


Bëngbe Bëtsa  
Cabëngaftaca  
Entsoyebuambna



New Testament in Camsá

# Bëngbe Bëtsa Cabëngaftaca Entsoyebuambna

## New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

### Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

---

PDF generated using Haiola and XeLaTeX on 21 Feb 2024 from source files dated 29 Jan 2022  
19104c0e-9046-5ff3-82fb-eb838c88dcf9

## Contents

San Mateo . . . . .	1
San Marcos . . . . .	50
San Lucas . . . . .	79
San Juan . . . . .	128
Hechos . . . . .	165
Romanos . . . . .	210
1 Corintios . . . . .	235
2 Corintios . . . . .	258
Gálatas . . . . .	274
Efesios . . . . .	283
Filipenses . . . . .	292
Colosenses . . . . .	298
1 Tesalonicenses . . . . .	304
2 Tesalonicenses . . . . .	309
1 Timoteo . . . . .	312
2 Timoteo . . . . .	319
Tito . . . . .	324
Filemón . . . . .	327
Hebreos . . . . .	329
Santiago . . . . .	349
1 San Pedro . . . . .	355
2 San Pedro . . . . .	362
1 San Juan . . . . .	366
2 San Juan . . . . .	372
3 San Juan . . . . .	373
San Judas . . . . .	374
Apocalipsis . . . . .	376

## San Mateo

*Jesusbe bēts taitanga*

*(Lc 3.23-38)*

<sup>1</sup> Quemēnga imnamna Jesucristbe bēts taitanga: Jesucristna Rey David y Abrahāmbentšana entšá inamna.

<sup>2-6</sup> Abraham yojamna Isaache taitá;

Isaacna Jacobēbe taitá

y Jacob, Judá y chabe catšátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabēbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaíbe taitá.

Isaí Rey Davidbe taitá;

David Salomonbe taitá y muabe mamá yojamna chē Uriásbe shema inamná.

<sup>7-11</sup> Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catšátangbe taitá yojamna.

Chē Babilonioca entšanga chē israelitēnga tmojánishēche y choca imojanētámēna ora, Josías chē básēnga yojánabamna.

<sup>12-16</sup> Ya Babilonioca ndutámenēnga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadoche taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;

Eleazar Matanbe taitá

y Matán Jacobēbe taitá.

Jacob Josebe taitá yojamna y Josena Mariybe boyá.

María Jesusbe mamá, Jesús chē Bēngbe Bētsabe Uámana Uabuayaná, chē Cristo ca uabainá.

<sup>17</sup> Chcasna, Abrahāmbentšana Davidbentscoñe bnétsana canta bēts pamíllanga imojéftsemna. Davidbentšana y chē israelitēnga Babilonioca imojanētamenēntscuana inye bnétsana canta bēts pamíllanga; y inye bnétsana canta bēts pamíllanga chē Israeloca entšanga imojanētamenentšana, chē Cristo tojanonýnántscōñe.

*Jesucristo tojanonýná*

*(Lc 2.1-7)*

<sup>18</sup> Jesucristo jónýnnamna mēntšá tojanopasá: María tbojansbuachená Joséftaca joboua-mayama, pero cabá ndoñe cánýiñe ibontsiyena ora, tojanopasá Mariyna ngomamaná yoyoquédá chē Uámana Espíritbe obenánaca. <sup>19</sup> José, Mariybe boyá, canye nyetsca soyēnguñe tšabá jamama bošá inamna. Cha ndoñe yontseboše entšangbe delante cha

mal jaquédana; chíyecna tojanjuabó nýe iytécana Mariybentsána jtsojuánañana. <sup>20</sup> Y chca yojtsejuabnantscuana, mo otjenayoquécá canýe Bèngbe Bètsabe ángel tbojáninýe y chana Josébíoye tbojaníyana: “José, Davídbentsána entsá, ndoñe matenócóchinýenana Mariáftaca jobouamayama, er chë bochántsebmoma šešona chë Uámana Espíritbe obenánaca cha bochántsebmoma. <sup>21</sup> María canýe šešona bochántsebmoma y cha Jesús ca cochjuabaye. Chca echantsabaina er cha chabe entsanga chëngbe bacna soyënguentsána echanjátsebacaye ca” —chë ángel tbojaníyana.

<sup>22</sup> Lempe chca tojanochñëngo, cachcá chaotsemnama ntšamo Bèngbe Bètsá chabe juabna oyeuambnayëngbiajana tojanayancá. Chë oyeuambnayá mëntšá tojánayana:

<sup>23</sup> Chë cabá boyabása nduabuatmá ngomamaná echanjoquéda

y canýe šešona boyabásetema bochántsebmoma,

y cha mochanjuabaye Emanuel ca.

(Emanuel endayana “Bèngbe Bètsá bëngaftaca ca”).

<sup>24</sup> José chë otjénayentsána tojanofsená ora, tojanma ntšamo chë Bèngbe Bètsabe ángel tbojanmandacá y Mariáftaca tojanobouamá. <sup>25</sup> Pero ndoñe cánýiñe ibontsaniyena, sinó nýe chë šešonatema tojanonýná orscana. Chë šešonatema tojanonýná orna, José chábiyoe Jesús ca tbojanabaye.

## 2

### *Reyes Magos Jesúsbiyoe tmojána*

<sup>1</sup> Herodes judiëngbe rey yojamna ora, canýe pueblo Judeoca, Belén ca uabáinentše Jesús tojanonýná. Chentsána, báseftanga, estrellënga uatsjëndayënga, magos ca uabáinënga, canýe bëts pueblöye Jerusalén ca uabáinoye tmojánashjajna. Chënga tmojánabo shinýe bocanoye luarëngocana. <sup>2</sup> Jerusalenocna chënga, Heródesbiyoe tmojána y tmojanënoticiá: “¿Ndayentše yojtsemna chë judiëngbe rey jtsemnama tojonýná cha ca? Bèngbe luarëngoca shinýe bocanoye chabe onýnana estrella fsëjinýe y as muentše cha jaboadórama tifjabo ca.”

<sup>3</sup> Rey Herodes chca tojanuena ora, corente yojtsenócóchinýena, y nýetsca chë Jerusalemntše oyenëngnaca. <sup>4</sup> Chentsána chë rey tojánachembo nýetsca chë judiëngbe bachnangbe amëndayënga y chë judiëngbe ley abuátambayënga jenoyeunayëngama. Mëntšá tojanatjá: —¿Ndayentše chë Bèngbe Bètsabe Uámana Uabuayaná, chë Cristo ca uabainá, jónýnama ibomna ca?

<sup>5</sup> Chënga tmojanjuá: —Judeoca, Belén pueblentše ca. Bayté entsemna chë Bèngbe Bètsabe juabna oyeuambnayá Miqueas mëntšá tojánábema:

<sup>6</sup> Y tsëngaftanga, Judeoca Belenentše oyenënga, canýe mandayá tsëngaftangbentsána echanjabo.

Cha nýetsca chë Judeoca mándayëngbiamá más uamaná echántsemna, y atšbe entsanga Israeloca echántsanyëna.

Chíyeca tsëngaftangbe pueblo ndoñe nýe batšá uámana pueblo quenátsmëna ca.

<sup>7</sup> Chora Herodes iytécana chë maguënga tojánachembo y cuedádoca tojanatjá ntseco ora chë estrella tmojáninýama. <sup>8</sup> Herodes chë soyënga yojtsetátšëmbo ora, Belenoye chë maguënga tojanichamó, y mëntšá tojanéyana: “Choye motsajna y tsabá chë šešona šmochjánguango. Chašmojinýena ora, šmochjabëuenaye, as átsnaca chayobená jama chë šešona jadórama ca.”

<sup>9</sup> Rey Herodes chë soyënga tojánëyanentsána, chë maguënga tmojtsatanoñe. Chora cachiñe tmojtaninýe chë chëngbe luarëngoca tmojáninýe estrella y yojtsanebnatsana chë šešona yojtsemnëntscoñe. Chentsa juatsbuacá chë estrella yojójayiye. <sup>10</sup> Chë maguënga chë estrella tmojáninýe orna, corente oyejuayënga imojtsemna. <sup>11</sup> Chë yebnoye tmojánamashjna ora, chë šešona tmojáninýe chabe mamá Mariáftaca. Chorna, tmojanoshamentsé y chë šešonatema tmojanadorá. Chora chëngbe cajontémënga tmojanëtsécaca y tojanatštá castellano, incienso y canýe botamana uangüetše soye, mirra ca uabáiniye. <sup>12</sup> Chentsána, mo canýe otjenayoquécá Bèngbe Bètsá chë maguënga tojanabuayená rey Herodesbiajana ndoñe chamondesshëcuanama. As chënga chentsána inýe benachëjana cachëngbe luarëngoye tmojësanshëcuana.

### *Egiptó luaroye tmojtsanachá*

<sup>13</sup> Chë maguënga tmojtsatanoñe ora, otjénayoca José canýe Bèngbe Bètsabe ángelbiyoe tbojáninýe y cha mëntšá tbojaníyana: “Motsbaná, chë šešonatema y chabe mamá mesëbiatše y Egiptoye motsachá. Herodes chë šešonatema bochanjánguango jtsóbama, chíyeca choca cochtsoquedañe atše chachochjábuayenantscuana ca.”

<sup>14</sup> As José tojantsbaná, chë šešonatema y chabe mamá tojesanëbiatše y ibeta Egiptó benache tojëftsanbocna. <sup>15</sup> Y choca imojtsanomñe Herodes tojanóbanëntscuana. Chca

tojanopasá, cachcá chaotsemnama ntšamo Běngbe Bětsá chabe juabna oyebuambnayabi-ajana tojanayancá. Chě oyebuambnayá mēntšá tojánayana: “Egiptocana atšbe uaquiñá sēnjanchembo ca.”

*Herodes tojanmandá basetémēnga jtsěbáyama*

<sup>16</sup> Chě maguēnga tmojtsaningñema Herodes tojántatšēmbona ora, puerte tbojánētna, y tojanmandá lempe jtsěbáyama base boyabāsetemēnga uta uata bomnēnga y cabá uta uata ndbomnēnga, Belén y chě juachañe pueblēnguentšēnga. Uta uatama cha tojanjuabó, er uta uata yojtsemna chě maguēnga chě estrella tmojáninýama. <sup>17</sup> Ntšamo chě Běngbe Bětsabe juabna oyebuambnayá Jeremías tojanoyebuambacá, cachcá tojanochnēngo:

<sup>18</sup> Ramá ca uabaina pueblentse canýe oyebuambnayana tmojanuena, ngmēnaca ošachiyana y becá tsetšanánaca oyebuambnayana.

Raquel yojamna chabe básengbama ošachiyiñe, pero ndoñe yontseboše chamuatebiajuama, chabe básēnga ya obanēnga causa ca —cha tojanábema.

<sup>19</sup> José cabá Egiptoca yojtsomñe ora, Herodes tojanóbana. Chentšana, otjénayoca José canýe Běngbe Bětsabe ángelbioye tbojáninýe y cha mēntšá tbojaninyana: <sup>20</sup> “Motsbaná, chě šešonatema y chabe mamá mesěbiatše y Israeloye cochtá. Chě šešonatema jóbama bošēnga ya obanēnga montsemna ca.”

<sup>21</sup> As José tojantsbaná y chě šešonatema y chabe mamá Israel luaroye tojtésanēbiatše. <sup>22</sup> Arquelao Judeoca yojanmánda chabe taitá Heródesbe cuentiñe, y José chca tojántatšēmbona orna, yojtsauatja choye jama. Pero otjénayoca Běngbe Bětsá Josébioye tbojanbuayená; chíyeca Josena Galilea ca uabaina luaroye tojána. <sup>23</sup> Choye tojánashjango ora, José tojána canýe pueblo Nazaret ca uabáinoye chentše joyénanama. Chca tojanochnēngo cachcá chaotsemnama ntšamo chě Běngbe Bětsabe juabna oyebuambnayēnga tmojanayancá. Chēnga tmojánayana: “Nazaretocá ca Jesús mochantsábobaina ca.”

### 3

*Juan chě Ubayaná entsānga yojanabuayiyná*  
(Mc 1.1-8; Lc 3.1-9, 15-17; Jn 1.19-28)

<sup>1</sup> Chě tempo, Juan chě Ubayaná, entsānga ndoyena luaroye Judeoca tojánbocna, Běngbe Bětsabe soyēngama jábuayenama. <sup>2</sup> Mēntšá cha yojanětsētsnaye: “Běngbe Bětsabe amēndayana ya echanjōshjango. Ngmēnaca smochtēnojuaoboye tsēngaftangbe bacna soyēngama y chca amana smochtsajbaná y Běngbe Bětsabe benache smochtishache ca.”

<sup>3</sup> Juan yojamna canýa ndabiama chě Běngbe Bětsabe juabna oyebuambnayá Isaías mēntšá tojánayana:

Entsānga ndoyena luaroca canýa enduáyebuache:

“Běngbe Utabná echanjabo ca;

mo nda canýe benache tojtseprontacá canýe uámāna entsá jashjanguama,

tsēngaftāngnaca cachcá, Běngbe Utabná jabama ainaniñe tsabe juabnēngaca smochtseprontana ca” —cha tojánayana.

<sup>4</sup> Juanbe entsáyá inauapormana camellbe stjēnasheca y bobache yojanasnana. Cha inasaye chapulinatēmēnga y tjoca tjouangbe méloye. <sup>5</sup> Jerusalenoca entsānga, nyētsca Judea luarentša entsānga y chě Jordán ca uabaina bėjaye béconana oyenēnga imojánbocana Juan joyeunayama. <sup>6</sup> Běngbe Bětsábioye chēngbe bacna soyēngama jaimpáda chentšana, Juan chě Jordán bėjayiñe chēnga yojanēbáyana.

<sup>7</sup> Pero Juan tojáninýe ba fariseunga y saduceunga cha chaubáyama tmojánama. Chēnga imojamna chě judiēngbeñe uánatsanēnga Běngbe Bětsá ndoñe corente ntseyeunanama; as chora tojanéyana: “¡Mětscuaye entsānga! ¿Nda tcmēnjáuyana chě echanjōshjango uabouana castigüēntsana smochjotsbocá ca? <sup>8</sup> Běngbe Bětsábeñe ndegombre ošbuáchiyēnga smochtsemna, as chca chaotsinýna chě bacna soyēnga amana tsēngaftanga ndegombre smojtsajbanama. <sup>9</sup> Y ndoñe smattsejuabnaye cach tsēngaftangbama jayanama: ‘Abrahám bēntšana entsānga fsēndmēna ca’. Er atše scuayana, Běngbe Bětsá quem ndětsbēngacnaca Abrahám bēntšana entsānga nanjábiamā. <sup>10</sup> Chě tatšniá ya entsaprontana chě betiyeshēnga tbētējēngocana jtseshatětsetsama. Ndaye betiye ndoñe tontseshajo, jtseshatětšana y iñoye jtsatmetšana. Tsēngaftangftācnaca cachcá, tsabe soyēnga ndoñe smontsamēse, Běngbe Bětsá cmochanjácastigaye.

<sup>11</sup> “Ndegombre, atšna bėjayeca cbondubáyana Běngbe Bětsabe benache chašmuatishachama. Pero chě atšbe ústonoye echanjabá, atšbiama más obenana bomná comna, y atše mercedo taitsatobuajoñe ni mo chabe shecochětjonēshe jtsámabñama. Chě chabe benache aifñe chamojtishachēngbama Běngbe Bětsá echanjama chě echanjabábeyeca,

chê Uámana Espíritu chëngbe ainaniñe cháumashënguama. Pero chë benache ndoñe chamontishachëngbiama, Bëngbe Bëtsá echanjama chë echanjabábeyeca, corente castigánënga chamotsemnama, mo ñeshëquécá. <sup>12</sup> Canye entsá chabe mëtstä cucuatshiñe jiyëbana, chabe trigo jtsóbobemana y chë ndoserverna shácuanënga jtsejashtsëtsana. Chabe trigo chë grano uaquëcñaye tsañe jtsabuájuana, y chë ndoserverna shácuanëngna ñfoye jtsatmetšana. Cachá, chë atšbe ústonoye echanjabana, chë tsabe entsanga echanjúbua, y chë bacna entsangna canye ñfeshiñe echantsacastígaye, y chë ñe ndocna te queochátsfsana ca” —cha tojanëyana.

*Juan, Jesúsbiye tbojanabaye*

*(Mc 1.9-11; Lc 3.21-22)*

<sup>13</sup> As Jesús, Galileocana tojána Jordán béjayoye, Juan yojtsemnoye, cha chabuábayama. <sup>14</sup> Pero Juan ndoñe yontseboše Jesús juabáyama, y mëntsá tbojaníyana: —Atše sontsemna aca chašcuabaye, y ¿más atše aca chochjuabaye ca?

<sup>15</sup> Chora Jesús tbojanjá: —Morna chca chaotsemna. Entsemna lempe ntšamo Bëngbe Bëtsá tojamandacá jobedësana ca.

As Juan yojouena Jesús juabáyama. <sup>16</sup> Jesús ya uabainá yojtsemna ora, chë buyeshoicana tojtanshëbéocna. Chorna Jesús tsbanánoye yojntješiye y tojáninye chë celoca atëfñiñe y chë Uámana Espíritu mo canye palomatemcá chábíoye yojtsastajuana. <sup>17</sup> Chora celocana Bëngbe Bëtsá mëntsá tojánayana: “Mua atšbe bonshana uaquíñá endmëna. Chabíama corente sëntsoyejuá ca.”

## 4

*Jesús tojanobená Satanás jayëñjanama*

*(Mc 1.12-13; Lc 4.1-13)*

<sup>1</sup> Chentšana chë Uámana Espíritu entsanga ndoyena luaroye Jesús tbojanánatse, as Satanás chauábama cha jisháchichíyama.

<sup>2</sup> Chentše canta bnëtsana te y canta bnëtsana ibeta ntjascá tbojanjëtana; chíyeca chora tbojaneshëtsena. <sup>3</sup> As Satanás tbojanobobeconá y tbojaníyana: —Aca ndegombre Bëngbe Bëtsabe Uaquíñá tcomñë, momandá quem ndëtsbenga tandëse chaobiama ca.

<sup>4</sup> Pero Jesús tbojanjá: —Bëngbe Bëtsabe uabemana palabrënguñe mëntsá endayana: “Entsá nye tandëseca ndoñe vida ntsebmomana, sinó entsá endobena jtsiyenana lempe ntšamo Bëngbe Bëtsá tojayancá tbojtseyeunanëse ca.”

<sup>5</sup> Chentšana Satanás, Jerusalén, chë uámana bëts pueblo ca uabáinoye Jesús tbojanánatse, y chë Bëngbe Bëtsabe bëts yebnentše chë más tsbanánoca tbojanatsá. <sup>6</sup> Chentše Satanás mëntsá tbojaníyana: —Aca ndegombre Bëngbe Bëtsabe Uaquíñá tcomñë, muentšana fshantsoye montsëñja, er Bëngbe Bëtsabe uabemana palabrënguñe endayana: Bëngbe Bëtsá chabe angelënga echanjichamuá, chacmotsinýenama.

Chënga buacuatsëngaca cmochanjishache, shecuatše ndëtsbeñe ndocá chacondomama ca —cha tbojaníyana.

<sup>7</sup> Chora Jesús tbojanjá: —Cach Bëngbe Bëtsabe uabemana palabrënguñe mëntsá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

<sup>8</sup> Cabana, Satanás tbojanánatse canye bëts tjoye y betso nyetsca quem luarentša amëndayëngbenache y chentša nyetsca uámana soyënga Jesúsbiye tbojaninýinýe. <sup>9</sup> As Satanás tbojaníyana: —Aca chacojshëntsamentšë y chašcojadorase, lempe chë soyënga chochjatšaye ca.

<sup>10</sup> Y Jesús tbojanjá: —¡Satanás, átšbentšana mojuaná! Bëngbe Bëtsabe uabemana palabrënguñe mëntsá endayana: “Bëngbe Bëtsá cochtsadorana y nye cha cochtseserverna ca.”

<sup>11</sup> As Satanás cachcá tbojanonýá. Cachora Bëngbe Bëtsábíocana angelotëmënga tmojánabo Jesús jtseservënama.

*Jesús tojanontsé Galileoca chabe trabajo jamana*

*(Mc 1.14-15; Lc 4.14-15)*

<sup>12</sup> Juan chë Ubayaná cárceloye tmojanëtámíama Jesús tojanuena ora, Galilea luaroye cha tojtaná. <sup>13</sup> Pero ndoñe tonjanoquedá Nazaret pueblentše, sinó Capernaumoca, uafjajónaye tsachañe; choye tojána joyënanama, chë uámana bëts taitata Zabulón y Neftalibe luaríñe.

<sup>14</sup> Chca tojanochnëngo, cachcá chaotsemnama ntšamo chë Bëngbe Bëtsabe juabna oye-buambnayá Isaías tojanayancá. Isaías tojánayana:

<sup>15</sup> Zabulón y Neftalibe luare, Jordán béjaye chenguánoica, uafjajónaye tsachañe;

Galilea luaríñe, ndoñe judío entsanga oyenentše.

<sup>16</sup> Chë mo ibetiñe cuaftsiyencá imojoyena entsanga, Bëngbe Bëtsabe soyënga nduabuatma causa, tmojinýe canya entsangbe juabnënga binýnayá.

Chë chëngbe juabnënga binjñayá entsebuashinjñyana chë Bëngbe Bëtsábioye nduabu-atmëngbiamá,  
y chë causa chabiamá imomna mo obanëngcá, ndoñe binjñiñe jtsiyenëse ca —cha to-  
janábema.

<sup>17</sup> Cach orscana Jesús tojanontsé entsanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboje tšëngaftangbe bacna soyëngama y chca amana smochtsajbaná ca.”

*Jesús tojánachembo canta boyabásenga beonga ashebuánayënga cha chamuastama*  
(Mc 1.16-20; Lc 5.1-11)

<sup>18</sup> Canje te, Jesús chë Galilea uafjájónaye tsachajana yojtsaye y ndeolpe uta boyabásata tojanje: canya yojamna Simón, chë Pedro cánaca uabainá, y chabe uabentsá Andrés. Chatna atarraiešhangá ibnetsashbuétsetšaňe, er beonga ashebuánayata ibnamna. <sup>19</sup> Jesús tojanëyana: “Atseftaca mabata; atše cbochanjábiamá Bëngbe Bëtsabiamá entsanga anguyata, y morscana nye beonga ashebuánayata ya ndoñe quešochátsmëna ca.” <sup>20</sup> Cachora chatbe atarraiešhangá cachcá tbojesanaboshjuana y Jesús tmojanasto.

<sup>21</sup> Y más chcoye, Jesús inje uta catšátata tojánanye: Santiago y Juan, chë Zebedeobe uaqüñata. Chata ibojtsomñe canje barquëshañe, chatbe taitáftaca, chëngbe atarraiešhangá atapórmayañe. Jesús tojánachembo, <sup>22</sup> y cachora chë barquëshata tbojesanaboshjona, chë taitá cachentše imojëseboshjona y Jesús tmojanasto.

*Jesús ba entsanga yojanabuatambá y yojánashnaye*  
(Lc 6.17-19)

<sup>23</sup> Jesús nyets Galilea luarëjana yojánana, chentše judiëngbe enefjuana yebnënguenache abuatambaye. Chë tšabe noticiënga Bëngbe Bëtsabe amëndayama entsanga yojanabuayinýa y nyetsca šocanëngama y tsetšanëngama yojánashnaye. <sup>24</sup> Nyets Siria luarëjana entsanga cha imojtsebáyana. As entsanga nyetsca šocana bomnënga Jesúsbioye imojtsënachaye: šoquënga y tsetšanana bomnënga, bacna bayëjbe juabna uambayënga, ataque ošáhichichanënga y jama ndobenënga. Jesús nyetscanga yojánashnaye.

<sup>25</sup> Mallajta entsanga Galileocana, Decápolis luarocana, Jerusalenocana, Judeocana y chë Jordán bëjaye chenguanoicana Jesús imojústona.

## 5

*Ndayá Jesús tjoca tojanabuatambá*

<sup>1</sup> Jesús chë mallajta entsanga tojánanye ora, batsjoye tojántsjua y tojanótbema. Chabe ústonënga tmojanobobeconá y <sup>2</sup> Jesús tojanontsé mëntšá jabuatambana:

*Ndëmuanyënga imomna chë ndegombre oyejuayana bomnënga*  
(Lc 6.20-23)

<sup>3</sup> “Puerte oyejuayënga mochántsemna chë Bëngbe Bëtsabe soyënga tša imuajaboto ca juab-nayënga. Chca entsanga mochántsemna chë Bëngbe Bëtsabe amëndayoca mochtsiyenënga.

<sup>4</sup> “Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

<sup>5</sup> “Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soyca quem luare mochanjójyëngacñe.

<sup>6</sup> “Puerte oyejuayënga mochántsemna chë nyetsca soyënguñe tšabá jamama bošënga. Chëngbe bošana entsemna mo chë ošhëntsiyá y uajuëndayabe bošancá. Chë nyetsca soyënguñe tšabá jamama bošënga mochanjobenaye jëftsinýana lempe ntšamo tmojtse-bošcá.

<sup>7</sup> “Puerte oyejuayënga mochántsemna chë inyëngbiamá ongmiayënga, er Bëngbe Bëtsá chëngbiamá bochanjóngmia.

<sup>8</sup> “Puerte oyejuayënga mochántsemna chë nye tšabe juabnënga ainaniñe bomnënga; chënga Bëngbe Bëtsá mochanjinje.

<sup>9</sup> “Puerte oyejuayënga mochántsemna chë nyetscanga natjëmbana chamotsiyenama amënga, er chënga Bëngbe Bëtsabe básenga ca mochantsabaina.

<sup>10</sup> “Puerte oyejuayënga mochántsemna chë inyënga tmojama chamotsesufrínënga, ntšamo Bëngbe Bëtsá yobošcá bëtšamama; chca entsanga mochántsemna chë Bëngbe Bëtsabe amëndayoca mochtsiyenënga.

<sup>11</sup> “Puerte oyejuayënga tšëngaftanga šmochtsemna, entsanga chacmojoyánguango y chac-mojtsécamena ora y nyetscna soyëngaca chacmojtšëbuayatsenaye ora, atšbe ústonënga bëtsemnama. <sup>12</sup> Móyejuanga, puerta móyejuanga, tšëngaftanga celoca becá šmochanjójyëngacñe.



Er ntšamo entšanga tsěngaftanga cměcamena, cachcá chě Běngbe Bětsabe juabna oyeubuamb-nayěngbioye, chě tsěngaftangbe natsana monjanieněngbioye entšanga monjaněcamena ca” —Jesús tojánayana.

*Ošbuáchiyěnga jtsemnana mo tamocá y binjñayěnga quem luarentša entsangbiam*  
(Mc 9.50; Lc 14.34-35)

<sup>13</sup> “Tsěngaftanga, quem luarentša entšanga jtsějabuáchaněse šmojtsiyena, Běngbe Bětsabe soyěnga chamotsetatsěmbuama, as chěngbiam šmochántsemna mo chě měntšena ndoñe chaondóndbemama tcojatboto tamocá. Pero chě tamó ftěnana tojtsóbeměse, ndoñe ntšopodénana tempcá sanana cachiñe jtětménana. Chca, ya tondayama ntšoservénana; chiyea chě tamó tsáshenoye jtsětsenana y entšanga jtsebotájayana.

<sup>14</sup> “Tsěngaftanga, ntšamo tsábá yomncá šmojtsiyeněse, as quem luarentša entsangbiam šmochántsemna mo chě ibetiñe tojtsěbínjña soyca. Canye běts pueblo batsjo juats-buañe tomněse, ndoñe ntšopodénana iytěmencá jtsemnama. <sup>15</sup> Canye uajuinjaněsha tcojuajuinjen ora, ndoñe cajoněshe tajsoye jtsabuájua, sinó tsbanánoca juajájua, chca, nyetsca entšanga chě yebnentě tmojtsemněngbiam chaotsebínjñama. <sup>16</sup> Cachcá tsěngaftanga, entsangbe delante mo binjñayěngcá šmochtsemna, as chěnga tsěngaftanga tsabe soyěnga šmuamama chamuinjñama, y chca, chěnga chamuinjñanyě chě Taitá, Běngbe Bětsá celoca endmėná, corente uamaná y obená bětsemnama ca” —Jesús tojánayana.

*Chě Moisesbe leyama Jesús tojanabuatambá*

<sup>17</sup> “Ndoñe šmattsejuabnaye, ntšamo Moisesbe leyíñe iuayancá y chě Běngbe Bětsabe juabna oyeubuambnayěnga tmojanayancá jabětsepochochama atše tijabo ca. Atše ndoñe chiyátabo chě soyěnga jabětsepochochama, sinó jabábuayenama ndayá chě soyěnga ndegombre bėtsayanama. <sup>18</sup> Ndegombre šcuayana: Celoca y quem luare chaojěftsemnėntscuana, ndocná queochatobenaye ni canye punto, ni canye letra chě leyěnguentsana jtsejuánana, lempe ntšamo jochněnguama yomncá chaojtsemnėntscuana. <sup>19</sup> Chiyea, nda nje mo canye mando chě leyěnguiñe ndoñe tonjoyeuná cha, masque nje base soye chě mando tojtsemna, y chě injěnga cachcá tojtsabuatambá, cha Běngbe Bětsabe amėndayoca chě más nduamaná echántsemna. Pero ndėmuinjěnga tmojtsama ntšamo Běngbe Bětsá tojamėndacá y chě injěnga cachcá chamotsamama tmojtsabuatambase, chěnga Běngbe Bětsabe amėndayoca uámaněnga mochántsemna. <sup>20</sup> Chě soyěngamna měntšá šcuayana: Tsěngaftanga chě ley abuátambayěnga y fariseúngbioye ndoñe šmontsayėnjanase, jtsamama ntšamo Běngbe Bětsá tcmojamėndacá, ndocna te Běngbe Bětsabe amėndayoye quešmochátamashjna.

*Ndayá chě injěngaftaca tbojetnama Jesús tojanabuatambá*

<sup>21</sup> “Tsěngaftanga šmojouena ntšamo Běngbe Bětsá tsěngaftangbe běts taitanga tojanamėndacá: ‘Ndoñe catjóbca. Chca ochjajnáyá bontsemna jobuambayana chě entsangbiam tsábá o ndoñe tsábá tmonjamama endbayanabe delante, ndáyeca chca ca.’ <sup>22</sup> Pero atše šcuayana, nda cachabe catšátaftaca tbojetna, chánaca bontsemna jobuambayana chě entsangbiam tsábá o ndoñe tsábá tmonjamama endbayanabe delante, ndáyeca chca ca. Nda cachabe catšátbioye puerta tojtsábboyěnja, cha bontsemna chě Sanedrín ca uabaina mándayěngbe delante jobuambayana ndáyeca chca ca; y nda cachabe catšatbiama opjema ca tojayana, ntšamo cha bėtsamama, cha bontsemna chě infiernoca iněshoye jama.

<sup>23</sup> “Chíyeca, nderado ndayá Běngbe Bětsabe běts yebnoye tcojuamba Běngbe Bětsá jětschuayama y chora tcojenojuabó acbe catšata ácaftaca etonaná yojtsemna ca, <sup>24</sup> as chě tcojiyěbo soye chě altarentša natsanoica cochjěsebošhjna, cochtá y acbe catšátaftaca cochtenoyántsia. Chentšana cocayé altaroye cochjá y chě tcojuamba sóyeca Běngbe Bětsá cochjětschuaye.

<sup>25</sup> “Nderado nda tcmojademanda y cabildoye jotsánama cmojtsemna, cabá choye ndáshjango ora, betso cháftaca cochtenoyántsia. Chca ndóñese, chě demandáyá mandádbioye cmochanjúshjango, chě mandado josticiěngbe cucuatšíñe cmochanjáboshjna y chěnga cárceloye cmochanjutame. <sup>26</sup> Ndegombre cběyana: Chentšana ndoñe quecochtětsbocna lempe candesopagantscuana ca” —Jesús tojánayana.

*Chě boyá o shėmbioye injñaftaca ingñayama Jesús tojanabuatambá*

<sup>27</sup> “Tsěngaftanga šmojouena ntšamo Běngbe Bětsá tojanmandacá: ‘Acbe boyá o acbe shėmbioye injñaftaca ndoñe catjaingña.’ <sup>28</sup> Pero atše cběyana: Nderado canye boyabása ndėmuanyě shėmbásabioye tbojinjy y tojajuabó ‘malaye cha ca’, chě boyabása chca tojajuabose, ainanoca ya chě inje shėmbásaftaca cachabe shėmbioye tbojtseingñe.

<sup>29</sup> “Chíyeca, nderado acbe catšbioica bomínjyca bacna soye tcojinjy y cachca soye tcojaměse, más tsábá nántsemna chě bomínjy cochtsenobuchjatsěca y cochtsětsena. Nyets cuerpo jtsebojnana y lėmpeca infiernoye jama chacmotsětsenamna, acbiam más tsábá

nántsemna n̄ye can̄ye soye acbe cuerpentšana chacoperdé. <sup>30</sup> Nderado acbe catšbioica cucuatšeca bacna soye tcojamése, más tšabá nántsemna ch̄e cucuatše cochtsenástjango y cochtsétšena. N̄yets cuerpo jtsebm̄nana y lémpeca infiernoye chacmotsétšenamna, achiamá más tšabá nántsemna n̄ye can̄ye soye acbe cuerpentšana chacoperdé ca” —Jesús tojánayana.

*Ch̄e bouamnata en̄ēšanama Jesús tojanabuatambá*  
(Mt 19.9; Mc 10.11-12; Lc 16.18)

<sup>31</sup> “M̄entšanaca leyiñe enduábemana: ‘N̄d̄emuan̄ye boyá chabe shémaftaca tbojtsen̄tšena, ch̄e boyá bontsemna chabe shema can̄ye tsbuanácha juiyiyana, ndayēchañe chaotsayana cha ya ndoñe chabe shema yontsemna ca.’ <sup>32</sup> Pero atše cb̄eyana: Nda chabe shémaftaca tbojtsen̄tšena y chca tojopasá ndoñe ch̄e shema in̄yáftaca t̄bontseingñe causa, as ch̄e boyá jtsamana cha chabotseingñema, ch̄e shema in̄yáftaca tojtóbouamase. Y nda ch̄e útšena shémaftaca tojtobouamá, chana can̄ye uabuatmá jtsebm̄nana, y chca, ch̄e ts̄em boyánaca can̄ye bacna soye jamana ca” —Jesús tojánayana.

*Ch̄e entsanga júrayama Jesús tojanabuatambá*

<sup>33</sup> “Ts̄ēngaftanga šmojouena ntšamo ts̄ēngaftangbe b̄ets taitángbiroye tmojan̄eyancá: ‘Nderado tojayana: De Dios ch̄e soye chanjama ca; ojal ch̄e soye ndoñe catjama ca.’ <sup>34</sup> Pero atše cb̄eyana: Tondayama šmattsejúr̄aye; ni celocama, er choca B̄ēngbe B̄etsabe t̄bemaniñe endm̄ēna. <sup>35</sup> Ni quem luarama, er B̄ēngbe B̄etsabiamá mo ts̄en̄t̄emcá endm̄ēna, chiñe chabe shecuatšēnga jacayama; ni Jerusalenama, er ch̄e pueblo endm̄ēna B̄ēngbe B̄etsá ch̄e B̄ets Reybe b̄ets pueblo. <sup>36</sup> Ni ts̄ēngaftangbe bestšašama cach ndoñe, er ts̄ēngaftanga ndoñe quešmátobena ni mo can̄ye stj̄enashe ftsenguēshe o f̄jants̄eshe jabemana. <sup>37</sup> Ts̄ēngaftanga aĩñe ca jayanama šmojtseboš̄ese, n̄ye aĩñe ca šmochjayana, y ndoñe casna n̄ye ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

*Ch̄e entsanga mondb̄atenachn̄enguama Jesús tojanabuatambá*  
(Lc 6.29-30)

<sup>38</sup> “Ts̄ēngaftanga šmojouena ntšamo ts̄ēngaftangbe b̄ets taitángbiroye tmojan̄eyancá: ‘Nderado nda tcmojtsebuchjats̄eca, ácnaca derecho contsebm̄na can̄yeb̄e cha j̄etsbuchjats̄ecama ca; y nderado nda can̄ye juats̄aše tcmojts̄ásiye, ácnaca derecho contsebm̄na can̄ȳese cha jts̄iyama ca.’ <sup>39</sup> Pero atše cb̄eyana: Ndoñe matsbošana ch̄e ndayánaca tcmojaborlábroye jtachn̄enguama; chamna, ndánaca catšbioica tcmojajuebjant̄etase, cochjomiye ch̄e in̄yoiaca cachcá chacmomama. <sup>40</sup> Nderado nda tcmojademanda y tojtseboše acbe shabuan-guan̄jua jtsabocñama, cha molesenciá acbe qūes̄aíyanaca chauetsácñama. <sup>41</sup> Nderado nda tcmojuas̄má y tcmojamandá bn̄etsana cuadroca juyambama, in̄ye bn̄etsana cuadro cochjuyamba. <sup>42</sup> Nda ndaye soye tcmojotjañ̄ese, cochjats̄taye; y nda ndaye soye tcmojuat̄jase, cha ndoñe st̄ets̄oye catjaqūeda ca” —Jesús tojánayana.

*Ch̄e uayaȳēngbiama bonsh̄ánana jtsebm̄nana*  
(Lc 6.27-28, 32-36)

<sup>43</sup> “Ts̄ēngaftanga šmojouena ntšamo ts̄ēngaftangbe b̄ets taitángbiroye tmojan̄eyancá: ‘Acbe amigo cochtsebobonshana y acbe uayayá cochtsaboȳenja ca.’ <sup>44</sup> Pero atše cb̄eyana: Ts̄ēngaftangbe uayaȳēnga šmochsababuán̄yeshana, y ch̄e cm̄ecamen̄ēngbiama B̄ēngbe B̄etsá šmochtseimpadana. <sup>45</sup> Chca ts̄ēngaftanga, ch̄e Taitá, B̄ēngbe B̄etsá, ch̄e celoca endm̄ēnabe básēnga šmochántsemna; B̄ēngbe B̄etsá endb̄etsama ts̄abe y bacna ent̄sángbeñe chabe shin̄ye chaotsebin̄yayama, y endb̄etsama ch̄e n̄yetsca soȳēnguiñe tšabá jamama boš̄ēnga y ndoñe chca ent̄sángbeñe chauaftema. <sup>46</sup> Ts̄ēngaftanga n̄ye ch̄e ts̄ēngaftanga tcmojtsababuán̄yeshanēnga šmojt̄sababuán̄yeshan̄ese, ¿B̄ēngbe B̄etsábiocana ndayá šmochjuacaná? Romocama crocénana ent̄sángbiroye atjanayēngnaca chca monduamana. <sup>47</sup> Y n̄ye ch̄e amiguēngbiroye šmojtsacheuanase, ¿ndaye b̄ets soye šmojtsama? Ch̄e ndoñe judiēngnaca chca mondb̄etsama. <sup>48</sup> Ts̄ēngaftangbe Taitá, B̄ēngbe B̄etsá celoca endm̄ēná, n̄yetsca ts̄abe soȳēnga bomná y amá endm̄ēna. Ts̄ēngaftángnaca cachcá šmochtsemna ca” —Jesús tojánayana.

## 6

*Jesús tojanabuatambá ntšamo ts̄abe soȳēnga in̄yēngbiama jamana*

<sup>1</sup> “Cuedado šmochtsebm̄na ndoñe ntšamama ent̄sángbeñe ts̄ēngaftangbe ts̄abe soȳēnga, n̄ye chēnga chca chamuin̄yama. Chca šmojamése, ts̄ēngaftangbe Taitá, B̄ēngbe B̄etsá, celoca endm̄ēná ndocna uacanana soye quecmocht̄t̄at̄sataye.

<sup>2</sup> “Chcasna, nderado nda caridá tcojábem̄ese, chca ndoñe šmatjama ch̄e ntšamo šmojtsamama n̄yetscanga chamotsetat̄šēmbuama, mo can̄ye trompet̄f̄jua cuaf̄tsaj̄at̄ēncá, ch̄e caridá šmojábemama chaotsót̄at̄šēmbuama; chca monduamana ch̄e bacna

entsanga chë ntšamo ndegombre tmojuabnacá ndinýinýayënga, chë judiëngbe enefjuana yebnënguenache y tsáshenafne. Ndegombre chëyana, chë chca amënga ya chëngbe uacanana soye tmojóyëngacñe, ntšamo chënga tmojamama entsanga tsábá chëngbiana tmojtsoyebuambná ora. <sup>3</sup> Chcasna, nda caridá tcojábema ora, ndocná más chaondëtsetatsëmbo, mo chë uañicuayoica cucuatše ndoñe queondbatstatšëmbcá ndayá chë catšbioica cucuatše tojtsamama, <sup>4</sup> chca, acbe caridá iytécana chaotsemnama. As, tsëngaftangbe Taitá, nda bominýe endbëtsequëcjnaye chë iytëmená tcojtsama soye, acbe uacanana soye cmochántatšaye ca” —Jesús tojánayana.

*Jesús tojanabuatambá ntšamo Bëngbe Bëtsáftaca jencuéntana*  
(Lc 11.2-4)

<sup>5</sup> “Bëngbe Bëtsáftaca šmojtsencuénta ora, ndoñe šmattsama chë bacna entsanga ntšamo ndegombre tmojuabnacá ndinýinýayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuéntayana, chca, nýe entsanga chë soye chamuinýama. Ndegombre šcuayana: chënga nýe morscama ya montsábouacaná, chënga tsábá imojtsama ca entsanga tmojayana ora. <sup>6</sup> Pero aca Bëngbe Bëtsáftaca jencuéntama orna, acbe tsoye cochtamáshëngo, bësása cochtatame y cháftaca cochjencuénta. Chánaca chë iytëmenentše ácaftaca echántsemna. Bëngbe Taitá lempe bominýe endetsequëcjná, masque cánýenga šmojtsemna ora šmojtsama soyëngnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatšaye.

<sup>7</sup> “Bëngbe Bëtsáftaca šmojtsencuénta ora, ndoñe nýe cachcá ndoservena palabrenga ba soye šmattsichamo. Chca mondbëtsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámësna, Bëngbe Bëtsá chënga más yochjóyaunaye ca. <sup>8</sup> Ndoñe chëngcá šmatsemna. Cabá nduyana ora, Bëngbe Bëtsá ya jtsetatšëmbuana ntšamo tsëngaftanga cmojtsëjabotcá. <sup>9</sup> Chamna tsëngaftanga mëntšá cmontsétocana Bëngbe Bëtsáftaca jencuéntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

<sup>10</sup> Acbe amëndayana chaóshjango.

Celoca yojtsemna ntšamo icobošcá;  
quem luariñnaca cachcá chaotsemna.

<sup>11</sup> Ménté šmiyatšatá cada te šnetsëjaboto tandëse.

<sup>12</sup> Bacna soyënga bënga fsënjama: šmotsaperdónaye;

cachcá ntšamo chë bëngbiana bacna soyënga amënga fsëndbetsaperdonaycá.

<sup>13</sup> Bacna soyënga jamama šojcöchëngo ora, šcochjuyabuache chca ndenobuíyama.

Nýetsca bacna soyënguentšana šmatsebacye.

<sup>14</sup> “Chë tsëngaftangbiana bacna soyënga amënga šmojtsaperdónasna, Bëngbe Taitá chë celoca endëtsomñá, tsëngaftanga cmochanjáperdonaye. <sup>15</sup> Pero chë tsëngaftangbiana bacna soyënga amënga ndoñe šmontsaperdónasna, Bëngbe Taitá cachcá, tsëngaftanga ndoñe quemochátaperdonaye ca” —Jesús tojánayana.

*Chë Bëngbe Bëtsáftaca jencuéntama tondaye ntjascá*

<sup>16</sup> “Y nderado tsëngaftanga inýe ora tondaye ntjascá šmojtsemna Bëngbe Bëtsáftaca jencuéntama, juebëngménënga ndoñe šmatsemna, ntšamo chë bacna entsanga chë ndegombre tmojuabnacá ndinýinýayënga mondbetsamcá, as chca, chënga imojtsayúnama entsanga chamuinýama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entsanga tsábá chëngbiana tmojtsoyebuambná ora. <sup>17</sup> Aca nderado tcojtsayúna ora, cochtsojuejbabebye y aceitiýeca botamana cochtenochquëca, <sup>18</sup> as chca, entsanga ndoñe chamondëtsetatsëmbo aca tondaye ntjascá cojtsemnama. Nýe acbe Taitá, lempe chë mo iytëmená yomna soyëngama tatšëmbuá, chama echántsetatsëmbo. Y cha, chë iytëmená tcojama soye bominýe endbetsequëcjnayá, acbe uacanana soye cmochántatšaye ca” —Jesús tojánayana.

*Chë celoca bomnana*  
(Lc 12.33-34)

<sup>19</sup> “Bomnana quem luarentše ndoñe šmattsëjuabaye. Muentšna chë mejojón y inýe pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana. <sup>20</sup> Más tsábá tsëngaftangbiana entsemna, mora quem luarentše tsabe soyënga šmojtsamamna, uacanana soyënga celoca chaotsójuabaye. Chentše ni chë mejojón, ni chë inýe pochócaye soyënga acbe soyënga quemochatspochóca, ni atbëbanënga quemochátamashjna jatbëbama. <sup>21</sup> Er chë ndayentše acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

*Chë cuerpama uajuinjānēsha*  
(Lc 11.34-36)

<sup>22-23</sup> “Acbe bominjē tšabá totsomñēse, mo canjē uajuinjānēshacá acbe cuerpama jtsemnana, chíyeca aca jtsobenana ntšamo tcojtsamcá chë bominjēca jtsonjāyana. Chë bominjē ndoñe tšabá tontsemnēsa, chë bominjē tondaye ntsoebenana jamana, ntšamo tcojtsamcá chacobená jinjāma. Cachcá, acbe ainaniñe tšabe juabnēnga tcojtsebomñēse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnēnga tcontsebomñēsa, lempe ntšamo chacojtsamcá ndoñe tšabá queochátsmēna. Y chca, aca cochantsiyena soyēnga jtsamēse mo puerte ibetiñcá ca” —Jesús tojánayana.

*Chë Bēngbe Bētsabíama bonshánana o chë nje quem luarentša soyēnga jtsebošana*  
(Lc 16.13)

<sup>24</sup> “Ndocná ntsoebenana uta mandayata jtsaservénana: cánjābioye bochantsáboyēnja y chë ínñābioyna bochántsebobonshana, o cánñābíama tšabá echántsetrabajaye y chë ínñābíamna ndoñe tšabá. Ndoñe quecátobena Bēngbe Bētsá jtsebobonshánana, nje quem luarentša soyēnga jtsebomnama yapa tcojtsebošēse ca” —Jesús tojánayana.

*Bēngbe Bētsá chabe básēnga jtsanñenana*  
(Lc 12.22-31)

<sup>25</sup> “Chcasna atše scuayana: Ndoñe šmattsenócochinjēna ndayá šmochjase o šmochjofsiye vida jtsebomnama, ni ndaye entsáyá šmochjuichētjuama cach ndoñe. Ndegombre, vida chë sanama más enduámāna y cuerpo chë entsáyama más. <sup>26</sup> Šmochjanjē chë šloftšēnga jtsongüefjnayana. Chēnga tondaye ntjájena, ni jaja saná ntjátbanana, ni chë grano uaquēcjnaye yebnēnguiñe quemnatsquēcjiná; pero Bēngbe Bētsá, celoca endmēná, chēnga saná jtsatsatnayana. ¡Y tšēngaftanga chë šloftšetēmēngbiama puerte más šmonduámāna! <sup>27</sup> Masque chca endmēna, canjā masque tša tojtsenócochinjēna, žntšamo nanjobenaye jamana chë ntsachetšá vida yochtsebomnentsana, canjē hora vida más jabotiyana?

<sup>28</sup> “Y ndayá šmochjuichētjuama, žndáyeca šmojtsenócochinjēna? Šmochjinjē chë ja-jañe lirio uantšefjushangá jtsajuajnana: ndoñe ntsetrabájayana, ni ntsešhabíamnayana. <sup>29</sup> Pero atše chēyana, ndegombre ni mo Rey Salomón nyetsca chabe bomnánaca nyetšá botamana mo chë lirio uantšefjushangacá quenjatspormana. <sup>30</sup> Bēngbe Bētsá tša botamana shácua tojuama, y chë shácua mēnté jajoca jtsamnana, yēfsana iñoca. Chca chë shácuanaca cha tojamēse, ndegombre tšēngaftangbiámna Bēngbe Bētsá echanjama entsáyá chašmotsábomnama, jentšanga nje batšá Bēngbe Bētsábeñe ošbuáchiyēngal <sup>31</sup> Ndoñe šmattsenócochinjēna, mēntšá jtsichámēse: ‘žNdayá mochjase?’ o ‘žNdayá mochjofsiye?’ o ‘žNdayá mochtichētjo ca?’ <sup>32</sup> Chë soyēngama, chë Bēngbe Bētsábioye nduabuátmēnga mondbétsenocochinjēna, pero tšēngaftanga ndoñe. Tšēngaftangbe Taitá, Bēngbe Bētsá, ndayá cmojtsējajotama endétatšēng. <sup>33</sup> Chíyeca, tšēngaftangna natsana šmochjshétsebošē Bēngbe Bētsá tšēngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamēse, Bēngbe Bētsá lempe ntšamo cmojtsējajotcá cmochanjátšataye. <sup>34</sup> Ndoñe matenócochinjēnana ndayá yēfse yochjochnēnguama. Yēfse luare cohántsebomna chë soyēngajinjāma y jamama. Cada tescama endbétsemna yapa totcá soyēnga jájandmanama ca” —Jesús tojánayana.

## 7

*Ndoñe ntsichámuana chë ínñēnga tšabá o ndoñe tšabá tmonjamama*  
(Lc 6.37-38, 41-42)

<sup>1</sup> “Ndocá ínñēngbiama šmattsichamo chë ndoñe tšabá tmontsamama. Chca, Bēngbe Bētsá ndoñe queochátichamo tšēngaftanga ndoñe tšabá šmonjama ca. <sup>2</sup> Chë ntšamo tšēngaftanga ínñēngbiama šmojtsichamcá tšabá o ndoñe tšabá tmontsamama, cachcá Bēngbe Bētsá tšēngaftangbiama chë ntšamo šmojamama echántsichamo. Y ntšamo ínñēngbioye chašmójábíama, uabouana o ndoñe jabuache soyēnga, cachcá Bēngbe Bētsá tšēngaftangbioye cmochanjábíama.

<sup>3-5</sup> “Nderado canjā chabe bominjēñe canjē niñēña tojtsebomñēse, cha ndoñe ntsoebenana chabe catšata jauyanama: ‘Acbe bominjēntšana canjē polvēshtema jtsebuchjatsēcama šmolesenciá ca’. Natsana cha bontsemna cachabe bominjēntšana chë niñēña jtsebuchjatsēcana tšabá jinjāma jobenayama, chabe catšatbe bominjēntšana polvēshtema jtsebuchjatsēcama. Cachcá entsemna acbíama, ¡bacna entšá chë ntšamo ndegombre tcojuabnacá ndinjinñayál, chë tša bacna soye cojtsama ca acbe catšata tcojauyana ora, cach aca tša bēts bacna soyēnga cojtsamama ntjenouaboycá; y chca, aca jamana canjē bacna soye. Natsana cmontsemna chë cach aca ndoñe tšabe soyēnga cojtsamama ngmēnaca jshatenójuaboyana y chca amana jtsajbanana, y chentšana cocayé cohantsobena acbe catšata juajabuáchana ntšamo tšabá yomncá chaotsamama.

<sup>6</sup> “Chë Bëngbe Bëtsabe soyëngama josértama ndëboše entsānga ndoñe šmattsabuayiyinaye. Añese nántsemna mo chë Bëngbe Bëtsabe bëts yebnoca uátšëmbona mëntsena quešënga cuaftsëbuajocá; chorna chënga jobuértanana, jobotjajuana y jtsášantsana. O mo chë uámana ndëtsëtëmënga cotsëngbioye cuaftsëtsāncá, chënga nýe jtsebotájayana ca” —Jesús tojánayana.

*Šmochjotjañe, šmochjánguango y šmochjachembo*  
(Lc 11.9-13; 6.31)

<sup>7</sup> “Šmochjotjañe y Bëngbe Bëtsá cmochanjátšataye; šmochjánguango y šmochanjínýena; šmochjachembo y bësásá cmochanjébëtafjo. <sup>8</sup> Er ndánaca tojtsotjanañá, jóyëngacñana; y nda tojtsenguá cha, jónýenana; y nda tojtsechembuanábioye jebiatëfjuana.

<sup>9</sup> “¿Ndëmuanyë boyabása tsëngaftanguentsá, canýe tandëse chabe uaquiná tbojtsotjanañe ora, canýe ndëtsbé chábioye buanjatštaye? <sup>10</sup> ¿O canýe mëtscuaye buanjatštaye, beona tbojtsotjanañe ora? <sup>11</sup> Y chca, tsëngaftanga, bacna soye amënga, tsëngaftangbe basetëmënga tsabe soyënga jatšatayama šmojtsamanëse, imás tsëngaftangbe Taitá, Bëngbe Bëtsá celoca endmëná, chë tmojtsotjanañënga tsabe soyënga echanjátšataye!

<sup>12</sup> “Inýëngaftaca šmochtsama ntšamo chë inýënga tsëngaftangaftaca chamotsamama šmojtsebošcá. Chca endmëna ntšamo Moisesbe leyinë y chë Bëngbe Bëtsabe juabna oye-buambnayëngbe बातëmbana soyënguñe endayancá ca” —Jesús tojánayana.

*Chë base utëtsá bësásá*  
(Lc 13.24)

<sup>13</sup> “Chë base utëtsá bësásajana šmochjámashjna. Chë utëtsá bësásajana y chë paselo jóyënama benache, infiernoye cmochanjuánatse y banga chëjana mondámashjuana. <sup>14</sup> Chë tsabe vida binýoye jamna base utëtsá bësásajana endmëna y ndoñe paselo jóyënama benache, y chinë báseftanga mondbínýena.

*Chë Bëngbe Bëtsabe ndoñe ndegombre juabna oyebuambnayënga*  
(Lc 6.43-44)

<sup>15</sup> “Cuedado šmochtseboamna chë Bëngbe Bëtsabe ndoñe ndegombre juabna oyebuamb-nayëngbiama. Chënga mo oveshëngcá tsëngaftangbioye mochanjabo, pero ndegombre chënga mondmëna mo tsátjaye tjañe quešëngcá. <sup>16</sup> Tsëngaftanga betiyënga jtsabuatmana ntšamo cada ona tojtseshajcá; cachcá tsëngaftanga chcanga šmochantsëbuatma, ndayá chënga mochtsamama. Uchmaššese betiyentsāna ndoñe uvas ntjuátabebiana, ni higuëbé cardo betiyentsāna. <sup>17</sup> Chca, nýetsca tsabe betiyinë tsabe soye jashájonana; y chë ndoñe tsabeshiñna podessa soye. <sup>18</sup> Canýe tsabe betiyinë quenátopodena podessa soyënga jashájonana, ni canýe ndoñe tsabe betiyinë tsabe soyënga jashájonana. <sup>19</sup> Ndaye betiye podessa shajuanëse jtseshatëtšana y inýoye jtsatmetsāna. <sup>20</sup> As chca tsëngaftanga chënga šmochantsëbuatma, ndayá chënga mochtsamama ca” —Jesús tojánayana.

*Bëngbe Bëtsabe amëndayoye ndoñe nýetscanga jamashjnana*  
(Lc 13.25-27)

<sup>21</sup> “Ndoñe nýetscanga chë ‘Utābná! Utābná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nýe ntšamo atšbe Taitá, celoca endmëná, tojtsebošcá amëngna añe. <sup>22</sup> Quem luare jopochócama te banga atše cmochanjauyana: ‘¡Bëngbe Utābná! Bëngbe Utābná! Aca jótšëmbonëse, ácheñe betsošbuáchemá, bënga fsëndoyebuambná, y ácbeyeca bacna bayëngbe juabna entsāngbentsāna fsëndëtabocana, y ácbeyeca bëts soyënga fsëndama ca.’ <sup>23</sup> Chora atše chanjójuaye: ‘Ndocna te checbaisëbuátmana. Atšbentsāna mojuánanga, bacna soye ama entsānga ca’ ” —Jesús tojánayana.

*Chë uta ucuatjoniñe*  
(Mc 1.22; Lc 6.47-49)

<sup>24</sup> “Chcasna, nda atše šojoyeuná y chë ntšamo sentsichamcá tojtsama, endmëna mo canýe tsabá juabnaye boyabasacá. Chë boyabásana ndëtsbeñe chabe yebna yojajebo. <sup>25</sup> Uaftena yojuáshjango, chë béjayënga yojóftjajna, chë yebnoye puente yojtsebinýiaye, pero chë yebna ndoñe ntjuáshajayana, chë yebna ndëtsbeñe inajéboyeca. <sup>26</sup> Pero nda atšbe palabra tojouena y ntšamo sentsichamcá ndoñe tontsama, endmëna mo canýe ndëjuabnaye boyabasacá. Chë boyabásana chabe yebna cascajuinë yojajebo. <sup>27</sup> Uaftena yojuáshjango, chë béjayënga yojóftjajna, chë yebnoye puente yojtsebinýiaye y chë yebna uabouancá yojtsášajaye ca” —Jesús tojánayana.

<sup>28</sup> Jesús chë soyënga jóyëbuambayama tojanpochocá ora, chë entsānga ojnanánënga imojt-semna ntšamo cha tojánabuatambama. <sup>29</sup> Jesús tojanabuatambá nýets obenánaca, mo canýa mando bomnacá y ndoñe nýe mo chë ley abuatambayëngcá.

## 8

*Jesús, canŷa bacna nguayanánaca šocábioye tbojanshná*  
(Mc 1.40-45; Lc 5.12-16)

<sup>1</sup> Jesús tjoicana tojtantsmá ora, ba entsanga tmojanasto. <sup>2</sup> Chora canŷe boyabása bacna nguayanánaca šocá Jesúsbioye tojanobeconá, chabe delante yojoshamentsiye y tbojaniyana: —Utabná, aca tcojtsebošese, catjobenaye atšbe šocana jtsebojuánana ca.

<sup>3</sup> As Jesús tojanacuenŷanējaná, chē boyabásabioye tbojánbojajo y tbojaniyana: —Aíñe, séntseboše. Socana cbotsebojuaná ca.

Y cachora chabe šocana tbojtsanóbojuanañe. <sup>4</sup> Jesús chē shnanábioye tbojaniyana: —Mouena, ndocnábeñe cattsecuéntaye; nŷe chē Jerusalemoca báchnēbioye motsa, y cha cochjinyñiye mora aca ya tšabá cojtsatsmēnama. Bayá cochtsambaye, Bēngbe Bētsá chama jētschuayama, ntšamo Moisés tojētsanmandacá, as chca nŷetscanga chamotatsēmbona mora aca ya ndoñe šocá contsemnama ca —Jesús tbojaniyana.

*Jesús canŷe Romano soldadēngbe amēndayabe bochichnayábioye tbojanshná*  
(Lc 7.1-10)

<sup>5</sup> Jesús Capernaumoye tojánamashēngo ora, canŷe Romano soldadēngbe amēndayá Jesúsbioye tojanobeconá canŷe pavorama jaimpádama. <sup>6</sup> Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobēsna ca.

<sup>7</sup> Chora Jesús tbojanjuá: —Cha jáshnama chanjá ca.

<sup>8</sup> As chē soldadēngbe amēndayá tbojaniyana: —Señor, atše mercedo taitsatobuajoñe atšbe yebnentše chacuamashēnguama; nŷe mayana y atšbe bochichnayá tšabá echántsatsmēna.

<sup>9</sup> Atšbioye mándayēnga atše sēndábamna y átšnaca soldadēngbe amēndayá sēndmēna. Atše canŷe soldado stjauyana “motsa ca”, cha cachora jana; y inŷa stjauyana “mabo ca”, cha cachora jabana; y nderado atšbe bochichnayá ndayánaca chaomama stjarnánda, chánaca cachora chē soye jamana ca —cha tojánayana.

<sup>10</sup> Jesús chca tojanuena ora, tojanenjaná y chē ústonēnga tojanēyana: —Ndegombre cbēyana, ni mo nŷets Israelēntše ni canŷa quem boyabasacá Bēngbe Bētsábeñe nŷetsá ošbuachiyá chiyátinŷena. <sup>11</sup> Y šcuayana, shinŷe bocanoicana y shinŷe uenatjēmbambanoicana bētsá entsanga mochanjabo, y Abraham, Isaac y Jacob,

chē judiēngbe tempsca uámama bēts taitángaftaca mochanjotbiama Bēngbe Bētsabe amēndayoca, cánŷiñe juasama. <sup>12</sup> Ba Israeloca entsanga, chē ndēmuanŷengbiama Bēngbe Bētsabe amēndayana natsana yochtsanmēna, chocana mochantēbuacana chē ndēbinŷna luaroye, infiernoye. Chentše puerte mochanjenóbošachna y chē tsetšanama juatsasēnga mochantseoftšejojnaye ca —Jesús tojánayana.

<sup>13</sup> Chora Jesús chē soldadēngbe amēndayábioye tbojaniyana: —Acbe yebnoye motsatá y chē ntšamo cojtsošbuachecá cachá chaotsemna ca.

Cachora chē bochichnayá tšabá yojtsatsmēna.

*Jesús, Pédrēbe uambén mamábioye tbojanshná*  
(Mc 1.29-31; Lc 4.38-39)

<sup>14</sup> Chentšana Jesús, Pédrēbe yebnoye tojána. Chentše Pédrēbe uambén mamá šocá calentóraca yojtsejutsnajona. <sup>15</sup> Chora Jesús chē uambén mamabe cucuatše tojánbojajo y cachora chē calentora tbojtsanóbojuanañe. Chorna chē uambén mamá tojtantsbaná y tojanontšé chēnga jobuácuedana.

*Jesús ba šoquēnga tojanashná*  
(Mc 1.32-34; Lc 4.40-41)

<sup>16</sup> Chē te jaibétatama ora, Jesús yojtsemnoye banga bacna bayējēngbe juabna uambaye entsanga tmojanēnatse. Chora, nŷe canŷe Jesús jóyebuambayēse chē bacna bayējēnga imojtsaisebocana y nŷetsca šoquēnga tojanashná. <sup>17</sup> Chca Jesús tojanma, cachá chaotsemnama ntšamo chē Bēngbe Bētsabe juabna oyebuambnayá Isaías tojanayancá. Cha mēntšá tojánayana: “Cha bēngbe šocanēnga tonjaftsanca y bēngbe nŷetsca tsetšanana chábeñe tonjanoquedá ca.”

*Chē Jesús juastama bošēnga*  
(Lc 9.57-62)

<sup>18</sup> Jesús tojánanŷe mallajta entsanga chabe shēconana; as tojanmandá uafjajónaye chen-guana jama. <sup>19</sup> Chorna, canŷe ley abuatambayá Jesúsbioye tojanobeconá y tbojaniyana: —Buatēmbayá, atše séntseboše aca juastama, ndémoye chacojtsá choye ca.

<sup>20</sup> As Jesús tbojaniyana: —Chē zorrēnga mondbomna cuevēshēnga ndayentše jtsiye-nama y chē shloftšēngna uajajonēshangá, pero chē Bēngbe Bētsá Entšá tbojanbemá ndoñe quenátsbomna ndayentše jóchnama ca.

<sup>21</sup> Chora inŷa, cach uatsjendayënguentsá, Jesúsbiroye tbojaniyana: —Bëngbe Utabná, šmolesenciá atšbe taitá chjšhesabotbontsañe ca.

<sup>22</sup> Chora Jesús tbojanjá: —Nŷe šmasto. Chë Bëngbe Bëtsabiamá mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe ca.

*Jesús chë binŷia y chë bëjaye bonguana yojëtsbema*

(Mc 4.35-41; Lc 8.22-25)

<sup>23</sup> Chentšana Jesús canŷe barquëshoye tojánamashëngo y chabe uatsjëndayënga imojtsetjëmbambnaye. <sup>24</sup> Ndeolpe tša jabuache binŷia chë uafjajónaye bëjayiñe yojóshjango; nŷetšá jabuachana yojtsemna, chë olëshënga barquëshá imojtsetšbotsana. Y Jesús chora inëtsomañe. <sup>25</sup> As chabe uatsjëndayënga tmojána Jesús jetsefšenama y tmojaniyana: —jBëngbe Utabná, šmatsebácá. Montsenatjëmbambana ca!

<sup>26</sup> Chora Jesús tojanëyana: —¿Ndáyeca tša šmojtsauatja? ¿Tša batšatema šmojtsosbuachë, Bëngbe Bëtsá tšëngaftanga jujuabuáchama yobenama ca?

Chca tojanëyana y tojantsbaná. Chora tojanmandá chë binŷia y chë búyeshe bonguana chaotsatmënama, y lempe natjëmbana yojtsatmëna. <sup>27</sup> Chabe uatsjëndayënga ojananënga imojtsemna y mëntšá imojtsichamo: “¿Nda quem boyabása yomna? Cha tonjayana y chë binŷia y chë búyeshe tmonjoyeuná ca.”

*Chë Gadara luaroca entsata, bacna bayëjbe juabna uambayata*

(Mc 5.1-20; Lc 8.26-39)

<sup>28</sup> Jesús uafjajónaye chenguana tojánashjango, canŷe luare Gadara ca uabáinentše. Chorna chë utabuantsánëngbentsana útata, bayëjbe juabna uambayata, tbojánbocna y Jesúsbiroye tbojanobéconata. Puerte tšatjayata ibnamna, chíyeca entsanga ndoñe ntšobenana chëjana jtsachnëjuanana; <sup>29</sup> y chora tbojanontsé chë bacna bayëjëngbeyeca mëntšá uayebuáchana: —¿Ndáya bëngaftaca cojtseboše, Jesús, Bëngbe Bëtsabe Uaquiná? ¿Moye tcojabo bënga chafsufrima, chama cabá ndoñe chë tempo yontsemna ora ca?

<sup>30</sup> Chentša bëconana ba cotšënga imnajena y chënga imnëtsosañe. <sup>31</sup> Y chë bayëjënga Jesús tmojanimpadá: —Muentšana jésebocanama aca tcojamëse, cochjama bënga chë cotšëngbeñe fchayamashjnama ca.

<sup>32</sup> Y Jesús tojanëyana: —Motsajna ca.

Chora chë bayëjënga chë boyabásatbentsana tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjajónayoye imojtsoshbuetše y yojtsatajo.

<sup>33</sup> Chora chë cotšënga anŷenënga tmojtsanacheta, y chë puebloye tmojánashjajna ora, tmojanontsé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca. <sup>34</sup> Chora nŷetsca entsanga chë pueblentsana tmojánbocana y Jesús yojtsemnoye tmojána. Chë entsanga Jesús tmojáninŷe ora, tmojanimpadá chë luarentšana chaueseboconama.

## 9

*Jesús, canŷe jama ndobenábioye tbojanshná*

(Mc 2.1-12; Lc 5.17-26)

<sup>1</sup> Chca tojanopasá chentšana, Jesús canŷe barquëshoye tojánamashëngo, uafjajónaye chenguana tojána y cachabe puebloye Capernaumoye tojtanashjango. <sup>2</sup> Chora, canŷe jama ndobená, tjuašhiñe jajoná, Jesús yojtsemnoye básefta boyabásenga tmojanamba. Jesús tojáninŷe chënga tša imojtsosbuáchema chë šocábioye jáshnama cha bëtsobenama; as chë šocábioye tbojaniyana: “Sobreno, añemo matsca; acbe bacna soyënga tcbontsebooperdoná ca.”

<sup>3</sup> Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiamá; mo chábioye cuafjoyengucá entsemna ca.” <sup>4</sup> Pero Jesús yojtsetátšëmbo ntšamo chënga imojtsejuabnaycá; chíyeca tojanëyana: “¿Ndáyeca nŷetšá bacna juabnënga ainaniñe šmojtseboamna ca? <sup>5</sup> ¿Tšëngaftangbiamá ndáyá más paselo nántsemna tšëngaftangbe delante jayanama: ‘Acbe bacna soyënga tcbontsebooperdoná’ o ‘Matëtsbaná y motsa ca?’ <sup>6</sup> Atše cbochanjínŷanŷiye ntšamo chë Bëngbe Bëtsá Entšá tbojanbemá quem luarentše mando yobomnama, entsanga bacna soyëngama jáperdonama ca” —Jesús tojanëyana.

As chë jama ndobenábioye tbojaniyana: “Matëtsbaná, acbe tjuashe mesocñe y acbe yebnoye motsatoñe ca.”

<sup>7</sup> Chorna chë jama ndobená tojtantsbaná y cachabe yebnoye yojtsatoñe. <sup>8</sup> Chca tmojáninŷama chë entsanga auatjanánënga imojtsemna y Bëngbe Bëtsá imojtsatschuanaye, cha chca obenana entsanga tojánatšatama.

*Jesús, Matéobioye tbojanchembo chabuastama*  
(Mc 2.13-17; Lc 5.27-32)

<sup>9</sup> Jesús chentšana tojtsanoñe y canye entsábioye tbojáninñe, Mateo ca uabainá, chë Romocama impuesto entsángbioye atjanayentse inétsotbemañe. Chora Jesús tbojaníyana: “Smasto ca.” As Mateo chentšana tojétsantsbaná y tbojanasto.

<sup>10</sup> Jesús cach Mateobe yebnentse yojtsesaye ora, banga Romocama impuesto entsángbioye atjanayenga y inyenga bacna soye amenga tmojánashajna y mesëshentse Jesús y chabe uatsjéndayengtafaca imojotbiama. <sup>11</sup> Chë fariseunga chca tmojáninñe ora, Jesusbe uatsjéndayengbioye tmojanatjá: —¿Ntsámo chca yojtsemna, tsëngatangbe buatëmbayá chë impuesto atjanayenga y bacna soye amengtafaca entsesá ca?

<sup>12</sup> Jesús chca tojanuena y chë fariseunga tojanéyana: —Chë salud bomnënga ashnayá ndoñe ntsëjabótana, pero chë soquenga aife. <sup>13</sup> Smochjá y ntsámo ndegombre iuayancá smochjuatsjinñe quem Bëngbe Bëtsabe uabemana palabrenguife:

Atse sëntseboşe tsëngatanga lastemadënga chašmotsemna, y ndoñe nñe bayënga chašmotsëbänaye Bëngbe Bëtsá jëtschuayama ca. Atse ndoñe chiyátabo chë Bëngbe Bëtsabe bominñiñe tsábá amenga jabáchembuama, sinó chë bacna soye amenga imomna ca juabnayenga jabáchembuama ca —Jesús tojánayana.

*Jesús tmojantjá chë Bëngbe Bëtsáftaca jencuëntama tondaye saytescama*  
(Mc 2.18-22; Lc 5.33-39)

<sup>14</sup> Chentšana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuëntama. ¿Ndáyeca acbe uatsjéndayenga ndoñe chca ca?

<sup>15</sup> As Jesús tojanéjua: —Chë casamentoye ófanënga chë boyabása bouamná chëngtafaca tojtsemnëntscuana, chëngbioye saná ndoñe ntsabuáshebenana y ngmënaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë ófanënga tondaye más jasama quemochátsbomna. Ntsámo chë tojobouamá cha y chë ofjanëngtafaca endmëncá, cachcá endmëna atse y atšbe uatsjéndayengtafcacna.

<sup>16</sup> “Ndocná canye uatanguá entsáyá base tsëm entsëjuaca jtarmëndana. Er chë tsëm entsëjuaca jtsabëconana y chë uatanguá entsáyá más jtsatanëcanana, y chca chë uátanëcniñe más bëtsiñe jtsabemana. <sup>17</sup> Y cach ndoñe chë tojtseshayana vínoye tanguá jasabenguife ntjataftsuámayana. Tcojuaftsuumasna, chë jasabenga jtseshëbéfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chiyeca comna, chë tojtseshayana vínoina tsëm jasabenguife juaftsuumana; y chca, chë jasabenga y chë vínoye jtsoservénana ca” —Jesús tojánayana.

*Jesús canye shembásabioye tbojanshná y tojanma Jairëbe bembetema cháuatayenama*  
(Mc 5.21-43; Lc 8.40-56)

<sup>18</sup> Jesús entsánga yojtsëtsëtsnantscuana, chë judiëngbe enefjuana yebnentša canye mandayá tojánashjango y Jesusbe shecuatšentse yojoshamentšiyi. Chë mandayá tbojaníyana: “Atšbe bembe tontsóbana. Diosmanda atšbe yebnoye mabo; cochjabojo y cha echántayena ca.”

<sup>19</sup> Chentšana Jesús y chabe uatsjéndayenga chë mandayá tmojanasto. <sup>20-21</sup> Imojtsaye ora, canye shembása stëtsoicana Jesúsbioye yojobeconá. Bnëtsana uta uatama oboftjajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nñe mo chabe entsáyá sibiájua chajuiúbojajo, salud chantinñena ca.” Chentšana chë šocá Jesusbe entsáyá tojánábojajo.

<sup>22</sup> Tojánábojajo ora, Jesús tojanobuértana, chë shembásabioye tbojáninñe y tbojaníyana: “Añemo matsca, shembása. Bëngbe Bëtsábeñe icošbuachéyeca, mora tsábá contsatsmëna ca.” Y cach orscana cha tsábá yojtsatsmëna.

<sup>23</sup> Chënga tmojtëtanontšë ayana y chora chë mandayábioca chënga tmojánashajna. Chentse Jesús tojánanñe, inyengna chë veloriamá imojtsanflautaye y inyengna tša imojtsošachiye. <sup>24</sup> Chora Jesús tojanéyana: “Muentšana mobocnënga. Chë shembássetema cabá ndoñe obaná quenátsmëna; nñe endëtsomañe ca.”

Pero chë entsánga Jesúsbioye nñe imojtsáfchaye. <sup>25</sup> Pero Jesús pronto chënga chë yebnentšana tojanëbuacna. Chora Jesús tojánamashëngo chë shembássetema yojtsemnoye; cucu-atse tbojánabuacueshache y cachora chë shembássetema tojtantsbaná. <sup>26</sup> Y nñets chë luarëjana ndayá Jesús yojamama nñetsca entsánga imojátatšëmbona.

*Jesús uta jtanata tojanashná*

<sup>27</sup> Jesús chentšana tojéftsanbocna ora, uta jtanata tbojanasto y mëntsá ibojtsaiuáyebuache: —¡Davidbentsana Entšá, bëndata šmotsalastemá ca!



<sup>28</sup> Jesús chë yebnoye tojanamashëngo ora, chë jtanata tbojanóbobeconata. As Jesús to-janajtá: —¿Tsëndata šojtsošbuachë atše chca jamama chjobenaye ca?

Y tmojanjuá: —Arseñor. Aíñe ca.

<sup>29</sup> Chora Jesús tojánabuchbojajo y tojanëyana: —Ntsamo tsëndatbe ošbuáchiyana yomncá, cachcá chaotsemna ca.

<sup>30</sup> Y cachora jinýama ibojtsobena. Jesús bëtscá chata mëntšá tojanamëndá: —Ndocná más quem soye chaondëtsetatšëmbo ca.

<sup>31</sup> Pero chata chentšana tbojëftsanbocna y cachora tbojanontsé ndayá Jesús chátaftaca tojanmama nýets chë luarëjana jacúntana.

*Jesús, canýe ndëbiábioye tbojanshna*

<sup>32</sup> Chë jtanata ibojtsebocanëntscuana, básefta entsanga canýe ndëbiá, bacna bayëjbe juabna uambayá, Jesúsbioye tmojanamba. <sup>33</sup> Jesús chë bacna bayëja chábensana tboj-tanábocna y cachora chë ndëbiá tojtanontsé oyeubuambnayana. Entšanga ojanánënga imojtsichamo: “¡Ndocna te Israelentse chca bëts soye chemuáisinýe ca!”

<sup>34</sup> Pero chë fariseunga imojtsichamo: “Cach bacna bayëjengbe amëndayá, Satanás, muábioye obenana tbojtštá chë bayëjenga entsángbentsana jtëbuacanama ca.”

*Jesús entsangbiana tbojanongmé*

<sup>35</sup> Jesús nýetsca pueblënguëjana y luarënguëjana vojtsachnëjuana y chë judiëngbe enefjuana yebnënguenache entsanga vojtsabuátambaye. Yojanabuayiyá chë tsabe noticiënga Bëngbe Bëtsabe amëndayama, y nýetsca šocanëngama y tsetšanama yojánashnaye. <sup>36</sup> Y chë entsanga tojánanyë ora, puerta tbojanongmé. Er chënga imojtsemna mo abuajënyá ndbomna oveshëngcá, puerta uamëntšnayënga ba soyëngama padecena causa, y chaujabuachama ndocná ntsebmncá. <sup>37</sup> Chora chabe uatsjëndayënga tojanëyana: “Canýe bëts jajañe bëtscá játbanama entsemna, pero peonga nýe báseftanga. Cachcá quem luarentse, bëtscá entsanga Bëngbe Bëtsábioye nduabuátëmga montsemna, y chëngbioye chabiana abuayiy-nayënga nýe báseftanga. <sup>38</sup> Peonga tmojtsashbenëse chë nduifñbioye jaimpádana ba pe-onga chauichamoma chë jaja saná játbanama. Cachcá, Bëngbe Bëtsábioye moimpadanga ba abuayinyayënga chauichamoma, quem entsanga chábioye chamúbujama ca” —Jesús tojanëyana.

## 10

*Jesús chë bnëtsana uta uatsjëndayënga tojanabacacá*

(Mc 3.13-19; Lc 6.12-16)

<sup>1</sup> Chentšana Jesús tojánachembo chabe bnëtsana uta uatsjëndayënga, y obenana to-janatsatá bacna bayëjengbe juabna entsángbentsana jtábocnama y nýetsca šocanëngama y tsetšanama jashnayama.

<sup>2</sup> Chë bnëtsana uta uatsjëndayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiná; <sup>3</sup> Felipe y Bartolomé; Tomás y Mateo, chë Romocama impuesto entsángbioye atjanayá; Santiago, Alfeobe uaquiná y Tadeo; <sup>4</sup> Simón, chë celote ca uabobainá y Judas Iscariote, chë uayayëngbe cucuatšifne Jesúsbioye boshjuaná.

*Jesús, chabe bnëtsana uta uatsjëndayënga tojanichamó, Bëngbe Bëtsabe amëndayama jábuayenama*

(Mc 6.7-13; Lc 9.1-6)

<sup>5</sup> Jesús chë bnëtsana uta boyabásenga tojanichamó chë tsabe noticiënga entsanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentse Samaria luaroca ndoñe šmatjëftsamashjna. <sup>6</sup> Nýe Israeloca pueblëngoye šmochjá. Choca entsanga mo ótsena oveshëngcá montsemna, Bëngbe Bëtsábioye corente nduabuatma causa. <sup>7</sup> Smochjá y entsanga šmochjábuayenaye Bëngbe Bëtsabe amëndayana echanjóshjanguama. <sup>8</sup> Chë šoquënga šmochjáshnaye, šmochjama chë obanënga chámuatayenama, bacna nguayanánaca šoquënga šmochjáshnaye y bacna bayëjengbe juabna entsángbentsana šmochtábocna. Chë obenana šmonjóyëngacñe tondaye ntjëtsajuacá; cachcá, chë soyënga šmojtsamama tondaye entsanga šmattsayëngacaye.

<sup>9</sup> “Ndoñe šmattsambaye crocénana uasnanëchiñe. <sup>10</sup> Ni shecnaja sanaca benachiñama, ni inýe entsáyá jtse nomódama, ni shecohëtjonëshënga, ni jatjonëfja, er chë tsabe trabajayá jtsomerecénana ntsamo tbojtsajabotcá jóyëngacñama.

<sup>11</sup> “Nderado canýe bëts pueblentse o base pueblentse chašmojáshjajna ora, smochjánguango canýe tsabe entsá, inýëngbioye ndaingñayá, y chabe yebnentse šmochtsoquedañe, inýe puebloye játantscuana. <sup>12</sup> Canýe yebnoye chašmojáshjajna ora, nýetsca chentša oyenënga mëntšá smochjácheuaye: “Chë bëngbe ainaniñe tsabe ebionana

tšëngaftangbe ainaniñe chaotsemna ca.' <sup>13</sup> Chë yebnentša entsānga ainaniñe tšabe ebionana jtsebonnana mercedido tmojtsebuajonēse, chë tšëngaftangbe ainaniñe tšabe ebionana chëngaftaca chaotsemna. Ndóñesna, nýe cach tšëngaftangftaca chaotsemñe. <sup>14</sup> Y nderado canýe pueblentše o bëtš pueblentše chë entsānga ndoñe tcmonjúbuaja y ndoñe tcmonjóyaunase, chentšana šmochjésebocana y chë shecuatšentša polvëshe šmochjésenstoto. Chca, chë entsānga mochántsetatšëmbo chënga tšëngaftangftaca ndoñe tšabá tmonjamama. <sup>15</sup> Ndegombre šcuayana, quem luare jopochócama te, chë ndoñe chacmonjúbuaja y ndoñe chacmonjoyauná entsānga Bëngbe Bëtsá puerte jabuache echantsacastigaye, y chë bacna entsānga Sodoma y Gomorra luaroquëngna ndoñe nýa nýetšá jabuache queochatacastigaye ca" —Jesús tojanáyana.

*Ntšamo chë uatsjëndayënga mochjansúfria*

<sup>16</sup> "Šmochjouena. Atše chontsachamná mo oveshënga cuenta tjañe quešëngbeñe. Chíyeca studio bomnënga mo mëtšcuayëngcá šmochtsemna y uamanënga mo palomatemëngcá. <sup>17</sup> Entšangbiama cuedado šmochtsebonna, chëngbe pueblentša amëndayëngbe cucuatšinë tšëngaftanga cmochanjábashejuana y chëngbe enefjuana yebnënguenache cmochanjátsetšenaye. <sup>18</sup> Atšbe ústonënga bëtsemnana, mandadëngbioye y reyëngbioye cmochanjuntase. Y chca, tšëngaftanga šmochanjobenaye chëngbeñe y chë ndoñe judiëngbeñe ntšamo atšbiama šmotatšëmbcá jóyebuambayama. <sup>19</sup> Pero chë mandadëngbe cucuatšinë chacmójábashejuana ora, ntšamo o ndayá šmochjayanama ndoñe šmattsenócochinýena. Chca orna, Bëngbe Bëtsá tšëngaftanga cmochanjabuayená ntšamo o ndayá jóyebuambayama. <sup>20</sup> Tšëngaftanga ndoñe chë oyebuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espiritu, tšëngaftangbiajana echantsóyebuambnayë.

<sup>21</sup> "Y canýe entsá cachabe catšátbioye uayayëngbe cucuatšinë bochanjábošhona chamotsóbama; y canýe taitá cachabe uaquiñábioynaca. Y chë básenga chëngbe bëtšëtsangbe contra mochántsemna y uayayëngbe cucuatšinë mochanjábashejuana chamotsëbáyama. <sup>22</sup> Tšëngaftanga atšbe ústonënga bëtsemnana, nýetsca entsānga cmochantsëbuayëñja; pero nda nýets tempo átšbeñe ošbuachiyá chaotsemñá, atšbocaná echántsemna. <sup>23</sup> Canýe pueblentše chacmojtšëcamena ora, nýe puebløe šmochtsacheta. Ndegombre chëyana, Israelentša nýetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabášhango.

<sup>24</sup> "Ni canýe uatsjëndayá chabe बातëmbayabiama más uamaná ntsemnana, ni chë oservená chabe nduiñbiama más uamaná. <sup>25</sup> Chë uatsjëndayá ya cachabe बातëmbayacá jtsemnana tojashjáchëse, ndayá más nanjátsboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canýe yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntšamo chënga tšëngaftanga cmochtsëbobotatma ca?" —Jesús tojanéyana.

*Nda ndegombre cuantsebiauatja*  
(Lc 12.2-7)

<sup>26</sup> "Chíyeca entsāngbiama ndoñe matauatjëngana. Chë yoiytëmena soyentsana ton-daye ntjinýcá queochaisoquéda, y chë ndótatšëmbo soye, ntsoatšëmbcá queochaisoquéda. <sup>27</sup> Chë mora cbontsëtsëtsná soyënga, chë entsāngbiama mo ibetiñe cuaftsemncá soyënga, tšëngaftanga šmochjama entsānga botamana chama chamotsetatšëmbuama. Y chë iytëcana cbontsëtsëtsná soyënga nýetsca entsānga šmochtsabuayinyaye, mo nda canýe yebnentša tšbanánocana noticiënga tojtšayebuachcá. <sup>28</sup> Ndoñe matauatjëngana nýe chë tšëngaftangbe cuerpo japochócama imobenëngbiama y ainana jtsepochoćama ndoñe ntsobenana. Más šmochtsebiauatja chë nda endobena tšëngaftangbe cuerpo y tšëngaftangbe ainana jtsepochoćama, nýetsca tescama infernoca.

<sup>29</sup> "Uta jaja shloftšetémata nýe canýe denario crocenánama mondbëtsena. Masque chca, ni cánýetema obanatema fhantsoye jotsatšana, tšëngaftangbe Taitá, Bëngbe Bëtsá ndoñe tontsebošëse. <sup>30</sup> Y tšëngaftangbiama, Bëngbe Bëtsá botamana jtsantjësna, y chca, cha lempe tšëngaftangbiama jtsetatšëmbuana, bueta stjënashënga tšëngaftangbe bestšasinë yomnámna. <sup>31</sup> Chíyeca ndoñe matauatjëngana, tšëngaftanga ba jaja shloftšetëmëngbiama corente más šmondúamana ca" —Jesús tojanáyana.

*Ndabiama Jesucristo yochjayana chabe entsá yomna ca*  
(Lc 12.8-9)

<sup>32</sup> "Nda atšbe entsá yomna ca entsāngbe delante tojayanabiama, átšnaca, atšbe Taitá, chë celoca endmënabe delante chanjayana cha atšbe entsá yomna ca. <sup>33</sup> Pero nda entsāngbe delante atšbe entsá ndoñe yondmëna ca tojayanabiama, átšnaca, atšbe Taitá, chë celoca endmënabe delante chanjayana cha atšbe entsá ndoñe yondmëna ca" —Jesús tojanéyana.

*Jesusbe causa, entsángbeñe más jtsentsjanayana*  
(Lc 12.51-53; 14.26-27)

<sup>34</sup> “Ndoñe šmattsejuabnaye atše quem luaroye tijabo nyetsca entsanga natjembana chamotsiyenama. Atše chama ndoñe chiyátabo; atše sējyabo causa, entsanga más mochántsejtsjanaye. <sup>35</sup> Atše sējyabo chē uaquiniá cachabe taitabe contra chaotsemnana, chē bembe cachabe mamabe contra y chē bebincúá chabe uambén mamabe contra chaotsemnana. <sup>36</sup> Y chca, ba entsangbe uayayēnga cachēngbe pamíllanga mochántsemna.

<sup>37</sup> “Nda cachabe taitá o mamábioye atšbiana más tbojtsebobonshánēse, cha ndoñe ntsomerecénana atšbe entsá jtsemnana. Nda cachabe uaquiniá o bémbebíoye atšbiana más tbojtsebobonshánēse, cha cach ndoñe. <sup>38</sup> Y nda nyetsca chabe quem luare soyēnga ndoñe tonjēseboshjona atše juastama, y atšbiana jasúfriama ndoñe tontseprontana y cruciñe jobanámna, cha ndoñe ntsomerecénana atšbe entsá jtsemnana. <sup>39</sup> Nda tojtsentsēna quem luarentše bētsca soyēnga jtsebmomna y atšbiana jasúfriama ndoñe tontseprontana, chē nyetsca tescama yomna tsabe vida echanjobuetše. Pero nda quem luarentša soyēnga cachá tojesonjá atše juastama, masque chaóbana, chē nyetsca tescama yomna tsabe vida echántsebmomna ca” —Jesús tojánayana.

*Chē uacanana soyēnga*  
(Mc 9.41)

<sup>40</sup> “Nda tsēngaftanga chacmojúbuaja, átsnaca cha šochanjofja; y nda atše chašojofja, chē nda šojichmóbioynaca cha bochanjofja. <sup>41</sup> Nda canye Bēngbe Bētsabe juabna oyeuambnáyábioye tbojoyeuná, cha chca bētsemnana, chábioye Bēngbe Bētsá canye uacanana soye bochántatšetaye, mo cach Bēngbe Bētsabe juabna oyeuambnáyabe uacanana soycá. Y nda canye nyetsca soyēnguñe tsabá amábioye tbojofja, cha chca uamanama, chábioye Bēngbe Bētsá canye uacanana soye bochántatšetaye, mo cach nyetsca soyēnguñe tsabá amabe uacanana soycá. <sup>42</sup> Y ndánaca, tsēngaftanguentsá canye nduamanábioye masque nye mo base búyeshtema tbojuabuatsétá, atšbe ustoná bētsemnayeca, ndegombre Bēngbe Bētsá canye uacanana soye chábioye bochántatšetaye ca” —Jesús tojánayana.

## 11

*Juan chē Ubayanabe ichmónēnga*  
(Lc 7.18-35)

<sup>1</sup> Jesús tojanpochocá chabe bnētsana uta uatsjēndayēnga jábuayenama, y chentšana tojt-sanoñe chē luariñe pueblēnguenache oyena entsanga Bēngbe Bētsabe palabra jabuátambana y jábuayenama.

<sup>2</sup> Chē tempo Juan chē Ubayaná cárceloye tmojanētame. Choca cha vojouena ndayá Jesús yojtsamama. Y as, Jesús yojtsemnoye, básefta chabe ústonēnga tojanichamó, <sup>3</sup> mēntšá jatjayama: —¿Aca ndegombre cojtsemna chē jabama ibojanmēná, chē Uámana Uabuayaná, o šojtsamna injyabiana jatobátmama ca?

<sup>4</sup> Chca tmojantjá orna, Jesús tojanējua: —Smochjá y Juan smochjauyana ntšamo šmojouena y šmojinycá. <sup>5</sup> Cha smochjacuénta: Chē jtanēnga tsabá entsatēbinjyana, chē coshetēnga tsabá montsatana, chē bacna nguayanánaca šoquēnga šhnánēnga montsatmēna y chē tēsmēnga montsuenana, chē obanēnga tmontayena y chē ndbomnjēmēngbioye chē tsabe noticiēnga montsabuayinyá ca. <sup>6</sup> ¡Puerte oyejuayá chaotsemna chē nda atše bacna soye ndoñe stsama ca jtsejuabnayēse, átsbeñe ošbuáchiyana ndoñe tontsajbaná cha ca! —Jesús tojánayana.

<sup>7</sup> Chēnga tmojtsatanoñe ora, Jesús tojanontsé Juanbiana chē entsanga jáuayana, mēntšá: “Juan jinýama šmojánbocana ora, žndayá jinýama chē entsanga ndoyena luaroye šmojánbocana? ¿Canýe entsá ainaniñe tondaye añemo ndbomná, mo canýe šēše binjyaca shatiyeynēscá? <sup>8</sup> Y ndoñese, žndayá jinýama choye šmojánbocana? ¿Canýe boyabása uámana entsayaca bopormaná? Ndoñe. Tsēngaftanga šmondētatsēmo chē boyabásenga uámana entsayaca bopormanēnga chē mándayēngbe yebnēnguñe mondbētsiyenama. <sup>9</sup> Y asna, žndayama choye šmojánbocana? ¿Canýe Bēngbe Bētsabe juabna oyeuambnáyá jinýama? Ndegombre, aifñe; y cbéyana, ndegombre cha canye Bēngbe Bētsabe juabna oyeuambnáyabiana más bētsá endmēna. <sup>10</sup> Cha, Juan, endmēna ndabiana Bēngbe Bētsá chabe uabemana palabrēnguñe tojánayana mo chabe ichmonacá, mēntšá tojánayana ora: Cristo, atšbe entsá natsana sējichmó acbiana chaóyeuambama,

entsanga jábuayenama aca jabama ainaniñe tsabe juabnēngaca chamotseprontánama ca.

<sup>11</sup> Ndegombre cbéyana: Nyets tempo entsángbeñe, ndocná quenátsmēna Juan chē Ubayanabiama más bētsá; masque chca, Bēngbe Bētsabe amēndayoca chē más batšá uamaná, más bētsá echántsemna ntšamo mora Juan yomnama.

<sup>12</sup> “Juan chë Ubayaná tojánabo orscana mëntscoñama, bëtská entsànga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnënga, chëngbe nyëts añémoca montseboše chë mándayana jtsepochócama. <sup>13</sup> Juan candabëntscuana, nyëtsca Bëngbe Bëtsabe juabna oyebuambnayënga y Moisesbe Ley nyë Bëngbe Bëtsabe amëndayama tmonjanobuambá. <sup>14</sup> Y tšëngaftanga chë soyënga jóyëngacñama šmotsebošëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná. <sup>15</sup> Chë jouenama tmojtsobenënga, chamouena ca” —Jesús tojánayana.

<sup>16</sup> Mëntšánaca Jesús tojánayana: “¿Ndayacá morsca entsànga imomna? Chënga mondmëna mo chë plazëngoca mondbetsetbiámama basetemëngcá; chënga chëngbe enutëngbiyoe jtsayebuáchana <sup>17</sup> y mëntšá jtsichámuana: ‘Tšëngaftangbiama fsënjaflautá y ndoñe chešmatlantšá; ngmënaca fsënjaversiá y ndoñe chešmatošachna ca.’ <sup>18</sup> Juan tonjánabo, y bëtská entsángbeñe ndoñe quenjatamana ni jasana, ni jofšiyana, y entsànga montsanichamo chana bacna bayëjbe juabna uambayá yojamna ca. <sup>19</sup> Morna, chë Bëngbe Bëtsá Entšá tbojanbemá tonjabo, y chana añe entsamama bëtská entsángbeñe jtsesayana y jtsofšëšayana, y entsànga montsichamo chana yapa uasayá y vinyoe tmoýá entsemna ca y Romocama impuesto entsángbiyoe atjanayënga y bacna soye amëngbe amigo ca. Pero Bëngbe Bëtsá endbëtsinýañyaye cha nyëts osertánana bomná yomnama, chë ndayá cha tojama ora ndayá chentšana tojóbcna soyëngaca ca” —Jesús tojánayana.

*Chë nduauenana entsànga  
(Lc 10.13-15)*

<sup>20</sup> Chentšana Jesús tojanontšë jucácanana chë entsànga, ndëmuanyënga imojoyena chë pueblënguñe ndayenache ba chabe bëts soyënga tojanma, chënga bacna soyënga amana ndoñe tmonsantajbanama y Bëngbe Bëtsabe benache ndoñe tmonanishachama. Mëntšá yojtsichamo: <sup>21</sup> “¡Tša lastema, Corazín puebloca entsángbiama! ¡Tša lastema, Betsaida puebloca entsángbiámna! Chë chentšë sënjama bëts soyënga, Tiro y Sidón bëts pueblënguentšë matënjochnënguse, chentša bacna entsànga ya tempo ngmënaca matmëntenoiuabó chëngbe bacna soyëngama y Bëngbe Bëtsabe benache matmëntishache; y chca tojamamama chaotsótatšëmbuama uajojësha entsayangaca matmëntopormanga y chëngbe bestšašñe jatinyá matmënjenotbótoto. <sup>22</sup> Pero ndegombre cbëyana, ntšamo entsànga tojamamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebmoma, chë Tiro y Sidonoca bacna entsángbe castiguama. <sup>23</sup> Y tšëngaftanga, Capernaumoca entsànga, ¿šmojtsejuabná celóntscoca atsebánanënga šmochtsemna ca? ¡Chë uabouana infernoye cmochantsësetjango! Chë muentšë sënjama bëts soyënga Sodomoca matënjochnënguse, choca entsànga ya tempo ngmënaca chëngbe bacna soyëngama matmëntenoiuabó y Bëngbe Bëtsabe benache matmëntishache, y chë bëts pueblo cabá cachcá mëntscuana mantsomñe. <sup>24</sup> Pero ndegombre cbëyana, quem luare jopochócama te, Bëngbe Bëtsá puerte jabuache cmochantsacastigaye, y chë Sodoma luaroca entsángbiyoe ndoñe nyëtsá jabuache quemochatacastigaye ca” —Jesús tojánayana.

*“Atšbiyoe mabënga y šmochjóchna”  
(Lc 10.21-22)*

<sup>25</sup> Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nyë batsá tatsëmbënga tcojanýañyé, chë tša tatsëmbënga y osertánëngbiama tcojaiytëme soyënga. <sup>26</sup> Añe, chama cbontsadorana, Taita, chca chaotsemnama tcojábosenayeca.

<sup>27</sup> “Atšbe Taitá lempe chca šonjatštá. Chë Uaquiñábíoye ndocná corente quebnatábuatma; nyë chë Taitá añe. Y chë Taitábíoye ndocná corente quebnatábuatma; nyë chë Uaquiñá añe, y ndábíoye chë Uaquiñá tojtseboše nda chë Taitá yomnama jinýañiyama, chánaca chë Taitábíoye bochantsábuatma.

<sup>28</sup> “Atšbiyoe mabënga nyëtsca tšëngaftanga uamëntšnayënga y bëtská trabajo uangmënënga, y atše chanjama tšëngaftanga chašmochnama. <sup>29</sup> Ntšamo canýe entšá, uacná yuguëšñe juabatsëcana juanatsama, cachcá, tšëngaftanga atše šmochjalesëncia jobnatsayama y jabuátambama. Atšbëntšana šmochjuatsjinýe: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebmoma. <sup>30</sup> Mo canýe uacnacá, ndoñe tishuta yuguëšeca o ndoñe uauta uasmanëshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nyëtsca soyënga jamama echántsemna ca” —Jesús tojánayana.

## 12

*Jesusbə uatsjéndayénga ochnayté trigo tmojanátabebe*

*(Mc 2.23-28; Lc 6.1-5)*

<sup>1</sup> Ché tempo, Jesús canýe ochnayté canýe jajajana yojtsachñējuana. Chabe uatsjéndayénga shéntseca imojtsemna, chíyeca tmojanontsé trigo juatabebiana y ché meshénga jasana.

<sup>2</sup> Ché fariseunga chca tmojáninýe ora, Jesús tmojaniana: —Minýe, acbe uatsjéndayénga canýe soye montsama y ché soye ochnayté jamama ndoñe quenátstslesciana ca.

<sup>3</sup> As Jesús tojanéyana: —¿Ndoñe šmëndualía y šmondétatšémbo ndayá David y chabe enuténga tmojanmama, shéntseca imojtsemna ora? <sup>4</sup> Chca orna, David, Bèngbe Bètsabe bèts yebnoye yojámashéngo y ché Bèngbe Bètsá chentše yojamnama inýinýnaye tandéšénga yojase. Ché tandése nýe ndánaca jasama ndoñe yonjalesenciana, ni Davidbiana, ni chabe enuténgbiana. Nýe bachnangbiana belesenciana ché tandése jasama. Masque David chca tojanma, Bèngbe Bètsá chora ndoñe tonjánayana David canýe bacna soye tojanma ca. <sup>5</sup> ¿O ndoñe šmëndualía y šmondétatšémbo, Moisesbe leyíne, ché bachnanga ochnayté Bèngbe Bètsabe bèts yebnentše jtsetrabájayana, pero ndoñe bacna soye ntsemmna ché bachnanga ochnayté ndoñe mondbóchnama? <sup>6</sup> Y atše šcuayana: Muenté canýa entsemna, cha ché Bèngbe Bètsabe bèts yebnentša bachnangbiana más uamaná endmēna y chabe améndayoca soyénga más entsámama ché bachnangbe mádayentša soyéngama. <sup>7</sup> Bèngbe Bètsabe uabemana palabrénguñe mēntšá endayana:

Atše sēntseboše tšēngaftanga lastemadénga chašmotsemna,

y ndoñe nýe bayénga chašmotsēbánaye Bèngbe Bètsá jētschuayama ca.

Ntšamo chíne entsayancá ndegombre cmojtsēsertánēse, tšēngaftanga ndoñe chēngbe contra šmattsichamo, ché ochnayté chca tmojtsamēngbiana. <sup>8</sup> Ché Bèngbe Bètsá Entšá tbojanbemá, ché entšá ochnayté tojtsama sóynaca jtsemándayana ca —Jesús tojánayana.

*Ché buashana cucuatše bomna entšá*

*(Mc 3.1-6; Lc 6.6-11)*

<sup>9</sup> Chentšana Jesús tojtsanoñe y chentša judiēngbe enefjuana yebnoye tojánamashéngo.

<sup>10</sup> Chentše yojtsemna canýe boyabása buashana buacuatše bomná. Ché fariseunga imojtsenguaye ndayánaca, as chca chénga jtsebomnama ndaye sóyeca Jesús mal jaquédama. Chcasna, chora chénga Jesús tmojantjá: —¿Queojtselesenciana canýe ochnayté šocá jáshnama ca?

<sup>11</sup> Y Jesús tojanéjua: —¿Nda tšēngaftanguentšá, canýe oveshá tbojtsebmoma y nýa ché ochnayté canýe fshantsentše atēfñoye ché oveshá tojtsótsatše, chora ché boyabása nanjá o ndoñe ché oveshá jatábocnama? <sup>12</sup> ¡Entšá oveshabiana puerta más uamaná endmēna! Chcasna, entselesenciana ché ochnayté tšabe soye jamama ca —Jesús tojanéyana.

<sup>13</sup> Chora Jesús ché buashana buacuatše bomnábioye tbojaniana: “Macuenýanējaná ca.” Y ché boyabásana tojanacuenýanējaná y chora chétsa tšabá yojtsatamna mo cach inýetšacá. <sup>14</sup> Pero ché fariseunga tmojésanbocana ora, tmojanontsé juabnayana ntšamo jamése Jesús jóbama.

*Ndayá ché Bèngbe Bètsabe juabna oyebuambnayá Jesusbiana tojánayana*

<sup>15</sup> Jesús ché soye tojántatšémbona ora, chentšana tojtsanoñe y ba entšanga tmojanasto. Nýetsca šoquēnga tojanashná, <sup>16</sup> y tojanamēndá chabiana entšángbeñe ndoñe chamondétsóyeuambnama. <sup>17</sup> Chca tojanamēndá, cachcá chaotsemnama ntšamo ché Bèngbe Bètsabe juabna oyebuambnayá Isaías tojanayancá. Cha mēntšá tojánayana:

<sup>18</sup> Muentše atšbe oservená entsemna. Atše cha sēnjabocacá, atšbe bonshaná, y atše corente chabiana sēntsoyejúá.

Atše chanjama atšbe Espíritu chabe ainaniñe chaotsemnama

y entšanga echanjabuayená, Bèngbe Bètsá nýetsca luarēnguēntšana entšangbiana yoch-jayanama chénga tšabá o ndoñe tšabá tmonjamama.

<sup>19</sup> Cha ndoñe queochátayajuatsana, ni queochátschembumbuana.

Chabe oyebuambnayana tsáshenañe ndocná queochatuena.

<sup>20</sup> Mo nda ché atcana šése ndoñe más jatsndbemana,

ché ndobenēnga cha ndoñe queochátapochocaye.

Mo nda ché quínýenēfjua nýe uabojátsena uajuinýnēfjua ndoñe ntsafsanana,

ché Bèngbe Bètsábeñe jtsošbuáchiyama imojtsebojátšangbe obatanana chábeñe, cha ndoñe queochátabuajuanaye.

Cha nýets añémoca echanjēftsetrabája,

entšanga chēngbe ainaniñe Bèngbe Bètsabe ndegombre soyénga chamóyēngacñēntscuana.

<sup>21</sup> Y nýetsca luarēnguēntšana entšanga chábeñe mochantsobátmana ca —cha tojánayana.

*Fariseunga tmojánayana Jesús Satanásbentsána obenana tojanóyëngacñe ca (Mc 3.20-30; Lc 11.14-23; 12.10)*

<sup>22</sup> Chora, Jesús yojtsemnoye canye boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínynama y chabu-atauénanama. <sup>23</sup> Y nyetsca entsanga ojanánënga imojtsichamo: “¿Mua yojtsemna chë Davidbentsána Uámana Entśá, chë Cristo ca?”

<sup>24</sup> Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatštá chë bayëjënga chauatëbuacnama ca.”

<sup>25</sup> Y Jesús yojtsetátsëmbo ntšamo chënga imojtsejuabnayama; as tojanëyana: “Canye amëndayentse entsanga tmojtsenojatá y tmojtseñayase, cachënga jenpochócana. Cachcá, canye bëts pueblentsa entsanga o canye yebnentsa pamállanga tmojtsenojatá y ndoñe tmontsenëyeunanëse, chënga ndoñe tšabá nyets tempo quemochátsmëna. <sup>26</sup> Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarentšë jëftsebmomnana? <sup>27</sup> Tšëngaftanga šmontsichamo atšë Beelzebube obenánaca chë bayëjënga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebmomna chë bacna bayëjënga jtëbuacnama? Chýecna, chënga montsinýinýná ntšamo ndegombre yomnana y tšëngaftanga ndoñe ndegombre soye šmontsichámuama. <sup>28</sup> Y atšna, chë Bëngbe Bëtsabe Espíritbeyeca chë bayëjënga entsángbentsána sëndëtëbuacana; y chë soye entsinýinýná Bëngbe Bëtsabe amëndayana tšëngaftangbioye tojóshjanguama.

<sup>29</sup> “¿Ntšamo nda nanjobenaye canye corente aňemo bomna entšabe yebnoye jamashënguana y chabe soyënga jtsebocana, ndoñe natsana chábioye tconjshëtsebatsëquëse? Nyë tcojshëtsebatsëquëšna aňne cuanjobenaye cha jefcana. Atšë ya chca Satanássoftaca sënjama.

<sup>30</sup> “Nda ndoñe átšëftaca tontsemná, atšbe uayayá jtsemnana. Y nda átšëftaca ndoñe tontsetrabája, chana atšbe contra jtsetrabájayana.

<sup>31</sup> “Chýeca cbëyana, Bëngbe Bëtsá entsanga echanjáperdonaye nyetsca chëngbe bacna soyënga y chë Bëngbe Bëtsabiana puerte bacá oyebuambnayana, mo chábioye cuafjoyenguangcá; pero ndoñe queochátaperdonaye chë Uámana Espíritbiana puerte bacá ichámënga. <sup>32</sup> Bëngbe Bëtsá bochanjaperdóna chë Cha Entśá tbojanbemabiana ndoñe tšabá ichamuábioye; pero chë Uámana Espíritbiana ndoñe tšabá ichamuábioyna, ni quem luarentšë, ni ndocna te quebochatsperdóna ca” —Jesús tojánayana.

*Tšabe betiye o ndoñe tšabe betiye tondmënana, jtsotatsëmbuana ntšamo tojashajoncá (Lc 6.43-45)*

<sup>33</sup> “Canye betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbmomna. Chë betiye tšabe betiye o ndoñe tšabe betiye tondmënana, jtsotatsëmbuana ntšamo chëshe tojashajoncá. <sup>34</sup> ¡Mëtscuaye entsanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsanga šmojtsemnëse? Er ndayá ainanoca becá tomnana entśá jtsóyebuambnayana. <sup>35</sup> Chë tšabe entśá, chë ainanoca tšabe juabnënga bomnentsána jtsóyebuambnayana, y chë bacna entsána chë ainanoca bacna juabnënga tobomnentsána jtsóyebuambnayana. <sup>36</sup> Y ndegombre cbëyana, chë entsangbiana tšabá o ndoñe tšabá tmonjamama jayanama tempo chaojjobuache ora, ndaye ndoservena palabra šmojóyebuambama, Bëngbe Bëtsabe delante šmochanjayana ndáyeca chca ca. <sup>37</sup> Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aňne o ndoñe cmontsemna castiganá jtsemnana ca” —Jesús tojánayana.

*Chë bacna entsanga Jesús tmojanimpadá canye bëts soye chaoma, chabe obenana jinýama (Lc 11.29-32)*

<sup>38</sup> Chentšana, básefta fariseunga y Moisesbe ley abuátambayënga Jesús tmojantjá: —Buatëmbayá, bënga fsëntseboše aca canye bëts soye chacoma, acbe obenana chašcuinýanýema ca.

<sup>39</sup> As Jesús tojanëjua: —Quem puerte bacna entsanga y ndošbuáchiyënga montseboše atšë canye bëts soye chaima, atšbe obenana jinýanýiyama; pero chca soye ndoñe quemochátinýe, sinó nyë chë ndayá yomna mo chë Bëngbe Bëtsabe juabna oyebuambnayá Jonássoftaca tojanopasá soycá. <sup>40</sup> Ntšamo Jonás unga te y unga ibeta chë bëts beonbe uafsbioye yojëftsemncá, cachcá chë Bëngbe Bëtsá Entśá tbojanbemá unga te y unga ibeta fshantse jashenoye echanjëftsemna. <sup>41</sup> Morsca entsanga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entsanga mochanjotsaye y morsca entsangbiana

mochanjayana ndoñe tšabá tmonjama ca; er chënga, Jonás yojtsabuayiyinaye ora, tmojanoyeuná y chë tšabe benache tmojtanishache, y chë mora muentše entsemnana, Jonabiamá más uamaná endmëna. <sup>42</sup> Morsca entsanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entsangbiamá echanjayana ndoñe tšabá tmonjama ca; er chana chë quem luare luajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiamá más uamaná endmëna ca —Jesús tojánayana.

*Ndayá inopása chë bacna entsángaftaca*  
(Lc 11.24-26)

<sup>43</sup> Jesús mëntsánaca tojánayana: “Canýe bacna bayëja canýe entsábentšana tojësebocna ora, chë bayëjna bojojo luarënguenache jtsanana ndayentše jóchnama onguayíñe, y canýe luare ndoñe tonjínýena ora cha jenójuaboyana: <sup>44</sup> ‘Atšbe oyenoye, chë ndayentšana sënjëftsebocnoye chanjesshëcona ca’. Y choye tojtashjango orna, jinýenana lempe tšabá cha jtesamashënguama, mo chentše ndocná tontsiyencá, tsajiniñe y lempe botamaniñe cuaftsemncá. <sup>45</sup> Chorna chë bayëjna jana y inýe canýsëfta bayëjenga chabiamá más opëjenga jobiatšana y nyëtsanga choye jamashjnana chë boyabásabeñe joyénanama. Y chca, chë boyabása tempscama más bacna entsá jtsemnana, chora chë natsanama más bayëjenga abama causa. Morsca puerte bacna entsángaftaca cachcá echanjochñënga ca” —Jesús tojánayana.

*Chë Jesusbe ndegombre pamillanguentsënga*  
(Mc 3.31-35; Lc 8.19-21)

<sup>46</sup> Jesús cabá entsanga yojtsëtsënaye ora, chabe mamá y catšátanga tmojánashjajna y imojtseboše Jesúseftaca jóyebuambayama. Nýe shjoca imojtsemna; <sup>47</sup> asna, canýe boyabása Jesúsbioye tbojanbuayená: —Ache mamá y ache catšátanga shjoca montsemna y montseboše ácaftaca jóyebuambayama ca.

<sup>48</sup> Pero Jesús chë jauenayama tojánabioye tbojaniyana: —¿Nda atšbe mamá yomna, y ndëmuanyënga atšbe catšátanga ca?

<sup>49</sup> Y cachora chabe cucuatše tojanatsbaná, chabe uatsjëndayënga tojanënyanyë y tojánayana: —Quemënga montsemna mo atšbe mamacá y mo atšbe catšatangcá. <sup>50</sup> Er ndánaca, ntšamo atšbe Taitá, celoca endmëná yobošcá tojtsama, jtsemnana atšbe catšata, atšbe uabena y atšbe mamá, atšbe ndegombre pamillanguentsá ca —Jesús tojánayana.

## 13

*Chë jenabe cuento*  
(Mc 4.1-9; Lc 8.4-8)

<sup>1</sup> Cach te, Jesús yebnentšana tojëftsanbocna y uafjajónaye tsachoca tojanótbema. <sup>2</sup> Mallajta entsanga choye tmojanobeconá; as Jesús, chë uafjajónayentše yojanamna canýe barquëshoye tojánasëngo, tojanótbema; y chë entsangna tsachoca imojtsemna. <sup>3</sup> Chorna ba soyëngama cuentëngaca chënga tojanabuatambá.

Mëntšá tojanëyana: “Canýe jená chë jénaye jaujuëshama yojëftsebocna. <sup>4</sup> Yojtsëjquëshaye orna, básëfta jénaye benache juachañe yojuatquëcjana, pero chë jaja shloftšënga imojástjajna y lempe imojtsósafne. <sup>5</sup> Inýe meshëngna ndëtsbenguíñe yojuatquëcjana, ndoñe yapa fshantse binýentše. Chiñna betscó yojuábocna, fshantse ndoñe jashenocana yonjanmëna causa, <sup>6</sup> pero shinýe yojábocna ora, puerte yojojënyána y yojtsancta; y yojtsábojo, bëtscá tbëtëjenga tondaye causa. <sup>7</sup> Inýe meshëngna ucmëshangañe yojuatquëcjana, y chë ucmëshangá yojuájua orna, lempe yojtsatscúe. <sup>8</sup> Y inýe meshëngna, uanguanëshiñe yojuatquëcjana y puerte botamana chiñe yojuashajo: ínýenache nýe canýe jénayentšana mo patse meshënga yojuashájona, ínýeñna mo chñënguana bnëtsana meshe y ínýeñna mo unga bnëtsana meshe.”

<sup>9</sup> Jesús chca jacuéntama tojanpochocá ora, mëntsá tojánayana: “Chë jouenama tmojt-sobenënga, šmochjouena ca.”

*Ndayeca Jesús cuentëngaca yojánabuatambaye*  
(Mc 4.10-12; Lc 8.9-10)

<sup>10</sup> Chora chë uatsjëndayënga tmojanobeconá y Jesús tmojantjá: —¿Ndayeca entsanga cuentëngaca cojtsabuatambá ca?

<sup>11</sup> As Jesús tojanëjua: —Bëngbe Bëtsá tšëngaftanga cmontsinýanýná nyëtsca chë mo iytëmená yomna soyënga chabe amëndayama, pero chë ínýëngbioyna ndoñe. <sup>12</sup> Nda tojtseboznábioye más jatšayana y chca cha corente bëtscá jtseboznana; pero chë tondaye tondboznábioyna, chë batšatema tobomna sóynaca mochántseboca. <sup>13</sup> Chíyeca atšbe

cuenténgaca chënga sentsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinýama; y masque beca chë soyënga chamouena, ndoñe tšabá quemochátuenana, ni queochátësertana. <sup>14</sup> Chcáyecna, chëngbeñe entsemna cachcá ntšamo chë Bëngbe Bëtsabe juabna oyeuambnayá Isaiás tojanayancá:

Masque beca chamouena, ndoñe queochátësertana.

Masque puerta chamotsantiešna, ndoñe quemochátinýe

<sup>15</sup> Quem entšanga ndoñe quemátsboše botamana jajuaboyana;

chënga uamatsáchtonënga montsemna

y chëngbe bomínýnaca cachcá.

Chca ndóñesna, chënga muantsobena jinýama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atšbe chënga chayatsebacama ca —cha tojéftsanbema.

<sup>16</sup> “Tšëngaftangna oyejuayënga šmochanjoyena, er šmondobomna bominye y matscuašënga Bëngbe Bëtsabe soyënga jinýama y jouenama. <sup>17</sup> Ndegombre cbëyana, banga Bëngbe Bëtsabe juabna oyeuambnayënga y nyetsca soyënguñe tšabá amënga tmonjánbošena chë tšëngaftanga šmontsonýá soyënga jinýama, y ndoñe chemátaninye; tmonjánbošena chë tšëngaftanga šmontsuenana soyënga jouenama, y ndoñe chemátanuena ca” —Jesús tojanëyana.

*Jesús chë jenabe cuentama tojanabuayená*

(Mc 4.13-20; Lc 8.11-15)

<sup>18</sup> “Chcasna, oído šmochajajo; chë jenabe cuento mëntsá endayana: <sup>19</sup> Chë Bëngbe Bëtsabe amëndayama tmojouena y ndoñe tontsësertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentšana jabëtsabuajuanama, chënga chiñe ndoñe chamondëtsošbuáchemá. <sup>20</sup> Y chë ndëtšbenguñe yojuatquécjana jénaye entsemna mo chë aifñe Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entšangcá; <sup>21</sup> pero ndoñe nyets tempo chana jocochájuana, y chca, ndoñe bayté Bëngbe Bëtsaftaca ntjéftsemnëngana, ndoñe yapa tmontsašbuaché causa. Inýenga chëngbioye mochantsëbuayëña y Bëngbe Bëtsabeñe betsošbuáchiyama mochanjasúfrianga; chiýeca chënga Bëngbe Bëtsabe palabra cachcá mochanjesonýaye. <sup>22</sup> Chë ucmëshangañe yojuatquécjana jénaye entsemna mo chë Bëngbe Bëtsabe palabra tmojouena entšangcá, pero quem luarentšá soyëngaca oyejuayënga jtsemnana yapa mochántsenojuabnaye y mallajta crocénana y ba soyënga jtsebornnama mochántseboše. Chiýeca chënga Bëngbe Bëtsabe palabra jtsebnëtjombana y ntšamo cha tojayancá ndoñe ntsamana. <sup>23</sup> Pero chë uanguanëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entšangcá. Mo canýe betiye puerta tšabá tojtsheshajuancá, chënga bëtscá tšabe nduño Bëngbe Bëtsabiama mochántsama. Inýenga inýengbiana más bëtscá soyënga mochántsama, y chca, inýenga jtsemnana mo chë patse meshënga tojanshajo jenaycá, inýenga mo chë chnënguana bnëtsancá y inýengna mo chë unga bnëtsana meshënga tojanshajo jenaycá ca” —Jesús tojanabuayená.

*Chë tríguañe bacna shacuanama cuento*

<sup>24</sup> Jesús mëntsánaca tojanacuntá: “Bëngbe Bëtsabe amëndayana endmëna mo chë tšabe jenaycá, canýe boyabása chabe jajañe yojáje. <sup>25</sup> Pero nyetscanga imojtsomañe orna, chabe uayayá yojáshjango y chë trigo jeniñe bacna shácuaña yojesejé y yojtsatoñe. <sup>26</sup> Y chë trigo yojuájua y ya yojtseshajuana orna, chë bacna shácuanëñaca yojuábocna. <sup>27</sup> As chë peonga imojá chë nduño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuaña chiñe tojuábocna ca?’ <sup>28</sup> Y chë nduño yojáuana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuaña jetsejashtsëtsama ca?’ <sup>29</sup> Pero chë nduño yojáuana: ‘Ndoñe. Chë bacna shácuaña šmojtsejashtsëtsana ora, chë trígnaca šmattsejashtse ca. <sup>30</sup> Más tšabana, cachcá mochjonýaye cánýiñe chaójuana, chë jaja saná játbana tempo chaojobuáchëntscuana. Chora chë trabájayënga chanjichamuá y chanjámëndaye natsana chë bacna shácuaña chamotsejashtsëtse y chamotsentsacuacjuá jtsejuinýiyama, y chentšana chë shajuana chamuatbaná y atšbe grano uaquëcjnaye yebniñe chamotsatsuamá ca’” —Jesús tojanayana.

*Chë mostaztiye jenayama cuento*

(Mc 4.30-32; Lc 13.18-19)

<sup>31</sup> Jesús mëntsánaca tojanacuntá: “Bëngbe Bëtsabe amëndayana endmëna mo canýe mostaza betiye jenaycá, canýe boyabása chabe jajañe yojáje. <sup>32</sup> Ndegombre, nyetsca jenayëngama chë mostaza jénaye chë más básetema endmëna, pero tojójua orna, chë jajañtšbe chë más bëts betiye jóbemana. Tša bëts betiye jtsemnana, chiýeca ba buacuashangá



jtsabomnana y chë jaja shloftšënga jana y chiñe uajajonëtmëngá jauábopormana ca” —Jesús tojánayana.

*Chë levadurama cuento*  
(Lc 13.20-21)

<sup>33</sup> Quem inñe cuéntnaca tojanëyana: “Bëngbe Bëtsabe amëndayana endmëna mo levadurcá; canñe shembása chana jenájuabana unga medida arninñañe, nñetsana chauabochama ca.”

*Ndáyeca Jesús entšanga cuentëngaca yojanabuayiyná*  
(Mc 4.33-34)

<sup>34</sup> Jesús nñetsca chë soyëngama lempe cuentëngaca entšanga jtsëtsëtsnayana, y cuentëngaca ndoñesna ndoñe yonjanoyebuambná. <sup>35</sup> Chca yojamna ndayá cachcá chaochnënguama ntšamo chë Bëngbe Bëtsabe juabna oyebuambnayá tojanayancá, mëntšá: Jabuátambamna cuentëngaca chanjôyebuambaye; chanjayana chë iytëmena soyëngama y chë entšanga ndoñe mondëtatšëmbo soyëngámncá; Bëngbe Bëtsá quem luare tojanma orscana chë soyënga yomna ca —cha tojánayana.

*Chë tríguañe bacna shácuaa cuentama Jesús tojanabuayená*

<sup>36</sup> Chentšana Jesús chë entšanga tojtanichamó y yebnoye tojtanamáshëngo. Chentšna chabe uatsjëndayënga tmojanimpadá ndayá chë bacna shacuanama cuento betsayancá chauabuayenama. <sup>37</sup> As Jesús tojanëyana: “Chë tsabe jénaye jená endmëna chë Bëngbe Bëtsá Entšá tbojanbemá, <sup>38</sup> y chë jajañna, quem luare. Chë tsabe jénaye entsemna chë Bëngbe Bëtsabe amëndayoye mochjámashjna entšanga, y chë bacna shácuaa entsemna chë bacna bayëjëngbe amëndayabe entšanga, <sup>39</sup> y chë uayayá, chë bacna shácuaa yojáye chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayënga chë angelotëmënga. <sup>40</sup> Ntšamo chë bacna shácuaa jtsejashtsëtsana y inñoye jtsatmetšana jtsejuinñiyama, cachcá echántsemna quem luare jopochócama te. <sup>41</sup> Chorna, chë Bëngbe Bëtsá Entšá tbojanbemá chabe angelotëmënga echanjichamuá chë inñyenga bacna soye chamomama amënga y chë bacna soyënga amënga chabe amëndayentšana chamotsajuanayama. <sup>42</sup> Y chora chëngbiöye chë uabouana ifñeshoye mochantsësetjango y chentše puerte mochanjenóbošachna y chë tsetšanama juatsašënga mochantsenoftšëjojnaye. <sup>43</sup> Chora, chë ntšamo Bëngbe Bëtsá yomandacá amënga corente mo shinycá mochantsebuashinñiyana chëngbe Taitá, Bëngbe Bëtsabe amëndayoca. Chë jouenama tmojtsobenënga, šmochjouena ca” —chora Jesús tojánayana.

*Chë fshantsiñe uaiytëmena bomnanama cuento*

<sup>44</sup> “Bëngbe Bëtsabe amëndayana endmëna mo chë fshantsiñe uaiytëmena bomnancá. Canñe boyabása chë bomnana yojuinñyena y chentšana iytëcana cachentše yojesatbontšá. Corente oyejuayá yojtá, nñetsca chabe bomna soyënga yojetsatobuiye y chentšana chë fshantse yojtobuámiñe ca” —Jesús tojánayana.

*Chë corente uámana fiantse ndëtsëtëmama cuento*

<sup>45</sup> “Mo canñe entšá uámana fiantse ndëtsëtëmënga obuamnañacánaca endmëna chë Bëngbe Bëtsabe amëndayana. <sup>46</sup> Chana, canñe corente uámana ndëtsëtëma yojinñyena ora, yojtá y lempe chë inabomna soyënga yojetsatobuiye y chë ndëtsëtëma yojtobuámiñe ca” —Jesús tojánayana.

*Chë atarraiešhama cuento*

<sup>47</sup> “Bëngbe Bëtsabe amëndayana endmëna mo canñe atarraiešhacá, buyeshoye jutšenana y nñetsca beonga jashebuáyana. <sup>48</sup> Chë atarraiešha jútjena tojtsamna orna, chë beonga ashebuáñayënga jtsashëbjátsëcana, tsachoye juyambana y chentše juatbemana chë beonga jabocacayama; chë tsábënga sbarëquënguñe juatsuámana y chë ndoñe tsábënga jtsëtsanana. <sup>49</sup> Cachcá echanjochnëngo quem luare jopochócama tempo chaojobuache ora. Chë angelotëmënga mochanjábocana chë tsabe entšángbentšana bacna entšanga jaluárama, <sup>50</sup> y chë bacna entšangna chë uabouana ifñeshoye mochantsatquëcjaye, y chentše puerte mochanjenóbošachna y chë tsetšanama juatsašënga mochantsenoftšëjojnaye ca” —Jesús tojana-cuntá.

*Anteo y tsëm uámana bomnana*

<sup>51</sup> Chora chabe uatsjëndayënga Jesús tojanatjá: —¿Lempe chama quecmojtsësertana ca? Y chënga tmojanjuá: —Arseñor, añe ca.

<sup>52</sup> As Jesús tojanëyana: —Canñe ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnana cha tojtsatsjëndá orna, mo canñe yebnentša nduiñcá cha jtsemnana. Chë nduiñna chabe grano uaquëcjñaye yebnocana anteo y tsëm uámana bomnana juabocnana.

Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanëyana.

*Jesús Nazaretoca*

*(Mc 6.1-6; Lc 4.16-30)*

<sup>53</sup> Jesús chë soyënga jacuéntama tojanpochocá ora, chentšana tojtsanoñe. <sup>54</sup> Y cachabe luaroye tojanashjango y chentša judiëngbe enefjuana yebnentse tojanontsé jabuátambama. Entšanga ojananänënga imojtsichamo: —¿Chë lempe yojtsetatšëmbcá ndëmoca mua tojuat-sjinÿe ca? ¿Ntšamo nantsobena chca bëts soyënga jamama ca? <sup>55</sup> ¿Mua ndoñe yondmëna chë calpinterbe uaquiniá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, <sup>56</sup> y chabe uabénanga ndoñe muentše bëngaftaca mondoyena? ¿Ndayentšana lempe chca mua yojtsebomna ca? —chënga imojtsichamo.

<sup>57</sup> Y chë causa chë entšanga tmojanotjayaná y ndoñe imontseboše cha joyeunayana. Pero Jesús tojanëyana: —Nÿetsquénache canÿe Bëngbe Bëtsabe juabna yebuambnayá bëtsá jabemëngana, pero cachabe luarentše, cachabe yebnentse ndoñe ca.

<sup>58</sup> Chíyeca chentše Jesús ndoñe tonjëftsanma ba bëts soyënga Bëngbe Bëtsabe obenánaca, chë entšanga chábeñe ndoñe montsanošbuaché causa.

## 14

*Ntšamo Juan chë Ubayaná tojanóbana*

*(Mc 6.14-29; Lc 9.7-9)*

<sup>1</sup> Chë tempo, Rey Herodes, chë Galileoca mandayá tojanuena ntšamo nÿetsca entšanga Jesucristbiana imojtsichamcá. <sup>2</sup> As cha chabe oservënënga tojanëyana: “Mua Juan chë Ubayaná ctsemna, obanënguentšana tojtayena, chíyeca chca obenana bëts soyënga jamama yojtsebomna ca.”

<sup>3</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamia. Herodes chca tojanma Herodíasbe causa, chabe catšata Felipe shema. <sup>4</sup> Juan Heródesebioye mëntšá ibnauácacana: “Ndoñe quenátšlesenciana aca acbe catšatbe shëmaftaca jobouamayama, acbe catšata cabá ainá yotsomñe ora ca.”

<sup>5</sup> Y chama Herodes yojtseboše Juan jóbana, pero entšangbiana yojtsauatja, er chënga innajuabnaye Juan ndegombre Bëngbe Bëtsabe obenánaca yojanoyebuambná ca. <sup>6</sup> Pero Heródesebe cumpleañ oboyejuaye ora, Herodíasbe bembe entšangbe delante tojanlantsá y Herodes puerta chama yojtsóyejuaye. <sup>7</sup> Chíyeca Herodes, jajúrase, tbojanšbuachená ndayánaca jatšetayana, ntšamo tbojotjañcá. <sup>8</sup> Y Herodíasna lempe bémëbëbioye ibojabuayená ntšamo Herodes jojuama. As chë bembe tbojaniyana: “Canÿe šcneniñe Juan chë Ubayanabe bestšaše šmatšetá ca.”

<sup>9</sup> Herodes chë soyama tbojanongmé, pero chë ófanëngbe delante jajúrase tbojanšbuachená causa, yojamánda chca chaotsemnama. <sup>10</sup> Y as tojanmandá chë Juan yojanëtámenoca chabe bestšaše chamuetsëstjanguama. <sup>11</sup> Chentšana, canÿe šcneniñe chë bestšaše tmojanamba y chë tobiashe tmojanëntšabuaché y chana, chabe mamábioye.

<sup>12</sup> Chentšana, Juanbe ústonënga tmojánashjaina, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojancuentá.

*Jesús shachna uaranga boyabásenga saná tojanacaredadó*

*(Mc 6.30-44; Lc 9.10-17; Jn 6.1-14)*

<sup>13</sup> Jesús chca tojanuena ora, canÿe barquëshañe tojtsanoñe canÿe bën luaroye, entšanga ndoyena luaroye. Pero entšanga chama imojátatšëmbona y chë pueblënguentšana tmojánbocana shecuátšëca cha juastama. <sup>14</sup> Chentšana, chë barquëshoicana tojtastjango ora, Jesús ba entšanga tojánanÿe, chë cha tmojánguanguënga. Chëngbiana tbojanongmé y chë entšanguentšana ba šoquënga tojanashná. <sup>15</sup> Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojaniyana: —Ya jetiñe entsemna y quem luariñe ndocná quenatiyena. Entšanga cuantichamuá, pueblotëmëngoye chamotsoñama, saná chamobuámiñiñama ca.

<sup>16</sup> As Jesús tojanëjua: —Ndoñe quenátšiyta chënga chamotsatoñama. Tsëngaftanga saná šmochjacaredádaye ca.

<sup>17</sup> Y chënga tmojanjuá: —Muentše tondaye queftsátsbomna; nÿe shachna tandëse y uta beónata ca.

<sup>18</sup> As Jesús tojanëyana: —Chë soyënga moye miyëbo ca.

<sup>19</sup> Chentšana Jesús tojanmandá entšanga chamoshëntsjatbiamama. Chorna, chë shachna tandëse y chë uta beónata tojanca, celoye tojanontješé y Bëngbe Bëtsábioye chama tbojtanchuá. Chora chë saná tojanjatá, chabe uatsjëndayënga tojanëjátaye, y chëngna nÿetsca entšanga tmojanacaredadó. <sup>20</sup> Nÿetsca entšanga tmojanse jtoshachaye nÿetšá y cabá chë

ojamnētēmēngaca bnētsana uta sbarēcua tmojanajutjé. <sup>21</sup> Chē tmojansēnga imojamna mo shachna uaranga boyabāsenga, shembāsenga y bāsenga ntjacuntacá.

*Jesús bėjaye juatsbuacá yojtsaye*  
(Mc 6.45-52; Jn 6.16-21)

<sup>22</sup> Chentšana, Jesús chabe uatsjédayēnga tojanamēndá chē barquēshoye jtamashjnama y chē uafjajónaye chenguánoica chabe natsana jashjajnana. Chēntscuana Jesús entšanga yojtichamuá. <sup>23</sup> Nyetścanga tojanichamó orna, Jesús canye tjoye tojántsjua canya jtsemnana, Bēngbe Bētsáftaca jencuéntama. Yojaibétata ora, cha canya chentše yojtsemna, <sup>24</sup> y chē barquēshana tsachocana bēnoca yojtsamna. Y chē olēshēnga chē barquēsha yojtsájantšetaye, chē binjia chēngbe contra yojtsemna causa. <sup>25</sup> Ya bínjanoyna, Jesús chēngbioye yojobeconá; bėjaye juatsbuacá yojtsaye. <sup>26</sup> Chabe uatsjédayēnga chca cha tmojáninye orna, tša imojocchauatjaná y puerte auatjanánēnga tmojanoyó: —¡Canyē añemēse entsemna ca!

<sup>27</sup> Pero chora Jesús tojanéyana: —¡Añemo šmochtsebmoma, atše Jesús sēndmēna; ndoñe matauatjēngana cá!

<sup>28</sup> Chora Pedro, Jesúsbioye tbojanianyana: —Bēngbe Utabná, ndegombre aca tcojtsemnēse, momandá atše bėjaye juatsbuacá ácbioye chayá ca.

<sup>29</sup> Y Jesús tbojanianyana: —Mabo ca.

Chora Pedro chē barquēshoicana tojánastjango y tojanontšé bėjaye juatsbuacá Jesúsbioye jama. <sup>30</sup> Pero chē binjia tša jabuache yojtsemnana tojáninye ora, Pedro puerte yojtsauatja y tbojanontšé jtsenatjēmbambana. Chiyeca cha jabuache tojanchembo: —¡Bēngbe Utabná, šmatsbocá ca!

<sup>31</sup> Y cachora Jesús tbojtano buacuetēntsiye y tbojanianyana: —¡Tša batšatema ošbuachiyá! ¿Ndáyeca ndoñe bētsá átsbeñe contošbuaché ca?

<sup>32</sup> Chentšana chē barquēshoye chata tbojtanamáshēngo y cachora chē binjia bonguana yojtsatsmēna. <sup>33</sup> Y chora, chē barquēshoye imojtsemnēnga Jesusbe shecuatšentše tmojanoshamentšé y tmojanianyana: —¡Aca ndegombre Bēngbe Bētsabe Uaquíñá comna ca!

*Genesaret ca uabáinoca, Jesús ba šoquēnga tojanashná*  
(Mc 6.53-56)

<sup>34</sup> Chē uafjajónaye tmojánenashbuachengo y canye luare Genesaret ca uabáinoye tmojánashjajna. <sup>35</sup> Chentša entšanga Jesús tmojantēmbá ora, chē luarentša nyetsca entšanga chama tmojántatsēmbona. As chē entšanga chēngbe šoquēnga Jesúsbioye tmojanēnatse. <sup>36</sup> Y imojtseimpadana nye mo chabe entšayá sibiájuanaca juabojajuama chē šoquēnga chaulaesciama. Y nyetścanga chabe entšayá sibiájua tmojanábojajēnga, šhnánēnga imojtsatoquédaye.

## 15

*Ndáyeca canye entšá Bēngbe Bētsabe delante ndoñe tšabia nántsemna*  
(Mc 7.1-23)

<sup>1</sup> Chora básefta fariseunga y judiēngbe ley abuátambayēnga, Jerusalenocana tmojánabēnga, Jesúsbioye tmojanobeconá y tmojanianyana: <sup>2</sup> —¿Ndáyeca acbe uatsjédayēnga ndoñe montsama chē ntšamo bēngbe bēts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bēnga chē judiēnga fsēnduamancá, Bēngbe Bētsabe delante tšábēnga jtsatšmēnama ca?

<sup>3</sup> As Jesús tojanējua: —¿Y ndáyeca tšēngaftanga ndoñe šmontsama ntšamo Bēngbe Bētsá tojanmandacá, nye cach tšēngaftangbe bētsētsanga imnētsama soyēnga jtsamama ca? <sup>4</sup> Bēngbe Bētsá mēntšá tojanmandá: “Acbe bētsētsata stētsoye ndoñe catjáquedaye”, y “nda cachabe bētsētsatbiama podesca tojóyebuambase, chana jóbanama jtsemnana ca.” <sup>5</sup> Pero tšēngaftanga šmondbētsichamo canye entšá canobena chabe taitá o chabe mamá jauyanana: “Lempe ntšamo sēndbomncá Bēngbe Bētsá jaserviama entsemna, chiyeca tondaye quetsátsbmoma aca juajabuáchama ca”; <sup>6</sup> y šmondbētsichamo nye ndánaca chca tojayanēse, ya ndoñe ntsemnana chabe taitá o chabe mamá stētsoye ndoñe ntjaquédana, ni ntjuajabuáchana ca. Y chca, tšēngaftangbiana tondaye ntsámanana ntšamo Bēngbe Bētsá tojanmandacá, y aife šmontsama ntšamo tšēngaftangbe bētsētsanga imojanamancá. <sup>7</sup> ¡Bacna entšanga, ntšamo ndegombre šmojuabnacá ndinjinjnyēnga! Nye tšabá chē Bēngbe Bētsabe juabna oyebuambnayá Isaias tšēngaftangbiana tojanoyebuambá, mēntšá tojánayana ora:

<sup>8</sup> Bēngbe Bētsá tonjayana: “Quem entšanga mondbētsichamo Bēngbe Bētsá tša tšabia yomna ca; chca nye uayásaca, pero chēngbe ainanentše atšbiama ndocna tšabe juabnēngaca.

<sup>9</sup> Chēnga nye bonamente mondbētsichamo: Bēngbe Bētsá tša tšabia yomna ca; chēnga nye entšangbe mandēnga jtsabuátambayana y Bēngbe Bētsabe mandēnga ndoñe ca” —cha tojánayana.

<sup>10</sup> Chentšana Jesús entsānga tojánachembo y tojaněyana: —Smochjouena y chacmēsertá. <sup>11</sup> Ndayá entsá tojttesacá, ndoñe quebochátsbema Běngbe Bětsabe delante ndoñe tsābia. Inyētšá comna: ndayá entsá tojtsejuabná y tojtsoyebuambnacá endobena cha jabemana Běngbe Bětsabe delante ndoñe tsābia ca.

<sup>12</sup> Chora chě uatsjéndayěnga Jesúsbiye tmojanobeconá y tmojaninyana: —¿Quéctsetatsēmbo, ntšamo tconjayanama chě fariseunga ndoñe tsābá chenatěuénana ca?

<sup>13</sup> As Jesús tojanějua: —Ndaye betiye atšbe Taitá celocá ndoñe tonjájese, tbětějocana mochántsejashitse. Cachcá echanjama chě nýe entsāngbe buatěmbana soyěngaca. <sup>14</sup> Cachcá mónýaye; chěnga montsemna mo jtaněnga inýe jtaněnga unachayěngcá. Y canýe jtaná inýe jtaná tbojtsánachase, nýets útata canýe tluabentše bochanjetsótsatše ca —Jesús tojánayana.

<sup>15</sup> Chora Pedro, Jesúsbiye tbojaninyana: —Ntšamo chě cuento bėtsayanama šmabuayená ca.

<sup>16</sup> As Jesús tojanějua: —¿Tsěngaftāgnaca cabá ndoñe cmontsēsertana ca? <sup>17</sup> ¿Cabá ndoñe cmontsēsertana lempe ntšamo šmojascá uafsbioye jomashěnguana y chentšana cuerpentšana jtabocnana? <sup>18</sup> Pero ntšamo šmojtsoyebuambnacana lempe ainanocana jtsóbocanana y chě soye endobena tsěngaftangbioye Běngbe Bětsabe delante ndoñe tsābenga jábiamana. <sup>19</sup> Ainanocana jtsóbocanana bacna juabněnga: jenóbama, shema o boyábioye inýaftaca jaingñama, shembása o boyabásaftaca bacna soye jamama, jatbėbama, jobostėrama y inýabiamana jtsayátsenayama. <sup>20</sup> Chě soyěnga cocayé jtsobenana entsābioye Běngbe Bětsabe delante ndoñe tsābia jabemama; pero chě ndoñe ntsacuentšabiana ndayá jasama ora, ndoñe ntsobenana Běngbe Bětsabe delante ndoñe tsābia jabemama ca —Jesús tojánayana.

*Canýe shembása inýe luarocana ashjangoná Jesúsbeñe yojtsosbuache  
(Mc 7.24-30)*

<sup>21</sup> Jesús chentšana, Tiro y Sidón luarěngoye tojtsanoñe. <sup>22</sup> Canýe shembása Caná luarocá chentše inoyena; cha Jesúsbiye yojobeconá y mēntšá yojtsáyebuache: —¡Utabná, Rey Davidbentšana Entšá, šmotselastemá! ¡Atšbe bembe puerte entsesufrina, bacna bayějbe juabna entsebmna causa ca!

<sup>23</sup> Jesús ndocá thonjanjá. As chabe uatsjéndayěnga tmojanobobeconá y tmojanimpadá: —Chě shembása mēyana chaotsatoñe; běngbe ústonoye yapa entsáyebuache ca.

<sup>24</sup> As Jesús tojánayana: —Běngbe Bětsá atše šonjichmó jtsanýenama nýe chě entsānga, chě mo ótsena oveshěngcá imomněnga Israeloquěnga, y chě ndoñe judiěngna ndoñe ca.

<sup>25</sup> Pero chě shembása tojána, Jesusbe shecuatšentše tojanoshamentšé y tbojaninyana: —¡Utabná! Diosmanda pavor šmotsebema. ¡Šmotsajabuache ca!

<sup>26</sup> Y Jesús tbojanjá: —Chě judiěnga mondměna mo Běngbe Bětsabe basengcá y atše ácbioye tchojuajabuache y chěngbioye ndóñesna, nántsemna mo chě básengbe saná chěnga cuatšěbaquěcá y quešěnga ftšěbuajocá. Chca jamana ndoñe tsābá quenátšmēna ca.

<sup>27</sup> As cha tbojanjá: —Arseñor. Pero chě quešěngnaca chěngbe nduiñěngbe mesěshentšana tmojatquécjanateměnga mondbase, chě nduiñěnga tmojtsesá ora. Chcasna, Diosmanda šmotsajabuache ca.

<sup>28</sup> Chora Jesús tbojaninyana:

—¡Shembása, Běngbe Bětsábeñe tsā ošbuachiyá comna! Ntšamo cojtseboščá chca chaotsemna ca.

Y cach orscana chabe bembe tsābá yojtsatsmēna.

*Jesús ba šoquěnga tojanashná*

<sup>29</sup> Jesús chentšana tojěťsanbocna y chě Galilea uafjajónaye tsachoye tojána. Chentšana, canýe batsjoye tojántjua y choca tojanótbema. <sup>30</sup> Mallajta entsānga Jesús yojtsemnentše tmojánashajna, y coshetěnga, jtaněnga, tsābá jobónjuama ndobeněnga, nděbianga y ba šocana bomněnga imojtsěnachaye. Jesusbe shecuatšentše tmojaněshejango y cha nýetscanga tojanashná. <sup>31</sup> Y chca orna, chě entsānga tmojáninýe: chě nděbianga imojtsatoyebuambná, chě tsābá jobónjuama ndobeněnga tsābá imojtsatsmēna, chě coshetěnga tsābá imojtsatana y chě jtaněnga yojtsěbinýna; y chama chěnga corente ojanáněnga imojtsemna. Chora chěnga tmojanontšé jětschuayana chě Israelentša entsānga imojánadorana Běngbe Bětsá.

*Jesús canta uaranga boyabásenga saná tojanacaredadó  
(Mc 8.1-10)*

<sup>32</sup> Chentšana Jesús, chabe uatsjéndayěnga tojánachembo y tojaněyana: —Quem entsāngbama šontsengmēna, er ya unga te chěnga átšeftaca muentše montsemna y jasama tondaye quemátšbomna. Atše ndoñe quetsátsboše ntjascá cachěngbe yebnoye chěnga jtichamuana, er benachiñe shěntsama nantsabuatěcja ca.

<sup>33</sup> As chabe uatsjéndayěnga tmojantjá: —¿Ntšamo muatjobenaye quem luarentše, ndocna entsá ndoyenentše, chěfta entsāngbama saná jinýenama ca?

<sup>34</sup> Y Jesús tojanatjá: —¿Bueta tandëse šmojtsebmoma ca?

Y chënga tmojanjuá: —Canýsëfta tandëse y básefta beonatëmënga ca.

<sup>35</sup> Chora Jesús tojanamëndá nýetsca entsanga fshantsiñe chamothbiamama. <sup>36</sup> As chë canýsëfta tandëse y chë beonatëmënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjëndayënga tojanëjatá. Chentšana nýetsca entsángbioye tmojanacaredadó. <sup>37</sup> Nýetsca entsanga tmojanse jtshachaye nýetsá. Y chentšana cabá canýsëfta bëts sbarëcua tmojanajutjé chë tojanójamëtemëngaca. <sup>38</sup> Chë tmojansënga imojamna canta uaranga boyabásenga, shembásenga y básenga ntjacuntacá. <sup>39</sup> Chentšana Jesús, chë entsanga tojtanichamó, barquëshoye tojánamashëngo y Magadán luaroye tojtsanoñe.

## 16

*Chë fariseunga y saduceunga tmojánbošena Jesús chaoma canýe bëts soye*

*(Mc 8.11-13; Lc 12.54-56)*

<sup>1</sup> Fariseunga y saduceunga tmojána Jesús jinýama, y jisháchichiyama imojtseimpadana canýe bëts soye chaoma, as jtsetatšëmbuama Jesusbe obenana ndegombre Bëngbe Bëtsábioyana tainóbocanama.

<sup>2</sup> Pero Jesús tojanëjua: “Tšëngaftanga jetiñoje šmondbëtsichamo: ‘Yëfse tšabe te echántsemna, er celoca buánganiñe entsemna ca.’ <sup>3</sup> Y cachëse šmondbëtsichamo: ‘Mënté echanjuafte, er celoca buánganiñe y ibetiñe entsemna ca.’ Tšëngaftanga celoye jontješiyëse, ntšamo chë tempo yochtsemnama tša tšabá jayanama šmojtsoberenëse, ¿ndáyeca ndoñe šmontsobena jtsetatšëmbuana ndaye bëts soye Bëngbe Bëtsá quem tempo cmojtsinýanýama? <sup>4</sup> Quem puerte hacna entsanga y ndošbuáchiyënga montseboše atše canýe bëts soye chaima, obenana jinýanýiyama; pero ndoñe chca quemochátinýe, sinó nýe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá ca” —Jesús tojánayana.

Chora Jesús tojésanabashejuana y chentšana tojtsanoñe.

*Jesús tojanabuayená chë fariseungebuatëmbana soyëngama*

*(Mc 8.14-21)*

<sup>5</sup> Chë uafajónaye chenguanocana chënga tmojtanabo ora, chë uatsjëndayënga yojësebnëjtomba tandëse jesocñana. <sup>6</sup> Chora Jesús tojanëyana: —Smochtsantješna; cuedado šmochtsebmoma chë fariseunga y saduceungebe levadurama ca.

<sup>7</sup> Pero chë uatsjëndayëngna imojtsenatsëtnaye: —Chca entsichamo, bënga tandëse ndoñe tmonjesocñama ca.

<sup>8</sup> Jesús chë soye yojtsetatšëmbo; chíyeca mëntsá tojanëyana: —¿Ndáyeca tandësama šmojtsenatsëtná ca? ¡Tša batšatema ošbuáchiyana šmobomna! <sup>9</sup> ¿Cabá ndoñe cmontsësertana y ndoñe šmontsabouñýna chë shachna tandësentšana shachna uaranga entsanga sënjanëjuatsema y bnëtsana uta sbarëcua šmonjánajutjema? <sup>10</sup> ¿Y ndoñe šmontsabouñýna chë canýsëfta tandësentšana canta uaranga entsanga sënjanëjuatsema y canýsëfta sbarëcua šmonjánajutjema? <sup>11</sup> ¿Ndáyeca ndoñe cmontsësertana atše tandësama ndoñe sëntsoýebuambnama? Cuedado šmochtsebmoma fariseunga y saduceungebe levadurama ca —Jesús tojanëyana.

<sup>12</sup> As chora chë uatsjëndayënga tojanësertá, Jesús ndoñe tonjánayana chë tandësentša levadurama cuedado jtsebmomna ca, sinó ndayá chë fariseunga y saduceungebe buatëmbana soyëngama.

*Pedro tojánayana, Jesús chë Cristo bëtsemnama*

*(Mc 8.27-30; Lc 9.18-21)*

<sup>13</sup> Jesús, Cesarea de Filipo luaroye tojánashjango ora, chabe uatsjëndayënga tojanatjá: —¿Nda ca entsanga imojtsichamo chë Bëngbe Bëtsá Entšá tbojanbemá yojtsemna ca?

<sup>14</sup> Chënga tmojanjuá: —Báseftanga montsichamo Juan chë Ubayaná ca, ínýengna Elías ca, ínýengna Jeremías y ínýengna tempasca inýe Bëngbe Bëtsabe juabna oyebuambnayá ca.

<sup>15</sup> As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

<sup>16</sup> Chora Simón Pedro tojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

<sup>17</sup> Y Jesús tbojanayana: —Simón, Jonasbe uaquiñá, oyejuayá cochanjoyena. Ndocna quem luarentša entšá chë soye checmatinýinýe, sinó atšbe Taitá, celoca endmëná. <sup>18</sup> Y mëntsánaca cbëyana: Mora acna Pedro o chë ndëtsbecá contsemna, y chë ndëtsbeñe atšbe bëts yebna chanjajebo, y ni Satanás, chabe obenánaca entšá jóbanama, queochatobenaye jtsepochócama. <sup>19</sup> Atše cbochanjátsetaye obenana, mo llavëjca, entsanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuënta ora, canýe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y

cháftaca chacojtsencuénta ora, canýe soye aíñe chaotsemna ca chacojayanése, Bèngbe Bètsá echanjayana aíñe chca chaotsemna ca —Jesús tbojanayana.

<sup>20</sup> Chentšana chabe uatsjédayënga tojanamëndá ndocnábeñe ntsecuéntayana cha, Jesús, chë Bèngbe Bètsabe Uámana Uabuayaná, chë Cristo bétsemnama.

*Jesús tojánayana cha ibojamna jóbanana y jtayenana ca*  
(Mc 8.31-9.1; Lc 9.22-27)

<sup>21</sup> Chorscana Jesús tojanontsé chabe uatsjédayënga jábuayenana cha ibojtsemna Jerusalenoye jama, y chocna chë bétšëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerte chaopadecema ca. Tojanëyana cha mochjanóba, pero unga tianoye yochtanayena ca. <sup>22</sup> Chora Pedro, Jesúseftaca tojanoluaré y tojanontsé mëntšá uatsétnayana: —¡Atšbe Utabná, Bèngbe Bètsá ndoñe chaondëlesenciá chca chaopasama! ¡Ndocna te quenisopodena chca ácaftaca jopásana ca!

<sup>23</sup> As Jesús tojanobuértana y Pédrëbïoye tbojanayana: —¡Satanás, átsbentšana mojuaná! ¡Aca contseboše atše canýe bacna soye chašócochënguama! Pedro, acbe juabnënga Bèngbe Bètsábïocana ndoñe quenatóbocana, sinó nýe entšángbentšana ca.

<sup>24</sup> Chentšana Jesús chabe uatsjédayënga tojanëyana: —Nda atšbe uatsjendayá jtsemnama tojtseboše, cháuyana nýe Bèngbe Bètsá yobena sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbïama jasúfriama chaotseprontana y cruciñe jobanámna. <sup>25</sup> Nda tojtšama quem luarentše bétscá soyënga jtsebomnama y atšbïama jasúfriama ndoñe tontseprontana, chë entšá chë nýetsca tescama yomna tšabe vida echanjopérdia. Pero nda quem luarentša soyënga cachcá tojéftsonýá atše juastama, masque chaóbana, chë nýetsca tescama yomna tšabe vida echántsebomna. <sup>26</sup> ¿Ndayama entšá buanjóservia nýetsca quem luarentša soyënga jtsebomnana, chë nýetsca tescama yomna tšabe vida tojtšoperdese? Ndegombre, canýe entšá chë nýetsca tescama yomna tšabe vida tojtšoperdese, ndocna soye quenátsmëna cha chaobená joyiyama, chë nýetsca tescama yomna tšabe vida jtsebomnama. <sup>27</sup> Chë Bèngbe Bètsá Entšá tbojanbemá, chabe Taitabe obenánaca y puerte buashinýinýaniñe echanjabo chabe angelotëmëngaftaca, y chora cada canýabïoye bochántatsetaye cachcá ntšamo cada ona tojéftsemcá. <sup>28</sup> Ndegombre šcuayana: Báseftanga muentše montsemnënga ndoñe quemochatóbana, Bèngbe Bètsá Entšá tbojanbemá amëndayacá jabana ntjéftsinýá ca —Jesús tojánayana.

## 17

*Jesús inýetšá tojanobinýná*  
(Mc 9.2-13; Lc 9.28-36)

<sup>1</sup> Chentšana chnënguana tianoye, Jesús tojéftšanëbiatše Pedro, Santiago y chabe catšata Juan, y inýoye tojanënatse nýe chënga, canýe bétš tjoye. <sup>2</sup> Chentše, chëngbe delante inýetšá cha tojanobinýná. Chabe jubíá shinýcá yojtsebuashinýinýana, y chabe uichëtjonëjuangana mo binýiñicá uafjantšëjuangá yojtsamna. <sup>3</sup> Chca orna, chabe uatsjédayënga tmojáninýe Moisés y Elías tbojanobinýná, Jesúseftaca encuéntaye.

<sup>4</sup> Chora Pedro, Jesúsbïoye tbojanayana: “Bèngbe Utabná, itša tšabá bëngbïama cuanmëna muentše jtsemnana ca! Tcojtsebošëse, unga tambotëmënga atše chjapórma: canýetema acbïama, inýetema Moisesbïama y inýetema Elíasbïama ca.”

<sup>5</sup> Pedro chca yojtsóyebuambnantscuana, canýe buashinýinýana jantšetëshe nýetscanga yojáutsbotse. Y chë jantšetëšhoicana canýe oyebuambnayana tmojanuena mëntšá: “Mua atšbe bonshana Uaquiná endmëna, atše chabïama sëntsoyejuá. Cha šmochtseyunana ca.”

<sup>6</sup> Y chë uatsjédayënga chca tmojanuena ora, tmojanoshamentšë y jubïaca fshantsóntscöñe tmojanotsejbëna, puerte auatjanánënga. <sup>7</sup> Chora Jesús chabe uatsjédayëngbïoye tojanobeconá, tojánabojajo y tojanëyana: “Matëtsbananga; ndoñe matauatjëngana ca.”

<sup>8</sup> Y tsbanánoye tmojanontješé ora, Jesús nýe canýa tmojáninýe, ndocná inýa más.

<sup>9</sup> Chë tjocana imojtsatstsmaye ora, Jesús tojanamëndá: —Bèngbe Bètsá Entšá tbojanbemá obanënguentshana candëtayenëntscuana, ndocnábeñe chë šmonjinýe soyama šmattsecuéntaye ca.

<sup>10</sup> As chë uatsjédayënga Jesús tmojantjá: —¿Ndáyeca chë ley abuátambayënga mondbétsichamo, canmëna Elías jabana chë Bèngbe Bètsabe Uámana Uabuayanabe natsana ca?

<sup>11</sup> Chora Jesús tojanëjua: —Ndegombre canýa Eliascá natsana echanjabo y ntšamo jtsemnama yomncá, lempe echánjabatsma ca. <sup>12</sup> Pero atše cbëyana, canýa mo Eliascá ya tonjabo, entšanga ndoñe chematanotëmbá y cháftaca entšanga tmonjanma lempe ntšamo

tmojanbošencá. Y cachcá, chë Bëngbe Bëtsá Entšá tbojanbemá entsangbe cucuatšíñe echanjasúfria ca —Jesús tojánayana.

<sup>13</sup> Chora chë uatsjéñdayënga tojanësertá, Juan chë Ubayanabiamá Jesús chca yo-jtsëtsëtsnama.

*Jesús, canye bacna bayëja tbojanbojuaná*

*(Mc 9.14-29; Lc 9.37-43)*

<sup>14</sup> Entšanga imojtsemnaye chënga tmojtanashajna ora, canye boyabása tojanobeconá, Jesusbe natsanoica yojoshamentšiyé y tbojaníyana: <sup>15</sup> —Utabná, atšbe uaquiñá motse-lastemá. Cha ataque bontšësháchichana y puerte entsesufrina, er cha inye ora iñoye jtseshajayana y inye orna, buyeshoye jtsoshbuetšana. <sup>16</sup> Acbe uatsjéñdayëngbiye cha sënjuánatse y ndoñe chematobená jtseboshnama ca —cha tbojaníyana.

<sup>17</sup> As Jesús tojánayana: —jNyetšá ndošbuáchiyënga y bacna entsanga ca! ¿Buetayté sojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? Moye chë básetema mánatse ca.

<sup>18</sup> Chora Jesús, chë basetëmbëñe bacna bayëjbioye tbojanácacana y chábentšana cha tojésanbocna. Cach orscana chë básetema tšabá yojtsatsmëna.

<sup>19</sup> Chentšana, chë uatsjéñdayënga luaroca Jesúseftaca tmojanoyebuambá y tmojaníyana: —¿Ndáyeca bënga ndoñe fsënjobená chë bacna bayëja jtabocnama ca?

<sup>20</sup> Y Jesús tojanéyana: —Tšëngaftanga tša batšatema ošbuáchiyana bomna causa. Ndegombre scuayana: tšëngaftanga batšatema ošbuáchiyana šmojtsebomnëse, masque nye mo canye mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena. <sup>21</sup> Pero chca bayëjënga jtëbuacnama jobenayana nye Bëngbe Bëtsáftaca jencuëntase y chama tondaye ntjascá jtsemnëse ca —Jesús tojanéyana.

*Jesús cachiñe tojánayana cha ibojamna jóbanana y jtayenana ca*

*(Mc 9.30-32; Lc 9.43-45)*

<sup>22</sup> Jesús y chabe uatsjéñdayënga cánýiñe Galilea luaroye imojétsaye ora, cha tojanéyana: “Chë Bëngbe Bëtsá Entšá tbojanbemá entsangbe cucuatšíñe mochanjáboshjona, <sup>23</sup> mochanjóba, pero unga tianoye echántayena ca.” Chë causa chë uatsjéñdayënga puerte ngménaca imojtsemna.

*Chë Bëngbe Bëtsabe bëts yebnama impuesto jtsatsquëcjnyama*

<sup>24</sup> Jesús y chabe uatsjéñdayënga Capernaumoye tmojánashajna ora, chë Bëngbe Bëtsabe bëts yebnama entsángbiye impuesto atjanayënga Pédrëbioye tmojána y tmojantjá: —¿Acbe बातëmbayá Bëngbe Bëtsabe bëts yebnama impuesto queonýbetsatsquëcjnyaye ca?

<sup>25</sup> Y Pedro tojanéjua: —Aíñe, cha endbetsatsquëcjnyaye ca.

Chentšana, Pedro chë yebnoye tojánamashëngo ora, Jesús natsana mëntšá chábioye tbojaníyana: —Simón, ¿ntšamo catjájuaboye? ¿Quem luarentša reyënga ndëmuanyëngbiye impuesto imnétsayëngacaye y crocénana imnétsatjanaye: cach luarentše oyenëngbiye o chë inye luarocana ashjajnëngbiye ca?

<sup>26</sup> As Pedro tbojanjá: —Chë inye luarocana ashjajnëngbiye ca.

Y Jesús tbojaníyana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnyama ca. <sup>27</sup> Pero ndocná mal chabonduínýnanamna uafajónayoye motsa, azuelëfjua cochjútsëna y chë natsana chaojuásjana beona cochjuábocna. Cochjuayetëfjoná y choye crocénana cochanjínýena y chánaca echanjoshjache atšbiamá y acbiamá jëtsjáuama. Cochjëftsejatsëca y cochjatsboshjona ca —Jesús tbojaníyana.

## 18

*¿Nda chë más uamaná yomna?*

*(Mc 9.33-37; Lc 9.46-48)*

<sup>1</sup> Chentšana chë uatsjéñdayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

<sup>2</sup> Chora Jesús canye basetëmbioye tbojanchembo y chëngbe tsëntsaca tbojanatsá. <sup>3</sup> Y tojánayana: —Ndegombre cbéyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguma. <sup>4</sup> Chca, nda tojtsejuabná canye nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna. <sup>5</sup> Y nda átsbeñe ošbuachiyá bëtsemnayeca, tbojofja canya mo quem basetembioycá, chana atše jofjana ca —Jesús tojánayana.

*Resjo yomna, nderado bacna soyënga cuanjama*

*(Mc 9.42-48; Lc 17.1-2)*

<sup>6</sup> “Nda canye básetema átsbeñe ošbuachiyábioye tbojaingñé bacna soye jamama, chabiama más tsábá nántsemna canye bēts nantsnēbé chamotsetamocñétsbua y chē mar bējaye shbuatsēntsoye chamotsashbuetše chabotsenatjēmbama. <sup>7</sup> ¡Tša lastema quem luarentša entsangbiama, chē inyēnga bacna soye jamama chaócochēnguama tmojtsamēngbiama! Nyets tempo chca amēnga mochanjēftsemna. Pero, ipayajema chē inya bacna soye chaomama tojtsamá ca!

<sup>8</sup> “Chíyeca, acbe cucuatšeca o acbe shecuatšeca bacna soye tcojamēse, cochtsenástjango y bēnoye cochtsētšena. Acbiama más tsábá nántsemna celoye jamashēnguana chē nyetsca tescama yomna tsabe vida jtsebmomna, cucuatše ndbomná o cosheto, y ndoñe nyets uta cucuatšeca o shecuatšeca chē nyets tempo echanjesomñe ifñeshoye chacmotséstjango. <sup>9</sup> Nderado acbe bomínýeca bacna soye tcojinýe y cachca soye tcojama, chē bomínýe cochtsenobuchjatsēca y bēnoye cochtsētšena. Acbiama más tsábá nántsemna, celoye jamashēnguana nye canye bomínýeca, y ndoñe nyets uta bomínýeca inñerno ye chacmotséstjango, chē bēts ifñeshoye ca” —Jesús tojánayana.

### *Chē ótsena oveshabiana cuento*

(Lc 15.3-7)

<sup>10</sup> Mēntšánaca Jesús tojánayana: “Ni mo cánýabioye quem tsēm ošbuáchiyēnguentsana, chē mo basetemēngcá mondmēñēnga, mo nduamanacá smattsonýaye. Ndegombre cbéyana, chēngbe angelotēmēnga celoca, sempre atšbe Taitá celocáftaca mondtsemna ca. <sup>11</sup> Er chē Bēngbe Bētsá Entšá tbojanbemá tonjabo chē pochocánēnga jtsemnama imojtsajnēnga jabátsebacama.

<sup>12</sup> “¿Ntšamo tsēngaftanga smatjájuaboye? Canye boyabása patse oveshēnga tojtsabamna y ndeolpe canye chentša oveshá tojtsotše. ¿Chē boyabása ndoñe chē inye esconēfta bnētsana y esconēfta oveshēnga tjoca cachcá nanjesēñýaye, jama chē ótsena oveshá jetsenguanguama? <sup>13</sup> Y chē oveshá jetsinýenama tojobenase, ndegombre chē boyabása más oyejuayá jtsemnana chē ótsena oveshabiana, y ndoñe nya chca chē inye esconēfta bnētsana y esconēfta oveshēngbiama chē ndoñe tmonjanotšēngbiama. <sup>14</sup> Cachcá, tsēngaftangbe Taitá, Bēngbe Bētsá, chē celoca endmēná, ndoñe quenátsboše ni canya quem basenguentsana mo otšenacá chaotsemna, bacna soyēnga jtsamēse oyena causa ca” —Jesús tojánayana.

### *Ntšamo cuanjama inya japerdónama*

(Lc 17.3)

<sup>15</sup> “Nderado acbe catšata, bacna soye tcmojaborlase, cochjá, cánýata šochjencuénta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tsábá ácaftaca echántsatsmēna. <sup>16</sup> Pero ndoñe tcmojóyeunasna, inye útata cochjáchembo chacmotjēmbambama, chca, chata chabouena ntšamo cochjauyanama y chamuayana ndegombre chca yomnama. <sup>17</sup> Y chata ndoñe tonjóyaunase, chentša Bēngbe Bētsábeñe ošbuáchiyēnga macuntá. Y chēnga ndoñe tonjóyaunasna, cochjayana cha yomna mo canya Bēngbe Bētsábioye nduabatmacá, mo canye ndoñe judiyá ca o canye bacna entšá mo canya Romocama impuesto entšángbioye atjanayacá yomna ca.

<sup>18</sup> “Ndegombre cbéyana: Tsēngaftanga Bēngbe Bētsáftaca chašmojtsencuénta ora, chašmojayana canye soye ndoñe chaondētsemna ca, Bēngbe Bētsá cachcá echanjayana. Y cháftaca chašmojtsencuénta ora, chašmojayana canye soye aññe chaotsemna ca, Bēngbe Bētsá echanjayana aññe chca chaotsemna ca.

<sup>19</sup> “Mēntšánaca cbéyana: Nderado útata tsēngaftanguentsana quem luarentše tbojenoye-uná Bēngbe Bētsáftaca jencuéntama ndayánaca jótjañama, Bēngbe Bētsá chē celoca endmēná pronto chē soye cmochanjátšataye. <sup>20</sup> Ndayentše útata o únganga tmojēñefña, átsbeñe ošbuáchiyēnga bētemnama, chentše atše chēngbe tsēntsaca chántsemna ca” —Jesús tojánayana.

<sup>21</sup> As Pedro tojána y Jesúsbioye tbojantjá: —Bēngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canýsēfta soye ca?

<sup>22</sup> Y Jesús tbojanjúá: —Ndoñe nye canýsēfta soyama quechatatsētsná, sinó canýsēfta bnētsana soye canýsēfta ca.

### *Ndayá inopása chē japerdónama ndēbošēngaftaca*

<sup>23</sup> Mēntšánaca Jesús tojanéyana: “Chochanjáuyana ntšamo Bēngbe Bētsabe amēndayana yomnana. Endmēna ntšamo canye réyēftaca tojanopasacá. Cha yojábošena chabe oservēñēnga crocēnana jtsētjañana. <sup>24</sup> Jtsētjañama yojóntša orna, canye boyabása imojuánatse, chē réybioye mallajta crocēnana ibnandebena. <sup>25</sup> Chē oservená tondaye yonjábomna chē ndebēnama jētsjájuama; asna chē rey yojamánda cha chamotsiye nyets tempo nye



inʼyabiam chaotsoservénama, chabe shema y chabe básengnaca, y lempe ntʼsamo yojan-bomncánaca, y chca chē ndebénama jtopágama. <sup>26</sup> Chora chē oservená chē reybe she-cuatʼsentʼse yojoshamentʼsiye y ibojtseimpáda: ‘Taita, Diosmanda šmotsēuantajema. Atʼse lempe cbochanjētsēntʼšabuachiye ca.’ <sup>27</sup> Chē reyna chē boyabásabiam ibojóngmia; as chē ndebénana ibojtseperdóna y ibojētsboshjona.

<sup>28</sup> “Chē oservenana chentʼšana yojésebcna y benachiñe inʼye oservenáftaca ibojen-betʼse, cach mandadbiama trabajaya. Chē inʼye oservenana nʼye batʼsatema crocénana chábioye ibnandebena. Chora chē oservená chē enutábioye tamošajentʼšana ibojishache y ibojóntʼsa jtsētajuashbebiana y mēntʼsá ibojauyana: ‘¡Ndebénana šmatsēntʼšabuaché ca!’ <sup>29</sup> Chora chā chē oservenabe shecuatʼsentʼse yojoshamentʼsiye y ibojtseimpáda: ‘Dios-manda šmotsēuantajema. Atʼse lempe cbochanjētsēntʼšabuachiye ca.’ <sup>30</sup> Pero chē oservená ndoñe yonjábosena, sinó yojama chē inʼye oservenábioye cárceloje chamotsētámiam, chē ndebénana candētsjájēntʼscuana. <sup>31</sup> Chē inʼye oservénēnga chca imojinʼye ora, puerta yojóngmia y imojá lempe ntʼsamo yojopasacá chēngbe rey jacuéntama. <sup>32</sup> As chē rey yojamánda chē boyabása jobetʼšana, y ibojauyana: ‘¡Puerte bacna oservená! Sconjaimpadáyeca, nʼyets ndebénana tcbontseperdoná. <sup>33</sup> Acnaca cachcá cmondmēna chē cach aquécá muentʼša trabájayabiam jóngmiana, ntʼsamo atʼse acbiama šonjongmecá ca.’ <sup>34</sup> Y tʼsa chē rey ibojtsetna; as yojamánda jabuache chamotsetsetʼsená nʼyets ndebénana candētsjájuantʼscuana ca” —Jesús tojanacuntá.

<sup>35</sup> Chora Jesús tojánayana: “Atʼsbe Taitá, celoca endmēná, cachcá tsēngaftangaftaca echan-jama, tsēngaftangbe catʼsata ndoñe ndegombre nʼyets ainánaca šmonjaperdonase ca.”

## 19

*Ndayá Jesús tojanabuatambá chē bouamnēnga tmojtsenētʼsenama*

(Mc 10.1-12; Lc 16.18)

<sup>1</sup> Chē soyēnga tojánayanentʼšana, Jesús Galilea luarentʼšana tojtsanoñe y Judeoye tojánashjango, Jordán chenguánoica. <sup>2</sup> Ba entʼšanga tmojanasto y chentʼse šoquēnga tojanashná.

<sup>3</sup> Básefta fariseunga Jesúsbioye tmojanobeconá y jisháchichiyama mēntʼsá tmojantjá: —¿Queojtselesenciana canʼye boyá nʼye ndayámnaca chabe shémbioye cachcá jesonʼyayama ca?

<sup>4</sup> As Jesús tojanéjua: —¿Tsēngaftanga ndoñe chē Bēngbe Bētsabe uabemana palabrēnguiñe šmēndualía, Bēngbe Bētsá, chē entʼšanga tojanabiamá, quem luare jobojátʼsama ora “boyá y shema tojanabiamama”? <sup>5</sup> Y Bēngbe Bētsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chē útata mo canʼyacá bochántsemna ca.” <sup>6</sup> Y chca, ya ndoñe útata quebochátʼsmēna, sinó mo nʼye canʼyacá. Chcasna, entʼsá ndoñe chaondēndbema ndayá Bēngbe Bētsá mo canʼyiñcá tojēftsema soye ca —Jesús tojánayana.

<sup>7</sup> Chora chē fariseunga tmojanianya: —¿As, ndáyeca Moisés tojanmandá, chē shémbioye canʼye uabemana tsbuanácha juiyiyana jtsenētʼsenama y cachcá jesonʼyayana ca?

<sup>8</sup> Y Jesús tojanéyana: —Tsēngaftanga Bēngbe Bētsabe mandēnga jóyēngacñama ndoñe quešmátsboše causa, Moisés tmojanalesencia shémbioye jesētʼsenana. Pero quem luare jobojátʼsama orna, ndoñe chca quenjatʼsmēna. <sup>9</sup> Atʼse cbéyana, nda chabe shémaftaca tbojtsenētʼšena y chca tojopasá ndoñe chē shema chabe boyábioye inʼyáftaca tbtontseingñé causa, y chē boyá inʼyáftaca tojtóbouamasna, cha chē natsana shémbioye inʼyáftaca jtseingñayana ca —Jesús tojánayana.

<sup>10</sup> Chora chabe uatsjédayēnga tmojanianya: —Chca chē boyá y shémaftaca tojtsemnēna, ndoñe tsabá yontsemna jobouamayana ca.

<sup>11</sup> Y Jesús tojanéyana: —Nʼyetscanga ndoñe quemátobena chē palabrēnga jóyēngacñama, nʼye chē Bēngbe Bētsá tojama jóyēngacñama chamobenama, chēngna aínē. <sup>12</sup> Ba soyēnga comna ndaye causa chē boyabásenga ndoñe ntʼsobenana jobouamayana. Inʼyēnga jónʼyana jobouamayama ndobenēnga, inʼyēngbioye cach entʼšanga jábiamana jobouamayama ndobenēnga y inʼyēngna, nʼyets tempo nʼye Bēngbe Bētsabe amēndayama oservena causa ca —tojanéyana.

*Jesús, basetémēngbiam Bēngbe Bētsábioye tbojanimpadá*

(Mc 10.13-16; Lc 18.15-17)

<sup>13</sup> Entʼšanga basetémēnga Jesúsbioye tmojanēnatse, cha chauabojajuama y Bēngbe Bētsábioye chēngbiam chaboimpadama. Pero chē uatsjédayēngna tmojanontʼsé chē basetémēnga unachayēnga jtsēcacánana. <sup>14</sup> Chora Jesús tojanéyana: “Cachcá mónʼyaye chē basetémēnga átʼsbioye chamuabo y ndoñe matéuyanana; er Bēngbe Bētsabe amēndayana endmēna mo quem basetémēngcá imomnēngbiam ca.” <sup>15</sup> As chē basetémēnga tojánabojajo, Bēngbe Bētsá jaimpádase; y chentʼšana cha tojtsanoñe.

*Canŷe bomna bobontse Jesúsbioye tojána*  
(Mc 10.17-31; Lc 18.18-30)

<sup>16</sup> Chentšana, canŷe boyabása tojána Jesús jinŷama y mēntšá tbojantjá: —Buatēmbayá, ¿ndaye tšabe soye chjama chē nŷetsca tescama yomna tšabe vida jtsebomnama ca?

<sup>17</sup> Y Jesús tbojanjuá: —¿Ndáyeca chē tšabe soye ndayá bētsēmnama šcojtsetjaná ca? Tšabia nŷe canŷa endmēna: Bēngbe Bētsá. Aca chē nŷetsca tescama yomna tšabe vida jtsebomnama tcojtsebošēse, mandēnga cochtsebohedecena ca.

<sup>18</sup> Chora chē bobontse tbojantjá: —¿Ndaye mandēnga ca?

Y Jesús tbojanjuá: —“Ndoñe catjóba, acbe shema inŷaftaca ndoñe cattseingñaye, ndoñe catjatlēba, ndoñe catjuaboínŷena. <sup>19</sup> Acbe bētsētsata stētsōye ndoñe catjáquedaye y ndēmua entšánaca cochtsebobonshana ntšamo cach aca cuenobobonshancá ca” —Jesús tbojaniana.

<sup>20</sup> Chora chē bobontse tbojanjuá: —Atše lempe chca nŷets tempo sēndocumplina. ¿Ndáyá más šojtsebuáshbena ca?

<sup>21</sup> As Jesús tbojaniana: —Aca lempe tšabá jamama tcojtsebošēse, motsa, acbe bomna soyēnga cochjetsatobuiye y chē crocénana, ndbomnjēmēnga cochtšatšataye; chca, bēts uacanana soye celoca cochántsebomna. Chentšana cochjabo y šcochjuasto ca.

<sup>22</sup> Chē bobontse chca tojanuena ora, ngmēnaca yojtsatoñe, cha corente bomná bemna causa.

<sup>23</sup> Chora Jesús chabe uatsjéndayēnga tojanēyana: —Ndegombre cbēyana, puerta totcá entsemna canŷe bomnabiama Bēngbe Bētsabe amēndayoye jamashēnguama ca. <sup>24</sup> Chē bomnabiama cachiñe šcuatayana: Más paselo entsemna canŷe camello chē coshuf-jentša atēfñējana chauachnēngo, y ndoñe canŷe bomná Bēngbe Bētsabe amēndayoye jamashēnguama ca.

<sup>25</sup> Chabe uatsjéndayēnga chca tmojanuena ora, puerta ojnánēnga imojtsemna y imojtsichamo: —As, ¿nda yochjobenaye atsbocaná jtsemnama ca?

<sup>26</sup> Jesús chēnga tojanēñyē y tojanēyana: —Entšanga ndoñe quemátobena jamama canŷa atsbocaná chaotsemnama, pero Bēngbe Bētsá aíñe, er cha nŷetsca soyēnga jamama endobena ca.

<sup>27</sup> Chora Pedro tbojaniana: —Aca contsonjá, bēnga lempe chē fsēndbomna soyēnga fsēnjēseboshjona y ácaftaca fsēntsajna. As, ¿ndayá bēnga fchjójyēngacñe ca?

<sup>28</sup> As Jesús tojanēyana: —Ndegombre cbēyana, nŷetsca quem luarentša soyēngama mo tsmēcá jtsemnama tempo chaojobuache ora, chē Bēngbe Bētsá Entšá tbojanbemá chabe buashinŷinŷana bēts tšenēšine reycá echanjót'bema jtsemándayama; y tšēngaftanga, chē atše šmēstonēnga, chora bnētsana uta uámana tbemaniñe šmochanjot'biana mo reyēngcá, chē Israeloca bnētsana uta bēts pamillentša entsāngbiana jayanama tšabá o ndoñe tšabá tmonjamama. <sup>29</sup> Y ndēmuanŷēnga, atše jaserviama tmojēftseboshjona cachēngbe yebna, catšátanga o uabénanga, befta o bebmá, básēnga o fshantsēnga, chē soyēngama patse soye más mochanjójyēngacñe y chē nŷetsca tescama yomna tšabe vídnaca. <sup>30</sup> Pero banga mora uámanēnga imomnēnga, nduámanēnga mochántsemna; y banga mora nduámanēnga imomnēnga, uámanēnga mochántsemna ca —Jesús tojanayana.

## 20

*Chē trabájayēngbiana cuento*

<sup>1</sup> Mēntšánaca Jesús tojánayana: “Bēngbe Bētsabe amēndayana endmēna mo canŷe bēts jajañe nduiñcá. Chē nduiñna canŷe te cabá cachēse yojábocna peonga janguanguama, chabe uvas betiyēnga jajañe chamotrabajama. <sup>2</sup> Chē nduiño peonga yojánŷena orna, imojenóyeunaye canŷe tescama canŷe denario crocénana jtēbuēnayama. As chora yojichamuá chē uvas betiyēnga jajoye jatrabájama. <sup>3</sup> Mo base mošenana ora, chē nduiño cachiñe yojábocna y plazoca atsanēnga inŷēnga yojanŷe, tondaye ntsamcá. <sup>4</sup> As yojáuyana: ‘Tšēngaftāngnaca atšbe uvas betiyēnga jajoye motsajna jatrabájama y ntšamo chašmojamcá cchochtēbuēnaye ca.’ Y chē entsānga imojá. <sup>5</sup> Nŷetsto ora y bēts mošenana ora, chē nduiño cachiñe yojábocna y cachiñe cachcá yojopásá. <sup>6</sup> Mo la cinco ora, chē nduiño cachiñe yojábocna y chenache inŷēnga yojánŷena, tondaye ntsamcá. As yojátjaye: ‘¿Ndáyeca tšēngaftanga nŷets díá ntjatrabajacá muentše smotsomñe ca?’ <sup>7</sup> Y chēnga imojojuá: ‘Ndocná bēnga chešnataimpadá causa ca.’ As chē nduiño yojáuyana: ‘Tšēngaftāngnaca atšbe uvas betiyēnga jajoye motsajna jatrabájama y cchochtēbuēnaye ca.’

<sup>8</sup> “Y ya bien jetiñe yojtsemna orna, chē nduiño chabe caporálbioye ibojauyana: ‘Peonga metsachembo y cochtēbuēnaye. Chē ústonoye tmojášhjajñēnguentšana cochjabojátša y chē natsana tmojášhjajñēnga ústonoye ca.’ <sup>9</sup> Y chē mo la cinco ora imojášhjajñēnga imojobeconá, y cada ona canŷe denario crocénana yojtáyentšbuachiye. <sup>10</sup> Chentšana, chē natsana

jatrabájama imojáshjajnënga yojtsamna jobéconama y chënga imojétsejuabnaye más crocénana mochanóyëngacñe ca. Pero chëngnaca cach canye denario crocénana yojtëbuénaye. <sup>11</sup> Chca imojóyëngacñe orna, chënga imojóntša chë nduifñbiana bacá ichámuana, <sup>12</sup> mëntšá: ‘Quemënga chë ústonoye tmonjáshjajnënga nýe canye horatema tmonjatrabajá; ntšamo bënga šcontëbuenacá, cachcá chënga contëbuená y bëngna nyëts día jabuache fsënjatrabajá y corente jënyá fsënjauantá ca.’

<sup>13</sup> “Pero chë nduifño canya chca yojtsichamuábioye ibojojuá: ‘Sobreno, acbiana ndocna ndoñe tsabe soye chiyatsma. ¿Ndoñe canye denario crocénana canye tescama tbonjenoye-uná ca? <sup>14</sup> Chcasna, acbe uacanana crocénana mesocñe y motsatoñe. Atše sëntseboše chë ústonoye jatrabájama tojashjanguá jtabuénayana, cachcá ntšamo aca tcojtabuenacá. <sup>15</sup> Chca entsemna, er atše sëndobena atšbe crocénanaca nýe ndayánaca jamana. ¿O aca envidia cojtsebmoma, atše tsabia tsmënama ca?’ ” —cha yojayana.

<sup>16</sup> Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnënga, nduámanënga mochántsemna ca.”

*Jesús cachiñe tojánayana cha jóbanama y jtayenama*

(Mc 10.32-34; Lc 18.31-34)

<sup>17</sup> Chënga Jerusalenoye imojtsaye ora, Jesús barie tojánachembo chabe bnëtsana uta uatsjëndayënga y tojanëyana: <sup>18</sup> “Tsëngaftanga šmontsonýá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšñe mochanjáboshjona, y chënga mochanjayana jóbanama cha ibojtsemna ca, <sup>19</sup> y chë ndoñe judiëngbe cucuatšñe mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

*Chë Santiago y Juanbe mamabe impadana soye*

(Mc 10.35-45)

<sup>20</sup> Chentšana, Zebedeobe uaquiñatbe mamá chabe uaquiñátaftaca Jesúsbioye tojanobekoná, chabe shecuatsëntse yojoshamentsiye canye pavorama jaimpádama. <sup>21</sup> As Jesús tbojantjá: —¿Ndayá cojtseboše ca?

Y chë shembása tbojanayana: —Aca reycá chacojtsemánda ora, cochjamánda atšbe uaquiñata chabótbema canya acbe catšbioica y chë inýa acbe uañicuayoica, ácaftaca chabotsemándama ca.

<sup>22</sup> Y Jesús tojanëjua: —Ntšamo šmontsotjanañama, tsëndata ndoñe quešnátsatsëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aññe, fchanjobenaye ca.

<sup>23</sup> Chora Jesús tojanëjua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útëntše entsemna ndëmuanyëngbiana atšbe Taitá tojaprontacá ca.

<sup>24</sup> Chë inýe bnëtsana uatsjëndayënga chca tmojanuena ora, chë uta catšátaftaca tmojanotjayaná. <sup>25</sup> Chora Jesús chë uatsjëndayënga tojánachembo y tojanëyana: —Tsëngaftanga šmondëtatsëmbo, chë ndoñe judiëngbeñe chë reyënga lempe jtsemándayana nýa mo nduifñënga cuafsemncá; y chë bëtsëtsa entsangna chëngbe obenánaca jtsemándayana, ndayánaca jtsamëse, chë inýe entsanga sempre chamotsayaunanama. <sup>26</sup> Pero tsëngaftangbeñna ndoñe chca chaondëtsemna. Inýetšá; masna, nda tsëngaftanguentše chë más uamaná jtsemnama tojtsebošá bontsemna chë inýënga jtsaservénana. <sup>27</sup> Y ndánaca tsëngaftanguentšá chë más uamaná jtsemnama tojtsebošá bontsemna jtsemnana mo nýe inýabiana nyëts tempo oservenacá. <sup>28</sup> Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá inýënga jabáserviana. Y mo nda inýënga játsëbacama cuafjëtšajocá, cha echanjóbana, ba entsanga atsebácanënga chamotsemnama ca —Jesús tojánayana.

*Jesús uta jtanata tojanashná*

(Mc 10.46-52; Lc 18.35-43)

<sup>29</sup> Chënga, Jericó bëts pueblëntšana tmojánbocana ora, ba entsanga Jesús imojtsëstona. <sup>30</sup> Uta jtanata benache juachañe ibnatbemana. Jesús chëjana yojtsachñëjuanama chata tbojanuena ora, tbojanotšé uayebuáchana: —¡Utabná, Davidbëntšana Entšá, šmotsalastemá ca!

<sup>31</sup> Entšanga chë jtanátbioye tmojtsanëcácana iytëca chabotsemnama, pero chatna más ibojtsáyeuache: —¡Utabná, Davidbëntšana Entšá, šmotsalastemá ca!

<sup>32</sup> As Jesús yojotsaye, chë jtanata tojánachembo y tojanatjá: —¿Ndayá šojtseboše atše tsëndatbiana chjamama ca?

<sup>33</sup> Y chata tbojanjuá: —Utabná, bëndata chabuatëbínýnama ca.

<sup>34</sup> Jesús chatbiamá tbojanongmé y tojánabuchbojajo. Cachora chë jtanata tšabá yojtëbinýna y Jesús tmojanasto.

## 21

*Jesús Jerusalenoye tojánashjango*

*(Mc 11.1-11; Lc 19.28-40; Jn 12.12-19)*

<sup>1</sup> Ya Jerusalenoca béconana imojtsemna y canýe pueblo Betfagé ca uabáinoca tmojánashjango, canýe tjashe Olivos ca uabáinentše. Chora Jesús uta chabe uatsjédayata tojanichamó, <sup>2</sup> y mentsá tojanéyana: “Tséndatbe natsana entsemna base pueblotémoye motsata. Cachora canýe burrá utsbuaná šochanjínýena y cháftaca canýe burrotema echántsemna. Sochjuajafóná y sochjuánatse. <sup>3</sup> Nderado nda ndayánaca chacmojáuyañese, šochjauyana: ‘Bëngbe Utabná bontšájaboto y chentšana camuentše echanjabáisabashejuana ca.’”

<sup>4</sup> Chca tojanopasá, cachcá chaotsemnama ntšamo chë Bëngbe Bëtsabe juabna oyebuambnayá tojanayancá. Cha mentsá tojanábema:

<sup>5</sup> Jerusalén bëts pueblentše oyenënga mëyana:

“Minýënga, tsëngaftangbe Rey chentše tsëngaftangbiroye entsabó, ndoñe mo canýa cachá bëtsá enobiamnayacá; canýe búrrbeñe enjaquená; canýe burrotëmiñe, canýe uatrabájaye bayabe šesónbeñe ca.”

<sup>6</sup> Chora chë uatsjédayata tbojána y tbojanma ntšamo Jesús tojanamëndacá. <sup>7</sup> Chë uatsjédayatna chë burrá y chë burrotema tmojanënatse, entsáyëjuangá chátbeñe tbojanátatse y chora Jesús chábeñe tojanenoyagé. <sup>8</sup> Bëtscá entsanga chëngbe entsáyá chë benachëjana imojtsëtšatsana, y inýengna betiyeshënguñe buacuafjénga imojtsetcroye y chiñe imojtse-quecñá. <sup>9</sup> Y chë natsana imojtsajnénga y chë ústonoyénga mentsá imojtsaiuáyeuache: “¡Rey Davidbentsana Entšá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

<sup>10</sup> Jesús Jerusalenoye tojánamashëngo ora, nyetsca entsanga imojtsenbouenana y banga imojtsenotíciaye: —¿Nda mua yojtsemna ca?

<sup>11</sup> Y chë entsanga imojtsëjuana: —Chë Bëngbe Bëtsabe juabna oyebuambnayá Jesús, chë Galileoca pueblo Nazaretocá ca.

*Jesús, Bëngbe Bëtsabe bëts yebnentšana enënga y obuámnayënga tojtanëbuacna*

*(Mc 11.15-19; Lc 19.45-48; Jn 2.13-22)*

<sup>12</sup> Chentšana Jesús, Bëngbe Bëtsabe bëts yebnoye tojánamashëngo y chë entsanga chentše imojtsena y imojtsobuámnafjénga chentšana tojtanëbuacna. Chéntšnaca imojtsemna entsanga canýe crocénana enënga, y chë crocénana nýe Bëngbe Bëtsabe bëts yebnentšama inoserverna. Chëngbe mesëshangá tojtsanenásatajchquëca y chë palomatema enëngbe tsenëšëgnaca. <sup>13</sup> Y tojanéyana: “Bëngbe Bëtsabe uabemana palabrënguñe cha mentsá tojanayana: ‘Atšbe bëts yebna echantsabaina átšeftaca encuéntaye yebna ca’; pero tsëngaftangna, atbëbanëngbe oyeniñe chë yebna šmojtsebema ca” —Jesús tojanéyana.

<sup>14</sup> Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná. <sup>15</sup> Chë bachnangbe más uámana amëndayënga y ley abuátambayënga, Jesús bëts soyënga yojtsamama tmojáninýe ora, y chë basetémënga Bëngbe Bëtsabe bëts yebnentše imojtsayebuáchama tmojanuena ora, tša tmojanotjáyananga. Chë basetémënga mentsá imojtsáyebuache: “¡Chë Rey Davidbentsana Entšá matschuanga ca!”

<sup>16</sup> As Jesús tmojanianya: —¿Ntšamo chë basetémënga montsichamcá quectsuenana ca?

Y Jesús tojanéjua: —Añe, sentsuenana. Pero, ¿tsëngaftanga Bëngbe Bëtsabe uabemana palabrënguñe chë soyama ndoñe šmëndualía? Chiñe mentsá endayana:

Chë basetémënga y ochóchaye šesonatémëngbe cantëngaca aca tcojama entsanga chacmotsatschuanama ca.

<sup>17</sup> Chora Jesús chënga tojtsanabashejuana y Jerusalenentsana Betania puebloye tojtsanoñe; y chentše chë ibeta tbojánbobinýna.

*Jesús tojánayana canýe higo betiye ndoñe más chaondëshájona ca*

*(Mc 11.12-14, 20-26)*

<sup>18</sup> Chë te cachëse, Jesús cach bëts puebloye yojtésa ora, tbojánishëntsena. <sup>19</sup> Chora canýe higo betiye benache juachaca yojinýe; as choye yojobeconá, pero nýe ena tsbuanáchënga chiñe yojinýena. As Jesús chë higo betiroye tojánayana: “¡Ndocna te más chaondëshájona ca!” Y betscó chë higo betiye tojtsanbuashá.

<sup>20</sup> Chë uatsjédayënga chca tmojáninýe ora, imojenjnáná y Jesús tmojantjá: —¿Ntšamo chca chë higo betiye canýe ora tojtsebuashá ca?

<sup>21</sup> Y Jesús tojanéjua: —Ndegombre cbëyana, tsëngaftanga Bëngbe Bëtsábeñe ošbuáchiyana šmojtsebmóna y chabiamá ainaniñe ndoñe inýetsá šmonjätšjuabnase, šmochantsobena

jamama ndoñe nñe ntšamo atše quem higo betiyeca sënjamcá, sinó quem tjoye, “muentšana mojuaná y uafjajónayoye moshbuetše ca” šmojayanēse, chca jochnēnguana. <sup>22</sup> Y Bēngbe Bētsáftaca chašmojtsencuénta ora, chábeñe jtsošbuáchiyēse, lempe ntšamo chašmojotjañca šmochanjóyēngacñe ca —Jesús tojánayana.

### *Jesube obenana*

(Mc 11.27-33; Lc 20.1-8)

<sup>23</sup> Chca tojanopasá chentšana, Jesús Bēngbe Bētsabe bēts yebnoye tojánamashēngo. Chentše yojsabuátambantscuana, bachnangbe amēndayēnga y judiēngbeñe bētsējemēngca amēndayēnga tmojanobobeconá y tmojantjá: —¿Ndaye deréchoca chē contsama soyēnga aca cojtsama ca? ¿Chca jtsamama nda mando tcmēnjatštá ca?

<sup>24</sup> As Jesús mēntšá tojanējua: —Atšnaca canye soye sēntsebmoma tšēngaftanga jatjayama, y quešmojojuase, átsnaca cbochjáuyana ndaye deréchoca atše chca stsama. <sup>25</sup> ¿Nda Juan chē Ubayaná tbojanichmó entšanga jubáyama, Bēngbe Bētsá o entšanga ca? —Jesús tojanējyana.

Chama chēnga tmojanontšé mēntšá enatsētsnayana: “‘Bēngbe Bētsá ca’ chamojojuase, cha sochanjáuyana: ‘As, ¿ndáyeca chē tcmojanabuayená soyēnguiñe ndoñe šmonjanošbuaché ca?’” <sup>26</sup> Pero ndoñe quemuátobena jayanana ‘entšanga ca’; muentša entšangbiamá bēnga montsauatja, er nyētsčanga mondējuabná Juan ndegombre Bēngbe Bētsabe juabna oyebuambnayá yomna ca.” <sup>27</sup> Chcasna chēnga Jesús tmojanjúá: —Bēnga ndoñe queftsátstatšēmo ca.

Y as Jesús tojanējyana: —Atše cach ndoñe quechochatējyana ndaye deréchoca chca stsama ca.

### *Chē uta uaquiñátbiamá cuento*

<sup>28</sup> Chora Jesús entšanga tojanatjá: —¿Ntšamo tšēngaftanga quem soyama šmatjayana? Canye boyabása uta uaquiñata yojánabamna, y cánýabioye ibojauyana: “Uaquiñá, mēnté motsa atšbe uvas betiyēnga jajoye jatrabájama ca.” <sup>29</sup> Chē uaquiñá ibojójuá: “¡Jama ndoñe quetsátsoše ca!” Pero botamana yojenójuaboye y pronto choye yojá. <sup>30</sup> Chentšana chē taitá chē inye uaquiñábioye cachcá ibojauyana. As cha ibojójuá: “Arseñor, aife chanjá ca.” Pero ndoñe yonjá. <sup>31</sup> ¿Chē útatentšana ndēmuanýá tojanma ntšamo chē taitá yojabošcá ca? —Jesús tojanatjá.

Y chēnga tmojanjúá: —Chē natsaná ca.

Chora Jesús tojanējyana: —Ndegombre chējyana, chē Romocama entšangbioye impuesto atjanayēnga y chē bacna vida bomna shembásenga, tšēngaftangbiamá más montseprontana Bēngbe Bētsabe amēndayoye jamashēnguama. <sup>32</sup> Juan chē Ubayaná tonjánabo tšēngaftanga jábuayenama ntšamo jtsiyenana cmamnama, ntšamo Bēngbe Bētsá yobošcá, y tšēngaftanga chē tcmojanabuayená soyēnguiñe ndoñe chešmatanošbuaché; y chē cuenta, chē Romocama entšangbioye impuesto atjanayēnga y bacna vida bomna shembásengna aife chábeñe montsanošbuaché. Y tšēngaftanga, masque ntšamo chēnga Bēngbe Bētsábeñe imojtsošbuáchema lempe šmojinýēse, chē juabnayana ndoñe šmonjatrocá, chábeñe jtsošbuáchiyama ca —cha tojanējyana.

### *Chē puerte bacna trabájayēngbiamá cuento*

(Mc 12.1-12; Lc 20.9-19)

<sup>33</sup> Mēntšanaca Jesús tojanayana: “Inye cuento šmochjatuena chašmuatsjínýama: Canye jajañe nduiño uvas betiyēnga yojáje y chē shēconana yojajétja. Chē uvasēšangá juantšétetjiamna canye base luare yojajutjo y canye tsbanana jebna soye yojapórma chentše jtsaishanýama. Chentšana, inye trabájayēnga chē jajañe yojárrendaye y chana inye luaroye yojtsoñe. <sup>34</sup> Chē uvasēšangá juashacama tempo yojobuache orna, chē jajañe nduiño básefta oservénēnga yojichamuá chē arrēndayēnga jáuyana ntsachetšá chē nduiño ibojtsotocánama. <sup>35</sup> Pero chē arrēndayēngna chē oservénēnga imojishēche: Inyēngbioyna imojtsajantšetaye, Inyēngbioye imojtsēbaye y chē Inyēngbioyna ndētsbēngaca imojtsatēchénganja. <sup>36</sup> As chē jajañe nduiño chē natsanama más ba oservénēnga yojichamuá. Pero chē arrēndayēngna, ntšamo chē natsanēngaftaca imojamcá, cachcá chora imojama.

<sup>37</sup> “Cabana, chē jajañe nduiño cachabe uaquiñá ibojíchmua; as mēntšá yojtsejuabnaye: ‘Atšbe uaquiñá cocayé mochanjóyeunaye ca.’” <sup>38</sup> Pero chē arrēndayēnga chē uaquiñá imojinýe orna, imojeniyana: ‘Mua chē fshantse nduiñbe uaquiñá entsemna. Lempe chabe soyēnga mua echanjóyēngacñe. Cuajna, motsóbanga y lempe chabe otocana soyēnga bēngbiamá echanjoquéda ca.’” <sup>39</sup> As chē uaquiñá imojishache, chē uvas betiyēnga jajañentšana imojtsábocna y imojtsóba.”

<sup>40</sup> Chca jacuéntama tojanpochocá orna, Jesús tojánayana: —Y morna, chē jajañe nduiño chaojabo ora, ¿ntšamo šmojtsejuabná chē arrēndayēngaftaca cha yochjama ca?

<sup>41</sup> Y chënga tmojanjuá: —Chë puerte bacna arrëndayënga ni mo batšatema ntjalastemaycá echantsëbaye. Chë jajañe ñyënga echanjárrendaye y chë uvasëšengá juashacama tempo chaojobuache ora, ntšamo chë nduiño chabojsotocancá chënga mochantíyiye ca.

<sup>42</sup> Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtsbé,

mora chë más bëts uashacuanëšentše entsejájona.

Chë soye Bëngbe Utabná, Bëngbe Bëtsá chca tojama,

y bënga chama ojananënga fsëntsemna ca.

<sup>43</sup> Ntšamo chë nduiño chë arrëndayënga chë fshantse echantsabaca y ñyënga echantsatsataye y chënga chabiama bëtscá shajuana mochanjatbanacá, cachcá, Bëngbe Bëtsabe amëndayana tšëngaftangbentsana mochantsejuána y ñyëngbioye mochantsatsataye. Chënga Bëngbe Bëtsabe soyëngama mochanjouena y chë soyëngama ñyëngbioye mochanjabuayená, Bëngbe Bëtsabe amëndayoye jamashënguama. <sup>44</sup> Ndánaca chë ndëtsbeñe chaojotsatsá, chëbë bochántsatcacaye; y chë ndëtsbé ndábeñnaca chaojotsatše, polvëshe bochántsebema ca —Jesús tojánayana.

<sup>45</sup> Chë bachnangbe amëndayënga y fariseunga, Jesús chë jabuátambama cuentënga yotsëtsësnama, tmojanenótatšëmbona chëngbiama chca yojtsóyebuambnama. <sup>46</sup> Chora chënga tmojánbošena Jesús jishachana, pero entsangbiama imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

## 22

### *Chë casamento fiestama cuento*

(Lc 14.15-24)

<sup>1</sup> Chentšana Jesús tojanontšé cachiñe cuentëngaca chënga jabuátambana. Mëntšá tojánayana: <sup>2</sup> “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canye réyefata tojanopasacá. Chë rey yojamánda canye bëts fiesta jamama, chabe uaquíñabe casamentama. <sup>3</sup> Chora chë rey chabe oservënënga yojichamuá chë ófanënga jobiatšama, pero chë ófanëngna ndoñe imonjouena jama. <sup>4</sup> As chë rey ñyë oservënënga yojichamuá y mëntšá yojámëndaye: ‘Chë ófanënga šmochjáuyana, ya saná stsebooprantana ca. Sënjamandá, atšbe uacnënga y uamna bayënga minýicánënga jobáyama y lempe entseprontana; y chamuabo chë casamento fiestama ca.’

<sup>5</sup> “Pero chë ófanënga ndoñe imonjouena. Canya, cachabe fshantse inabomnoye yojtsoñe; ñyënga chabe obuámmayíñe trabajuama yojtsoñe; <sup>6</sup> y ñyëngna, chë reybe oservënënga imojishëche, jabuache imojtsatsetšenaye y imojtsëbaye. <sup>7</sup> Y chë rey chë soyama yojouena ora, corente ibojtsetna. As chabe soldadënga yojichamuá chë oservënënga obánayënga chamuetsëbáyama y chëngbe bëts pueblo jetsángbotjuama. <sup>8</sup> Chora chabe oservënënga yojáyuyana: ‘Lempe entseprontana chë casamento fiestama, pero chë ófanënga ndoñe quenjatëmerecena moye jabama. <sup>9</sup> Motsajna tsashenangoye y ndëmuanýëngnaca chašmojánýenënga, chë casamento fiestama šmochjúbuaja ca.’ <sup>10</sup> As chë oservënënga tsashenangoye imojábocana y nyëtsanga imojánýenënga imojáchembo, cánýiñe tšabe y bacna entsanga, y chca, chë tsbocnanoiça jútjena yojtsemna entsángaca.

<sup>11</sup> “Chë ófanënga jánýama chë rey yojámashëngo ora, chentše cánýabioye ibojinýe y chana ndoñe yontsemna ntšamo canye casamento fiestama endbetsemncá uichëtjoná. <sup>12</sup> As chë rey ibojauyana: ‘Sobreno, ntšamo canye casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca? Pero chë boyabásana nýe iytëca yojtsemna. <sup>13</sup> As chë rey chë fiestentše ujuatšnayënga yojámëndaye: ‘Shecuatše y cucuatše motsebatšëca y chë ndëbinýna luaroye, infiernoye motsábocna. Chentše puerte echanjenóbošachna y chë tsetšanama juatsašënga echantsenofhtëšjojnaye ca’ —cha yojayana.”

<sup>14</sup> Jesús chca jacuéntama tojanpochocá ora, mëntšá tojánayana: “Chë fiestama ófanënga banga montsemna, pero chë bocacánënga choca jtsemnana nýe báseftanga. Er Bëngbe Bëtsá banga jáchembuana chabe amëndayoye jamashënguama, pero nýe báseftanga choca mochántsemna ca.”

### *Chë Romoca bëts mandadbiana impuesto jtsatsquëcjnyama*

(Mc 12.13-17; Lc 20.20-26)

<sup>15</sup> Chentšana chë fariseunga tmojtsatanoñe y tmojanenoyeuná ntšamo Jesús tojanyañe cha jisháchichiyana, as chca, mandadëngbeñe cha mal jaquédama. <sup>16</sup> Chama chënga tmojanichamó básefta cachëngbe usetonënga y ñyëngna Heródesbe ústonënga, Jesús jauyanama: —Buatëmbayá, bënga fsëndëtatšëmbo aca ndegombre soyënga cnetsabuátambama y consabuatumá ndegombre tšabe vida jtsebomnana, ntšamo Bëngbe Bëtsá yomandacá,

y ndoñe jatunenana nñe ntšamo entšanga tmojatichamcá, er acbiama tondaye quenatámána nda más uamaná o nduamaná tomnana. <sup>17</sup> Chcasna, ¿ntšamo catjájuaboye? ¿Tšabá tayoijtsemna, César, chë Romoca bëts mandadbiama, bënga impuesto jtsat-squëcñayana o ndoñe ca?

<sup>18</sup> Jesús yojtsetátšëmbo chëngbe bacna juabnëngama; chíyeca tojanéyana: —Bacna entšanga, ntšamo ndegombre šmojuabnacá ndinñinñayënga. ¿Ndáyeca tšëngaftanga šmojtseboše chë sóyeca atšë jisháchichiyama? <sup>19</sup> Chë šmat-squëcñá crocénana šminñinñé ca.

As canñe crocénana tmojanoyé. <sup>20</sup> Jesús tojanatjá: —¿Ndabe jubiá quem crocénaniñe yojtsemna, y ntšamo muentše entsabemancá nda chca iuabaina ca?

<sup>21</sup> Y chënga tmojanjuá: —Césarbie šmoctoyiye cha ibotocana soye; y Bëngbe Bëtsana cha ibotocana soye ca.

As Jesús tojanéyana: —Césarbioye šmoctoyiye cha ibotocana soye; y Bëngbe Bëtsana cha ibotocana soye ca.

<sup>22</sup> Chënga chca tmojanuena ora, ojnánánënga imojtsemna. As chënga cachcá Jesús tmojanonñá y tmojtsatanoñe.

*Obanënga jtayenama Jesús tmojantjá*

*(Mc 12.18-27; Lc 20.27-40)*

<sup>23</sup> Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojáná y mëntšá tmojantjá: <sup>24</sup> —Buatëmbayá, Moisés tojánayana nderado canñe boyá tojóbana básenga ntjéftasbashejuancá, ana chabe uabentsá jtsemnana chë shëmaftaca jtobouamayana, chca, chabe uabochená obanabiama básenga jtsabamnama ca. <sup>25</sup> Chcase, canñe bëngbentše canñsëfta catšátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tonjanobouamá. <sup>26</sup> Y cháftaca cachcá tonjanopasá, chë inñe uabentsáftaca cachcá, y cachcá chë inñengaftaca y chë ústonoca uabentsáftacnaca. <sup>27</sup> Y chentšana chë shembásanaca tontsanóbana. <sup>28</sup> Y morna, chë obanënga chamojtayena ora, ¿ndabe chë canñsëfta catšatanguentsabe shema chë shembása yochtsemna, nyetscanga cháftaca tmojanobouamase ca? —chënga tmojantjá.

<sup>29</sup> As Jesús tojanéjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa. <sup>30</sup> Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëncá. <sup>31</sup> Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrënguñe tojánayanama? Cha tonjánayana: <sup>32</sup> “Atšë sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>33</sup> Chë entšanga chca tmojanuena ora, ojnánánënga imojtsemna ntšamo Jesús yojtsabuátambama.

*Chë más bëts uámána mando*

*(Mc 12.28-34)*

<sup>34</sup> Jesús chë saduceúngbioye iytëca tojánabiamama fariseunga tmojántatšëmbona ora, chënga tmojánenëfña, <sup>35</sup> y canñá chënguentsá, ley abuatambayá, Jesúsbioye jisháchichiyama tbojantjá: <sup>36</sup> —Buatëmbayá, ¿Moisesbe leyiñe ndayá chë más bëts uámána mando yomna ca?

<sup>37</sup> As Jesús tbojanjuá: —“Utabná Bëngbe Bëtsá cochtsebobonshana nyets acbe ainánaca, nyëts espiritoca y nyëts juábncaca.” <sup>38</sup> Chë soye endmëna chë más bëts uámána mando y nyetsca mandëngama chë natsanoca entsemna. <sup>39</sup> Y quem inñe soye, chë natsana mandcá endenoparecena. Endayana: “Ndëmua entšánaca cochtsebobonshana, ntšamo cach aca cuenobobonshancá ca.” <sup>40</sup> Chë uta mandentšana endóbocana lempe ntšamo Moisesbe leyiñe endayancá y ntšamo chë Bëngbe Bëtsabe juabna oyebuambnayënga mondbetsabu-atambacá ca —Jesús tbojanayana.

*¿Cristo, ndabe entšábentšana yomna?*

*(Mc 12.35-37; Lc 20.41-44)*

<sup>41</sup> Chë fariseunga cabá cachentše imojtsemnëntscuana, <sup>42</sup> Jesús tojanatjá: —¿Ntšamo šmojtsejuabná chë Bëngbe Bëtsabe Uámána Uabuayanabiama, chë Cristo? ¿Ndábentšana cha iuabó ca?

Y chënga tmojanjuá: —Davidbentšana ca.

<sup>43</sup> As Jesús tojanéyana: —¿Ntšamo chca nántsemna, cach David, chë Uámána Espiritbe mándoca, Cristbioye Utabná ca tbojtsabobuátmëse? David mëntšá tojánayana:

<sup>44</sup> Bëngbe Bëtsá, atšbe Utabná Cristbioye tbojanayana:

atšbe catšbioica mótbema,

atšbe obenánaca acbe uayayënga acbe cucuatšíne chamoquedama chjamëntscuana ca.

<sup>45</sup> ¿Ntšámoose Cristo, Davidbentsana Entšá nántsemna, cach David “Utabná ca” chábioye tbojtsabobuátmëse ca? –Jesús tojanatjá.

<sup>46</sup> Chora ndocná tonjanobená ni mo canýe palabra jojuana. Y chë tescana ndocná yonjenñemua Jesús más jatstjanayama.

## 23

*Jesús chë fariseungbiana y ley abuátambayëngbiana tojánayana, chënga ndoñe tsabá montsama ca*

(Mc 12.38-40; Lc 11.37-54; 20.45-47)

<sup>1</sup> Chora Jesús, entšanga y chabe uatsjëndayënga mëntšá tojanëyana: <sup>2</sup> “Chë fariseunga y chë ley abuátambayënga cmondbétsabuatambaye ntšamo Moisesbe leyënguñe iuayancá.

<sup>3</sup> Chcasna, tsëngaftanga cmontsamna chënga joyaunayana y ntšamo tcmojauyancá, cachcá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá. <sup>4</sup> Mo canýe entšá, couáybioye uauta uasmanësha jtsamayana y cachá tondaye tontsasmancá, chënga entšanga jtsamëndayana bëtscá mandënga chamotsocumplínama, pero cachënga ni mo batšatema ntsamana chë mandënga jtsocumplínama. <sup>5</sup> Chënga lempe jtsamana nýe entšanga chamotsëñýama. Chënga chë inýengbiana más Bëngbe Bëtsá imobobonshana ca chamotsejuabnana, chënga monduamana tëntša sëndachëjënguñe juabemana ntšamo Bëngbe Bëtsabe uabemana palabrënguñe endayancá, y juentsaca y buacuatsíne chëjënga jenábatsëcana y sibiajana nýa tëntša uasebtotonanëjuangá jtsichëtjonana. <sup>6</sup> Chënga jtsebošana chë fiestënguñe nýa quëferoca jtsetbiámanama, y chë judiëngbe enefjuana yebnënguenache chë más uámana luarënguñe. <sup>7</sup> Chënga jtsebošana tsáshenañe entšanga nýa respétoa chamotsacheuanama, y ‘abuátambayënga ca’ chamotsachembuanámna chënga jtsebošana.

<sup>8</sup> “Pero tsëngaftangna ndoñe šmattseboše entšanga ‘abuátambayënga ca’ chacmotsachembuanama, er nýetsca tsëngaftanga mo catšatangcá šmondmëna, Bëngbe Bëtsábeñe betsošbuachëyeca, y nýe canýa endmëna tsëngaftangbe Buatëmbayá. <sup>9</sup> Tsëngaftanga ‘taitá ca’ chë ley abuátambayënga šmondbétsachembuana, pero tsëngaftanga ndocna quem luarentšá ‘taitá ca’ šmattsechembuana; tsëngaftanga nýe canýe Taitá šmondhomna, chë celoca endmëná. <sup>10</sup> Ndoñe šmattseboše entšanga ‘mándayënga ca’ chacmotsachembuanama; er nýe canýe Mandayá endmëna y cha Cristo endmëna. <sup>11</sup> Nda tsëngaftangbeñe chë más uamaná tojtsemná bontsemna chë inýenga jtsaservénana. <sup>12</sup> Nda cachá bëtsá tojtse nobi-amná, nduamaná mochántsebema; y nda cachá nduamaná tojtse nobi-amná, más bëtsá mochánjábema.

<sup>13</sup> “¡Tsá lastema tsëngaftangbiana, bacna entšanga ntšamo ndegombre šmojuabnacá ndinýinýayënga fariseunga y ley abuátambayënga! Tsëngaftanga šmontsama entšangbiana puerte totcá chaotsemna Bëngbe Bëtsabe amëndayoye jamashënguama, mo bësásá cuafsebiatamiancá. Pero ni cach tsëngaftanga choye quešmátamashjuana, ni inýenga choye jamashënguama bošëngbioye chama quešmátaleściana. <sup>14</sup> ¡Tsá lastema tsëngaftangbiana, ntšamo ndegombre šmojuabnacá ndinýinýayënga fariseunga y ley abuátambayënga! Tsëngaftanga chë viuángbioye chë tmobomna soyënga jtsabacayana, y entšangbe delante tsabá chacmotsëñýa y chënga šmojtsaingñayama ndoñe chamondëtsetatšëmbuamna, Bëngbe Bëtsáftaca tsá jtsencuëntayana. Chë causa, Bëngbe Bëtsá tsëngaftanga más jabuache inýengbiana cmochánjácástigaye.

<sup>15</sup> “¡Tsá lastema tsëngaftangbiana, bacna entšanga ntšamo ndegombre šmojuabnacá ndinýinýayënga fariseunga y ley abuátambayënga! Tsëngaftanga ba luarënguenache jtsajana canýa tsëngaftangbe ustóna onguayiñe, y šmojñýena ora, tsëngaftanga jamana cha chaotsemna tsëngaftangbiana uta soye más merecido buajóná infiernoye chaotsama.

<sup>16</sup> “¡Tsá lastema tsëngaftangbiana; tsëngaftanga šmondmëna mo jtanënga entšanga unachayëngcá! Tsëngaftanga šmondbétsichamo: ‘Nda inýabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentsa castellanama cha tojajurasna, añe jtsemnana chë tbojašbuachená soye jamama ca.’ <sup>17</sup> ¡obëjëmënga y nduabínýënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiana josërviana jtsemnana, nýe Bëngbe Bëtsabe bëts yebnoca chë castellano tojtsemnayeca. <sup>18</sup> Tsëngaftanga mëntšánaca šmondbétsichamo: ‘Nda inýabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiana altaroca tojtsejájona soyëngama tojajurasna, añe jtsemnana chë tbojašbuachená soye



jamama ca.' <sup>19</sup> ¡Nduabínñénga! ¿Ndayá más uámana soye yomna, chë Bëngbe Bëtsabiamá tmojacjá soyénga o chë altar? Chë tmojacjá soyénga Bëngbe Bëtsabiamá josérviamá jtsemnana, nýe chë altaroca chë soyénga tmojacjáyeca. <sup>20</sup> Nda chë altarama tojajurá, ndoñe nýe chë altarama ntsejúranya. Lempe chë altar juatsboca tojtsemnámnaca cha jtsejúranya. <sup>21</sup> Nda Bëngbe Bëtsabe bëts yebnama tojajurá, ndoñe nýe Bëngbe Bëtsabe bëts yebnama ntsejúranya. Bëngbe Bëtsabiamá cha jtsejúranya, cha chë chentše oyená. <sup>22</sup> Y nda celocama tojajurá, chentše reyca Bëngbe Bëtsabe tñemaniñama cha jtsejúranya y cachora Bëngbe Bëtsabiámnaca, chentše yotbemanabiamá.

<sup>23</sup> “¡Tša lastema tsëngaftangbiama, bacna entsanga ntšamo ndegombre šmojuabnacá ndinýinýayénga fariseunga y ley abuátambayénga! Tsëngaftanga Bëngbe Bëtsabiamá jtse- quécjnyana chë jajañentša sananga bnëtsanentšana canýe soye; chë binche matatémenga menta, anís y chë cominentša sanángnaca. Pero tsëngaftanga nýe batsá jtsamana chë leyentša más uámana soyénga, mo chë nyetsca entsanga cachca derechénga chamotse- bomnna, ínýenga jtsalastemánana y chë tsabe soyénguiñe jtsiyenana, chca, entsanga tsëngaftangbëñe chamotsošbuáchemá. Chë soyénga cocayé cmontsamna jtsamana, chë ínýe tsabe soyénga amana ntjajbnacá. <sup>24</sup> ¡tñanénga entsanga unachayénga! Tsëngaftanga chë base soyénga jamama puerte jtsenócochinýenana, pero jtsebnëjtombana uámana soyénga ja- mama, Bëngbe Bëtsá tojanmandá soyénga. Y chca, tsëngaftanga šmontsemna mo canýe entšá ndayá tojtsabuchetjá bayéñja jtsejuánama, ndoñe ntjasama, jasama ndoñe yondëlesenciana ca chë leyíñe iuayana causa. Pero šmondmëna mo entsangcá ndëmuanýenga camellbe mëntšena jasana, y chë leyíñe endayana chcana jasama ndoñe yondëlesenciana ca.

<sup>25</sup> “¡Tša lastema tsëngaftangbiama, bacna entsanga ntšamo ndegombre šmojuabnacá ndinýinýayénga fariseunga y ley abuátambayénga! Tsëngaftanga šmondmëna mo entsangcá ndëmuanýenga platilléjenga y tazëšénga shjoicajana jtsóbojabiana, pero tsoyna nýe cachcá jonýayana. Tsëngaftanga tša jtsentšénana entsangbiama mo tsabengcá jtsinýnama, pero tsëngaftangbe ainanentše jútjena entsemna nýe jtsatbëbanama y nýe bëtscá soyénga jésebonnna juabnëngaca. <sup>26</sup> ¡Nduabínýa fariseo! Cochýshetsajbaná ainaniñe bacna soyénga bonnna. Chamna nýe tsabe juabnënga chentše cochtsebonna, y lempe ntšamo chacojtsamcá y entsanga chamojtsónýacá tsábá echántsemna.

<sup>27</sup> “¡Tša lastema tsëngaftangbiama, bacna entsanga ntšamo ndegombre šmojuabnacá ndinýinýayénga fariseunga y ley abuátambayénga! Tsëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana soyéngaca. <sup>28</sup> Tsëngaftanga chca šmondmëna: ontsangbe delante tsëngaftanga jtsinýnana mo nyetsca soyénguiñe tsábá amëngcá, pero ndoñe chca quešmátsmëna. Tsëngaftangbe ainanentšna chë bacna entsanga ntšamo ndegombre tmojuabnacá ndinýinýayéngcá y chë bacna soye amëngcá šmontsejuabná.

<sup>29</sup> “¡Tša lastema tsëngaftangbiama, bacna entsanga ntšamo ndegombre šmojuabnacá ndinýinýayénga fariseunga y ley abuátambayénga! Tsëngaftanga jtsamana chë Bëngbe Bëtsabe juabna oyebuambnayénga tempsquënga bëtsetša entsanga chamotsemnna, chëngbe cuevëshënga jtsatspórmayëse. Tsëngaftanga cachcá jtsamana chë nyetsca soyénguiñe tsábá amëngaftaca, chë chëngbiama jtenójuaboyama pormániñe jtsatsbótamnyëse; <sup>30</sup> y chentšana šmondbëtšichamo: ‘Bënga chë bëngbe bëtsejémëngbe tempo maftsjanienëse, chëngbiye ndoñe matmëñjanëjabuache chë Bëngbe Bëtsabe juabna oyebuambnayénga jobáyama ca.’ Pero mo chëngcá canýe buayenana sóyeca tmojabëngbioyna ndoñe ntsayaunanana. <sup>31</sup> Pero ntšamo šmojtsamcá jtsamëse, tsëngaftanga šmontsinýanýná ndegombre chë Bëngbe Bëtsabe juabna oyebuambnayëngbiye tmojanbáyëngbe entsanguentšana šmonnna. Y mora cach tsëngaftangbe bëtš taitangcá tsëngaftanga šmontsama. <sup>32</sup> ¡Mopochocanga jamama chë bacna soyénga, chë tsëngaftangbe bëtš taitanga tmojanbojatsé jamama soyénga!

<sup>33</sup> “¡Mëtšcuayénga, mëtšcuaye entsanga! ¿Ndayá šmochjama chë infiernoca uabouana castigüentsana jótšocama? <sup>34</sup> Chýyeca atše tsëngaftangbiye chanjichamuá Bëngbe Bëtsabe juabna oyebuambnayénga, tsabe soye tatsëmbënga y abuátambayénga. Pero tsëngaftangna, ínýengbiye šmochantsëbaye y šmochanjácrucificaye; ínýengbioyna chë enefjuana yebnënguenache šmochanjátsenaye y nyetsca bëtš pueblënguenache chënga šmochandúcama. <sup>35</sup> Chýyeca, tsëngaftangbiama nyets castigo echántsemna chë nyetsca soyénguiñe tsábá amënga tmojëtšóbanama; Abel, chë jóbana chabotsemnna tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquíñana, Bëngbe Bëtsabe bëtš yebnentše tmojanóba, altar y chë entsanga Bëngbe Bëtsábíoye imojánadorana luariñe. <sup>36</sup> Ndegombre cbéyana, lempe chë soyéngama castigo morsca entsangbiama echántsemna ca — Jesús tojánayana.

*Jesús tojanošachna Jerusalenoca entsangbiam*  
(Lc 13.34-35)

<sup>37</sup> Měntšánaca Jesús tojánayana: “Jerusalenentša entsanga, Jerusalenentša entsanga! Tšëngaftanga chë Bëngbe Bětsabe juabna oyebuambnayënga jtsëbáyana y chë Bëngbe Bětsabe ichmónënga ndětsbëngaca jtsatëchënganana jtsëbáyana. Bueta soye atše sënjabošëna tšëngaftanga átšbioye júbuajana, mo canye tuamba chabe bolletotémënga chabe juatëngmiáša tajsoye cuaftajayecá, pero tšëngaftanga ndoñe chešmátsbošëna. <sup>38</sup> Y šmochjinýe, atše mora cachcá cbochanjesënýaye, y chca, atšna enánanga cbochanjesábashejuana, mo canye yebna cachcá tcojesonýa y énañe tcojeseboshjoncá. <sup>39</sup> Y atše cbéyana, ndegombre tšëngaftanga morscana atše ndoñe más quešmochátinýe; y atše šmochántinýe mēntšá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

## 24

*Jesús tojánayana chë Bëngbe Bětsabe bēts yebna lempe mochjánpochocama*  
(Mc 13.1-2; Lc 21.5-6)

<sup>1</sup> Jesús Bëngbe Bětsabe bēts yebnentšana tojēftsanbocna y ya yojtsaye. Chorna chë uatsjëndayënga chábioye tmojanobeconá y tmojanontšë nýetsca chentša bēts yebnënga cha jinýinýiyana. <sup>2</sup> Chora Jesús tojanéyana: “Tšëngaftanga lempe šmontsonýá. Ndegombre šcuayana, quem Bëngbe Bětsabe bēts yebnentšë ndoñe queochaisoquéda ni mo canye ndětsbé inýe ndětsbé juatsboye. Lempe mochantsepochoá ca.”

*Ntšamo yochtsemna quem luare jopochócama tempo chaojtsobeco ora*  
(Mc 13.3-23; Lc 21.7-24; 17.22-24)

<sup>3</sup> Chentšana chënga Olivos tjashoye tmojána. Jesús choca yojtsetbemana; as, chë uat-sjëndayënga tmojanobobeconá nýe chëngbiam jatjayama, mēntšá: —Sméyana. ¿Mocna ora chë soyënga Bëngbe Bětsabe bēts yebnoca yochjochnënga ca? ¿Ndayá yochjochnënga bēnga jinýanýiyama aca jésabama ora ya yojtsemnama y quem luare jopochócama tempo yojtsobecuama ca?

<sup>4</sup> As Jesús tojanjá: —Cuedado šmochtsebmoma ndocná chacmondáingñema. <sup>5</sup> Banga mochanjabo y mochantsabíchamo chënga atše imomna ca. Mochántsichamo: “Atše chë Cristo sēndmēna ca” y chca, ba entšángbioye mochanjáingñaye. <sup>6</sup> Tšëngaftanga šmochanjouena canye luarentša entšanga inýe luaroca entšángaftaca imojtsentsjanama y nderado mochjentsjámna. Ndoñe matauatjëngana, er chca jochnënguama endmēna; pero masque chcase, quem luare jopochócama cabá ndoñe queochátsmēna. <sup>7</sup> Canye luarentša entšanga inýe luaroca entšángaftaca mochántsentsjanaye, y canye amēndayábentša entšanga inýe amēndayábioca entšángaftácnaca; y ba luarënguñe shēntsana echanjóshjango y chentša fshantsënga echanjuangmēmana. <sup>8</sup> Masque chca jasúfiase, más chcoye cabá más mochanjatssúfia.

<sup>9</sup> “Chora, entšanga inýengbe cucuatšíñe cmochanjábashejuana chacmatsetšenama y cmochantsēbaye; y atšbe ústonënga bētsemnayeca nýetsca luarënguentsá entšanga cmochantsēbuayëña. <sup>10</sup> Chë tempo, banga mora atšbeñe ošbuáchiyënga, ošbuáchiyana mochantsajbaná y mochantsenábeyñe y jóbanama inýengbe cucuatšíñe mochántsenboshjuana. <sup>11</sup> Banga Bëngbe Bětsabe ndoñe ndegombre juabna oyebuambnayënga mochanjábocana y ba entšanga mochanjáingñaye. <sup>12</sup> Nýetšá bacna juabnënga entšanga ainaniñe echanjésemna, y chë causa banga ndoñe quemocháténbobonshana. <sup>13</sup> Pero nda nýets tempo atšbeñe ošbuachiyá totsomñe, atsbocaná echántsemna. <sup>14</sup> Y quem tsabe noticiënga Bëngbe Bětsabe amēndayama nýets quem luariñe entšángbioye mochantsabuayinaye, chca, chë ndegombre soyënga Bëngbe Bětsabiam chënga chamotsetatšëmbuama. Chentšana cocayé quem luare jopochócama tempo echántsemna.

<sup>15</sup> “Chë Bëngbe Bětsabe juabna oyebuambnayá Daniel chë puerte uabouana soye tojēftsanabema chë pochócaye soyama. Tšëngaftanga chë puerte uabouana soye chë uamana ca uabania luarentšë chašmojinýe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; <sup>16</sup> entšanga Judeoca chamojtsabamnëngbiam, bats-jabengoye chamotsacheta. <sup>17</sup> Y nda cachabe yebnentša tsbanánoca chaojtsemna, chaot-sachá chocana ntjastjangcá ndayá tsoicana jēftsábocnama. <sup>18</sup> Y nda jajoca chaojtsemna, yebnoye ndoñe chaondéta ni mo chabe quēfsaíya jesácñama. <sup>19</sup> ¡Tša lastema chë tempo ngomámanënga chamojtsemnëngbiam o ochóchaye šësonga chamojtsabamnëngbiam! <sup>20</sup> Bëngbe Bětsá šmochtseimpadana chë tšëngaftanga jachetama, uaftena tempo ora o canye ochnayté ndoñe chaondětsemnama. <sup>21</sup> Chca, chora puerte ngménana echántsemna. Tša jabuache ngmenancá, quem luare jabojátšama orscana y mēntscoñama y más chcoye, cachcá ngménana ndoñe ntjamnana. <sup>22</sup> Chë puerte ngménana tempo yapa bēn ndoñe

chaondétsemnama Bèngbe Bètsá ndoñe tonjalesenciase, ndocná quentatsbocá; pero chabe ubuáyanènga cha corente endábabuan'yeshanayeca, echanjama yapa bèn tempo ndoñe chaondétsemnama.

<sup>23</sup> “Chora nderado nda cmochanjáuyana: ‘Min'yènga, muentse chë Cristo entsemna’, o ‘Choca cha entsemna ca’, chë soyèngama ndoñe šmattsayaunana. <sup>24</sup> Chora mochanjábocana ndoñe ndegombre uámama ubuáyanènga, chënga Cristo imonna ca jtsichámese, y Bèngbe Bètsabe ndoñe ndegombre juabna oyebuambnayéngnaca; y chënga mochanjama bèts soyènga chëngbe obenana jin'yan'yiyama, ents'anga jáingñama, y tmojobenase, chë Bèngbe Bètsabe bocacánèngnaca. <sup>25</sup> Atše ya chama tcbonjabuayená chë tempo cabá ndóshjango ora. <sup>26</sup> Chiyeca, nderado chënga chacmojáuyana: ‘Min'yènga, chentse chë Cristo entsemna, ents'anga ndoyenoca ca’, choye ndoñe šmatjá; o chacmojáuyana: ‘Cha can'ye tsoca entsemna ca’, chama ndoñe šmattsayaunana. <sup>27</sup> Er ntšamo chë tojatcuin'ye ora, shin'ye bocanoicana y shin'ye uenatjèmbambanèntscóñe jabuashin'in'yenancá y ba luarènguenache ents'anga jobenayana jin'yama, cachcá, Bèngbe Bètsá Entšá tbojanbemá quem luaroye chaojésabo te, ents'anga nyets luarentse mochanjobenaye cha jin'yama. <sup>28</sup> Can'ye obanabe cuerpo tojtsemnama chë gallinacènga tmojátatšëmbona y cachora chë beconana jojotana. Cachcá, chë castigo echántsemna n'ya chama chë tempo chaojtsemna ora ca” —Jesús tojánayana.

*Bèngbe Bètsá Entšá tbojanbemá quem luaroye echanjésabo*

*(Mc 13.24-37; Lc 21.25-33; 17.26-30, 34-36)*

<sup>29</sup> Mèntšánaca Jesús tojánayana: “Chë puerte ngménana tempo chaojochnèngüents'ana, shin'ye ndoñe queochátsbuashin'in'yana, juashcona ndoñe queochátsbin'yaye, celocana estrellènga echanjatquécj'ana y quem luarentsa tsbanánoca espíritènga obenana bomnènga echanjángmèmana. <sup>30</sup> Chora can'ye soye celoca echanjón'ya ents'anga jin'yan'yiyama Bèngbe Bètsá Entšá tbojanbemá ya iuaisaboma, y nyets luarenache ents'anga mochanjenóbošachna, y Bèngbe Bètsá Entšá tbojanbemábioye mochanjin'ye celoca jantšetèshiñe echántsaboye, puerte obenánaca y corente buashin'in'yan'niñe. <sup>31</sup> Y can'ye trompetèfua jabuache chaojuénana ora, cha chabe angelotémènga echanjichamuá Bèngbe Bètsabe ubuáyanènga júbuajama, nyets luarèngocana, celoca can'yoica juachoicana y chë in'yoica juachóntscóñe.

<sup>32</sup> “Ntšamo higo betiyeca endbètsopasanama šmochjuatsjin'ye: Tojtsaisabuacua y tojtsaisèjotsana ora, chë tsabe tempo ya tojtsaisobecuama jtsotatšëmbuana. <sup>33</sup> Cachcá, lempe chë ndayama tsèngafanga tcbonjauyancá chašmojin'ye ora, šmochántsetatšëmbo Bèngbe Bètsá Entšá tbojanbemá ya jésabama yojtsemnama. <sup>34</sup> Ndegombre cbéyana, lempe chca echanjochnèngo, morsa ents'anga cabá ndóbana ora. <sup>35</sup> Celoca y quem luare echanjopochóca, pero atšbe palabra ndocna te queochaisopochóca.

<sup>36</sup> “Pero ndayté y ntseco ora Bèngbe Bètsá Entšá tbojanbemá yochjésabama, ndocná quenátstatšëmbo, ni chë celoca angelotémènga, ni Bèngbe Bètsabe Uaquiñá. N'ye chë Taitá chama yotátšëmbo.

<sup>37</sup> “Ntšamo Noé yojétsiyena ora tojanopasacá, cachcá echanjopása chë Bèngbe Bètsá Entšá tbojanbemá chaojésabo ora. <sup>38</sup> Noebe tempo, chë uabouana uaftena cabá nduáshjango ora, ents'anga imnasaye, imnofšèsnaye y imnóbouamnaye; natjèmbana imojtsiyen'e, y chca imojtsom'ne Noé chë barqueshoye tojánamashènguentscuana. <sup>39</sup> Chënga tondaye imonjántatšëmbo, n'ye chë uabouana uaftena tojánashjango y nyetscanga tojtsan'éyamba ora cocayé. Cachcá echántsemna Bèngbe Bètsá Entšá tbojanbemá chaojésabo ora; ya chaojochnèngo ora, ents'anga chama mochanjátatšëmbona. <sup>40</sup> Chora uta boyabásata jajoca bochántsemna; can'ya mochanjesbetse y chë in'yana ndoñe. <sup>41</sup> Uta shembásata bochántsejan'yoye; can'ya mochanjesbetse y chë in'yana ndoñe.

<sup>42</sup> “Chiyeca cuado šmochtsèbomna y yejuana šmochtsantješna, er ndoñe quešmátstatšëmbo ndayté tsèngafangbe Utabná yochjésabama. <sup>43</sup> Pero quem soye tsabá chachmèsertá: Chë yebnentša nduiño, ntseco ora ibeta atbèbaná yochjabama tojtsetatšëmbèse, cha nantsefs'na y ndocnábioye buanjaleséncia jusha'ne chaotsendbemama tsoye jtsamashènguama y jtsatbèbama. <sup>44</sup> Chiyeca, tsèngafángnaca šmochtsèprontana, er Bèngbe Bètsá Entšá tbojanbemá echanjésabo, ents'anga chama tondaye chamontsejuabná ora ca” —Jesús tojánayana.

*Chë tsabe oservená y chë ndoñe tsabe oservená*

*(Lc 12.41-48)*

<sup>45</sup> “¿Nda yomna chë oservená ntšamo chë nduiño tojtsebošcá amá y nyets juábna amá? Cha jtsemnana nda chë nduiño bochjèftsebošhona chë yebnentšènga chaotsan'yenama y jasama tojtsemna ora chaújuatšema. <sup>46</sup> Chë nduiño tojtashjango ora, chë oservenábioye tbojin'yena ntšamo ibomncá jtsamése, chë oservená puerte oyejuayá echántsemna. <sup>47</sup> Ndegombre cbéyana, chë nduiño chábioye bochanjaimpáda lempe chabe

soyënga chabotsinýeñama. <sup>48</sup> Pero chë oservená bacna entśá tomñesna, jajuaboyana chë nduiño ndoñe betscó yochantabo ca, <sup>49</sup> y as, cha jontśana chë inýe oservénënga jtsajantsetayana, becá jtsesana y jtsetmuana inýe tēmiëngaftaca. <sup>50</sup> Y chabe nduiño jtsahjanguama ndoñe tontsejuabná te y ndoñe tontsetátśēmbo ora, cha echántashjango. <sup>51</sup> Chora chë nduiño jabuache bochantsecastíga, y ntśamo chë bacna entśanga ndayá ndegombre tmojuabnacá ndinýinýayënga jasúfriama entsamncá, cha echanjasúfria. Chora cha puerta echanjenóbośachna y chë tsetśanama juatsaśënga echantsenoftěśjojnaye ca” — Jesús tojánayana.

## 25

### *Chë bnětsana tobiášëngbiama cuento*

<sup>1</sup> Měntśanaca Jesús tojánayana: “Chë te chaojóshjango ora, Běngbe Bětsabe aměndayana echántsemna mo ntśamo canýe casamento fiestentśe tojanopasacá. Měntśá yojopása: Bnětsana tobiášënga chěngbe querosine uajuinýaněshangá imojěťśájaca y imojábocana chë casamento boyabása jajébenguama. <sup>2</sup> Chë bnětsana tobiášënguentśana, shachnënga sempre enójuabnayënga innamna, y chë inýe shachnënga, ndenójuabnayënga. <sup>3</sup> Chë ndenójuabnayënga chěngbe uajuinýaněshangá imojěťśájaca, pero querosine ndoñe imonjuabuyamba chë uajuinýaněshangañe cachiñe jtaťśuámama. <sup>4</sup> Pero chë sempre enójuabnayënga chěngbe uajuinýaněshangá imojěťśájaca y querosinénaca botellěśënguiñe imojabuyamba. <sup>5</sup> Chë casamento boyabásana ndoñe betscó yonjabo, chíyeca nyetsca tobiášënga ocnayana yojubuaache y imojtsomaná. <sup>6</sup> Mo tsěntseto orna, chěnga imojouena mēntśá uayebuáchana: ‘¡Chë casamento boyabása ya endabó! ¡Jajébenguama mobocana ca!’ <sup>7</sup> Asna, nyetsca tobiášënga imojotsbaná y imojontśa chë uajuinýaněshangá juabopróntana. <sup>8</sup> Chorna, chë shachna ndenójuabnaye tobiášënga chë inýe shachnënga sempre enójuabnayëngbiye imojáuyana: ‘Diosmanda tsěngaftangbe querosinentśana baseytema śměbuaťśatá, bēngbe uajuinýaněshangá tojontśe jtsafsanana ca.’ <sup>9</sup> Pero chë sempre enójuabnayënga imojayana: ‘Ndoñe. Tcbojubuaťśatase, tsěngaftangbiama y bēngbiámna querosine echántashbe. Más tsábá entsemna, chë querosine mondbětsenoye chaśma y tsěngaftangbiama chaśmauábuamiñe ca.’

<sup>10</sup> “Chorna, chë shachna ndenójuabnaye tobiášënga imojá chë querosine jauabuámiyama; pero chěntscuana chë casamento boyabása yojášhjangó y chë sempre enójuabnayënga cháťśaca chë casamento fiestoye imojámashjna, y chěntśa bėsása imojtatame. <sup>11</sup> Chěntśana chë inýe tobiášënga imojášhjajna y mēntśá imojtsichamo: ‘¡Taita, Taita, śmēbētaťśo ca!’ <sup>12</sup> Pero chë casamento boyabása yojójua: ‘Ndegombre chěyana, tsěngaftanga ndoñe quechatěbuaťśa ca.’

<sup>13</sup> “Cachcá echántsemna Běngbe Bětsá Entśá tbojanbemá chaojėsabo ora; chíyeca śmochtseprontana, tsěngaftanga ndoñe queśmátstatśēmbo ndayté, ni mocna ora chca yochjopásama ca” — Jesús tojánayana.

### *Chë crocenánama cuento*

(Lc 19.11-27)

<sup>14</sup> “Běngbe Bětsabe aměndayana endmēna mo ntśamo canýe boyabásaftaca tojanopasacá. Cha ibojťsemna inýe luaroye jťsoñama; as chabe oservénënga yojáchembo y yojaimpádaye chabe crocénana chamotsinýenama. <sup>15</sup> Cányabioye ibojántśabuachiye shachna uaranga crocénana, inýabioyna uta uaranga y inýabioyna canýe uaranga. Chca yojamna ntśamo cada ona ibojobiashjáčhá. Y as chë boyabása yojťsoñe. <sup>16</sup> Cachora chë shachna uaranga yojoyěngacñá yojá trato jabemama, y chca, inýe shachna uaranga crocénana yojábotiye. <sup>17</sup> Chë uta uaranga yojoyěngacñá cachcá yojama y inýe uta uaranga yojábotiye. <sup>18</sup> Pero chë canýe uaranga yojoyěngacñana, yojá, fshantsiñe yojajutjo y chabe mandayabe crocénana chěntśe yojťseitēme.

<sup>19</sup> “Chěntśana baytese chë oservénëngbe aměndayá yojťashjango y yojóntśa chë crocénánama chěnga jatjayana. <sup>20</sup> Natsana yojášhjangó chë shachna uaranga yojoyěngacñá y chabe mandayábioye inýe shachna uaranga crocénana ibojántśabuachiye y mēntśá ibojayayana: ‘Taita, aca shachna uaranga śconjanoyé y muentśe entsemna inýe shachna uaranga sěnjaboté ca.’ <sup>21</sup> As chë mandayá ibojayayana: ‘Tśa tsábá, tsabe oservená y ntśamo tsboścá amá. Aca quem base soyiñe lempe ntśamo tcbójamandacá tcojámayeca, atśe cbochanjaimpáda más bēťścá chaścotsinýeñama. Mamášhěngó y átśeftaca cochjójeyuaye ca.’ <sup>22</sup> Chěntśana chë uta uaranga yojoyěngacñá yojášhjangó y chë mandayábioye ibojayayana: ‘Taita, aca uta uaranga śconjanoyé y muentśe entsemna inýe uta uaranga sěnjaboté ca.’ <sup>23</sup> As chë mandayá ibojayayana: ‘Tśa tsábá, tsabe oservená y ntśamo tsboścá amá. Aca quem base soyiñe lempe ntśamo tcbójamandacá tcojámayeca, atśe cbochanjaimpáda más bēťścá chaścotsinýeñama. Mamášhěngó y átśeftaca cochjójeyuaye ca.’

<sup>24</sup> “Pero chë canÿe uaranga yojoyëngacÿe oservená yojáshjango orna, chabe mandayábioye ibojauyana: ‘Taitá, atse sëndétatšëmbo aca canÿe tsátjaye entsá comnama; acna chë ndoñe tconjajé chentše saná jociñana y chë ndoñe tconjujquëshe luarentše jobuátbanana. <sup>25</sup> Chama atse uatjana šjuábuache, chíyeca atse sënjá y fshantsiñe chë crocénana sënjetseitéme. Pero muentše acbe crocénana entsatsmëna ca.’ <sup>26</sup> As chë mandayá ibojajuá: ‘¡Bacna oservená y oyëñjayá! Chë ndayentše ndoñe tijajé chentše saná jociñana y chë ndoñe tiju-jquëshe luarentše jobuátbanana atse tsuamanama icojátatšëmbëse, <sup>27</sup> aca cmonjamna atšbe crocénana bancoca jetsobuájua y atse matijtabo ora, atšbe crocénana matijtóyëngacÿe y chë chentsana tojoboté crocénanënaca ca.’ <sup>28</sup> Y as yojamënda: ‘Chë uaranga motseboca y chë bnëtsana uaranga entsebomnábioye chana motsatšetá ca. <sup>29</sup> Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.’

<sup>30</sup> “Y chora cha yojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chë tsetšanama juatsašënga echantsenoftšësjonaye ca’ — Jesús tojanëyana.

*Ntsamo chë quem luare jopochócama ora, nyetsca entsangbiana mochjayana*

<sup>31</sup> Mëntšánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinÿinÿaniñe y nyetsca chabe angelotëmëngaftaca chaojésabo ora, chë reybiana puerte buashinÿinÿana tthemaniñe echanjótëma. <sup>32</sup> Chora nyets luarëngoca entsanga chabe natsanoica mochanjénefna, y cha, entsanguentsana inÿenga echanjábacacaye, mo chë oveshënga abuajëñya oveshënga chivëngbentsana endbetsabacacnaycá. <sup>33</sup> Chë abuajëñyana, oveshënga chabe catšbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catšbioica echanjúbuaja y chë bacna entsangna chabe uañicuayoica echanjatsaye.

<sup>34</sup> “Chorna chë Rey, Bëngbe Utabná, chabe catšbioica chamojtsemna entsanga echanjáuyana: ‘Tsëngaftanga, Atšbe Taitá tsábeñe cmëtabna, mabënga ca; atšbe amëndaye luare mo tsëngaftangbiana otocana soycá mosháchiñënga; tsëngaftangbiana endëprontana, Bëngbe Bëtsá quem luare tonjanma orscana. <sup>35</sup> Er atse šonjanishëntsana y tsëngaftanga saná šmonjancaredadó; šonjanajuendá y tsëngaftanga šmonjanafšé; inÿe luarocana ashjangonacá sënjánana y posada šmonjanántsame. <sup>36</sup> Enašá sënjánana y entsáyá šmonjanëtšetá jtichëtjuama; šocá sënjanjáona y šmonjanatsëtsaye; cárceloca sënjanëtátëma y jabëuatsëtsayama šmonjánabo ca.’

<sup>37</sup> “As chë Bëngbe Bëtsá chabe bominÿiñe tsábenga tojábiamënga mochanjatjaye: ‘Bëngbe Utabná, žntseco shëntseca tcbëñjaninÿe y tcbëñjanajuatšé? žNtseco uajuendayá tcbëñjaninÿe y tcbëñjanafšé? <sup>38</sup> žO ntseco inÿe luarocana ashjangonacá tcbëñjaninÿe y posada tcbëñjanántsame, o enašá y entsáyá jtichëtjuama tcbëñjanëtšetá? <sup>39</sup> žO ntseco šocá o cárceloca utamená tcbëñjaninÿe y jauatsëtsayama tiffána ca?’

<sup>40</sup> “As chë Utabná echanjóua: ‘Ndegombre cbëyana, lempe ntšamo chë atšbe catšátanguentsana chë más batšá uámanëngaftaca šmojamcá, cach átšeftaca šmonjanma ca.’

<sup>41</sup> “Chentsana chë Utabná chabe uañicuayoica chamojtsemna entsanga echanjáuyana: ‘Atšbentsana mojuánanga atšbe Bëtsabe uaboténënga. Infiernoye motsajna, chë ndocna te queochátsfana iñeshoye; choca endëprontana Satanás y chabe ustonëngbiana. <sup>42</sup> Er atse shëntseca sënjánana y tsëngaftanga saná ndoñe chešmatancaredadó; šonjanajuendá y ndoñe chešmatanafšé; <sup>43</sup> inÿe luarocana ashjangonacá sënjánana y ndoñe posada chešmatanántsame. Enašá sënjánana y ndoñe entsáyá chešmatanëtšetá; šocá sënjanjáona y cárceloca sënjanëtátëma y ndoñe chešmatanatsëtsá ca.’

<sup>44</sup> “As chënga mochanjatjaye: ‘Bëngbe Utabná, žntseco tcbëñjaninÿe shëntseca o uajuendayá, o inÿe luarocana ashjangonacá, o enašá, o šocá o cárceloca utamená y ndoñe tcbëñjanajabuache ca?’

<sup>45</sup> “Y chë Utabná echanjóua: ‘Ndegombre cbëyana, tsëngaftanga ntšamo chë atšbe catšátanguentsana chë más batšá uámanëngaftaca, ndoñe šmonjanmcá, átšeftaca cach ndoñe chešmatanma ca.’

<sup>46</sup> “Chëngna infiernoye nyetsca tescama mochantsësetjango, y chë Bëngbe Bëtsá chabe bominÿiñe tsábenga tojábiamëngna chë nyetsca tescama yomna tsábe vida mochántsebomna ca’ — Jesús tojánayana.

## 26

*Entšanga tmojanjuabó ntšamo jamëse Jesús jishachama  
(Mc 14.1-2; Lc 22.1-2; Jn 11.45-53)*

<sup>1</sup> Lempe chca tojánayanentsana, Jesús chabe uatsjéndayënga tojanéyana: <sup>2</sup> “Tšëngaftanga šmondétatsëmbo, uta te y chë Bashco fiesta echántsemna y Bëngbe Bëtsá Entšá tbojanbemá inýengbe cucuatšíne mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

<sup>3</sup> Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenefjna, Caifás, chë bachnangbe más uámana amëndayabe bëts yebnentše.

<sup>4</sup> Tmojanenójuabó y tmojanenoyeuná jtsëíngñase Jesús jishachama, y jtsóbama. <sup>5</sup> Pero imojtsichamo: “Quem fiestëntscuana ndoñe, entsanga yapa muanjontša enbouenanana ca.”

*Canýe shembása botamana uanguëtše bėjaye Jesusbe bestšasiñe tbojanbuescja*  
(Mc 14.3-9; Jn 12.1-8)

<sup>6</sup> Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše. <sup>7</sup> Chëntscuana canýe shembása Jesúsbiøye tojanabeconá. Chë shembásana tojanamba canýe alabastro jarrëtema, jútjena canýe puerta uámana botamana uanguëtše bėjayeca. Jesús mesëshentše yojtsemnëntscuana, chë shembása chabe bestšasiñe chë botamana uanguëtše bėjaye tbojanbuescja.

<sup>8</sup> Chë uatsjéndayënga chca tmojáninýe orna, tmojanotjayaná y tmojanontšé ichámuana: —¿Ndáyeca nýe bonamente chë soye chca yojtsemna ca? <sup>9</sup> Chamna, matmënjobenanga chë bėjaye becá crocenánama juiyana y chánaca ndbomnjëmënga matmënjújabuache ca.

<sup>10</sup> Jesús chë soye tojanuena; as tojanéyana: —¿Ndáyeca ndoñe cachá quem shembása šmochanjonýaye ca? Ntšamo tonjamcá tšabá entsemna. <sup>11</sup> Er chë ndbomnjëmëngna nýets tempo tšëngaftangbeñe mochanjëftsemna, pero atše tšëngaftangaftaca ndoñe nýets tempo quicháisemna. <sup>12</sup> Ntšamo chë shembása tojamcá, chë botamana uanguëtše bėjaye atšbe cuerpiñe jabuëscjese, cha šontseprónta atše juatbontsa tescama. <sup>13</sup> Ndegombre chéyana, quem luariñe ndayéntsnaca Bëngbe Bëtsabe soyëngama chamojtsabuayiyná chentše, ntšamo quem shembása tojamámna becá mochanjëftsóyebuambaye, chca, entsanga chabiamna chamotsenójuabnma ca —Jesús tojanéyana.

*Judas tojána bachnangbe amëndayëngbiøye, Jesús chamuishachama*  
(Mc 14.10-11; Lc 22.3-6)

<sup>14</sup> Canýa chë bnëtsana uta uatsjéndayënguentsá, Judas Iscariote ca uabainá, tojána bachnangbe amëndayëngaftaca jencuëntama. <sup>15</sup> Y tojanatjá: “¿Ntsachetšá šmatjtabuënaye y Jesús tšëngaftangbe cucuatšíne chochjayentšbashejuana ca?”

As chëngna, unga bnëtsana ralbenga tmojtananubená. <sup>16</sup> Y cach orscana Judas yojtsenguaye ntšámose y ntseco ora, Jesús chëngbe cucuatšíne jayentšbashejuanama.

*Jesús chabe uatsjéndayëngaftaca Bashco saná tojanse*  
(Mc 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Chë Bashco fiesta bojatšenté, chë levadúracana ndëpormana tandëse jasama fiestëntscuana, chë uatsjéndayënga Jesúsbiøye tmojanobeconá y tmojanatjá: —¿Ndëmoca aca cojtseboše bënga fchaiprontama Bashco saná chacosama ca?

<sup>18</sup> Y Jesús tojanéyana: —Chë bëts puebloye motsajna canýe bacobe yebnoye y cha šmochjauyana: “Buatëmbayá tonjayana: ‘Atšbe ora ya echanjobuache, y atše acbe yebnoye sëntsa, Bashco fiesta jamama atšbe uatsjéndayëngaftaca ca.’ ”

<sup>19</sup> As chë uatsjéndayënga tmojanma ntšamo Jesús tojanamëndacá y chë Bashco fiesta saná tmojanprontá.

<sup>20</sup> Y tojanibétata orna, Jesús chë bnëtsana uta uatsjéndayëngaftaca mesëshentše yojtsemna. <sup>21</sup> Y imojtsesantscuana, Jesús tojanéyana: —Ndegombre chéyana, canýa tšëngaftanguentsá uayayëngbe cucuatšíne šochanjáboshjona ca.

<sup>22</sup> Chora chë uatsjéndayënga puerta ngmënaca imojtsemna y tmojanontšé canýánýa Jesús jatjayama: —Bëngbe Utabná, ¿nderado atše cha chtsemna ca?

<sup>23</sup> As Jesús tojanéjua: —Canýa nda chabe tandëse entsefchecuacná cach atše sëntsefchecuacná šcnenentše, cha uayayëngbe cucuatšíne šochanjáboshjona. <sup>24</sup> Ndegombre, Bëngbe Bëtsá Entšá tbojanbemáftaca echanjopása ntšamo Bëngbe Bëtsabe uabemana palabrënguiñe chabiamna iuayancá; pero, itša lastema chë bochjáboshjonabiamna! Más tšabá chabiamna manjamna ndoñe ntjónýnana ca.

<sup>25</sup> As Judas, chë boshjuaná, Jesúsbiøye tbojanatjá: —Buatëmbayá, ¿nderado atše chtsemna ca?

Y Jesús tbojanjuá: —Ndegombre tcjayana ca.

<sup>26</sup> Imojtsesantscuana, Jesús tandëse tojanca, Bëngbe Bëtsábiøye chama tbojtanchuá, tojanatjá y chë uatsjéndayënga tojanatšatá. Y mëntšá tojánayana: “Mocñënga, mosënga. Atšbe cuerpo entsemna ca.”

<sup>27</sup> Chentšana, canye coptema vínoyeca tojanaca, Běngbe Bětsábioye tbojtanchuá y chě uatsjéndayěnga tojaněfsasé. Y mēntšá tojánayana: “Nýetscanga quem coptémntšana mofšenga. <sup>28</sup> Quem vínoye atšbe buiñe entsemna. Atšbe buiñe echanjuábuashana entsanga chamotsetatšěmbuama ntšamo Běngbe Bětsá entsanga tojanašebuachenacá aifne yochjochnēnguama. Chě buiñe bētsá entsangbiana echanjuábuashana, chēngbe bacna soyēngama perdonānēnga chamotsemnma. <sup>29</sup> Y ndegombre cbēyana, morscana atše ya ndoñe más chě uvasentšana obocniye quichaisofsiye. Chě tsēm vínoye tsēngaftangafata chanjofsiye, atšbe Taitabe amēndayoca chamojtsemna ora ca” —Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayana*  
(Mc 14.26-31; Lc 22.31-34; Jn 13.36-38)

<sup>30</sup> Běngbe Bětsá jetschuayama tmojancantá chentšana, Olivos tjšahoye tmojětsanbocana. <sup>31</sup> Choca Jesús tojánayana: —Tsēngaftanga nýetscanga quem ibeta átšbeñe ošbuáchiyana šmochantsobuetše y šmochántšacheta, er Běngbe Bětsabe uabemana palabrēnguifne, cha mēntšá tojánayana: “Chě oveshēngbe abuajēñya chanjóba y chě oveshēnga mochantsášhana ca.” Chca tsēngaftangafata echanjopása, uayayēnga chašmojishache ora. <sup>32</sup> Pero obanēnguentšana chaitayenentšana, tsēngaftangbe natsana Galileoye chanjá ca —cha tojanēyana.

<sup>33</sup> Chora Pedro tbojanjuá: —Masque nýetscanga áceñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

<sup>34</sup> As Jesús tbojanayana: —Ndegombre cbēyana, cam ibeta, ngallo cabá ndēcánta ora, aca unga soye cochanjyana ndoñe sconduabuatma ca.

<sup>35</sup> Pero Pedro tbojanayana: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nýetsca uatsjéndayēngnaca cachcá imojtsichamo.

*Getsemaní luarentše Jesús Běngbe Bětsáftaca tbojanencuentá*  
(Mc 14.32-42; Lc 22.39-46)

<sup>36</sup> Chentšana, Jesús chabe uatsjéndayēngafata canye luare Getsemaní ca uabáinoye tojána. Choca tojanēyana: “Muentše motbiana, chēntscuana atše choye chanjá Běngbe Bětsáftaca jencuéntama ca.”

<sup>37</sup> Y Pedro y chě Zebedeobe uta uaquñata tojětsanēbiatše. Choca yojóntša puerte ngmēnaca y corente cochtsetšenaná jtsemnma. <sup>38</sup> Jesús tojanēyana: “Atšbe ainana puerte ngmēnaca entsemna, mo jobanamcá. Muentše moquedanga y átšeftaca šmochtsefšna ca.”

<sup>39</sup> Chora Jesús más natsanoye tojána, tojanoshamentšé y fshantsóntscoca yojotsejbéna, y mēntšá Běngbe Bětsáftaca tbojanencuentá: “Atšbe Taitá, jopódianēse moma atše japadésama ndoñe chašondětsemnma. Pero ntšamo atše stsebošcá ndoñe chaondětsemna, sínó ntšamo aca cojtsebošcá ca.”

<sup>40</sup> Chentšana, Jesús chabe unga uatsjéndayēngbiye tojtanabo y chēngna innétsomañe. Chca tojánāñyena ora, Pédrēbiye tbojanayana: “¿Ni mo canye horatema tsēngaftanga šmonjobená átšeftaca jtsefšana ca? <sup>41</sup> Šmochtsefšna y Běngbe Bětsáftaca šmochtseñcuentaye, chca, bacna soye jamama ndoñe chacmondócochēnguama. Tsēngaftanga ndegombre šmontseboše espíritoca Běngbe Bětsá joyeunayama, pero cuerpiñe añemo ndoñe quešmátsbomna ca” —Jesús tojanēyana.

<sup>42</sup> Uta soyama tojtesaná y mēntšá Běngbe Bětsáftaca tbojanencuentá: “Atšbe Taitá, atše japadésama ndoñe chašondětsemnma jamama ndoñe jopódianēna, nýe ntšamo aca cojtsebošcá chaotsemna ca.”

<sup>43</sup> Y tojtanabo ora, chě uatsjéndayēnga cachíñe innétsomañe; yapa ocnyae causa nýe imojtsefshétana. <sup>44</sup> As Jesús cachcá yojětsēñyaye, y ungama cachíñe tojtesaná Běngbe Bětsáftaca jencuéntama, y cach palabrēnga tojánayana.

<sup>45</sup> Chora chě uatsjéndayēngbiye tojtanabo y tojanēyana: “¿Cabá šmotsomañe y šmotsochnañe ca? Ya ora tocjebuache, Běngbe Bětsá Entšá tbojanbemá bacna soye amēngbe cucuatšifne mochanjáboshjona. <sup>46</sup> Motsbananga, cuajna. Minýēnga, chě boshjuaná ya entebeconá ca.”

*Uayayēnga Jesús tmojánishache*  
(Mc 14.43-50; Lc 22.47-53; Jn 18.2-11)

<sup>47</sup> Jesús cabá yojtsóyebuambnāntscuana, Judas, canye chě bnétsana uta uatsjéndayēnguentšá, tojánashjango, y cháftaca imojtsemna ba entsanga espadējangaca y ngarotbēngaca prontānēnga. Chēnga imojamna chě bachnangbe amēndayēnga y chě judiēngbeñe bētsēmēngcá amēndayēngbe ichmónēnga. <sup>48</sup> Judas, chě boshjuaná, tojanjuabó ntšamo jamana entsanga jinýanýiyama ndēmua Jesús bētsemnana. Chiyeca

yojáuyana: “Nda chajiauámocho, cha echántsemna. Smochjishache ca.” <sup>49</sup> Cachora Judas Jesúsbioye tojanobeconá y tbojanchuá: —Buajtana, Buatémbyá ca.

Y tbojtanámocho.

<sup>50</sup> Jesús tbojaniyana: —Enutá, moma chë ndayá jabomama tcojabo ca.

Chorna, chë entsanga tmojanobeconá, Jesús tmojánishache y tmojanánatse.

<sup>51</sup> Chca orna, canýe enutá Jesúseftaca yojtsemná, chabe espadéja tojanenosëngbotëntsena, y chë bachnangbe más uámana amëndayabe oservenábioye canýe matscuaše tbojtsanëstjango.

<sup>52</sup> As Jesús tbojaniyana: “Espadéja matosëngbuajonýá. Nda espadéjaca tbojóba chana, cach espadéjaca echanjóbana. <sup>53</sup> ¿Aca ndoñe condétatsëmbo, atše atšbe Taitábioye stjaimpádase, cha cachora atšbiana nanjichamuá bnëtsana utama más ejércitënga angelotëmëngaca? <sup>54</sup> Pero chcasna, ¿ndayá Bëngbe Bëtsabe uabemana palabrënguifne endayanácá ntšamo nanjochnëgo? Chiñe endayana ntšamo entsopasancá jochnënguama canmëna ca.”

<sup>55</sup> Cachora Jesús entsanga tojanatjá: “¿Ndáyeca šmojabo espadëjagaca y ngarotbëngaca atše jishachama, mo atše canýe bacá uamana entšá cuafitsemncá ca? Atše cada te Bëngbe Bëtsabe bëts yebnoca tsëngaftangafaca sënjántbemana abuátambaye, y choca ndoñe chešmánishache. <sup>56</sup> Pero lempe quem soyënga chca entsopasana, cachcá chaotsemnana ntšamo Bëngbe Bëtsabe uabemana palabrënguifne chë Bëngbe Bëtsabe juabna oyebuamb-nayënga tmojanayancá ca” —Jesús tojánayana.

Cachora nyetsca uatsjëndayënga tmojtsanëuatjaná y tmojtsanacheta, y Jesús chë uayayëngaftaca cachcá tmojesanonýá.

*Jesús tmojanánatse chë judiëngbe más uámana amëndayëngbioye  
(Mc 14.53-65; Lc 22.54-55, 63-71; Jn 18.12-14, 19-24)*

<sup>57</sup> Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentše chë ley abuátambayënga y chë judiëngbeñe bëtsëjemëngcá amëndayënga tmojánenefina. <sup>58</sup> Pedro bënocana Jesús tbojanasto, chë bachnangbe más uámana amëndayabe chashjöntsoñe; choye tojánamashëngo y chë Bëngbe Bëtsabe bëts yebnoca josticëngaftaca yojótbema, chca, jtsetatšëmbuama ntšamo yochjopásama.

<sup>59</sup> Chë bachnangbe amëndayënga, chë bëtsëjemëngcá amëndayënga y inýenga judiëngbe amëndayënga imojtsenguaye ndánaca masque uayátseye soyë Jesusbe contra cháuyanama, as chënga jobenayama cha chaóbana ca jayanama, <sup>60</sup> pero ndoñe tmonjáninýena, masque banga tmojánashajna Jesusbe contra uayátseye soyënga jayanama. Cabana, útata tbojánashjango, <sup>61</sup> y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajchcana y nýe unga tese jtëtsjebuana ca.”

<sup>62</sup> As chë bachnangbe más uámana amëndayá tojantjá y Jesúsbioye tbojanatjá: —¿Ndocá cochanjayana? ¿Ndayase yojtsemna chë acbe contra montsichamo soyë ca?

<sup>63</sup> Pero Jesús nýe iytëca yojtsemna. Chíyeca chë bachnangbe más uámana amëndayá tbojaniyana: —Bëngbe Bëtsá Ainabe mándoca cbomandá chašcuyana aca ndegombre chë Cristo, chë Bëngbe Bëtsabe Uaquiná comna o ndoñe ca.

<sup>64</sup> Chora Jesús tbojanjuá: —Aca ndegombre yomncá tcjayana. Y quem sóynaca cbëyana: Tsëngaftanga šmochanjinye, atše, Bëngbe Bëtsá Entšá tbojanbemá, chë nýets obenana bomnabe catšbioica jtsetbemanana y celoca jantšetëshiñe jtsaboyana ca.

<sup>65</sup> Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte iobjtsetna causa, y tojánayana: —¿Ntšamo quem boyabása tonjoyebuambacá, Bëngbe Bëtsabiana entsemna mo cha cuafjoyenguangcá, chë chabe Uaquiná yomna ca cha tonjayana ora! ¿Ndayama más entsanga šochjátëjaboto Jesusbe contra chamuayanama? <sup>66</sup> ¿Ntšamo šmatjayana ca? —cha tojanatjá.

As chë entsanga tmojanjuá: —Ndegombre cha bëts bacna soyë entsebmna; jóbanama bontsemna ca.

<sup>67</sup> Chora tmojanontsé Jesús juebëbuashëtjayana, jabuache jantšetayana y inýengna imojtsejuebantšetaye, <sup>68</sup> y imojtsatsëtsnaye: “Cristo, aca ndegombre Bëngbe Bëtsabe juabna oyebuambnayá tcomnëse, jmomalisiá nda tcmënjajantsetá ca!”

*Pedro tojánayana Jesúsbioye ndoñe bonjanabuátma ca  
(Mc 14.66-72; Lc 22.55-62; Jn 18.16-18, 25-27)*

<sup>69</sup> Chëntscuana Pédrëna šhjoca yojtsemna, chashjoca yojtsetbemana. Chora, canýe shembása chentša oservená tbojanobeconá y tbojaniyana: —Acnaca, Jesús chë Galileocáftaca conjánana ca.

<sup>70</sup> Pero Pédrëna, nýetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnatësertana ca.

<sup>71</sup> Chora Pedro bësoye yojábocna. Chentšna, inýe shembása oservená chábioye tbojáninýe y chë inýe entsanga tojanýëna: —Cha, Jesús chë Nazaretocáftaca enjánana ca.



<sup>72</sup> Pedro cachiñe tojánayana ndoñe bonjanabuátma ca, y mēntśá yojtsejúraye: —¡Chē boyabása ndoñe quetsatabuatma ca!

<sup>73</sup> Chentšana, chē chentše imojtsemnēnga Pédrēbioye tmojanobeconá y tmojanianana: —Ndegombre, ácnaca chē uatsjendayēnguentśá condmēna. Chē contsoyebuambnacá contsoyátēmbana ca.

<sup>74</sup> Chora Pedro tojanontśé ichámuana, Bēngbe Bētsá chašotsecastigá ndoñe ndegombre soye stsichámēse ca; yojtsejúraye y yojtsichamo: —¡Chē boyabása ndoñe quetsatabuatma ca!

Y cachora canye ngallo yojacánta. <sup>75</sup> Y Pedro yojenójuaboye ntśamo Jesús tbojanianama. Cha mēntśá tbojanianana: “Cabá ngallo ndēcánta ora, aca unga soye cochanjayana ndoñe šconduabuatma ca.” Y chentšana tojéšanbocna y corente ngmēnaca yojtsenóbošachna.

## 27

*Jesús, Pilátbioye tmojanánatse*

(Mc 15.1; Lc 23.1; Jn 18.28-32)

<sup>1</sup> Tojanbinýna ora, nyetsca chē bachnangbe amēndayēnga y judiēngbeñe bētsějémēngcá amēndayēnga tmojanēnefna jenóyeunayama ntśamo jamēse Jesús chaóbanama. <sup>2</sup> As, Jesús tmojanēcuébatśeca y tmojanánatse, y chca, Pilato, chē Judeoca Romano mandadbe cucuatśiñe tmojánboshjona.

*Ntśamo Judas tojanóbana*

<sup>3</sup> Judas, chē boshjuaná, Jesús jóbanama ibojtsemnnama tojanuena ora, puerta yojtseñócochinýena ntśamo tojánchjanguama, y chē unga bnētsana ralbenga chē bachnangbe amēndayēnga y bētsějémēngbioye tojtanamba, <sup>4</sup> y mēntśá tojanéyana: —Puerte bacna soye tijama. Atśe canye bacna soye ndbomná tšēngaftangbe cucuatśiñe tijáboshjona chaóbanama ca.

Pero chēnga tmojanjúá: —¿Chē soye ndayá bēngbiama? Cach aca cochátotatśēmbñe ca.

<sup>5</sup> As Judas chē ralbenga Bēngbe Bētsabe bēts yebnentše yojesētsana, y yojá y yojtsetseñsaye.

<sup>6</sup> Chē bachnangbe amēndayēngna chē ralbenga tmojtjanatbaná y tmojánayana: —Quem crocenánama buiñe echanjuábuashana; ntśamo leyiñe endayaná, bēnga ndoñe quemuátobena chē Bēngbe Bētsabiana soyēnga quēcjnayētēmiñe chana jasegórana ca.

<sup>7</sup> Chcasna, chēnga tmojanenoyeuná, chē crocenánacna chē Alfarerbe Luare ca uabaina fshantse jabuámiyana, y chca, canye luare jtsebmomnama ndayentše chē inye luarēngocana entśanga áshjajñēnga jutabuantsama. <sup>8</sup> Chiyeca, chē fshantse mēntscóñama Buiñe Luare ca uabaina. <sup>9</sup> Chca, tojanochñēngo ntśamo Jeremías, chē Bēngbe Bētsabe juabna oye-buambnayá, tempścá tojanayancá, ndayá yochjanchñēnguama. Chana mēntśá tojánayana: “Y chē unga bnētsana ralbenga tmonjanca, ntsachetśá chē Israeloca entśanga cha tmojanamananacá, <sup>10</sup> y chánaca chē Alfarerbe Luare tmonjanbuamé, ntśamo Bēngbe Bētsá šonjanmandacá ca.”

*Jesús Pilatbe delante*

(Mc 15.2-5; Lc 23.2-5; Jn 18.33-38)

<sup>11</sup> Chentšana Jesús, chē mandado Pilátbioye tmojanánatse y cha mēntśá tbojantjá: —¿Aca chē judiēngbe rey cojtsemna ca?

Y Jesús tbojanjúá: —Aíñe, aca ndegombre yomncá tcjayana ca.

<sup>12</sup> Chē bachnangbe amēndayēnga y chē bētsějémēnga Jesús mal imojtsequédantscuana, cha ndocá ntjojuana. <sup>13</sup> Chiyeca Pilato tbojantjá: —¿Ndoñe contsuenana lempe ntśamo acbe contra montsichamcá ca?

<sup>14</sup> Pero Jesús ní canye palabra ndoñe ntjojuana. Chē causa, chē mandado ndoñe yontsetátśēmbó ntśamo jajuaboyana.

*Jesús chaóbanca ca tmojánayana*

(Mc 15.6-20; Lc 23.13-25; Jn 18.38-19.16)

<sup>15</sup> Bashco fiesta ora, chē mandado yojanamana canye utamená jētsboshjonana, nda entśanga tmojuabuayaná. <sup>16</sup> Chē tempo canye uachuana utamená inamna, Jesús Barrabás ca uabainá. <sup>17</sup> Nyetsca entśanga chentše imojtsemna ora, Pilato tojanatjá: “¿Tšēngaftanga nda šmojtseboše atśe chjētsboshjonama, Jesús Barrabás o Jesús, chē Cristo ca monduabobuatmá ca?”

<sup>18</sup> Er chē mandado yojtsetátśēmbó, entśangna envidia causa Jesús chabe cucuatśiñe tmojánboshjonama.

<sup>19</sup> Pilato chē tribunal ca uabáinentše yojtsetbemanēntscuana, chabe shema canya tbojanichmó mēntśá cha jauyanama: “Chē nyetsca soyēnguiñe tśabá ama entśábioye ndocá matsborlánana; chabe causa ibeta otjénayoca puerta sēñjasufrí ca.”

<sup>20</sup> Pero chë bachnangbe amëndayënga y chë bëtsëjëmënga entšanga tmojanayënjana, Barrabás jëtsboshjonama y Jesús chaóbana ca chamuayana. <sup>21</sup> Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjonama ca?

Y chënga tmojánayana: —¡Barrabás ca!

<sup>22</sup> Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nýetscanga tmojanjá: —¡Motsecrucificá ca!

<sup>23</sup> Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojánáyebuachena: —¡Motsecrucificá ca!

<sup>24</sup> Ndocá jamama yontsobenama y entšanga más jabuache enbouenanama tmojanontšema Pilato tojáninýe ora, cha tojanmandá býeshe juabuíyëboñana y nýetscangbe delante yojtsenacuentšabiá. Mëntšá tojánayana: —Atše ndocá chiýátayana, ni chiýatsma quem boyabása chaóbanama. Tsëngaftanga lempe šmonjama ca.

<sup>25</sup> Chora nýetsca entšanga tmojanjá: —¡Quemuá yochjóbanama, bënga y bëngbe básengbiana castigo chaotsemna ca!

<sup>26</sup> As Pilato, Barrabás tbojtanboshjona; tojanmandá soldadënga Jesús jabuache chamot-setsetšenama y chentšana entšangbe cucuatšíne tbojánboshjona chamocrucificama.

<sup>27</sup> Chentšana, chë mandadbe soldadënga Jesús tmojánánatse chë mandadbe bëts yeb-nentšá chashjoye y choca nýetsca soldadënga chabe šheconana tmojanófoto. <sup>28</sup> Chorna, entšáyá tmojtšanabotsca y shbuenda uafjatsenga entšáyá mo reycá tmojanichëtjo. <sup>29</sup> Canýe coronéshe tmojanapormá uchmašëfjangaca y tmojanabestšajó, y catšbioica cucuatšíne canýe niñëfja. Chorna, chabe shecuatšentše imojtsofshëntsamentšenaye y imojtsáboyejuana. Mëntšá imojtsichamo: “¡Bayté judiëngbe Rey cochtsemna ca!”

<sup>30</sup> Chëngnaca imojtsanbuashëjnyaye y cach niñëfjaca bestšaentše imojtsëtsjanjnyaye.

<sup>31</sup> Y chca imnaftsáboyejuanentšana, chë shbuenda uafjatsenga entšáyá tmojtšanabotsca y cachabe entšáyá tmojtanichëtjo, y chora, jacrucificama tmojánánatse.

### *Jesús tmojanrucificá*

(Mc 15.21-32; Lc 23.26-43; Jn 19.17-27)

<sup>32</sup> Chë entšanga chentšana tmojánbocana ora, tmojánenbetše canýe bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

<sup>33</sup> Canýe luare Gólgota ca uabáinoca tmojánashajna ora (hebreo biyañe chca endayana “Obanabe Bestšashe Luare ca”), <sup>34</sup> Jesúsbioye vínoye hiéloyeca enájuañiye tmojanabuiyé chaořfsema; pero yojaftántia y ndoñe yonjábošena chiye jofšiyama.

<sup>35</sup> Ya tmojanrucificá orna, chë soldadënga Jesusbe entšayamna, tsbanánoye tmojanëtšena, chca, jtsetatšëmbuama ndabiama yochjanáquedama. <sup>36</sup> Y chora chënga chentše tmojanotbiama Jesús jtsebojanýama. <sup>37</sup> Y chabe bestšaše juatsboicna canýe uabemana soye tmojananjo. Chiñe yojëtsayana ndáyeca cha tmojanrucificama, mëntšá: MUA JESÚS ENDMËNA, CHË JUDIËNGBE REY ca.

<sup>38</sup> Utata bacna soye ochjajnayatna chënga chentše tmojanrucificá, canýa Jesusbe catšbioica y chë ínýana chabe uañicuayoica. <sup>39</sup> Y chëjana imojtsachnëjuana entšangna, Jesús imojtsóyenguaye, imojtsobestšshanenaye <sup>40</sup> y imojtsatsaye: “¡Aca chë icobena Bëngbe Bëtsabe bëts yebna jtšenásatajchcana y nýe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

<sup>41</sup> Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntšá imojtsichamo: <sup>42</sup> “Cha ínýenga tojëftsatsebaca, pero cachá jëtsbocama ndoñe quenátobena. Cha Israeloca entšangbe Rey tojtsemnëse, chë cruzocana chauatastjango, y chca, bënga chábeñe fchtsošbuáchiye. <sup>43</sup> Cha tojyana Bëngbe Bëtsábeñe puerta yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbojobonshánësel, er cha tonjánayana Bëngbe Bëtsabe Uaquiñá canmëna ca” — chënga imojtsichamo.

<sup>44</sup> Y chë bacna soye ochjajnayata, Jesúseftaca ibojtsecrucificanáttna cachcá ibojtsóyenguaye.

### *Jesús tojanóbana*

(Mc 15.33-41; Lc 23.44-49; Jn 19.28-30)

<sup>45</sup> Nýetsto orscana las tresëntsoñe, nýets quem luare yojtseibétata. <sup>46</sup> Chca orna, Jesús chabe biyañe tojánáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá scojonýa ca?”)

<sup>47</sup> Chca tmojanuena ora, báseftanga chentše imojtsemna entšanguentšana imojtsichamo: “Cha Elias, chë Bëngbe Bëtsabe juabna oyebuambnayá, bontsechambuana ca.”

<sup>48</sup> As chora, chentša canýa tojëftsanótjajo canýe esponjëshe janguanguama, untja vínoyeca chëshe tojanfchecuacuá, canýe niñëfjiñe tojananguësëtjo y Jesúsbioye tojanbeconá

chaofsema. <sup>49</sup> Pero inŷengna tmojánayana: “Cachcá mochjonŷaye, er Elías tayochjabo jabátsbocama ca.”

<sup>50</sup> Pero Jesús cachiñe jabuache tojanoyó y tojanóbana. <sup>51</sup> Y cachora, Bēngbe Bēngbe Bētsabe bēts yebnoca yojújonŷana entšējua tsēntsaca yojtsenájataye, tsbanánocana fshantsoye. Chējua bēnējua inauamna y chē tsatsēntsaca inaujonŷana. Fshantse yojuangmēmama, ndētsbēnga yojtsashtēšana, <sup>52</sup> y chē cuevēshēnga obanēngaca yojtsētēfo y banga Bēngbe Bētsabe entšanga tmojtanayena. <sup>53</sup> Y chēnga, Jesús tojtanayenentšana, chē cuevēshēnguentšana tmojánbocana, y Jerusalén, chē uamana bēts pueblo ca uabáinoe tmojánamashjina y ba entšángbioye tmojánēbēbuacana.

<sup>54</sup> Chē soldadēngbe amēndayá y chē inŷenga, Jesús jtsebojanŷama cháftaca tmojanoquedanga, chē fshantse yojuangmēmamanama tmojáninŷe ora, y nŷetsca chē yojtsēchnējuana soyēngama, puerte auatjanánēnga imojtsemna y tmojánayana: “¡Ndegombre quem boyabása Bēngbe Bētsabe Uaquíñá yomna ca!”

<sup>55</sup> Ba shembásengnaca chentše imojtsemna y bēnocana imojtserreparana. Chēngna, Galileocana Jesús tmojanasto y cha imojanájabuachana. <sup>56</sup> Chē shembásengbeñe imojtsemna María Magdalena; María, Santiago y Josebe mamá; y Zebedeobe uaquíñatbe mamá.

### *Jesús tmojanatbontsá*

*(Mc 15.42-47; Lc 23.50-56; Jn 19.38-42)*

<sup>57</sup> Ya yojtseibétatana ora, canŷe bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. <sup>58</sup> José tojána Pilato jinŷama, Jesusbe cuerpo jot-jañama. As Pilato tojanmandá chē cuerpo chamontšabuáchema. <sup>59</sup> José chē cuerpo tojanca y canŷe nduatsenga lino entšējua tbojanandmaná. <sup>60</sup> Y canŷe chabe tsēm cuevēshiñe tbojanajó. Tempo cha inamánda chē cuevēshna ndētsbēnguiñe chamopormama. Canŷe bēts ndētsbé tojansjoná y chē cuevēshoye amashjuanentše tojánachto; y chentšana José yojtsatoñe. <sup>61</sup> Pero María Magdalena y chē inŷe Mariyna chentše tbojtsanoquedañe y chē cuevēshe ndirichiñe tbojanótbema.

### *Soldadēnga tmojána Jesús yojtsatbontsánentše jtsebojanŷama*

<sup>62</sup> Yēfsana, chē ochnayté, chē bachnangbe amēndayēnga y chē fariseunga cánŷiñe tmojána Pilato jinŷama. <sup>63</sup> Tmojánayana: —Taita, bēnga fsēntsejuabná ntšamo chē bostero cabá ainá ora tonjánayanama, chē unga tianoye cha jtayenama ca. <sup>64</sup> Chíyeca, momandá chē cuevēshe soldadēnga chamotsashanŷá unga tentscuana. Chca, chabe uatsjēndayēnga ndoñe ibeta chamondabo chabe cuerpo jabétsatbēbama, y chentšana chēnga entšanga chamúyana. Jesús tojtayena ca. Y chca, chabíama quem ústonoye bostero soye, chē cachabíama tojánayana soyēngama puerte más bacá nántsemna ca —chēnga tmojaníyana.

<sup>65</sup> As Pilato tojanēyana: —Tsēngaftanga cach tsēngaftangbíama soldadēnga šmondábamna. Motsajna y chē cuevēshe cuedádoca šmochtsashanŷá, ntšamo šmondētatsēmbcá ca.

<sup>66</sup> Chora chēnga tmojána chē cuevēshe jtsashanŷama; chē ndētsbena, tsengájaseca imojuinŷnaná, ntsoťatsēmbcá ndocná choye chaondámashēnguama, y soldadēnga chentše tmojēťsanabashejuana.

## 28

### *Jesús tojtanayena*

*(Mc 16.1-8; Lc 24.1-12; Jn 20.1-10)*

<sup>1</sup> Ochnayté chentšana, chē inŷe semana bojatšenté yojtsebinŷana ora, María Magdalena y chē inŷe María tbojána cuevēshoye jarrepárama. <sup>2</sup> Ndeolpe fshantse tojanangmēmama, er Bēngbe Bētsabe canŷe ángel celocana tojánťsma, chē cuevēshoye tojanobeconá, chē atamiana ndētsbé tojtsanjuaná y chíñe tojanótbema. <sup>3</sup> Chē ángelna mo canŷe tcuinŷējćá yojtsebuash-inŷinŷana, y chabe uichētjonējuangá uafjantsējuangá mo jantšētēshcá yojtsamna. <sup>4</sup> Chē soldadēnga chca tmojáninŷe ora, de auatja yojtsangmēmna y mo obanēngcá imojtsemna.

<sup>5</sup> Chora chē ángel chē shembásatbioye tojanēyana: “Ndoñe batauatjana. Atše sēntsetatsēmbo tsēngaftanga Jesús, chē tmonjancrucificá cha šmojtsenguama. <sup>6</sup> Cha muentše ndoñe quenátmēna; cha tontayena, ntšamo cachá tonjanayancá. Mabata y šochjinŷe cha endētsesegoranentše. <sup>7</sup> Betsco motsata y chē uatsjēndayēnga šochjáuyana: ‘Jesús tontayena y tsēngaftangbe natsana Galileoye echanjá; choca šmochanjinŷe ca.’ ” Y chora cha tojánayana: “Chca šondmēna tsēngaftanga jauyanana ca.”

<sup>8</sup> Cachora chē shembásata chē cuevēshentšana tbojēsanbocna, auatjanánata pero puerte oyejuayata, y tbojēťsanotjajo chē soye chē uatsjēndayēngbeñe jobuambayama. <sup>9</sup> Y ndeolpe Jesús chata tojánēbēbuacna y tojanacheuá. Chatna, chábioye tbojanobēconata, tbojtanadorata y chabe shecuatše shēconana imojtbojcuá. <sup>10</sup> Y Jesús tojanēyana: “Ndoñe batauatjana. Motsata atše uatsjēndayēnga, atšbe catšátanga jáuyanama Galileoye chamotsá y choca atše šmochjinŷe ca.”

*Ntšamo chē soldadēnga tmojánayana ndayá tojanochñēnguama*

<sup>11</sup> Chē shembásata ibojtsayēntscuana, bāsefta soldadēnga chē bēts puebloye tmojána y ntšamo tojanopasacá lempe chē bachnangbe amēndayēngbeñe tmojanobuambá. <sup>12</sup> As chē bachnangbe amēndayēnga, chē judiēngbeñe bētsējemēngcá mandayēngaftaca tmojáneneñfna jenóyeunayama. Chēngna chē soldadēngbioye bētscá crocénana tmojtanatšatá, <sup>13</sup> y mēntšá tmojanabuayená: “Tšēngaftanga šmochjayana, ibeta šmotsomáñēntscuana, Jesusbe uatsjēndayēnga tmojabo y chabe cuerpo tmojabétsatbēba ca. <sup>14</sup> Y chē mandado chē soyama chaojátatšēmbonēse, bēnga lempe cháftaca fchjenóyeunaye, chca, tšēngaftangaftaca ndocá chaondopasama ca” —chēnga tmojanēyana.

<sup>15</sup> As chē soldadēnga chē crocénana tmojanóyēngacñe y tmojanma ntšamo chē mándayēnga tmojanabuayenacá. Ba entšanga chē cuento tmojanuena y mēntscōñama judiēnga cachcá mondbétsichamo.

*Jesús chē uatsjēndayēnga tojanichamó, Bēngbe Bētsabe soyēngama nyētsquénache jábuayenama (Mc 16.14-18; Lc 24.36-49; Jn 20.19-23)*

<sup>16</sup> Chentšana, chē bnētsana canye uatsjēndayēnga Galileoye tmojána, chē ndēmua tjoye Jesús chēnga tojanabuayená choye. <sup>17</sup> Y Jesús tmojáninye ora, tmojtanadorá. Pero bāseftangna imojétsejuabnaye nderado cha ndoñe Jesús yontsemna ca. <sup>18</sup> Jesús chēngbioye tojanobeconá y tojanēyana: “Bēngbe Bētsá nyēts mando atše šonjatšetá celoca y quem luarentše. <sup>19</sup> Chcasna, motsajna, nyēts luarēnguenache oyenēnga atšbe uatsjēndayēnga šmochjábiamá. Entšanga šmochjubaye atšbe Taitá, atše chabe Uaquiñá y chē Uámana Espiritbe uabaina jayanēse, átšbeñe šmošbuachéyeca, <sup>20</sup> y šmochjabuatambá lempe ntšamo atše tchojamēndacá chēnga chamóyeunama. Y ndegombre atše nyēts tempo tšēngaftangaftaca chanjéftsemna, quem luare jopochócantscuana ca” —Jesús tojanēyana.

## San Marcos

*Juan chë Ubayaná entsanga yojanabuayiná*

(Mt 3.1-12; Lc 3.1-9, 15-17; Jn 1.19-28)

<sup>1</sup> Měntsá tojanobojatšé chë tšabe noticiēnga Běngbe Bětsabe Uaquiñá Jesucristbiamá.

<sup>2</sup> Ntšamo bayté entsemna, chë Běngbe Bětsabe juabna oyebuambnayá Isaiás chabe librěsañe yojěftsayancá, ntšamo Běngbe Bětsá chabe Uaquiñábíoye ibojauyanama cha tojanábema ora:

Minýe, atšbe abuayíynayá acbe natsana sěntsichamná,  
chë aca jabama lempe echanjaprónta cha.

<sup>3</sup> Entsanga ndoyena luaroca cha enduáyebuache měntsá:

“Běngbe Utabná echanjabo ca;

mo nda canýe benache tojtseprontacá canýe uámana entśá jashjanguama,

cachcá tšěngaftanga, cha jabama ainaniñe tšabe juabnėngaca šmochtseprontana ca” —cha tojanábema.

<sup>4</sup> Chcase, Běngbe Bětsá Juan tbojanichmó, y cha tojánbocna entsanga ndoyena luaroca, Běngbe Bětsabe soyěngama abuayíynaye y entsanga ubáyana. Cha entsanga yojanětsěsnaye: “Tšěngaftangbe bacna soyěngama ngmėnaca šmochtenójuaboye, chca amana šochtsajbaná, y Běngbe Bětsabe benache šmochtishache. Chora cbochjúbaye, y Běngbe Bětsá tšěngaftangbe bacna soyěngama cmochanjáperdonaye ca.” <sup>5</sup> Nýets Judea luarocana chábíoye entsanga imojánbocana, y Jerusalenentsana nýetsca entságnaca, y Běngbe Bětsábíoye chěngbe bacna soyěngama jaimpáda chentsana, Juan Jordán ca uabaina bėjayıñe chěnga yojanėbáyana.

<sup>6</sup> Juanbe entsáyá inauapormana camellbe stjėnasheca y bobache yojanasnana; chapulinatémėnga y tjañe méloye inasaye. <sup>7</sup> Y měntsá entsanga yojanětsěsnaye: “Atšbe ústonoye inýa echanjabo, atšbiamá mās obenana bomná; chíyeca atše merecido taitsatobuajoñe, ni mo jotsejbiyana chabe shechchětjoněshentśa corriėja jajafjonama. <sup>8</sup> Atśna buýeshca cbondėubáyana, pero chë echanjabábeyecna, Běngbe Bětsá bochanjíchmuá chë Uámana Espíritu tšěngaftangbe ainaniñe cháumashėnguama ca.”

*Juan, Jesúsbiye tbojanabaye*

(Mt 3.13-17; Lc 3.21-22)

<sup>9</sup> Chë tempo, Galilea luarocana Nazaret pueblentsana Jesús yojěftsebcocna, y Juan yojtsemnoye tojána; y Jordán bėjayıñe Jesúsbiye cha tbojanabaye. <sup>10</sup> Bejayoicana yojtashėbėbcocna orna, tojáninýe celoca atěfjniñe, y chë Uámana Espíritu chábíoye mo palomatemcá yojtsastjajuana. <sup>11</sup> Y celocana Běngbe Bětsá měntsá tbojaníyana: “Acna atšbe bonshana Uaquiñá condmėna; achbiamá corente sěntsoyejuá ca.”

*Jesús tojanobená Satanás jayěnjanamá*

(Mt 4.1-11; Lc 4.1-13)

<sup>12</sup> Chentsana chë Uámana Espíritu Jesúsbiye entsanga ndoyena luaroye tbojanánatse. <sup>13</sup> Canta bnětsana te chë entsanga ndoyena luaroca tbojanjėtana, y Satanasma yojanabó jisháchichiyama. Chë luarentše tsátjaye bayėnga imnajena; chentsana, Běngbe Bětsabe angelėnga cha imojtseservena.

*Jesús tojanontśé Galileoca chabe trabajo jamana*

(Mt 4.12-17; Lc 4.14-15)

<sup>14</sup> Juan cárceloye tmojanětámentśana, Jesús Galileoye tojesaná; y chiñe cha yojanabuayíyná chë tšabe noticiēnga Běngbe Bětsabiamá. <sup>15</sup> Jesús entsanga yojanětsěsnaye: “Ora tocjobuache, Běngbe Bětsabe amėndayana echanjőshjango. Tšěngaftangbe bacna soyěngama ngmėnaca šmochtenójuaboye, y chca amana šmochtsajbaná y Běngbe Bětsabe benache šmochtishache; y ainaniñe chë tšabe noticiēnga Běngbe Bětsabiamá šmochjőyėngacñe ca.”

*Jesús tojánachembo canta boyabásenga beonga ashebuánayėnga cha chamuastama*

(Mt 4.18-22; Lc 5.1-11)

<sup>16</sup> Galilea uafajónaye tsachajana Jesús yojtsaye ora, cha tojánanye Simón y chabe uabentsá Andrés; chatna atarraíeshangá ibnetsashbuětśañe, er beonga ashebuánayata chata ibnamna. <sup>17</sup> Chora Jesús tojanėyana: “Atšeftaca mabata. Atše cbochanjábiamá Běngbe Bětsabiamá entsanga angwayata; y morscana, nýe beonga ashebuánayata ndoñe quešochátmėna ca.”

<sup>18</sup> Y cachora chatbe atarraíeshangá cachcá tbojėsanaboshjuana y Jesús tmojanasto.

<sup>19</sup> Más chcoye yojátaye orna, Jesús tojánanye Santiago y chabe uabentsá Juan, Zebedeobe uaquiniata; chatna barquëshañe ibnetsotbemañe, chatbe atarraishangá atapórmayañe. <sup>20</sup> Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúséftaca tbojtsanoñe.

*Jesús, bacna bayëbe juabna cánÿabiye tbojanbojuaná*  
(Lc 4.31-37)

<sup>21</sup> Chentsana, Jesús y chabe uatsjéndayënga Capernaum ca uabaina puebloca tmojánashajjna. Chë ochnayté, Jesús chë judiëngbe enefjuana yebnentse tojánamashëngo y yojóntsa entsanga jabuátambama. <sup>22</sup> Entsanga imojtsenjnanye ntšamo Jesús yojtsabatambacá, er chama mo canÿe mando bomnacá yojtsóyeuambnaye, ndoñe nÿe ntšamo Moisesbe ley abuátambayënga imojanabatambacá. <sup>23</sup> Chë pueblentse judiëngbe enefjuana yebnentse yojtsemna canÿe entsá bacna bayëja uambayá, y chábeyeca chë boyabása yojóntsa mentsá uayebuáchana: <sup>24</sup> —¿Ndayama bëngbiye təcjabo, Jesús Nazaretocá? ¿Tcojabo bënga jabétsapochocama? Atse sëndétatšëmbo nda aca comnama, aca chë Bëngbe Bëtsabe Uamaná ca.

<sup>25</sup> Chora Jesús chë bayëbiye tbojtsanácacana, y tbojanianyana: —¡lytëca móbema y chábéntšana maisebocna ca!

<sup>26</sup> Chora chë bacna bayëjna tojanma chë boyabása ataque chaboshachama, jabuache tojanoyó y chábéntšana tojésanbocna. <sup>27</sup> Chama, nÿetsca entsanga ojanánënga imojtsemna, y mentsá imojtsentjanaye: “¿Ndayá chca yojtsemna? ¿Canÿe tsëm buatëmbana soye? ¡Quem boyabása mando bomnacá y obenacá entsabatambá, y chca, chë bayëjënga cha jtsamëndayana y chëngnaca joyeunayana ca!”

<sup>28</sup> Y betesco nÿets Galilea luarentša publënguenache Jesusbiam a yojtsótatšëmbo.

*Jesús, Simón Pédrëbe uambén mamábiye tbojanshná*  
(Mt 8.14-15; Lc 4.38-39)

<sup>29</sup> Chentsana, chë enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye. <sup>30</sup> Simonbe uambén mamá šocá inajájona, jabuache calentóracá, y Jesúsbiye chë šocábiam a tmojanianyana. <sup>31</sup> As chora, Jesús tojanobeconá, chë šocábíoye tbojanábuacushache y tbojanatsbaná. Cachora chë calentora tbojtsanóbojuanañe; y cachora cha tojantsbaná y tojanontsé chënga jobuácuedana.

*Jesús ba šoquënga tojanashná*  
(Mt 8.16-17; Lc 4.40-41)

<sup>32</sup> Chë te jetiñe, shinÿe ya yojuenatjëmbo ora, chë luarentša nÿetsca šoquënga y bacna bayëjënga uambayënga Jesúsbiye tmojanënatse; <sup>33</sup> y nÿetsca entsanga bëšoye imojobeconá. <sup>34</sup> Jesús banga tojanashná, nÿetsca šocana bomnënga, y ba bacna bayëjënga entsanguentsana tojtanëbuacna; y ndoñe tonjanalesenciá chë bayëjënga chamóyeuambama, er chënga imnatátšëmbo cha chë Cristo bëtsemnama.

*Chë judiëngbe enefjuana yebnënguenache Bëngbe Bëtsabe soyëngama Jesús yojanabuayiyiná*  
(Lc 4.42-44)

<sup>35</sup> Yëfsana cabá cachëse, cabá ibetcă, Jesús tojëftsantsbaná, chë pueblentšana tojëftsanbocna y entsanga ndoyena luaroye tojtsanoñe, choca Bëngbe Bëtsáftaca jencuëntama. <sup>36</sup> Pero Simón y chabe enutëngna tmojána jetsenguanguama; <sup>37</sup> y tmojtsaninÿena ora tmojanianyana: —Nÿetscanga cmontsenguá ca.

<sup>38</sup> Y Jesús tojanëyana: —Inÿoye cuajna, cam bëconana pueblëngoye, chífnaca Bëngbe Bëtsabe soyëngama entsanga chayábuayenama; er chama atse sënjabo ca.

<sup>39</sup> Y chentsana, Jesús yojánaca Bëngbe Bëtsabiam a entsanga abuayinyaye chë judiëngbe enefjuana yebnënguenache, nÿets Galileiñe, y entsángbentšana bacna bayëjënga yojtëbuacana.

*Jesús, canÿa bacna nguayanánaca šocábíoye tbojanshná*  
(Mt 8.1-4; Lc 5.12-16)

<sup>40</sup> Chentsana, canÿe boyabása bacna nguayanánaca šocá Jesúsbiye tojanobeconá; y joshaméntšase mentsá tbojanimpadá: —Aca tcojtsebošëse, aca catjobenaye atšbe šocana jtsebojuánama ca.

<sup>41</sup> Jesús chabiam a tbojanongmé; cucuátseca tbojánbojajo y tbojanianyana: —Aíñe sëntseboše. ¡Šocana chotsebojuaná ca!

<sup>42</sup> Y cachora chë šocana tbojtsanóbojuanañe y tšabá yojtsatsmëna. <sup>43</sup> Chora Jesús chábiye tbojtanchimó, pero puerta mentsá tbojanmandá: <sup>44</sup> —Mouena; ndocnábeñe quem soye cattsecuëntaye; nÿe Jerusalenoca báchnëbiye motsa y cha cochjinÿinÿiye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe Bëtsábíoye chama jëtschuayama, chca, nÿetsca entsanga chamotatšëmbona mora ya tšabá cojtsatsmënama ca.

<sup>45</sup> Pero chë boyabásana, chentšana tojéftsanbocna y cachora yojóntša nyetsquénache entsānga yapa acúntayana Jesús tbojanshnama. Chë causa, Jesús ndoñe yontsobena entsāngbe delante pueblēnguenache jtsanana, ndayá nýe chë pueblēnga béconana y nyetsca chë entsānga ndoyena luarēnguñe yojánana; pero nyets luarēngocana chábioye entsānga imojánashjajuana.

## 2

*Jesús, canýe jama ndobenábioye tbojanshná*  
(Mt 9.1-8; Lc 5.17-26)

<sup>1</sup> Chentšana, Jesús Capernaumoye tojtanashjango; y entsānga imojátatšēmbona, Jesús yebnentše yojtsatsmēnama. <sup>2</sup> Mallajta entsānga chentše tmojanójoto; chë causa chë yebnentše ya tondaye más luare entsāngbiama yontsemna, ni mo chë amashjuanentše, y Jesús Bēngbe Bētsabe soyēngama yojtsabuayinye. <sup>3</sup> Chora tojanopasá, canta boyabásenga tmojánashjango, canýe entsá jama ndobená imojtsaismana. <sup>4</sup> Pero ndoñe tmojanobená Jesús yojtsemnoye cha juambana, tša entsānga causa. Chcasna, chë canta boyabásenga yebna tsbanánoca, Jesusbe tatsētsoca batšá tmojánatēfo y chējana chë jama ndobená tjuashiñe tmojánēštjango. <sup>5</sup> Jesús tojáninýe chēnga tša imojtsosbuaché chë šocá jáshnama cha yojanobenama; as chë jama ndobenábioye tbojanianyana: “Sobreno, mouena; acbe bacna soyēnga tcbontseboperdoná ca.”

<sup>6</sup> Chentše báseftanga judiēngbe ley abuátambayēnga imnatbemana; chēnga chora mēntšá imojtsejuabnaye: <sup>7</sup> “¿Ntšámoyeca quem boyabása chca yojtsichamo? Jesús ndoñe tsabá Bēngbe Bētsabiana quenátichamo; mo chábioye cuafjoyenguangcá entsemna. Ndocna entsá quenátobena inýabioye bacna soyēngama japerdónana; nýe Bēngbe Bētsana aíñe ca.”

<sup>8</sup> Pero Jesús cachora lempe yojtsetátšēmo ntšamo chēnga ainanoca imojtsejuabnacá; as tojanēyana: “¿Ndayeca chca tsēngaftanga ainaniñe šmojtsejuabná? <sup>9</sup> ¿Tsēngaftangbiama ndayá más paselo nántsemna tsēngaftangbe delante chë jama ndobenábioye atše jauyanana: ‘Acbe bacna soyēnga tcbontseboperdoná’, o ‘Matētsbaná, acbe tjuashe mesocñe y motsa ca’? <sup>10</sup> Y chca, mora atše chochanjínýanyíye Bēngbe Bētsá Entšá tbojanbemá quem luariñe obenana yobomnama, entsānga bacna soyēngama jáperdonama ca” —Jesús tojánayana.

Y chë jama ndobenábioye tbojanianyana: <sup>11</sup> “Atše cbēyana, matētsbaná, acbe tjuashe mesocñe y acbe yebnoye motsatoñe ca.”

<sup>12</sup> Cachora chë jama ndobená tojtantsbaná, chabe tjuashe yojesocñe, y entsāngbiayana chentšana yojésebocna. Chama nyetsca entsānga imojenjnaná y Bēngbe Bētsábioye imojtsatschuanaye, y mēntšá imojtsichamo: “Nýa ndocna te tša bēts soye chemuáisinýe ca.”

*Jesús, Levíbioye tbojanchembo chabuastama*  
(Mt 9.9-13; Lc 5.27-32)

<sup>13</sup> Chentšana, Jesús cachiñe chë uafjajónaye tsachoye tojesaná; ba entsānga chábioye imojobeconá, y Jesús yojtsabuátambaye. <sup>14</sup> Chentšana yojtsataye orna, Jesús tbojáninýe Levíbioye, Alfeobe uaquiñá, yojtsanotbemañe, entsānga impuesto atjanayacá inétsotrabajañe. Chora Jesús tbojanianyana: “Smasto ca.”

Y Leví tojtantsbaná y tbojanasto.

<sup>15</sup> Tojanopasá, Jesús Levibe yebnentše yojtsesaye, y banga Romocama entsānga impuesto atjanayēnga y inýe bacna entsānga, mesēshentše cányiñe imojtsetbiámama, Jesús y chabe uatsjēndayēngaftaca; er ba entsānga cha imojústona. <sup>16</sup> Chë fariseunga y chë ley abuátambayēnga, chë entsāngaftaca Jesús yojtsesama tmojáninýe ora, chabe uatsjēndayēngbiye tmojanatjá: —¿Ndayeca tsēngaftangbe buatēmbayá, entsānga impuesto atjanayēngaftaca y bacna soye amēngaftaca yojtsesá ca?

<sup>17</sup> Jesús chca tojanuena; as mēntšá tojanējua: —Chë salud tmotsobomñēnga, ashnayá ndoñe ntšējábótana, pero chë šoquēngna aíñe. Y atše ndoñe chiyátabo chë Bēngbe Bētsabe bominiñe tsabá amēnga jabáchembuama, ndayá chë bacna soye amēnga imomna ca juabnayēnga átšbioye jabáchembuama ca.

*Jesús tmojantjá chë Bēngbe Bētsáftaca jencuéntama tondaye saytescama*  
(Mt 9.14-17; Lc 5.33-39)

<sup>18</sup> Canýe, Juan chë Ubayanabe ústonēnga y chë fariseungbe usetonēnga, Bēngbe Bētsáftaca jencuéntama tondaye ntjascá imojtsemna ora, básefta entsānga Jesúsbioye tmojanobeconá y mēntšá tmojanianyana: —Juanbe ústonēnga y chë fariseungbe usetonēnga monduamana tondaye ntjascá jtsemnana Bēngbe Bētsáftaca jencuéntama. ¿Ndayeca acbe uatsjēndayēnga ndoñe chca ca?

<sup>19</sup> As Jesús tojanējua: —Chë casamento fiestentše, chë ófanēnga saná ndoñe ntsabuáshebenana. ¿Ntšamo chca ndoñe nántsemna? Chë tojobouamá entsá chēngaftaca tojtsemnēntscuana, chë ófanēnga bētscá jasana y cháftaca oyejuayēnga jtsemnana. <sup>20</sup> Pero

ora echanjobuache y chë boyabása chëngbentšana mochantsánatseñe; chora cocayé chë ófanënga echántsamna tondaye ntjascá jtsemnana. Ntsamo chë tojobouamá boyabása y chë ófanëngaftaca endmëncá, cachá endmëna atše y atšbe uatsjëndayëngaftacnaca.

<sup>21</sup> “Ndocná, canýe tanguá entsáyá, base tsëm entsëjuaca jtarmëndana; chca tcojamëse, chë tsëm entsëjuaca jtsabëconana y chë tanguá entsáyá más jtsatanëcanana, y chca, chë uátanëcniñe más bëtsiñe jtsabemana. <sup>22</sup> Y cach ndoñe, chë tojtseshayana vínoye tanguá jasabenguíñe ntjatuftsúamayana; er chë jasabenga jtseshëbëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguíñe juafsuámana; chca, chë jasabenga y chë vínoye josérviana ca” —Jesús tojánayana.

*Jesusbe uatsjëndayënga canýe ochnayté trigo tmojanátabebe  
(Mt 12.1-8; Lc 6.1-5)*

<sup>23</sup> Canýe ochnayté, Jesús canýe jajajana yojtsaye; y chabe uatsjëndayënga chëjana imojtsachnëjuana ora, tmojanontsé trigo juatabebiana. <sup>24</sup> Chë fariseunga chca imojinýe ora, Jesúsbiye tmojanianyana: —Minýe. ¿Ntsámo acbe uatsjëndayënga montsamcá, ndoñe quenátselesciana ochnayté jtsamama ca?

<sup>25</sup> Pero cha tojanëjuca: —¿Ndoñe šmëndualía y šmondëtatšëmbo ntsámo Rey David y chabe enutënga tmojanmama shëntseca imojtsemna ora y jasama yojtsëjaboto ora? <sup>26</sup> Chca ora, Abiatar chë judiëngbe bachnangbe más uamana amëndayá inamna ora, David Bëngbe Bëtsabe yebnoye yojámashëngo, y chë luarentše Bëngbe Bëtsá yojamnana inýinýnaye tandëšënga yojase; y chë cháftaca imojánajna entsángnaca yojátsataye. Y chë tandëšna nýe bachnangbiama belesesciana jasama. Masque David chca tojanma, Bëngbe Bëtsá ndoñe tonjánayana David canýe bacna soye tojanma ca.

<sup>27</sup> Y Jesús más tojánayana: —Bëngbe Bëtsá ochnayté entsabiama tojama y entsá ndoñe tbonjánbema nýe chë ochnayté ndoñe chaondëtrabajama. <sup>28</sup> Chíyeca, Bëngbe Bëtsá Entšá tbojanbemá, ndayá entsá ochnayté tojtsama sóynaca jtsemándayana ca.

### 3

*Chë buashana cucuatše bomna entsá  
(Mt 12.9-14; Lc 6.6-11)*

<sup>1</sup> Chentšana, Jesús cachiñe chë judiëngbe enefjuana yebnoye tojésanamashëngo; y chentše canýe boyabása yojtsemna, buashana cucuatše bomná. <sup>2</sup> Chë fariseunga chiñe imojtser-rondana jinýama nderado Jesús chë ochnayté chábiye tabuanjashnama, as chca chënga jtsebmomna ndaye sóyeca cha mal jaquédana. <sup>3</sup> Chora Jesús chë buashana cucuatše bomnábiye tbojanianyana: —Chentše, entsangbe delante motsa ca.

<sup>4</sup> Y chë fariseunga tojanatjá: —¿Ndayá yojtselesciana ochnayté jamama, tsabe soye o ndoñe tsabe soye? ¿Jatsbocama o jtsepochoćama ca?

Pero chënga ndocá tmonjanjuá, nýe iytëca imojobiama. <sup>5</sup> Chora Jesús rábiaca y ngménaca chë fariseunga tojanëñyanýe, chënga ainaniñe josértama ndoñe montseboše causa; y chë buashana cucuatše bomnábiye tbojanianyana: —Macuenýanëjaná ca.

As chë boyabása tojanacuenýanëjaná, y chora tsabá chëtsa yojtsatamna cach inýetsacá. <sup>6</sup> Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontsé juabnayana ntsámo jamëse Jesús jóbama.

*Mallajta entsanga Jesúsbiye tmojanobeconá*

<sup>7</sup> Chentšana, Jesús chabe uatsjëndayëngaftaca tojanoluaré mar bëjaye tsachoye, y Galileocana bëtsá entsanga tmojanasto. <sup>8</sup> Inýe entsángnaca chábiye tmojanobeconá Judeocana, Jerusalenocana, Idumea ca uabaina luarocana, Jordán bëjaye chenguanocana, Tiro y Sidón pueblëngocana. Chënga tmojanobeconá, Jesús tša bëts soyënga yojtsamama tmojanuena ora. <sup>9</sup> Jesús chabe uatsjëndayënga tojanënyana: “Motsajna y canýe barquëshu atšbiama šmochjuapróna, tša entsanga ndoñe chašmondëtsatsëntsnama ca.” <sup>10</sup> Er cha banga tojanashná, y chë causa, nýetscanga šocana bomnënga chábiye tmojanajuatsëntšená cha jaboajuama.

<sup>11</sup> Y chë bacna bayëjënga uambayëngna, Jesús tmojinýe ora, betscó chabe shecuatšëntše imojtsofshëntsaméntšenaye, y chë bacna bayëjëngbeyeca mëntsá imojtsáyebuache: “¡Aca Bëngbe Bëtsabe Uaquiná condmëna ca!”

<sup>12</sup> Pero Jesús puerte tojanamëndá, nda cha bëtsemnana entsangbe delante ndoñe chamondëtsichámuama.

*Jesús chë bnëtsana uta uatsjëndayënga tojanabacacá  
(Mt 10.1-4; Lc 6.12-16)*



<sup>13</sup> Chentšana, Jesús canye batsjoye tojánstjua, y ndémuanýenga tšabá tojanínýnanenga tojánachembo. Y chéngna chábioye tmojanobeconá. <sup>14</sup> Chora, chénguentšana bnétsana útata tojanébuáyana, chamotsetjémbambnama, y Bèngbe Bètsabe soyéngama entšanga chámabuayenama; <sup>15</sup> y chénga obenana tojanatšatá entšángbentšana bacna bayéýenga jtébucanama. <sup>16</sup> Mènga mondmèna ché bnétsana uta bocacánenga: Simón, ché ndábioye Pedro ca Jesús tbojanabaye; <sup>17</sup> Santiago y chabe uabentsá Juan, Zebedeobe uaqúñata, chata tojanébaye “boanerges ca”, y chca endayana “uajuesayabe uaqúñata ca”; <sup>18</sup> Andrés, Felipe, Bartolomé, Mateo, Tomás, Santiago, Alfeobe uaqúñá; Tadeo, Simón ché celote ca uabobainá; <sup>19</sup> y Judas Iscariote, ché chentšana ndoñe baytesna, Jesús uayayéngbe cucuatšíne bochjanboshjona.

*Ley abuátambayénga tmojánayana, Jesús Satanásbentšana obenana tojanóýengacñe ca (Mt 12.22-32; Lc 11.14-23; 12.10)*

<sup>20</sup> Chentšana, Jesús yebnoye tojtanamáshéngo, y tša entšanga chentše tmojanóoto; ché causa, ni cha ni chabe uatsjédayénga, ni mo jasama luare ndoñe imontsebmoma. <sup>21</sup> Jesusbe pamillanga ntšamo cha yojtsepásama tmojánatšémbona ora, tmojána cha jetsbetšana, er entšanga imojtsencuéntaye cha opá tojtšanóbema ca.

<sup>22</sup> Y ché ley abuátambayénga Jerusalenocana tmojánashjainéngna Jesusbiama mentsá imojtsichamo: “Chabe ndegombre mandayá Beelzebú, cach Satanás yojtsemna. Cha, ché bacna bayéýenga améndayá, Jesúsbioye obenana tojatšetá entšángbentšana bacna bayéýenga chauatébucanama ca.”

<sup>23</sup> Chénga chca imojtsichámuama, Jesús chénga tojánachembo, y cuenténgaca tojanontsé jáuyanana, jinýanýiyama chénga canye ndoñe ndegombre soyíñe imojtsemnama, mentsá: “¿Ntšamo Satanás nantsobena cachá jtenábocnama ca? <sup>24</sup> Canye améndayábentše entšanga tmojtsenojatá y tmojtsenýase, ché améndayana ndoñe ntjatotonana. <sup>25</sup> Cachcá, canye yebnentše pamillanga tmojtsenojatá y tmojtsenýase, ché pamillanga ndoñe tšabá nyets tempo quemochátsmèna. <sup>26</sup> Y cachcá, Satanás y chábenga ndoñe tmontsenéyeunana y cachabe contra tojtsemnése, chabe améndayana ndoñe más queochátstotona; y cha ya ndoñe más chéngbe améndayá queochátsmèna.

<sup>27</sup> “Ndocná quenátobena canye corente añemo bomna entšabe yebnoye jamashénguana y chabe soyénga jtsebocana, ndoñe natsana tconjshétsebatséquese. Nye tcojshétsebatséquese cocayé cuanjobenaye cha jefcana.

<sup>28</sup> “Ndegombre chéyana, Bèngbe Bètsá entšangbe nyetsca bacna soyénga echanjáperdonaye, y ntšamo Bèngbe Bètsabiama y inýengbiama ndoñe tšabá tmontsichamo soyéngnaca; <sup>29</sup> pero ché Uámana Espiritbiama ndoñe tšabá icháméngna ndocna te queocháperdonaye, er nyetsca tescama castigánenga jtsemnama chénga jtsamnana ca” —Jesús tojánayana.

<sup>30</sup> Jesús chca tojanéyana, er chénga imojtsichamo cha bacna bayéja ibojtsambá ca.

*Ché Jesusbe ndegombre pamillanguentsénga (Mt 12.46-50; Lc 8.19-21)*

<sup>31</sup> Chéntscuana, Jesusbe mamá y catšátanga choye tmojánashjaina, pero nye shjoca imojtsemna; y canya tmojanichmó cha jachembuama. <sup>32</sup> Ché ba entšanga chentše chabe shéconana imojtsetbíamanéngna, chora tmojaníyana: —Acbe mamá, acbe catšátanga y uabénanga shjoca montsemna; aca cmontsenguá ca.

<sup>33</sup> Chora cha tojanéyana: —¿Nda atšbe mamá yomna, y ndémuanýenga atšbe catšátanga ca?

<sup>34</sup> Chentšana, ché chabe shéconanana tbíamanéngbioye jarrepárase, tojánayana: —Queménga mondmèna atšbe mamá y atšbe catšátanga. <sup>35</sup> Er ndánaca, ntšamo Bèngbe Bètsá yobošcá tojtsamá, jtsemnana atšbe catšata, atšbe uabena y atšbe mamá, atšbe ndegombre pamillanguentsá ca.

## 4

*Ché jenabe cuento (Mt 13.1-9; Lc 8.4-8)*

<sup>1</sup> Chentšana, uafjáónaye tsachoca Jesús tojtétanontsé Bèngbe Bètsabe soyéngama jabuátambama. Mallajta entšanga tmojanobeconá causa, ché uafjáónayentše yojanamna canye barqueshoye Jesús tojánaséngo y tojanóbema; y ché entšanga tsachoca imojtsemna. <sup>2</sup> Chora cuenténgaca ba soyéngama tojanabuatambá.

Mentsá tojanéyana: <sup>3</sup> “Smochjouena; canye jená ché jénaye jauqueshama yojéftsebocna. <sup>4</sup> Yojtséjqueshaye orna, básefta jénaye benache juachañe yojuatquécjana; pero jaja shloftsénga imojástjajna y lempe imojtsósañe. <sup>5</sup> Inye meshéngna ndétsbenguiñe yojuatquécjana, ndoñe yapa fshantse binýnentše. Chiñna betesco yojuábocna, ndoñe yapa jashenocana fshantse yojanmèna causa; <sup>6</sup> pero yojuábocna orna, puerta yojojénýána y

yojtsancta; y yojtsábojo yapa tbëtējēnga tondaye causa. <sup>7</sup> Inye meshēngna uchmēshangañe yojuatquécjāna; chē uchmashá yojuájua ora, lempe yojtsatscué, y chca, chē jénayentsāna tondaye yonjuashájona. <sup>8</sup> Pero inye meshēngna, uanguaníñe yojuatquécjāna, y bētsá tšabe shajuanēnga chiñe yojóbozna: ínñenache, canye meshentsāna unga bnētsana meshēnga yojóbozna; ínñenachna, chñēnguana bnētsana meshēnga; y ínñenachna patse meshēnga ca” —cha tojánayana.

<sup>9</sup> Y chentšāna, Jesús más tojánayana: “Chē jouenama tmojtsobenēnga, šmochjouena ca.”

*Ndáyeca Jesús cuentēngaca yojánabatambaye  
(Mt 13.10-17; Lc 8.9-10)*

<sup>10</sup> Chentšāna, Jesús canya yojoquéda ora, chē chabe béconana imojtsemnēnga chabe bnētsana uta uatsjēndayēngaftaca, tmojantjá ndayá chē cuento bētsayanama. <sup>11</sup> As Jesús tojanējua: “Bēngbe Bētsá tšēngaftanga cmontsinjānā nýetsca chē mo ytēmencá yomna soyēnga chabe amēndayama, pero chē ínñēngbiōye ndoñe; chē soyēngama chēnga lempe cuentēngaca sēntsētsētsnā. <sup>12</sup> Chca, masque becá chamotsafšna, ndoñe chamondobená chē Bēngbe Bētsabe soyēnga jinýama; y masque becá chē soyēnga chamouena, ndoñe queochátēsertana, chēnga Bēngbe Bētsábīōye ndoñe chamondētochéconama, y cha ndoñe chaondáperdonama ca.”

*Jesús chē jenabe cuentama tojanabuayená  
(Mt 13.18-23; Lc 8.11-15)*

<sup>13</sup> Chentšāna, Jesús tojanējyana: “¿Quem cuentama ndoñe tcmónjósertase, ntšamo chcase nýetsca cuentēngama cmónjóserta ca? <sup>14</sup> Chē jená endmēna chē tšabe noticiēngama abuayiyayá. <sup>15</sup> Básefta entšānga mondmēna mo chē benache juachañe yojuatquécjāna jenaycá. Chēngna Bēngbe Bētsabīama soyēnga jouenana; pero chora Satanás betscó jabanā, chēngbe ainaniñe yojtsemna Bēngbe Bētsabe palabra jabētsabuajuanama, chēnga chiñe ndoñe chamondētsošbuáchemā. <sup>16</sup> Inye entšānga mondmēna mo chē ndētšēnguñe yojuatquécjāna jenaycá; chēngna Bēngbe Bētsabe palabra jouenana y oyejuayēnga jtsemnana; <sup>17</sup> pero ndoñe nýets tempo chana jocochájuana; y chca, ndoñe bayté Bēngbe Bētsáftaca ntjēftsemnēngana, ndoñe yapa tmonsasbuaché causa. Inyēnga mochantsēbuayēnja, y Bēngbe Bētsábeñe betsošbuáchiyama mochanjasúfrianga; chíyeca chēnga Bēngbe Bētsabe palabra cachcá mochanjesonjaye. <sup>18</sup> Inyēnga mondmēna mo chē uchmēshangañe yojuatquécjāna jenaycá. Chēnga Bēngbe Bētsabe palabra mochanjouena, <sup>19</sup> pero quem luarentša soyēngaca oyejuayēnga jtsemnana yapa mochántseboše, y nýe bomnana jēftsebomnana yapa mochanjēsenojuañaye. Chē soyama y inye ba soyēngama yapa enócochinjēna causa, Bēngbe Bētsabe soyēngama echantsebnētjomba, y ndoñe quemochátama ntšamo Bēngbe Bētsá tojayancá. <sup>20</sup> Pero ínñēnga mondmēna mo chē uanguaníñe yojuatquécjāna jenaycá. Chēngna Bēngbe Bētsabe palabra botamana mochanjouena; nýets ainánaca mochántseprontana chiñe jtsošbuáchiyama. Mo canye betiye becá tšabá tojtseshajuaná, chēnga bētsá tšabe soyēnga Bēngbe Bētsabīama mochántsama. Inyēnga ínñēngbiāma más bētsá soyēnga mochanjama; y chca, ínñēnga mochántsemna mo chē unga bnētsana meshe tojeshajo jenaycá, ínñēnga mo chē chñēnguana bnētsancá, y ínñēngna mo chē patse meshēnga tojanboté jenaycá ca” —Jesús tojánayana.

*Chē uajuinýanēshama cuento  
(Lc 8.16-18)*

<sup>21</sup> Mēntsánaca Jesús tojánayana: “Ndocná juiyēbana canye uajuinýanēsha cajonēshe o jutsnēsha tajsoye juajájua. Ndoñe; uajuinýanēsha juiyēbana tsbanánaca juajájua, lempe chaotsebínýama. <sup>22</sup> Ndocna yoityēmena soye ntjinýencá queochaisoquéda, y chē ndótatsēmbó soye ntsoatatsēmbcá queochaisoquéda. <sup>23</sup> Chē jouenama tmojtsobenēnga, šmochjouena ca.”

<sup>24</sup> Y mēntsánaca Jesús tojanējyana: “Tšabá šmochjájuaboje ntšamo šmojtsuenanama. Nýe batšatema šmojouenēse, nýe batšatema cmochanjósertaye; pero aiñe tšabá šmojouenēse, chama corente cmochanjósertaye; y Bēngbe Bētsá echanjama tšēngaftanga más soyēngama chacmósertama. <sup>25</sup> Er nda Bēngbe Bētsabe soyēngama tšabá tbojosertá, Bēngbe Bētsá echanjama cha más ba soyēngama chabosertama; pero nda chē soyēngama josértama ndoñe tontsebošá, chē nýe batšá ibosertana soyēngama bochantsebnatjēmba ca” —cha tojánayana.

*Chē ojuajna jenayama cuento*

<sup>26</sup> Jesús mēntsánaca tojanējyana: “Bēngbe Bētsabe amēndayana endmēna mo ntšamo canye boyabása jénaye tojuatbontsá ora echandbopasacá: <sup>27</sup> masque cha cada ibeta jtsojájuana y bnēté jotsbanama, ibeta o bnēté, chē jénayentsāna juabocnana y juájua, ntšamo chca yojtsájuañama chē boyabása ntjatstatsēmbcá. <sup>28</sup> Chē fshantse cachabe ponto jamana ndayánaca chiñe chaójuama; natsana tsbuanachētema jóbocnana, chentšāna chē espiga, y

chentšana chë meshënga jashájonana. <sup>29</sup> Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

*Chë mostaztiye jenayama cuento*

(Mt 13.31-32; Lc 13.18-19)

<sup>30</sup> Jesús mēntšanāsca tojaněyana: “¿Ndayacá Bēngbe Bētsabe amēndayana yomna, o ndaye sóyeca nanjopódia chama jábuayenama? <sup>31</sup> Endmēna mo canye mostaza jénaye jajoca tcojajecá. Ndegombre, nyētsca quem luarentša jenayēngama, mostaza jénaye chë más básetema endmēna; <sup>32</sup> pero tcojajé orna, jójuana, y jajañe chë más bēts betiye jóbemana, ba bēts buacuashēngaca; chíyeca chë jaja shloftšēnga jana y chiñe uajajonētemēngá jauábopormana ca.”

*Ndáyeca Jesús cuentēngaca entsānga yojanabuayiná*

(Mt 13.34-35)

<sup>33</sup> Chca Jesús Bēngbe Bētsabe soyēngama entsānga yojanabuatambá, ba cuentēnguentšana, mo chë tmonjouena cuentcá, ntsachetsá chë entsānga josértama tmojobenacá. <sup>34</sup> Tondaye yonjanabuatambá ndoñe cuentēngaca ntsemēncá; pero chabe uatsjēndayēngna lempe yojanabuayiná, cányēnga tmojtsemna ora.

*Jesús chë binýia y chë béjaye bonguana yojētsbema*

(Mt 8.23-27; Lc 8.22-25)

<sup>35</sup> Cach te, yojtseibétatana ora, Jesús chabe uatsjēndayēnga tojaněyana: “Uafjajónaye chenguana cuajna ca.”

<sup>36</sup> Chorna, chë entsānga jesabáshejuanēse, chë uatsjēndayēnga Jesús tmojtsanánatseñe, cach yojānenjaquena barquēshañe; y inye entsāngnaca inye barquēshangañe tmojanasto. <sup>37</sup> Chentsāna, chë uafjajónaye béjayiñe tša jabuache binýia yojóshjango; olēshēnga chë barquēsha imojtsētsbotsana, y chë causa chë barquēsha yojóntša búyesheca jtsobuajútjiana. <sup>38</sup> Y chēntscuana, barquēsha stētsōica, tsēntšenēshañe Jesús yojtsomañe. Chora chë uatsjēndayēnga tmojtsanfšená y tmojanayana: —¡Buatēmbayá! ¿Tondayana cmontsentšamna bēnga chašotsēnatjēmbama ca?

<sup>39</sup> As Jesús tojantsbaná, chë binýia tbojanácacana, y chë bēts uafjajónayoye tojánayana: —¡Natjēmbana cochtsemna! ¡Bonguana ca!

Y cachora chë binýia yojētstēcja, y lempe bonguana yojtsatsmēna. <sup>40</sup> Chora chabe uatsjēndayēnga tojaněyana: —¿Ndáyeca tša šmojtsauatja? ¿Bēngbe Bētsá tsēngaftanga jujabuáchama yobenama cabá ndoñe šmontsošbuaché ca?

<sup>41</sup> Chama, chēnga puerte auatjanānēnga imojtsemna y mēntšá imojtsenatsētsnaye: “¿Nda quem boyabása yomna? Cha tonjayana y chë binýia y chë béjaye tmonjoyeuná ca.”

## 5

*Chë Gerasa luaroca bacna bayēja uambayá*

(Mt 8.28-34; Lc 8.26-39)

<sup>1</sup> Chentšana, uafjajónaye chenguanoica tmojánashjajna, Geraseno ca uabaina entsāngbe luroye. <sup>2</sup> Jesús barquēshoicana tojánastjango, y cachora, chë obanēngbe cuevēshēnguentšana canye entsá, bacna bayėje juabna uambayá, tojánbocna y tbojanjébengo. <sup>3</sup> Chë boyabásana, obanēngbe cuevēshēnguenache inoyena, y ndocná yonjobena cha jtsebátsēcana, ni mo cadenējuangaca; <sup>4</sup> er ba soye cadenējuangaca y inye soyēngaca cha nyētsá tmojanbatsēca, pero cha nyētsca soye yojtsátabebe y yojtsenájaca, y ndocná yonjobenaye cha bonguana chaotsemnama. <sup>5</sup> Nyēts tempo, bnētē y ibeta, obanēngbe cuevēshēnguenache y tjañenache yojánana yoye, y ndētsbēngaca enotsetšenaye. <sup>6</sup> Jesúsbiye bēnocana tbojáninye ora, chábioye tojanótjajo y chabe natsanoica yojoshēntsamentsiye; <sup>7</sup> y mēntšá yojtsáyebuache: —¿Ndayá átšeftaca cojtseboše, Jesús, celoca Bēngbe Bētsabe Uaquíñá? ¡Bēngbe Bētsabe delante choimpadá, ndoñe šcatjatsetšená ca!

<sup>8</sup> Chca tbojanayana, er Jesús chábioye tbojanayana: —¡Bacna bayėje juabna, chábentšana maisebocna ca!

<sup>9</sup> Chentšana Jesús tbojantjá: —¿Ntšamo cabaina ca?

Y chë bacna bayējēngbe juábnaca cha tbojanjuá: —Atšna Legión ca sēnduabaina, bētscanga fsēndmēna causa ca.

<sup>10</sup> Y tša Jesús ibojtserruana chë luarentšana ndoñe chaondētēbuacanama. <sup>11</sup> Chentša bēconana ba cotšēnga imnajena, batsjoca imnētsosañe; <sup>12</sup> as chë bacna bayējēnga Jesúsbiye tmojanimpadá: —Chë cotšēngbiye šmichamó, chēngbeñe fchayamashjna ca.

<sup>13</sup> Y Jesús aiñe tojanalesenciá; as chë bacna bayējēnga chë entsábentšana tmojésanbocana y chë cotšēngbeñe tmojánamashjna. Cachora chë mo uta uaranga cotšēnga batsjocana peñēšjana uafjajónayoye imojtsoshbuetše y yojtsatajo.

<sup>14</sup> Chora, chë cotšënga anjënënga tmojtsanacheta auatjanánënga, y tmojána chama jacuéntama chë puebloca y chabuenache; y entsanga tmojánabo ntšamo tojanopasacá jinjama. <sup>15</sup> Jesús yojtsemnoye chë entsanga tmojánashjajna ora, tmojáninje chë tempo bacna bayëjënga uambayá, inétsotbemañe, entsayá uichëtjoná y chabe nyets juábna. Y chë entsanga chama imojtséuatjaná. <sup>16</sup> Chë tmojáninjënga imojtsecuéntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámna. <sup>17</sup> Chora chë entsanga tmojanontsé Jesús impadánana chë luarentšana chaotsatoñama.

<sup>18</sup> Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca. <sup>19</sup> Pero ndoñe tbojanlesenciá, sinó mēntšá tbojaniana: “Acbe yebnoye motsatoñe, acbe pamílangbioye, y cochjácutayey ndayá Bëngbe Utabná ácaftaca tojamama, y ntšamo cha ácbioye tcmojalastemama ca.”

<sup>20</sup> Chentšana, chë entšá yojtsatoñe y tojanontsé Decápolis uabaina pueblënguenache jacúntana lempe ntšamo Jesús cháftaca tojanmca; y nyetscanga imojtsenjanaye.

*Jesús canye shembásabioye tbojanshná y Jairëbe bembetëmbioye tbojtanayená (Mt 9.18-26; Lc 8.40-56)*

<sup>21</sup> Chentšana, Jesús cachiñe chë uafjajónaye chenguana tojesaná barquëshañe. Chocna ba entsanga tmojanobuashconá, y Jesús chë uafjajónaye tsachañe yojtsemna. <sup>22</sup> Chorna, tojánashjango chë judiëngbe enefjuana yebnentša canye mandayá, Jairo ca uabainá. Jesúsbioye tbojáninje ora, chábtentse tojanoshëntsamentšé, <sup>23</sup> y tša ibojtseimpadana, mēntšá: —Atšbe bembetema ya echantsóbana; Diosmanda mabo, acbe cucuatšënga chábeñe coch-jajájua, salud chauatinñenama y cháuatayenama ca.

<sup>24</sup> As Jesús cháftaca tojána; pero bētsá entsanga imojtséstona, chábioye imojtsen-atsēntšenaye. <sup>25</sup> Chë entsanguentšey yojtsaye canye shembása šocá; cha ya bnētsana uta uata oboftajuanánaca inapadecena. <sup>26</sup> Cha puerta tojansufri, ba ashnyëngbe cucuatšëñe, y lempe ntsachetšá inabomncá tojanpochocá jenóshnama; pero ndoñe ibontsatsétəcacjana, nje más peor ibojtsobiamnaye. <sup>27</sup> Chë shembása yojjouena ntšamo Jesús ba šoquënga tojánashnama, y as stētšocana entsangbe tsēntsajana yojobeconá, y Jesusbe entsayá yojauábojajo. <sup>28</sup> Cha chca tojanma, er yojtsejuabnaye: “Masque nje mo chabe entsayá sibiájua chaijuábojajo, y salud chantsatsbomna ca.” <sup>29</sup> Y cachora chë oboftajuanana ibojtsobojuána; y chabe cuerpiñe ibojebiónana ya tšabá yojtsatsmēnama. <sup>30</sup> Chora Jesús yojaséntia chábtensana obenana yojóboचना, mo ndábioye tbojashná orcá; as cha tojanobuértana entsángbeñe y tojanatjá: —¿Nda atšbe entsayá tojuabojajo ca?

<sup>31</sup> Chabe uatsjéndayënga tmojanjuá: —Aca contsonyá chë entsanga cmontsatsēntšená, y cabá cochjátsnoticiaye nda entsayá tojuabojajo ca.

<sup>32</sup> Pero Jesús cátoye yojtserreparana jinjama nda tbojánbojajuama. <sup>33</sup> As chë shembása, chë ntšamo cháftaca yojopásama jtsetatšëmbëse, tojanobeconá ngmēmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojaniana. <sup>34</sup> Chora Jesús tbojaniana: —Bembe, Bëngbe Bētsábeñe ičošbuachéyeca shnaná contsatsmēna. Natjëmbana motsatoñe; acbe šocana tontsopochocá ca.

<sup>35</sup> Jesús cabá yojtsóyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojaniana: —Acbe bembe tontsóbana; ¿ndayama más Buatëmbayá chama cochjátebëybaboma ca?

<sup>36</sup> Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábioye tbojaniana: —Ndoñe matauatjana. Nje Bëngbe Bētsábeñe cocht-sošbuáchiye cha tšabá chaotsatsmēnama ca.

<sup>37</sup> Y Jesús ndoñe tonjanalesenciá Jairëbe yebnoye banga chamuastama; nje Pedro, Santiago y Juan, Santiagbe uabentsana, añe. <sup>38</sup> Chentšana, chë mandayabe yebnoye tmojánashjajna ora, Jesús tojánanje entsanga tša imojtsenbouenana, entsanga imojtsošachiye y puerta ngmēnaca imojtseyoye. <sup>39</sup> As chë yebnoye tojánamashëngo y chë entsanga tojanëyana: “¿Ndayama tša šmojtsenbouenana y tša šmojtsendëntjana? Chë shembásetema ndoñe chenatóbana, nje endētsoañe ca.”

<sup>40</sup> Pero entsanga nje imojtsáfchaye. As Jesús nyetsca entsanga shjoye tojtanëbuacna, y tojēftsanëbiatš chë basetembe bētsétsata y chabe enutënga; y chë shembásetema yojtsemnoye tojánamashëngo. <sup>41</sup> Chora Jesús tbojánabuacueshache y cachëngbe biyáye tbojaniana: “Talita, cum ca.” (Chca endayana “Shembásetema, matētsbaná ca”).

<sup>42</sup> Cachora, chë bnētsana uta uata bomna shembásetema tojtantsbaná y yojtsobena jama. Y chë entsanga chama imojtsenjanaye. <sup>43</sup> Pero Jesús corente tojanamēndá ndocnábeñe chama ntsecuéntayana ca, y tojanamēndá chë básetema saná chamuiyé chaosama.

## 6

*Jesús Nazaret puebloca**(Mt 13.53-58; Lc 4.16-30)*

<sup>1</sup> Chentšana Jesús tojéftsanbocna y cachabe luaroye tojtanashjango, y chabe uat-sjéndayënga cháftaca tmojána. <sup>2</sup> Ochnayté tojanobuache ora, Jesús tojanontsé chë judiëngbe enefjuana yebnentše entsänga jabuátambana.

Chë ba entsänga cha jóyebuambayama tmojanuenënga, imojenjnana y tmojánayana: “¿Ndëmoca quem boyabása lempe chca tojuatsjinýe? ¿Ndaye osertánana mua tmojátsetá, y ntšámoyeca cha yojtsobena chca bëts soyënga jtsamana ca? <sup>3</sup> ¿Mua ndoñe chë calpintero yondmëna, Mariybe uaquíña, y chabe catsátanga ndoñe mondmëna Santiago, José, Judas y Simón; y chabe uabénangnaca muentše ndoñe bëngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboše joyeunayana. <sup>4</sup> As Jesús to-janëyana: “Nýetsca luarënguenache canýe Bëngbe Bëtsabe juabna oyebuambnayábiye bëtsá jabemana, pero ndoñe chca cachabe laurentše, ni cachabe pamíllangbenache, ni cachabe yebnentše ca.”

<sup>5</sup> Chë entsänga chentše chábeñe ndoñe montsanošbuaché causa, Jesús ndoñe ton-janobená ni canýe bëts soye Bëngbe Bëtsabe obenánaca chentše jëftsemana; nýe básefta šoquëngbeñe cucuatšënga tojanjajó y tojanashná. <sup>6</sup> Jesús ojnananá yojtsemna cachábentša entsänga chábeñe ndoñe montsanošbuaché causa.

*Jesús, chabe uatsjëndayënga tojanichamó Bëngbe Bëtsabe amëndayama jábuayenama**(Mt 10.5-15; Lc 9.1-6)*

Chentšana, chë chaboye base pueblënguenache Jesús yojánana, Bëngbe Bëtsabe soyëngama abuátambaye. <sup>7</sup> Y chë bnëtsana uta uatsjëndayënga Jesús tojánachembo, y utáta inýoye tojanichamó, entsángbentšana bacna bayëjënga jtëbuacnama obenana jatšatayëse; <sup>8</sup> y mëntšá yojáuyana: “Benachiñama tondaye šmattsambaye, nýe canýe jatjonëfja; ndoñe šmattsambaye saná, ni shecnaja, ni crocénana uasnanëchiñe. <sup>9</sup> Nduámánëshe šmochjesóshecohëtjo, y nýe canýájua šmochjesíchëtjo ca.”

<sup>10</sup> Mëntšánaca tojanëyana: “Posada chacmojúyentšame yebnentše šmochtsoquedañe inýe puebløye játantscuana. <sup>11</sup> Canýe luaroye chašmojáshjajna y ndocná posada chac-monjúyentšame, y joyeunayama ndoñe chamontsebošëse, chentšana šmochjësebecana, y shecuatšentša polvëshe šmochjësenstoto, chca, chëngbioye jinýanjíyama chënga ndoñe tsábá tsëngaftangata tmonjamama ca.”

<sup>12</sup> Chentšana, chë uatsjëndayënga tojéftsanbocana y entsänga imojánabuayinyaye, chë tsabe benache chámuatishachama, bacna soyënga amana jtsajbanase. <sup>13</sup> Entšángbentšana ba bacna bayëjënga tmojtanëbuacna, y ba šoquënga aceitíyeca tmojananëttoj y tmojanashná.

*Ntšamo Juan chë Ubayaná tojanóbana**(Mt 14.1-12; Lc 9.7-9)*

<sup>14</sup> Rey Herodes Jesusbiamá yojátatšëmbona, er nýetsquénache nýetsca entsänga chabi-ama imojtsoýebuambnaye. Entšanga Jesusbiamá imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

<sup>15</sup> Inýënga imojtsichamo: “Cha entsemna chë Bëngbe Bëtsabe juabna oyebuambnayá Elías ca.”

Y inýënga: “Muana canýa Bëngbe Bëtsabe juabna oyebuambnayá, mo chë tempsquëngcá ca.”

<sup>16</sup> Heródesna ntšamo entsänga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentšana tojtayena ca.”

<sup>17</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceløye jutámiamá. Herodes chca tojanma Herodíasbe causa, chabe uabentsá Felipebe shema. Herodes chë shëmaftaca tojanobouamá, Felipe cabá ainá ora. <sup>18</sup> Y chama, Heródesbioye Juan ibojánabuayinyaye: “Ndoñe quenátslesenciana acbe uabentsabe shema acbe shema chaotsemnama ca.”

<sup>19</sup> Chë causa, Herodías Juárezbioye puerta ibojuáya, y yojánboše jtsóbama; pero ndoñe yontsobena, <sup>20</sup> er Herodes yojántatšëmbo, Juan canýe nýetsca soyënguiñe tsábá amá, nýe Bëngbe Bëtsábiye sempre oservená inamnana. Chama cha yojánauatja y ndoñe yonjanalesencia cha chamóbama. Y Juan Bëngbe Bëtsabe soyëngama Heródesbioye tojt-sebuayinyá ora, ntšamo jajuaboyana ndoñe yontsetátšëmbo, pero masque chca, oye-juayá Juárezbioye ibnayeunana. <sup>21</sup> Pero Herodías tojáninýena mocna ora Juan chamóbama. Heródesbe cumpleañø obøyejuaye ora, bëtscá saná tmojanprontá, y Herodes yojúbuaaja

chabe amëndayënga, soldadëngbe amëndayënga y Galileoca uamana entšanga. <sup>22</sup> Chora, chë oboyeuaye luaroye Herodiasbe bembe tojanamashëngo, tojanlantsá, y Herodes y nyetsca ófanënga chama tša imojtsóyejuaye. As chë rey, chë tobiášbioye tbojaniana: —Ndayánaca šmotjañe y atše cbochjátšetaye ca.

<sup>23</sup> Y jajúrase, mentsá tbojanšbuachená: —Ntšamo chašcojotjañá cbochjátšetaye, masque atšbe amëndayentsá bomnantšana tsentsañaca ca.

<sup>24</sup> Chentšana, chë tobiashe yojéftsebozna y chabe mamábioye ibojatjaye: —¿Ndayá chjotjañe ca?

Y chabe mamá ibojajuá: —Juan chë Ubayanabe bestšaše ca.

<sup>25</sup> Cachora chë tobiashe betso chë rey yojtsemnoye tojtanamashëngo, y tbojaniana: —Atše séntseboše, cam ora Juan chë Ubayanabe bestšaše canye šcnenëšife chašcuatšetá ca.

<sup>26</sup> Herodes chama corente tbojanongmé, pero chë entšangbe delante y jajúrase tbojanšbuachená causa, ndoñe yonjobenaye ntšamo tbojaniancá jebëbuetámenana.

<sup>27</sup> Cachora chë rey canye soldado ibojíchmua, Juanbe bestšaše chauyëbama. <sup>28</sup> As chë soldado cárceloye tojana, Juánbioye bestšaše tbojšanëštjango, y canye šcnenëšife tojanamba. Chë tobiášbioye tbojanëntšabuaché, y chana, chabe mamábioye.

<sup>29</sup> Juanbe ústonënga chama imojátatšëmbona ora, choye tmojánashajina, chabe cuerpo tmojésanocñe y jauátbontsama tmojána.

*Jesús shachna uaranga boyabásenga saná tojanacaredadó*

*(Mt 14.13-21; Lc 9.10-17; Jn 6.1-14)*

<sup>30</sup> Chë Jesús tojánichamonga chábioye tmojtashajina ora, lempe ntšamo tmojanmama y tmojanabuatambama cha tmojancuentá. <sup>31</sup> Chora Jesús tojanëyana: “Cuajna ínjoye, entšanga ndoyena luaroye, batsatema jóchna ca.” Cha chca tojánayana, er tša entšanga imojtsaye y imojtsabëbana; ni mo jasama ndoñe luare imontsebozna.

<sup>32</sup> As cánýnga barquëshañe tmojtanoñe, entšanga ndëbínýnoye. <sup>33</sup> Pero chënga imojtsoñama entšanga tmojánanyë, y ndëmuanyënga imojmnama imojtsetátšëmbo; chcasna, chë entšanga shecuátšeca betso tmojána, nyetsca pueblënguentšana, y chëngbe natsana choye tmojánashajina. <sup>34</sup> Chentšana, chë barquëshoicana tojánastjango ora, Jesús ba entšanga tojánanyë; chëngbiana tbojanongmé, er imojtsemna mo abuajënýa ndbomna oveshëngcá; y tojanontšé ba soyëngama jabuátambana.

<sup>35</sup> Ya jetiñe yojtsemna orna, chabe uatsjëndayënga tmojanobobeconá y tmojaniana: —Ya jetiñe entsemna, y quem luariñe ndocná quenatiyena. <sup>36</sup> Entšanga cuantichamuá, pueblotëmngoye y inyë luarëngoye chamotsoñama, ndayánaca jasama chamobuámiñama ca.

<sup>37</sup> Y Jesús tojanëyana: —Tsëngaftanga saná chëngbioye šmochjacaredádaye ca.

Chora chënga tmojaniana: —Crocénana queftsátsbomna, uta patse denario nyetšá, chëfta entšangbiana saná jabuámiyama ca.

<sup>38</sup> As Jesús tojanëyana: —¿Bueta tandëse šmojtsebozna? Marrepáanga ca.

Ya imojtsetátšëmbo ora, tmojaniana: —Shachna tandëse y uta beónata fsëntsebozna ca.

<sup>39</sup> Chora Jesús entšanga tojanamëndá ínýoca ínýoca chamoshëntsajtbiámama. <sup>40</sup> As chënga tmojanotbiama patse patsënga y shachna bnëtsátsanënga. <sup>41</sup> Chora Jesús chë shachna tandëse y chë uta beónata tojanca, y celoye jontjesiyëse, Bëngbe Bëtsábioye chama tbojtanchuá. Chentšana chë tandëšënga tojanjatá y chabe uatsjëndayënga tojanayentšbuaché chë entšanga jatšatayama. Y chë uta beónatnaca nyetscanga tojanëjätaye.

<sup>42</sup> Nyetscanga tmojanse jtoshachaye nyetšá. <sup>43</sup> Y chentšana, chë tandëse y chë beonentšana ojamnëtmënga tmojanatbaná, y bnëtsana uta sbarëcua tmojanajutjë. <sup>44</sup> Chë saná tmojansënga imojamna shachna uaranga boyabásenga, shembásenga y básenga ntjacuntacá.

*Jesús bëjaye juatsbuacá yojtsaye*

*(Mt 14.22-27; Jn 6.16-21)*

<sup>45</sup> Chentšana, Jesús chabe uatsjëndayënga tojanamëndá chë barquëshoye jtašjnama, chë uafjajónaye chenguana jangana y chabe natsana Betsaida ca uabaina puebloca jashjajana. Chënga imojtsebocanëntscuana, Jesús chë entšanga yojtichamuá. <sup>46</sup> Nyetscanga tojtandiošoftá ora, tjoye cha tojtanoñe Bëngbe Bëtsáftaca jencuéntama.

<sup>47</sup> Yojtseibétatana ora, chë barquëshu uafjajónaye tsëntsaca yojtsamna, y Jesús, canýa fshantsoca. <sup>48</sup> Jesús tojáninýe chëngbiana totcá yojtsemna, chë barquëshaca natsanoye jtsayana, er binýia chëngbe contra yojtsemna. Ya binýia ora, chëngbioye yojobeconá, bëjaye juatsbuacá yojtsaye, y ya chëngbiajana nyë ndericho jachnënguama yojtsemna. <sup>49</sup> Y chënga, chë bëjaye juatsbuacá cha yojtsayama tmojáninýe ora, tmojanjuabó cha canýe añemëse yojtsemna ca, y tmojanontšé yoyana; <sup>50</sup> er nyetscanga chca tmojáninýe y cochauatjanánënga imojtsemna. Pero Jesús cachora tojanëyana: “¡Añemo šmochtsebozna; atše Jesús sëndmëna; ndoñe matauatjëngana ca!”

<sup>51</sup> Chorna, chënga imojtsemna barquëshoye cha tojánasëngo, y chë jabuache binjia tojanëjbana, y nyetscanga puerte auatjanánënga y ojananánënga imojtsemna. <sup>52</sup> Chënga tmojáninnye chëfta entsanga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnama.

*Genesaret ca uabáinoca Jesús ba soquënga tojanashná*  
(Mt 14.34-36)

<sup>53</sup> Chë uafajónaye tmojánenashbuachengo ora, Genesaret ca uabaina luaroye tmojánashajina, y chë uafajónaye tsachoca chë barquëshu tmojánétsbua. <sup>54</sup> Chë barquëshoicana tmojánastajina y cachora entsanga Jesús tmojantëmbá. <sup>55</sup> Chiyeca, chë luariñe yebnënguenache betsko chënga tmojána, y tmojanontsé chë soquënga tjuashënguñe juyambana, chë ndémoye tmojanuena Jesús yojtsemna luaroye. <sup>56</sup> Y ndayentse cha tojámashënguñentse, pueblënguñe, bëtsc pueblënguñe y base pueblotëmënguñinaca, chë soquënga benachoye imojtsëbuacana, y Jesús corente imojtseimpadana chë soquënga chaualesenciá, nye mo chabe entsáyá sibúajua juabojajuana. Y nyetscanga tmojuábojajënga tsabá imojtsatsmëna.

## 7

*Ndáyeca canye entsá Bëngbe Bëtsabe delante ndoñe tsabia nántsemna*  
(Mt 15.1-20)

<sup>1</sup> Chentšana, fariseunga Jesúsbiye tmojanobeconá y báseftanga ley abuátambayëgnaca, Jerusalenocana áshjainënga. <sup>2</sup> Chënga tmojáninnye básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá. <sup>3</sup> Er chë fariseunga y nyetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëtsc taitanga imojanamancá. Chënga imojanjuabná, chca jtsamëse Bëngbe Bëtsabe delante tsábënga jtsatsmënama ca. <sup>4</sup> Chë sananga enocana tmojtashjango ora, ba soye ndoñe tmontsacuentšabese, tondaye ntjasana; y ba soyëgnaca imojánama, pero nye chëngbe bëtsc taitanga chca jamana imojanamánayeca, mo chë béjayeca juabáyana tazëšënga, matbajënga, calderëshënga y jutsnëshangá. <sup>5</sup> Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëtsc taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tsabá jtsatsmënama ca?

<sup>6</sup> Chora Jesús tojanëyana: —Nye tsabá chë Bëngbe Bëtsabe juabna oyebuambnayá Isaías tsëngaftangbama tojánayana, bacna entsanga chë ntšamo ndegombre šmojuabnacá nd-injinyayënga ca, mëntšá enduabemanentse: Quem entsanga mondbëtsichamo Bëngbe Bëtsá tša tsabia yomna ca; chca nye uyayásaca, pero chëngbe ainanentse ndocna tsabe juabnëngaca.

<sup>7</sup> Pero chënga nye bonamente mondbëtsichamo Bëngbe Bëtsá tša tsabia yomna ca; chënga nye entsangbe mandënga jtsabuátambayana, y Bëngbe Bëtsabe mandënga ndoñe ca — cha tojánayana.

<sup>8</sup> Chora Jesús tojanëyana: —Ntšamo Bëngbe Bëtsá tojanmandacá stëtsoye tsëngaftanga šmojtsequedá, nye ntšamo entsanga monduamancá jtsamama ca.

<sup>9</sup> Y mëntšánaca tojanëyana: “Tsëngaftanga ntšamo Bëngbe Bëtsá tojanmandacá stëtsoye jtsequédana, nye ntšamo tsëngaftangbe anteunga imojanamancá jtsamama. Tsëngaftanga jtsejuabnayana tsabá šmojtsama ca chca šmojtsama ora. <sup>10</sup> Moisés tonjánayana: ‘Acbe bëtscsata ndoñe stëtsoye catjáquedaye,’ y ‘nda chabe bëtscsati bama ndoñe tsabá tonjoyebuambá chana, jóbana jtemnana ca.’ <sup>11</sup> Pero tsëngaftanga šmondbëtsichamo, canye entsá yobena chabe taitá o chabe mamá jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana ‘Bëngbe Bëtsabiana uatšëmbona soyënga ca’). <sup>12</sup> Tsëngaftanga šmondbëtsichamo, nda chca tojanayëse, ya ndoñe obligaciönaca ntsemnana chabe taitá o mamabiana ndayánaca jamama ca. <sup>13</sup> Chca, tsëngaftanga šmontsama entsanga Bëngbe Bëtsabe palabra stëtsoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entsangbeñe tempscana y mëntsofiama yochnëjuancá. Y ba soyënga tsëngaftanga cachcá šmontsama ca” —Jesús tojánayana.

<sup>14</sup> Chora Jesús, cachife entsanga tojtanachembo y tojanëyana: “Nyetscanga šmochjouena y chacmësertá. <sup>15</sup> Ndayá entsá tojtsesacá, ndoñe ntjábemana ndoñe tsabia Bëngbe Bëtsabe delante. Inyëtšá comna: ntšamo entsá tojtsejuabná y tojtsoyebuambnacá endobena jabe-mana ndoñe tsabia Bëngbe Bëtsabe delante. <sup>16</sup> Chë jouenama tmojtsobenënga, šmochjouena ca” —cha tojánayana.

<sup>17</sup> Jesús entsanga tojëftsanabashejuana y yebnoye tojtanamáshëngo ora, chabe uat-sjëndayënga tmojantjá ntšamo cha tojánayana. <sup>18</sup> As cha tojanëyana: “¿Tsëngaftangnaca

cabá ndoñe cmontsésertana ca? ¿Cabá ndoñe cmontsésertana, lempe ntšamo entšá tojascá ndoñe ntsoberenana chábioye jabemana ndoñe tšabia Bëngbe Bëtsabe delante; <sup>19</sup> er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nyetsca sananga tšabá jasama yomna ca y chë saná ndoñe ntjamana canye entšá bacna soye chaotsamama ca. <sup>20</sup> Y mëntšánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena entšá jabemana ndoñe tšabia Bëngbe Bëtsabe delante. <sup>21</sup> Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama, <sup>22</sup> bacna juabnënga boyá o shëmbioye inýaftaca jáingñama, jtsatbomnayama, nyetsca bacna soyënga jamama, inýenga jáingñama, nye cachá jenomándama ntsobercá jtsiyenama, inýabioye jtsántšabošama, inýabiama jtsayátsenayama, jtsenábotamnayama y nye opënga jtsobi-amnayama. <sup>23</sup> Nyetsca quem bacna soyënga entšabe ainanocana jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

*Canye shembása inye luarocana ashjanganá Jesúsbeñe yojtsošbuaché*

(Mt 15.21-28)

<sup>24</sup> Jesús chentšana, Tiro ca uabaina luaroye tojtšanoñe, y canye yebnentše tojánamashëngo. Cha yojtseboše ndocná chama chaondëtsetatšëmbuama; pero ndoñe yonjobenaye iytëmenana jatsmënana. <sup>25</sup> Y betsko, canye shembása, canye bembe bacna bayëbe juabna uambayá ibnabonná, Jesusbiam aoyebuambnayana yojouena ora, chábioye tojánabo y chabe shecuatšentše tojanoshëntsamentšé. <sup>26</sup> Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye thojanimpadá chabe bembetëmbentšana bacna bayëja chabuataóbocnama. <sup>27</sup> Pero Jesús thojaniyana: —Atše šondmëna natsana judío entsangbiam chë soyënga jamana; chentšana cocayé chanjobenaye chca inye entsangbiam jamana. Atše acbiam, canye ndoñe judiá, soyënga stjámëse, nántsemna mo chë básengbe saná quešënga cuaftsëbuajocá ca.

<sup>28</sup> Y cha thojanjuá: —Arseñor, chca jtsemnana. Pero chë quešëngnaca mondbase chë básenga motšesá ora tmojatquécjanatemënga. Chcasna, Diosmanda átsnaca šmotsajabuache ca.

<sup>29</sup> As Jesús thojaniyana: —Tšabá tcjyana; chcasna, acbe yebnoye motsatoñe. Chë bacna bayëja acbe bembetëmbentšana tonjësebocna ca.

<sup>30</sup> Chentšana, chë shembása chabe yebnoye tojtšaná, y thojáninýena chë bembetema jutsnëshentše yojtsojájoñe, y chë bacna bayëja ya ndoñe chábeñe yontsemna.

*Jesús, canye boyabása tšamá y ndëbiábioye thojanshná*

<sup>31</sup> Tiro pueblentšana Jesús tojëftsanbocna, y Sidón y Decápolis luarentša pueblënguëjana jachnënguse, Galilea uafjajónayoye tojánashjango. <sup>32</sup> Cha chentše yojtsemna ora, chábioye tmojanánatse canye entšá tšamá y ndëbiá, y tmojanimpadá chabe cucuatšënga chë šocábeñe chaojájoma, chaboshnama. <sup>33</sup> Chorna Jesús entsangbentšana luaroye thojanánatse, cánýata. Chora chë šocabe matscuašoye ntšabuafjënga yojajué, cucuatšinë yojabuashëtjo, y chë šocabe bichtaja yojábojajo. <sup>34</sup> Chentšana, Jesús celoye tojanontješé, jabuache yojáshachna, y hebreo palabriñe thojaniyana: “¡Efata ca!” (Chca endayana “¡Chacmotsauenana ca!”)

<sup>35</sup> Cachora, chë boyabásabe matscuaše tšabá yojtsatsmëna y tšabá yojtsuenana; chë bichtaja tšabá yojtóbema y tšabá yojtsoyebuambnay. <sup>36</sup> Y Jesús chë entsanga tojanamëndá chama ndocnábeñe ntsecuëntayana. Pero masque tša chama yojtsamëndaye, entsanga más chabiam imojtsencuëntaye. <sup>37</sup> Chama chë entsanga puerte imojtsenjnanaye, y mëntšá imojtsichamo: “¡Lempe tšabá entsama! Chë tšëmënga chamouenama, y chë ndëbianga chamóyebuambama entsama ca.”

## 8

*Jesús canta uaranga entsanga saná tojanacaredadó*

(Mt 15.32-39)

<sup>1</sup> Chë tempo, ba entsanga Jesúsbioye cachiñe tmojanobeconá, y jasama tondaye imontse-bomna. As Jesús chabe uatsjëndayënga tojánachembo y tojanëyana: <sup>2</sup> —Quem entsangbiam šontsengmena, er ya unga te átsëftaca montsemna y mora jasama tondaye quemátsbomna. <sup>3</sup> Cachëngbe yebnoye tondaye ntjascá stichamuase, shëntsama benachëjana nantsabuatëcja; y báseftanga bën luarocana tmojabo ca.

<sup>4</sup> As chabe uatsjëndayënga tmojaniyana: —¿Ntšamo nda nanjobenaye quem luarentše, ndocna chë ndoyentšë, chëfta entsangbiam saná jinýenama ca?

<sup>5</sup> Chora cha tojanatjá: —¿Bueta tandëse šmojtsebomna ca?

Y chënga tmojanjúá: —Canýšëfta ca.

<sup>6</sup> Chentšana, Jesús tojanamëndá entsanga chamoshëntsjatbiamama. Chorna, chë canýšëfta tandëse tojanca y Bëngbe Bëtsábioye chama thojtanchuá. Chentšana tojanatjá,



chabe uatsjédayénga tojanējatá, y chéngna chē entsángbioye. <sup>7</sup> Básefta beonatémēngnaca innabomna; as Jesús, Bēngbe Bētsábioye chama tbojtanchuá y chabe uatsjédayénga tojanamēndá entsānga jujátayama. <sup>8</sup> Njētsānga tmojanse jtoshachaye njētsá. Chentšana cabá canýsefta bēts sbarécua tmojanajutjé chē ojamnētémēngaca. <sup>9</sup> Chē tmojansēnga imojamna mo canta uaranga njētsá. Chentšana Jesús chē entsānga tojtanadiosoftá. <sup>10</sup> Chora Jesús barquēshañe tojánenoyaiye chabe uatsjédayéngaftaca, y tmojtsanoñe Dalmanuta ca uabaina luaroye.

*Chē fariseunga tmojánbošena, Jesús chaoma canýe bēts soye, chabe ndegombre obenana jinýama*

(Mt 16.1-4; Lc 12.54-56)

<sup>11</sup> Chentšana, fariseunga tmojánabo y tmojanontsé Jesúseftaca enatsētsnayana. Y jisháchichiyama, imojtseimpadana canýe bēts soye chaoma, as jtsetatšēmbuama Jesusbe obenana Bēngbe Bētsábocana ndegombre tainóbocanama. <sup>12</sup> Y Jesús ngmēnaca, jabuache yojáshachnēse, mēntšá tojánayana: “¿Ndáyeca tsēngaftanga, chē mora oyenēnga, šmojtseboše canýe bēts soye chaimama tsēngaftanga atšbe obenana jinýanjíyama ca? Ndegombre chéyana, quem entsānga ndocna chca soye quemohátinýe ca.”

<sup>13</sup> Chorna chē entsānga cachcá tojesanēñýá, chē barquēshoye yojtamáshēngo, y uafajónaye chenguana yojtsoñe.

*Jesús tojanabuayená fariseunge buatēmbana soyēngama*

(Mt 16.5-12)

<sup>14</sup> Chē uatsjédayénga yojésebnētjomba ndaye soye jasama jesocñama, y chē barquēshoye nýe canýe tandēse imojtsebomna. <sup>15</sup> Jesús tojanéyana: —Smochtsantjesña; cuedado smochtsebomna fariseunga y Heródesbe levadurama ca.

<sup>16</sup> Chora chē uatsjédayénga tmojanontsé enatsētsnayana: —Chca entsichamo, bēnga tandēse ndoñe tmonjesocñama ca.

<sup>17</sup> Jesús yojtsetatšēmba, chabe uatsjédayénga imojtsejuabnaye chana tandēsama yojtsētsēsnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyēnga jtsamēse imojoyenama. Chcasna, mēntšá tojanéyana: —¿Ndáyeca tandēsama šmojtsoyebuambná? ¿Cabá ndoñe cmontsēsertana, ni šmontsetatšēmba? ¿Ainanoca ndoñe šmontseboše chacmēsertama? <sup>18</sup> Bominýe šmondobomna, pero ndoñe quešmátobena jinýana; jouenama šmondobena, y ndoñe quešmátuenana, y ndayá tijamama ndoñe quešmatsjuabná. <sup>19</sup> Chē shachna uaranga entsānga shachna tandēsēntšana sēnjanējatá chentšana, ¿bueta sbarécua chē ojamnētémēngaca šmēnjanajutjé ca? —cha tojanatjá.

Y chēnga tmojanjuá: —Bñētsana utácua ca.

<sup>20</sup> —Y chē canýsefta tandēsēntšana canta uaranga entsānga sēnjanējatá chentšana, ¿bueta bēts sbarécua chē ojamnētémēngaca šmēnjanajutjé ca?

Y chēnga tmojanjuá: —Canýseftácua ca.

<sup>21</sup> As Jesús tojanéyana: —¿Y cabá ndoñe cmontsēsertana ca?

*Jesús canýe jtanábioye tbojanshná, Betsaida puebloca*

<sup>22</sup> Chentšana tmojánashjajna Betsaida puebloca; y chora, entsānga canýe boyabása jtaná Jesúsbioye tmojánánatse, y tmojanimpadá cha jabojuana chabotseshnama. <sup>23</sup> As, chē jtanábioye tbojánábuacueshache, y chē pueblo chaboye tbojánánatse. Chorna, yebuáyeca ibojabuchanētjo, y chábeñe cucuatšēnga yojajájua, y tbojantjá nderado ndayá jinýama tayojsanobena ca. <sup>24</sup> As chē jtaná yojontjesiye y tojánayana: —Boyabásenga sēntsēñýa; mo betiyēngcá montsemna, pero montsobjonjá ca.

<sup>25</sup> Chora Jesús, chē jtanabe fšneñeñe chachiñe cucuatšēnga yojajájua. Y chē boyabása yojtsobena lempe tsabá jinýama; ya shnaná yojtoquéda. Y yojtsobena njētsca soyēnga botamana jinýana. <sup>26</sup> Chentšana, Jesús cachabe yebnoye tbojtanichmó y mēntšá tbojaníyana: —Chē pueblaye ndoñe catjēftsamashēngo ca.

*Pedro tojánayana, Jesús chē Cristo bétsemnana*

(Mt 16.13-20; Lc 9.18-21)

<sup>27</sup> Chentšana, Jesús tojánbocna chabe uatsjédayéngaftaca Cesarea de Filipo luaroca pueblēngoye, y benachiñe chabe uatsjédayénga tojanatjá: —¿Nda atše bétsemnana ca entsānga imojtsichamo ca?

<sup>28</sup> Y chēnga tmojaníyana: —Inýenga montsichamo Juan chē Ubayaná ca, inýengna Elías ca, y inýengna, canýe Bēngbe Bētsabe juabna oyebuambnayá ca.

<sup>29</sup> As Jesús tojanatjá: —Y tsēngaftangna, ¿nda atše bétsemnana ntšamo smochjayana ca?

Y Pedro tbojanjuá: —Acna chē Cristo condmēna, chē Bēngbe Bētsabe Uámana Uabuayaná ca.

<sup>30</sup> Chentšana Jesús corente chënga tojanamëndá, chë nda cha yojamna ndocnábeñe ntsecuëntayana.

*Jesús tojánayana cha ibojamna jóbanana y jtsayenana ca*  
(Mt 16.21-28; Lc 9.22-27)

<sup>31</sup> Y Jesús tojanontsé chabe uatsjéndayënga jabuátambana, cha, chë Bëngbe Bëtsá Entšá tbojanbemá, ibojamna puerte jasúfriana ca; chë judiëngbeñe bëtsëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayena ca. <sup>32</sup> Nýtscanga catafjosertaycá chama yojtsóyebuambnaye. As Pedro, Jesúsbiye luaroye tbojanánatse, y tojanontsé jtsáuyanana. <sup>33</sup> Pero Jesús yojobuértana, chabe uatsjéndayënga tojanënyanýe, y Pédrëbiye mëntšá tbojtsanbochembo: “¡Satanás, átsbentšana mojuaná! Pedro, achbe juabnënga Bëngbe Bëtsábiocana ndoñe quenatóbocana, sinó nýe entšángbentšana ca.”

<sup>34</sup> Chentšana, Jesús chabe uatsjéndayënga y chë inýe entšanga tojánachembo chamouenama, y tojanëyana: “Nda atšbe uatsjendayá jtsemnana tojtseboše, cháuyana nýe Bëngbe Bëtsá yobena sempre chabe vidíñe jtsemándayana ca, chabe quem luarentša soyënga cachcá chauesonyá atše juastama, y atšbiama jasúfriama chaotseprontana y cruciñe jobanámna. <sup>35</sup> Nda tojtsama quem luarentše bëtscá soyënga jtsebmomna y atšbiama jasúfriama ndoñe tontseprontana, chë nýtscá tescama yomna tšabe vida echanjopérda. Pero nda quem luarentša soyënga cachcá tojëftsonýá atše juastama, y chë tšabe noti-ciënga atšbiama abuátambaye causa, masque chaóbana, chë nýtscá tescama yomna tšabe vida echántsebmomna. <sup>36</sup> ¿Ndayama entšá buanjóservia nýtscá quem luarentša soyënga jtsebmomna, chë nýtscá tescama yomna tšabe vida tojtsoperdese? <sup>37</sup> Er canýe entšá chë nýtscá tescama yomna tšabe vida tojtsoperdese, ndocna soye quenátsmëna cha chaobená joyiyama, chë nýtscá tescama yomna tšabe vida jtsebmomna. <sup>38</sup> Chcasna, nda mora atšbiama y atšbe buayenana soyëngama tojtsëuatja entšángbeñe, chënga chë Bëngbe Bëtsabiama nduauenanënga y bacna soye amënga, chë Bëngbe Bëtsá Entšá tbojanbemánaca chabiama echantsëuatja, chabe Taitabe bëts obenánaca y chabe angelëngaftaca chaojésabo ora ca” —cha tojanëyana.

## 9

<sup>1</sup> Mëntšánaca Jesús tojanëyana: “Ndegombre cbëyana, báseftanga muentše montsemnënga ndoñe quemochatóbana, Bëngbe Bëtsá entšángbeñe chabe obenánaca jabomándama jabana ntjëftsinýca ca.”

*Jesús inýetšá tojanobinýná*  
(Mt 17.1-13; Lc 9.28-36)

<sup>2</sup> Chentšana chnënguana tianoye, Jesús tojëftsanëbiatše Pedro, Santiago y Juan, y ínýoye tojanënatse nýe chënga, canýe bëts tjoye. Y chëngbe delante Jesús inýetšá tojanobinýná; <sup>3</sup> chabe uichëtjonëjuangá tša yojtsabuashinýinýana; corente uafjantsëjuangá yojtsamna; nýa chca juafjantsama ndocná quem luarentše quantatobenaye. <sup>4</sup> Chca orna, chë uatsjéndayënga tmojáninýe, Moisés y Elías tbojanobinýná Jesúseftaca encuëntaye.

<sup>5</sup> Chora Pedro, Jesúsbiye tbojanianya: “¡Buatëmbayá, tša tšabá bëngbiama cuanmëna muentše jtsemnana ca! Mora fchanjapórma unga tambotëmënga: cánýetema acbiama, ínýetema Moisesbiama y ínýetema Elíasbiama ca.”

<sup>6</sup> Chca tojánayana, chë uatsjéndayënga yapa auatjanánënga imojtsemna causa, y Pedro ndoñe yontsetátšëmbo ntšamo jayanana. <sup>7</sup> Chora canýe jantsetëshe yojóbema, y chëngbiye yojáutsbotse; y chë jantsetëshoicana canýe oyebuambnayana tojanóbocna, mëntšá: “Mua atšbe bonshana Uaquiná endmëna; cha šmochtseyeyunana ca.”

<sup>8</sup> Y ndeolpe, chëngbe shëconana tmojanrrepará ora, ya ndocná más tmonjáninýe; nýe Jesús canýa chëngaftaca yojtsemna.

<sup>9</sup> Chë tjocana imojtsatsstmaye ora, Jesús chë uatsjéndayënga tojanamëndá: —Bëngbe Bëtsá Entšá tbojanbemá obanënguentšana candëtayenëntscuana, chë mënté tjoca šmonjinýe soyama ndocnábeñe šmattsecuëntaye ca.

<sup>10</sup> Chë uatsjéndayënga aiñe chca tmojanuena; pero chënga imojtsentjanaye ndayá cha yojtsentsáyana, cha yochtanayena ca cha tojánayana ora. <sup>11</sup> Y Jesúsbiye imojtsetjanaye: —¿Ndáyeca chë ley abuátambayënga mondbëtsichamo, canmëna Bëngbe Bëtsabe Uámana Uabuayanabe natsana Elías jabana ca?

<sup>12</sup> As cha tojanëjua: —Ndegombre, canýa Eliascá natsana echanjabo, y ntšamo jtsemnana yomncá lempe echánjabatsma. Pero ntšamo Bëngbe Bëtsabe uabemana palabrënguñe endayancana, Bëngbe Bëtsá Entšá tbojanbemá puerte caochjasúfria, y ínýenga puerte camochtsáboyëña ca. <sup>13</sup> Ndegombre cbëyana, canýa Eliascá ya tonjabo, y cháftaca entšanga

tmojanma lempe ntšamo tmojabošencá, ntšamo chaohnënguama Bëngbe Bëtsabe uabem-  
ana palabrënguine endayancá.

*Jesús, canye basa bayêbe juabna uambayábioye tbojanshná*  
(Mt 17.14-21; Lc 9.37-43)

<sup>14</sup> Chentšana, chënga tmojtáná chë inye uatsjëndayëngbiöye. Chora, Jesús tojáninye ba  
entsanga chë uatsjëndayëngbe shëconana imojtsemnama, y básefta ley abuátambayëngna  
chëngaftaca imojtsenatsëtsnaye. <sup>15</sup> Nyetsca entsanga cha tmojáninye ora, imojenjiná y  
tmojanótjajo cha jachuyama. <sup>16</sup> Chora Jesús chënga tojanatjá: —¿Ndayama chëngaftaca  
šmenatsëtsná ca?

<sup>17</sup> Y canya entsanguentsá tbojanjuá: —Buatëmbayá, muentše ácbioye sënjuánatse atšbe  
uauqiná; bacna bayêbe juabna entsambá, y chë causa, jóyebuambayama ndoñe quenátobena.  
<sup>18</sup> Nye ndayentsnáca cha tojtsemnentše, chë bayêja chábioye jishachana y jtsena-  
juáchesënjana; chentše uayoicana shashiye jtsabocanana, jtsenoftëšfjojnayana y obanacá  
jtsatsjájonana. Acbe uatsjëndayënga sënjaimpadá chë bacna bayêja chamuatábocnama, pero  
ndoñe chematobená ca —cha tbojaninyana.

<sup>19</sup> As Jesús tojánayana: —¡Nyëtsá ndošbuáchiyënga ca! ¿Buetayté šojtsemna tsëngaftangaftaca  
jëftsemnana? ¿Buetayté uantado tsëngaftangaftaca chjëftsemna? ¡Moye chë básetema mánatse  
ca!

<sup>20</sup> Chora chë básetema chábioye tmojanánatse; y chë bayêja Jesúsbiöye tbojáninye ora,  
tojanma chë basa ataque chaboshachama, y chë basa fshantsoye yojashajaye, yojtsojan-  
duounaye y uayoicana shashiye yojtsábocana. <sup>21</sup> As Jesús chë básabe taitábioye tbojantjá:  
—¿Buetayté chca yojtsepása ca?

Y cha tbojanjuá: —Básetema orscana chca; <sup>22</sup> ba soye, chë bayêja chábioye iñoye jtsat-  
metšana y buyeshoye jtsahbuetsána, jtsóbama. Chiyeca, nderado ndayá chabiama jamama  
tcojtsobenëse, bënga šmotsalastemá y šmotsëjabuache ca.

<sup>23</sup> Chora Jesús tbojaninyana: —¿Ndáyeca “ndayá jamama tcojtsobenëse ca” šcjayana? Nda  
Bëngbe Bëtsábeñe tojtsošbuáchebiana lempe endopodena ca.

<sup>24</sup> Y cachora chë básabe taitá tojanáyeuachena: —Añe, Bëngbe Bëtsábeñe sëntsošbuaché;  
Diosmanda, jmás jtošbuáchiyama šmajabuache ca!

<sup>25</sup> Y bëtská entsanga imojtsótotoma Jesús tojáninye ora, chë bacna bayêja tbojtsan-  
bochembo mëntsá: —¡Bacna bayêja, chë básetema tësmá y ndëbiá biamnayá; chábentsana  
maisebocna y ndocna te más chábeñe catjësamashëngo ca!

<sup>26</sup> Y chë bayêja chábentsana yojësebocna, yojtseyoye y chë básabioye jabuache ibojese-  
shatiyiyé; y chë básana mo obanacá tojanoquedá, y chë causa banga imojtsichamo cha  
obaná yojtsemna ca. <sup>27</sup> Pero Jesús tbojanábuacueshache y tbojtanatsbaná; y chë básana  
yojtëtsaye.

<sup>28</sup> Chentšana, Jesús canye yebnoye tojánamashëngo, y chabe uatsjëndayëngna luaroca cha  
tmojantjá: —¿Ndáyeca bënga ndoñe fsënjobená chë bayêja jtabocnana ca?

<sup>29</sup> Y Jesús tojanéjua: —Chca bayêjënga jtëbuacanamna jobenayana nye Bëngbe Bëtsáftaca  
jencuëntase, chabuájabuachama jaimpádase ca.

*Jesús cachiñe tojánayana cha ibojamna jóbanana y jtayanana ca*  
(Mt 17.22-23; Lc 9.43-45)

<sup>30</sup> Chentšana tomjëftsanbocna ora, Galilea luarëjana imojtsajna; y Jesús yojtseboše  
chama ndocná chaondëtsetatšëmbuama, <sup>31</sup> er cha chabe uatsjëndayënga yojtsabuátambaye.  
Mëntsá cachabiana yojanëtsëtsnaye: “Bëngbe Bëtsá Entsá tbojanbemá entsangbe cucu-  
atšñe mochanjáboshjona; mochanjóba, pero chentšana unga tianoye echántayena ca.”

<sup>32</sup> Pero chënga ndoñe yontsósertana ntšamo Jesús yojtsanëtsëtsnáca, y chama jatst-  
janayamna chënga imojtsauatja.

*¿Nda chë más uamaná yomna?*  
(Mt 18.1-5; Lc 9.46-48)

<sup>33</sup> Chora Capernaum puebloye chënga tmojánashajana; y cach yebnentše imojtsemna  
ora, Jesús chë uatsjëndayënga tojanatjá: “¿Ndayama benachiñe šmabáyenatsëtsnaye ca?”

<sup>34</sup> Chëngna nye iytëca tmojanobiama, er benachëjana chënga imnayénatsëtsnaye, chënguentsá  
nda chë más uamaná bëtsemnama. <sup>35</sup> As Jesús tojanótbema, chabe bnëtsana uta uat-  
sjëndayënga tojánachembo y tojánëyana: “Ndánaca nyëtscangbiana chë más uamaná jtsem-  
nama tojtsebošëse, cha chë más nduamaná chaóbema y nyëtscanga chaotsaserverna ca.”

<sup>36</sup> Chora Jesús canye básetema tbojánishache, chëngbe tsëntsaca tbojanatsá, tbojantbá y  
chënga tojanëyana: <sup>37</sup> “Ndánaca, átsbeñe ošbuachiýá bëtsemnayeca, tbojofja canya mo quem  
basetemcá, chana atše jofjana; y nda atše šojofja, chora cha nye atše ndoñe ntjofjana, sinó  
chë šojichmó chábioynaca jofjana ca.”

*Nda ndoñe bëngbe contra tontsemná, bëngaftaca jtsemnana*  
(Mt 10.42; Lc 9.49-50)

<sup>38</sup> Juan, Jesúsbioye tbojaniana: —Buatëmbayá, bënga fsënjinye canye boyabása, y cha aca jótëmbonëse, bacna bayëjbe juabna entsångbentsana endëtëbuacana; pero cha bëngaftaca ndoñe quenátëmëna causa, chama fsënjesauyaná ca.

<sup>39</sup> As Jesús tbojanjá: —Ndoñe şmatjuauyaná; er ndocná quenátobena canye bëts soye jamana Bëngbe Bëtsabe obenánaca, atşe jótëmbonëse, y chentsana atşe contra jatöyebuambnayana. <sup>40</sup> Ndegombre, nda ndoñe bëngbe contra tontsemná, bëngaftaca jtsemnana. <sup>41</sup> Y ndánaca, masque nÿe búyeshtema tsëngaftanga tcmojubuatşatá, tsëngaftanga átşbenga bëtsemnayeca, chábioye Bëngbe Bëtsá canye uacanana soye bochántatşetaye, cha chë tsabe soye tojamama ca.

*Resjo yomna, nderado bacna soyënga cuanjama*  
(Mt 18.6-9; Lc 17.1-2)

<sup>42</sup> Chentsana Jesús tojánayana: “Canya átşbeñe oşbuachiyábioye mo quem basetemcá, nda tbojaingñe atşe ustonama chaotsajbanama, más tsabá chabiamá nántsemna canye bëts nantsñébe chamotsetamošëntsua y mar bëjayoye asentoye chamotsashbuetşe chabotse-natjëmbama. <sup>43</sup> Nderado acbe cucuatşeca bacna soye tcojama, más tsabá nántsemna chë cucuatşe chacotsenacuéştjango. Achiama más tsabá endmëna celoye jamashënguana nÿetsca tescama vida jtsebmnama, nÿe canye cucuatşe bomná, y ndoñe nÿets útátşeca infernoye chacmotocá jama, chë ndocna te yochanjáfsana ifñeshoye; <sup>44</sup> choca útşenënga puerte nÿetsca tescama mochanjasúfria. Chëngbioye mochtsasaye mamanga ndocna te quemochatóbana, y chë ifñeshe ndocna te queochátşfsana.

<sup>45</sup> “Nderado acbe shecuátşeca bacna soye tcojama, achiama más tsabá nántsemna chë shecuatşe chacotsenashecuátşjango. Achiama más tsabá endmëna cosheto celoye jamashënguana nÿetsca tescama vida jtsebmnama, y ndoñe nÿets útátşeca infernoye chacmotsëtşena; <sup>46</sup> choca útşenënga puerte nÿetsca tescama mochanjasúfria. Chëngbioye mochtsasaye mamanga ndocna te quemochatóbana, y chë ifñeshe ndocna te queochátşfsana.

<sup>47</sup> “Nderado acbe bominyëca bacna soye tcojinye y cachca soye tcojama, más tsabá nántsemna chë bominye chacotsenobuchjátşëca. Achiama más tsabá endmëna Bëngbe Bëtsabe amëndayoye jamashënguana nÿe canye bominye bomná, y ndoñe nÿets útabeca infernoye chacmotsëtşena; <sup>48</sup> choca útşenënga puerte nÿetsca tescama mochanjasúfria. Chëngbioye mochtsasaye mamanga ndocna te quemochatóbana, y chë ifñeshe ndocna te queochátşfsana.

<sup>49</sup> “Tamó tsabe soye endmëna. Ntşamo chë tamó canye tsabe soye endmëncá, Bëngbe Bëtsá echanjama nÿetsca tsëngaftangbiamá tsábenga chaşmotsemnana, chë átşbeñe bet-soşbuáchemá şmojtsepadececa ora şmojauantase. <sup>50</sup> Tamó tsabe soye endmëna. Pero chë tamó fténana tojtsóbemëse, ndoñe queşmátobena jamana cachiñe chabe tempşca sanana chaotsatsbmnama, ni saná jatamuama. Mo tsabe tamocá entsångbiama şmochtsemna, chëngbeñe jtsiyenëse ntşamo Bëngbe Bëtsá yoboşcá, y nÿetscángaftaca natjëmbana şmochtsiyena ca” —cha tojánayana.

## 10

*Ndayá Jesús tojanabuatambá bouamnënga tmojtsenëtşenama*  
(Mt 19.1-12; Lc 16.18)

<sup>1</sup> Chentsana, Jesús chë luarentşana tojëftsanbocna y tojána Judea luaroye y Jordán chen-guana. Entşanga cachiñe chábioye tmojánabo, y cha chënga yojtsabuátambaye, chë ntşamo ja-mana yojanamancá. <sup>2</sup> Bášefta fariseunga chábioye tmojanobeconá, y jisháchichiyama mëntşá imojtsetjanaye: —¿Queojtselesenciana canye boyá chabe shëmbioye cachcá jesonÿayama ca?

<sup>3</sup> Chora cha tojanëjua: —¿Ntşamo Moisés chë soyëngama tcmënjanamëndaye ca?

<sup>4</sup> Y chënga tmojánayana: —Moisés tojanalesenciá chë boyá chabe shëmbioye chabuiyë canye tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonÿá ca.

<sup>5</sup> Chora Jesús tojanëyana: —Tsëngaftanga Bëngbe Bëtsabe mandënga ainaniñe jóyëngacñama ndoñe queşmátşboşe causa, Moisés chca tsëngaftanga tcmojëtsanamëndá. <sup>6</sup> Pero quem luare jobojátşama orna, “Bëngbe Bëtsá canye boyabása y canye shembása tonjánabiamá. <sup>7</sup> Chiyeca, chë boyabása chabe taitá y chabe mamá echanjéshashejuana, chabe shëmaftaca jenútanama, <sup>8</sup> y chë útatna mo canÿacá bochántsemna.” Y chca, ya ndoñe útata quebochátşmëna, sinó nÿe mo canÿacá. <sup>9</sup> Chcasna, entşá ndoñe chaondëndbema ndayá Bëngbe Bëtsá mo canÿiñcá tojëftşema soye ca —cha tojánayana.

<sup>10</sup> Ya cach yebnocá imojtsatsmëna ora, chabe uatsjëndayënga cach soyama imojtëtştjaye.

<sup>11</sup> Y Jesús tojanëyana: “Nda chabe shëmbioye cachcá tbojesonÿá y inÿaftaca tojtóbouamase,

cha chë natsana shémbioye inýe shembásaftaca jtseíngñayana; chana canýe uabuatmá jtse-bomnana. <sup>12</sup> Y chë shema chabe boyábioye cachcá tbojesonýá, y inýaftaca tojtóbouamase, chánaca chë natsana boyábioye inýaftaca jtseíngñayana; canýe uabuatmá jtsebmomnana ca” —Jesús tojánayana.

*Jesús, basetémëngbiana Bëngbe Bëtsábioye tbojanimpadá*

*(Mt 19.13-15; Lc 18.15-17)*

<sup>13</sup> Entsanga, basetémënga Jesúsbioye tmojanënatse, chauabájajuama y Bëngbe Bëtsábioye chëngbiana chaboimpadama; pero chabe uatsjëndayënga tmojanontsé chë basetémënga unachayënga jtsécacanan. <sup>14</sup> Jesús chca tojáninýe ora, tbojánetna y chë uatsjëndayënga tojanéyana: “Cachcá mónýaye chë basetémënga átsbioye chamuabo y ndoñe matéuyanana; er Bëngbe Bëtsabe amëndayana endmëna chë mo quem basetémëngcá imomnëngbiana. <sup>15</sup> Ndegombre cbéyana, nda Bëngbe Bëtsabe soyënga ndoñe tonjóyëngacñe mo canýe basetémcá jtsosbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

<sup>16</sup> Y chë basetémënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tsabe bendicionënga chëngbeñe chaotsemnana.

*Canýe bomna entsá Jesúsbioye tojána*

*(Mt 19.16-30; Lc 18.18-30)*

<sup>17</sup> Jesús jama tojtétanontsé ora, canýe boyabása chábioye tojanótjajo, chabe shecuatšentse tojanoshëntsamentse, y mëntsá tbojantjá: —Tsabe Buatëmbayá, ¿ndayá šojtsemna jamana chë nyetsca tescama yomna tsabe vida jtsebmomnana ca?

<sup>18</sup> Y Jesús tbojanjuá: —¿Ndáyeca “tsabia ca” šcjauyana? Tsabia nýe canýa endmëna: Bëngbe Bëtsá. <sup>19</sup> Aca icotátšëmbo Bëngbe Bëtsá tojanmandacá: “Ndoñe catjóba, acbe shema inýaftaca ndoñe cattseíngñaye, ndoñe catjatbëba, ndoñe catjuaboínýena, inýëngbioye ndoñe catjáingñaye ndayánaca jabacama, y acbe bëtsétsata ndoñe stëtsoye catjáquedaye ca.”

<sup>20</sup> Chora chë boyabása tbojanjuá: —Buatëmbayá, atse lempe chë mandënga básetema orscana sëndocumplina ca.

<sup>21</sup> Jesús bonshanánaca tbojanonýinýe y mëntsá tbojaniyana: —Canýe soye cmontse-buáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnëjémënga cochtsatsataye; chca, celoca canýe bëts bomnana cochántsebmoma. Chentšana, cochjabo y šcochjuasto ca.

<sup>22</sup> Pero chë bobóntsbioye inýetsá ibojtsínýana Jesús chca tbojaniyanama; y puente ngmëna yojtá, cha puente bomná inamna causa.

<sup>23</sup> Chora Jesús cátoye tojanrepará y chabe uatsjëndayënga tojanéyana: —¡Puerte totcá entsemna bomnëngbiana Bëngbe Bëtsabe amëndayoye jamashënguama ca!

<sup>24</sup> Chca imojouena ora, chë uatsjëndayënga ojananánënga imojtsemna, pero Jesús cachiñe tojanoyebuambá y mëntsá tojanéyana: —Atšbe básenga; ¡puerte totcá entsemna Bëngbe Bëtsabe amëndayoye jamashënguama! <sup>25</sup> Ndegombre, más paselo endmëna chë coshuffentša atëfñëjana canýe camello chauachnëngo, y ndoñe canýe bomná Bëngbe Bëtsabe amëndayoye jamashënguama ca.

<sup>26</sup> Pero chë uatsjëndayënga nýe más imojtsenjananaye y imojtsentjanaye: —¿As, nda yochjobenaye atsbocaná jtsemnana ca?

<sup>27</sup> Chora Jesús tojanëñyanýe y tojanéyana: —Entsanga ndoñe quemátobena jamana canýa atsbocaná chaotsemnana, pero Bëngbe Bëtsá aññe; er Bëngbe Bëtsá lempe jamama endobena ca.

<sup>28</sup> Chora Pedro tbojaniyana: —Aca contsonýá, bënga lempe chë fsëndbomna soyënga fsënjéseboshjona y ácaftaca fsëntsajna ca.

<sup>29</sup> As Jesús tojánayana: —Ndegombre cbéyana, ndánaca átsbioye jaserviama y chë tsabe noticiënga jábuayenama, tojéseboshjona chabe yebna, catšátanga o uabénanga, bebmá o befta, o básenga, o fshantsënga, <sup>30</sup> cha mora quem luarentse echanjóyëngacñe chama patse soye más yebnënga, catšátanga, uabénanga, bebmanga, básenga y fshantsënga, masque puente chaosufrima inýënga mochántsama; y chë inýe luarocna, chë nyetsca tescama yomna tsabe vida echanjóñyena. <sup>31</sup> Pero banga, mora uámanënga imomnënga, nduámanënga mochántsemna; y banga, mora nduámanënga imomnëngna, uámanënga mochántsemna ca — Jesús tojánayana.

*Jesús cachiñe tojánayana cha jóbanama y jtayenama*

*(Mt 20.17-19; Lc 18.31-34)*

<sup>32</sup> Chentšana Jerusalenoye imojtsaye, y Jesús yojtsebnatsana. Chë uatsjëndayënga puente ojananánënga imojtsemna, Jesús ndauatjcá choye yojtsayama; y inýe becá entsanga ústonoye imojtsajnënga, imojtsayáuatja. Jesús cachiñe chabe bnëtsana uta uatsjëndayënga barie

tojánachembo y tojanontsé jáuyanana ntšamo cháftaca jopásama yojtsemnana. <sup>33</sup> Měntšá tojaněyana: “Tsěngaftanga šmontsonýá, Jerusalenoye bēnga mora montsajnama. Chocna, chē Bēngbe Bětsá Entšá tbojanbemá, chē bachnangbe amēndayēnga y ley abuatambayēngbe cucuatšife mochanjáboshjona, y chēnga mochanjayana cha chaóbana ca; y ndoñe judiēngbe cucuatšife mochanjáboshjona. <sup>34</sup> Chēnga mochantsáboyejuana, mochántsebuashětotoj, mochántsetjanja y mochanjóba, pero chentšana unga tianoye cha echántayena ca.”

*Santiago y Juan, Jesús tmojanimpadá canye pavor cháuabiamama*  
(Mt 20.20-28)

<sup>35</sup> Chora, Santiago y Juan, Zebedeobe uaquiñata, Jesúsbioye tbojanobeconá y tmojaninyana: —Buatēmbayá, bēndata fsěntseboše pavor chašcuabiamama ntšamo chacbojaimpadacá ca.

<sup>36</sup> Y Jesús tojanatjá: —¿Ndayá šojtseboše atše tsěndatbiamama chjamama ca?

<sup>37</sup> Y chata tbojaninyana: —Aca reycá chacojtemándana ora, cochjalesencia bēndata fchayobená jótbemana, canya acbe catšbioica y inya acbe uañicuayoica ca.

<sup>38</sup> As Jesús tojanjúa: —Ntšamo šmontsotjanañama tsěndata ndoñe quešnatšatšēmo. ¿Ntšamo atše chaitsesufrincá, tsěndátnaca cachcá jasúfriama tašatjobenaye? ¿Y entšanga puerte bacá chacmojtsěbuatsená ora, tašochjauánta, ntšamo atše chjauantacá ca?

<sup>39</sup> Y chata tbojaninyana: —Añe fchanjobenaye ca.

Y Jesús tojaněyana: —Ndegombre tsěndátnaca atšcá šochanjasúfria, y atšbe causa cmochántsamna bētscá soyēngama jasúfria. <sup>40</sup> Pero atše ndoñe quetsátobena jamándana nda atšbe catšbioica y atšbe uañicuayoica chaótbemama. Chē útentše entsemna ndēmuanjēngbiamama atšbe Taitá tojaprontacá ca.

<sup>41</sup> Chē inye bnětsana uatsjěndayēnga chca tmojanuena ora, tmojanontsé Santiago y Juánoftaca jotjáyanana. <sup>42</sup> Pero Jesús nyetsca uatsjěndayēnga tojánachembo y tojaněyana: “Tsěngaftanga šmondětatšēmo, quem luarentša amēndayēnga lempe jtsemándayana, nya mo nduiñēnga cuafsemncá; y chē bētsětsa entšanga chēngbe obenánaca jtsemándayana, ntšámnaca jtsaměse, chē inye entšanga sempre chamotsayaunanama. <sup>43</sup> Pero tsěngaftangbeñe ndoñe chca chaondětsemna. Inyětšá; masna, nda tsěngaftangbeñe chē más uamaná jtsemnana tojtseboše, cha bontsemna chē inyēnga jtsaservénana; <sup>44</sup> y ndánaca tsěngaftanguentšá chē más uamaná jtsemnana tojtsebošá, bontsemna jtsemnana nyetscangbiamama, mo nye inyabiamama nyets tempo oservenacá. <sup>45</sup> Cachcá, Bēngbe Bětsá Entšá tbojanbemá ndoñe chenátabo cha chamotseservénama, ndayá inyēnga jabáserviamama. Y mo nda, inyēnga jātsebacama cuafjopagacá, cha echanjóba ba entšanga atsebácanēnga chamotsemnana ca” —cha tojánayana.

*Jesús canye jtanábioye tbojanšhná*  
(Mt 20.29-34; Lc 18.35-43)

<sup>46</sup> Chentšana, Jesús y chabe uatsjěndayēnga Jericó uabaina pueblōye tmojánashjajna. Y Jesús chabe uatsjěndayēngaftaca y bētscá entšangaftaca Jericó pueblentšana yojtsaisebocana ora, Timeobe uaquiñá, Bartimeo ca uabainá, canye jtaná lemošna otjanañá, benache juachañe yojtsetbemana. <sup>47</sup> Y Jesús Nazaretocá chējana yojtsachnějuanama cha yojátatšēbona ora, tojanontsé mēntšá uayebuáchana: —¡Jesús, Davíd bentšana Entšá, šmotselastemá ca!

<sup>48</sup> Chorna, banga chē jtaná imojtsácacana iytēca chaótbemama. Pero cha más yojtsáyebuache: —¡Davíd bentšana Entšá, šmotselastemá ca!

<sup>49</sup> Chora Jesús tojantšá y chē inyēnga tojaněyana: —Chē jtaná mochembo ca.

As chē jtaná tmojanchembo, y mēntšá tmojaninyana: —¡Añemo cochtsebmoma; motsbaná! Jesús cmontsechembuana ca.

<sup>50</sup> Y chē jtaná, quefsaiya jtsenátsejquěse, yojontsēnja y betscó Jesúsbioye yojobeconá.

<sup>51</sup> Chora, Jesús chē jtanábioye tbojantjá: —¿Ndayá cojtseboše atše acbiamama chjamama ca? Y chē jtaná tbojanjúa: —¡Buatēmbayá, šmolesenciá atše chašuatabinynama ca!

<sup>52</sup> As Jesús tbojaninyana: —Motsatoñe. Tšabá jtsatsmēnama Bēngbe Bětsábeñe icóshuachéyeca, tšabá contsatšmēna ca.

Y cachora cha tšabá ibojtabinyna, y Jesúsbioye benachējana ibojtsěstona.

## 11

*Jesús Jerusalenoye tojánashjango*  
(Mt 21.1-11; Lc 19.28-40; Jn 12.12-19)

<sup>1</sup> Ya Jerusalenoye imojtsebeconá ora, Betfagé y Betania pueblēnga bēconana, Olivos ca uabaina tjashe juachañe, Jesús uta chabe uatsjěndayata tojanichamó, <sup>2</sup> y mēntšá tojaněyana: “Tsěndatbe natsana entsemna base pueblotēmoye motsata. Chašojáshjango y cachora sochanjinynena canye burrotema utsbuaná; chábeñe cabá ndocná tonjenojayé.

Sochjuajafjoná y sochjuánatse. <sup>3</sup> Nderado nda, ¿ndáyeca šmojtšanachá ca? chacmojátjase, sochjojuá: 'Béngbe Utabná bontsájaboto y chora bochantabáiseboshjona ca.' "

<sup>4</sup> As chata tbojáná, y tbojáninýena chë burrotema tsáshenañe, canýe bësásañe utsbuaná, y imojuajafjoná.

<sup>5</sup> Y básefta entsanga chiñe imojtsemnënga, chátbïoye tmojanëyana: "¿Ndayá šojtsama? ¿Ndayeca chë burrotema šojtsajafjná ca?"

<sup>6</sup> As chata tbojanjuá ntšamo Jesús tojanëyancá; y chë entsanga tmojanalesenciá chë burrotema chamuánatsama. <sup>7</sup> Chentšana, chë burrotema Jesúsbiïoye tmojanánatse; chë burrotémbeñe chatbe entsáyá tbojanátjase, y Jesús chábeñe tojanenoyáyé. <sup>8</sup> Bëtská entsanga chëngbe entsáyá chë benachëjana imojtsanëtëtsatsana, y inýengna chë jajoca imojuatëtsetse buacuashangá chiñe imojuacjaye. <sup>9</sup> Y chë natsana imojtsajnënga y chë ústonoyënga mëntšá imojtsaiuáyebuache: "¡Béngbe Bëtsá matschuanga! ¡Corente bendición bomná, chë Béngbe Utabnabe obenánaca tojabá! <sup>10</sup> ¡Tša tsábá chë echanjóshjango amëndayana, béngbe bëts taitá David yojëftsemánda orcal! ¡Béngbe Bëtsá celocá matschuanga ca!"

<sup>11</sup> Jesús Jerusalenoye tojánashjango, y Béngbe Bëtsabe bëts yebnoye tojánamashëngo. Chabe shëconana lempe yojëftserrepárase, y ya yojtseibétatana causa, chabe bnëtsana uta uatsjëndayëngaftaca tojëftsanbocna, Betania pueblöye.

*Jesús tojánayana canýe betiye ndoñe más chaondëshájona ca  
(Mt 21.18-19)*

<sup>12</sup> Yëfsana, Betaniocana Jerusalenoye chënga imojtësajna ora, Jesús tbojánishëntsena. <sup>13</sup> Bënocana canýe higo betiye yojinýe; as tojáná jontjesiyama tainashajo o ndoñe. Pero nýe tsbuanachënga chiñe yojínýena, chora ndoñe shajo tempo bëtsemna causa. <sup>14</sup> As Jesús chë higo betiyye tojánayana: "¡Ndocna te más chaondëshájona entsanga chamosama ca!"

Y chabe uatsjëndayënga imojouena ntšamo cha tojanayancá.

*Jesús, Béngbe Bëtsabe bëts yebnentsana enënga y obuámnayënga tojtanëbuacna  
(Mt 21.12-17; Lc 19.45-48; Jn 2.13-22)*

<sup>15</sup> Jerusalenoye tmojánashjajnentšana, Jesús Béngbe Bëtsabe bëts yebnoye tojánamashëngo, y tojanontsé chentšana jtëbuacnana chë chentše imojtsena y imojtsobuámnayënga. Chéntšnaca imojtsemna entsanga canýe crocénana enënga, y chë crocénana nýe Béngbe Bëtsabe bëts yebnentsama inoservena. Chë entsanga crocénana atrocayëngbe mesëshangá tojtsanenásatajchquëca, y chë palomatëmënga enëngbe tsënëshëngnaca; <sup>16</sup> y ndoñe tonjanalesenciá ndocná Béngbe Bëtsabe bëts yebnëjana chë soyënga chaotsëchnëjuanama. <sup>17</sup> Y tojanontsé entsanga mëntšá jabuátambana: "Ndegombre, Béngbe Bëtsabe uabemana palabrenguñe cha mëntšá tojánayana: 'Atšbe bëts yebna echantsabaina nýetsca luarentša entsangbiama átšeftaca encuëntaye yebna ca'; pero tsëngaftangna atbëbanëngbe oyeniñe chë yebna šmojtsebema ca" —Jesús tojanëyana.

<sup>18</sup> Chë bachnangbe más uámana amëndayënga y chë ley abuátambayënga tmojátántšëmbona ntšamo yojochnënguama; as tmojanontsé enójuabnayana ntšamo jobenayana cha jóbana, cha imojtsebiauatya causa, er nýetsca entsanga imojtsenjnanaye ntšamo cha yojanabuátambana. <sup>19</sup> Pero yojtseibétatana ora, Jesús chabe uatsjëndayëngaftaca chë bëts pueblentsana yojesóbocñe.

*Chë higo betiye tojtsanbuashá  
(Mt 21.20-22)*

<sup>20</sup> Yëfsana cachëse, cachëjana imojtësachnëjuana ora, tmojáninýe chë higo betiye parejo tbëtëjëngaca yojtsebuashá. <sup>21</sup> Chora Pedro yojenójuaboye ntšamo yojopásama; as Jesúsbiïoye tbojanianya: —¡Buatëmbayá, minýe; chë tconjayana ndocna te más tsábe betiye chaotsemnana betiye tojtsebuashá ca!

<sup>22</sup> Y Jesús tbojanianya: —Béngbe Bëtsábeñe šmochtsošbuáchiye. <sup>23</sup> Ndegombre chëyana, nderado nda quem tjöye tojayana, "¡chentšana mojuaná y bëts uafjajónayoye motsëshbuetše ca!" y chca tojayana ainaniñe inýetsá juabna ntjatsbomncá, y ainaniñe puerte tojtsosbuaché ntšamo tojayancá añe yochjochnënguama, ndegombre chca echanjochnëngo. <sup>24</sup> Chíyeca cbochanjáuyana, lempe ntšamo Béngbe Bëtsáftaca chašmojtscencuënta ora chašmojtstojanañama, ainaniñe corente šmochtsejuabnayey ya šmojóyëngacñe ca, y ndegombre chca šmochántsebmoma. <sup>25</sup> Y Béngbe Bëtsáftaca chašmojtscencuënta ora, šmochinjauaboye nderado nda ndaye bacna soye tsëngaftangbiama tojamama, y cháftaca cabá etonánënga šmojtsemnëse, šmochtseperdóna; chca, Béngbe Bëtsá, celoca endmëná, tsëngaftangbe bacna soyëngama chacmotsaperdonama. <sup>26</sup> Pero inýa ndoñe šmonjaperdonasna, Béngbe Taitá, celoca endmëná, cach ndoñe tsëngaftanga quëcmochátaperdonaye ca —cha tojánayana.

*Jesusbe obenana**(Mt 21.23-27; Lc 20.1-8)*

<sup>27</sup> Chca tojanopasá chentšana, Jerusalenoye chënga tmojesaná. Jesús Bëngbe Bëtsabe bëtš yebnëjana yojtsobuertanëntscuana, chábioye tmojanobeconá bachnangbe amëndayënga, ley abuátambayënga y chë judiëngbeñe bëtšëjemëngcá amëndayënga, <sup>28</sup> y mëntšá tmojantjá: — ¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšetá ca?

<sup>29</sup> As Jesús tojanëyana: —Atšnaca sëntsebmoma canye soye tsëngaftanga jatjayama. Chašmojuuase, átšnaca cbochjáuyana ndaye deréchoca atše chca stsama. <sup>30</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga? Smëyana ca.

<sup>31</sup> Chora chënga tmojanontsé mëntšá enatsëtsnayana: “ ‘Bëngbe Bëtsá ca’ chamojuuase, cha šochanjáuyana: ‘As ¿ndáyeca chë cha tmojanabuayená soyënguñe ndoñe šmonjanošbuaché ca?’ <sup>32</sup> Pero ndoñe quemuátobena jayanana ‘entšanga ca.’” Chca tmojánayana, er chënga entšangbiana imojánauatja, er nyetścanga imojanjuabná, Juan ndegombre Bëngbe Bëtsabe juabna oyeuambnáy voyamnana. <sup>33</sup> Chcasna, chënga tmojanjuá: —Bënga ndoñe queftsátstatšëmbo ca.

Y Jesús tojanëyana: —As atše cach ndoñe quechocatëyana ndaye deréchoca atše chca stsama ca.

**12***Chë puerta bacna trabájayëngbiana cuento**(Mt 21.33-46; Lc 20.9-19)*

<sup>1</sup> Chora Jesús tojanontsé cuentëngaca jabuátambana. Mëntšá tojanëyana: “Canye entšá bëtšcá uvas betiyënga yojáye, y chë shëconana yojajëtja. Chë uvasëšangá juantšëtetjiamna canye base luare yojajutjo; y canye tšbanana jebna soye yojapórma chiñe jtsashanyama. Chentšana, inye trabájayënga chë jajañe yojýentšame, y chana inye luaroye yojtsoñe.

<sup>2</sup> Chë uvasëšangá juashacama tempo yojobuache orna, chë jajañe nduiño canye oservená ibojichmua chë arrëndayënga jáuyanama ntsachetšá chë nduiño ibojtsotocánama.

<sup>3</sup> Pero chëngna, cha imojishache, imojtsejantšetaye, y tondaye ntajatacá imojtichmuá.

<sup>4</sup> Chentšana, chë nduiño inye oservená ibojichmua; pero chana, bestšaše imojtselisia y podesca imojtsóyenguango. <sup>5</sup> Chentšana inya ibojatichmuá, y chana chë arrëndayënga imojtsóba. Y bángnaca yojichamuá; pero chëngna, inýengna imojtsajantšetaye y inýengna imojtsëbaye.

<sup>6</sup> “Chë nduiño cabá canya ibojtsábojamna jíchmuama: cachabe bonshana uaquiñá. Cabana, cha ibojichmua y mëntšá yojtsejuabnaye: ‘Atšbe uaquiñá cocayé mochanjóyeunaye ca.’

<sup>7</sup> Pero chë arrëndayënga cha imojinye ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbangá, y lempe chabe otocana soyënga bëngbiana echanjoquéda ca.’ <sup>8</sup> Chcasna, cha imojishache, imojtsóba y chë uvas betiyënga jajañentšana más chcoye imojetsëtšena ca” —Jesús tojancuentá.

<sup>9</sup> Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjetsëbaye, y inye trabájayënga chë uvas betiyënga jajañe echanjárrendaye.

<sup>10</sup> “¿Tsëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtšbé,

mora chë más bëtš uashacuanëšentše entsejájona.

<sup>11</sup> Chë soye Bëngbe Utabná, Bëngbe Bëtsá chca tojama, y bënga chama ojanánënga fsëntsemna ca.”

<sup>12</sup> Chora, chë bachnangbe amëndayënga y chë bëtšëjemëngcá mándayënga tmojánbošena Jesús jishachana, er chënga tmojanenótatšëmbona cha chca tojancuentá jinýanýiyama chënga mo chë puerta bacna trabájayëngcá imojanmënana. Pero entšangbiana imojtsauatja, chíyeca cachcá tmojanonýa y chentšana imojtsóñenga.

*Chë Romoca bëtš mandadbiama impuesto jtsatsquëcjnyama**(Mt 22.15-22; Lc 20.20-26)*

<sup>13</sup> Chentšana chënga, básefta fariseunga y Heródesbe ústonënga Jesús bioye tmojanichamó, ndayá cha tojayaníñe jisháchichiyama, as chca jtsebmomna ndaye sóyeca mandadëngbeñe cha mal jaquédana. <sup>14</sup> Chënga tmojána y Jesús tmojaninyana: —Buatëmbayá, bënga fsëndëtátšëmbo aca ndegombre soyënga cnetšabuátambama, y ndoñe jatuenanana nye ntšamo entšanga tmojatichamcá, er acbiana tondaye quenatámama nda más uamaná o nduamaná tomnana; y contšabuátambá ndegombre tsábe vida jtsebmomna, ntšamo Bëngbe



Bětsá yomandacá. Chcasna, ěťšabá tanántsemana, César, chě Romoca běts mandadbiama bēnga impuesto ěťsatsquēcĵnayana? ěFchtsatsquēcĵnaye o ndoñe ca? —chēnga tmojantĵá.

<sup>15</sup> Jesús yojťsetátšēmbō, chēnga bacna entšanga ntšamo ndegombre tmojuabnacá nd-inĵinĵnayēnga imojamnama; chíyeca tojanēyana: —ěNdáyeca tšēngaftanga šmojtseboše chě soýeca atše ĵisháchichiyama? Canĵe denario crocénana šmiĵēboñe, atše chayobená ĵinĵyama ca.

<sup>16</sup> As canĵe crocénana tmojanoyé y Jesús tojanēyana: —ěNdabe ĵubiá quem crocenáníñe yojťsemna, y ntšamo muentše entsabemancá nda chca iuabaina ca?

Y chēnga tmojanjuá: —Césarbe ĵubiá; cha chca enduabaina ca.

<sup>17</sup> Chora Jesús tojanēyana: —Chcasna, César šmoctoyiye cha ibotocana soye; y Bēngbe Bětsana cha ibotocana soye ca.

Y nĵetscanga chama imojenĵnaná.

### *Obanēnga ĵtayanama Jesús tmojantĵá*

(Mt 22.23-33; Lc 20.27-40)

<sup>18</sup> Chentšana, báseftanga saduceo ca uabaina entšanga tmojána Jesús ĵinĵyama. Chēnga imojanjuabná obanēnga ndocna te ntayenana ca. Chíyeca, Jesús mēntšá tmojaniyana:

<sup>19</sup> —Buatēmbayá, Moisés toĵěťsanabema, nderado canĵe boyá toĵóbana y básenga ndoñe ntĵěťsabásheĵuanēsna, canmēna chě uabentšá chě shémaftaca ĵtobouamayana, chca, chabe uabočená obanabiama básenga ĵtsabamnama ca. <sup>20</sup> Y chcase, canĵe, canĵsēfta catšátanga monjamna. Chě natsaná tonjanobouamá y tontsanóbana básenga ntĵěťsabasheĵuancá. <sup>21</sup> Chentšana, chě ústona uabentšá chě shémaftaca tonjanobouamá, pero chana tontsanóbana, básenga ntĵěťsabasheĵuancá; chě inĵe uabentšáftaca cachcá tonjanopasá. <sup>22</sup> Chca, nĵetsca canĵsēfta catšátangaftaca cha tonjanobouamá, pero ndocná básenga ntĵěťsabásheĵuanana. Y chentšana chě shembásanaca tontsanóbana. <sup>23</sup> Y morna, chě obanēnga chamojtayena ora, ěndabe chě canĵsēfta catšatanguentšabe shema chě shembása yochťsemna, nĵetscanga cháftaca tmojanobouamase ca? —chēnga tmojantĵá.

<sup>24</sup> As Jesús tojanēyana: —Ntšamo Bēngbe Bětsabe uabemana palabrēnguñe endayancá ndoñe tcmojosertá, ni Bēngbe Bětsabe obenanama. Chíyeca ntšamo ndoñe yondmēncá šmontsichamo. <sup>25</sup> Er obanēnga chamojtayena ora, ni boyabásenga ni shembásenga quemochatóbouamnaye, y chca, chēnga mochántsemna mo celoca angelotemēngcá. <sup>26</sup> Y chě obanēnga ĵtayanama, ěMoisesbe librěšañe ndoñe šmēndualía ntšamo Bēngbe Bětsá tbojaniyanama, chě betiyetema yojťsángbototjuana ora? Bēngbe Bětsá mēntšá tbojaniyana: “Atše sēndmēna Abraham, Isaac y Jacobēbe Bětsá ca.” <sup>27</sup> Bēngbe Bětsá chca tojánayana ora, entsichamo cha ndoñe yondmēna obanēngbe Bětsá, sinó aina entšangbe Bětsá ca, er masque chēnga tmojanóbana, chēnga cabá Bēngbe Bětsáftaca mondoyena. Tšēngaftanga canĵe ndoñe ndegombre soyiñe šmontsemna ca —tojanēyana.

### *Chě más běts uámana mando*

(Mt 22.34-40)

<sup>28</sup> Chentše yojťsemna canĵe ley abuatambayá. Cha yojouena ntšamo Jesús y chēnga imojťsenatsěťsnayana, y yojťsetátšēmbō Jesús tšabá tojanējuama. As, tojanobeconá y Jesúsbioye tbojantĵá: —ěNdayá chě más běts uámana mando yomna ca?

<sup>29</sup> Y Jesús tbojanjuá: —Chě más uámana mando mēntšá endmēna: “Israeloquēnga šmochoĵouena, Utabná, Bēngbe Bětsá endmēna, y nĵe canĵe Bēngbe Utabná endmēna, ndocná más. <sup>30</sup> Utabná Bēngbe Bětsá cochtsebobonshana nĵets acbe ainánaca, nĵets espírituca, nĵets juábnaca y nĵets añēmoca.” <sup>31</sup> Y chentšana quem inĵe mándnaca: “Ndēmua entšánaca cochtsebobonshana, ntšamo cach ca cuenobobonshancá.” Ndocna mando quem uta mandama más quenatámana ca —Jesús tojánayana.

<sup>32</sup> Chora, chě ley abuatambayá Jesúsbioye tbojaniyana: —Buatēmbayá, puerta tšabá tcjayana. Ndegombre yomncá contsichamo, nĵe canĵe Utabná endmēna y ndocná más. <sup>33</sup> Y cha ĵťsebobonshánana nĵets ainánaca, juábnaca y añēmoca, y ndēmua entšánaca ĵťsebobonshánana cachá cuenobobonshancá, puerta cuámana. Cach nĵetšá ndoñe quenatámana bayēnga ĵťsēbánayana, ni chě uátšēmbona soyēnga Bēngbe Bětsá ĵěťschuayama ca.

<sup>34</sup> Cha nĵets juábnaca tbojanjuama Jesús tojáninĵe ora, tbojaniyana: —Batšatema cmontsebuáshbena ĵťseprontánama, Bēngbe Bětsá chacolesenciamana acbe ainanentše ĵťsemándayama ca.

Y chentšana, ya ndocná yonjenñēmua Jesús más jatťťjanayama.

### *ěCristo ndabe entšábentšana yomna?*

(Mt 22.41-46; Lc 20.41-44)

<sup>35</sup> Jesús Bèngbe Bètsabe bèts yebnentše vojtsabuátambaye ora, tojánayana: “¿Ndáyeca chë ley abuatambayënga mondbètsichamo chë Uámana Uabuayaná Davídbentšana iuabó ca?” <sup>36</sup> Cach David, chë Uámana Espíritbe mándoca mēntšá tojánayana:

Bèngbe Bètsá, atšbe Utabná Crístbioye tbonjaniyana:

atšbe catšbioica mótbema,

atšbe obenánaca, acbe uayayënga acbe cucuatšíñe chamoquedama chjamēntscuana ca.

<sup>37</sup> ¿Ntšámose Cristo Davídbentšana Entšá nántsemna, cach David ‘Utabná ca’ chábioye tbojtsabobuatmēse ca?” —cha tojánéyana.

Y chë bètsá entšanga, oyejuayënga imojtsuenana.

*Jesús chë ley abuatambayëngbiamá tojánayana, chënga ndoñe tsabá montsama ca*

(Mt 23.1-36; Lc 11.37-54; 20.45-47)

<sup>38</sup> Mēntšanaca Jesús chënga vojtsabuátambaye: “Cuedado šmochtsebmna y ndoñe šmattsama chë ley abuatambayëngcá. Chënga jtsogusetánana bēñēna entšayangaca jtsajnána y jtsabošana tsáshēñe entšanga nýa respétoca chamotsacheuanama. <sup>39</sup> Chë judiēngbe enefjuana yebnēnguenache, chë más uámana luarēnguñe jtsēbiámanana, y chë fiestēnguenache nýa quēfseroca. <sup>40</sup> Pero chënga, viudángbioye chë tmobomna soyēnga jtsabacayana, y entšangbe delante tsabá chamotsēñyama, y chēngbioye imojtsaíngñama ndoñe chaondētsótatšēmbuamna, Bèngbe Bètsáftaca tša jtsencuéntayana. Chë causa, Bèngbe Bètsá inýēngbiamá más chënga echanjácastigaye ca” —Jesús tojánayana.

*Jesús vojtsēñyaye chë crocénana quēcjnayënga*

(Lc 21.1-4)

<sup>41</sup> Jesús jabuatambama tojanpochocá ora, tojanótbema Bèngbe Bètsabe bèts yebnentše, chë crocénana quēcjnayētema ndirichíñe; y chë crocénana quēcjnayënga vojtsēñyaye. Bètsá bomnēngna becá crocénana imojtsequēcjnaye. <sup>42</sup> Chora, canýe viudá ndbomnējēmnaca vojbeconá y nýe uta crocénana chētēmiñe yojafstsegóra. <sup>43</sup> Chora Jesús chabe uatšjēndayënga tojánachembo chamobéconama, y mēntšá tojánéyana: “Ndegombre cbéyana, quem viudá ndbomnējēma, Bèngbe Bètsabiamá nýetscangbiamá más tonjēftsesegóra. <sup>44</sup> Chë bomnēngna chë vojtsóyentšjamentšana tmonjēftsesegóra, y cabá bomnana imotsóbmñe; y chë viudana tonjēftsesegóra lempe ntsachetšá yobomncá; masque tša ndbomnējēma, chë vida jtsēbmnamá lempe ntsachetšá yobomncá tonjēftsesegóra ca.”

## 13

*Jesús tojánayana chë Bèngbe Bètsabe bèts yebna lempe mochjánpochocama*

(Mt 24.1-2; Lc 21.5-6)

<sup>1</sup> Jesús Bèngbe Bètsabe bèts yebnentšana tojēfts sanbocna ora, canýe chabe uatsjēndayá tbojaniyana: —Buatēmbayá, minýe, jtsa bèts ndētsbēnga, y tša botamana bèts yebnēnga ca!

<sup>2</sup> Chora Jesús tbojaniyana: —Tsabá cochjinýe tša botamana bèts yebnēnga. Pero muentšē ndoñe queochaisoquédá ni mo canýe ndētsbé inýebé juatsboye. Lempe mochantsepochoá ca.

*Ntsamo yochtsemna quem luare jopochócama te chaojtsobeco ora*

(Mt 24.3-28; Lc 21.7-24; 17.22-24)

<sup>3</sup> Chentšana, Olivos tjšahoye chënga tmojána. Bèngbe Bètsabe bèts yebnentšá ndirichíñe yojamná; y Jesús tojanótbema ora, Pedro, Santiago, Juan y Andrés iytēcana tmojantjá, <sup>4</sup> ntsamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšēmbuama, ndayá Bèngbe Bètsá yochjanma ca.

<sup>5</sup> Chora Jesús tojanējua: “Cuedado šmochtsebmna ndocná chacmondáingñēma. <sup>6</sup> Banga mochanjabo y mochantsabíchamo chënga Jesús imomna ca. Mochántsichamo: ‘Atše chë Cristo sēndmēna ca’, y chca, ba entšanga mochanjáingñaye.

<sup>7</sup> “Entšanga tmojtsentsjanama y nderado mochjentsjámna tsēngaftanga chašmojouena ora, ndoñe šmattsauatja; er chca chaohnēnguama entsemna, pero masque chca, chora chë quem luare jopochócama tempo cabá ndoñe queochátsmēna. <sup>8</sup> Canýe luarentša entšanga inýe luaroca tošanangftaca mochántsentsjanaye, y canýe amēndayábentša entšanga inýe amēndayábioca entšangftácnaca; ba luarēnguenache fshantse echanjuangmēmēna y bèts shēntsana echanjóshjango. Masque chca jasúfriase, más chcoye cabá más mochanjatssúfria.

<sup>9</sup> “Pero tsēngaftangna cach tsēngaftangbiamá šmochtsantješna; entšanga cmochanjishēche y amēndayēngbe cucuatšíñe cmochanjábashejuana, judiēngbe enefjuana yebnēnguenache cmochanjátsetšenaye. Atšbe ústonēnga bētemna causa, mandadēngbioye y reyēngbioye cmochanjunatse, choca, chēngbe delante ntsamo atšbiamá šmotatšēmbcá chašmuayanama. <sup>10</sup> Er entseyta, quem luare cabá ndopochóca ora, Bèngbe Bètsabe tsabe noticiēnga nýetsca luarēnguentsá entšángbioye chaóshjanguama. <sup>11</sup> Y inýēngbe

cucuatsiñe jabáshejuanama chacmojtsënachá ora, ndoñe šmattsenócochinýena ntšamo chora šmochjayanama. Chora šmochjayana ntšamo Bëngbe Bëtsá yochjamcá tsëngaftanga chašmuayanama, er tsëngaftanga cánýenga ndoñe chora quešmochátóyebuambnaye, ndayá chë Uámana Espiritu tsëngaftangbiajana echantsóyebuambnaye.

<sup>12</sup> “Canýe catsata cachabe catsata inýengbe cucuatsiñe bochanjáboshjona chamotsóbama, y bëtsétsanga cachënge básenga mochanjábashhejuana chamotsëbáyama; y chë básengna chënge bëtsétsangbe contra mochántsemna y chamotsëbáyama mochanjábashhejuana.

<sup>13</sup> Atšbe ústonënga bëtsemna causa, nyëtsca luarënguentša entsanga cmochantsëbuayënja; pero nda nyëts tempo átšbeñe ošbuachiyá totsomñe, atsboaná echántsemna.

<sup>14</sup> “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojëftsanabema. Chë puerte uabouana soye, chca jtemnana inýoca tsëngaftanga chašmojinýe ora (nda tojtsalía, chabosertá), šmochántsetatšëmbo chë puerte ngmënana tempo tojóshjanguama; chorna, chë Judeoca chamojtemna entsanga, batsjabengoye chamotsacheta; <sup>15</sup> chama, nda cachabe yebnentša tsbanánoca chaotjsemna, chocana ndoñe chaondétastjango, ni chaondétamashëngo tsoicana ndayá jesábocnama; <sup>16</sup> y nda jajoca chaotjsemna, yebnoye ndoñe chaondéta ni mo chabe quëfsaiya jesácñama. <sup>17</sup> ¡Tša lastema chë tempo ngomámanënga o ochóchaye šešonga chamojtsabamna shembásengbiamal! <sup>18</sup> Bëngbe Bëtsá šmochtseimpadana chë ngmënana tempo ndoñe chaondóshjango uaftena tempo ora, <sup>19</sup> er chora puerte ngmenancá echántsemna. Tša jabuache ngmenancá, quem luare jobojátšama orscana y mentscoñama y más chcoye, cachcá ngmënana ndoñe ntjamnana. <sup>20</sup> Chë puerte ngmënana tempo, yapa bën ndoñe chaondétsemnana Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabanýeshanayeca, echanjama yapa bën tempo ndoñe chaondétsemnana.

<sup>21</sup> “Chora nderado nda chacmojáuyana: ‘Minýe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. <sup>22</sup> Er mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chënge obenana jinýanjíyama, entsanga jáingñama, y tmojobenase, chë Bëngbe Bëtsabe bocacánëngnaca. <sup>23</sup> ¡Cuedado šmochtsebmoma! Cabá chca ndochñëngo ora, lempe tcbonjabuayená ca” —Jesús tojanéyana.

*Bëngbe Bëtsá Entšá tojanbemá quem luaroye echanjésabo  
(Mt 24.29-44; Lc 21.25-36)*

<sup>24</sup> Mëntsánaca Jesús tojanéyana: “Pero chë tempo, entsanga puerte chamojasufri chentšana, shinýe ndoñe queochátšbuashinýinýana, juashcona ndoñe queochátšbinýnaye, <sup>25</sup> celocana estrellënga echanjatquécjana, y quem luarentša tsbanánoca espíritënga obenana bomnënga echanjángmëmmana. <sup>26</sup> Y chora, entsanga mochanjinýe, Bëngbe Bëtsá Entšá tojanbemá jantšetëshiñe echántsaboye, corente obenánaca y corente buashinýinýaniñe. <sup>27</sup> Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nyëts luarëngocana, quem fshantsoca cánýoica juachoicana, celoca inýoica juachóntsoñe.

<sup>28</sup> “Chë higo betiyama šmochjuajinýe: Tsëm buacuafjënga tojtsebmoma ora y tojt-saisëjotsana, jtsotatšëmbuana chë tsabe tempo ya tojtsaisobecuama. <sup>29</sup> Cachcá, chë soyënga ndayama tsëngaftanga tcbonjauyancá chašmojinýe ora, šmochántsetatšëmbo Bëngbe Bëtsá Entšá tojanbemá ya jésabama yojtsemnana. <sup>30</sup> Ndegombre chëyana, lempe chca echanjochñëngo, morsca entsanga cabá ndóbana ora. <sup>31</sup> Celoca y quem luare echanjopochóca, pero atšbe palabra ndocna te queochaisopochóca.

<sup>32</sup> “Pero Bëngbe Bëtsá Entšá tojanbemá ndayté y ntseco ora yochjésabama, ndocná quenátstatšëmbo, ni chë celoca angelënga, ni Bëngbe Bëtsabe Uaquiñá. Nyë chë Taitá chama yotátšëmbo.

<sup>33</sup> “Chíyeca, cuedado šmochtsebmoma y yejuana šmochtsantješna, er ndoñe quešmátstatšëmbo mocna ora yochtsemna Bëngbe Bëtsá Entšá tojanbemá jésabama tempo. <sup>34</sup> Echántsemna mo canýe entsácá; chana inýe luaroye ya jëftsebmocna ora, chabe oservënënga jëftsamëndana chabe yebna chamotsinýenama. Cada ona canýe trabajo jëftsebmónýiyana, y chë shanyá jëftsemándana botamana chaotsantješnama. <sup>35</sup> Chcasna, cuedado šmochtsebmoma, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatšëmbuana, mo nderado jétatana, tsëntseto ora, binýanoye o cachëse, tsëngaftanga cachcá, Bëngbe Bëtsá Entšá tojanbemá ntseco jésabama ndoñe quešmátstatšëmbo; <sup>36</sup> ndoñe cuedado šmontsebmomñëse, nderado cha nyë ndeolpe nántashjango, tsëngaftanga ndëprontánënga šmojtsemna ora, mo ftsomañe cuenta. <sup>37</sup> Chíyeca, ntšamo tsëngaftanga cbochanjauyancá, nyëtscanga chanjáuyana: ¡Puerte cuedado šmochtsebmoma ca!” —Jesús tojanayana.

## 14

*Entsanga imojtsejuabnaye ntšamo jaměse Jesúš jishachama*

*(Mt 26.1-5; Lc 22.1-2; Jn 11.45-53)*

<sup>1</sup> Bashco fiestama uta te yojetsájamna, chě Běngbe Bětsá Egiptocana judiěngbe běts taitanga tojánatsebacama jtenójuaboyama fiesta, chě levadúraca nděpormana tanděse sayora. Chě judiěngbe bachnangbe aměndayěnga y chě ley abuátambayěnga imojtsenguaye ntšamo Jesúš jishachana jtseingnase, y jtsóbama. <sup>2</sup> Báseftanga imojtsichamo: “Quem fiestěntscuana ndoñe, er nderado entsanga yapa muanjontša enboudenana ca.”

*Canye shembása botamana uanguěise bėjaye Jesusbe bestšašine tbojanbuescja*

*(Mt 26.6-13; Jn 12.1-8)*

<sup>3</sup> Jesúš Betanioca yojtsemna, Simón chě bacna nguayanánaca šocá ca uabobuatmabe yebnentše; mesěshentše Jesúš yojtsemna ora, canye shembása tojánashjango. Chě shembása yojúshjango canye alabastro jarrětema jútjena canye becá uámana y botamana uanguěise bėjayeca, ena nardana uanguěsiye; chana chě jarrětema yojátsba y chě bėjaye Jesusbe bestšašine tbojanbuescja. <sup>4</sup> Chca tmojáninye ora, báseftanga chentše imojtsemnėnga tmojanotjayaná y měntšá imojtsenatsěsnaye: —¿Ndáyeca nye bonamente chě soye yojtsemna ca? <sup>5</sup> Chamna, matmėnjobenanga chě bėjaye unga patse denario crocėnánama juiyana, y chánaca ndbomněmėnga matmėnjújabuache ca.

Y chě shembásabiama podesca imojtsichamo.

<sup>6</sup> Chora Jesúš tojaněyana: —¿Ndáyeca quem shembása ndoñe cachcá šmochanjonjaye ca? ¡Ndocá matatsana! Atšbiama tšabe soye tonjama. <sup>7</sup> Er ndbomněmėnga nýets tempo tšěngaftangbeñe mochanjěftsemna, ndaytėnaca šmojábošena ora, šmatjobenaye tšabe soye chěngbiama jamana; er atše tšěngaftangafata ndoñe nýets tempo quicháisemna. <sup>8</sup> Quem shembása lempe ntšamo tojobenacá atšbiama tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná sěntsemna ora. <sup>9</sup> Ndegombre cběyana, quem luaroca ndayěntšnaca Běngbe Bětsabe tšabe noticiěnga chamojtsabuayiná chentše, ntšamo quem shembása tojamámnaca becá mochanjěftsóyebuambaye, chca, entsanga chabiama chamotsenójuabnana ca —cha tojaněyana.

*Judas tojána bachnangbe aměndayěngbiye, Jesúš chamuishachama*

*(Mt 26.14-16; Lc 22.3-6)*

<sup>10</sup> Chentšana, Judas Iscariote, canye chě bnětsana uta uatsjendayěnguentšá, tojána chě bachnangbe aměndayěngaftaca jencuéntama, Jesúš chěngbe cucuatšine jaboshjonama. <sup>11</sup> Chca tmojanuena ora, chěnga imojóyejuaye y tmojansbuachená crocėnana jtabuėnayana. Y cach orscana Judas yojtsenguaye ntšamo jamana y ndėmua ora, Jesúš chěngbe cucuatšine jaboshjonana.

*Jesús chabe uatsjėndayěngaftaca Bashco saná tojanse*

*(Mt 26.17-29; Lc 22.7-23; Jn 13.21-30; 1 Co 11.23-26)*

<sup>12</sup> Chě Bashco fiesta bojatsenté, chě levadúraca nděpormana tanděse sayté, chě uatsjėndayěnga Jesúš tmojantjá: —¿Ndėmoca cojtseboše bėnga fchaiprontama, Bashco saná chacosama ca?

Chca te chě judiěnga imojanamana, Běngbe Bětsá jětschuayamna canye oveshá jóbana chora jasama, chě Egiptocana chěngbe běts taitanga Běngbe Bětsá tojánatsebacama jtenójuaboyama.

<sup>13</sup> As Jesúš uta chabe uatsjėndayata tojanichamó y měntšá tojaněyana: —Chě běts puebloye motsata. Chašojášhango ora, canye bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndėmuanye yebnentše yochjámarshėguama; <sup>14</sup> y chě yebna nduiño šochjauyana: “Buatěmbayá tonjajana: ¿Ndayentše chě tsañe yojtsemna, Bashco saná atše atšbe uatsjėndayěngaftaca jasama ca?”

<sup>15</sup> As cha cmochanjínjanjaye canye běts tsañe, tsbanana pisoca, lempe prontániñe; chentše šochjapronta bėnga mochjasama ca.

<sup>16</sup> As chě uatsjėndayata tbojána y tbojáninjena lempe ntšamo Jesúš tojaněyancá; y chentše chě Bashco saná tbojanprontata.

<sup>17</sup> Tojanibėtata ora, Jesúš chě yebnoca tojánashjango, chabe bnětsana uta uatsjėndayěngaftaca. <sup>18</sup> Y mesěshentše imojtsesaye ora, Jesúš tojaněyana: —Ndegombre cběyana, canya tšěngaftanguentšá, átšeftaca entsesá cha, uayayěngbe cucuatšine sochanjáboshjona ca.

<sup>19</sup> Chorna chě uatsjėndayěnga ngmėnaca imojtsemna, y tmojanontsé canyánja cha jatjajana: —¿Atše chtsemna ca?

<sup>20</sup> Y Jesúš tojanějua: —Canya chě bnětsana utatentšá entsemna. Chabe tanděse cach atše sěntsefchecuacná šnenentše cha entsefchecuacná. <sup>21</sup> Ndegombre, Běngbe Bětsá Entšá tbojanbemáftaca echanjopása ntšamo chabiama Běngbe Bětsabe uabemana palabrenguiñe

endayancá. Pero, itša lastema chë bochjáboshjonabiam! Chabiamá más tšabá manjamna ndoñe ntjónjñana ca —Jesús tojánayana.

<sup>22</sup> Imojtsesantscuana, tandëse tojanca, Bëngbe Bëtsábioye chama tbojtanchuá, tojanjataye y chabe uatsjéndayënga tojanëjatá, y mëntšá tojánayana: “Mocñënga, mosënga, atšbe cuerpo entsemna ca.”

<sup>23</sup> Chentšana, canye coptema vínoyeca tojanaca, Bëngbe Bëtsábioye tbojtanchuá, chabe uatsjéndayënga tojanëfšasë, y nyetscanga tmojanofsë. <sup>24</sup> Mëntšá tojánayana: “Quem vínoye atšbe buiñe entsemna. Atšbe buiñe echanjuábuashana entsanga chamotsetatšëmbuama ntšamo Bëngbe Bëtsá entsanga tojašebuachenacá ndegombre yochjochñënguama. Chë buiñe bëtsá entsangbe tšabiam echanjuábuashana. <sup>25</sup> Y ndegombre cbëyana, morscana ya ndoñe más chë uvasëšentsana obocniye quichaisofsiye. Chë tšëm vínoye tšëngaftangaftaca chanjofsiye, Bëngbe Bëtsabe amëndayoca chamojtsemna ora ca” —tojánayana.

*Jesús tojánayana, chábioye ndoñe bonjanabuátma ca Pedro yochjányanamá*  
(Mt 26.30-35; Lc 22.31-34; Jn 13.36-38)

<sup>26</sup> Bëngbe Bëtsábioye jëtschuyama tmojancantá chentšana, Olivos tjashoye tmojëfšsanbocana. <sup>27</sup> Jesús tojanëyana: —Nyetsca tšëngaftanga quem ibeta átšbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrënguñe, cha mëntšá tojánayana: “Chë oveshënga abujëñjñ chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora. <sup>28</sup> Pero obanënguentsana chaitayenentsana, tšëngaftangbe natsana Galileoye chanjá ca —cha tojanëyana.

<sup>29</sup> Chora Pedro tbojanianyana: —Masque nyetscanga ábeñe ošbuáchiyana chamotsobuetše y chamotsacheta, atše nña ndocna te ca.

<sup>30</sup> Chora Jesús tbojanianyana: —Ndegombre cbëyana, cam ibeta, ngallo cabá uta soye ndëcánta ora, aca unga soye cochanjyana ndoñe šcondubuatma ca.

<sup>31</sup> Pero Pedro más yojtsichamo: —Masque chašotsemna ácaftaca jóbanama, atše ndoñe quichátayana ndoñe chonduabuatma ca.

Y nyetscanga cachcá imojtsichamo.

*Getsemaní luarentše Jesús, Bëngbe Bëtsáftaca tbojanencuentá*  
(Mt 26.36-46; Lc 22.39-46)

<sup>32</sup> Chentšana, canye luare Getsemaní ca uabáinoye tmojána. Chocna Jesús tojanëyana: “Muentše motbiam, chëntscuana atše choye chanjá, Bëngbe Bëtsáftaca jencuëntama ca.”

<sup>33</sup> Y tojëfšsanëbiatše Pedro, Santiago y Juan. Choca cha yojóntša puerta ngménaca jtsemnama y corente cochsetšenaná. <sup>34</sup> Chëngbioye tojanëyana: “Atšbe ainaa puerta ngménaca entsemna, mo jobanamacá. Muentše moqedanga y šmochtsefšna ca.”

<sup>35</sup> Chentšana, Jesús más natsanoye tojána, tojanoshëntsamentšë y fshantsóntscoca tojanotsejbéna y Bëngbe Bëtsábioye tbojanimpadá, jopódianëse, chë tša japadésa ora ndoñe chaondóshjanguama. <sup>36</sup> Mëntšá yojtsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondëtsemnama. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

<sup>37</sup> Chentšana, chabe unga uatsjéndayëngbioye tojtanabo, y chëngna imnétsomañe. Chca tojánanñena ora, Pédrëbioye tbojanianyana: “Šimón, ¿cotsomañe? ¿Ni mo nñe canye hora jtsefšnama ndoñe tconjobená? <sup>38</sup> Smochtsefšna y Bëngbe Bëtsáftaca šmochtsencuëntaye, bacna soye jamana ndoñe chacmonódocochënguama. Tšëngaftanga ndegombre šmontseboše espíritoca Bëngbe Bëtsá joyeunayana, pero cuerpiñe ndoñe añemo quešmátsbomma ca.”

<sup>39</sup> Jesús cachiñe tojesaná y Bëngbe Bëtsáftaca tbojanencuentá, cach palabrënga jayanëse. <sup>40</sup> Yojtabo orna, chë uatsjéndayënga cachiñe imnétsomañe; chënga imojtsefšhëta ocnaye causa, y ndoñe imontsobena ntšamo jojuana.

<sup>41</sup> Chentšana, tojtesaná y tojtanabo ora tojanëyana: “¿Cabá šmotsomañe y šmotsochnañe? Nñe nyetšá; hora tocjobuache, Bëngbe Bëtsá Entšá tbojanbemá bacna soye amëngbe cucuatšñe mochanjáboshjona. <sup>42</sup> Motsbananga, cuajna. Minyënga, atše boshjuaná ya entebeconá ca.”

*Uayayënga Jesús tmojánishache*  
(Mt 26.47-56; Lc 22.47-53; Jn 18.2-11)

<sup>43</sup> Jesús cabá yojtsóyeuambnantscuana, Judas, canye chë bnëtsana uta uatsjéndayënguentsá, tojánashjango y cháftaca ba entsanga espadëjangaca y ngarotbëngaca prontánënga. Chënga imojamna chë bachnangbe amëndayënga, ley abuatambayënga y judiëngbeñe bëtsëjemëngcá mándayëngbe ichmónënga. <sup>44</sup> Judas, chë boshjuaná, tojanjuabó ntšamo jamana entsanga jinñanñiyama ndëmua Jesús bëtsemnana. Chíyeca, yojáuyana:

“Nda chajauámocho, cha echántsemna; šmochjishache y cuedádoca šmochjuánatse ca.”  
<sup>45</sup> Chcasna, judas Jesúsbioye tojanobeconá y tbojanianana: “¡Buatëmbayá ca!”

Y tbojanámocho. <sup>46</sup> Chora chë entsanga tmojánishache y tmojanánatse.

<sup>47</sup> Pero canya chentše Jesúseftaca yojtsemná, chabe espadéja yojenosëngbotëntšena, y chë bachnangbe más uámana amëndayabe oservená canye matscuaše tbojtsanëštjango.

<sup>48</sup> Y Jesús chë entsanga tojanatjá: “¿Ndayeca šmojabo espadëjanga y ngarotbéngaca atše jishachama, mo atše canye bacá uamana entsá cuaftsemncá ca?” <sup>49</sup> Atše cada te tsëngaftangbeñe sëndëtsemna Bëngbe Bëtsabe bëts yebnoca abuátambaye, y ndocna te choca chešmánishache. Pero tsëngaftanga chca átšeftaca šmontsama, cachcá ntšamo Bëngbe Bëtsabe uabemana palabrénguifne endayanca chaotsemnana ca” —tojánayana.

<sup>50</sup> Chorna, nyetsca uatsjëndayënga tmojtsanëuatjaná y tmojtsanacheta, y Jesús cachcá chë uayayëngaftaca tmojesanonýa. <sup>51</sup> Canye bobontse Jesúsbioye ibojtséstoná, nye canye uafjantse entšëjua uichëtjoná. Cha chë entsanga tmojánishache, <sup>52</sup> pero chëngbe cucuatšifne chë entšëjua jesáboshjonëse, chë bobontsna enasá yojtsachá.

*Jesús tmojanánatse chë judiëngbe uámana amëndayëngbioye  
 (Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup> Chentšana, Jesús tmojanánatse chë bachnangbe más uámana amëndayábioye; y chocna, nyetsca chë bachnangbe amëndayënga, bëtšëjemëngcá amëndayënga y ley abuátambayënga tmojanenëfjna. <sup>54</sup> Pedro bënocana Jesús tbojanasto, chë bachnangbe más uámana amëndayabe yebnentsá chashjónscoñe; y chentše tojanocuéda. Chë Bëngbe Bëtsabe bëts yebnoca josticiëngaftaca yojtsetbemana; ifne juachaca yojtsešbonena.

<sup>55</sup> Chë bachnangbe amëndayënga y chë judiëngbe uámana mándayënga imojtsenguaye canya, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninýana. <sup>56</sup> Er masque banga Jesusbe contra uayátsenaye soyënga imojtsichamo, nyetscanga ndoñe cachca soye montsanichamo.

<sup>57</sup> Báseftanga imojtsaye y mentsá Jesusbe contra, ndoñe ndegombre betsemncá tmojánayana: <sup>58</sup> “Bënga cha fsënjoyeuná mentsá: ‘Atše quem Bëngbe Bëtsabe bëts yebna, entsangbe pormana yebna, chantsepochoá; y unga tese inye Bëngbe Bëtsabe bëts yebna, entsángbeyeca ndëpormana yebna chanjëtsebo ca.’”

<sup>59</sup> Pero masque chca imojtsichamo, nyetscanga ndoñe cachca soye montsanichamo.

<sup>60</sup> Chorna, chë bachnangbe más uámana amëndayá yojtsbaná, nyetscangbe tsëntsaca yojotsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë ache contra montsichamo soye ca?

<sup>61</sup> Pero cha nye itýeca yojtsemna y ndocá ibontsëjuana. Chë bachnangbe más uámana amëndayá cachiñe tojtëtantjá, mentsá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

<sup>62</sup> Y Jesús tbojanjuá: —Arseñor, atše cha sëndmëna; y tsëngaftanga šmochanjinýe, atše, Bëngbe Bëtsá Entšá tbojanbemá, chë nyets obenana bomnabe catšbioica chantsetbemana, y celoca jantšëtëshiñe chántsaboye ca.

<sup>63</sup> Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ndayama más entsanga šochjátëjaboto Jesusbe contra chamuayanama ca? <sup>64</sup> Tsëngaftanga šmonjouena ntšamo chë entsá entsichamcá, y chca Bëngbe Bëtsabiama entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tsëngaftanga šmatjayana ca? —cha tojanëyana.

Y nyetscanga tmojánayana, cha ndegombre bacna soye yojtsebomna y jóbanama ibojtsemna ca.

<sup>65</sup> Chorna báseftanga tmojanontsé Jesús buashëtjanayana; jubiá imojútsbotse, imojtsejantšetaye y imojtsetjanaye: “¡Momalisiá nda tcmënjajantšetá ca!” Y chë Bëngbe Bëtsabe bëts yebnoca josticiëngna imojtsajuebiantšetaye.

*Pedro tojánayana Jesúsbioye ndoñe bonjanabuátma ca  
 (Mt 26.69-75; Lc 22.56-62; Jn 18.15-18, 25-29)*

<sup>66</sup> Pédrëna, tsmánoca yojtsemna chashjoca. Chora, canye shembása, chë bachnangbe más uámana amëndayabe oservená yojáshjango; <sup>67</sup> y Pédrëbioye tbojáninýe ora, cha ifne juachaca yojtsanšbonena, yejuana ibojonýinýiye y tbojanianana: —Acnaca, Jesús Nazaretocáftaca conjánana ca.

<sup>68</sup> Pero Pedro tojánayana chábioye ndoñe bonjanabuátma ca; y mentsá tojánayana: —Ndayama cojtsichámuama ndoñe quetsátstatšëmbo, ni quešnatšesertana ca.

Y shjoye, amashjuanóntscoñe yojábocna; y chora canye ngallo yojacánta. <sup>69</sup> Chë oservená cachiñe Pédrëbioye tbojáninýe y tojanontsé chë inýenga jauyanana: —Muánaca Jesusbe uatsjëndayënguentšá entsemna ca.

<sup>70</sup> Pero chana cachiñe tojánayana Jesúsbiye ndoñe bonjanabuátma ca. Chentšana, chë chentše imojtsemnënga Pedro tmojátaniyana: —Ndegombre aca chënguentšá contsemna; ácnaca Galileocá contsemna ca.

<sup>71</sup> Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stschámëse ca! —y yojóntša júrayana — ¡Atše chë entšá ndoñe quetsatabuatma, ndabiamá tsëngaftanga šmontsatsëtná ca!

<sup>72</sup> Y cachora chë ngallo uta soyama yojacánta, y Pedro yojenójuaboye ntšamo Jesús tbojanianama: “Ngallo cabá uta soye ndécánta ora, aca unga soye cochanjayana ndoñe šconduabuatma ca.” Y tojanontsé enóbošachiyana.

## 15

*Jesús Pilátbiye tmojanánatse*

(Mt 27.1-2, 11-14; Lc 23.1-5; Jn 18.28-38)

<sup>1</sup> Tojanbinyä ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuátambayënga cánÿentše tmojánenefña, nÿetsca chë luarentša más uámama mandayëngaftaca, jenóyeunayama ntšamo jamëse Jesús jóbama. Jesús tmojanëcuëbatsëca y tmojanánatse, y Pilato, chë Judeoca mandadbe cucuatšifne tmojánboshjona.

<sup>2</sup> Pilato Jesúsbiye tbojantjá: —¿Aca chë judiëngbe rey cojtsemna ca?

Y Jesús tbojanjá: —Aíñe, aca ndegombre yomncá tcjayana ca.

<sup>3</sup> Chë bachnangbe amëndayënga bëtscá soyënga Jesusbe contra imojtsichamo; <sup>4</sup> chíyeca Pilato cachiñe Jesúsbiye tbojantjá: —¿Ndocá šcochanjojuá ca? Minÿe; bëtscá soyënga acbe contra montsichamo ca.

<sup>5</sup> Pero Jesús ndoñe más tbonjanjá; chë causa, Pilato ndoñe yontsetátšëmbo ntšamo jajuaboyana.

*Jesús chaóbana ca tmojánayana*

(Mt 27.15-31; Lc 23.13-25; Jn 18.38-19.16)

<sup>6</sup> Cada Bashco fiesta ora, Pilato yojanamana canÿe utamená jëtsboshjonana, ndánaca entšanga tmojuabuayaná. <sup>7</sup> Chë tempo yojamna canÿa Barrabás ca uabainá; cárceloye inautámëna chabe enutëngaftaca. Chëngna entšanga tmojtsanëbaye, mandadëngbe entšangftaca imojentsjaná ora. <sup>8</sup> Chora, entšanga tmojánashjajina y tmojanontsé Pilátbiye jauyanana, ntšamo Bashco fiesta ora jamama yojanamancá chaomama. <sup>9</sup> Y Pilato tojanëjua: —¿Tsëngaftanga šmojtseboše tsëngaftangbe rey atše chjëtsboshjona ca?

<sup>10</sup> Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšifne tmojánboshjonama. <sup>11</sup> Pero chë bachnangbe amëndayëngna entšanga tmojanañemó chamuenbouénanama, Pilato jauyanama chëngbiama Barrabás chabuatsboshjona ca. <sup>12</sup> Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

<sup>13</sup> Y chënga tmojánáyebuachena: —¡Motsecrucificá ca!

<sup>14</sup> Y Pilato entšanga tojanëyana: —¿Ndáyeca? ¿Ntšamo cha tojobuachjanguá ca?

Pero chëngna más añëmoca tmojtëtanayebuachena: —¡Motsecrucificá ca!

<sup>15</sup> As Pilato, entšangftaca tsábá joquédama yojtsebóseyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentšana soldadëngbe cucuatšifne tbojánboshjona, chamocrucificama.

<sup>16</sup> Chentšana, chë soldadënga Jesús tmojanánatse chë mandadbe bëts yebnentša chashjoye, y nÿetsca soldadënga tmojánachembo chamobéconama. <sup>17</sup> Shbuenda uafjatsenga uinÿna entšayá mo reyca tmojanichëtjo; canÿe coronësha tmojanapormá uchmašëfjangaca y tmojanabestšajó. <sup>18</sup> Y chentšana tmojanontsé jachuyana: “¡Baytë judiëngbe Rey cochtsemna ca!”

<sup>19</sup> Canÿe niñëfjaca Jesús bestšasiñe imojtsëtsjanjnaye, imojtsebuashëtjnaye, y chabe delante imojtsofshëntsaméntsenaye. <sup>20</sup> Y chca imnaftsáboyeyuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y pueblo chaboye tmojanánatse jacrucificama.

*Jesús tmojanancrucificá*

(Mt 27.32-44; Lc 23.26-43; Jn 19.17-27)

<sup>21</sup> Chora, canÿe entšá chëjana yojtsatashjauana, Simón ca uabainá, Cirene pueblócá, Alejandro y Rufbe taitá; jajocana yojtsatachnëjuana; y chë soldadëngna imojuatária Jesusbe cruz jëftsocutsayama.

<sup>22</sup> Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”); <sup>23</sup> y tmojanabuiyé vinye mirraca enájuañe, pero Jesús ndoñe yonjuáyëngacñe. <sup>24</sup> Y chentšana tmojanancrucificá; y chabe entšayangamna, tsbanánoye tmojanëtsëna jinÿama ndayá cada ona yochjëtsanácñama.

<sup>25</sup> Cachëse, base mošenana ora Jesús tmojancrucificá. <sup>26</sup> Y chabe bestšaše juatsboicina canye uabemana soye tmojananjo. Chiñe joyétsayana ndáyeca cha tmojancrucificama, mēntsá: MUA CHĚ JUDIĚNGBE REY ENDMĚNA ca.

<sup>27</sup> Y cháftaca útata bacna soye ochjajnayátnaca tmojanacrucificá, canya chabe catsbioica, y ínřana chabe uañicuayoica. <sup>28</sup> Chca cháftaca tmojanma, chaochnēnguama ntšamo Bēngbe Bētsabe uabemana palabrenguñe chabiamia iuayancá, mēntsá: “Y chábioye tmonjáninře mo chē puerte bacna soye amēnguentsá canya cuafsemnncá ca.”

<sup>29</sup> Y chējana imojtsachnējuaña entsānga, Jesús imojtsóyenguaye, imojtsobestšfshanenaye y imojtsatsaye: “¡Aca chē Bēngbe Bētsabe bēts yebna cochtsānenasatajchca y nře unga tese cochtanjebo, <sup>30</sup> cach aca mentsbocá y cruzocana matastjango ca!”

<sup>31</sup> Cachá chē bachnangbe amēndayēnga y chē ley abuátambayēnga imojtsáboyejuana, y chēnga imojtsenatsētsnaye: “Cha ínřēnga tojētsatsebacá, pero cachá jētsbocama ndoñe quenátobena. <sup>32</sup> ¡Chē Cristo, chē Israeloca Rey! ¡Cruzocana chauatastjango, bēnga jinřama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

*Jesús tojanóbana*

(Mt 27.45-56; Lc 23.44-49; Jn 19.28-30)

<sup>33</sup> Nřetsto orscana y las tresētscoñe, nřets quem luare yojtseibétata. <sup>34</sup> Chca orna, Jesús chabe biyañe tojanáyebuachena: “Eloi, Eloi, ¿lema sabactani ca?” (Chca endayana “Atšbe Bētsá, atšbe Bētsá, ¿ndáyeca cachcá scojonyá ca?”)

<sup>35</sup> Chca tmojanuena ora, báseftanga chentše imojtsemnēnga imojtsichamo: “Mouenēnga, chē Bēngbe Bētsabe juabna oyebuambnayá Elías bontsechembuana ca.”

<sup>36</sup> As chora, canya tojanótjajo, untja vínoyeca canye esponjēše tojanfchecuacuá, canye niñēñiñe tojananguēsētjo y Jesúsbioye tojanbeconá chaořsema; y tojánayana: “Cachcá mochjonřaye, er Elías tayochjabo jabátēstjanguama ca.”

<sup>37</sup> Pero Jesusna, jabuache tojanoyó y tojanóbana. <sup>38</sup> Y chē Bēngbe Bētsabe bēts yebnoca yojjónřana entsēřjua tsēntsaca yojtsenájataye, tsbanánocana fshantsoye. Chējua bēñējua inauamna y chē tsatsēntsaca inaujónřana. <sup>39</sup> Chē romano soldadēngbe amēndayá, Jesusbe ndrichiñe yojtsemna; y ntšamo cha tojanobancá tojáninře ora, tojánayana: “¡Ndegombre quem boyabása Bēngbe Bētsabe Uaquiñá yomna ca!”

<sup>40</sup> Básefta shembásēngnaca chentše imojtsemna, bēnocana imojtserreparana; chēnguentsē imojtsemna María Magdalena; María, Santiago chē más basa y Josebe mamá; y Salomé. <sup>41</sup> Chē shembásēngna Jesús tmojanasto y tmojanájabuache cha Galileoca yojamna ora; y ínře ba shembásēngnaca chentše imojtsemna, chē cháftaca Jerusalenoye tmojánanga.

*Jesús tmojanatbontsa*

(Mt 27.57-61; Lc 23.50-56; Jn 19.38-42)

<sup>42</sup> Chē yēřsana ochnayté yojtsēmnayeca, cach te yojánamna saná japróntana chē yēřsana jasama. Ya yojtseibétatana ora, <sup>43</sup> Pilato yojtsemnoye tojana canye boyabása, José ca uabainá, Arimatea pueblócá; cha inamna canye chē luarentša uámana mandayēnguentsá. Cha Bēngbe Bētsábeñe yojtsosbuáchiye y yojanobátmana chabe amēndayana chaóshjanguama. Ndauatjácá Pilátbioye Jesusbe cuerpo tojanotjañe. <sup>44</sup> Pilato yojenjinaná Jesús tša betso yojóbanama; as tojanmandá chē soldadēngbe amēndayá chamuachembo, jatřayama Jesús ya bēn obaná tayojtsemnana. <sup>45</sup> Chē soldadēngbe amēndayana Pilátbioye ibojauyana Jesús ya obaná yojtsemna ca; y as chora, Josébioye tojanlesencia Jesusbe cuerpo chabotsámabñama. <sup>46</sup> Chora, José canye uafjantse lino entsēřjua tojanabuamé, Jesusbe cuerpo cruzocana tojanēstjango, chē lino entsēřjuaa tojanandmaná, y canye cuevēshiñe ndētsbeñe pormánēshiñe tojananjá; chentšana canye ndētsbé tojansjoná, y chē cuevēshoye amashjuanentše tojánachtó. <sup>47</sup> María Magdalena y María, chē José y Santiagbe mamá, tojáninře ndayentše Jesusbe cuerpo tojananjóma.

## 16

*Jesús tojtanayena*

(Mt 28.1-10; Lc 24.1-12; Jn 20.1-10)

<sup>1</sup> Ochneyté tojanopasá ora, María Magdalena, María Santiagbe mamá, y Salomé, botamana uanguētsē bėjaye tmojanabuamé, chíyeca jama Jesusbe cuerpo janētjuama; <sup>2</sup> y tmenguse, chē semana bojatsēntena, cabá cachēse, shinře yojábocna ora, chē cuevēshoye tmojána. <sup>3</sup> Imojtsaye ora imojtsayénatsētsnaye: “¿Chē cuevēshoye amashjuanentša ndētsbé nda bochtsabuajuána ca?”

<sup>4</sup> Pero imojontješiye ora, tmojáninře chē cuevēshoye amashjuanentša bēts ndētsbé, chentšana juanániñe. <sup>5</sup> As chēnga choye tmojánamashjna y choye tmojáninře canye



bobontse bën uafjantse entsëjua uichëtjoná, chë cuevëshentša catšbioica inétsotbemañe; y chë shembásenga imojouatjaná. <sup>6</sup> Pero chë bobontse tojanéyana: “Ndoñe matauatjèngana; tsëngaftanga šmondënguá Jesús Nazaretocá, chë tmonjancrucificá cha. Cha ya tontayena; muentše ndoñe quenátsmëna. Minyënga cha enjëftsejajonentše. <sup>7</sup> Motsajna, y Pedro y chë inye uatsjëndayënga šmochjáuyana: ‘Jesús tsëngaftange natsana Galileoye echanjá. Choca cha šmochanjinye, ntsamo cachá tmojanëyancá ca.’”

<sup>8</sup> As chë shembásenga betscó chë cuevëshentšana tmojésanbocana, er puerte auatjanánënga imojtsemna y ngmëmnyënga imojtsemna; y chë causa, chë soyama ndocná tmonjaniyana.

*Jesús, María Magdalénbioye tbojánebëbocna*

*(Jn 20.11-18)*

<sup>9</sup> Jesús tojanayenentšana, chë semana bojatšenté, Jesús natsana María Magdalénbioye tbojánebëbocna. Tempo Jesús chábertšana canyësëfta bacna bayëjënga tojtanébuacana.

<sup>10</sup> Cha Jesúsbioye ainá tbojáninyëntšana, tojána Jesúseftaca imojánajñënga chama jaúnayama; chëngna ngmënaca y šachénaca imojtsemna. <sup>11</sup> Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninye ca tmojanuena ora.

*Uta ustonata Jesúsbioye tbojáninye*

*(Lc 24.13-35)*

<sup>12</sup> Chentšana, uta ustonátbioye, básefta yebnënga yojamna luaroye ibojétsaye ora, Jesús tojánebëbuacna, mo inya cwaftsemncá. <sup>13</sup> Chora chata tbojésanšhecona chë inyënga chama jacúntama; pero chëngna cach ndoñe ndegombre ca tmojanjuabó.

*Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama*

*(Mt 28.16-20; Lc 24.36-49; Jn 20.19-23)*

<sup>14</sup> Cabana, Jesús chë bnëtsana canye uatsjëndayënga tojánebëbuacna, chënga imojt-sesaye ora; y tojanécácana chë cha ainá yojtsemnama ndoñe ndegombre yontsemna ca tmojanjuaboma y nyëts ainánaca chábeñe ndoñe montsanošbuachema, er cha ainá tmojáninyënga chama tmojanacuntá ora, chca ndoñe ndegombre yontsemna ca chë uat-sjëndayënga tmojánayana.

<sup>15</sup> Chentšana Jesús tojanéyana: “Nyëts luarëngoye motsajna, y nyëtsca entsánga chë tsábe noticiëngama šmochtsabuayiynaye. <sup>16</sup> Nda chiñe chaojtsošbuaché y tsëngaftanga chašmojuabaye, cha atsbocaná echántsemna; pero nda ndoñe tontsošbuaché, cha nyëts tempo castiganá echántsemna. <sup>17</sup> Chë átsbeñe ošbuáchiyënga ndegombre soyënga imojtsabuayiynama, entsánga mentsá mochántsetatšëmbo: atše jótšëmbonëse, átsbeñe bet-sošbuachéyeca, entsángbentšana bacna bayëjëngbe juabna mochántábocna; tempo chënga ndmabiyañe mochantsóyebuambnaye. <sup>18</sup> Masque nderado cucuatšinë mëtšcuayënga tmojishache o veneno tmojofšenga, ndocá quemochatšpása; y šoquëngbeñe cucuatšënga chamotjacjá ora, chënga shnánënga mochántatsmëna ca” —Jesús tojanéyana.

*Jesús Bëngbe Bëtsábioye tojtaná*

*(Lc 24.50-53)*

<sup>19</sup> Bëngbe Utabná Jesús jóyebuambayama tojanpochocá chentšana, celoye cha tmojtanatš-baná, y uámana luarentše, Bëngbe Bëtsabe catšbioica yojtótbema jtsemándayama. <sup>20</sup> Y chë uatsjëndayëngna tmojánbocana y Bëngbe Bëtsabe soyëngama nyëtsquénache entsánga tmojanabuayená. Cach Bëngbe Utabná chënga yojanëjabuáchana, y yojánama entsánga chamotsetatšëmbuama chë buayenana soye ndegombre Bëngbe Bëtsabe soyënga bétsemnama, chë uatsjëndayënga bëtš soyënga jamama obenana chamotsebomnama cha jtsamëse.

## San Lucas

### *Jabojátsama*

<sup>1</sup> Ba ents'anga Jesusbe historia tmojuábema, ntšamo b'ngbeñe ndegombre tojopasacá. <sup>2</sup> Chê historia juabemamna, ch'enga tmojanuena ntšamo Jesusbe uatsjéday'enga y in'ye ents'anga chabiama innencuentaycá. Chê ents'angna tmojánin'ye y tmojanuena ndayá Jesús tojanmama y ntšamo tojanayancá, y chents'ana chabe ts'abe notici'enga ents'angbioye tmojanabuayená. <sup>3</sup> As, átšnaca s'enjontsé cuedádoca juanotici'ana lempe ntšamo Jesusbiam imojtsichamcá, tojanobojatšents'ana m'ents'coñe. Mora šontsin'jana ts'abá yojtsemna achiam juabemana ntšamo ndegombre yomncá, uamana taitá Teófilo, ch'ê t'ijuanoticiá soy'engama, ntšamo ndegombre b'ngbeñe tojopasacá. <sup>4</sup> Ba soy'enga Jesusbiam tcmo-jabuát'embanga, y atše s'entseboše aca chacotsetátš'ẽmbo, ntšamo tcojouencá ndegombre yomnama.

### *Can'ye ángel tojanabuayená Juan ch'ê Ubayaná jón'ynama*

<sup>5</sup> Herodes Judea luaroca rey inamna ora, yojamna can'ye judi'engbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojan-abaina, y chana Aarónbents'ana ents'á inamna (Aarón, ch'ê m'as uamana bachnangbe natsana am'endayá). <sup>6</sup> Chatna ts'abá amata ibnamna B'ngbe B'etsabe bomini'ñe, y ntšamo B'ngbe B'etsá yomandacá ibojoyena; y chca, ndocná yonjanobena jayanana chata ndoñe ts'abá ibonjánama ca. <sup>7</sup> Básenga tondaye ibonjánabamna, Isabel šesona jtsebmomna ndobena causa, y chatna ya b'etsanánata ibojtsemna.

<sup>8-9</sup> Chê bachnanga B'ngbe B'etsabe b'ets yebnentšẽ tmojtsoservena ora, sempre imo-janamana jabocacayana, nda ts'abá tbojtson'yná, B'ngbe B'etsábioye atschuanaye luaroye cháuama incienso jajuini'yima. Can'ye, Zacaríasbe ents'anga B'ngbe B'etsabe b'ets yebnocá, B'ngbe B'etsábentšẽ imojtsoservena orna, Zacaríasbioye ts'abá ibojon'jena; y chca, cha ibojotóca jana incienso jajuini'yima. <sup>10</sup> Zacarías, incienso yojtsejuini'yantscuana, ba ents'anga shjoca imojtsemna, B'ngbe B'etsáftaca encu'entaye. <sup>11</sup> N'ye ndeolpe, B'ngbe Utabnabe can'ye ángel tojanon'yná ch'ê incienso jajuini'yima altarentša catšbioica. <sup>12</sup> Zacarías chábioye tbojánin'ye ora, tojanenjnáná y corente uatjana tbojanábuache.

<sup>13</sup> Chora ch'ê ángel tbojaniana: —Zacarías, ndoñe matauatjana. B'ngbe B'etsá tonjouena ntšamo tconjaimpadacá. Ache shema Isabel can'ye šesona bochántsebmomna, boyabásetema, y chana Juan ca cochjuabaye. <sup>14</sup> Chama aca corente oyejuayá cochántsemna, y b'etscá ents'anga mochanjójeyuaye ache uaquin'á tojon'ynama. <sup>15</sup> Er cha, B'ngbe B'etsabiam can'ye uamana ents'á echántsemna. Ndocna te queochaisofsiye v'inoe, ni jabuáchiye. Chê Uamana Esp'iritu chabe ainani'ñe echantsemándaye, cha cabá ndon'yna orscana. <sup>16</sup> Banga Israeloca ents'anga, ntšamo cha chaojayanama mochanjontsé joyeunayana B'ngbe B'etsá, ch'engbe Utabná. <sup>17</sup> Cha echanjášhango ch'ê B'ngbe B'etsabe Uamana Uabuayanabe natsana, y echántsebmomna obenana y can'ye esp'iritu ntšamo ch'ê B'ngbe B'etsabe juabna oyebuambnayá Elías inabomncá. Chabe natsana echanjášhango, b'ets'angna ch'engbe básengaftaca ndoñe chamond'etsentsjanama, y ch'ê nduauenan'enga cachiñe chamotsatsjuabnama ntšamo ch'ê B'ngbe B'etsabe bomini'ñe ts'abá am'enga mondbetsejuabnacyá. Y chca, ents'anga cha echantsapróntaye B'ngbe Utabná jabama orscana ca —ch'ê ángel tbojaniana.

<sup>18</sup> As Zacarías ch'ê ángelbioye tbojantjá: —¿Ntšamo atše stjobenaye jtsetatš'ẽmbuana ch'ê šcontsatsá soye ndegombre b'etsemnama? Er atše ya b'ets'ejema s'entsemna y atšbe sh'ẽmnaca cachcá ca.

<sup>19</sup> Chora ch'ê ángel tbojanjá: —Zacarías, atše ángel Gabriel s'ẽndm'ena; atše B'ngbe B'etsábioca s'ẽndoservena. Cha šonjichmó ch'ê ts'abe notici'enga aca jauyanama y jue-nayama. <sup>20</sup> Morna, ch'ê cbontsatsá soyi'ñe ndoñe quecatošbuaché causa, nd'ebíá cochan-joquéda, y ntšamo cbontsatsacá chaojopasá ora, chama tempo chaojtsemna ora, chora jójeyuambayama cochantobenaye ca.

<sup>21</sup> Chê ángel Zacaríaseftaca yojtsójeyuambnantscuana, ents'anga shjoca Zacaríasbiam imojtsobátmama, y m'ents'á imojtsejuabnaye: “¿Ndáyeca ts'a b'ẽn B'ngbe B'etsabe b'ets yebnentšẽ ibojtsobiamná ca?” <sup>22</sup> Zacarías tojtanbocna ora, ndoñe yontsobena ch'ê ents'angftaca jójeyuambayana. Ch'enga tmojántatš'ẽmbona, ch'ê B'ngbe B'etsábioye atschuanayentšẽ Zacarías mo otenayoquécá B'ngbe B'etsábiocana can'ye soye tojánin'jama, er ch'engbioye jatš'ẽmbombonana yojáuana, nd'ebíá yojoquéda causa.

<sup>23</sup> Chabe tempo, ch'ê B'ngbe B'etsabe b'ets yebnentšẽ jtsetrabájayama tojanpochocá ora, Zacarías cachabe yebnoye tojtaná. <sup>24</sup> Chents'ana baseftaytese, chabe shema Isabel ngomamaná yojoquéda, y ch'ê causa, ch'ê shema shachna ishini'ñe cach tsoca yebnentšẽ

totanoquedá. <sup>25</sup> Cha mēntśá yojtsichamo: “Bēngbe Utabná mora atśbiama tojtenojuabó, entśángbentśe atśbe ngmēnana jtsebojuánama, básenga tondaye Bēntsabamna causa ca.”

*Canŷe ángel tojanabuayená Jesús jónŷnama*

<sup>26</sup> Isabel chñēnguana ishinŷe ngomamaná yojtsemna ora, Bēngbe Bētsá, ángel Gabriel tbojanichmó Galilea luaroye, Nazaret ca uabaina puebloye, <sup>27</sup> canŷe shembása María ca uabainá jauatsētsayama. Mariyna cabá boyabása nduabuatmá inamna, pero Joséftaca jobouamayama tbojanśbuachená. Y Josena, rey Davidbentśana entśá inamna. <sup>28</sup> Chē ángel Mariybioye tojána y mēntśá tbojanchuá: —¡Mouena. Bēngbe Bētsá tśabe bendición acbiamatona! ¡Bēngbe Utabná ácaftaca entsemna ca!

<sup>29</sup> Chca tojanuena ora, María yojenjaná chē soyama, y yojtsejuabnaye ndáyeca chē ángel chca tbojanchuama.

<sup>30</sup> Chora chē ángel tbojaniana: —María, ndoñe matauatjana, Bēngbe Bētsá entsama tśabe bendicionēnga chacotsebmoma. <sup>31</sup> Aca ngomamaná cochanjoquedá y canŷe šešona boyabásetema cochántsebmoma, y chana Jesús ca cochjuabaye. <sup>32</sup> Cha puerta echantsamana, y entsangna Bēngbe Bētsabe Uaquiñá ca chábioye mochantsáobuatma. Y Bēngbe Bētsá chē Utabná, chábioye canŷe rey bochanjábema, ntśamo David yojamncá, <sup>33</sup> y Jacobēbentśana entśanga nŷetsca tescama echantsamēndaye, y chabe mándayana ndocna te queochaisopochóca ca —chē ángel tbojaniana.

<sup>34</sup> Chentsana María chē ángelbioye tbojantjá: —¿Ntśamo chca yochjopása, cabá ndoñe boyá sēntsebmōñse ca?

<sup>35</sup> Y chē ángel tbojanjuá: —Chē Uámana Espiritu echanjabo nŷets áceñe, y Bēngbe Bētsabe obenánaca ngomamaná cochanjoquedá. Chabe obenana mo jantśetēshcá cmochanjabóutśotse; chíyeca chē echanjónŷna šešona Uamaná echántsemna, y chábioye Bēngbe Bētsabe Uaquiñá ca mochantsáobuatma. <sup>36</sup> Mouena, Isabel, acbe primá, canŷe šešona bochántsebmoma, masque ya bētsananá cha entsemna; chē “šešona ndobmná ca” monjan-abobuatmá, mora ya chñēnguana ishinŷe ngomamaná entsemna, <sup>37</sup> er Bēngbe Bētsá lempe jamama endobena ca —cha tojánayana.

<sup>38</sup> Chora María chē ángelbioye tbojaniana: —Bēngbe Bētsabe oservená atśe sēntsemna. Bēngbe Bētsá átśeftaca chaoma ntśamo ŷcojauyancá ca.

Y chentsana chē ángel tojtsatanoñe.

*María tojána Isabel jabuáchama*

<sup>39</sup> Chentśana, María tojanoprontá y tojanochēmo canŷe puebloye, Judeoca tjañenache luariñe. <sup>40</sup> Chocna cha, Zacaríasbe yebnentśe tojánamashēngo y Isabélbioye tbojanchuá.

<sup>41</sup> Isabel ntśamo María tbojanachuama tojanuena ora, Isabelbe šešona chabe uafsbioye tojanobonjó, y chē Uámana Espiritu Isabélbeñe tojánamashēngo chabe ainaniñe jtsemándayama.

<sup>42</sup> Chcasna, Isabel jabuache tojánayana: —¡Bēngbe Bētsá acbiamá más tśabe bendicionēnga entsama nŷetsca shembásengbiama, y chē cochántsebmoma šešonbiámna cachá! <sup>43</sup> Atśe merecido taitsatobuajoñe, atśbe Utabnabe mamá chaśuabobuáchama; <sup>44</sup> er atśe sēnjouena ntśamo ŷconjachuá, y cachora atśbe šešona oyejuayá atśbe uafsbioye tonjobonjó. <sup>45</sup> ¡Aca Bēngbe Bētsábeñe tojośbuaché; cojtsetátśēmo Bēngbe Bētsá ntśamo tcmojaśbuachenacá yochjamama; chíyeca puerta oyejuayá cochántsemna ca!

<sup>46</sup> Chora María tojánayana:

“Nŷets ainánaca Bēngbe Utabná chantsadorana,

<sup>47</sup> y Bēngbe Bētsá, atśbe Atsbocayabiamá corente chanjóyejuaye.

<sup>48</sup> Bēngbe Bētsá atśbiama tojtenojuabó, atśe chabe oservénējema.

Er morscana muentśa entśanga nŷetscanga puerta oyejuayá ca śmochantsáobuatma.

<sup>49</sup> Bēngbe Bētsá, chē nŷets obenana bomná, chabe obenánaca bēts soyēnga atśbiama tonjama. ¡Bēngbe Bētsá puerta Uamaná ca entsabaina!

<sup>50</sup> ¡Morsca entśanga y más hcōyēnga, chábioye yeunanēngbiama, cha sempre bochántsebmoma!

<sup>51</sup> Cha, chabe obenánaca bēts soyēnga tojama, y chē nŷe cachēnga bētsētsanga enobiamnŷēngbe juabna tojtsepochocá;

<sup>52</sup> reyēngbioye chēngbe mándayentśana tojtsatsatśe;

pero chē nŷe cachēnga bētsētsanga ndenobiamnŷēngbioye, uámanēnga tojábiamá.

<sup>53</sup> Chē shēntseca imomnēngbioye, chamosama bētsá cha tojatsatá, pero chē bomnēngbioyna tondaye tonjatsatá.

<sup>54</sup> Cha tojanéjabuache chabe entśanga Israeloca, chabe oservénēnga, y ndoñe tbonjánēbnatjēmba jtsalastemánana,

<sup>55</sup> nŷetsca tescama chē Abraham y chábentśana entśángbioye, ntśamo bēngbe bēts taitanga Bēngbe Bētsá tojanaśebuachenacá ca” —cha tojánayana.

<sup>56</sup> Mariyna unga ishinŷe Isabéltaftaca tojananoquedá, y chentśana cachabe yebnoye tojtana.

*Juan chë Ubayaná tojanonýná*

<sup>57</sup> Isabel jtseshócanama tojanóntšabuache ora, canýe šešona boyabásetema tojanonýná.  
<sup>58</sup> Isabelbe juachañe oyenënga y chabe pamíllanga tmojántatšëmbona ntšamo Bëngbe Bëtsá chábiye ibojalastemama, y chama corente Isabélauftaca tmojanoyeuanga. <sup>59</sup> Chë šešona posuftayté yojtsebomna ora, tmojánashjango y chëtëmbiye chë más delicadentše base bobachtema tmojantëtše, ntšamo chë judiënga imojanamancá. Chënga imojëtseboše chë šešónbiye Zacarías ca juabáyana, cach beftcá; <sup>60</sup> pero chabe mamá tojanéyana: —Ndoñe. Quem šešona echantsabaina Juan ca.

<sup>61</sup> As chënga Isabélbiye tmojaniana: —Acbe pamíllangbeñe ndocná chca quenatabaina ca.

<sup>62</sup> Chora chënga jatšëmbombonana Zacaríasbiye tmojantjá, ntšamo chë šešona chaotsabainama cha yojtseboše ca. <sup>63</sup> Zacaríasna jatšëmbombonana canýe tablëbé tojanéyá y chiñe tojanábema: “Cha entsabaina Juan ca”. Y chë causa, nyetscanga ojanánënga imojtsemna. <sup>64</sup> Y cachora Zacarías jóyebuambayama yojtobenaye, y yojontsé Bëngbe Bëtsábiye jëtschuayana. <sup>65</sup> Chë juachañe oyenënga nyetscanga tmojanëuatjaná, y Judeoca nyetsca chë tjañenache luaríne entsanga chë soyëngama imojtsencuéntaye. <sup>66</sup> Nyetscanga chë soyëngama tmojántatšëmbona ora, chëgnaca corente chama imojtsejuabnaye y mëntšá imojtsichamo: “¿Chë básetema, Bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

*Zacarías, Bëngbe Bëtsábiye jëtschuayama*

<sup>67</sup> Chë Uámana Espíritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

<sup>68</sup> “¡Chë Utabná, chë Israeloca entsangbe Bëtsá matschuanga, er cha tonjabo chabe entsanga jabújabuachama y jabátsebacama!

<sup>69</sup> Cha bochaníjchmua canýe atsebacayá puerta obenana bomná, y cha echántsemna Bëngbe Bëtsabe oservená Davidbentsána entsá;

<sup>70</sup> ntšamo Bëngbe Bëtsá bayté entsemna, chë chabe juabna oyebuambnayëngbiajana, chë chábénga imomnëngbiajana bënga šojanašebuachenacá, mëntšá:

<sup>71</sup> Cha canýa bochjanichmuá bëngbe uayayënga y nyetsca uaboyënjëngbiana bënga jabátsebacama;

<sup>72</sup> bëngbe bëtsétsangbiye jálastemama,

y jenójuaboyama y jamama chabe uámana trato,

<sup>73</sup> ntšamo Bëngbe Bëtsá, bëts taitá Abrahámbiye tbojanšbuachenacá.

<sup>74</sup> Cha tbojanšbuachená bëngbe uayayëngbiana bënga jabátsebacama,

chca, bënga ndauatjá Bëngbe Bëtsá jasérviana,

<sup>75</sup> y chabe entsangcá, nyetsca soyënguifne tšabá amënga, Bëngbe Bëtsabe delante nyetsca te bëngbe vidënguifne jëftsiyenama.

<sup>76-77</sup> Y aca, atšbe básetemna, Bëngbe Bëtsabe juabna oyebuambnayá ca cmochantsábobuatma, entsángbiye Bëngbe Bëtsabe soyëngama cochtsabuayiyama,

Bëngbe Utabná cabá ndáshjango ora, bacna soyënga amana chamuajbanama;

as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsoptontaye.

<sup>78-79</sup> Bëngbe Bëtsá bënga puerta šualastemánayeca,

canýa bëngbe juabnënga binýnayá bochaníjchmua,

bënga chë bacna soyënga causa mo ibetiñcá y obanëngbe luarentscá vida bomnëngbiye jabátsebacama,

y jabaúatambama ntšamo natjëmbana jtsiyenana ca” —cha tojánayana.

<sup>80</sup> Chë básetema yojontsé jobóchana y chabe espíritnaca puerta. Bayté, entsanga ndoyena luarënguenache cha yojëftsiyena, Bëngbe Bëtsá Israeloca entsángbiye cha tojáninýanýentscuana. Chentšana, chamuábuatmanamna tojanontsé Israeloca entsángbeñe jóyebuambayana.

**2***Jesucristo tojanonýná*

(Mt 1.18-25)

<sup>1</sup> Chë tempo yojamna canýe Romoca bëts mandado, Augusto ca uabainá; y cha, chë natsanama tojanmandá nyetsca entsanga chamuenábemama. <sup>2</sup> Chë soye tojanochñëngo Cirenio ca uabainá Sirioca mandado yojamna ora. <sup>3</sup> Chamna, nyetscanga tojanotocá jtangana jenábemëngama, cada ona ndémoca chëngbe bëts taitanga imojëftsiyena puebloye.

<sup>4</sup> As, Josénaca Galilea luarentšana Nazaretocana yojëftsebocna y Judeoye, Belén puebloye, tojtaná. Tempo, Josebe bëts taitá rey David, Belenoca inoyena. Y José,

Davidbentsana entsá inámnyecna, choye jenábemama tojtaná. <sup>5</sup> Mariáftaca tojána jenábemama, y muana tbojanšbuachená Joséftaca jobouamayama. Mariá ngomamaná yojtsemna, <sup>6</sup> y Belenoca ibojtsemnentscuana, chë ora tbojanóntšabuache jtsešócanama. <sup>7</sup> Y chentše Mariá ibojtsebmoma chabe natsana šešona, canýe boyabásetema. Posadoca tondaye luare yontsemna causna, chata nýe uacnëngbe átana tambuentše tbojanokedá. Y Jesús tojanonýná orna, Mariá tbojanentsacua y canýe bachetémiñe tbojanajá.

*Chë angelotëmënga y chë oveshënga abujäñýanga*

<sup>8</sup> Belén bëconana, chë ibeta, oveshënga abujäñýanga shëntsoca cachëngbe oveshëngaftaca imojtsemna. <sup>9</sup> Nýe ndeolpe, Bëngbe Bëtsábocana canýe ángel tojánebëbuacna, y Bëngbe Bëtsábentsana corente yojtsebuashinýýana chëngbe shëconáñiñe. Chama chënga puerte imojocochauatjaná.

<sup>10</sup> Chora chë ángel tojanëyana: “Ndoñe matauatjëngana. Sënjabo tsábe soyënga tonjopasama jábuayenama, nýetscanga chamóyejuama. <sup>11</sup> Mora chë David tonjanonýná pueblentše canýe šešona tonjonýná. Cha tsëngaftangbe atsebacyá echántsemna y tsëngaftangbe entsangbiámna. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná. <sup>12</sup> Ndegombre chca entsemnana mëntšá šmochanjátatšëmbona: canýe šešona ntsacuaná y uacnëngbe bachetémiñe jajoná šmochanjínýena ca” —cha tojanëyana.

<sup>13</sup> Cachora, celocana mallajta angelënga chë natsana ángelbentše tmojánbocana y Bëngbe Bëtsábioye mëntšá imojtsachuanaye:

<sup>14</sup> “Bëngbe Bëtsá, celoca entsemná matschuanga!

Bëngbe Bëtsábioye yeunanëngbiam, Bëngbe Bëtsá corente entsoyejuá; quem luariñe chëngbeñe puerte tsábá chaotsemna ca.”

<sup>15</sup> Chentšana chë angelënga cloye tmojësanshëcuana. Y chora chë oveshënga abujäñýanga tmojanontsé jeniyanana: “Belenoye cuajna, chë quem tojopasá soye jinýama. Ndegombre, Bëngbe Bëtsá chë soye šojanýanyé ca.”

<sup>16</sup> As betso tmoján y tmojánanyëna Mariá, José y chë šešonatema bachetémiñe jajoná.

<sup>17</sup> Chë šešona tmojáninýe ora, chënga tmojanacuntá Jesusbe bëtsëtsata y chë inýengbioye, ntšamo chë šešonbiam chë ángel tojanëyancá. <sup>18</sup> Nýetscanga chë tmojanuenënga tmojanen-jnaná ndayá chë oveshënga abujäñýanga imojtsacúntama. <sup>19</sup> Pero Mariyna nýe cachabe ainanoca quem soyëngama más bën inëtseñojuabnañe.

<sup>20</sup> Chentšana, chë oveshënga abujäñýanga tmojtaná Bëngbe Bëtsá atschuanaye, ndayá tmojáninýama y tmojanuenama. Nýetsá tojanopasá lempe ntšamo chë ángel tojanëyancá.

*Bëngbe Bëtsabe bëts yebnoye Jesús tmojanamba*

<sup>21</sup> Posufta te tojánashjache ora, chë basetëmbioye chë más delicadentše base bobachtema tmojantëtše, Bëngbe Bëtsabe entsá bëtsemnana chaotsinýnama, ntšamo judiënga imojanamancá; y Jesús ca tmojanabaye, ntšamo chë ángel tbojanianýancá, Mariá cabá ndoñe ngomamaná yontsemna ora.

<sup>22</sup> Y chë tempo tojanóshjango, ndaye ora José y Mariá yojtsamna jamana ntšamo Moisesbe leyíñe iuayancá, ndayá jamama yojanmëncá, canýe shembása Bëngbe Bëtsabe delante tsabia jtsatsmënama, canýe šešona tbojtsebmomentsana. Asna, Jerusalenoye tbojánata y chë básetema tmojanamba, Bëngbe Bëtsabe bëts yebnoca jinýinýiyama, <sup>23</sup> ntšamo chë Bëngbe Utabná Moisésbioye tbojaníyë leyënguifne iuayancá, mëntšá: “Canýe yebnentše chë natsana šešona boyabása tojtsemnëna, Bëngbe Bëtsábioye cha jinýinýiyana chábioye chabotseservënama ca.” Chcasna, chë básetema Bëngbe Bëtsabe bëts yebnoye tmojanamba. <sup>24</sup> Y tmojanamba janshana uta shloftše, Bëngbe Bëtsá jëtschuayama, ntšamo Bëngbe Utabnabe leyíñe yomandancá. Chiñe mëntšá endayana: “Chë natsana šešona chaojonýná ora, boyabásetema tojtsemnëne, janshana šmochjuamba uta fchetnatëmata o uta šešona palomatëmata, Bëngbe Bëtsá jëtschuayama ca.”

<sup>25</sup> Jerusalenoca inamna canýe bacó, Simeón ca uabainá; cha inamna nýetsca soyënguifne tsábá amá, y yojanienana ntšamo Bëngbe Bëtsá yomandacá. Cha yojanobátmana chë tempo ndaye ora, Bëngbe Bëtsá bochjanichmuá canýa Israeloca entsanga cháuatsebacad. Y chë Uámana Espiritu chabe ainaniñe yojtsemna; <sup>26</sup> chiýeca, cabá lempe chca ndópasa ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayaná ntjëtšinýá. <sup>27</sup> Chë Uámana Espiritu tbojanmandáyeca, Simeón Bëngbe Bëtsabe bëts yebnoye tojána; y Jesusbe bëtsëtsata chë básetema tmojanamba ora, ntšamo Moisesbe leyíñe iuayancá chabiamama jamama ora, <sup>28</sup> Simeón tbojanocutsá y Bëngbe Bëtsábioye tbojtanchuá. Cha mëntšá tojánayana:

<sup>29</sup> “Bëngbe Utabná, mora šmolesenciá, atše acbe oservená natjëmbana jóbanana, er ya tconjama ntšamo šconjanšbuachenacá;

<sup>30</sup> atše chë entsangbe Atsebacyá sënjinýe.

<sup>31</sup> Aca cha tcojichmó nýets luarenache entsangbiamá.

<sup>32</sup> Cha chë ndoñe judiëngbe juabnënga binýnayá echántsemna; y chábeyeca, nýets quem luarentse mochanjátatšëmbona, chë acbe entsangbiamá, Israelo-quëngbiamá ca” —cha tojánayana.

<sup>33</sup> José y María ibojenjanata ntšamo Simeón Jesusbiamá yojtsichámuama. <sup>34-35</sup> Chentšana, Simeón Bëngbe Bëtsábioye tbojanimpadá tšabe bendicionënga chata chabotsebonnama chaomama; y María, chë Jesusbe mamábioye tbojanianá: “Quem soyënga corente cmochanjacochtsetšenaná, mo ainana espadëjaca cuafjenëchnëngcá. Cha Israeloca banga echanjápochochocaye y banga echanjátsebacaye; y chca, ntšamo banga ainaniñe imojuabnacá echantsótatšëmbo. Israeloca banga quem básetema mochantsábotena y chabe palabrëngnaca ca” —cha tbojanianá.

<sup>36</sup> Chéntšnaca yojtsemna canýe shembása Bëngbe Bëtsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentsá; ya bëtsananá cha inamna. Nýe canýësëta uata cha yojëftsebouamna; <sup>37</sup> y chabe boyá tojanóbanentsana, cha posufta bnëtsana y canta uata viudá inamna. Ndocna te Bëngbe Bëtsabe bëts yebnentsana yonjábocana, y chentše tojanoquedá bnëté y ibeta, Bëngbe Bëtsáftaca encuéntaye y cha atschuanaye; y chama, ba soye yojanamana tondaye ntjascá jtsemnana. <sup>38</sup> Simeón, María y Josébioye yojtsëtsësnaye ora, Ana chëngbioye yojobeconá, y chë Atsebacayá tojanonýnama Bëngbe Bëtsábioye tbojtanchuá chentšana, Jerusalenoca entsángbioye, chë canýe atsebacayá Israeloca entsangbiamá imojanobatmanëngbioye tojanéyana, chana Jesús yojëtsemna ca.

### *Jesús Nazaret puebloca*

<sup>39</sup> José y María lempe ntšamo chë Utabnabe leyënguñe iuayancá tbojanma ora, Galilea luaroye tbojtanata, cachëngbe puebioye, Nazaretoye. <sup>40</sup> Y chë básetema yojtsobóchaye, y más añemo yojtsejacana y más osertánana yojtsebonma. Y Bëngbe Bëtsá yojánama cha bëtscá tšabe bendicionënga chaotsebonnama.

### *Jesús Bëngbe Bëtsabe bëts yebnoca*

<sup>41</sup> Chabe bëtsëtsata ibojanamana cada uata Jerusalenoye jana Bashco fiestama, chë Bëngbe Bëtsá chë judiëngbe bëts taitángbioye Egiptocana tojánatsebacama jtenójuaboyama fiesta. <sup>42</sup> Jesús bnëtsana uta uata tojánashjache ora, Jerusalenoye tmojána, ntšamo imojanamancá. <sup>43</sup> Chë fiesta tojanopochocá chentšana, chabe bëtsëtsata yebnoye ibojtsataye, y chata ntsetatšëmbcá, Jesusna Jerusalenoca yojtsoqueadañe. <sup>44</sup> Chata ibojëtsejuabnaye Jesús chë inýe entsángaftaca yojtsataboye ca; chcasna, canýe te nýetsá benachëjana tbojánata ora, tbojanontšë chabe pamíllangbeñe y ubuatmëngbeñe jtsenguanguana, <sup>45</sup> pero ndoñe ibonjobenaye jtsinýenana. As, chata chora Jerusalenoye tbojësanshëcona choca cha jetsenguanguama.

<sup>46</sup> Unga tianoye chata tbojanobená Bëngbe Bëtsabe bëts yebnentse cha jetsinýenana. Chana chë Moisesbe ley abuatambayëngbe tsëntsaca inëtsofbemañe, chëngbioye inayaunana, inatjanaye. <sup>47</sup> Nýetsca ouenanënga imojtsenjanaye Jesús tša osertaná inamnana, y tša tšabá jojuama cha yojtsobenama. <sup>48</sup> Chabe bëtsëtsata chca tbojáninýe ora, chátnaca ibojenjaná. Chora, chabe mamá tbojanianá: —Uaquíñá, ¿ndáyeca chca Bëndátaftaca tcojama? Taitá y atše corente enócochinýenata cbondënguá ca.

<sup>49</sup> As Jesús tojanéyana: —¿Ndáyeca atše šmonguá? ¿Ndoñe šondëtatšëmbo atše šomna atšbe Taitabe yebnentse jtsemnana ca?

<sup>50</sup> Pero chë bëtsëtsata ndoñe tonjanësertá ntšamo cha tojanéyancá.

<sup>51</sup> Chentšana Jesús chë bëtsëtsataftaca Nazaretoye tojtaná y chata yojtsayaunana. Y chabe mamana nýe cachabe ainanoca chë soyëngama chë bën inëtseñojuabnañe. <sup>52</sup> Jesús yojtsobóchaye y más juabna yojtsebonma; y Bëngbe Bëtsá y nýetsca entsanga corente oyejuayënga chabiamá imojtsemna.

## 3

### *Juan chë Ubayaná entsanga yojanabuayiná*

(Mt 3.1-12; Mc 1.1-8; Jn 1.19-28)

<sup>1</sup> Bnëtsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey. <sup>2</sup> Anás y Caifás chë bachnangbe más uámama amëndayata ibojamna. Cach tempo, canýe luare entsanga ndoyenentše Bëngbe Bëtsá tbojanatsëtsá Juánbioye; Juan, Zacaríasbe uaquíñá. <sup>3</sup> As Juan nýetsca luarënguëjana Jordán bëjaye bëconana tojánachnëngo, entsanga mëntsá utsësnaye: “Tsëngaftangbe bacna soyëngama ngmënaca šmochtenójuaboye, chca amana šmochtsajbaná y Bëngbe Bëtsabe benache šmochtishache. Chora chochjúbaye, y Bëngbe Bëtsá tsëngaftangbe bacna soyëngama

cmochanjáperdonaye ca.”<sup>4</sup> Chê soye tojanopasá, cachcá ntšamo chë Bëngbe Bëtsabe juabna oyeuambnayá Isaias chabe librësañe yojëftsabemcá. Cha mëntšá tojanábema: Entšanga ndoyena luaroca canya enduáye buache:

“Bëngbe Utabná echanjabo ca; mo nda canye benache tojtseprontacá canye uamana entšá jashjanguama, cachcá, tšëngafángnaca, Bëngbe Utabná jabama ainanentše tšabe juabnëngaca smochtseprontana.

<sup>5</sup> Nyetsca jachañe echantójtjia, y tjañe y batsjabenga mochantenájachibiaye.

Chë scundma benachënga ndirichëjënga echántsatsmëna, y chë bacá mana benachënga mochantenájachibiaye.

Mo chë chca tmojtsamëngcá, canye benache japróntana canye rey cháushjanguama, tšëngafángnaca bëtscá smochtseprontana tšëngafangbe ainaniñe, Bëngbe Utabná jabama.

<sup>6</sup> Y nyetsca entšanga mochanjinye chë Atsebacyá Bëngbe Bëtsábentšana jabana ca” —cha tojanábema.

<sup>7</sup> Chë entšanga Juan chaubáyama imojánbocana ora, Juan yojanëtsëtsnaye: “¡Mëtscuaye entšanga! ¿Nda tcmënjáuyana chë echanjóshjango uabouana castigüentšana smochjotsbocá ca?”<sup>8</sup> Bëngbe Bëtsábeñe ndegombre ošbuáchiyënga smochtsemna, as chca chaotsinýna, tšëngafanga chë bacna soyënga amana ndegombre smojtsajbanama. Y ndoñe smattsejuabnaye cach tšëngafangbiama jayanama: ‘Bëngna Abrahábentšana entšanga, Bëngbe Bëtsabe entšanga fsëndmëna ca’. Er atše chanjayana, Bëngbe Bëtsá quem ndëtsbéngacnaca Abrahábentšana entšanga nanjábiama.<sup>9</sup> Tatšnia ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonjashájona, jtseshatëtšana y iñoye jtsatmetšana; tšëngafangafángnaca cachcá, tšabe soyënga ndoñe smontsamëse, Bëngbe Bëtsá cmochanjácastigaye ca” —cha yojanëtsëtsnaye.

<sup>10</sup> —¿Y as, ndayá jamama šojtsamna ca? —chora chë entšanga tmojantjá.

<sup>11</sup> Y Juan tojanëjua: —Chë uta quëfsáya uabomná bontsemna canýiyá jutštayana chë tondaye tondubomná. Saná bomná bontsemna juajatayana chë tondaye saná tond-bomnábiye ca.

<sup>12</sup> Romocama entšángbiye impuesto atjanayëngnaca jenábayama tmojánabo. Chënga Juánbiye tmojantjá: —Buatëmbayá, ¿ndayá jamama šojtsamna ca?

<sup>13</sup> Y Juan tojanëyana: —Nye ntšamo chë leyinë yomandancá entšángbiye crocénana smochtsayëngacaye ca.

<sup>14</sup> Básefta soldadëngnaca chábiye tmojantjá: —¿Ndayá jamama šojtsamna ca?

Y Juan tojanëyana: —Ndocnábiye tondaye šmatjáboca, ni jauátjanase, ni nye ndayámnaca bonamente jobuáchëse; y nye ntsachetšá smacaná crocénanaca oyejuayënga smochtsomñe ca.

<sup>15</sup> Entšanga chë Bëngbe Bëtsabe Uamana Uabuayanabiama imojtsobátmana, y chëngna Juanbiama imojëtsejuabnaye nderado cha chë Bëngbe Bëtsabe Uamana Uabuayaná nanjamna ca;<sup>16</sup> pero Juan tojanëyana: “Ndegombre, atše bëjayeca chondubáyana. Pero chë echanjabá atšbiama corente más obenana endbomna, y atše mercedo taitsatobuajoñe ni mo jotsejbiyana chabe shecochëtjonëshëntša corriëja jajafjonama. Chë Bëngbe Bëtsabe benache chamojtishachëngbiama, Bëngbe Bëtsá echanjama chë echanjabábeyeca, chë Uamana Espiritu chëngbe ainaniñe cháumashënguama. Pero chë ndoñe chamontishachëngbiama, Bëngbe Bëtsá echanjama chë echanjabábeyeca, chënga corente castigánënga chamotsemnama, mo iñeshequécá.<sup>17</sup> Canye entšá chabe mëntšá cucuatšinë jiyëbana, chabe trigo jtsóbobemama, y chë ndoservena shácuaniënga jtsejashtsëtsana. Chabe trigo chë grano uaquëcjnyaye tsañe jtsabuájua, y chë ndoservena shácuaniënga iñeshoye jtsatmetšana. Cachcá, chë átšbentšana echanjabá, chë tšabe entšanga echanjúbuaja, y chë bacna entšangna iñeshiñe echantsacastigaye, y chë iñe ndocna te queochátsfana ca” —cha tojanëyana.

<sup>18</sup> Chca y inye palabrëngaca Juan chë tšabe noticiëngama yojanabuayinýna.<sup>19</sup> Tempo, Juan Heródësbioye tojanácacana, cha tojanobouamama cachabe catšata Felipe shémaftaca, Felipe cabá oyena ora; chana Herodías ca uabainá. Chama Juan tojanácacana y nyetsca bacna soyënga Herodes tojanmámna.<sup>20</sup> Pero Herodes Juánbiye joyeunaye luariñna, cabá inye más bëts bacna soye tojátanma: Juánbiye cárceloye thojtsanëtame.

*Juan, Jesúsbiye thojanabaye*

*(Mt 3.13-17; Mc 1.9-11)*

<sup>21</sup> Pero Herodes Juánbiye cabá ndutame ora, Juan ba entšanga tojanëbaye, y Jesús naca tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo,<sup>22</sup> y chë Uamana Espiritu mo canye palomatemcá Jesúsbiye yojtsast-jajuana; y celocana Bëngbe Bëtsá thojaniyana: “Acna atšbe bonshana Uaquiná condmëna. Achbiama corente sëntsoyejuá ca.”

*Jesusbe bēts taitanga*  
(Mt 1.1-17)

<sup>23-38</sup> Jesús unga bnētsana uata yojtsebmna, entšángbeñe Bēngbe Bētsabe soyēngama jóyebuambayama yojontsé ora. Entšanga imojanjuabná Jesús Josebe uaquiñá yojamna ca.

José yojamna Elibe uaquiñá.

Elí Matatbe uaquiñá

y Matatna Levibe uaquiñá.

Leví yojamna Melquibe uaquiñá,

Melqui Janabe uaquiñá

y Jana Josebe uaquiñá.

José yojamna Matatíasbe uaquiñá,

Matatíasna Amosbe uaquiñá.

Amós Nahumbe uaquiñá,

Nahúm Eslibe uaquiñá

y Esli yojamna Nagaibe uaquiñá.

Nagai yojamna Maatbe uaquiñá,

Maatna Matatíasbe uaquiñá.

Matatías Semeibe uaquiñá,

Semei Joseche uaquiñá

y Josec yojamna Judabe uaquiñá.

Judá yojamna Joananbe uaquiñá

y Joanán Resabe uaquiñá.

Resa Zorobabelbe uaquiñá,

Zorobabel Salatielbe uaquiñá,

y Salatielna Neribe uaquiñá yojamna.

Neri yojamna Melquibe uaquiñá,

Melqui Adibe uaquiñá.

Adi Cosambe uaquiñá,

Cosam Elmadambe uaquiñá,

y Elmadamna yojamna Erbe uaquiñá.

Er yojamna Jesusbe uaquiñá

y Jesús Eliezerbe uaquiñá.

Eliezer Jorimbe uaquiñá

y Jorimna Matatbe uaquiñá.

Matat yojamna Levibe uaquiñá,

Leví Simeonbe uaquiñá

y Simeón Judabe uaquiñá.

Judá Josebe uaquiñá,

José Jonambe uaquiñá,

y Jonamna yojamna Eliaquimbe uaquiñá.

Eliaquim yojamna Meleabe uaquiñá,

Melea Menabe uaquiñá.

Mena Matatbe uaquiñá,

y Matata yojamna Natanbe uaquiñá.

Natán yojamna Davidbe uaquiñá,

David Isaibe uaquiñá

y Isaína Obedbe uaquiñá.

Obed Boozbe uaquiñá,

Booz Salabe uaquiñá

y Sala yojamna Naasonbe uaquiñá.

Naasón yojamna Aminadabēbe uaquiñá,

Aminadab Adminbe uaquiñá

y Admin Arnibe uaquiñá.

Arni Esrombe uaquiñá,

Esrom Fáresbe uaquiñá

y Fáresna yojamna Judabe uaquiñá.

Judá yojamna Jacobēbe uaquiñá,

Jacob Isaacbe uaquiñá

y Isaacna Abrahambe uaquiñá.

Abraham Tarebe uaquiñá

y Taré yojamna Nacorbe uaquiñá.

Nacor yojamna Serugbe uaquiñá,



Serug Ragaube uaquiñá  
 y Ragauna Pelegbe uaquiñá.  
 Peleg Heberbe uaquiñá,  
 y Heber yojamna Salabe uaquiñá.  
 Sala yojamna Cainanbe uaquiñá,  
 Cainán Arfaxadbe uaquiñá  
 y Arfaxadna Sembe uaquiñá.  
 Sem Noebe uaquiñá  
 y Noé yojamna Lamecbe uaquiñá.  
 Lamec yojamna Matusalenbe uaquiñá,  
 Matusalén Enoche uaquiñá  
 y Enocna Jaredbe uaquiñá.  
 Jared Mahalaleelbe uaquiñá,  
 y Mahalaleelna yojamna Cainanbe uaquiñá.  
 Cainán yojamna Enosbe uaquiñá,  
 Enós Setbe uaquiñá,  
 Set Adanbe uaquiñá  
 y Adán Bëngbe Bëtsabe uaquiñá.

## 4

*Jesús tojanobená Satanás jayëñjanama*

*(Mt 4.1-11; Mc 1.12-13)*

<sup>1</sup> Juan, Jesúsbiye tbojanabáyentsana, chë Uámana Espíritu Jesusbe ainaniñe yojt-semándaye. Jesús Jordán bejajoicana tojtaná y chë Uámana Espíritna entsanga ndoyena luaroye tbojanánatse. <sup>2</sup> Chentse canta bnëtsana te tbojanjëtana, y Satanasma yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibojeshëntsena.

<sup>3</sup> Chora Satanás tojésanabo y tbojanianyana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

<sup>4</sup> As Jesús tbojanjuá: —Bëngbe Bëtsabe uabemana palabrënguifne mëntšá endayana: “Entšá nýe tandëseca ndoñe vida ntsebomnana ca.”

<sup>5</sup> Chentšana, Satanás canýe bëts tjoye tbojanánatse y betscó nýetsca quem luarentša amëndayëngbenache tbojaninýinýe. <sup>6</sup> Chora Satanás tbojanianyana: —Atse nýets obenana chochjätsetaye y lempe quem amëndayëngbenache yobinýa soyëgnaca. Atse lempe chca sënjóyëngacñe y sentsobena jatsetayama nda stsebošábíoye. <sup>7</sup> Aca chacojoshëntsamentšë y chaščojadorase, lempe nýetsá acbiama echántsemna ca.

<sup>8</sup> Chora Jesús tbojanjuá: —Bëngbe Bëtsabe uabemana palabrënguifne mëntšá endayana: “Acbe Bëtsá, chë Utabná cochtsadorana y nýe cha cochtseservena ca.”

<sup>9</sup> Chentšana, Satanás Jerusalenoye tbojanánatse y Bëngbe Bëtsabe bëts yebnentse chë más tsbanánoca tbojanatsá, y tbojanianyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, <sup>10</sup> er Bëngbe Bëtsabe uabemana palabrënguifne endayana: Bëngbe Bëtsá chabe angelënga echanjichamuá, chacmotsinýenama.

<sup>11</sup> Chënga buacuatšëngaca cmochanjishache, shecuatšë ndocá ndëtsbeñe chacondomama ca —cha tbojanianyana.

<sup>12</sup> Chora Jesús tbojanjuá: —Bëngbe Bëtsabe uabemana palabrënguifne mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

<sup>13</sup> Cabana, Satanás tojanajbaná bošana Jesúsbiye bacna soyëngama jacochënguama, y bënama Jesúsbenšana tojtsanojuánañe.

*Jesús tojanontšë Galileoca chabe trabajo jamana*

*(Mt 4.12-17; Mc 1.14-15)*

<sup>14</sup> Chentšana, Jesús Galileoye tojesaná chë Uámana Espíritbe obenánaca, y nýetsca entsanga chë luariñe chabiama imojtsencuéntaye. <sup>15</sup> Jesús yojtsabuátambaye chë judiëngbe enefjuana yebnënguenache, y nýetscanga cha imojtsatschuanaye.

*Jesús Nazaret puebloca*

*(Mt 13.53-58; Mc 6.1-6)*

<sup>16</sup> Chentšana Jesús Nazaretoye tojtashjango, chë pueblentse cha tojanoboché, y ochnayté, ntšamo cha yojanamancá, chë judiëngbe enefjuana yebnentse tojánamashëngo. Y chocna tojantsbaná Bëngbe Bëtsabe palabra jualíama. <sup>17</sup> Chë Bëngbe Bëtsabe juabna oyebuambnayá Isaiásbe librëša tmojaninýe chaulíama. Chë librëša yojutëfjona orna, tojáninýena mëntšá uábemanentse:

<sup>18</sup> “Chë Utabnabe Espíritu átšëftaca entsemna,

er atše uabuayaná stsemna chë Bëngbe Bëtsabe tšabe noticiënga chë ndbomnëngbeñe jóyeuambayama.

Cha šonjichmó jábuayenama, chë utámenënga chentšana ya chamuáisebocanama;

jamama chë jtanënga chamobenama tšabá jubínynama;

jamama chë injengbe causa imosufrínënga, tempcá cachcá tšabá chamotsatsmënama;

<sup>19</sup> y entšanga jáuyanama ndëma ora chë Utabná chabe entšanga yochjatsebacye ca.”

<sup>20</sup> Jesús jualíama tojanpochocá y chora chë uajabuachanábioye chëša tbojtaniyé y tojtantóbema. Njëtšca entšanga chë enefjuana yebnentše imojtsemnënga Jesúsbioye imojt-sobuáuatja. <sup>21</sup> Chora Jesús tojanontšé mëntšá jayanana: —Camënté tšëngaftangbeñe tonjopasá ntšamo quem librëšaíe iuabemancá ca.

<sup>22</sup> Njëtšcanga Jesusbiam tšabá imojtsencuëntaye y ojanánënga imojtsemna tša botamana cha vojtsóyeuambnama. Y chënga imojtsentjanaye: —¿Quem boyabása ndoñe Josebe uaquiná yondmëna ca?

<sup>23</sup> Jesús yojtsetátšëmo ntšamo cha tojánayaniñe chënga ndoñe tmonjanóšbuachema. As tojánëyana: —Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe puebléntšnaca cachcá moma ca”.

<sup>24</sup> Y cachora Jesús más tojanoyebuambá, mëntšá: “Ndegombre cbëyana, ni canýe Bëngbe Bëtsabe juabna oyebuambnayábioye cachabe pueblëntše tšabá quematonýá. <sup>25</sup> Ndegombre cbëyana, Elías, chë Bëngbe Bëtsabe juabna oyebuambnayá, Israeloca inamna ora, ba viu-danga chentše imojamna. Chë tempo, unga uata y tséntsafne nýetšá ndoñe tonjanafte y bëts shëntsana chë luariñe yojtsebinýna. <sup>26</sup> Pero Bëngbe Bëtsá, Elíasbioye ndoñe tbonjanichmó ni mo canýe Israelentša viudábioye, y aífne tbojanichmó inýoye, Sarepta ca uabáinoye, Sidón béconana, canýe chentša viudábioye. <sup>27</sup> Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canýa chentša šocábioye tbonjanshná, pero aífne canýe šocábioye, Naamán ca uabainá, cach bacna nguayanánaca, Siriocá ca” —cha tojánayana.

<sup>28</sup> Chë judiëngbe enefjuana yebnentše imojtsemna entšanga chca tmojanuena ora, puerte tojánëtëna. <sup>29</sup> As, chora chënga tmojantsbaná, chë pueblëntšana Jesús imojtábocna y más tsjuanoye canýe peñëšëjana imojuánatse. Chënga imojanajebna cach peñëšiñe, y chë entšanga imojtseboše Jesús chocana jtsajuatsëntšana. <sup>30</sup> Pero Jesusna chëngbe tséntsajana tojánachnëngo y inýoye tojtsanoñe.

*Jesús, bayëjbe juabna canýabioye tbojanbojuaná*

*(Mc 1.21-28)*

<sup>31</sup> Chentšana, Jesús cach Galileoye tojesaná, Capernaum puebloye, y choca tojanontšé, chë ochnayté, chë judiëngbe enefjuana yebnentše entšanga jabuátambana. <sup>32</sup> Entšanga imojtsenjnanye ntšamo Jesús vojtsabuátambama, er chamna mo canýe mando bomnacá vojtsóyeuambnaye.

<sup>33</sup> Chë enefjuana yebnentše, canýe boyabása bacna bayëja uambayá yojtsemna, y chabe causa chë boyabása tojanontšé mëntšá uayebuáchana: <sup>34</sup> —¡Cachcá šmonýá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndëtátšëmo nda aca comnama, aca chë Bëngbe Bëtsabe Uamaná ca.

<sup>35</sup> Chora Jesús chë bacna bayëjbioye tbojtsanácacana y tbojaninyana: —¡lytëca móbema y chábentšana maisebocna ca!

As chora chë bayëja entsanguentše chë boyabásabioye tbojanshajayé, y ndocá ntjëftsemcá chábentšana yojësebocna. <sup>36</sup> Chë soyama njëtšca entšanga imojénjnanye y mëntšá imojt-senatsësnaye: “¡Tša chca palabrénga! ¡Quem entšá mandayacá y obenacá chë bayëjënga entsamënda, y chënga montsaisebocana ca!”

<sup>37</sup> Y Galileoca njëtšca pueblënguífne Jesusbiam yojtsótátšëmo.

*Jesús, Simón Pédrëbe uambén mamábioye tbojanshná*

*(Mt 8.14-15; Mc 1.29-31)*

<sup>38</sup> Chentšana, Jesús chë judiëngbe enefjuana yebnentšana tojëftsanbocna y Simonbe yebnentše tojanamashëngo. Simonbe uambén mamá šocá inajájona jabuache calentóraca, y chë chentše imojtsemna entšanga chabiam Jesúsbioye tmojanimpadá. <sup>39</sup> Chora Jesús chë šocábioye yojtsejbëna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojantsbaná y tojanontšé chënga jobuácuedana.

*Jesús ba šoquënga tojanashná*

*(Mt 8.16-17; Mc 1.32-34)*

<sup>40</sup> Shinÿe yojuenatjëmba ora, banga inÿe y inÿe šocana bomnënga Jesúsbioye tmojanënatse, y cha nÿetsca šoquëngbeñe cucuatšënga tojanajó y tojanashná. <sup>41</sup> Chora, ba šoquëngbentšana bacna bayëjënga imojtsaisebocana y mëntšá imojtsanchembumbuana: “¡Aca chë Bëngbe Bëtsabe Uaquiñá condmëna ca!” Pero Jesusna yojtsëcácana y ndoñe tonjanalesenciá chamóyebuambama, er chë bayëjënga imnatátšëmbo cha chë Cristo bëtsemnama.

*Chë judiëngbe enefjuana yebnënguenache, Bëngbe Bëtsabe soyëngama Jesús entsänga yojanabuayiná*

(Mc 1.35-39)

<sup>42</sup> Yëfsana tojanbinÿna ora, Jesús chë pueblentšana tojëftsanbocna, y canÿe luaroye, entsänga ndoyenoye tojtsanoñe. Pero entsänga tmojána cha jetsenguanguama, y cha yojtsemnoye tmojánashjajna. Chënga imojtëseboše Jesús cach pueblentše chaotsoquedáñama, <sup>43</sup> pero Jesús tojanëyana: “Atše šontsemna chë tšabe noticiënga Bëngbe Bëtsabe amëndayama inÿe pueblënguenáchnaca jábuayenana. Chama Bëngbe Bëtsá šonjichmó ca.”

<sup>44</sup> Y chentsana, Jesús yojánana Bëngbe Bëtsabiama entsängbioye abuayinayae, chë judiëngbe enefjuana yebnënguenache Judeoca.

## 5

*Canÿe te mallajta beonga ashebuánaye te*

(Mt 4.18-22; Mc 1.16-20)

<sup>1</sup> Canÿe te, Jesús, Genesaret ca uabaina uafjajónaye tsachañe yojtsemna ora, ba entsänga tmojánashjajna, y chënga tša imojtsenajuatsëntšnaye Bëngbe Bëtsabe palabra jounama.

<sup>2</sup> Jesús, chë uafjajónaye tsachañe bécoñe tojáninÿe uta ena barquësha; chë beonga ashebuánayëngna barquëshanguentsana tmojëftsanbocna atarraiešhangá jetsáboshabiama.

<sup>3</sup> Jesús canÿe barquëshañe tojánamashëngo; chësha Simónbesha inauamna. Chora Simónbioye mëntšá tbojaniana: “Quem tsacháñentšana chcoye mëyamba ca.”

<sup>4</sup> Tojanótbema ora, Jesús chë barquëshoicana tojanontsé entsänga jabuátambama. Jabuátambama tojanpochocá orna, Simónbioye tbojaniana: —Shbuatsëntsoye barquësha mëyamba y tšëngaftangbe atarraiešhangá šmochjushbuetše, beonga jashebuáyama ca.

<sup>5</sup> Pero Simón tbojanjuá: —Buatëmbayá, nÿets ibeta fsëndanguá y tondaye chibiátashebuaye. Pero aca chca tcjajánayecna, cachiñe atarraiešha chantëtëšshbuetše ca.

<sup>6</sup> Tmojanëshbuetše orna, bëtscá beonga tmojánishëche y chëngbe atarraiešhangá tojanontsé jtsatanëcanana. <sup>7</sup> As, chë inÿe barquëshañe imojtsemna enutëngbioye tmojánëfjatšëmbo, jabújabuachama chamuábama. Chora chënga tmojánabo, y nÿets uta barquësha beóngaca tmojanajutjë. Tša chëftanga causa, tojanontsé chë uta barquësha jtsenatjëmbambana.

<sup>8</sup> Simón Pedro chca tojáninÿe ora, Jesúscentše tojanoshëntsamentsé y tbojaniana: —¡Bëngbe Utabná, atše bacna soye amá sëndmëna, chíyeca átšbentšana mojuaná ca!

<sup>9</sup> Chë tša beonga jashebuáyama Jesús tojanmama, Simón y chë cháftaca imojtsemnënga imojouatjaná. <sup>10</sup> Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniana: —Ndoñe matauatjana. Morcana, entsänga Bëngbe Bëtsabiama cochántanguaye, y nÿe beonga ashebuayanáyá ndoñe quecochátmëna ca.

<sup>11</sup> As chora chë barquëshangá tsachoye tmojtanëyamba y lempe jéseboshjonëse, Jesús tmojanasto.

*Jesús, canÿa bacna nguayanánaca šocábioye tbojanshná*

(Mt 8.1-4; Mc 1.40-45)

<sup>12</sup> Jesús canÿe pueblentše yojtsemna ora, chentše tojánashjango canÿe entsá bacna nguayanánaca šocá. Chë šocá Jesúsbioye tbojáninÿe ora, tojanoshëntsamentsé y jubiaca fshantsóntsoñe yojotsejbéna y tbojanimpadá: —Bëngbe Utabná, aca tcojtsebošëse, aca catjobenaye atšbe šocana jtsebojuánana ca.

<sup>13</sup> As Jesús cucuatšëca tbojánbojajo y tbojaniana: —Aíñe, sëntseboše. ¡Šocana chotsebojuaná ca!

Y cachora chë šocana tbojtsanóbojuanañe. <sup>14</sup> Chora Jesús tbojanmandá: —Ndocnábeñe chë soye cattsecuëntaye; nÿe Jerusalenoca báchnëbioye motsa, y cha cochjinÿinÿiye aca mora ya tšabá cojtsatsmënama; y chora cochjuátšëmbona ntšamo Moisés chabe leyinë tojanmandacá, Bëngbe Bëtsábioye chama jëtschuayama, chca, nÿetsca entsänga chamotatšëmbona mora ya tšabá cojtsatsmënama ca.

<sup>15</sup> Pero ndayá Jesús yojtsamama más entsänga imojátatšëmbona, y ba entsänga imojtsojotoye chábioye joyeunayama y chëngbe šocanëngama chauashnama. <sup>16</sup> Pero Jesús yojanamana jtsoñana entsänga ndoyena luarëngoye y choca Bëngbe Bëtsáftaca ibnëncuentaye.

*Jesús, canýe jama ndobenábioye tbojanshná*  
(Mt 9.1-8; Mc 2.1-12)

<sup>17</sup> Canýe te, Jesús yojtsabuatambá ora, chentše básefta fariseunga y ley abuátambayënga imojtsetbiámána, Galileoca nýetsca pueblënguentsána áshjainënga, Judeoquënga y Jerusalemocuënga. Y chora Jesús shoquënga yojtsashnaye, Bëngbe Bëtsabe obenánaca. <sup>18</sup> Chora tojanopasá, básefta boyabásenga canýe šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye, <sup>19</sup> pero jamashjnama ndoñe tmonjanobená, tša entsanga causa. Chcasna, gradasësënguëjana chë yebnentša tsbanánoye tmojánasëngo y batšá tejëshe tmojtsanjuaná. Chorna, chë atëfñëjana chë šocá tjuashiñe tmojanëštjango, entsangbe tsëntsaca, Jesusbe natsanoica. <sup>20</sup> Jesús tojáninýe cha chë šocá jáshnama bëtsobenama chënga puerte imojtsošbuáchema. As, chë jama ndobenábioye tbojanianyana: “Bacó, acbe bacna soyënga tcbontseboperdoná ca.”

<sup>21</sup> Chora chë ley abuátambayënga y chë fariseunga mëntšá tmojanontšë juabnayana: “Quem boyabása ndoñe tsabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entsá quenátobena bacna soyëngama inýa japerdónana; nýe Bëngbe Bëtsá aíñe ca.”

<sup>22</sup> Pero Jesús yojtsetátšëmbo ntšamo chënga imojtsejuabnayama; as tojanëyana: “¿Ndáyeca tsëngaftangbe ainaniñe chca šmojtsejuabná? <sup>23</sup> ¿Tsëngaftangbiana ndayá más paselo nántsemna tsëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’?” <sup>24</sup> Y chca, morna atše cbochanjínýanýiye, chë Bëngbe Bëtsá Entšá tbojanbemá quem luariñe obenana yobomnana, entsanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojanianyana: “Atše chëyana, matëtsbaná, tjuashe mesocñe y acbe yebnoye motsatoñe ca.”

<sup>25</sup> Cachora chë jama ndobená tojtantsbaná entsangbe delante, chë cha inajájona tjuashe yojesocñe y Bëngbe Bëtsábioye atschuanaye chentšana yojtsatoñe. <sup>26</sup> Chama nýetsca entsanga imojénjnanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëtš soyënga tmonjinýe ca.”

*Jesús, Levíbioye tbojanchembo chabuastama*  
(Mt 9.9-13; Mc 2.13-17)

<sup>27</sup> Chca yojochnënguentsána, Jesús chentšana tojëftsanbocna y canýe entsábioye tbojáninýe, Leví ca uabainá, chë entsángbioye impuesto Romocama atjanayentšë inëtsoibemañe. Chora Jesús tbojanianyana: “Smasto ca.”

<sup>28</sup> Y Leví lempe tojésanboshjona, tojantsbaná y Jesús tbojanasto.

<sup>29</sup> Chentšana, Levina bëtš fiesta chabe yebnentšë Jesusbiana yojama. Y chë fientëtsë imojtsemna banga impuesto atjanayënga; y inýe entsángnaca mesëshentšë imojtsetbiámána. <sup>30</sup> Chora, chë fariseunga y chë ley abuátambayënga tmojanontšë chë Jesusbe uatsjëndayëngbiana podesca oyeubuambnayana; y chëngbioye mëntšá tmojanëyana: — ¿Ndáyeca tsëngaftanga impuesto atjanayëngaftaca y bacna soye amëngaftaca šmojtsesá y šmojtsofšësná ca?

<sup>31</sup> Y Jesús tojanëjua: —Salud bomnënga ashnayá ndoñe ntsëjabótana, pero shoquëngna aíñe.

<sup>32</sup> Y atše ndoñe chiyátabo chë Bëngbe Bëtsabe bominiñe tsabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

*Jesús tmojantjá chë Bëngbe Bëtsáftaca jencuéntama tondaye saytescama*  
(Mt 9.14-17; Mc 2.18-22)

<sup>33</sup> Chora chënga Jesúsbioye tmojanianyana: —Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjëndayënga nýe nýets tempo jesosañana y jesofšëšnañana ca.

<sup>34-35</sup> Chora Jesús tojanëjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntšamo chca ndoñe nántsemna? Chë tojobouamá cha chëngaftaca tojtsemnëntscuana, chë ofjanënga bëtscá jasaná y cháftaca oyejuayënga jtsemnana. Pero ora echanjóshjango y chë boyabása chëngbentšana mochantsánatseñe; chora cocayé chë ofjanënga echántsamna tondaye ntjascá jtsemnana. Ntšamo chë tojobouamá cha y chë ofjanëngaftaca endmëncá, cachcá endmëna atše, atšbe uatsjëndayëngaftacnaca ca —cha tojanëjua.

<sup>36</sup> Jesús mëntšánaca tojanacuntá jabuátambama: “Ndocná queonýbatatëtšë basájua tsëm entsayañe, tanguá entsayá jtarmëndama. Chca tcojamëse, chë tsëm entsayá jtsandbemana, y chë tcojuatëtšë entsëjua chë tanguájuañe ndoñe tsabá ntsinýnana. <sup>37</sup> Y cach ndoñe, chë tojtseshayana vínoye tanguá jasabenguñe ntjtaftsuaamayana. Tcojuafsuamasna, chë jasabenga jtseshëbëjua y chë vínoye jtsabuáshana; y chca, chë vínoye y chë jasabenga

todayama ntjatoservénana. <sup>38</sup> Chíyeca co, chë tojtshayana vínoyna tsëm jasabenguíñe juaftsúamana. <sup>39</sup> Ndocná, chë bóchena vínoye tojatëmo y chentsána játsbošana chë tojtshayana vínoye jatofsiyana; cha jayanana: ‘Chë bóchena vínoye tša tšabeye ca’.”

## 6

*Jesusbe uatsjédayënga ochnayté trigo tmojanátabebe*  
(Mt 12.1-8; Mc 2.23-28)

<sup>1</sup> Canye ochnayté, Jesús canye jajajana yojtsaye; chabe uatsjédayënga trigo imojtsaiuatabnaye, imojtsaiúshenëcaye, y imojtsaiuasaye. <sup>2</sup> Chë causa, básefta fariseunga tmojanatjaye: —¿Ndáyeca šmojtsama chë ochnayté jamama ndoñe quenátslesenciana soye ca?

<sup>3</sup> Y Jesús tojanējua: —¿Ndoñe šmëndualía y šmondétatšëmbo, ntšamo rey David y chabe enutënga tmojanmama shëntseca imojtsemna ora y jasama yojtsējaboto ora? <sup>4</sup> Chca orna, David Bëngbe Bëtsabe bëts yebnentse yojámashëngo y chë Bëngbe Bëtsá chentše yojamnama injínynaye tandëšënga yojase, y chë cháftaca imojánajna entsángnaca yojátšataye. Y chë tandëšna nýe bachnanga belesenciana jasama. Masque David chca yojama, Bëngbe Bëtsá chora ndoñe tonjánayana David canye bacna soye tojanma ca —Jesús tojanējua.

<sup>5</sup> Y Jesús más tojanējyana: “Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca.”

*Chë buashana cucuatše bomna entšá*  
(Mt 12.9-14; Mc 3.1-6)

<sup>6</sup> Inýe ochnayté, chë judiëngbe enefjuana yebnoye Jesús tojánamashëngo y tojanontšë jabuátambana. Y chentše yojtsemna canye entšá, catšbioica cucuatše buashanëtše bomná; <sup>7</sup> y chë ley abuátambayënga y fariseunga chiñe imojtserrondana jinýama nderado Jesús chë ochnayté chábioye tabuanjashna, as chca chënga jtsebomnama ndaye sóyeca Jesús mal jaquédana. <sup>8</sup> Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojaninyana: “¡Motsbaná y chentše tsëntsaca motsa ca!” Y chë entšá yojotsbaná y entsangbe tsëntsaca yojotsaye. <sup>9</sup> Chora Jesús chë inýëngbioye tojanējyana: “¿Ndáyá yojtselesenciana ochnayté jamana, canye tšabe soye o canye ndoñe tšabe soye? ¿Jatsbocana o jtsepochócana ca?”

<sup>10</sup> Y nyëtscanga chabe chabuajana imojtsemnënga tojanënyanyé, y chë buashana cucuatše bomnábioye tbojaninyana: “Macuenýanëjaná ca.” Y chë boyabása tojanacuenýanëjaná, y tšabá chëtša yojtsatamna. <sup>11</sup> Pero chë inýëngna puerte tmojanotjayaná, y tmojanontšë enatsëtsnayana ndáyá muanjobenaye Jesusbe contra jamana ca.

*Jesús chë bnëtsana uta uatsjédayënga tojanabacacá*  
(Mt 10.1-4; Mc 3.13-19)

<sup>12</sup> Chë tempo, Jesús tjoye tojána Bëngbe Bëtsáftaca jencuéntama; y nyët ibeta cháftaca tbojanencuénta. <sup>13</sup> Tojanbinýna ora, chabe ústonënga tojánachembo, y chënguentsána tojanëbuáyana bnëtsana uta uatsjédayënga, chë ndëmuanýënga “chabe ichmónënga cánaca” tojanëbobaye. <sup>14</sup> Chënga imojamna: Simón, chë Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé, <sup>15</sup> Mateo y Tomás, Santiago, Alfeobe uaquiñá; Simón, chë celote ca uabobainá; <sup>16</sup> Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšine bochjanboshjoná.

*Jesús ba entšanga yojanabuatambá y yojánashnaye*  
(Mt 4.23-25)

<sup>17</sup> Chentsána, Jesús chëngaftaca chë tjocana tojtantsmá y canye jachañe tojanoquedá ba chabe ustonëngaftaca y ba inýe entšángaftaca. Ba entšanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentsána, Jesúsbioye oído jabuájua y chëngbe šocanëngama chauashnama. <sup>18</sup> Y chábeyeca chë bacna bayëjbe juabna uambayënga tšabá imojtsatsmëna. <sup>19</sup> Nyëtscá entšanga tša imojtseboše y ndayánaca imojtsama Jesús jaboajuama, er chábentšana bëts obenana yojtsóbocana y nyëtscanga yojtsashnaye.

*Chë ndegombre oyejuayana bomnënga y ndëmuanýëngbiama tša lastema yochtsemna*  
(Mt 5.1-12)

<sup>20</sup> Jesús chabe uatsjédayëngbioye tojanontješé y tojanējyana: “Puerte oyejuayënga tsëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tsëngaftangbiama entsemna ca.

<sup>21</sup> “Puerte oyejuayënga tsëngaftanga chë mora oshëntsiyënga, er becá šmochantóshachaye ca.

“Puerte oyejuayënga tsëngaftanga chë mora šmošachenga, er chentsána šmochántatenbiajuaye ca.

<sup>22</sup> “Puerte oyejuayënga šmochtsemna, entšanga chacmojtšëbuayënja ora, chacmo-jtsatëhuacana ora, chacmojtšëyanguá ora, y tšëngaftanga ndoñe tšabá šmontsama ca chënga chamojtsichamo ora, tšëngaftanga atšbe ústonënga bëtsemnama. <sup>23</sup> Chë te puerte šmochjýejuaye, er celoca canye bëtš uacanánana šmochántsebmoma. Chëngbe bëtš taitanga, cachcá chë Bëngbe Bëtšabe juabna oyebuambnayëngaftaca tmonjanma ca.

<sup>24</sup> “Pero jtsa lastema tšëngaftanga bomnëngbiama, er mora oyejuayënga jtsemnama ya bëtscá šmojóyëngacñe ca!

<sup>25</sup> “jtsa lastema tšëngaftanga chë mora shachanëngbiama, er shëntsana šmochántsebmoma ca!

“jtsa lastema tšëngaftanga chë mora oyejuayëngbiama, er ngménama šmochanjenóbošachna ca!

<sup>26</sup> “jtsa lastema tšëngaftangbiama nyetsca entšanga tšabá chamojtsoyebuambná ora; er cachcá chëngbe bëtš taitanga monjánama chë Bëngbe Bëtšabe ndoñe ndegombre juabna oyebuambnayëngaftaca ca!” —Jesús tojanéyana.

*Chë uayayëngbiama bonshánana jtsebmomana*  
(Mt 5.38-48; 7.12)

<sup>27</sup> “Pero tšëngaftanga, átšbioye ouenanënga cbéyana: Tšëngaftangbe uayayënga šmochtsababuánýeshana; chë tcmojtsëbuayënjëngbiama tšabe soyënga šmochtsama; <sup>28</sup> chë tšëngaftangbiama bacna soyënga bošëngbiama, Bëngbe Bëtšá šmochtseimpadana tšabe bendicionënga chamóyëngacñama; chë tcmojýanguanguëngbiama, Bëngbe Bëtšá šmochtseimpadana. <sup>29</sup> Nderado ndánaca cánýoica tcmojajuebjantšetase, cochjomiye chë ínýoica cachcá chacmomama; nderado ndánaca quëfsaiya tcmojuábocana, cachcá cochjonýaye acbe shabuanguanëjuanaca chauetsácñama. <sup>30</sup> Ndánaca chacmojtjtañábioyna, jatsetayana; y nda ndayánaca chacmojtšëfácábioyna, ndoñe catjontšínýena chacmatoyema. <sup>31</sup> Inýëngaftaca šmochtsama, ntšamo chë ínýënga tšëngaftangaftaca chamotsamama šmojtsebošcá.

<sup>32</sup> “Tšëngaftanga, nýe chë tcmojtsababuánýeshanënga šmojtšababuánýeshanëse, ¿ndaye tšabe soye chca šmattsama?; er chë bacna entšángnaca chca mondbëtšama. <sup>33</sup> O nderado, nýe chë tšëngaftangbiama tšabe soyënga tmojtsamëngbiama tšabe soyënga šmojtsamëse, ¿ndaye tšabe soye chca šmattsama?; er bacna entšángnaca chca mondbëtšama. <sup>34</sup> O nýe chë cmochtëchenanguama šmojtsejuabnángbioye šmojúyentsamëse, ¿ndaye tšabe soye chca šmattsama?; er chë bacna entšángnaca mondbetsenántšamiana, chëngbentšana cachcá jtóyëngacñama jtsobátmanëse. <sup>35</sup> Pero tšëngaftangna cmontsamna chë uayayënga jtsababuánýeshanana; y tšabe soyënga chëngbiama jtsamana y júyentsamiana, chëngbentšana ndayánaca jtóyëngacñama ntjatobatmancá. Chca, tšëngaftanga uacanánana cuenta canye bëtš soye šmochanjóyëngacñe, y celoca endmëna Bëngbe Bëtšabe básenga šmochántsemna; Bëngbe Bëtšá chë ndochuanayëngaftaca y bacna entšangaftácnaca tšabia comna. <sup>36</sup> Inýëngbiama lastemadënga šmochtsemna, ntšamo tšëngaftangbe Taitá yomncá ca” —Jesús tojanayana.

*Ndoñe ntsichámuana chë ínýënga tšabá o ndoñe tšabá tmonjamama*  
(Mt 7.1-5)

<sup>37</sup> “Ndócá ínýëngbiama šmattsichamo chë ndoñe tšabá tmonjamama, y Bëngbe Bëtšá ndoñe queochátichamo tšëngaftanga ndoñe tšabá šmonjama ca. Inýëngbiama ndoñe šmattsichamo ndoñe tšabá tmonjama ca, y Bëngbe Bëtšá ndoñe queochátichamo tšëngaftanga ndoñe tšabá šmonjama ca. Inýënga šmochjáperdonaye y Bëngbe Bëtšá cmochanjáperdonaye. <sup>38</sup> Inýëngbioye šmochjatsataye y Bëngbe Bëtšá cmochántatsataye. Mo nda canye biaco medidiñe bëtscá tojajutjé, uashëshe y cmojtiyecá, Bëngbe Bëtšá cachcá cmochántatsataye. Ntšamo tšëngaftanga ínýëngbioye chašmojábiama, uabouana o ndoñe jabuache soyënga, Bëngbe Bëtšá cachcá tšëngaftangbioye cmochanjábiamana ca” —Jesús tojanayana.

<sup>39</sup> Jesús quem cuéntnaca tojanayana jabuátambama: “¿Canyë jtaná nantsobena inýe jtaná jtsanachayama? ¿Chca ndoñe nýets útata ndaye tšubentse buanjótsatse? <sup>40</sup> Chë uat-sjendayá ndoñe ntsemnana chë buatëmbayabiamana más bëtšá. Pero chabe uatsjendayana chaojapochocá ora, cach buatëmbayacá jtsemnana.

<sup>41-42</sup> “Canyá chabe bominyñiñe canye niñëña tojtsebmomnëse, cha ndoñe ntsoberenana chabe catšátbioye jauyanana: ‘Acbe bominyñentsana canye polvshëtema jtsebuchjatsëcama šmolesenciá ca’. Natsana cha bontsemna cachabe bominyñentsana chë niñëña jtsenobuchjatsëcana, tšabá jinyama jobenayama, chabe catšatbe bominyñentsana chë polvotema jtsebuchjatsëcama. ¡Cachcá entsemna acbiama, bacna entšá chë ntšamo ndegombre tcojuabnacá ndinýinýayá! Chë tša bacna soye cojtsama ca acbe catšátbioye tcojauyana ora, cach aca tša bëtš bacna soyënga cojtsamama ntjenojauaboycá; y chca, aca jamana canye bacna soye. Natsana cmontsemna chë cach aca ndoñe tšabe soyënga

cojtsamama ngménaca jshatenójuaboyana y chca amana jshétsajbanana, y chentšana cocayé cohantsobena acbe catšata juajabuáchana ntšamo tšabá yomncá chaotsamama ca” —Jesús tojánayana.

*Tšabe betiye o ndoñe tšabe betiye tondmënana, jtsotatsëmbuana ntšamo tojashajonca*  
(Mt 7.17-20; 12.34-35)

<sup>43</sup> “Ndoñe queonýbatsmëna, chë canýe tšabe betiyiñe podesca soye jashájonana; ni canýe ndoñe tšabe betiyiñe tšabe soye jashájonana. <sup>44</sup> Betiyënga jtsabuatmana ntšamo cada betiye tojtseshajcá. Uchmašëshentšana quenátopodena higuébë jocñana; ni uvašëša, shëshëntšana betiyentsana. <sup>45</sup> Chë tšabe entšana, chabe ainanoca tšabe juabnënga bomnentsana jtsóyeuambnayana; y chë bacna entšana, chabe ainanoca ndoñe tšabe juabnënga bomnentsana jtsóyeuambnayana. Er ndayá becá ainanoca tomnana entšá jtsóyeuambnayana ca” —Jesús tojánayana.

*Chë uta ucuatjoniñe*  
(Mt 7.24-27)

<sup>46</sup> “¿Ndayeca tšëngaftanga atše šmnëtsatsaye, ‘Utabná, Utabná ca’, y ntšamo atše stsichamcá ndoñe ntsamana? <sup>47</sup> Cbochanjáuyana ndacá yomna nda átsbiye tojabo, atšbe palabra tojouena y ntšamo stsichamcá tojtsama: <sup>48</sup> Cha endmëna mo canýe entšacá, nda canýe yebna jajeuamna becá fshantse jashenoye yojajutjo y ndëtsbenguíñe yojúcuatjoe. Béjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtsbenguíñe jabuache yojáucuatjona. <sup>49</sup> Pero nda atšbe palabra tojouena y ntšamo stsichamcá ndoñe tontsama, endmëna mo canýe entšacá, nda canýe yebna yojajebo nýe fshantsiñe, tondayiñe ntjucuatjocá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

## 7

*Jesús canýe Romano soldadëngbe amëndayabe bochichnayábioye tbojanshná*  
(Mt 8.5-13)

<sup>1</sup> Entšángbioye chca jáuyanana tojanpochocá ora, Jesús Capernaum puebloye tojána. <sup>2</sup> Chentše yojoyena canýe romano soldadëngbe amëndayá. Cha ibnabomna canýe bochichnayá puerte bonshaná, y chora cha šocá yojtsemna, ya jtsóbanama. <sup>3</sup> Jesús ba šoquëngbioye yojáshnama encuéntayana chë amëndayá yojouena ora, báseftanga bëtšëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama. <sup>4</sup> Chënga Jesúsbioye tmojánashjango y tša imojtseimpadana, mëntšá: “Quem soldadëngbe amëndayá mercedo entsebuájona chacotsájabuachama; <sup>5</sup> er cha bëngbe luarentša entšángbioye corente endábabanýeshana, y cachá chë bëngbe enefjuana posada šonjayentšjebo ca.”

<sup>6</sup> Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntšá chamuauyanama: “Atšbe Utabná, ndoñe yapa matenócochinýenana átsbiye jabama. Atše mercedo taitsatobuajoñe aca atšbe yebnoye chacuamashënguama; <sup>7</sup> chiyea ni mo aňemo chiyatentšetá jama aca jajëbenguama. Morna nýe cochjayana y atšbe bochichnayá tšabá echántsatsmëna. <sup>8</sup> Er atše sëndábamna átsbiye mándayënga y átsnaca soldadëngbe amëndayá sëndmëna. Atše canýe soldadábioye stjauyana ‘motsa ca’, cha cachora jana; y inýabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

<sup>9</sup> Jesús chca tojanuena ora, chë mándayabiama yojenjinaná, y jobuértanëse chë ba entšanga cha ustonëngbioye tojanëyana: “Ndegombre chëyana, ni mo nýets Israelentše, ni canýa quem boyabasacá tša ošbuachiyá chiyátinýena ca.”

<sup>10</sup> Y chë ichmónënga yebnoye tmojtaná orna, tmojáninýena chë bochichnayá ya tšabá yojtsatsmëna.

*Jesús tojanma canýe viudabe uaquiñá cháuatayenama*

<sup>11</sup> Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjëndayënga y ba entšanga imojtsaye. <sup>12</sup> Chë pueblo amashjuanoye yojtsebeconá orna, entšanga chë pueblentsana canýe obaná imojtsábocana jauátbontsama; chë obaná canýe viudabe uaquiñá inamna y nýe cha uaquiñá. Bëtscá entšanga chë obanabe mamá imojtsetjëmbambnaye. <sup>13</sup> Bëngbe Utabná chë viudábioye tbojáninýe ora, chabiama tbojanongmé y tbojanayana: “Ndoñe matošachena ca.”

<sup>14</sup> Y jobëconase, chë ataúše tojánbojajo, y chë obaná atambayënga tmojantsá. Y Jesús chë obanábioye tbojanayana: “Bobontse, atše cbëyana: ¡Matëtsbaná ca!”

<sup>15</sup> Chora chë obaná tojtantsbaná y tojanontsé oyebuambnayana; y chabe mamábioye Jesús chë bobontse thojtánátse. <sup>16</sup> Nýetsca entsanga tša uatjana yojubuaiche chca tmojáninýe ora, y Bëngbe Bëtsá imojtsatschuanaye, mentsá jayanése: “Bëngbentše canýe Bëngbe Bëtsabe juabna oyebuambnayá cuatënjonýná ca.” Y mentsánaca: “Bëngbe Bëtsá tojabo chabe entsanga jabújubuachama ca.”

<sup>17</sup> Y nýets Judea luarëjana y chë chábuañe luarenache entsanga imojátatsëmbona ndayá Jesús tojanmama.

*Juan chë Ubayanabe ichmónënga*  
(Mt 11.2-19)

<sup>18</sup> Juan, lempe ntšamo Jesús yojtsamama yojátatsëmbona; er chabe ústonënga chama tmojancuentá. As Juan, chënguentšana útata tojánachembo, <sup>19</sup> y Jesúsbioye yojichamuá jatjayama cha tayojamna chë Cristo, chë jabama ibojanmëná, chë Uámána Uabuayaná, o inýabíama jatobátmama tayojetšamna ca. <sup>20</sup> As chë Juanbe ichmónënga Jesúsbioye tmojanobeconá y tmojaníyana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna inýabíama jatobátmama ca.

<sup>21</sup> Chë ichmónata thojánashjango ora, Jesús banga yojtsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojtsatëbinýna. <sup>22</sup> Chora Jesús mentsá tojanëjua: —Motsata y Juánbioye šochjauyana ntšamo šojinýe y šojouená: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga šhnánënga montsatsmëna, chë tšëmënga montsuenana, chë obanënga tmontayena, y chë ndbomnjëmëngbioye chë tšabe noticiënga montsabuayinýna. <sup>23</sup> ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átsbeñe ošbuáchiyana ndoñe tontsajbaná cha ca! —Jesús tojanëyana.

<sup>24</sup> Chë Juanbe ichmónata chentšana thojesanbocnentšana, Jesús tojanontsé Juanbíama entsanga jáuyanana, mentsá: “Juan jinýama šmojánbocna ora, ¿ndayá jinýama šmojánbocana entsanga ndoyena luaroye? ¿Canýe entsá ainaniñe tondaye añemo ndbomná, mo canýe šëse bínýiaca shatiyeynëscá? <sup>25</sup> Y ndoñese, ¿ndayá jinýama choye šmojánbocana? ¿Canýe boyabása uámána entsayaca bopormaná? Ndoñe. Tšëngaftanga šmondëtatšëmbo chë uámána entsayaca bopormánënga y chë bëtská bomnánaca nýe tondayama ntsecochinýencá vida bomnëngna, reyëngbe yebnënguñe mondbëtsiyenama. <sup>26</sup> Asna, ¿ndayá jinýama choye šmojánbocana? ¿Canýa Bëngbe Bëtsabe juabna oyebuambnayá? Ndegombre; y cbëyana, canýa Bëngbe Bëtsabe juabna oyebuambnayabíama más bëtsá. <sup>27</sup> Cha, Juan, endmëna ndabíama Bëngbe Bëtsá chabe uabemana palabrenguñe tojánayana mo chabe ichmonacá, mentsá tojánayana ora:

Cristo, atšbe entsá natsana sënjichmó acbíama chaóyeuambama, entsanga jábuayenama aca jabama ainaniñe tšabe juabnëngaca chamotseprontánama ca. <sup>28</sup> Ndegombre cbëyana: Nýets tempo entsángbeñe, ndocná quenátsmëna Juan chë Ubayanabíama más bëtsá; masque chca, Bëngbe Bëtsabe amëndayoca chë más batsá uamaná, cha más bëtsá echántsemna ntšamo mora Juan yomnma ca” —Jesús tojánayana.

<sup>29</sup> “Nýetsca entsanga chca Juánbioye tmojánóyeunanga y chë Romocama entsángbioye impuesto atjanayëngnaca, nýets ainánaca tmojánayana Bëngbe Bëtsá nýetsca soyënguñe tšabá amá yomna ca; er tmojánenabaye ntšamo jubáyama Juan yojanamancá. <sup>30</sup> Pero chë fariseunga y ley abuátambayënga, ntšamo jubáyama Juan yojanamancá jýëngacñama ndoñe tmojánbošena ora, tmojtšanaboté ndayá Bëngbe Bëtsá chëngbíama jamama yojanjuabnacá.”

<sup>31</sup> Jesús mentsánaca tojánayana: “Cbochanjáuyana ndayacá morsca entsanga imomna, y ndayëngcá chënga imomna. <sup>32</sup> Chënga mondmëna mo chë plazëngoca mondbetsetbíamama basetëmëngcá; chëngna mentsá jabuache jtseñatsayana: ‘Tšëngaftangbíama fsënjaflautá y ndoñe chešmatšlantsá; ngmëñaca fsënjavërsiá y ndoñe chešmatenóbošachna ca.’ <sup>33</sup> Juan chë Ubayaná tojánabo y ndoñe quenjatamana bëtská entsángbeñe jtsemnana, ni tandëse jasana, ni vínoye jofšiyana; y tšëngaftanga šmontsichamo chana bacna bayëjbe juabna uambayá inamna ca. <sup>34</sup> Morna, chë Bëngbe Bëtsá Entsá tojtšabmëñá tonjabo y chana añe entsamana bëtská entsángbeñe jtseyayana y jtsofšëšnayana, y tšëngaftanga chabíama šmontsichamo: ‘Chana yapa uasayá y vínoye tmoyá entsemna y Romocama entsángbioye impuesto atjanayënga y bacna soyënga amëngbe amigo ca.’ <sup>35</sup> Pero Bëngbe Bëtsá endbëtsinýinýaye cha nýets osertánana bomná yomnma, chë ndayá cha tojama ora ndayá chentšana inobocna soyëngaca ca” —cha tojánayana.

*Jesús, chë fariseo Simonbe yebnentše*

<sup>36</sup> Canýe fariseo Jesúsbioye thojanofja saná jauasama, y Jesús chabe yebnoye tojána y mesëshentše yojótbema. <sup>37</sup> Chë pueblentše yojamna canýe shembása, bacna vida bomná. Jesús chë fariseobe yebnentše yojtsesama chë shembása yojátatsëmbona; as cha



chë yebnoye tojánashjango y tojanamba canýe alabastro botellêše, jútjena canýe botamana uanguëtše bėjayeca. <sup>38</sup> Jesúsbe shecuatšëntše yojoshëntsamentšije, šachénaca; shëchbuíyeca chabe shecuatšënga yojtsefchequacná y cachabe stjénashaca ibojtsatsshéchojuaye. Chabe shecuatšënga yojtonguëtšëntšije y chë botamana uanguëtše bėjaye ibojtsashecbueścacia. <sup>39</sup> Chë fariseo Jesúsbiøye ofjaná chca tojáninýe ora, mëntšá Jesusbiamá yojtsejuabnaye: “Cha ndegombre canýe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canýe bacna vida bomna shembása ca.” <sup>40</sup> As Jesús chë fariseobiøye tbojanianyana: —Simón, cuentado palabra šmotsoyeuná ca.

Y chë fariseo tbojanjuá: —Arseñor, Buatëmbayá ca.

<sup>41</sup> Y Jesús tojánayana: —Canýe entšá crocénana uyentšamianá, uta ndebénata yojánabamna. Canýa shachna patse denario crocénana ibojandebena, y chë ínýana, shachna bnëtsana. <sup>42</sup> Pero chë útata tondaye ibontsebmoma ndayentšana cha jëtsëntšabuáchiyama; as chë uyentšamianá nyëts útata chë ndebénana yojtsaperdónaye.

Chora chë fariseobiøye tbojanianyana: —Mora šmëyana, ¿chë útataentšana nda más chë uyentšamianabiøye buantsebobonshana ca?

<sup>43</sup> Y Simón tbojanjuá: —Atše šontsinýana chë más bëtscá ndebená ca.

Y Jesús tbojanianyana: —Ndegombre, ntšamo endmëncá tcjayana ca.

<sup>44</sup> Jesús, chë shembásabiøye jontješiyëse, Simónbiøye tbojanianyana: —Minýe quem shembása. Atše acbe yebnoye sënjamashëngo y aca býeshe ndoñe chešcatabuátšetá atšbe shecuatšëngama. Y quem shembásana, cachabe shëchbuíyeca šontseshecjabebé y chabe stjénashaca šontseshechojó. <sup>45</sup> Ndoñe chešcatámocho, pero cha tonjámarshëngo orscana ndoñe ntájabanana atšbe shecuatšënga onguëtšëntšaye.

<sup>46</sup> “Aca bestšašine aceitiye ndoñe chešcatsbuešcja, y chana aíñe botamana uanguëtše bėjaye šonjashecbuešcja. <sup>47</sup> Chcasna atše cbëyana, cha šonjinýanýe atšbiama corente bonshánana yojtsebmoma, er atše chabe bëtscá bacna soyënga sëntsebooperdoná; pero nda nýe básefta bacna soyëngama stjaperdóna chana, nýe batšatema bonshánana jtsebmomna ca.”

<sup>48</sup> Y chora Jesús chë shembásabiøye tbojanianyana: “Acbe bacna soyëngama perdonaná contsemna ca.”

<sup>49</sup> Chora chë ofjanënga chentše imnatbíamanëngna tmojanontšé enatsëtsnayana: “¿Nda quem entšá yojtsemna, chë bacna soyëngamnaca entšángbiøye jtsaperdónayana ca?”

<sup>50</sup> Y Jesús más chë shembásabiøye tbojanianyana: “Aca átšbeñe icošbuachéyeca, atsbocaná cochántsemna; natjëmbana motsatoñe ca.”

## 8

### *Chë Jesúsbiøye imojanájabuachana shembásenga*

<sup>1</sup> Chca tojanopasá chentšana, Jesús bëts y base pueblënguëjana yojánana, tšabe noti-ciënga Bëngbe Bëtsabe amëndayama entsanga abuátambaye y abuayinýaye. Chë bnëtsana uta uatsjëndayënga cháftaca imojtsajna. <sup>2</sup> Básefta shembásëngnaca imojtsetjëmbambnaye; chëngbëtsana Jesús bacna bayjënga tojtanëbuacna y šocanëngnaca tojanashná. Chënga imojamna, María chë Magdalena ca uabobainá, ndábentšana Jesús canýsëfta bacna bayjënga tojtanëbuacna; <sup>3</sup> Juana, Cuzbe shema (Cuza yojamna rey Heródesbe canýe uajabuachaná); Susana y inýe shembásenga; chëngna chë imojánbomna soyëngaca chëngbiøye imojanëjabuáchana.

### *Chë jenabe cuento*

(Mt 13.1-9; Mc 4.1-9)

<sup>4</sup> Ba pueblënguëntšana mallajta entsanga tmojánbocana Jesús jinýama. Ba entsanga jouenama tmojanobeconá ora, Jesús mëntšá tojanacuntá: <sup>5</sup> “Canýe, canýe jená jénaye jauquëshama yojëftsebozna. Yojtsëjquëshaye orna, básefta jénaye benache juachañe yojuatquëcjana; chiñna entsanga imojtsebotájaye, y jaja shloftšënga imojásttajna y imojtsósane.

<sup>6</sup> Inýe meshëngna ndëtsbenguíñe yojuatquëcjana. Yojuábocna orna, betscó yojtsábojo, chë fshantsiñe ndoñe yapa býeshe yonjamna causa. <sup>7</sup> Inýe meshëngna uchmëshangañe yojuatquëcjana y chë uchmëshangá lempe yojtsatscúe, chë jénayeca canýiñe yojuábocna ora. <sup>8</sup> Inýe meshëngna, uanguaniñe yojuatquëcjana. Yojuájua orna, bëtscá yojuashájona; canýe jénayentšana nýa mo patse meshënga yojuashájona.”

Jesús chca jacuëntama tojanpochocá ora, tojanáyebuachena: “Chë jouenama tmojt-sobenënga, šmochjouena ca.”

### *Ndáyeca Jesús cuentëngaca yojánabuutambye*

(Mt 13.10-17; Mc 4.10-12)

<sup>9</sup> As chora chabe uatsjëndayënga tmojantjá: —¿Ntšamo chë cuento yojtsayana ca?

<sup>10</sup> Y Jesús tojanëyana: —Bëngbe Bëtsá tšëngaftanga cmontsinýanýná nyëtsca chë mo iytëmencá yomna soyënga chabe amëndayama, pero chë ínýëngbiøyna ndoñe; chë soyëngama

chënga lempe cuentëngaca sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinýama; y masque beca quem soyënga chamouena, ndoñe queochátësertana ca.

*Jesús chë jenabe cuentama tojanabuayená*  
(Mt 13.18-23; Mc 4.13-20)

<sup>11</sup> “Chë cuento mëntsá endayana: Chë jénaye Bëngbe Bëtsabe palabra entsemna. <sup>12</sup> Chë benache juachañe yojuatquécjána básefta jénaye endayana chë básefta entšanga Bëngbe Bëtsabiama soyënga tmojouenënga; pero chora Satanás betso jabana chënga Bëngbe Bëtsabe palabra jabëtsabuajuanama, chca, chënga ndoñe chamondëtsošbuáchema y bacna soyënguentšana ndatsebácanënga chamotsemnana. <sup>13</sup> Inýe entšanga mondmëna mo chë ndëtšbenguíñe yojuatquécjána jenaycá. Chë entšangna Bëngbe Bëtsabe palabra jouenana y oyejuayënga jtsemnana. Pero ndoñe nyets tempo chana jochajúana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmontsašbuaché causa. Inýenga mochantsëbuayënja y Bëngbe Bëtsábeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonýaye. <sup>14</sup> Inýe entšanga mondmëna mo chë uchmëshangañe yojuatquécjána jenaycá. Chëngna Bëngbe Bëtsabe palabra jouenana, pero quem luarentšá soyëngaca oyejuayënga jtsemnana yapa jesenójuabnayana, y mallajta crocënana y ba soyënga jtsebomnana yapa jésebošana; chama y ba soyëngama yapa enócochinýena causa, Bëngbe Bëtsabe soyëngama echantsebnëtjomba y ndoñe quemochátama ntšamo Bëngbe Bëtsá tojayancá. <sup>15</sup> Inýe entšangna mondmëna mo chë uan-guaniñe yojuatquécjána jenaycá. Chëngna Bëngbe Bëtsabe palabra botamana mochanjouena; tsabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canýe betiye puerto tsabá tojtsheshajuancá, chënga bëtscá tsabe soyënga Bëngbe Bëtsabiama mochantsama. Chca mochantsama, Bëngbe Bëtsábeñe jtsošbuáchiyëse y nyetsca soyënguíñe puerto uantadënga jtsemnëse ca” —Jesús tojanabuayená.

*Chë uajuinýanëshama cuento*  
(Mc 4.21-25)

<sup>16</sup> “Ndocná canýe uajuinýanëshá juajuinýenana, chentšana ndaye sóyeca chësha jtsëstama o jutsnëshá tajsoye jtsajájuama; juajuinýenana ndayá tsbanánoca juajájuama, chë luarentšë amashjuanëngbiana chaotsebinýnama. <sup>17</sup> Er ndocna yoiytëmena soye, ntjinýcá queochaiso-quéda, y chë entšangbiana ndótatšëmbo soye, ntsoatšëmbcá queochaisoquéda.

<sup>18</sup> “Chcasna, botamana šmochjouena, er nda Bëngbe Bëtsabe soyëngama tsabá tbojoserá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe tontsebošá, chë nýe batsá ibosertana soyëngama bochantsebnatjëmba ca” —Jesús tojánayana.

*Chë Jesusbe ndegombre pamillanguentsënga*  
(Mt 12.46-50; Mc 3.31-35)

<sup>19</sup> Chora, chabe mamá y chabe catšátanga chë Jesús yojtsemnentšë tmojánashjajna, pero ndoñe imontsobena chábioye jobéconana, yapa entšanga causa. <sup>20</sup> As canýa Jesúsbioye mëntsá tbojanianana: —Acbe mamá y acbe catšátanga shjoca montsemna y montseboše aca jinýama ca.

<sup>21</sup> As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catšátanga, atšbe ndegombre pamillanguentsënga ca.

*Jesús chë binýia y chë bëjaye bonguana yojëtsbema*  
(Mt 8.23-27; Mc 4.35-41)

<sup>22</sup> Canýe te, Jesús chabe uatsjëndayëngaftaca canýe barquëshoye tojánamashëngo y chënga tojanëyana: “Uafajónaye chenguana cuajna ca.”

As tmojána; <sup>23</sup> y imojtsenachñëjuanëntscuana Jesús yojtsomaná. Ndeolpe, chë bëjayiñe corente jabuache binýia yojóshjango y yojontsé bëjaye chë barquëshoye jtsobuajútjiana. Y chca, chëngbiana puerto resjo yojtsemna. <sup>24</sup> Chora chë uatsjëndayënga tmojána Jesús jetsefšenama y mëntsá tmojanianana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binýia y chë bëts olëshëngoye tojanmandá: “Bonguana sochtsemna ca.” Y chë binýiayana tojanëjbana y lempe bonguana yojtsatsmëna.

<sup>25</sup> Chentšana Jesús chabe uatsjëndayënga tojanëyana: —¿Bëngbe Bëtsá tsëngaftanga ju-jabuáchama yobenama, cabá ndoñe šmontsošbuaché ca?

Y chënga auatjanánënga y ojnánánënga mëntsá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binýia y chë bëjaynaca joyeunayana ca!

*Chë Gerasa luaroca bacna bayëja uambayá*  
(Mc 8.28-34; Mc 5.1-20)

<sup>26</sup> Chentšana Gerasa ca uabaina luaroye tmojánashjajna, Galilea ndirichiñe. <sup>27</sup> Jesús fshantsoye tojánastjango ora, chë pueblócana canýe entsá chábíoye tojánabo. Cha ya bayté bayëje juabna yojtsebomna, ndocna entsáyá yonjanichëtjona; y yebniñe ndoñe yonjaniyena, sinó obanënge cuevëshënguénache. <sup>28</sup> Chë entsá, Jesúsbiøye tbojáninýe ora, chabe natsanoica yojoshëntsamentísiye y mëntśá yojtsáyebuache: —¿Ndayá átšeftaca cojtseboše, Jesús chë celoca Bënge Bëtsabe Uaquiná? ¡Diosmanda ndoñe scatjatsetšená ca!

<sup>29</sup> Chca tbojaninyana, er Jesús tojanmandá chë bacna bayëje juabna chábentšana chauesebomna. Ba soye chë bayëja yojánama chë entsá ndoñe tsábá chaotsemnama. Chë entsanga imojuamana cucuatšentsana y shecuatšentsana cha jtsëtsbuayana bonguana chaotsemnama, pero chana jtsatabebiana, y chë bacna bayëje mándoca entsanga ndoyena luarëngoye yojánachana. <sup>30</sup> Jesús chë boyabásabiøye tbojantjá: —¿Ntsámo cabaina ca?

Y cha tbojanjá: —Atše sënduabaina Legión ca.

Cha chca tojánayana, er chábefe ba bacna bayëjenga tmojánamashjna. <sup>31</sup> Y chë bayëjenga Jesús tmojanimpadá, chë corente uabouana tboye ndoñe chaondichamuama. <sup>32</sup> Chentša béconana ba cotšënga imnajena, tjoca imnétsosañe; as chë bayëjenga Jesús tmojanimpadá chë cotšëngbeñe jamashjna chualesenciama, y Jesús aínë chca tojanaleenciá. <sup>33</sup> As chë bayëjenga chë entsábentšana tmojésanbocana y chë cotšëngbeñe tmojánamashjna; y chentšana, chë cotšënga batsjocana peñëšëjana uafjajónayoye imojtsoshbuetše y yojtsatajo.

<sup>34</sup> Chë cotšënga anýenënga chca yojopásama tmojáninýe ora, chentšana tmojtsanacheta y tmojána chë soye jacuéntama chë puebloca y chiñe luarenache. <sup>35</sup> Entšanga tmojánbocana ndayá tojanopasacá jinýama, y Jesús yojtsemnoye tmojánashjajna ora, tbojáninýe chë entsá chë ndábentšana bayëjenga tmojtanbocna, Jesusbe shecuatšentše yojtsótbemañe, entsáyá uichëtjoná y chabe nyëts juábna. Y chë entsanga chama corente imojouatjaná. <sup>36</sup> Ntsámo yojopasacá tmojáninýënga entsángbiøye tmojanacuntá ntsámo chca chë bacna bayëje juabna uambayá chora ya tsábá yojtsatmëñana. <sup>37</sup> Chentšana, nyëtscanga chë Gerasa luarentše oyeñënga Jesúsbiøye imojtseimpadana chë luarentšana ínýoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe. <sup>38</sup> Chë entsá chë ndábentšana bacna bayëjenga tmojtanbocana, Jesúsbiøye tbojanimpadá cháftaca jama chabolesenciama; pero cha ndoñe tbojanlesenciá. Jesús tbojanmandá chauatoquedama y mëntśá tbojaninyana: <sup>39</sup> “Acbe yebnoye motsatoñe y cojhácuntaye lempe ntsámo Bënge Bëtsá acbiama tojamcá ca.”

Chentšana chë boyabása yojtsatoñe, y nyëts pueblëjana tojanacuntá ntsámo Jesús chabiama tojanmca

*Jesús canýe shembásabiøye tbojanshná y tojanma jairëbe bembetema cháuatayenama*  
(Mt 9.18-26; Mc 5.21-43)

<sup>40</sup> Jesús chë uafjajónaye chenguánoica tojtanashjango ora, nyëtsca entsanga oyejuayënga tmojtanofja, er nyëtscanga chabiama imojanobátmana. <sup>41</sup> Chora tojánashjango canýe entsá, Jairo ca uabainá. Cha inamna chë pueblentše chë judiënge enefjuana yebnentša mandayá. Jesusbe shecuatšentše yojoshëntsamentísiye y ibojtseimpadana chabe yebnoye cháuama; <sup>42</sup> er chë nýe canýe bembe cha ibnabomná, bnëtsana uta uata bomná, chora ya jöbanama yojtsemna.

Y Jesús yojtsayëntscuana, chë entsanga chábíoye imojtsojuatsëntšenaye. <sup>43</sup> Chë entsánguentše yojtsaye canýe shembása, oboftjajuanánaca šocá; cha ya bnëtsana uta uata chca inapadecena. Lempe ntsámo yojanbomncá ashnayëngbiøye atóbocayinë yojtsepochóca, y ndocná yonjobenaye cha jáshnana. <sup>44</sup> Chë shembásana stëšioicana Jesúsbiøye yojobeconá y chabe entsáyá sibúajua tojánábojajo. Y yachora chë oboftjajuanana ibojtsobojána. <sup>45</sup> Chora Jesús tojanatjá: —¿Nda šjabojojajo ca?

Nýëtscanga imojtsichamo ndoñe ca; as Pedro tojánayana: —Buatëmbayá, entsanga cmontsatsëntšená y cmontsayájuatsëntšenaye ca.

<sup>46</sup> Pero Jesús cachiñe tojánayana: —Pronto nda šjábojojajo, er atše sënjasenté obenana átšbentšana jóbocnana, mo nda stjashna orcá ca.

<sup>47</sup> Chë shembása tojáninýe Jesús yojtsetátšëmbo cha tbojánbojajuama. As chora, ngmëmnyá tojána y Jesusbe shecuatšentše yojoshëntsamentísiye; y nyëtscangbe delante tojanobuambá, ndáyeca tbojánbojajuama, y ntsámo cachora tsábá tojtanoquedama. <sup>48</sup> Chora Jesús tbojaninyana: —Bembe. Bënge Bëtsábeñe icošbuachéyeca shnaná contsatmëña. Natjëmšana motsatoñe ca.

<sup>49</sup> Jesús cabá yojtsóyeuambnantscuana, chë judiëngbe enefjuana yebnentša mandayábíocana canýa tojánashjango, y chë mandayábíoye tbojaninyana: —Acbe bembe ya tontsóbana; ndoñe más chë Buatëmbayábíoye matëbëyabomana ca.

<sup>50</sup> Pero Jesús chë soye tojanuena; as chë mandayábioye tbojanianya: —Ndoñe matauatjana. Nye Bëngbe Bëtsabeñe cochtsošbuáchiye y acbe bembe tsábá echántsatsmëna ca.

<sup>51</sup> Chë yebnoye tmojánashjajna ora, Jesús ndoñe tonjanalesenciá banga choye jamashj-nama, nye Pedro, Juan y Santiago y chë shembásetembe bëtsëtsatna aíñe. <sup>52</sup> Nýetscanga imojtsenóbošachiye y ngménaca imojtsóyebuambnaye, pero Jesús tojanéyana: “Ndoñe matenóbošachengana. Cha ndoñe chenatóbana; cha nye endëtsomañe ca.”

<sup>53</sup> Chë entsanga Jesúsbioye nye imojtsáfchaye, er chënga imojtsetátsëmbo chë shembásetema obaná yojétsemnama. <sup>54</sup> Chora Jesús chábioye tbojánábuacueshache y jabuache tbojanianya: “¡Shembásetema, matëtsbaná ca!”

<sup>55</sup> Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšé, chaosama. <sup>56</sup> Chë shembásetembe bëtsëtsata puerte ojnánánata ibojtsemna; y Jesús tojanamëndá, ndayá tojanopasama ndocnábeñe ntsecuéntayana.

## 9

*Jesús, chabe uatsjédayënga tojanichamó, Bëngbe Bëtsabe amëndayama jábuayenama*  
(Mt 10.5-15; Mc 6.7-13)

<sup>1</sup> Chentšana, Jesús chabe bnëtsana uta uatsjédayënga tojánachembo, y mando y obenana tojanatšatá bacna bayëjenga entsángbentšana jtëbuacanama y socanëngama jashnayama.

<sup>2</sup> Tojanichamó Bëngbe Bëtsabe amëndayama jábuayenama y entsángbioye jashnayama.

<sup>3</sup> Y mëntšá tojanéyana: “Benachiñama tondaye šmattsambaye; ni jatjonéña, ni shec-naja, ni saná, ni crocénana; ni inýe entsëjua jenotrócama cach ndoñe. <sup>4</sup> Canýe yeb-nentše posada chacmojúyentsame ora, chentše šmochjoquéda inýe pueblóye játantscuana.

<sup>5</sup> Nderado ndayentše posada ndoñe chacmonjuyentsame, chentšana šmochjésebcana y shecuatšentša polvëshe šmochjésentoto, chca, chëngbioye jinýanjíyama chënga ndoñe tsábá tsëngaftangaftaca tmonjamama ca” —Jesús tojanabuayená.

<sup>6</sup> Asna chë uatsjédayënga tmojëftsanbocana y tmojána, nýetsca chë base pueblotémënguenache chë tsabe noticiënga abuayinyaye y entsanga socanëngama áshnaye.

*Herodes y Jesús*  
(Mt 14.1-12; Mc 6.14-29)

<sup>7</sup> Jesusbiamá y ntšamo yojtsanopasánama rey Herodes tojántatšëmbona; y ndoñe yontsetátsëmbo ntšamo jtsejuabnayana, er báseftanga imojtsanichamo Juan chë Ubayaná obanënguentsana tojtanayena ca, <sup>8</sup> inýenga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y inýengna canýa chë tempo imojanmëna Bëngbe Bëtsabe juabna oyebuambnayënguentsá obanënguentsana tojtanayena ca. <sup>9</sup> Pero Heródesna tojánayana: “Cach atše sënjanmandá Juanbe bestšaše chamotsëštjanguama. ¿As, nda cha nántsemna, chë ndabiamá chca soyënga jtsóyebuambnayana sëntsuenana ca?”

Chíyeca Herodes yojtsenguaye ntšamo jamëse Jesús jinýama.

*Jesús shachna uaranga boyabásenga saná tojanacaredadó*  
(Mt 14.13-21; Mc 6.30-44; Jn 6.1-14)

<sup>10</sup> Chë Jesús tojánichamonga chábioye tmojtanashjango ora, lempe ntšamo chënga tmo-janmama tmojançantá. Y Jesús, nye chënga jëftsëbiatšese inýoye tojtsanoñe, Betsaida ca uabaina pueblóye. <sup>11</sup> Pero chë entsanga chë soye tmojántatšëmbona, y as tmojanasto; y Jesusna tsábá chënga tojanëbuaia, y Bëngbe Bëtsabe amëndayama yojtsëtsëtsnaye, y chë soquënga imojtsemnëngbioye tojanashná.

<sup>12</sup> Ya jetiñe yojtsobiarná orna, chë bnëtsana uta uatsjédayënga Jesúsbioye tmojanobe-coná y mëntšá tojanianya: —Chë entsanga cuantichamuá, jóchnama y saná jonguan-goñama chamotsama chë béconana pueblotémënguenache y luarënguenache; er quem luariñe ndocná quenatiyena ca.

<sup>13</sup> Jesús chora tojanéyana: —Tsëngaftanga saná chëngbioye šmochjacaredádaye ca. Pero chënga tmojanjuá: —Nýe shachna tandëse y uan beónata fsëntsebmomna; nýetscangbiamá saná jabuámiyama nderado nda tojasna, aíñe uanjacaredádaye ca.

<sup>14</sup> Er mo shachna uaranga boyabásenga imnamna. Pero Jesusna chabe uatsjédayënga tojanéyana: —Mamëndá nýetscanga chamotbiamama shachna bnëtsátsanënga ca.

<sup>15</sup> As chënga chca tmojanma y nýetsca entsanga tmojanotbiamá. <sup>16</sup> Chora, Jesús chë shachna tandëse y chë uta beónata tojanca, y celoye tojanontjesé, Bëngbe Bëtsábioye chama tbojtanchuá, tojanjatá y chabe uatsjédayënga tojanantregá entsángbioye chamuatšatama.

<sup>17</sup> Nýetsca entsanga tmojanse jtoshachaye nýetšá, y cabá bnëtsana uta sbarëco tmojanajutjé chë ojamnëtëmëngaca.

*Pedro tojánayana, Jesús chë Cristo bétsemnama*  
(Mt 16.13-19; Mc 8.27-29)

<sup>18</sup> Canye te, Jesús canya Bëngbe Bëtsáftaca ibojtsencuéntaye ora, chabe uatsjédayënga cháftaca imojtsemna. Chora tojanatjá: —¿Nda atše bétsemnama entsánga imojtsichamo ca?

<sup>19</sup> Y chënga tmojanjuá: —Báseftanga montsichamo Juan ca, ín'yengna Elías ca, y ín'yengna canye Bëngbe Bëtsabe juabna oyebuambnayá tempscá mora tojtayena ca.

<sup>20</sup> As Jesús tojanatjá: —Y tsëngaftangna, ¿nda atše bétsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

*Jesús tojánayana cha ibojamna jóbanana y jtayenana*

*(Mt 16.20-28; Mc 8.30-9.1)*

<sup>21</sup> Pero Jesús corente chënga tojanamëndá ndocnábeñe chama ntsecuéntayana. <sup>22</sup> Y mëntšá cachabiamna tojánayana: —Chë Bëngbe Bëtsá Entšá tbojanbemá bontsemna puerte jasúfriana, chë judiëngbeñe Bëtsëjemëngcá amëndayëngbiama, chë judiëngbe bachnangbe más uámana amëndayëngbiama y ley abuátambayëngbiama uabotená jtsemnana. Entšanga mochanjóba, pero unga tianoye cha echántayena ca.

<sup>23</sup> Chentšana nyetsca entsánga tojanëyana: “Nda atšbe uatsjendayá jtsemnana tojtseboše, cháuyana nýe Bëngbe Bëtsá yobena sempre chabe vidiñe jtsemándayama, chabe quem luarentša soyënga cachá chauesonýá atše juastama, y cada te chaotseprontana átšbeyeca jasúfriama, y cruciñe jobanámna. <sup>24</sup> Nda tojtsama quem luarentše bëtscá soyënga jtsebonmna y atšbiamna jasúfriama ndoñe tontseprontana, chë nyetsca tescama yomna tsábe vida echanjobuetše. Pero nda quem luarentša soyënga cachá tojëftsonýá atše juastama, masque chaóbana, chë nyetsca tescama yomna tsábe vida echántsebonna. <sup>25</sup> Er ¿ndayama entšá buanjosería nyetsca quem luarentša soyënga jtsebonmna, cha pochocaná jtsemnana tojtsá y chë nyetsca tescama yomna tsábe vida tojtsoperdese? <sup>26</sup> Er ndëmuanyë entšá, atšbiamna o atšbe buayenana soyëngama tojtšëuatja, chë Bëngbe Bëtsá Entšá tbojanbemánaca chabiamna echantsëuatja, cha chabe bëtš buashinýinýaniñe chaojésabo ora, chabe Taitabe bëtš obenánaca y chabe angelotëmëngaftaca adoraná. <sup>27</sup> Ndegombre cbëyana, báseftanga muentše montsemnënga quemochatóbana, Bëngbe Bëtsá chabe obenánaca entšángbeñe jabomándama jabana ntjëftsinýcá ca” —cha tojánayana.

*Jesús inýetšá tojanobinýná*

*(Mt 17.1-8; Mc 9.2-8)*

<sup>28</sup> Mëntšá tojanopasá: Chca palabrënga tojanoyebuambá chentšana posuftaytese, Jesús tojëftsanëbiatše Pedro, Santiago y Juan, y canye tjoye tojántsua, Bëngbe Bëtsáftaca jencuéntama. <sup>29</sup> Bëngbe Bëtsáftaca ibojtsencuéntantscuana, chabe jubíá inýetšá yojtsinýna, y chabe uichëtjonëjuangá tša uafjantsëjuangá yojtsamna y tša yojtsabuashinýinýana. <sup>30</sup> Chora uta boyabásata tbojanonýná, Jesúseftaca ibojtsencuéntaye. Chata ibojamna Moisés y Elías; <sup>31</sup> corente buashinýinýaniñe ibojtsemna, y chënga imojtsencuéntaye ntšamo Jesús Jerusalenoca jasúfriana y jóbanana. <sup>32</sup> Masque Pedro y chabe enutata tša ocnayënga imojtsemna, nýe imojtsefšna y tmojáninýe Jusube juachañe tša yojtsabuashinýinýana y chë uta boyabásata cháftaca ibojtsemna. <sup>33</sup> Chë uta boyabásata Jesús bentšana ibojoluára ora, Pedro, Jesúsbiyoe tbojanianya: “Buatëmbayá, ítša tsábá bëngbiama cuanmëna muentše jtsemnana ca! Mora fchanjapóma unga tambotëmënga: cánýetema acbiamna, ínýetema Moisesbiamna y ínýetemna Elíasbiamna ca.”

Pero Pedro ndoñe yontsetátšëmbo ntšamo yojtsichámuama. <sup>34</sup> Y chca yojtsóyebuambnantscuana, canye jantsetëshe yojóbema, y chëngbiyoe yojáutsbotse, y chënga chë tsoye imojtsemnana tmojáninýe ora, chë uatsjédayënga chama imojtsauatja. <sup>35</sup> Chora chë jantsetëshoicana canye oyebuambnayana tojanóbocna, mëntšá: “Mua atšbe Uaquiñá endmëna, atšbe uabuayaná; cha šmochtseyeunana ca.”

<sup>36</sup> Chë oyebuambnayana tmojanuenentšana, tmojáninýe Jesús canya yojtsemna. Chë uatsjédayënga iytëca imojtsemna, y chë tempo ndocnábiyoe chama imonjuenaye.

*Jesús, canye basa bacna bayëjbe juabna uambayábíoye tbojanshna*

*(Mt 17.14-21; Mc 9.14-29)*

<sup>37</sup> Yëfsana, chë tjocana tmojantsmá ora, ba entsánga tmojánbocana Jesús jajëbenguama. <sup>38</sup> Chora, chë entšanguentšana canye boyabása tojanontsé mëntšá uayeubáchana: —Buatëmbayá, Diosmanda atšbe uaqiñá minýe. Nýe cha atšbe uaqiñá endmëna; <sup>39</sup> y mora, bayëjbe juabna chábiyoe bontsësháchichana, y nýe ndeolpe jóntšana yoyana, ataque joshachana y uayocana shashiye jtsabocanana. Y chábensana chë bayëja ndoñe betso ntjësebocnana, y cuerpiñe corente maltrataná jeseboshjonana. <sup>40</sup> Acbe uatsjédayënga sënjaipadá chë bayëja chábensana chamuatábocnana, pero ndoñe chematobená ca.

<sup>41</sup> As Jesús tojánayana: —¿Nýetšá ndošbuáchiyënga y bacna entsánga! ¿Buetayté šojtsemna tsëngaftangaftaca jëftsemnana y jtsëuantánana ca?

Chora chë boyabásabioye tbojaniyana: —Moye chë uaquiñá mánatse ca.

<sup>42</sup> Chë basa yojtsebeconá ora, chë bacna bayëja chábioye tbojanshajayé y inýe ataque tbojanëshache. Pero Jesús chë bayëjbioye tbojanácacana, chë basetëmbioye tbojanshná y chabe taitábioye tbojtantëntregá. <sup>43</sup> Y nýetscanga puerta ojanánënga imojtsemna, Bëngbe Bëtsá tsa obenana bomná inamnama.

*Jesús cachiñe tojánayana cha ibojamna jóbanana y jtayenana ca*  
(Mt 17.22-23; Mc 9.30-32)

Nýetsca entšanga, ndayá Jesús yojtsamama ojanánënga imojtsemnëntscuana, chabe uatsjëndayënga cha tojanëyana: <sup>44</sup> “Quem soye tšabá šmochjouena y ndoñe chacmondëbnëtjomba: Chë Bëngbe Bëtsá Entšá tbojanbemá entsangbe cucuatšifne mochanjáboshjona ca.”

<sup>45</sup> Pero chënga ndoñe yontsörtana ntšamo Jesús yojtsëtsëtsnacá, er Bëngbe Bëtsá ndoñe tonjanaleenciá chama chaósertama; y imojtsauatja Jesús jaimpádana chama chaubuayenama.

*¿Nda chë más uamaná yomna?*  
(Mt 18.1-5; Mc 9.33-37)

<sup>46</sup> Chë tempo, chë uatsjëndayënga tmojanontsé enatsëtsnayana, nda chë más uamaná bëtsemnama. <sup>47</sup> Jesús yojtsetátšëmbo ntšamo chënga imojtsejuabnayama; asna, canýe básetema tbojánishache, chabe juachaca tbojántbema, <sup>48</sup> y chëngbioye tojanëyana: “Nda átšbeñe ošbuachiyá bëtsemnama, quem basetëmbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tšëngaftanguentše chë más nduamaná, cha chë más uamaná entsemna ca.”

*Nda bëngbe contra ndoñe tontsemná, bëngaftaca jtsemnana*  
(Mc 9.38-40)

<sup>49</sup> Juan, Jesúsbioye tbojaniyana: —Buatëmbayá, bënga fsënjinye canýe boyabása y cha aca jótšëmbonëse, entšangbentšana bacna bayëjbe juabna endëtëbuacana; pero cha bëngaftaca ndoñe quenátšmëna causa, chama fsënjesauyaná ca.

<sup>50</sup> As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

*Santiago y Juánbioye Jesús tojanëcácana*

<sup>51</sup> Jesús celoye jtama yojtsobeco ora, nýets añémoca cha yojtsejuabnaye Jerusalenoye jama. <sup>52</sup> Natsana báseftanga tojanichamó, y chënga tmojána canýe base pueblotémoye Samaria luaroca, posada chabíama janguangoñama; <sup>53</sup> pero chë luarentša entsanga ndoñe tmonjábosëna posada juantšamiana, er tmojántatšëmbona cha Jerusalenoye yojétsayama, chë chëngbe uayayëngbe uámana puebloye. <sup>54</sup> Chabe uatsjëndayata, Santiago y Juan, chë soye tbojáninye ora, Jesús tmojaníyana: “Bëngbe Utabná, ¿quetseboše bëndata fchaimandá celocana ifeshe chaótsatše y quem entšanga chaotsapochóyaca?”

<sup>55</sup> Pero Jesús yojobuértana y chátbioye tojtsanëcácana, chca juabna bomna causa. <sup>56</sup> Chentšana chënga inýe pueblotémoye tmojtsanoñe.

*Chë Jesús juastama bošënga*  
(Mt 8.19-22)

<sup>57</sup> Benachëjana imojtsajna ora, canýe boyabása Jesúsbioye tbojaniyana: —Atšbe Utabná, atše sëntseboše aca juastana ndémoye chacojtsá choye ca.

<sup>58</sup> Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftsetëmëngna uajajonëshangá; pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

<sup>59</sup> Jesús inýe entšábioye tbojaniyana: —Smasto ca.

Pero cha tbojanjuá: —Atšbe Utabná, šmolesenciá atšbe taitá chjshesabotbontsañe ca.

<sup>60</sup> As Jesús tbojaníyana: —Chë Bëngbe Bëtsabíama mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe. Acna, motsa y Bëngbe Bëtsabe amëndayama entsanga cochjabuayená ca.

<sup>61</sup> Inýana Jesúsbioye tbojaniyana: —Atšbe Utabná, atše sëntseboše aca juastama, pero šmolesenciá natsana atšbe pamíllangbíama jaisodiósoftama ca.

<sup>62</sup> As Jesús tbojaníyana: —Nda cachabe soyëngama tbojtsengmena, Bëngbe Bëtsabe amëndayocama ndoñe ntoservénana; er cha jtsemnana mo canýe arayacá, chë tojtse-trabája ora, stëtšoye tojtsaisantjësncá ca.

## 10

*Jesús canýsëfta bnëtsana y uta entsanga tojanichamó Bëngbe Bëtsabe soyëngama jábuayenama*

<sup>1</sup> Chë soyënga chentsana, Bëngbe Utabná Jesús inýe canýsëfta bnëtsana y útatnaca tojanabacacá, y utáta chabe natsana tojanichamó, chë cha ibojtsemna jama pueblëngoye y luarëngoye.

<sup>2</sup> Mëntśá chënga tojanëyana: “Canýe bëts jajañe bëtscá játbanama entsemna, pero peonga báseftanga; chíyeca, chentsa nduññioye jaimpádana ba peonga chauichamó chë jaja saná játbanama. Cachcá, quem luarentşe bëtscá entsanga montsemna Bëngbe Bëtsábioye nduabuátmënga, y chëngbioye chabiamá abuayinayënga nýe báseftanga. Chíyeca, Bëngbe Bëtsá moimpadanga ba abuayinayënga chauichamó quem entsanga chábioye júbuajama. <sup>3</sup> Motsajna; şmochjinýe, atşe tşëngaftanga cbontsichamná mo oveshënga cuenta, tjañe queşëngbeñe. <sup>4</sup> Ndoñe şmattsambaye shecnaja, ni crocënana şmattsaiuábuenana, ni she-cochëtjonëshe; y nda chacmojacheuá ora, ndoñe yapa bën chentşe şmatjáisënobiamnaye.

<sup>5</sup> “Ndaye yebnentşe chaşmojámarshjna ora, natsana şmochjayana: ‘Lempe tşabá quem yebnentşe chaotsomñe ca’. <sup>6</sup> Y chë yebnentşe chca juabna bomna entsanga tmomñëna, chë tşabiana ndegombre chentşe echántsemna; pero ndóñese, chca tşabiana chentşe ndóñe queochátsmëna. <sup>7</sup> Canýe yebnentşe şmochjoquéda, y şmochjase y şmochjoşsiye ntşamo chentşe chacmojacaredadaycá; er chë trabajayá mercedo jtsebuájonana chca juácanama. Canýe pueblëntşe nýe inýe y inýe yebnënguenache ndoñe matajnana.

<sup>8</sup> “Ndaye pueblëntşe chaşmojámarshjna y tşabá chacmojúbuajëntşe, şmochjase ntşamo chentşe chacmojacaredadaycá; <sup>9</sup> chentsa şoquënga şmochjáshnaye y şmochjáuyana: ‘Bëngbe Bëtsabe amëndayana tşëngaftangbeñe entsemna ca’. <sup>10</sup> Pero canýe pueblëntşe chaşmojáshjango y ndoñe chacmonjúbuaja, chentsa tsashenangoye şmochjábocana y mëntśá şmochjayana: <sup>11</sup> ‘¡Chë tşëngaftangbe pueblëntşa polvëshe, chë bëngbe shecuatşënguñe tojuanjëshe, camuentşe şcuesenstëtóná, chca, tşëngaftanga chaşmotsetatşëmbuama ndoñe tşabá şmonjamama! Pero masque chca, şmochtsetátşëmbo chë Bëngbe Bëtsabe amëndayana tşëngaftangbeñe entsemnama ca.’ <sup>12</sup> Ndegombre chëyana, quem luare jopochócama te, chë luarentşa entsángbioye Bëngbe Bëtsá puerte jabuache echantsacastigaye, y Sodoma puebloca bacna entsángbioye ndoñe nýa nýetsá jabuache ca” —Jesús tojánayana.

*Chë nduauenana entsanga*

*(Mt 11.20-24)*

<sup>13</sup> “¡Tşa lastema Corazín puebloca entsángbiamá! ¡Tşa lastema Betsaida puebloca entsángbiamá! Er chë muentşe Bëngbe Bëtsabe obenánaca sënjama soyënga, chë bëtş pueblënga Tiro y Sidonoca chca matënjochnënguse, chentsa bacna entsanga ya tempo chëngbe bacna soyëngama ngmënaca matmëntenójuabonga y Bëngbe Bëtsabe benache matmëntishache, y chca tmojamama chaotsótatşëmbuama, uajojësha entsayangaca matmëntopormanga y jatinyashiñe matmënjotbiamá. <sup>14</sup> Pero ntşamo entsanga tmojamama, tşabá o ndoñe tşabá bëtsemnama jayanama chaobjuache ora, tşëngaftanga más bëtş castigo şmochántsebmoma, chë Tiro y Sidonoca bacna entsangbe castiguama. <sup>15</sup> Y tşëngaftanga, Capernaum pueblëntşa entsanga, ¿celóntscoca atşebánanënga şmochtsemna ca şmojtsejuabnanga? ¡Chë uabouana infernoye cmochantsësetjango!

<sup>16</sup> “Nda tşëngaftanga tcmojoyauná, chana atşe joyeunayana; y nda tşëngaftanga tcmojtsëbaté, chana atşe jtsabotena; y nda atşe şojtsaboté, chana chë nda şojichmó chábioye jtsabotena.”

*Chë canýsëfta bnëtsana y uta entsanga tmojtanashhajna*

<sup>17</sup> Chë canýsëfta bnëtsana y útatna Jesús yojtsemnoye tmojtanashhajna, puerte oyejuayënga; y chábioye mëntśá tmojanianaya: —¡Bëngbe Utabná, aca jótşëmbonëse, chë bacna bayëjëgnaca şonjoyauná ca!

<sup>18</sup> Y Jesús tojanëyana: —Ndegombre. Y tşëngaftanga Satanásbioye chca şmontseyëñjaná ora, entsemna mo Satanás celocana canýe tcuinýcá jtsotsatsana stjinyá. <sup>19</sup> Atşna obenana tcbonjatşatá mëtşcuayënga y alacranëngbeñe chaşmotsajnama, y bëngbe uayayá Satanásbe nýets obenana jáyëñjanama, tşëngaftanga ndocá ntjapasacá. <sup>20</sup> Pero móyejuanga, ndoñe chë bacna bayëjënga chacmóyanama obenana şmojtsebmoma, sinó tşëngaftangbe uabaina celoca ya yojtsábëmanama, er tşëngaftanga chë nýetsca tescama yomna tşabe vida şmochántsebmoma ca —cha tojanëyana.

*Jesús puerte tojanoyejúa*

*(Mt 11.25-27; 13.16-17)*

<sup>21</sup> Chora Jesús, chë Uámana Espiritbeyeca, corente oyejuayá tojánayana: “Atşe cbatschuá, Taita, celoca y quem luarentşa Utabná. Aca, chë nýe batśá tatşëmbënga tconjanýanyé, chë

tša tatsšembënga y osertánëngbiama tcojaiytëme soyënga. Aíñe, chama cbontsadorana, Taita, aca chca chaotsemnana tcojábosënayeca.

<sup>22</sup> “Atšbe Taitá lempe chca šonjatšetá. Chë Uaquiñábioye ndocná corente quebnatábuatma; nýe chë Taitá aíñe. Y chë Taitábioye ndocná corente quebnatábuatma; nýe chë Uaquiñá aíñe, y ndëmuanyëngbiaye chë Uaquiñá tojtsebošë nda chë Taitá yomnana jinýañiyama, chëngnaca chë Taitábioye mochantsábuatma ca.”

<sup>23</sup> Chentšana, Jesús chabe uatsjëndayëngbiaye tojanobuértana y nýe chëngbiaye tojanëyana: “¡Puerte oyejuayënga chë ntšamo tšëngaftanga šmontsonýacá jinýama tmojt-sobenënga! <sup>24</sup> Er atše chëyana, banga Bëngbe Bëtsabe juabna oyebuambnayënga y reyënga tmojánbošëna chë tšëngaftanga šmontsonýá soyënga jinýana, pero ndoñe tmonjáninýe; y tmojánbošëna chë šmontsuenana soyënga jouenana, pero ndoñe tmonjanuena ca” —cha tojánayana.

### *Chë Samarioca tšabe entsabiama cuento*

<sup>25</sup> Canýe judiëngbe ley abuatambayá yojontšë Jesúseftaca jóyebuambayama, y jisháchichiyamna mëntšá tbojantjá: —Buatëmbayá, ¿ndayá šojtsemna jamana chë nýetsca tescama yomna tšabe vida jtsebmomna ca?

<sup>26</sup> Y Jesús tbojanjuá: —¿Ntšamo leyinñe iuábemana? ¿Ndayá chiñe condbëtsaliaye ca?

<sup>27</sup> Chë ley abuatambayá tbojanjuá: —“Chë Utabná Bëngbe Bëtsá cochtsebobonshana nýets ainánaca, nýets espíritoca, nýets añémoca y nýets juábnaca”; y “ndëmua entsánaca cochtsebobonshana, ntšamo cach aca cuenobobonshancá ca.”

<sup>28</sup> Chora Jesús tbojanianya: —Tšabá šconjojuá. Chca cochtsama y chë nýetsca tescama yomna tšabe vida cochántsebmomna ca.

<sup>29</sup> Pero chë ley abuatambayá tšabá jenoquédamna Jesúsbiaye tbojantjá: —Y ¿ndase chë ndëmua entsánaca yomna ca?

<sup>30</sup> As Jesús tbojanjuá: —Canýe, Jerusalenocana Jericó benache canýe entsá yojtsetsmá, y básefte salteadorënga imojëbëbocna. Lempe imojtsefca, chë entsáyánaca; imojtsejantšetaye y chentšana imojtsatöñënga, y chë entsá batšá obaná imojëseboshjona. <sup>31</sup> Ndeolpe, chë benachëjana canýe judiëngbe bachna yojtsachnëjuana. Chë entsábioye ibojinýe ora, nýe chabuaacá yojtsëchnëguañe. <sup>32</sup> Cachcá, canýe Levita, chë canýe Bëngbe Bëtsabe bëts yebnoca trabajayá chëjana yojtsachnëjuana; y chë entsábioye ibojinýe orna, nýe chabuaacá yojtsëchnëguañe.

<sup>33</sup> “Chorna, cach benachëjana canýe samaritano ináboye. Chë entsábioye ibojinýe orna, ibojóngmia. <sup>34</sup> Chábioye yojobeconá, aceitiye y vínoyeca ibojáshna, y lisianënguiñe entsëjuaca ibojuantsacjuá. Chabe couayinñe ibojëftsenjayiye, canýe yebnoye posada uyentsámianoye ibojúanatse, y chentše chábioye ibojëftsinýena. <sup>35</sup> Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nýetšá, y chë posada nduifñibioye ibojesabuenaye, y mëntšá ibojaunya: ‘Quem boyabása cochtsinýena, y nderado más crocénana muabiana chacojenábojafjonasna, mëjana chaitisachnëjuana ora, chochjabábsabuenaye ca.’ <sup>36</sup> Y chcasna, chë unganguentsána nda cmojtisinýana chë entsabiama yojtsejuabnaye cha cachacá entsá inamnana ca?”

<sup>37</sup> Y chë ley abuatambayá tbojanjuá: —Chë entsabiama tbojanongmé cha ca.

Y Jesús tbojanianya: —Asna, motsa y cachcá cochjama ca.

### *Jesús, María y Martbe yebnentše*

<sup>38</sup> Chentšana, Jesús benachëjana yojtsaye y canýe base pueblotëmoye tojëftsanamashëngo; y canýe shembása Marta ca uabainá, chabe yebnentše tbojanofja. <sup>39</sup> Martna canýe quenata ibnabomna, María ca uabainá. Cha Jesusbe shecuatšentšë yojótbema chabe palabra jouenama; <sup>40</sup> y chëntscuana Marta ba soyënga yojtsama. Cha Jesúsbiaye tojanobeconá y tbojanianya: —Utabná, ¿tondayana cmontsentšamna, atšbe quenata nýe canýa chašonýá lempe jamana ca? Mëyana chašujabuache ca.

<sup>41</sup> Chora Jesús tbojanjuá: —Marta, Marta, bëtscá soyëngama contsenócochinýena y contsenomantšná; <sup>42</sup> pero nýe canýe soye endmëna chë yoiyta soye jamama. María chca jamama tojobuáyana, chë más tšabe soye, y ndocná queochatsma cha chaotsajbanama ca.

## 11

### *Ntšamo Bëngbe Bëtsáftaca cuanjencuénta*

(Mt 6.9-15; 7.7-11)

<sup>1</sup> Canýe, Jesús Bëngbe Bëtsáftaca ibojtsencuëntaye canýe luarentše. Tojanpochocá orna, canýa chabe uatsjëndayënguentsá tbojanianya: —Bëngbe Utabná, Bëngbe Bëtsáftaca jencuëntama šmabuatambá, ntšamo Juan chabe uatsjëndayëngaftaca tojanmá ca.

<sup>2</sup> Y Jesús tojanëyana: —Bëngbe Bëtsáftaca chašmojtscuënta ora, šmochjayana: Bëngbe Taitá, acbe uabaina chë más uámana uabainana chauesomñe.



Acbe amëndayana chaóshjango.

<sup>3</sup> Ménté šmiyatsatá, cada te šnetsëjaboto tandëse.

<sup>4</sup> Bacna soyënga fsënjama: šmotsaperdónaye;

er bëngnaca nÿetscanga chë bëngbiama bacna soyënga amëngbiöye fsëndbetsaperdónaye.

Bacna soyënga jamama šojocochëngo ora, šcochjubahuache chca ndenobuiyama.

<sup>5</sup> Jesús mentsánaca tojanëyana: “Nderado aca acbe bacóbiöye tsëntseto ora tcojá y tcojauyana: ‘Bacó, Diosmanda unga tandëse šmotsemná, <sup>6</sup> er canÿe atšbe amigo yebnoca tonjáshjango y tondaye quetsátsbomna cha jonánjama ca.’ <sup>7</sup> Ndegombre, cha tsocana tcmojojúa: ‘Ndoñe šmatébeyabomana. Bëšáša ya entsatámena y atše y atšbe básenga ya fsëntsocjá; ndoñe quetsátobena mora jotsbanana y chë tandëse jámnana ca.’ <sup>8</sup> Ndegombre, chë bacó ndoñe tonjotsbaná chë tandëse jámnana, cháftaca šuenatsëtsnámase, cha pronto jotsbanana chca uébëyabomana ndoñe tconjabaná causa, y lempe ntšamo cmojisajabotcá cha cmochanjöyie. <sup>9</sup> Chcasna, atše chëyana: Smochjotjañe y Bëngbe Bëtsá cmochanjátataye; smochjánguango y smochanjinyëna; smochjachembo y cmochanjébëtafo. <sup>10</sup> Er ndánaca ndayá tojtsotjanañá, jóyëngacñana; y tojtsenguá cha, jónÿenana; y nda tojtsechembuanáböyie jebiatëfjuana ca.

<sup>11</sup> “Nda tsëngaftanguentšana nantsobena, taitá tojtsemnëse, cachabe uaquiñáböyie canÿe mëtšcuaye jatšayana, beona tbojtsotjanañe ora; <sup>12</sup> o canÿe alacránashe joyiyana, shëmnëbë tbojtsotjanañe ora? <sup>13</sup> Y chca, tsëngaftanga, bacna soyënga amënga, tsëngaftangbe basatemëngbiöye tsabe soyënga jatšatayama šmojtsamanëse, jmás chë celoca Taitá, chë Uámana Espiritu echanjátataye, chca tmojtsotjanañëngbiöye ca!” —Jesús tojánayana.

*Fariseunga tmojánayana Jesús Satanásbentsána obenana tojanóyëngacñe ca  
(Mt 12.22-30; Mc 3.20-27)*

<sup>14</sup> Jesús canÿe entsábentsána canÿe bacna bayëja tbojtjanábocna. Chë bayëja ndëbiá chë entsáböyie tbojánbema, y chábensána tojésanbocna ora, chë ndëbiá tojtantonstë oyebuambnayana. Y chë entsanga chama imojenjnaná; <sup>15</sup> pero báseftanga imojtsichamo: “Beelzebú, cach Satanás, chë bacna bayëjëngbe amëndayá, quem boyabásaböyie obenana tbojatsetá chë bayëjënga chauatëbuacnama ca.”

<sup>16</sup> Y inÿenga, Jesús jisháchichiyamna tmojanimpadá canÿe bëtš soye chaoma, jinÿanÿiyama cha celoca obenana inabomna o ndoñe. <sup>17</sup> Pero Jesús yojtsetátšëmo ntšamo chëngbe juabna bëtsemnana. As tojanëyana: “Canÿe amëndayábentšë entsanga tmojtsenojátá y tmojtsenáyase, cachënga jtsenpochócana; y canÿe yebnentšë oyenënga tmojtsenojátá y tmojtsenáyase, chë pamúllanga tsábá nÿets tempo ndoñe quemochátsmëna. <sup>18</sup> Cachcá, Satanás tojtsenojátá y cachabe contra tojtsemnëse, ¿ntšamo nantsobena chabe mándayana quem luarentšë jëftsebmomna? Chca sëntsichamo, er tsëngaftanga šmontsichamo Beelzebube obenánaca chë bayëjënga tsatëbuacana ca; <sup>19</sup> pero chca ndegombre tojtsemnëse, ¿ndábeyeca tsëngaftangbe usetonënga obenana imojtsebmomna chë bacna bayëjënga jtëbuacnama? Chiyecna, cachënga montsinÿinÿná ntšamo ndegombre yomnana, y tsëngaftanga ndoñe ndegombre soye šmontsichámuama. <sup>20</sup> Y atšna, Bëngbe Bëtsabe obenánaca entsángbentsána chë bayëjënga sëndëtëbuacana; y chë soye entsinÿinÿná, Bëngbe Bëtsabe amëndayana tsëngaftangbiöye tojóshjanguama.

<sup>21</sup> “Canÿe corente añemo bomna entsá, bëtscá ármangaca chabe yebna tojtsinÿenëse, chë tsoca tomna soyënga ndoñe ntjotšana. <sup>22</sup> Pero inÿa chabiama más añemo bomná tojabo y tojabetseyëñaná, chë cha yojanašbuachë armangá jtsabocana y chë tobomna sóynaca; y ntšamo chë inÿa tojtsebošcá chë soyëngaca jamana.

<sup>23</sup> “Nda ndoñe átšëftaca tontsemná, atšbe uayayá jtsemnana. Y nda átšëftaca ndoñe tontsetrabája, chana atšbe contra jtsetrabájayana ca” —Jesús tojánayana.

*Ndayá inopása chë bacna entsánggaftaca  
(Mt 12.43-45)*

<sup>24</sup> “Canÿe bacna bayëja canÿe entsábentsána tojésebmocna ora, bojojo luarënguénache chë bayëja jtsanana, ndayentšë jóchnama onguayinë. Ndoñe tonjinÿyana ora, jenójuaboyana: ‘Atšbe oyenoye, chë ndayentsána sënjëftsebmocnoye chanjesshécona ca.’ <sup>25</sup> Y choye tojtashjango ora, jinÿenana lempe tsábá cha jtesamashënguama, mo tsajniñe y prontániñe cuafstsemncá. <sup>26</sup> Chora chë bayëja jana y inÿe canÿsëfta bayëjënga, chabiama más opëjënga jobiatšana, nÿetscanga choye jamashjnama, chë boyabásabeñe joyënanama. Y chca, chë boyabása tempscama más bacna entsá jtoquédana, chora chë natsanama más bayëjënga abamna causa ca” —Jesús tojánayana.

*Chë ndegombre oyejuayana*

<sup>27</sup> Jesús chë soyënga yojtsichamëntscuana, entšanguentše canye shembása yoyuayebuáchena: —¡Puerte oyejuayá chë quem luaroye tcmojúshjango y tcmojéftseboché shembása ca!

<sup>28</sup> As Jesús tbojanianana: —Más oyejuayana bomnënga, chë Bëngbe Bëtsabe palabra tmojouena y chca tmojtamënga ca.

*Chë bacna entšanga Jesús tmojanimpadá canye bëts soye chaoma, chabe obenana jinýama (Mt 12.38-42; Mc 8.12)*

<sup>29</sup> Entšanga más imojtsójoye Jesús yojtsemnentše, y Jesús tojanontsé jáuyanana: “Morsca entšanga puerte bacna entšanga; chënga montsotjanañe atše canye bëts soye chaima atšbe obenana jinýama, pero ndoñe chca quemochátinýe, sinó nýe chë ndayá yomna mo chë Jonásoftaca tojanopasá soyca. <sup>30</sup> Er chca, ntšamo Jonás Nínive pueblocu entšanga canye bëts soye tojaninýanýe Bëngbe Bëtsá obená yomnama chamotsetatšëmbuama, chë Bëngbe Bëtsá Entšá tbojanbemánaca entsinýanýná morsca entšángbioye, Bëngbe Bëtsabe amëndayana tojóshjanguama. <sup>31</sup> Bëngbe Bëtsá ntšamo morsca entšanga tmojanmama yochjayana te, chë Sur luaroca reiná echanjotsaye y morsca entšangbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrenga jouenama, y chë mora muentše entsemnana, Salomonbiama más uamaná endmëna. <sup>32</sup> Chë entšanga tšabá o ndoñe tšabá tmonjamama jayanama te, chë Nínive bëts pueblocu entšángnaca mochanjotsaye y mochanjayana morsca entšanga ndoñe tšabá tmonjama ca; er chënga, Jonás yojtsabuayinýe ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna ca” —Jesús tojánayana.

*Chë cuerpama uajuinýanësha (Mt 5.15; 6.22-23)*

<sup>33</sup> “Ndocná canye uajuinýanësha juajuinýenana, canye iytëmena luaroye juajájuama, ni canye cajonëshe tajsoye, sinó canye tšbanana luaroca juajájuama, chca, chë luaroye amashjuanëngbiama chaotsebinýnama. <sup>34</sup> Acbe bominýe tšabá totsomñëse, acbe cuerpama mo canye uajuinýanëshacá jtsemnana; chiyeca aca jtsobenana, ntšamo tcojtsamcá chë bominýeca jtsonýayana. Chë bominýe ndoñe tšabá tontsemnëšna, chë bominýe tondaye ntšobenana jamana, ntšamo tcojtsamcá chacobená jinýama. Cachcá, acbe ainaniñe tšabe juabnënga tcojtsebmñëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebmñëšna, lempe ntšamo chacojtsamcá ndoñe tšabá queochátsmëna. <sup>35</sup> Cuedado šmochtsebmna, tšëngaftange ainaniñe nýe tšabe juabnënga chaotsemnana, chca, lempe ntšamo chašmojtsamcá tšabá chaotsemnana, y bacna juabnënga ndoñe chaondëtsemnana. <sup>36</sup> Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canye uajuinýanësha puerte tšabá tojtsebinýnacá ca” —Jesús tojánayana.

*Jesús chë fariseungbiama y ley abuátambayëngbiama tojánayana, chënga ndoñe tšabá montsama ca*

*(Mt 23.1-36; Mc 12.38-40; Lc 20.45-47)*

<sup>37</sup> Jesús chca jayanama tojanpochocá ora, chábioye canye fariseo tbojanofja chabe yebnoye jauasama. As Jesús tojánamashëngo y mesëshentše tojanótbema. <sup>38</sup> Chë fariseo tojanëuatjaná, Jesús ntsacuentšabiaca jasama yojontsé causa, ndoñe ntšamo chë judiënga tojanamancá, Bëngbe Bëtsabe delante tšábenga jtsatsmënama. <sup>39</sup> Pero Bëngbe Utabná tbojanianana: “Tšëngaftanga fariseunga šmondmëna mo entšangcá ndëmuanyënga chë tazëšënga y šcnenënga shjoicajana jtsóbojabiana, pero tsoyna nýe cachcá jonýayana. Tšëngaftanga becá jtsamana entšangbiama mo tšabengcá jtsinýnama; pero tšëngaftange ainanentše jútjena entsemna nýe jtsatbëbanama y bacna soyënga jtsamana juabnëngaca. <sup>40</sup> ¡Juabna ndbomnënga! Tšëngaftanga ndoñe šmondëtatšëmbo, chë tšëngaftangbentšana entšanga ndayá jinýama imobencá tojamá, chë tšëngaftange tsoye yomna soyëngnaca tojamama; y chiyeca, chabiama cachcá enduámana ndayá tšëngaftange ainanoye yomna soyënga, y chë entšange delante šmojana soyënga. <sup>41</sup> Tšëngaftanga cmontsamna, chë soyënguñe ndayá ainaniñe yomnentsána inýëngbioye jatšatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

<sup>42</sup> “Tša lastema tšëngaftangbiama fariseunga! Tšëngaftanga Bëngbe Bëtsabiama jtse-quëcnayana chë jajañentša sananga bnëtsanentšana canye soye nyëtsá, y chë binche matatëmënguentšana menta, ruda y nyëtsca binche matatëmënguentšánëšna; pero nýe

batśá jtsamana chë nyetscanga cachca derechënga chamotsebmomna y cha jtsebomnshánama. Quem soyënga cocayé cmontsamna jtsamana, chë inye tsabe soyënga ntjajbanacá ca.

<sup>43</sup> “¡Tśa lastema tsëngaftangbiama fariseunga! Tsëngaftanga tśa jtsebošana chë judiëngbe enefjuana yebnënguenache chë más uámana luarënga jtsebmomna, y benachiñe nya puerte respétoca entsänga chacmotsacheuanayama ca.

<sup>44</sup> “¡Tśa lastema tsëngaftangbiama! Smondmëna mo obanënga uatbontsaniñcá, ndoñe ntsinynana, y entsänga ntsetatšëmbcá chiñe jtsebotájayana. Chca šmondmëna, er tsëngaftangbe ainana entsemna jútjena bacna juabnëngaca, pero entsangbiama ndoñe chca quešmátinyna ca.”

<sup>45</sup> Jesús chca tojánayana ora, canye ley abuatambayá tbojanianya: —Buatëmbayá, chca palabrënga contsoyebuambná ora, bëngbiámnaca ndoñe tsábá quecátichamo ca.

<sup>46</sup> Pero Jesús tojánayana: —¡Tśa lastema tsëngaftangbiámnaca, chë ley abuátambayënga! Mo canye entsá, couáybioye canye uauta uasmanësha tbojuasmá, y chësha ndoñe yapa chaondëtsautama tondaye tontsmcá, tsëngaftanga entsángbioye jtsamëndayana bëtscá mandënga chamotsocumplínama, pero cach tsëngaftanga ni mo batśatëmnaca jtsamana chë mandënga jtsocumplínama ca.

<sup>47</sup> “¡Tśa lastema tsëngaftangbiama! Tsëngaftanga jtsamana chë Bëngbe Bëtsabe juabna oyeuambnayënga tempsquënga bëtsetsa entsänga chamotsemnana, chëngbe cuevëshënga jtsatspórmayëse; pero chë mo chëngcá, canye buayenana sóyeca tmojabëngbioye ndoñe ntsayaunanana. Y chë tempsquënga chca oyeuambnayëngbioye tsëngaftangbe bëtš taitanga tmojtsanëbaye. <sup>48</sup> Chca jtsamëse, tsëngaftanga šmontsinynáná, ntśamo chë bëtš taitanga tmojanmá tsábá yomna ca tsëngaftanga šmojtsejuabnama, er chënga chë oyeuambnayëngbioye tmojtsanëbaye y tsëngaftangna chëngbe cuevëshënga jtsatspórmayana.

<sup>49</sup> “Chíyeca, Bëngbe Bëtśa chabe bëtš osertanánaca tojánayana: ‘Atšë chëngbioye chanjichamú atšbe juabna oyeuambnayënga y atšbiama abuayinayënga, y báseftangbioye mochantsëbaye y inýengbioyna mochantsécamiye ca.’ <sup>50</sup> Y chca, nyets castigo morsca entsángbeñe echántsemna, nyetsca Bëngbe Bëtsabe juabna oyeuambnayënga tmojóbanama, Bëngbe Bëtśa quem luare tojanma orscana; <sup>51</sup> Abélbioye tbojanóba orscana, Zacarías tmojanóbscoñe. Zacaríasna Bëngbe Bëtsabe bëtš yebnëntšë tmojanóba, altar y chë entsänga Bëngbe Bëtśábioye imojánadorana luariñe. Chcasna, Bëngbe Bëtśa echanjama chë oyeuambnayënga tmojanóbanama, morsca entsángbeñe nyets castigo chaotsemnana ca.

<sup>52</sup> “¡Tśa lastema tsëngaftangbiama, chë ley abuátambayënga! Tsëngaftanga jtsamana, Bëngbe Bëtsabe soyëngama jtsetatšëmbuama entsangbiama yapa totcá chaotsemnana. Cach tsëngaftanga ndoñe quešmátobena chë soyëngama tsábá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

<sup>53</sup> Jesús chë soyënga tojánayanama, chë ley abuátambayënga y fariseunga puerte tojánëtëna, y cha chentsana yojtsaisebocana ora, tmojanontšë chábioye becá tjanayana, y imojtsama ba soyëngama chaóyeuambama, <sup>54</sup> chca, jisháchichiyama jtsebošëse, cachá ntśamo tojayana sóyeca chënga jtsebmomna ndáyeca chábioye mal jaquédana.

## 12

*Jesús, chë bacna entsänga ntśamo ndegombre tmojuabnacá ndinýinynayëngbiama tojanabuatambá*

<sup>1</sup> Chëntscuana, ba uaranga entsänga chentšë tmojanójoto; tśa entsänga causa, nyetscanga imojtsenatsëntsenaye. Chora Jesús tojanontšë jóyeuambayama, y natsana chabe uatsjëndayëngbioye tojanëyana: “Chë fariseungbe buatëmbana soyëngama cuedado šmochtebmomna, chënga mondmëna bacna entsänga, ntśamo ndegombre tmojuabnacá ndinýinynayënga. Ntśamo chë levadura jamana nyetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entsänga ntśamo ndoñe tsábá tontsemncá chamotsamama. <sup>2</sup> Er ndocna yoiytëmena soye, ntjinyá queochaisoquéda; y chë ndótatšëmba soye, ntsoatšëmbcá queochaisoquéda. <sup>3</sup> Chíyeca, chë mora nye tsëngaftangbiama šmojtsichamo soyënga, chë entsangbiama mo ibetiñcá cuaftebmomna soyënga, entsänga chama botamana mochanjátatšëmbona. Y chë iytëcana šmojtsichamo soyënga, nyetsca entsángbioye mochantsabuayinaye, mo nda canye yebnëntšá tsbanánocana noticiënga tojtsaye buachcá ca” —cha tojanëyana.

*Nda ndegombre cuantsebiauatja*  
(Mt 10.26-31)

<sup>4</sup> “Tsëngaftanga, atšbe amiguënga, cbochjáuyana: Ndoñe matauatjëngana nye chë tsëngaftangbe cuerpo japochoçama imobenëngbiama, pero chentsana más jamana ndoñe ntsobenana. <sup>5</sup> Cbochanjabuayená ndábioye cmojtsamna jtsebiauatjana:

šmochtsebiauatja chë nda vida jtsabuajuánama y chentšana infiernoye jtsichámuama obenana endbomnábioye; chábioye cocayé šmochtsebiauatja ca.

<sup>6</sup> “¿Shachna jaja shloftšetémenga ndoñe nýe uta denario crocenánama mondbétsena? Pero masque chca, Bëngbe Bëtsá chëngbiama sempre jesenójuabnayana. <sup>7</sup> Y tsëngaftangbiama Bëngbe Bëtsá lempe endëtatsëmbo, y bueta stjënëjenga tsëngaftangbe bestšašine yomnámnaca. As ndoñe matauatjengana; tsëngaftanga ba jaja shloftšëngbiama corente más šmonduámana ca” —Jesús tojánayana.

*Ndabiama Jesucristo yochjayana chabe entsá yomna ca*  
(Mt 10.32-33; 12.32; 10.19-20)

<sup>8</sup> “Atše cbëyana, nda atšbe entsá yomna ca entsangbe delante tojayanabiama, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entsá chabia yomna ca; <sup>9</sup> pero nda entsangbe delante, atšbe entsá ndoñe yondmëna ca tojayanabiama, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entsá ndoñe yondmëna ca.

<sup>10</sup> “Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiama ndoñe tsábá tontsichamuábioye, pero chë Uámana Espiritibiama ndoñe tsábá tontsichamuábioyna ndoñe.

<sup>11</sup> “Tsëngaftanga chë judiëngbe enefjuana yebnëngoye, ntšamo entsanga bétsamama ichámëngbioye y mandadëngbioye chacmojunatse ora, ndoñe šmattsenócochinýena ntšamo o ndáyaca šmochjeyuyanama, o ndáyá šmochjayanama; <sup>12</sup> er chë Uámana Espiritu cmochanjabuayená ntšamo jayanama tojtsemncá, jóyebuambayama chacmojtšamna ora ca” —Jesús tojánayana.

*Entšabiama resjo yomna, nýe yapa bomnana jesejuabayana*

<sup>13</sup> Chentšana, canýa entsanguentsá Jesúsbioye tbojanianyana: —Buatëmbayá, atšbe catšata momandá chë átšbioye otocana soyënga chašuatoyé ca.

<sup>14</sup> Y Jesús tbojanianyana: —Bacó, ¿nda atšbe šojábema tsëndatbe ujetanayá ca?

<sup>15</sup> Y entsángbioye tojanéyana: —Smochjinýe y cuedado šmochtsebmoma chë nýe yapa soyënga jtsebmomama bošama; er masque bëtscá soyënga chašmotsóbmñe, chca ndoñe quešmochátstatsëmbo aïne tsabe vida taišmochjónýenama ca.

<sup>16</sup> Y chora mëntšá tojanacuntá: “Inamna canýe bomna entsá, y chabe fshantsënguine tša jaja saná yojtsopodena. <sup>17</sup> Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbmoma ndayentše atšbe jaja saná jtsobocjayama ca.’ <sup>18</sup> Y mëntšá tojanéyana: ‘Chë grano uaquëcjnaye yebnënga chantsendbiama, y inýe más bëts yebnënga chanjëtšjebo, y chiñe nyëtca atšbe jaja saná chantsóbocjaye y nyëtca atšbe soyëngnaca. <sup>19</sup> Y chora atšbe chjeniyana: Bacó, bëtscá soyënga contsebocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyeyuaye ca.’ <sup>20</sup> Pero Bëngbe Bëtsá chábioye ibojauyana: ‘Obëjema, cach quem ibeta cochanjóbana; y asna, chë contsebocjana soye, ¿ndabiama yochtsemna ca?’”

<sup>21</sup> Y Jesús chora tojánayana: “Chca endbopása chë nýe chabiama bomnana tojtsejuabá y bëtsá Bëngbe Bëtsabe soyënga ndoñe tonjëtsashjacháftaca ca.”

*Bëngbe Bëtsá chabe básenga jtsanýenana*  
(Mt 6.25-34)

<sup>22</sup> Chentšana, Jesús chabe uatsjëndayënga tojanéyana: “Quem soye cbëyana: Ndoñe šmattsenócochinýena ndáyá šmochjase o šmochjóšiyë vida jtsebmomama, ni ndaye entsáyá šmochjuichëtjuama cach ndoñe. <sup>23</sup> Ndegombre, vida chë sanama más enduámana y cuerpo chë entsáyama más. <sup>24</sup> Chë ftsenga shloftšënga šmochjanýe: tondaye ntjájena, ni jaja saná ntjátbanana, ni grano uaquëcjnaye yebnënga ntsebmomana; pero Bëngbe Bëtsá chënga saná jtsatšatnayana. ¡Y tsëngaftanga chë ftsenga shloftšëngbiama puerte más šmonduámana! <sup>25</sup> Masque chca endmëna, masque canýa tša tojesenócochinýena, ¿ntšamo nanjobenaye jamana, chë ntsachetšá vida yochtsebmomentsana canýe hora vida más jabotiyana? <sup>26</sup> Chcasna, nýe chë base soye jamama ndoñe šmontsobenëse, ¿ndayama chë inýe soyëngama šmochjatenócochinýena?”

<sup>27</sup> “Smochjuinýe chë lirio uantšëfjushangá jtsajuajnana: ndoñe ntsetrabájayana, ni ntseshabiamnayana. Pero atšbe cbëyana, ndegombre ni mo rey Salomón, nyëtca chabe bomnánaca, chë lirio uantšëfjushangacá nyëtšá botamana quenjatspormana. <sup>28</sup> Bëngbe Bëtsá tša botamana shácua tojuama, y chë shácuaa mënté jajoca jtsammana y yëfsana iñoca. Cha chë shácuanaca chca tojamëse, ndegombre tsëngaftangbiámna Bëngbe Bëtsá echanjama entsáyá chašmotsábmomama, jëntšanga Bëngbe Bëtsábeñe nýe batsá ošbuáchiyënga! <sup>29</sup> Chiyeca, ndoñe šmattsenócochinýena ndáyá jasama o jofšiyama onguayíñe; <sup>30</sup> er chë soyëngama quem luarentša entsanga mondbétsenocochinýena, pero

tšëngaftanga ndoñe. Tšëngaftangna canye Taitá šmondobomna, y cha endětatsšëmbo ndayá cmëjabótama. <sup>31</sup> Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtsëjaboto soyënga nye šmochanjóyëngacñe ca” —Jesús tojánayana.

*Chë celoca bomnana  
(Mt 6.19-21)*

<sup>32</sup> “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuínýnana chabe amëndayana tšëngaftanga jatšatayama. <sup>33</sup> Lempe ntšamo šmobomncá šmochtsatobuiye y chë ujabotëngbioye šmochtsatsataye. Mo ndotanguánaye shecnajiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; <sup>34</sup> er chë ndayentšë tšëngaftangbe bomnana tojtsemntšá soyëngama, ainánaca tšëngaftanga šmochántsejuabnaye ca” —Jesús tojánayana.

*Bëngbe Utabná yochjésabama jtseprontánana*

<sup>35</sup> “Mo chë oservénënga, chë entsáyá uichëtjonënga y uajuínýananëshangaca chëngbe nduiño yochtashjanguama cuafstobatmancá, tšëngaftanga šmochtseprontana Bëngbe Utabná yochjésabama. <sup>36</sup> Chca, tšëngaftanga šmochántsemna mo chë oservénënga, tšabe entsáyaca bopormánënga y uajuínýananëshangaca chëngbe amëndayá casamentocana yochtashjanguama cuafstobatmancá; y chca, chë nduiño tojabochembo ora, cachora chë oservénënga jtebiatëfjuama. <sup>37</sup> Puerte oyejuayënga chë oservénënga, chë nduiño tojtashjango ora tmojtsefsnënga. Ndegombre cbëyana, chora chë mandayá sëndorëche echantšnaye, mesëshentšë chë oservénënga echanjábima, y saná echanjuuatšiyë. <sup>38</sup> Puerte oyejuayënga chënga, chë tmojtsefsnënga cha tojtashjango ora, masque tséntseto ora o bínýanoyë. <sup>39</sup> Quem soye tšabá chacmësértá: chë yebnentša nduiño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama. <sup>40</sup> Tšëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entsānga chama tondaye tmontsejuabná ora ca” —Jesús tojánayana.

*Chë tšabe oservená y chë bacna oservená  
(Mt 24.45-51)*

<sup>41</sup> Pedro, Jesúsbioye tbojanayana: —Utabná, ¿chë tconjayana cuento nye bëngbiana o nyetscangbiana yochtsemna ca?

<sup>42</sup> Y Bëngbe Utabná tbojanjá: —¿Nda yomna chë oservená, ntšamo chë nduiño tojtsebošcá amá y nyets juábnaca amá? Cha jtsemnana nda chë nduiño bochjëftsebošhona chë yebnentšënga chaotsanýenama, y jasama tojtsemna ora chaújuatsema. <sup>43</sup> Puerte oyejuayá chë oservená, chë nduiño tojtashjango ora, cha tbojínýena jtsamëse ntšamo tbojtsemncá. <sup>44</sup> Ndegombre cbëyana, chë nduiño chábioye bochanjaimpáda nyetsca chabe soyënga chabotsinýëñama. <sup>45</sup> Pero chë oservená, chabe nduiño betseco ndoñe yochantabo ca tojtsejuabná, y tojontšë chë inýe oservénënga, boyabásenga y shembásenga jtsajantšetayana, becá jtsesana, jofšiyana y jtsótmenana, <sup>46</sup> cha ndoñe tontsejuabná te y tontsetátšëmbo ora, chabe nduiño echántashjango y puerte jabuache bochantsecastiga, y echanjama cha jasúfriama chabotsemnana, mo chë Bëngbe Bëtsábeñe ndošbuáchiyënga mochanjasufriacá.

<sup>47</sup> “Chë oservená, nda tojtsetátšëmbo ndayá chë nduiño tojtsebošama, pero ndoñe tontsetprontana y ndoñe tontsobedecena, cha ba soye mochántsetjanja. <sup>48</sup> Y chë oservená, ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnëna, chana más batšá mochántsetjanja. Nda bëtscá soyënga tmojattšábioye jauyanana, bëtscá soyënga chaoma ca; y nda bëtš trabajo tmojabonýëbioyna jauyanana, más bëtš trabajo chaoma ca.”

*Jesube causa, entšángbeñe más jtsentsjanayana  
(Mt 10.34-36)*

<sup>49</sup> “Atše sënjabo quem luariñe jabojuínýiyama, y jtša sëntseboše malaye ya ctsangbototjuana! <sup>50</sup> Atše šontsemna puerte jasúfriana, y ipuerte ngménaca sëntsobátmana chca chaotsemnana! <sup>51</sup> ¿Tšëngaftanga šmojtsejuabná atše tijabo quem luarentšë entsānga natjëmbana chamotsiyenama? Ndegombre ndoñe chca queochátšmëna; atše sënjabo causa, entsānga más mochántsejtsanaye. <sup>52</sup> Er mëntescana, canye yebnentšë, shachnënga ndoñe quemochátënyeyunana, únganga útatbe contra y útata úngangbe contra mochántsemna. <sup>53</sup> Taitá uaquínabe contra echántsemna, y uaquíná taitabe contra; bebmá, bembëbe contra, y bembe bebmabe contra; uambén mamá, bebinuabe contra, y bebinuá uambén mamabe contra ca” —cha tojánayana.

*Ndaye tempo yochtsemnama ntšamo inétsotatšëmbo  
(Mt 16.1-4; Mc 8.11-13)*

<sup>54</sup> Měntšánaca Jesús entsanga tojaněyana: “Tšěngaftanga, chě jantšetëshěnga shině ue-natjěmbambanoicana tojóboचना श्मोजिन्ये ora šmondbétšichamo ‘echanjuafé ca’, y ndegombre chca jopásana. <sup>55</sup> Y tsmanoicana tojtsebínýia orna, tšěngaftanga šmondbétšichamo ‘echanjuěnyana ca’, y ndegombre chca jopásana. <sup>56</sup> Bacna entsanga, chě ntšamo ndegombre šmojuabnacá ndinýinýayěnga! Ntšamo quem luarentše yochtsemnama, ndayá celoca šmojinýama tša tšabá šmojtsetatšěmběse, žndáyeca ndoñe šmontsobena jtsetatšěmbuana ndaye bėts soye quem tempo Běngbe Bėtsá cmojtsinýanýnama ca?” —Jesús tojánayana.

*Chě uayayáftaca natjěmbana jtenbemana  
(Mt 5.25-26)*

<sup>57</sup> “Žndáyeca cach tšěngaftanga ndoñe šmondbáyana ndayá tšabá bétsemnana? <sup>58</sup> Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betso cháftaca cochtenoyántsia. Chca ndóñese, chě demandayá mandádbioye cmochanjúshjango, chě mandadna josticiěngbe cucuatšife cmochanjáboshjona, y chěnga cárceleye cmochanjutame. <sup>59</sup> Ndegombre chěyana, chentšana ndoñe quecochtětsbocna, nýets ndebénana candesopagantscuana ca” —Jesús tojánayana.

## 13

*Běngbe Bėtsabe benache jtishachana*

<sup>1</sup> Cach ora, báseftanga tmojána Jesús jinýama, y tmojancuentá ndayá chě mandado Pilato tojanmama; chana básefta Galileoca boyabásenga tojtsaněbaye, y chěngbe buíñe yojenajuabó chě Běngbe Bėtsábioye jětschuayama tmojanóba bayěngbe buíñeca.

<sup>2</sup> Y Jesús chěnga tojaněyana: “Žtšěngaftanga šmojtsejuabná, chě Galileoca entsanga chca tmojapasá, chě luarentša inýe boyabásengbiana chěnga más bacna soye aměnga imojamna causa ca? <sup>3</sup> Ndegombre chěyana, ndoñe. Y cach tšěngaftanga, bacna soyěnga amama ndoñe šmontsajbaná y Běngbe Bėtsabe benache ndoñe šmontishachěse, tšěngaftágnaca šmochanjóbana. <sup>4</sup> O, žtšěngaftanga šmnětsejuabnaye, chě Jerusalenentša bnětsana posufta entsanga tmojanóbaněnga, chě Jerusalenoca binche uafjajónaye Siloé béconana tšbanana jebna soye tojtsanáshajaye ora, chěnga imojamna chě inýenga Jerusalenentše oyeněngbiana más bacna soyěnga aměnga ca? <sup>5</sup> Ndegombre chěyana, ndoñe. Y cach tšěngaftanga, bacna soyěnga amama ndoñe šmontsajbaná y Běngbe Bėtsabe benache ndoñe šmontishachěse, tšěngaftágnaca šmochanjóbana ca” —Jesús tojaněyana.

*Chě nděshajona higo betiyama cuento*

<sup>6</sup> Jesús mēntšá tojanacuntá jabuátambama: “Canýe entšá jajoca canýe higo betiye in-abomna, y yojá nderado nantseshájonama, pero tondaye yonjinýena. <sup>7</sup> Chcasna, chě jajañe bojanýabioye cha ibojauyana: ‘Mouena, ya unga uata tsabó quem higo betiyoeye jaborrepárama, nderado nantseshájonama, pero ndocna te tondaye chiyátinýena; chiyeca, motsetětše. Žndayama quem jajañe yochjátsjena ca?’ <sup>8</sup> Pero chě jajañe inýená ibojauyana: ‘Bacó, inýe uata cachcá monýá, fshantse chanjáboplojua y uanguněshe chanjabotboto. <sup>9</sup> Nderado chca jaměse, nanjashájona; y ndóñesna, chora cocayé cuantsetětše ca.’”

*Jesús canýe ochnayté, canýe tsěštjona shembásabioye tbojanshná*

<sup>10</sup> Canýe, canýe ochnayté Jesús yojontšě entsanga jabuátambana, chě judiěngbe enefjuana yebnentše, <sup>11</sup> y chentše yojtsemna canýe shembása; cha ya bnětsana posufta uata yojtsesoca. Canýe bacna bayěja chábeñe tojánamashěngo y chca tseštjoná tbojtsanbema, y tondayama yontsobena jtondiríchana. <sup>12</sup> Jesús chábioye tbojanínýe ora, tbojanchembo y mēntšá tbojanýana: “Batá, mora ya ndoñe socá quecátsměna ca.”

<sup>13</sup> Chora Jesús chabe cucuatšěnga chábeñe tojanjajó, y cachora chě shembása yojtondiricha, y tojanontšě Běngbe Bėtsábioye jětschuayama. <sup>14</sup> Pero chě enefjuana yebnentša mándayana tbojánetna, Jesús chě shembása ochnayté tbojanshnama, y entsanga tojaněyana: —Chněnguana te comna jatrabájama; chora šmochjabo jenóshnama; ochnaytese ndoñe ca.

<sup>15</sup> Y Běngbe Utabná tbojanjá: —Bacna entsanga, ntšamo ndegombre šmojuabnacá ndinýinýayěnga! Žtšěngaftanguentšá ndocná chě ochnayté chabe uacná o chabe bur-rotema buanjuaafjoná, juanatsama bėjaye chaofšema? <sup>16</sup> Chcasna, quem shembása, canýe Abraháměntšana entšá, y Satanasbe causa bnětsana posufta uata socá yojtsemna, žndoñe tšabá yondměna canýe ochnayté chě bayěja jtsebojuánana ca?

<sup>17</sup> Jesús chca tojánayana ora, chabe uayayěnga imojtsěuatja, y nýetsca entsanga imojtsěoyuaye Jesús tša bėts soyěnga yojtsamama.

*Chě mostaztiye jenayama cuento  
(Mt 13.31-32; Mc 4.30-32)*

<sup>18</sup> Jesús mēntśánaca tojánayana: “¿Ndayacá Bēngbe Bētsabe amēndayana yomna, o ndaye sóyeca nanjopódia chama jábuayenana ca? <sup>19</sup> Endmēna mo canye mostaza jénaye, canye entśá jajañe tojajecá; chiyna jójuana y canye bēts betiye jóbemana; tśa bētsashe jóbemana, chíyeca chē jaja shloftśēnga chē buacuashēnguiñe uajajonēmēngá jauábopormana ca.”

### *Chē levadurama cuento*

(Mt 13.33)

<sup>20</sup> Mēntśánaca Jesús tojánayana: “¿Ndaye sóyeca chjobenaye Bēngbe Bētsabe amēndayama jábuayenama ca? <sup>21</sup> Endmēna mo levadurcá; canye shembása chana jenájua bana unga medida arninýañe, nyetsana chauabochama ca.”

### *Chē base utēntśá bēśása*

(Mt 7.13-14, 21-23)

<sup>22</sup> Jerusalemoye benache, Jesús entśanga yojtsabuátambaye bēts pueblēnguiñe y base pueblotēmēnguiñe. <sup>23</sup> Canya chábioye tbojantjá: —Bēngbe Utabná, ¿nye báseftanga imomna chē atsebácanēnga mochtse mnēnga ca?

Y Jesús tbojanjá: <sup>24</sup> —Puerte šmochtse ntśena chē base utēntśá bēśásajana jamashjnama; er ndegombre chēyana, banga mochántseboše chējana jamashjnama, pero ndoñe quemochatobenaye. <sup>25</sup> Chē yebnentśa nduiño chaojotsbaná y chē bēśása chaojtátamentśana, tśēngaftanga chē shjoca chašmojtse mnēnga, šmochántsechembuana, mēntśá jtsichámēse: “Utabná, šmēbētafo ca.” Pero cha cmochanjáuyana, “Atše ndoñe quetsátstatšēmo ndēmoquēnga tśēngaftanga šmomnma ca.” <sup>26</sup> Chora tśēngaftanga šmochanjontśé ichámua: “Acaftaca cányñe fsēnjase y fsēnjofśé, y aca bēngbe tsáshenañe tconjabuatámá ca.” <sup>27</sup> Pero cha cmochanjójuaye: “Ya tcbonjáuyana, ndēmoquēnga šmomnma ndoñe tstátšēmo ca. ¡Atšbentśana mojuánanga, bacna soyēnga amēnga ca!

<sup>28</sup> “Chora chentśe puerte šmochanjenóbošachna y tsetśanama juatsašēnga šmochantsenofťśojnaye, Abraham, Isaac, Jacob y nyetsanga Bēngbe Bētsabe juabna oyebuambnayēnga Bēngbe Bētsabe amēndayoca imojtse mnēnga chašmojinýe ora, y tśēngaftanga chentśana cmochtēbuacanama. <sup>29</sup> Y shinýe bocanoicana y uenatjēmbambanoicana, tsmanoicana y tsjuanoicana entśanga mochanjabo y juasama mochanjotbama Bēngbe Bētsabe amēndayentśe. <sup>30</sup> Y banga mora nduámanēnga imomnēnga, chora uámanēnga mochántse mnē; y banga mora uámanēnga imomnēnga, chora nduámanēnga mochántse mnē ca” —Jesús tojánayana.

### *Jesús tbojanongmé Jerusalementśa entśangbiama*

(Mt 23.37-39)

<sup>31</sup> Jesús chē soyēnga tojanéyana ora, básefta fariseunga tmojánashjajna y tmojanianya: —Muentsana motsatoñe; Herodes entseboše aca jtsóbama ca.

<sup>32</sup> Y Jesús tojanéjua: —Motsajna y šmochjauyana chē corente studio bomná, mo tjañe mesetá: “Minýe, mēnté y yēse entśangbentśana bacna bayējēnga sēndētēbuacana y šoquēnga sēndáshnaye, y baseftaytesna chanjapochóca ca.” <sup>33</sup> Pero atše šontse mnē mēnté y yēse jtsayana, y baseftaytesna Jerusalemoye jana, er ndoñe tsabá ntse mnēna canya Bēngbe Bētsabe juabna oyebuambnayá Jerusalementśa chábuañe chaóbana ca.

<sup>34</sup> “Jerusalementśa entśanga, Jerusalementśa entśanga, tśēngaftanga chē Bēngbe Bētsabe juabna oyebuambnayēnga jtsébáyana, y chē Bēngbe Bētsabe ichmónēngbiroye ndētśbēngaca jtsatēchénganjana jtsébáyama! ¡Bueta soye atše sēnjábošena tśēngaftanga átšbiroye júbuajama, mo canye tuamba chabe bolletotēmēnga juatēngmiáša tajsoye cuaftajayecá, pero tśēngaftanga ndoñe chešmátsbošena! <sup>35</sup> Y šmochjinýe, mora atše cachcá cbochanjesēñýaye, y chca, atśna enánanga cbochanjesabashjuana, mo canye yebna cachcá tcojesonýa y éñañe tcojeseboshjoncá. Y ndegombre, tśēngaftanga morscana ndoñe más atše quemochátinýe; y atše šmochántinýe, chē: “Corente bendición bomná, Bēngbe Utabnabe obenánaca tojabá ca!” chašmojtšichamo ora ca” —Jesús tojánayana.

## 14

### *Jesús, canye uafshachanánaca šocábioye tbojanshná*

<sup>1</sup> Canye ochnayté, Jesús tojána jasama fariseungbe canye amēndayabe yebnoye; y chē fariseunga yejuana imojtserreparana, er ndayá Jesús nanjama. <sup>2</sup> Chēntśnaca, chabe delante yojtse mnē canye entśá uafshachanánaca šocá. <sup>3</sup> As Jesús chē ley abuátambayēnga y fariseunga tojanatjá: “¿Quenlesenciana canye ochnayté canye šocá jáshnama o ndoñe ca?”

<sup>4</sup> Chēngna ndocá tmonjanjá. As Jesús chē šocábioye tbojánishache, tbojanshná y tbojanianya chaotsatoñe ca. <sup>5</sup> Y chē fariseunga tojanéyana: “¿Nda tśēngaftanguentśá, nderado chabe uaquiná o uacná canye tboye tojtsótsatše, cachora ndoñe nanjá jetsejátsēcama, masque ochnayté totsomñēse ca?”

<sup>6</sup> Y chënga ndocá tmonjanobená cha jojuana.

*Chë casamentoye ofjanënga*

<sup>7</sup> Jesús tojáninýe ntšamo chë ofjanënga quëfseroye imoitsachnëjuana jotbiamama; as mëntšá chënga tojanabuayená: <sup>8</sup> “Canýe casamentama nda chacmojojfa ora, quëfseroca ndoñe catjót'bema, er nderado inýe ofjaná acbiama más uamaná ústonoye nandaboye; <sup>9</sup> y nderado chë tsëndatbe ofjajaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatót'bemana. <sup>10</sup> Chamna, nda chacmojojfa ora, chafjoca cochjót'bema, chca, chë ofjajaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentše tmojtsetbiámanëngbiamá uamaná cochántsemna. <sup>11</sup> Er nda cachá bëtšá tojtse nobiamná, nduamaná mochántse bema; y nda cachá nduamaná tojtse nobiamná, añe bëtšá mochanjábema ca.”

<sup>12</sup> Y chë tbojanofja entšá bioynaca Jesús mëntšá tbojaniana: “Fiesta chacojama o sananga chacojtse bomna ora, ndoñe cattšëbuájajana acbe amiguënga, catšátanga, ni pamillanga, ni acbe juachañe oyenënga bomnënga; er chëngnaca, fiesta chamojtse bomna ora, aca cmochantëttojfa, y chca ya acbe uacanana soye cochántse bomna. <sup>13</sup> Chamna, canýe fiesta chacojama ora, cochjúbuaja ndbomnjémënga, jama ndobenënga, coshetënga y jtanënga, <sup>14</sup> y aca corente oyejuayá cochántsemna; er chënga ndoñe quemochatobenaye cachá aca jtëtojfa, pero acna acbe uacanana soye cochántse bomna, chë Bëngbe Bëtšabe bominýiñe tsábënga imomnënga chamojtayena ora ca” —cha tbojaniana.

*Chë bëtš sanama cuento*

(Mt 22.1-10)

<sup>15</sup> Chca tojanuena ora, canýa chë mesëshentše tbermaná tojánayana: —¡Puerte oyejuayá echántsemna Bëngbe Bëtšabe amëndayoca juasama chaojtsemná ca!

<sup>16</sup> Chora Jesús tbojaniana: —Canýe bacó canýe bëtš saná yojapróna y ba entšanga yojúbuaja. <sup>17</sup> Juasama ya yojobuache ora, canýe oservená ibojíchmuá chë ofjanënga jáuyanama chamotsajna, ya lempe yojtseprontana ca. <sup>18</sup> Pero chorna nyëtscanga imojontsé jtsoyátšëmbuana. Canýa yojayana: “Cabá mora canýe fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.” <sup>19</sup> Inýa yojayana: “Bnëtsana toronga sënjobuámiñe, y šontsemna jana jányama, jaárama taimochjóservia. Chcasna, aslëpaye šmotsepacenciá ca.” <sup>20</sup> Y inýa yojayana: “Cabá mora sëntsobouamá, y chë causa, ndoñe quichatobenaye jama ca.” <sup>21</sup> Chora chë oservená yojesshëcona y lempe chabe nduñibioye ibojauenaye. Chë nduñio tša ibojtsetna, y chë oservenábioye ibojauyana: “Cam ora motsa tsashenangoye y benachëngoye, y moye cochjunatse ndbomnjémënga, jama ndobenënga, jtanënga y coshetënga ca.” <sup>22</sup> Chentša bënëntscose, chë oservená chë nduñibioye ibojauyana: “Bacó, ya sënjama ntšamo šconjamandacá, y cabá inýengbiamá luare entsemna ca.” <sup>23</sup> As chë nduñio ibojauyana: “Motsa benachëngoye y betiyetemëngaca jetjaniñëngoye, y entšanga cochjautáriaye moye chamuábama, atšbe yebna chaojtjama; <sup>24</sup> er ndegombre chëyana, chë natsana sënjobuajënguentsá ndocná atšbe saná queochatsse ca.”

*Ntšamo yomna Cristbe ustoná jtsemnama*

(Mt 10.37-38)

<sup>25</sup> Mallajta entšanga Jesús imojtsëstona; as cha tojanobuértana y tojanëyana: <sup>26</sup> “Nderado nda átšbioye tojabo, y ntšamo chabe taitá, chabe mamá, chabe shema, chabe básënga, chabe catšátanga y uabëñanga tuababuánýeshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntšobenana atšbe uatsjendayá jtsemnama. <sup>27</sup> Y nda, atšbiamá ndoñe tontseprontana jasúfriama y cruciñe jobanámna, y nyëtscá chabe quem luare soyënga ndoñe tonjësebohona atše juastama, cha ndoñe ntšobenana atšbe uatsjendayá jtsemnama.

<sup>28</sup> “Nderado nda tsëngatanguentsá tojtsejuabná canýe tsbanana jebna soye japórmama, ¿cha natsana ndoñe nanjót'bema jinýama ntsachetšá crocénana chentše yochjuába, y japochócama nyëtšá crocénana tayojtse bomna? <sup>29</sup> Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nyëtscanga chca tmojinýënga, muantsáfchaye y mëntšá muantsichamo: <sup>30</sup> ‘Quemëjema jajebuama tonjontsé, y japochócama ndoñe chenatobená ca.’

<sup>31</sup> “O ¿ndaye rey inýe réyefata jëntsjama tbojotocase, natsana ndoñe nanjót'bema jajuboyama, nderado nanjobenaye bnëtsana uaranga soldadëngaftaca chë inýabioye jayëñjanana, chë inýa uta bnëtsana uaranga soldadëngaftaca tojtšabose? <sup>32</sup> Y ndóñesna, chë inýe rey cabá bënoca tojtsemna ora, básefta entšanga echanjichamuá, cha jáuyanama más tsábá yomna ndoñe jatentsjanayana ca.



<sup>33</sup> “Chcasna, ndánaca tsëngaftanguentsá, lempe ntšamo toboimncá ndoñe cachcá tonjesonýá, cha ndoñe ntsobenana atšbe uatsjendayá jtsemnama ca” —Jesús tojánayana.

*Chë tamó fténana tojtsebocna ora*

(Mt 5.13; Mc 9.50)

<sup>34</sup> “Tamó tsabe soye endmëna; pero chë tamó fténana tojtsóbemëse, tsëngaftanga ndoñe quešmátobena jamana tempcá sanana cachiñe chaotsatsmënana, ni saná jatamuama. Chë ftëna tamó tondayama ntoservénana, cachcá, chë atšbe uatsjendayënga jtsemnama tojtsebošënga, pero lempe jëseboshjonama ndoñe tmontseboše, cach ndoñe chama ntoservénana. <sup>35</sup> Chë ftëna tamó ndoñe ntoservénana ni fshantsama, ni uanguanëshama. Nye jtsëtšenana. Chë jouenama tojtsoebenënga, šmochjouena ca” —Jesús tojánayana.

## 15

*Chë órsëna oveshabiamia cuento*

(Mt 18.10-14)

<sup>1</sup> Nyetsca chë Romocama impuesto entsángbiöye atjanayënga y inye bacna soyënga amënga, Jesúsbioye imojánajna chabe palabra jouenama; <sup>2</sup> y chë fariseunga y ley abuátambayënga chama Jesusbiamia podesca imojtsoyebuambná, mëntšá: —Mua bacna soyënga amëngaftaca entsenuta y chëngaftaca entsesá ca.

<sup>3</sup> As Jesús mëntšá tojanacuntá, chënga jabuátambama: <sup>4</sup> —¿Nda tsëngaftanguentsá, canye patse oveshënga tojtsabamna, y canya tbojtsobuëtsëse, chë inye esconëfta bnëtsana y esconëfta oveshënga shëntsjañe ndoñe cachcá nanjesënyaye, y nanjá chë otšená jetsenguan-guama candëtsónyëñëntscuana? <sup>5</sup> Y tbojtsinyëna ora, oyejuayá chë oveshá jesotantšájuana; <sup>6</sup> y yebnoye tojtashjango orna, chabe amiguënga y juachañe oyenënga jáchembuana y mëntšá jáuyanana: “Atšeftaca móyejuanga, er chë sentsanobuetše oveshá sentsinyëna ca.” <sup>7</sup> Atšë chëyana, cachcá, celócnaca más oyejuayana jtsebínynana, canye bacna soyënga amá tsabe benache tojtishachabiamia, y ndoñe nýa yapa, esconëfta bnëtsana y esconëfta tsabe soyënga amëngbiamia, chë ndoñe yondujaboto bacna soyënga amana jtsajbanana ca.

*Chë crocénana tojtsónyëna shembásabiamia cuento*

<sup>8</sup> “O mëntšá, ¿ndëmua shembása, bnëtsana uámana crocénana tojtsebmoma y cánýana tojtsobuëtsëse, chora ndoñe canye uajuinýanësha nanjuajuinýená, y cuedádoca chë yebna nantsëtsajo y botamana chë crocénana nantsenguango candëtsónyëñëntscuana? <sup>9</sup> Y tojtsinyëna ora, chabe amiguënga y juachañe oyena shembásënga jáchembuana, y mëntšá jáuyanana: ‘Atšeftaca móyejuanga, er chë sentsanobuetše crocénana sentsinyëna ca.’ <sup>10</sup> Atšë chëyana, cachcá, chë Bëngbe Bëtsabe angelotëmëngbeñe oyejuayana jtsebínynana, nýe canye bacna soyënga amá chë tsabe benache tojtishachabiamia ca” —Jesús tojánayana.

*Chë uaquiñá bacna benachiñe ayá*

<sup>11</sup> Jesús mëntšanaca tojanacuntá: “Canyë entsá uta uaquiñata yojánabamna; <sup>12</sup> y canye, chë ngomënche uaquiñá chabe taitábioye ibojauyana: ‘Taita, atšbe otocana soyënga šmatatšetá ca.’ As chë befta lempe chë uta uaquiñata yojtëjtaye.

<sup>13</sup> “Chëntšana baseftaytesna, chë más bobontse uaquiñá lempe ntšamo ibojobuachcá yojtsatobuiye y chë crocénánaca bën luaroye yojtsoñe, y choca, cha nýe ntšamo ibojochëngcá, mocá yojenobuiye, y chca, lempe yojtsepochóca. <sup>14</sup> Lempe crocénana yojtsoshañe orna, bëts shëntsana chë luarentše yojóshjango, y chë causa cha ibojotóca shëntseca jtsejëtanana. <sup>15</sup> As, cha yojá trabajo janguangoñama y yojínýena chë luarentša canye entsábentše; chana, chabe jajoye ibojíchmua cotšënga jtsanýenama. <sup>16</sup> Chë bobontsna yojtseboše chë cotšbe saná jtsesana, pero ndocná tondaye ibonjanájuatšnayë.

<sup>17</sup> “Cabana, botamana yojinýe ntšamo yojtsepasacá, y mëntšá yojenójuaboje: ‘¡Bueta trabájayënga atšbe taitabe yebnentše bëtscá saná mondëtsóbomñe, y atšë muentše shëntsama chanjóbanaca! <sup>18</sup> Chantá atšbe taitabe yebnoye y mëntšá cha chanjauyana: Taita, šmotseperdoná. Atšë tijama ndayá Bëngbe Bëtsá ndoñe yondbošcá, y ntšamo aca ndoñe condbošcá. <sup>19</sup> Mora ya mercedo taitsatobuajoñe acbe uaquiñá jtsabáinana; nýe canye acbe trabajayacá Diosmanda šmatofja ca.’ <sup>20</sup> Chca jëftsenójuaboješë, yojontšë cachabe yebnoye jtana.

“Cabá bënoca yojtsemna ora, chabe taitá chábioye ibojinýe, y chabe uaquiñabiamia ibojóngmia, y jajëbenguama betscó yojá; ibojajebengo, ibojtotsejcuá y tša yojtsóyejuayayama chë uaquiñábioye ibojtámochó. <sup>21</sup> Chora chë uaquiñá ibojauyana: ‘Taita, šmotseperdoná. Atšë tijama ndayá Bëngbe Bëtsá ndoñe yondbošcá, y ntšamo aca ndoñe condbošcá; mora ya mercedo taitsatobuajoñe acbe uaquiñá jtsabáinana ca.’ <sup>22</sup> Pero chë Taitana chabe oservénënga yojámëndaye: ‘Betscó chë más tsabe entsáyá mauaca y matspormanga, montšabuechëtjo y matsshecohëtjo. <sup>23</sup> Mora chë más minýica uacná šmochjuánatse y

šmochjáshbua. ¡Mochjase y mochjóboyejuaye ca! <sup>24</sup> Quem atšbe uaquiñá mo obanacá endánmēna y mora bēnga montsetátšēmo cha ainá yotsomñāma. Quem atšbe uaquiñá mo otšenacá endánmēna y mora tmontsinñēna ca.' Y chentšana imojontsé joboyeuayama.

<sup>25</sup> “Chē yebnoca fiesta yojtsemñēntscuana, chē mayor uaquiñana jajoca inētšomñē. Yebnoye yojtsataye y ya bēconana yojtsemna orna, cha vojouena imojtsabuastoye y imojtselántsaye. <sup>26</sup> As chora cha canñe oservenábioye ibojachembo y mēntšá ibojatjaye: ‘¿Ndayá bēngbe yebnentše yojtsopasana ca?’

<sup>27</sup> “As chē oservená ibojojúá: ‘Acbe uabentsá tontashjango y chama acbe taitá sonjutaríe chē más minñica uacná jáshbuama, cha tšabá tojtashjanguama ca.’ <sup>28</sup> Pero chē uabóchena catšatna corente ibojtsetna y ndoñe yontseboše tsoye jtamashēnguana. As cach befta yojábocna chē catšátbioye jaimpádama chauatamashēnguama. <sup>29</sup> Chora cha chē taitábioye ibojauyana: ‘Taita, aca condétatšēmo bueta uata cbetsajabuáchanama, nyets tempo cbetseyeunanama, pero ndocna te ni mo canñe chivotema chešcaisatšá atšbe amiguēngaftaca joboyeuayama. <sup>30</sup> Y masna, acbe uaquiñá chē bacna vida bomna shembásēngaftaca acbe crocénana pochocayá tojtashjango ora, chē más minñica uacná chabiama tcojášbua ca.’ — chē uaquiñá ibojauyana.

<sup>31</sup> “Chora chē befta ibojojúá: ‘Atšbe uaquiñá, aca sempre átšeftaca condétsemna y lempe ntšamo atše tsbomncá acbiámna endmēna. <sup>32</sup> Pero mora tšabá entsemna joboyeuayama y joyeuayēngama; er acbe uabentsá mo obanacá endánmēna, y mora bēnga montsetátšēmo cha ainá yotsomñāma; mo otšenacá endánmēna, y mora tmontsinñēna ca.’ ”

## 16

### *Chē nduñibe ndoñe tšabe uajabuachanábiama cuento*

<sup>1</sup> Jesús mēntšánaca chabe uatsjēdayēnga tojanacuntá: “Inamna canñe bomna entšá, y cha ibnabomna canñe uajabuachaná chabe soyēngaca chaotsinñēnana; y chē nduñio imojuenaye chē uajabuachaná chabe soyēngaca ndoñe tšabá yontsamama. <sup>2</sup> Asna, chē nduñio ibojachembo y mēntšá ibojauyana: ‘¿Ntšamo acbiama šmontsatsēntšacá ndegombre yojtsemna ca? Mora cuenta šmatatšá ntšamo atšbe soyēngaca tcojamama, er morscana ya ndoñe atšbe soyēnga inñēná quecochátšmēna ca.’ <sup>3</sup> Chē uajabuachaná yojontsé jenójuaboyana, y mēntšá yojeniyana: ‘¿Y mora ntšamo chtsemana, chē nduñio atšbe trabajuentsana sojtabocna ora? Ndoñe añemo quetsátšbomna fshantse jatrabájama, y lemošna jótjañamna sēntšēuatja. <sup>4</sup> Ya sēntsetatšēmo ndayá chjama, chca, atšbe trabajuentsana chašojtábocna ora, atše jtsabamnana ndēmuanñēnga chēngbe yebnentše chašmofjama ca.’

<sup>5</sup> “Chentšana, canñánñya chē chabe nduñibioye ndebénēnga yojáchembo. Cánñabioye ibojatjaye: ‘¿Ntsachetšá atšbe nduñio icondebena ca?’ <sup>6</sup> Y cha ibojojúá: ‘Canñe patse barrilēšangá aciteiye ca.’ As cha ibojauyana: ‘Muentše acbe recibēcha entsamna; mora mótbema y inñácha nñe shachna bnētsana barrilēšangama matapormá ca.’ <sup>7</sup> Chentšana inñabioye ibojatjaye: ‘Y acna, ¿Ntsachetšá icondebena ca?’ Y cha ibojojúá: ‘Canñe patse medida trigo ca.’ As cha ibojauyana: ‘Muentše acbe recibēcha entsamna; chiñe nñe posufta bnētsanama mábema ca.’ <sup>8</sup> Chentšana, chē nduñio tšabá yojayana chē ndoñe tšabá ama mayordombiama, cha študioca yojamama. Chē nñe quem luarama enójuabnaye entšanga, cachēngbe soyēngaca puerte studio bomnēnga mondmēna; y chē entšangbe juabnēnga binñayábēnga ndoñe nñya yapa ca.

<sup>9</sup> “Atše cbabuayená, quem luarentše, chē bacna soyēnga amēngbe luarentša bomnánaca amiguēnga šmochjábiama, inñēnga jtsējabuáchanēse. Chca, chē bomnana tojtšopochocá ora chašmotsabamna ndēmuanñēnga chē nyetsca tescama oyenoye chacmúbujama ca.

<sup>10</sup> “Nda básefta soyēnguñe lempe tšabá tojama, bētsá soyēnguñinaca lempe tšabá echanjama; y nda básefta soyēnguñe ndoñe tšabá tonjama, bētsá soyēnguñinaca cach ndoñe tšabá queochatsma. <sup>11</sup> Chcasna, quem luarentše, chē bacna soyēnga amēngbe luarentša bomnánaca ndoñe tšabá šmonjamēse, ¿nda chē ndegombre bomnana, chē Bēngbe Bētsabe soyēnga cmochjábanyēye? <sup>12</sup> Y chē ndoñe tšēngaftangbe sóyeca ndoñe tšabá šmonjamēse, ¿nda cmochjantšabuáchiye ndayá tšēngaftangbiama yomncá ca?

<sup>13</sup> “Ndocná ntšobenana uta mandayata jtsaservénana; er cánñabioye bochantšábóyēña y chē inñabioyna bochantšebobonshana, o cánñabiama tšabá echántsetrabajaye, y chē inñabiama ndoñe tšabá. Ndoñe quecátobena Bēngbe Bētsá jtsebobotšánana, nñe quem luarentša soyēnga jtsebomnana tcojtsebošēse ca” — Jesús tojánayana.

<sup>14</sup> Chē fariseunga, becá crocénana jtsebomnana bošēnga innamna, lempe chca chēnga tmojanuena, y Jesúsbioye imojtsábóyejuana. <sup>15</sup> As Jesús tojanēyana: “Tšēngaftanga entšangbe delante mo tšábēnga cuatsemncá jtsebobiamnayana, pero Bēngbe Bētsá endétatšēmo ndayá tšēngaftangbe ainaniñe yomnana; er ndayá entšanga más tojtsebošcá, Bēngbe Bētsá tsábóyēñana ca.

*Moisesbe ley y Bëngbe Bëtsabe amëndayana*

<sup>16</sup> “Moisesbe ley y chë Bëngbe Bëtsabe juabna oyebuambnayënga tšëngaftanga cmon-janabuayiyá, Juan chë Ubayaná quem luaroye tonjánabëntscuana. Cha tonjánabo orscana montsabuayiyá chë tšabe noticiënga Bëngbe Bëtsabe amëndayocama, y nyëtscanga tša montseboše choye jamashënguama ca.

<sup>17</sup> “Más paselo endmëna, celoca y quem luare chaopochocá, y ndoñe chë ntšamo leyíne iuayancá, chë ndayá jopásama yomnama, ni mo canye punto ndoñe chca chaondëtsemnama ca” —Jesús tojánayana.

*Ndayá Jesús tojanabuatambá chë bouamnënga tmojtsenëtšenama*

(Mt 19.1-12; Mc 10.1-12)

<sup>18</sup> “Nda chabe shémbyoye cachcá tbojesonyá y ínÿaftaca tojtóbouamase, cha chë natsana shémbyoye ínÿaftaca jtseíngñayana; y nda chë útšena shembásaftaca tojobouamá chana, canye uabuatmá jtsebomnana, y chca, chana canye bacna soye jtsamana ca” —Jesús tojánayana.

*Chë bomná y chë ndbomnjëma Lázaro*

<sup>19</sup> “Canye bomna entšá inamna; cha yojanamana uámana y botamana shbuenda uaf-jatsenga y lino entšayangá jtichëtjuana, y cada te bëts fiestënga yojánama. <sup>20</sup> Canye ndbomnjëmnaca inamna, Lázaro ca uabainá, bacna nguayanánaca šocá; y cha yojanamana chë bomnabe bësásentšë fshantsiñe jótbemana. <sup>21</sup> Quem ndbomnjëma yojtseboše chë bomná yojtsesayentšana yojatquëcjana sanángaca jtoshachayana; y chë quešënga imnaboye chabe nguaye cuerpo jajáfuama. <sup>22</sup> Canye te Lázaro yojtsóbana, y Bëngbe Bëtsabe angelënga Abrahámbyoye cha imojtamba, chë nyëtscanga oyejuayënga mondmëna luaroye. Chë bomnánaca yojóbana y imojuábtontsa.

<sup>23</sup> “Chë bomná infiernoca puerte ngméniñe yojtsesufrina ora, tsbanánoye yojontješiyey bënoca Abraham ibojinÿe, y Lázaro cháftaca yojtsemna. <sup>24</sup> As chë bomná yoyuayebuáchena: ‘jTaita Abraham, šmolastemá! Lázaro michmó chabe ntšabuafja chaofchecuacú y atšbe bichtaja chauabofchecuacuaye, er quem íñeshoca tša sëntsesufrina ca.’ <sup>25</sup> Pero Abraham ibojauyana: ‘Uaquíñá, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátšbomna; pero morna, cha tšabá y oyejuayá entsemna, y aca jabuache ngménana contsebomna. <sup>26</sup> Y inÿe soye, canye bëts tšuáñe entsemna tšëngaftangbiocana mëntscóñe; chca, chë tšëngaftangbioye muentšana jenachnënguama tmojtsebošënga ndoñe chamondëtšobena, ni chocana bëngbioye cach ndoñe ca.’

<sup>27</sup> “Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye; <sup>28</sup> choca sëndábamna shachna catšátanga; as cháñyana ntšamo moca atše stsepasana y ntšamo jamëse chënga ndoñe chaondëtšamna quem ngménënga luaroye jabama ca.’ <sup>29</sup> Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëtšanábema soyënga; jchëngbioye chamoy-auná ca!’ <sup>30</sup> Chë bomná ibojajuá: ‘Ndoñe, Taita Abraham; nderado obanënguentšana canya chëngbioye tojase, aíñe chë tšabe benache muantishache ca.’ <sup>31</sup> Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjýaunase, Bëngbe Bëtsábeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’ ” —Jesús tojancuentá.

## 17

*Resjo yomna, nderado bacna soyënga cuanjama*

(Mt 18.6-7, 21-22; Mc 9.42)

<sup>1</sup> Jesús chabe uatsjëndayënga tojanëyana: “Sempre echanjëftsemna juabnënga bacna soyënga jamama; pero, jtša lastema chë entšabíama ndabe causa ínÿenga bacna soyënga tmojama! <sup>2</sup> Más tšabá chabíama nántsemna canye nantsnëbé chamotsetamošëntšbua y mar bëjayoye chamotsashbuëtse, y ndoñe chë canya Bëngbe Bëtsábeñe ošbuachiyá bacna soye chaomama juanatsana. <sup>3</sup> Cuedado šmochtsebomna.

“Acbe catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna. <sup>4</sup> Masque nÿe canye te, canÿsëfta soye ntšámmaca tcmojaborlá, y canÿsëfta soye ‘chca ndoñe más quebochatsbórla ca’ tcmojauyanëse, aca cmontsemna cha jtseperdónana ca” —Jesús tojánayana.

*Bëngbe Bëtsábeñe jtsošbuáchiyëse, corente obenana jtsebomnana*

<sup>5</sup> Chë uatsjëndayënga Bëngbe Utabnábbyoye tmojaníyana: —Ošbuáchiyana šmababuátë ca.

<sup>6</sup> Y chë Utabná tojanëjua: —Tšëngaftanga ošbuáchiyana, batšatema masque nÿe mo mostaza jenaycá šmojtsebomnëse, quem sicomoro betiyoye šmatjauyana: “quemuentšana mojashtse y mar bëjayoca mojé ca”, y quem betiye chca nanjama ca.

*Chë oservená ndayá ibomna jamana*

<sup>7</sup> “Nderado canya tsëngaftanguentšá canye bochichnayá tbojtsebmna, cha jajocana tojtashjango jajañe arayocana o uacnënga anýenocana, ¿chábioye bochjauyana: ‘Matabo y mabose ca?’ <sup>8</sup> Ndoñe, chamna mënšá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentšana aca cochjase y cochjofsiye ca.’ <sup>9</sup> Y chë bochichnayábioye ndoñe quebochtëtschuaye ndayá tbojuatariećá cha tojamama. <sup>10</sup> Tsëngaftángnaca cachcá, lempe ntšamo Bëngbe Bëtsá tcmojutariećá chašmojama ora, cmontsamna jayanana: ‘Nduámana oservénënga fsëndmëna; er nýe ntšamo jamama šuamncá tifjama ca’ ” —Jesús tojánayana.

*Jesús, bnëtsanënga bacna nguayanánaca šoquënga tojanashná*

<sup>11</sup> Jerusalenoye benache, Jesús tojánachnëngo Samaria y Galilea luarëjana. <sup>12</sup> Y canye pueblotmoye tojánashjango ora, bnëtsana boyabásenga bacna nguayanánaca šoquënga chábioye tmojána; chábentšana bënoca chënga tmojanoquedá, <sup>13</sup> y mënšá imojtsáyebuache: —Jesús, Buatëmbayá, šmotsalastemá ca!

<sup>14</sup> Jesús chënga tojánanye ora, tojanëyana: —Jerusalenoca bachnángbioye motsajna, y chënga šmochjínjanyíye tsëngaftanga mora ndësoquënga šmojtsemnana ca.

Y tojanopasá, chë bnëtsanënga cabá imojétsayëntscuana, ya shnánënga imojtoquédaye. <sup>15</sup> Canya chënguentsá, shnaná yojtsemnana tojáninye ora, yojeshëcona Bëngbe Bëtsábioye jabuache atschuanaye; <sup>16</sup> y Jesusbe delante yojoshëntsamentšiyë, jubiaca fshantsotšcoñe yojotsejbëna, y chábioye ibojtsatschuanaye; y chë boyabásana Samarioca entšá inamna.

<sup>17</sup> Chora Jesús tbojananyana: —Bnëtsanënga mondmëna chë shnánënga tmontoquedanga. ¿Ndayentšë chë inýe esconëftanga imojtsemna? <sup>18</sup> ¿Nýe quem boyabása, inýe luarocana ashjangoná, tojeshëcona Bëngbe Bëtsá jëtschuayama? ¿Ndayeca chë inýenga ndoñe ca?

<sup>19</sup> Y chë entšábioye tbojananyana: —Matëtsbaná y motsatoñe; Bëngbe Bëtsábefie aca icošbuachëyeca shnaná contsatmëna ca.

*Ntšamo Bëngbe Bëtsabe amëndayana yochjóshjango*  
(Mt 24.23-28, 36-41)

<sup>20</sup> Canye, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjanguama; y cha tojanëjua: “Bëngbe Bëtsabe amëndayana chaojóshjango ora, tsëngaftanga ndoñe quemochatobenaye chca jinýana. <sup>21</sup> Chora ndoñe quemochátichamo ‘Muentšë entsemna’ o ‘Choca entsemna ca’; er Bëngbe Bëtsabe amëndayana ya tsëngaftangbeñe entsemna ca” —cha tojánayana.

<sup>22</sup> Jesús chabe uatsjëndayënga tojanëyana: “Canye tempo echanjóshjango, y chora tsëngaftanga šmochántseboše canye te jtsebmnnana, ntšamo chë Bëngbe Bëtsá Entšá tbojanbemá tsëngaftangbeñe enjëftsemna orcá; pero chora ndoñe chca queochatóshjango. <sup>23</sup> Chora báseftanga mochántsiichamo: ‘Muentšë entsemna’ o ‘Choca entsemna ca’; pero choye ndoñe šmatjá, ni šmatjüeto. <sup>24</sup> Er chë tojatcuinýe ora, ntšamo celoca catoica juachoica tojabuashinýinýenacá, chca echántsemna chë Bëngbe Bëtsá Entšá tbojanbemá quem luaroye chaojésabo te. <sup>25</sup> Pero natsana cha bontsemna puerte jasúfriana, y morsca entšangbiana uabotená jtsemnana.

<sup>26</sup> “Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entšá tbojanbemá quem luaroye chaojésabo ora. <sup>27</sup> Chë tempo, entšanga imnasaye, imnofšësnaye, imnóbouamnaye; natjëmbana imojtsiyëñe, y chca, natjëmbana imojtsomñe, Noé chë barquëshoye tojánamashënguëntscuana; pero chora uabouana uaftena tojánashjango y chë entšanga tojtšanapochocá. <sup>28</sup> Cachcá ntšamo Lot yojaniyena ora tojanopasacá: entšanga imnasaye, imnofšësnaye, imnóbouamnaye, imojtsena, sananga imnajena y imnajeubana; <sup>29</sup> pero Lot Sodoma bëts pueblentšana tojéftšanbocna ora, Bëngbe Bëtsá tojanma celocana iñeshe y azufre chauaftema, y chentša entšanga tojtšanapochocá. <sup>30</sup> Cachcá echántsemna chë Bëngbe Bëtsá Entšá tbojanbemá chaojtonýná ora.

<sup>31</sup> “Chë tena, nda cachabe yebnentša tsbanánoca chaojtsemna, y chabe soyënga cach tsoca tojtsebmnnëse, chocana ndoñe chaondëstajango chë soyënga jesabobocnama; y nda jajoca chaojtsemna, yebnoye ndoñe chaondëta. <sup>32</sup> Menójuabonga ntšamo Lotbe shëmaftaca tojanopasama. <sup>33</sup> Nda tojentsëna quem luarentšë bëtscá jtsebmnnana y atšbiana jasúfriama ndoñe tontseprontana, chë nýetsca tescama yomna tsabe vida echanjobuetše. Pero nda quem luarentša soyënga cachcá tojonýá atše juastama, masque chaóbana, chë nýetsca tescama yomna tsabe vida echántsebmna.

<sup>34</sup> “Atše cbëyana, chë ibeta, chë Bëngbe Bëtsá Entšá tbojanbemá chaojtonýná ora, útata canye jutsnëshañe bochántsemna; canya mochanjesbetše y chë inýana ndoñe. <sup>35</sup> Uta shembásata cányiñe bochántsejanýcoye; canya mochanjesbetše y chë inýana ndoñe. <sup>36</sup> Uta boyabásata jajoca bochántsetrabajaye; canya mochanjesbetše y chë inýana ndoñe ca” —cha tojanëyana.

<sup>37</sup> Chora chë uatsjédayënga Jesús tmojantjá: —Utabná, ¿ndémoca chca yochjopása ca? Y cha tojanjuá: —Chë obanabe cuerpo tojtsemnentse chë gallinacënga jojtotana ca.

## 18

### *Chë viudá y chë mandadbiama cuento*

<sup>1</sup> Jesús mentsá tojanacuntá, entsanga jabuatambama, Bëngbe Bëtsáftaca nyets tempo jtsencuentayana yomnama, ainaniñe añemo jtsebomnama ndocna te ntajbanacá. <sup>2</sup> Mentsá tojánayana: “Canýe pueblentse canýe mandado inamna; chana ni Bëngbe Bëtsábíoye ndoñe bonjánebiauata, ni entsanga yonjánayaunana. <sup>3</sup> Chë pueblentse canýe viudánaca inamna; chana canýe demanda yojánbomna. As chë mandádbíoye yojobeconá y mentsá ibojauyana: ‘Diosmanda atse uayayá motsecastigá ndayá sojaborlama ca.’ <sup>4</sup> Bayté chë mandado ndoñe yonjábosena chë viudábíoye joyeunayama; pero chentsana cha yojenójuaboye: ‘Masque Bëngbe Bëtsá ndoñe quetsátebiauata, ni entsanga ndoñe quetsátayaunana, <sup>5</sup> pero quem viudá cada ora endabó causa, aña chanjóyeunaye, chabe uayayá chanjacastiga; ndóñesna cada te nandaboye y cabana ya sochanjanaméntsa ca.’ ”

<sup>6</sup> Chentsana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá. <sup>7</sup> Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora inýengbe causa montsesufrina y cada te Bëngbe Bëtsá mondbëtseimpadana chaújabuachama. ¿Más chamuatobatmá ca yochjáuyana? <sup>8</sup> Atse cbëyana, Bëngbe Bëtsá betso tšëngaftanga mochanjátsebacaye, tšëngaftanga chë inýengbe causa mora smojtsesufrinënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentse entsanga yochjánýena ca?” —Jesús tojánayana.

### *Chë fariseo y chë Romocama impuesto atjanayabiama cuento*

<sup>9</sup> Báseftanga imojtsanjuabná chënga tšabe entsanga innamna ca, pero chë inýengbíoye imojtsëbuayënja; chiyeca Jesús mentsá tojanacuntá jabuatambama: <sup>10</sup> “Uta boyabásata Bëngbe Bëtsabe bëtš yebnoye tbojána Bëngbe Bëtsáftaca jencuentama: canýa yojamna fariseo, y chë inýana, canýe Romocama entsángbíoye impuesto atjanayá. <sup>11</sup> Chocna chë fariseo, tsanana Bëngbe Bëtsábíoye mentsá ibojtsecuentaye: ‘Bëngbe Bëtsá, cbontsatschuaná atse chë inýengcá ndoñe quetsatsmënema: atbëbanënga, puerte bacna soye amënga y shëmbíoye inýaftaca ingñayënga; y ni quem Romocama impuesto atjanayacá ndoñe quetsatsmënema. <sup>12</sup> Atse sënduamana, ácaftaca jencuentamna, canýe semaniñe uta soye tondaye ntjascá jtsemnana; y lempe stjonýenentšana, bnëtsanentšana canýe soye acbiama sëndëquëcñá ca.’ <sup>13</sup> Pero chë Romocama impuesto atjanayana, bënoca yojtsemna, ni celoye ntjonjtšeycá, yojtsenócochjantsetaye y mentsá yojtsichamo: ‘¿Atšbe Bëtsá, smotselastemá, atšajema bacna soye amá tsmëna causa ca!’ ”

<sup>14</sup> Chentsana Jesús tojánayana: “Atse cbëyana, quem Romocama impuesto atjanayá chabe yebnoye tojtán chabe bacna soyëngama perdonaná, pero chë fariseo ndoñe. Er nda cachá bëtšá tojtsenobiamná, nduamaná mochántsebema; y nda cachá nduamaná tojtsenobiamná, aña bëtšá mochanjábema.”

### *Jesús, basetëmëngbiama Bëngbe Bëtsábíoye tbojanimpadá*

(Mt 19.13-15; Mc 10.13-16)

<sup>15</sup> Entšanga imojanamana Jesúsbíoye basetëmënga junatsana chauabájajuama, y Bëngbe Bëtsábíoye chëngbiama chaboimpadama; pero chë uatsjédayënga chca tmojáninýe ora, tmojanontsé chë basetëmënga unachayënga jtsécácanana. <sup>16</sup> Pero Jesusna chë basetëmënga tojánachembo, y mentsá tojánayana: “Cachá mónýaye chë basetëmënga átsbíoye chamuabo, y ndoñe matëuyanana; er Bëngbe Bëtsabe amëndayana endmëna chë mo quem basetëmëngcá imomnëngbiama. <sup>17</sup> Ndegombre cbëyana, nda Bëngbe Bëtsabe soyënga ndoñe tonjóyëngacñe mo canýe basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

### *Canýe bomna entsá Jesúsbíoye tojána*

(Mt 19.16-30; Mc 10.17-31)

<sup>18</sup> Canýe mandayá Jesúsbíoye tbojantjá: —Tšabe Buatëmbayá, ¿ndayá sojtsemna jamana chë nyetsca tescama yomna tšabe vida jtsebomnama ca?

<sup>19</sup> Y Jesús tbojanjuá: —¿Ndáyeca šcauyana “tšabia ca”? Tšabia nýe canýa endmëna: Bëngbe Bëtsá. <sup>20</sup> Aca condëtatšëmbo ntšamo Bëngbe Bëtsá tojanmandacá: “Acbe shema inýaftaca ndoñe cattseingñaye, inýa ndoñe catjóba, ndoñe catjatbëba, ndoñe catjuaboínýena y acbe bëtšëtsata ndoñe stëtsoye catjáquedaye ca.”

<sup>21</sup> Chora chë boyabása tbojanjuá: —Atse lempe chca basetema orscana sëndocumplina ca.

<sup>22</sup> Jesús chca tojanuena ora, tbojaninyana: —Cabá canýe soye cmontsebuáshbena jamana: lempe ntšamo icobomncá cochjatsatobuiye, y chë crocénana, ndbomnëjmënga

cochtsatšataye; chca, celoca canye bēts bomnana cochántsebmna. Chentšana, cochjabo y šcochjuasto ca.

<sup>23</sup> Chē entšá chca tojanuena ora, puerte ngménaca yojtsemna, er cha corente bomná inamna. <sup>24</sup> Chca ngmená tbojáninŷe ora, Jesús tojánayana: —¡Yapa totcá bomnēngbiana entsemna Bēngbe Bētsabe amēndayoye jamashēnguama! <sup>25</sup> Ndegombre, más paselo endmēna canye camello chē coshuffentša atējñējana chauachnēngo, y ndoñe canye bomná Bēngbe Bētsabe amēndayoye jamashēnguana ca.

<sup>26</sup> Chora, chē chca imojouenēnga tmojánayana: —¿As nda yochjobenaye atsbocaná jtsemnana ca?

<sup>27</sup> Y Jesús tojanējua: —Ndayá entšanga ndoñe mondobena jamana, Bēngbe Bētsá aíñe endobena jamana ca.

<sup>28</sup> Chora Pedro, Jesúsbiŷoye tbojanianya: —Bēngbe Utabná, aca contsonŷá, bēnga lempe chē fsēndbmna soyēnga fsēnjésebošhona, y ácaftaca fsēntsajna ca.

<sup>29</sup> Jesús chora tojanējua: —Ndegombre cbēyana, ndánaca Bēngbe Bētsábioye jaserviama, chabe amēndayama jtsuabuyiynayēse, cachcá tojēftsebošhona chabe yebna, shema, catsátanga, bētsētsanga o básenga, <sup>30</sup> cha mora quem luarentse chē soyēngama más echanjóyēngacñe, y chē inŷe luarocna, chē nŷetsca tescama yomna tšabe vida ca.

*Jesús cachiñe tojánayana cha jóbana y jtayenama*

*(Mt 20.17-19; Mc 10.32-34)*

<sup>31</sup> Jesús chabe bnētsana uta uatsjēndayēnga barie tojánachembo, y mēntšá tojanējua: “Smontsetátšēmba mora Jerusalenoye bēnga montsajnama, y choca lempe echanjóchnēngo ntšamo chē Bēngbe Bētsabe juabna oyeuambnayēnga, chē Bēngbe Bētsá Entšá tbojanbemabiana tmojanabemcá; <sup>32</sup> er choca cha chē ndoñe judiēngbe cucuatšñe mochanjáboshhona, y mochantšáboyejuana, mochanjóyenguango, mochantsebuashēttoj; <sup>33</sup> y chamojátjanjentsana, mochanjóa, pero unga tianoye cha echántayena ca.”

<sup>34</sup> Chē uatsjēndayēnga tondaye tonjanēsértá, ni montsetátšēmba ndayá bētsemnana ntšamo Jesús yojtsētsētnacá, er chēngbiana yojamna josértama ndopodena soyēnga.

*Jesús, Jericó puebloca canye jtanábioye tbojanshná*

*(Mt 20.29-34; Mc 10.46-52)*

<sup>35</sup> Tojanopasá, Jesús Jericó pueblŷoye yojtsebēconaye ora, canye jtaná benache juachañe inatbemana, lemošna otjanañe. <sup>36</sup> Entšanga chējana imojtsachñējuanama tojanuena ora, yojanotšia ndayá yojtsopasana ca, <sup>37</sup> y chē entšanga tmojanianya, —Jesús Nazaretocá entsebeconá ca.

<sup>38</sup> As cha yojontsé uaye buáchana: —¡Jesús, Davidbentšana Entšá, šmotselastemá ca!

<sup>39</sup> Chē natsana imojtsajnēnga chē jtaná imojtsácacana, iytēca chaobemama; pero cha más yojtsáye buache: —¡Davidbentšana Entšá, šmotselastemá ca!

<sup>40</sup> As Jesús tojantsá y tojanmandá cha chamobetšama. Cha ya bécoñe yojtsemna ora, Jesús tbojantjá: <sup>41</sup> —¿Ndayá cojtseboše atše acbiana chjamama ca?

Y chē jtaná tbojanjúá: —Atšbe Utabná, atše sēntseboše chašuatábínŷnama ca.

<sup>42</sup> Chora Jesús tbojanianya: —Matinŷe, Bēngbe Bētsábeñe betsošbuachēyeca shnaná con-tsatsmēna ca.

<sup>43</sup> Y cachora cha tšabá ibojtabinŷna, y Jesúsbiŷoye ibojtsēstona, Bēngbe Bētsá atschuanaye. Y nŷetsca entšanga, chca tmojáninŷe ora, Bēngbe Bētsá imojtsatschuanaye.

## 19

*Jesús y Zaqueo*

<sup>1</sup> Jesús Jericó puebloca tojánashjango ora, chē pueblējana cha yojtsachñējuana. <sup>2-3</sup> Chora, canye bomna entšá, chē Romocama entšanga impuesto atjanayēngbe amēndayá, Zaqueo ca uabainá, yojtseboše Jesús jinŷama. Pero ndoñe yontsobena jinŷama, bētscá entšanga causa y cha becuca inamna causa. <sup>4</sup> Chcasna, cha betsco natsanoye tojaftsanótjajo y canye sicomoro betiyeshoye tojánashēngo, chca, Jesús chējana tojtsachñējuana ora, jinŷama jobenayama. <sup>5</sup> Jesús chē betiyeshoye tojánashjango ora, tsbanánoye tojanontjesé y Zaqueobiŷoye tbojáninŷe. As Jesús tbojanianya: “Betsco chocana matastjango, Zaqueo, er mēnté chanjá acbe yebnoye jatema ca.”

<sup>6</sup> Chora Zaqueo betsco tojtastjango y chentšana puerte oyejuayá Jesúsbiŷoye tbojanofja. <sup>7</sup> Entšanga chca tmojáninŷe ora, tmojanontsé Jesusbe contra mēntšá ichámuaana: “Jesús tonjá canye bacna soyēnga amabe yebnentše jatema ca.”

<sup>8</sup> Chora Zaqueo tojantsá, Bēngbe Utabná Jesús bentše, y mēntšá tbojanianya: —Mouena, atšbe Utabná, atšbe bomna soyēnguentšana tsēntsañe ndbomnējmēnga chanjátšataye y nda más crocénana tijēftseyēngacá, chē ntsachetšá tijēftsefcama canta soye más chantoyiye ca.

<sup>9</sup> As Jesús tbojanianana: —Ménté, aca acbe bacna soyënguentsana atsbocaná contsemna, er Zaqueo, ácnaca Abrahábentšana entsá condmëna. <sup>10</sup> Er chë Bëngbe Bëtsá Entsá tbojanbemá tojabo chë pochocánënga jtsemnana imojtsajnënga jabétsanguanguama y jabátsebacama ca.

*Chë crocenánama cuento  
(Mt 25.14-30)*

<sup>11</sup> Entsanga chë soyënga imojtsuenana, y Jesús inye soye tojanacuntá jabuátambama, er cha ya Jerusalén béconana yojtsemna, y entsanga imojtsejuabnaye chë Bëngbe Bëtsabe amëndayana ya yochjanóshjango ca.

<sup>12</sup> Jesús tojanëyana: “Canýe luarentša uámana entsá inye bën luaroye yojá, cachabe luar-entša rey chamobemama y chentsana cachábioye jtama. <sup>13</sup> Cabá nda ora, chabe bnëtsana oservënénga yojáchembo y bëtsá crocénana cada cánýabioye yojéftsayentšbuachiye, y mëntša yojétsëyana: ‘Quem crocenánaca trato šmochjábema atše candëtabëntscuana ca.’ <sup>14</sup> Pero cachabe luarentša entsanga cha imojuáya, as chënga básefta entsanga imojchamuá chë inye bën luaroca mëntša chamuayanama: ‘bënga ndoñe queftsátsoše cha bëngbe rey chaotsemnana ca’.

<sup>15</sup> “Pero pronto chë luarentša rey cha imojábema. Y chë luaroye yojtá orna yojamánda chë crocénana yojéftsayentšbuachenga chamobéconama, jtsetatšëmbuama ntsachetšá cada ona chë crocenánaca yojongánama. <sup>16</sup> Chë natsaná yojáshjango y yojayana: ‘Taita, acbe crocénana bnëtsana soye más tonjoboté ca.’ <sup>17</sup> Y chë rey ibojojúá: ‘Tša tšabá, tšabe oservená. Aca quem base soyiñe ntšamo tbojamandacá tšabá tcojámayeca, bnëtsana pueblentša mandado chacotsemnana cbojayé ca.’ <sup>18</sup> Chentsana inýa yojáshjango y yojayana: ‘Taita, acbe crocénana shachna soye más tonjoboté ca.’ <sup>19</sup> Y chë rey ibojauyana: ‘Acnaca shachna pueblentša mandado cochántsemna ca.’

<sup>20</sup> “Chorna inýa yojobeconá y mëntša yojayana: ‘Taita, muentše acbe crocénana entsatsmëna; canýe pañuelëjuañe bonguana sëntsejajo. <sup>21</sup> Atše acbiana uatjana šonjuábuache, er aca canýe tšátjaye entsá condmëna; aca chë ndoñe condbuajonentšana jocñana y chë ndoñe tconjájé luarentšana jaja saná jobuátbanana ca.’ <sup>22</sup> As chë rey ibojauyana: ‘Bacna oservená, cach acbe palabrëngaca chanjínýanýiye aca ndoñe tšabá tconjamama. Atše chë ndoñe sëndbuajonentšana jocñana y chë ndoñe sënjájé luarentšana jobuátbanana tsuamanama icojátatšëmbëse, <sup>23</sup> žndáyeca ndoñe tconjá chë crocénana bancoca jetsobuájua, y atše camoye matijtabo ora, mašctoyé chë crocénana y chë chentsana tojoboté crocënanëna ca?’ <sup>24</sup> Y chë chentše imojtsemna entsanga yojáuyana: ‘Chë crocénana motseboca y chë bnëtsana soye más tojobotébíoye chana motsatšetá ca.’ <sup>25</sup> As chënga imojojúá: ‘¡Pero cha ya bnëtsana soye más entsebmoma ca!’ <sup>26</sup> Y chë rey yojójuá: ‘Atše chëyana, nda tojtsebmomnábioye, más mochanjátšetaye; pero nda tondaye tondbmomnábioye, chë tojtsejuabná batšatema yobomna sóynaca mochántseboca ca. <sup>27</sup> Y chë atše uayayënga, chë chëngbe rey atše chaitsemnana ndoñe monjánbošënga, moye mënatse y atšbe delante šmochtšëbaye ca’ ” —cha chora yojayana.

*Jesús Jerusalenoye tojánashjango  
(Mt 21.1-11; Mc 11.1-11; Jn 12.12-19)*

<sup>28-29</sup> Chca tojéftsanyana chentsana, Jerusalenoye yojétsaye ora, Jesús tojánashjango canýe tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjëndayata tojanichamó, <sup>30</sup> mëntšá jáuyanëse: “Tsëndatše natsana entsemna base pueblotëmoye motsata. Chašojáshjango ora, canýe burrotema utsbuaná šochanjínýena. Chábëñe cabá ndocná tonjenojayé. Sochjuajafjoná y sochjuánatse. <sup>31</sup> Y nderado nda ndáyeca šojtsajafjná ca chacmojátšana, sochjuayana: ‘Bëngbe Utabná bontsájaboto ca.’ ”

<sup>32</sup> Chë uatsjëndayata tbojána y lempe ntšamo Jesús tojanëyancá tbojáninýena. <sup>33</sup> Y chë burrotema imojtsajafjná orna, chë burrotema nduiñënga tmojanëyana: —žNdáyeca chë burrotema šojtsajafjná ca?

<sup>34</sup> Chora chata tbojánayana: —Bëngbe Utabná bontsajabótoyeca ca.

<sup>35</sup> Chentsana Jesúsbioye chë burrotema tmojanánatse, y chë burrotëmëñe chatbe entsáyá tbojanájtse, y chábëñe Jesús tmojanenjayé. <sup>36</sup> Y cha yojtsachnëjuana ora, entsanga chëngbe entsáyá benachëjana imojtsëtëtsatsana.

<sup>37</sup> Olivos tjashe tsmanoye yojtsebeconá ora, chë bëtsá entsanga, Jesúsbeñe ošbuáchiyënga, tmojanontšë uyayebuéchana y Bëngbe Bëtsá oyejuayënga jëtschuyana, Bëngbe Bëtsabe obenánaca bëts soyënga Jesús tojanmama. <sup>38</sup> Chënga mëntšá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bëtsá matschuanga ca!”

<sup>39</sup> Chë entšanguentše básefta fariseunga imojtsemnënga, Jesús tmojanianana: — Buatëmbayá, acbe ústonënga mecácana chca ndoñe chamondëtsáyebuchama ca.

<sup>40</sup> Pero Jesús mēntśá tojanējua: —Ndegombre cbéyana, mēnga iytēca tmojobiamēse, chē ndētsbēnga muanjuayebuáchena ca.

<sup>41</sup> Jesús Jerusalén béconana tojánashjango, y chē bēts pueblo tojáninŷe ora, chentśa entsangbiama tojánenobosachna. <sup>42</sup> Y mēntśá tojánayana: “¡Malaye šmēntsetátśēmo, nŷe mo mēnténaca, ndayá yojtseita tšēngaftangbeñe lempe tśabá chaotsomñama! Pero mora chē soye tšēngaftangbe bominŷama entsēitēmena. <sup>43</sup> Er Jerusalenoca bacna tenga echanjoshjango; chora uayayēnga chentśa shēconánējana canŷe tapiēse mochantsepórma, mochantsejētja y nŷetsca juachoicana mochanjontśé tšēngaftanga jtsatsejana, <sup>44</sup> y lempe mochantsepochoá. Muentśa oyenēnga mochantśēbaye, y ni mo canŷe ndētsbé inŷebé juatsboca quemochaise-boshjona, chē Bēngbe Bētsá tšēngaftanga játsebacama tojabo ora, ndoñe chešmatoyeuná causa ca” —Jesús tojánayana.

*Jesús, Bēngbe Bētsabe bēts yebnentsana enēnga y obuámnayēnga tojtanēbuacna*  
(Mt 21.12-17; Mc 11.15-19; Jn 2.13-22)

<sup>45</sup> Chentśana, Bēngbe Bētsabe bēts yebnoye Jesús tojánamashēngo y tojanontśé chē chentśe imojtsenēnga chentśana jtēbuacnana, <sup>46</sup> y tojanējyana: “Bēngbe Bētsá chabe uabemana palabreñguñe tojayana: ‘Atśbe bēts yebna echántsemna átśeftaca encuéntaye yebna ca’, pero tšēngaftangna, atbēbanēngbe oyeñiñe chē yebna šmojtsebema ca.”

<sup>47</sup> Y cada te, Bēngbe Bētsabe bēts yebnentsē Jesús entsānga yojtsabuátambaye; y bachnangbe amēndayēnga, ley abuátambayēnga y chē pueblentśa mandayēngnaca imojtsenguaye ntśamo jamēse cha jóbana. <sup>48</sup> Pero ndoñe tmonjáninŷena ntśamo, er nŷetsca entsānga corente imojtseyeunana ntśamo cha yojtsoyebuambnacá.

## 20

*Jesusbe obenana*  
(Mt 21.23-27; Mc 11.27-33)

<sup>1</sup> Canŷe te, Bēngbe Bētsabe bēts yebnentsē Jesús yojtsabuátambaye, y chē tśabe noticiēngama yojtsabuayiná ora, tmojánashjajna bachnangbe amēndayēnga, ley abuátambayēnga, judiēngbeñe bētsējemēngcá mandayēngaftaca cāñiñe; <sup>2</sup> y Jesús tmojaninyana: —Sméyana; ¿ndaye deréchoca chē contsama soyēnga aca cojtsama ca? o ¿chca jtsamama nda obenana tcmēnjatśetá ca?

<sup>3</sup> Chora Jesús tojanējua: —Atśnaca canŷe soye sēntsebmoma tšēngaftanga jatjayama. Smochjojuanga. <sup>4</sup> ¿Nda Juan chē Ubayaná tbojanichmó entsānga jubáyama, Bēngbe Bētsá o entsānga ca?

<sup>5</sup> Chora chēnga tmojanontśé enatsētsnayana: “ ‘Bēngbe Bētsá ca’ chamojojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’ <sup>6</sup> Y ndoñe quemuátobena jayanana ‘entsānga ca’; entsānga ndētsbéngaca buattsēbaye, er nŷetscanga becá mondējuabná Juan ndegombre Bēngbe Bētsabe juabna oyeubuambnayá yojamnama.” <sup>7</sup> Chcasna, chēnga tmojanjuá ndoñe monjántatśēmo nda Juan tbojanichmó entsānga jubáyama ca.

<sup>8</sup> Y Jesús tojanējyana: —Asna atśe cach ndoñe quechocatēyana ndaye deréchoca chca stsama ca.

*Chē puerte bacna trabájayēngbiama cuento*  
(Mt 21.33-44; Mc 12.1-11)

<sup>9</sup> Chentśana Jesús tojanontśé entsānga jáuyanana, y quem cuéntoca tojanabuatambá: “Canŷe entśá uvas betiyēnga yojáje y chē fshantse inŷe trabájayēnga yojúyentsame, y baytescama bēn luaroye yojtsoñe. <sup>10</sup> Chē uvasēsangá juashacama tempo yojobuache orna, chē jajañe nduiño canŷe oservená ibojíchmuá chē trabájayēnga jáuyanama ntsachetśá cha ibojtsotocánama. Pero chēngna cha imojtsejantsetaye, y tondaye ntōyicá imojtichmuá. <sup>11</sup> Chentśana inŷa ibojíchmuá; pero chē trabájayēnga cha imojtsejantsetaye, imojtsóyenguango, y tondaye ntōyicá imojtichmuá. <sup>12</sup> Chē nduiño inŷa ibojatichmuá; pero chánaca chēnga imojtsejantsetaye, imojtselisia, y chentśana imojtábocna.

<sup>13</sup> “Chora chē nduiño yojeniyana: ‘¿Y mora ntśamo chijama ca? Cach atśbe bonshana uaquiñá chanjíchmuá; nderádose cha añe mochanjōyeunaye ca.’ <sup>14</sup> Pero chē trabájayēnga, chē uaquiñá imojinŷe orna imojeniyana: ‘Mua chē fshantse nduiñbe uaquiñá entsemna. Lempe chabe soyēnga mua echanjōyēngacñe; motsóbanga y nŷetsca chabe otocana soyēnga bēngbiama echanjoquéda ca.’ <sup>15</sup> Chcasna, chē uvas jajañentśana cha imojtsábocna y imojtsóba.”

Chora Jesús tojanatjá: —Y asna, ¿ntśamo šmojtsejuabná, ndayá chē jajañe nduiño chē trabájayēngaftaca yochjama ca? <sup>16</sup> Cha co echanjá y chē trabájayēnga echanjatsēbaye, y chē uvas betiyēnga jajañe inŷe trabájayēnga echanjárrendaye ca.



Chê entsânga chca tmojanuena ora, tmojánayana: —¡Bëngaftaca ndocna te chca chaon-dopasá ca!

<sup>17</sup> Pero Jesús tojanënyané y tojánayana: —As ñdayama Bëngbe Bëtsabe uabemana pal-abrënguñfe iuayana?:

Chê yebna jebuanënga tmojtsanaboté ndëtsbé, mora chë más bëts uashacuanësentse entsejáona ca.

<sup>18</sup> Ndánaca chë ndëtsbéne chaojotsatsá, chëbé bochántsatsacacaye; y chë ndëtsbé ndábeñnaca chaojotsatsé, polvëshe bochántsebema ca —Jesús tojánayana.

<sup>19</sup> Chê bachnangbe amëndayënga y ley abuatambayënga tmojanenótatsëmbona Jesús chca tojanacuntá jinýanyiyama, chënga mo chë puerte bacna trabajayëngá imojamnama; asna tmojánbošena cachora jishachana, pero entsangbiamá imojtsauatja.

*Chê Romoca bëts mandadbiama impuesto jtsatsquëcñayama  
(Mt 22.15-22; Mc 12.13-17)*

<sup>20</sup> Chentšana chënga báseftanga tmojanichamó, mo ndegombre tšabe entsânga cuaftsem-ná chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama. <sup>21</sup> As chënga tmojantjá: —Buatëmbayá, bënga fsëntsetatsëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiama tondaye quenatámana nda más uamaná o nduamaná tomnana. Aca contsabuatambá ndegombre tšabe vida jtsebonnama, ntšamo Bëngbe Bëtsá yomandacá. <sup>22</sup> Chcasna, šmëyana, ñtsabá tayojtsemna bënga, César, chë Romoca bëts mandadbiama, impuesto jtsatsquëcñayama o ndoñe ca?

<sup>23</sup> Jesús yojtsetatsëmbo, ntšamo cha tojayaniñe jisháchichiyama chënga imojtsebošama; as tojanëyana: <sup>24</sup> —Chë šmatsquëcñá crocénana šminýinyënga ca; ñdabe jubiá chë crocénaniñe yojtsemna, y ntšamo muentse entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

<sup>25</sup> Y Jesús tojanëyana: —César šmochtoyiye cha ibotocana soye; y Bëngbe Bëtsana cha ibotocana soye ca.

<sup>26</sup> Y chca, chë ichmónënga ndoñe imonjobenaye jisháchichiyana, ndayá cha entsangbe delante tojayaniñe. Masna, ntšamo tojanëjuama, ojanánënga iytëca imojobiama.

*Obanënga jtayenama Jesús tmojantjá  
(Mt 22.23-33; Mc 12.18-27)*

<sup>27</sup> Chentšana, báseftanga saduceo ca uabaina entsânga tmojána Jesús jinýama. Chënga imojanjuabná obanënga ndocna te ntayenana ca. Jesús mentsá tmojantjá: <sup>28</sup> —Buatëmbayá, Moisés bëngbe leyënguñfe tojëftsanabema, nderado canýe boyá tojtsóbana y básenga ndoñe tonjëftsabáshejuanëšna, canmëna chë uabentsá chë shémaftaca jtobouamayana, chca, chë chabe uabochená obanabiamá básenga jtsabamnama ca. <sup>29</sup> Chcace, canýe bëngbentšë canýsëfta catšátanga monjamna. Chë natsaná tonjanobouamá y tonsanóbana, básenga ntjëftsabashejuancá; <sup>30</sup> chentšana chë inýa chë shémaftaca tonjanobouamá, y cachcá tonjanopasá. <sup>31</sup> Chë inýe uabentsá chora cháftaca tonjanobouamá, pero tonsanóbana básenga ntjëftsabashejuancá; y cachcá, chë inýe uabentsëgnaca cháftaca tmonjanobouamá, pero nyetscanga tmonjanóbana básenga ntjëftsabashejuancá. <sup>32</sup> Cabana, chë shembásanaca tonsanóbana. <sup>33</sup> Y chcasna, chë obanënga chamojtayena ora, ñdabe chë canýsëfta catšatanguentsabe shema chë shembása yochtsemna, nyetscanga cháftaca tmojanobouamase ca? —chënga tmojantjá.

<sup>34</sup> Chora Jesús tojanëyana: —Quem luarentse boyabásenga y shembásenga mondbëtsobouamnaye; <sup>35</sup> pero chë echanjóshjango luaroye jama y obanënguentsana jtayenama merecido jtsebuájonama chamojobenangna, masque boyabásenga o shembásenga, ya ndoñe quemochatóbouamnaye, <sup>36</sup> ni queochátopodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentsana mochtayénayeca. <sup>37</sup> Y Moisésnaca, chë yojtsángbototjuana betiyetémama tojanábementse, bënga šontsinýanýná chë obanënga imnátayenama; chentse Bëngbe Bëtsá tojánayana cha yomna Abraham, Isaac y Jacobëbe Bëtsá ca. <sup>38</sup> Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>39</sup> Chora básefta ley abuatambayënga Jesús tmojanianyana: —Buatëmbayá, tšabá tcjayana ca.

<sup>40</sup> Y ya ndoñe más montsenñëmua inýe soyëngama jatstjanayana.

*¿Cristo ndabe entsábentšana yomna?  
(Mt 22.41-46; Mc 12.35-37)*

<sup>41</sup> Jesús tojanatjá: “¿Ndáyeca tsëngaftanga šmnétsichamo chë Uámana Uabuayaná, chë Cristo, Rey Davidbentsana iuabó ca? <sup>42</sup> Er cach David, chabe librëšaña Salmos ca uabainëšaña, tojánayana:

Bëngbe Bëtsá, atšbe Utabná Crístbioye tbojanayana:

‘Atšbe catšbioica mótbema,

<sup>43</sup> atšbe obenánaca, acbe uayayënga acbe cucuatšíne chamoquedama chjamëntscuana ca.’

<sup>44</sup> ¿Ntámose, Cristo, Davidbentsana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

*Jesús chë ley abuátambayëngbiana tojánayana chënga ndoñe tsabá montsama ca*  
(Mt 23.1-36; Mc 12.38-40; Lc 11.37-54)

<sup>45</sup> Nyetsca entšanga imojtsuenana, y Jesús chabe uatsjëndayënga tojanëyana: <sup>46</sup> “Cuedado šmochtsebmna, y ndoñe šmattsama chë ley abuátambayëngá; chënga jtsogusetánana bënëna entšayangaca jtsajnana, y jtsebošana tsášenañe entšanga becá respétoca chamot-sacheuanayama. Chënga chë judiëngbe enefjuana yebnënguenache chë más uámana luarënguñe jtsetbiámanana, y fiestënguñe nýa quëseroca. <sup>47</sup> Pero chë viudángbioye chë tmobomna soyënga jtsabacayana; y entšangbe delante tsabá chacmotsënyama y chënga imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá inýëngbiana más chënga echanjácastigaye ca” —Jesús tojánayana.

## 21

*Jesús yojtsënyaye chë crocénana quëcjayënga*  
(Mc 12.41-44)

<sup>1</sup> Bëngbe Bëtsabe bëts yebnëntše, Jesús yojtsënyaye chë bomnënga crocénana jtse-quëcjayana chë crocénana quëcjayëtëmiñe; <sup>2</sup> y canýe viudá ndbomnjëmnaca tbojáninye, uta crocénana chëtëmiñe yojaftsësegóra. <sup>3</sup> Chora Jesús tojánayana: “Ndegombre cbëyana, quem viudá ndbomnjëma, Bëngbe Bëtsabiana nyetscangbiana más becá tonjëftsësegorá; <sup>4</sup> er nyetscanga tmonjëftsësegorá chë yojtsóyentsjamentsana, pero chana, masque tša ndbomnjëma, cha vida jtsebmnama lempe ntsachetsá yobomncá tonjëftsësegorá ca.”

*Jesús tojánayana Bëngbe Bëtsabe bëts yebna lempe mochjánpochocama*  
(Mt 24.1-2; Mc 13.1-2)

<sup>5</sup> Bãseftanga imojtsichamo chë Bëngbe Bëtsabe bëts yebnama, tša yojtsebotamanana puerta uámana ndëtsbéngaca y chë entšanga imojanamana juambana Bëngbe Bëtsábioye uátsëmbona soyëngaca ca. As Jesús tojánayana: <sup>6</sup> —Canýe tempo echanjóshjango, y lempe ntšamo mora muëntše šmontsonýacá tondaye queochatoquéda, ni mo canýe ndëtsbé inýebé juatsboye. Lempe mochantsëpochóca.

*Ntšamo yochtsemna quem luare jopochócama te chaojtsobeco ora*  
(Mt 24.3-28; Mc 13.3-23)

<sup>7</sup> Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entšanga chamotsetatšëmbuama ca?

<sup>8</sup> Y Jesús tojánayana: —Cuedado šmochtsebmna ndocná chacmondáingñema. Er banga mochanjabo y mochantsabíchamo chënga atšbe imomna ca. Mochántšichamo: “Atšbe chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye. <sup>9</sup> Y tsëngaftanga, entšanga imojtsentsjanama y entšanga mandadëngbe contra imojtsennama chašmojtsuenana ora, ndoñe šmattsauatja, er entseyta natsana chë soyënga chaochnëngo; pero masque chca, chë quem luare jopochócama tempo cabá ndoñe queochátsmëna ca.

<sup>10</sup> Y mëntšánaca Jesús tojanëyana: “Canýe luarentša entšanga, inýe luaroca entšangáftaca mochántšentsjanaye; y canýe amëndayábentša entšanga, inýe amëndayábioica entšangáftacnaca. <sup>11</sup> Ba luarënguñe jabuache echanjuangmëmana, bëts shëntsana, y entšanga pochócaye šocanënga echanjóshjango; y celoca echántsemna puerta uabouana soyënga y bëts soyënga, entšanga jinýanýiyama quem luare ya yochtsopochócama.

<sup>12</sup> “Pero cabá ndoñe chca chaondochnëngo ora, tsëngaftanga cmochanjíshëche y chašmosufirma mōchtsamta; bënga judiëngbe enefjuana yebnëngoye cmochanjunatse jātsetšenama y cárceloyacna cmochanjáutame, y reyënga y mandadëngbióynaca cmochanjunatse, atšbe ústonënga bëtsemna causa. <sup>13</sup> Chca šmochanjapása, ntšamo atšbiama šmotatšëmbcá chënga chašmëyanama. <sup>14</sup> Natsana ndoñe šmatjātsjuabnaye jenëuyana ntsamo chora jóyebuambayana, <sup>15</sup> er atšbe chanjama puerta tsabá y osertanánaca tsëngaftanga chašmóyebuambama; y chca, tsëngaftangbe uayayënga ndoñe quemochatobenaye jayanana ndoñe tsabá šmontsichamo ca, y ndocá jojuama quemochatobenaye. <sup>16</sup> Pero uayayëngbe cucuatšíne cmochanjábashejuana cach tsëngaftangbe bëtšëtsanga, catšátanga, pamillanga y amiguënga; y tsëngaftanguentšana

báseftanga cmochantsëbaye. <sup>17</sup> Y nÿetsca entsãnga cmochantsëbuayënja, atšbe ústónënga bétsemna causa. <sup>18</sup> Pero tsëngaftangbe bestšaëntšana ni mo canÿe stjënëja quecmochátabajajo. <sup>19</sup> Tsëngaftanga nÿets tempo átšbeñe ošbuáchiyënga chašmojtsemnëse, chë nÿetsca tescama yomna tsãbe vida šmochántsebmoma ca.

<sup>20</sup> “Jerusalén nÿets šhëconana soldadënga chašmojanÿe ora, šmochtsetátšëmbo Jerusalén jopochóama tojobuáchama. <sup>21</sup> Chorna, chë Judeoca oyenënga batsjabengoye chamot-sacheta; Jerusalenentše chamojtsemnënga, chentšana chamuaisebocana; y chë ja-jenache chamojtsemnënga, Jerusalenoye ndoñe chamondésamashjina. <sup>22</sup> Er chora echántsemna chë entsãngbe jabuache castigo; lempe ntšamo Bëngbe Bëtsabe uabe-mana palabrénguñe endayancá chora echanjochñëngo. <sup>23</sup> ¡Tša lastema chë tempo shembásenga ngomámanëngbiama o ochóchaye básenga chamojtsabamnëngbiama! Er chora corente ngmënana quem luarentše echántsemna, y quem luarentša entsãngbiama chë uabouana castigo. <sup>24</sup> Inÿenga espadëjaca mochanjóbana, y inÿengbiyoe nÿetsca lu-arënguëjana utámenënga mochanjunatse; y chë ndoñe judiënga, Jerusalenoca entsãngbiyoe mochántsatsejaye y mochantsëbaye, chca chaotsemnama Bëngbe Bëtsá tojalesenciantscuana ca” —Jesús tojánayana.

*Bëngbe Bëtsá Entšá tbojanbemá quem luaroye echanjësabo  
(Mt 24.29-35, 42-44; Mc 13.24-37)*

<sup>25</sup> Mëntšánaca Jesús tojánayana: “Chora bëtš soyënga echantsinÿna shinÿiñe, juashconiñe y estrellënguñe; y quem luarentša entsãnga tša mochántsauatja, ndayá jamama ntse-tatšëmbcá, chë mar béjaye y olëšënga corente echantsefshauenana causa. <sup>26</sup> Entšanga echantsabuátëcja tša auatja causa y ndayá quem luarñe yochjopásama enócochinÿena causa; er chë quem luarentša tsbanánoca espíritënga obenana bomnënga echanjángmëmëna. <sup>27</sup> Y chora entsãnga mochanjinÿe, chë Bëngbe Bëtsá Entšá tbojanbemá jantšetëshiñe echántsaboye, puerta obenánaca y corente buashinÿinÿaniñe. <sup>28</sup> Chë soyënga jochnënguama chaojobojatšë ora, añemo šmochjentšetaye y bestšaše játsbanase šmochjarrepára, er chora echántsemna chë tsëngaftangbe atsebacyana ca” —Jesús tojánayana.

<sup>29</sup> Mëntšánaca Jesús tojánëyana jabuátambama: “Šmochjinÿe canÿe higo betiye o ndaye inÿe betíynaca. <sup>30</sup> Tojtsaisëjotsanama šmojinÿe ora, jtsetatšëmbuana chë tsãbe tempo ya yojtsaisobecuama. <sup>31</sup> Cachcá, chë soyënga yojtsëchnëjuamana chašmojinÿe ora, šmochtsetátšëmbo chë Bëngbe Bëtsabe amëndayana ya yojtsobecuama.

<sup>32</sup> “Ndegombre chëyana, lempe chca echanjochñëngo, morsca entsãnga cabá ndóbana ora. <sup>33</sup> Celoca y quem luare echanjopochóca, pero atšbe palabra ndocna te queochaisopochóca.

<sup>34-35</sup> “Cuedado šmochtsebmoma y ndoñe šmatjaleséncia tsëngaftangbe ainana bacna juabnënga chaotsemnama, jenomándama ntšobencá mocá enobuena causa, tmoeye causa y nÿe quem luarentša soyëngama enócochinÿena causa; y tsëngaftanga prontánënga šmochtsemna, nÿe ndeolpe chë te chaojobuache ora; y tsëngaftanga ndëprontánënga ndoñe chašmondëtsemna, mo tsëngaftangbiama canÿe uachmaniñe cuaftsemncá. Er nÿetsca quem luarentša entsãngbiama chca echántsemna. <sup>36</sup> Cuedado šmochtsebmoma y yejuana šmochtsantješna; nÿe ntseco órnaca Bëngbe Bëtsáftaca šmochtsencuëntaye, chca, chë echan-jopása soyëngama jótšbocama chašmobenama, y chë Bëngbe Bëtsá Entšá tbojanbemabe delante jashjanguama ca” —Jesús tojánëyana.

<sup>37</sup> Jesús, bnëtë Bëngbe Bëtsabe bëtš yebnentše yojánabuatambaye, y ibetna, Olivos uabaina tjashoye yojánaye joquédama. <sup>38</sup> Y nÿetsca entsãnga cabá cachëse Bëngbe Bëtsabe bëtš yebnoye imojánajna Jesús joyeunayama.

## 22

*Entšanga tmojanjuabó ntšamo jamëse Jesúsbiyoe jishachama  
(Mt 26.1-5, 14-16; Mc 14.1-2, 10-11; Jn 11.45-53)*

<sup>1</sup> Ya yojëtšobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bëtš taitanga tojánatsebacama jtenójuaboyama. <sup>2</sup> Chë bachnangbe amëndayënga y ley abuátambayënga imojtsenguaye ntšamo jamëse Jesús jóbana, pero entsãngbiama imojtsauatja.

<sup>3</sup> Chora Satanás, Judas chë Iscariote ca uabobuatmabe ainaniñe bacna juabnënga tojan-jajó. Chánaca yojamna chë bnëtšana uta uatsjendayënguëntšá; <sup>4</sup> y tojáná, chë bachnangbe amëndayënga y Bëngbe Bëtsabe bëtš yebnoca soldadëngbe amëndayëngaftaca jencuëntama, ntšamo Jesús chëngbe cucuatšñe jayentšbáshejuanama. <sup>5</sup> As chënga imojóyejuaye, y Ju-das tmojanšbuachená crocénana chama jtatšetayana. <sup>6</sup> Y Júdasna aiñe ca tojánayana; y cach orscana cha yojtsenguaye ntšamo jamana y ndëmua ora Jesús chëngbiyoe jayentšbáshejuanama, ndocna entsãnga ora.

*Jesús chabe uatsjédayëngaftaca Bashco saná tojanse*  
(Mt 26.17-29; Mc 14.12-25; Jn 13.21-30; 1 Co 11.23-26)

<sup>7</sup> Chê Bashco fiesta ora tojanóshjango, chë levadúraca ndëpormana tandëse sayté; chë te yojamna, Bëngbe Bëtsá jëtschuayamna canýe oveshá jóbana chora jasama. <sup>8</sup> As Jesús, Pedro y Juánbïoye tojanëyana: —Motsata y saná sochjaprónta Bashco fiestama bënga mochjasama ca.

<sup>9</sup> Chora chata tbojantjá: —¿Ndémoca cojtseboşe chë saná fchjapróntama ca?

<sup>10</sup> Y Jesús tojanëjua: —Jerusalenentse chaşojámashëngo ora, canýe bacó cmochanjóbiatşe, mathajiñe búyeshe echantsabuyambaye. Cha sochjuasto, y sochtsonýaye ndëmuanýe yebnentşe cha yochjámashënguama; <sup>11</sup> y chentşa nduiño sochjauyana: “Chë Buatëmbayá şonjichamó aca jauyanama: ‘¿Ndayentşe chë tsañe yojtsemna, Bashco saná atşe atşbe uatsjédayëngaftaca jasama ca?’ ” <sup>12</sup> As cha cmochanjínýanyíe canýe bëts tsañe, tsbanana pisoca; ya lempe echántseprontana, y chentşe, Bashco fiestama saná sochjaprónta ca.

<sup>13</sup> As chë útata tbojana, y tbojaninýena lempe ntşamo Jesús tojanëyancá, y chentşe chë Bashco saná tbojanprontata.

<sup>14</sup> Jasama tojanobuache ora, Jesús mesëshentşe tojanótbema chabe uatsjédayëngaftaca, chë cachënga más chcoye chabe ichmónënga ca uabáinënga. <sup>15</sup> Chora Jesús tojanëyana: “Tşa sëndánboşe quem Bashco saná tsëngaftangaftaca jasama, atşe cabá ndoñe chandësufri ora. <sup>16</sup> Muentşana ndoñe más quemëntşa saná quicháisesse, Bëngbe Bëtsabe amëndayana candóshjanguëntscuana. Chora echantsótátşëmbo ntşamo quem fiesta ndegombre iuayancá ca.”

<sup>17</sup> Chorna canýe coptema vínoyeca tojanaca, Bëngbe Bëtsábïoye tbojtanchuá y mëntşá tojánayana: “Quem coptema vínoye menáfsënga; y cbëyana, <sup>18</sup> chë uvas betiyentşa shajuanentşana obocniye ndoñe más quichaisofsiye, Bëngbe Bëtsabe amëndayana candóshjanguëntscuana ca.”

<sup>19</sup> Chentşana, tandëse tojanca y Bëngbe Bëtsábïoye tbojtanchuá; tojanjatá, tojanatsatá y mëntşá tojánayana: “Quem soye, atşbe cuerpo entsemna, y chanjóbana tsëngaftangbe tşabiama. Ntşamo mora bënga montsamcá şmochtsama, atşbiama jtenójuaboyama ca.”

<sup>20</sup> Tmojansentşana, chë coptémaca tojanma cachcá ntşamo chë tandëseca tojanmcá y mëntşá tojánayana: “Quem coptema vínoye entsemna chë Bëngbe Bëtsabe tsëmtrato entsángaftaca. Atşbe buiñe echanjuábuashana, tsëngaftanga chaşmotsetatşëmbuama ntşamo Bëngbe Bëtsá entsanga tojanaşebuachenacá ndegombre yochjochñënguama. Chë buiñe tsëngaftangbe tşabiama echanjuábuashana. <sup>21</sup> Pero chë uayayëngbe cucuatşifñe sochjaboshjoná, mesëshentşe átşeftaca entsemna. <sup>22</sup> Ndegombre, chë Bëngbe Bëtsá Entşá tbojanbemáftaca echanjopása, ntşamo Bëngbe Bëtsá chabiama tojanjuabocá. ¡Pero tşa lastema chë bochjáboshjonabiama ca!” —Jesús tojánayana.

<sup>23</sup> Chorna chë uatsjédayënga tmojanontşé entjanayana, chënguentşá nda chë boshjuaná bëtsemnana.

*Nda chë más uamaná yomna*

<sup>24</sup> Chë uatsjédayënga imojtsenatsëtsnaye chënguentşá nda chë más uamaná bëtsemnana. <sup>25</sup> As Jesús tojanëyana: “Chë ndoñe judiëngbeñe, chë reyënga chëngbe entsángbïoye nýe ntşámncaca jtsamëndayana, y chentşa amëndayënga jtsamana, entsanga chëngbïoye tşabe soye amënga ca chamotsëbobaútmama. <sup>26</sup> Pero tsëngaftangbeñe ndoñe chca chaondëtsemna; chamna, tsëngaftangbeñe chë más uamaná mo chë más basacá chaóbema, y chë mandayá mo chë oservenacá. <sup>27</sup> Er, ¿ndase chë más uamaná yomna, chë mesëshentşe jasama tojotbemá o chë uajuatşnýa? Ndegombre co chë mesëshentşe tojotbemá; pero atşna tsëngaftangbeñe sëntsemna mo chë oservenacá.

<sup>28</sup> “Atşbe padecëniñe tsëngaftanga sempre átşeftaca şmondëtsemna. <sup>29</sup> Chíyeca, atşbe bariëna, canýe amëndayana cbochanjátşataye, ntşamo atşbe taitá canýe amëndayana sojatştacá; <sup>30</sup> chca, atşbe amëndayoca mesëshentşe átşeftaca şmochanjase y şmochanjofsiye, y uamana tbemaniñe mo reyëngcá şmochanjotbiama, chë Israeloca bnëtsana uta pamállanga entsangbiama chaşmuayanama tşabá o ndoñe tşabá chënga tmonjamama ca” —Jesús tojánayana.

*Jesús tojánayana, chábïoye ndoñe bonjanabuátma ca Pedro yochjánayana*  
(Mt 26.31-35; Mc 14.27-31; Jn 13.36-38)

<sup>31</sup> Jesús mëntşánaca tojánayana: —Simón, Simón; cochtsetatşëmbo, Satanás obenana tonjotjañe tsëngaftangaftaca nýe ntşámncaca jamama, mo chë trigo matënga tcojtsashatiyëncá; <sup>32</sup> pero atşna Bëngbe Bëtsá sënjaimpadá, átşbeñe oşbuáchiyana ndoñe chacmondëtsebuáshbenama. Y aca, nýets oşbuáchiyana átşbeñe chacojtsatsbomna ora, chë inýe oşbuáchiyënga cochjújabuache átşbeñe sempre chamotsoşbuáchema ca.

<sup>33</sup> Chora Simón tbojaniana: —Bëngbe Utabná, atše sëntseprontana ácaftaca cárceloje jámnaca y jobanámnaca ca.

<sup>34</sup> Y Jesús tbojaniana: —Pedro, atše cbëyana, cam ibeta bínñanoye, ngallo cabá ndécanta ora, aca unga soye cochanjayana ndoñe šconduabuatma ca.

*Chë más jabuache ora yojtsobeco*

<sup>35</sup> Chentšana Jesús tojanatjá: —¿Chë ni shecnájaca, ni crocenánaca, ni shecochëtjonësheca tcbonjanichamó ora, nderado ndayá tmojanabuáshebena ca?

Y chënga tmojanjuá: —Tondaye ca.

<sup>36</sup> Chora tojanéyana: —Mora ndoñe chca; shecnaja tobonná, chëja chauesocñe y crocenánama shecnëbénaca; y nda ndoñe espadëja tondbomna, chabe quëfsaiya chaot-satábuiye y canye espadëja chauatobuámiñe. <sup>37</sup> Er cbëyana, entseyta átseftaca chaopasá, ntšamo Bëngbe Bëtsabe uabemana palabrënguñe atšbiana iuayancá, mëntšá: “Y chábioye tmonjáninñe mo chë puerte bacna soye amënguentšá canya cuaftsemncá ca.” Y lempe ntšamo atšbiana iuabemancá, mora ya echanjochnëgo ca —Jesús tojanéyana.

<sup>38</sup> As chënga tmojaniana: —Bëngbe Utabná, muentše uta espadëja entsemna ca.

Y japochócamna cha tojánayana: —Nye nyetšá ponto ca.

*Getsemaní luarentše, Jesús Bëngbe Bëtsáftaca tbojanencuentá*

(Mt 26.36-46; Mc 14.32-42)

<sup>39</sup> Chentšana, Jesús tojánbocna y ntšamo yojanamancá Olivos tjšashoye tojána, y chabe uatsjëndayënga tmojanasto. <sup>40</sup> Choca tmojánashjajna ora, Jesús tojanéyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

<sup>41</sup> Y chë uatsjëndayëngbentšana yojoluára, mo canye ndëtsbé jutšenëntscoca nyetšá, y yojoshëntsamentšiye Bëngbe Bëtsáftaca jencuéntama. <sup>42</sup> Jesús mëntšá tojánayana: “Taita, aca tcojtsebošëse, moma atše ndoñe chašondëtsemna chca jasúfriana. Pero ntšamo atše stsebošëcá ndoñe chaondëtsemna, sinó ntšamo aca cojtsebošá ca.”

<sup>43</sup> Chca orna celocana canye ángel tbojánebëbocna, añemo chaotsebonnama jua-jabuáchama. <sup>44</sup> Jesús tša ngmëniñe yojtsemna, y Bëngbe Bëtsáftaca más ibojtsencuéntaye. Y chabe bosese yojtsemna mo fshantsiñe buiñe cuaftsebuastëtjuancá.

<sup>45</sup> Bëngbe Bëtsáftaca jencuéntama tojanpochocá ora, tojtantsbaná y chabe uatsjëndayënga imojtsemnoye tojána; y chënga imnëtsomañe, tša ngmëna imojtsemna causa. <sup>46</sup> Chora tojanéyana: “¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

*Uayayënga Jesús tmojánishache*

(Mt 26.47-56; Mc 14.43-50; Jn 18.2-11)

<sup>47</sup> Jesús cabá yojtsóyebuambnantscuana, ba entšanga chentše tmojánashjajna. Chë Judas ca uabainá, canya chë bnëtsana uta uatsjëndayënguentšá, chë entšangbe natsana yojtsaye. Cha yojobeconá Jesús juamóchama; <sup>48</sup> pero Jesús tbojaniana: “Judas, ¿canye juamochëse chë Bëngbe Bëtsá Entšá tbojanbemá uayayënge cucuatšñe cochjaboshjona ca?”

<sup>49</sup> Chë Jesuseftaca imojtsemnënga tmojáninñe ntšamo chora yochjanopásama; as tmojaniana: —Bëngbe Utabná, ¿espadëjaca fšcotsatsejaye ca?

<sup>50</sup> Y canya chënguentšá, chë bachnangbe más uámana amëndayabe bochichnayábioye catšbioica matscuase tbojtsantëtše, y tbojtsanëštjango. <sup>51</sup> Chora Jesús tojanéyana: —Cachcá monjá; nye nyetšá ponto ca.

Y chë bochichnayábioye chë matscuase tbojánbojajo y tbojanshná. <sup>52</sup> Chentšana, chë bachnangbe amëndayënga, chë Bëngbe Bëtsabe bëts yebnentšá soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanéyana: “¿Ndáyeca espadëjangaca y ngarotbëngaca šmojabo atše jishachama, mo atše canye bacá uamana entšá cuaftsemncá ca? <sup>53</sup> Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmátanbojajo. Pero ora tocjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanéyana.

*Pedro tojánayana Jesúsbioye ndoñe bonjanabuátma ca*

(Mt 26.57-58, 69-75; Mc 14.53-54, 66-72; Jn 18.12-18, 25-27)

<sup>54</sup> Chentšana Jesús tmojánishache, y chë bachnangbe más uámana amëndayabe yebnoye tmojanánatse. Y Pedro bënocana ibojtsëstona. <sup>55</sup> Choca, chashja tsëntsaca, canye iñeshe tmojanangbotj y entšanga chë shëconana imojtsetbiámana; y Pédrëna chentše chëngaftaca yojótbema. <sup>56</sup> Chora, canye shembása chentša oservená, Pédrëbioye tbojáninñe chë iñe juachaca yojtsetbemana; tbojanonñinñe y tojánayana: —Muánaca cháftaca endánmëna ca.

<sup>57</sup> Pero Pedro ndoñe ca tojánayana, y chë shembásabioye mëntšá tbojaniana: —Sobrená, atše cha ndoñe quetsatabuatma ca.

<sup>58</sup> Ndoñe yapa bën y inña chábioye tbojataninye y tbojanianyana: —Acnaca chë uatsjendayënguentšá condmëna ca.

Pero Pedro tbojanjuá: —Bacó, atše ndoñe quetsátmëna ca.

<sup>59</sup> Chentša benëntscosna, inña más yojátayana: —Ndegombre, muánaca cháftaca enjánana; muánaca Galileocá entsemna ca.

<sup>60</sup> Y Pedro tojánayana: —Bacó, ndayama cojtsichámuama ndoñe quetsátsatšëmbo ca.

Cachora, y Pedro cabá yojtsóyeuambnantscuana, canye ngallo yojacánta. <sup>61</sup> Chora Bëngbe Utabná yojobuértana y Pédrëbioye tbojanonýinyé; y Pedro chora yojenójuaboye ntšamo Bëngbe Utabná tbojanianama: “Cam ibeta bínýanoye, ngallo cabá ndécánta ora, aca unga soye cochanjayana ndoñe šconduabuatma ca.” <sup>62</sup> As Pedro shjoye tojánbocna, y corente ngmënaca yojtsenóbošachna.

*Jesús imojtsáboyejuana*

(Mt 26.67-68; Mc 14.65)

<sup>63</sup> Chë Jesús imojtsebojanýa entsanga cha imojtsáboyejuana y imojtsejantšetaye; <sup>64</sup> y jtsabuchëntsacjuase, imojtsetjanaye: “¡Momalisiá, nda tcmënajantšetá ca!” <sup>65</sup> Y imojtsóyenguaye, nýe mocá soyënga jtsatsëtsnayëse.

*Jesús, chë judiëngbe uámana mándayëngbe delante*

(Mt 26.59-66; Mc 14.55-64; Jn 18.19-24)

<sup>66</sup> Tojanbinýna ora, chë bëtsëjemëngcá amëndayënga, bachnangbe amëndayënga y ley abuátambayënga tmojanenëfina, y chëngbioye Jesús tmojanánatse. Choca tmojantjá: <sup>67</sup> —Smëyana, ça Bëngbe Bëtsabe Uámana Uabuayaná, chë Cristo comna ca?

Y Jesús tojanëjua: —Aíñe ca tchojáuyanëse, tšëngaftanga chama átšbeñe ndoñe quešmochatošbuáchiye. <sup>68</sup> Y nderado tchojátjasna, tšëngaftanga ndoñe quešmochatojuá ca. <sup>69</sup> Pero cam orscana, chë Bëngbe Bëtsá Entšá tbojanbemá, chë Bëngbe Bëtsá nýets obenana bomnabe catšbioica echántsatsbemana ca.

<sup>70</sup> Chora nýetscanga tmojantjá: —¿As, aca chë Bëngbe Bëtsabe Uaquíñá comna ca?

Y Jesús tojanëjua: —Cach tšëngaftanga chca šmontsichamo; atše cha sëndmëna ca.

<sup>71</sup> As chora chënga tmojánayana: —¿Ndayama más entsanga šochjátëjaboto Jesusbe contra chamuayanama? Er cach bënga chabe uayášentšana chca tmonjouena ca.

## 23

*Jesús, Pilatbe delante*

(Mt 27.1-2, 11-14; Mc 15.1-5; Jn 18.28-38)

<sup>1</sup> Nýetsca mándayënga tmojëfšantsbaná, y Pilátbioye, chë Judeoca mandádbioye Jesús tmojanánatse. <sup>2</sup> Y chentše tmojanontšé cha mal jaquédana, mëntšá: —Bënga fsënjínýena mua entsabuatambá bacna soyënga, quem luarentša entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsatsquécjnayana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canye reycá ca.

<sup>3</sup> Chora Pilato Jesúsbioye mëntšá tbojantjá: —¿Aca chë judiëngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>4</sup> As Pilato, chë bachnangbe amëndayënga y entsanga tojanëyana: —Atše ni mo canye soye chiyátinýena, quem boyabása castiganá chaotsemnma jayanama ca.

<sup>5</sup> Pero chënga más tmojanáyeuachena: —Nýets Israel luarëjana entsabuatambá, Galilea entsangbe amëndayëngbe contra jtsemnma. Galilea luaroca chca tonjabojatšé y mora moca Judeócna cachá entsama ca.

*Jesús Rey Heródesbe delante*

<sup>6</sup> As Pilato, Galilea luarama yojouena ora, tojanatjá Jesús Galileocá tayoamnama.

<sup>7</sup> Y Jesús aíñe Galileoca yojamnama cha tojántatšëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna.

<sup>8</sup> Herodes Jesúsbioye tbojáninye ora, corente tojanoyejuá. Chana tempscana inaboše Jesús jinýama. Cha ba soyënga Jesusbiama tojanuena, y yojtseboše jinýama Jesús jamana canye bëts soye, Bëngbe Bëtsabe obenánaca. <sup>9</sup> Heródesna ba soyënga tbojantjá, pero cha ndocá tbojanjuá. <sup>10</sup> Y chéntšnaca, chë bachnangbe amëndayënga y judiëngbe ley abuátambayënga imojtsemna, y Jesús corente mal imojtsequédaye.

<sup>11</sup> Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entsayangá tmojanichëtjo, mo canye reycá; chentšana cachiñe Pilátbioye tmojesanichmó. <sup>12</sup> Cach te Herodes y Pilato tbojtananetsëtsaye; tempna chata ibojenáyata.

*Jesusbiama chaóbana ca tmojánayana*

(Mt 27.15-26; Mc 15.6-15; Jn 18.39-19.16)

<sup>13</sup> Chentšana Pilato, chë bachnangbe amëndayënga, chë pueblentša amëndayënga y nyëtca entšanga tojánachembo, <sup>14</sup> y mentsá tojanéyana: —Tšëngaftanga quem entšá átsbioye šmojuánatse, mo bacna soye entšangbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiana šmonjayana, pero atšna ni mo canye soye chiyátinýëna, quem boyabása castiganá jtsemnma ibojtsemna ca jayanama. <sup>15</sup> Herodes cach ndoñe, chíyeca cachiñe bëngbioye cha thobesichmó. Quem boyabása ni mo canye ndoñe tonjobuachjanguá jóbanama chabotsemnma. <sup>16</sup> Chcasna, jabuache chamotsecastigá y chentšana chanjëtšboshjona ca —cha tojánayana.

<sup>17</sup> Yojamna canye utamená jëtšboshjonana, ntšamo Bashco fiesta ora jamana imojanamancá. <sup>18</sup> Pero chora entšanga cánýiñe tmojanáyebuachena: —¡Jesús chaóbanal! ¡Barrabás matsboshjona ca!

<sup>19</sup> Barrabás inautámena, mandadëngbioye ndëtsayaunanama chë bëtš pueblentše entšanga tojánenautanama y entšá óbanaye causa. <sup>20</sup> Pilato cachiñe tojánayana Jesúsbioye jëtšboshjonama yojtsanboše ca; <sup>21</sup> pero entšangna más tmojtétanaye buachena: —¡Motsecrucificá! ¡Motsecrucificá ca!

<sup>22</sup> Pilato ya unga soyama tojtétanayana: —¿Ntšamo bacna soye mua tojobuachjanguá ca? Ni mo canye bacna soye chiyátinýëna, mua jóbanama chabotsemnma. Chcasna, chanjacastiga y chora chanjëtšboshjona ca.

<sup>23</sup> Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entšangbe jabuache chembumbuanánaca, Pilato tmojanëýëñaná Jesús chamóbama. <sup>24</sup> As Pilato tojanmandá ntšamo chë entšanga imojtsot-janañá chaotsemnma; <sup>25</sup> as chora Pilato, Barrabásbioye cachcá tbojtanboshjona, chë nda inautámena mandadëngbioye ndëtsayaunanama entšangbioye tojánenautanama y entšá óbanaye causa. Y Jesusna entšangbe cucuatšíñe tbojánboshjona, ntšamo chënga tmojtsebošcá chamomama.

### *Jesús tmojancrucificá*

(Mt 27.32-44; Mc 15.21-32; Jn 19.17-27)

<sup>26</sup> As jacrucificama Jesús tmojanánatse. Chora jajocana inátaboye canye boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

<sup>27</sup> Y banga chë pueblentša entšanga imojtséstona; y chë shembásenga imojtséstonënga imojtsayošachiye y ngménaca imojtsanioye, Jesús chca yojtsepásama. <sup>28</sup> As Jesús chëngbioye tojanobuértana y tojanéyana: “Jerusalenenťša shembásenga, atšbiama ndoñe matošachena; cach tšëngaftangbiama y tšëngaftangbe básengbiama šmochjenóbošachna. <sup>29</sup> Canye te echanjóshjango y chë te šmochántsihamo: ‘Tša tsabá chë shembásenga šësona ndbomnëngbiama, chë quem luaroye šësonga ndoñe tmonjëtššeshejajněngbiama, y chë šësonga ndoñe tmonjëtšabachengbiama ca.’” <sup>30</sup> Chora entšanga jetsóitanama mochántseboše y mochanjontšë ichámuana: “¡Tjashënga šmotsëtebuantsá y batsjabenga šmotsaitame ca!” <sup>31</sup> Atše, chë ndocna bacna soye amá, chíyeca puerta obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mentsá, ¿chë nguëřšhna betiyeca chca tmojtsamëse, ntšamo chë tojtsebuashá betiyeca mochjama ca?” —cha tojanéyana.

<sup>32</sup> Jesúseftaca cruciñe jóbanama, útata bëtš bacna soyënga ochjajnayátnaca imojtsënachaye. <sup>33</sup> Chë “Obanabe Bestšashe ca” uabaina luaroye tmojánashjajna ora, Jesús tmojancrucificá y chë bëtš bacna soyënga ochjajnayátnaca, canya chabe catšbioica y chë inýana chabe uañicuayoica. <sup>34</sup> Chora Jesús mentsá tojánayana: “Taita, mëngbe bacna soye motsaperdónaye, er ntšamo montsamama chënga ndoñe quemátstatšëmbo ca.”

Chë soldadënga Jesusbe entšayamna, tsbanánoye tmojanëtšëna, chënga jtenájatayama. <sup>35</sup> Entšanga chentše imojtsemnënga chca imojtsonýaye, y chë pueblentša mandayëngnaca Jesús imojtsáboyejuana y mentsá imojtsenatsëtsnaye: “Inýengna añiñe tojëtšatsebacá; mora cachá chautsibocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

<sup>36</sup> Soldadëngnaca Jesús imojtsáboyejuana; tmojanobeconá y untja vínoye imojtsefšësnaye, <sup>37</sup> y mentsá imojtsatsaye: “¡Chë judiëngbe Rey tcomnëсна, cach aca mentsibocá ca!”

<sup>38</sup> Jesusbe bestšase juatsboicna canye uabemana soye tmojananjo; chiñe mentsá yojtsanábemana: MUA CHë JUDIëNGBE REY ENDMëNA ca.

<sup>39</sup> Canye bëtš bacna soyënga ochjajnayá yojtsecrucificaná, Jesúsbioye mentsá tbojanóyenguango: —Chë Bëngbe Bëtsabe Uámana Uabuayaná tcomnëсна, mentsibocá y bëndátnaca šmatsebočá ca.

<sup>40</sup> Pero chë inýe bëtš bacna soyënga ochjajnayana mentsá tbojanácacana: —¿Ni mo Bëngbe Bëtsá ndoñe condërrespëtna? Bëndátnaca bontsamna chacá jóbanama. <sup>41</sup> Ndegombre

bëndata muentse bontsemna bëts bacna soyënga ochjajnaye causa, y chíyeca chca jasúfriama bontsamna. Pero quem boyabása ni mo canye bacna soye ndoñe tonjobuachjuangá ca.

<sup>42</sup> Y chorna, quem bëts bacna soyënga ochjajnayá Jesúsbiye tbojanianyana: —Jesús, atšbiama cochtenójuaboye aca reycá jabomándama chacojtabo ora ca.

<sup>43</sup> Y Jesús tbojanjuá: —Ndegombre cbëyana, mënté átšeftaca celoca, chë nyëtscanga oyejuayënga mondbetsemnoca, aca cochantsatsmëna ca.

*Jesús tojanóbana*

(Mt 27.45-56; Mc 15.33-41; Jn 19.28-30)

<sup>44</sup> Nyetsto orscana las tresëtscoñe nyëts quem luare yojtseibétata. <sup>45</sup> Y shinýe yojtsajbaná binýnayana, y Bëngbe Bëtsabe bëts yebnentše yojújonýana entšējua tsëntsaca yojtsenájataye. Chējua bënëjua inauamna y chë tsatsëntsaca inaujonýana. <sup>46</sup> As Jesús tojanáyebuachena: “Taíta, atšbe espíritu acbe cucuatšife šcoboshjona ca.”

Y chca jayanama tojanpochocá ora, tojanóbana.

<sup>47</sup> Chë romano soldadënge amëndayá chca tojáninýe ora, Bëngbe Bëtsábíoye tbojtanadorá, mëntšá jayanëse: “Ndegombre, quem boyabása ainaniñe tšabe juabnënga bomná inamna ca.”

<sup>48</sup> Nyetsca entsanga chë soye jinýama tmojánabënga, chca tojanopasama tmojáninýe ora, tmojanontšé jtangana enocochantšetaye, ngménama. <sup>49</sup> Pero Jesusbe nyetsca ubuátmënga y chë shembásenga Galileocana tmojanastëngna, chaboca tmojanouedá chë soyënga onýayiñe.

*Jesús tmojanatbontsá*

(Mt 27.57-61; Mc 15.42-47; Jn 19.38-42)

<sup>50</sup> Yojanmëna canye boyabása, José ca uabainá, canye Judeoca pueblocá, Arimatea ca uabaina; cha inamna canya chë pueblentša uámana amëndayënguentšá y canye tšabe entšá y nyetsca soyënguñe tšabá amá. <sup>51</sup> Chánaca yojanobátmána chë Bëngbe Bëtsabe amëndayana chaóshjanguama, y tondaye tbojanogustá ntšamo chë inye amëndayënga tmojanjuabó y Jesúseftaca tmojanmcá. <sup>52</sup> Cha Pilátbiye tojána y Jesusbe cuerpo tbojanotjañe. <sup>53</sup> José chë cruzocana Jesusbe cuerpo tbojtantšjango, canye lino entšējua tbojanandmaná y canye cuevëshiñe, peñëshiñe pormániñe, tbojanjajó. Chentše cabá ndocná mondējajo. <sup>54</sup> Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebínýana.

<sup>55</sup> Chë shembásenga, Galileocana Jesús tmojantjëmbabanga, tmojána y chë cuevëshe tmojáninýe, y tmojanrrepará ntšamo Jesusbe cuerpo tmojanjajoma. <sup>56</sup> Yebnoye tmojtaná orna, tmojanprontá botamana uangüëtse bëjayënga y soyënga chë cuerpiñe janëtjuama.

Chë ochnaytena chënga tmojanochná, ntšamo Moisesbe leyíñe yojanmandancá.

## 24

*Jesús tojtanayena*

(Mt 28.1-10; Mc 16.1-8; Jn 20.1-10)

<sup>1</sup> Y tmingo, chë inye semana bojatséntena, cabá cachëse, Jesús tmojanatbontsá cuevëshoye chë shembásenga tmojána, y tmojanamba chë tmojanprontá botamana uangüëtse soyënga.

<sup>2</sup> Pero choye tmojánashjajna orna, tmojáninýena chë cuevëshoye amashjuanentša ndëtšbé chentšana juanániñe, <sup>3</sup> y choye tmojánamashjina ora, Bëngbe Utabná Jesusbe cuerpo ndoñe tmojáninýena. <sup>4</sup> Chë shembásenga ndoñe imontsetátšëmo ntšamo jajuaboyana chë soyama; chora, uta boyabásata, uabuashinýinýana entšayá uichëtjonata chentše tbojabántsaye. <sup>5</sup> Y chë shembásenga tmojanëuatjanama y fshantsoye imojtsatsejbénama, chata tbojanëyana: “¿Ndáyeca obanëngbentše chë vida totsobomñá šmojtsenguá ca? <sup>6</sup> Muentše cha ndocná quenátsmënga, er cha ya tontayena. Menójuabonga ndayá cha tmojanëyanama, cha cabá Galileoca enjamna ora. Cha tonjánayana: <sup>7</sup> “Chë Bëngbe Bëtsá Entšá tbojanbemá bontsemna bacna soye amënge cucuatšife chamoboshjonama, chamocrucificama y unga tianoye cháuatayenama ca” —chata tbojánayana.

<sup>8</sup> Chora chë shembásenga Jesusbe palabrëngama imojtenójuaboye, <sup>9</sup> y chë cuevëshentšana tmojtaná ora, chë tšabe noticiënga chë bnëtsana canye uatsjëndayënga y inye entšángbiye tmojanacuntá. <sup>10</sup> Chë uatsjëndayëngbiye chca cuentayëngna imojamna María Magdalena, Juana, y María, chë Santiagbe mamá, y chë inye shembásenga chëngaftaca imojamnënga. <sup>11</sup> Pero chë uatsjëndayëngna mëntšá chë shembásengbiana imojëtsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyiñe ndoñe montsanošbuaché.

<sup>12</sup> Pero chentšana, Pedro tojëtsantsabaná y ochamanana chë Jesús tmojanjajó cuevëshoye tojána. Y choca yojtsemna ora, yojotsejbéna soye jontješiyama, pero nye ena entšëjuangá



yojuinŷe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

*Chë Emaús puebloye benachiñe  
(Mc 16.12-13)*

<sup>13</sup> Cach te, uta uatsjéndayata Emaús puebloye ibojtsaye. Emaús yojamna Jerusalenocana bnëtsana canŷe kilómetroca. <sup>14</sup> Chata ibojtsayencuéntaye lempe ntšamo tojanopasama. <sup>15</sup> Y tojanopasá, ibojtsencuéntaye y ibojtsenatsëtsnayëntscuana, cach Jesús tojanobeconá y chátaftaca cánŷiñe yojtsaye; <sup>16</sup> masque imojtsonŷaye, ndoñe ibontsobena cha jótëmbana. <sup>17</sup> Jesús tojanëyana: —¿Ndayama benachiñe šuabanencuéntaye ca?

As chata ngmënaca ibojtsaye, <sup>18</sup> y canŷa, Cleofás ca uabainá, tbojaniyana: —¿Nŷe aca cojtsemna, inŷe luarocana ashjangoná Jerusalenentše oyená, ndayá chentše quem diënga yopasánama ndëtatsëmbuá ca?

<sup>19</sup> Chora cha tojanëyana: —¿Ndaye soyënga ca?

Y chata tbojaniyana: —Chë Jesús Nazaretocáftaca tonjopasá soyëngama. Cha enjamna canŷe Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nŷetsca entšangbe delante. <sup>20</sup> Y ntšamo, chë bachnangbe amëndayënga y chentša mandadënga inŷengbe cucuatšë tmonjáboshjona, jóbana ibojtsemna ca entšanga chamuayanama y chamocrucificama. <sup>21</sup> Bënga chabíama fsënjanobátmána, Césarbe cucuatšëtsána Israeloca entšangbe atsebacyá chaotsemnana; pero morna ya unga te entsemna chca tonjopasá. <sup>22</sup> Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjajó cuevëshoye tmonjá, <sup>23</sup> y chabe cuerpo ndoñe tmonjínŷena; as chora chënga bëngbiyoe tmontabo y montsabichamo angelënga tmojëftsanŷe y chënga catmënjayana cha ainá yojtsatsmëna ca. <sup>24</sup> Bëngbentšana baseftángnaca chentšana chë cuevëshoye tmonjá, y tmojinŷena ntšamo chë shembásenga tmonjayancá, pero Jesús ndoñe tmonjëftsínŷe ca —chata ibojtsichamo.

<sup>25</sup> As Jesús chata tojanëyana: —¡Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama! <sup>26</sup> ¿Mo ndoñe yonjamna chë Uámana Uabuayaná chë soyënga chaosufrima, y chentšana nŷetsca entšanga corente cha chamuatschuama ca?

<sup>27</sup> Chentšana Jesús tojanontsé chata jábuayenana, lempe ntšamo chabíama yojanoyebuambnacá chë Bëngbe Bëtsabe uabemana palabrenguiñe; yojontsé Moisesbe librëšangañe y chë Bëngbe Bëtsabe juabna oyebuambnayënga librëšangáñnaca.

<sup>28</sup> Chë ibojétsaye puebloye imojtsebeconá ora, Jesús tojanma mo más chcoye cuaftsacá. <sup>29</sup> Pero chatna tmojanataríe chentše chaotsoquedáñama, mëntšá jauyanëse: —Bëndátaftaca motsoquedáñe; ya jetiñe entsemna y ya echanjaibétata ca.

As Jesús chátaftaca tojtsanoquedáñe. <sup>30</sup> Chentšana tojanopasá, juasama mesëshentše imojtsetbíamana ora, Jesús chë tandëse tojanca, Bëngbe Bëtsábíoye tbojtanchuá, chë tandëse tojanjatá, y chata tojanatsatá. <sup>31</sup> As, chora chë uatsjéndayata ibojobenaye Jesús jótëmbana; pero chana nŷe ndeolpe yojuenatjëmba. <sup>32</sup> Chora chata ibojtsenatsëtsnaye: “Chë benachiñe Bëngbe Bëtsabe uabemana palabrengama šondabuayiyná ora, ndegombre bëngbe ainaniñe más bontseboše cha más chašotsabuayiynama, ¿ndoñe chca ca?”

<sup>33</sup> As, cachora tbojëftsantsbanata y Jerusalenoye tbojtánata; choca tmojáninŷena chë bnëtsana canŷe uatsjéndayënga cánŷentše imojtsemna y chëngbe enutëngnaca; <sup>34</sup> y mëntšá imojtsichamo: —¡Ndegombre Bëngbe Utabná tojtayena; Simónbiyoe tbojëbébocna ca!

<sup>35</sup> As chata tbojanontsé jacúntana, ntšamo benachiñe tbojanpasacá, y ntšamo Jesúsbiyoe imojótëmba, chë tandëse tojanjatá ora.

*Jesús chabe uatsjéndayënga tojánebëbuacna  
(Mt 28.16-20; Mc 16.14-18; Jn 20.19-23)*

<sup>36</sup> Chë uatsjéndayënga chë soyëngama cabá imojtsencuéntantscuana, Jesús chëngbe tsëntsaca tojabántsaye y mëntšá tojanëyana: “Chë atšbe ainaniñe tsabe ebionana tsëngaftangaftaca chaotsemna ca.”

<sup>37</sup> Pero chënga tša auatjanánënga imojtsemna, y canŷe añemëse imojétsonŷaye ca imojtsejuabnaye. <sup>38</sup> Pero Jesús tojanëyana: “¿Ndáyeca auatjanánënga šmojtsemna? y ¿ndáyeca tsëngaftangbe ainaniñe chca šmojtsejuabná ca? <sup>39</sup> Atšbe cucuatšënga y atšbe shecuatšënga minŷënga; šmobjajo y šmochanjínŷe. Cach atšbe sëntsemna. Canŷe añemësa, ni mëntšena ni betašënga ntsebmnnana; pero tsëngaftanga šmontsonŷá, atšna añe ca” —tojanëyana.

<sup>40</sup> Chca yojtsichámëse, chabe cucuatšënga y chabe shecuatšënga tojaninŷanŷe. <sup>41</sup> Y chënga cabá ndoñe montsanošbuaché, chca noticiama corente imojtsóyejuama y tša ojnánënga imojtsemna causa; as Jesús tojanatjá: “¿Muentše ndayá jasama quešmëbomna ca?”

<sup>42</sup> As canýe tabena buana beonbiana tmojanoyé; <sup>43</sup> Jesús tojanocñe y chëngbentse tojanse. <sup>44</sup> Chentšana Jesús tojanéyana: “Quem palabrënga entsemna ntšamo cabá tšëngaftangatacá sënjamna ora tchbonjanëyancá: Entsemna, lempe chaopasá ntšamo atšbiama iuabemancá, Moisesbe leyënguifne, chë Bëngbe Bëtsabe juabna oyebuamb-nayëngbe uabemana librëšangañe y Salmos librëšañnaca ca.”

<sup>45</sup> Y chora chë uatsjëndayënga, Jesúsbeyeca tmojanobená chë Bëngbe Bëtsabe uabemana palabrëngama josértana. <sup>46</sup> Chentšana Jesús tojanéyana: “Ntšamo atšbiama iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca. <sup>47</sup> Y morna atšbe uabaina jayanëse, átšbeñe betsošbuáchema, nýets quem luarentse šmochjótša entšanga atšbiama jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuaperdonama; chë soyënga Jerusalenentse chaobojatšé. <sup>48</sup> Tšëngaftanga atšbiama soyënga šmonjinýe y šmondëtatsëmbo. <sup>49</sup> Atšbe Taitabe šbuachenaná, tšëngaftangbiamana chanjíchmu. Pero morna camuentse Jerusalenentse moquedanga, Bëngbe Bëtsabe obenana chašmóyëngacñëntscuana ca” —cha tojanéyana.

*Jesús celoye tojtantsjuá*  
(Mc 16.19-20)

<sup>50</sup> Chentšana, Jesús chabe uatsjëndayënga ínýoye tojanënatse, Betania pueblo béconana. Y chabe buacuatsënga játsbanase, Bëngbe Bëtsá tbojanimpadá chë uatsjëndayënga tšabe bendicionënga chamóyëngacñama. <sup>51</sup> Chca yojtsamëntscuana, cha chëngbentšana tojanoluaré y tojanontsé celoye játsjuana. <sup>52</sup> Chë uatsjëndayëngna, Jesús tmojtanadorá chentšana, Jerusalenoye oyejuayënga tmojtaná; <sup>53</sup> y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

## San Juan

*Cristo, chë Bëngbe Bëtsabe Uámana Oyebuambnayana ca Uabainá*

<sup>1</sup> Quem luare ndobojátsa ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna. <sup>2</sup> Ndegombre cha, chë tempscana Bëngbe Bëtsáftaca yojtsanmëna. <sup>3</sup> Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye maténjanma. <sup>4</sup> Cachábeñe nyets vida inamna, y quem vídaca tojánabo quem luarentsa entsangbe juabnënga jabuábinýayama. <sup>5</sup> Cha tonjánabo moye, chë entsangbe juabnënga ndoñe binýniñe yonjamnoye, chiñe jabobínýayama. Cha sempre chca yobínýna, y Satanás chë entsangbe juabnënga ndoñe binýniñe chaondëtsemnama amá, ndoñe yondobena chë binýnayabe obenana jtsejuánana.

<sup>6</sup> Inamna canýe boyabása, Juan ca uabainá; y Bëngbe Bëtsá tbojanichmó, <sup>7</sup> binýnayabiam chaóyeuambama; entsángbeñe binýnayabiam cháuyanama, chca, ntšamo Juan chë binýnayabiam tojayana soyëngaca, nyetscanga Jesúsbeñe chamotsošbuáchema. <sup>8</sup> Juan ndoñe yonjamna chë binýnýa. Cha inamna canýe ichmoná, chë nda binýnýa yomnabiam entsángbeñe chauabáyanama. <sup>9</sup> Chë ndegombrá quem luaroye tonjánabo chë entsangbe juabnënga jabuábinýayama.

<sup>10</sup> Chë Bëngbe Bëtsabe Uámana Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjánatšëmbo. <sup>11</sup> Cachabe luare entsángbioye tonjánabo, y entsanga ndoñe tmonjánbošena cha jofjana. <sup>12</sup> Nyetscanga, ndëmuanýenga cha tmojanëbuaja y chábeñe tmojtsošbuáchenga, cha derecho tonjanatšatá jtsobenama Bëngbe Bëtsabe básenga ca jtsabáinama. <sup>13</sup> Quem ošbuáchiýengna, chca jtsemnama ndoñe tmonjanobená entsangbe buiñentsana tmojanonýnáyeca, o ndaye entsabe juabnentsana. Nýe Bëngbe Bëtsábeyeca chca chabe básenga imojtsabaina.

<sup>14</sup> Cha, chë Bëngbe Bëtsabe Uámana Oyebuambnayana, entsá tojanóbema, y quem luare bëngaftaca yojéftsiyena. Cha yomna chë Bëngbe Bëtsabe nýe canýe Uaquiñá; chíyeca bënga tifjáninýe chabe bëts obenana y chabe tsabe juabna, chë Bëngbe Bëtsábentsana tojanóýëngacñana. Cha corente jtsababuánýeshanëse šojánanýena y yojéftsiyena ntšamo ndegombre inamncá. <sup>15</sup> Juan mëntšá chabiam yojanáyeuache: “Chabiam sënjanoyebuambná, chë ndabiam chora atše sënjánayana, chë átsbentšana jabamana atšbiam más uamaná endmëna, er atše cabá ndonýna orna, cha ya yojtsemna ca.”

<sup>16</sup> Cha tša tsabe ainana bómnyeca, bënga nyetscanga mallajta tsabe bendicionënga tmojóýëngacñe. <sup>17</sup> Moisesbiajana tifjanóýëngacñe chë Bëngbe Bëtsá tojanmandá soyënga. Pero Jesucristbeyeca, Bëngbe Bëtsá tsabe bendicionënga bëngbiam tojama y chë ndegombre soyënga bënga tmojëftsashache. <sup>18</sup> Ndocná, ndocna te Bëngbe Bëtsábioye thonjinýe. Chë nýe canýe Uaquiñá ibobomná, cach Bëngbe Bëtsá yomna; y cha, Bëngbe Bëtsá chë Taitáftaca cánýiñe mo canýacá yomna. Mua, chë Uaquiñá, bëngbiam tojama, Bëngbe Bëtsá juabuátmanama chaotsopodënama.

*Juan chë Ubayaná Jesucristbiam tojanabuayená*

*(Mt 3.11-12; Mc 1.7-8; Lc 3.15-17)*

<sup>19</sup> Canýe te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnama chamuatjayama. <sup>20</sup> Chocna, Juan chëngbeñe ndegombre tojanobuambá: —Atše, chë Bëngbe Bëtsabe Uámana Uabuayaná ndoñe quetsátsmëna ca.

<sup>21</sup> As chora, cachiñe tmojanjá: —As, ¿ndase cojtsemna? ¿Chë Bëngbe Bëtsabe juabna oyeuambnayá Elías ca?

Y Juan tojanéjua: —Atše cha ndoñe quetsátsmëna ca.

Chora chënga tmojanjá: —As, ¿chë Bëngbe Bëtsabe juabna jabóyeuambayama jabamá ca?

Y Juan tojanéjua: —Ndoñe ca.

<sup>22</sup> Chora chënga tmojanianya: —Asna, ¿aca ndase cojtsemna? Bënga šontsamna nda aca cojtsemnama jtsetatšëmhuana, as chë šonjadespachenga jacúntama. ¿Ndayá cojtsobena cach acbiam jayanama ca?

<sup>23</sup> Y Juan mëntšá tojanéjua: —Atše sëntsemna chë ndabiam Bëngbe Bëtsabe juabna oyeuambnayá Isaías mëntšá tojanábema: “Entsanga ndoyenoca canýe abuayiynayá echántsemna, y entsanga mëntšá echántsabuyiynaye: Bëngbe Utabná echanjabo ca. Mo nda canýe benache tojtseprontacá, tšëngaftángnaca cachcá, cha jabama tsabe juabnëngaca smochtseprontana ca.”

<sup>24</sup> Chorna, báseftanga chë fariseungbe ichmónënguentšana, <sup>25</sup> Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnësna, ni Elías, ni chë Bëngbe Bëtsabe juabna jabóyebuambayama jabamá ndoñesna, ¿ndáyeca entsanga cojtsëbayana ca?

<sup>26</sup> Chora Juan tojanëjua: —Atšna, béjayeca entsanga sëndëubáyana. Pero tsëngaftangbeñe canya entsemna; cha ndoñe quešmatábuatma; <sup>27</sup> y cha atšbe ústonoye echanjáshjango. Atše mercedo taitsatobuajoñe, ni mo jotsejbiyama, chabe shecochëtjonëshentša corriëja jajaffonama ca.

<sup>28</sup> Chca tojanopasá, canye pueblo Betania ca uabáinentše, Jordán béjaye chenguana. Cach béjayiñe, Juan entsanga yojanëbáyana.

*Jesús chë Bëngbe Bëtsabe Oveshatema ca uabainá*

<sup>29</sup> Yëfsana, Juan yojtsemnoye Jesús yojtsebëconaye, y chë cháftaca imojtsemna entsanga tojanëyana: “Smochjinýe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashajuana ca. Cha jóbanëse, quem luarentša entsanga bacna soyëngama perdonánënga mochántsemna. <sup>30</sup> Atše chabiamna cbonjutsëtsná, mëntšá sënjanáyana ora: ‘Atšbe ústonoye canya echanjáshjango. Cha atšbiamna más uamaná endmëna, er atše cabá ndonýna ora, cha ya yojtsemna ca.’ <sup>31</sup> Tempna, cach atše ndoñe quetsjátantatšëmbo nda cha bëtsemnana. Pero atšna ínýenga béjayeca ubáyana sëndabó, Israeloca entsanga quem boyabáca chamuábuatmanama ca” —Juan tojanëyana.

<sup>32</sup> Chentsana Juan mëntšánaca tojanobuambá: “Chabiamna mëntšá bominye sënjanajó: chë Uámana Espíritu, mo canye palomatemcá, celocana tonjánastjango y quem boyabásabe juatsbuañe tonjanototoná. <sup>33</sup> Atše cabá ndoñe quetsjátantatšëmbo nda cha bëtsemnana, pero chë béjayeca jubáyama šonjanichmó cha, mëntšá šonjaniyana: ‘Nda chacojinýe, chë Uámana Espíritu jastjanguana y chabe juatsbuañe jototonana, chábeyeca atše chanjíchmuu chë Uámana Espíritu entsangbe ainaniñe cháumashënguama ca.’ <sup>34</sup> Y morna, atše aiñe chca tijinýe, y ndegombre tsëngaftanga cbëyana, cha chë Bëngbe Bëtsabe Uaquifiá entsemna ca” —cha tojanëyana.

*Chë Jesusbe natsana ústonënga*

<sup>35</sup> Yëfsana, Juan chabe uatsjëndayënguentšana útataftaca cachoca yojtësemna. <sup>36</sup> Jesús yojtsachnëjuanama, Juan tbojáninýe ora, tojanëyana: “Sochjinýe. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

<sup>37</sup> Chora chë Juanbe uta uatsjëndayata, chca tbojanuena ora, Jesús tmojanasto. <sup>38</sup> Jesús tojesanontješë y tojánanýe chata imojtsëstonama. As, tojanatjá: —¿Ndayá šojtsenguá ca?

Y chata tbojánanýe: —¿Rabí, ndayentše icyoyena ca? (Rabí endayana “Buatëmbayá ca.”)

<sup>39</sup> Chora Jesús tojanëjua: —Mabo y sochjinýe ca.

As chata tbojána y tbojáninýe ndayentše cha yojaniyenana. Y chentše cháftaca tojëtšsanajëtana, ya jetiñe mo las cuatro ora yojtsemna causa.

<sup>40</sup> Chë Jesusbiamna oyebuambnayana Juánbioye tbojánóyeunata y Jesús tbojanasto útatëntšana cányana Andrés ca yojanabaina; cha yojamna Simón Pédrëbe catšata. <sup>41</sup> Andrés, cabá ndocna inýe soye ndëma ora, tojána chabe catšata Simón janguanguama. Y tbojáninýena ora, Simónbioye tbojaniyana: “Chë Bëngbe Bëtsabe Uámana Uabuayaná, Cristo, fsëjñinýena ca.”

<sup>42</sup> Chentsana Andrés, Simónbioye tbojánánatse Jesús yojtsemnoye. Jesús, Simónbioye tbojáninýe ora, tbojaniyana: “Aca condmëna Simón, Jonasbe uaquifiá, pero Cefas ca cochantsabaina ca.” (Chcana endayana “Pedro o ndëtšbé ca.”)

*Jesús, Felipe y Natanael tojánachembo chamuastama*

<sup>43</sup> Yëfsana, Jesús tojanjuabó Galilea luaroye jama. Benachiñe Felípbioye tbojáninýena y tbojaniyana: “Smasto ca.”

<sup>44</sup> Chë boyabása Felipe, Betsaida pueblócá inamna. Andrés y Pédrëna cach pueblócata ibnamna. <sup>45</sup> Chentsana Felipe tojána Natanael janguanguama; y tbojaniyana: —Chë ndabiamna leyënga libréšangañe Moisés tojanábema cha fsëjñinýena ca. Cachabiamna, Bëngbe Bëtsabe juabna oyebuambnayëngnaca tmojanábema. Cha Jesús entsemna, Josebe uaquifiá, chë Nazaretocá ca.

<sup>46</sup> Chora Natanael tbojaniyana: —¿Ndaye tsabe soye Nazaretocana nanjopódia jóbocnama ca?

Y Felipe tbojanjú: —Mabo y cochjinýe ca.

<sup>47</sup> Natanael yojtsebëconama, Jesús tbojáninýe ora tojánayana: —Moye canye entsá entsabó; cha ndegombre endomerecena Israelbëntšana entsá jtsemnama. Cha tsabe entsá endmëna; ndocnábioye quebnatsingña ca.

<sup>48</sup> Chora Natanael Jesúsbioye tbojantjá: —¿Ntšamo atše šcuabuatma ca?

Y Jesús tojanjuá: —Felipe cabá aca ndëchembo ora, atše tchonjinýe, chë higo betiye tchetsoye condëtsomñe ora ca.

<sup>49</sup> As, Natanael tojaniyana: —Buatëmbayá, jaca chë Bëngbe Bëtsabe Uaquiniá comna! ¡Aca, chë Israeloca entšangbe Rey ca!

<sup>50</sup> Chora Jesús tojanjuá: —¿Aca átšbeñe cojtsošbuaché, nýe chë higo betiye tchetsoye tchonjinýe ca tchojauyanama? Ndegombre, chë soyama más bëts soyënga cochanjinýe ca.

<sup>51</sup> Chentšana Jesús tojanýana: —Ndegombre šcuayana: Tšëngaftanga šmochanjinýe celoca atëfñiñe, y Bëngbe Bëtsabe angelotëmënga jtsetsjuajnana y jtsastjajuanana Bëngbe Bëtsá Entšá tojanbemabe tatsëtsoaca.

## 2

### *Canýe casamento Galilea luaroca, Caná pueblentše*

<sup>1</sup> Chentšana unga tianoye, canýe casamento inamna, canýe pueblentše Caná ca uabáinentše, Galileoca. Chë oboyejuayoca Jesusbe mamá yojtsemna. <sup>2</sup> Jesús y chabe uatsjëndayëngnaca chë casamentoca ófanënga imojtsemna. <sup>3</sup> Chë oboyejuayentše, vínoye yojtsopochóca y Jesusbe mamá tojaniyana: —Ya tondaye vínoye quemátsbomna ca.

<sup>4</sup> As, Jesús tojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

<sup>5</sup> Chentšana, chabe mamá, chentša oservénënga tojanýana: —Lempe šmochjama, ntšamo cha chacmojuayancá ca.

<sup>6</sup> Chocna, chñënguana ndëšbé matbaja inamna. Chca matbajënguentša béjayeca, judiënga imojanamana jtsacuéntšabiana cabá ndëse ora, ntšamo tempo entšanga imojanamancá, Bëngbe Bëtsabe delante tšábënga jtsatsmënana. Cada matbajiñe, mo shachna o canýsëfta bnëtsanáua béjaye yojanába.

<sup>7</sup> Chora Jesús chë oservénënga tojanamëndá: “Quem matbajënga béjayeca mobuajutetjé ca.” Y chënga, chora lempe tmojanbuajutetjé.

<sup>8</sup> Y Jesús tojanýana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

<sup>9</sup> Chora, chë fiesta otocaná, chë béjaye Jesús vínoye tojanbemiye tojanftantiá, ndëmocana yojóbocnama ntsetatšëmbcá. Pero chë oservénëngna aíñe imojtsetatšëmbo ndëmocana, er cachënga chë béjaye tmojanbuatsjo. As, chë fiesta otocanana, chë bobontse bouamnábioye tojanchembo, <sup>10</sup> y tojaniyana: “Nýetscanga monduamana natsana chë más uámana vínoye jushebëcana, y chë ófanënga becá tmojatëmo ora, chë más batšá uámaniye. Pero acna, chë más uámana vínoye morscama tojtsaboffajó ca.”

<sup>11</sup> Ntšamo Jesús tojanmcá Caná pueblentše, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninýanýe; y as, chabe uatsjëndayënga chábeñe imojtsošbuaché.

<sup>12</sup> Chca tojanopasá chentšana, Jesús canýe pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjëndayënga cha tmojantjëmbambá, y choca baseftatescama tmojanoqueadá.

### *Jesús Bëngbe Bëtsabe bëts yebnentsana bacna entšanga tojtanëbuacna*

(Mt 21.12-13; Mc 11.15-18; Lc 19.45-46)

<sup>13</sup> Ya canýe judiënga bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána. <sup>14</sup> Jerusalenoca, Bëngbe Bëtsabe bëts yebnentsé, Jesús tojánanýëna uacnënga, oveshënga y paloma enënga, y entšángbioye crocénana atrócyënga, chëngbe luarënguenache imojtsetbiámana. <sup>15</sup> Jesús chca tojánanýe ora, biajënga tojanaca, tjanjanëja tojanobopormá, y Bëngbe Bëtsabe bëts yebnentsana nýetscanga tojtanëbuacna, chëngbe oveshënga y uacnëngaca. Chentšana Jesús, Bëngbe Bëtsabe bëts yebnentsama yojanoserverna crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca. <sup>16</sup> Chë paloma enëngna Jesús tojanýana: —¡Quem soyënga lempe muentsana matábocana! ¡Ndoñe matsbuamnana ni mátenana atšbe Bëtsabe yebnentsé, mo cánýentše jiyama luarentše cwaftsemncá ca!

<sup>17</sup> Y as, chabe uatsjëndayënga tmojanenouabó ntšamo Bëngbe Bëtsabe uabemana palabrengüñe iuyanama: “Bëngbe Bëtsabe yebna jtseboguanama juabna, nýets átšbeñe entsemna ca.”

<sup>18</sup> Chora, judiënga Jesús tmojantjá: —¿Ndaye bëts soye cochjama bënga chašcuinýanýëma, aca ndaye deréchoca bëngaftaca chca cojtsobenama ca?

<sup>19</sup> As Jesús tojanëjua: —Quem Bëngbe Bëtsabe yebna menásatajchca, y atše unga tese chtëtsbaná ca.

<sup>20</sup> Chora chë judiënga tmojanianya: —Canta bnëtsana chnënguana uatiñe, quem Bëngbe Bëtsabe yebna tmojanjebbo. ¿Y aca, nÿe unga tese lempe cochtëtsjebbo ca?

<sup>21</sup> Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye. <sup>22</sup> Chama, Jesús obanënguentsana tojtayanena ora, chabe uatsjëdayënga tmojanenujabo ntšamo muentše cha tojanëyanama. Chca ora, Bëngbe Bëtsabe uabemana palabrënguine y Jesús chora tojánayana palabrënguine más chënga imojtsošbuaché.

*Jesús nyëtsca entsangbe juabna iuábuatma*

<sup>23</sup> Jesús Jerusalenoca chë Bashco fiestama yojtsemnëntscuana, entsanga tmojaninÿe Jesús jamana bëts soyënga Bëngbe Bëtsabe obenánaca. Chíyeca, ba entsanga chábeñe imojtsošbuaché. <sup>24</sup> Pero Jesús chëngbeñe ndoñe yontsošbuaché, cha nyëtsanga yojanëbuatma causa. <sup>25</sup> Y Jesús ndoñe bonjanájaboto chë entsangbe soyëngama chabotsebuaiyina, er cachá entsangbe ainaniñe nyëtsca juabnënga yojanábuatma.

### 3

*Jesús y Nicodemo*

<sup>1</sup> Inamna canÿe boyabása Nicodemo ca uabainá. Cha yojamna fariseunguentšá y judiëngbe canÿe amëndayá. <sup>2</sup> Chana ibeta Jesúsbioye tojána y tbojanianya: —Buatëmbayá, bënga fsëntsetatšëmbo aca canÿe buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chíyeca bënga chca fsëntsetatšëmbo ca —cha tbojanianya.

<sup>3</sup> Chora Jesús tbojanjá: —Ndegombre cbëyana, nda ndoñe cachiñe tontonÿná, cha ndoñe quenátobena Bëngbe Bëtsabe amëndayana jinÿama ca.

<sup>4</sup> Y Nicodemo tbojantjá: —¿Ntšamo, canÿe entšá ya bëtsá tojtsemna ora, nantsobena cachiñe jtónÿnama ca? Ndegombre, cha ndoñe ntsoebenana cachabe mamabe cuerpiñe jtamashënguana cachiñe jtónÿnama ca.

<sup>5</sup> Chora Jesús tbojanjá: —Ndegombre cbëyana, béyayeca y chë Uámana Espiritbeyeca ntjonÿnacá, ndocná quenátobena Bëngbe Bëtsabe amëndayoye jamashënguana. <sup>6</sup> Nda bëtsëtsabentsana tojonÿná cha, quem luarentša entsangcá jtsemnana; pero chë Uámana Espiritbeyeca tojonÿná chana, jtsemnana canÿa chë Uámana Espiritu ainaniñe bomná. <sup>7</sup> Ndoñe matenjanana ntšamo tcbonjauyanama: “Nyëtsanga entsamna cachiñe jtónÿnama”. <sup>8</sup> Chë binÿia ndëmuajana tojtseboše jtsemnana, chëjana jtsanana. Masque entsanga, chë binÿiyama jtsuenanana, ndoñe ntsetatšëmbuana ndëmocana yobama y ndëmoye yojtsoma. Cachcá, tsëngaftanga ndoñe quešmatšatšëmbo ntšamo entsanga chë Uámana Espiritbeyeca tmojtsoñÿnama; pero tsëngaftanga šmontsetatšëmbo aife chca yomnama ca —Jesús tbojanianya.

<sup>9</sup> Chora Nicodemo tbojantjá: —¿Ntšamo chca nántsemna ca?

<sup>10</sup> Y Jesús tbojanjá: —Aca, canÿe Israeloca abuatambayá, ¿chë soyëngama ndoñe condëtatšëmbo ca? <sup>11</sup> Ndegombre cbëyana, bënga chë fststátšëmbo soyëngama fsëntsoyebuambná, y chë tifiñÿe soyëngama ndegombre bëtsemnana fsëntsichamo. Pero tsëngaftangna, chë cbontsëtsëtsná soyënguine ndoñe quešmatošbuaché. <sup>12</sup> Atše, quem luarentša soyëngama sënjoyebuambá y tsëngaftanga átsbeñe ndoñe chešmatošbuaché. Y as, ¿ntšamo átsbeñe šmochtsošbuachiye, celoca soyëngama cbojtsëtsëtsnase?

<sup>13</sup> “Ndocná, nÿe cachábeyeca Bëngbe Bëtsábioye tonjatsjua. Nÿe chë celocana tojabá aife, chë Bëngbe Bëtsá Entšá tbojanbemá. <sup>14</sup> Y chcase, ntšamo Moisés entsanga ndoyenoca bronce mëtscuaye tsbanánoca tbojananguëšétjca, soquënga tsabá chamotsatšmënama; cachcá entsemna, Bëngbe Bëtsá Entšá tbojanbemá entsanga chamuatsbanama; <sup>15</sup> chca, nyëtsanga chábeñe tmojtsošbuachenga, chë nyëtsca tescama yomna tsabe vida chamotse-bomnama ca” —Jesús Nicodëmbioye tbojanianya.

*Ntsachetšá Bëngbe Bëtsá entsanga iuababuáñyeshana*

<sup>16</sup> Mëntánaca Jesús tojánayana: —Bëngbe Bëtsá quem luare entsángbioye tša yojánababuanÿeshanayeca, chë nÿe canÿe Uaquiñá ibobomná, bëngbioye tbojichmó, nyëtsca chábeñe ošbuáchiyënga ndoñe chamondóbanama, y aife chë nyëtsca tescama yomna tsabe vida chamotse-bomnama. <sup>17</sup> Er Bëngbe Bëtsá chabe Uaquiñá quem luaroye ndoñe tbojichmó quem luare entsangbiama jabáyanama ntšamo tmojamama castigánënga chaotsamnama ca, sinó, entsanga chábeyeca atsebácanënga chamotse-bomnama.

<sup>18</sup> “Nda Bëngbe Bëtsabe Uaquiñábeñe tojtsošbuáchebiam, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiam, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa. <sup>19</sup> Chca, chë ndoñe tmontsošbuáchengbiama cha ya tojayana,

ntšamo tmojamama castigánënga chamotsemna ca; er chë entsangbe juabnënga binýnýá quem luaroye tojabo, pero ba entsanga tmojábošena jtsomñana, chë entsangbiama bacna juabnëngaca chamotsebmomnana amáftaca. Chënga sempre bacna soyënga jtsamana; chiýeca chënga jtsebošana cháftaca jtsomñana. <sup>20</sup> Chë bacna soyënga tojtsamá ndoñe ntsebošana, chë binýnýá chabe bacna soyënga chabuiniýnyema, ni chabe bacna soyëngama chabuácacana. Chiýeca, chë bacna soyënga jtsamëse oyená, chë binýnýábioye jtsáboýënjana, y chë binýnýábioye ndoñe ntjabana. <sup>21</sup> Pero nda sempre tojtsiyena ntšamo ndegombre yomncá jtsamëse, chana aíñe chë binýnýábioye jabana, chë binýnýá chabiamna chabuiniýnyema, chë tojama soyëngna, ntšamo Bëngbe Bëtsá tojtsebošcá tojamama ca” — Jesús tojánayana.

*Juan chë Ubayaná cachiñe Jesucristbiama tojanabuayená*

<sup>22</sup> Chca tojanopasá chentšana, Jesús chabe uatsjédayëngaftaca básefta Judeoca pueblëngoye tojtsanoñe. Chiñe, baseftatescama chë uatsjédayëngaftaca tojanoquedá, entsanga ubáyana. <sup>23</sup> Cach tempo, Juanënaca entsanga yojanëbáyana Enonoca, Salim béconana, er choca bëtscá béjaye inabinýna. Ba entsanga choye imojtsaye, y Juan chënga yojanëbáyana. <sup>24</sup> Chca tojanopasá, chë Heródesbe soldadënga Juan cabá ndutame ora.

<sup>25</sup> Chë tempo, básefta Juanbe ústonënga tmojanontsé inýe judíoftaca enatsëtsnayana ntšamo tempo judiënga chë jtsacuëntsabiama imojanámanama. <sup>26</sup> Chora, chënga Juánbioye tmojánabo y tmojaníyana: —Buatëmbayá, chë Jordán chenguánoica ácaftaca enjamná, ndabiamna tša tsábá conjanoyebuambná, mora entsanga entsëbayana y nyëtscanga cha montséstona ca.

<sup>27</sup> As Juan tojanéyana: —Ndocná quenátobena tondaye ntsebmomnana, Bëngbe Bëtsá ndoñe thonjatsetase. <sup>28</sup> Cach tsëngaftanga tsábá šmonjanuena y šmontsobena ndegombre yomnana jayanana, atse ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atse šojanichmó chë Uabuayanabe natsana, chabiamna entsanga jabábuayenama. <sup>29</sup> Chë tobiáse tojtsobouamá ora, chë bobontse chábioye jtsebmomnana; y chabe amigna, chabiamna jtsobátmanana y chë bobontse bouamnabe oye-buambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyebuambnama sëntsuenana ora, átsnaca corente oyejuayá sëntsemna. <sup>30</sup> Cha bontsemna más uamaná jtsemnana, pero atse šontsemna más nduamaná jtsemnana ca —Juan tojanéyana.

*Ntšamo yomna chë celocana tojabá*

<sup>31</sup> Mëntšánaca Juan tojánayana: “Chë tsbanánocana tojabá, nyëtsca entsangbiama más uamaná endmëna. Chë quem luare oyená quem luare entsangcá jtsemnana y quem luarentša soyëngama jtsóyebuambnayana, pero chë celocana tojabana, nyëtsca entsangbiama más uamaná endmëna. <sup>32</sup> Cachá ntšamo tojinýe y tojouencá entsoyebuambná, pero chë entsichamo soyënguñe ndocná quenatošbuaché. <sup>33</sup> Nda ntšamo cha tojtsóyebuambnañe tojtsóšbuaché y chca tojtsama, jtsinýanýyana Bëngbe Bëtsá ndegombre soyënga inet-sichámuama. <sup>34</sup> Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nyëts tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama. <sup>35</sup> Chë Taitá Uaquiñábioye bondbobonshana, y chë Uaquiñábioye obenana tbojatsetá nyëtsca soyënguñe jtsemándayama. <sup>36</sup> Nda chë Uaquiñábeñe tojtsóšbuaché, chë nyëtsca tescama yomna tsabe vida echántsebmomna; y nda chë Uaquiñábioye ndoñe tbontsašbuaché, chana chë vida ndoñe queochátsbmomna, y chë Bëngbe Bëtsabe uabouana castigo nyëtsca tescama chábeñe echántsemna ca” —cha tojánayana.

## 4

*Jesús y chë Samaria luaroca shembása*

<sup>1</sup> Chë fariseunga tmojanuena Jesús, Juanbiamna más ústonënga yojtsabamnama, y más entsanga yojtsëbáyana. <sup>2</sup> Pero ndegombre, cach Jesús ndocnábioye bonýanábayana, sinó chabe uatsjédayënga. <sup>3</sup> Bëngbe Utabná Jesús, ntšamo chë fariseunga tmojanuena tojátatšëmbona ora, Judea luarocana tojëftsambocna y Galileoye tojtaná.

<sup>4</sup> Choye jtamna ibojamna Samaria luarëjana jachnënguana. <sup>5</sup> Samariocna, canýe pueblo Sicar ca uabánoye Jesús tojánashjango. Chë pueblo yojamna, chë Jacob chabe uaqiñá Josëbioye tojëftsamlargá fshantse béconana. <sup>6</sup> Choca yojamna cánýentse atëfjóniñe, búyeshe jobuatsjuama, Jacobëbe atëfjóniñe ca uabáiniñe. Mo nyëtsto ora, chentše Jesús yojtsemna, aniñe uamëntsnayá, chë atëfjóniñe batsjaca yojótbema. <sup>7-8</sup> Chabe uatsjédayëngna chë pueblöye tmojána saná jobuámiñama. Chora, canýe shembása Samariocá, chë atëfjónoye tojánashjango, búyeshe jauafcamna; as Jesús tbojaníyana: —Búyeshtema šmabuatšetá ca.

<sup>9</sup> Y chë shembása thojanjuá: —Aca canýe judío condmëna y atšna canýe samaritaná. ¿Ntšamo cojtsobena atše býeshe juabuátjafnama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

<sup>10</sup> Chora Jesús thojanjuá: —Aca mo cojtsetátšëmbo nýe ntšamo Bëngbe Bëtsá aca jatsetayama yojtsebošcá, y nda chë býeshe cmojtsábuatjafnama, acna más cha catjuábuatjafne, y chana béjaye vida bomniye cmajuábuátsetaye ca.

<sup>11</sup> Y chë shembása thojaniyana: —Señor, tondaye quecátšbomna nýe mo ndayecnaca býeshe jabuatsjuama, y chë atëfjóniñe corente tboca endmëna; y as, ¿ndayentšana cochjobenaye béjaye vida bomniye atše juabuátsetayama? <sup>12</sup> Bëngbe tempsca bëts taitá Jacob, quem atëfjóniñe bëngbiana tojëfšsanboshjona. Cachá, chabe básenga y chabe bayënga muentšana býeshe tmojëfšsanofšë; y ¿aca chabiana más bëtsá comna ca? —chë shembása yojtsichamo.

<sup>13</sup> As Jesús thojanjuá: —Nýetscanga chë quem býeshentšana tmojëfšsenga, chënga cachiñe echantëtejundaye. <sup>14</sup> Pero chë chanjuabuátsetaye býeshentšana tojëfšë chana ndocna te cachiñe quebochëtajundaye. Cha chanjuabuátsetaye býeshna, chábeñe echántsemna mo cányentšë béjaytema obocaniñcá, chë nýetsca tescama yomna tšabe vida jtsebomnama ca —cha thojaniyana.

<sup>15</sup> Chora chë shembása thojaniyana: —Señor, chca býeshe šmabuátšetá, as atše ndoñe cachiñe chašondetsajuendama, ni býeshe juafcamo moye jtsaboyama ndoñe chašondëtsemnama ca.

<sup>16</sup> As Jesús thojaniyana: —Motsa acbe boyá jachembuama y cochjésabo ca.

<sup>17</sup> Chora chë shembása thojanjuá: —Boyá ndoñe quetsátšbomna ca.

As Jesús thojaniyana: —Tšabá tcjayana boyá ndoñe condmoma ca. <sup>18</sup> Er, aca shachna boyanga conjánabamna, y chë mora contsebomnana, acbe boyá ndoñe quenátšmëna. Ntšamo tconjayancá ndegombre entsemna ca.

<sup>19</sup> Chë shembása chca tojanuena ora, Jesúsbiye thojaniyana: —Señor, mora atše sëntsetatšëmbo, aca canýa Bëngbe Bëtsabe juabna oyebuambnayá comnama. <sup>20</sup> Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga šmondbëtsichamo, bënga Bëngbe Bëtsá jadóramna, Jerusalenoca chë luare canmëna ca.

<sup>21</sup> Chora Jesús thojanjuá: —Shembása, šmoyená; canýe tempo echanjójshjongo y chora tšëngaftanga ndoñe quecmochátamna Bëngbe Bëtsá jadóramna, ni quem tjoye jabana, ni Jerusalenoye jana. <sup>22</sup> Tšëngaftanga samaritanënga ndoñe quešmatábuatma nda šmetsadoránama; pero bënga aíñe fšënduábuatma, er chë atsebacayá judiënguentsana endabó. <sup>23</sup> Pero ora entsoshjauana, ya chë tempo tocbuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnëngaca chábiye mochántšadorana. Er chë Taitá entseboše chë chábiye adórayënga chca chamotsamama. <sup>24</sup> Bëngbe Bëtsá, Espíritu endmëna; y chë chábiye adórayënga entsamna, chë Uámana Espíritbeyeca y ndegombre juabnëngaca cha jtsadoránana ca —Jesús thojaniyana.

<sup>25</sup> Chora chë shembása thojaniyana: —Atše sëndëtatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaójshjongo orna, cha nýetsca soyëngama cašochjabuayená ca.

<sup>26</sup> As Jesús thojaniyana: —Atše, chë ácaftaca entsoyebuambná cha, cha entsemna ca.

<sup>27</sup> Chëntscuana, Jesusbe uatsjëndayënga tmojtanashjajna, y tmojtsanëuatjaná, Jesús canýe shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndayeca cháftaca cojtsoyebuambná ca?

<sup>28</sup> Chorna, chë shembása chabe uafcanëja tojësanboshjona, y chë pueblayo betso tojtaná. Chocna, entšanga tojanëyana: <sup>29</sup> “Mabënga canýe boyabásca jinýama ca. Cha atše šonjauyana lempe ntšamo tijamcá. ¿Chë boyabásca, chë Cristo tanántsemna ca?” —cha yojtsichamo.

<sup>30</sup> As chë entšanga chë pueblcana tmojánbocana y Jesús yojtsemnoye tmojánashjajna.

<sup>31</sup> Chca yojtsopasánëntscuana, chë uatsjëndayënga Jesúsbiye imojtseimpadana: —Buatëmbayá, batšatema mose ca.

<sup>32</sup> Pero cha tojanëyana: —Atše canýe soye jasama sëntsebomna. Tšëngaftanga chë soyama ndoñe quešmatšatšëmbo ca.

<sup>33</sup> Chora chë uatsjëndayënga tmojanontšë entjanayana: —¿Nderado nda jasama chabiana tojiyëbo ca?

<sup>34</sup> Y Jesús tojanëyana: —Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiana entsemna. <sup>35</sup> Tšëngaftanga šmondbëtsichamo: “Cabá canta ishinýe entsashbena jaja saná chaotsebinýnama ca”; pero atše cbëyana: Minýënga tša entšanga moye montsabëbana; chënga montsemna mo jajañe saná játbanama tojtseprontancá. <sup>36</sup> Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanánana jtsësháchifana. Cachcá, tšëngaftanga cmontsamna



atšbiana entšanga júbuajana, chë nyetsca tescama yomna tšabe vida chamotsebomnana. Chë jaja saná atbanaye ora, jenënga y chë atbanayënga cányiñe oyejuayënga jtsemnana. Cachcá, chë entšanga átšbeñe chamojtsošbuaché ora, nyetscanga, chë atšbiana obuájajanënga y chë atšbiana trabájayëngnaca cányiñe oyejuayënga mochántsemna. <sup>37</sup> Quem entšangbe ichámuana, canye ndegombre soye endmëna: “Chë jená canya jtsemnana, y atbanayana inya ca.” <sup>38</sup> Atše tsëngaftanga chonjichamó canye soye játbana, y tsëngaftanga tondaye chešmatna chca chaotsebinýana. Inyënga chiñe bëtscá tmonjëftsetrabája, y tsëngaftangna, chëngbe trabajënguentšana šmojolograñe ca —Jesús tojánayana.

<sup>39</sup> Bëtscá entšanga, Samarioca pueblentšënga Jesúsbeñe imojtsanošbuaché, ntšamo chë shembása tojanéyanama. Chë shembása tojanéyana: “Lempe ntšamo atše tijamcá cha šonjauyana ca.” <sup>40</sup> As chë samaritanënga, Jesús yojtsemnëntše tmojánashhajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjétana. <sup>41</sup> Y más entšanga, cach ntšamo Jesús yojtsanëtsëtsnacá tmonjanuena ora, chábëñe imojtsanošbuaché.

<sup>42</sup> Y chë shembása chë entšanga tmojanianyana: “Mora cocayé fsëntsošbuaché, ndoñe nye ntšamo aca šcojáuyanama, sinó cach bënga chábioye oído fsëñjabuajóyeca; y mora fsëntsetatšëmbo ndegombre cha yojtsemna chë quem luare entšangbiama Atsebacayá ca.”

*Jesús, canye mandado uajabuachanabe básabioye tbojanshna*

<sup>43</sup> Uta te chentšana, Jesús Samariocana tojáisanbocna y Galileoye tojataná. <sup>44</sup> Cach Jesús mëntšá tojánayana: “Canya Bëngbe Bëtsabe juabna oyebuambnayá, cachabe luarentše oyenënga ndoñe bëtšá ntjabemëngana ca.” <sup>45</sup> Galileoca oyenënga Jerusalemoye tmojána, y tmojáninýe nyetsca bëtš soyënga ntšamo Jesús Bashco fiesta ora choca tojanmcá. Chíyeca, Jesús Galileoye tojtanashjango ora, chënga tšabá tmojtanojfa.

<sup>46</sup> Galileocna, Jesús cachiñe Caná puebloye tojéšanashjango, chë béjayeca vínoye cha tojánbementše. Choca yojtsemna canye mandadbe uajabuachaná, y chabe uaquiñana Capernaum puebloca šocá yojtsejájona. <sup>47</sup> Jesús Judeocana Galileoye tojánashjanguama, chë uajabuachaná tojanuena ora, Jesúsbiye tojána y ibojtseimpadana chabe yebnoye cháuama, chabe uaquiñá chabuetsešhnañama, er ya jtsóbanama yojtsemna ca. <sup>48</sup> As Jesús tbojanianyana: —Tsëngaftanga, Bëngbe Bëtsabe obenana jinýañiyama bëtš soyënga atše jamama ndoñe šmonjinýëse, átšbeñe ndocna te ntsošbuáchiyana ca.

<sup>49</sup> Chora, chë mandadbe uajabuachaná Jesúsbiye tbojanianyana: —Taita, betsko mabo, atšbe uaquiñá cabá ndóbana ora ca.

<sup>50</sup> As Jesús tbojanianyana: —Acbe yebnoye motsatá. Acbe uaquiñá ainá endëtsomñe ca.

Chë boyabásana tojanošbuaché ntšamo Jesús tbojanianyancá y tojtaná. <sup>51</sup> Cha yojtsataye orna, chabe oservénënga tmojánbocana jajëbenguama y tmojanianyana: —Acbe uaquiñá tšabá entsatsmëna ca.

<sup>52</sup> As cha tojanatjá: —¿Ntseco orscana thënjatëjca ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

<sup>53</sup> Chora chë taitá tojanenojuabó, cachca ora Jesús tbojanianyana: “Acbe uaquiñá ainá endëtsomñe ca”. Y cha y nyetscanga chabe yebnëntše oyenënga Jesúsbeñe imojtsanošbuaché.

<sup>54</sup> Ntšamo Jesús chora, chë uajabuachanabe uaquiñabiama tojanmcá, Judeocana Galileoye yojtsataye orna, yojamna chabe utama chca bëtš soye jamama, Bëngbe Bëtsabe obenana jinýañiyama, Galilea luaroca.

## 5

*Jesús canye jama ndobenábioye tbojanshna*

<sup>1</sup> Baseftayté chentšana, chë judiënga canye oboyejuaye te imojtsebomna ora, Jesús Jerusalemoye tojána. <sup>2</sup> Choca, chë Oveshëngbe amashjuana ca uabáinentše yojamna canye binche uafjajónaye, entšangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsojebniñe inamna. <sup>3</sup> Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana. <sup>4</sup> (Nderado nderado, Bëngbe Bëtsábioica canye ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënanana.) <sup>5</sup> Chë šoquënguñe canye boyabása inamna, unga bnëtsana y posufta uatama jama ndobená. <sup>6</sup> Jesús chë jajonábioye tbojáninýe ora y ba uatama chca yojamnama tojántatšëmbona ora, tbojantjá: —¿Quecojtseboše tšabá jtsatsmënanama ca?

<sup>7</sup> Y chë šocá tbojanjuá: —Taita, ndocná quetsátsbomna nda chašuájabuache béjayoye jamashënguama, chë béjaye tojtsobonjíná ora. Y atše béjayoye jamashënguama stseboše ora, inya atšbe natsana jtsamashënguana ca.

<sup>8</sup> Y Jesús tbojanianyana: —Matëtsbaná, acbe tjuashe mesocñe y matontšé jóyenana ca.

<sup>9</sup> Cach ora chë boyabása tsábá yojtsatsmäna, chabe tjuashe tojésanocñe y tojanontsé jtsanana. Chca tojanopasá ora, chë ochnayté inamna. <sup>10</sup> Chiyeca, chë thojanshnábioye chë judiënga tmojaniana: —Mëntena ochnayté. Mënté ndoñe quenátopodena aca tjuashe jtsecutsnana ca.

<sup>11</sup> Y chë boyabása tojanëyana: —Chë šonjashná cha mëntšá šonjauyana: “Acbe tjuashe mesocñe y montsé jóyenana ca”.

<sup>12</sup> As chënga tmojantjá: —¿Nda yojtsemna chë “acbe tjuashe mesocñe y montsé jóyenana ca” tmojauyaná ca?

<sup>13</sup> Pero chë shnaná ndoñe yontsetátšëmbo nda thojanshnama. Chocna bëtsá entšanga imojtsemna; chcasna, Jesús Bëngbe Bëtsabe tsëntsajana tojanenatjëmbo.

<sup>14</sup> Chentsana, Jesús Bëngbe Bëtsabe bëts yebnentše chë boyabásabioye thojáninýena y thojaniyana: —Mouena; mora aca ya ndoñe šocá quecátsmäna; bacna soyënga ndoñe cachiñe cattsama. Aññese, acbiama puerte mal echanjópása ca.

<sup>15</sup> Chë boyabása tojtsanoñe y chë judiënga tojanëyana: —Chë šonjashná cha Jesús entsemna ca.

<sup>16</sup> Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama. <sup>17</sup> Pero Jesús tojanëyana: “Atšbe Taitá nyëts tempo tsabe soyënga endbëtsama; cachá, átšnaca tsabe soyënga séntsama ca.”

<sup>18</sup> Jesús tojanma ntšamo ochnayté ndoñe yonjanapodencá, y Bëngbe Bëtsabiama tojánayana “Atšbe Taitá ca”. Mëntšá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

#### *Bëngbe Bëtsabe Uaquiñabe obenana*

<sup>19</sup> Chentsana Jesús tojanëyana: “Ndegombre šcuayana: Bëngbe Bëtsabe Uaquiñá, nyë cachabe cuenta tondaye quenátobena jamana. Cha jtsonýayana ntšamo chabe Taitá tojt-samcá. Ntšamo chë Taitá tojtsamcá, chë Uaquiñánaca jtsamana. <sup>20</sup> Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinýinýná; y más bëts soyënga bochanjinyñiye, chë soyëngama tsëngaftanga chašmenjnanama. <sup>21</sup> Chë Taitá endama obanënga chámuatayenama y tsabe vida chamotsebmnama; cachá, chë Uaquiñá entsama tsabe vida chamotsebmnama, ndëmuanyënga cha tojtsebošcá. <sup>22</sup> Chë Taitá ndocnabiama jatichámuana tsábá o ndoñe tsábá yontsama ca. Chabe Uaquiñábioye nyëts obenana thonjatšetá nyëtschangbiama jayanama tsábá o ndoñe tsábá tmontsamama. <sup>23</sup> Chca, chënga chamuinýinýé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nyëtscanga mondbetsinýinýnáyca. Nda chë Uaquiñábioye ndoñe más uamaná tbontsebiamná, cach ndoñe más uamana ntsebi-amnayana chë Taitábioye, nda chë Uaquiñá thojichmóbioye.

<sup>24</sup> “Ndegombre šcuayana: Nda ntšamo atše sentsichamcá šojoyeuná, y chë muentše šonjichmó chábeñe tojtsošbuaché, chë nyëtsca tescama yomna tsabe vida jtsebmnama. Chabiama chë Uaquiñá ndoñe queochátayana castiganá chaotsemna ca. Chca, Bëngbe Bëtsabiama cha ya ndoñe más mo obanacá queochátsmäna, chábeñe ndošbuáchiye causa; y ya ndoñe nyëtsca tescama castiganá queochátsmäna. Y aññe, chë nyëtsca tescama yomna tsabe vida echántsebmna.

<sup>25</sup> “Ndegombre šcuayana: Chë jobuáchama te ya tocjobuache. Chë te, chë Bëngbe Bëtsabiama mo obanëngcá imomnënga mochanjouena Bëngbe Bëtsabe Uaquiñá jtšoyebuambnyana. Nda chca tsábá chašojoyeuná cha, tsabe vida echántsebmna.

<sup>26</sup> Er ntšamo Bëngbe Taitá obenana endbmncá, cachá jamama entšanga vida chamotsebmnama, chabe Uaquiñábionaca obenana thojatšetá entšanga vida chamotsebmnama jamama. <sup>27</sup> Chë Uaquiñá endmëna nda Bëngbe Bëtsá Entšá thojánbema; chiyeca chë Taitá chábioye obenana thojatšetá nyëtschangbiama jayanama tsábá o ndoñe tsábá tmontsamama. <sup>28</sup> Chama ndoñe matenjanana. Er canýe tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjésebocana. <sup>29</sup> Tsabe soyënga tmojëftsemënga, obanënguentšana mochántayena, chë nyëtsca tescama yomna tsabe vida jtsebmnama. Pero bacna soyënga tmojëftsemëngna obanënguentšana mochántayena nyëtsca tescama castigánënga jtsemnama ca” —Jesús tojanëyana.

#### *Jesús, ndegombre Bëngbe Bëtsabe ichmoná inamna*

<sup>30</sup> Mëntšanaca Jesús cachatbiama tojánayana: “Nyë átšbeyeca tondaye quetsátobena ja-mama. Chë Taitá šontsemáná ntšamo nyëtschangbiama jayanama tsábá o ndoñe tsábá tmontsamama. Nyë chca atše sentsobena chë soye jamama. Ndoñe quetsátsoše jamana nyë ntšamo cach atše stsebošcá; pero sempre sëndbëtseboše jamama, ntšamo Taitá, chë šonjichmó cha tojtsebošcá. Chiyeca atše nyëtschangbiama séntsichamo tsábá o ndoñe tsábá tmontsamama; y ntšamo nyëtschangbiama séntsichamcá, ndegombre endmëna.

<sup>31</sup> “Ntšamo cach atšbiama tijayanama, ndegombre entsemna ca stsiháměse, ntšamo tsichámćá, nyetścangbiama tondaye ntšámanana. <sup>32</sup> Pero inya entsemna. Cha endétatšěmbo y entsichamo ntšamo ndegombre atšbiama yomncá; y sěntsetatšěmbo ntšamo cha atšbiama yojtsichámćá, nyetścangbiama aife yojtsámanama. <sup>33</sup> Tšěngaftanga inyenga šmojanichámó atšbiama Juan jatjayama; y ntšamo cha tcmojauyancá ndegombre endmėna. <sup>34</sup> Masque chě soyěnga cha tcmojauyana, ndoife quešnatájaboto ndocna entšá atšbiama chaotsichamo ‘cha aife chca endmėna ca’. Atše quem soyěnga sěntsichamo ndayá nye tšěngaftanga atsebácaněnga chašmotsemnama. <sup>35</sup> Juan enjamna mo canye uajuinjaněsha tojtsajuinjana y tojtsabuashinjinjanćá. Tšěngaftanga chabe buashinjinjanana šmonjinje, y šmonjábošena rato cháftaca oyejuayěnga jtsemnama. <sup>36</sup> Pero chě atše sěnjama soyěngacna más entsinjinjena ntšamo atšbiama ndegombre yomncá, chě ntšamo Juan atšbiama tojánayanama. Ndayá atšbe Taitá sojabonyě jamama, ntšamo atše sěntsamćá, entsinjinjaná ndegombre chě Taitá šojichmoma. <sup>37</sup> Atšbe Taitá, chě šojichmó chánaca entsichamo ntšamo atšbiama ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinje. <sup>38</sup> Pero tšěngaftangbe ainanoye chabe palabra ndoife tonjómashěngo, cha tbojichmóbeife tšěngaftanga ndoife quešmatošbuaché causa. <sup>39</sup> Tšěngaftanga, Běngbe Bětsabe palabra tša jtsatsjėndayana, er šmondobátmana, chca jtsaměse chě nyetsca tescama yomna tšabe vida jónyendama. Y Běngbe Bětsabe uabemana palabrěnguiife atšbiama endayana ntšamo ndegombre yomncá; <sup>40</sup> pero masque chca, tšěngaftanga ndoife quešmátšboše atše jtsėstonana, y chca, tšabe vida jtsebmomna.

<sup>41</sup> “Atše ndoife quetsátšboše entšanga yapa tšabá atšbiama chamotsichámúama. <sup>42</sup> Y inye soye, atše puerre chonděbuatma, y sěndétatšěmbo tšěngaftanga Běngbe Bětsá ndoife šmondobonshánama. <sup>43</sup> Atšna atšbe Taitabe cuenta sěnjabo, y tšěngaftanga ndoife quešmátšboše atše jofjana. Pero inya, cachabe cuenta tojabábioye cocayé aife šmatjofja. <sup>44</sup> Tšěngaftanga corente jésebošana, inyenga tšěngaftangbiama tšabá chamotsichámúama, y inyěngbiama tšabá jtsichámúama; pero ndoife ntsebošana chě nye canye Běngbe Bětsá tšěngaftangbiama cachćá chaotsichámúama. Chca šmojtsaměse, žntšamo šmochtobena Běngbe Bětsábeife jtsošbuáchiyana? <sup>45</sup> Ndoife šmatsejuabnaye, atšbe Taitabe delante tšěngaftangbe contra atše chjayana ca ntšamo tšěngaftanga šmojtsamama. Tšěngaftanga tša jtsobátmanana atsebácaněnga jtsemnama, chě ntšamo Moisesbe leyife endayancá šmojtsamama; pero ndegombre, ntšamo cha tojayancá, cach tšěngaftangbe contra entsemna. <sup>46</sup> Tšěngaftanga, chě Moisés tojěftsanabema soyife šmojtsošbuachese, átsbeñnaca šmatsošbuáchiye, er cha atšbiama tojánábema. <sup>47</sup> Pero chě tojánábema soyife tšěngaftanga ndoife šmontsošbuachesa, žntšamo šmochjobenaye chě atše sěntsichamo soyěnguiife jtsošbuáchiyana ca?” —Jesús tojaněyana.

## 6

*Jesús shachna uaranga boyabásenga saná tojanacaredadó  
(Mt 14.13-21; Mc 6.30-44; Lc 9.10-17)*

<sup>1</sup> Chě soyěnga tojanopasá chentšana, Jesús chabe uatsjėndayěngaftaca tojána Galilea uafajónaye chenguana. Chě uafajónayna Tiberias cánaca inauabaina. <sup>2</sup> Ba entšanga imojtsėstona, er chěnga tmojáninje cha běts soyěnga jtsamana, šoquěnga jtsashnayěse. <sup>3</sup> As Jesús tjoye tojántsjua, y choca chabe uatsjėndayěngaftaca tojanótbema. <sup>4</sup> Ya judiěngbe canye fiesta, chě Bashco fiesta, yojětsobeco.

<sup>5</sup> Jesús tojanótbema ora, tojanontješé y tojánanye ba entšanga chábioye imojetsebéconaye. As Felipbioye thojaniyana: —ŽNdayentše saná cuanjabuámiye nyetsca quem entšanga chamosama ca?

<sup>6</sup> Jesús chca thojaniyana, ana Felipbioye jinýama ntšamo cha tabuanjojuama; er cach Jesús tšabá inatátšěmbo ndayá jamama. <sup>7</sup> Y Felipe thojanjuá: —Ni mo uta patse denario croćenaca nanjópódia tanděse jabuámiyama, nyetsca entšanga nye mo batšatėmnaca chamuėtsesama ca.

<sup>8</sup> Chorna, Jesusbe canye uatsjėndayá, Andrés ca uabainá, Simón Pédrěbe catšata, Jesúsbioye thojaniyana: <sup>9</sup> —Muentše entsemna canye básetema y cha shachna cebada tanděse y uta beónata entsebmomna. Pero, žndayase nye nyětsatema chěfta entšangbiama ca?

<sup>10</sup> As Jesús tojánayana: —Entšanga měyana chamotbiama ca.

Becá shácua chě luariife inamna, y nyetsca entšanga chiife tmojanoshěntsjatbiama. Chě entšanguentše shachna uaranga boyabásenga imojtsemna. <sup>11</sup> Chora Jesús, chě tanděse

chabe cucuatšiñe tojanca, y Běngbe Bětsábioye chě tanděsama tbojtanchuá; y chabe uatsjéndayěnga tojanějatá, y chě uatsjéndayěngna nýetsca entsānga imojtsetbiāmaněnga tmojanatšatá. Cachá Jesús chě beónaca tojanma, y ntšamo entsānga imojanbošcá tmojanatšatá. <sup>12</sup> Nýetscanga tmojanse y tmojtanoshachá ora, Jesús chabe uatsjéndayěnga tojaněyana: —Chě ojannětéměnga šmochtsatbananga, tondaye nýe cachá ntjěftsonýayama ca.

<sup>13</sup> As chěnga tmojanatbaná, y chě tmojanse shachna cebada tanděsentšana tojanójaměteměngaca, bnětsana uta sbarēcua tmojanajutjé. <sup>14</sup> Chě entsānga quem běts soye Jesús jamama tmojáninýe ora tmojánayana: “Ndegombre quem boyabása, chě quem luaroye jabama Běngbe Bětsabe juabna jabóyeuambayama cha entsemna ca.”

<sup>15</sup> Jesús yojtsetátšēmo entsānga chěngbe rey jabemama imojetsebošama. Chíyeca cach tjoye tojtsaisanoñe canýa jtsoñfama.

*Jesús béjaye juatsbuacá yojtsaye*  
(Mt 14.22-27; Mc 6.45-52)

<sup>16</sup> Tojanibétata ora, Jesusbe uatsjéndayěnga chě uafjajónayoye tmojantsmá; <sup>17</sup> barquěshañe tmojtanenojáy, y tmojanontšé jenashbuachénguana, chca, Capernaumoca jenbocnama. Ya ibeta yojtsemna, y Jesús cabá ndoñe chěngbioye ntashjanguana. <sup>18</sup> Chca imojtse-nashbuachnějuana orna, chě bėjayíñe jabuache binýia tojanóshjango y běts olěshěnga chě barquěshoye yojtsójantšetaye. <sup>19</sup> Shachna o chněnguana kilómetro chěnga tmojána ora, tmojáninýe Jesús chěngbioye yojtsebēconaye, bėjaye juatsbuacá yojtsaye. Chěnga chca tmojáninýe ora tša tmojanocochauatjaná, <sup>20</sup> pero Jesús tojaněyana: “Atše sěndmēna; ndoñe matauatjěngana ca.”

<sup>21</sup> Chora chě uatsjéndayěnga oyejuayěnga imojtseboše Jesús chě barquěshoye jofjana, y ndoñe bēntscose ya chě imojtsaye luaroye tmojánashjajna.

*Entšanga Jesús tmojánguango*

<sup>22</sup> Yěfsana, nýetsca entsānga, chě uafjajónaye chenguánoica tmojanoquedanga tmojáninýe, chě inýe yěfsana chě nýe canýe barquěsha yojuamněshañe Jesusbe uatsjéndayěnga tmojt-sanoñama, y Jesús chěngaftaca ndoñe tonjánama. <sup>23</sup> Pero chěntscuana, Tiberias pueblentšana inýe barquěshangá tojanáshjajna canýe luarentše, chě Běngbe Utabná Jesús chabe Taitábioye tbojtanchuá chentšana, entsānga saná tmojanse luare bēconana. <sup>24</sup> Asna, ni Jesús ni chabe uatsjéndayěnga chentše ndoñe montsemnama chě entsānga tmojáninýe ora, chě barquěshangañe tmojtanenojáy y Capernaumoye tmojána Jesús jetsenguanguama.

*Jesús, chě nýetsca tescama yomna tšabe vida jtsebomnama tanděse*

<sup>25</sup> Chě uafjajónaye chenguánoye tmojánashjajna ora, Jesús tmojáninýena y mēntšá tmojan-tjá: —¿Buatěmbayá, ntseco ora muentše tcojášhango ca?

<sup>26</sup> Y Jesús tojaněyana: —Ndegombre cběyana, tšěngaftanga ndoñe atše quešmatšngúá, chě běts soyěnga tijamama, sinó nýe chě jtoshachaye nýetsá tanděse šmojasama. <sup>27</sup> Ndoñe matenángmenana chě nýe ndoñe bēn y jopochócana sanama; chě ndmopochócaye saná, chě nýetsca tescama yomna tšabe vida jtsebomnama saná šmochjánguango. Chě saná, Běngbe Bětsá Entšá tbojanbemá mchohanjátsataye, er Běngbe Bětsá chě Taitá tonjinýanýé, tšabe soyěngaca, cha chábioye tbojuábuayanama ca —tojánayana.

<sup>28</sup> Chora chě entsānga tmojantjá: —¿Ndayá fchjama ntšamo Běngbe Bětsá yojtsebošcá chaotsemnama ca?

<sup>29</sup> Chca tmojantjá ora, Jesús tojaněyana: —Chě Taitá entseboše tšěngaftanga chabe ich-monábeñe chašmotsošbuáchema ca.

<sup>30</sup> Chora chěnga tmojanianya: —¿Ndaye tšabe soye cochjama acbe obenana bēnga jinýanýiyama ca? Chě soye chaftšjinýěse, áceñe fchantsošbuáchiye. ¿Běngbiam taicoch-jama ca? <sup>31</sup> Běngbe tempšca běts taitanga entsānga ndoyenoca maná ca uabaina saná tmojanse. Běngbe Bětsabe uabemana palabrenguñe mēntšá endayana: “Cha celoca tanděse tonjanatšatá chamosama ca” —chěnga tmojánayana.

<sup>32</sup> Chora Jesús tojaněyana: —Ndegombre cběyana, Moisés chěnga ndoñe chě celoca tanděse tonjanatšatá; Běngbe Bětsá Běngbe Taitá chěngbioye tojanatšatá chě maná ca uabaina tanděse; y cha endmēna nda celocana chě ndocna te ndmopochócaye tanděse ndegombre cmondatsatná. <sup>33</sup> Er Běngbe Bětsábicana tanděse entsemna chě celocana tojastjanguá; y cha quem luare entsāngbiam entsama chě nýetsca tescama yomna tšabe vida chamotsebomnama ca —cha tojaněyana.

<sup>34</sup> Chora chěnga tmojanimpadá: —Taita, chě tanděse sempre šcochtsatšatnayca ca.

<sup>35</sup> Y Jesús tojanějua: —Atše sěndmēna entsānga chě nýetsca tescama yomna tšabe vida jtsebomnama tanděse. Nda atše chašojtsěstona, sempre oyejuayá echanjěftsemna y Běngbe Bětsabe soyěnga nýets tempo echanjesóbomñe, mo nda nýets tempo saná totsobomñá, y

ndocna te tñontsishëntsancá. <sup>36</sup> Pero ntšamo ya tñonjauyancá, tšëngaftanga atše šmonjinýe y cabá ndoñe átšbeñe quešmatošbuaché. <sup>37</sup> Nda atšbe Taitá atšbiana tñobocacá, cha atše šochantsëstona; y nda átšbioye šojtsëstona, átšbentsana quichtëtábocna. <sup>38</sup> Er atšna celocana sënjabo chë šojichmó cha ntšamo yojtsebošcá jamama, y ndoñe nýe ntšamo atše tsebošcá. <sup>39</sup> Y chë šojichmó cha entseboše, ni mo canýa chë atšbiana tojabacacá chentsana, atše chaileenciá pochocaná chaotsemnana; y quem luare jopochócama tena, nýetscanga atšbiana tojabacangbiama chámuatayenama atše chaimama. <sup>40</sup> Er atšbe Taitá entseboše, nda chabe Uaquinábioye tñojinýe y chábeñe tojtsošbuaché, chë nýetsca tescama yomna tšabe vida chaotsebmoma, y quem luare jopochócama tena, cha cháuatayenama atše chaimama ca —Jesús tojanéyana.

<sup>41</sup> “Atše sëntsemna chë celocana tojóshjango tandëse ca” Jesús tojanéyana causa, chë judiënga tmojanontsé chabiama podesca ichámuana. <sup>42</sup> Chënga mëntšá imojtsichamo: —¿Mua ndoñe Jesús yondmëna, chë Josebe uaquiná? Chabe bëtsëtsata bënga tñotsábuatmñe. ¿Ntšamo cha mora yochjátichamo celocana tojástjango ca?

<sup>43</sup> As Jesús tojanéyana: —Atšbiana ndoñe podesca matichámuana. <sup>44</sup> Ndocná quenátobena atše juastana, chë Taitá, chë šojichmó cha, ainaniñe chca chaotsebošama ndoñe tñonjuajabuáchëse; y atše chanjama cha cháuatayenama quem luare jopochócama te. <sup>45</sup> Chë tempsquënga Bëngbe Bëtsabe juabna oyeubuambnayënga mëntšá tmojanábema: “Cach Bëngbe Bëtsá nýetscanga echanjabuatambá ca.” Chcasna, nda atšbe Taitábioye tñojoyeuná, y ntšamo chë Taitá tñobuatëmbacá tojuatsjinýe, cha atše šochanjuasto.

<sup>46</sup> “Ndocná atšbe Taitá tñonjinýe. Nýe chë Bëngbe Bëtsábicana tojabá aíñe. <sup>47</sup> Ndegombre šcuayana: Nda átšbeñe tojtsošbuaché, chë nýetsca tescama yomna tšabe vida echántsebmoma. <sup>48</sup> Atše sëndmëna entšanga chë nýetsca tescama yomna tšabe vida chamotsebmomna tandëse. <sup>49</sup> Masque tšëngaftangbe bëts taitanga, entšanga ndoyenoca chë maná ca uabaina saná tmojanse, pronto tmojanóbana. <sup>50</sup> Pero atše sëntsoyeubuambná ndayá chë celocana tojóshjango tandëšama. Nda chë tandëse tojase, ndoñe queochatóbana. <sup>51</sup> Atše sëntsemna entšanga chë nýetsca tescama yomna tšabe vida jtsebmomna tandëse, chë celocana tojóshjanguëse. Nda quem tandëse tojase, nýetsca tescama nýe ainá echanjesomñe. Chë chanjátšataye tandëšna, cach atšbe cuerpo entsemna. Chca chanjama quem luare entšanga chë nýetsca tescama yomna tšabe vida chamotsebmomna ca” —Jesús tojánayana.

<sup>52</sup> Chora chë judiënga tmojanontsé enatsëtsnayana: —¿Ntšamo cha yochjobenaye cachabe cuerpo jatšatayana bënga jasama ca?

<sup>53</sup> As Jesús tojanéyana: —Ndegombre šcuayana: Tšëngaftanga Bëngbe Bëtsá Entšá tñojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmočátšbmoma. <sup>54</sup> Nda atšbe cuerpo tojase y atšbe buiñe tojofšé, chë nýetsca tescama yomna tšabe vida echántsebmoma, y quem luare jopochócama te atše chanjama cha cháuatayenama. <sup>55</sup> Atšbe cuerpo ndegombre saná endmëna, y atšbe buiñe ndegombre ofšësnayiye. <sup>56</sup> Nda atšbe cuerpo tojase y atšbe buiñe tojofšé, átšeftaca canýiñe mo canýacá echántsemna, y átšnaca cháftaca. <sup>57</sup> Atšbe Taitá, chë šojichmó cha, vida endbmoma, y atše chábeyeca vida sëndbmoma; cachcá, nda atšbe cuerpo tojase, chana átšbeyeca vida jtsebmomna. <sup>58</sup> Chë ndaye soyama atše sëntsoyeubuambná, atšbe cuerpo y atšbe buiñe, entsemna chë celocana tojóshjango tandëse. Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátšmëna. Nda quem tandëse tojase, nýe nýets tempo vida echanjesóbomñe ca —Jesús tojánayana.

<sup>59</sup> Chë soyënga Jesús tonjanabuatambá Capernaum pueblentse, chë judiëngbe enefjuana yebnentse.

*Chë nýetsca tescama yomna tšabe vida jtsebmomna palabrënga*

<sup>60</sup> Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

<sup>61</sup> Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo chontsëtsëtsnacá ndoñe tšabá cmontsëuenana ca? <sup>62</sup> Y chcasna, Bëngbe Bëtsá Entšá tñojanbemá, chë cha tempo inamna luaroye tojëtstsjuama šmojinýëse, ¿ntšamo šmatsejuabnaye? <sup>63</sup> Bëngbe Bëtsabe Espiritu entsama entšanga chë tšabe vida chamotsebmomna. Chë cuerpo ndoñe uámana soye quenátšmëna; chë tñonjáuayana soyënguiñe entsemna chë Uámana Espiritbe uajabuáchenana y chë tšabe vida. <sup>64</sup> Pero masque chca entsemna, tšëngaftangbentsana banga átšbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entsànga jábuayenama Jesús tojanbojatsé orscana, cha inatátšëmbo ndëmuan'yenga chábeñe ndoñe mochanjanošbuáchiye, y nda chë uayayëngbe cucuatšifñe yochjéftsayentšbashejuana. <sup>65</sup> Y Jesús yojtëtóntša oyebuambnayana: — Chiyeca, atše tsëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjáúabuache, cha ndoñe quešochatasto ca”.

<sup>66</sup> Chë causa, chentšana, ba chabe ústonëga cachá tmojesanonýa, y cháftaca ya ndoñe imontsajna. <sup>67</sup> Chora Jesús, chë bnëtsana uta uatsjéndayënga tojanëyana: —¿Y tsëngaftángnaca, jtsónama y atše jéseboshjonama šmojtseboše ca?

<sup>68</sup> Chora Simón Pedro tbojanjá: —Bëngbe Utabná Jesús, ¿chcasna ndábioye fchjanga ca? Nye aca šcontsëtsësná chë nyetsca tescama yomna tsabe vida jtsebomnma palabrenga. <sup>69</sup> Acheñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná com-nama ca.

<sup>70</sup> Chora Jesús tojanëyana: —Atše tcbonjabacacá, chë bnëtsana útata; pero canýa tsëngaftanguentšana, mo Satanasbe canýe trabajayacá entsemna ca.

<sup>71</sup> Judas Iscariote, chë Simonbe uaqiñabíama chca Jesús tojánayana. Er chana masque canýa chabe bnëtsana uta uatsjéndayënguentsá inamna, Jesús uayayëngbe cucuatšifñe yochjéftsayentšbashejuana.

## 7

### *Jesusbe catšátanga chábeñe ndoñe montsanošbuaché*

<sup>1</sup> Chë soyënguentsana, Jesús Galilea luarëjana yojánana. Chë tempo, judiënga imojtsanjuan-naye ntšamo jamëse cha jóbama. Chiyeca, Jesús ndoñe yontseboše Judeoye jama. <sup>2</sup> Chora, judiëngbe canýe bëts fiesta semana yojtsobeco. Quem fiestënguentscuana, chë judiënga imojngamana tambënguifñe jtsiyenana. <sup>3</sup> As chora Jesusbe catšátanga tmojaníyana: — Muentše ndoñe catjoquéda; Judeoye motsa, choca condbomna ústonëga, ntšamo consamcá chócnaca chamínýama. <sup>4</sup> Er nda tojtseboše chamotsábuatmama, chabe soyënga ndoñe iytëcana ntсамana. Aca bëts soyënga Bëngbe Bëtsabe obenánaca contsamëсна, motsa y nyetscangbe delante chca cohjama ca —chënga tmojaníyana.

<sup>5</sup> Er ni mo cach Jesusbe catšátanga chábeñe ndoñe montsanošbuaché. Chiyeca chënga chca tmojaníyana.

<sup>6</sup> Chora Jesús tojanëjua: —Atšbe ora cabá ndoñe quentóshjango, pero tsëngaftangbíama mocna órnaca tsabá endëtsomñe. <sup>7</sup> Chë nye quem luarama enójuabnaye entsànga ndoñe quemátobena tsëngaftanga jtsëbuayënjana, pero átšbioyna aifñe, er atše puerte tsabá sëntsinýanýná ntšamo chënga imojtsamcá ndoñe tsabá yontsemnana. <sup>8</sup> Tsëngaftanga chë fiesta šmochjá. Atšbe ora cabá ndoñe quentóshjango. Chiyeca atše choye ndoñe quicháta ca —cha tojánayana.

<sup>9</sup> Jesús chë soyënga tojanëyana y cach Galileoca tojtsanoquedañe.

### *Chë tambënguifñe jtsiyenama fiesta*

<sup>10</sup> Chabe catšátanga chë fiestoye tmojána chentšana, Jesúsna tojána, masque ndoñe entsángbeñe, sinó mo iytëcana cuenta. <sup>11</sup> Chë fiestocna, judiënga Jesús imojtsenguaye y imojtsichamo: —¿Ndayentše chë boyabása yojtsemna ca?

<sup>12</sup> Entsángbeñe ba soyënga chabíama iytëcana imojtsichamo. Inýenga chabíama imojtsichamo: “Cha tsabia endmëna ca”; pero inýengna: “Cha entsànga entsaingña ca”.

<sup>13</sup> Pero ndocná Jesusbíama becá añémoca yontsoyebuambná, chë judiëngbe amëndayëngbíama imojtsauatja causa.

<sup>14</sup> Chë fiesta semana tsëntsañe yojtsó ora, Jesús Bëngbe Bëtsabe bëts yebnentše tojánamashëngo, y tojanontsé jabuatambana. <sup>15</sup> Chentše chë judiënga, ntšamo Jesús tojanabuatambacá tmojanuena ora, ojanánënga imojtsichamo: —Bëtsá ntjuatsjinýcá, ¿ntšamo nyëtšá nantsetatšëmbo ca?

<sup>16</sup> As Jesús tojanëjua: —Atšbe बातëmbayana ndoñe nye átšbentšana quenatóbocana, ndayá chë šonjichmó chábentšana. <sup>17</sup> Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe बातëmbayana Bëngbe Bëtsábíocana yóbocanama o nye átšbentšana. <sup>18</sup> Nda nye cachabe juábnaca tojtsoyebuambná, jtsebošana entsànga más bëtsá chamobemama; pero nda bëtscá tojtsama, chë tbojichmóbioye entsànga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

<sup>19</sup> “Ndegombre, Moisés tsëngaftangbíama ley tojéftsanaboshjona. Pero masque chca, tsëngaftanguentsá ndocná quenátama ntšamo cha tojéftsanmandacá. Y ¿ndáyeca šmojtseboše atše jóbama ca?” —Jesús tojanatjá.

<sup>20</sup> Chora entsànga tmojanjá: —¡Ndegombre aca bacna bayëjbe juabna contsambá! ¿Nda yojtseboše aca jóbama ca?

<sup>21</sup> Chora Jesús tojaneyana: —Nyetca tsëngaftanga ojnánënga atse smontsonyá, atse canye ochnayté canye entsá tijashnama. <sup>22</sup> Pero, Moisés tmonjanamëndá básetema base bobachtema chë más delicadentse jatëtsana, chaotsinynama (ndoñe nye Moisésbeyeca chca, sinó Moisesbiama más tempsca bëts taitanga chca jamama imojanamánayeca); y tsëngaftanga canye básetema base bobachtema chë más delicadentse jatëtsana, masque chë te canye ochnayté totsomñëse. <sup>23</sup> Y mora, ntšamo Moisés tcmojëtsanamëndacá ndoñe cachcá ntjonýayama, canye básetema chca jatëtsana masque ochnayté; as, ¿ndáyeca atse smojtsayaná, atse ochnayté canye entsábe nyets cuerpo tijashnama? <sup>24</sup> Nye batšá jinýëse, inýengbiama ndoñe maticámëngana tsábá o ndoñe tsábá tmonjama ca. Ntšamo chë soyënga ndegombre bëtsemnama natsana lempe tsábá jshëtsetatšëmbëse, smochjayana tsábá o ndoñe tsábá tmonjama ca —Jesús tojánayana.

*Jesús tojánayana ndëmocana cha tojánabama*

<sup>25</sup> Chora báseftanga Jerusalenoca oyenënga tmojanontsé ichámuana: —¿Mua ndoñe yontsemna chë jobama montsenguá cha ca? <sup>26</sup> Masque ba entsangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yojtsemna ca? <sup>27</sup> Pero bënga mondëtatšëmbo ndëmocá quem boyabása yomnana; y chë cuenta, chë Cristo chaojabo ora, ndocná queochátstatšëmbo ndëmocana cha yochjabama ca —chënga imojtsichamo.

<sup>28</sup> Chca tojanuena ora, Bëngbe Bëtsabe bëts yebnentse Jesús yojtsabuátambayëntscuana, cha jabuache tojánayana: —¿Tsëngaftanga smojtsejuabná atse ndegombre smabuutma, y ndëmocana tijabama smojtsetátšëmbo ca! Pero nye atšbe cuenta, ndoñe chiyátabo, ndayá canya sojichmóyeca, nda ntšamo ndegombre yomncá nyetsca soyëngama endbëtsoyebuambnayey; y tsëngaftanga cha ndoñe quešmatábuatma. <sup>29</sup> Atšna aíne cha sënduábuatma, er atse chábentšana sënjabo y cha quem luaroye sojichmó ca —Jesús tojánayana.

<sup>30</sup> Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango. <sup>31</sup> Banga chentse Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiama más tsábe soyënga yochjama ca?”

*Chë fariseunga tmojánbošena Jesús jishachama*

<sup>32</sup> Chë fariseunga tmojánatšëmbona ntšamo entsanga Jesusbiama iytëcana imojtsencuëntaye. As, chënga y chë bachnangbe amëndayënga tmojanichamó básëftanga Bëngbe Bëtsabe bëts yebnocá josticiënga, Jesús chamuishachama. <sup>33</sup> Chora Jesús tojánayana: “Muentšana nye basefatyë tsëngaftangataca chanjëftsemna; chentšana, chë sojichmó chábioye chanjëtspadésa. <sup>34</sup> Chora tsëngaftanga atse smochántseenguaye, pero ndoñe quešmochátinýena; y ndayentse chántsemnoca ndoñe quešmochatobenaye jashjanguama ca.”

<sup>35</sup> Chora chë judiënga tmojanontsé entjanayana: “¿Ndëmoye quem boyabása yochjá, y bënga ndoñe mochanjobenaye jinýenama ca? ¿Inýe fshantsëngoye, judiënga tmojuashanëngbiyoye yochjá, y choca chë ndoñe judiënga yochjabuatambá? <sup>36</sup> ¿Ntšamo yojtsentsáyana cha soñjauyancá, chë tsëngaftanga atse smochántseenguaye, pero ndoñe quešmochátinýena; y ndayentse chántsemnoca ndoñe quešmochatobenaye jashjanguama ca?” —chënga imojtsichamo.

*Béjayënga vida bomniye*

<sup>37</sup> Chë fiesta jopochócoma te yojamna chë más uámana te. Chë te, Jesús entsángbentšë tojantsá y jabuache tojánayana: “¿Nda tbojtsajuendá, átšbiyoye chauabo y chaošfé! <sup>38</sup> Ntšamo Bëngbe Bëtsabe uabemana palabrenguñe endayancá: ‘Nda átšbeñe tojtsobuaché, cha echántsemna mo ndabe ainantšana vida bomna béjayënga tojtsobocancá.’ Chca echántsemna átšbeñe ošbuáchiyëngbiama ca” —cha tojánayana.

<sup>39</sup> Chë sóyeca, Jesús yojtseboše jayanana, chábeñe ošbuáchiyënga chë Uámana Espiritu mochjanóyëngacñe ca; er chë Uámana Espiritu cabá ndoñe tonjánabo, Jesús corente bëtsá yojamnama cabá ndoñe tmonjaninýinýe causa.

*Nyetca entsanga ndoñe cachcá Jesusbiama imontsejuabnayey*

<sup>40</sup> Chca tojanuena ora, inýenga imojtsichamo: —Quem boyabása ndegombre chë Bëngbe Bëtsabe juabna oyebuambnayá entsemna, chë Cristbe natsana jabamá ca.

<sup>41</sup> Inýenga imojtsichamo: —Ndegombre cha chë Cristo, chë Uámana Uabuayaná entsemna ca.

Pero inýengna: —Ndoñe, er chë Cristo Galileocana ndoñe queochátabo. <sup>42</sup> Ndegombre, Bëngbe Bëtsabe uabemana palabrenguñe endayana, chë Cristna rey Davidbentšana entsá

canmëna, y Belenocana caochjabo ca, cach puebllocana ndayentśá David inamna ca — chënga imojtsichamo.

<sup>43</sup> Y chca, ínÿengna Jesusbe pavor imojtsemna, y ínÿengna chabe contra. <sup>44</sup> Inÿenga imojtseboşe Jesús jishachama, pero ndocná tbonjánishache.

*Chë amëndayënga Jesúsbeñe ndoñe montsanoşbuachë*

<sup>45</sup> Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtanashjajna ora, tmojanatjá: —¿Ndáyeca ndoñe Jesús şmonjuánatse ca?

<sup>46</sup> Chora chë josticiënga tmojanëjua: —Ndocná quenatoyebuambná ntşamo chë boyabása tonjoyebuambacá ca.

<sup>47</sup> Chora chë fariseunga tmojanëyana: —¿Tsëngaftángnaca şmojalesenciá cha chacmaingñema ca? <sup>48</sup> ¿Nderado bëngbe amëndayënguentsá o bënga fariseunguentśá nÿe mo canÿa chábeñe tayojtsoşbuaché? <sup>49</sup> Pero quem entşanga, ntşamo leyíñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

<sup>50</sup> Chora Nicodemo, canÿa fariseunguentśá, chë Jesúseftaca jencuëntama ibeta tojána cha, tojánayana: <sup>51</sup> —Ntşamo bëngbe leyíñe endayancá, bënga ndoñe quemuátobena jayanana canÿe entśá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatşëmbuama ca.

<sup>52</sup> Chora chënga Nicodemo tmojanuá: —¿Acnaca chábeñe cojtsoşbuaché y mo canÿe Galileoca entśacá cojtsejuabná ca? Bëngbe Bëtsabe uabemana palabrenguiñe cochjuatşjinÿe, y cochanjinÿe ni canÿa Bëngbe Bëtsabe juabna oyeubuambnayá Galileocana yochjabo ca.

*Chë shema boyábioye ínÿaftaca ingñayá*

<sup>53</sup> Fariseunga y bachnangbe amëndayënga chë josticiëngbioye tmojanëcácanentşana, cada ona cachabe yebnoye imojtsatónënga.

## 8

<sup>1</sup> Pero Jesusna canÿe tjoye, Olivos ca uabáinoye tojtsanoñe. <sup>2</sup> Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nÿetsca entşanga tmojanobeconá jouenama, y Jesús tojanótbema y tojanontśé jabuátambama.

<sup>3</sup> Chorna, báseftanga ley abuátambayënga y fariseunga tmonjánashjajna, y canÿe shembása tmojanëşjango. Chana tmojáninÿena chabe boyábioye ínÿaftaca ibnetsoingñañëntscuana; nÿetscangbe tsëntsaca tmojanatsá, <sup>4</sup> y Jesús tmojanianya: —Buatëmbayá, quemuá fsëñjínÿena chabe boyábioye ínÿaftaca bondëtsoingñañëntscuana. <sup>5</sup> Leyíñe Moisés şonjanamëndá mëntśá uamana shembásengna ndëtşbéngaca jtsëbáyama. ¿Aca ntşamo catjayana ca?

<sup>6</sup> Jesús chca tmojanianya ana jisháchichiyama, chca chënga jtsebmomna ndáyeca chabe contra jayanana. Pero Jesús nÿe fshantsoye yojotsejbéna y yojóntśa ntşabuáfaca fshantsiñe juabemama. <sup>7</sup> Chënga nÿe imojtsetjanaye causa, Jesús tojantsbaná y tojanëyana: —Nda tsëngaftanguentsá tondaye bacna soyënga tondbomná, chaobojatśé ndëtşbeca jatëchënjama ca.

<sup>8</sup> Chentşana Jesús cachiñe fshantsoye yojtotsejbéna, y yojtëtóntśa fshantsiñe jtëtabemama.

<sup>9</sup> Chca tmojanuena ora, entşanga tmojanontśé canÿánÿa chentşana jésebocanana; natşana chë más bëtsanánënga y chë ínÿengna ústonoye. Canÿa Jesús tonjanoquedá y chë shembásanaca. <sup>10</sup> As, Jesús tojtantsá y tbojantjá: —¿Shembása, ndayentşe chë acbe contra ichámënga imojtsemna? ¿Ndocná acbiama tonjayana castiganá chacotsemna ca?

<sup>11</sup> Ndoñe, Taita, ndocná ca —chë shembása tbojanuá.

Chora Jesús tbojanianya: —Atşe cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye cattşama ca.

*Jesús yomna quem luarentśa entşangbe juabna binÿnayá*

<sup>12</sup> Jesús cachiñe Bëngbe Bëtsabe bëts yebnentşe yojtsabuátambaye, y entşanga mëntśá tojanëyana: —Atşe sëndbínÿa quem luare entşangbe juabnënga. Nda atşe chaşojtsëstona, cha echantsiyena atşe chë binÿnayáftaca; y ndoñe mo ibetiñcá queochátaye, y chca, tşabe vida echántsebmomna ca.

<sup>13</sup> Chora chë fariseunga Jesús tmojanianya: —Aca nÿe cach acbiama chca contsoye-buambná; chcana, chë ntşamo contsichamcá tondaye quenatámama ca.

<sup>14</sup> As chora Jesús tojanëjua: —Ntşamo cach atşbiana sëntsichamcá aïñe entsámama, masque nÿe atşe stsichamo ntşamo atşbiana ndegombre yomncá. Er atşe sëndëtátşëmbo ndëmocana tijabo y ndëmoye tştsá. Pero tsëngaftanga ndoñe chca queşmátstatşëmbo.

<sup>15</sup> Tsëngaftanga şmondbëtsichamo ínÿengbiama tşabá o ndoñe tşabá tmontsamama, chca, nÿe ntşamo entşanga mondbetsejuabnaycá. Pero atşna ndocnabiama chca quetsátichamo. <sup>16</sup> Atşe ndoñe nÿe canÿa quetsátsmëna ínÿabiama jayanama tşabá o ndoñe



tšabá tontsamama; ndayá atšbe Taitá, chë šonjichmó cha, átseftaca chca jayanana. Chiyeca, atše inñabiamá tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana. <sup>17</sup> Tšëngaftangbe leyíñe enduábemana, uta entšata ndayámnaca cachcá tbojayanëse, ntšamo chata tbojayancá puerte jtsámanana ca. <sup>18</sup> Y morna, atše sentsichamo chë ntšamo cach atšbiamá ndegombre yomncá, y atšbe Taitá, chë šonjichmó chánaca entsichamo ntšamo atšbiamá ndegombre yomncá ca —Jesús tojánayana.

<sup>19</sup> Chora chënga tmojantjá: —¿Ndayentše acbe Taitá yojtsemna ca?

Y Jesús tojanéjua: —Tšëngaftanga ndoñe quešmatábuatma ni atše ni atšbe Taitá. Atše šmojtsábuatmëšna, atšbe Taitánaca šmattsábuatma ca.

<sup>20</sup> Bëngbe Bëtsabe bëts yebnoca, chë crocénana jacayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

*“Chë chanjá luaroye, tšëngaftanga ndoñe quešmátobena jama”*

<sup>21</sup> Chora Jesús yojtétóntša oyebuambnayana: —Atše chantá, y chora tšëngaftanga atše šmochántseguaye. Masque chca, šmochanjóbana tšëngaftangbe bacna soyëngama ndëperdonánëga. Chë chanjá luaroye, tšëngaftanga ndoñe quešmátobena jama ca —Jesús tojánayana.

<sup>22</sup> Chora chë judiëga tmojanontsé enatsëtsnayana: —¿Mo nderado yojtsejuabná jt-senóitanama, y chiyeca yojtsichamo chë cha yochjá luaroye bënga ndoñe montsobena jama ca?

<sup>23</sup> Chora Jesús tojanéyana: —Tšëngaftanga quem luaroquënga šmondmëna; atšna ts-bananocá, celocá sëndmëna. Tšëngaftanga nýe quem luarama enójuabnayënga šmondmëna, pero atše ndoñe. <sup>24</sup> Chiyeca atše chca tcbonjáuyana, chë “tšëngaftangbe bacna soyëngama ndëperdonánëga šmochanjóbana ca”. Er, nda atše ndegombre bétsemnana ndoñe chašmontsošbuachese, tšëngaftangbe bacna soyëngama ndëperdonánëga šmochanjóbana ca.

<sup>25</sup> Chora chënga tmojantjá: —¿As aca ndase cmëna ca?

Y Jesús tojanéyana: —Entsanga jabuátambama sënjanbojatsé orscana chama tcbonjáuyana.

<sup>26</sup> Atše ba soyënga sëntsebmoma tšëngaftangbiama jayanama, tšëngaftangbe contra jayanama; pero chë šonjichmó cha nyëtsca soyëngama ndegombre endbëtsichamo, y atšna ntšamo chábétsana tijouencá, cachcá quem luare oyenëga sentsëtsëtsná ca —cha tojanéyana.

<sup>27</sup> Pero chënga ndoñe tonjanësértá Jesús cachabe Taitabiamá chca tojanéyanama. <sup>28</sup> As Jesús tojanéyana: —Bëngbe Bëtsá Entšá tbojanbemá chašmojatsbaná ora, šmochántsetatšëmbo nda sëndmëná atše bétsemnana. Cachcá, tšëngaftanga šmochántsetatšëmbo, nýe cach atšbe juábna atše tondaye jamama sëndobenama. Nýe ndayá atšbe Taitá šojabuatëmbacá atše sëndoyebuambná. <sup>29</sup> Y chë šonjichmó cha ndoñe nýe canýa quešnátsboshjuana. Chca endmëna, er atše sempre sëndbëtsama ntšamo cha oyejuayá jabemama tojtsemná ca —Jesús tojánayana.

<sup>30</sup> Jesús chca tojánayana ora, banga chábeñe imojtsanošbuaché.

*Bëngbe Bëtsabe básenga y chë nýe bacna soye jtsamama vida bomnëga*

<sup>31</sup> Chora Jesús, chë chábeñe imojtsanošbuaché judiëga tojanéyana: —Ntšamo cbontsëtsëtsnacá tšëngaftanga sempre šmojtsamëse, ndegombre atšbe uatsjëndayënga šmochántsemna. <sup>32</sup> Ntšamo ndegombre yomncá šmochántsetatšëmbo; y ntšamo ndegombre yomncá jtsetatšëmbëga, atsebacánëga šmochántsemna ca.

<sup>33</sup> Chora chënga tmojanjá: —Bënga Abrahámbeñsana entsanga fsëndmëna, y ndocná ndocna te chešnáiishëche nýe chabiamá nyëts tempo jtsoservënama. As, ¿ndáyeca šcojtsëtsëtsná bënga atsebacánëga fchtsemna ca?

<sup>34</sup> Chora Jesús tojanéyana: —Ndegombre šcuayana: Nda bacna soyënga tojtsama, cha nýe bacna soyënga jamama juabnëngaca mandaná jéftsemnana. <sup>35</sup> Canýe oservená ndoñe nyëts tempo chë pamillentsá ntjéftsemnana, ntšamo canýe uaquiñá sempre chë pamillentsá jesomñancá. <sup>36</sup> Y chca, Bëngbe Bëtsabe Uaquiñá chacmojátsebacase, tšëngaftanga ndegombre atsebacánëga šmochántsemna bacna soyënga juabnënguentšana. <sup>37</sup> Atše sëndétatšëmbo tšëngaftanga Abrahámbeñsana entsanga šmomnana; pero tšëngaftanga šmontseboše atše jóbama, ntšamo atše cbontsëtsëtsnacá ainaniñe jýëngacñama ndoñe quešmátsboše causa. <sup>38</sup> Ntšamo atšbe Taitabioca tijinýcá, cach soyëngama atše sëntsoyebuambná. Tšëngaftangnaca, cachcá ntšamo tšëngaftangbe taitábentsana šmojouencá šmontsama ca —tojanéyana.

<sup>39</sup> Chora chënga tmojanjá: —Bëngbe uamana bëts taitá, Abraham endmëna ca.

As Jesús tojanéyana: —Tšëngaftanga Abrahambe básenga ca jtsabáinama merecido smojtsebuajonëse, chë ntšamo Abraham tojéftsema y cachcá tšëngaftanga šmattsama. <sup>40</sup> Atšna ntšamo ndegombre yomncá sëndoyebuambná, ntšamo Bëngbe Bëtsábentsana tsouenancá. Pero mora tšëngaftanga šmontseboše atše jóbama; Abraham ndocna te chca

chenaisobuachjanguá. <sup>41</sup> Tsëngaftangna, ntšamo tsëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojaníyana: —Bënga nÿe enaquécana básenga ndoñe queftsátsmëna. Chë nÿe canÿe taitá tsëndbomná, Bëngbe Bëtsá endmëna ca.

<sup>42</sup> Chora Jesús tojanëyana: —Bëngbe Bëtsá ndegombre tsëngaftangbe taitá tojtsemnëse, tsëngaftangna atše smattsebobonshana. Er atšna, Bëngbe Bëtsábiocana sënjabo y muentše sëntsemna. Nÿe atšbe ponto ndoñe chiyátabo; Bëngbe Bëtsá šonjichmó. <sup>43</sup> ¿Ndáyeca tsëngaftanga ndoñe šmontsobena atšbe palabrénga josértana? Co, ntšamo chontsëtsëtsnacá joyeunayama ndoñe quešmátsboše causa chca. <sup>44</sup> Tsëngaftangbe taitá Satanás endmëna. Tsëngaftangna chabe entšanga šmondmëna; chíyeca, tsëngaftanga šmontseboše jamama cachcá ntšamo cha tojtsebošcá. Quem luare jobojátšama orscana, Satanás entšá obanayá endmëna. Satanasbe juabnoca, ndocna tsabe soyënga ni ndegombre soyënga ntšebínÿana. Chíyeca, ndocna te cha ntšamo ndegombre yomncá ntsamana. Cha canÿe bostero endmëna, y chábtëtsana nÿetsca bostero soyënga jtsóbocanana. Chíyeca, cha tojtsebostero ora, nÿe ntšamo cachá yomnana jtsichámuana. <sup>45</sup> Atšna sempre ntšamo ndegombre yomncá chondutsëtsná; chíyeca, chë sentsichamo soyiñe tsëngaftanga ndoñe quešmatóšbuaché. <sup>46</sup> ¿Nda tsëngaftanguentšá nanjobenaye jinÿanjíyana atše ndaye bacna soye tijamama? Y atše, nÿe ntšamo ndegombre yomncá stšichámëse, ¿ndáyeca chë tijayaniñe ndoñe šmontsošbuaché? <sup>47</sup> Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tsëngaftangna ndoñe Bëngbe Bëtsabe entšanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanëyana.

*Cristo Abrahambíama más natsana ya yojtsemna*

<sup>48</sup> Chora chë judiënga tmojaníyana: —Ajá, bënga co ndegombre ftsichamo, aca nÿe samaritano y bacna bayëjbe juabna uambayá comna ca ftsichamo ora ca.

<sup>49</sup> Y Jesús tojanëjua: —Atše ni mo canÿe bayëjbe juabna quetsatambá. Ntšamo atše sentsamcá, endmëna jinÿanjíyama atšbe Taitá Bëngbe Bëtsá uamaná yomnana; pero tsëngaftangna, atše chca tsëmëna ndoñe quešmatinÿinÿná. <sup>50</sup> Atše ndoñe quetsátsboše inÿenga atše más uamaná chašmoberama. Pero inÿa endmëna; cha aiñe endboše atše bëtsá bëtsemnana chaminÿanÿema. Y chánaca endmëna chë inÿengbíama tsábá o ndoñe tsábá tmontsamama endbetsichamuá. <sup>51</sup> Ndegombre šcuayana, nda ntšamo atše sentsichamcá tojouena y chca tojama, ndocna te queochatóbana ca —Jesús tojánayana.

<sup>52</sup> Chora chë judiënga tmojaníyana: —Mora cocayé fsëntsetatšëmbo aca ndegombre bacna bayëjbe juabna uambayá comnana. Abraham tojanóbana, y cachcá, nÿetscanga Bëngbe Bëtsabe juabna oyebuambnayëngnaca. ¿Y mora aca cochjátichamo, “Nda ntšamo atše sentsichamcá tojouena y chca tojama, cha ndocna te queochatóbana ca”? <sup>53</sup> ¿O aca, bëngbe bëtš taitá Abraham, chë atše jabama te jinÿama yojtsejuabnaye ora, Bëngbe Bëtsabe juabna oyebuambnayëngnaca. ¿Ndase cojátšmëna ca aca cojatsjuabná ca? —chënga imojtsichamo.

<sup>54</sup> Chora Jesús tojanëjua: —Atše nÿe cach atše más bëtšá stsenobiamnasna, chë soye tondaye nantsámama. Pero chë más bëtšá šojtsebiamná cha, atšbe Taitá endmëna, cach ndabíama tsëngaftanga šmondbëtsichamo tsëngaftangbe Bëtsá canmëna ca. <sup>55</sup> Pero tsëngaftanga cha ndoñe quešmatábuatma; atše aiñe. Y atše, “cha ndoñe quetsatabuatma ca” stšichámëse, átšnaca cach tsëngaftangcá canÿe bostero stsemna. Pero ndegombre atše cha šënduábuatma, y ntšamo cha tojtsichamcá, atše šëndouenana y cachcá šëndbëtsama. <sup>56</sup> Tsëngaftangbe uámana bëtš taitá Abraham, chë atše jabama te jinÿama yojtsejuabnaye ora, puerta oyejuayá yojtsemna. Y pronto tojëftsaninÿe, y puerta tojanoyejúa ca —Jesús tojánayana.

<sup>57</sup> Chora chë judiënga tmojaníyana: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojëftsinye ca?

<sup>58</sup> Chora Jesús tojanëjua: —Ndegombre chëyana, Abraham cabá ndoñe ainá quen-jatšmëna ora, atše ya sënjetsemna ca.

<sup>59</sup> Jesús chca tojanëjua ora, chënga ndëtsbenga tmojanájaca cha jtsatëchënganjama. Pero Jesusna oitanánana, Bëngbe Bëtsabe bëtš yebnentšana tojésanbocna.

## 9

*Jesús tojanma, canÿe boyabása jtaná onÿnaná chabuabínÿnama*

<sup>1</sup> Canÿe luarëjana yojtsachnéjuana ora, Jesús canÿe boyabásabioye tbojáninÿe. Chë boyabásana jtaná inónÿna. <sup>2</sup> Chë uatsjédayënga Jesús tmojantjá: —Buatëmbayá, ¿ndáyeca quem boyabása jtaná inónÿna? ¿Camuá bacna soyënga tojamama, o chabe bëtšëtsangbe bacna soyënga causa ca?

<sup>3</sup> Chora Jesús tojanëjua: —Ni cachabe bacna soyëngama, y ni chabe bëtšëtsangbe bacna soyënga causa. Chca endmëna ndayá entšanga jinÿanjíyama ntšamo Bëngbe Bëtsá yobencá.

<sup>4</sup> Cabá yojtsësháchena ora, šontsamna jamana ntšamo chë šonjichmó cha yojtsebošcá.

Ndoñe usháchena tempo echanjóshjango; chora ndocná tondaye jamama queochatobeyaye. <sup>5</sup> Quem luariñe chjéftsemnëntscuana, atše quem luare entsangbe juabnënga binýnayá chanjéftsemna ca —tojanéyana.

<sup>6</sup> Chca tojánayanentšana, Jesús fshantsiñe tojanbuashëtjo, y chë yebuáyeca batśá ngüiche tojánbema, y chë jtaná chë ngüicheca tbojanbucharñëtjo. <sup>7</sup> Chora chë jtaná tbojaníyana: —Motsa y metsobúchjabebiye, chë binche uafajónaye entsangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”).

Y chë jtaná tojána; choca yojetsobúchjabebiye, y yebnoye tojtaná ora, ya ibojtsabinýna. <sup>8</sup> Chë juachañe oyenënga y chë jtaná tempo lemošna otjanañana tmojáninýënga, imojtsentjanaye: —¿Mua ndoñe yondmëna chë enjanamana jótbemana lemošna jótjañama ca?

<sup>9</sup> Inýënga imojtsichamo: —Cha entsemna ca.

Y inýengna: —Cha ndoñe quenátsmëna, pero chacá entsábona ca.

Y cach shnaná yojtsichamo: —Atše cha sëndmëna ca.

<sup>10</sup> As chë entsanga tmojantjá: —¿Ntšamo chca mora cmojtsabinýna ca?

<sup>11</sup> Y cha tojanéjua: —Chë boyabása, Jesús ca uabainá, ngüiche yebuáyeca tonjábema, šonjabucharñëtjo y šonjauyana: “Motsa y Siloé uafajónayiñe metsobúchjabebiye ca”. Chcasna, atše sënjá, sënjetsobúchjabebiye y cachora šontsabinýna ca.

<sup>12</sup> Chora chënga tmojantjá: —¿Ndayentše cha yojtsemna ca?

Y chana: —Atše ndoñe quetsátstatšëmbo ca —tojanéjua.

### *Chë jtanana shnanábioye fariseunga imojtsetjanaye*

<sup>13</sup> Chora chë entsanga, chë jtaná inamná fariseúngbioye tmojanánatse. <sup>14</sup> Chë Jesús batśá yebuáyeca ngüiche tojánbema, y chë jtaná tojanma te, canýe ochnayté inamna. <sup>15</sup> As chë fariseunga chë boyabása tmojantjá: —¿Ntšámoyeca mora cmojtsabinýna ca?

Chora cha tojanéjua: —Cha ngüiche yebuáyeca tonjábema y šonjabucharñëtjo. Šënjetsobúchjabebiye, y cachora šonjuabinýna ca.

<sup>16</sup> As chora básefta fariseunga imojtsichamo: —Chë jtaná chabotsabinýnama tojamá ndoñe tonjochná, y ochnayté tojatrabaja. Chýeca cha Bëngbe Bëtsabe entsá ndoñe quenátsmëna ca.

Inýënga imojtsichamo: —Cha canýe bacna soyënga amá tojtsemnëse, ¿ntšamo nantsobena canýe bëts soyë Bëngbe Bëtsabe obenánaca jamama ca?

Y chca, inýënga Jesube pavor imojtsemna, y inýengna chabe contra. <sup>17</sup> Chama chënga cachiñe chë jtaná inamná tmojtétantjá: —Er aca mora chacmotsabinýnama cha tojamëse, ¿chabiama ntšamo catjayana ca?

Chora cha tojanéjua: —Chana canýa Bëngbe Bëtsabe juabna oyebuambnayá entsemna ca.

<sup>18</sup> Pero chë judiënga ndoñe montsanošbuaché, cha chë jtaná inamnama y chora ibojtsabinýnama. As chënga, inýënga tmojanichamó chë boyabásabe bëtsétsata jobiatšama.

<sup>19</sup> Chë bëtsétsata tbojánashjango ora, chë judiënga tmojanatjá: —¿Quem boyabása tsëndatbe uaqiñá yomna ca? ¿Ndegombre tašojtsichamo cha jtaná inonýnama? Chcase, ¿ntšamo mora cha ibojtsabinýna ca?

<sup>20</sup> Chora chë bëtsétsata tmojanéjua: —Aíñe fsëndétatšëmbo cha bëndatbe uaqiñá endmënama y jtaná tonjanonýnama. <sup>21</sup> Pero ndoñe queftsátstatšëmbo ntšámoyeca mora chca ibojtsabinýnama, ni bëndatbe uaqiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tsëngaftanga razón jatšatayama ca —chata tbojánayana.

<sup>22</sup> Tempo, chë judiënga imojenóyeunaye, chëngbe enefjuana yebnënguentšana jtëbuacanana chë Jesús ndegombre chë Uámama Uabuayaná, chë Cristo yojamna ca tmojayanënga. Chë bëtsétsatna chama ibojtsauatja; <sup>23</sup> chýeca tmojanéyana: “Cha ya bëtsá entsemna. Cachá motjanga ca”.

<sup>24</sup> As cachiñe chë judiënga chë jtaná inamná tmojanchembo y tmojaníyana: —Bëngbe Bëtsabe delante cach acbiama ndegombre mobuambá. Bënga fsëndétatšëmbo chë boyabása canýe bacna soyënga amá yomna ca.

<sup>25</sup> Chora cha tojanéjua: —Cha canýe bacna soyënga amá o ndoñe tondmënama, atše ndoñe quetsátstatšëmbo. Atše nýe mëntśá sëntsetatšëmbo: Atše jtaná sënjanmëna, pero mora šontsabinýna ca.

<sup>26</sup> Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinýnama ca?

<sup>27</sup> Y cha tojanéjua: —Ya tcbonjáuyana y ndoñe chešmatoyeuná. ¿Ndayeca cachiñe šmojtseboše jatuenama? ¿Tsëngaftángnaca šmojtseboše chabe ústonënga jtsemnana ca?

<sup>28</sup> Chora chënga cha tmojtsanóyenguango y tmojaníyana: —Acna canýe chabe ustoná cojtsemna, pero bënga ndoñe; bëngna Moisesbe ústonënga fsëndmëna. <sup>29</sup> Bënga fsëndétatšëmbo,

Bèngbe Bètsá Moisésbioye tbojanatsètsama, pero chë boyabásabiama ndoñe queftsátstatšëmbo ni mo ndëmocana cha tojabama ca —chënga imojtsichamo.

<sup>30</sup> Chora chë boyabása tojanējua: —¡Ntšamo chca nántsemna! Tsëngaftanga ndoñe šmontsetátšëmbo ndëmocana cha tojabama; pero chašubabinýnama cha tonjama. <sup>31</sup> Bënga tšabá mondétátšëmbo, bacna soyënga amënga Bèngbe Bètsá ndoñe queondbátayaunana. Chana, nýe chábioye adorayá y ntšamo cha tojtsebošcá amábioye joyeunayana. <sup>32</sup> Quem luare jobojátšama orscana ndocna te quenaísótátšëmbo canýe jtaná onýnanabiama ndánaca cha chabotsabinýnama tojéftsemama. <sup>33</sup> Quem boyabása, Bèngbe Bètsabe ichmoná chabe soyënga jamama ndoñe tontsemnëse, tondaye nantsobena jamama ca —chë entšá tojánayana.

<sup>34</sup> As chë fariseunga tmojanianiya: —¡Ndayá! Aca tcojanonýná orscana, corente bacna soyënga amá tcomnëse, ¿ntšamo mora bënga šcochjátatuambaye ca?

Y chora chë judiëngbe enefjuana yebnentsana cha tmojtanábocna.

*Chë Bèngbe Bètsabe soyëngama mo jtanëngcá imomnënga*

<sup>35</sup> Chë jtaná tmojtanábocnama Jesús tojanuena ora, tojána cha janguanguama. Tbojáninýena ora tbojanianiya: —¿Aca Bèngbe Bètsá Entšá tbojanbemábeñe quecojtsosbuaché ca?

<sup>36</sup> Y cha tbojanjá: —¿Taita, nda cha yojtsemna, as atše chábëñe jtsosbuáchiyama ca?

<sup>37</sup> As Jesús tbojanianiya: —Aca ya tconjinýe; chë ácaftaca entsoyebuambná cha entsemna ca.

<sup>38</sup> Chora, chë boyabása Jesús bentsë tojanoshamentšé jëtschuayama y tbojanianiya: —Atšbe Utabná, aíñe sentsosbuaché ca.

<sup>39</sup> Chora Jesús chë entsanga tojanējyana: —Atše quem luaroye tijabo ndayá entsanga jinýanýiyama ntšamo cachënga Bèngbe Bètsabe soyëngama imojuabnama. Chë Bèngbe Bètsabe soyëngama ndosertánënga, chë soyënga atše chanjinýanýiye ora, mo jtanëna shnanëngcá mochántsemna; y chë Bèngbe Bètsabe soyëngama corente imotátšëmbo ca juabnayëngna chanjinýanýiye, nýe batsá Bèngbe Bètsabe soyëngama imotátšëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

<sup>40</sup> Básefta fariseunga Jesúseftaca imojtsemnënga chca tmojanuena ora, cha tmojanianiya: —Ndegombre bënga ndoñe mo jtanëngcá queftsátsmëna ca.

<sup>41</sup> Chora Jesús tojanējua: —Tsëngaftanga Bèngbe Bètsabe soyëngama ndétátšëmbënga šmojtsemna ca, y ndegombre chë soyëngama ndoñe cmontsësertana ca šmojobuabase, ndayá šmojtsemná Bèngbe Bètsá mo bacna soyënga cuenta ndoñe queochátónýaye. Pero tsëngaftanga corente Bèngbe Bètsabe soyëngama cmojtsësertana ca šmojtsichámëšna, Bèngbe Bètsá ndoñe queochatobenaye tsëngaftangbe bacna soyëngama jáperdonana ca —Jesús tojanējyana.

## 10

*Chë oveshënga abuañjënýa y chabe oveshënga*

<sup>1</sup> As Jesús tojanējyana: “Ndegombre šcuayana: Nda chë oveshëngbe luaroye bësháshajana ndoñe tonjámarshëngo, pero aíñe inýajana tojtsamáshëngo, chana canýe atbëbaná y abacayá jtsemnana. <sup>2</sup> Pero chë bësháshajana tojamashënguana, chë oveshënga anýená jtsemnana. <sup>3</sup> Chë bëshásha ebtafjuaná, chë bëshásha jebëtafjuana, y chë oveshënga abuañjënýa ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe abuañjënýa yojtsachembuanama; y chë luarentsana cha jubuacnana. <sup>4</sup> Nýetsca oveshënga tmojábocana ora, chë abuañjënýa chënga jtsebënatšanana, y chë oveshënga jtsëstonana, er chabe oye-buambnayana chënga joyátëmbana. <sup>5</sup> Pero chë tmonduabatmábioyna chë oveshënga ndoñe ntjuastana; nýe chábentsana jtsachetëngana, chë oveshënga chabe oye-buambnayana ndoñe ntjoyátëmbana causa ca” —Jesús tojánayana.

<sup>6</sup> Jesús entsanga chca tonjanacuntá, pero chënga ndoñe ntjosértana ntšamo yojt-sentšayancá.

*Jesús, chë oveshënga tšabe abuañjënýa*

<sup>7</sup> As Jesús cachiñe tojanējyana: “Ndegombre cbëyana: Atše sëndmëna chë bëshásha oveshënga mondbëtsamashjuanjëna. <sup>8</sup> Nýetscanga chë atšbe natsana tmojábabënga, atbëbanënga y abacayënga imnamna, pero chë oveshënga ndoñe chëngbioye ntjóyaunayana. <sup>9</sup> Atše chë bëshásha sëndmëna. Nda quem bësháshajana tojamashënguá, atsbocaná echántsemna. Canýe oveshá jamashënguana y jabocnana, y shácuana jónýenana. Cachcá, chë quemëjana tojamashënguá, lempe echanjónýena.

<sup>10</sup> “Chë atbëbaná jabana nýe jatbëbama, jóbama y lempe jtsepochócama; pero atšna, entsanga vida chamotsebomnana y átseftaca bëtscá tšabe vida chamotsebomnana tijabo.

<sup>11</sup> “Atše sēndmēna chē oveshēnga tšabe abujējñya. Chē oveshēnga tšabe abujējñya sempre jtseprontánana chēngbiamá jóbánama, chabe oveshēnga ababuánñeshanayeca. <sup>12</sup> Pero nda nñe crocenánama totrabáya y chē oveshēnga ndoñe chábenga tmontsemna, cha nderado tojinñe canñe tjañe queše chē oveshēngbiyoje tojtsobécocnama, cachora nñe cachcá jesēñyayana y jtsachana. Chē tjañe queše oveshēnga jtsacamiyana, y chē oveshēngna nñe cátoye jtsachetana. <sup>13</sup> Cha jtsemnana nñe crocenánama trabajayá; chabiamá nñe chē uacanánana más uámana soye jtsemnana, y chē oveshēngbiamá tondayana ntseñtšamnana; chíyeca cha jtsachana.

<sup>14</sup> “Atše sēndmēna chē oveshēnga tšabe abujējñya. Atše chēnga sēndēubuatma, y chēngnaca atše šmondúabuatma. <sup>15</sup> Cachcá, chē Taitá Bēngbe Bētsá atše šondúabuatma y atše chábioye. Atše sempre sēndētseprontana jóbánama, atšbe oveshēnga sēndababuanñeshanayeca. <sup>16</sup> Atše inñe oveshēnga sēndábamna, pero chēnga ndoñe quem luariñe oveshēnga quemátsemna. Atše šontsemna chēngnaca moye junatsana. Chēngnaca atšbe oyebuambnayana mochanjoena, y muentá oveshēngtaftaca cánñiñe mochántsemna, y atšna nñetsca chē oveshēngbiamá chē abujējñya chántsemna.

<sup>17</sup> “Atše siempre sēndētseprontana jóbánama, chora jtayenama. Chíyeca chē Taitá šondbobonshana. <sup>18</sup> Ndocná atšbe vida quešochatsbojuána, pero chēnga sēndababuanñeshanayeca siempre sēndētseprontana jóbánama, cach atše chca sēndbošeyeca. Derecho sēndētsoñomñe chēngbiamá jóbánama, y chora jtayenama. Chca endmēna ntšamo atšbe Taitá šonjamandacá ca” —Jesús tojánayana.

<sup>19</sup> Chē soyēnga chē judiēnga tmojanuena ora, cachiñe banga Jesusbe contra y inñengna Jesusbe pavor imojtsemna. <sup>20</sup> Banga imojtsichamo: —Chana bacna bayējbe juabna uambayá y corente juicio ndbomná entsemna. Y as ĩndáyeca cha mochjátsyeunana ca?

<sup>21</sup> Pero inñengna imojtsanichamo: —Ndocna bacna bayējbe juabna uambayá ntsoberenana chca jóyebuambayama. ĩCanñe bayēja nantsobena jamama canñe jtaná chabotsabinñyama ca?

*Chē judiēnga ndoñe imontsošbuáchiye Jesús Bēngbe Bētsabe Uaquiñá bētsemnana*

<sup>22</sup> Canñe uaftena tempo inamna, y Jerusalemntše canñe fiesta imojtsebomna. Chē fiesta inamna cada uata, Bēngbe Bētsabe bēts yebna tempo cachiñe tmojtanjebuama entšanga jtenójuaboyama. <sup>23</sup> Jesús Bēngbe Bētsabe bēts yebnoca yojétsana, canñe amashjuana otsojebniñe, Salomonbe Amashjuana ca uabáinentše. <sup>24</sup> Chora, chē judiēnga tmojanóbobuashcona, y tmojantjá: —ĩBuetaytentscuana bēnga fchjéftsemna acbiamá ndegombre soye ntsetatšēmbcá? Aca chē Cristo cojtsemnēse, chama lempe tšabá šmanñanñé ca.

<sup>25</sup> As Jesús tojánjua: —Ya tchonjáuyana y tšēngtaftanga átšbeñe ndoñe ntsošbuáchiyana. Chē atše sēndama soyēnga, atšbe Taitá Bēngbe Bētsabe obenánaca, cmontsinñanñá nda atše bētsemnana. <sup>26</sup> Pero tšēngtaftanga átšbeñe ndoñe quešmatsošbuaché, er tšēngtaftanga atše ndoñe quešmatšestona, ntšamo chē oveshēnga chē tšabe abujējñya mondbetsēstona. <sup>27</sup> Chē atše šmondústonēnga, atše šmondóboyenayey y šmondébēuasto. Atše chēnga sēndēubuatma. <sup>28</sup> Atše chanjama, quem entšanga chē nñetsca tescama yomna tšabe vida chamotsebomnana; chēnga ndocna te pochocánēnga quemochátsemna, y ndocná quenátobena átšbentšana chēnga jefcana. <sup>29</sup> Atšbe Taitá Bēngbe Bētsá, chē entšanga atše chašmuastama tojamá, nñetscangbiamá más bētsá endmēna, chíyeca ndocná quenátobena chábentšana chēnga jefcana. <sup>30</sup> Chē Taitá y atše canñya fsēndmēna ca —Jesús tojánayana.

<sup>31</sup> Chora, chē judiēnga cachiñe ndētsbēnga tmojanájaca Jesús jtsatēchénganjama. <sup>32</sup> Pero Jesús tojanéyana: —Atše tšēngtaftangeñe, ba bēts soyēnga sēnjama atšbe Taitá Bēngbe Bētsabe obenánaca. ĩNdēmua chentšá soyama atše šmochtsatēchénganja ca?

<sup>33</sup> Chora chē judiēnga tmojanjú: —Ni canñe quem bēts soyēngama bēnga queftsátsboše aca jtsatēchénganjama. Aca Bēngbe Bētsabiamá ndoñe tšabá quecátichamo; mo chábioye cuafjoyenguangcá entsemna. Aca nñe canñe entšá condmēna, pero acna contsichamo cach aca Bēngbe Bētsá comna ca; chíyeca bēnga fsēntseboše ndētsbēngacaca aca jtsatēchénganjama ca —chēnga tmojanijana.

<sup>34</sup> Chora Jesús tojanéyana: —Bēngbe Bētsabe uabemana palabrēnguñe mēntšá endayana: “Atše sēnjayana tšēngtaftanga diosēnga šmomna ca.” <sup>35</sup> Bēngbe Bētsá chca tojánayana chē chabe palábraca y cha chamotsešervénama tojánamandangbiamá; ndocná quenátobena jinñanñiyana ni mo canñe soye Bēngbe Bētsabe uabemana palabrēnguñe, ndoñe ndegombre soye yomnana. <sup>36</sup> Y atšbiama, Bēngbe Bētsabiacá uabuayaná y quem luare ichmoná, ĩntšamo tšēngtaftanga šmojtsobera jayanama, “aca Bēngbe Bētsabiamá ndoñe tšabá quecátichamo ca”, chē Bēngbe Bētsabe Uaquiñá sēndmēna ca atše tijayanama? <sup>37</sup> Ntšamo atšbe Taitá endamcá atše ndoñe sēntsamēse, tšēngtaftanga átšbeñe ndoñe šmattsošbuáchiye. <sup>38</sup> Pero, ntšamo atšbe Taitá endamcá atše añe stsamēse, masque ndoñe átšbeñe šmontsošbuaché, nñe chē Taitabe obenánaca soyēnga tijamama šmochtssošbuáchiye. As, canñe ora chašmotsetatšēmbó y chacmēsertá, chē Taitá átšbeñe yomnana y atše chábēñe tsmēnana ca —Jesús tojanéyana.

<sup>39</sup> Chora chënga cachiñe tmojánbošena Jesús jishachama, pero cha chëngbentšana tojan-otsbocá.

<sup>40</sup> Chentšana, Jesús Jordán bėjaye chenguana tojesaná y choca tojtsanoquedañe. Chentše Juan tempo entšanga yojanëbáyana. <sup>41</sup> Ba entšanga tmojána Jesús jinýama, y mëntšá imojtsichamo: “Ndegombre, masque Juan ni mo canýe bëts soye Bëngbe Bëtsabe obenánaca tonjëftsema, lempe ntšamo quem boyabásabiama tonjanoyebuambacá, ndegombre yojamna ca.” <sup>42</sup> Y chentše, ba entšanga Jesúsbeñe imojtsanošbuaché.

## 11

### *Lázaro tojanóbana*

<sup>1</sup> Inamna canýe boyabása šocá, Lázaro ca uabainá. Cha inoyena canýe pueblo Betania ca uabáinentše, Marta y Mariáftaca, chabe uabénata. <sup>2</sup> Quem Mariá inamna nda Bëngbe Utabná Jesusbe shecuatšiñe botamana uanguëtsiye tbojanáshecbuešcja, y chabe stjënashaca tbojtanshechojó cha. <sup>3</sup> Chë uta uabénatna inýenga tmojanichamó Jesús jauenayama: —Bëngbe Utabná, chë aca condobonshaná šocá entsemna ca.

<sup>4</sup> Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aiñe entsemna Bëngbe Bëtsabe obenana entšanga jinýanýiyama, y Bëngbe Bëtsabe Uaquiñá chamuatschuama ca.

<sup>5</sup> Jesús corente yojánabuanýeshana Marta, Mariá y chatbe uaftše Lázaro. <sup>6</sup> Masque chcasna, Lázaro šocá yojtsema ca Jesús tmojanayana ora, cabá uta te más cha yojëtsemna luarentše tojtsanoquedañe. <sup>7</sup> Chentšana, chabe uatsjëndayënga tojanéyana: —Judeoye cachiñe cuajna ca.

<sup>8</sup> As chë uatsjëndayënga tmojanayana: —Buatëmbayá, baseftayté entsemna chë luaroca judiënga cmonjanbuachetá ndëtsbéngaca jtsóbama; y mora, ¿cabá choye jtésama cojtseboše ca?

<sup>9-10</sup> Chora Jesús tojanéyana: —Bnëtsana uta hora bnëté endmëna. Nda bnëté tojt-sana, ndoñe ntjojëstjiana, binýniñe bëtsemnayeca. Cachá átšeftaca endmëna, tondaye quenátopodena átšeftaca jopásana, atše jóbanama cabá ndoñe tonjobuache ora. Pero ibeta tojtšanëse, cha jtsojëstjiana, ndoñe binýniñe causa. Cachá, bënga šontsamna yojtsëshächenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

<sup>11</sup> Chentšana tojanéyana: —Bëngbe amigo Lázaro tojtsomaná, pero atše choye chanjá jetsefsenama ca.

<sup>12</sup> Chora chë uatsjëndayënga tmojanjuá: —Bëngbe Utabná, tojtsomanase yojtsayana chana tsabá yochtsatsmëna ca.

<sup>13</sup> Pero Jesús yojtsanëtsëtsná ndayá Lázaro tojtsanóbana ca, y chabe uatsjëndayëngna imojtsejuabnaye Lázaro ndegombre yojtsomáñama. <sup>14</sup> As Jesús tsabá tojanéyana: —Lázaro tontsóbana. <sup>15</sup> Atše sëntsoyejuá choca atše ndoñe tsmënema, tsëngaftangbe tsabiama chaotsemnama; chca, tsëngaftanga más átšbeñe chašmotsošbuáchema. Pero cuajna cha jinýama ca.

<sup>16</sup> Chora Tomás, chë Gemelo ca uabobainá, chë inýe uatsjëndayënga tojanéyana: “Bëngnaca cuajna, cháftaca mochjóbana ca.”

*Jesús iuama entšanga chámuatayenama y chë nyetsca tescama yomna tsabe vida chamotse-bomnama*

<sup>17</sup> Jesús chë béconana tojánashjango ora, tojántatšëmbona Lázaro ya canta te uatbontsána yojtsemnama. <sup>18</sup> Betania pueblo yojamna Jerusalén béconana, mo unga kilómetroca. <sup>19</sup> Ba judiënga tmojána Marta y Mariá jautsëtsayama y jatjëmbambayama ndoñe tša ngmënaca chabondëtsemnama, chatbe uaftše tojanóbana causa. <sup>20</sup> Jesús yojtsashajuanama Marta tojántatšëmbona ora, tojánbocna cha jajëbenguama, pero Mariá cach yebnentše tojanoquedá.

<sup>21</sup> Chora Marta Jesúsbioye tbojanayana: —Bëngbe Utabná, aca muentše macmënëse, atšbe uaftše ndoñe matënjóbana. <sup>22</sup> Pero atše sëntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjátsetaye ca.

<sup>23</sup> Y Jesús tbojanjuá: —Acbe uaftše echántayena ca.

<sup>24</sup> Chora Marta tbojanayana: —Aiñe, atše sëndëtatšëmbo cha yochtayenama, pero quem luare jopochócama te, nyetsca obanënga mochtayena ora ca.

<sup>25</sup> As Jesús tbojanayana: —Atše sëndmëna chë entšanga chámuatayenama y chë nyetsca tescama yomna tsabe vida chamotsebomnama endamá. Nda átšbeñe tojtsošbuaché, masque chaóbana, echántayena. <sup>26</sup> Y nda cabá ainá totsomñe y átšbeñe tojtsošbuaché, ndocna te queochatóbana. ¿Chë cbontsatsá soyiñe quecojtsosbuaché ca? —Jesús tbojantjá.

<sup>27</sup> Chora Marta tbojanayana: —Aiñe, Bëngbe Utabná, atše ábeñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnama ca.

*Jesús, Lázaró yojtsábtontsana cuevēshentše yojenóbošachna*

<sup>28</sup> Chca tojanayanentšana, Marta tojaná chabe quenata María jachembuama, y iytęcana tbojanianyana: “Buatěmbayá tonjáshjango y entseboše aca jinýama ca.”

<sup>29</sup> María chca tojanuena y cachora tojěftsanbocna y tojána Jesús jinýama. <sup>30</sup> Jesús cabá ndoñe chě puebløye tonjánamashěngo; yojětsemna Marta tbojanjébengo luarentše. <sup>31</sup> Chě yebnentše imojtsemna judiěnga, María tša ngmęcna ndoñe chaondětsemnama tjěmbambayěnga, tmojánbocna María juastama; er chě tojěftsantsbaná y tojěftsanbocna ora, chě judiěnga imojtsejuabnaye, Lázaró yojtsábtontsana luaroye María yojtsaye, choca jošachnama ca.

<sup>32</sup> Jesús yojtsemnentše María tojánashjango ora, chá bentše tojanoshamentšé y tbojanianyana: —Běngbe Utabná, aca muentše macmęcne, atšbe uafše ndoñe matěnjóbana ca.

<sup>33</sup> María y cháftaca tmojánashjajna judiěnga, nyětsanga imojetsenóbošachiye; y Jesús chca tojáninýe ora, corente tbojancochtsetšena y puerte ngmęcna yojtsemna. <sup>34</sup> Chora Jesús tojanatjá: —¿Ndayentše cha šmojuatbontsá ca?

Y chěnga tmojanjuá: —Běngbe Utabná, mabo y cochjinýe ca.

<sup>35</sup> Chora Jesús tojánenobošachna. <sup>36</sup> As chě judiěnga tmojánayana: —¡Minýěnga, tša ibn-abobonshana ca!

<sup>37</sup> Pero inýe judiěnga imojtsichamo: —Chě jtaná chabuabínýnama tojamá, ¿tondaye tonjobená jamama, Lázaró ndoñe chaondóbanama ca?

*Lázaro tojtanyena*

<sup>38</sup> Jesús, cachiñe puerte cochtsetšenaná, chě uatbontsánøye tojanobeconá. Chě luarna cuevēshe inamna, y amashjuanentše canýe bětš ndětšbeca yojtsatámena. <sup>39</sup> Chora Jesús tojaněyana: —Chě ndětšbě mojuánanga ca.

Chora Marta, chě obanabe uabena tbojanianyana: —Běngbe Utabná, mora ya bacá yojtsonguětšé, er ya canta te entsemna cha tontsóbana ca.

<sup>40</sup> Y Jesús tbojanjuá: —Ndegombre, ya tcbonjauyana, aíñe átšbeñe tcojtsošbuáchese, cochjinýe Běngbe Bětšá puerte obená y bětšá bětsemnama ca.

<sup>41</sup> Chora chě ndětšbě tmojanjuá; Jesús celøye yojontješiye y Běngbe Bětšábøye tbojanianyana: “Taita, cbatschuá atšbe opresido tcojouenama. <sup>42</sup> Atše sěndětátšěmbo aca sempre šcondbětseyeunanama; atše chca tcbonjauyana, muentše montsemna entsangbe tšabíama, chca, aca atše šcojichmoma, chěnga chamotsošbuáchema ca.”

<sup>43</sup> Chca tojánayanentšana, jabuache tojánayana: “¡Lázaro, chentšana matsbocna ca!”

<sup>44</sup> Y cachora chě obaná tojtanbocna, cucuatšěnga y shecuatšěnga entšějuaca batsěcná, y chabe jubíá base entšějuaca uamochěcjuaná. As Jesús tojaněyana: “Motsejafjoná y jama chaotsobena ca.”

*Chě judiěngbe aměndayěnga tmojanenøyeuná Jesúsbiøye jóbama*

*(Mt 26.1-5; Mc 14.1-2; Lc 22.1-2)*

<sup>45</sup> Chě soyěngama, banga chě judiěnguentšana, María jatjěmbambayama tmojánanga, y ntšamo Jesús tojanmcá tmojáninýěnga, Jesúsbeñe imojtsošbuaché. <sup>46</sup> Pero inýe judiěnga fariseungbiøye tmojána, ntšamo Jesús tojanmama chěnga jacúntama. <sup>47</sup> As, chě fariseunga y chě bachnangbe aměndayěnga tmojánenefina inýe judiěngbe aměndayěngaftaca, y tmojánayana: —¿Ndayá mochjobenaye cháftaca jamama? Quem boyabása bětš soyěnga entsama. <sup>48</sup> Nyě cachcá chamojonýase, nyětsca entsanga chábeñe mochantsošbuáchíye; chě romaněngbe aměndayěnga mochanjabo y lempe mochantsepochóca, Běngbe Bětšabe bětš yebna y Běngbe luare Israel ca —chěnga imojtsichamo.

<sup>49</sup> Pero canýa chěnguentšá, Caifás ca uabainá, chě uata chě bachnangbe más uámana aměndayá inamná, tojaněyana: —Tšěngaftanga tondaye quešmátstatšěmbo. <sup>50</sup> Y ndoñe quešmatsjuabná, tšěngaftangbiamá más tšabá yojtsemna nýe canýe boyabása Israeloca entsangbiamá chaóbana, y ndoñe nyěts Běngbe luare chamotsepochóca ca —cha tojaněyana.

<sup>51</sup> Pero Caifás chě soye nýe cachabe juábnaca ndoñe chca tonjánayana. Cha, chě uata chě bachnangbe más uámana aměndayá inámnayeca, Běngbe Bětšabe Espíritbe obenánaca tojánayana Jesús ibojamna Israeloca entsangbiamá jóbana ca. <sup>52</sup> Y ndoñe nýe Israeloca entsangbiamá, sínó chě inýe luarenguñe Běngbe Bětšabe básenga tmojánáshaněnga chamuatábama, as chca, nyětsanga nýe canýe luarentša entsanga chamotsemnama. <sup>53</sup> Chcasna, cach tescana judiěngbe aměndayěnga tmojanenøyeuná Jesús jóbama.

<sup>54</sup> Chýeca Jesús entsangbeñe, Judea luariñe ya ndoñe yontsana. Chě luarentšana tojěftsanbocna y canýe luaroye tojtsanoñe, entsanga ndoyeniñe bēcónana, canýe pueblo Efraín ca uabáinoe. Y chentše chabe uatsjěndayěngaftaca tojtsanoquedañe.

<sup>55</sup> Judiěngbe Bashco fiestama batšá yojtsájamna, y ba entsanga pueblěnguentšana Jerusalenøye imojtsajna, soyěnga choca jamama ntšamo tempo inamncá, chca, Běngbe Bětšabe bominyáma tšábenga jtsemnama, chě Bashco fiesta cabá ndobuache ora. <sup>56</sup> Chocna,

judiënga Jesús imojtsenguaye, y Bëngbe Bëtsabe bëts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

<sup>57</sup> Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnana tojtsetatšëmbësna, chaobuambá ca, as Jesús jishachama.

## 12

*María, botamana uanguëtsiye Jesúsbeñe tbojanáshecbuešcja*

(Mt 26.6-13; Mc 14.3-9)

<sup>1</sup> Chnënguana te chë Bashco fiestama yojtsájamna ora, Jesús Betania puebloye tojtaná. Lázaro, chë Jesús tbojtanayená cha, choca inoyena. <sup>2</sup> Chentšna bëts saná Jesusbiama tmojanábua. Marta tojanëjuatšë, y Lázaro yojtsemna chë Jesúseftaca juasama mesëshañe imojtsetbiamanënguentše. <sup>3</sup> As María canýe jarrëtema tojanaca; chiñe yojanaftsuamna canýe botamana uanguëtsiye, bëtsca uámaniye, ena nárdoca pormániye. Chë uanguëtsiye, María, Jesusbe shecuatšënguñe tbojanáshecbuešcja, y cachabe stjënashaca tbojtanshecbójó. Chora, chë yebnentše ena nardiya yojtsonguëtsiye.

<sup>4</sup> Chora, canýa Jesusbe uatsjëndayënguentšá, Judas Iscariote, chë Jesús uayayëngbe cuuatšifne yochjanayentšbashejuaná, tojánayana: <sup>5</sup> —Quem botamana uanguëtsiye unga patse denario crocénana enduámama. ¿Ndáyeca ndoñe šmonjiuye y ndbomnjëmënga chë crocénana mašmëntsatsatá ca?

<sup>6</sup> Pero Judas chca tojánayana, chë ndbomnjëmëngbeñe ntsejuabnaysca, sinó cha atbëbaná inamna causa. Judas chëngbe crocénana shecnëšifne yojánatbëna, y ba soye, chë shecnëšoye imojanatsuíama crocénanentšana cha yojánatbëbana.

<sup>7</sup> As Jesús tbojanjuá: —Cachcá monýa. María mëntscoñe chë botamana uanguëtsiye iuabofjájona, cha jobenayama átšbeñe jabuéšcjama, er ndoñe bën y atše šmochanjaitëme.

<sup>8</sup> Chë ndbomnjëmëngna tšëngaftangbeñe sempre mochanjesomñe, pero atše ndoñe ca — tojánayana.

*Judiënga tmojanenoyeuná Lázaro jóbama*

<sup>9</sup> Ba judiënga tmojántatšëmbona Jesús Betanioca yojtsemnana, y choye tmojána, ndoñe nýe Jesús jinýama, sinó Lázarnaca, chë Jesús tbojtanayená cha. <sup>10</sup> As chë bachnangbe amëndayënga tmojanenoyeuná Lázarnaca jóbama. <sup>11</sup> Chabe causa, ba judiënga chëngbioye cachcá tmojesanëñya y Jesusbeñe imojtsošbuaché.

*Jesús Jerusalenoye tojánashjango*

(Mt 21.1-11; Mc 11.1-11; Lc 19.28-40)

<sup>12</sup> Chë yëfsana, mallajta entšanga, Jerusalenoca fiestama tmojánashjajnënga, tmojántatšëmbona Jesús choye yochjánashjanguama. <sup>13</sup> As chëngna palma betiye buacuafjënga tmojanatëtsetše, y Jesús jajëbenguama tmojánbocana, y mëntšá imojtsáyebuae: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabá! ¡Corente bendición bomná chë Israeloquëngbe Rey ca!”

<sup>14</sup> Jesús canýe burrotema tbojáninýena y chábeñe tojanenoyayé. Ntšamo Bëngbe Bëtsabe uabemana palabrenguñe iuayancá, cachcá tojanopasá. Chiñe mëntšá endayana Jerusalenoca entšangbiama:

<sup>15</sup> Sión bëts puebloca oyenënga, ndoñe matauatjëngana.

Minýënga, tšëngaftangbe Rey burrotëmiñe enjaquená entsabó ca.

<sup>16</sup> Chca orna, Jesusbe uatsjëndayënga chë soyëngama ndoñe tonjanësertá; pero chentšana, Jesús corente bëtsá yomnama Bëngbe Bëtsá tojaninýanyé ora, chë uatsjëndayënga chama tmojanenoyuabó, lempe ntšamo Bëngbe Bëtsabe uabemana palabrenguñe iuayancá y cachcá Jesúseftaca tojanopasama.

<sup>17</sup> Chë Jesúseftaca imojtsemna entšanga, Lázarbíoye uatbontsánoye tbojanchembo ora y chentšana tbojtanayená ora, ntšamo tmojáninýama chora imojtsecuëntaye. <sup>18</sup> Chiyeca, ba entšanga tmojánbocana Jesús jajëbenguama, chë bëts soye Bëngbe Bëtsabe obenánaca cha tojanmama tmojanuénayeca. <sup>19</sup> Pero chë fariseunga imojtsenatsëtsnaye: “Tšëngaftanga šmontsonýá bënga tondaye jamama quemuatobenama y más, inýetscanga cha montsëstona ca!”

*Básefta Grecia luaroca entšanga Jesús tmojánguango*

<sup>20</sup> Bashco fiestama, chë Bëngbe Bëtsá jadórama Jerusalenoye tmojánangbeñe, básefta griego entšángnaca imojtsemna. <sup>21</sup> Chëngna, Felipe chë Galilea luarocá, chë Betsaida pueblócábíoye, tmojanobeconá y tmojanimpadá: “Señor, bënga fsëntseboše Jesús jinýama ca.”

<sup>22</sup> Chora Felipe tojána Andrés jauyanama, y chë útatna Jesúsbiyoye tbojána, chë grieguëngbiama jauenayama. <sup>23</sup> Jesús chata tojanéyana: “Chë Bëngbe Bëtsá Entšá



tbojanbemá corente bêtsá yomnama jin̄jan̄iyama te ya tocbuache. <sup>24</sup> Ndegombre ſcuayana: Can̄ye trigo jénaye ndoñe fshantsiñe tmonjuatbontsá y ndoñe tonjóbaneſe, n̄ye cach can̄ye trigo jénaye jesom̄ñana. Pero tmojuatbontsá y tojóbanase, bêtsá jashájonana. <sup>25</sup> Cachcá, nda n̄ye cachá tojtsenóbobonshana, cha chabe vida echanjétsobuetſe. Pero nda n̄ye cachá ndoñe tontsenóbobonshana y ntſamo atſe stsemandacá, quem luariñe vida tojtsobom̄ñentscuana cha tojtsam̄eſe, ch̄e n̄yetſca tescama yomna tſabe vida echántsebomna. <sup>26</sup> Nda ntſamo stsemandacá jamama tojtseboſe, atſe chaſotséſtona. Chca, ndayentſe atſe chaitsemna, chánaca, ch̄e atſe oservená, chentſe chaotsemna. Atſe ſojtseservénabiamá, atſbe Taitá Bēngbe Bêtsá echanjin̄jan̄iyē bêtsá yomnama ca” —Jesús tojánayana.

*Jesús tojánayana cha yochjanóbanama*

<sup>27</sup> Y más Jesús tojánayana: “¡Mora tſa cochtsetſenaná ſéntsemna! ¿Atſe chjayana: ‘Taita, ch̄e átſetſaca echanjópáſa ſoyēga ſmotsebojuaná ca?’ Ndoñe; er más chama atſe quem luaroye tijabo. <sup>28</sup> Taita, ſmin̄yan̄yē aca puerte bêtsá y obená comnama ca.”

Y cachora, celocana can̄ye oyeuambnayana tojanóbocna mēntſá: “Ya tcbonjin̄jan̄yē atſe puerte bêtsá y obená tsmēnama, y mora cachiñe cachcá chanjama ca.”

<sup>29</sup> Entſanga chca tmojanuena ora, in̄yēga imojtsichamo n̄ye tojanjuésase ca; pero in̄yēgna imojtsichamo: —Can̄ye ángel chábioye tbonjuatsétsá ca.

<sup>30</sup> Chora Jesús tojánayana: —Ntſamo ſmonjouencá, atſbiama ndoñe quenátſmēna, ſinó tſēngangbiama. <sup>31</sup> Mora ch̄e tempo entsemna, ch̄e quem luare entſanga tmojéſtsema bacna ſoyēga jin̄jan̄iyama y chēngbe caſtiguama jayanama. Y mora, ch̄e n̄yetſca bacna ſoyēga mandayá, quem luarentſana mochántábocna. <sup>32</sup> Pero atſe fshantsocana atſbananá chaitsemna ora, n̄yetſca entſanga átſbioye chanjúbua ca —Jesús tojánayana.

<sup>33</sup> Chca cha yojtsichamo, ana jin̄jan̄iyama ntſamo jóbanama ibojamnama. <sup>34</sup> Chora ch̄e entſanga tmojanjuá: —Bēngbe Bêtsabe uabemana palabrénguñe endayana, y chíyeca bēnga ſſēndētātſēmo ch̄e Cristo n̄yetſca tescama vida yochtsebomna ca. As, ¿ndáyeca cojtsichamo, Bēngbe Bêtsá Entſá tbojanbemá chamuatsbanama yojtsemna ca? ¿Nda yojtsemna Bēngbe Bêtsá Entſá tbojanbemá ca? —chēga imojtsichamo.

<sup>35</sup> Y Jesús tojánayana: —N̄ye baseſtateſcama ch̄e entſangbe juabnēga bin̄ynayá tſēngangbeñe entsemna. Ch̄e bin̄ynayá cabá tſēngangbeñe yojtsemnēntſcuana, cháftaca ſmochtsajna. Chca, mo ibetiñcá ndoñe queſmochátajna. Nda ndoñe bin̄yniñe tojtsana, cha ndoñe ntſetātſēmbuana ndēmujajana yojtsana. <sup>36</sup> Ch̄e bin̄ynayá cabá tſēngangbeñe endētsemnēntſcuana, chábēne ſmochtsobuáchiye; as, tſēngangbeñe juabnēga bin̄yniñe echántsemna ca —Jesús tojánayana.

Ch̄e ſoyēga tojánayanentſana, Jesús tojtsanoñe y entſangbiama yojetsóitana.

*Ndáyeca ch̄e judiēga Jesúsbeñe ndoñe montſanoſbuaché*

<sup>37</sup> Masque Jesús, judiēgbe delante ba bēts ſoyēga Bēngbe Bêtsabe obenánaca tojéſtsema, chēnga ndoñe chábēne ntſoſbuáchiyana, <sup>38</sup> ntſamo Bēngbe Bêtsabe juabna oyeuambnayá Iſaías tojanabemcá, cachcá chaotsemnama. Iſaías mēntſá tojánayana: Bēngbe Utabná, ¿nda bēngbe buayenana ſoyiñe yojtsoſbuaché?

Y ¿nda tbojosertá, acbe obenana tcojin̄jin̄yē ora ca?

<sup>39</sup> Chíyeca chēnga ndoñe montsobena Jesúsbeñe jtsōſbuáchiyama, er Iſaías mēntſánaca tojéſtsanabema:

<sup>40</sup> Bēngbe Bêtsá tojama chēnga chabe ſoyēgama ndoñe botamana chamondētsejuabnama y chabe ſoyēga ainaniñe ndoñe chamondóyēngacñama, as ndoñe chaondētſesertánama ca.

Y Bēngbe Bêtsá entſichamo: “Chca entsemna, chēnga atſbe benache ndoñe chamondishachama,

y atſe ndoñe ntjātsebacama;

y chca, chēnga mochántsemna mo ndēshnana entſangcá ca.”

<sup>41</sup> Iſaías chca tojánayana, er tojin̄yē Jesús puerte bêtsá y obená yojamnama, y chca ch̄e uabemaniñe Jesusbiamá yojanoyebuambná.

<sup>42</sup> Pero masque chca iuábemanēſe, ba judiēga imojtsanoſbuaché, y banga judiēgbe amēndayēngnaca Jesúsbeñe imojtsanoſbuaché. Pero chēnga, Jesúsbeñe imojtsoſbuáchema entſangbeñe ndoñe montſichamo. Chca imojánama ch̄e fariseungbiama auatja causa, ch̄e judiēgbe enefjuana yebnēnguentſana ndoñe chamondētēbuacnama. <sup>43</sup> Chēngbiama más yojanámama, entſanga chēngbiama chamotsichamo tſa uámanēga imojamna ca, y ndoñe, Bēngbe Bêtsá chca chaotsamama.

*Jesúsbe palabréngaca yochtsótātſēmo entſanga tſabá o ndoñe tſabá tmonjamama*

<sup>44</sup> Chora Jesús mēntſá jabuache tojánayana: “Nda átſbeñe tojtsōſbuaché, ndoñe n̄ye átſbeñe ntſoſbuáchiyana; ch̄e nda ſojichmó chábēñnaca cha jtsōſbuáchiyana. <sup>45</sup> Cachca, nda

atše šojtsónyá, chë šojichmó chábioynaca cha jtsonýayana. <sup>46</sup> Atše quem luaroye tijabo entsangbe juabnënga jabobínýnaca, chca, nda átšbeñe tojtsosbuaché, mo ibetiñcá ndoñe chaondëtsemnana. <sup>47</sup> Pero nda atšbe soyëngama tojouena, pero ntšamo sentsichamcá ndoñe tontsama, atše chabiamana ndocá quichátayana tsábá o ndoñe tsábá tonjama ca. Atše ndoñe chiyátabo, ntšamo quem luarentša entsangba tmojamama tsábá o ndoñe tsábá yontsemna ca jatichámuama; quem luaroye sënjabo ndayá chënga jabátsebacama. <sup>48</sup> Nda atše šojtsaboté y atšbe palabrengama ndoñe šonjoyeuná, ya entsebmoma nda chabiamana yochjayana bëtš castigo jtsebmomana ibojtsemna ca. Atše tijanoyebuambá palabrengaca, quem luare jopochócama te chabiamana chca echántsayana. <sup>49</sup> Er atše ndoñe nýe atšbe juábnaca quetsatoyebuambná. Chë Taitá, chë šojichmó cha, šonjamandá ntšamo jayanana y ndayá jabuátambana. <sup>50</sup> Atše sëndétatšëmbo, atšbe Taitá tojamandá orna, cha jamándana entsangba chë nyetsca tescama yomna tsabe vida chamotsebmomana. Chíyeca, ndayá sentsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

## 13

*Jesús chabe uatsjëndayënga tojanashecjabebé*

<sup>1</sup> Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jëftsebmomana y chabe Taitábioye jtama. Ntšamo Jesús chábinga yojan-ababuanýeshancá, chë quem luare imojamnënga, chórnaca yojtseboše chë bëtš bonshánana puerta más jinýanýiyana.

<sup>2</sup> Pero Satanás, Júdasbe ainaniñe bacna juabnënga tojanajá, uayayëngbe cucuatšíne Jesús jayentšbáshejuanama. Judas Iscariote, Simonbe uaquíñá. <sup>3</sup> Jesús yojtsetátšëmbo chabe Taitá Bëngbe Bëtsá nyets obenana tbojánatsetama. Cachcá, Jesús yojtsetátšëmbo, Bëngbe Bëtsábocana cha tojánabama y cachábioye jtama ibojtsemnana. <sup>4</sup> Chcasna, chë ibeta jasama tmojanpochocá ora, mesëshentšana tojantsbaná, chabe juatsboye uichëtjoniya tojanenátsejca y canýe tuallëjua tojanenasná. <sup>5</sup> Chentšana, canýe bachešíne búyeshe tojanbuešcja y tojanontsé chabe uatsjëndayënga jushecjabebiyana y jtšhechojuana cha yojtsasnana tuallëjua.

<sup>6</sup> Pero, Simón Pedro tbojanobuache ora, Jesúsbioye tbojanianana: —Atšbe Utabná, ¿aca šcochjuashecjabíá ca?

<sup>7</sup> Chora Jesús tbojanjuá: —Atše sentsama soye mora ndoñe quecmátësertana; pero más chcoye aífne cmochanjósérta ca.

<sup>8</sup> As Pedro tbojanianana: —¡Ndocna te šcatjuashecjabíá ca!

Pero Jesús tbojanianana: —Ndoñe chacbonjuashecjabese, atšbia ndoñe quecochátsmëna ca.

<sup>9</sup> Y Simón Pedro tbojanianana: —¡Atšbe Utabná, as nýe atšbe shecuatšënga ndoñe, ndayá atšbe cucuatšënga y bestšásnaca ca!

<sup>10</sup> Pero Jesús tbojanjuá: —Nda bebená tojtsemna, nýe shecuatše jtsashecjabiamana jtsa-jabótana, ndoñe nyetšá cachiñe. Nda tojtsobebé, ndoñe tsengá ntsemnana. Cachcá, mo bebëngënga cuenta tsëngaftanga šmontsemna; pero canýa muentše entsemna, y cha mo bebenacá ndoñe quenátsmëna.

<sup>11</sup> Jesús yojtsetátšëmbo nda chë uayayëngbe cucuatšíne boshjuaná yochtsanmënama, chíyeca tojánayana: “Tsëngaftanguentsá canýa entsemna, cha mo bebenacá ndoñe quenátsmëna ca”.

<sup>12</sup> Jushecjabebiyana tojanpochocá ora, chabe juatsboye uichëtjoniya tojtánichëtjo, y mesëshentše tojtánótbema. Chora tojanéyana: —¿Chë tchbonjábiamana soyama quecmojtsésertana ca? <sup>13</sup> Tsëngaftanga atše šmondabauyana Buatëmbayá y Bëngbe Utabná ca; tsábá chca šmontsichamo, er atše ndegombre chca sëndmëna. <sup>14</sup> Atše, tsëngaftangbe Buatëmbayá y Utabná, tchbonjushecjabebé; chcasna, tsëngaftangnaca cmontsamna jenáshecjabebiyana. <sup>15</sup> Ntšamo quem sóyeca tchbonjanýanýecá, tsëngaftanga cachcá šmochtsama. <sup>16</sup> Ndegombre šcuayana, chë oservená chabe nduiñbiamana ndoñe más uamaná ntsemnana. Cachcá, chë ichmoná chë tbojichmobiamana ndoñe más uamaná quenátsmëna. <sup>17</sup> Quem soyënga chašmojuatsjinýe y chca chašmojamëse, tsëngaftanga puerta oyejuayënga vida šmochanjëftsebmoma.

<sup>18</sup> “Atše sëndétatšëmbo chë tijábacacangbiamana, chíyeca atše nyetscangbiamana ndoñe chca quetsatoyebuambná. Y ntšamo Bëngbe Bëtsabe uabemana palabrenguífne endayanacá cachcá chaotsemnana, chë ‘canýa átšeftaca tandëse tonjasá, atšbe contra echántsemna ca’, cachcá echanjopáca. <sup>19</sup> Mora, cabá ndoñe chca tonjopasá ora, lempe chë soyënga sentsichamo. As, chca chaojopasá ora, átšbeñe šmochantsošbuáchiye, y as šmochántsetatšëmbo atše tsmëna chë nda sëndmëna. <sup>20</sup> Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

*Jesús tojánayana uayayëngbe cucuatšíñe Judas bochjáboshjonama  
(Mt 26.20-25; Mc 14.17-21; Lc 22.21-23)*

<sup>21</sup> Chë soyënga tojánayanentsana, Jesús corente cochtsetšenaná yojtsemna, y tojánayana: — Ndegombre šcuayana, canya tsëngaftanguentšá uayayëngbe cucuatšíñe šochanjáboshjona ca.

<sup>22</sup> Chora, chabe uatsjëndayënga tmojanontsé enonjinyayana, y ndoñe montsetátšëmbo ndabiamia Jesús chca tojánayanama. <sup>23</sup> Canye uatsjëndayá, chë Jesús puerte ibnabobonshana, Jesusbe juachaca inatbemana. <sup>24</sup> As, Simón Pedro chábiye tojánëfjatšëmbo, ndabiamia Jesús chca tojánayanama Jesúsbiye chabotjama. <sup>25</sup> Chë puerte bonshana uatsjëndayá, Jesúsbiye batsatema más tojanosjoná y tbojantjá: —Bëngbe Utabná, ¿nda cha yojtsemna ca?

<sup>26</sup> Chora Jesús tbojanjá: —Atše canye base tandëtema chanjafchécuaquaye y ndábiye chajoyé, cha entsemna ca.

As Jesús canye base tandëtema tojanfchecuacua, y Judas, Simón Iscariotbe uaqiñábíoye, tbojanoyé. <sup>27</sup> Tandëse tojanóyëngacñe y cach ora, Satanás Júdasbe ainaniñe bacna juabnënga tojánocohëngo. As Jesús tbojaníyana: “Chë cochanjama soye, cam ora moma ca.”

<sup>28</sup> Pero ni canya chë jasama imojtsetbiamanënguentsá tbojanësertá, ndayama Júdasbiye chca tbojaníyanama. <sup>29</sup> Judas inamna chëngbe crocénana shecnëšíñe uambayá; chíyeca inyënga tmojanjuabó Jesús chca ibojtsatsaye, ana ndayá yojtseita soye chë fiestama chauabuamiyama, o ndbomnjëmënga ndayánaca chauatšatama ca.

<sup>30</sup> Júdasna chë base tandëtema tojanóyëngacñe, y cachora chentšana tojéftsanbocna. Chora ya ibeta yojtsemna.

### *Chë tsëm mando*

<sup>31</sup> Judas tojéftsanbocnentsana, Jesús tojánayana: —Ora tocijobuache, Bëngbe Bëtsá Entšá tbojanbemá corente bëtsá y obená yomnama jinyanjyíyama; y mua echanjinyanjyíyë Bëngbe Bëtsá corente bëtsá y obená yomnama. <sup>32</sup> Cha echanjinyanjyíyë Bëngbe Bëtsá chca yomnama, chíyeca Bëngbe Bëtsánaca echanjinyanjyíyë corente bëtsá y obená yomnama, y mora entsemna chë ndaye ora Bëngbe Bëtsá chca chabiamia yochjinyanjyíyë.

<sup>33</sup> Atšbe básënga, baseftatescama tsëngaftangaftaca sëntsemna. Chora šmochántsenguaye, pero ntšamo judiënga sënjauyancá, mora cachá tsëngaftanga chëyana: Chë chanjá luaroye, tsëngaftanga ndoñe quešmátobena jama ca. <sup>34</sup> Canye tsëm soye cbetsamëndá: Nyetscanga šmochtsenbobonshana. Ntšamo atše tsëngaftanga cbondábabuanjeshana, cachá tsëngaftanga šmochtsenbobonshana. <sup>35</sup> Tsëngaftanga šmojttsenbobonshánëse, nyetsca entsänga mochántsetatšëmbo, tsëngaftanga atšbe uatsjëndayënga šmomnama ca —Jesús tojanëyana.

*Jesús tojánayana, chábiye ndoñe bonjanabuátma ca Pedro yochjánayanama  
(Mt 26.31-35; Mc 14.27-31; Lc 22.31-34)*

<sup>36</sup> Chora Simón Pedro tbojantjá: —Bëngbe Utabná, ¿ndëmoye cochjá ca?

As Jesús tbojanjá: —Atše sentsá luaroye, mora aca ndoñe quecátobena atše juastana, pero más chcoye añe šcochanjuasto ca.

<sup>37</sup> As Pedro tbojaníyana: —Atšbe Utabná, ¿ndáyeca ndoñe sentsobena mora aca juastama? ¡Atše sëntseprontana acbiamia jóbanama ca!

<sup>38</sup> Chora Jesús tbojaníyana: —¿Ndegombre cojtseprontana atšbiamia jóbanama? Ndegombre chëyana, cabá ngallo ndëcánta ora, aca unga soye atšbiamia cochanjayana: “Cha ndoñe quetsatabuatma ca”.

## 14

*Jesús beyeca entsänga jobenayana Bëngbe Bëtsábiye jama*

<sup>1</sup> Mëntsánaca Jesús tojánayana: —Ndoñe ainana tsetšanënga matsmëna. Tsëngaftanga Bëngbe Bëtsábeñe šmondosbuache; átšbeñnaca šmochtsosbuachiye. <sup>2</sup> Atšbe Taitá Bëngbe Bëtsá endmënoca, ba luarënga joyënanama endmëna. Ndoñe chca tontsemnëse, atše chca matchënjáuyana. Morna, cha endmënoye atše chanjá tsëngaftangbiamia canye luare joyënanama jabuáprontama. <sup>3</sup> Atše chajá y chë luare chacbojabuaprontá ora, cachiñe moye chanjësabo, tsëngaftanga átšeftaca junatsama. As, atše chaitsemnoye, tsëngaftangnaca chašmotsá joyënanama. <sup>4</sup> Atše chanjá choye ntšamo jama y jashjanguama ya šmontsetátšëmbo ca —Jesús tojánayana.

<sup>5</sup> Chora Tomás Jesúsbiye tbojaníyana: —Bëngbe Utabná, ndëmoye cochjama ndoñe queftsátstatšëmbo. As, ¿ntšamo bënga fchtsetátšëmbo ntšamo choye jama ca?

<sup>6</sup> Chca tbojaníyana ora, Jesús tbojanjá: —Atše sëndmëna benachá; chëjana tocijsase, pronto jashjanguana. Atše sëndmëna ntšamo ndegombre yomncá sempre oyeuambnayá, y entsänga chë nyetsca tescama yomna tsabe vida chamotsebmomnama endamá. Nye átšbeyeca endopodena ndayëjana jama, y atšbe Taitá Bëngbe Bëtsábioca jashjanguama.

<sup>7</sup> Tsëngaftanga atše šmojtsábuatmëse, atšbe Taitánaca šmattsábuatma. Morscana ya cha šmontsábuatma y cha šmontsonýa ca —tbojaniana.

<sup>8</sup> Pero Felipe tbojaniana: —Atšbe Utabná, nýe chë Taitá šmanýanyë, ndayama más ca.

<sup>9</sup> Chora Jesús tbojaniana: —Chëfta te tsëngaftangafata sëntsemna, y ¿cabá ndoñe atše šcontsábuatma, Felipe? Nda atše šojinýe, chë Taitá Bëngbe Bëtsábiyana jinyana. As, ¿ntšamo atše šcojtsatsá, chë Taitá šmanýanyë ca? <sup>10</sup> ¿Ndoñe condošbuachë, atšbe Taitá átsbeñe y átsnaca chábeñe nýe canýacá tsmënama? Chë cbontsëtsësná soyënga, ndoñe nýe atšbe juábnaca chca quetsatoyebuambná. Atšbe Taitá, chë átsbeñe vida endbomná jtsamana lempe ntšamo stsamcá. <sup>11</sup> Muñe šmochtsošbuáchiye: Atšbe Taitá átsbeñe endmëna, y átsnaca chábeñe mo nýe canýacá sëndmëna. Chama ndoñe šmontsošbuachese, as nýe chë tijama soyëngámna átsbeñe šmochtsošbuáchiye. <sup>12</sup> Ndegombre šcuayana, nda átsbeñe tojtsosbuachë, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átsbeñe ošbuachiyá, chama más bëts soyënga echanjama. <sup>13</sup> Tsëngaftanga ndaye sóynaca Bëngbe Bëtsábiye šmojtjañe, y chca šmojama atše jótšëmbonëse, átsbeñe šmošbuachéyeca, lempe šmochanjóyëngacñe; chca, chë Uaquiñá echanjinyanyíye chë Taitá corente bëtsá y obená yomnama. <sup>14</sup> Tsëngaftanga ndaye sóynaca atše šmojtjañe, y chca šmojama atše jótšëmbonëse, átsbeñe šmošbuachéyeca, atše chë soyë chanjama ca —Jesús tojánayana.

*Jesús tojanašebuachená chë Uámana Espiritu jíchmuama*

<sup>15</sup> Mëntsána Jesús tojánayana: “Tsëngaftanga atše šmojtsebobonshánëse, ntšamo cbontsamëndacá cachcá šmochanjama. <sup>16</sup> Chca chašmojamëse, atšbe Taitá Bëngbe Bëtsá tsëngaftangbiamá chanjaimpáda, tsëngaftanga jabújabuachama y jabáñemuayama inýa cha chabuichmoma, chë Uajabuachaná nyetsca tescama tsëngaftangafata chauétsëmnama. <sup>17</sup> Cha, chë Uámana Espiritu endmëna chë nyetsca soyënguiñe ntšamo ndegombre yomncá oyeubambnayá. Chë nýe quem luarama enójuabnaye entšanga, chë átsbeñe ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana. Pero tsëngaftanga aíñe cha šmontsábuatma. Cha tsëngaftangafata entsemna, y tsëngaftangbe ainaniñe sempre echanjëtsiyena.

<sup>18</sup> “Atše ndoñe quechócháisabashëjuana, mo uajchonga cuenta chašmotsemnama. Tsëngaftangbiye chanjésabo. <sup>19</sup> Muentšana baseftaytese, chë nýe quem luarama enójuabnaye entšanga ndoñe más quešmochátonýaye; pero tsëngaftangna aíñe, atše cachíñe šmochántinýe. Atše ainá chántsemna, chíyeca tsëngaftanga átsëftaca tsábe vida šmochántsebobomna. <sup>20</sup> Chë Uámana Espiritu tsëngaftangbe ainaniñe chašmojtjóyëngacñe ora, tsëngaftanga šmochántsetatsëmbo, atše atšbe Taitábeñe nýe canýacá tsmënama; cachcá, tsëngaftanga šmochántsetatsëmbo, tsëngaftanga átsëftaca cachcá nýe canýacá šmomnama y átsnaca tsëngaftangafata. <sup>21</sup> Nda totátšëmbo ntšamo atše tijamandacá y sempre chca tojtsama, cha ndegombre šojtsebobonshana. Nda átsbiye šojtsebobonshana, chábiye atšbe Taitánaca bochántsebobonshana. Atšnaca cha chántsebobonshana, y nda atše tsmënama cha chanjinyanyíye ca” —Jesús tojánayana.

<sup>22</sup> Chora, inýe Judas, ndoñe Judas chë Iscariote, Jesúsbiye tbojaniana: —Bëngbe Utabná, ¿ntšamo chca yojtsemna, nýe bënga šcochjinyanyíye ntšamo cach aca comnama, y nyetsca quem luarentšëngbiye ndoñe ca?

<sup>23</sup> Chora Jesús tbojanjá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábiye bochántsebobonshana, y bëndata chábiye fchanjabo y chábeñe vida fchantsebobomna. <sup>24</sup> Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nýe atšbe juábnaca quenátsmëna, sinó chë Taitá, chë šonjichmó chabe juábnaca.

<sup>25</sup> “Atše cabá tsëngaftangafata sëntsemnëntsëcuana, lempe quem soyëngama sëntsoyebuambná. <sup>26</sup> Chë Uajabuachaná, chë Uámana Espiritu, atšbe impadanánaca atšbe Taitá bochanjíchmuama. Cha lempe cmochántsabuatambaye, y echanjama nyetsca chë tcbonjáuyana soyëngama chašmuatenójuaboma.

<sup>27</sup> “Chë atšbe ainaniñe puerte tsábe ebionana tsëngaftangbiamá šcuétsëboshjona, cbet-satsatá. Chë nýe quem luarama enójuabnaye entšanga cmondbëtsatsatnayë soyëngcá ndoñe quenátsmëna, chë atše cbontsatsatná ainaniñe puerte tsábe ebionana. Ainana tsetšanënga ndoñe matsmënana, ni matauatjëngana. <sup>28</sup> Ya šmonjouena ntšamo tcbonjáuyancá: ‘chanjá y tsëngaftangbiye chanjésabo’. Tsëngaftanga atše šmojtsebobonshánëse, šmattsóyejuaye atše chë Taitábiye jama šojtsemnama, er chë Taitá átsbiamá más bëtsá endmëna. <sup>29</sup> Quem soyënga tcbonjáuyana, cabá ndoñe chca tonjopasá ora; as, chca chaojopasá ora, chíñe jenójuaboyëse átsbeñe chašmotsošbuáchema.

<sup>30</sup> “Chë quem luarentša bacna soyënga mandayá endabó; chíyeca atše ya ndoñe bëtscá tsëngaftangafata quichaisóyëuambaye. Pero cha tondaye quenátobena atše jabórlana.

<sup>31</sup> Masque cha chca endmëna, chca entsemna, atše chë Taitábioye tsbobonshánama quem luarentsa entsanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbanaga. Muentšana cuajna ca” —Jesús tojanëyana.

## 15

*Jesús yomna mo chë tsabe uvas betiyá*

<sup>1</sup> Mëntšanaca Jesús tojanayana: “Atše sëndmëna mo chë tsabe uvas betiyá, y atšbe Taitá Bëngbe Bëtsá chë tsabe uvas betiye inýenacá. <sup>2</sup> Chë inýená, chë uvas betiyentša buacuafjënga ndëshajuanëfjënga jtsebuacuetëtsetsana; pero chë uvas betiyentša buacuafjënga shajuanëfjënga jtsobolimpiana, bëtscá chaotseshájuanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga. <sup>3</sup> Tsëngaftanga šmonjouena ntšamo tijayancá; bëtscá chca šmontsama. Chiyeca mora tsëngaftanga šmontsemna mo chë limpiana y shajuana buacuafjëngcá. <sup>4</sup> Atšeftaca cányiñe mo canýacá šmochtsemna y atše tsëngaftangaftácnaca. Chë buacuafja uvas betiyentsana juanánëfja ndoñe ntsohenana nýe cachabe ponto jashájonana. Cachcá, tsëngaftanga átšeftaca ndoñe cányiñe mo canýacá šmontsemnëse, ndoñe šmattsobena Bëngbe Bëtsabiama bëtscá soyënga jamama.

<sup>5</sup> “Atše chë tsabe uvas betiyá sëndmëna y tsëngaftanga chë buacuafjëngcá. Nda átšeftaca cányiñe mo canýacá tojtsemna y atše cháftacnaca, cha Bëngbe Bëtsabiama bëtscá soyënga echanjama, mo canýe buacuafja becá tojtsheshajuancá. Er, tsëngaftanga atšbe uajabuáchenana ndoñe šmontsebošnëse, átšeftaca cányiñe mo canýacá ndoñe šmontsemna causa, tondaye šmattsobena jamama. <sup>6</sup> Canýa átšeftaca cányiñe mo canýacá ndoñe tontsemnëse, cha jtsemnana mo canýe buacuetëtšena buacuafja, utšenëfja y buashánëfjá. Chca buacuafjënga, entsanga jtsatbanana, íñeshoye jtsëtšenana y chentše jtsejuinýiyana. Cachcá, nda ndoñe átšeftaca cányiñe mo canýacá tontsemna, ndoservená jtsemnana y luaroca cha mochantsesegóra.

<sup>7</sup> “Tsëngaftanga átšeftaca cányiñe mo canýacá šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe. <sup>8</sup> Chë shajuana buacuafjëngcá tsëngaftanga chašmojtsemna ora, šmochanjínýanyíye atšbe Taitá corente bëtscá y obená yomnama. Y chca, tsëngaftanga atšbe ndegombre uat-sjëndayënga šmochántsemna. <sup>9</sup> Ntšamo chë Taitá šondbobonshancá, átsnaca cachcá tsëngaftanga cbondábuanýeshana. Chiyeca, šmochtsiyena atšbe bonshánama jtsejuabnayëse. <sup>10</sup> Atše sëndama ntšamo atšbe Taitá šondëmandacá. Chiyeca atše sëndoyena chabe bonshánama jtsejuabnayëse. Cachcá tsëngaftángnaca, ntšamo atše cbontsamëndacá šmojtsamëse, atšbe bonshánama jtsejuabnayëse šmochantsiyena.

<sup>11</sup> “Atše chca cbontsëtšetsná, chë atše sëntsebošmna oyejuayana tsëngaftángnaca chašmotsebošnana, y tsëngaftanga puerte chašmotsóyejuama. <sup>12</sup> Mëntšá cbetsamëndá: Ntšamo atše cbondábuanýeshancá, cachcá šmochtsenbobonshana. <sup>13</sup> Chë chabe amiguëngbiana tojóbanabiana, ndocna quenátobena chabiana más bonshánana jtsebošnana. <sup>14</sup> Ntšamo atše tijamandacá tsëngaftanga šmojtsamëse, atšbe amiguënga šmochántsemna. <sup>15</sup> Chë oservená ndoñe ntsetatšëmbuana ndayá chabe nduíño tojtsamama. Chiyeca atše tsëngaftanga oservénënga ca ndoñe quechatëtšetsná. Morscana mëntšá cbontsëtšetsná: ‘Tsëngaftangna atšbe amiguënga šmontsemna ca’, er lempe ntšamo atšbe Taitábentsana tijuatsjinýcá, tsëngaftanga tcbonjinýanyé. <sup>16</sup> Tsëngaftanga ndoñe atše chešmatábuayana, pero atše aífne tsëngaftanga tcbonjabacacá y tcbonjubuáayana, Bëngbe Bëtsabe trabajo jamama; y chca, mo canýe betiye sempre tojtseshajuana y chë shajuana ndocna te tontsopochocacá, tsëngaftanga chašmotsemnana. Chca, lempe ntšamo atšbe Taitá šmojotjañcá, y chca šmojama atše jótsëmbonëse, átšbeñe šmošbuachéyeca, cha lempe cmochanjátataye. <sup>17</sup> Mëntšá atše cbetsamëndá: Smochtsenbobonshana ca” —Jesús tojanëyana.

*Jesús y chabe entsanga, chë nýe quem luarama enójuabnayëngbiana uaboyënjanënga*

<sup>18</sup> Mëntšanaca Jesús tojanayana: “Pero chë nýe quem luarama enójuabnayë entsanga tcmojtsëbuayënjese, šmochjenójuaboye, natsana chënga atše šmonjanáboyënjama. <sup>19</sup> Tsëngaftanga, chë nýe quem luarama enójuabnayë entsanguentšana šmojtsemnëse, chënga cmattsababuánýeshana cachëngbengbioyá. Pero tsëngaftanga ndoñe chë nýe quem luarama enójuabnayë entsanguentšana quešmátsmëna, y atšna, chë quem luare oyenënguentsana tsëngaftanga tcbonjabacacá. Chiyeca chë nýe quem luarama enójuabnayë entsanga tsëngaftanga cmontsëbuayënja. <sup>20</sup> Smochjenójuaboye ntšamo tcbonjáuyanama: ‘Chë oservená chabe nduíñbiana ndoñe más uamaná quenátsmëna ca’. Chënga monjánama atše chaisufrima; tsëngaftángnaca chašmotsesufriñama mochántsama. Entšanga ntšamo atše

tijayanentšana ntsachetśá tmojtsamcă, cachcă chęnga mochántsama ntśamo tśęngaftanga chaśmojtsęśtsná chentšana. <sup>21</sup> Chę chacmojtsębuayęnjęnga, chę ōojichmó cha ndońe quematábuatma. Chýyeca chęnga lempe chca cmochanjáborlaye, atśbe causa.

<sup>22</sup> “Atśe ndońe matijabo y chęnga ndońe matijáuyanęse, ndegombre ndońe bacna soye mattsebmoma. Pero mora, chęngbe bacna soyęngama chęnga ndońe quemátobena jayanana, ‘jChca fsęnjama ntsetatśęmbcă ca!’ <sup>23</sup> Nda atśe ōojtsáboyęnja, atśbe Taitábioynaca jtsáboyęnjaca. <sup>24</sup> Atśe chę bęts soyęnga Bęngbe Bętsabe obenánaca chęngbeńe ndońe matijamęse, ndegombre chęnga ndońe bacna soyęnga mattsebmoma. Pero mora, masque ntśamo sęnjamcă tmonjinýęse, chęnga atśe śmontśáboyęnja y atśbe Taitábioynaca. <sup>25</sup> Chca chęnga montsama, ntśamo chęngbe leyęnguińe enduabemancă cachcă chaopasama. Chińe męntśá endayana: ‘Nýe tondayama chęnga śmonjanáboyęnja ca.’

<sup>26</sup> “Atśe, atśbe Taitábentšana chę Uajabuachaná y ańemuayá tśęngaftangbioye chanjíchmu. Cha chę Uámana Espírítu endmęna, chę nyętsca soyęnguińe ntśamo ndegombre yomncă oyeuambnayá. Cha endmęna chę Taitábentšana ichmoná; y cha lempe atśbe tsabe soyęnga cmochantsęśtsnaye. <sup>27</sup> Chorscana, tśęngaftángnaca atśbiama tśabiama śmochantsęśtsnaye, er tśęngaftanga átśeftaca śmondętsemna, entśanga jábuayenama atśe sęnjanbojatśę orscana ca” —Jesús tojanayana.

## 16

<sup>1</sup> Męntśánaca Jesús tojanayana: “Atśe quem soyęnga cbontśęśtsná, tśęngaftanga átśbeńe ośbuáchiyana ndońe chaśmondájbanama, atśbe causa chaśmojtsesufrina ora. <sup>2</sup> Chęngna, chę judięngbe enefuana yebńęguentšana cmochantębuacana. Chca tempo chaojobuache ora, chę tśęngaftanga chacmojtsębáyęnga męntśa mochántsejuabnaye: ‘Bęnga tsábá tmonjama ca. Ntśamo Bęngbe Bętsá yojtseboścă, cachcă bęnga tmonjama ca.’ <sup>3</sup> Chęnga, chę Taitá Bęngbe Bętsá ndońe quematábuatma, y átśbioye cach ndońe. Chýyeca, chca cmochanjáborlaye. <sup>4</sup> Atśe chca tśęngaftanga cbontśęśtsná, ntśamo tcbonjáuyanama chaśmuenójuaboma, chca tempo chaojobuache ora ca” —Jesús tojanayana.

### *Ndayá chę Uámana Espírítu inętšana*

Męntśánaca tojanayana: “Entśanga jábuayenama sęnjanbojatśę orscana, chę echanjopása soyęngama ndońe quecbęńjanatśęśtsná, er atśe tśęngaftangaftaca sęńętsemna. <sup>5</sup> Pero morna, chę ōojichmó cha yomnoye chantá; y tśęngaftanguentśá ndocná ōochanjatjaye, ‘ńdęmoye cojtsă ca?’ <sup>6</sup> Mora, tśęngaftangbe ainana ngmęnaca entsemna, atśe chca tcbonjáuyana causa. <sup>7</sup> Pero ndegombre ōcuayana: Atśe chanjá y chca tśęngaftangbe tsábiamu echántsemna. Atśe ndońe quętsjase, chę Uajabuachaná y ańemuayá ndońe tśęngaftangbioye queochátabo. Pero ańe chanjá, y chora cha tśęngaftangbioye chanjíchmu. <sup>8</sup> Cha chaojášhango ora, echanjama quem luarentśa entśanga corente chamotsetátśęmbo ndayá ndegombre yomna bacna soyęnga jtsamana, ndayá ndegombre yomna chę Bęngbe Bętsabe bominýińe tsabia jtsemnana, y ndayá yomna chę Bęngbe Bętsá entśangbiamu jayanana tsábá o ndońe tsábá tmonjamama. <sup>9</sup> Entśanga átśbeńe ndońe quematośbuachę. Chýyeca chę Uajabuachaná echanjama chęnga corente chamotsetátśęmbo ndayá ndegombre yomna chę bacna soyęnga jtsamana. <sup>10</sup> Chę Taitábioye chanjá y atśe ndońe más queśmochátinýe. Chýyeca chę Uajabuachaná echanjama chęnga corente chamotsetátśęmbo ndayá ndegombre yomna Bęngbe Bętsabe bominýińe tsabia jtsemnana. <sup>11</sup> Quem luarentśa bacna soyęnga mándayabiamu Bęngbe Bętsá ya tonjayana, ntśamo cha tojamama ndońe tsábá yontsemna ca y nyętsca tescama castiganá chaotsemna ca. Chýyeca chę Uajabuachaná echanjama entśanga corente chamotsetátśęmbo, ndayá ndegombre yomna chę Bęngbe Bętsá entśangbiamu jayanana tsábá o ndońe tsábá tmonjamama.

<sup>12</sup> “Atśe cabá ba soyęnga sęntsebmoma tśęngaftanga jáuyanama. Masque chcasna, mora tśęngaftanga ndońe queśmátobena chę soyęngama jośertana. <sup>13</sup> Pero chę Uámana Espírítu, chę nyętsca soyęnguińe ntśamo ndegombre yomncă oyeuambnayá, chaojášhango ora, lempe ntśamo ndegombre yomncă cmochanjabuatambá. Cha ndońe nýe cachabe juábncă queochátoyeuambnaye. Ntśamo chę Taitá chábioye tbojauyancă, tśęngaftanga cachcă cmochanjáuyana, y cha cmochanjábuayenaye ntśamo yochjopásama. <sup>14</sup> Atśbe soyęngentšana cha echanjóyęngacńe, y cach soyęngama cmochanjabuatambá. Chcace cha cmochanjínýanyıye atśe bętsá y obená bętsemnama. <sup>15</sup> Lempe ntśamo chę Taitá endbomncă, atśbe soyęngnaca endmęna. Chýyeca atśe tcbonjáuyana, chę Uámana Espírítu atśbe soyęngentšana yochjóyęngacńe y cach soyęngama cmochjabuatambá ca.”

<sup>16</sup> “Baseftayté y atśe ndońe más queśmochátinýe. Inýe baseftayté y cachińe śmochantętinýe ca” —Jesús tojanęyana.

*“Tśęngaftangbe ngmęnana, oyejuayana echanjóbema”*

<sup>17</sup> Chora Jesusbe básefta uatsjéndayënga imojtsentjanaye: —¿Ntšamo yoijtsentšáyana, chë “baseftayté y atše ndoñe más quešmochátinýe, y inýe baseftayté y cachiñe atše šmochantétinýe, er atše chë Taitábioye chanjá ca”? <sup>18</sup> ¿Ntšamo yoijtsentšáyana, chë “baseftayté ca”? Ndoñe quemuátstatšëmbo ntšamo yoijtsentšáyanama ca —chënga imojtsichamo.

<sup>19</sup> Jesús yoijtsatšëtšëmbo chënga chca jatjayama imojtsebošama, y tojanéyana: —Atše tcbonjáuyana: “Baseftayté y atše ya ndoñe más quešmochátinýe, y inýe baseftayté y cachiñe atše šmochantétinýe ca.” ¿Chë soyëngama šmoijtsentjaná ntšamo stsentšáyanama? <sup>20</sup> Ndegombre šcuayana: Tšëngaftanga šmochanjenóbošachna y puerte ngmënënga šmochántsemna, pero chë nýe quem luarama enójuabnaye entsanga corente oyejuayënga mochántsemna. Masque tša ngmënënga šmochántsemna, chentšana tšëngaftangbe ngmënana, oyejuayana echanjóbema. <sup>21</sup> Canýe shembása tbojontšabuache šešona jónýnama ora, tša ngmënaca cha jésemnana, puerte tbojtssetsetse causa. Chë šešona ya tojonýna ora, cha ndoñe ntšenójuabnayana chë tša ibuántsetšama. Canýe šešona quem luaroýe cháushjanguama chë shembása tojámayeca, chora cha tsábá y oyejuayá jtsemnana. <sup>22</sup> Ndegombre, tšëngaftángnaca cachcá, chora tša ngmënaca šmochántsemna. Pero atše tšëngaftangbiye chajjésabo ora, atše šmochantétinýe y corente oyejuayënga šmochántsatsemna. Y ndocná queochatobenaye chë oyejuayana jabuajuánana.

<sup>23</sup> “Chë te chaojshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtotañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. <sup>24</sup> Mëntscoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóýëngacñe, y chca, bëtscá oyejuayana šmochántsebmoma ca” —Jesús tojanéyana.

*Jesucristo, quem luarentše mandayábioye yëñjanayá*

<sup>25</sup> Mëntšánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca quebochátëtsëtsnaye; chë cuentna, puerte botamana lempe atšbe Taitabiam chochanjáuyana. <sup>26</sup> Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotañe. Y atše cbëyana; chca, chë te ndoñe quešochatájaboto tšëngaftangbiam atšbe Taitá jatsimpadánana. <sup>27</sup> Atše ndoñe quichatsimpadana, er cach Taitá tšëngaftanga cmondábabuanýeshana. Tšëngaftanga atše šmondobonshánama, y Bëngbe Bëtsábocana atše tijabama šmojtsošbuáchema, chë Taitá cmondábabuanýeshana. <sup>28</sup> Atše chë Taitábocana sënjabocna y quem luaroýe sënjabo. Pero mora quem luare chanjëftsebohshona atšbe Taitábioye jtama ca” —Jesús tojánayana.

<sup>29</sup> Chora chabe uatsjéndayënga tmojanianayana: —Mora ya ndoñe cuentëngaca quecatoyebuambná, chíyeca lempe paselo josértama bëngbiam entsemna. <sup>30</sup> Mora fsëntsetatšëmbo aca nýetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatmana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábocana tcojabama ca —chënga tmojanianayana.

<sup>31</sup> As Jesús tojanéyana: —¿Mora chiñe šmojtsošbuaché ca? <sup>32</sup> Ya tempo tocjobuache y cam ora entsemna, tšëngaftanga nýetsquénache šmochanjuáshana y atše nýe canýa šmochanjésebohshona. Pero atše ndoñe nýe canýa quichátsmëna, chë Taitá átšeftaca entsëmnaýeca. <sup>33</sup> Atše lempe quem soyënga cbontsëtsëtsná, tšëngaftangbe ainaniñe tsabe ebionana chašmotsebmoma, átšeftaca canýiñe mo canýacá jtsemnëse. Quem luarentše šmochanjasufrina; pero añemo šmochtsebmoma, atše ya chë quem luarentše mandayá sënjayëñaná ca —Jesús tojánayana.

## 17

*Jesús chabe uatsjéndayëngbiam Bëngbe Bëtsábioye tbojanimpadá*

<sup>1</sup> Jesús chë soyënga tojánayanentsana, celoye tojanontjeshé y Bëngbe Bëtsábioye tbojanianayana: “Taita, atšbe te ya tocjobuache. Minýanýé, atše acbe Uaquiná, corente bëtscá y obená bëtsemnama. As, atše acbe Uaquiná, aca corente bëtscá y obená comnama chainýanýema.

<sup>2</sup> Mora aca nýets obenana šconjatšetá nýetsca entsángbeñe, nýetscanga chë atšbiam tcojábacacanga chë nýetsca tescama yomna tsabe vida chamotsebmoma atše chaimama.

<sup>3</sup> Chë nýetsca tescama yomna tsabe vida jtsebmomna endmëna aca, chë nýe canýe y ndegombre Bëngbe Bëtsá jtsabuatmana, y atše Jesucristo, acbe ichmoná.

<sup>4</sup> “Lempe ntšamo šconjamandacá atše sënjapochocá, y chca quem luariñe sënjama aca corente bëtscá y obená comnama jinýanýiyama. <sup>5</sup> Taita, quem luare cabá ndoñe quen-jatsmëna ora, aca tconjaninýanýé atše corente bëtscá y obená ácaftaca bëtsemnama. Mora moma atše cachcá ácaftaca chaitsemnama.

<sup>6</sup> “Aca quem luarentša entsanguentšana quem boyabásenga tconjabacacá y atšbiam šconjinýinýé. Atše chënga sënjanýanýé ntšamo ndegombre aca comnama. Chënga acbe

entsanga mondmëna; y acna, chë atšbiana chënga šconjinyñiyá. Chënga acbe palabra tmonjouena y tsabá tmonjoyeuná. <sup>7</sup> Chiyeca chënga mondëtatšëmbo, lempe ntšamo atše tsbomncá ácbentšana tijóyëngacñama. <sup>8</sup> Atše chënga sënjáuyana ntšamo aca šcojauyancá, y chënga montsošbuaché chë atše sënjauniñe. Chiyeca, chënga ndegombre mondëtatšëmbo atše acbiocana tijabama, y montsošbuaché aca chë atše šcojichmó cha comnama.

<sup>9</sup> “Atše chëngbiana cbontsempadana. Chë nýe quem luarama enójuabnaye entsangbiana ndoñe quecbátsimpadana, pero aíñe chë atšbiana šconjinyñiyëngbiana, er chënga acbe entsanga mondmëna. <sup>10</sup> Lempe ntšamo atše tsbomncá, acbiámnaca endmëna; y cachcá, lempe ntšamo cobomncá, atšbiámnaca endmëna. Acbengbe vidëngaca aca tcojinyñyë atše corente bëtsá y obená bëtsemnama.

<sup>11</sup> “Atše ndoñe quem luarentse quešocháisetotona, pero chënga aíñe cabá camuentse mochanjëftsemna. Atše chantá ácaftaca jtsatsmënama. Uámana Taitá, chë atšbiana šconjinyñiyënga acbe obenánaca cochtsañyena. Chca ntšamo bëndata mo canýacá bondmëna, chëngnaca cachcá chamotsemnama. <sup>12</sup> Atše chëngaftaca sëntsemnëntscuana, chënga sëntsanýena, aca šconjatšetá obenánaca. Atše chënga sëndánýena, y ni canýa queochátsmëna infernoca pochocaná, nýe chë infernoca pochocaná jtemnama ibomná chana aíñe, ntšamo acbe uabemana palabreñguíñe endayancá, cachcá chaotsemnama.

<sup>13</sup> “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtná, chca, chë atše sëntsebmoma puente bëtsá oyejuayana chëngnaca chamotsebmomnama. <sup>14</sup> Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nýe quem luarama enójuabnaye entsanguentsá, cachcá, chënga cach ndoñe quemátsmëna. Chiyeca, chë nýe quem luarama enójuabnaye entsanga chënga montsëbuayënja. <sup>15</sup> Atše ndoñe quecbátsimpadana, chënga quem luarentšana chacúbuacanama; pero aíñe, nýetsca bacna soyënguentsana chacuatsebacama. <sup>16</sup> Ntšamo atše ndoñe quetsátsmëna chë nýe quem luarama enójuabnaye entsanguentsá, cachcá, chënga cach ndoñe quemátsmëna. <sup>17</sup> Cochjama chënga acbe entsanga chamuëtsemnama, y chca, nýe acbiama vida chamotsebmoma. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna. <sup>18</sup> Ntšamo aca quem luaroye šconjanichmocá, cachcá átsnaca chënga sëntsachamná, quem luare entsanga jábuayenama. <sup>19</sup> Chëngbiana atše cachiñe mëntsá cbëyana: Atše nýe acbiama sëndmëna. Y chca, chëngnaca, ntšamo acbiama ndegombre yomncá jtsóyëbuambnayëse acbe entsanga chamotsemna, y chca, nýe acbiama vida chamuëtsebmoma, ntšamo ndegombre yomncá chënga imoyenama.

<sup>20</sup> “Pero nýe chëngbiana ndoñe quecbátsimpadana, sinó chë átsbeñe mochtsošbuáchiyëngbiannaca, chë atšbiana šconjinyñiyënga, chëngbioye atšbiana inýenga chamojtsabuayinyá ora; <sup>21</sup> as chënga nýetscanga canýiñe mo canýacá chamotsemnama. Ntšamo aca, Taita, átsëftaca canýiñe mo canýacá bondmëna y átsnaca ácaftaca, cachcá chëngnaca canýiñe mo canýacá bëndataftaca chamotsemnama cbontsempadana. Y chca, quem luarentša nýetsca entsanga, atše šcojichmoma chamotsošbuáchemá. <sup>22</sup> Ntšamo chë obenana y uámanana šconjatšetacá, cachcá átsnaca chënga sënjatšatá. As, ntšamo bëndata canýiñe mo canýacá bondmëna, chëngnaca cachcá canýiñe mo canýacá chamotsemnama. <sup>23</sup> Atše chëngbe ainaniñe sëntsemna, y aca átsëftaca canýiñe mo canýacá bondmëna; as, chëngnaca nýetsca soyënguíñe canýiñe mo canýacá chamotsemnama. Y chca, quem luarentša entsanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanýeshanama.

<sup>24</sup> “Taita, atšbiana chënga šconjinyñiyë. Atše mëntsá sëntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuiñe. Quem luare cabá ndoñe quenjatsmëna orscana, šconjábobonshana; chiyeca, cachora tconjaninyñyë atše corente bëtsá y obená bëtsemnama. <sup>25</sup> Taita, nýetsca soyënguíñe tsabá amá, masque chë nýe quem luarama enójuabnaye entsanga ndoñe quecmatábuatma, atše aíñe chondúabuatma, y quem boyabásenga montsetátšëmbo, aca comna chë šcojichmó cha. <sup>26</sup> Atše chënga sënjinýanyë ntšamo ndegombre aca comnama, y más chanjinyñanyë; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnama ca” —Jesús tojánayana.

## 18

*Uayayënga Jesús tmojánishache*

*(Mt 26.47-56; Mc 14.43-50; Lc 22.47-53)*

<sup>1</sup> Chë soyënga Jesús tojëftsanayanentšana, chabe uatsjëndayëngaftaca tojëftsanbocna, chë binche bëjaye Cedrón ca uabáiniye chenguana jama. Chentše inamna canýe tjashetema; y Jesús chabe uatsjëndayëngaftaca choye tojánamengo. <sup>2</sup> Y Judas, chë Jesús uayayëngbe



cucuatšiñe boshjuaná, tšabá chë luare yojanábuatma, er Jesús y chabe uatsjéndayënga ba soye chentše imojánenefjuana. <sup>3</sup> Chora Judas tojánashjango, y cháftaca ba soldadënga y básefta Bëngbe Bëtsabe bëts yebnocá josticiënga; chënga imojamna chë bachnangbe amëndayënga y fariseungbe ichmónënga; nyetscanga uajuinýanëshangaca, lamparëshangaca y espadëjangaca uajátënga.

<sup>4</sup> Jesusna yojtsetátšëmo lempe ntšamo cha yochjanpásama; chíyeca, natsanoye tojánbocna y chë entšanga tojanëyana: —¿Nda šmojtsenguá ca?

<sup>5</sup> Y chënga tmojanjuá: —Jesús, chë Nazaretocá fsëntsenguá ca.

As Jesús tojanëjua: —Atše cha sëndmëna ca.

Y Judas, chë boshjuaná, chánaca chë entšangafatacá yojtsemna. <sup>6</sup> Jesús tojanëyana: “Atše cha sëndmëna ca”, y cachora chë entšanga tmojanostëtšánanga y fshantsoye tmojánshajaye.

<sup>7</sup> Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

<sup>8</sup> As Jesús tojanëyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachá čmochjónýaye chamotsóñëngama ca.

<sup>9</sup> Chca tojanopasá, ana ntšamo Jesús tojanayancá cachá chaotsemnama, chë “Atšbe Taitá Bëngbe Bëtsá, chë šconjínýinýiye entšanguentšana ni canýa pochocaná queochátšmëna ca”.

<sup>10</sup> Simón Pedro canýe espadëja inasëngbuájonýana; asna, tojanenosëngbotëntšëna y chë bachnangbe más uámana amëndayabe canýe oservenábioye catšbioica matscuaše tbojtsanëštjango. Chë oservená Malco ca inauabaina. <sup>11</sup> As Jesús, Pédrëbioye tbojanianyana: “Ache espadëja matosëngbuajonýá. Ntšamo atšbe Taitá Bëngbe Bëtsá tojanmandacá, chë atše puerte ngmënana jtsebmnama, čndöñe chca chaondëtsemna ca?”

*Jesús, Anasbe yebnocá*

*(Mt 26.57-58; Mc 14.53-54; Lc 22.54)*

<sup>12</sup> Chentšana chë soldadënga, chëngbe amëndayá y Bëngbe Bëtsabe bëts yebnocá josticiënga Jesús tmojánishache y tmojanëcuébatšëca. <sup>13</sup> Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá. <sup>14</sup> Caifás yojamna nda judiënga tojanëyana: “Tšëngafangbiama más tšabá entsemna canýe boyabása Israeloca entšangbiama chaóbana ca.”

*Pedro tojánayana Jesúsbiöye ndöñe bonjanabuátma ca*

*(Mt 26.69-70; Mc 14.66-68; Lc 22.55-57)*

<sup>15</sup> Simón Pedro y inýe uatsjendayá Anasbe yebnoye Jesús imojtsëstona. Chë inýe uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúsëftaca chabe chashjónťscoñe jashjanguana. <sup>16</sup> Pero Pédrëna nýe shjoca, amashjuanentše tojanoquedá. Chcasna, chë inýe uatsjendayá tojánbocna y chë bëshása ebtafjuana shembásafatacá tojanoyebuambá. Chora Pedro tbojanëmashëngo. <sup>17</sup> As chë shembása Pédrëbioye tbojanianyana: —¿Acnaca ndöñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndöñe quetsatabuatma ca.

<sup>18</sup> Tša yojtsesëšna causna, chë oservénënga y chë josticiënga shjoca tmojanniñé y chentše imojtššboniye. Y Pédrënaca chëngafatacá yojtššbonena.

*Ntšamo chë bachnangbe más uámana pasado amëndayá, Jesúsbiöye tbojantjá*

*(Mt 26.59-66; Mc 14.55-64; Lc 22.66-71)*

<sup>19</sup> Chora, chë bachnangbe más uámana pasado amëndayá tojanontšë Jesús jatjayama chabe uatsjéndayëngbiama y ndayá cha entšanga yojánabuatambamnaca. <sup>20</sup> Y Jesús tbojanjuá: —Atše nyetsca entšangbe delante sënjoyebuambá. Sempre chë entšangbe enëfjuana yebnënguenache sëndabuatambá, y Bëngbe Bëtsabe bëts yebnócnaca, nyetsca judiënga mondbësenëfjuantšë; y chca, iytëmencá tondaye chiyatoyebuambá. <sup>21</sup> ¿Ndáyëca chca šcojtsetjaná? Atšbe palabra tmojouenënga máťjaye, as chënga chacmëyana ntšamo atše tijáuyana. Chënga mondtátšëmbo ntšamo atše tijayancá ca —Jesús tbojanjuá.

<sup>22</sup> Jesús chë soyënga tojánayana ora, canýe josticio chentše yojtsemná, Jesúsbiöye tbojanjuebjantšetá y tbojanianyana: —¿Chca chë bachnangbe más uámana amëndayá cuanjojuá ca?

<sup>23</sup> Y Jesús tbojanjuá: —Ndoñe tšabá tijayanëšna, šmëyana ndayentšë chë podesca palabra yojtsemna; y tšabá tijoyebuambasna, čndáyëca šcojajuebjantšetá ca?

<sup>24</sup> Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

*Pedro cachiñe tojánayana Jesúsbiöye ndöñe bonjanabuátma ca*

*(Mt 26.71-75; Mc 14.69-72; Lc 22.58-62)*

<sup>25</sup> Chéntscuana, Pedro yojtsešbonena, tsanana chë iñe juachaca. Chora chë entšanga tmojantjá: —¿Aca ndoñe chabe uatsjendayëñuentšá condmëna ca?

Y Pedro ndoñe ca tojánayana: —Atše ndoñe quetsátsmëna ca —cha tojánayana.

<sup>26</sup> Chora, chë bachnangbe más uamana amëndayabe canye oserverná Pédrëbioye tbojaniyana: —¿Atše ndoñe cháftaca chë tjashetémoca tcbonjinye ca?

Chë oserverná inamna chë Pedro tbojtsanmatstëšabe pamillo.

<sup>27</sup> Y Pédrëna cachiñe ndoñe ca tojánayana, y cachora canye ngallo yojacánta.

*Jesús Pilatbe delante*

*(Mt 27.1-2, 11-14; Mc 15.1-5; Lc 23.1-5)*

<sup>28</sup> Chentšana, Caifasbe yebnentsana Jesús tmojanánatse chë romano mandadbe yebnoye. Ya yojtsebinýana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canye ndoñe judiëbe yebnoye nda tojámashënguse. <sup>29</sup> Chíyeca Pilato tojánbocna y chënga tojanéyana: —¿Ndayá quem boyabásabe contra šmochjayana ca?

<sup>30</sup> Chora chë entšanga tmojanjuá: —Bacá uamaná ndoñe tontsemnëse, ndoñe matifuánatse ca.

<sup>31</sup> As Pilato tojanéyana: —Tšëngaftanga matánatse, y ntšamo cach tšëngaftangbe leyíñe iuayancá muabiama šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

<sup>32</sup> Chca tojanopasá, ana ntšamo Jesús cachá jóbana tojanayancá cachá chaotsemnama. <sup>33</sup> As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

<sup>34</sup> Y Jesús tbojanjuá: —¿Ntšamo šconjatjacá, cach aca chca cojtsejuabnýeca chca yojtsemna o inýenga atšbiama tcmojacuentáyeca ca?

<sup>35</sup> Chora Pilato tbojaniyana: —¿Mo atše judío quetsmëna? Cach ácbioca entšanga y chë bachnangbe amëndayënga muentše tcmojnúshjango. ¿Ndayá tcojama ca?

<sup>36</sup> Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojsemnësa, atšbe ústonënga muantsatsejaye atše chë judiëngbe cucuatsíñe ndoñe chašmondobshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

<sup>37</sup> As Pilato tbojaniyana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonýná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmojenënga, atše jtseyeunanana ca.

<sup>38</sup> Chora Pilato tbojaniyana: —¿Y ndayase chë ndegombre soye yomna ca?

*Jesusbiana tmojanayana chaóbana ca*

*(Mt 27.15-31; Mc 15.6-20; Lc 23.13-25)*

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanéyana: —Atše ni mo canye soye chiyátinýena, quem boyabása castiganá chaotsemna ca jayanama. <sup>39</sup> Pero tšëngaftanga šmondétatšëmbo, Bashco fiestama atše canye utamená cachá jëtsboshjonama. ¿Šmojtseboše chë judiëngbe Rey chjëtšboshjona?

<sup>40</sup> Chorna nýetsca entšanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabasna canye bacá uamana entšá inamna.

## 19

<sup>1</sup> Chora Pilato, Jesús tbojanánatse y tojanmandá chamotsetjanjama. <sup>2</sup> Y canye coronësha uchmašëfjangaca chë soldadënga tmojanapormá y Jesús tmojanabestšajó; y canye shbuenda uafjatsenga entšayá mo reycá tmojanichëtjo. <sup>3</sup> Chorna chënga imojtsóbobecocnaye y jtsafchayama imojtsatsëtsnaye: “¡Bayté judiëngbe Rey cochtsemna ca!” Y imojtsejuebantšetaye.

<sup>4</sup> Pilato cachiñe tojánbocna y entšanga tojanéyana: —Šmochjouena; cha chanjuábocna, chë boyabása castiganá chaotsemna ca jayanama atše ni mo canye soye ndoñe sënjinýenama chašmotsetatšëmbuama ca.

<sup>5</sup> As Jesús tojánbocna chë uchmašëfjangaca coronësha uabestšajoná y chë shbuenda uafjatsenga entšayá mo reycá uichëtjoná. Y Pilato tojanéyana: —¡Muentše chë boyabása entsemna ca!

<sup>6</sup> Chë bachnangbe amëndayënga y chëngbe josticiënga cha tmojaninýe ora, tmojanontšë uayebuáchana: —¡Motsecrucifá! ¡Motsecrucifá ca!

Chora Pilato tojanéyana: —Cach tšëngaftanga mánatse y šmochjacrucifá; atše ni mo canye soye chiyátinýena quem boyabása castiganá chaotsemna ca jayanama ca.

<sup>7</sup> Chora chë judiënga tmojanjuá: —Bëngna canýe ley fsëndbomna, ntšamo chiñe endayan-cana, quem boyabása jóbanama bontsemna, Bëngbe Bëtsabe Uaquiñá entsenobiamná causa ca.

<sup>8</sup> Pilato chca tojanuena ora, más yojtsauatja. <sup>9</sup> Cachiñe chabe yebnoye tojtanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbonjanjuá. <sup>10</sup> Chora Pilato tbojaniana: —¿Ndoñe šcochanjojuá ca? ¿Ndoñe condëtatšëmbo, aca jacrucificama o jëtsboshjonama atše tsobenama ca?

<sup>11</sup> As Jesús tbojanjuá: —Ache obenana Bëngbe Bëtsá ndoñe macmënjánatsetase, tondaye cattsobena átšeftaca jamama; chíyeca, ache cucuatšíñe šonjaboshjoná, acbiama más bëts bacna soye tonjama ca.

<sup>12</sup> Cach orscana Pilato yojtsenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —¡Chacojëtsboshjonëšna, Césarbe amigo ndoñe condmëna! ¡Nda rey tojtsenobiamná chana, Césarbe uayayá jtsemnana ca!

<sup>13</sup> Pilato chë soyënga tojanuena ora, chashjoye Jesús tbojanábocna. Pilato tojanótbema chabe puestentše tribunaloca. Chë tribunaloca chashjañña hebreo biyañe Gabata ca inauabaina, y endayana “ndëtsbëngaca pormániñe ca”. <sup>14</sup> Bashco fiestama canýe te yojtsámna, y mo nyetsto ora yojtsemna. Chora Pilato chë judiënga tojanëyana: —¡Muentše tsëngaftangbe rey entsemna ca!

<sup>15</sup> Pero chënga tmojanáyebuachena: —¡Chaóbana! ¡Chaóbana! ¡Motsecrucificá ca!

As Pilato tojanatjá: —¿Tsëngaftangbe rey atše chjacrucifica ca?

Y chë bachnangbe amëndayënga tmojanjuá: —Bëngbe rey nýe César endmëna, ndocná más ca.

<sup>16</sup> Chentšana Pilato, chëngbe cucuatšíñe Jesús tbojánboshjona chamocrucificama y chë judiënga cha tmojanánatse.

### *Jesús tmojancrucificá*

(Mt 27.32-44; Mc 15.21-32; Lc 23.26-43)

<sup>17</sup> Jesús tojánbocna chabe cruz tantšajónana y tmojanánatse canýe luaroye, “Obanabe Bestšashe ca” uabáinoye (hebreo biyañe Gólgota ca inauabaina). <sup>18</sup> Chentše cha tmojancrucificá y inýe útatnaca cátaicoa tmojanacrucificá; Jesusna tsëntsaca. <sup>19</sup> Pilato tojan-mandá canýe uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca. <sup>20</sup> Y ba judiënga chë uabemana soye tmojanalía, er chë Jesús tmojancrucificá luare Jerusalenó béconana inamna, hebreo, latín y griego biyañe yojetsábemana. <sup>21</sup> Chca juabemama tojanmandáyeca, chë bachnangbe amëndayënga Pilato tmojaniana: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

<sup>22</sup> Pero Pilato tojanëyana: —Ntšamo tijuábema cachcá chaotsábemana ca.

<sup>23</sup> Chë soldadënga Jesús tmojancrucificá chentšana, chabe entšayangá tmojanájaca y cántañe tmojanajatá, nyetsca canta soldadëngbiama. Chabe cmešëjua tmojanaca; chëjuana yojanamna nduajonanëjua, nyetsëjua uabianánëjua. <sup>24</sup> As chë soldadënga tmojanëniyana: “Ndoñe matjuátanëca; más tsábana tsbanánoye mochjútšëna, ndabiama yochjuáquedama chaotsotatšëmbuama ca.”

Chca tojanopasá ana ntšamo Bëngbe Bëtsabe uabemana palabreñguíñe endayancá cachcá chaotsemnana, chë “Atšbe entšayangá tmojatenájataye; atšbe cmešëjuamna tsbanánoye tmonjanëtsëna, ndabiama juaquédama jtsotatšëmbuama ca.” Y lempe chca chë soldadënga tmojanma.

<sup>25</sup> Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena. <sup>26</sup> Jesús chabe mamábioye tbojáninýe, y chabe juachacna chë Jesusbe bonshana uatsjendayá yojtsemna. Chora chabe mamá tbojaniana: “Mama, chentše ache uaquiñá entsemna ca.”

<sup>27</sup> Y chë bonshana uatsjendayá tbojaniana: “Chentše ache mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

### *Jesús tojanóbana*

(Mt 27.45-56; Mc 15.33-41; Lc 23.44-49)

<sup>28</sup> Jesús yojtsetátšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabreñguíñe endayancá cachcá chaotsemnana, tojánayana: “Sontsajuendá ca.”

<sup>29</sup> Chentše inamna canýe matbaja buajútjena untja vínoyeca. As, chë soldadënga canýe esponjëshe chë vínoyeca tmojanfchecuacuá, canýe hisopo niñëfjiñe tmojananguësëtjo y játsbanase, Jesusbe uayásoye tmojanbeconá. <sup>30</sup> Chë untja vínoye Jesús tojanofšë ora, tojanayana: “Ya lempe tocjochnëngo ca.”

Tojanotsejbé y tojanóbana.

*Canýe soldado chabe lanzësaca costillaca Jesúsbioye tbojanashacua*

<sup>31</sup> Bashco fiestama canýe te yojtsájamna, y chë judiënga ndoñe imontseboşe chë crucificánëga cachentşe chë ochnayté chamotsemnana, chë te puerte uámana te bétsemnayeca. As Pilato tmojanimpadá chë crucificánëga shecuatşënga jetsatcacayama y chë cuerpënga chentşana jtsejuánama chaomandama. <sup>32</sup> As chë soldadënga tmojána y shecuatşënga imojtsatcacaye, natsana canýa y chentşana chë inýa, Jesúseftaca yojtsecrucificaná. <sup>33</sup> Pero Jesúsbioye tmojanobeconá ora, ya obaná tmojáninýe; chíyeca chabe shecuatşënga ndoñe tmonjanatcacá. <sup>34</sup> Masque chca, canýe soldado Jesúsbioye costillaca canýe lanzësaca tbojanashacua. Y cachora buiñe y búyeshe chentşana tonjanóbocna. <sup>35</sup> Chë mëntşá cuentayá chentşe enjamna y tonjáninýe, y ndegombre entsichamo; cha endétatşëmbo ndegombre yojtsichámuama, chca, tşëngaftángnaca chiñe chaşmotsoşbuáchema. <sup>36</sup> Chë soyënga chca tojanopasá, ntşamo Bëngbe Bëtsabe uabemana palabrënguñe endayancá cachá chaotsemnana. Chiñe endayana: “Ni mo canýe betaşe cha quemochatsëntşátca ca.” <sup>37</sup> Y inýoca, Bëngbe Bëtsabe uabemana palabrënguñe endayana: “Chë tmojenachentşá bominýe mochanjabuájua ca.”

*Jesús tmojanatbontşá*

(Mt 27.57-61; Mc 15.42-47; Lc 23.50-56)

<sup>38</sup> Chë soyënga tojanopasá chentşana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canýe ustoná, masque nýe iytëcana, chë judiëngbiama auatja causa. Pilato añe tbojanlesenciá; as José tojána y Jesusbe cuerpo yojtsámbañe. <sup>39</sup> Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájuañana. <sup>40</sup> As José y Nicodemo Jesusbe cuerpo tbojanca y tmojanandmaná chë botamana uanguëtşe soyëngaca unëtjona entsëjuangaca. Judiënga chca innauamana, obaná juatbontşama ora. <sup>41</sup> Jesús tmojan-crucificá luarentşe canýe base jajañe inamna, y chiñe canýe tsëm cuevëshe, entsangbe pormánëshe, obanëngbiama; chëshiñe cabá ndocna obaná mondëjajo. <sup>42</sup> Asna, nýe chentşe Jesusbe cuerpo tmojansegorá, chë Bashco fiestama canýe te yojtsájamna causa, y chë cuevëshe chë béconana inámnayeca.

## 20

*Jesús tojtanayena*

(Mt 28.1-10; Mc 16.1-8; Lc 24.1-12)

<sup>1</sup> Chë inýe semana bojatşenté, cabá cachëse, cabá ndëbinýna ora, María Magdalena chë cuevëshoye tojána y tojáninýe inýoca yojtsemna chë cuevëshoye amashjuanentşá ndëtşbé. <sup>2</sup> Asna, tojëtsanótjajo y tojána chë Simón Pedro y chë inýe uatsjendayá, ndábioye Jesús tşa ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentşana tmojtsámbañe y ndayentşe tmojtsejájoma ndoñe queftşatstatşëmbo ca.”

<sup>3</sup> Chora Pedro y chë inýe uatsjendayá chentşana tojëtsanbocna y chë cuevëshoye tbojánata. <sup>4</sup> Nýets útata ibojtsëchamana, pero chë inýe uatsjendayá Pédrëbiama más betscó tojanótjajo y natsana chë cuevëshoye tojánashjango. <sup>5</sup> Tojanotsejbé y chë chentşe tmojanacjá entsëjuangá tojáninýe, pero choye ndoñe tonjánamashëngo. <sup>6</sup> Chentşana, Simón Pedro chabe ústonoye tojánashjango y chë cuevëshoye tojánamashëngo, y tojáninýe chë chentşe tmojanacjá entsëjuangá. <sup>7</sup> Y chë Jesús juabestşëntsacjuama tojanaservé entsëjuana ndoñe chë inýájuangaca yontsamna, sinó inýoca botamana uandmanánëjua. <sup>8</sup> Chora chë inýe uatsjendayá, chë cuevëshoye natsana tojanashjanguá, choye tojánamashëngo. Tojáninýe y Jesús tojtanayenama yojtsanoşbuaché. <sup>9</sup> Chëntscoñe chë útata cabá ndoñe yontsósertana ntşamo Bëngbe Bëtsabe uabemana palabrënguñe endayancá, chë Jesús obanënguentsana jayenama ibojamnana. <sup>10</sup> Chentşana chë uatsjendayata chatbe oyenoye tojtaná.

*Jesús, María Magdalënbioye tbojánëbëbocna*

(Mc 16.9-11)

<sup>11</sup> Pero María chentşe tojanoquedá, chë cuevëshe juachaca şachénaca; yojtsosachentscuana tojanotsejbé cuevëshoye jarrepárama. <sup>12</sup> Y tojáninýe uta angelotëmata uafjantsëjua uichëtjonata, Jesusbe cuerpo yojëftsejajóntşe ibojtsetbemana. Canýa tsëntşënëşoica y chë inýana matsësoica. <sup>13</sup> Chora chata tmojanianya: —Shembása, çndayama coşaché ca?

As cha tojanjá: —Atşbe Utabná tmojtsámbañe, y ndayentşe tmojtsejájoma ndoñe quetsátstatşëmbo ca.

<sup>14</sup> Chca tojánayana ora, tojanostëtşantjeşé y tojáninýe chentşe Jesús yojtsemna, pero María ndoñe yontsetátşëmbo cha Jesús bétsemnana. <sup>15</sup> Chora Jesús tbojanianya: —Shembása çndayama coşaché? ¿Nda conguá ca?

María yojtsejuabnaye chë boyabásana yojtsemna chentša base jajañe uaishanýa ca; chíyeca tbojantjá: —Bacó, aca tcojuambësna, šmëyana ndayentše cojtsejajó, as atše cha jesocñama ca.

<sup>16</sup> As Jesús tbojaniana: —¡María ca!

Chora María chábioye tojanontjesé y tbojaniana: —¡Rabuni ca! (hebreo biyañe chca endayana “Buatëmbayá ca”).

<sup>17</sup> Chora Jesús tbojaniana: —Ndoñe šcatábojajo, er atše cabá ndoñe atšbe Taitábioye quetstëtstsjua. Pero motsa atšbe catšátangbioye y cochjáuyana, atše stsetsjuá atše y tšëngaftangbe Bëtsábioye, atše y tšëngaftangbe Taitábioye ca.

<sup>18</sup> As María Magdalena tojána y Jesusbe uatsjëndayënga tojanëyana cha chë Utabnábioye tbojáninýe ca y cha chë palabrënga tojánayana ca.

*Jesús chabe uatsjëndayënga tojánebëbuacna*

(Mt 28.16-20; Mc 16.14-18; Lc 24.36-49)

<sup>19</sup> Tojanibétata ora, cach semana bojatsënté, chë uatsjëndayënga tmojánenefna canýe luarentše, pero lempe tmojtanatame, chë judiëngbiama auatja causa. Chora Jesús tojánamashëngo, chëngbe tsëntsaca tojantsá y mëntšá tojanacheuá: “Chë atšbe ainaniñe tšabe ebionana tšëngaftangata chaotsema ca.”

<sup>20</sup> Y chca tojanëyana ora, chabe cucuatšënga y costillaca tojaninýanjé. Chora chë uatsjëndayënga oyejuayënga imojtsemna, chëngbe Utabná tmojáninýama. <sup>21</sup> As Jesús cachiñe tojanëyana: “Chë atšbe ainaniñe tšabe ebionana tšëngaftangata chaotsema. Ntšamo atšbe Taitá Bëngbe Bëtsá šojichmocá, átsnaca cachá tšëngaftanga chontšachamná ca.”

<sup>22</sup> Chca tojánayana ora, chëngbioye tojangouo y tojanëyana: “Chë Uámana Espiritu smochjójëngacñe. <sup>23</sup> Ndëmuanyënga chëngbe bacna soyëngama chašmojáperdonanga, perdonánënga mochántatsmëna; y ndoñe chašmonjáperdonasna, ndëperdonánënga mochántsemna ca.”

*Tomás, Bëngbe Utabnábioye ainá tbojáninýe*

<sup>24</sup> Pero Tomás, chë Gemelo ca uabobainá, canýa chë bnëtsana uta uatsjëndayënguentšá, chë uatsjëndayëngata ndoñe yontsemna, Jesús tojánashjango ora.

<sup>25</sup> Chíyeca, “bënga chë Utabná fsënjinye ca”, chë inýe uatsjëndayënga tmojaniana ora, Tomás tojanëjua: “Atše chabe cucuatšñe chë uajabonjana uinýniñe ndoñe sënjinýe, y chiñe atšbe ntšabuafja ndoñe sënjajué y atšbe cucuatše chabe costillaca ndoñe, ndoñe quichátošbuachiye ca.”

<sup>26</sup> Canýe semana tojanochnëngo ora, chë uatsjëndayënga cachiñe canýe luarentše tmojánenefna. Y Tomásna chëngata yojtsemna. Masque chentše atámeninýe yojtsemna, Jesús tojánamashëngo, chëngbe tsëntsaca tojantsá y tojanëyana: —Atšbe ainaniñe tšabe ebionana tšëngaftangata chaotsema ca.

<sup>27</sup> Chora Tomásbioye tbojaniana: —Acbe ntšabuafja muentše mojué y atšbe cucuatše minýe; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayenama cochtšošbuachiye ca.

<sup>28</sup> As Tomás tbojaniana: —¡Atšbe Utabná y atšbe Bëtsá ca!

<sup>29</sup> Chora Jesús tbojaniana: —Tomás, nýe šconjínýeyeca cojtšošbuaché. ¡Bëngbe Bëtsá chaoma puerte oyejuayënga chamotsemna chë nýe ntjinýá tmojošbuachenga ca!

*Ndayama quem librëša tmojánábema*

<sup>30</sup> Jesús, chabe uatsjëndayëngbe delante inýe bëts soyënga Bëngbe Bëtsabe obenánaca tonjëftsema, pero quem librëšañe ndoñe quenatábemana. <sup>31</sup> Y quem librëšañe soyënga, entsábemana tšëngaftanga chašmotšošbuachema, Jesús, chë Cristo y Bëngbe Bëtsabe Uaquiná bëtsemnana; y chcase, chábëñe chašmojtšošbuachese, chábeyeca chë nýetsca tescama yomna tšabe vida chašmotsebomnana.

## 21

*Jesús, canýsëfta chabe uatsjëndayënga tojánebëbuacna*

<sup>1</sup> Chca tojanopasá chentšana, Jesús inýe soye chabe uatsjëndayënga tojánebëbuacna, Tiberias mar bëjaye tsachañe. Chora mëntšá tojanopasá: <sup>2</sup> Canýentše imojtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquiná y Jesusbe inýe uta uatsjëndayata. <sup>3</sup> Simón Pedro chënga tojanëyana: —Sëntšá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canýe barquëshoye tmojánamashjna; pero chë ibeta tondaye tmonjáninýena.

<sup>4</sup> Ya yojtsebínýana orna, Jesús chë tsachoca yojtsemna, pero chë uatsjëndayënga ndoñe

imontsetátsëmbo cha Jesús yojamnama. <sup>5</sup> Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

<sup>6</sup> As Jesús tojanëyana: —Barquësha catšbioica chë atarraiešha mëtšena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nyëtšá beonga tmojánishëche causa. <sup>7</sup> As chë Jesusbe bonshana uatsjendayá, Pédrëbioye tbojanianya: “¿Bëngbe Utabná entsemna ca!”

Simón Pedro chca soye tojanuena y cachora entšayá tojtanichëtjo, er nduichëtjoná yojtsemna, y chë béjayoye tojanoshbuetse. <sup>8</sup> Chë inye uatsjendayëngna chë barquëshañe tmojána, y chë atarraiešha jútjena beóngaca imojtsásjaye, er chë tsachocama bécoñe imojtsemna, nye canye patse metroca. <sup>9</sup> Fshantsoye tmojánastjajna ora, chënga tmojáninýena canye chebániñe pormániñe, y chentšna canye beona y tandëšnaca yojtsesegorana. <sup>10</sup> Chora Jesús tojanëyana: “Chë šmonjáshebuaye beonguentšana báseftanga miyëbo ca.”

<sup>11</sup> Simón Pedro chë barquëshoye tojánamashëngo, y chë atarraiešha jútjena bëts beóngaca, uasjojónana tsachóntscoñe tojanëyamba. Mo canye patse y shachna bnëtšana y unga beóngaca; pero masque nyëtšá beonga, chë atarraiešha ndoñe ntjuatanëcanana. <sup>12</sup> Chora Jesús tojanëyana: “Mabënga, šmochjase ca.”

Chë uatsjendayënguentšana ni canya yontsenñëmua cha jatjayama nda cha yojamnama, er nyëtscanga imojtsetátsëmbo cha chë Utabná bëtsemnama. <sup>13</sup> Chora Jesús tojanobeconá, chë tandëše tojanca y chënga tojanatsatá, y chë beónacnaca cachcá tojanma.

<sup>14</sup> Chóracna, Jesús ya unga soyama chabe uatsjendayënga yojtsanebëbuacana, obanënguentšana tojtananenentšana.

*Jesús, Simón Pédroftaca tojanoyebuambá*

<sup>15</sup> Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiana más quešcobotonshana ca?

Y Pedro tbojanjuá: —Atšbe Utabná, añe. Aca condëtatšëmbo atše añe cbondbobonshánama ca.

As Jesús tbojanianya: —Atšbe entšanga, mo oveshatemëngcá imomnënga, cochtsanýena ca.

<sup>16</sup> Chora cachiñe tbojantjá: —Simón, Juanbe uaquiñá, ¿quešcobotonshana ca?

Y Pedro tbojanjuá: —Atšbe Utabná, añe. Aca condëtatšëmbo atše añe cbondbobonshánama ca.

As Jesús tbojanianya: —Atšbe entšanga, mo oveshëngcá imomnënga, cochtsanýena ca.

<sup>17</sup> Y unga soyama tojtëtantjá: —Simón, Juanbe uaquiñá, ¿quešcobotonshana ca?

Pedro puere tbojanongmé, ya unga soyama “quešcobotonshana ca” tbojantjá causa; y tbojanjuá: —Atšbe Utabná, aca lempe condëtatšëmbo. Aca condëtatšëmbo atše añe cbondbobonshánama ca.

As Jesús tbojanianya: —Atšbe entšanga, mo oveshëngcá imomnënga, cochtsanýena. <sup>18</sup> Ndegombre cbëyana: Más bobontse conjamna ora, conjanamana cach aca jtichëtjuana y ndëmoye jama cojtseboše choye jtsoñana; pero tanguá chacojtsemna orna, buacuatšënga cochanjatsbaná, y inya cmochantichëtjo y ndëmoye jama ndoñe chacontseboše choye cmochanjuánatse ca —Jesús tbojanianya.

<sup>19</sup> Chca tojánayana, ana jtsotatšëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bëtsemnama Pedro yochjáninýanýiyama. Y chca tojánayanentšana, Pédrëbioye tbojanianya: —Smasto ca.

*Jesusbe bonshana uatsjendayá*

<sup>20</sup> Pedro tojesanenostëštantješé y tojáninýe, Jesusbe bonshana uatsjendayá ústonoye yojtsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbojantjá: “Bëngbe Utabná, ¿nda chë boshjuaná yochtsemna ca?” <sup>21</sup> Pedro chábioye tbojáninýe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

<sup>22</sup> Chora Jesús tbojanjuá: —Atše quem luaroye jesabámëntscuana cha ainá chauesomñama atše stebošëse, ¿aca ndayá chama cmatjatsëntšamna? Acna nye šmasto ca.

<sup>23</sup> Chiyeca, chentšana, Jesucristbeñe ošbuáchiyëngbenache nyëtscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabámëntscuana cha ainá chauesomñama atše stebošëse, ¿aca ndayá chama cmatjatsëntšamna? ca”.

<sup>24</sup> Mua endmëna chë uatsjendayá; cha entsichamo quem soyënga ndegombre yojamnama, y camuá quem librëšane lempe tonjuábema. Y bënga mondëtatšëmbo cha ndegombre soye endóyebuambnama.

<sup>25</sup> Jesús inŷe ba soyënga tonjëftsema; tša bëtská soyënga endmëna, nderado lempe cada canŷe soye tcojuábema y librëšangá tcojuapormá, atše sëntsejuabná, nŷetsca chëšangá quem luarentše ndoñe nanjuába.

## Hechos

*Jesús tojanašebuachená chë Uámana Espíritu jíchmuama*

<sup>1</sup> Teófilo, atšbe natsana librěšaňe tcbonjuábobema lempe ntšamo Jesús tojanmama y tojánabuatambama, chca tojanbojatsě orscana, <sup>2</sup> y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojěťsanaměndá, chë Uámana Espíritbiajana, ndayá jamama yojánamnana. <sup>3</sup> Jesús cruciňe tojanóbana y tojtanayenentšana, ba soye chë ichmóněnga yojáneběbuacana, chca, chěnga jinyňayama cha ndegombre tojtanayenama. Canta bnětsana tentscuana cha yojáneběbuacana y Běngbe Bětsabe aměndayama chěnga yojanabuatambá.

<sup>4</sup> Canye, Jesús chabe ichmóněngaftaca yojětsemna ora, měntšá tojanaměndá: — Jerusalenentšana ndoňe šmatjábocana. Camuentše šmochjobátma, ntšamo atšbe Taitá tcmonjanašebuachenacá chaóshjanguěntscuana, ndayama atšbe tcbonjáuyana. <sup>5</sup> Ndegombre, Juan entšanga bėjayeca tonjaněbaye; pero ndoňe baytesna, Běngbe Bětsá chë Uámana Espíritu bochanjíchmu, tšěngaftangbe ainaniňe jtsemándayama cháumashěnguama ca.

*Jesús celoye tojtantsjuá*

<sup>6</sup> Canye, chë ichmóněnga Jesúseftaca cányiňe imojtsemna ora, chěnga tmojantjá: —¿César y chë Romoquěngbe aměndayentšana taščochjatsebacá, y mora běnga, Israeloca entšanga, canye Rey quemochtsatsbomna ca?

<sup>7</sup> As Jesús tojaněyana: —Tšěngaftanga ndoňe quecmátamna chë soyěngama jtsetatšěmbuana. Nye atšbe Taitá aňe; y cha, chabe obenánaca echanjamánda mocna ora y ndaytě chca chaopasama. <sup>8</sup> Chë Uámana Espíritu tšěngaftangbe ainaniňe jtsemándayama chaojabo ora, tšěngaftanga obenana šmochanjóyěngacňe. Chentšana, ntšamo atšbiama šmotatšěmbcá, chë tcbonjabuatambá soyěnga, entšanga šmochjáuyana Jerusalenentše, nyěts Judea luariňe, Samarioca y quem luarentša nyěts luarěnguenáčhnaca ca.

<sup>9</sup> Chë soyěnga tojánayenentšana y chabe uatsjědayěnga imojtsonyaye ora, Běngbe Bětsá, Jesúsbiolye tbojtanatsbaná y canye jantšetěshe chábiolye ibojútšbotse y ndoňe más tmonjanobená cha jinyama. <sup>10</sup> Jesús celoye yojtsetsjuama chěnga bēn imojtser-reparáněntscuana, nye ndeolpe, uta boyabásata uafjantse entšayaca bopormánata chěngbe juachaca tbojabántsaye, <sup>11</sup> y chěngbiolye tmojaněyana: “Galileoca entšanga, žndáyeca celoye šmojtsantješana? Jesús, chë tšěngaftangftaca enjamná celoye tontá y ntšamo mora šmonjinyčá cha celoye jtama, cachcá quem luaroye cha echanjěsabo ca.”

*Júdasbe cuenta Matías tmojanábuayana*

<sup>12</sup> Jesusbe ichmóněnga chë Olivos tjashocana Jerusalenolye tmojtaná. Chë tjocana Jerusalenóntscóňna bėcoňe inamna, ndayěntscoca canye ochnaytě jama yojanlesenciana nyěťšá. <sup>13</sup> Jerusalenolye tmojtanashjajna orna, chë yebnentša tsbanánoca tsoye tmojtanášěngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiňá, Simón chë Celote ca uabobainá, y Judas, chë Santiagbe uaquiňá. <sup>14</sup> Chěnga sempre imojanamana jteneťjnana Běngbe Bětsáftaca jencuěntama básefta shembásengftaca, María Jesusbe mamá y Jesusbe catšátangftaca.

<sup>15</sup> Chë tempo tmojáneněfjna canye patse y uta bnětsana Jesucristbeňe ošbuáchiyěnga, y canye, Pedro tojantsá y tojaněyana: <sup>16</sup> “Jesucristbeyeca atšbe catšátanga, endáněyta ntšamo Běngbe Bětsabe uabemana palabrěnguifne iuabemancá chaochměnguama, y tempo, David chë Uámana Espíritbeyeca chiňe tojanábema ntšamo Júdaseftaca yochjanopásama; chcasna, Judas uayayěnga tojaněnatse Jesús chamuishachama. <sup>17</sup> Júdasnaca běngbe enutá enjamna y Jesús chábioynaca tbonjanábuayana běngcá chabe trabajuifne jtsoservěnama. <sup>18</sup> Tšěngaftanga šmondětatšěmbo, chë Judas bacna soye tojanmama tmojanabuená crocénánacna fshantse tmojánbuamema. Chentšana cha tojtsanótsatse y chabe bestšaše tsěntsaca tojtsanashtěťšena y chabe uafsbentšana nyětsca chabe chunchullějuangá tojtsanášana. <sup>19</sup> Jerusalenentše oyeněnga chë soyama tmojántatšěmbona ora, chë fshantse chěngbe biyaňe Acéldama ca tmojanabaye. Acéldama endayana ‘Buiňe Luare ca’. <sup>20</sup> Salmos librěšaňe, Jesucristo uayayěngbe cucuatšifne boshjuanabiamama měntšá enduábemana:

Chabe yebna énaňe chaotsemna y ndocná chentše chaondětsiyena ca.

Y měntšanaca endayana:

Chabe cuenta inya chabe trabajo chaoma ca.

<sup>21</sup> “Chcasna, mora muentše montsemna taitanga běngaftaca mondenutěnga, Běngbe Utabná Jesús běngaftaca enjamněntscuana, <sup>22</sup> Juan Jesúsbiolye tbonjanabaye orscana y Běngbe Bětsá Jesúsbiolye běngbentšana celoye tbonatanatsbanantscuana. Y mora šontsamna



canja mēnguentśa juabuayanama, Jesús tojtanayenama entśángbioye bēngaftaca jábuayenama ca.”

<sup>23</sup> As chora útata tmojanabocacá: José, nda Barsabás ca imojanábobuatma y ínŷengna Justo ca; y chentśana Matías. <sup>24</sup> Chora Bēngbe Bētsáftaca mēntśa tmojanencuentá: “Bēngbe Utabná, aca nŷetscangbe ainana icuabuatma; chcasna, śminŷanŷé nda quem útatentśana cochjuábuyanana, <sup>25</sup> canŷe ichmonacá Júdasbe cuenta chaotrabajama. Judas ya ndoñe canŷe ichmoná quenátśmēna, bacna soye tojama causa, y cha mora yojtsemna chē ndayentśe jtsemnama ibomna luaroca ca” —chēnga tmojánayana.

<sup>26</sup> Y nda chē ichmoná yochtsemnama jtsotatśēmbuamna tsbanánoye tmojanētśena y Matías thojanobuache; as cach orscana, Jesucristbeñe ośbuáchiyēnga chabiamia imojan-juabná mo canŷe Jesusbe ustonacá, cachcá ntśamo chē bnētsana canŷe uatsjēndayēngbiama chēnga imojanjuabnacá.

## 2

*Chē Uamana Espiritu ośbuachiyēngbeñe tojánamashēngo*

<sup>1</sup> Pentecostés ca uabaina fiesta tojanobuache ora, chē jaja sananga tmojanobuátbanama fiesta te, Jesucristbeñe ośbuáchiyēnga nŷetscanga cánŷiñe canŷe luarentśe imojtsemna. <sup>2</sup> Ndeolpe, celocana mo canŷe jabuache binŷiēcá yojtsaishauenana y chca, tśa jabuache shauenanana tojanóshjango nŷets yebnentśe, chēnga imojtsetbiámanentśe. <sup>3</sup> Y chora bich-tajēnga mo iñeshcá yojónŷna y canŷanŷabeñe yojojátaye. <sup>4</sup> Chca chē Uamana Espiritu tojánamashēngo chēngbe ainaniñe jtsemándayama; chora nŷetscanga tmojanontśé inŷetśa biyangana, chēnga tempo ndmabiyañe, ntśamo chē Uamana Espiritu yojtsamcá chēnga inŷetśa chamotsebiyama.

<sup>5</sup> Chē tempo Jerusalenentśe imojtsemna ba judiēnga, Bēngbe Bētsá puerte adórayēnga, nŷets luarēngocana áshjajnēnga; chēnga tmojánabo Bēngbe Bētsá jētschuayama. <sup>6</sup> Entśanga chē shauenanana tmojanuena ora, tmojanóoto y ndoñe imontsetátśēmo ntśamo jtse-juabnayana ndayá yojtsopasánama, er chē inŷe luarocana áshjajnēnga imojtsuenana chē Jesucristbeñe ośbuáchiyēnga inŷetśa biyangana jtsóyebuambnayana, ntśamo cada ona chēnga imojanbiyacá. <sup>7</sup> Chē soyēngama entśanga puerte imojenjnaná y mēntśa imojtsenatsētsnaye: “Chē chca montśóyebuambnanga Galileoquēnga mondmēna. <sup>8</sup> Chcase, ħntśámoyeca bēnga imojtsobena chēnga joyaunayana cach bēnga mondēbiyacá ca? <sup>9</sup> Muentśe montsemna Partioquēnga, Medioquēnga, Elam, Mesopotamia y Judeoquēnga, Capadocia, Ponto y Asia luaroquēngnaca, <sup>10</sup> Frigioquēnga, Panflia, Egiptó y Libia, chē Cirene béconana luaro-quēnga. Báseftangna Romoquēnga montsemna; <sup>11</sup> chēngbeñe nderado judiēnga camuentśe onŷnánēnga, pero ínŷengna ndoñe, y chēnga Bēngbe Bētsá mondbētsachuanaye cach ntśamo chē judiēnga monduamancá. Inŷengna Cretocana y Arabiocánēnga tmojabo. ¡Y bēnga montsobena chē Galileoca judiēnga joyaunayana Bēngbe Bētsá bēts soyēnga tojamama cach bēnga mondēbiyacá ca!” —chē entśanga imojtsichamo.

<sup>12</sup> Chē causa nŷetscanga imojtsenjnanaye y ntśamo jtsejuabnayama ntsetatśēmbcá imojtsemna y imojtsentjanaye: “¿Ndayá chē soye yojtsayana ca?”

<sup>13</sup> Pero ínŷengna, chē soyēngama chēngbioye imojtsēbayajuana y imojtsichamo: “Chēnga tēmiēnga montsemna ca.”

*Ntśamo Pedro chora tojanoyebuambá*

<sup>14</sup> Chentśana, Pedro tojtansá chē inŷe bnētsana canŷe ichmónēngaftaca y jabuache tojanontśé chē entśanga jáuyanana, mēntśa: “Atśbe entśanga judiēnga y nŷetscanga Jerusalenentśe oyenēnga, tśabá śmochjouena. Ntśamo tojopasama chochanjábuayenaye, as chacmēsertama. <sup>15</sup> Tśēngaftanga śmontsejuabná atśe y atśbe enutēnga tēmiēnga ftsemna ca, pero ndegombre, tēmiēnga ndoñe queftsátśmēna; cabá cachēse, base mošenana ora ctsomñe. <sup>16</sup> Pero ntśamo entsopasánama, Bēngbe Bētsabe juabna oyebuambnayá Joel mēntśa tojanábema:

<sup>17</sup> Bēngbe Bētsá mēntśa tojánayana: ‘Quem luare jopochócama te chaojtsobeco ora, chē soyēnga echanjochnēngo.

Atśe chanjama, atśbe Espiritu nŷetscangbe ainaniñe cháumashēnguama.

Chentśana, tśēngaftangbe uaqiñēnga y bemianga atśbe soyēngama entśanga mochantśétsētsnaye;

tśēngaftangbe bobontśēngna, atśe chanjama soyēnga mochantsonŷaye mo otjenayoquēcá;

y tśēngaftangbe bētsjémēngna atśbe soyēnga mochantsojtēnaye.

<sup>18</sup> Chca ora, atśe chanjama nŷetsca atśbe oservēngbiama, boyabásenga y shembásenga,

chēngbe ainaniñe atśbe Espiritu cháumashēnguama,

as chēnga atśbe soyēngama entśanga mochantśétsētsnaye.

<sup>19</sup> Atśe chanjama bēts soyēnga celoca;

y quem luariñe echántsemna buiñe, iñeshe y ngona mo jantšetëshcá, atšbe obenana jinýañiyama.

<sup>20</sup> Cabá chë puerte uámana te, chë Bëngbe Utabná bëts soyënga jamama ndobuache ora, shinýe ndoñe queochátsbuashinýinýana

y juashcona buángañetema mo buiñcá echántsemna.

<sup>21</sup> Y as, ndánaca Bëngbe Utabná tbojtsotsëmbuaná, cha bochanjatsbocá.’

Chca Joel tempo tojanábema ca” —Pedro tojánayana.

<sup>22</sup> Chora Pedro tojatanëyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tcmonjaninýañýe, Jesúsbiøye chabe trabajo biamnayá cha tbojánbemama. Chë soye Bëngbe Bëtsá tcmonjaninýañýe, Jesús chë Nazaretocáftaca cha tojanma bëts soyëngaca y ójnanana soyëngaca, Bëngbe Bëtsabe obenana jinýañiyama. Cach tsëngaftanga chë soyëngama šmondëtatšëmbo, Bëngbe Bëtsabe obenánaca chë soyënga tsëngaftangbeñe Jesús tonjánmayeca. <sup>23</sup> Ndegombre tsëngaftangbe cucuatšifñe Jesús tmonjánboshjona, pero cabá ndëboshjona ora, Bëngbe Bëtsá tojanjuabó ntšamo jopásana vojannama; y ntšamo tsëngaftanga cháftaca šmochjanmámñaca cha inatátšëmbo. Tsëngaftangna Jesús šmonjanishache y šmonjanma cha chamóbama y chamocrucificama, bacna entšangbe cucuatšifñe. <sup>24</sup> Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

<sup>25</sup> Chora Pedro tojatanëyana: “Rey David tempo Jesusbiamma mëntšá tojëftsanabema, ntšamo cha Bëngbe Bëtsábiøye tbojanianama:

Atšbe Utabná, aca sempre átšeftaca condbëtsemna, y siempre átšeftaca condboquedá atše juajabuáchama, chíyeca ndocná queochatobenaye atše jauátjanama.

<sup>26</sup> Chíyeca atše corente oyejuayá sëntsemna,

y atšbe uayásaca chontsatschuaná.

Atše masque chanjóbana, tšabá sëndëtatšëmbo aca atšbe Bëtsá, atše chaitayenama cochjama.

<sup>27</sup> Aca, Bëngbe Bëtsá, obanëngbe luarentše ndoñe quešcochátsboshjona,

y ndoñe queochátsleséncia acbe uámana oservenabe cuerpo chaotsopochocama.

<sup>28</sup> Aca chë tšabe benache šconjaninýinýe, ntšamo tšabe vida jtsebonnama.

Aca átšeftaca condbëtsemnama, atše puerte oyejuayá sëntsemna ca —David tojëftsanabema ca.”

<sup>29</sup> Chentšana Pedro tojatanëyana: “Baconga y batanga, šontsemna ndegombre tsëngaftanga jábuayenana tšabá chacmésertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare bëconana. <sup>30</sup> Cach David canýe Bëngbe Bëtsabe juabna oyebuambnayá inamna. Cha tšabá inatátšëmbo Bëngbe Bëtsá bëtscá tbojanšbuáchenama, Davidbe entšanguentsana canýa, Cristo, cach Davidcá rey jabemama. <sup>31</sup> David inatátšëmbo chë Uámana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojëftsanabema, obanëngbe luarentše Cristo ndoñe ntjëftseboshjonana y Bëngbe Bëtsá ndoñe ntjalesénciana chabe cuerpo chaotsopochocama ca. <sup>32</sup> Bëngbe Bëtsá tojama Jesús cháuatayenama y bënga cha fsënjinye. Chíyeca bënga fsëntsetatšëmbo chca ndegombre bëtsemnama. <sup>33</sup> Bëngbe Bëtsá, Jesús celøye tbotanatsbaná chabe catšbioica jtsatsmënema jtsemándayama, y Bëngbe Bëtsá chë Uámana Espíritu Jesúsbiøye tbojanëntšabuaché ntšamo chë Taitá tbojanšbuachenacá. Ntšamo tsëngaftanga šmontsonýá y šmontsuenancá entsemna, Jesucristoftaca chë Uámana Espíritu bëngbe ainaniñe cháumashënguama Bëngbe Bëtsá tojámayeca. <sup>34</sup> David ndoñe Jesuscá celøye tonjána, pero mëntšá tojëftsanábema:

Bëngbe Bëtsá atšbe Utabná Crístbiøye tbonjaniyana:

‘Atšbe catšbioica cochtsetbemana,

<sup>35</sup> acbe uayayënga acbe cucuatšifñe chamoquedama atšbe obenánaca chjamëntscuana ca.’ ”

<sup>36</sup> Chora Pedro tojatanëyana: “Tsëngaftanga nyets Israeloquënga šmochtsetátšëmbo, atše ndegombre cach Jesusbiamma sëntsøyeuambnama. Cha tsëngaftanga šmonjancrucificá, pero Bëngbe Bëtsá chábiøye tbonjábema Bëngbe Utabná y chabe Uámana Uabuayaná, chë Cristo ca.”

<sup>37</sup> Chë soyënga tmojanuena ora, entšanga cochtsetšenánënga imojtsemna, y Pedro y chë inýe ichmónëngbiøye tmojanëyana: —Baconga, ¿ndayá mora jamama šojtsamna ca?

<sup>38</sup> As Pedro tojanëjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tsëngaftangbe bacna soyëngama cmochanjáperdonaye y echanjama chë Uámana Espíritu tsëngaftangbe ainaniñe jtsemándayama cháumashënguama. <sup>39</sup> Bëngbe Bëtsá chë

soyënga tcmonejanešebuachená tšëngaftangbiam, tšëngaftangbe básengbiam y nyëts chë bën luarënguenache imomna entšangbiam, nyëtsanga chë Bëngbe Utabná Bëngbe Bëtsá chábioye jabama chaojubuáyanënga ca.

<sup>40</sup> Inye palabrëngnaca Pedro tojatanëyana y bëtscá tojanabuayená mëntšá: “jBëngbe Bëtsá chë Israeloca bacna entšanga echanjácastigaye. Chašmótsbocamna, chëngbentšana šmochtsojuánañe ca!”

<sup>41</sup> Ba entšanga imojtsanošbuaché ntšamo Pedro tojanëyanama y tmojánenabaye. Cach te mo unga uaranga entšanga nyëtšá tmojanoboté, Jesucristbeñe ošbuáchiyënga jtemnama. <sup>42</sup> Chënga corente imojtseboše jtsamama chë Jesusbe ichmónënga imojtsabuatambá soyënga. Tšabá yojtsacochebiona nyëtsanga cánýiñe jtemnama y imojanamana mo chë Jesucristbeñe ošbuachiyëngcá cánýiñe jtsesayana y cánýiñe Bëngbe Bëtsáftaca jtsencuëntayana.

### *Ntšamo chë natsana Cristbeñe ošbuáchiyënga vida imnabomna*

<sup>43</sup> Nyëtsanga imojtsenjanaye, chë ichmónënga bëtš soyënga y inye soyënga chabe obenana jinýanjýyama chamomama Bëngbe Bëtsá tojánmayeca. <sup>44</sup> Nyëtšca chë Jesucristbeñe ošbuáchiyënga sempre cánýiñe mo canýacá imojtsemna y nyëtšca chëngbe bomna soyënga nyëtsangbiam yojtsemna. <sup>45</sup> Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë inýënga tojtsëjabotcá. <sup>46</sup> Cada te imojanamana Bëngbe Bëtsabe bëtš yebnentšë jénefnana cha jëtschuayama, y yebnënguenache cánýiñe imojtsesaye oyejuayënga y ndoñe ojëndayënga. <sup>47</sup> Chënga imojanamana Bëngbe Bëtsá jtsatschuanayana, y nyëtšca entšanga imojtsejuabnaye chë Jesucristbeñe ošbuáchiyëngbiam tšabe entšanga imojamna ca. Y cada te Bëngbe Bëtsá yojtsama más ošbuáchiyënga chamóbotema, chë ndëmuanýënga cha yojtsatsebacayënga.

## 3

### *Pedro canýe coshëtbioye tbojanshná*

<sup>1</sup> Canýe te, Pedro y Juan Bëngbe Bëtsabe bëtš yebnoye tbojánata bëtš mošenana ora. Chca ora entšanga imojanamana Bëngbe Bëtsáftaca jtsencuëntayana. <sup>2</sup> Bëngbe Bëtsabe bëtš yebnentšë canýe cosheto yojtsemna; tojanonýná orscana chca šocá inamna. Entšanga imojanamana cada te cha juanatsana canýe luaroye, Bëngbe Bëtsabe bëtš yebnoca, Botamana Amashjuana ca uabáinoye, chë tmojtsachnëjuanënga lemošna chaótejañama. <sup>3</sup> Pedro y Juan Bëngbe Bëtsabe bëtš yebnoye jamashënguama chë cosheto tojánanyë ora, canýe lemošna chátbioye yojótejañe. <sup>4</sup> Chatna chë šocá imojtsonýaye, y Pedro tbojaniyana: “Sochtsënýaye ca.”

<sup>5</sup> As cha yojtsënýaye y yojtsejuabnaye ndayá chjójyëngacñe ca. <sup>6</sup> Chora Pedro tbojaniyana: “Quetsátsbomna ni crocénana, ni castellano aca jatšetayama, pero atšë chanjama Jesucristbe obenánaca ndayá acbiam jamama atšë stsobencá: Jesús chë Nazaretocá obenana endbomna; chíyeca atšë cbëyana chabe mándoca, matëtsbaná y cochtsana ca.”

<sup>7</sup> Pedro chca tbojaniyana ora, tbojanábuacueshache catšbióicatšë y tbojtjanatsbaná, y cachora chë cosheto shecuatšíñe y shëmiabeñe añemo yojtsatsbomna. <sup>8</sup> As chë cosheto, canýe jontsënjëse tšabá tojantšá y tojanontšë tšabá jtsanana, y Bëngbe Bëtsabe bëtš yebnoye Juan y Pédroftaca tojánamashëngo; yojtsayontsënjnaye y Bëngbe Bëtsá ibojtsatschuanaye, tbojanshnama. <sup>9</sup> Chë Bëngbe Bëtsabe bëtš yebnentšë imojëtsemnënga nyëtsanga cha tmojáninýe tšabá jtsanana y Bëngbe Bëtsá jtsatschuanayana. <sup>10</sup> Chënga imnatátsëmbo cha chë cosheto yojamnana, chë nda yojanamana Bëngbe Bëtsabe bëtš yebnoca, chë Botamana Amashjuantšë jótbemana, entšanga lemošna jotejañama. Cha tšabá yojtsatsmënamna entšanga ojnanánënga imojtsemna.

### *Ntšamo Pedro tojanoyebuambá Salomonbe Amashjuana ca uabáinentšë*

<sup>11</sup> Chë cosheto ya shnaná ora, ndoñe yontseboše Juan y Pédrëbentšana joluárana. As, nyëtšca entšanga ojnanánënga tmojanótjajo chë amashjuana otšbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojëtsemnoye. <sup>12</sup> Pedro chë entšanga tojánanyë ora, tojanëyana: “Taitanga y mamanga, Israeloquënga, žndáyeca chë soyëngama ojnanánënga šmojtsemna? žNdáyeca nyë šcojtsëbuatjta? žŠmojtsejuabná nyë bëndatbe obenánaca quem boyabása tifjashná ca? žO šmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca? <sup>13</sup> Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëtš taitanga imojanošbuaché, cha tonjinýanyë chabe oservená Jesús chë más uamaná yomnama. Cha tšëngaftanga chë mándayëngbe cucuatšíñe šmonjánboshjona chamóabama. Pilato enjëtseboše Jesús jëtsboshjonama, pero tšëngaftanga Pilatbe delante šmonjánayana chca ndoñe šmontsanboše ca, y chíyeca Pilato ndoñe tbontanboshjona. <sup>14</sup> Jesús uamaná y nyëtšca soyënguñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canýe boyabása, entšá obanayá, chabuatsboshjonama. <sup>15</sup> Y chca, chë ndegombre

tšabe vida chašmotsebobmnama amábioye tšəngaftanga šmonjanóba. Pero Bəngbe Bətsá tojanma cha cháuatayenama y bənga chə soye fsənjanínŷe y chama fsəndétatsəmbó. <sup>16</sup> Jesús puerte obená endménayeca, quem cosheto añémoca entsatsməna. Ntsamo šmonjinŷe y šmonjatatsəmbonca ndegombre tonjopasá Jesúsbeñe betsošbuáchema. Chə Jesúsbeñe jtsošbuáchiyana tonjama cha tšabá tšəngaftangbeñe chaotsatsmənama.

<sup>17</sup> “Taitanga y mamanga, atše səndétatsəmbó tšəngaftangbe causa y tšəngaftangbe aməndayəngbe causa Jesús tojanóbanama. Pero tšəngaftanga chca šmojanma, ndayá šmojətsamama ntsetatsəmbcá. <sup>18</sup> Tempo, Bəngbe Bətsá chə chabe juabna oyebuambnayənga tojanaməndá entsanga jábuayenama, chə Bəngbe Bətsabe Uámana Uabuayaná puerte ngménana yochtsanbomnama. Morna, ntšamo Bəngbe Bətsá tojanayancá ya tonjochnəgo. <sup>19</sup> Chcasna, ngménaca menójuabonga bacna soyənga šmojtsamama, chca amana šmochtsajbaná y Bəngbe Bətsabe benache šmochtishache, chca, tšəngaftangbe bacna soyənga cha chacmabuajuánama. Chca chašmojaməse, Bəngbe Bətsá echanjama tšəngaftangbe ainaniñe oyejuayana chašmotsóbomñama, <sup>20</sup> y tšəngaftangbiye bochanjíchmuu Jesús, chə tempo chabe Uámana Uabuayaná Bəngbe Bətsá tojanbemá. <sup>21</sup> Canŷe te echanjóshjango, Bəngbe Bətsá lempe tsməmacá jətsbemama. Chə tentscuana Jesús bontsemna celoca joquédana. Chca echanjochnəgo ntšamo Bəngbe Bətsá chabe juabna oyebuambnayəngbiayana entsanga tojanabuayenacá. <sup>22</sup> Moisés bəngbe bəts taitanga tojanabuayená: ‘Chə Utabná Bəngbe Bətsá canŷe chabe juabna oyebuambnayá ntšamo atše səndmėncá, cmochanjayəntsíchmuu. Cha tšəngaftangbentsana echanjábcoca y tšəngaftanga cmontsamna ntšamo chacmojtsətsətsnacá cha jtseyeunanana. <sup>23</sup> Ndánaca chábioye ndoñe chabonjoyeuná, cha bontsemna chə Bəngbe Bətsabe entsángbentsana luaroca jtsemnama y chamotseepochocama ca’ —cha tojanayana.

<sup>24</sup> “Y nŷetsca chə Bəngbe Bətsabe juabna oyebuambnayəngnaca Samuel orscana, entsanga tmojanabuayená ndayá quem tempo yochjanchnənguama, ntšamo mora montsonŷacá. <sup>25</sup> Chabe juabna oyebuambnayəngaftaca Bəngbe Bətsá tojanašebuchená bəts soyənga tšəngaftangbiama, y tšəngaftangbe bəts taitangaftaca canŷe trato tojanbema; chə soyənga cabá tšəngaftangbiama entsemna. Bəngbe Bətsá Abrahámioye məntšá tojaniiyana: ‘Chə ácbentsana entsángbeyeca tšabe bendicionəga chanjama nŷetsca quem luarentsa entsangbiama ca.’ <sup>26</sup> Bəngbe Bətsá tojama chabe oservená cháuatayenama y natsana tšəngaftangbiye tojanichmó, bacna soyənga amana chašmotsajbanama. Y chca, Bəngbe Bətsá jamama tšəngaftangbeñe tšabe bendicionəga chaotsemnama ca” —Pedro tojanayana.

## 4

### *Pedro y Juan Jerusalenentša mandadəngbe delante*

<sup>1</sup> Pedro y Juan cabá entsanga imojtsətsətsnaye; chorna chə chata ibojtsemnoye tmojánashjajna judiəngbe bachnanga, Bəngbe Bətsabe bəts yebnentša soldadəngbe aməndayá y saduceo ca uabaina judiəngbe aməndayənga. <sup>2</sup> Chatna entsángbioye imojtsabuátambaye Jesús tojtanayenama y chə soye yojánayana obanənga ndegombre mochtayena ca. Chə causa, chə tmojánashjajna aməndayənga tojanətəna. <sup>3</sup> As, Pedro y Juan tmojánishəche y ya jətiñe yojtsemna causa, cárceloye tojanətame yəfsanəntsacuana. <sup>4</sup> Masque chca, banga entsanguəntsana, ntšamo Pedro y Juan tojanayancá tmojanuenənga, añe Jesucristbeñe imojtsošbuáchiyē. Chə tentscuana shachna uaranga Jesucristbeñe ošbuáchiyənga imojtsemna, nŷe boyabásenga jacuəntase.

<sup>5</sup> Yəfsana, chə judiəngbe aməndayənga, judiəngbeñe bətsəjeməngcá aməndayənga y ley abuátambayənga Jerusalenentše tmojánenəfna. <sup>6</sup> Chəntsna imojtsemna, chə bachnangbe más uámana aməndayá Anás ca uabainá, Caifás, Juan, Alejandro y chə bachnangbe más uámana aməndayəngbe nŷetsca pamállangnaca. <sup>7</sup> Chora chənga tmojanmandá Pedro y Juan junətsama, y chəngbe tsəntsaca tojanatsá y məntšá tmojanatá: —¿Nabe obenánaca chə soyənga šojtsama, o, nda derecho tcmənjatsatá chə soyənga chašotsamama ca?

<sup>8</sup> As Pedro, chə Uámana Espíritu chabe ainaniñe corente jtseməndayəse, məntšá tojanəjua: —Israeloca mándayənga y bətsəjemənga, <sup>9</sup> məntə šconjatjá chə jama ndobenáftaca tšabe soye tifjamama y ntšamo cha mora jama yojtsatobenama. <sup>10</sup> Chcasna, ntšamo tojopasama bochanjabuayená, chca, tšəngaftanga y nŷetsca Israeloca entsanga chə soyənga chašmotsetatsəmbuama. Quem boyabása, chə tšəngaftangbe tsəntsaca entsemná, Jesucristo chə Nazaretocabe bəts obenánaca chca tšabá entsatsməna. Y Jesús endmėna nda tšəngaftanga šmonjancrucificá y ndabiamma Bəngbe Bətsá tojanma cháuatayenama. <sup>11</sup> Jesusbiama Bəngbe Bətsabe uabemana palabrənguñe məntšá endayana: “Chə yebna jebuanənga tmontsanaboté ndətsbé, mora chə más bəts uashacuanəsentše entsejájona ca”. Tšəngaftanga šmondmėna mo chə yebna jebuanəngcá, er Jesúsbiye šmontsanaboté y mora cha chə más uamaná entsemna. <sup>12</sup> Nŷe cha yobena tšəngaftanga játsebacama. Bəngbe Bətsá ndocna nŷe

entšábioye tbonjatšetá chabe obenana chca jamama; chíyeca quem luarentše ndocná más quenátobena bēnga játsebacama. Nye Jesucristbe obenánaca aīne ca—Pedro tojánayana.

<sup>13</sup> Chēnga imojenjaná Pedro y Juan tša aīémoca ibojtsóyebuambnama tmojáninye ora, y chata tempo nduatsjínjenata y librēša nduabuatmata bētsemnama tmojántatsēmbona ora. Chca chē mándayēnga tmojántatsēmbona chata Jesúseftaca bayté ibojamnama. <sup>14</sup> Y entšanga imojtsónyaye chē tmojanšná cha chentše chátaftaca yojtsemnama; chē causa, chēnga ndocá más tmojanobená chatbe contra jatichámuana. <sup>15</sup> As chora tmojanamēndá chentšana chábuaisebocnama y chentše tmojanouedangna chē soyama imojtsenatsētsnaye. <sup>16</sup> Chēnga imojtsentjanaye: “¿Ndayá chátaftaca mochjama ca? Jerusalenentše oyenēnga montsetátsēmba chata chē bēts soye Bēngbe Bētsabe obenánaca tbojanama; chē causa, bēnga ndoñe quemuátobena jayanana chata chca ndoñe tbojanama ca. <sup>17</sup> Pero entšanga chama ndoñe más chamondētsencuéntamna, chata mochjáuyana: ‘Ndoñe más entšángbeñe Jesús smattsebáyana; y ndoñe chašmonjoudenēse, jabuache castigo šochántsebonma ca.’”

<sup>18</sup> As chē mándayēnga cachiñe chata tmojánachembo y tmojanamēndá ndoñe más Jesús jtsebáyana, ni chabiamá entšángbeñe jtsabuátambayana. <sup>19</sup> Pero Pedro y Juan tbojánayana: “¿Ntšamo tšēngaftanga smatjayana ntšamo fchanjayana ca? Ndegombre, Bēngbe Bētsabe bomínýiñe ndoñe tšabá quenátsmēna tšēngaftangbioye aīne joyaunayana y chábioye ndoñe. <sup>20</sup> Er bēnga queftsátobena jtsajbanana oyebuambnayana chē tifiñye y tifjouena soyēngama ca.”

<sup>21</sup> Chē mándayēngna chátbioye tojtsanautatjá, pero chentšana tmojanabáshejuana. Nýetsca entšanga Bēngbe Bētsá imojtsatschuanaye ntšamo tojanopasama; chíyeca, chē mándayēnga ndoñe tmojanobená tondaye ntjínjenana ntšamo chata jácastigama. <sup>22</sup> Chē boyabása, ndáftaca chata chē bēts soye Bēngbe Bētsabe obenánaca tbojanma, inabomna canta bnētsana uatama más.

*Jesucristbeñe ošbuáchiyēnga Bēngbe Bētsá tmojanimpadá más aīemo chauatšatama*

<sup>23</sup> Pedro y Juan ya tmojanabáshejuana ora, tbojánata chē inye ošbuáchiyēngaftaca jateninjenama y lempe ntšamo chē bachnangbe amēndayēnga y bētsējemēngcá mándayēnga chátbioye tmojanēyancá, chēngbioye tmojanacutá. <sup>24</sup> Chēnga chca tmojanuenentšana, nýetscanga cányiñe tmojanontšé Bēngbe Bētsáftaca mēntšá jencuéntama: “Bēngbe Utabná, aca chē nda tojama celoca, fshantse, nýetsca bējayēnga y lempe ntšamo chenache yomncá, <sup>25</sup> chē Uámana Espíritbiajana tcojánayana y acbe oservená David, ntšamo tcojanayancá tojanábema, mēntšá:

¿Ndáyeca entšanga yapa imojtsetsátjaye ca?

¿Ndáyeca imojtsejuabná nye bonamentiaa soyēnga jamana?

<sup>26</sup> Quem luarentša reyēnga y amēndayēnga imoprontánēnga, nýetscanga tmojenoyeuná Bēngbe Bētsá y chabe Uámana Uabuayaná chē Cristbe contra jtsemnama ca—cha tojanábema.

<sup>27</sup> “Ndegombre chca tonjopasá. Rey Herodes y Poncio Pilato, quem bēts pueblentše, ndoñe judiēngaftaca y israelitēngaftaca tmonjáneneñfna, jenóyeunayama ntšamo jamana, Jesús chē acbe uámana oservená y chē Uámana Uabuayaná tcojabemábioye jóbama. <sup>28</sup> Tempo, Bēngbe Bētsá, acbe obenánaca y ntšamo icnabošcá tcojanmandá ntšamo mora chaotsemnama, y chēnga chca Jesúseftaca tmonjama. <sup>29</sup> Morna Bēngbe Bētsá, mouena ntšamo chēnga montsichamo, bēnga jasúfriama cašojtsamna ca; chcasna, cochjama bēnga fchayobená Jesusbe tšabe noticiēnga bēts aīémoca entšángbeñe jtsóyebuambnayama, <sup>30</sup> y cochjama acbe obenánaca šoquēnga tšabá chamotsatsmēnama y cochjama bēnga fchayobená bēts soyēnga jamama, Jesús chē uámana oservenabe obenánaca y cha jótšēmbonēse ca” —chēnga tmojánayana.

<sup>31</sup> Bēngbe Bētsáftaca jencuéntama tmojanpochocá orna, chē tmojáneneñntšē tojanangmēmama; y nýetscangbe ainaniñe chē Uámana Espiritu tojanontšé más jtsemándayana, y chēnga tmojanontšé más aīémoca Bēngbe Bētsabe soyēngama entšanga jábuayenama.

*Nýetsca bomna soyēnga nýetscangbiamá yojtsemna*

<sup>32</sup> Jesucristbeñe ošbuáchiyēnga, nýetscanga canye juabna imojtsebomna y ainaniñe cach canye ebionana. Ndocná ntjatichamuana chabe soyēnga nye chabiamá yojtsemna ca, pero aīne imojtsichamo, “atše sēndbomna soyēnga nýetscangbiamá entsemna ca”. <sup>33</sup> Chē Jesusbe ichmónēnga puerta obenánaca mēntšá imojtsichamo: “Fsēnjinye y fsēntsetatšēmba Bēngbe Utabná Jesús obanēnguentsana tojtayenama ca.” Y Bēngbe Bētsá yojtsama chē ichmónēnga bētscá tšabe bendicionēnga chamotsebomnama. <sup>34</sup> Jesucristbeñe ošbuáchiyēngbeñe ndocná yonjamna ndayánaca uajabotá, er nýetscanga fshantse o yebna bomnēnga imojanamana jtsatobuíyana, y chē crocénana <sup>35</sup> chē ichmónēngbioye jayentsbuáchiyana, ntšamo

tojtšëjabotcá nyetścanga jujátayama. <sup>36</sup> Chca tojanma canya Bëngbe Bëtsabe bëts yebnoca trabajáyá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. <sup>37</sup> Chana, fshantse yojtsatobuiye, y chë crocénana Jesusbe ichmónëngbiye yojáyentšbuachiye, chë uajabótëngbiana chaoservema.

## 5

### *Ntšamo Ananías y Safiratac tojanopasá*

<sup>1</sup> Inamna canye bacó, Ananías ca uabainá, y chabe shemna, Safira ca. Chatna canye fshantse tbojániye. <sup>2</sup> Ananías y Safirna tbojanenóyeunata; chcasna, batšá crocénana cachatbiana tbojanobuajó y chë tojanójama crocénana ichmónëngbiye Ananías tojanamba, pero tojanéyana chana canjamna nyets crocénana ntsachetšá chë fshantsama tbojanosháchiñe ca. <sup>3</sup> As Pedro tbojaniyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espiritu chë crocénánama jabuambayama ca? Acna chë fshantsama tmojtubuená crocénantšana cach acbiana batšá tcontábojama. <sup>4</sup> Cabá ntsatobuiye ora, chë fshantse ácbeshe endánmëna y tojtsatobuiyentšana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojjuabó chë crocénánama chca jobostérama? Chca jamëse, ndoñe nye entšángbiye quecatabuambná, sinó Bëngbe Bëtsánaca ca” —Pedro tbojaniyana.

<sup>5</sup> Ananías chë palabrenga tojanuena ora, obaná tojánshajaye. Y nyetścanga chama tmojántatšëmbonënga corente imojtsauatja. <sup>6</sup> Chentšana, básefta bobontšënga tmojánashajina y Ananíasbe cuerpo entšëjuaca tmojanandmaná y jauátbontsama tojanamba.

<sup>7</sup> Mo unga horëntscose, Ananíasbe shema Safira tojánashajango, pero ndoñe yontsetátšëmbo ntšamo chabe boyáftaca tojanopasama. <sup>8</sup> Chora Pedro tbojantjá: —Ndegombre šmëyana, ¿chë šmonjayana nyetšnama chë fshantse šmojiye ca?

As chë shema tbojanjuá: —Aññe, nyetšnama fsënjiye ca.

<sup>9</sup> Pedro tbojaniyana: —¿Ndáyeca tsëndata šojenoyeuná Bëngbe Utabnabe Espiritu jabuambayama, y cabá castigo jtsebomnama ndoñe šontsobatmana ca? Acbe boyá jauátbontsama tmonjuambënga muentšë bëšoca montsemna y mora ácnaca cmochanjuamba ca.

<sup>10</sup> Cachora Safira Pédrëbe shecuatšentšë obaná tojánshajaye. Chë bobontšënga tmojtanamáshina ora, obaná Safira tmojáninýena; asna, chentšana tmojanamba y cachabe boyabe juachaca tmojanatbontšá. <sup>11</sup> Y nyetšca Jesucristbeñe ošbuáchiyënga chentšë imojtsemnënga y nyetścanga chë soye tmojántatšëmbonënga, corente imojtsauatja.

### *Ba bëts soyënga chë ichmónënga tmojanma, Bëngbe Bëtsabe obenana jinýanýiyama*

<sup>12</sup> Chë Jesucristbe ichmónëngaftaca ba bëts soyënga entšángbeñe yojtsebinýna Bëngbe Bëtsabe obenana jinýanýiyama; y nyetšca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentšë. <sup>13</sup> Chë inýenga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtsenutana; pero entšangna chë ošbuáchiyëngbiana tšabá imojtsencuëntaye. <sup>14</sup> Bëngbe Utabnábeñe ošbuáchiyënga más imojtsóbotena, bëtscá boyabásenga y shembásengnaca. <sup>15</sup> Tša bëts soyënga chë ichmónëngaftaca yojtsebinýna; chiýeca entšanga imojanamana jutsnëshangañe y tjuashënguñe tsáshenoye šoquënga jubuacnana, chca, Pedro chëjana tojtsachñëjuana ora, nye mo chabe sómbrenaca chëngbe cuerpëjana chaochnënguama, shnánënga jtsatsmënama. <sup>16</sup> Jerusalén chábuañe pueblënguentsana ba entšanga imojanamana jabana, y šoquënga y bacna bayëjbe juabna uambayënga imojtsëyabó; y nyetścanga shnánënga imojtsatsmëna.

*Bëngbe Bëtsá tojanma Pedro y chë inýe ichmónënga cárcelocana natjëmbana chámuaisebocnana*

<sup>17</sup> Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerta envidia imojtsebomna. <sup>18</sup> As chë ichmónëngbiye tmojánishëche y chë bëts pueblentša cárceloye tojtsanëtame. <sup>19</sup> Pero ibetna, Bëngbe Utabná canye ángel tbojanichmó y chë utámenentša bëšášangá cha tojánatëfjo, chënga tojtanebuacna y mëntšá tojanéyana: <sup>20</sup> “Motsajna, Bëngbe Bëtsabe bëts yebnentšë šmochjámashjina, y entšanga šmochjabuayená ntšamo cuanjama chë nyetšca tescama yomna tšabe vida jtsebomnama, Jesucristoftaca cányñe mo canýacá jtsemnëse ca.” <sup>21</sup> Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontšë entšanga jabuátambana.

Chëntscuana, chë bachnangbe más uámana amëndayá y chabe ústonënga, chë Israe- loca bëtsëjemëngcá mándayënga y inýe chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatšama. <sup>22</sup> Pero chë soldadënga chë utámenoye tmojánashajina ora, chënga chentšë ndoñe tmonjánanýena. Chcasna, chënga tmojtaná chë mándayënga chca jaúnayama.

<sup>23</sup> Y tmojanayana: “Chë utámenoca fsënjínýena lempe tšabá endëtsëtámeñe y soldadëngna nyëtsca bësasangá monduabojanýanga; pero fsënjatëfjo y tsoye fsënjámashjna orna ndocná chibiátinýena ca.”

<sup>24</sup> Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsëtëmnana y imojtsentjanaye ndayá chentšana yochanopásama. <sup>25</sup> Chorna, chënga imojtsenmentse canýe boyabása tojánashjanga y mëntšá tojanéyana: “Chë šmojutámiënga mora Bëngbe Bëtsabe bëts yebnoca montsemna, entšanga montsabuatambá ca.”

<sup>26</sup> Chë soldadëngbe amëndayá tojána soldadëngaca, chë Jesusbe ichmónënga junatsama; pero nyë tšabá tmojanënatse, er chënga entšangbiana imojtsauatja, nderado cachëngbioye ndëtsbëngaca muantsëbaye. <sup>27</sup> Chëngbioca tmojanëshejajna ora, mandayëngbioye tmojanënatse; chora chë bachnangbe más uámana amëndayá mëntšá tojanéyana: <sup>28</sup> —Bënga jabuachana tcbontsëuyaná y tcbonjáuyana ndoñe šmontselesenciana jtsóyëbuambnayama chë boyabása Jesús tojanáyana yojtsemna jabuátambama soyëngama ca. Masque chcasna, mora tsëngaftanga nyëtsca chë Jerusalenentša oyenënga chabe soyëngama šmojtسابuatambá y šmojtseboše, cha tojanóbanama castigo bëngbeñe chaotsemnna ca.

<sup>29</sup> Chorna, Pedro y chë inýe ichmónënga tmojanayana: —Bënga šontsamna natsana Bëngbe Bëtsá joyeunayana y chentšana entšangbioye. <sup>30</sup> Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tsëngaftanga šmonjanóba canýe cruciñe juajabonjëse. <sup>31</sup> Bëngbe Bëtsá tbontatsbaná y chabe catšbioica tbojëstthema, jtsamëndayama, y tbojábema entšangbe Unachayá y Atsebacyá, chca, Israeloca entšanga ngménaca chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnna. <sup>32</sup> Bënga fsëntsichamo ndayá bënga ndegombre tifjinýe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyëbuambnaye. Bëngbe Bëtsá endbëtšama chë Uámana Espíritu cháumashëngo chë tmojtseyeunanëngbe ainaniñe jtsemándayama ca —chënga tmojanáyana.

<sup>33</sup> Chë mándayënga chca tmojanuena ora, puerta tmojanotjayaná y tmojanbošena chë ichmónënga jtsëbáyama. <sup>34</sup> Pero chë mándayënguentse yojtsemna canýe fariseo, Gamaliel ca uabainá. Chana canýe ley abuatambayá inamna y entšanga puerta inmarrespetana. As cha tojantsá y tojanmandá chë ichmónënga ratotema chentšana jubuacnama. <sup>35</sup> Chentšana chë inýe mándayënga tojanéyana: “Israeloca taitanga, puerta cuedado šmochtsebmna ntšamo quem boyabásëngaftaca šmochjamama. <sup>36</sup> Quem soyama šmochjenójuaboye: Ndoñe baytë quenátsmëna, Teudas tonjánbocna y cha enjánichamo canýe uámana entšá canjamna ca, y mo canta patse entšanga cha tmojanasto. Pero chora inýenga cha tmontsanóba y chabe ústonënga tmontsanáshana, y chca lempe tontsanopochocá. <sup>37</sup> Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca inýenga tmontsanóba y nyëtsca chabe ústonënga tmontsanáshana. <sup>38</sup> Chýeca atšë cbëýana, quem boyabásënga matabáshejuana y ndocá mataborlánana. Ntšamo chënga montsamancá, nyë entšangbe juabna y nyë chëngbe trabajo tojtsemnëse, betscó echanjopochocá. <sup>39</sup> Pero chca Bëngbe Bëtsabe soye tomnëse, tsëngaftanga ndoñe quešmochatobenaye jáýënanama. Cuedado šmochtsebmna, nderado mo Bëngbe Bëtsabe uayayënga šmuatjanenobiama ca” —cha tojanéyana.

Y as chënga Gamaliel tmojanoyeuná. <sup>40</sup> Chcasna, chë ichmónëngbioye tmojanachembo, tmojtsanachebuánanja y tmojanéyana Jesusbe uabáinaca entšangbeñe ndoñe chamondëtsoyëbuambná ca; y chentšana tmojtanabáshejuana. <sup>41</sup> Chora chë ichmónënga chë amëndayëngbentšana puerta oyejuyënga tmojésanbocna, er Bëngbe Bëtsá tojanalesenciá jasúfriama, chënga Jesusbiana oservénënga bëtsemnayeca. <sup>42</sup> Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnna entšangbioye imojanabuayinýá, Bëngbe Bëtsabe bëts yebnentšë y yebnënguenáchna.

## 6

*Chë ichmónëngbiana ujabuáchanënga tmojanëbuáyana*

<sup>1</sup> Chë tempo, Jesucristbeñe ošbuáchiyënga betscó imojtsóbotena. Chora chë Jesucristbeñe ošbuachiýëngbentšë, chë judiënga griego biyanga batšá imojtsëtsátjaye y chë judiënga hebreo biyangbiana mëntšá tmojanayana: “Chë griego biyangbe viudángbioye ndoñe cachca quemnatëjabuáchana ntšamo chë hebreo biyangbe viudángbioye cada te montsëjabuachancá ca.”

<sup>2</sup> Asna, chë bnëtsana uta ichmónënga nyëtsca chë Jesucristbeñe ošbuáchiyënga tmojanëbuaja y tmojanéyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyëbuambnayana nyë chë viudanga jtsanyënama chë tojtšëjaboto soyënguifë.

<sup>3</sup> Chcasna, baconga y batanga, ts̱əngəftanguentšana canjšəftanga mēbuáyana, ts̱abá mand-bomnəngcá šmēbuátmēnga, chamotsemna osertánēnga y chē Uámana Espírítu chēngbe ainaniñe chaotsemánda, as chēnga chē ujabótēnga jts̱əjabuáchanama trabajo fchanjábanjīye.

<sup>4</sup> Y Bēngna šontsamna ṉyets tempo Bēngbe Bētsáftaca jtsencuéntayana y Bēngbe Bētsabe palabra entsānga jtsabuayīynayana ca” —chēnga tmojánayana.

<sup>5</sup> Ṉyetscanga tojanogusetá ntšamo chē ichmónēnga tmojanayancá; as, Esteban tmojanábuaayana; canjē boyabása puerto ošbuachiyá cha inamna y chē Uámana Espírítu chabe ainaniñe yojanmánda. Chentsana tmojanēbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entsá, Antioquía bēts pueblócá, y cha yojanamana Bēngbe Bētsá jtsadoránana mo cach judiēngcá). <sup>6</sup> Chentsana chēnga tmojanēnatse Jesucristbe ichmónēnga imojtsemnoye; chocna, chē Jesusbe ichmónēnga Bēngbe Bētsá tmojanimpadá chē ichmónēngbe trabajēnguiñe chē ubuáyanēnga chaújabuachama, chēngbe cucuatšēnga chēngbe bestšaentše jajájuase.

<sup>7</sup> Más banga Bēngbe Bētsabe palabra imojtsuenana, y chca, Jesucristbeñe ošbuachiyēnga más imojtsóbotena, y Jerusalenentše más ošbuachiyēnga betscó imojtsóbotena. Y ba judiēngbe bachnāngnaca tmojanontšé Jesucristbeñe jtsošbuachiyana, ntšamo chē iṉyēnga imojtsanošbuacheca.

#### *Esteban tmojánishache*

<sup>8</sup> Esteban, Bēngbe Bētsabe obenana y chábentšana ts̱abe bendicionēnga yojtsebmōnēse, entsāngbeñe bēts soyēnga yojtsama. <sup>9</sup> Báseftanga “Ya Cachcá Atabashejuana Oservénēnga ca” uabainēngna tmojanontšé Estébanoftaca enatsētsnayana. Chēnga imojamna judiēnga Cirenouēnga, Alejandríouēnga, Cilicia y Asíouēngnaca, y chēngbe enefjuana luare yojanabaina “Ya Cachcá Atabashejuana Oservénēngbe Yebna ca”. <sup>10</sup> Pero chē Uámana Espírítu tojanma Esteban chaóyeubuambama bētscá osertanacá, y chíyeca chēnga ndoñe imontsobena ntšamo cha jojuana. <sup>11</sup> As chēnga báseftanga tmojanēbuénaye Estébanbe contra podesca soye chamuayanama, mēntšá: “Cha fs̱ənjoyeuná Moisesbiana y Bēngbe Bētsabiana ndoñe ts̱abá jts̱oyebuambnayana, mo cuafjoyanguangcá ca.” <sup>12</sup> Chcase chēnga tmojanma entsānga, bēts̱ejmēngcá mándayēnga y ley abuátambayēnga Estébanbe contra chamóntša enboudenanana; y as, Esteban tmojanotbá y chē mándayēnga imojtsemnoye imojuichēmo. <sup>13</sup> Y tmojanēnatse básefta entsānga, uayátsenaye soyēnga y podesca soyēnga Estébanbe contra chamuayanama; as chēnga mēntšá tmojánayana: “Mua bacna soyēnga entsichamo chē Bēngbe Bētsá jtsadoránama bēts yebnama y Moisesbe leyēngama. <sup>14</sup> Y fs̱ənjoyeuná cha jayanana, Jesús Nazaretocá Bēngbe Bētsabe bēts yebna caochtsepochóca y caochjama bēnga ṉye chabe mandēngaca mandānēnga chamotsiyenama y ndoñe ntšamo Moisés bēngbe bēts taitanga tojētsanabuatambacá ca.”

<sup>15</sup> Chē mándayēnga y ṉyetscanga chentše imojétsetbiamanēnga Esteban tmojanonjīṉyē ora, tmojániṉyē chabe jubíá yojtsebuashiṉyīṉyāna mo canjē ángelbe jubiacá.

## 7

#### *Ntšamo Esteban tojanenēuyaná*

<sup>1</sup> Chora chē bachnangbe más uámana amēndayá, Estébanbioye tbojantjá: —¿Ntšamo acbiana montsichamcá ndegombre yojtsemna ca?

<sup>2</sup> As Esteban tojanējua: —Taitanga y baconga, mouenēnga. Bēngbe Bētsá, chē corente uamaná endmēná, Abrahámioye tbojánēbēbocna, cha Mesopotamíoca yojaniyena ora; tbojánēbēbocna, Harán bēts puebloca joyēnanama cabá nda ora, <sup>3</sup> y Bēngbe Bētsá tbojánianiya: “Metsebohshjona acbe fshantse y acbe pamíllanga y cbochanjiṉyīṉyīye luaroye cochjá ca.” <sup>4</sup> As Abraham chabe luare Caldea tojētsanboshjona y tojána Haránoca joyēnanama. Chabe taitá tojanóbanentšana, Bēngbe Bētsá Abrahámioye chē luaroye tbojánánatse, chē mora ts̱əngəftanga šmontsiyenentše. <sup>5</sup> Pero quem luaríñe ni mo base fshantse ndoñe tbonjētsanatšeta, ni mo ndayentše jtsiyenama. Pero afñe Abrahámioye tbojánšbuachená chē fshantse jatšetayama, chabiana y chabe básengbiana, Abraham tojóbanentšana. Chca tbojánšbuachená ora, Abraham ni canjē šešona bonjánbomna. <sup>6</sup> Y Bēngbe Bētsá mēntšá tbojánianiya: “Chē ácbentšana entsānga, iṉyēngbe luaroca áshjajnēnga mochántsemna, y choca oyenēnga chēngbe oservénēnga chēngbioye mochanjábiama y canta patse uatēntscuana jabuache mochanjasufrina ca.” <sup>7</sup> Y mēntšanaca tbojánianiya: “Pero atše chanjácastigaye chca oservénēnga chacmojábiama luarentša entsānga; y as, chentsana chē ácbentšana entsānga mochanjésebocana y mora bontsemna luaroye mochanjésabo y muentše atše šmochántadorana ca.” <sup>8</sup> Bēngbe Bētsá Abrahámioye tbojánšbuachená ṉye cha y chabe básengbe Taitá cha jtemnama y jamama ts̱abe bendicionēnga chēngbeñe chaotsemnama, y chama, chaotsiṉyānamna tbojanmandá chabe šešona, boyabásetema tojonjīná ora, base bobachtema chē más delicadentše jatētsana. Chíyeca, chabe uaquiñá Isaac tojanonjīná



ora, posufla tianoye Abraham base bobachtema chë más delicadentse tbojantëtse. Isaac cachcá tojanma chabe uaqiñá Jacoboftaca y Jacob cachcá tojanma chë chabe bnëtsana uta uaqiñëngaftaca. Chënga monjamna chë Israeloca bnëtsana uta bëts pamíllangbe taitanga.

<sup>9</sup> “Quem uaqiñënga bëngbe bëts taitanga monjamna. Chëngna, chëngbe uabentsá Josébíoye envidia innabomna y tmojtsatanobuiye, Egiptoye canye oservenacá chamotsánatseña. Pero Bëngbe Bëtsá Josébíoye nyëts tempo ibnauájabuachana, <sup>10</sup> chíyeca nyëtsca chabe ngmenënguentsana tbojanatsbocá y Bëngbe Bëtsá tojanma cha chaotsetatšëmbuama tšabá jóyebuambayama chë Egiptoca réybentse, Faraón ca uabainá. Bëngbe Bëtsá tojanma chë Faraón chaoyeuá ntšamo José yojamnana; chíyeca Faraón Josébíoye tojánbema Egiptoca mandado y chabe yebnënguentsë oyenëngbiámnaca.

<sup>11</sup> “Chë tempo, Egiptó y Canaán luariñe bëts shëntsana tojanóshjango y puerta ngménana yojtsemna y bëngbe bëts taitanga ndoñe imontsobena saná jónyënama. <sup>12</sup> Pero Jacob tojántatšëmbona Egiptoca saná yojtsemnana; asna, chabe uaqiñënga, chë bëngbe bëts taitanga choye tojanichamó. Chora yojamna chë natsanama chënga Egiptoye jama. <sup>13</sup> Uta soyama chënga tmojtesaná ora, José chabe catšátanga tojanëyana: ‘Atše José sëndmëna, tšëngaftangbe uabentsá ca.’ Chca chë Faraón Josebe pamíllangbiana tojántatšëmbona. <sup>14</sup> Chentšana, José tojanmandá chabe taitá Jacob y nyëtsca pamíllanga Egiptoye chamotsama. Canyëfta bnëtsana shachnënga imojamna chë Egiptoye tmojánanga. <sup>15</sup> Chcasna, Jacob Egiptoye tojána choca joyënanama. Choca cha tojanóbana y chë inye bëngbe bëts taitángnaca. <sup>16</sup> Jacob y chabe básenga, ntšamo imojtsobancá, chëngbe cuerpo Siquem bëts pueblíoye imojtsatambaye y tmojanëtebuantsá, Abraham tojëftsambuamé cuevëshënguñe. Abraham canye crocénanama Hamorbe uaqiñëngbiíoye, chëshënga yojtëyentšbuamiñe Siquem pueblíoca.

<sup>17</sup> “Ntšamo Bëngbe Bëtsá Abrahámíoye tbojanšbuachenacá jamama yojtsobeco ora, Egiptoca corente tmojanoboté Israeloca entsanga y banga chënga imojtsemna. <sup>18</sup> Cabana, Egiptoca inye rey tojanoyé y cha Josébíoye ndoñe tbojanabuátmána. <sup>19</sup> Chë reyna, bëngbe entsanga, chë bëngbe bëts taitángbiíoye tojanaingñe y tojanma chënga puerta chamosufrima; tojanamëndá, chë tmojtsónyina šësonatëmënga cachcá jtsënyayana chamotsóbanama. <sup>20</sup> Chë tempo canye básetema tojanonýná y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsëtsata cach yebnentse tmojanboché unga ishinyëntsuaná. <sup>21</sup> Cachcá jonýayama yojtsamna orna, Faraonbe bembe tbojanocñe y mo cachabe uaqiñá cuenta tbojanboché. <sup>22</sup> Chca, chë Egiptoquënga imnatátšëmbo soyënga Moisés tmojanbutëmbá y canye uámana entsá tojánbocna jóyebuambayama y ndayánaca jamama.

<sup>23</sup> “Canta bnëtsana uta tojánshjache ora, tojanenojuabó jama jtsëtatšëmbuama ntšamo chë Israeloquënga, chabe entsanga imojtsemnana. <sup>24</sup> Canye, Moisés tojáninye canye Egiptocá canye Israelocábíoye ibojtsejantšetaye ora; as Moisés tbojanoboguiyaná y chë Egiptocábíoye tbojtsanóba. <sup>25</sup> Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentsana chëngbiíoye játsebacama ca. Pero chë Israeloquënga ndoñe yontsësertana. <sup>26</sup> Yëfsana, Moisés tojánanyëna útata, cach Israelocata, ibojtsentsjanaye; chora cha betso tojána jetsëuyanama y tojanëyana: ‘Tsëndata catšata šondmëna, žndáyeca šojtsentsjanata ca?’ <sup>27</sup> As, chë inýabiíoye ibojtsentsjanayá Moisésbiíoye tbojtsanjuatšëntse y tbojaníyana: ‘žNda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’ <sup>28</sup> žCojtseboše átšnaca jóbama, ntšamo tonjopasá yëfse chë Egiptocábíoye tconjobacá ca?’ <sup>29</sup> Moisés chca tojanuena ora, Madián luaroye tojtsanachá y choca jojoyëna inye luarocana ashjangonacá. Chentše uta uaqiñata yojëftsabamna.

<sup>30</sup> “Chentšana canta bnëtsana uatëse, entsanga ndoyëna luariñe, Siná tjañe béconana, canye ángel tbojánëbëbocna zaržësha yojtsángbototjuantëse. <sup>31</sup> Moisés yojenjaná ndayá yojtsonýama y tšabá jinýama tojanobeconá ora, tojanuena Bëngbe Bëtsá mëntšá ibojtsatsësnaye: <sup>32</sup> ‘Atše acbe bëts taitangbe Bëtsá sëndmëna, Abraham, Isaac y Jacobë Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontsebmna choye jontješiyama. <sup>33</sup> As Bëngbe Utabná tbojaníyana: ‘Motsenóshecbotsca, er aca contsementse nye atšbiana luare endmëna, er átšnaca chentše sëntsemna. <sup>34</sup> Ndegombre sënjinýe ntšamo atšbe entsanga Egiptoca montsesufrina y sënjouena chëngbe oyabojuayana, y atše sënjabo chënga jabátsebacama. Chcasna, mabouena, Egiptoye cbochanjíchmuca ca’ —Bëngbe Bëtsá tbojaníyana.”

<sup>35</sup> Chentšana Esteban tojanëyana: “Quem Moisés entsanga tmojtsanaboté y tmojaníyana: ‘žNda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojtsanichmó, chë zaržëshentse tojanobinýná ángeloftaca. <sup>36</sup> As Moisés, bëngbe bëts taitanga Egiptocana tojësanebuacna y bëts soyënga tojanma, y inye soyënga Bëngbe Bëtsabe obenana jinýanyiyama Egiptentse, chë Buángana ca uabaina mar bëjayentse y entsanga ndoyëna

luarentše, canta bnětsana uatěntscuana. <sup>37</sup> Cach Moisés Israeloca entšanga měntšá tojaněyana: ‘Běngbe Bětsá tšěngaftanguentšana canya bochanjábema atšcá Běngbe Bětsabe juabna oyebuambnayá ca.’ <sup>38</sup> Moisés Israeloca entšangaftaca yojěftsemna chě entšanga ndoyena luaroca. Choca chě entšanga tmojánenefna Sinai tjañe béconana. Chentšana canye ángel Moisésoftaca tojanoyebuambá, běngbe běts taitángbiye chě buayenana soye Moisés chaoýebuambama, chě entšanga tsabe vida jónyēnana palabrenga; y Moisés chca tojanma, běngnaca chě palabrenga jouenama jobenayama.

<sup>39</sup> “Pero běngbe běts taitanga ndoñe tmonjánbošena joyeunayama, masna nye tmojt-sanaboté y Egiptoye jesshěconama imojtsaiseboše. <sup>40</sup> Moisés cabá chě tja tsjuanoca chě ángeloftaca yojtsemna ora, chěngbe bachnangbe más uamana aměndayá Aarónbiye měntšá tmojanianya: ‘Běngbe Bětsabe cuenta šmayentšpormá canye buashinýinýana soye jadórama, bēnga chašúnatsama. Er bēnga quemátstatšēmo ndayá yojtsopasana Moisés, chě Egiptocana šonjětsēbuacnáftaca ca.’ <sup>41</sup> As tmojanma canye buashinýinýana soye mo canye uacnabecá y cha jadórama ba bayēnga tmojanēbaye, y tmojanóbeyejanga cachēnga chě soye tmojanpormáyeca. <sup>42</sup> Chě causa, Běngbe Bětsá chěngbentšana tojtsanojuánañe y cachcá tojesaněñyaye chěngbe bacna soyēnga causa, estrellatēmēnga chamotsadoránama. Chca jochněnguama, Běngbe Bětsabe juabna oyebuambayēngbe librěšañe měntšá endayana, ntšamo Běngbe Bětsá tojanayancá:

Israeloca entšanga,

¿Atše jětschuayama bayēnga chešmēñanēbaye y chě soyēnga chešmēñanátšēmbona, chě canta bnětsana uata entšanga ndoyena luarentše tšěngaftanga šmonjěftsemna ora?

<sup>43</sup> Atše jadóra cuentna, chě Molocbiana jebna soye šmonjanacutsá y cha šmonjánadorana, y chě Refánbe estréllacnaca cachcá šmonjánama.

Chě soyēnga mo Běngbe Bětsá cuenta šmonjánbomna y cach tšěngaftanga šmonjanobopormá jadórama.

Mora chě causa atše chanjama, Babilonientšana más chcoye tšěngaftanga chacmotsēñatsama ca” —chñe endayana.

<sup>44</sup> “Běngbe tempsca běts taitanga entšanga ndoyena luaroca, chě jatsjacama opodena yebna imnabomna; chě yebnentše Běngbe Bětsá chěngaftaca tojanoyebuambá. Inajebna ntšamo Běngbe Bětsá Moisésbiye tbojanmandacá, y cha tojanma ntšamo chaojebuama Běngbe Bětsá tbojaninýinýecá. <sup>45</sup> Běngbe běts taitangna chěngbe taitángbentšana chě jatsjacama opodena yebna chěngbiama tmojanóyēngacñe, y chēnga chě Canaán luaroye Josuéftaca, chě inye luaroquēngaftaca jěntsama tmojána ora, chě jebna soye tmojanamba y chocna, Běngbe Bětsábeyeca chentša entšángbiye Israeloquēngbentšana tmojtanēbuacna; y chě jebna soyna chě tmojanayēñaná luarentše tojanoquedá, rey David yojětsiyeněntscuana. <sup>46</sup> David tsabá mandbomná inamna, chíyeca Běngbe Bětsá cháftaca puerta yotsóyejuaye. David chábiye lesencia tbojanotjañe jajebuama, Běngbe Bětsá chě Jacob tbojanadorá cha, chentše chaotsiyenama. <sup>47</sup> Pero Salomón inamna nda chě Běngbe Bětsabe běts yebna tojanjebuá. <sup>48</sup> Masque chě celoca Běngbe Bětsá, entšangbe jebna yebniñe ndoñe quenatiyena. Ntšamo Běngbe Bětsabe juabna oyebuambnayá tojanabemcá, ndayá Běngbe Bětsá tojanayancá:

<sup>49</sup> ‘Celoca endmēna chě luare ndayentšana atše tsmánda,

y quem luare endmēna nye mo canye tšenētemcá ndayentše atše shecuatsēnga chjajcaye. As, ¿ntšamo atšbiama jebna yebna šmochjajebo ca?’ —chě Utabná jayanana—;

‘o ¿ndaye yebnentše atše jóchnama chjobenaye,

<sup>50</sup> ndegombre cach atše nyetsca chě soyēnga tijamēse ca?’ ”

<sup>51</sup> Esteban měntšánaca tojaněyana: “Tšěngaftanga nyets tempo josértama nděbošēnga šmondmēna; šmondbomna ainana mo chě Běngbe Bětsábeñe ndošbuáchiyēngbe ainancá, y Běngbe Bětsabe soyēngama nduauenanēnga šmondmēna. Tšěngaftanga ndocna te quešmátšboše chě Uamana Espíritu joyeunayana. Ntšamo tšěngaftangbe běts taitanga monjanienycá, tšěngaftángnaca cachcá. <sup>52</sup> ¿Běngbe Bětsabe juabna oyebuambnayēnguentšana, ndábíoye tšěngaftangbe běts taitanga ndoñe monjanacmena? Chě Běngbe Bětsá tojanichamó entšanga chēnga tmojtsanēbaye, y mēngna entšángbiye imojanabuayinýa Cristo, chě ntšamo Běngbe Bětsá yobošcá amá yochjánabama. Pero morna, uayayēngbe cucuatšíñe cha šmojábošhona y šmojóba. <sup>53</sup> Běngbe Bětsabe mandēnga angelēngaftaca tšěngaftanga šmonjánóyēngacñe, pero chě soyēnga ndoñe quešmátšyeunana ca” —cha tojaněyana.

*Esteban ndětsbēngaca tmojanóba*

<sup>54</sup> Chentša mándayēnga chca tmojanuena ora, Estébanoftaca tmojanotjayaná y tmojanenaftěšbonzentsé, rábiaca imojtsemnama. <sup>55</sup> Pero chě Uamana Espíritu Estébanbe ainaniñe corente yojtsemándaye. Celoye yojontješiye y Běngbe Bětsabe buashinýinýanana yojinýe, y Jesús, Běngbe Bětsabe catšbioica yojtsatsana. <sup>56</sup> As, Esteban tojánayana: “¡Mouenēnga,

séntsonyá celoca entsatëfna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

<sup>57</sup> Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontšënja. <sup>58</sup> Chentšana, chënga chë pueblentšana tmojtsanábocna y ndëtsbéngaca tmojtsanatëchënganja. Chë Estébanbioye mal tmojanquedangna entšayangá tmojtsanenátsejca y canye bobontse, Saulo ca uabainá, tmojesanábonyife chaotsinýenama.

<sup>59</sup> Ndëtsbéngaca imojtsénanantscuana, Esteban Bëngbe Bëtsáftaca ibojtsencuëntaye y mëntšá tojánayana: “Bëngbe Utabná Jesús, atšbe espíritu šmóyëngaca ca.”

<sup>60</sup> Chentšana Esteban tojanoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojánóbana.

## 8

<sup>1</sup> Saulo chentšé yojtsemna y tšabá imojtsama ca yojtsejuabnaye, Esteban tmojanóbama.

*Saulo yojánama chë Cristbeñe ošbuáchiyënga chamotsesufrínama*

Cach te, inýenga tmojanontšé Jesucristbeñe ošbuáchiyënga Jerusalenentšé ucamenana y jtsamana puerta chamotsesufrínama; chcasna, chënga tmojsanacheta y Samarioye y Judeoye tmojanáshana. Nýe chë Jesucristbe ichmónënga ndócnoye tmonjánacheta. <sup>2</sup> Básefta boyabásenga, Bëngbe Bëtsá adórayëngna, Esteban tmojanamba jauátbontsama y chabiamana puerta tmojánenobosachna. <sup>3</sup> Chëntscuana, Saulo yojtsentšëna Jesucristbeñe ošbuáchiyënga jtsapochócama y yebñënguenache yojánamashjuana boyabásenga y shembásenga sjojóñana ubuacana jutámiamana.

*Felipe Samaria luaroca tšabe noticiëngama yojanabuayiyiná*

<sup>4</sup> Y Jesucristbeñe ošbuáchiyënga tmojanáshanëngna nýetsquénache imojánabuayiyinaye Jesusbe tšabe noticiënga. <sup>5</sup> Chca, Felipe Samarioye tojána y tojanontšé chë Bëngbe Bëtsabe Uámána Uabuayaná, Cristbiamana, chentšana entšanga jábuayenama. <sup>6</sup> Entšanga imojánenefjuana Felipe joyeunayama y tmojáninýe bëts soyënga cha jtsamana, Bëngbe Bëtsabe obenana jinýanýiyama. Chënga nýetscanga ntšamo Felipe yojtsichamcá tšabá imojtseyeunana. <sup>7</sup> Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisëbocana; y banga jama ndobenënga y coshetënga tšabá imojtsatsmëna. <sup>8</sup> Chë soyama chë pueblentša oyenënga corente imojtsóyejuaye.

<sup>9</sup> Pero canye pueblentšé Samarioca inamna canye boyabása, Simón ca uabainá; cha tempo inamna canye bocjuaná y chë Samarioca entšanga chabe soyëngama imojánenjnanaye. Cha yojánichamo cha canye uámána entšá canjamna ca. <sup>10</sup> Y chábioye corente imnayeunana nýetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inýanýináy ca.”

<sup>11</sup> Y ndegombre chënga corente imnayeunana, er cha chë bocjuanana soyëngaca bayté chë entšanga ingñënga y ojanánënga yojtsabamna. <sup>12</sup> Pero chë luarentša entšangna, Felipe tmojanoyeuná chë cha yojtsëtsëtsná tšabe noticiënga Bëngbe Bëtsabe amëndayama y chë Jesucristbiamana tšabe soyënga. Chorna chënga Jesucristbeñe imojtsosbuáchiye, y boyabásenga y shembásenga tmojánenabaye. <sup>13</sup> Y cach Simónënga Jesucristbeñe yojtsosbuáchiye y tojanenábaye, y chentšana cada te Felipeftaca cha yojtsanmëna. Cha tojáninýe Felipe chë bëts soyënga Bëngbe Bëtsabe obenánaca jamana, y chama ojanananá yojtsemna.

<sup>14</sup> Chë Jerusalenoca imojtsemna ichmónënga tmojántatšëmbona Samarioca entšanga Bëngbe Bëtsabe palabra tmojánoyeunama; as, chora Pedro y Juan choye tmojanichamó. <sup>15</sup> Pedro y Juan Samarioye tbojánashjango ora, chentšé Jesucristbeñe ošbuáchiyëngbiamana Bëngbe Bëtsá tmojanimpadá, as chë Uámána Espiritu chëngbeñe cháumashënguama jtsamándayama. <sup>16</sup> Er cabá ni mo cánýabeñe chë Uámána Espiritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga jtsemnana imojtsëbóseyaca. <sup>17</sup> As Pedro y Juan chëngbe bestšašine cucuatšënga tbojancjá, y chca, chë Uámána Espiritu tojánamashëngo chëngbe ainaniñe jtsamándayama.

<sup>18</sup> Simón tojáninýe, chë ichmónënga entšangbeñe cucuatšënga tmojacjá ora, chë Uámána Espiritu chëngbeñe jamashënguana. As chora Simón chë ichmónënga tojanëyana: —Quem crocëñana mosháchiñe, <sup>19</sup> y átšnaca chë obenana šmatšetá, y ndábeñnaca cucuatšënga chaijajáj ora, chábeñnaca chë Uámána Espiritu cháumashëngo ca.

<sup>20</sup> As Pedro tbojanianaya: —¡Acbe crocëñana infiernoye chaotsá y ácnaca, chë Bëngbe Bëtsabe tšetana soye crocëñanaca jobuámiñama yopodena ca tcojajuabó causa! <sup>21</sup> Ndegombre, aca bëngaftaca ndoñe quecátšmëna, ni bëngbe trabajo acbiamana quenátšmëna, Bëngbe Bëtsabe delante acbe ainaniñe tšabe juabnënga ndoñe quecátšbomna causa. <sup>22</sup> Ngmëñaca cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádose cmatjaperdóna. <sup>23</sup> Atšé sëntsetatšëmbo, acbe ainaniñe tša bacna juabnënga inýengbiamana yojtsemnana; y bacna soyënga amana

jtsajbanama ndoñe quecátobena causa, aca mo canýe ntsacjuanacá contsemna ca —Pedro tbojaniana.

<sup>24</sup> As chora Simón tojanéyana: —Bèngbe Utabná atšbiana šochjaimpáda, ntšamo šmonjauyancá ndoñe chandépasama ca.

<sup>25</sup> Pedro y Juan, ntšamo Bèngbe Utabná Jesucristbiana tbojaninýcá y ibnatatšëmbcá entšanga imojtsétsenaye. Chentšana, Jerusalenoye tbojésanata y tbojánachnëngo ba Samarioca pueblënguëjana, tšabe noticiënga entšanga abuayinaye.

*Felipe y chë Etiopía luaroca reinabe uajabuachaná*

<sup>26</sup> Chentšana, Bèngbe Utabnabe canýe ángel Felípbioye tbojaniana: “Moprontá y tsmana luarëngoye motsa, Jerusalenentšana Gaza ca uabaina bèts puebloye benachëjana ca.” Chë benachna entšanga ndoyena luarëjana yojanachnëngona. <sup>27</sup> As Felipe yojëtsëtsbaná y tojána. Benachiñe tbojáneninýena canýa Etiopía luarocáftaca. Etiopía luaroca canýe reiná inamna y chë boyabásana chabe uajabuachaná y chabe crocénana bojanýá inamna. Chana Jerusalenoye tojánabo Bèngbe Bëtsá jadórana. <sup>28</sup> Chora Etiopía luaroye yojtsataye, chabe cochëshañe inayésenotbemañe, y chë Bèngbe Bëtsabe juabna oyebuambnayá Isaíasbe uabemana librëša yojtsaiualíaye.

<sup>29</sup> Chora chë Uámana Espíritu Felípbioye tbojaniana: “Mobeconá y chë cochësha juachaca cochtsaye ca.” <sup>30</sup> As Felipe betscó yojobeconá. Chora yojouena chë Etiopía luarocá, Isaíasbe uabemana librëša yojtsaiualíaye; as tbojantjá: —¿Chë contsalía soye quecmojtsosertana ca?

<sup>31</sup> Y chë Etiopía luarocá tbojanjá: —¿Ntšamo šochjosërta, ndocná šonjabuayenase ca?

Y Felípbioye tbojaniana: —Diosmanda, atšbe cochëshoye másëngo y atšbe juachaca mabótbema ca.

<sup>32</sup> Isaíasbe uabemana librëšañe mëntšá yojtsalíaye:

Cha tmojanánatse mo canýe oveshá jóbama cuafjuanatsá; y chë mo canýe oveshá tmojtsëtsbotjná ora, cha iytëca jtsemnana, chánaca cachcá, chacá tondaye chenátanayana.

<sup>33</sup> Entšanga tmonjanma cha puerta chaosufrima,

mo cha canýe nduamaná cuafsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiana jacuéntana,

quem luarentša chabe vida tmonsanbojuaná causa ca.

<sup>34</sup> Chora chë Etiopía luaroca uajabuachaná Felípbioye tbojaniana: —Diosmanda, šmoubuayená, ¿ndabiama Bèngbe Bëtsabe juabna oyebuambnayá chca yojtsichamo, cachabiama o inýabiama ca?

<sup>35</sup> As Felipe tojanontsé, chë Isaíasbe librëšañe yojtsayana sóyeca, Jesusbe tšabe noticiënga jábuayenama.

<sup>36</sup> Chentša bënëse, canýe bėjaye obëjniñe juachañe ibojtsachnëjuana. Chora chë uajabuachaná tojánayana: —Muentše bėjaye entsemna. ¿Ndáyeca ndoñe nanjopódia atše muentše uabainá jtsemnama ca? Diosmanda, šmabaye ca.

<sup>37</sup> As Felipe tbojaniana: —Jesucristbeñe nýets acbe ainánaca tcojtsošbuáchese, aifñe echanjopódia juabáyama ca.

Y chë boyabása tbojanjá: —Aifñe, sëntsošbuaché Jesucristo Bèngbe Bëtsabe Uaquiná yomnama ca.

<sup>38</sup> As chë Etiopiacá tojanmandá chë cochësha chauátotonama. Chentšana, nýets útata chë bėjayoye tbojanashëbëbuástjango y Felipe, chë Etiopioca uajabuachanábioye tbojanabaye.

<sup>39</sup> Chë bėjayentšana tbojtambocna ora, chë Uámana Espíritu Felipe ibojtsánatseñe y chë uajabuachaná ya ndoñe más Felípbioye ibontsonýaye, pero corente oyejuayá yojtsatoñe.

<sup>40</sup> Felipe tojántatšëmbona Azoto bèts puebloca yojtsemnama, y chentšana tojána nýetsca pueblënguenache chë tšabe noticiënga abuayinaye, Cesarea puebloye jashjanguéntscuana.

## 9

*Ntšamo Saulo Crístbeñe ošbuachiyá tojanóbema  
(Hch 22.6-16; 26.12-18)*

<sup>1</sup> Saulo chëntscuana cabá Bèngbe Utabnábeñe ošbuachiyënga yojanautatjná jtsëbáyama. Chama cha tojána chë bachnangbe más uámana amëndayábioye, <sup>2</sup> uabemana tsbuanachangá jauátjáñama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninýanýé Benache ustoniñe, boyabásenga o shembásenga tojánýenëse, jótabayama y Jerusalenoye junatsama. Y chca jamama tojánbocna. <sup>3</sup> Pero ya Damasco bëconana yojtsaye orna, nýe ndeolpe chabe juachañe celocana canýe bèts tcuinýe tojanbuashinýinýena. <sup>4</sup> Chora Saulo fshantsoye tojánshajaye y canýe oyebuambnayana tojanuena, mëntšá: —Saulo, Saulo, ¿ndáyeca chca šcojtsacmena ca?

<sup>5</sup> As Saulo tbojantjá: —¿Nda comna, Bëngbe Utabná ca?

Y chë oyebuambayana tbojanjá: —Atše sëndmëna Jesús y aca condama atšbe entšanga chamotsesufrínama. <sup>6</sup> Pero matëtsbaná y Damascoye mamáshëngo; chentše canya cmochanjabuayená ndayá jamama cmojtsemnama ca.

<sup>7</sup> Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana; er nýe chë oyebuambayana tojanuena, pero ndocná tmonjáninye. <sup>8</sup> As Saulo fshantsentsana tojtantsbaná y tojtanobuchattëfjona ora, tondaye yontsobena jinýana. Chcasna, chë ínýenga tmojëftsanobuacuetëntsé y chca, Damascoye tmojanánatse. <sup>9</sup> Chentše yojëftsemna unga te, jinýama ntsobencá, ni ntjascá y tondaye ntjofšiyá.

<sup>10</sup> Damascoca Jesucristbeñe canye ošbuachiyá inoyena, Ananías ca uabainá. Cha Bëngbe Utabnábiye mo otjenayoquécá tbojáninye y Bëngbe Bëtsá tbojaniana: —Ananías ca.

As cha tbojanjá: —Bëngbe Utabná, ¿ndayá chjama ca?

<sup>11</sup> Y Bëngbe Utabná tbojaniana: —Moprontá y motsa chë “Ndericho tsáshenañe ca” uabáinoe, y Júdasbe yebnentše cohjanoticia canye boyabásabíama, Saulo ca uabainábíama, Tarso pueblócá; cha mora Bëngbe Bëtsáftaca bentsencuénta. <sup>12</sup> Saulo ya tonjinýe mo otjenayoquécá, canye entšá Ananías ca uabainá entsamashjuana y chabe cucuatšënga chabe bestšasiñe entsejáua, chca, cha chabuatabínýama ca.

<sup>13</sup> Ananías chca tojanuena ora, tojánayana: —Bëngbe Utabná, banga ba soyënga chabíama šmonjacuentá; Jerusalenoca tša bacá acbe entšanga imomnënga tojáborlaye. <sup>14</sup> Y mora entsebmoma mando chë bachnangbe amëndayëngbentsana, muentše aca otšëmbuanënga jótabayama ca.

<sup>15</sup> As Bëngbe Utabná tbojaniana: —Motsa, er atše cha sënjuábuayana atšbíama chaotraba-jama; chaóyebuambama ndoñe judiëngbeñe, reyëngbeñe y Israeloca entšángbeñnaca, y chca, chënga atšbíama chamotatsëmbonama. <sup>16</sup> Atše cha chanjinýinye ntsachetšá ibojtsemna atšbeyeca jasúfriama ca.

<sup>17</sup> As Ananías tojána Saulo yojtsanmëna yebnoe. Tojánamashëngo ora, Saulëbe bestšasiñe chabe cucuatšënga tojanjá y tbojaniana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chac-matabínýama y chë Uámana Espíritu acbe ainaniñe jtsemándayama cháumashënguama ca.”

<sup>18</sup> Cachora, Sálëbe bominyëtsana mo beonbe bobachëshëngcá tojantquécjana, y chca, ibojtsatabinýa; chora tojantsbaná y tojanenábaye. <sup>19</sup> Chentšana, Saulo tojanse y añemo yojtsatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

### *Damascopuebloca Saulo entšanga yojanabuayinýa*

<sup>20</sup> Saulo cachorscana tojanontsé jábuayenama judiëngbe enefjuana yebnënguenache, Jesús Bëngbe Bëtsabe Uaquíñá bëtsemnama. <sup>21</sup> Chë imojtsuenanënga nyëtscanga imojtsenjanayey mentsá imojtsichamo: “Mua entsemna chë Jerusalenoca Jesúsbiye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšëñe jabáshejuanama.”

<sup>22</sup> Pero Saulo cada ora más añémoca yojtsóyebuambayey y puerte tšabá yojaninýanýná Jesús Bëngbe Bëtsabe Uámana Uabayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

### *Ntšamo Saulo judiëngbentsana tojtsanachá*

<sup>23</sup> Bayté tojanochnëngo ora, judiënga tmojanenoyeuná ntšamo jamëse Saulo jóbama, <sup>24</sup> pero Saulo chë soye tojántatsëmbona. Bnëté y ibeta, chë bëtspueblentsa bëšašanguenache chënga chabíama imojananyá, jtsóbama; <sup>25</sup> pero chë Jesucristbeñe ošbuáchiyënga, ibeta, cha canye bëtspbarëcuíñe tmojtsanatsuumá, y chë pueblentsa shëconana tapišëjajana tmojtsanëštjango. Chca cha tojanotsbocá.

### *Saulo Jerusalenoca*

<sup>26</sup> Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nyëtscanga imojtsebíauatja y ndoñe imontsošbuaché Saulo Jesucristbe ustóná yojtsemnama. <sup>27</sup> Chcasna, Bernabé Sálëbiye tojëftsanbetšey chë Jesucristbe ichmónëngbiye tbojanánatse, y tojanacuntá Saulo benachiñe Bëngbe Utabnábiye tbojáninýama, ntšamo Bëngbe Utabná tbojanianama y ntšamo cha Damascoca tša añémoca Jesusbíama entšanga tojánabuayenama. <sup>28</sup> As Saulo Jerusalenentše tojanototóná y chë Jesucristbe ichmónëngaftaca yojánana. Bëngbe Utabnabíama bëtspañémoca entšanga yojanabuayinýa y <sup>29</sup> yojanoyebuambná y imojanenatsëtsná chë griego biyá judiëngaftaca; pero chëngna imojtsenýeyunana Saulo jtsóbama. <sup>30</sup> Jesucristbeñe ošbuáchiyënga chca tmojántatsëmbona ora, Saulo Cesarea luaroye tmojanánatse, y chentšana Tarso pueblöye tmojanichmó.

<sup>31</sup> Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nyëtsanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

*Pedro Enéasbiye tbojanshná*

<sup>32</sup> Pedro yojánabuache nyëtsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámnaca tojána. <sup>33</sup> Lida pueblentše canýa tbojáninýena, Eneas ca uabainá. Cha jama ndobená inamna y posufta uata jutsnëshañe chca inajájona. <sup>34</sup> Pedro tbojaniyana: “Eneas, Jesucristo tcmonjashná. Matëtsbaná y acbe tjuashe motsejacadá ca.” Y cachora chë jama ndobená tojtantsbaná.

<sup>35</sup> Nyëtscanga chë Lida pueblentše y Saronoca oyenënga chë entšá shnaná tmojáninýe. Y as, chënga bacna soyënga amana tmojtšanajbaná y cach orscana tmojanontsé Bëngbe Utabnábeñe ošbuáchiyana.

*Pedro tojanma Dorcas cháuatayenama*

<sup>36</sup> Chë tempo, Joje puebloca yojaniyena canýe shembása Jesucristbeñe ošbuachiýa, Tabita ca uabainá, o griego biyañna Dorcas ca. Cha nyëts tempo tsabe soyënga yojánama y yojanamana chë tojtšëjabotënga jujabuáchana. <sup>37</sup> Pero chora, šocana tbojanshache y tojtšanóbana. Tmojtšanbébé chentšana, canýe tsoye tsbanana tsañoca chabe cuerpo tmojtšanajáj. <sup>38</sup> Joje inamna Lida béconana, y Lidentše Pedro yojtsemna; y chë Joje pueblentše Jesucristbeñe ošbuáchiyënga tojántatšëmbona Pedro choca yojtsemnama. Asna, uta boyabásata tmojanichamá Pedro jauyanama: “Diosmanda, betsko Joje puebloye mabo ca.”

<sup>39</sup> As Pedro tojtšantsbaná y chë uta boyabásaftaca tojána. Choye tmojánashjaina ora, tmojanánatše chë Dórcasbe cuerpo yojtsemnoye, tsbanánoca; chorna, nyëtsca viudanga sachénaca Pédrëbiye tmojanóbobuashcona y imojtsinýinýaye chë Dorcas yojuajonaná entšayangá y cmešëjuangá, cabá chëngaftaca yojëftsemna ora. <sup>40</sup> Pedro tojanmandá nyëtscanga chentšana chamotsebocanama; chora Pedro yojoshëntsamentšiyë y Bëngbe Bëtsáftaca ibojencuentá. Chentšana, Pedro chë obanábïoye tbojanonýinýe y tbojaniyana: “Tabita, matëtsbaná ca.”

As Dorcas tojtanobuchatëfjona y Pédrëbiye tbojáninýe ora, tojanótbema. <sup>41</sup> Chora Pedro tbojanábucushache y tbojtanatsbaná. As Pedro tojánachembo nyëtsca chë Jesucristbeñe ošbuáchiyënga, chë viudanga y chë inýenga, y Dorcas ainá tojtaninýanjé. <sup>42</sup> Chë soye nyëts Joje pueblentše tojanótatšëmbona y banga Bëngbe Utabnábeñe imojtšošbuáchiye. <sup>43</sup> Y Pedro bayté Joje pueblentše tojanoquedá, Simón chë bobáchëshiñe trabajayabe yebnentše.

## 10

*Pedro y Cornelio*

<sup>1</sup> Cesarea pueblentše inamna canýe boyabása Cornelio ca uabainá; cha inamna chë Italiano ca uabaina soldadëngbe amëndayá. <sup>2</sup> Cornelio Bëngbe Bëtsábïoye ibnarrespetana y nyëtsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcjnaye chë judiënga ndbomnjëjmënga jujabuáchama y sempre Bëngbe Bëtsáftaca ibñencuentaye.

<sup>3</sup> Canýe te, mo bëts mošenana ora, cha botamana tojáninýe mo otjenayoquëcá, mëntšá: Bëngbe Bëtsabe canýe ángel Cornelio yojtsemnoye yojtsamashjuana y tbojaniyana: — ¡Cornelio ca!

<sup>4</sup> Cornelio chë ángelbiye ibojtsonýaye y auatjananá tbojaniyana: —Taita, ¿ndayá yojtsemna ca?

Y chë ángel tbojaniyana: —Bëngbe Bëtsá condbëtseimpadanama y chë ujabótënga condbëtšëjabuachanama, Bëngbe Bëtsá ácaftaca entsoyëjuá y lempe mochóanjóyeunaye.

<sup>5</sup> Chcasna, mora básefta boyabásenga Joje bëts puebloye michamó y Simón, chë Pedro ca monduabobuatmá, moye chamuánatše. <sup>6</sup> Cha posada entsebomna inýe Simónbentše, chë bobáchëshiñe trabajayabe yebnentše. Chabe yebna mar bëjaye tsachañe endmëna. Cha mochóanjauyana ndayá jamama cmojtsemna ca.

<sup>7</sup> Chë Cornéliëbiye ibjuatsëtsaye ángel tojtsatanoñe ora, Cornelio chabe oservenënguentsana útata tojánachembo y canýe soldádnaca, chabe uajabuachaná, Bëngbe Bëtsá adorayá, <sup>8</sup> lempe ntšamo yojopasacá chënga tojanacuntá y chentšana Joje puebloye tojanichamá.

<sup>9</sup> Yëfsana mo nyëtsto ora, chënga benachiñe Joje béconana imojtsajnëntscuana, Pedro yebnentša tsbanánoye tojánasëngo, Bëngbe Bëtsáftaca jencuëntama. <sup>10</sup> Becá tbojánishëntsena y jasama yojtseboše; pero imojtsebopróntantscuana, Pedro mo otjenayoquëcá mëntšá tojáninýe: <sup>11</sup> Celoca yojtsatëfjna y mo canýe bëts entšayëjuacá yojtsabá y nyëts canta sibientšana yojtsëjónýana. <sup>12</sup> Chë entšayëjuañe imojtsemna nyëtsca bayënga, ósojnyaye

bayënga y nyëtsca shloftšëgnaca. <sup>13</sup> Y tojanuena canÿe oyebuambnayana mëntšá: —Motsbaná, Pedro; mobaye y quem bayënga mose ca.

<sup>14</sup> Chora Pedro tojánayana: —Ndoñe, atšbe Utabná. Atše ndocna te chiyáise Moisesbe leyíne ndoñe yondëlesenciana jasama bayënga y chë jasama ndoñe tšabá imomna bayënga ca.

<sup>15</sup> Y cachiñe tojtëtanuena chë oyebuambnayana mëntšá: —Bëngbe Bëtsá tojalesenciá y canÿe bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

<sup>16</sup> Chë soye unga soyama chca tojanopasá chentšana, chë entšayëjua celoye tojtanátsjua. <sup>17</sup> Pero Pedro ndoñe yontsetátšëmbo ntšamo tojaninÿcá ndayá chabiama yojtsayanama. Chëntscuana, chë Cornéliëbe ichmónënga noticiánana Simónbe yebnoca tmojánashjajna y shjoca bësoca imojtsobátmana. <sup>18</sup> Tmojanchembo ora, tmojanënoticiá Simón, chë Pedro ca uabobainá, chentše taibojatanama.

<sup>19</sup> Pedro, ndayá tojáninÿama chabosertama yojtsenójuabnantscuana, chë Uámama Espiritu tbojaniyana: “Mouena, muentše mora unga boyabásenga cmotšenguá. <sup>20</sup> Motsbaná, mocana matastjango y yapa ntjatenuabnycá chëngaftaca cohjá, er atše chënga sënjichamó ca”.

<sup>21</sup> As Pedro tojtanastjango y chë tmojánashjajñënga tojanëyana: —Atše sëndmëna chë šmontšenguá cha. ¿Ndáyeca moye šmojabo ca?

<sup>22</sup> Chora chënga tmojanjú: —Cornelio šonjichamó. Cha endmëna chë soldadëngbe amëndayá, canÿe tšabá mándbomna entšá y Bëngbe Bëtsábioye adorayá, y nyëtsca judiënga chabiama tšabá mondbëtsoyeuambnayë. Bëngbe Bëtsabe canÿe ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebmncá cha jouenama ca.

<sup>23</sup> As chënga tojanëmashengo y posada tojanëyentšame. Yëfsana Pedro chë unga boyabásengaftaca tojána. Básefta Jesucristbeñe ošbuáchiyënga Joepueblentšënga Pedro tmojan-tjëmbambá.

<sup>24</sup> Chë inÿe yëfsana Cesarea pueblöye tmojánashjajna. Chentše Cornelio Pédrëbiamayojtsobátmana, y Cornelio tojánëbuaja pamillanga y tšabe amiguëgnaca chentše imojtsemna. <sup>25</sup> Pedro tojánashjango ora, Cornelio tojánbocna jajëbenguama y chabe shecuatšentše yojoshëntsamentšiyë cha jadórama. <sup>26</sup> Pero Pédrëna tbojtanatšbaná y mëntšá tbojaniyana: —Matëtsbaná, atše cach aquécá nÿe canÿe entšá sëndmëna ca.

<sup>27</sup> Pedro Cornélioftaca encuëntaye chë yebnentše tojánamashëngo y ba entšanga tojánanÿena, chentše tmojanójtënga. <sup>28</sup> Chora Pedro tojanëyana: —Cach tšëngaftanga šmondëtatšëmbo chë judiëngbe leyënguifë endayana ndoñe yondopodena canÿe judío ndoñe judío entšangaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinÿinÿë atše ndocna te šondmëna inÿabiamajatsjuabnayana cháftaca jenútanama ndoñe tšabá yondmëna ca. <sup>29</sup> Chíyeca, šmonjobetše ora, ndocá ntjatichamcá nÿe sënjabo ca.

Chora tojanatjá: —¿Ndáyeca šmonjobetše ca?

<sup>30</sup> As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuëntaye y ndeolpe sënjinÿe atšbe delante canÿe boyabása uabuashinÿinÿana entšayaca bopormaná. <sup>31</sup> Cha šonjauyana: “Cornelio, Bëngbe Bëtsá condbëtseimpadanama y chë ujabótënga condbëtsejabuachanama, Bëngbe Bëtsá ácaftaca entsoyejúá y lempe cmochanjóeyunaye ca. <sup>32</sup> Básefta boyabásenga Joepëts pueblöyemichamó y Simón chë Pedro ca monduabobuatná moye chamuánatše ca. Cha posada entsebmomna inÿe Simónbentše, chë bobáchëshiñe trabajayabe yebnentše, y chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.” <sup>33</sup> Chcasna, chachora sënjichamó aca jobëtšama, y aslëpaye jabama tcojóyaunama. Y as morna, nyëtscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tmojamandacá ca —cha tojánayana.

*Ntšamo Pedro tojanoyebuambá Cornéliëbe yebnentše*

<sup>34</sup> Pedro chora tojanontšë mëntšá jóyebuambayama: —Mora atše šontsosertana, ndegombre Bëngbe Bëtsabiamaynyëtscanga cachcá uámanënga imomnama. <sup>35</sup> Nyëts luarënguenache Bëngbe Bëtsá júbuajana cha tmojtsatschuaná y tšabe soyënga tmojtsamënga. <sup>36</sup> Tšëngaftanga šmondëtatšëmbo, Bëngbe Bëtsá Israeloca entšanga tojánabuayenama, tšabe noticiënga jtsóyebuambnayëse, chënga nyëtscanga ainaniñe tšabe ebionana chamotsebmomnama, Jesucristbeyeca; y cha endmëna nyëtsca entšangbe Utabná. <sup>37</sup> Tšëngaftanga šmondëtatšëmbo ntšamo nyëts Judeoca tonjanopasama. Chë soye Galilea luaroca tojanobojatšë, Juan entšanga yojanabuayiná orscana, chënga bacna soyënga amana chamotsajbanama y

chamuenábayama. <sup>38</sup> Smondétatsëmbo ntšamo Bëngbe Bëtsá, Jesús Nazaretocábioye tbojanábuayanama y tojanma chë Uámana Espíritu chabe ainaniñe cháumashënguama, y tojanma Jesús corente obená chaotsemnama; y šmondétatsëmbo ntšamo Jesús enjánana entsangbiana tšabe soyënga amiñe y nyetscanga chë Satanás yojánama chamosufriëmënga áshnaye, er Bëngbe Bëtsá cháftaca yojtsemna.

<sup>39</sup> Bënga fsënjániñe y fsëndétatsëmbo lempe ntšamo Jesús tojanmcá Jerusalenoca y nyets Judea luariñe; y cha tmonjanóba, canye cruciñe jacrucificase. <sup>40</sup> Pero Bëngbe Bëtsá tonjanma unga tianoye cha cháuatayenama y bëngbeñe chaonýnama. <sup>41</sup> Cha nyetsca entsangbe delante ndoñe chenátanbocna, pero aife bëngbeñe, chë tempo Bëngbe Bëtsá šojanëbuayanënga, Jesús tojtanayenama chamuinýama. Y tojtanayenentsana bënga cháftaca fsënjanse y fsënjanoñsé. <sup>42</sup> Cha šonjichamó entsanga jábuayanama y jayanama ndegombre cha yomna chë Bëngbe Bëtsabe uabuayaná, chë nda obanëngbiana y ainëngbiana yochjayana tšabá o ndoñe tšabá tmonjamama. <sup>43</sup> Bëngbe Bëtsabe juabna oyebuambnayënga nyetscanga cach Jesusbiana tmojanayana, nda Jesúsbeñe tojtošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

*Ndoñe judiënga chë Uámana Espíritu tmojanóyëngacñe*

<sup>44</sup> Pedro chë palabrenga cabá yojtsóyeuambnanscuana, chë Uámana Espíritu tojánamashëngo nyetsca chë imojtsuenanëngbe ainaniñe jtsemándayama. <sup>45</sup> Chë judiënga Jesucristbeñe ošbuáchiyënga Pédroftaca tmojánabënga imojenjaná, chë Uámana Espíritu ndoñe judiëngbeñaca cháumashënguama Bëngbe Bëtsá tojanmama. <sup>46</sup> Chënga imojtsuenana chënga inýetsá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

<sup>47</sup> Chora Pedro tojánayana: “Pero mënga chë Uámana Espíritu tmonjóyëngacñe ntšamo bënga tmonjóyëngacñecá. Chcasna, ndocná queochatobenaye jamana chënga uabáinënga ndoñe chamondëtsemnama ca.” <sup>48</sup> As Pedro tojanamëndá chënga jubáyama, Jesucristo jótšëmbonëse. Chentsana chënga tmojanimpadá baseftaytë chëngaftaca chaoquedama.

## 11

*Ntšamo Pedro chë Jerusalenoca imojánenefuana ošbuachiyëngbíoje tojanëyana*

<sup>1</sup> Jesucristbe ichmónënga y chë Judeoca Jesucristbeñe ošbuáchiyënga tmojántatsëmbona, chë ndoñe judiëngnaca Bëngbe Bëtsabe palabriñe imojtsošbuáchema. <sup>2</sup> Pero Pedro Jerusalenoye tojesaná ora, báseftanga chabiama ndoñe tšabá tmonjánayana. Chënga imojama chë juabnayënga, chë ndoñe judiënga ošbuáchiyënga boyabásenga canjánamna chë más delicadentše base bobachtema tëtšenënga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. <sup>3</sup> As Pedro tmojanjá: —¿Ndáyeca tcojá chë ndoñe judiënga jábuachama y chëngaftaca tcojase ca?

<sup>4</sup> Chora Pedro lempe chënga tojanacuntá ntšamo chë ndoñe judiëngbíoje cha tojána orscana tojanopasama. Cha tojanëyana: <sup>5</sup> —Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninýe celocana mo canye bëts entsëjuacá átsbíoje enýetsabeconaye y nyets canta sibiocana enýetsëjonýa. <sup>6</sup> Y botamana sënjanrrepará ndayá chë tsoye bëtsemnama y sënjáninýe choye monjëtsemna uamna y tjoca bayënga, ósjojnaye bayënga y nyetscna shloftšëngnaca. <sup>7</sup> Y sënjanuena canye oyebuambnayana mëntšá: “Motsbaná, Pedro; mobaye y quem bayënga mose ca.” <sup>8</sup> Chora atše sënjánayana: “Bëngbe Utabná, ndoñe; atše ndocna te chiyáises chë Moisesbe leyinë ndoñe yondëlesenciana jasama bayënga y jasama ndoñe tšabá imomnënga ca.” <sup>9</sup> Chentsana cachiñe sëntétanuena chë celocana oyebuambnayana mëntšá: “Bëngbe Bëtsá tojalesenciá y canye bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.” <sup>10</sup> Chë soye unga soyama chca tonjanopasá y chentsana chë entsëjuá celoye tontanátsjua. <sup>11</sup> Y cachora unga boyabásenga Cesarea puebloca ichmónënga, chë posada sëndbomnentše tmonjánashjajna, atše janguanguama. <sup>12</sup> Y chë Uámana Espíritu šonjanmandá atše yapa ntjatenoyuabnacyá chëngaftaca jama; y quem chñënguana Jesucristbeñe ošbuachiyëngnaca átsëftaca tmonjána. Nyetscanga canye entsá Cornelio ca uabainabe yebnoye fsënjánamashjna; <sup>13</sup> y chana bënga šonjanacuntá ntšamo tojáninýe, cachabe yebnentše canye ángel ibojtsebiatsana y mëntšá tbojanianayana: “Básefta boyabásenga Jope bëts pueblóye michamó y moye chamuánatse Simón, chë Pedro ca monduabobuatmá, <sup>14</sup> y cha cmochanjabuayená ntšamo aca y acbe yebnentša oyenënga šmochjotsbocá ca.” <sup>15</sup> As, atše jóyeuambayama sënjanbojatšë orna, chë Uámana Espíritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

<sup>16</sup> “Chora sënjanenoyuabó ntšamo Bëngbe Utabná tonjánayanama: ‘Ndegombre, Juan entsanga béjayeca tonjanëbaye; pero Bëngbe Bëtsá chë Uámana Espíritu bochanjíchmuá, tšëngaftangbe ainaniñe jtsemándayama cháumashënguama ca.’ <sup>17</sup> Chcasna, chëngnaca



Bëngbe Bëtsá chë Uámana Espíritu tonjatsáta, ntšamo bënga, chë Utabná Jesucristbeñe ošbuáchiyënga, šonjanatsataca. Y chca, atše ndoñe quetsátsmëna canye tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

<sup>18</sup> Jerusalenoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëgnaca tojalessenciá chëngbe bacna soyëngama ngmëna chamuatenójuaboma y chca amana chamotsajbanama, chë nyetsca tescama yomna tšabe vida chamotseboimnana ca!

*Ntšamo Antioquia pueblota tojanobojatsé, entsanga Jesucristbeñe ošbuáchiyana*

<sup>19</sup> Esteban tmojanóba chentšana, tmojanontsé chë Jesucristbeñe inye ošbuachiyëgnaca jatëcamiyama. As chentšana báseftanga yojtsamna bën luarëngoye jtsachetëngana Fenicioye, Chipre y Antioquia luarëngoye, y chenache chënga Jesucristbe soyëngama imojanoyebuamná, pero nye judiëngbiam. <sup>20</sup> Pero báseftanga imojamna Chipre y Cirene luaroquënga, y chënga Antioquia bëts pueblote tmojanashajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase. <sup>21</sup> Bëngbe Utabnabe obenana chëngaftaca yojtsamna, y chca, ba entsanga tmojanajbaná bacna soyënga amana y tmojanontsé Bëngbe Utabnábeñe jtsošbuáchiyana.

<sup>22</sup> Jerusalenoca Jesucristbeñe ošbuáchiyënga chë soye tmojántatsëmbona ora, Antioquia luaroye Bernabé tmojanichmó. <sup>23</sup> Bernabé choye tojánashjango orna, tojáninnye ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nyetscanga tojanabuayená chamotsiyena nyets ainánaca Bëngbe Utabnábeñe jtsošbuáchiyëse. <sup>24</sup> Bernabé inamna canye entsá tšabe soyënga amá, chë Uámana Espíritu chabe ainaniñe yojtsëmándaye y bëtscá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

<sup>25</sup> Chentšana, Bernabé Tarso pueblote tojána Saulo janguanguama, <sup>26</sup> y tojáninñena ora, Antioquia luaroye tojëftsantbetše. Antioquia luarentšna canye uata nyetsá Jesucristbeñe ošbuáchiyëngaftaca cányinñe ibojëftsemna y ba entsanga tmojanabuatambá. Antioquioc inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

<sup>27</sup> Chë tempo, básefta Bëngbe Bëtsabe juabna oyebuambnayënga Jerusalenocana Antioquia luaroye tmojána. <sup>28</sup> Chënguentšana canya Agabo ca uabainá tojantsá y chë Uámana Espíritbeyeca tojánayana, mëntšá: “Nyets luariñe entsanga oyeniñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora. <sup>29</sup> Chcasna, chë Antioquia bëts pueblentsa Jesucristbeñe ošbuáchiyënga imojenóyeunaye ntsachetšá crocënanëñnaca juichmuana, ntšamo cada ona tojobenacá, Judeoca Jesucristbeñe ošbuáchiyënga jujabuachama. <sup>30</sup> Chca tojanma, y Bernabé y Sálloftaca chë crocëna tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbiye.

## 12

*Santiago tmojanóba; Pedro tmojanëtame*

<sup>1</sup> Chë tempo, rey Herodes básefta Jesucristbeñe ošbuáchiyënga tojánishëche jutámiamia y jatsetšenama. <sup>2</sup> Tojanmandá espadëjaca chamóbama Santiago, Juanbe catsata; <sup>3</sup> y Herodes tojántatsëmbona judiënga chë soye tojanogúsetama; as, cha tojanmandá Pédrëñaca chamutámiamia. Chca tojanopasá chë levadúraca ndëpormana tandëse sayté, Bashco fiesta ora. <sup>4</sup> Pedro tmojánishache orna, Herodes tojanmandá chamutámiamia, y chë cárceloca soldadënga cantátanga tmojanenotatá cántentše cha chamotsebojanýama. Herodes yojtësejuabnaye, Bashco fiesta tojochnëngo ora Pedro juabocnama, entsangbe delante jayanama cha chaóbanama. <sup>5</sup> Chcasna, Pedro yojtsëtámena y chë soldadënga corente imojtsebojanýa. Pero Jesucristbeñe ošbuáchiyënga bëtscá Bëngbe Bëtsá imojtseimpadana Pédrëbiamia.

*Bëngbe Bëtsá tojanma Pedro natjëmbana cárcelocana cháuaisebocnama*

<sup>6</sup> Canye te yojtsájamna Herodes entsangbe delante Pedro juabocnama. Chë te ibetna, Pedro yojtsomañe y cátaoica canye soldado yojtsëmna; uta cadenëjuaca yojtsabatsëcna y inye soldadënga bëšócana chë utámeniñe imojtsebojanýa. <sup>7</sup> Ndeolpe, Bëngbe Utabnabe canye ángel tojánbocna, y lempe chë utámeniñe yojtsebuashinýinýana. Chora chë ángel tēchañe Pédrëbiye tojánbojajo, tojánfšená y tojanianya: “Betsco motsbaná ca.” Y cachora chë cadenëjuangá Pédrëbe buacuatsënguentšana tojanatquécjana, <sup>8</sup> y chë ángel tojanianya: “Matichëtjo y matóshëcochëtjo ca.” Pedro tojanma ntšamo chë ángel tojanianyancá, y chora chë ángel tojátaniana: “Mataquëfsayé y šmasto ca.”

<sup>9</sup> Pedro utámenocana chë ángel ibojtsëstona, pero ndoñe yontsetátšëmbo aíñe ndegombre o ndoñe bentsemna chë ángel yojtsama cha chocana cháuaisebocnama; masna, ibojtsinýana mo canye otjénayoca cuaftsemncá ca. <sup>10</sup> Y ütëntše chë soldadënga imojtsebojanýajana

chata tbojánachnëngo y yerëša bësásoye tbojánashjango, chë ndayëša yojanamna tsáshenoye jabocnama; y chë bësásana nÿe cachabe ponto yojotëfjo. Chentšana tbojëftsanbocna ora, canÿe tsáshenëjana ibojtsaye, y nÿe ndeolpe chë ángel Pédrëbentšana yojtsojuánañe.

<sup>11</sup> Nÿa chora Pedro tbojanosertá y tojánayana: “Mora tsábá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšentšana y lempe ntšamo judiënga átšeftaca jamama imojuabnámnaca ca.”

<sup>12</sup> Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentše banga cánÿiñe imojtsemna, Bëngbe Bëtsáftaca encuéntaye. <sup>13</sup> Pedro chë tsashenoica bësásoca tojanchembo ora, canÿe oservená, Rode ca uabainá, tojánbocna jarrepárama. <sup>14</sup> Chë oservená Pédrëbioye tojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tsábe noticia jaúnayama, Pedro bësoca yojtsemna ca. <sup>15</sup> Chë tsoca imojtsemnëngna chora tmojanianya: “¿Opá chetsebocna ca?”

Pero chë oservená yojtsichamo ndegombre ca. Y chënga tmojanianya: “¡Chabe ángel ctsemna ca!”

<sup>16</sup> Chëntscuana Pedro cabá yojtsechambuana; tmojánëbiatëfjo y tmojáninÿe ora, chënga puerte imojenjináná. <sup>17</sup> Pero Pedro tojánëfjatšëmbo iytëca chamobiamama y tojanacuntá ntšamo Bëngbe Utabná utámenocana tbojánatsbocama. Chentšana tojanëyana: “Ntšamo tonjopasama Santiago y chë Jesucristbeñe inÿe ošbuáchiyënga šmochjaúnaye ca.”

Chora Pedro chë yebnentšana tojtáisebocna y inÿoye yojáta.

<sup>18</sup> Tojanbinÿna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa. <sup>19</sup> As Herodes tojanmandá Pedro chamot-senguanguama; pero jtsinÿenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanýá soldadënga jtsëbáyama. Chë soyënga tojanochnëngo chentšana, Herodes Judea luarentšana tojëftsanbocna y Cesarea luaroye tojsanoñe, y choca tojsanoquedáñe.

### *Herodes tojanóbana*

<sup>20</sup> Herodes corente yojtsetšátjaye Tiro y Sidonoquëngaftaca; as chënga tmojanenoye-uná Heródesbioye jama. Canÿe uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayánanënga chamoydëtsemnana, er Tiro y Sidonoca entšanga vida imnabomna Heródesbe luaroca sanángaca. <sup>21</sup> Chcasna, rey Herodes inÿe tescama tojánachembo. Chë tena, jýeyebuambayama Herodes uámana entšayaca yojtopórma y yojótbema chabe mándaye tbemantšë; chentšana tojanonguamé. <sup>22</sup> Chora entšanga tmojanontšé mëntšá uayebuáchana: “¡Chë entsoyebuambná cha entšá ndoñe quenátšmëna! ¡Chana canÿe dios entsemna ca!” <sup>23</sup> Cachora, Bëngbe Bëtsabe canÿe ángel tojanma Herodes šocana chaboshachama, chabe cuenta Bëngbe Bëtsá chamuatschuama entšanga ndoñe yonjáuyana causa. Herodes tojanóbana mamángaca sasná.

<sup>24</sup> Pero chë tempo más bëtscá entšanga Bëngbe Bëtsabe palabra imojtsuenana y Jesucristbeñe imojtsošbuáchiye.

<sup>25</sup> Bernabé y Saulo chatbe trabajo tbojëftsanma ora, Jerusalenocana Antioquía luaroye tbojésanata y Juan, chë Marcos ca uabobuatmá, chátaftaca tmojëftsanbetše.

## 13

### *Bernabé y Saulo tbojanbojatsé Bëngbe Bëtsabe trabajo jamama*

<sup>1</sup> Antioquía luaroca Jesucristbeñe ošbuáchiyënguentše imojtsemna Bëngbe Bëtsabe juabna oyeubuambnayënga y ošbuachiyëngbioye abuátambayënga. Chënga imojanabaina Bernabé, Simón (chë Sibetá ca uabobuatmá), Lucio Cirenocá, Manaén (nda tojanoboché cánÿiñe Herodes, chë Galileoca réyëftaca) y Saulo. <sup>2</sup> Canÿe te, Bëngbe Utabná imojtsatschuanyaye y chama tondaye ntjascá imojtsemna ora, chë Uámana Espiritu tojánayana: “Mora šmochjaleséncia Bernabé y Saulo tšëngaftangbentšana chabuétsebocnama; chatna canÿe trabajuama sënjabacacá ca.”

<sup>3</sup> Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuéntantscuana, chëngbe cucuatšënga chatbe bestšaše juatsboica tmojancjá, chatbe trabajuíñe chaújabuachama Bëngbe Bëtsá jteimpadánëse. Y chentšana chátbioye tmojtana-diošoftá.

### *Bernabé y Saulo Chipre luaroca*

<sup>4</sup> As Bernabé y Saulo, chë Uámana Espiritbeyeca ichmónata, Seleucia ca uabáinoye tbojánata y chentšana bejaycá, Chipre luaroye. <sup>5</sup> Salamina bëtš puebløye tbojánashjango ora, tbojanontšé Bëngbe Bëtsabe palabrama entšanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

<sup>6</sup> Njēts chē luarējana tmojánachnēngo orna, Pafos puebloye tmojánashjajna; y chentše tmojánin'yena can'ye judío tatsēmbuá, Barjesús ca uabainá. Cha yojánichamo cha canjamna can'ye Bēngbe Bētsabe juabna oyebuambnayá ca, pero ndoñe chca yonjamna. <sup>7</sup> Chē tatsēmbuá inatrabájaye chē Chipre luaroca mandadbiamá, Sergio Paulo ca uabainá; y chē mandadna corente osertaná inamna. Cha yojtseboše Bēngbe Bētsabe palabra jouenama; as tojanmandá Bernabé y Saulo jobiatšana. <sup>8</sup> Pero chē tatsēmbuá, grieguiñe Elimas ca uabainá, Saulo y Bernabebe contra yojtsemna y yojtsama chē mandado ndoñe chaondētsosbuáchema, ntšamo chē Jesucristbeñe ošbuáchiyēnga imojanošbuachecá. <sup>9</sup> Chora, Saulo chē Pablo ca imojanábobuatmabe ainaniñe chē Uámána Espíritu corente yojtsemándaye; as chē tatsēmbuábioye yejuana ibojon'yin'ye, <sup>10</sup> y tbojanianya: “¡Abuambnayá, puerte bacna entšá, Satanasbe uaquiñá y tšabe soyēnga ndoñe chaondētsébín'yama trabajayá! Bēngbe Utabnabe njētsca ndegombre soyēngama aca contsichamo uayátsenaye soyēnga yojtsemna ca. <sup>11</sup> Mora, Bēngbe Bētsá cmochanjacastíga, jtaná cochanjoquédá y baseftayté jin'yama quecochatobenaye ca.”

Cachora Elimas mo ibetiñá chojoquédá y ibojtsonguaye can'ya buacuetēntšnana chabuánatsama, jtaná yojtsemna causa. <sup>12</sup> Chē mandado chca tojánin'ye ora, Jesucristbeñe yojtsosbuaché y yojenjaná Bēngbe Utabnabe soyēnga tojanatsjin'yama.

*Pablo y Bernabé Antioquía pueblentše, Pisidia luaroca*

<sup>13</sup> Pablo y chabe enutēnga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalenoye tojésanshēcona. <sup>14</sup> Pergentšana Antioquía puebloye tbojátanata; chē pueblo inamna Pisidia luare bēconana. Chentšna, ochnayté, chē judiēngbe enefjuana yebnoye tbojánamashēngo y tbojanótbema. <sup>15</sup> Moisesbe leyíne y Bēngbe Bētsabe juabna oyebuambnayēngbe uabemana libréšangañe tmojanalía orna, chē enefjuana yebnentša mándayēnga can'ya tmojanichmó chēnga jáuyanama: —Israeloquēnga, bēnga fsēntseboše entšanga chašmabuayená, nderado ndayá jayanama šmojtsebmōnšē, muentša entšanga añemo chamotsebmōnna ca.

<sup>16</sup> As Pablo tojétsa y entšángbioye cucuátšca tojánefjatsēmbō iytēca chamobiamama, y tojánayana: —Smochjouena Israeloquēnga y ndoñe judiēnga Bēngbe Bētsá adórayēnga. <sup>17</sup> Israeloca entšanga mondadorana Bētsá, Bēngbe Bētsá, bēngbe bēts taitanga tojanēbuáyana, y tojanma chēnga corente bētscanga chamotsemnana, chēnga Egiptoca in'ye luarocana ashjajñēngcá imojoyena ora. Y chentšana, cachabe obenánaca chē luarocana chēnga tojésanēbuacana. <sup>18</sup> Canta bnētsana uata njētsá, Bēngbe Bētsá entšanga ndoyena luaroca chēnga yojanēuantana, <sup>19</sup> y cha tojanma chē Canaán luaroca can'yēftentša entšanga chamopochocama y bēngbe bēts taitanga chēngbe fshantsēnga nduiñēnga tojánabiamá. <sup>20</sup> Chē tempo, chē Bēngbe Bētsá Abrahámioye quem fshantse jatsetayama tbojanšbuachená orscana, y chē tempo, chē bēngbe bēts taitanga chē fshantse tmojanóyēngacñēntscuana, canta patse y shachna bnētsana uata tojanochnēngo.

“Chentšana, Bēngbe Bētsá chēngbiamá mandadēnga tojánabiamá, Bēngbe Bētsabe juabna oyebuambnayá Samuel chēngbe mandayá yojēftsemna tempēntscuana. <sup>21</sup> Chentšana, Israeloquēnga Samuel tmojanimpadá can'ye rey chabojayé chaotsamēndama; as Bēngbe Bētsá Saúlbioye chēngbe rey tbojánbema, canta bnētsana uatēscama. Saúl inamna Cisbe uaquiñá y Benjaminbe bēts pamillanguentšá. <sup>22</sup> Más chcoyna, Bēngbe Bētsá Saúlbioye chē mándayentšana tbojtsanjuaná, y chentšana Davidbioye mo chēngbe reycá tbojánbema. Chabiamá Bēngbe Bētsá tojánayana: ‘Atše sēndētatsēmbō, David, Isaibe uaquiñá, can'ye tšabe entšá yomnama y chama atše sēndoyejuá, y cha sempre endēprontana ntšamo atše stsebošcá jtsamama ca.’ <sup>23</sup> Davidbentšana can'ye entšá Jesús enjamna, nda Bēngbe Bētsá tbojanichmó Israeloca entšanga jabátsebacama, ntšamo cach Bēngbe Bētsá chēngbe bēts taitanga tojanašebuachenacá. <sup>24</sup> Cabá Jesús ndēbocna ora, Juan njētsca Israeloquēnga tojanabuayená bacna soyēnga amana chamotsajbanama y chamuenábayama. <sup>25</sup> Juanbe trabajo jopochócama yojtsobeco ora, cha tojánayana: ‘¿Nda atše tsmēnama tsēngaftanga šmojuabná ca? Chē tsēngaftanga šmontsejuabná atše tsmēna ca cha, atše ndoñe quešátsmēna. Pero átsbentšana echanjabo can'ya, y atše mercedo taitsatobuajōñe ni mo jotsejbiyama chabe shecochējtōñēshentša corriēja jajafjonama ca.’

<sup>26</sup> “Chcase morna, Abrahámbsentšana entšanga y ndoñe judiēnga Bēngbe Bētsá adórayēnga; bēngbiamá entsemna quem buayenana soye, chē Bēngbe Bētsá entšanga jātsebacana. <sup>27</sup> Masque cada ochnayté, Bēngbe Bētsabe juabna oyebuambnayēngbe uabemana palabra monjanalía chēngbe enefjuana yebnentše, Jerusalenentša oyenēnga y chentša mándayēnga ndoñe quenjatanēsertana nda Jesús bētemnana, y chē tmojtsalía soyēngama cach ndoñe. Y chca, chēnga Jesús chamóbama tmojánboshjona ora, chē chca amēnga tmojanma ntšamo Bēngbe Bētsabe juabna oyebuambnayēngbe libréšangañe iuabemancá. <sup>28</sup> Y masque ndocna

bacna soye tmojanínýena Jesús jóbanama chabotsemnana, Pilato tmojanimpadá chao-mandá chábiye jóbama. <sup>29</sup> Chentsana, lempe ntšamo Bèngbe Bètsabe uabemana palabrénguiñe iuayancá Jesúseftaca tojanochnéngo ora, chabe ústonènga chë cruzocana tmojanèštjango y tmojanatbontsá. <sup>30</sup> Pero Bèngbe Bètsá tojanma Jesús cháuatayenama. <sup>31</sup> Chë Galileocana Jerusalenoye cháftaca tmojánanga, baytentscuana Jesús yojánebëbuacana; y morna, lempe ntšamo Jesusbiam tmojanínýcá, chënga entšángbeñe montsoyebuambná.

<sup>32</sup> “Y chca, mora bënga chë tsabe noticiënga cbontsëtsëtsná. Ntšamo Bèngbe Bètsá bëngbe bëts taitanga tojanašebuachenacá, <sup>33</sup> cha tonjama, bënga chë chëngbe entsanguentsëngbiam, chca chaotsemnana. Y Bèngbe Bètsá chca tojama, Jesús cháuatayenama cha jamëse. Rey David, Bèngbe Bètsabe uabemana palabrénguiñe, segundo salmentse mëntsá tojanábema, ntšamo Bèngbe Bètsá Jesúsbiye tbojanianama: Aca atšbe uaquiñá condmëna.

Mënté entsanga sënjinýanyé aca atšbe Uaquiñá comnama ca.

<sup>34</sup> Y tempo Bèngbe Bètsá chabe uabemana palabrénguiñe tojaninýanyé cachá jamama Jesús cháuatayenama y ndoñe cachiñe chaondóbanama, mëntsá tojánayana ora:

Chë ndegombre soyënga y chë tsabe bendicionënga ntšamo David sënjanšbuachenacá, tsëngaftanga cbochanjátataye ca.

<sup>35</sup> Inýoca Bèngbe Bètsabe uabemana palabrénguiñe, Salmos librëša uabiamnayá, mëntsá tojanábema ntšamo Jesús Bèngbe Bètsábiye tbojanianama:

Aca ndoñe quecochatsleséncia atšbe cuerpo, chë acbe Uamana oservenabe cuerpo chaotso pochocama ca.

<sup>36</sup> David, chabe tempo imojyenëngbiam tojanma, ndayá cha chaomama Bèngbe Bètsá tojanjuabocá. Cha tojanóbana y tmojanatbontsá chë chabe bëts taitángbiye tmojanëtabuantsá luarentse, y chabe cuerpo tojanopochocá. <sup>37</sup> Pero chë Bèngbe Bètsá tojanma chauatayenamabe cuerpna, ndoñe tonjanopochocá.

<sup>38-39</sup> “Asna, baconga y batanga, atše sëntseboše tsëngaftanga quem soye chašmotsetátšëmbo: Ndayá Jesús tojanmama, entsanga chëngbe bacna soyëngama perdonánënga montsemna. Jesúsbe yeca, nyetsca chábeñe tmojtsosbuáchenga, bacna soyëngama perdonánënga mochántsemna. Ntšamo Moisesbe leyíñe iuayancá tmojanmama, chënga ndoñe tmojanobená chca perdonánënga jtsemnana; nyë Jesúsbeñe jtsošbuáchiyëse chënga perdonánënga jtsemnana. <sup>40</sup> Cuedado šmochtse bomna, ntšamo Bèngbe Bètsabe juabna oyebuambnayënga tmojanayancá, tsëngaftangafaca ndoñe chaondochnénguama.

<sup>41</sup> Bèngbe Bètsá mëntsá tojánayana:

Šmochjouena. Tsëngaftanga chë ntšamo atše tijayancá šmojtsábotenga, ojanánënga šmochántsemna y šmochanjóbana.

Tsëngaftanga cabá vida šmobomnëntscuana, atše bëts soyënga chanjëftsema,

y masque ndánaca chë soyëngama chacmojtsacúnta,

tsëngaftanga chiñe ndoñe quešmochatošbuáchiye ca” —Pablo tojanoyebuambá.

<sup>42</sup> Pablo y chabe enutënga chë judiëngbe enefjuana yebnentšana tmojëftsanbocna ora, chë ndoñe judiënga chëngbiye tmojanaimpadá, chë inýe ochnaytescama chë soyëngama más jábuayenama. <sup>43</sup> Chentse chë te jenefjnama tempo tojanopochocá ora, ba judiënga y ndoñe judiënga, chë Bèngbe Bètsábiye imojánadorana mo chë judiëngcá, Pablo y Bernabé tmojanéseto. Y chatna chënga tmojanabuayená nyets tempo chamotsejuabnama, Bèngbe Bètsá chëngbiam tsabe soyënga yojtsamama.

<sup>44</sup> Chë inýe semana, chë ochnaytena, nýa mo nyetsca chë pueblentse oyenënga tmojanobeconá Bèngbe Bètsabe palabra jouenama. <sup>45</sup> Pero ba entsanga choye jouenama tmojánama chë judiënga tmojáninýe ora, tmojanotjayaná, ba entsanga Pablo imojtseyenanama; as chënga tmojanontsé mocá ichámuana ndayá cha yojtsóyebuambnama, y chábiye oyenguayana. <sup>46</sup> As Pablo y Bernabé más añémoca mëntsá tojánayana: “Endánëyta, natsana tsëngaftanga, chë judiënga šmommënga, Bèngbe Bètsabe palabra jshabuayenana. Pero tsëngaftangna chë palabra šmontsaboté, y šmontsejuabná tsëngaftangbiam ndoñe tsabá yontsemna chë nyetsca tescama yomna tsabe vida jtsebmomna ca; chë causa, bënga fchantsoñe chë ndoñe judiëngbeñe Bèngbe Bètsabe palabra jóyebuambayama. <sup>47</sup> Er Bèngbe Bètsá chama šjanichamó, mëntsá jauyanëse:

Aca tcbonjuábuayana chë ndoñe judiëngbiye tsabe noticiënga jábuayenama, chaósertama.

Y chca, aca chëngbiam cochántsemna mo canýe binýnayacá.

Chca, ácbeyeca nyets luarënguenache entsanga atše chanjatsebacadá ca.”

<sup>48</sup> Chë ndoñe judiënga chca tmojanuena ora, puerte imojtsóyejuaye y tmojanontsé mëntsá ichámuana: “Bèngbe Utabnabe palabra tsabá bëngbiam entsemna ca.” Y chora, chë nyetsca tescama yomna tsabe vida jtsebmomna Bèngbe Bètsá tempo tojánabacacanga, tmojanontsé Jesúsbeñe jtsošbuáchiyana. <sup>49</sup> Y chca, nyets chë luariñe más entsanga Bèngbe Bètsabe palabra imojtsuenana. <sup>50</sup> Pero chë judiënga tmojanoyebuambá, shembásengaftaca Bèngbe Bètsá

adórâyēnga y uámanēnga, y chē pueblentša uámana taitángaftaca, jamama Pablo y Bernabé chabosufrima y chē luarentšana jtēbuacnama. <sup>51</sup> As, Pablo y Bernabé tbojésanshecstētonata, judiēnga jinjānyiyama chēnga ndoñe tšabá tmojanmama; y chentšana, Iconio puebloye tbojtsanoñe. <sup>52</sup> Pero Jesucristbeñe ošbuáchiyēnga corente oyejuayēnga imojtsemna, y chē Uámana Espíritu chēngbe ainaniñe corente yojtsemándaye.

## 14

### *Pablo y Bernabé Iconio puebloca*

<sup>1</sup> Iconioca, Pablo y Bernabé cánñiñe tbojánamashēngo chē judiēngbe enefjuana yebnentsē y corente obenánaca Bēngbe Bētsabe palabra tbojanoyebuambá. Chíyeca, ba judiēnga y ndoñe judiēnga Jesucristbeñe imojtsošbuaché. <sup>2</sup> Pero chē judiēnga Jesucristbeñe ndošbuáchiyēnga, chē ndoñe judiēngbiyoe tmojanayēñjaná, Pablo y Bernabebiamá podesca chamotsejuabnama. <sup>3</sup> Chíyeca, Pablo y Bernabé baytē chentše tbojanotoná y ndauatjcá Bēngbe Utabná Jesucristbiamá tbojanoyebuambá. Bēngbe Utabná obenana chata tojanatšatá bēts soyēnga jtsamama, y chē soyēngaca Bēngbe Utabná entšanga tojaninñanyē, ndayá chē ichmónata ibojtsoyebuambnacá ndegombre bētsemnama, chē Bēngbe Bētsá nyētsanga iuababuáñyeshanana. <sup>4</sup> Pero nyētsca chē pueblentša entšanga ndoñe cachá imontsejuabnaye; inñyēnga chē judiēngaftaca imojtsemna, y inñyēnga chē Jesucristbe ichmonáttaftaca. <sup>5</sup> As, chē judiēnga y ndoñe judiēnga chentša mandayēngaftaca tmojanenoye-uná chata jtsatsetšenama y ndētsbēngaca jtsébáyama. <sup>6</sup> Pero Pablo y Bernabé chama tbojántatšēmbona orna, tbojtsanēchañe Lистра y Derbe puebloye, Licaonia luaroca, y choca chábuañe luarēngoye; <sup>7</sup> y chē luarēnguenáchnaca, chata Jesucristbe tšabe noticiēnga entšanga tmojanabuayená.

### *Lистра puebloca, ndētsbēngaca Pablo tmojtsanatēchēnganja jtsóbama*

<sup>8</sup> Lистра puebloca inamna canñe boyabása jama ndobená. Ndocna te yondobena jana, chca cosheto inónýna causa. Chē boyabásana yojtsetbemana <sup>9</sup> ouenana ntšamo Pablo yojtsichamcá. Y Pablo chábioye tbojanonñinyē ora, tojántatšēmbona chē socá tša yojtsošbuáchema, shnaná jtsatsemnama; <sup>10</sup> as Pablo, juayebuáchenēse tbojaniana: “¡Motsaná y acbe shecuatšēngaca tšabá motsa ca!”

Chora chē boyabása, canñe jontsēñjese tojantsá y yojóntša anana. <sup>11</sup> As chē entšanga, ndayá Pablo tojanmá tmojaninñe ora, tmojanontšē uayebuáchana chē Licaonia luarentša biyañe, mēntšá: “¡Bēngbe diosēnga bēngbiyoe tbojásma mo entšatcá ca!”

<sup>12</sup> Bernabé imojtsábobuatma Zeus ca, mo chē chēngbe diosēnga amēndayacá; y Páblēna Hermes ca, mo chē inñe diosēngbiamá oyeuambnayacá. Páblēbiyoe chca imojtsábobuatma, er cha más yotsoyebuambná. <sup>13</sup> Zeusbiamá chentša bachna inabomma canñe yebna chē pueblo chaboca, chábioye jadórama. Chē bachna, uacnēga tojanēnatse y uantseffjushangá tojanēyamba chē Zeus jadórama yebnentsá amashjuanoye; y cha y chē entšanga imojtseboše chē uacnēga jashebuáyana y jajuinñiyana, chca, chē ichmonátbiyoe jadórama.

<sup>14</sup> Bernabé y Pablo chama tbojántatšēmbona ora, entšayá tbojtsanenántšajatanēca, entšanga jinñanyiyama, ntšamo chēnga imojtsamcá chata tondaye yonjógusetama, y tbojétsanotjajo entšangbe tsēntsajana y mēntšá ibojtsaychembumbuana: <sup>15</sup> “Baconga y batanga, ¿ndáyeca chca šmojtsama ca? Bēndata cach tšēngaftangcá entšata fsēndmēna. Muentše bēndata fsēntsemna nñe jábuayenama Bēngbe Utabná Jesucristbe tšabe noticiēnga, tšēngaftanga chē quem ndoservena soyēnga, vida ndbomma soyēnga adórayana chašmotsajbanama, y Bēngbe Bētsá Ainabe benache chašmatishachama. Ndegombre, cha tojanma celoca, fschantse, nyētsca bējayēnga y lempe ntšamo chenache yobinñncá. <sup>16</sup> Masque tempo, Bēngbe Bētsá entšanga tojanalesenciá cada ona chaoma ntšamo tojtsejuabnacá, tšabá cachēngbiamá yojtsēmnyeca, <sup>17</sup> Bēngbe Bētsá ndocna te ntjájbanana tšēngaftanga jtsinñanyayana, cachá tojama tšabe soyēngaca, mocna Bētsá cha yomnana. Cha endama tšēngaftangbiamá chauaftema y chē matēnga botamana chaoshájonama, y becá saná cmondatsatná; y cha endama tšēngaftangbe ainaniñe corente oyejuayana chašmotsebomnama ca” —chata tbojánayana.

<sup>18</sup> Masque chē soyēnga tbojánayana, nñe batšatema más bēn y ya ndoñe matbēñjanobenata chē entšanga jtséuyanana uacnēga jashebuáyama, chca, chátbiyoe jadórama.

<sup>19</sup> Chca ora, básefta judiēnga tmojánashjajna Pisidioca, Antioquiocana y Iconiocana, y chentša entšangbiyoe tmojanayēñjaná, Jesucristbe ichmonatbe contra chamatsemnama. Chcasna, Pablo ndētsbēngaca imojtsēnanaye y chabe cuerpo chē pueblo chaboye tmojtsansjojó, er chēnga imojtsejuabnaye Pablo ya obaná yojtsemna ca. <sup>20</sup> Pero Jesucristbeñe ošbuáchiyēnga Pablo tmojanóbobuashcona orna, cha tojtantsbaná y cachiñe chē puebloye tojtsaná; y chē yēfsana, Bernabéftaca Derbe puebloye tojána.

<sup>21</sup> Derbe puebloca Jesucristbe tsabe noticienga entsānga tmojanabuayenā, y chca, entsānga Jesucristbeñe imojtsošbuáchiye. Chentšana chata tbojésanshēcona Listra, Iconio y Pisidioca Antioquiye. <sup>22</sup> Chē luarēnguenache chata ibojánana chē Jesucristbe ustonēngbioye atañēmuaye, cada te chábeñe más chamotsošbuáchema. Y entsāngbioye tmojanéyana: “Bēngbe Bētsabe amēndayoye jamashēngumna, bēnga šontsamna quem luarentse bētsá jētsepdecēnana ca.” <sup>23</sup> Nyētsca ošbuachiyēngcá enefjuanenache, bētsējemēngcá mándayēnga tmojanabacacá, chentša Jesucristbeñe ošbuachiyēnguentšana, cachēnga chentša ošbuachiyēngbioye jtsamēndayama. Bēngbe Bētsá jētschuayama tondaye ntjascá imojtsemna y cháftaca imojtsencuénta ora, cha tmojanimpadá, chē ošbuachiyēnga Bēngbe Utabnabe cucuatšife chamotsemnana, ndábeñe chēnga imojtsošbuaché.

*Pablo y Bernabé, Sirioca Antioquia puebloye tbojtanata*

<sup>24</sup> Pisidia luarējana tbojánachnēnga ora, Panfilia luaroye tbojánashjango. <sup>25</sup> Perge pueblentse Jesucristbe tsabe noticienga entsāngbioye tmojanabuayenā, y chentšana Atalia puebloye tbojánata. <sup>26</sup> Chentšana, Bernabé y Pablo, bejaycá tbojtanata Sirioca Antioquia puebloye. Chentša entsānga Bēngbe Bētsá tmojanimpadá chata chabe cucuatšife chabotsemnana, chē trabajuñe chaotsanēyena; y chorna, chē trabajo ya tbojanpochocá. <sup>27</sup> Choye tbojtanashjango ora, nyētsca Jesucristbeñe ošbuachiyēngbioye tmojánachembo, y tmojanacuntá ntšamo Bēngbe Bētsá tsabe soyēnga chátaftaca tojanmama, y ntšamo Bēngbe Bētsá tojaninñanyé, chē ndoñe judiēngnaca chamotsobenama Jesucristbeñe jtsosbuachiyama. <sup>28</sup> Y Pablo y Bernabé baytē chentše tbojanototoná Jesucristbeñe ošbuachiyēngtaftaca.

## 15

*Ichmónēnga y bētsējemēngcá mándayēnga Jerusalenoca tmojánenefna jencuéntama*

<sup>1</sup> Chē tempo, báseftanga Judeocana áshjajnēnga tmojanontsé, Antioquia pueblentse, chentša Jesucristbeñe ošbuachiyēnga mēntšá jabuátambana: “Base bobachtema chē más delicadentse ndoñe šmonjenotētšēse, ntšamo Moisesbe leyīñe endayanca, ndoñe quenátopodena tsēngaftanga atsebācanēnga jtsemnana ca.” <sup>2</sup> Chiyeca, Pablo y Bernabé jabuachana chca buātēmbayēngtaftaca imojānenatsēnaye. Cabana, tmojanēbuáyana Pablo, Bernabé y inñēnga Jerusalenoye chamotsama, choca chē Jesucristbe ichmónēngtaftaca y chē chentše Jesucristbeñe ošbuachiyēngbeñe bētsējemēngcá mándayēngtaftaca chama chamencuentama.

<sup>3</sup> Chcasna, chē Antioquioca imojānenefuana Jesucristbeñe ošbuachiyēnga Jerusalenoye chēnga tmojanichamó. Fenicia y Samaria luarējana imojtsachnējuana ora, chēnga tmojanacuntá ntšamo chē ndoñe judiēnga chēngbe tempsca soyēnguiñe ošbuachiyana tmojtšanajbanama y chora Bēngbe Bētsábeñe imojtsošbuáchema. Jesucristbeñe chentša ošbuachiyēnga chca tmojanuena ora, puerte oyejuayēnga imojtsemna.

<sup>4</sup> Pablo y chē inñēnga Jerusalenoye tmojánashjajna ora, chentša Jesucristbeñe ošbuachiyēnga, Jesucristbe ichmónēnga y bētsējemēngcá mándayēnga chēngbioye tmojanēbuaja. Chentšana, Pablo y Bernabé tmojanacuntá lempe ntšamo Bēngbe Bētsá chátaftaca yojamcá. <sup>5</sup> Pero básefta fariseunga, chora ya Jesucristbeñe ošbuachiyēnga, tmojantsá y mēntšá tmojánayana: “Chē ndoñe judiēnga entsamna chē más delicadentse base bobachtema tētšenēnga jtsemnana, bēnga judiēngcá; y tsēngaftanga cmontsamna chēnga jáuyanana, ntšamo Moisesbe leyēnguiñe iuayancá chamotsamana ca.”

<sup>6</sup> As, chē Jesucristbe ichmónēnga y bētsējemēngcá mándayēnga tmojánenefna jencuéntama, chē ndoñe judiēnga aīñe o ndoñe yonjánamnama chē más delicadentse base bobachtema tētšenēnga jtsemnana, ntšamo chē judiēnga imojanamancá. <sup>7</sup> Bēn y bētsá chēnga tmojanencuentá chentšana, Pedro tojantsbaná y mēntšá tojanéyana: “Jesucristbeyeca catšátanga, tsēngaftanga šmondētatšēmba, ya baytē entsemna Bēngbe Bētsá tsēngaftangbentšana atše šonjanábuayana, Jesucristbe tsabe noticienga chē ndoñe judiēnga jábuayenama, chca, chēnga Bēngbe Utabnábeñe chamotsošbuáchema. <sup>8</sup> Bēngbe Bētsá jtsetatšēmbuana lempe ntšamo entsānga tmojtsejuabnacá. Y cha šonjaninñanyé, chē ndoñe judiēngnaca inmobenana chabe entsānga jtsemnana, chábeñe tmojtsošbuáchese, chē Uámana Espiritu chēngbe ainaniñe cháumashēnguama cha tojanma ora, ntšamo cha bēngbe ainaniñe tojanmca. <sup>9</sup> Y chca, Bēngbe Bētsabiana nyētsanga cachcá monduámana, judiēnga y ndoñe judiēngnaca; y cha tojama chē ndoñe judiēngnaca chēngbe bacna soyēngama perdonánēnga chamotsemnana y ainaniñe tsabe juabna chamotsebmomnana, Bēngbe Bētsabe palabriñe jtsosbuachiyēse. <sup>10</sup> Y mora, ¿ndáyeca tsēngaftanga ndoñe šmontseboše ntšamo Bēngbe Bētsá tojamcá? Pero tsēngaftanga šmontseboše, chē ndoñe judiēnga Jesucristbeñe ošbuachiyēnga lempe chē leyentša mándēnga chamotsocumplínama, mo nda inñabioye uauta uasmanēsha cuaftasmēmncá; pero lempe chē mándēnga, ni bēngbe bēts taitanga ni bēnga ntsobenana

jocúmpliana. <sup>11</sup> Y chca ndoñe chaondětsemna. Bënga mondošbuaché bënga atsebácänënga imomnãma Bëngbe Utabná Jesús chabe tšabe juabna sojaninñanýéyeca, y Bëngbe Bëtsá cachcá chë ndoñe judiëngnaca tojatsebácá ca” —cha tojanéyana.

<sup>12</sup> Chorna, chentše imojtsemna entsãnga nyetscanga iytëca tmojanobiama, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entsãnga jinñanýiyama, y inñe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmca.

<sup>13</sup> Chë útata jóyebuambayama tbojanpochocá ora, Santiago mëntšá tojánayana: “Jesucristbeyeca catšátanga, smochjouena: <sup>14</sup> Simón šonjabuayená ntšamo Bëngbe Bëtsá natsana tojaninñanýé, chë ndoñe judiëngnaca cha iuanýenama, y chíyeca cha chënguentšana banga tojubuáyana chabe entsãnga chamotsemnãma. <sup>15</sup> Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyebuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabreñguine endayancá, mëntšá:

<sup>16</sup> Chentšana atše chanjésabo

y chë Rey Davidbe pamíllanga cachiñe uámanënga chantabiama;

mo nda canýe uáshajayena yebna tojëtšejbcá, atše, Davidbe pamíllanga cachiñe uámanënga chantabiama;

<sup>17</sup> chca, chë inñe entsãnga chamonguango ndayá jamana atše, tšëngaftangbe Utabná, más chašmotsábuatmama,

nyetsca ndoñe judiënga, chë atše entsãnga chamotsemnãma atše tijábacacanga.

<sup>18</sup> Chca atše, tšëngaftangbe Utabná sentsichamo,

nda ya baytë entsemna tonjanma entsãnga chë soyënga chamotsetatšëmbuama ca —chiñe endayana.”

<sup>19</sup> Chentšana Santiago mëntšá tojanéyana: “Chíyeca atše sëntsejuabná, bënga ndoñe šontsamna chë ndoñe judiëngbiamã jamana más totcá chaotsemnãma Jesucristo jtsëstonama. <sup>20</sup> Chamna, šontsamna chënga juabuábiamana y jáuyanana ndoñe chamondëtsesá, sananga chë ndaye soyënga entsãnga tmojuabná diosënga yomna ca jadórama tmojuiyëbana; bacna soyënga shembásenga o boyabásengaftaca ndoñe chamondëtsama y ndoñe chamondëtsesá tsešana bayëngbe mëntšena, y buiñe cach ndoñe ca. <sup>21</sup> Er chë natsana tempënga orscana, nyetsca pueblënguenache mondñena chë Moisés tojëtšanayana soyënga entsãngbiyoe abuaiyinyayënga; y chabe leyënga, nyetsca ochnaytë mondbetsaliaye chë bënga judiëngbe enefjuana yebnënguenache ca” —cha tojanéyana

*Chë Jerusalemoca ichmónënga y bëtsëjemëngcá mándayënga canýe tsbuanácha tmojanichmó chë ndoñe judiëngbiamã*

<sup>22</sup> Chentšana, chë Jesucristbe ichmónënga y bëtsëjemëngcá mándayënga, nyetsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jáchamuama. Chcasna, tmojanëbuáyana Judas, chë Barsabás ca uabobuatná, y Silas; chata ibnamna uámanata chë Jesucristbeñe ošbuáchiyënguentše. <sup>23</sup> Y chëngaftaca canýe tsbuanácha tmojanichmó, y chíñe mëntšá yojëtšayana:

Bënga chë Jesucristbe ichmónënga y chë bëtsëjemëngcá mándayënga, cach tšëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca chacmotsábouamna, tšëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

<sup>24</sup> Bënga fsëntsetatšëmbo bëngbentšana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tšëngaftanga ndoñe šmontsetatšëmbo ntšamo jtsejuabnayana ndayá jamama yomnana, Jesucristbe canýe ndegombra ustoná jtsemnãma. <sup>25</sup> Chcasna, bënga fsënjenoyeuná y šonjúnñana tšabá yojtsemna báseftanga bënguentšana jabacacayana tšëngaftangbiyoe jontjesiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama. <sup>26</sup> Chë útata ba soye tbojotsbocá vida jáshbiamã, Bëngbe Utabná Jesucristbiamã oservëniñe. <sup>27</sup> Chátaftaca Judas y Silas fsënjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemanama.

<sup>28</sup> Chë Uámana Espiritu y bënga cachcá fsëntsejuabná, bënga ndoñe šontsamna tšëngaftanga jamëndana bëtscá jabuache mandënga Moisesbe leyënguine chašmotsocumplínama. Nýe quem uámana soyënga chíñe añe cmontsamna jtsobedecénana: <sup>29</sup> Ndoñe šmattsesaye mëntšena, chë ndaye soyënga entsãnga tmojuabná diosënga yomna ca jadórama tmojóba bayëngbiana; ndoñe šmatjofšiyë buiñe, ni šmatjase tsešana bayëngbe mëntšena; y shembásenga y boyabásengaftaca bacna soyënga ndoñe šmattsama. Chë soyënga ntšamcá, tšabá šmochanjama.

Bèngbe Bètsá salúdoca chacmotsábouamna ca —chiñe yojétsayana.

<sup>30</sup> Chcasna, chë quem Jerusalenocana ichmónënga tmojésanodiosoftanentsana, Antioquia puebloye tmojána; y chocna, nyetsca chë Jesucristbeñe ošbuachiyëngbiye tmojanëbuaja y chë tsbuanácha tmojanayentsbuaché <sup>31</sup> Chë Antioquia pueblentsa Jesucristbeñe ošbuachiyënga ntšamo chë tsbuanáchañe yojtsabemancá tmojanalía ora, bëts añemo tmojtanca y corente imojtsóyejuaye. <sup>32</sup> Judas y Silas Bèngbe Bètsabe juabna oye-buambnayata ibnamna; as, chátnaca chë chentša Jesucristbeñe ošbuachiyëngbiye ba soyënga tmojanéyana, chënga añemo chamotsatsbomnama y Jesucristbeñe corente chamot-sošbuáchema. <sup>33</sup> Chentšana baseftaytese, chentša Jesucristbeñe ošbuachiyënga chëngbiye tmojtandiošoftá, chë ndëmuanyënga tmojanichamóngbiye jtama. <sup>34</sup> Pero Silasna tsábá ibojtsinýana cachentše más jéftsajëtanama. <sup>35</sup> Pablo y Bernabé baseftayshinýe Antioquia pueblentsa tbojanototoná y ba inýengaftaca Bèngbe Utabná Jesucristbe tsabe noticiënga entsanga tmojanabuatambá y tmojanabuayená.

*Pablo cachiñe inýe luarëngoye tojána, Bèngbe Bètsabe trabajo jamama*

<sup>36</sup> Chentšana baseftaytese, Pablo Bernabébiye tbojaniyana: “Bèngbe Utabnabe palabra tbojanabuayená luarëngoye bochjésa, choca Jesucristbeñe ošbuachiyënga jábuachama y jányama ntšamo imojtsemnama ca.”

<sup>37</sup> Bernabé yojtseboše, Juan chë Marcos ca uabobuatmábíoye chátaftaca jéftsbetsama. <sup>38</sup> Pero Páblëna ndoñe tsábá ibojtsinýana cha jéftsbetsana, er Juan chátbentsana tojtsanuáñañe Panfilia luarocana, y ndoñe tonjanatjëmbambá, Bèngbe Bètsabe trabajo japochócantscuana. <sup>39</sup> Y chë palabrama tondaye tbojanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojétsanbetše, y bejaycá Chipre luaroye tbojánata; <sup>40</sup> y Páblëna, Silas tbojanábuayana jéftsbetsama. Chë Antioquia pueblentsa Jesucristbeñe ošbuachiyënga Bèngbe Bètsá tmojanimpadá Pablo y Silas Bèngbe Utabnabe cuuatšínë chabotsemnama, chatbe trabajuíñe chaotsanýenama. Chentšana, Pablo Silaseftaca tbojánbocna y <sup>41</sup> Siria, Cilicia luarënguëjana tojánachnëngo entsanga añemo atšatnaye, chë luarenache enefjuana ošbuachiyënga Jesucristbeñe más chamotsošbuáchema.

## 16

*Pablo Timotéobíoye tbojáninýena*

<sup>1</sup> Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquiná y chabe taitana griego entsá inamna. <sup>2</sup> Chë Listra y Iconioca Jesucristbeñe ošbuachiyënga Timoteobíama tsábá imojanoyebuambná. <sup>3</sup> Pablo tojánbošëna Timoteo jéftsbetsama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nyetsca judiënga imnatšëmbo Timoteobe taitá griego inamnana. <sup>4</sup> Chë ibojtsachnëjuana pueblënguenache chata ibojtsana Jesucristbeñe ošbuachiyëngbiye abuayinaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuachiyënga ndoñe judiënga jamama yojtsamncá. <sup>5</sup> Nyets luarenache enefjuana ošbuachiyënga, Jesucristbeñe más imojtsošbuachiye, y cada te Jesucristbeñe ošbuachiyënga más imojtsóbotena.

*Pablo mo otjenayoquécá canýe Macedonioca entsábíoye tbojáninýe*

<sup>6</sup> Chë Uámana Espíritu, Pablo y Silasbiye tojaninýanyé, chata ndoñe yontsanamna Asia luaroca Bèngbe Bètsabe palabra entsanga jábuayenana; asna, tojánachnëngo Frigia y Galacia luarëjana. <sup>7</sup> Y Misia luaroca enajëbanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondëtsama. <sup>8</sup> Misia luarëjana tmojánachnëngo ora, Troas luaroye chënga tmojána. <sup>9</sup> Chë te ibeta, Pablo mo otjenayoquécá tojáninýe canýe Macedonioca boyabása ibojtsebiatsana y mëntsá ibojtseimpadana: “Diosmanda Macedoniye mabo y šmabëjabuache ca.” <sup>10</sup> Pablo chca tojáninýe y cachora lempe tmonjanprontá Macedoniye jama. Atšnaca, chë quem soyënga uabiamnayá, chënga sënjétsatjëmbambnaye. Bënga fsënjëtsejuabnaye ndegombre Bèngbe Bètsá šojtsanachembuana choye jama ca, Jesucristbe tsabe noticiënga choca entsanga jábuayenama.

*Pablo y Silas Filipos puebloca*

<sup>11</sup> As, Troasentšana bejaycá fsënjána Samotracia luaroye, y yëfsana Neápolis puebloye, <sup>12</sup> y chentšana Filíposoye. Filipos enjamna canýe uámana bëts pueblo Macedonioca y bëtscá romanënga oyeníñe. Chë luarentše baseftayté fsënjanoquedanga. <sup>13</sup> Canýe ochnaytena, chë pueblentsana fsënjétsanbocna y chë fshájaye tsachoye fsënjána. Fsënjauena chentše canjamna canýe luare Bèngbe Bètsáftaca jencuëntama ca, y fsënjána janguanguama.



Fsēnjāninīyena ora, chentše fsēnjanotbiamā y Bēngbe Bētsabe palabra fsēnjanoyebuambā chentše tmojanōjoto shembāsengbiamā. <sup>14</sup> Enjamna canye shembāsa, Lidia ca uabainā, Tiatira pueblōcā, y cha enjamna uāmāna uabuāngana uafjatsenga entšayā uenā. Cha inamna Bēngbe Bētsābioye adorayā y chentše Pāblēbioye ibotseyeyunana. Bēngbe Bētsā tojanma cha chabosertā lempe ntšamo Pablo yojtsoyebuambnacā, Jesucristbeñe chaotsošbuāchemā. <sup>15</sup> Cha y chabe yebnentše oyenēnga tmojanēnabaye ora, Lidia mēntšā šonjanaimpadā: “Tšēngaftanga šmonjayana atše Jesucristbeñe ndegombre stsošbuachē ca; chcasna, mabēnga yebnoye, ātsbentše chašmoquedama ca.”

Y šonjanētariē bēnga chentše joquédama.

<sup>16</sup> Canye te, chē Bēngbe Bētsāftaca encuēntaye luaroye fsēnjétsajna orna, šonjanēbiatše canye tobiāše, oservenā, bacna bayējbe juabna uambayā; chē causa cha malisiyā inamna. Chabe nduiñēnga becā crocēnana imojanōjacañe, chē tobiāše yojanmalisiaye soyēngama. <sup>17</sup> Chē tobiāše tonjanontšē Pablo y bēnga usetonana y mēntšā enjētsaychembumbuana: “¡Quem boyabāsenga montsemna chē celoca Bēngbe Bētsabe oservēnēnga y tšēngaftanga cmontsabuayīnā ntšamo Bēngbe Bētsā yobena tšēngaftanga jātebacama ca!”

<sup>18</sup> Y baytē chca enjanchembumbuana; chē causa, Pablo bonjētsetana y cabana, tonjanobuértana y chē bacna bayējbioye mēntšā tbonjaniyana: “¡Jesucristbe obenānaca y cha jōtšēmbonēse, cbontsemānda chē tobiāšbentšana chacuaisebocnama ca!”

Y cachora chē bacna bayēja chē tobiāšbentšana tojēsanbocna.

<sup>19</sup> Pero, chē bayējbe juabna chābentšana tojēsanbocnama y chēngbiamā más crocēnana jabemama chora chē tobiāše ndoñe yontsobenama, chē tobiāše nduiñēnga tmojanīnīyē ora, Pablo y Silasbioye tmojanīshēche y tmojtsanasojoye plazoye, mandayēngbioye.

<sup>20</sup> Chē mandayēngbioye tmojanēnatse ora, chēnga mēntšā imojtsichamo: “Quem boyabāsata judío entšata bondmēna, y muatbe causa bēngbe pueblentšā entšanga montsenbouenana, <sup>21</sup> y bontsabuātambā soyēnga jamama ntšamo chē judiēnga imuamancā y bēngbe leyēnguiñe chē soyēnga jamama ndoñe quenātslesenciana. Bēnga ndoñe quešnātamna ni jouenana, ni jamana chē soyēnga, romanēnga bētsemnayeca ca” —chēnga imojtsichamo.

<sup>22</sup> Chora chē entšanga tmojanontšē uayebuāchana; as, chē māndayēnga tmojanamēndā chata entšayā jtsētejquēcana y niñēfēngaca jtsachebuānganjana. <sup>23</sup> Jabuache tmojanachebuānganjantēšana, cárceloye tmojanautame y chē utāmenēnga shanyā tmojanmandā yejuana chaotsabuajēnyāma. <sup>24</sup> Chca tmojanmandā ora, chē utamianā chata tojanēnatse chē más tsoye utāmenoye y shecuatšentšana tsbuanēšiñe tojanatsebuā.

<sup>25</sup> Pero tsēntseto orna, Pablo y Silas ibnētsocantañe Bēngbe Bētsā jētschuayama, y cháftaca ibnēncuentaye; y chē inye utāmenēnga chca imojtsuenana. <sup>26</sup> Ndeolpe, corente jabuache yojtsébánjua y chē utāmena yebna fshantsocana yojtsābonjnaye. Cachora, nyētsca chē utāmenentšā bēšašangā tojantēfjo y nyētsca utāmenēnga chē cadenējuangā yojtsayentsjafjona. <sup>27</sup> Pero chē utāmenēnga shanyā tojanofšenā y chē utāmenentšā bēšašangā yojtsatēfjnāma tojanīnīyē ora, cha tojanjuabō nyētsca utāmenēnga tmojtsanacheta ca; chē causa, chabe espadēja yojenosēngbotēntšēna jtsenōitanama. <sup>28</sup> Pero Pablo tbojánbochembo: —¡Acbe cuerpo ndocā matenābomana; nyētscanga camuentše fsēndētsomñe ca!

<sup>29</sup> Asna, chē utāmenentšā shanyā canye uajuināñesha tojanēyā y chē utāmenoye ochamanana tojanamashēngo y auatja causa ngmēmnyā Pablo y Silasbe shecuatšentše yojshēntsamentšiye. <sup>30</sup> Chentšana tojtānēbuacna y tojanēyana: —Señórata, ¿ndayā šojtsemna jamama atše atsbocanā jtsemnama ca?

<sup>31</sup> Y chata tbojanjuā: —Bēngbe Utabná Jesúsbeñe cochtsošbuāchiye, y chca, Bēngbe Bētsā aca cmochanjatsbocā y acbe yebnentše oyenēngnaca ca.

<sup>32</sup> Y cha y nyētscanga chē yebnentše imojtsemnēnga, Bēngbe Utabnabe palabra tmojanabuayenā. <sup>33</sup> Cach ora chē ibeta, chē utamianā chata tojanēnatse chē lisianēnguiñe jetsajabiamā. Chentšana, cha y chabe pamillanga tmojanēnabaye. <sup>34</sup> Chentšana, chē utamianā chata tojanēnatse chabe yebnoye y sanā tojanacaredadō. Cha y nyētscanga chē yebnentše oyenēnga oyejuayēnga imojtsemna, Bēngbe Bētsābeñe imojtsōšbuāchemā.

<sup>35</sup> Yēfsana cachēse, chē mandayēngna soldadēnga tmojanichamō, chē utamianā jamāndama Pablo y Silas chauatabáshejuanama. <sup>36</sup> Chē utamianā Pāblēbioye tbojaniyana: —Chē māndayēnga šmonjamandā tsēndata jtabáshejuanama. Chcasna, šontsobena natjēmbana jtsatoñāna ca.

<sup>37</sup> Pero Pablo chē soldadēnga tojanēyana: —Bēndátnaca fsēndmēna mo Romoca onyñanatcā derecho bomnata y šonjāchebuanganja entšangbe delante, bacna soyēnga aīñe o ndoñe tatifjamama cabā ndinñanyīye ora, y cárceloye šmonjautame. ¿Y mora imojtseboše iytēcana jtabáshejuanama? Chca ndocna te chaondētsemna; cach māndayēnga chamuabo jabātēbuacnama ca —cha tojánayana.

<sup>38</sup> Chentšana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja. <sup>39</sup> Chcasna, cach mándayënga tmojána chata perdón jatétejañama; chentšana tmojtanebuacna y tmojanëyana: “Diosmanda, muentsána inýe luaroye motsoñata ca.” <sup>40</sup> As chata chë utámenentšana tbojëftsanbocna y Lidiëbe yebnoye tbojëftsanata. Chentšana, Jesucristbeñe ošbuáchiyëngaftaca tmojáneneñfna y chata tbojánayana soyëngaca chëngbioye tmojanañemó. Y chentšana, chata inýoye tbojtsanoñe.

## 17

### *Tesalónica puebloca, Pablo y Silasbioye ndoñe tšabá tmojanëbuaja*

<sup>1</sup> Pablo y Silas inýe luaroye ibojtsaye ora, Anfípolis y Apolonia bëts pueblënguëjana tbojánachnëngo y canýe bëts pueblo, Tesalónica ca uabáinoye tbojánashjango. Chentše, chë judiënga canýe yebna innabomna chënga jénefnama. <sup>2</sup> Páblëna, ntšamo enjanamancá, cada ochnaytë chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsësnaye. Bëngbe Bëtsabe uabemana palabrenguiñe iuayana soyëngaca, <sup>3</sup> chënga yojanabuayinýa y ndegombre yojaninýanýná, Bëngbe Bëtsabe Uamana Uabuayaná jóbanama y chentšana jtaenayama ibojamnama. Y mëntsá yojanëtsësná: “Chë Cristo, Jesús endmëna, ndabiama atše cbontsabuyinýa ca.”

<sup>4</sup> Judiënguentšana báseftanga chiñe imojtsošbuáchiye y Pablo y Silas tmojanëseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uamana shembásengnaca. <sup>5</sup> Pero chë judiënga ndošbuáchiyënga chca tmojáninýe ora, puerte envidia imojtsebmna. Asna, chënga tmojánachembo banga, tondaye amënga y bacna entšanga, y chënga tmojanenutaná jamama nyëtscá chë pueblentša entšanga chamotsenbouénanama; y canýe entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entšangbe cucuatšifne jabáshejuanama. <sup>6</sup> Pero chentše ndocná tmojáninýena; as chë entšanga Jasón imojtsesjojeye y chentša mándayënga imojëtsemnoye tmojanánatse y Jesucristbeñe inýe ošbuachiyëngnaca choye tmojanënatse, y mëntsá imojtsáyebuache: “¡Chë boyabásata, chë ndëmuanyáta ibojtsama nyëtscá luarentša entšanga chamuenbouénanama, quem luaróynaca tbojabo, <sup>7</sup> y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguifne ndoñe quenatslesenciancá, er chënga montsichamo inýe rey canmëna, Jesús ca, y cha, César chë Romoca mandadbe cuenta nyëtscángbeñe yojtsemándá ca!” —chënga imojtsáyebuache.

<sup>8</sup> Chë entšanga y chë pueblentša mándayënga chca tmojanuena ora, corente imojenbouénana. <sup>9</sup> Pero Jasón y chë inýënga, cháftaca imojtsemnënga, crocénana tmojtanjajó, y as tmojtanabáshejuana.

### *Pablo y Silas Berea Puebloca*

<sup>10</sup> Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebloye chabuëtsebocnama. Y chata choye tbojánashjango ora, chë judiëngbe enefjuana luaroye tbojánata. <sup>11</sup> Chentša judiënga imojamna más tšabe ainana bomnënga chë Tesalonicoca judiëngbiama; chcasna, oyejuayënga chë buayenana soye Jesucristbiama tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsësnacá aíñe o ndoñe ndegombre yojtsemnama. <sup>12</sup> Y chca, ba chentša judiënga chatbe palabracá Jesucristbeñe imojtsošbuáchiye, y Grecia luaroca ba uamana shembásënga y boyabásengnaca. <sup>13</sup> Pero, Pablo Bereoca chë Bëngbe Bëtsabe buayenana soyama entšanga yojtsabuayinýama chë Tesalonicoca judiënga tmojántatšëmbona ora, chënga choye tmojána y tmojanma chentša entšanga chamuenbouénanama. <sup>14</sup> Chcasna, banga Jesucristbeñe ošbuáchiyënga tmojanma cachora Pablo chentšana chauëtsebocnama y bējaye tsachoye chaotsoñama; chëntscuana, Silas y Timoteo Bereoca tbojanuqedá. <sup>15</sup> Pablo tmojantjëmbambá entšangna, Atenas ca uabaina bëts pueblóntscóñe cháftaca tmojána. Chentšana, Pablo chënga tojanabuayená chamuaisshëconama Silas y Timoteo jaúnayama betscó jtsayana, Pábloftaca jateninýenama.

### *Pablo Atenas puebloca*

<sup>16</sup> Pablo Atenas bëts puebloca Silas y Timoteo yojtsëbatmanëntscuana, puerte tbojanongmé, er cha tojáninýe chentša entšanga imojtsadorana bëtsá cachëngbe pormanana soyënga, ndayama chënga imojanjuabná diosënga yojamna ca. <sup>17</sup> Chíyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adórayëngaftaca

imojánenatsëtsnaye, y cada te chentša plazoca chë ndëmuanyënga chentše imojanashja-juanëngaftácnaca. <sup>18</sup> Y báseftanga, ntšamo jtsejuabnayama entšanga abuátambayënga, epicureunga y estoiquënga ca uabainëngnaca Pábloftaca imojánenatsëtsnaye. Inyënga imojtsichamo: “¿Ndayama quem bostero yojtsoyebuambná ca?” Y inyënga: “Chana inyë luarëngoca entšangbe diosëngbiana muentše entsabóyebuambnay ca.”

Chënga chca imojtsichamo, er Páblëna Jesusbiana y chë obanënga jtayenama yojanoyebuambná. <sup>19</sup> Asna, chentša entšanga cha tmojanánatse canyë luaroye, entšanga jénefnama y oyebuambnayënga joyaunayama luare, Areópago ca uabáinoe. Chentše imojanamana uámanënga jénefnana, nderado ndabiana jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bëtšayanana bënga quefstsobena jtsetatšëmbuama ca? <sup>20</sup> Aca tsëm soyënga šcontsëtsëtsná y bënga fsëntseboše jtsetatšëmbuana ndayá chë soyënga bëtšayanana.

<sup>21</sup> Er nyëtscanga Atenasentaša oyenënga y inyë luarëngocana áshjajnënga, corente yojanogüsetana chë tojtsopasana tsëm soyëngama jtsuenanana y jtsencuëntayana.

<sup>22</sup> As Pablo tojantsá chëngbe tsëntsaca chë Areópago ca uabáinentše y tojánayana: —Atenasentša entšanga: ntšamo bominyë sënjjajácá, atše sëntsetatšëmbo tsëngaftanga ba diosënga puerte šmayaunana y šmadoránama. <sup>23</sup> Atše sëndánrreparana tsëngaftangbe diosënga šmëtsadorana luarënguenache y sënjinýena canyë altar y chentše mëntšá iuábemana: “Chë Bëtsá nduabuatmbiama ca”. Y morna, chë Bëtsá chë nda ntsabuatmčá šmadoránabiana, atše cbontsabuaiyná.

<sup>24</sup> “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórana entšangbe jebna yebnënguifne, <sup>25</sup> ni quebnatájaboto ndocná chabiana tondaye chaondëtsama, er cha endmëna nda inëtsama bënga vida chamotsebmomna y jtseshachnayama chamotsobenama, y cha nyëtsca soyënga šnetsatšatnaye.

<sup>26</sup> “Cha nyë canyë boyabásabentšana nyëts luarënguentša entšanga tojánabiana, nyëts quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entšanga chamuetsiyenama; <sup>27</sup> chca, Bëngbe Bëtsá chamonguanguama, masque chabiana ndoñe corente tmontsetatšëmbo, y chamuinýena y chábeñe chamotsošbuáchemá; pero ndegombre, Bëngbe Bëtsá bëngbentše cada cányábentšana ndoñe bënoca quenátšmëna. <sup>28</sup> Ntšamo canyá tojanayancá: ‘Bënga Bëngbe Bëtsáftaca cányifne mo cányácá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tsëngaftanguentša báseftanga bëtš soyëngama uabiamnayëngnaca tmojanayancá: ‘Bënga nyëtscanga Bëngbe Bëtsabe básenga mondmëna ca’. <sup>29</sup> Y chcasna, Bëngbe Bëtsabe pamillanga bënga tmonnëse, ndoñe quešnátamna jtsejuabnayana Bëngbe Bëtsá yomna mo cach entšangbe castellano, midio o chë ndëtsbeca pormana soyëngcá ca, er chë soyëngna nyë ntšamo entšanga tmojajuabocá y tmojtsobencá japórmana. <sup>30</sup> Pero Bëngbe Bëtsá tojanjuabó ndoñe ntjanjányana chë entšangbe tempsca ndosertánana, y morna, nyëtsca luarënguentša entšanga entsamënda, ndaye bacna soyënga tmojtsamabó ngmëncaca chamuenojuabó, chca amama chamotsajbaná y Bëngbe Bëtsabe benache chamuatishache ca. <sup>31</sup> Bëngbe Bëtsá canyë te tojuinýnaná, y chë tena, ndocnábiyoe inyábiana más tšabá ntjanjányacá, cha echanjayana entšanga tšabá o ndoñe tšabá tmonjamama; lempe chca cha echanjama canyá cachá tbojabocacá entšáftaca, Jesús; y chca yochtsemmamna, Bëngbe Bëtsá entšanga tojinýanýé, chë bocacaná Jesús cháuatayenama cachá tojánmayeca ca” —Pablo tojánayana.

<sup>32</sup> Chë obanënga mochtayenama ichámuana chë entšanga tmojanuena ora, báseftanga Pablo imojtsáboyeuana, y inyënga mëntšá imojtsichamo: —Bënga fsëntseboše chë contsichamo soyënga más chcoye cachiñe jatuenama ca.

<sup>33</sup> As Pablo chëngbentšana tojésanbocna. <sup>34</sup> Pero báseftanga aíñe Jesucrístbeñe imojtsosšbuáchiye y Pablo tmojanasto más jatuenama; chënguentše imojamna Dionisio, canyá chë Areopagoca tbiamanënguentšá; canyë shembásanaca, Dámaris ca uabaina, y inyënga.

## 18

### *Pablo Corinto puebloca*

<sup>1</sup> Chë soyënga tojanochnëngüentšana, Pablo Aténasentšana Corinto bëtš puebloye tojána. <sup>2</sup> Chocna, canyë judío Ponto luaroca onýnanáftaca tbojáneninýena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nyëtsca judiënga Romocana chamuáisebocanama choca bëtš mandado Claudio tojanmandá causa. Pablo tojána chata jautsëtsayama, <sup>3</sup> y ntšamo chata jamama Páblëncaca jamama inatátšëmboyecna, chátaftaca yojtsoquedañe y cányifne chënga imnatrabájaye; chënga imnatátšëmbo mo tambotemëngcá entšëjuaca japórmana. <sup>4</sup> Y nyëtsca ochnayté, Pablo yojanamana chentša judío

entsangbe enefjuana yebnoye jana, Bëngbe Bëtsabe soyëngama jóyebuambayama, y puente yojtsentsëna judiënga y ndoñe judiënga chamotsošbuáchemá, ntšamo cha yojtsanëtsëtsnacá ndegombre bëtsemnama.

<sup>5</sup> Silas y Timoteo Macedoniocana choye tbojánashjango ora, Pablo nÿets tempo Bëngbe Bëtsabe soyëngama entsanga yojtsabuayiynaye y puente tšabá chë judiënga yojaninÿanÿná, Jesús ndegombre Bëngbe Bëtsabe Uámana Uabuayaná bëtsemnama. <sup>6</sup> Pero chë judiënga Páblëbe contra imojtsemna y tmojanontsé podesca chabiamá ichámuana. Asna, Pablo chabe uichëtjoniyangá yojtsenántšasjayaye, chënga jinÿanÿiyama chënga ndoñe tšabá tmonjáchjanguama, y tojanëyana: “Tšëngaftanga ndatsebácanënga chašmojóbanëse, cach tšëngaftanga šmochtsótatšëmbñe; atšna ndoñe. Mëntescana chë ndoñe judiënga jábuayenama chantsoñe ca.”

<sup>7</sup> Chorna, chë judiëngbe enefjuana yebnentsana tojëftsanbocna y canÿe boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentsa juachaca inoyena. <sup>8</sup> Y Crispo, canÿe chë enefjuana yebnentsa mandayá, Bëngbe Utabná Jesucristbeñe yojtsošbuáchiye y nÿetsca chabe pamíllangnaca; y banga chë Corintentsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. <sup>9</sup> Canÿe ibeta, Bëngbe Bëtsá Páblëbioye mo canÿe otjenayoquécá tbojanianaya: “Ndoñe matauatjana; nÿe cochtsana atšbe soyëngama oyebuambnaye y ndoñe iytëca cattsemana. <sup>10</sup> Er atše ácaftaca sëntsemna y ndocná quemochátsbojajo ntšámnaca jáborlama; atše bëtscá entsanga quem pueblentše sëndábamna ca.” <sup>11</sup> Chcasna, Pablo Corintentsë canÿe uata y chñënguana shinÿe tojanototoná, Bëngbe Bëtsabe palabra entsanga abuatambaye.

<sup>12</sup> Pero, Galión chë Acaya luarentša mandado inamna orna, chë judiënga imojenoyeunaye Páblëbe contra; cha tmojánishache y chë tribunaloye tmojanánatse. <sup>13</sup> Chocna, chë mandado tmojanianaya: —Mua entsanga entsëtsëtsná y entsama chënga Bëngbe Bëtsá chamotsadora, pero ndoñe ntšamo bëngbe leyënguiñe endayancá ca.

<sup>14</sup> Pablo jóyebuambayama uatajanóntša orna, Galión chë judiënga tojanëyana: —Quem entsá nderado inÿabioye matbënjóba o ndayánaca chca matënjobuachjanguá, as cocayé atše matijótbema tšëngaftanga judiënga yejuana joyaunayama; <sup>15</sup> pero ntšamo šmontsichamcá entsemna nÿe buatëmbana soyëngama, nÿe tšëngaftanga šmëbuatma entsangbiama y cach tšëngaftangbe leyëngoma; chcasna, cach tšëngaftanga cmontsamna jenóyeunayana y jamana ntšamo chašmojenoyeunacá. Atše quem base soyëngama ndoñe quetsátsboše ngoberna jtsemnana ca.

<sup>16</sup> As Galión tojanamëndá chë tribunal luarentšana chë judiënga jtëbuacnama. <sup>17</sup> Chorna, chë entsanga tmojánishache chë judiëngbe enefjuana yebnentsa mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentsamna.

*Pablo Antioquiye tojtaná y chentsana cachiñe inÿe luarëngoye tojána, Bëngbe Bëtsabe trabajo jamama*

<sup>18</sup> Pablo cabá bayté Corintentsë tbojánatona. Chentsana, Jesucristbeñe ošbuachiyëngbentsana tojesanodiošoftá y bejaycá Siria luaroye tojána, Priscila y Aquilaftaca. Cabá Sirioye nda ora, Cencia puebloca nÿets stjénashe yojtsenátšbotje, Bëngbe Bëtsábioye jinÿinÿiyama canÿe soye tbojanšbuáchenama. <sup>19</sup> Efeso puebloye tmojánashjajna ora, Páblëna Priscila y Aquila tojesanabashejuana. Chentsana, cha tojána chë chentša judiëngbe enefjuana yebnoye y chentše chë judiëngaftaca yojanoyebuambná y imojánenatsëtsnaye. <sup>20</sup> Báseftanga Pablo tmojanimpadá inÿe baseftayté chentše chauesomñama, pero chana ndoñe tonjanoyauná; <sup>21</sup> chentsana, chëngbentsana tojesanodiošoftá, mëntšá jëftsëyanëse: “Nderádose cachiñe chantésabo tšëngaftanga jabábuchama, Bëngbe Bëtsá šojalesenciase ca.”

Chora, Pablo bejaycá Efesocana tojëftsanbocna. <sup>22</sup> Cesarea puebloye tojánashjango ora, tojána jacheuayama Jesucristbeñe ošbuáchiyënga Jerusalenoca; y chentsana Antioquiye tojána. <sup>23</sup> Chentše baseftayté yojëftsemna; y chentsana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

*Apolos, Efeso puebloca Bëngbe Bëtsabe soyëngama yojanabuayiyná*

<sup>24</sup> Cach tempo, Efesoye tojánashjango canÿe judío, Apolos ca uabainá, Alejandría bëtš puebloca; cha puente obená inamna jonguamiyama y corente inatátšëmbo Bëngbe Bëtsabe uabemana palabrëngama. <sup>25</sup> Bëtscá tojánatsjinÿe chë Bëngbe Utabná tojaninÿanÿé benachama; añémoca yojanoyebuambná y Jesusbe soyëngama botamana yojanabuatambá, masque cha nÿe ntšamo Juan entsanga tojánabuatambama y tojanëbáyama inatátšëmbo. <sup>26</sup> Ndauatjá Apolos tojanontsé jóyebuambayama chë judiëngbe enefjuana yebnentsë. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inÿinÿena benache bëtsemnama. <sup>27</sup> Apolos

Acaya luaroye jama yojtseboše orna, Jesucristbeñe ošbuáchiyënga bëtscá tmojanañémó y choca Jesucristbeñe ošbuáchiyëngbiam canýe tsbuanácha tmojanichmó, chca, Apolos choca tsábá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanējabuache. Bëngbe Bëtscá chëngbe tsabiama yojanjuabnáyeca, chënga Jesucristbeñe corente imojtsošbuáchiye. <sup>28</sup> Entšangbe delante chë judiëngaftaca jabuachana imojánenatsëtsnaye y nyëtsanga tojaninýanýé, ntšamo ndoñe tsábá inamncá chë judiënga imnatatsëmbuama; y Bëngbe Bëtscabe uabemana palabrëngaca chënga tojaninýanýé, Jesús Bëngbe Bëtscabe Uámana Uabuayaná bëtsemnama.

## 19

### *Pablo Efeso puebloca*

<sup>1</sup> Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanyëna, pero chëngna nyë ntšamo Juan chë Ubayaná tojanabuatambacá imnatatsëmbo. <sup>2</sup> Pablo chënga tojanatjá: —¿Uámana Espíritu chenjánabo tsëngaftangbe ainaniñe jtsemándayama, Jesucristbeñe ošbuáchiyënga šmojanóbiam ora ca?

Chora chënga tmojanjuá: —Ni mo queftsátstatsëmbo chë Uámana Espíritu yomnama ca.

<sup>3</sup> Y Pablo tojanëyana: —As, žntšamo šmojánenabaye ca?

Y chënga tmojanjuá: —Fsëñjánenabaye ntšamo Juan entsanga yojanëbayancá ca.

<sup>4</sup> As Pablo tojanëyana: —Juan tojanëbaye chë bacna soyënga amama ngmënaca tmojanenuabó, chca amana tmojanajbaná y chë Bëngbe Bëtscabe benache tmojánishachënga, y entsanga yojanëtsësná chë chábentsana yochjanashjanguábeñe chamotsošbuaché ca; y cha Jesús endmëna ca —Pablo tojánëyana.

<sup>5</sup> Chca tmojanuena ora, chënga tmojánenabaye Bëngbe Utabná Jesús jótšëmbonëse, chábeñe imojtsošbuáchema. <sup>6</sup> Pablo chëngbe bestšasiñe chabe cucuatsënga tojanajó ora, Uámana Espíritu chëngbe ainaniñe tojánamashëngo jtsemándayama; tmojanontšë inýëtšá biyangana, chënga tempo ndmabiyañe, y Bëngbe Bëtscabe juabna imojtsoyebuambná. <sup>7</sup> Chentše imojtsemna bnëtsana uta entsanga.

<sup>8</sup> Unga shiniyëntscuana Pablo yojánaye chë judiëngbe enefjuana yebnoye y ndauatjá Jesucristbe soyëngama yojanoyebuambná; entsángaftaca imojánenatsëtsnaye y entsanga yojanëtsëtsná Bëngbe Bëtscabe amëndayama, chënga chábeñe chamotsošbuáchema. <sup>9</sup> Pero ba nduauenanënga ndoñe imontsošbuaché y Bëngbe Utabná tojaninýanýé Benachama entsángbeñe bacna soyënga imojtsichamo. Chcasna, Pablo chëngbentsana tojtsanojuánañe y nyë chë Jesucristbeñe ošbuáchiyënga tojanëbuaja canýe scuelye, canýe entsá Tirano ca uabainabe yebnoye. Chentše cada te chë ouenanëngaftaca yojanoyebuambná, <sup>10</sup> y chca yojánama uta uatëntscuana; y chca, nyëtsanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca. <sup>11</sup> Y Bëngbe Bëtscá puerte bëtš soyënga Pábloftaca yojtsama. <sup>12</sup> Tša bëtš soyënga tojanma; chíyeca, nyëtsca chë Pablo tojuabojajo entsáyá y pañuelëjuangá, entsanga imojanamana soquëngbioye juyambana, y chca tmojama orna, chë šocanënga juenatjëmbana y chë bacna bayëjënga entsángbentsana jésebocanana.

<sup>13</sup> Pero básefta judiënga tsáshenañe bacna bayëjënga entsángbentsana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbioye mëntšá imojtsëtsëtsnaye: “Bëngbe Utabná Jesús, Pablo bondbetsebayaná jótšëmbonëse y chabe obenánaca cbontsamënda muabentsana chašmuaisebocnama ca.”

<sup>14</sup> Chca imojánama chë judío Esceva ca uabainabe canýsëfta uaquiñënga. Esceva inamna bachnangbe amëndayá. <sup>15</sup> Pero canýe, Escévëbe uaquiñënga chca tmojánayana orna, chë bacna bayëja mëntšá tojanëju: “Atše Jesús sënduábuatma y sëndëtatsëmbo nda Pablo yomnana; pero tsëngaftanga, žndëmuanyënga šmomna ca?”

<sup>16</sup> As, cachora chë bacna bayëje juabna uambayá chëngbioye tojanontsënja y tša añemo bonná bëtsemnayeca chënga tojtsanayëjaná, jabuache jtšajantsetayëse; chë causa, chënga chë yebnentsana tmojtsanacheta enašënga y lisiánënga. <sup>17</sup> Nyëtsanga Efesoca oyenënga, judiënga y ndoñe judiënga, chca tmojantatsëmbona y corente imojtsanauatja. Y chca, Bëngbe Utabná Jesús entsanga más imojtsantschuanaye.

<sup>18</sup> Jesucristbeñe imojtsošbuachiyënguentsana, banga imojánashjuana y entsangbe delante imojtsecompšaye, tempo bacna soyënga tmojanmama; <sup>19</sup> banga, chë bocjuanana soyënga jamama imojanëntšënënga, chëngbe bocjuanana librëšangá tmojaninyëbo y entsanga imojtsantješna ora, chëšangá imojtsajuiniýe. Tmojanjuabó ntsachetšá chë librëšangá bëtšamanama y tojanóbocna shachna bnëtsana uaranga crocénana nyëtšá. <sup>20</sup> Y

chca, Bëngbe Utabnabe palabra más ba entsānga imojtsuenana y chiñe imojtsošbuáchiye y Bëngbe Bëtsá chabe obenana entsāngbeñe yojtsinñinñaye.

<sup>21</sup> Chca tojanochñëngüentsāna, Pablo tojanjuabó Macedonia y Acaya luarënguëjana jachñënguse, Jerusalenoye jésama. Y yojtsejuabnaye cha ibojtsemna Jerusalenentsāna Romoye jama ca. <sup>22</sup> Asna, chabe uajabuachanënguentsāna útata, Timoteo y Erasto, Macedonoye cha tojanichamó. Chëntscuana Pablo baseftayté más Asia luarentse tbojanjétana.

#### *Efesoca entsānga tmojánenboudenana*

<sup>23</sup> Chë tempo, Efesoca entsānga corente tmojánenboudenana, chë Bëngbe Utabná yojtsinñanñá Benache imojtsisháchichanëngbe causa. <sup>24</sup> Chë entsānga chca tmojanma, er canñe entsá mídioca soyënga pormayá, Demetrio ca uabainá, chënga tojanayëñaná chca jamama. Cha yojanamana binche soyetëmënga japórmana y chëtëmënga yojāninñana mo chë Efeso pueblonëngbe diosá Artemisa jadórmana bëts yebncá. Demétrioftaca imojantrabájangna bëtscá crocénana imojanójacañe chë soyetëmënga eniñe. <sup>25</sup> Demetrio tojanëbuaja cháftaca imojantrabájanga y inñenga cach mídioca soyënga pórmayënga, y mëntsá tojanëyana: “Baconga, tsëngaftanga šmondëtatšëmbo, bënga bëtscá crocénana jtsebmomnanna quem trabajuentšana chca jopódiana. <sup>26</sup> Pero tsëngaftanga šmontsonýa y šmontsuenana ntšamo chë Pablo ca uabainá yojtsichamcá. Cha entsichamo, chë entsāngbe pormana soyënga ndoñe yontsemna jtsadoránana ca; y chca ba entsānga tojabuayená y chënga aiñe montseyeunana. Chë soyna ndoñe nñe muentse Efesentse chca quenátopasana; nñets Asia luaríñnaca chca entsopasana. <sup>27</sup> Resjo entsemna; chca causa, entsānga bëngbe trabajuama ndoñe tsábá quemochátichamo y chë uámana Artemisa jadórmana bëts yebnama mochántichamo uámana yebna ndoñe yondmëna ca. Y chca, Artemisbe obenana entsānga mochantsábotena y Artemisa ndoñe bañe quemochátatuatma, nda Asientse y nñets luaríñnaca mondadorana ca.”

<sup>28</sup> Chca tmojanuena ora, chca pórmayënga puerta tojánëtëna y tmojánáyebuachena: “¡Efesoquëngbe Artemisa corente bëtscá endmëna ca!”

<sup>29</sup> Y chca, nñetsca chë pueblentsá entsānga tmojánenboudenana. Tmojanotabá Gayo y Aristarquëbioye, Macedonioca boyabásata, Pablëbe tjëmbambnayata; y sjojónana tmojanënatse chëngbe enefjuana yebnóntscoñe. <sup>30</sup> Pablo tojánbošëna choye jamashënguama chë entsāngaftaca jýebuambayama, pero Jesucristbeñe ošbuachiyënga ndoñe tmonjanlesenciá. <sup>31</sup> Chë Asioca mándayëngbentse báseftanga imnamna Pablëbe amiguënga, y chënga Pablëbioye palabara tmojanafja chë jénefnama yebnoye ndoñe chaondámashënguama.

<sup>32</sup> Chëntscuana, entsānga imojtsejotonocna, inñenga imojtsechembumbuana canñe soye y inñengna inñe soye, chënga corente imojtsenboudenana causa, y banga chentse imojtsemnënga ndoñe imontsetátšëmbo ndayama choye tmojanobéconama. <sup>33</sup> Pero básefta judiënga, canñe entsá, Alejandro ca uabainá, chë entsāngbe natsanoye tmojanajuatsëntse, y báseftanga cha tmojanbuayená ntšamo yojtsopasánama. Asna, Alejandro tojánëfatšëmbo cucuátseca iytëca chamobiamama, er cha yojtseboše entsāngbe delante chë judiënga jobuauyanama. <sup>34</sup> Pero, Alejandro judío bemnama chë entsānga tmojánatšëmbona ora, nñetscanga tmojánáyebuachena uta horëntscuana, mëntsá: “¡Efesoquëngbe Artemisa corente bëtscá endmëna ca!”

<sup>35</sup> Chë pueblentsá mándayëngbe uajabuachaná, entsānga iytëca jábiamama tojanobená ora, tojanëyana: “Efesoquënga, nñets luaríñe endótatšëmbo, quem pueblentsë oyenënga iuamna jtsinñenana chë Artemisa jadórmana bëts yebna y chë cha jadórmana celocana ot-satsëna ndëtšbé. <sup>36</sup> Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tsábá ntšajuaboycá. <sup>37</sup> Tsëngaftanga quem boyabásenga moye šmojunatse, masque Artemisbe yebnentse tondaye tmonjatbëba y bëngbe Artemisbiana ndoñe podesca tmonjoyebuambá. <sup>38</sup> Demetrio y cháftaca šmotrabájanga, nderado ndabiana ndaye demanda šmojtsebmomñësna, cabildoca endatëfjna y chentse mándayënga montsemna chë demandënga joudenama, y chëngbentse cada ona šmochjéftsemdándana. <sup>39</sup> Y tsëngaftanga inñe soye šmojtsenguasna, cmontsanna ntšamo bëngbe leyënguñe yomandancá, nñetsca quem pueblentsë oyenëngaftaca jenóyeunayana. <sup>40</sup> Ndayá mënté tojopasá causa, resjo entsemna bëngbiana chamuayana, ntšamo leyënguñe yomncá bënga ndoñe montsama ca; y bënga ndoñe quemuátobena ndayá jojuana, ndáyeca quem enboudenana tojopasá ca šojátjayëse ca” —cha tojanëyana. <sup>41</sup> Y chca jayanëse, chë entsānga tojtanichamó.

## 20

#### *Pablo, Macedonia y Grecia luaroye tojána*

<sup>1</sup> Chë enboudenana tojanochñëngo ora, Pablo chë Jesucristbeñe ošbuachiyëngbiye tojanëbuaja jábuayenama, añemo chamotsatsbmomnana; tojesanodiošoftá y Macedonoye

tojéftsanbocna. <sup>2</sup> Chê luarënguëjana cha tojánachnëngo Jesucristbeñe ošbuachiyënga becá aňemo atatsatnaye, ba chabe palabrëngaca; chentšana, Grecia luaroye tojánashjango, <sup>3</sup> y chentše unga ishinje tojanoquedá. Barquëshañe Sirioye játama Pablo yojtseprontana orna, tojátatšëmbona chë judiënga cha jtsóbama tmojanenöyëunama. Asna, tojanenöjúbó jesshëconama, cach Macedonia luarëjana jësachnënguse. <sup>4</sup> Pablo quem boyabásenga tmojantjëmbábá: Sópater, chë Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófinnaca, Asia luarocata. <sup>5</sup> Chënga tmonjanonatsé y šonjanëbatma Troasoca. <sup>6</sup> Chë levadúraca ndëpormana tandëse saye fles-tentšana, Filípotsentšana barquëshañe fsënjëftsanbocna y shachna tianoye, Troasoca chë tmonjanonatsenga fsëntanishëche, y chentše canje semana fsënjanoquedanga.

# *Ntsamo tojanopasá Troas puebloca*

<sup>7</sup> Chë inje semana jobojátsuma te, fsënjánenefjna Jesucristbeñe ošbuachiyëngcá tandëse jajátayama, cánjiñe jasama; y Pablo entsànga enjétsëtsëtsnaye. Cha bonjamna yëfsana chentšana jëftsebocnana; chë causa, más bën chëngaftaca tonjanoyebuambá, tsëntsetëntscuana. <sup>8</sup> Fsënjamna canje tsoye tsbanana tsañoca y chentše ba uajuinjanëshangá enjanamna; <sup>9</sup> y canje bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocayana tbojanábuache. Cabana, corente tojtsanomaná ora, chë unga tsañocana tontsanótsatše y obaná chora tmontanatsbaná. <sup>10</sup> As, Pablo tonjánastjango, chë bobóntsbioye tbonjanotsbuajó y tbonjanotsejcuá. Y chë entsànga tonjanëyana: “Ndoñe nyëtsá matauatjëngana; ainá cha entsatsmëna ca.”

<sup>11</sup> Chentšana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbaneše tojanmama. Chora Pablo chë entsàngaftaca tonjanse y tontëtanontšë oyeuambnayana, jabinjñëntscuana. Chora Pablo chentšana tontsanofne. <sup>12</sup> Y chë otsatsëna bobontsa ainá imojtsatánatseñe, y chama chë entsànga corente oyejuayënga imojtsemna.

# *Pablo Troasentšana Mileto pueblöye tojána*

<sup>13</sup> Bëngna fsënjanonatsé y barquëshañe fsënjána Aso pueblóntsoñe, chentšana Pablo jtesbetšama, ntšamo fsënjananoyeunacá, er Pablo tonjánbošëna fshantscá choye jana. <sup>14</sup> Asoca Pábloftaca fsëntaneninýëna ora, bëngaftaca barquëshañe cha tonjána Mitilene pueblöye. <sup>15</sup> Chentšana fsënjëftsanbocna y yëfsana Quío luarëjana fsënjánachnëngo, y chë inje yëfsana Samos luaroye fsënjánashjajna. Chentšana fsënjána y yëfsana Mileto pueblöye fsënjánashjajna. <sup>16</sup> Chca tonjanochnëngo er Pablo ndoñe chenátanbošëna Efesoye jama, Asia luariñe ndoñe yapa ndëtsemnana. Chca tojánbošëna er cha enjëtseboše betscó Jerusalenoca jtsatsmëna, tojopodesna chë judiëngbe fiesta, Pentecostés ca uabaina fiestama.

# *Ntsamo Pablo chë Efesoca ošbuachiyëngbeñe bëtsëjemëngcá mándayënga tojanëyana*

<sup>17</sup> Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana. <sup>18</sup> Chënga tmonjánashjajna ora, Pablo tonjanëyana: “Tsëngaftanga šmondëtatšëmbo ntšamo atše quem Asia luaroye sënjabánashjango orscana tsëngaftangbeñe snetsamana. <sup>19</sup> Nyëts tempo Bëngbe Utabná sëndëserveda y cach atše uamaná ndoñe quetsatenobiamná. Corente shëchbuiye tijëftsoperdé y ba soyënguine tijasufri, chë judiënga atše jóbama mondboše causa. <sup>20</sup> Y lempe ntšamo tsëngaftangbe tsabiamna yomncá tcbonjabuayená; tondaye ntjatsbuetamencá. Nyëtsangbe delante sënjabuatambá y tsëngaftangbe yebnënguenáchnaca. <sup>21</sup> Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngmëncá chamuenujuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchëma. <sup>22</sup> Y mora Jerusalenoye chanjá; Uámana Espiritu chca šontsemándá y ndayá choca chjapásamna ndoñe quetsátstátšëmbo. <sup>23</sup> Nyë mëntsá aife sëndëtatšëmbo: Nyëtsca bëts pueblënguenache ndayëjana atše chandbëtsana, Uámana Espiritu šondbëtsëuajiyinaye entsànga cašmochjutame y puerte chaisufriama camochjama ca. <sup>24</sup> Atšbe vida cach atšbiamna ndoñe yapa quenatámana, chaitsaina o chayóbana. Pero atšbiamna iuámanana endmëna ndayá atše jobenayana atšbe trabajo jëftsepochócana, ndayá Bëngbe Utabná Jesús šojanmandá jamama, chë tsabe noticiënga Bëngbe Bëtsá entsàngaftaca tsabia yomnana jábuayenama.

<sup>25</sup> “Y mora atše ndegombre sëntsetatšëmbo, tsëngaftangbentšana, chë ndëmuanjëngbentše Bëngbe Bëtsabe amëndayama sënjabuayená, ndocná atše más quešmochátinje. <sup>26</sup> Chiyëca, atše ndegombre mënté cbetsëyana: Atše tondaye quetsátstátšëmbo nderado nda ndatsbocaná chaojóbanabiamna, <sup>27</sup> er atše ntšamo Bëngbe Bëtsá jamama yojuabnacá lempe tcbonjabuayená, tondaye ntsebuetamencá. <sup>28</sup> Chcasna, cach tsëngaftangbiamna šmochtsantješna y nyëtsanga muentše Jesucristbeñe ošbuachiyëngbiámnaca. Chëngbeñe mo chëngbe abuajëñyängcá Uámana Espiritu tmonjajayé, Bëngbe Bëtsabe entsànga chašmotsanýënama, chënga Bëngbe Bëtsá chábinga tojábiamna, chabe Uaquiñabe buiñe juabuáshanëse y jóbaneše,

mo bëtská cuafjopagacá. <sup>29</sup> Atše sëntsetatšëmbo, atše chaitsoñe orna, banga mochanjabo y chënga mochantsemna mo corente tsátjaye tjañe quesëngcá, Jesucristbeñe ošbuáchiyënga chábeñe ošbuáchiyana chamotsajbanama chënga jamama. <sup>30</sup> Y tsëngaftangbentsánëñaca báseftanga mochanjábcocna y entsángbiye uayátsenaye soyënga mochanjabuatambá, chca, báseftanga Jesucristbeñe ošbuáchiyënga chë inyëngbentsána chamotsoluarema y nýe chë abuatambayëngbiye chamotsësetonama. <sup>31</sup> Chcasna, sempre šmochtsantjeño; ndoñe chacondébnëñtjomba, atše unga uatëntscuana, bnëté y ibeta, tsëngaftanga cada ona cbondétsabuayinayama y chama atše puerte tijasufri.

<sup>32</sup> “Y morna, Jesucristbeyeca catšátanga, Bëngbe Bëtsabe cucuatšifne cbëtsabashejuana y ntšamo tsëngaftangbiana chabe tsabe juabna yomnama palabrengaca, tsabá chašmuesomñe. Cha endobena jamama tsëngaftangbe ainaniñe más chašmotsošbuáchemá, y endobena tsabe soyënga tsëngaftanga jatšatayama, ndayá jatšatayama tojanašebuachenacá mo tsëngaftangcá entsángbiye, ndëmuanyënga cha tojáchembo chabe entsanga chamotsemna. <sup>33</sup> Atše ndocna crocénana, o castellano o entsáyá atšbiana quetsatántšaboše; <sup>34</sup> más inýetšá, y tsëngaftanga lempe šmondëtatšëmbo, atše cach atšbe cucuatšeca tijëtsetrabajama, atšbiana y átseftaca imojamnëngbiana opresido enjamna soyënga janguanguama. <sup>35</sup> Atše nýets tempo sëndinýanýná entsá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesúsbe palabrengama sempre jtsejuabnayëse: ‘Canýe entsá más oyejuayá jtsemnana ndayánaca inýabiye tbojtsatšetná ora, y inýabiye tbojtseyëngacá ora ndoñe nýa nýetšá ca’” —Pablo tonjanoyebuambá.

<sup>36</sup> Pablo chë soyënga tonjánayanentšana, tonjanoshamentšé y nýetscanga chentše monjëtsemnëngaftaca Bëngbe Bëtsá tmonjanótsëmbona. <sup>37</sup> Nýetscanga tmonjánenobosachna y Pablo tmontanotsejcuá y tmontanámochó. <sup>38</sup> Y entsanga corente ngménaca monjëtsemna, chënga ndocna te más cha mochantinýe ca Pablo tojanëýana causa. Chentšana, chënga chë barquësha enjetsamnëntscóñe cha tmonjantjëmbambá.

## 21

### *Pablo Jerusalemoye tojána*

<sup>1</sup> Chë Jesucristbeñe ošbuáchiyënga fsënjëftsanasbashejuana ora, barquëshañe fsëñjanenoyé y ndericho Cos luaroye fsëñjána; chë yëfsana Rodasoye y chentšana Pátara puebloye. <sup>2</sup> Pátara pueblentše canýe barquësha fsëñjáninýena, Fenicioye enjëtšaye; asna, chëshañe fsëñjanenoyé y chentšana fsënjëftsansocna. <sup>3</sup> Fsëñsanachnëjuana ora, fsëñjáninýe Chipre luare; Chipre bëngbe uañicuayoica tonjanoquedá y bëngna Sirioye fsënjëtšaye. Tiro pueblentše chë barquëshentša uasmanëshangá jëftsáboshjonama yojámnayeca, chë puebloye bënga fsënjëftsanamashjna. <sup>4</sup> Chentšna, Jesucristbeñe ošbuáchiyënga fsëñjánanýena y canýsëfta te chëngaftaca fsëñjanoquedá. Chënga Pablo tmonjanianyana cha ndoñe ibonjamna Jerusalemoye jtsayana ca, er chë Uámana Espíritu tojanabuayená ndayá choca cháftaca jopásama. <sup>5</sup> Chë canýsëfta te tonjanochnëngo ora, chentšana fsënjëftsansocna y nýetscanga parejo chëngbe shëmangaftaca y básengaftaca šonjanatjëmbambá chë pueblo chabóntscoñe; y chentše, chë chëñyañe fsëñjanoshamentšé y Bëngbe Bëtsá fsëñjanimpadá. <sup>6</sup> Chentšana, fsëñjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

<sup>7</sup> Tirentšana fsënjëftsansocna y Tolemaida puebloye fsëñjánashjajna; y chentše tonjanopochocá bëngbiana bejaycá chë te ayana. Tolemaidentše Jesucristbeñe ošbuáchiyënga fsëñjanacheuá y chëngaftaca canýe te fsëñjanoquedanga. <sup>8</sup> Yëfsana, bënga chentšana fsënjëftsansocna y Cesarea luaroye fsëñjánashjajna. Chocna, bënga fsëñjána Felipe chë Jesucristbiana tsabe noticiënga abuayinayabe yebnoye y cháftaca fsëñjanoquedanga. Felipe enjamna canýa chë Jesucristbe içhmónëngbiye ujabuachanënguentšá, Jerusalemoca ubuáyanënga. <sup>9</sup> Felipe enjánabamna canta ndëbouamna bembalianga y chënga monjamna Bëngbe Bëtsabe juabna oyeuambnayënga. <sup>10</sup> Ya bayté chentše fsënjëtsemna orna, Judeocana tonjánashjango canýa Bëngbe Bëtsabe juabna oyeuambnayá, Agabo ca uabainá. <sup>11</sup> Agabo bëngbiyoye tonjánashjango ora, Pablëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalemoca quem uasnanëja nduifbiye chë judiënga mëntšá camochjama y ndoñe judiëngbe cucuatšifne camochjáboshjona ca.”

<sup>12</sup> Chca fsëñjanuena ora, bënga y chentša entsanga Pablo fsëñjanimpadá Jerusalemoye ndoñe chaondétsama. <sup>13</sup> Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngménana chaotsemnana ca? Atše sëntseprontana y ndoñe nýe chašmobatsëcamá; Jerusalemoca jobanámna sëntseprontana, Bëngbe Utabná Jesusbiana ca —cha tonjánayana.



<sup>14</sup> Jáyēnjanama ndoñe chibiatanobená ora, ndoñe más chibiatanimpadá; n̄ye mēntśá fsēnjaníyana: —Ntśamo Bēngbe Utabná yojtseboścá chaotsemna ca.

<sup>15</sup> Chē soyēnga tonjanochnēngüentśana, fsēnjanoprontá y Jerusalenoye fsēnjána.  
<sup>16</sup> Cesareoca, básefta Jesucristbeñe ośbuáchiyēnga choye šonjanatjēmbambá y chocna, chēnga šonjanēnatse can̄ye Chipre luaroca entśabe yebnoye, Mnasón ca uabainá, ndábentśe bēnga joquédama. Mnasón tempscana inamna Jesucristbeñe ośbuachiyá.

*Pablo tojána Santiago jauatsētsayama*

<sup>17</sup> Jerusalenoye fsēnjánashajna orna, chentśa Jesucristbeñe ośbuáchiyēnga oyejuayēnga šonjanēbuaja. <sup>18</sup> Yēfsana, Pablo bēngaftaca tonjána Santiago jábuachama, y chentśe, n̄yetsca chē ośbuachiyēngbeñe bētsējemēngcá mandayēngnaca monjētsemna. <sup>19</sup> Pablo tonjanacheuá y chentśana tonjanacuntá lempe ntśamo Bēngbe Bētsá Pablēbe trabájoca chē ndoñe judiēngbeñe tojanmama.

<sup>20</sup> Chca tmonjanuena ora, Bēngbe Bētsá tmontanchuá y Pablo mēntśá tmonjaníyana: “Morna, Jesucristbeyeca bēngbe catśata, contsonyá ntśamo ba uaranga judiēnga Jesucristbeñe imojtsośbuáchemá, y chēnga n̄yetscanga montsantjeśna n̄yetsca Jesucristbeñe ośbuáchiyēnga chē Moisesbe leyentśa n̄yetsca mandēnga chamotsocumplínama. <sup>21</sup> Y entśanga chēngbiye noticia tmojatśatá, aca chē in̄ye luarēnguenache imoyena judiēnga cojtśabuatambá, Moisés tojanmandá soyēnga ndoñe ntseyeunanama y basetēmēnga base bobachtēma chē más delicadentśe ndoñe ntjatētśama, ntśamo bēnga judiēnga fsēnduamancá, y ntśamo bēnga fsēndētātśēmbcá ndoñe chamondētśamana ca. <sup>22</sup> Y morna, ¿ntśamo chē soyēngama cochtsemna? Ndegombre, chēnga mochanjátātśēmbona aca moye tcojabama. <sup>23</sup> Chcasna, ntśamo chochanjabuayenacá cochjama: Bēngbentśe canta boyabásēnga montsemna y chēnga entsamna Bēngbe Bētsabíama can̄ye šbuachenana soye jamama. <sup>24</sup> Acaftaca cochjunatse, chēngaftaca cochtsemna y chēngcá cochtsama Bēngbe Bētsabe delante tśábēnga jtsatsmēnama ntśamo chamojtsama ora, y ntsachetśá jētsájuaama chaojtsamncá, aca cochjētsájua, as chēnga chamobená n̄yets stjēnashe jtsenátśbotjiaama, jin̄yan̄íyama, ntśamo Bēngbe Bētsábiye tmojaśbuachenacá ya tmojamama. Y chca, n̄yetsca judiēnga mochanjin̄ye ndoñe ndegombre yontsemna chē ntśamo chēngbiye acbiamá tmojacuntacá; masna, chēnga mochanjátātśēmbona aca ndegombre ntśamo Moisesbe leyíñe yomandancá icuamama. <sup>25</sup> Y chē ndoñe judiēnga Jesucristbeñe imojtsośbuachengbiāmna, bēnga ya fsēnjubúabíama y fsēnjáuyana ndayá jtsocumplínama chēnga yojtsamnama, mēntśá: ‘Ndoñe chamondētśesá mēntśēna, chē entśanga tmojtsejuabná diosēnga imomna soyēnga jadórama tmojiyēbana; ni būñe, ni tsešana bayēngbe mēntśēna; y ndoñe chamondētśama bacna soyēnga shembásēnga y boyabásēngaftaca ca’ ” —chēnga tmojánayana.

*Bēngbe Bētsabe bēts yebnentśe judiēnga Pablo tmojánishache*

<sup>26</sup> As Pablo, yēfsana chē cántanga tonjanēnatse y chēngaftaca tonjanma soyēnga Bēngbe Bētsabe delante tśábēnga jtsatsmēnama. Chentśana, Pablo Bēngbe Bētsabe bēts yebnoye tonjánamashēngo chē bachnanga júnayama, ndaytēntsoñe yojamna chē cantangbíama soyēnga jtsamama, Bēngbe Bētsabe delante tśábēnga jtsatsmēnama, y jayanama ndaytē chēngbíama yojtsemna ndaye ora cada ona ibojtsemna ndayánaca Bēngbe Bētsabe bēts yebnoye juambana, Bēngbe Bētsabíama juatśēmbonama.

<sup>27</sup> Chēnga tmojanenoyeuná y tmojánayana can̄yśēfta tentscuana chca jamana ca. Chē can̄yśēfta te ya jochnēnguma yojtsemna orna, básefta judiēnga Asioquēnga Pablo tmojánin̄ye Bēngbe Bētsabe bēts yebnoca y tmojanma entśanga chamuenbouēnanama. Y cha tmojánishache, <sup>28</sup> mēntśá jtsayebuáchēse: “¡Israeloca entśanga, śmabētsējabuache ca! Quem boyabása entsemna chē n̄yets luarēnguenache iuana abuátambaye soyēnga bēngbe entśangbe contra, y ntśamo bēngbe leyēnguiñe endayanama contra, y quem Bēngbe Bētsabe bēts yebnama ndoñe tśabá yontsoyebuambná. Y cabana quem Bēngbe Bētsabe bēts yebnoye grieguēnga tojúmashēngo, y chca cha tonjama chē Bēngbe Bētsabe bēts yebna Bēngbe Bētsabe bomin̄yñe ndoñe tśabá chaondētsemnama ca’ ” —chēnga imojtsichamo.

<sup>29</sup> Chca imojtsichamo, er entśanga Pablo tmojánin̄ye chē bēts pueblentśe Trófimo Efe-socáftaca; y imojtsejuabnaye chábíoye Bēngbe Bētsabe bēts yebnoye Pablo tojanánatse ca.

<sup>30</sup> N̄yetsca chē pueblentśa entśanga tmojánenbouenana, y ochamanana chē Pablo yojtsemnoye tmojánashajna. Pablo tmojánishache y Bēngbe Bētsabe bēts yebnentśana shjoye tmojtsansjojó, y cachora chentśa bēšaśangá tmojtanatame. <sup>31</sup> Jtsóbama ya imojtsebuachéta ora, chē Romoca soldadēngbe mandayá tojántātśēmbona n̄yetsca chē bēts pueblentśa entśanga imojtsenbouenana. <sup>32</sup> Asna, chē mandayá chabe soldadēnga y in̄ye chentśa amēndayēnga tojánachembo y cán̄yñe chē entśanga imojtsemnoye tmojētsanótjajo. Entśanga, chē mandayá y chē soldadēngbiye tmojánan̄ye ora, tmojtsanajbaná Pablo jantśetayana.

<sup>33</sup> Chorna, chë soldadëngbe amëndayá tojanobeconá, Páblëbioye tbojánishache y tojan-mandá uta cadenëjuaca cha chamotsebátsécama y tojanatjá: “¿Nda mua yomna y ndayá tojama ca?” <sup>34</sup> Pero chë entsángbeñe, ínÿenga canÿe soye imojtsáyebuache y ínÿengna ínÿe soye; y chca, ntšamo ndegombre tojanopasama jtsetatšëmbuama chë mandayá ndoñe ton-janobená; chcasna, cha tojanmandá Pablo chë soldadëngbe oyenoye chamuánatsama. <sup>35</sup> Chë soldadëngbe oyenoca grádasbengoye tmojánashajna ora, chë soldadënga tojanotocá Pablo cutsnana juambama, chë entsànga tša rábiaca imojtsemna causa, <sup>36</sup> er chënga ústonoye imojtsaye y “¡Chaóbana ca!” imojtsaiuébuache.

*Ntšamo Pablo entsángbe delante tojanenëuyaná*

<sup>37</sup> Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojanjá: —¿Tascatjaleséncia ratotema ácaftaca jóyebuambayama ca?

Y chë mandayá tbojanjá: —¡Aca icobena griego biyañe jóyebuambayama! <sup>38</sup> As, ¿aca ndoñe condmëna chë Egiptocá, chë ndoñe bayté quenátsmëna entsànga yojanëtsëtsná chë mándayëngbe contra chamotsemnana y chë canta uaranga podesca uamana entsànga puñálaca uajatëngaftaca, entsànga ndoyena luaroye tojanbocná ca?

<sup>39</sup> Chora Pablo tbojanjá: —Atše judío sëndmëna, Tarso pueblota onÿnaná, canÿe uamana pueblentše Cilicia luaroca; Diosmanda šmoleseñciá entsànga jáuyanama ca.

<sup>40</sup> As, chë soldadëngbe amëndayá chca tbojanlesenciá. Páblëna chë gradasbenguiñe tojantsá y cucuatše tojanatsbaná entsànga iytëca chamobiamama. Nÿetscanga iytëca imojtsemna orna, Pablo hebreo biyañe mentsá entsànga tojanëyana:

## 22

<sup>1</sup> “Baconga y taitanga, mora šmochjouena atše jenëuyanama ntšamo chjayancá ca.”

<sup>2</sup> Pablo cachëngbe biyañe, hebreo biyañe joÿtsóyebuambnana entsànga tmojanuena ora, más iytëca tmojanobiamama. As Pablo tojanëyana: <sup>3</sup> “Atše judío sëndmëna. Tarso pueblentše, Cilicia luaroca sënjanonÿná, pero muentše Jerusalemëntše sënjanoboché y sëndëtatšëmo soyëngna Gamaliëlbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nÿets atšbe ainánaca Bëngbe Bëtsá sëndëserveda, ntšamo nÿetsca tšëngaftanga mora šmontsamancá. <sup>4</sup> Atše sënjánama chë Jesucristo tojaninÿanÿe Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame. <sup>5</sup> Chë judío bachnangbe más uamana amëndayá, nÿetsca chë judiëngbeñe bëtsëjemëngcá mándayënga y ínÿe muentša mándayënga mondobena jayanana ntšamo sentsichamcá ndegombre yomnama. Chënga uabemana tsbuanachangá šmonjaniyë, bëngbe catšátanga judiënga chamotsetatšëmbuama atše mando stsanbomnama, Jesucristbeñe ošbuáchiyënga jótabayama; y Damascoye sënjána choca Jesucristbeñe ošbuáchiyënga jótabayama, moye Jerusalemoye junatsama jacistigayama.”

*Pablo tojanacuntá ntšamo Jesucristbeñe ošbuachiyá tojanóbema*

*(Hch 9.1-19; 26.12-18)*

<sup>6</sup> “Pero canÿe te benachiñe Damasco béconana sënjëtsaye orna, mo nÿetsto ora, nÿe ndeolpe atšbe juachañe canÿe bëts tcuinÿe celocana tonjanbuashinÿinÿena. <sup>7</sup> Y fshantsoye sënjëtseshajaye y canÿe oyeuambnayanana sënjanuena mentsá: ‘Saulo, Saulo, ¿ndáyeca šcojtsacmena ca?’ <sup>8</sup> Atše sënjanjá: ‘¿Nda comna, Bëngbe Utabná ca?’ Y chë oyeuambnayanana šonjanjá: ‘Atše sëndmëna Jesús Nazaretocá, y aca condama atšbe entsànga chamot-sesufrinama ca.’ <sup>9</sup> Chë átšeftaca monjánajnënga chë bëts tcuinÿe tmojáninÿe y tmojanouat-jananga, pero chë oyeuambnayanana ndoñe tmonjanuena. <sup>10</sup> Chora atše sënjanjá: ‘¿Bëngbe Utabná, ndayá jamama šojtsemna ca?’ Y cha šonjanianana: ‘Matëtsbaná y mëtëtontšé Damascoye jama. Chentše canÿa cmochanjabuayená ndayá jamama cmojtsemnana ca.’ <sup>11</sup> Chë tcuinÿe yapa tonjanbuashinÿinÿena causa, atše jtaná sënjanouquedá. Chcasna, chë ínÿenga šmontanobuacuetëntšë y chca, Damascoye sënjanashjango.

<sup>12</sup> “Chentše enjamna canÿe bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo bëngbe leyënguiñe iuayancá, y nÿetsca chentša judiënga mon-janamana chabiamama tšabá jtsóyebuambnayanana. <sup>13</sup> Cha tonjánabo atše jinÿama y tonjánashjango ora, šonjanianana: ‘Jesucristbeyeca atšbe catšata, Saulo, chacmotsatabinÿna ca.’ Cachora y cha sënjáninÿe.

<sup>14</sup> “Chentšana cha tonjánayana: ‘Bëngbe bëts taitangbe Bëtsá aca tcmojuábuayana, ntšamo cha acbiamama yobošcá chacotsetatšëmbuama, chë nÿetsca soyënguiñe Tšabá Amá chacuinÿama y cachabe uayásentšana chacóyeunama. <sup>15</sup> Bëngbe Bëtsá chca tojama, aca chë chabe buayenana soyëngama entsángbeñe chacóyebuambama, y chamna nÿets luar-entsa entsángbeñe cochjacuënta, ntšamo tcojinÿe y tcojouencá. <sup>16</sup> Y mora, indoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnana ca’ ” —cha šonjanianana.

*Pablo tojanacuntá ntšamo chë ndoñe judiëngbiye tmojánichmoma*

<sup>17</sup> “Jerusalenoye sèntaná ora, Bëngbe Bëtsabe bëtš yebnoye sënjána cháftaca jencuéntama, y ndeolpe atše mo otjenayoquécá sënjanoqueadá. <sup>18</sup> Chca orna, Bëngbe Utabná sënjáninýe y cha mëntšá šonjaninyana: ‘Betsco motsa y cam ora Jerusalenentšana mëtsebozna; quemuentšá entšanga ndoñe quecmochatóyeunaye ntšamo atšbiana condétatšëmbo y cons-tšëtsnácá ca.’ <sup>19</sup> Atše sënjanjúá: ‘Bëngbe Utabná, chënga mondétatšëmbo atše sënjánana nyëtšca chëngbe enefjuana yebnënguenache y chë ácebeñe ošbuáchiyënga sënjanëtámiana y sënjánatsetšenaye; <sup>20</sup> y acbiama ndegombre oyebuambnayá Esteban tmonjanóba ora, átšnaca chentše sënjamna y tsabá imojtsama ca chama sënjëtsejuabnaye, y cabá chë monjanóbanangbe entšáyëjuangá atše chora sënjanabojanýá ca’ —atše sënjanjúá. <sup>21</sup> Pero chca sënjánayana ora, Bëngbe Utabná šonjaninyana: ‘Motsa; atše bën luarëngoye, ndoñe judiëngbiye cbochanjíchmuca ca.’ ”

*Pablo y chë soldadëngbe amëndayá*

<sup>22</sup> Chë entšanga chëntsoñe tmojanuena; pero chë ndoñe judiëngbiama tojanoyebuambá orna, chënga tmojanontšë uayebuáchana: “¡Ndoñe tsabá quenátšmëna cha vídaca chaotsemnama! ¡Motsóba ca!” <sup>23</sup> Y chënga más imojtsáyebuache; puerte rábiaca chëngbe uichëtjonëjuangá tsbanánoye imojtsëbëntaye y tsbanánoye polvëshe imojtsëtšana; <sup>24</sup> chë causa, chë mandayá tojánayana chë soldadëngbe oyenoye Pablo chamotšëmashëngo ca, y tojanmandá chamotsetjanja chaobuambama ndáyeca entšanga chca chabe contra imojtsáyebuache. <sup>25</sup> Pero jtsetjanjama ya tmojanbatsëca orna, chentše imojtsemna soldadëngbe amëndayábíoye Pablo tbojantjá: —¿Tšëngaftanga šmobena canýe entšá derecho bomná mo canýa Romoca onýnanacá jatjanjana, ndegombre tsabá o ndoñe tsabá tonjamama cabá ndayana ora ca?

<sup>26</sup> Chë básefta soldadëngbe mandayá chë soye tojanuena ora, tojána y nyëtšca soldadëngbe amëndayábíoye chama ibojuenaye, mëntšá: —¿Ndayá cochjama? Chë entšá derecho bomná mo canýa Romoca onýnanacá canmëna ca.

<sup>27</sup> As chë amëndayá tojána Pablo yojtsemnnoye y tbojaninyana: —Smëyana, ¿aca derecho bomná mo canýa Romoca onýnanacá comna ca?

Y cha tbojanjúá: —Arseñor ca.

<sup>28</sup> Chora chë amëndayá tojánayana: —Atše beca crocénana sënjëtšajó mo canýa Romoca onýnanacá derecho jtsebomnama ca.

As Pablo tbojanjúá: —Y atšna derecho bomná mo canýa Romoca onýnanacá sëndmëna atše tijanonýná orscana, er atšbe taitá chca derecho bomná inamna ca.

<sup>29</sup> Chcasna, chë jatjanjama imojtseprontanënga, Páblëbëntšana tmojanojuaná; y chë mandayánaca tojanojuaná y yojtsauatja, Pablo derecho bomná mo canýa Romoca onýnanacá yojannama tojántatšëmbona ora, er cha tojanmandá Pablo chamotsebátsëcama.

*Pablo, Jerusalenentša uámana mándayëngbe delante*

<sup>30</sup> Chë soldadëngbe amëndayá yojtseboše ndegombre jtsetatšëmbuama ndaye soyama judiënga Páblëbe contra imojtsichámuaama; asna, yëfsana tojanmandá cadenëjuangá jt-sajaffonana y chë bachnangbe amëndayënga y nyëtšca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

## 23

<sup>1</sup> Chora Pablo, nyëtšca chë mandayëngbiye tojanënyanjýe y tojanëyana: —Taitanga, atše mënténtsoñe tsiyena jtšamëse ntšamo Bëngbe Bëtsá yobošá y chabe delante atšbe ainana natjëmbana endëtšomñe ca.

<sup>2</sup> As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotšáyëjantšetama. <sup>3</sup> Pero chora Pablo Ananíasbiye tbojanjúá: —¡Bëngbe Bëtsá ácnaca cmochanjëtšantšetá, bacna entšá, ntšamo ndegombre tcojuabnacá ndinýinýnayá! Aca chentše contsetbemana tsabá o ndoñe tsabá tijamama jayanama, ntšamo Moisesbe leyíñe yomandancá; as, ¿ndáyeca cojtsemánda chašmojantšetama? Chca chë leyíñe ndoñe quenátšlesenciana ca.

<sup>4</sup> As, chabe béconana imojtsemna entšanga tmojánayana: —¿Chca chë Bëngbe Bëtsabe bachnangbe más uámana amëndayábíoye cochjóyenguango ca?

<sup>5</sup> Chora Pablo tojánayana: —Taitanga, atše ndoñe quetsátstátšëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrënguñe mëntšá endayana: “Entšangbe mandayabe contra ndoñe catjayana ca.”

<sup>6</sup> Pablo tojáninýe chë mándayënguentše báseftanga saduceunga y ínýengna fariseunga imojtsemnna; as, mëntšá tojánáyebuachena: —Taitanga, atše fariseo sëndmëna; atšbe bëtšëtšanga fariseunga mondmëna. Atše, jtsošbuáchiyëse chë obanënga mochtayenama tsobátmama causa, atše ndoñe tsabá sëntsama ca tšëngaftanga šmochjayana ca.

<sup>7</sup> Pablo chca tojánayana ora, chë fariseunga y saduceunga tmojanontsé enatsëtsnayana, y chë causa nyëtsca entsanga ndoñe cachcá imontsejuabnaye. <sup>8</sup> Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aïñe chë soyënguïñe jtsosbuáchiyana. <sup>9</sup> Y nyëtsanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntsá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canýe ángel o espíritu muábioye ndegombre tojauyana ca.”

<sup>10</sup> Entsanga más imojtsáyebuache y chë soldadëngbe amëndayá yojtsauatja nderado entsanga Pablo muantsatcacaye; as, cha tojanmandá soldadënga chamua Pablo chë entsángbentsana jaisábocnama y chë soldadëngbe oyenoye cachiñe jesánatsama.

<sup>11</sup> Yëfsana íbeta, Bëngbe Utabná Páblëbioye tbojánëbëbocna y tojaniyana: “Pablo, ainaniñe añemo cochtsebmna. Ntsamo aca atšbiama condétatsëmo y muentse Jerusalenentse condoyebuambnacá, cachcá cmontsemna Romoca jamama ca.”

### *Judiënga tmojanenoyeuná Pablo jtsóbama*

<sup>12</sup> Chë inýe yëfsana, judiënguentsana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofsiyana, cha jóbantscuana. <sup>13</sup> Chca jamama tmojanjuabó entsanga imojamna canta bnëtsanëngama más. <sup>14</sup> Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntsá tmojánayana: “Bënga Bëngbe Bëtsá mëntsá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofsiyana, Pablo jóbantscuana. <sup>15</sup> Morna, tsëngaftanga y chë inýe muentša mandayëngaftaca chë soldadëngbe amëndayá smochjaimpáda Pablo moye chabuánatsama; y smochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

<sup>16</sup> Pero, Páblëbe uabenbe uaquiñá chë soye tojántatsëmbona; asna, tojána chë soldadëngbe oyenoye, chama Pablo jauenayama. <sup>17</sup> Chorna, Pablo canýe básefta soldadëngbe mandayábioye tbojanchembo y tojaniyana: “Diosmanda quem basa mánatse chë nyëtsca soldadëngbe amëndayábioye; canýe soye entsebmna chábioye juenayama ca.”

<sup>18</sup> As, cha chë bobontse tojéftsanbetse, chë nyëtsca soldadëngbe amëndayábioye tojanánatse y tojaniyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebmna canýe soye aca jauyanama ca.”

<sup>19</sup> Chë soldadëngbe amëndayá chë bobóntsbioye tbojéftsanobuácuëtëntsiye, luaroye tojanánatse y tojantjá: —¿Ndayá cojtsebmna atše jauyanama ca?

<sup>20</sup> As chë bobontse tojaniyana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. <sup>21</sup> Pero ndoñe catjóyaunaye; chënguentsana canta bnëtsanëngama más entsanga iytëmenënga Páblëbiam montsanýá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofsiyana, Pablo jóbantscuana. Mora chënga montseprontana y montsobátmana ntsamo aca chë soyama cochjáuyanama ca —chë bobontse tojaniyana.

<sup>22</sup> Chentsana, chë soldadëngbe amëndayá chë bobóntsbioye tojanmandá, ndayá ibojueyayana ndocnábeñe ntseuëntayana, y chentsana tojtanichmó.

### *Pablo tmojanánatse Félix, chë Cesareoca mandádbioye*

<sup>23</sup> Chentsana, chë soldadëngbe amëndayá tojánachembo útata chë inýe soldadëngbioye mandayënguentsana, y tojanamëndá chamoprontama uta patse soldadënga, inýe canýsëfta bnëtsanënga couayënguïñe y inýe uta patse lanzëšangaca, Cesarea puebloye íbeta, las nueve ora jabocanama; <sup>24</sup> y tojanamëndá couayënga chamoprontá Pablo chauenójayama. Y tojanmandá tsabá y ndocá ntjapasacá Pablo chamuánatsama, Félix chë Cesareoca mandádbioye. <sup>25</sup> Y canýe tsbuanácha chëngaftaca tojanichmó y chëchañe mëntsá yojtsábemana:

<sup>26</sup> Claudio Lisias, chë bëts uámana mandado Felixbiam: Salud bonná chacotsomñe.

<sup>27</sup> Judiënga quem boyabása tmojishache y montseboše jtsóbama; pero cha mo canýa Romoca onýnanacá derecho bonná yomnama sënjátatsëmbona ora, atše soldadëngaftaca sënjá y chëngbe cucuatšentsana cha sënjatsbocá. <sup>28</sup> Atše sëntseboše jtsetatsëmbuana ndaye soyama chënga chabe contra imojtsichámuama; as, cha sënjuánatse nyëtsca chë judiëngbe amëndayënga montsemnoye; <sup>29</sup> y chentsana, atše sënjátatsëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárceloye jutámiam. <sup>30</sup> Pero atše sënjátatsëmbona chë judiënga tmojenoyeuná cha jtsóbama; chíyeca, cam ora cha ácbioye sëntsichamná, y chabe contra ichámëngna sënjáuyana, ndayá muabe contra jayanama imojtsebmncá acbe delante chamuayana ca.

<sup>31</sup> Chentšana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatriš pueblöye tmojanánatse. <sup>32</sup> Yëfsana, chë shecuátseca tmojána soldadënga cach soldadëngbe oyenoye tmojësanshëcuana, y chë couayíñe enjaquenënga Pábloftaca tmojána. <sup>33</sup> Cesareoye chënga tmojánashajna ora, chë tsbuanácha chë mandádbioye tmojanantšabuaché, y Páblëna chabe cucuatšíñe tmojánboshjona. <sup>34</sup> As chë mandado chë tsbuanácha tojanalá; chentšana, cha tojanënoticiá ndaye luarocá Pablo inamnama, y Cilicia luarocá cha inamnama cha tojántatšëmbona ora, <sup>35</sup> tbojaniana: “Ache contra ichámënga chamobeconá ora, ácbioye oído chochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanýama.

## 24

*Ntšamo Pablo chë mandado Félixbe delante tojanenëuyaná*

<sup>1</sup> Shachna tianoye, Ananias, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentsana y canýa entsanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

<sup>2</sup> Pablo tmojanábocna ora, Tértulo tojanontsé chabe contra jayanama y Félixbioye tbojaniana: “Aslëpaye, taita mandado, ácbeyeca bënga natjëmbana fsëndoyena y aca puente obiashjachá cómnayeca ba tsabe soyënga quem luarentša entsangbiana yojtsebinýna. <sup>3</sup> Nyëts tempo y nyëtsquénache chë soyënga fsëndóyëngacafë, bëts uámana mandado, y bënga chama corente chondetsechuaná. <sup>4</sup> Pero ndoñe yapa bën jatenbinayamna, Diosmanda ratotema šmotsoyauná. <sup>5</sup> Bënga fsëntsetatšëmbo quem boyabása entsanguentše entsemna mo bacna shacuancá, nyëts luarënguénache yojtsana y yojtsama chë judiënga nyëtsanga cachca soye ndoñe chamondëtsejuabnama, y cha yojtsemna chë Nazaretocabe ustonëngbe uanatsaná. <sup>6</sup> Y tonjábošena jamama Bëngbe Bëtsabe bëts yebna, Bëngbe Bëtsabe bominýñe ndoñe tsabá chaondëtsemnama; chíyeca bënga cha fsënjotbá. Bënga fsënjábosena chabiana jayanana tsabá o ndoñe tsabá tonjamama, ntšamo bëngbe leyënguñe endayancá; <sup>7</sup> pero chë soldadëngbe amëndayá Lisias tonjontremetë y jabuachana bëngbe cucuatšëntsana tbojšánatseñe, <sup>8</sup> y tonjayana chë chabe contra ichámënga caojtsamna ácbioye chama jabana ca. Cach taitá chacojatjá ora, ndegombre soyënga cochántsetatšëmbo ndáyeca bënga muabe contra fstsichámuama ca” —cha tojánayana.

<sup>9</sup> Y chë judiënga chentše imojëtsemnënga imojtsanichamo aíñe chca tojanopasá y lempe ndegombre yojtsemna ca.

<sup>10</sup> Chentšana, chë mandado Páblëbioye tbojánëfjatsëmbo chaóyebuambama; as Pablo tojánayana: “Atše sëndétatšëmbo aca ba uatama comna muentša entsangbiana tsabá o ndoñe tsabá tmonjamama ichamuá; chcasna, tondayama ntsauatjá y puente oyejuayá ache delante šcuenëuyaná. <sup>11</sup> Ntšamo cach aca jsetatšëmbuama contobencá, cabá bnëtsana uta te entsemna atše Jerusalenoye sënjá, Bëngbe Bëtsá jadórama. <sup>12</sup> Y quemënga ndoñe chešmátinýena nderado ndáftaca jabuachana enatsësnayíñe, ni entsanga chamuenbouénanama amiñe, Bëngbe Bëtsabe bëts yebnoca, ni chëngbe enefjuana yebnënguénache, ni inýe luarënguénache chë bëts pueblentse. <sup>13</sup> Quem entsanga tondaye quemátšbomma ntšamo jayanama, atšbe contra montsichamo soyënga ndegombre yojtsemna ca. <sup>14</sup> Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse ntšamo Bëngbe Bëtsá šonjaninýanýe benache yomncá; y quem entsanga montsichamo, básefta soyënga ntšamo bënga quem Tsëm Benache ústonënga ftssošbuachecá, ndoñe ndegombre yondmëna ca. Pero atšna nyëtsca chë Moisesbe leyíñe y Bëngbe Bëtsabe juabna oyebuambnayëngbe uabemana librëšanguentsa soyënguñe sëndosbuaché; <sup>15</sup> y atše cach chëngcá, puente jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nyëtsca entsanga, lempe tsabá amënga y chë ndoñe tsabá amëngnaca. <sup>16</sup> Chíyeca, atše nyëts tempo puente tsabá sëndama, tondayama ntjatenócochinýenama y atšbe ainana natjëmbana chaotsomfiama, Bëngbe Bëtsabe delante y entsangbe delántnaca.

<sup>17</sup> “Básefta uatama inýe luarënguénache atše sëndánana; ndoñe bayté quenátšmëna cach atše luaroye sëntashjango, chentša ndbomnjëmënga jujabuáchama ndáyánaca jatšatayama y bayënga jobáyama, Bëngbe Bëtsá jëtschuayama. <sup>18</sup> Atše sënjama soyënga Bëngbe Bëtsabe delante tsabá jtsatšmënama; chentšana, básefta Asioca judiënga Bëngbe Bëtsabe bëts yebnentše šmonjínýena, pero ndoñe chešmátinýena ni ba entsángaftaca, ni enbouenaniñe. <sup>19</sup> Chë šmonjinýenënga entsamna ácbioye jabana y ache delante atšbe contra chamuayana, nderado ndayá tmojtsebomnëse. <sup>20</sup> O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tijobuáchjanguama chešmënjínýena, atše castiganá jtsemnna šojtsemna ca chënga chamuayanama; <sup>21</sup> o nderado nántsemna chë atše chëngbentše sëntsemna ora, mëntšá

tijuáye buachenama: ‘Atše chë obanënga mochtayenama puerte jtsošbuáchiyëse sëndobátmana causa, tsëngaftanga atšbe contra šmochjayana ca.’”

<sup>22</sup> Félix bëtscă inatătšëmbo Bëngbe Utabná tojaninÿinÿë Benache ústonënga imojanošbuachë soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatôyebuambnayana, y chë entsanga tojanëyana: “Chë soldadëngbe amëndayá Lisias chaojášhango ora, chanjayana ntšamo quem tsëngaftangbe sóyeca jamama ca.”

<sup>23</sup> Y chentša soldadëngbe amëndayábioye tbojanmandá Pablo jtsebojanÿama, pero nÿe utamená ndoñe chaondëtsemna ca; y tojanmandá, Páblëbe amiguënga jalesenciayana ntšamo tmojtseboščá cha chamuauájabuachama.

<sup>24</sup> Chentšana baseftaytese, chë mandado Félix Cesareoye tojtanashjango, chabe shema Drusíaftaca, canÿe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canÿa nanjobenaye Jesucristbeñe ošbuachiyá jtsemnana.

<sup>25</sup> Pero, nÿetsca soyënguifne tsábá jtsamama, cachá jenomándama jtsobenama y ntšamo tmojamama nÿetsca entsangbiana Bëngbe Bëtsá yochjayanama Pablo tojanoyebuambá ora, Félix tojanëuatjáná y Páblëbioye tbojanianyana: “Mora, mata; luare quëtstsebmoma ora, cbochjachembo ca.”

<sup>26</sup> Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanóšfajana cháftaca jencuëntama. <sup>27</sup> Y chca uta uata tojanochñëngo; chentšana, Félix ya ndoñe más chë mandado yontsemna y chabe cuentna Porcio Festo mandadcă tmojántbema. Félix yojtseboše chë judiëngbe delante tsábá joquédama, chíyeca utamená Pablo tbojëftsanboshjona.

## 25

### *Pablo Festbe delante*

<sup>1</sup> Festo chë luaroye tojánashjango y unga tianoye, Cesarea pueblentšana Jerusalenoye cha tojána. <sup>2</sup> Chocna, chë bachnangbe amëndayënga y chë más uámana judiënga Fëstbioye tmojána Páblëbe contra jayanama. <sup>3</sup> Y tmojanimpadá, mo chëngbiana canÿe bëts pavor cuenta, cha chaomandá Pablo Jerusalenoye chamuánatsama. Chëngna imojëtsejuabnaye Pablo benachiñe chamotsóbama. <sup>4</sup> Pero Festo tojanëyana, Páblëna Cesareoca utamená yojtsemna y baseftaytese cha choye jtama ca. <sup>5</sup> Y tojanëyana: “Chamna, tsëngaftangbe amëndayënga átseftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

<sup>6</sup> Festo Jerusalenentše posufta o bnëtsana te más chëngaftaca tbojëftsanjëtana y chentšana Cesareoye tojtáná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama. <sup>7</sup> Pablo choye tojánashjango ora, Jerusalenocana tmojánashjajna judiënga tmojanobobconá y ba uabouana soyënga chabe contra imojtsichamo, pero ni canÿe chë soyëngama tmonjanobená jinÿanÿiyana chca ndegombre bëtsemnana.

<sup>8</sup> Y Pablo, cachá jenëuyanama mëntšá yojtsichamo: —Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

<sup>9</sup> Festo yojtseboše chë judiëngaftaca tsábá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

<sup>10</sup> As Pablo tojánayana: —Atše sëntsemna chë Romoca bëts mandado tojichamó amëndayëngbe delante y chënga entsamna jayanama atše tsábá o ndoñe tsábá sënjamama. Ntšamo ndegombre contsetatsëmbcă, judiëngbe contra atše ndocna bacna soye chiyatsma.

<sup>11</sup> Nderado atše ndaye bëts soye tijobuachjanguá y chama atše jóbanama šojtemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná quechatobenaye chëngbe cucuatšifne atše jaboshjonana. Chíyeca, Diosmanda chë Romoca bëts mandado cháuyana tsábá o ndoñe tsábá sënjamama ca —Pablo tojánayana.

<sup>12</sup> As Festo, chë soyama chabe buayinayënga tojanantjá y chentšana tojánayana: —Chë Romoca bëts mandado quem soyama cháuyanama tcojáboshënšna, chábioye cochjá ca.

### *Festo, Rey Agrípaftaca tbojanencuentá ntšamo Pábloftaca jamama*

<sup>13</sup> Chentšana baseftayté tojanochñëngo ora, Rey Agripa y Berenice Cesareoye tbojána, Festo jauatsëtsayama. <sup>14</sup> Bayté chata chentše tojanajëtana; y chca, Festo chë réybioye tbojancuentá Páblëbe soyama. Cha mëntšá tbojanianyana: —Muentše endmëna canÿe entsá, Pablo ca uabainá; Félix utamená tbonjëftseboshjona, atše mandadcă sënjontsé ora. <sup>15</sup> Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcă mândayënga Páblëbe contra demanda tmonjajajó y šmonjaimpadá cha

jóbanama ibojtsemna ca atše jayanama. <sup>16</sup> Y atše sēnjáuyana: “Chē romanēnga ndoñe quematamana ndocnabíama jayanana cha jóbanama ibojtsemna ca, chabe contra íchámēnga chabe delante ndoñe tmontsemnēse, chca, chama jenēuyanama cha chaobenama ca.” <sup>17</sup> Chíyeca, chēnga moye tmonjabo ora, ndoñe yapa bēn ntjatenobíamnaycá cach yēfsana atšbe puestentše tribunaloca sēntórbema y sēnjamandá chē boyabása jobetšana. <sup>18</sup> Pero chabe contra íchámēnga, ntšamo atše sēndanjuabnacá chēnga mochjayanamna ni mo canye bēts soye chabe contra chemátayana, chēnga jóyebuambayama tonjóyentšbuache ora. <sup>19</sup> Chēnga chabe contra montsichamo, nye cachēngbe Dios ntšamo jadórana yomnana y canya Jesús ca uabainábíama; cha tojanóbana, pero Pablo entsichamo cha ainá yotsomñe ca.

<sup>20</sup> “Chora atše ndoñe quetstétsetatšēmo ntšamo chē soyíne jamana; asna, Pablo sēnjantjá Jerusalenoye jama tayojétseboše ca, choca atše jayanama tšabá o ndoñe tšabá cha tonjanmama. <sup>21</sup> Pero cha šonjaímpadá camuentše jaboshjonana, cach Romoca bēts uámana mandado chē sēntsebošojanýama, chē mandádbioye jíchmuama atše jobenayēntscuana ca” —Festo tbojancuentá.

<sup>22</sup> Chca tbojanencuentá ora, Agripa Féstbioye tbojaníyana: —Atšnaca sēntseboše chē boyabása joyeunayama ca.

Y Festo tbojanjá: —Cach yēse oído chábíoye cochanjabuájua ca.

<sup>23</sup> Chē yēfsana, Agripa y Berenice corente uachuanentše chē tribunaloye tbojánamashjna y chátaftaca tmojánamashjna chē soldadēngbe amēndayēnga y chē pueblentša uámana taitanga. Chentšana Festo tojanmandá Pablo jobetšana; <sup>24</sup> y chora cha tojánayana: “Rey Agripa y nyetsca taitanga bēngaftaca šmojtsemnēnga: Chentše entsemna chē boyabása. Nyetsca judiēnga chabe contra átsbentše montsabíchamo, Jerusalenoca y quem Cesarea pueblēntšnaca, y nya jtsayebuáchēse tša šmontseímpadana cha chaóbanama; <sup>25</sup> pero atše sēntsejuabná quem boyabása tondaye tonjama, jóbanama chabotsemnana ca. Y más, cachá šonjaímpadá chē Romoca bēts uámana mandado César chabe soyama cháuyanama; chcasna, chca chanjama, chábíoye cha chanjíchmu. <sup>26</sup> Pero atše, atšbe bēts uámana mandádbioye quem boyabásabíama juábobemama ndocna serto soye quetsátsbomna causa, tšēngaftangbe delante cha tijatsá, y masna, acbe delante, bēts rey Agripa; chca, lempe chacojantjá chentšana, ndayá juabemama atše chaitsebomnana. <sup>27</sup> Er atše sēntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtsichámua ndoñe lempe ntjuabemana ca” —cha tojánayana.

## 26

*Pablo tojanontsé rey Agripbe delante jóyebuambayama*

<sup>1</sup> Chentšana, Agripa Páblēbioye tbojaníyana: —Jóyebuambayama contselesenciana, cach aca chacuenēuyanama ca.

As Pablo, chē réybíoye jachuayama cucuatše tojanatsbaná y jenēuyanama tojanontsé mēntšá jayanama: <sup>2</sup> —Atše ndegombre sēntsoyejúá mora chjjobenaye acbe delante jóyebuambayama, uámana rey Agripa, chca, atše jenēuyanama nyetsca soyēngama ntšamo judiēnga atšbe contra montsichámua; <sup>3</sup> y más sēntsoyejúá, taitá conduábuatmama lempe ntšamo judiēnga monduamancá y condétatšēmo chē judiēnga ndayama imuenoboyebuambnana. Chcasna, Diosmanda uantádoca šmotsoyeuná.

*Pablo tojanacuntá ntšamo cha tempo inamnama*

<sup>4</sup> “Nyetsca judiēnga mondétatšēmo ntšamo atše tempscana chēngbeñe tsiyenama, bobontse sēnjamna orscana, atše sēnjanonýná luarentše y Jerusalenentše. <sup>5</sup> Chēngnaca mondétatšēmo y montsobena jayanana, chēnga tmojtsebošēse, chca ndegombre yomnana; atše nyets tempo fariseucá vida sēndbomna, y chē fariseunga mondayena más soyēnga jtsamēse chē judiēngbe leyēngaca chē inye judiēngbiama. <sup>6</sup> Y mora, ntšamo Bēngbe Bētsá bēngbe bēts taitanga tojanašebuachenacá, chē obanēnga jtayenama cha yochjamama puente jtsošbuáchiyēse atše obatmana causa, šmojuánatse atšbe contra jayanama. <sup>7</sup> Bēngbe bnētsana uta Israeloca bēts pamíllanga mondobátmana chē šbuachenana soye chēngbiama chaóshjanguama y chíyeca, cada te bnētē y ibeta chēnga Bēngbe Bētsá mondadorana y mondēservena. Y atše cach soyama obatmana causa, bēts rey Agripa, judiēnga mora atšbe contra montsabíchamo. <sup>8</sup> ¿Ndáyeca tšēngaftanga judiēnga šmojtsichamo, chē obanēnga chámuatayenama Bēngbe Bētsá yochjamama jtsošbuáchiyama ndoñe šmontsobena ca?

*Pablo tojanacuntá, ntšamo tempo cha Jesucristbeñe ošbuáchiyēnga yojanaborlánama*

<sup>9</sup> “Y cach átsnaca sēnjanjuabná atše šojamna lempe ntšamo stjjobenacá jamana, Jesús chē Nazaretocábeñe ošbuáchiyēnga corente chamosufrima, <sup>10</sup> y chca Jerusalenentše atše sēnjamna. Chē bachnangbe amēndayēnga mando šmonjanatšetá, y chca, banga Jesucristbeñe ošbuáchiyēnga cárceloye sēnjanētame; y jtsēbáyama ca chēngbiama montsanichamo

ora, átsnaca aíñe chca chamoma ca sënjánichamo. <sup>11</sup> Y ba soye, chë judiëngbe ene-juana yebnënguenache jabuache chënga sënjanatsetšená, chënga Jesucristo ústonana chamot-sajbanama, y chëngaftaca tša etonaná sënjëtsemna causa, chë inye luarëngöca bëts pueblënguenáchnaca chënga sënjanëcamena.”

*Pablo tojanacuntá ntšamo cha Jesucristbeñe ošbuachiyá tojanóbema*  
(Hch 9.1-19; 22.6-16)

<sup>12</sup> “Y cachcá jamama canye te Damascoye sënjëtseye; chë bachnangbe amëndayënga uabemanëchangá šmonjanëntsabuaché chca jamama y, cachënga choye šmonjanichmó. <sup>13</sup> Pero, uámana rey, chë benachëjana mo nyetsto ora, sënjáninye canye bëts tcuinye celocana, shinýama corente más enjëtsebinýnaye, y atše y chë átšeftaca ajnëngbe shëconana corente enjëtsebuashinýnaya. <sup>14</sup> Nyetscanga fsënjánshajaye y atše sënjanuena canye oyebuamb-nayana, hebreo biyañe, mëntsá šonjëtsetsaye: ‘Saulo, Saulo, ¿ndáyeca chca šcojtsacmena ca? Cach aca bacá consenabomá, atšbe entsanga chamosufrika tojtsama ora, mo uacná ngmëche niñëfiñe cha tojtsoscunjá orcá, cachá jenótsetšenana ca.’ <sup>15</sup> As atše sënjanayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entsanga chamosufrika ca.’ <sup>16</sup> Pero matëtsbaná y matëtsá. Atše cbonjébëbocna jinýinýiyama aca tchojuábuayanama atše šcochjasérviana, y chacotse-tatšëmbuama y entsanga chacuacuntama, mora tconjinýe soyama y más chcoye atšbiama cbochanjinýinýiye soyëngámna. <sup>17</sup> Atše chanjama judiënga y ndoñe judiënga tondaye chac-mondëborlama; y morna, ndoñe judiëngbiöye cbontsichamná, <sup>18</sup> chënga atšbe soyëngama josértama aca chacomama. Chca, chënga bacna juabnëga ndoñe chamondëtsebonna, mo ibetiñe cuaftsemnëngcá, sinó mo binýniñcá chamotsemna átšeftaca, atše chë entsangbe juabnëga binýnayá. Satanashbe cucuatšifne ndoñe chamondëtsebnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchemá, y chca, chëngbe bacna soyëngama perdonánëga chamotsemnana y chënga chamotsebonnana canye luare entsángaftaca, chë ndëmuanyëngbiöye Bëngbe Bëtsá tšabe entsanga y chabe entsanga tojábiana, chënga átšbeñe betsošbuáchiyama ca’ ” — cha šonjaniana.

*Pablo tojanma ntšamo chë mo otjenayoquécá tojaninýcá*

<sup>19</sup> “Chcasna, bëts rey Agripa, atše sënjanma chë mo otjenayoquécá sënjáninýe ora ntšamo Cristo šonjaniancá; <sup>20</sup> y natsana, Damascoca entsanga chë tšabe noticiëngama sënjanabuayená; chentšana, Jerusalenoquënga y nyetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngménaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinýinýiyama chca ndegombre tmojanmama. <sup>21</sup> Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošena atše jtsóbana. <sup>22</sup> Pero Bëngbe Bëtsá sempre šondúajabuachana, y chca, cada te mëntscoñama, nyetscanga Bëngbe Bëtsabiana sëndabuayinýá, uámanëngbiöye y nduámanëngbioynaca; nye ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inýetsá ndoñe. <sup>23</sup> Chënga tmonjanayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbiöye y ndoñe judiëngbiöye echanjabuayená, y chca, chënga mochántsetatšëmbo nyetscanga chábeñe tmojtsosbuáchenga atsebácanënga mochtsemnana ca.’ ”

*Pablo tojanma rey Agripbiöye jáyënjana, Jesucristbeñe ošbuachiyá chaóbemama*

<sup>24</sup> Pablo, cachá jenëuyanama chë soyënga tojánayana ora, Festo mëntsá tojánayebuachena: —¡Pablo, opá cojtsóbema! Yapa ualiye causa, opá tcojtsóbema ca.

<sup>25</sup> Pero Pablo tojanjuá: —Opá ndoñe quetsátmëna, bëts uámana Festo; inýetsá entsemna; atše sëntsoyebuambná nyets juabnaca, y ndegombre soyënga. <sup>26</sup> Chentše rey Agripa entsue-nana, y cha puerte tšabá chë soyëngama endëtatsëmbo, chíyeca, tondayama ntjatauajcá, atše chabe delante sëntsoyebuambná; atše corente sëndëtatsëmbo chánaca chë soyëngama yotatšëmbuama, er ndayá Jesús tojanmá, ndoñe tonjopasá ndaye iytëmena chaboye. <sup>27</sup> Bëts rey Agripa, ¿Bëngbe Bëtsabe juabna oyebuambnayënga tmojanayana soyënguñe aca quecošbuaché? Atše sëntsetatšëmbo aíñe chíñe cošbuáchemá ca —Pablo tojaniana.

<sup>28</sup> Chora Agripa tojanjuá: —Batšatema más y mašcjayëñaná Jesucristbe ustoná atše jóbemama ca.

<sup>29</sup> As Pablo tojánayana: —Nye batšatema más o bëtscama más, atše Bëngbe Bëtsá sëntseimpadana, ndoñe nye bëndatbe barie, sinó nyetscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondëtsemna, ntšamo mora atše sëntsemná ca.



<sup>30</sup> Chorna, chë rey, chë mandado, Berenice y chë chëngaftaca imojantbiámanënga tmojantsbaná, <sup>31</sup> y luaroye tmojána chë soyama jencuéntama. Mëntsá imojtsichamo: — Quem boyabása ndocna bacna soye tonjama jóbanama chabotsemnana, ni mo utamená jtsemnana ndoñe quebnátsmëna ca.

<sup>32</sup> Y Agripa Féstbïoye tbojaniana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

## 27

### *Roma bëts puebloye Pablo tmojanichmó*

<sup>1</sup> Italia ca uabaina luaroye Pablo jíchmuama tmojanenoyeuná ora, atše, quem librëša uabiamnayá, cháftaca sënjána. Chora Pablo y chë inye utamenënga Julio ca uabainabe cucuatšinë tmonjánabashejuana. Julio enjamna canya chë Romoca bëts mandadbe soldadënguentša mandayá. <sup>2</sup> Asna, fsënjánašëngo canye Adramitio puebloca barcuñe; ya chë Asioca bëts pueblëngoye juama enjëtsamna. Cesarea pueblentsana fsënjánbocna y Aristárnaca bëngaftaca enjëtsamna; cha enjamna Tesalónica bëts pueblócá, Macedonia luaroca.

<sup>3</sup> Chë inye yëfsana, Sidón puebloye fsënjánashajna. Chentše Julio, tsabá mandbomná Pábloftaca enjëtsamna; tbonjanlesenciá chabe amiguëngbïoye chauabuáchama, chënga chamofjama y chamóbocuedama. <sup>4</sup> Sidonocana fsënjëftsanbocnentšana, bëngbe contra corente enjëtsëbinýiaye. Chiyeca, Chipre fshantsënga catšbioicajana, ndoñe yapa quentëtsëbinýiayëjana bënga fsënjána. <sup>5</sup> Cilicia y Panfilia luarënga bëconana mar bejaycá fsënjánachnëngo, y Mira bëts puebloye fsënjánashajna, Licia luaroca.

<sup>6</sup> Chë soldadëngbe amëndayá, canye Alejandria puebloca barco chentše tonjáninýena, Italia luaroye yojétsaye; asna, šonjanamëndá chë barcuñe jenójayiana.

<sup>7</sup> Baseftaytentscuana uenana fsënjánana y pordonto fsënjanobená Gnido pueblentsá ndirichiñe jashjanguana. Cabá bëngbe contra enjëtsëbinýiaye causa, Salmón luarëjana fsënjánachnëjna, Creta fshantsënga bëconana, ndoñe yapa quentëtsëbinýiayëjana. <sup>8</sup> Y chca, pordonto bejaycá fsënjánana, fshantsënga bëconana; chentšana, canye pueblo, Tsabe Puertënga ca uabáinentše fsënjánashajna, Lasea ca uabaina pueblo bëconana.

<sup>9</sup> Chca, bayté tonjanochnëngo y chora chë bejaycá jama puerte resjo enjëtsëmna, er ya chë jüdiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjëtsobeco.

<sup>10</sup> Chiyeca Pablo chë entsanga mëntsá tonjanabuayená: “Baconga, atše šontsinýana mora puerte resjo entsemna bejaycá játama, y ndoñe tsabá queochátsmëna, ni chë uasmanëshangama, ni chë barcuama y bëngbiama cach ndoñe, mo naderado muanjanóbana ca.”

<sup>11</sup> Pero chë soldadëngbe amëndayá Páblëbïoye ndoñe ntjoyeunayana; más, chë barcuentsá mandayá y chë barco nduñibïoye aiñe. <sup>12</sup> Ndoñe tsabá yonjamna, chë barco chora enjëtsëmmentše chë uaftena tempëntsçuana jëftsemnana; chë causa, nýa mo nyëtscanga tmonjanenoyeuná cachiñe bejaycá chentšana játama, nderado cuanjobenaye Fenice puebloye jashjanguama y chentše jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinýe endbetsenatjëmbambana juachoica tsjuanoicajana y tsmanoicajana.

### *Mar bëjayiñe puerte uaftena y tsinýia tojanóshjango*

<sup>13</sup> Chentšana tonjanontsé tsmanoicana batšá binýiayana, chiyeca chë entsanga tmonjanjuabó ya yojtsanopodena jtëtóntsana jama ca. As, chentšana fsënjëftsanbocna y bejaycá fsënjána, Creta fshantsënga beconanëjana. <sup>14</sup> Pero baseftayté chentšana, chë fshantsëngocana tonjanontsé corente jabuache binýiayana y chë barquëshoye enjëtsoshjajuana. Chë binýia yojanabaina Nordeste binýia ca. <sup>15</sup> Chë barcna nýe chë binýiëbe ponto tonjanontsé uayana; chë binýia enjëtsobayëjana jama ndoñe quentëtsopodena causa, šonjanotocá nýe ntšamo tojtsebinýiacá chašúyambama. <sup>16</sup> Chentšana fsënjánachnëjna Cauda ca uabaina stëtsoicajana, base fshantsënga mar bëjayoca; chiñe ya ndoñe tša jabuache quentëtsëbinýiaye y pordonto fsënjanobená buyeshocana jtabocnana chë barco enjanasjá canouše, ndoñe chaondëtsóndbemama. <sup>17</sup> Ya chë barquëshoye fsëntanëšëngo orna, chë entsanga lazëjangaca chë barquëshá tmonsanabatsécaca, más uamorochësha chaotsamnana. Pero chënga monjëtsauatja nderado chë barco chë Sirte ca uabaina cascajúentše nanjetsánjua; asna, chë barcuentsá ancla tmonjanashëbéútsëna, chë barco ndoñe betsco chaondëtsábonjnama, y ntšamo enjetsanbinýiaycá fsënjána. <sup>18</sup> Chë inye yëfsana y chë binýiayana cabá jabuache enjëtsëmna causa, chënga tmonjanontsé chë barcuentsá uasmanëshangá jtsëshbuëtsetšana; <sup>19</sup> y unga tianoye bëngnaca šonjanotocá, cach bëngbe cucuatšëca, chë barcuentsá soyënga buyeshoye jtsëtšanana. <sup>20</sup> Baytentscuana bënga

ndoñe chibiatanobená jinýana ni shinýe, ni estrellatémenga, tša tonjéseitebata causa; y tša jabuache enjétebinýiaye causa, benga ya ndoñe quefstétsanobatmana chentšana jótsbocana.

<sup>21</sup> Ya bayté enjésemna y chéntsucana tondaye saná ntjascá fsenjésemna. Chentšana, Pablo bēngbe tséntsaca tonjantsá y tonjánayana: “Bacongá, tsabá manjamna atše mašmēnjanoyeuná y Creta luarocana ndoñe matmēnjéftsanbocna; chca mora ndoñe mal mamojtsepasá y ndoñe nýa nýetšá matmēnjobuetše. <sup>22</sup> Pero mora ngménaca ndoñe matsmēnēngana; masque chē barco echantsenatjēmba, tsēngaftanguentšá ndocná queochatóbana. <sup>23</sup> Ibeta canýe ángel šonjébēbocna; Bēngbe Bētsá, ndabia atše sēndmēna y nda sēndēservena, cha tbojichmó; <sup>24</sup> y chē ángel mēntšá šonjaunya: ‘Pablo, ndoñe matauatjana; entseyta aca chē Romoca bēts mandádbioye chacotsama, y aca Bēngbe Bētsábia cómnayeca, nýetsca quem barcuñe ajnēnga jobanámētsana cha echanjatsebaca ca.’ <sup>25</sup> Chcasna, bacongá, ndoñe matauatjēngana, er atše Bēngbe Bētsábeñe corente sēntsošbuaché y lempe ntšamo chē ángel šonjauyancá echanjóbcna. <sup>26</sup> Pero mora entseyta canýe fshantse mar bējayifne chašúshejanguama ca” — cha tonjanéyana.

<sup>27</sup> Canýe ibeta, uta semana fsenjánana chentšana chē Adriático ca uabaina mar bējayifne fsenjésemna, y nýe inýoye y inýoye chē binýia šonjétsēyambaye. Y mo tsēntseto yojésemna orna, chē barcuentša trabájayēnga tmojanjuabó ya fshantse bēconana imojésemna ca. <sup>28</sup> As chēnga tmonjanmedidá ntsachetšá chē búyeshe buatiye inamnama y tonjanóbocna unga bnētsana y chnēnguana metro; más chcoye cachiñe tmonjanmedidá y uta bnētsana canýsēfta metro tonjanóbocna. <sup>29</sup> Chēnga monjétsauatja nderado bēts ndētsbēngaca nan-jetsántšētjiama; asna, chē barco stēšioicajana canta ancla buyeshoye tmonjanashēbēútsena, chē barco ndoñe más chaondétsabonjnama, y tša monjéteboše betscó chaobínýama. <sup>30</sup> Chéntsucana, chē barcuentša trabájayēnga tmojánbošena chentšana jtsachetana; chamna, chēnga tmojanontšé chē canouše buyeshoye justjanguana, pero chca imojétsama, mo chē anclēnga chē barco natsanoica cuaftsēstjauancá. <sup>31</sup> Pero Pablo chē soye tojáninýe, y chē soldadēngbe amēndayábioye y chē soldadēngbioye tonjanéná y mēntšá tonjanéyana: “Chē barcuentša trabájayēnga cach quem barcuentše ndoñe chamonjoquedase, tsēngaftanga ndoñe quešmochatobenaye muentšana jótsbocama ca.”

<sup>32</sup> As, chē soldadēnga tmonjáná y chē canoušentša lazējēnga tmontsantētsetše y buyeshoye chēse tmontsantsatše.

<sup>33</sup> Enjétebinýana ora, Pablo nýetscanga tonjanaimpadá ndayánaca chamosēngama, mēntšá jáuyanēse: “Ya uta semana entsemna y tsēngaftanga ni mo batšatema chešmatamaná, y tondaye chešmatšbmuananga. <sup>34</sup> Diosmandá, masque nýe mo batšatémnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

<sup>35</sup> Pablo, chca tonjánayanentšana, canýe tandēse tonjanca y nýetscangbe delante Bēngbe Bētsábioye tñontanchuá. Chorna, tonjanjatá y tonjanontšé jasama. <sup>36</sup> Chentšana nýetscanga tmonjanenñemó y chēngnaca tmonjanse. <sup>37</sup> (Chē barcuentše nýetscanga fsenjámna uta patse y canýsēfta bnētsana y chnēnguanēnga.) <sup>38</sup> Ntšamo inmabošca tmonjansentšana, buyeshoye trigo tmontsanashaná, chca, chē barco ndoñe yapa chaondétsautama.

### *Chē barco tojtsanenatjēmba*

<sup>39</sup> Ya tonjanbinýna ora, chē barcuentša trabájayēnga ndoñe quemēntētsetatšēmbó ndaye fshantse chentše bētemnana, pero tmonjáninýe chē fshantsentše canýe luare jachañe, chē bējaye chē luaroye omashjuanentše, y chiñe canýe chēñyañe enjamna; as chēnga tmonjanjuabó jarrepárana nderado cuanjobenaye chējana chē barco chē fshantsoye juyambana. <sup>40</sup> Asna, chē anclentša lazējēnga tmontsantētsetše y chē anclēnga buyeshoye tmontsanboshjuana, y chē timón, chē barco juyambama oservena soyentša uabatsēcnjēngnaca tmontsanjafjoná. Chorna, chē barcuentša natsanoica niñēšifne entšējua tsbanánoye tmon-tanēšēngo, y chē binýia tonjanma chē barco chaontšé chē chēñyoye juabēconama. <sup>41</sup> Pero chē barco canýe luaroye tonjánashjango, y chentše chē bējaye catatoicajana enjetsobuá y chē barco canýentše, bētsca cascajo buyeshifne binýnentše tontsanajo. Chē barcuentša natsanoica lado chē cascajuñe entsanajuena, ndócnoye juabónjuama ntšopodencá, y chē stēšioica lado puerta entsanashatiyina y lempe entsanandbianná, yapa binýia causa y búyeshe chentše enjétojantšetaye causa.

<sup>42</sup> Chora, chē soldadēnga tmonjanjuabó chē utámenēnga jtsēbáyana, jachbabēse chēnga ndoñe chamondétsachetama. <sup>43</sup> Pero chē soldadēngbe amēndayá inaboše Pablo jatsbocama, y chíyeca chē soldadēngbioye ndoñe chenatanalesencia chca jamana; y tojanmandá nýetscanga chē jachbabama obenēngna natsana chē buyeshoye joshbuetšana tsachoye chamuashjanguama, <sup>44</sup> y chē inýengna tablēshēnguñe o chē barcuentša pedazēnguñe chamoshbuetšama. Y chca, nýetscanga fsenjānobená tsabá y ndocá ntjapasacá fshantsoye jashjanguama.

*Pablo Malta luaroca*

<sup>1</sup> Ya njëtscanga fshantsoca tsábá fsënjésemna ora; fsënjántatšëmbona chë luare Malta ca yojanabaina. <sup>2</sup> Chë luarentša entsanga bēngaftaca corente tsábá mändbomnēnga monjésemna; canye ifēshe tmonjanangbotjó y šonjanēbuaja choca bēnga jatósboniyama, er tša enjētsaftena y yapa enjētsesēsna. <sup>3</sup> Pablo tojanatbaná básefta buashana chamesēfjēnga y chë ifēshoye enjētseshacnayē ora, canye mētšcuaye tojánbocna y enjētsachayē, chentše yapa obonýaye causa, y Páblēbe cucuatšīne tontsanojonýá. <sup>4</sup> Chë luarentša entsanga, chë mētšcuaye Páblēbe cucuatšīne vojtsajonýanama tmonjáninýe ora, monjētsenatsēsnyae: “Quem boyabáša ndegombre inýa obanayá cuanmēna; mar bējayoca jobanámentšana tojots-bocá, pero chca uamana causa, diosá Justicia ndoñe quebnatslesēncia cha vida chaotse-bomnma ca.”

<sup>5</sup> Pero Pablo tontsanenacuestētoná y ifēshoye chë mētšcuaye tbontsantsatše y Pablo ndocá chenatanpasá. <sup>6</sup> Chë entsanga imojétsejuabnaye chábíoye bochtsacuefshachá y nýe ndeolpe obaná yochjashajayē ca. Pero bēn tonjanochnēngo y ndocá chenátanopasama chēnga tmonjáninýe ora, ya ndoñe cachcá quemētētsanjuabnaye y tmonjanontšē ichámuaana Pablo canye dios inamna ca.

<sup>7</sup> Chentša béconana inamna chë luarentša mandayabe fshantsēnga. Cha šonjanēbuaja y corente tsábá šonjanacuedá, unga tentscuana. Chë taitana Publio ca inauabaina. <sup>8</sup> Chë tempo, Públiēbe taitá šocá jutsnēshañe inajájona, calentóracá y buifēca buamachnējuanáca. Pablo tonjána cha jinýama y tonjánamashēngo; Bēngbe Bētsábíoye tbonjanimpadá y chë šocábēñe chabe cucuatšēnga tonjanajó, y chca, cha shnaná enjētsatsmēna. <sup>9</sup> Chca tonjanopasá chentšana, chë luarentša inýe šoquēnga Páblēbíoye monjánajna y cha enjánashnaye. <sup>10</sup> Bētscá tsábe soyēnga chentše bēngbiamá tmonjanma, y cachíñe játama ya chë barcuíñe fsēntanenoyajenga orna, lempe ntšamo bejaycá jama šonjanējabotcá chēnga šonjanatšatá.

*Pablo Romoye tojánashjango*

<sup>11</sup> Chë fshantsentše mar bējayoca unga ishinýe fsënjēftsemna, y chentšana canye Alejandriocana yojanabá barcuíñe fsēnjānenoyayé; chë barco nýets uaftena tempo chë luarentše vojēftsamna y enjanabaina Cástor y Pólux ca, mo chë romanēngbe uta diosata catšatcá. <sup>12</sup> Chentšana, Siracusa bēts puebloye fsēnjānashajna y chentše unga te fsënjēftsemna; <sup>13</sup> y chentšana fshantse béconana bejaycá fsēnjána, Regio puebloye jashjanguēntscuana. Yēfsana, tsmanoicana tsjuanoye enjētsēbinýiaye, y chca, chë inýe yēfsana Puteoli puebloye fsēnjānashajna. <sup>14</sup> Chentše básefta Jesucristbēñe ošbuáchiyēnga fsēnjānanýena, y šonjanēbuaja chēngaftaca canye semana chentše jēftšajētanama; y chentšana Romoye fsēnjēftsanbocna. <sup>15</sup> Romoca Jesucristbēñe ošbuáchiyēnga ya imojétsetatšēmbó bēnga choye fchjanashajnama; chcasna, chēnga tmonjánbocna bēnga jajébenguama canye luare Foro del Apio y Unga Tabernēnga ca ubainóntsoñe. Pablo chēnga tonjánanyē ora, Bēngbe Bētsá tbontanchuá y puerta añēmoca enjētsēmna. <sup>16</sup> Romoye fsēnjānashajna ora, soldadēngbe amēndayá Páblēbíoye tbonjalesenciá cánýabe yebnentše chaotsiyenama, y tonjanmandá canye soldado chabotsebojanýama.

*Ndayá Pablo Romocá tojanma*

<sup>17</sup> Choye fsēnjānashajnentšana unga tianoye, Pablo tonjanmandá chentše imnoyena judiēnga más uámanēnga chamobéconama; y njëtscanga ya tmojánenefjna ora, cha tojanéyana: —Catsátanga judiēnga, masque atše tondaye chiyatsma bēnga judiēnga mondbētsama soyēngama contra, ni bēngbe bēts taitanga imojanamana soyēngama contra, judiēnga Jerusalenoca šmonjanishache y romanēngbe cucuatšīne šmonjánboshjona. <sup>18</sup> Chë romanēnga lempe šmonjantjá chentšana, monjētsēboše atše jētsboshjonana, er ndocna bacna soye chemátaninýena atše jóbanama chašotsemnma. <sup>19</sup> Pero chë judiēnga ndoñe quemētētsēboše atše chašmuatsboshjonama; chiyecca, šonjanotocá jáimpadana cach Romoca bēts uámana mandado cháuyana atše tsábá o ndoñe tjanmama, masque atše tondaye quetsátbomna, cach atšbe luarentša entsanga, judiēngbe contra jayanama. <sup>20</sup> Chiyecca, atše tbonjúbujá jányama y jáuyanama, er ndayama chë Israeloca entsanga puerta jtsošbuáchiyēse mondobátmanama, chë obanēnga mochtayenama, atše mora utamená sēntsemna ca —tojanéyana.

<sup>21</sup> Chora chēnga tmojanianyana: —Bēnga ni mo canye tsbuanácha Judeocana fchiyatáyēngaca acbiamá noticiēngaca, y ni canye catšata judío, chocana moye ashjajnēnguentšá, ndocna bacna soye acbiamá chešnatacuntá. <sup>22</sup> Bēnga fsēntseboše jouenana ntšamo aca cojuabnama, er ntšamo Jesucristbe ustonēngbiamá fstsētātšēmbcá, entsemna ana nýets luarenache chēngbe contra entsanga imojtsichamo ca.

<sup>23</sup> Asna, canye tescama Pablo tmojaninyana chca chaotsemnana; y chë tena, ba entšanga chë Pablo posada inabomnoye tmojanobeconá. Y cachëscana tojanjétanëntscuana, Pablo entšanga yojanëtsëtsná Bëngbe Bëtsabe amëndayama, ndayama cha ininye y inatátšëmbo; y yojtsentšena chënga jáyëñjanama Jesúsbeñe chamotsošbuáchema, Moisesbe leyënguentša soyëngaca y Bëngbe Bëtsabe juabna oyebuambnayëngbe uabemana libréšangañe soyëngaca. <sup>24</sup> Báseftanga aíñe imojtsošbuáchiye ntšamo Pablo yojtsanëtsëtsnacá ndegombre bëtsemnana, pero ínýengna ndoñe. <sup>25</sup> Nyëtscanga ndoñe cachcá montsanjuabnaye causa, tmojanontsé chentšana jésebocanana. As Pablo tojanëyana: “Nyëts razónaca chë Uámana Espíritu tšëngaftangbe taitanga tojanëyana, Bëngbe Bëtsabe juabna oyebuambnayá Isaíasbiajana, mëntšá:

<sup>26</sup> Motsa chë entšanga jauyanama:

‘Bëtscá šmochantsuenana, pero tondaye quecmochátësertana;

tša šmochantsafšna, pero tondaye quešmochátinýe.

<sup>27</sup> Muentša entšanga ainánaca josértama ndoñe quemátšboše causa,

chënga nduauenanënga montsemna y nduabinýñëngnaca;

chënga bomínýeca ndoñe chamondobená jinýama,

ni chëngbe matscuašeca jouenama,

ni chëngbe ainánaca josértama ndoñe chamondobená,

chca, atšbe benache ndoñe chamondishachama,

atše ndoñe ntjátsebacama ca.’ ”

<sup>28</sup> Pablo chora mëntšá tojanëyana: “Ndegombre šmochtsetátšëmbo, cach quem Bëngbe Bëtsabe buayenana soyënga entšanga bacna soyënguentšana játsebacama, chë ndoñe judiëngbioye mochanjábuayenaye, y ndegombre chënga cocayé aíñe mochanjóyeunaye ca.” <sup>29</sup> (Pablo chca tojánayana ora, chë judiënga chentšana imojésebocana y tša imojtsenatsëtsnaye.)

<sup>30</sup> Pablo uta uata chentše tonjanoquedá canye uántšamena yebnentše; y nyëtscanga cha jauatsëtsayama monjánajnënga cha enjanëbuájajana. <sup>31</sup> Nyëtscangbe delante puerta añémoca entšanga enjanabuayiyná Bëngbe Bëtsabe amëndayama, y enjanabuatambá soyënga Bëngbe Utabná Jesucristbiamá, y ndocna Romoca mandayá quebëñjatanauyá chca jtsamama.

## Romanos

### *Pablo Romoca ošbuáchiyënga jacheuayama*

<sup>1</sup> Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnana, y šonjanbocacá chabe tsabe noticiëngama entsanga chayábuayenama.

<sup>2</sup> Ya bayté entsemna, Bëngbe Bëtsá chabe juabna oyeuambnayeŋgaftaca chë tsabe noticiënga entsanga tojanašebuachená, y chënga chca tmojëtsanábema Bëngbe Bëtsabe uabemana palabreŋguiñe. <sup>3-4</sup> Chë tsabe noticiënga, chabe Uaquiñá Bëngbe Utabná Jesucristbiamna jtsóyeuambnayana. Entsá quetsomñecana, tojanonýná canye rey Davidbentša entsábentšana; pero chabe espíritu sempre uamanáyecna, Bëngbe Bëtsá chabe obenánaca entsanga tojaninýanyé Jesucristo chabe Uaquiñá bëtsemnana. Cha chca tojaninýanyé chë Uaquiñá cháuatayenama cha tojanma ora.

<sup>5</sup> Chábeyeca, Bëngbe Bëtsá atše canye bëts soyama šojanábuayana, Jesucristbe ichmoná jtsemnana, chabe soyëngama entsanga jábuayenama, y nyëts luarënguenache Jesucristbeñe ošbuáchiyënga chamotsemnana, y chca, ntšamo cha yomandacá chënga chamotseyeunanama. <sup>6-7</sup> Tsëngaftangbiamna chëngbeñe šmontsemna, tsëngaftanga chë Romoca šmoyenënga, ndëmuanyënga Bëngbe Bëtsá tcmojáchembo Jesucristbenga chašmotsemnana. Atše tsëngaftangbiamna sentsabiamná, tsëngaftanga Bëngbe Bëtsabe bonshánënga y chabe entsanga chašmotsemnana chëmbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnana, y chaboma tsëngaftanga ainaniñe tsabe ebionana chašmotsebomnana.

### *Pablo tša inaboše Roma bëts puebloye jama*

<sup>8</sup> Jabojátšamna, Bëngbe Bëtsá, Jesucristbiajana šcuatschuá, cada ona tsëngaftanguentšabiama, er nyëts quem luariñe entsanga tša monjesoyebuambná tsëngaftanga Jesucristbeñe bëtscá šmojtsošbuáchema. <sup>9</sup> Bëngbe Bëtsá, nda nyëts ainánaca sëndëserveda, tsabe noticiënga chabe Uaquiñabiamna abuayinayiniñe, endëtátšëmbo atše nyëts tempo Bëngbe Bëtsáftaca stsencuénta ora, tsëngaftangbiamna sëndëtseimpadanama; <sup>10</sup> y mora Bëngbe Bëtsá sëntseimpadana, nýa mora y cha tojtsebošëse, chašolesenciá jama tsëngaftanga jautsësayama. <sup>11</sup> Er atše tša sënjëseboše tsëngaftanga jányama, chca, atše chayobená jamama chë Uámana Espiritbentšana yóbocana tsabe soyënga tsëngaftanga chašmotsebomnana; y chca, tsëngaftanga ainaniñe bëts añemo chašmotsebomnana, y Jesucristbeñe corente chašmotsošbuáchema; <sup>12</sup> o más tsabá jayanamna, tsëngaftanga y átšeftaca mochjenájabuache ainaniñe bëts añemo jtsebomnana, tsëngaftanga y átšnaca Jesucristbeñe tša imošbuacheyeca.

<sup>13</sup> Y morna, Jesucristbeyeca catšátanga, sëntseboše tsëngaftanga chašmotsetátšëmbo atše ba soye jama tijájuaboma, tsëngaftanga jautsësayama, pero mentscoñama ndoñe tsjobenaye. Atše sëntseboše ndayá chayobená jamana inýenga tsëngaftangbioca Jesucristbeñe chamotsošbuáchema, ntšamo inýengbeñe ndoñe judiëngbeñe tonjopasacá. <sup>14</sup> Atše Jesucristbiamna canye oservená sëndmëna, y chiýeca nyëtscángaftaca obligacióncá sëntsemna, chë pueblënguiñe oyenëngaftaca y bën tjoye oyenëngaftaca, chë uatsjinýenëngaftaca y ndoñe chcangafácnaca. <sup>15</sup> Chiýeca atše tša sëntseboše tsëngaftanga chë Romoca šmoyenëngnaca chë tsabe noticiënga jábuayenama.

### *Chë tsabe noticiënga Bëngbe Bëtsabe obenana jtsinýanyayana*

<sup>16</sup> Atše ndoñe quetsátëuatja chë tsabe noticiënga jtsabuayinayama, er chë noticiënga jtsinýanyayana Bëngbe Bëtsabe obenana; y chë obenánaca, nyëtscanga Jesucristbeñe ošbuáchiyënga jtsobenana atsebácanënga jtsemnana, natsana chë judiënga chca ošbuáchiyënga, pero chë ndoñe judiëngnaca. <sup>17</sup> Er chë tsabe noticiënga jtsinýanyayana ntšamo Bëngbe Bëtsá inétsama entsanga chabe bominýiñe tsábenga chamotsemnana. Y entsanga chabe bominýiñe tsábenga jábiamana, chënga Jesucristbeñe tmojtsošbuáchema. Ntšamo Bëngbe Bëtsabe uabemana palabreŋguiñe endayancá: “Nýe ndabiamna Bëngbe Bëtsá tojama chabe bominýiñe tsabia chaotsemnana, cha Bëngbe Bëtsábeñe betsošbuáchema, cha ndegombre chë nyëtscá tescama yomna tsabe vida echántsebomma ca.”

### *Bëngbe Bëtsabe delante nyëtscanga culpa bomnënga mondmëna*

<sup>18</sup> Bëngbe Bëtsá celocana tojinýanyé, chë uabouana castigo, tša tbojetnama entsangbiamna chaotsemnana, ainaniñe bacna juabnënga bomnëngbiamna y chë bacna soyënga amëngbiamna y ndëmuanyëngbiamna, masque Bëngbe Bëtsabe ndegombre soyënga jtsotatšëmbñana, tša bacna soyënga tmojtsama causa, ndoñe ntjalesénciana cachënga jtsiyenama ntšamo ndegombre yomncá. <sup>19</sup> Bëngbe Bëtsá echanjácastigaye, er ntšamo entsanga imobencá Bëngbe

Bětsabíama jtsatatsěmbuama soye, chěngaftaca sempre endětsemna. Y chca endmēna, Běngbe Bětsá chě soye tojinānyēyeca. <sup>20</sup> Běngbe Bětsá quem luare tojanma orscana, entšanga mondetsoberena botamana josértana, Běngbe Bětsabe obenana ndocna te yochjěftsopochócama y cha ndegombre Běngbe Bětsá yomnama. Chě soyěnga Běngbe Bětsabíama entšanga quemátobena jinjāna; nje jtsatatsěmbuamna aífie. Entšanga mondobena chě soyěnga Běngbe Bětsabíama jtsatatsěmbuama, cachá tojanma soyěngaca. Chcasna, chěnga ndoñe quemátobena jayanana bacna soye tmojama, cha nduabuatma causa ca. <sup>21</sup> Chěnga Běngbe Bětsabíama mondětatsěmbo, pero ndoñe ntsebošana chábioye jadórana, “aca ndegombre Běngbe Bětsá condmēna ca” jtsichámese, ni cha ntsatschuanayana. Pero, ntšamo chěnga tmojtsejuabnacá tondaye ntsámanana; ndoservena juabněngaca y bacna juabněngaca montsiyena, y chca, chěnga montsiyena, jtsamēse ntšamo cachěngbe juabněnga yomncá, mo ibetiñe cuafatsajncá. <sup>22</sup> Chěnga jtsichámuana corente osertáněnga imomna ca, pero ndegombrna juabna ndobomněnga mondmēna. <sup>23</sup> Chěnga ndoñe ntsadoránana Běngbe Bětsá, chě ndocna te yochjěftsobaná; chě cuenta, soyěnga tmojobopormá mo entšangá, y chěnga aífie jóbanana; o soyěnga shloftšěngcá o bayěngcá, o osjojnayěngcá, y chěnga diosěnga imomna ca jtsējuabnayese jtsadoránana.

<sup>24</sup> Chíyeca, Běngbe Bětsá cachcá tojónjā, cachěngbe ainaniñe puente bacna juabněngaca mandáněnga chamotsiyenama, y chca, bacna soyěngaca inyěngaftaca imojtsama; chě soyěngamna jtsěuatjana chěnga entsamna. <sup>25</sup> Chěnga chca jtsemnana, er ndoñe tmonjábosēna Běngbe Bětsabe ndegombre soyěnguiñe jtsosbúachiyana, pero chě ndoñe ndegombre soyěnguiñe cocayé jtsosbúachiyana; chěnga jtsadoránana y jtseservénana, Běngbe Bětsá quem luarentse tojama soyěnga; pero ndoñe ntsadoránana, ni ntseservénana cach Běngbe Bětsá, chě nyetsca chě soyěnga tojanmá. Entšanga nyets tempo cha chamotsatschuaná. Chca chaotsemna.

<sup>26</sup> Entšanga chca ndoñe tšabá tmonjámayeca, Běngbe Bětsá cachcá tojónjā, chěnga inyěngaftaca bacna soyěnga jtsamama chamotsebošana; chě soyěngamna jtsěuatjana chěnga entsamna. Y chca, chě shembásengnaca tmojtsajbaná boyabásengnaca jtsamana ntšamo tšabá yomncá, inye shembásengnaca bacna soyěnga jtsamama. <sup>27</sup> Cachcá, boyabásenga tmojtsajbaná shembásengnaca jtsamana ntšamo tšabá yomncá; y tša imojtseboše inye boyabásengnaca bacna soyěnga jtsamama. Chěnga chě inye boyabásengnaca bacna soyěnga imojtsama causa, entsamna jtsěuatjana, y chě soyěngama castigáněnga mochántsemna, cachěngbe cuerpěnguiñe jasúfriase, ntšamo chěngbe bacna soyěngama yojtsěmerezencá.

<sup>28</sup> Chěnga ndoñe tmonjábosēna jtsiyenana jtsejuabnayese, ntšamo entšanga Běngbe Bětsabíama imotatsěmbcá ndegombre bětsemnana. Chíyeca Běngbe Bětsá cachcá tojónjā, cachěngbe ndbēmana juáběmana chamotsiyenama; y chca, chěnga ba soyěnga jtsamana, jamama ndoñe yontsamncá. <sup>29</sup> Chěnga nyetscna bacna soye jtsamana: ainaniñe nyetscna bacna juabna jtseboamnana, nje cachěngbíama bětscá soyěnga jtseboamnana tša jésebošana, y inyěngbioye ntšámnaca jáborlama jtsebošana; chěnga nje játsbošana inya tojtseboamna soyěnga jtseboamnana, inyěnga jtsěbānāyana. Mondmēna penzertšerēnga, inyěnga áingñayěnga, puente bacna soyěnga inyěngbíama bošěnga, y uayátsenayěnga. <sup>30</sup> Chěnga inyěngbíama podesca jtsóyebuamnayana, Běngbe Bětsá jtsáyayana, inyěnga jtsóyanguayana, nje cachěngbe soyěnga más iuámana ca jésejuabnayana, tša jtsenábotaamnayana, jésejuabnayana ntšamo muanjobenaye más bacna soyěnga jamana; chěngbe bětsětsangbioye ndoñe ntsayaunanana. <sup>31</sup> Chěnga ndoñe ntsebošana chě tšabe soyěngama chaósertama, tondayama palabra ndobomněnga, ndocnábioye ntsebobonshánana y ndocnabíama ntjóngmiana. <sup>32</sup> Y chěnga corente mondětatsěmbo chca soyěnga aměngbíama, Běngbe Bětsá chabe leyíñe tojajana jóbanama yojtsěmerezencá ca; pero masque chca, chěnga nyets tempo chca jtsamana, y oyejuayěnga jtsěnyāyana inyěnga cachcá tmojtsama ora.

## 2

*Běngbe Bětsá echanjama chě ndoñe tšabe soye aměnga běts castigo chamotseboamnana*

<sup>1</sup> Chcasna tšěngaftanga, chě inyěnga ndoñe tšabá montsama ca šmojtsicháměnga, ndoñe queśmátobena jayanana ndáyeca chca cach tšěngaftanga šmojama soyěngama. Tšěngaftanga chca inyěngbíama šmojtsichamo ora, jtsinānyānyana cach tšěngaftāngnaca ndoñe tšabá šmonjamama, y castigáněnga jtsemnana cmontsamna, er tšěngaftanga cachěngcá šmojtsiyena. <sup>2</sup> Běnga mondětatsěmbo, Běngbe Bětsá ntšamo ndegombre yomncá inětsamama, chě chca aměngbíama ndoñe tšabá tmonjama ca y castigáněnga jtsemnana yojtsamna ca cha tojajana ora. <sup>3</sup> Y tšěngaftanga, chě inyěnga ndoñe tšabá montsama ca šmojtsicháměnga, y cachca soyěnga šmojtsama, ¿šmojtsajuabná Běngbe Bětsabe castigüentšana šmochjotsbocá ca? <sup>4</sup> Běngbe Bětsá tšěngaftangbíama corente tšabe juabna endbomna; mora ndoñe quecmátacastigaye, y tšěngaftangnacaftaca puente uantado nje chca

endétsemna. ¿Chama tsëngaftanga cha šmojtsábotena? ¿Ndoñe šmondétatšëmbo Bëngbe Bëtsá chca corente jtsababuányeshanëse cmojtsënña, tsëngaftanga juabna chašmotrocama y chabe benache chašmuishachama cha yobóseyeca? <sup>5</sup> Er tsëngaftanga ndoñe quešmátsboše chacmotsësertánama, y bacna soyënga amama jtsajbanama ndoñe quešmátsboše causa, šmontsama más bëts castigo chašmotsebonnama, chë ndayté Bëngbe Bëtsá ntšamo entšanga tmojamcá tsábá o ndoñe tsábá bëtsemnama yochjayana ora; chë te, Bëngbe Bëtsá echanjamánda chë ndoñe tsábe soye amënga bëts castigo chamotsebonnama, y chë tsábe soye amëngna, uacanana soye; y chca echanjama ntšamo ndegombre yomncá, y echanjinñanyïe cha tša tbojetna, entšanga ndoñe tsábá tmonjamama. <sup>6</sup> Chca, chë te, ntšamo cada ona tojëftsemama, Bëngbe Bëtsábentšana echanjýëngacñe. <sup>7</sup> Ndëmuanyënga nyëts tempo tsábá jtsamëse imoyena, y chca imonguá Bëngbe Bëtsá más uámanënga chauabiama, cha chëngbiamá tsábá chaotsoyebuambná y tsábe vida jtsebonnama chaoma; chë te chëngbiamá Bëngbe Bëtsá echanjama, chë nyëtsca tescama yomna tsábe vida chamotsebonnama. <sup>8</sup> Inyënga imoyena, nyë cachëngbe juabnëngaca cachënga tsábá jtsomñiamá; y ntšamo ndegombre tsábá yomncá tmojtsaboté, ntšamo ndoñe tsábá yomncá jtsamama. Y Bëngbe Bëtsá chë te, ndoñe tsábá tmonjëftsobuachjanguamna puerte etonaná echanjayana nyëtsca tescama castigánënga jtsemnana chënga yojtsamna ca. <sup>9</sup> Bëngbe Bëtsá echanjama, chca amëngna puerte chamosufima y lastemcá chëngbiamá chaotsemnama, er yapa tsetšénana chëngbiamá echanjëftsemna; chca echántsemna chë chcángbeñe judiënga imomnëngbiamá natsana, y ndoñe judiëngbiámnaca. <sup>10</sup> Pero chë te, Bëngbe Bëtsá echanjama, ntšamo tsábá yomncá amëngna puerte uámanënga chamotsemnama, chëngbiamá corente tsábá echanjýebuambaye, y echanjama chënga cháftaca tsábá tempcá chamot-satsménama; y chca echántsemna chë chcángbeñe judiënga imomnëngbiamá natsana, pero ndoñe judiëngbiámnaca.

<sup>11</sup> Er Bëngbe Bëtsabiamá nyëtscanga cachcá monduámama. <sup>12</sup> Chë Moisesbe ley ndoñe monduábomnënga, bacna soye tmojamama castigo mochántsebonna, masque leyënga ndoñe tmonduábomnëse, ndayá yojtsamna jamama chauýyanama; y chë Moisesbe leyënga imuabomnëngbiamna, bacna soye tmojamama, Bëngbe Bëtsá echanjayana chënga ndoñe tsábá tmonjama ca y castigo chamotsebonna ca, chë leyënguñe iuayana soyëngaca. <sup>13</sup> Chca endmëna, er Bëngbe Bëtsá ndoñe queonýbatsma entšanga chabe bominýñe tsábënga chamotsebonna, nyë ntšamo chë leyíñe iuayancá tmojtsuenanama, sinó ntšamo leyënguñe iuayancá, ndayá jamama yojtsamncá tmojtsamëse. <sup>14</sup> Chë ndoñe judiënga chca leyënga ndoñe quematábomna, pero chëngbe ainanentša juabnënga tojtsëtsëtsná ndayánaca jamana, y ndayá chamotsamama ntšamo chë leyënguñe tomandancá chënga tmojamëse, chënga jtsinñanyñayana tsábá imotátšëmbo ndayá aíñe o ndoñe inétsamna jamama, masque leyënga ndoñe tmonduábomnëse, ndayá yojtsamna jamama chauýyanama. <sup>15</sup> Ntšamo tmojtsiyencá chënga jtsinñanyñayana, ndayá leyíñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabncá ndayá cachënga tmojamama, jtsinñanyñayana chënga ntšamo chë leyíñe yomandánama cachcá imojuabnama. Inyë ora, chëngbe juabnënga echantsëtsëtsnaye aíñe o ndoñe tsábá tmonjama ca; y ndayté, Bëngbe Bëtsá nyëtscangbiamá ntšamo tmojamama yochjayana ora, cachëngbe ainaniñe tmojuabó soyëngaca, cha echanjinñanyïe ndayá tsábá o ndoñe tsábá tmonjamama. <sup>16</sup> Chë te, Bëngbe Bëtsá nyëtscangbiamá echanjayana chëngbe juabnëngama y ntšamo tmojamama, ndayá entšanga tempo ndoñe tmonjáninýama; cha chca echanjama Jesucrístoftaca; y chë atšë sëndabuayinýa tsábe noticiënga entsichamo ndegombre chca yochtsemnama.

### *Judiënga y Moisesbe ley*

<sup>17</sup> Y mora tsëngaftangbiamá, chë judiënga šmomna ca ichámënga, y tša šmojtsejuabná Moisesbe léyeca tsëngaftanga tsábe vida jtsebonnama, y jtsenábobotamnyana Bëngbe Bëtsabe ubuáýana entšanga šmomna ca; <sup>18</sup> tsëngaftanga chë ntšamo Bëngbe Bëtsá yoboscá tsëngaftanga chašmotsamama tatšëmbënga, y chë leyentšana šmojuatsjinñe jobocacayana ndayá más tsábá jamama tojtsemncá. <sup>19</sup> Tsëngaftanga tša jësejuabnayana, šmobena inýënga chë ntšamo tsëngaftanga cmësertancá ndosertánënga jubabuáchama ca, mo jtanënga unachayënga cuaftsemnëngcá, o mo chë ndoñe binýñiñcá oyenëngbe juabnënga binýñayëngcá; <sup>20</sup> tsëngaftanga jtsejuabnayana chë ntšamo tsábá yomncá ndosertánëngbiamá abuayiyayënga šmomna ca, y mo chë basengcá tondaye nduatsjinñenëngbiamá abuátambayënga ca. Tsëngaftanga tša jësejuabnayana chë ley šmobomnama, lempe šmotátšëmbo ca y ntšamo šmojtsichamcá ndegombre yojtsamna ca. <sup>21</sup> Y chcasna, tsëngaftanga chë inýënga abuátambayënga, ¿ndáyeca ndoñe cach tsëngaftanga šmondëtsánatsana? Tsëngaftanga inýëngbioye jtsabuayiyayana ndoñe chamondëtsatbëbanama; as, ¿ndáyeca cach tsëngaftanga šmnëtsatbëbana? <sup>22</sup> Tsëngaftanga jtsichámuana, acbe shema o boyábioye ndoñe inýaftaca cattseingñaye ca; as, ¿ndáyeca tsëngaftanga cachcá šmnëtsama? Tsëngaftanga jtsáboyënjana

soyënga chë ndayama inýenga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórana yebnënguentsana uámana soyënga šmnétsatbëbana? <sup>23</sup> Tsëngaftanga tša jtsenábotamnayana chë ley šmobomnana; as, ¿ndáyeca šmonýbëtsama inýenga Bëngbe Bëtsabiana podësca chamotsóyebuambnana, tsëngaftanga chë leyentša mandënga jobedësama ndocna te ntsebošana causa? <sup>24</sup> Chama, Bëngbe Bëtsabe uabemana palabrënguifne mëntšá endayana: “Tsëngaftanga judiëngbe causa, ndoñe judiëngbeñe Bëngbe Bëtsabiana ndoñe tsábá quematoyeuambná ca.”

<sup>25</sup> Tsëngaftanga ntšamo leyifne yomandancá šmojtsamëse, Bëngbe Bëtsábenga šmomnana jinýanýiyama, chë más delicadentše base bobachtema tëtšenënga jtsemnana tsábá nántsemna; pero ntšamo chiñe tomandancá ndoñe šmontsamëse, chca tëtšenënga jtsemnana, tondayama ntososervëna, y chca, tsëngaftanga jtsemnana mo chë más delicadentše base bobachtema ndëtëtšenëngcá. <sup>26</sup> Y chë ndoñe judiënga chë más delicadentše base bobachtema tëtšenënga, judiëngcá ndoñe quemátsmëna; pero chënga ntšamo leyifne yomandancá tmojtsamëse, ndegombre Bëngbe Bëtsá chënga echanjúbuaja mo cachabe entšangcá. <sup>27</sup> Y chca, tsëngaftanga judiëngbiama Bëngbe Bëtsá echanjayana ndoñe tsábá šmonjama ca, ntšamo leyifne yomandancá ndoñe šmontsama causa. Cha chca echanjama, er bëtscá ndoñe judiënga mondmëna y chënga ntšamo leyifne yomandancá mondocumplina, pero chënga ndoñe quemátsmëna tsëngaftangcá tëtšenënga, jinýanýama Bëngbe Bëtsábenga šmomnana. Tsëngaftanga, masque Bëngbe Bëtsabe uabemana ley šmonduábomna y chë más delicadentše base bobachtema tëtšenënga šmondmëna, cabá ndoñe šmontsama ntšamo leyifne iuayancá, ndayá jamama cmojtsamnama.

<sup>28</sup> Chcasna, nda chë más delicadentše base bobachtema tmojatëtse ora, chábioye chë soye ndoñe ntjábemana canýe ndegombre judío. Y canýe entšá ndoñe Bëngbe Bëtsábia ntsemnana nýe inýenga chë más delicadentše base bobachtema tmojatëtšama. <sup>29</sup> Y canýe entšá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entšá yomnana tojtsinýanýnase. Y chca, canýe ndegombre judío, Bëngbe Bëtsabe entšá yomnana chaotsinýanamna ndoñe quenátsmëna chë más delicadentše base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínýama. Bëngbe Bëtsabe Espíritu jamana entšá chca ainana chaotsebonmna, ndayá inétsinýanýnaye cha canýe ndegombre judío yomnana; y chë uabemana ley ndoñe quenátobena chca jamana. Bëngbe Bëtsá endmëna chë tsabe soye entšabiana ichamuá; entšanga ndoñe.

### 3

<sup>1</sup> Chcase, ndánaca suatjatjaye, as ¿Bëngbe Bëtsabe entšá jtsemnana jëftsashjáchama, más tsábá yojtsemna canýe judío jtsemnana ca? ¿Base bobachtema chë más delicadentše tëtšená jtsemnana becá yojtsámama ca? <sup>2</sup> Aifne, chca jtsemnana corente enduámama y nýetsca soyënguifne; natsana chjayana, Bëngbe Bëtsá, judiënga chabe palabra tojanabanýe, nýetscangbiama chamotsinýenama. <sup>3</sup> Y morna, ¿ndayá yochjopása nderado judiënguëntše báseftanga ya ndoñe chca tmontsentšénëse? Y chë causa, ¿Bëngbe Bëtsánaca yochtsajbaná ntšamo tojašebuachenacá amana? <sup>4</sup> ¡Ndoñe, ndegombre ndoñe! Chca ndoñe cha queochatsma; tsëngaftanga šmondétatšëmbo Bëngbe Bëtsá sempre endbëtsama ndayá jamama tojašebuachenacá, masque nýetsca entšanga bosterënga chamotsomñe. Er Bëngbe Bëtsabe uabemana palabrënguifne Bëngbe Bëtsabiana mëntšá endayana:

Aca ntšamo chacojayana ora, nýetscanga mochanjinýe aca ntšamo ndegombre yomncá cnétsamama;

y chacojtsenëuyaná ora, sempre cochanjinýanýye acbe contra tmojtsoyeuambnángbioye, chënga ndoñe tsábá montsamama ca.

<sup>5</sup> Pero bënga ndoñe tsabe soye montsama ca báseftanga tmojayana ora, Bëngbe Bëtsá sempre tsábá inétsamama entšanga más tsábá jinýama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tsábá tonjama ca, bëngbiama castigo chaotsemna ca cha tojayana ora? (Morna atše sëntsoyeuambná ntšamo entšanga jóyeuambayama monduamancá.) <sup>6</sup> ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nýets tempo ntšamo ndegombre yomncá ndoñe tontsamëse, ndegombre cha ndoñe nanjobenaye jayanama nýetsca quem luarentša entšangbiama, ntšamo tmojamcá tsábá o ndoñe tsábá bëtsemnana.

<sup>7</sup> Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerta uamaná y bëtsá yomnana jinýanýiyama, y Bëngbe Bëtsá sempre ntšamo ndegombre yomncá tojtsamama jinýama entšanga tmojtsobenëse, ¿ndáyeca Bëngbe Bëtsá cabá iuichamo ntšamo atše tijamcá ndoñe tsábá yontsemna ca y atše canýe bacna soye amá stsemna ca?” <sup>8</sup> Y chcase, ndánaca mëntšá nanjátayana: “Ntšamo ndoñe tsábá yondmëncá mochjama, chca, entšanga chámuinýe Bëngbe Bëtsá puerta tsabia yomnana ca.” Ndegombre, atše mal jaquédama báseftanga



tmojayana atše chca stsabuatambá ca; Bèngbe Bètsá chca abuatambayënga echanjácastigaye, ntšamo castigánënga jtsemnana imomerecencá.

*Ntšamo entšá tojtsamama, Bèngbe Bètsabe bominiyíne ndocná tšabia ntsemnana*

<sup>9</sup> Y asna, ¿Bèngbe Bètsá bënga judiënga inyëngbiamá más tšabá šonya? ¡Ndoñe, ndegombre ndoñe! Atše ya sënjininyé judiënga y ndoñe judiëngnaca, chë bacna soyënga jamama juabnëngaca mandánënga imomnana. <sup>10</sup> Er Bèngbe Bètsabe uabemana palabrenguifne mentsá endayana:

Ntšamo entšá tojtsamama, ndocná Bèngbe Bètsabe bominiyíne tšabia quenátsmëna.

¡Ndoñe, ndegombre ndoñe, ni mo canya chca quenátsmëna!

<sup>11</sup> Ndocná quenátsmëna ntšamo ndegombre yomncá chabotsosertánama;

¡Ndocná quenátsmëna nda chaotseboše Bèngbe Bètsáftaca jtsemnana!

<sup>12</sup> Nyetscanga ndoñe tšabe benache tmojishache y chiñe montsajna.

Chënga nyetscanga Bèngbe Bètsabe bominiyíne tondayama quemátoserverna.

Ndocná quenátsmëna ntšamo tšabá yomncá chaotsamama, ¡ni canya ndoñe!

<sup>13</sup> Ntšamo tmojtsichamcá puerte bëtš bacna soye jtsemnana, mo canye obanabe cuevëshe atëfñëshe puerte bacá tojtsonguëtšecá.

Chënga tmojtsoyebuambná soyëngaca inyëngbiye jtsaíngñayana.

Chë tmojtsichamo soyëngaca puerte bacna soye inyëngbiamá jtsamana, mo canye mëtšcuaye tbojtseftëtše orcá, chë veneno canye entšábíoye jóbana.

<sup>14</sup> Chënga, nyets tempo inyëngbiamá podesca jtsichámuana, y sempre jtsyebuambnayana chë inyënga ntšámnaca jáborlama.

<sup>15</sup> Sempre jtseprontánana inyëngbiye ntšámnaca jáborlama y jobáyama.

<sup>16</sup> Chënga siempre jtsiyenana inyënga chamotsesufrínama jtsamëse, y nye ntšámnaca jtsaborlánana.

<sup>17</sup> Chënga ndocna te tondaye ntjamana nyetscanga natjëmbana chamotsiyenama;

<sup>18</sup> Chënga ndoñe ntšiyenana Bèngbe Bètsabiamá jtsejuabnayëse, cha chë más bëtšá nyetscangbiamá yomnana ca—chiñe endayana.

<sup>19</sup> Er bënga mondétatšëmbo, lempe ntšamo leyíne iuabemancá, chë leyëngaca mandánënga imoyenëngbiamá yomnana. Chcasna, chë ley endmëna, Bèngbe Bètsabe delante ndocná chaondobená jayanama, cha ndoñe tšabá tonjama, chama ndoñe yonjátatšëmbo causa ca; y endmëna jinýanýiyama, ntšamo tmojamcá tšabá o ndoñe tšabá bëtsemnana Bèngbe Bètsá nyetscangbiamá yochjayana ora, nyetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca. <sup>20</sup> Er, Bèngbe Bètsá ndoñe queochatsma ndocná chabe bominiyíne tšabia chaotsemna, ntšamo leyíne yomandancá cha tojamama; chë ley bëngbiamá jamana, nye bënga bacna soye tmojamama chamotsetatšëmbuama.

*Ntšamo Bèngbe Bètsá inama entšanga chabe bominiyíne tšábenga chamotsemnana*

<sup>21</sup> Pero mora, Bèngbe Bètsá tonjinýanyé ntšamo cha inama entšanga tšábenga chabe bominiyíne chamotsemnana; y Bèngbe Bètsá ndoñe ntjamana canya chabe bominiyíne tšabia chaotsemnana, ntšamo ibomncá cha tojtsamama, ntšamo chë leyënguifne y mandënguifne yomncá. Pero masque mora chca, Bèngbe Bètsá tonjinýanyé, Moisesbe leyíne y Bèngbe Bètsabe juabna oyebuambnayëngbe librëšangañe yopodena jinýenana chca yochtsemnana.

<sup>22</sup> Bèngbe Bètsá jamana entšanga chabe bominiyíne tšábenga chamotsemnana, chënga Jesucristbeñe tmojtsosbuáchemá. Bèngbe Bètsá nyetscanga Cristbeñe ošbuáchiyëngbiamá chca jamana, y chabiamá nyetscanga cachcá monduámana; <sup>23</sup> er nyetscanga bacna soye tmojama, y chë causa, ndocna entšá tonjobená jashjáchana ndocna bacna soye ndbomná jtsemnana y puerte bëtšá jtsemnana, ntšamo Bèngbe Bètsá tojanjuabocá entšanga chamotsemnana. <sup>24</sup> Pero Bèngbe Bètsá chëngbiamá corente tšabe juabna bómnyayca, mo ndáyá cuafjatšatacá, cha jamana chënga chabe bominiyíne tšábenga chamotsemnana. Bèngbe Bètsá chca tojanma, Cristo Jesúsbeñe, entšanga atsebácanënga chamotsemnana y ya ndoñe más bacna soyënga jamama juabnëngaca mandánënga chamondëtsemnana cha tojanma ora. <sup>25</sup> Bèngbe Bètsá cha tjojanábuayana, chabe buiñe juabuáshanëse y jóbaneñe, cha chaotsemna ndábeyeca Bèngbe Bètsá entšanga bacna soyëngama jáperdonama; Jesucristbeñe jtsosbuáchiyëse entšanga jobenayana perdonánënga jtsemnana. Bèngbe Bètsá chca tojanma, jinýanýiyama cha inétsama entšanga tšábenga chabe bominiyíne chamotsemnana, chë endónga bacna soyënga tmojanmama chë tempo ntjatonýaycá, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye. <sup>26</sup> Cha lempe chca tojanma, jinýanýiyama cha siempre ntšamo ndegombre yomncá inétsamama, y nyetscanga Jesucristbeñe ošbuáchiyënga chabe bominiyíne tšábenga chamotsemnana inétsamama.

<sup>27</sup> Hcáyeca, entsá ndoñe ntsobenana tondayama ntsenábotamnayana. Chca endmëna, er Bëngbe Bëtsá tsabia chabe bominiñi tsošoşbuáchema. <sup>28</sup> Y chca jayanëse, mora bënga tsábá montsetátşembo, Bëngbe Bëtsá inétsama canye entsá tsabia chabe bominiñi chaotsemnana, nye Jesucristbeñe tojtsosbuáchema, y ndoñe ntşamo leyine yomandancá cha tojtsamama.

<sup>29</sup> ¿O Bëngbe Bëtsá nye judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna; <sup>30</sup> er nye canye Bëtsá nyetşangbiamma endmëna, y cha echanjama chë más delicadentşe base bobachtema tétşenënga imomnëngbiamma y ndoñe chcangbiámna, chabe bominiñi tsábenga chamotsemnana, Jesucristbeñe tmojtsoşbuáchema. <sup>31</sup> Hcasna, Bëngbe Bëtsá jamana entsanga chabe bominiñi tsábenga chamotsemnana, Jesucristbeñe tmojtsoşbuáchema; ¿chca yojtsayana chë ley nye tondayama yondoservena ca? ¿Ndoñe, ndegombre ndoñe! Inyetşá, chca jamana chë ley más chaotsámanama.

## 4

### *Ntşamo Abraháñoftaca tojanopasá*

<sup>1</sup> Morna Abrahamiamma mochjóyebuambaye, bëngbe tempsca bëtş taitá, y mochjinýe ndayá tojánatsjinýe Bëngbe Bëtsábeñe oşbuáchiyana bomnentsana. <sup>2</sup> Abraham chabe bominiñi tsabia chaotsemnana, ndayá cha tojanmama Bëngbe Bëtsá matëñjanmëse, cha matëñjanobená entsángbeñe ndayama jtşenábotamnayana, pero Bëngbe Bëtsabe delante ndoñe; <sup>3</sup> er Bëngbe Bëtsabe uabemana palabrënguiñe mëntşá endayana: “Abraham, Bëngbe Bëtsábeñe yojtsosbuáchiye, y chíyeca Bëngbe Bëtsá tonjánayana cha chabe bominiñi tsabia yojamna ca.”

<sup>4</sup> Canye entsá trabajayá, crocénana josháchiñana ndayá tojamama, pero chë crocénana ndoñe nye tşetánana ntsemnana, sinó chana jtsemnana ntşamo cha tojtsomerecencá. <sup>5</sup> Er menójuabonga, nda tondaye tontsama Bëngbe Bëtsá cháuyanama cha chabe bominiñi tsabia yomna ca, pero aíñe tojtsosbuaché Bëngbe Bëtsábeñe, nda endbáyana chë bacna soye tojamënga mora mo ndoñe chca cuafjamcá chamotsemna ca, chabiamma Bëngbe Bëtsá echanjama chabe bominiñi tsabia chaotsemnana, chabe oşbuáchiyama. <sup>6</sup> Rey David cachcá chabe librëşañe tojánayana, chë ndabiamma Bëngbe Bëtsá jayanana chabe bominiñi tsabia chaotsemna ca, masque chabiamma chca cháuyanama tondaye tonjamëse. David chca entsabiamma tojánayana, cha puerte echantsoyejuaye ca. <sup>7</sup> Chabe librëşañe mëntşá tojanábema:

¡Tşa oyejuayënga jtsemnana chë Bëngbe Bëtsá chëngbe bacna soyënga tojáperdonanga, chë Bëngbe Bëtsá chëngbe bacna soyënga tojabuajuánanga!

<sup>8</sup> ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonýá cha ca!

<sup>9</sup> ¿David tojánayana nye chë más delicadentşe base bobachtema tétşenënga imomnëngbiamma oyejuayana yomna ca? Ndoñe; ndoñe chca mondmëñëngbiámna. Y muentşe tmonjayana, Abraham Bëngbe Bëtsábeñe yojtsosbuachéyeca, Bëngbe Bëtsá tojánayana cha chabe bominiñi tsabia yojamna ca. <sup>10</sup> Y ¿ntşeco chca tojanopasá? ¿Abraham ya chë más delicadentşe base bobachtema tétşená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tétşená yontsemna ora. <sup>11</sup> Y cabá chentşana, Abraham base bobachtema chë más delicadentşe tétşená yojtsemna; y chca yojamna jinýañiyama, Bëngbe Bëtsá tempo ya chabiamma tojánayana cha chabe bominiñi tsabia yojamna ca, cha Bëngbe Bëtsábeñe yojtsosbuáchema. Lempe chca tojanopasá, jinýañiyama Abraham mo taitacá yomnama Bëngbe Bëtsábeñe imoşbuachëngbiamma, masque ndoñe base bobachtema chë más delicadentşe tétşenënga mondmëna. Y cachcá Bëngbe Bëtsá chë oşbuáchiyëngbiamma tojánayana, chënga chabe bominiñi tsábenga imomna ca. <sup>12</sup> Y Abrahámnaca endmëna mo chë taitacá, chë más delicadentşe base bobachtema tétşenënga imomnëngbiamma, pero aíñe Bëngbe Bëtsábeñe corente jtsoşbuáchiyëse imoyenëngbiamma, cachcá ntşamo bëngbe bëtş taitá Abraham Bëngbe Bëtsábeñe yojtsosbuachecá. Y cha cabá chë más delicadentşe base bobachtema ntşetétşena ora, ya chca yojtsosbuáchiye.

### *Jtsoşbuáchiyëse, ntşamo Bëngbe Bëtsá tojaşebuachenacá jóşhjangwana*

<sup>13</sup> Bëngbe Bëtsá tojanaşebuachená Abrahamiamma y chábenşana entsangbiamma, quem luare chëngbiamma yochjëftsemna ca. Y chca tojanaşebuachená, ndoñe Abraham ntşamo leyine yomandancá betsobedecénama, sinó cha Bëngbe Bëtsábeñe yojtsanosbuáchema, y chíyeca Bëngbe Bëtsá tojánayana cha chabe bominiñi tsabia yojamna ca. <sup>14</sup> Pero,

ntšamo Běngbe Bětsá tojanašebuachenacá, běnga ntšamo chě leyíñe yomandancá tmojtsaměngbiama yojtsemna ca tmojayaněse, Běngbe Bětsábeñe jtsošbuáchiyana tondayama nantsošerverna, y ntšamo Běngbe Bětsá tojanašebuachenacá tondaye ntšámanana. <sup>15</sup> Chě ley juabocnana, Běngbe Bětsá puerte etonaná entsanga cháucastigama, chěnga ntšamo chíñe luayancá ndoñe tmontsamama; pero ndocna manděnga tontsemněse, ndocná ntšobenana chě ndoñe tontsayancá ndoñe ntjamana.

<sup>16</sup> Y chca, Běngbe Bětsá Abrahámbyoe tbojanšbuachená, cha yojtsanošbuachěyeca, ntšamo Běngbe Bětsá tojanašebuachenacá, ndegombre chaotsemnana chě Běngbe Bětsábeñe imošbuáchemama mo Abrahámbytšana entsāngcá imomněngbiama; y Běngbe Bětsá chca tojanašebuachená, cha chěngbe tšabiamama iuantjěsnayeca. Chě mo Abrahámbytšana entsāngcá imomněngbeñe, ndoñe quemnatšmēna nŷe chě ntšamo ley yomandacá imnētšaměnga, sinó nŷetscanga chě ntšamo Abraham tojanosbuachecá Běngbe Bětsábeñe imošbuachěngnaca. Y Abraham nŷetscanga bēngbiama, Běngbe Bětsábeñe ošbuáchiyěnga, mo taitacá endmēna. <sup>17</sup> Ntšamo Běngbe Bětsábe uabemana palabrěnguñe endayancá, Běngbe Bětsá Abrahámbyoe ibojtsatsětsnaye ora: “Atše sěnjama aca ba luariñe entsāngbiama atšbe bominiŷiñe taitá chacotsemnana ca.” Chě ntšamo tojanašebuachenacá ndegombre tšabe soye endmēna, er Běngbe Bětsá chca Abrahambiamama yojanjuabná; y Běngbe Bětsá endmēna ndábēñe Abraham yojtsanošbuaché, y nda inětsama entsanga chámuatayenama, y nda inamánda y entsanga jobenayana jinŷama ndayá ndocna te tmonjaninŷcá.

<sup>18</sup> Abraham Běngbe Bětsábeñe yojtsošbuáchiye y yojtsobátmana ntšamo tbojanšbuachenacá chaotsemnana, masque entsábe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entsāngbe taitá”, ntšamo Běngbe Bětsá tbojaninŷancá: “Acbytšana entsanga tša mallajta mochántsemna, ndocná queochatobenaye jacúntana ca”. <sup>19</sup> Abraham yojanobátmaněntscuana, cha puerte chábeñe yojtsanošbuaché, ntšamo tbojanšbuachenacá jóyěngcāñama, masque Abraham yojtsonŷaye ya bětsanănějema yojtsemnana, er ya mo patse uata yojtsebomna, y chabe shema, Sara, ndoñe yonjobena šesonga jtsabamnama. <sup>20</sup> Abraham ndocna te tonjanajbaná Běngbe Bětsábeñe ošbuáchiyana, y ni mo canŷe ndoñe yonjanjuaboje chě ntšamo Běngbe Bětsá tbojanšbuachenacá ndoñe joparějana ca; sinó más corente chábeñe yojtsanošbuaché, y chca Běngbe Bětsábyoe ibojtsatschuanaye, <sup>21</sup> er cha tšabá inatátšēmba, ntšamo tbojanšbuachenacá jamama, ndegombre Běngbe Bětsá obená inamnama. <sup>22</sup> Chíyeca, Běngbe Bětsá tojánayana cha chabe bominiŷiñe tšabia yojamna ca.

<sup>23</sup> Pero, chabe bominiŷiñe tšabia yojamna ca Běngbe Bětsá tojánayana ora, ndoñe nŷe Abrahambiamama chca ntšoyebuambnayana; <sup>24</sup> ndayá bēngbiámncana, ndēmuanŷyēngbiama Běngbe Bětsá yochjayana chabe bominiŷiñe tšábēnga imomna ca, bēnga Běngbe Bětsábeñe imošbuachěyeca; Běngbe Bětsá, nda tojanama Běngbe Utabná Jesús cháuatayenama. <sup>25</sup> Běngbe Bětsá tojanalesenciá entsanga Jesús chamóbama, bēnga bacna soyēnga tmojanama causa, y Běngbe Bětsá tojanama cha cháuatayenama. Běngbe Bětsá chca tojanama jobenayama, bēnga chabe bominiŷiñe tšábēnga jábiāmama.

## 5

### *Mora bēnga Běngbe Bětsábe bominiŷiñe tšábēnga montsemna*

<sup>1</sup> Er Běngbe Bětsá tojama bēnga chabe bominiŷiñe tšábēnga chamotsemnana, bēnga chábeñe imošbuachěyeca; mora tempcá tšabá Běngbe Bětsáftaca bēnga montsatsmēna, Běngbe Utabná Jesucrístbeyeca. <sup>2</sup> Bēnga Crístbeñe mondošbuáchemama, cha tojama bēnga chamotsetatšēmbuama Běngbe Bětsá tša tšabia yomnama, y Běngbe Bětsábiocana tšabe soyēnga jtsebomnēse mora chamotsiyenama. Bēnga tša oyejuayēnga jésemnana, er Běngbe Bětsábeñe jtsošbuáchiyěse mondobátmana cha puerte uámanēnga y bětsětsanga šochjábiāmama, batšá ntšamo cachá yomncá. <sup>3</sup> Y ndoñe nŷe chama bēnga oyejuayēnga jésemnana, ndayá bēnga tmojtsesufrina y padecena soyēnguñe tmojtsajna órnaca. Chca mondbama, er bēnga mondětatšēmba bēnga tmojtsesufrina orna, bēnga juatsjinŷyana ntšamo uantadēnga jtsemnana padecena soyēnguñe tmojtsemna ora, Běngbe Bětsábeñe jtsošbuáchiyěse. <sup>4</sup> Bēnga padecena soyēnguñe tmojtsemna ora, más tšabá uantadēnga jtsemnana mondobēnayeca, Běngbe Bětsá oyejuayá bēngaftaca jtsemnana, padecena soyēnguentšana ndegombre tšabá tmojachněngo ora. Běngbe Bětsá oyejuayá bēngaftaca chaotsemnana bēnga tmojama ora, bēnga jtsobenana más jtsobátmanana, ntšamo šojašebuachenacá cha yochjamama. <sup>5</sup> Bēnga chca tmojtsobátmaněse, ndocna te nŷe bonamente quemochatobátmana, er Běngbe Bětsá šojinŷanŷé tša bětscá cha šuababuánŷeshanama. Běngbe Bětsá chca tojama chě Uámana Espíritbeyeca, y cha endmēna nda Běngbe Bětsá tbojanichmó bēnga ainaniñe chaotsemnana jtsemándayama.

<sup>6</sup> Tempo bënga tondaye chemuatanobená jamana Bëngbe Bëtsabe bominiyiñe tsábenga jtsemnama, y chora Cristo tojanóbana bënga chë bacna soyënga tmojamëngbe tsabiama, nña chama tempo yojamna ora. <sup>7</sup> Ndoñe paselo quenátsmëna jajuaboyana, ndáyeca canña nantseprontana jóbanama canña ntšamo chë leyiñe yomandancá jamama tojtsamanabiama; pero, canña bëtsá tsababuánñeshanëse tsabe soyënga inñengbiama tojtsamabiama, nderádose chabiama jóbanama cuantseprontana. <sup>8</sup> Pero Bëngbe Bëtsá bënga sojanñanyé tša šuababuánñeshanama, er bënga cabá bacna soyënga ntsamcá imojoyena ora, Cristo bëngbiama tojanóbana.

<sup>9</sup> Cristo, chabe buiñe juabuáshanëse bëngbiama tojanóbanyeca, Bëngbe Bëtsá tojanma bënga chabe bominiyiñe tsábenga jtsemnama. Y chca endmënyeca, ndegombre Cristo šochanjátsebacaye, entšanga ndoñe tsábá tmonjama ca y castigo chëngbiama chaotsemna ca Bëngbe Bëtsá chaojayana ora. <sup>10</sup> Bënga tempo Bëngbe Bëtsá imojanña; pero cha tojanma bënga cháftaca tempcá tsábá chamotsatsmënama, chabe Uaquiñá tojanóbanyeca. Y mora, bënga natjëmbana cháftaca chamotsemnama ya tojama ora, ndegombre atsebácanënga mochántsemna, chabe Uaquiñá ainá yómnyeca. <sup>11</sup> Y ndoñe nñe chca, ndayá bënga cháftaca puerte oyejuayënga chamotsemnámna Bëngbe Bëtsá jamana, ndayá Bëngbe Utabná Jesucristo bëngbiama tojánmayeca. Y mora, chábeyeca Bëngbe Bëtsá tojama bënga cháftaca tempcá tsábá chamotsatsmënama.

### *Adán y Cristo*

<sup>12</sup> Canñe entšá bacna soye tojanma causa, nyetsca entšanga bacna soyënga amënga tmojábocana; y cha tojanóbana, bacna soyënga tojanma causa. Y chca, nyetsca entšanga entsamna jóbanama, er nyetscanga bacna soyënga tmojama. <sup>13</sup> Bëngbe Bëtsá Moisésbiye chë leyënga cabá nduántšaboshjona ora, entšanga quem luarentšë bacna soyënga tmojanma. Pero ndocna ley totsemna ora, Bëngbe Bëtsá ndoñe ntjanñayana entšanga bacna soyënga tmojanma. <sup>14</sup> Nyetsca entšanga, Adánbentšana Moisésbentscoñe, nyetscanga yojánamna jóbanama, ntšamo cach Adán tojanmcá ndoñe tmonjanmëngnaca, ntšamo cha ndoñe chaondëmama Bëngbe Bëtsá tbojanmandacá cha tojanma ora. Y Adánbeñe entšanga mondobena jinñama, ntšamo chë jabama ibojamná canñe soyënguñe yochtsanmëna.

<sup>15</sup> Pero ntšamo chë útata tojanmcá ndoñe cachca soye quenátsmëna; er Bëngbe Bëtsá entšangbe tsabiama jtsejuabnayëse tsabe soyënga chëngbiama tojanma ora, ndoñe yonjanma mo ntšamo Bëngbe Bëtsá tbojanmandacá ndoñe chaondëmama Adán tojanma orcá. Tsëngaftanga šmondëtatšëmbo, nñe canñe entšá canñe bacna soye tojanma causa, cha tojanma nyetsca entšanga jóbanama chaotsamnana, pero Bëngbe Bëtsá entšangbe tsabiama yojuabnáyeca, más bëts soyënga jamana, chë Adanbe bacna soye entšangbiama bacna soyënga tojanmama. Chca, Bëngbe Bëtsá tojanma ba entšanga bëtsá tsabe soyënga chamotsebmoma; y chca tojama, nñe canñe entšá, Jesucristo, tsabe soyënga tojánmayeca. <sup>16</sup> Chë ba entšanga bëtsá tsabe soyënga chamotsebmoma Bëngbe Bëtsá tojamentšana endóbocana soye, puerte inñetšá comna, chë entšá Adán, canñe bacna soye tojanmentšana tojanóbocna soyama. Adán bacna soye tojanmentšana, Bëngbe Bëtsá tojánayana chana bacna soye tojanma y castigo jtsebmoma ibojtsemna ca, y nyetsca entšángnaca chë causa; pero masque nyetscanga bacna soyënga tmojama, Bëngbe Bëtsá entšangbe tsabiama ndoñe bëndëtsebnatjëmbayeyeca, tojanma entšanga chabe bominiyiñe tsábenga chamotsemnama y chë bacna soyëngama castigánënga ndoñe chamondëtsemnama. <sup>17</sup> Ndegombre endmëna, canñe entšá bacna soye tojanma causa, nyetsca entšanga jóbanama yojtsamna. Pero puerte más, canñe entšá Jesucristo tojanma. Ndëmuanyëngbiama Bëngbe Bëtsá tojama bëtsá tsabe soyënga chamotsebmoma, ndëmuanyëngbiama Bëngbe Bëtsá tojama chabe bominiyiñe tsábenga chamotsemnama, y Bëngbe Bëtsábiocana chca tmojóyëngacñënga, chënga nyetscanga mochantsiyena bacna soyënga jtseyënjanayëse y nyetsca tescama mo bëtsëtsangcá; y chca echántsemna ndayá Cristo tojánmayeca.

<sup>18</sup> Y chca, ntšamo canñe entšá, Adán, canñe bacna soye tojanmama, Bëngbe Bëtsá tojánayana nyetscanga bacna soye tmojanma y castigánënga chamotsemna ca; cachcá ntšamo canñe entšá, Cristo, puerte tsabe soye tojánmayeca, Bëngbe Bëtsá jayanana nyetscanga imojtsobena chabe bominiyiñe tsábenga jtsemnama y chë nyetsca tescama yomna tsabe vida jtsebmoma ca. <sup>19</sup> Y ntšamo Bëngbe Bëtsá tbojanmandacá ndoñe chaondëmama canñe entšá tojanma causa, nyetsca entšanga bacna soye amënga tmojanobiama; cachcá, ntšamo Bëngbe Bëtsá tbojanmandacá canñe entšá, Jesucristo, tojánmayeca, Bëngbe Bëtsá tojanma bëtsá entšanga chabe bominiyiñe tsábenga chamotsemnama.

<sup>20</sup> Chë ley entšangbe cucuatšine tmojanáboshjona, jinñanyiyama ntšamo ndegombre yomna bacna soyënga jtsamana; pero entšanga más bacna soyënga imojtsama ora, Bëngbe

Bětsá cabá más chěngbe tšabiama yojtsanjuabnaye y más tšabe soyěnga chěngbiana yojtsama. <sup>21</sup> Chcasna, mora mochjayana, entsānga bacna soyěngaca puerthe mandānēnga imojamna, y chca, n̄yetscanga jóbana yojamna ca. Pero mora, ya ndoñe chca quenátsmēna, er Běngbe Bětsá tojama entsānga chabe bominiñi tšábēnga chamotsemnana, Běngbe Utabná Jesucristbeyeca chē n̄yetsca tescama yomna tšabe vida chamotsebomnana; chiyecca mora bēnga montsobena jtsiyenama, Běngbe Bětsá šojatšatá tšabe soyěnga lempe bēngaftaca jtsemnēse.

## 6

### *Cristbeyeca bēnga tšabe vida jtsebmōnana*

<sup>1</sup> Y asna, ¿ntšamo mochjayana? ¿šojtsamna jtsiyenana sempre bacna soyěnga jtsamēse, chca, Běngbe Bětsá šuababuñyeshanama más chašotsin̄yān̄yama, cha más bacna soyěnga bēnga jtsaperdōnayēse? <sup>2</sup> ¡Ndoñe, ndegombre ndoñe! Tempo bēnga monjaniiyena bacna soyěnga jamama juabnēngaca mandānēnga, pero mora bēnga montsobena jtsiyenana chē juabnēnga tondaye bēngbiōye ntsamcá, y chca, bēnga montsobena mo obanēngcá chē soyěngama jtsemnana; y as, ¿ndáyēca bēnga muatjātsjuabnaye ntšamo ndoñe tšabá tontsemncá jatiyenana? <sup>3</sup> Er ndegombre tšēngaftanga šmondētātšēmo, bēnga uabáinēnga tmojanoquedá ora, tmonjanin̄yāyē bēnga Cristo Jesúseftaca cānyīñe mo can̄yácá bētsemnana; y bēnga uabáinēnga tmojanoquedá ora, enjamna mo bēnga cuafjōbancá, ntšamo Cristo tojanobancá. <sup>4</sup> Bēnga uabáinēnga tmonjanoquedá ora, enjamna mo bēnga cuafjōbancá, y cháftaca uatabuantsanēngcá. Chca yojamna, bēnga chamotsobēnana mo tsēm entsāngcá jtsiyenama, ntšamo Cristoftaca tojanopasacá, cha cháuatayenama Běngbe Bětsá tojanma ora, chabe puerthe bēts obenánaca.

<sup>5</sup> Bēnga Cristoftaca cānyīñe mo can̄yácá jtsemnēse, cha tojanóbana ora mo bēngnaca cháftaca cuafjōbancá enjámnayeca, ndegombre bēnga cānyīñe mo can̄yácá cháftaca mochāntsemna, bēnga cachiñe vida n̄yetsca tescama chamotsatsbomnana Běngbe Bětsá jtsamēse, ntšamo Cristo cháuatayenama cha tojanmá. <sup>6</sup> Y bēnga mondētātšēmo, chē ntšamo bēngbe vida enjamná, bacna juabnēngaca mandānēnga, Jesucristbēñe cabá ntsošbuáchiye ora, mora ya ndoñe chca yontsemnana; y chca entsemna mo chē tempasca vida chaobanama cuafjamcá, Cristo tmojancrucificá ora. Chca yojamna, Běngbe Bětsá jobenayama chē bacna soyěnga jamama bēngbe juabnēnga jtsepochócama; y chca, ya ndoñe más chē bacna soyěngaca mandānēnga chamondētsemnana, mo n̄yets tempo n̄yē in̄yabiama oservenēngcá. <sup>7</sup> Er can̄yē entsá tojóba ora, chē bacna soyěnga chábíoye ya ndoñe más ntsemāndayana. <sup>8</sup> Er Cristo tojanóbana ora, mo bēngnaca cháftaca cuafjōbancá endmēnayeca, cháftaca jtsiyenámna bēnga montsošbuachē. <sup>9</sup> Bēnga mondētātšēmo Cristo cháuatayenama y ndocna te cha cachiñe jatóbana Běngbe Bětsá tojanmata; y ndocna obenana queochatsma cha cachiñe chauatóbana. <sup>10</sup> Cha tojanóbana, y chē bacna soye jamama juabnēnga ndocna te ntjobenayana chábíoye jamándana, y in̄yēnga ndoñe imontsobena ntšamo cha jabórlana; y ntšamo mora cha yoyencá, Běngbe Bětsá jtsešervénama yomna. <sup>11</sup> Cachcá, tšēngaftanga cmontsamna jtsejuabnayana, chē ya ndoñe más bacna soyěngaca mandānēnga šmojtsemnana, pero vida šmobomna lempe jtsamēse Běngbe Bětsá tšēngaftangaftaca oyejuayá chaotsemnana, Cristo Jesúseftaca cānyīñe mo can̄yácá jtsemnēse.

<sup>12</sup> Tšēngaftanga cmontsamna, chē bacna soyěnga jamama ainanentše šmobomna juabnēngaca ndoñe más mandānēnga ntsemnana, chca, tšēngaftanga ndoñe chašmondētšamama juabnēngaca n̄yē cach tšēngaftanga, tšēngaftangbe cuerpiñe tšabá jtsomiñana. <sup>13</sup> Tšēngaftanga ndoñe quecmátamna jalesénciana ndaye tšēngaftangbe cuerptšá soye, bacna soyěnga jamama chaoservema. Chamna, tšēngaftanga cmontsamna Běngbe Bětsá jauyanana, lempe ntšamo tšēngaftanga šmomncá, cha jaserviama chaotsemna ca, tšēngaftanga chē šmomna mo ya ndoñe más obanēngcá Běngbe Bětsabiama, y tojanma tšabe vida chašmotsebmōnana; y jauyanana n̄yetsca tšēngaftangbe cuerptšá soyēngna Běngbe Bětsá jaserviama yojtsema ca. <sup>14</sup> Ndoñe quecmátamna bacna soyěngaca mandānēnga jtsemnana, er tšēngaftanga ndoñe quešmátiyena leyīñe iuayana soyěngaca mandānēnga, y šmondoyena Běngbe Bětsá tšēngaftangbiama tšabá jtsejuabnayēse.

### *Osbuachiyá obligaciōnaca jtsemnana ntšamo tšabá yomncá jamama*

<sup>15</sup> Y asna, ¿bēnga imojtsobena bacna soyěnga jamana, chē leyīñe iuayana soyěngaca ndēmandānēnga imomnana, y Běngbe Bětsá bēngbiana tšabá jtsejuabnayēse bēnga imoyenama? ¡Ndoñe, ndegombre ndoñe! <sup>16</sup> Tšēngaftanga tšabá šmondētātšēmo, in̄yabe cucuatšīñe mo n̄yets tempo n̄yē in̄yabiama oservenēngcá šmojoquedá ora, cha jtsobedecēnana, ndegombre tšēngaftanga chē nduiñbiama n̄yets tempo oservēnēnga jtsemnana. Chcasna, cachcá jtsemnana, chē tšēngaftanga šmojabocacá bacna soyěngaca

mandánënga jtsemnana, y chca jtsemnana mo Bëngbe Bëtsabe bominiñi tšëngaftanga nyetsca tescama obanënga cuafsemncá, o Bëngbe Bëtsá jtsobedecénana, y chca, chabe bominiñi tšábënga jabocanana. <sup>17</sup> Pero šontsamna Bëngbe Bëtsá jtsatschuanayana, er tempo tšëngaftanga mo nye inýabiama oservenëngcá šmojamna, bacna soyënga jamama juabnëngaca mandánënga; pero mora nyets ainánaca šmojoyeuná, ntšamo chë tcmo- janabuatambá soyënguifë šmojoyëngacñëcá. <sup>18</sup> Bëngbe Bëtsá tšëngaftanga cmojatsebácá, bacna soyëngaca ndëmandánënga chašmotsemnana, y morna mo Bëngbe Bëtsabiama oservenëngcá šmojabocna, ntšamo tšabá yomncá jtsamama. <sup>19</sup> Muentšë sënjoyebuambá ntšamo entsanga mondbetsichamcá, er tšëngaftanga ndoñe corente juabna quešmátsbomna toto palabrenga chacmósertama. Tempo, tšëngaftanga šmonjanamana jalesénciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabnëngaca, y nye ndaye bacna soyënga jamama juabnëngaca. Cachcá, mora tšëngaftanga cmontsamna jalesénciana tšëngaftanga chašmotsemnana juabnëngaca mandánënga tšabe soyënga jtsamama, chca, ndegombre Bëngbe Bëtsabe entsanga chašmotsemnana.

<sup>20</sup> Tšëngaftanga, cabá bacna soyënga jamama juabnëngaca mandánënga šmonjamna ora, tšëngaftanga ndoñe obligacionaca quešmënjatsmëna ntšamo Bëngbe Bëtsabiama tšabá yomncá játamama. <sup>21</sup> ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtsëuatja. Chca soyënga tcojamentsšana jóbocnana, entsá nyetsca tescama castiganá chaotsemnana, mo Bëngbe Bëtsabe bominiñi nyetsca tescama obaná cuafsemncá. <sup>22</sup> Pero mora, ndoñe quešmátsmëna bacna soyënga jamama juabnëngaca mandánënga, y mora bëtscá šmojtsentsëna Bëngbe Bëtsá jtseyeunana y jtseyevëna. Chca jtsamana, tšëngaftangbiana puerte tšabá entsemna, er chca, Bëngbe Bëtsabe entsanga šmochántsemna, y cabana, chë nyetsca tescama yomna tšabe vida šmochántsebmna. <sup>23</sup> Bacna soyënga tcojtsamentsšana jóbocnana entsá nyetsca tescama castiganá chaotsemnana, mo Bëngbe Bëtsabe bominiñi nyetsca tescama obanënga cuafsemncá; pero, Bëngbe Bëtsá šojtsatsatná soyënguentsšana, jóbocnana chë nyetsca tescama yomna tšabe vida jtsebmnnana, Cristo Jesús Bëngbe Utabnáftaca cánýiñe mo canýacá jtsemnëse.

## 7

### *Chë bouamnátbentsana ndayá bëngbiana mochjuatsjinýe*

<sup>1</sup> Jesucristbeyeca catšátanga, tšëngaftanga šmotátšëmbo ntšamo chë leyënga entsangbiana inëtsemnana; tšëngaftanga šmotátšëmbo, ntšamo chë leyiñe tojtsayancá canýe entsá chaot-samamna, nye chë entsá tojtsainëntscuana chábioye jtsemándayana. <sup>2</sup> Chcasna, canýe bouamna shembása, ntšamo chë leyiñe endayancá bontsemna chabe boyáftaca jëtsemnana, chë boyá tuainëntscuana; pero chë boyá tojtsóbanëna, chë leyiñe endayana, chë shemna canýa jtoquédana, chë boyabiama ndëmandaná ca. <sup>3</sup> Y chca, chë shema inýe boyabásaftaca chabe boyábioye tbojaingñë, chë boyá cabá vida totsóbomñe ora, chë shemna jtsabáinana chabe boyábioye inýaftaca ingñayá ca. Pero chabe boyá tojtsóbanëse, chë leyiñe endayana chë shemna canýa jtoquédana, chë boyabiama ndëmandaná ca, y cha jtsobenana inýaftaca jtobouamayana; y chca tojama ora, boyábioye inýaftaca ingñayana ndoñe ntsemnana.

<sup>4</sup> Tšëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátsmëna, er Cristo tojanóbana ora šmojánbocna, mo chë soyëngama obanënga cuafjoquedangcá, inýabe entsanga jtsemnana, Crístbënga, ndabiama Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jaserviama. <sup>5</sup> Bënga chë nye ntšamo cabënga imnabošcá monjaniyena ora, chë ley enjanoserverna bëngbe ainaniñe chamotsebmnnama bacna soyënga jamama puerte bëtš juabnënga, nye bënga tšabá jtsomñama. Ba bacna soyënga tmonjanma, y chë causa bënga šonjanamna nyetsca tescama castigánënga jtsemnana, mo Bëngbe Bëtsabe bominiñi nyetsca tescama obanënga cuafsemncá. <sup>6</sup> Pero mora Bëngbe Bëtsá šojatsebácá chë léyeca ndëmandánënga chamotsemnana; chë ley tempo enjamna bëngbiana mo canýe amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y aifñe tsmëcá chamotsiyenama, ntšamo chë Uámana Espiritu iuamcá bënga vida chamotsebmnnama.

*Bacna soye jamama juabna tcojtsebmnnëse, chë ley jamana entsá bacna soye chaomama*  
<sup>7</sup> Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atšë tšabá sëndëtatšëmbo ndayá yomna bacna soye jamana. Atšë ndocna te matijántatšëmbona ndayá yomna chë “inýabioye jtsántšabošana”, “inýabioye ndoñe catsantsaboše ca” chë leyiñe ndoñe matmënjanábemëse. <sup>8</sup> Pero bacna soyënga jamama juabnënga atšë bomna causa tonjanma, atšë puerte chaitsebošama chë ndoñe šonjamna jtsebošana soyënga; y chca chë juabnëngaca tonjanopasá, atšë chë leyënguifñe ndayá

iuayanama jtsejuabnayése. Er ndocna ley tondmëna ora, entšá ndoñe ntsetatšëmbuana ndayá yomna bacna soye jtsamana. <sup>9</sup> Canýe tempo enjamna, chora atše sënjanayena leyëngama ntsetatšëmbcá, pero ntšamo leyíñe iuayancá sënjanabuátmana ora, ndayá jamama ndoñe yonjamnama, atše sënjanontšé chë bacna soyënga jamama juabnëngaca mandaná jtsemnama; <sup>10</sup> y chora atše sënjántatšëmbona, chë causa šojtsanmëna nyetsca tescama castiganá jtsemnama, mo Bëngbe Bëtsabe bominiýiñe nyetsca tescama obaná cuaftsemncá. Bëngbe Bëtsá chë mando tojanma, atše chë nyetsca tescama yomna tšabe vida jtsebmomnama chayobenama, chë ley jtseyeunanése; pero ndoñe chiyatanobedecé causa, chë mando tonjanma atše chašotsemna nyetsca tescama castiganá jtsemnama. <sup>11</sup> Chë leyentša mandíñe inýe soyënga ndoñe šonjëtsemna jamama ca yojtsayánayeca, chë bacna soyënga jamama juabnënga átšbeñe, šmonjaningñe bacna soyënga jamama; y chë mando bëtsemnama, chë bacna soyënga jamama juabnënga tmonjanma atše chašotsemna nyetsca tescama castiganá jtsemnama, mo Bëngbe Bëtsabe bominiýiñe nyetsca tescama obaná cuaftsemncá.

<sup>12</sup> Pero bënga mëntšá mochjayana: chë leyna tšabe soye endmëna, er Bëngbe Bëtsábiocana tojanóbocna, y chë mandëngnaca Bëngbe Bëtsábiocana tojanóbocna ca; chiñe endayana ndayá tšabá yomna jamana y chca tšabá jtsemnana. <sup>13</sup> Y asna, ¿quem tšabe soye tojanma atše chašotsemna nyetsca tescama castiganá jtsemnama, mo Bëngbe Bëtsabe bominiýiñe nyetsca tescama obaná cuaftsemncá? ¡Ndoñe, ndegombre ndoñe! Chë bacna soyënga jamama juabnënga atše bomna causa, chca átšeftaca tonjanopasá. Chë tšabá yomna sóyeca, chë bacna soyënga jamama juabnënga tmonjanma atše chašotsemna nyetsca tescama castiganá jtsemnama. Chca chë juabnëngaca tonjanopasá, entšanga jobenayama jtsetatšëmbuana ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nyetsca entšanga mondobena jinýana canýe bacna soye, mo canýe puerte bëtš bacna soyá.

<sup>14</sup> Bënga mondëtatšëmbo chë ley Bëngbe Bëtsabe ley yomnama, pero atšna nýe canýe entšá sëndmëna, canýa nýets tempo nýe bacna soyënga jamama juabnëngaca mandaná. <sup>15</sup> Ndegombre ndoñe quešnátšertana ntšamo sëntsamcá, er ndoñe ntsamana ndayá jamama stsebošcá, pero aifñe jtsamana ndayá jamama ndoñe šontsogustancá. <sup>16</sup> Pero chë atšbe ainaniñe stsejuabná ndoñe tšabá tontsemna soye stsamëse, ndayama leyíñe iuayana ndoñe candmëna ntsamana ca, chca atše jtsinýanayana chë ley ndegombre tšabe soye yomnama. <sup>17</sup> Chcasna, atše ya ndoñe ntsemnana chë chca tojtsamá, ndayá chë bacna soye jamama atšbe ainaniñe yomna juabnënga jtsamana atše chca jamama. <sup>18</sup> Atše sëndëtatšëmbo, atšbe ainaniñe tondaye yontsemna ntšamo tšabá yomncá atše jamama. Masque sëntseboše ntšamo tšabá yomncá jamama, ndoñe quetsátobena chca jamama. <sup>19</sup> Atše ndoñe quetsátama chë tšabe soye ndayá jamama sëndbošcá, pero aifñe sëntsama chë bacna soye ndayá jamama ndoñe sëndbošcá. <sup>20</sup> Chë ndayá ndoñe jamama sëntsebošcá stsamëse, chca jtsayanana, atše ya ndoñe stsemna chë chca yojtsamá, sinó chë bacna soye jamama atšbe ainaniñe yomna juabnënga chca yojtsama.

<sup>21</sup> Chca, atše tijátatšëmbona ndayá átšeftaca yojtsopasánana; masque, ntšamo tšabá yomncá jamama stseboše, bacna juabnënga sempre jtsemándayana atše bacna soye chaimama. <sup>22</sup> Atšbe ainanoca puerte sëntsoyejuá, Bëngbe Bëtsábiocana yóbocana mandëngama. <sup>23</sup> Pero atše sënjinýena inýe soye átšeftaca yojtsopasánama; chë bacna soye jamama atšbe ainaniñe yomna juabnënga yojtsama atše ndoñe ntjamama ntšamo atšbe juabnoca yomna mo ndegombre soyá, mo chë bacna soyëngaca mandaná cuaftsemncá.

<sup>24</sup> ¡Tša lastema atšbiama! Chë bacna soye jamama juabnënga átšbeñe entsemándá, y entsama atše chašotsemna nyetsca tescama castiganá jtsemnama, mo Bëngbe Bëtsabe bominiýiñe nyetsca tescama obaná cuaftsemncá. ¿Nda nanjobenaye chentšana atše jatsbocama? <sup>25</sup> Nýe Bëngbe Bëtsá endmëna nda yobena atše jatsbocama, Bëngbe Utabná Jesucristbeyeca. Chábiye chama mochtsatschuanaye. Atšbe ainanoca atše aifñe sëntsejuabná chë ley puerte tšabe soye yomna ca, y jobedésama sëntseboše; pero chë bacna soye jamama átšbeñe yomna juabnëngaca, atše bacna soyënga sëntsama, ntšamo chë juabnënga šontsemmandacá.

## 8

### *Ntšamo Bëngbe Bëtsabe Espíritu yomandacá jtsiyenana*

<sup>1</sup> Y chca, Bëngbe Bëtsá ndoñe ntjayanana, Cristo Jesúseftaca cánýiñe mo canýacá imomnënga, chëngbe bacna soyëngama nyetsca tescama castiganënga jtsemnama yojtsamna ca. <sup>2</sup> Er, chë Uámana Espíritoftaca mandánënga mondménayeca, Bëngbe Bëtsá šojatsebácá, bënga chë bacna soye jamama juabnëngaca mandánënga ndëtsemnama, y nyetsca tescama castiganënga ndëtsemnama, mo Bëngbe Bëtsabe bominiýiñe nyetsca tescama obanënga cuaftsemncá. Chë Uámana Espíritu jamana bënga ndegombre tšabe vida chamotsebmomnama, cánýiñe mo canýacá Cristo Jesúseftaca jtsemnëse. <sup>3</sup> Bëngbe Bëtsá tojanma ndayá Moisesbe

ley ndoñe tonjanobenacá, er entšanga mondoyena nŷe ntšamo cachēnga imobošcá, y nŷe cányēnga ndoñe ntšobenana jamana ntšamo tojtsamncá. Bēngbe Bētsá tojánayana entšángbēñe bacna juabnēngbe mando jtsepochócama ca, y chama chabe Uaquíná tbojanichmó. Cha quem luaroye mo canŷe entšacá tojánabo, canŷe ainánaca, mo chē entšanga bacna soye amēngbe ainancá, pero ndocna te ni mo canŷe bacna soye ndoñe tojntēftsema; y tojánabo, chábeyeca entšanga bacna soyēngama perdonánēnga chamotsemnana. <sup>4</sup> Bēngbe Bētsá chca tojanma, bēnga chē mora oyenēnga jtsamēse ntšamo chē Uámana Espiritu ainaniñe yomandacá y ndoñe nŷe ntšamo bēnga entšanga tmojtsebošcá, chamobenama tšabá jamana ntšamo chē leyíñe yomandancá, ntšamo šojtsamncá.

<sup>5</sup> Chē nŷe cachēnga tšabá jtsomñama cachēngbe juabnēngaca imoyenēnga, nŷe sempre jésejuabnayana bacna soyēnga jtsamama, chca bacna juabnēngaca mandánēnga; pero ntšamo chē Uámana Espiritu ainaniñe iuamēndacá oyenēngna, sempre jésejuabnayana tšabe soyēnga jamama, ntšamo chē Uámana Espiritu yobošcá. <sup>6</sup> Ntšamo chē nŷe cachá tšabá jtsomñama juabnēngaca mandaná oyenentšana jóbocnana entšana tšesca tescama castigáná chaotsemnana, mo Bēngbe Bētsabe bominŷíñe nŷetsca tescama obaná cuaftsemncá; y ntšamo chē Uámana Espiritu tojtsemandacá oyenentšana jóbocnana chē nŷetsca tescama yomna tšabe vida jtsebmomna y ainaniñe tšabe ebionana. <sup>7</sup> Chē nŷets tempo oyenēnga nŷe ntšamo tmojtsebošcá nŷe cachēnga tšabá jtsomñama jtsejuabnayēse, Bēngbe Bētsabe uayayēnga jtsemnana, er chēnga ndoñe ntšamana ntšamo cha tojtsamēndacá, y chca jamama ndoñe ntšobenana; <sup>8</sup> y chca, chē nŷe chca bacna juabnēngaca oyenēnga, ndoñe ntšobenana jamana ntšamo Bēngbe Bētsá tšabá tbojtsinŷancá.

<sup>9</sup> Pero tšēngaftanga ndoñe quešmátiyena nŷe cach tšēngaftanga tšabá jtsomñama cach tšēngaftangbe juabnēngaca, sinó šmojtsiyena ntšamo chē Uámana Espiritu tšēngaftangbe ainaniñe cmamēndacá, er chē Uámana Espiritu sempre tšēngaftangbe ainaniñe iuētsemna. Nda ndoñe quem Cristbe Espiritu tondbomná, ndoñe Cristbia ntsemnana. <sup>10</sup> Pero Cristo sempre tšēngaftangbe ainanentse vida totsóbomñēse, masque tšēngaftangbe cuerpēnga yochjopochóca, quem luarentse entšanga bacna soyēnga jtsamana causa, tšēngaftangbe espiritu nŷets tempo vida echanjesóbomñe, er Bēngbe Bētsá tojama tšēngaftanga chabe bominŷíñe tšabēnga chašmotsemnana. <sup>11</sup> Y Bēngbe Bētsabe Espiritu, Jesús cháuatayenama tojamabe Espiritu, sempre tšēngaftangbe ainaniñe tojtsemnēse, Bēngbe Bētsá, chē Cristo cháuatayenama tojamá, echanjama chē tšēngaftangbe yochjóbana cuerpo, cachiñe vida chaot-satsbomnana. Cha chca echanjama chabe Espiritoftaca, y mua sempre tšēngaftangbe ainaniñe iuētsemna.

<sup>12</sup> Chcasna, Jesucristbeyeca catšátanga, šontsamna jtsiyenana ntšamo chē Uámana Espiritu ainaniñe šuamēndacá; ndoñe quešnátamna jtsiyenana nŷe bēnga tšabá jtsomñama cabēngbe bacna juabnēngaca; <sup>13</sup> er nŷe bēnga tšabá jtsomñama cabēngbe bacna juabnēngaca šmojtsiyenēse, castigánēnga šmochántsemna, mo Bēngbe Bētsabe bominŷíñe obanēnga cuaftsemncá; pero Uámana Espiritbeyeca, chca juabnēngaca nŷetsca bacna soyēnga jtsamana jtsajbanama šmojobenase, chē nŷetsca tescama yomna tšabe vida šmochántsebmomna.

<sup>14</sup> Ntšamo chē Uámana Espiritu yomandacá tmojtsemēngna, Bēngbe Bētsabe básēnga jtsemnana. <sup>15</sup> Er Bēngbe Bētsá ndoñe tonjama bēnga ainaniñe canŷe espiritu chamotsebmomnana, mo nŷe ínŷabíama nŷets tempo oservenēngcá chašotsamēndama, y chca cha chaoma bēnga cachiñe chamotsēuatjama; sinó chē Bēngbe Bētsá tojama bēnga chamotsebmomnana Espiritu jamana bēnga Bēngbe Bētsabe básēnga chamotsemnana, y chē Espiritu endama “Atšbe Taitá ca” bēnga Bēngbe Bētsá chamotsechembuanama. <sup>16</sup> Y chē Uámana Espiritu y bēngbe espiritu canŷe ora jayanana bēnga Bēngbe Bētsabe básēnga imomna ca. <sup>17</sup> Y Bēngbe Bētsabe básēnga mondmenayeca, bēngnaca mochanjójyēngacñe ndayá cha chabe básēnga jatšatayama tojašebuachenacá; bēnga y Cristo cányíñe chē soyēnga mochanjójyēngacñe, er bēnga inŷe soyēnguñe tmojasufrí cachcá ntšamo Cristo tojansufricá, Bēngbe Bētsá uámanēnga y bētsétsanga chášuabíamama, ntšamo cach Cristo yomncá.

#### *Bēngbe Bētsá bētsétsanga y uámanēnga šochjábíama*

<sup>18</sup> Atše ndegombre sēndētatsēmba, ntšamo quem tempo bēnga imosufrincá, puerta batšatema yomna chē bēngbe tšabíama uámanana y buashinŷínŷanana Bēngbe Bētsá šochjínŷanŷiyama. <sup>19</sup> Lempe ntšamo Bēngbe Bētsá tojamcá endmēna mo tša cuaftsobatmancá, chaobuache chē Bēngbe Bētsá ntšamo chabe básēnga imomnana jinŷanŷiyama ora. <sup>20</sup> Er lempe ntšamo Bēngbe Bētsá tojamcá, mora ndoñe yontsoservena ntšamo chaotsemnana cha tojanjuabocá. Chca tojanopasá, ndoñe chē lempe ntšamo cha tojanmncá chca chaotsemnana tojánbošenayeca, ndayá cabá chē soyēnga tojanmentšana, Adán bacna soye tojanmentšana, Bēngbe Bētsá tojanjuabó ntšamo cha tojanmncá josérviama ndoñe ndayama ntšamo cha tempo tojanjuabocá. Pero lempe ntšamo Bēngbe Bētsá tojanmncá entsemna mo cuaftsobatmancá canŷe te, ndēmua ora chē soyēnga chaoservema cha yochjamama



jtsetatsëmbëse, ntšamo quem luare jobojátšama ora chama cha yojanjuabnacá; <sup>21</sup> Bëngbe Bëtsá canye te yochjama lempe ya ndoñe más chaondetsopochocama. Y chora, ntšamo Bëngbe Bëtsá yochjamcá chabe básenga chamotsemnana, lempe ntšamo cha yojanjuabnacá, chabe uámanana y buashinýinýanana jtsebmnama, cachcá yochjama lempe chë cha tojanma soyëngaca.

<sup>22</sup> Er bënga mondétatsëmbo lempe ntšamo Bëngbe Bëtsá tojanmcá mëntscoñama yomna mo canye shembása šešona jtsebmnama ora tbojtsetsetsama tojtsobësnacá; er lempe ntšamo cha tojanmcá entsemna mo tša cuafitsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá. <sup>23</sup> Pero ndoñe nýe chë lempe ntšamo Bëngbe Bëtsá tojanmcá yojtsemna mo chë shembasacá, sinó bëngnaca; y bënga ainaniñe mondbomna chë Uámana Espiritu, y chë soye endmëna ndayá natsana bënga tmojanóyëngacñe, chë Bëngbe Bëtsá bëtscá soyënga šochjátšatayentsana; bënga bëngbe ainanoca tša jesobësnayana, bënga chabe básenga chamotsemnana Bëngbe Bëtsá chaomama mondobátmanëntscuana, y hcá, Bëngbe Bëtsá chaoma bënga ndocna te ndopochócama cuerpënga chamotsebmnama. <sup>24</sup> Bënga, Bëngbe Bëtsábeñe jtsošbuáchiyëse monjobátmana ntšamo cha tojanayancá chaomama, y chiyea cha bënga šojatsebácá; pero ndayama tmobatmancá, ya tojtšëchnëjuana bënga tmojtsonýase, chora chama ya ndoñe ntjátobatmanëngana. Er ndocná jatobátmanana chë ndayá jinýama ya tojobenacá. <sup>25</sup> Pero ndayama bënga tmobatmancá, cabá ndoñe jinýama tmontsobena soye tojtsemnëse, bënga jtsamnana Bëngbe Bëtsábeñe jtsobatmanana, uantadënga jtsemnëse, ntšamo tojayancá Bëngbe Bëtsá chaomëntscuana.

<sup>26</sup> Uámana Espiritnaca bënga šochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemuátstatsëmbo Bëngbe Bëtsáftaca jencuëntana ntšamo ndegombre tšabá yomncá; pero cach Espiritu Bëngbe Bëtsábioye bëngbiama jtsojtjanañana, mo hcá ora chabe ainanoca tša cuafitsebošcá; y ndayá hcá ora tbojtsojtjanañamna, bënga ndoñe ntjobenayana bënge palábraca chama jóyebuambayama. <sup>27</sup> Y Bëngbe Bëtsana, ntšamo entsanga ainanoca tmojtsebošcá yonýa, y ntšamo chë Espiritu jayanama tojtsebošcá yotátšëmbo, er chë Espiritu chabe entsangbiama ibotjanañe, ntšamo Bëngbe Bëtsá yobošcá.

*Bënga ayëñjanayëngama más tmojábobocana*

<sup>28</sup> Y bënga mondétatsëmbo, Bëngbe Bëtsá nýetsca soyënguñe inétsama cha imobobonshánënge tšabiamá, ndëmuanyënga cha tojáchembo chabe entsanga chamotsemnana, ntšamo cha jamama yojanjuabnacá. <sup>29</sup> Jesucristbeñe imošbuachëngbiama, Bëngbe Bëtsá quem luare tojanma orscana yojanjuabná y chënga tojanabacacá hcá chamotsemnana, y chë tempscana tojaninýanáná chënga chabe Uaquiñacá chamotsemnana; hcá, chabe Uaquiñá chë bëtscá catšátangbeñe chë natsaná chaotsemnana. <sup>30</sup> Y chë Bëngbe Bëtsá hcá tojanabacacangnaca, tojánachembo chabe entsanga chamotsemnana; chëngbiama tojanma chabe bominiñe tšabënga chamotsemnana, y chëngbiámnaca yochjama chabe uámanana y obenanentsana chamotsebmnama.

<sup>31</sup> Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyëñjanama ndocná queochatobenaye ca. <sup>32</sup> Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entsanga chamóba, nýetsca bënge tšabiamá. Bëngbe Bëtsá chabe Uaquiñáftaca hcá tojanmëse, ndegombre Bëngbe Bëtsá lempe šochanjátšataye. <sup>33</sup> ¿Nda nanjobenaye jayanama chë Bëngbe Bëtsá tojábacangana bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominiñe tšabënga imomna ca. <sup>34</sup> Y asna, ¿nda nanjobenaye jayanama bënga castigánënga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bëngbiama tojanóbana, pero cabá más, ndabiamá Bëngbe Bëtsá tojanma cháuatayenama, y mora Bëngbe Bëtsábe catšbioica yojtsebemana, jamándama y puerte bëtsá chentšë jtsemnana; y choca, chánaca bëngbiama Bëngbe Bëtsábioye ibotjanañe. <sup>35</sup> ¿Ndayá nanjobenaye Cristbentsana, chë tša šondababuanýeshanábentsana bënga jtsajuánayana? ¿Padeccena soyënguñe jtsemnana, tša jtsetsetsana, bënga chamosufrima inýenga tmojtsama ora, tondaye saná shëntsana ora, tondaye entsáyá tmontsábomna ora, o resjo bëngbiama tojtsemna ora, o bënga jtsëbáyama inýenga tmojtseboše ora? <sup>36</sup> Ntšamo Bëngbe Bëtsábe uabemana palabrenguñe endayancá, canye entsá Bëngbe Bëtsábioye ibojauyana ora: Ache causa entsanga cada te šontšëtsëtsná bënga jtsëbáyama ca;

entsanga bëngbiaye nýe ntšámnaca jtsaborlánana; bëngaftaca jamana mo chë jobáyama oveshëngaftaca mondbetsamcá ca.

<sup>37</sup> Pero ndoñe; nýetsca chë soyëguentsana bënga ayëñjanayëngama más tmonjábobocana, cha bënga šuababuánýeshanayeca. <sup>38</sup> Er atše tšabá šëndétatsëmbo tondaye yondobena, bënga Bëngbe Bëtsábentsana, chë tša šondababuanýeshanábentsana jtsajuánayana: masque ainënga o obanënga tmojtsemna; ni angelënga, ni amëndayënga hcá jamama quemátobena;

ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe; <sup>39</sup> ndocna quem luarentša tsbanánoca soye, ni quem luarentša tajsoica soye; ni ndocna inye soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentšana, chë bënga šondababuanýeshanábentšana jtsajuánayana, chë Cristo Jesús Bëngbe Utabnáftaca Bëngbe Bëtsá šojanýanýe bonshánentšana!

## 9

### *Bëngbe Bëtsá Israeloca entšanga tojabacacá, uámanënga chamotsemnana*

<sup>1</sup> Atše, Crísoftaca cánýiñe mo canýacá quetsomñecana, ntšamo sentsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemándánëse, chë šmonybëyuana tšabá o ndoñe tšabá tijamama, šmontsatsëtsná atše ndoñe stsebosterama. <sup>2</sup> Ndegombre, atše puerte ngménaca atšbe entsangbiamá, chë Israeloquëngbiamá sentsemna y atšbe ainana tša šontsetsetše, chënga Jesucristbeñe jtsošbuáchiyama ndoñe quemátsboše causa. <sup>3</sup> Tšabá tojtsemnëse, atše stjobenaye jtsebošana cach atše Bëngbe Bëtsábeyeca nyetsca tescama castiganá y Crístbentšana luaroca jtsemnana, atšbe entsanga, chë cach atšcá buiñe bomna entsanga jujabuáchama. <sup>4</sup> Chënga mondmëna chë Israeloca entsanga, chë Bëngbe Bëtsabe bocacana entsanga. Bëngbe Bëtsá chënga chabe basengcá tojánabiamá y chë tša bëtsá y uamaná cha yomnana chënga tojaninýanýe. Bëngbe Bëtsá ba soye chënga tojanabuayená ndayá cha chëngbiamá yojánboše y ndayá chëngbiamá jamama, y chë ley chëngbe cucuatšiñe tojanáboshjona. Chënga monjántatšëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha jatšebacana. <sup>5</sup> Chënga mondmëna chë bëngbe tempsca uámana bëts taitangbentsánënga, y Crístnaca mo canýe entsacá, mo canýe Israeloca entsangbentsacá tojánabo; y cha endmëna Bëngbe Bëtsá, nyetsca soyënguiñe mandayá. Nyetsca entsanga nyets tempo cha chamotsatschuaná. Chca chaotsemna.

<sup>6</sup> Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá ton-jama ca; er, nyetsca Israeloca entsangbentsënga ndoñe Bëngbe Bëtsabe ndegombre entsanga quemátsmëna. <sup>7</sup> Ni nyetsca Abrahám bentšana entsanga, ndoñe chabe ndegombre básenga quemátsmëna; er Bëngbe Bëtsá Abrahám bioye tbojanianyana: “Chë ácbentšana entsanga nye Isáácbentšana mochanjabo ca.” <sup>8</sup> Chca entsayana, bënga ndoñe šontsamna jtsejuabnayana Abrahám bentšana nyetsca entsangbiamá mo Bëngbe Bëtsabe basengcá; inyetsá, nye chë Bëngbe Bëtsá tbojanšbuachenáyeca Abraham yojánabamna básengbiamá cocayé entsemna jtsejuabnayana, Abrahám bentšana ndegombre entsanga bëtsemnana. <sup>9</sup> Er mentsá endmëna ntšamo Bëngbe Bëtsá tojánayana, Abrahám bioye tbojanšbuachená ora: “Camëntša tempo entsba uata chanjésabo, y Sara canýe šëšona bochántsebomna ca.”

<sup>10</sup> Pero nye nyetsá ndoñe quenátsmëna. Chë Rebeche uta básatna canýe taitá ibnabomna, bëngbe tempsca bëts taitá Isaac. <sup>11-12</sup> Bëngbe Bëtsá, Rebécbioye tbojanianyana: “Acbe mayor uaquiñá, acbe ngomëñche uaquiñábioye bochanjaservia ca.” Cha chca tojánayana jinýinýiyama chë básatbentšana canýa cha tbojánbocacama, Jacob, y ndoñe chë inye basa, Esaú, chca jamama tempo cha tojanjuabóyeca. Rebécbioye chca tbojanianyana chë básata cabá ndonýna ora, y ni canýe basa cabá ndocna soye ndama ora. Y chca, ntšamo tojanopasacana, tojanopasá chë básatbentšana canýa y ndoñe chë inýa chca chaotsemnana Bëngbe Bëtsá tbojanabuayanayeca, y ndoñe ndayá chata tbojanmama. <sup>13</sup> Ndocna Bëngbe Bëtsá chabe uabemana palabreñguñe tojanayancá: “Jacob sënjanbobonshana, y Esaú sënjanáboyënja ca.”

<sup>14</sup> Y asna, ¿ntšamo mochjayana? ¿Bëngbe Bëtsá ndoñe cachcá nyetscángaftaca endëtsemna ca? ¡Ndoñe, ndegombre ndoñe! <sup>15</sup> Er Bëngbe Bëtsá Moisésbioye tbojanianyana:

Atše šochanjóngmia nda chaitsebošabiamá,

y nda chaitsebošá chanjalastéma ca.

<sup>16</sup> Y chca, Bëngbe Bëtsá canýe entsá jabocacayana, ndoñe ndayá chë entsá tojtsebošama o tojamama, ndayá Bëngbe Bëtsá tbojalastemama. <sup>17</sup> Er Bëngbe Bëtsabe uabemana palabreñguñe, Faraón chë Egiptoca réybioye cha tbojanianyana: “Atše rey tcbonjábema, tša bëtscá atšbe obenana yomnana nyetscanga ácheñe chayinýanýema, y nyets luarentša entsanga atšbiamá chamotatšëmbonama ca.” <sup>18</sup> Y chca, Bëngbe Bëtsá jalastëmana nda tojtsebošábioye, y nda tojtsebošábioye jalesénciana chabiamá nduauenaná chaotsomñama.

<sup>19</sup> Pero ndánaca tšëngaftanguentsá šuatjatjaye: “Bëngbe Bëtsá chca tojtсамëse, ¿ntšamo cha nantsobena jayanana canýe entsá bacna soye tojamama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?” <sup>20</sup> Pero, nye entsá quecotsemñecá, ¿ntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canýe soye chca yojtsama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?”” <sup>21</sup> Chë fshantse soyënga pormayá jtsobenana

canje fshantsentsana jamana, canje matbaja uamana tescama, y inyajna cada te chaot-soservénama. Cachá, Bèngbe Bètsá jtsobenana jamana ntšamo cha tojtsebošcá, ndayá cha tojama sóyeca.

<sup>22</sup> Bèngbe Bètsá yojáboše jinñanyiyama entsángaftaca tbojánetnama, chèngbe bacna soyèngama; y yojáboše cha puerte obená yomnama jinñanyiyama. Chíyeca, chènga tša yojanéuantana, chènga chë ndëmuanýengbiana Bèngbe Bètsá yochjánayana chèngbe bacna soyèngama castigánènga jtsemnama yojánama ca, chë ndëmuanýenga jtsapochócama Bèngbe Bètsá yojtsanprontana. <sup>23</sup> Y chánaca yojáboše jinñanyiyama cha puerte uamaná y bètsá yomnama. Cha tojama, bènga chë ndëmuanýenga cha šojanalastemá, chabe obenanentšana y uámananentšana chamotsebomnama; y cha tempo chca tojanjuabó bènga uámanènga y bètsétsanga jábiamama. <sup>24</sup> Bènga mondmèna chë ndëmuanýenga Bèngbe Bètsá chama šojánachembo, inýengna judío entsánguentsana, y inýengna ndoñe judièngbentsana. <sup>25</sup> Ntšamo chabe uabemana palabrénguiñe, Oséasbe librèsañe Bèngbe Bètsá tojanayancá: Entšanga ndoñe átšbenga mondmèngènga, chènga “atšbe entsanga ca” chantsébobuatma; y canje luarentša entsanga ndoñe sènjánababuanýeshanènga, chèngna “atšbe bonshánènga ca” chantsébobuatma.

<sup>26</sup> Y cach luare ndayentše Bèngbe Bètsá tojánayana: “Tšèngaftanga atšbe entsanga ndoñe quešmátmèna ca”,

cachentše Bèngbe Bètsá ainá chènga echanjáuyana “atšbe básenga ca”.

<sup>27</sup> Israeloca entsangbiana, Isaías jabuachana tojánayana:

Masque Israeloca entsanga puerte banga chamotsemna, nýa mo chë mar béjayoca chènýañe cascajca,

Bèngbe Bètsá nýe báseftanga chentšana echanjåtsebacye;

<sup>28</sup> er, ndoñe bën y Bèngbe Utabná canje y nýetsca tescama echanjayana,

nýets quem luarentša entsangbiana ndayá chènga tmojamama tsabá o ndoñe tsabá bétsemnama,

y chèngaftaca echanjama ntšamo chaojayancá ca —cha tojánayana.

<sup>29</sup> Ntšamo Isaías tojanayancá, Bèngbe Bètsá Israeloca entsángaftaca ntšamo jamama tojanoyebuambá ora:

Bèngbe Utabná, nýets obenana bomná,

inýenga bènga jtsapochócama cha tojanalesenciá ora,

báseftanga bèngbe entsánguentsènga ainènga chamotsomñama ndoñe matènjannmèse,

bènga mora pochocánènga mamojtsemna, mo chë Sodoma y Gomorra pueblèngoca entsangcá ca,

cha nýetscanga y nýetsca tescama tojtsanapochócyae ca.

### *Israeloca entsanga y chë tsabe noticiènga*

<sup>30</sup> Chasna, mora mèntšá mochjayana: ndoñe judiènga tondaye monjánama Bèngbe Bètsabe bominýiñe tsábenga jtsemnama, pero cha tojanma chènga chabe bominýiñe tsábenga chamotsemnama, chènga chábeñe imojtsošbuáchiyama. <sup>31</sup> Pero, Israeloca entsanga imojánboše Bèngbe Bètsabe bominýiñe tsábenga jtsemnama, ntšamo chë leyiñe uyayancá jtsamèse; pero ndoñe chca tmonjanobená. <sup>32</sup> ¿Y ndáyeca chca? Co chë Bèngbe Bètsabe bominýiñe tsábenga jtsemnama, chábeñe jtsošbuáchiyèse, chènga tondaye monjánama causa chca, sinó chca jtsemnama imojánboše nýe ntšamo leyiñe uyayancá jtsamèse. Y chca, chèngna Jesús tmojtsanaboté, ntšamo chë Bèngbe Bètsabe uabemana palabrénguiñe chë tmojtsanabotengbiana ndayancá, chèngbiana cha yomna mo chë ndètsbé ndayíñe chènga jtsojestjamcá ca. <sup>33</sup> Bèngbe Bètsabe uabemana palabrénguiñe cha chca tojánayana: Smochjinýe, atše sènjama Jerusalenentše canya chaotsemna, y cha endmèna mo ndètsbecá ndayentše chènga mochjojestje,

y canje peñéscá ndayèse yochjama chènga chamotsótsatšama;

pero nda chábeñe tojtsošbuaché, ndocna te nýe bonamente queochátobatmana ca.

## 10

<sup>1</sup> Jesucristbeyeca catšátanga, atše nýets ainánaca sèntseboše y Bèngbe Bètsá sèntseimpadana, cha Israeloca entsanga cháuatsebacama. <sup>2</sup> Atše sèndétatšëmbo y sèntsobena chèngbiana jayanama, chènga puerte mondboše Bèngbe Bètsá jaserviama, pero ntšamo chènga yojtsèsertancá, ntšamo Bèngbe Bètsá jaserviama yojtsamnamna, ndoñe quenátmèna ntšamo ndegombre yomncá. <sup>3</sup> Chènga ndoñe tonjanésertá ntšamo Bèngbe Bètsá inétsama entsanga chabe bominýiñe tsábenga chamotsemnama, y cachènga tmojánguango ntšamo jamèse jobenayama Bèngbe Bètsabe bominýiñe tsábenga jtsemnama; pero ndoñe chca tmonjanobená, chë entsanga chabe bominýiñe tsábenga chamotsemnama ntšamo Bèngbe Bètsá inetsamcá ainánaca ntjoyèngacñécá. <sup>4</sup> Er Cristo tojama entsanga

ndoñe chamondétsama ntšamo leyíñe iuayancá, Bèngbe Bètsabe bominiñiñe tšábenga jtsemnama, chca, chènga chamobenama chabe bominiñiñe tšábenga jtsemnama, Cristbeñe jtsosbuáchiyese.

<sup>5</sup> Chè Bèngbe Bètsabe bominiñiñe tšábenga jtsemnama bošèngbiana, ntšamo leyíñe iuayancá jtsamése, Moisés mèntšá tojánayana, chèngbiana tojanábema ora: “Nda tojtsama nyetsca mandènga ntšamo leyènguiñe endayancá, tšabe vida echántsebomma, nyets tempo chè leyèngaca mandaná ca.” <sup>6</sup> Mèntšá endmèna ntšamo Bèngbe Bètsabe uabemana palabrénguiñe iuayana, entšanga chabe bominiñiñe tšábenga chamotsemnama ntšamo cha inétsamama, Jesucristbeñe jtsosbuáchiyese: “Ndoñe cattsetjanaye: ‘¿Nda celoye yochjátsjua ca?’ (chca endmèna ndayá Cristo quem luaroye chaotsmama); <sup>7</sup> o, ‘¿Chè obanènga imomna luaroye yochjátsma ca?’ (chca endmèna ndayá Cristo chè obanènga imomna luarentšana chaotsjuama).” <sup>8</sup> Ntšamo Bèngbe Bètsabe uabemana palabrénguiñe iuayancá mèntšá endmèna: “Tšèngaftanga paselo šmontsobena ntšamo Bèngbe Bètsá tojabuayenacá joudenama, tšèngaftanga ya chama palabréngaca šmojeyuambá y tšèngaftange ainaniñe chama šmojtsejuabná.” Chè buayenánana endmèna ndayá bènga ftsabuayiyinacá, y chiñe endayana Jesucristbeñe jtsosbuáchiyama šojtsamna ca. <sup>9</sup> Chè buayenana soyènguiñe endayana, Jesús ndegombre Bèngbe Utabná yomna ca aca tcojayanése, y Jesucristo cháuatayenama Bèngbe Bètsá tojanmama, nyets ainanaca tcojtsosbuáchese, Bèngbe Bètsá cmochjatsbocá ca. <sup>10</sup> Er ainanoca bènga Jesucristbeñe jtsosbuáchiyana y Bèngbe Bètsá jamana cachabe bominiñiñe tšábenga chamotsemnama; palabréngaca bènga jinñanñiyana ndegombre Jesucristbeñe imojtsosbuáchema, y Bèngbe Bètsá bènga játsebacana.

<sup>11</sup> Er Bèngbe Bètsabe uabemana palabrénguiñe mèntšá endayana: “Nda Bèngbe Bètsábeñe tojtsosbuaché, ndocna te nye bonamente queochátobatmana ca.” <sup>12</sup> Judiènga y ndoñe judiènga atsebácanènga mondmèna cach sóyeca, er canye Utabná nyetscangbe Utabná endmèna, y cha tmojtsotšèmbuanèngbiana, cha bètsá jtsamana. <sup>13</sup> Er Bèngbe Bètsabe uabemana palabrénguiñe mèntšá endayana: “Ndánaca Bèngbe Utabná tbojtsotšèmbuanábioye, cha bochanjatsbocá ca.” <sup>14</sup> Pero, ¿ntšamo cha mochjótšèmbona, chabeñe ndoñe tmonjounése? ¿Y ntšamo chabeñe mochtsošbuáchiye, chabiana jóyebuambayama ndoñe tmonjounése? ¿Y ntšamo chabiana mochjouena, chabe buayenana soyènga chènga jáuyanama ndocná tontsemnèse? <sup>15</sup> ¿Y ntšamo chabe buayenánana mochtسابuatambaye, chèngbiye jíchamuama ndocná tontsemnèse? Ntšamo Bèngbe Bètsabe uabemana palabrénguiñe endayancá: “¡Tša tšabá chè buayenánana abuátambayènga tmojášhjajna ora ca!”

<sup>16</sup> Pero nyetscanga chè tšabe noticiènga ndoñe ntjoyeunayana. Cach Isaías mèntšá tojánayana: “Utabná, ¿nda chè mondabuayiyiná soyènguiñe yojtsosbuaché ca?” <sup>17</sup> Chcasna, chè tšabe noticiènga jounése, entšanga jobenayana Jesucristbeñe jtsosbuáchiyana; y nda Cristbiana tojtsabuayiyinase, entšanga chabe buayenánana jounenana.

<sup>18</sup> Pero atše scotjá: ¿ndegombre nandmèna judiènga chè buayenánana ndoñe tmonjanuena ca? ¡Aíñe, chènga aíñe tmonjanuena! Ntšamo Bèngbe Bètsabe uabemana palabrénguiñe endayancá, chè Bèngbe Bètsabe buayenana soyèngama oyeuambnayèngbiana: Chèngbe oyeuambnayana nyets quem luariñe tojóshjango, y chèngbe palabrénga nyets luarènguentša entsangbenache tojuášhna ca.

<sup>19</sup> Pero cachiñe scotjá: ¿Israeloca entšanga chè buayenánana ndoñe tonjanésertá ca? Natsana, Moisés mèntšá tojánayana, chè ndoñe judiènga Jesucristbeñe tmojtsosbuaché ora, ntšamo chè judiènga mochtšanjuabnayama tojanoyebuambá ora: Atše, Bèngbe Bètsá, chanjama, ndayá chè ndoñe judiènga chamojashjache soyèngama tšèngaftanga chašmotsiyentšbuašama, chènga chè ndoñe monjamna mo tšèngaftangcá atšbe entšanga.

Atše chca chanjama chèngaftaca, chènga chè tempo Bèngbe Bètsabe soyèngama ndoñe tonjanésertá ca.

<sup>20</sup> Isaíasnaca, Bèngbe Bètsabiana tojanoyebuambá ora, puerta añémoca tojánayana: Chè atše ndoñe šmondènguanga, šmonjínjena; y chè atšbiana ndoñe mondènoticiangbiye sèñjenonñinyé ca.

<sup>21</sup> Pero Israeloca entsangbiana mèntšá tojánayana:

Nyets tempo atše tša sèñjanama, chènga átšeftaca tšabá tempcá chamotsatsmènama, pero chènga ndoñe chemátanbošena joudenama, y atšbe contra monjètsemna ca.

## 11

*Bèngbe Bètsá, Israeloca entsangbiana tšabe juabna yobomnama tojinñanyé*

<sup>1</sup> Y as mora scotjá: ¿Bèngbe Bètsá chabe entšanga tojtsanèbaté? ¡Ndoñe, ndegombre ndoñe! Cach atše canye Israelocá sèndmèna, Abrahambètsana entšá y Benjaminbe bèts

pamillentsana entsá. <sup>2</sup> Bèngbe Bètsá chabe entsánga ndoñe tonjubaté, chë tempšana tojánabacacanga. Tsèngaftanga smondétatsèmba ntšamo Bèngbe Bètsabe uabemana palabrènguifne endayancá, Bèngbe Bètsabe juabna oyebuambnayá Elías, Israeloca entsánga contra Bèngbe Bètsábioye cha ibojanatsètsná ora: <sup>3</sup> “Bèngbe Utabná, acbe juabna oye-buambnayènga tmojtsèbaye y acbiama pormana altarènga tmojtsepochohá; nyè atše vídaca tijoquedá, y chénga montseboše átsnáca jóbama ca.” <sup>4</sup> Y mèntšá Bèngbe Bètsá tbojan-juá: “Atše canýsèfta uaranga boyabásenga atšbiama sènjacuedá, Baal ndoñe tmonjado-ranga, ndayá entsánga tmojobopormá y imojtsejuabná canýe díos yomna ca.” <sup>5</sup> Mórna cachá entsemna, judiènguentše báseftanga monduájamna Jesucristbeñe ošbuáchiyènga, ndèmuanyènga Bèngbe Bètsá tojabacacá, cha chéngbiama tsábe juabna bómnyeca. <sup>6</sup> Bèngbe Bètsá entsánga jabacacayana chéngbiama tsábe juabna bómnyeca; y ndoñe chca ntjamana ndayá entsánga tmojamama. Er ndayá tmojamama Bèngbe Bètsá entsánga tojabacacase, cha nanjínýanýiye cha chca inétsama, ndoñe nyè chéngbiama tsábe juabna bómnyeca.

<sup>7</sup> ¿Y asna? Israeloca entsánga ndoñe chemátaninýena ntšamo Bèngbe Bètsabe bominýiñe tsábenga jtsemnana, pero chénguentšènga básefta bocacánènga aifne tmojanobená. Bèngbe Bètsá tojanalesenciá chë ínýenga Israeloquènguentšana chabe buayenana soyènga ainaniñe ndoñe chamondóyèngacñama; <sup>8</sup> ntšamo Bèngbe Bètsabe uabemana palabrènguifne endayancá: “Bèngbe Bètsá tojama chénga chabe soyèngama jósertama ndoñe chamondétsobenama, y mèntscoñama chénga ndoñe quemátobena chabe soyèngama ni jinýana ni jósertana, mo nduabínýnènga o nduauenanènga cuaftsemnèngcá ca.” <sup>9</sup> Davídnaca chéngbiama mèntšá tojánayana:

Mo chë entsánga canýe fiestentše oboyejuayènga, chéngbe uayayéngbeyeca nyè ndeolpe ishèchenèngcá,

y mo chë bayèngbiama uachmaniñe ishèchenèngcá, chénga mal chamopasama chaomama Bèngbe Bètsá sèntseimpadana, mo nda ndètsbeñe cuaftsojestjá.

Chca Bèngbe Bètsá chaoma, chéngbe bacna soyèngama;

y cha cháuyana chénga puerte castigánènga jtsemnana yojtsamna ca, bacna soyènga tmojama causa;

<sup>10</sup> Bèngbe Bètsá chaoma ntšamo mochjapásama chénga ndoñe chamondobená jtse-tatšèmbuana,

y chaoma puerte chamosufrima, nyèts tempo padecena soyènguifne jtsiyenése ca —cha tojánayana.

#### *Bèngbe Bètsá ndoñe judiènga tojatsebacá*

<sup>11</sup> As mora šcotjá: ¿Israeloca entsánga Bèngbe Bètsá ndoñe tmonjanoyeuná ora, cha tojánayana chénga nyètsca tescama castigánènga jtsemnana yojtsamna ca, ndocna inýe soye chéngbiama ntsemncá? ¿Chéngbiama yojamna mo chë ndètsbeñe jojéstjiana y jtètsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmèna. Chénga Bèngbe Bètsá ndoñe chematanoyeuná causa, ndoñe judiènga tmonjántatsèmbona ndayá bètsemnana Bèngbe Bètsábeyeca atsbocaná jtsemnana; y chë causa, mora, judiènga, ndayá chë ndoñe judiènga Bèngbe Bètsábentsana tmojoshachiñcá montsíyentsbuaše. <sup>12</sup> Judiènga bacna soyènga tmojanma causa, inýe entsánga quem luarentše tmojobená ba tsábe soyènga jtsebmomna. Chë judiènga tmonjanorrebajá causa, chë ndoñe judiènga ba tsábe bendicionènga Bèngbe Bètsábentsana tmojoshachiñe. Y chca, chë bètscá judiènga Bèngbe Bètsá játsebacama, chénga atsebacánènga chamojtsemna ora, más bètscá tsábe bendicionènga Bèngbe Bètsábentsana nyètsca entsangbiama echántsemna.

<sup>13</sup> Ntšamo mora chanjayancá, tsèngaftanga ndoñe judièngbiama entsemna. Bèngbe Bètsá sojichmó chabe soyèngama chë ndoñe judiènga jábuayenama; atše sèntsejuabná puerte uámana trabajo stsebmomna ca. <sup>14</sup> Atše sèntsobátmana, quem trabájoca atše jobenayana jamama chë cach atscá buifne bomna entsanguentšènga, ndayá chë ndoñe judiènga Bèngbe Bètsábentsana tmojoshachiñcá chamotsíyentsbuaše, y chca, ndayá tijamama, Bèngbe Bètsá chénguentšana báseftanga cháutsebacama. <sup>15</sup> Er chë judiènga Bèngbe Bètsá tojtsanébaté ora, cha tojanma inýe entsánga quem luarentše cháftaca tempcá tsábá chamotsatsmènam; y chénga cha chamojoyeuná ora, corente tsábá echántsemna, nýa chénga mo obanènga cuabmèncá y cuafsatayanèngcá. <sup>16</sup> Nda canýe arninýentsana chë natsana tandése Bèngbe Bètsabiama jóserviama yojtsemna ca tojayanése, jtsemnana mo nyètsana chabiama cuaftsemncá. Canýe betiyentsá tbètèjènga Bèngbe Bètsabiama yojtsemna ca canýa tojayanése, nyètsca chë betiyentsá buacuafjèngnaca Bèngbe Bètsabiama jtsemnana.

<sup>17</sup> Chë judiènguentše báseftanga Jesucristbeñe ndoñe montsanosbuaché ora, tsèngaftanga chë ndoñe judiènga smonjanobená chábèñe jtsošbuáchiyana. Y chca, judiènga monjamna mo canýe jena olivo betiyentsana entsánga tmojatètše buacuafjèngcá, y tsèngaftanga mo tjoca olivo betiyentsá buacuafjènga, chë jena olivo betiyeshiñe jenèfjèngcá. Mora

tšəngaftanga Bəngbe Bətsábəntšana cachca tšabe soyəŋga chə judiəngaftaca šmontsebmna, mo chə jena buacuaŋgə y cachəntša buacuaŋgə cach tbətəjəntšana lempe cuaft-soyəngacaŋcá. <sup>18</sup> Ndoñe šmattsenábotamnaye, tšəngaftanga Bəngbe Bətsabe tšabe soyəŋga šmojtsebmnama, chə Jesucristbeñe ndoñe montsanošbuaché judiəngbiama yojamna soyəŋga. Smochtsejuabnaye, buacuaŋgəna chə tbətəjəngayeca vida jtsebmnanana, y ndoñe tbətəjəngə chə buacuaŋgəyeca; cachcá, tšəngaftanga nŷe Bəngbe Bətsábeyeca chə tšabe soyəŋga šmojtsebmna.

<sup>19</sup> Pero tšəngaftanga šmuatjayana: “Aíñe, pero Bəngbe Bətsá básefta judiənga tojanəbaté, Jesucristbeñe ndoñe montsanošbuaché causa; chíyeca bənga fšənjənobená mo buacuaŋgə betiyiñe jenəŋgəcá chca tšabe bendicionənga Bəngbe Bətsábəntšana jóyəngacaŋcá ca.” <sup>20</sup> Ndegombre, chənga Jesucristbeñe ndoñe montsanošbuaché causa, mo buacuetətsəñəŋgəcá tmonjanəquedá, pero Jesucristbeñe šmojtsošbuachema, tšəngaftanga šmojoquedá Bəngbe Bətsábəntšana tšabe bendicionənga jtsoyəngacaŋcá. Chcasna, chama ndoñe šmattsenábotamnaye; más tšabana cuədado jtsebmnanana. <sup>21</sup> Er Bəngbe Bətsá, chə Jesucristbeñe ndoñe montsanošbuaché judiənga, ndoñe tonjanaperdoná, y chənga chabe entšanga bətsebmnama, monjamna mo cach betiyəntša buacuaŋgəcá; tšəngaftanga, chə mo betiyiñe jena buacuaŋgəcá šmonnənga, cha cach ndoñe quəcmochátaperdonaye, chábeñe ošbuáchiyana šmojtšajbanase.

<sup>22</sup> Bətsá šmochtsejuabnaye Bəngbe Bətsá puerte tšabia yomnama, pero cha tšatjayá yomnámnača šmochtsejuabnaye; tšatjayá endməna chə bacna soyəŋga tmojtšaməngaftaca, pero tšəngaftangafacna puerte tšabia. Cha tšəngaftangafacna chca echántsemna, tšəngaftanga chca chašmojtšomerecəñəntscuana; pero ndóñesna, Bəngbe Bətsá echanjama tšəngaftəngnaca mo buacuetətsəñəŋgəcá chašmoquedama, chə tšabe bendicionənga Bəngbe Bətsábəntšana ntsoyəngacaŋcá. <sup>23</sup> Y ntšamo mora imojtsejuabnacá chə judiənga tmojatrocá y tmojontšé Jesucristbeñe jtsošbuáchiyana, chəngnaca cachiñe chə tšabe bendicionənga Bəngbe Bətsábəntšana mochənjóyəngəcá, y mochántsemna mo betiyiñe jena buacuaŋgəcá, er Bəngbe Bətsá becá obenana endbmna jamama ntšamo chə judiənga tempo imojanbomncá cachiñe chamotsatsbmnama. <sup>24</sup> Chcasna, más paselo jtsebmnanana canŷe jena olivo betiyəntša buacuatətsəñəŋfə cach betiyiñe jətsjena, y ndoñe, chə tjoca olivos betiyəntša buacuaŋfə canŷe jena olivos betiyiñe chaójuama jájena. Cachcá, más paselo jtsebmnanana chə Jesucristbeñe ndoñe montsošbuaché judiəngbiama, jontšana jtsošbuáchiyana y tšabe bendicionənga Bəngbe Bətsábəntšana jóyəngacaŋcá, tšəngaftanga ndoñe judiənga chə tempo Bəngbe Bətsá ndoñe šmonjanábuaatməngbiama.

#### *Bəngbe Bətsá nŷetscəngafacna puerte tšabia endməna*

<sup>25</sup> Jesucristbeyeca catšátanga, atše səntseboše tšəngaftanga chašmotsetátšəmo chə tempo Bəngbe Bətsá entšanga ndoñe tonjaninŷanŷé soyəngama. Atše səntseboše tšəngaftanga quem soyəngama chašmotsetátšəmo, chca, tšəngaftanga ndoñe judiənga chə judiəngbiama más uámanənga šmonna ca ndoñe chašmondətsəjuabnama. Ndayá Bəngbe Bətsá tempo entšanga ndoñe tonjaninŷanŷecá, quem soye endməna: Bəngbe Bətsá tojalesenciá, nŷe baseftatescama banga Israeloquənga Bəngbe Bətsabe soyəŋga ainaniñe ndoñe chamondóyəngacaŋcá; pero chca echántsemna, chə ndoñe judiənguentše atsebácanənga jtsebmnama imomnənga, atsebácanənga chamojtsebməntscuana. <sup>26</sup> Chca chaójopasá ora, nŷetsca Israeləntša entšanga atsebácanənga mochántsemna; ntšamo Bəngbe Bətsabe uabemana palabrənguiñe endayancá:

Entšangbe atsebacyá Israelocana echanjabo,

y echanjama nŷetsca Jacóbəbəntšana entšanga ndoñe más vida chamondətsəbmna, bacna soyəŋga jtsebməse ca.

<sup>27</sup> Y məntšá endməna ntšamo chəngbiama chjašebuachená:

chənga játsəbacana, chəngbe bacna soyəngama chajaperdónaye ora ca —chíñe endayana.

<sup>28</sup> Chə tšabe noticiənga tmojtšanaboté causa, judiənga Bəngbe Bətsabe uayayənga mondməna, chca, tšəngaftangbe tšabiamna chaotsebmnama. Pero Bəngbe Bətsá tojánabacayeca, chəngnaca Bəngbe Bətsabe bonshánənga mondməna, er Bəngbe Bətsá chəngbe tempsca uámana bəts taitanga chca tojanašebuachená. <sup>29</sup> Chca endməna, er Bəngbe Bətsá ndocna te juabna ntjatrócana; nŷetscanga chabe entšanga chamotsebmnama tojáchembənga, nŷets tempo cha echántsababuanŷəshana, y echanjama chəngbeñe tšabe bendicionənga chaotsebmnama. <sup>30</sup> Tšəngaftanga ndoñe judiənga tempo ndoñe šmonjánama ntšamo Bəngbe Bətsá inabošcá; y mora, Bəngbe Bətsá tcmojalastemá, judiənga Bəngbe Bətsá ndoñe tmonjoyeuná causa. <sup>31</sup> Cachcá, Bəngbe Bətsá tšəngaftanga tcmojalastemama, judiənga montsebmna chə Bəngbe Bətsá ndoñe montsobedecəñənga, chca, Bəngbe Bətsá chəngnaca cháualastemama. <sup>32</sup> Er Bəngbe Bətsá tojinŷanŷé, cha ndoñe ntjoyeunayama juabnəngaca nŷetscanga mandánənga imomnama, chca, nŷetscanga jálastemama cha jobenayama.

<sup>33</sup> ¡Ndegombre, Bèngbe Bètsá n̄yetscangbiamu puente tšabia endmēna, puente osertaná y puente obiašnjachá! Ndocná quenátobena in̄yenga jábuayenama ndayá Bèngbe Bètsá jamana inetsejuabnacyá, y ndocná quenátobena corente josértana ntšamo cha inetsamcá. <sup>34</sup> Ntšamo Bèngbe Bètsabe uabemana palabrer̄nguñe endayancá:

Ndocná quenátstatšēmbo ntšamo Bèngbe Bètsá inetsejuabnacyá;  
ndocná quenátobena cha jábuayenama ndayá jamana ibomnana.

<sup>35</sup> Ndocná quenátobena ndayánaca cha natsana jshatšetayana, chē tbojatšetabiamu ndebená cha jatsmēnana,  
y chē ndebénana ndayánaca jtoyiyama chabotsemnana ca.

<sup>36</sup> Er lempe cha tojama, lempe cha iútabna, y lempe chabiamu yomna. ¡N̄yetscanga n̄yetasca tescama cha chamotsatschuaná! Chca chaotsemna.

## 12

### *Ntšamo jtsiyenēse Bèngbe Bètsá jtseervénana*

<sup>1</sup> Chcasna, Jesucristbeyeca catšátanga, Bèngbe Bètsá bēnga ba soye šojalastemáyeca, puente cbontsaimpadana, tšēngaftanga Bèngbe Bètsá chašmēyana tša šmojtseboše lempe jamana chábioye jadórana ca, Bèngbe Bètsá jadórana mo ndayá cuafjocabá y cuafjuatšēmboncá, mo cabá ainá cuafstomñcá. Smochjauyana tšēngaftanga sempre šmochtsentšena cha servénana y jtsamēse cha tšabá bēngaftaca chaotsemnana. As, chca chašmojtšama ora, ndegombre oyejuayá Bèngbe Bètsá šmochántsebiannaye. <sup>2</sup> Ndoñe šmattsiyena jtsamēse ntšamo chē n̄ye quem luarama en̄juabnaye entšanga monduamancá, y šmochjalesencia Bèngbe Bètsá mo tsēm entšangcá chácmbiamama, tšēngaftange ainana y juabna mo tsēmčá chaomēse. Chca, tšēngaftanga šmochanjobenaye jtsejuabnayana y šmochántsetatšēmbo ntšamo Bèngbe Bètsá yobošcá: ndayá tšabá yomna, chē ndayá cha oyejuayá ibnabema, y ndayá ya ndoñe yondopodena más tšabá jtsemnana.

<sup>3</sup> Ndayá Bèngbe Bètsá atšbiamu tšabá jtsejuabnayešē šojatšetama, n̄yetasca tšēngaftanga chochjáuyana, ndocná cachabiamu chaondētsejuabná más uamaná yomna ca, n̄ye ntšachetšá jtšenójuabnayana ibomna n̄yetšá. Más tšabá, cada ona cachabiamu tšabá chaotsenójuabná, y chca chaotsenójuabná ntšamo chabe ošbuáchiyana yomncá, chca, chē Bèngbe Bètsá tbojatšetá ošbuáchiyana chabiamu chaotsetrabájama. <sup>4</sup> Er, ntšamo bēnga cada ona mondbomna can̄ye cuerpo y chē cuerpiñe ba soyēnga jtsebomnana, y n̄yetasca soyēnga ndoñe cach soyama cuerpiñe ntsoervénana, <sup>5</sup> cachcá bēnga ošbuáchiyēnga, masque bētscanga imomna, Cristofaca cán̄yñe mo can̄yacá mondmēnayeca, bēnga mondmēna mo chabe cuerpo cuafstsemncá, y cada ona cán̄yñe mo can̄yacá n̄yetścāngaftaca.

<sup>6</sup> Bèngbe Bètsá tojama bēnga cada ona chamotsebomnana ndoñe cachca chabe tšetana obenana, ntšamo Bèngbe Bètsá cada ona bēngbe tšabiamu inajuabnacyá. Y chabe juábna bēnga jtsoyebuambnayama jtsoobenama Bèngbe Bètsá tojamēse, chca mochtsama ntšachetšá chábeñe bēngbe ošbuáchiyana yomncá. <sup>7</sup> Ošbuáchiyēnga bētscá jasērviamu bēnga chamotsobenama Bèngbe Bètsá tojamēse, chca mochtsama. Tšabá jtsubuátambayama bēnga chamotsobenama Bèngbe Bètsá tojamēse, chca mochtsama. <sup>8</sup> In̄yenga jañēmuama bēnga chamotsobenama Bèngbe Bètsá tojamēse, chca šontsamna. Lempe ntšamo bēnga tmobomncá in̄yengbiámna chaotsemnana bēnga jamana chamotsobenama Bèngbe Bètsá tojamēse, n̄yetš ainánaca chca šontsamna. Amēndayēnga jtsemnana bēnga chamotsobenama Bèngbe Bètsá tojamēse, šontsamna bētscá jamana tšabá jtsamēndayama. In̄yenga jálastemama bēnga chamotsobenama Bèngbe Bètsá tojamēse, šontsamna oyejuayēnga chca jamana.

### *Ntšamo bēnga Jesucristbeñe ošbuáchiyēnga jtsamana šojtsamna*

<sup>9</sup> In̄ya chašmojtsebobonshana ora, n̄yetš ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentšena ntšamo tšabá yomncá jtsamana. <sup>10</sup> Cmotsamna n̄yetscanga puente jtsebobonshánana, Jesucristbeyeca catšátanga quetsomñecá, chē in̄yenga bēngbiamu más uamanēnga imomna ca jtsejuabnayešē.

<sup>11</sup> Ndoñe oyēnjayēnga šmattsemna, ndayá bētscá Bèngbe Utabnabiamu šmochtsetrabájaye; ainaniñe corente añemo jtsebomnēse, Bèngbe Utabná sempre šmochtseservena.

<sup>12</sup> Tšēngaftanga Bèngbe Bètsabeñe jtsošbuáchiyēse, chábeñe šmobatmánayeca, puente oyejuayēnga šmochtsemna; padecena soyēnguñe chašmojtsachnējuana ora, puente uantadēnga šmochtsemna, y sempre Bèngbe Bètsáftaca šmochtsencuēntaye.

<sup>13</sup> Bèngbe Bètsabe entšanga opresido bomnēnga šmochjúbuaque, y šmochtseprontana tšēngaftange yebnentše posada in̄yenga júyentsamiama.

<sup>14</sup> Bèngbe Bètsá šmochtseimpadana, chē tšēngaftanga chašmosufrima amēngbiamu tšabe bendicionēnga cha chaotsamama; aiñe, cha šmochjaimpáda tšabe bendicionēnga chēngbiamu chaotsamama, bacna soyēnga ndoñe.

<sup>15</sup> Oyejuayënga ñyëngaftaca šmochtsemna, chënga oyejuayënga chamojtsemna ora; ngmënaca šmochtsemna, ñyënga ngmëniñe chamojtsemna ora.

<sup>16</sup> Smochtsiyena nyëtscanga jtsenëyeunanëse. Nye cach tsëngaftanga uámanënga ndoñe šmattsenobiamnaye, sinó chë nduámanënga imomnëngaftaca tsábá mándbomnënga šmochtsemna. Ndoñe šmattsejuabnaye yapa osertánënga šmomna ca.

<sup>17</sup> Ñyënga bacá chamojtsaborlana ora, ndoñe šmattsatëchënguaye; corente šmochtsentsëna ntšamo nyëtscata entsangbiama tsábá yomncá jtsamama. <sup>18</sup> Ntsachetšá šmojobenacá, lempe šmochtsama natjëmbana nyëtscata entsángaftaca jtsiyenama. <sup>19</sup> Atšbe bonshánënga, ñyënga bacá chamojtsaborlana ora, ndoñe šmatjama chënga chë causa chamotsesufriñama, ndayá Bëngbe Bëtsá šmochjaleséncia chënga cháucastigama; er Bëngbe Bëtsabe uabemana palabreñguifne cha tojánayana: “Atše chanjama chënga chamosufrima, ñyënga chamosufrima tmojama causa; y chënga chanjácastigaye, ñyëngbiye bacá tmojaborlá causa ca.” <sup>20</sup> Chca játamamna, mëntšá šmochjama, ntšamo cachánaca tojanayancá:

Acbe uayayá tbojtseshëntsane, saná cochjacaredáda,

y tbojtsajuendase, cochjuáfsiye.

Chca chacojamëse, cochanjama cha puerta chaotsëuatja ntšamo tcmojaborlama,

y ainana corente chabotsetšena, mo chebana iñbenga chabe bestšáñe cuafjacjá ca.

<sup>21</sup> Ndoñe šmatjaleséncia, ntšamo ndoñe tsábá tontsemncá tsëngaftanga chacmayëñjanama. Chamna, ntšamo tsábá yomncá jtsamëse, chë ndoñe tsabe soye šmochjayëñjaná.

## 13

<sup>1</sup> Nyëtscata entsánga entsamna jtsamana ntšamo chë amëndayënga tmojtsamëndacá, er ndocná obenana ntsebmomana, Bëngbe Bëtsá ndoñe chca tbonjalesenciase, y nye Bëngbe Bëtsá tojama amëndayënga obenana chamotsebmomana. <sup>2</sup> Chca, chë amëndayëngbe contra tmojtsemnënga, ntšamo chaotsemnama Bëngbe Bëtsá tojayancá contra chënga jtsemnana; y chca contra tmojtsemnënga, castigánënga mochántsemna; <sup>3</sup> er ntšamo tsábá yomncá amënga, ndoñe quenátamna ndayama chë amëndayënga jatebëuatjana, nye chë bacna soye amënga aifne. Tsëngaftanga šmojtseboše jtsiyenama chë amëndayëngbiye ntjatebëuatjá; chcasna, ntšamo tsábá yomncá šmochtsama, y chë amëndayëngna tsabe bomínjeca mochantsonyaye ntšamo chašmojtsamncá; <sup>4</sup> er chë amëndayëngna Bëngbe Bëtsabe trabajo amënga mondmëna, tsëngaftangbe tsabiama. Pero bacna soyënga šmojtsamëсна, cmontsamna jtsiyenana chë amëndayënga jtsebéuatjëse, er chënga jacastigama obenana mondbomna, y chca mondbëtsama. Chënga, Bëngbe Bëtsabe mándoca jayanana chë bacna soye amënga ndoñe tsábá tmonjama ca, y jamana chënga chamosufrima. <sup>5</sup> Chiyeca, jtseytana ntšamo chë amëndayënga tmojtsichamncá jtsamana, pero ndoñe nye chë castigo ndoñe chašmondëtebmomana, ndoñe chca šmontsama causa, sinó chë ainanentša tsabe juabnënga ntšamo tbojtsëtsësnacá joyeunayama yomnayeca. <sup>6</sup> Cachca soyëngama, amëndayëngbiama impuesto tsëngaftanga jtsatsquécjnayana; er chë amëndayënga Bëngbe Bëtsabe oservénënga mondmëna, ntšamo chiñe jtsamama tojtsamncá corente tmojtseñtsëna ora.

<sup>7</sup> Chcasna, tsëngaftanga šmochjáyentšbuachiye ntšamo chënga jtsebmomana tojtsamncá. Chë crocénana entsánga ayëngacayëngbiye, ndaye impuësnaca šmochtëbuénaye; chëngna šmochtsarrespetana ntšamo yomncá, y chënga uámanënga chamotsebmomana šmochtsejuabnaye.

<sup>8</sup> Crocénana ñña jëtsëntšabuáchiyama chamojtsamnése, nye ntöyiyá ndoñe šmatjoquéda, nyëts tempo ndebénënga; nye quem soye sempre šmochtsama: nyëtscanga šmochtsenbobonshana; er nda ndëmua entsábiye tbojtsebobonshana, ya tojama ntšamo leyifne yomandancá. <sup>9</sup> Quem mandënga, “acbe shema ññaftaca ndoñe cattseíngñaye, ñña ndoñe catjóbë, ndoñe catjathëba, ñña tojtsebmomna soye ndoñe nye acbiama cattseboše”, y chë ñnye mandënga leyifne lempe quem mandifne entsemna: “Ndëmua entsánaca cochtsebobonshana ntšamo cach aca cuenobobonshancá”. <sup>10</sup> Nda ndëmua entsábiye tojtsebobonshana, chábiye ndoñe bacá ntjabórlana; chca, ndánaca jtsebobonshánëse, entsá jamana lempe ntšamo leyifne yomandancá.

<sup>11</sup> Chë soyënga cmontsamna jtsamana, er bënga mondetatšëmbo ya chë uámana tempifne imojtsiyenama, chë mocna ora šojtsamna prontánënga jtsemnana, mo ocnayentšana cuafjofšenangcá, Jesucristo jaserviama jtsentšëñëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristëñe jtsošbuáchiyama tmonjanontsé ora enjamnama. <sup>12</sup> Mora bënga mondoyena canye luar-entse bëtsá bacna soyëngaca y ngmenánaca, y chca jtsemnana mo bënga nyëts tempo ibetifne cuaftsajncá. Pero ya entsobeco chë Bëngbe Bëtsá bënga játsebacama te, mo chë ibetifne ya jtso pochócama y binñifne ya jontšamncá. Chiyeca mochtsajbaná bacna soyënga



amana, y mochtsiyena tšabe soyënga jtsamëse, Satanás játsjama y jáyënjana bënga jtseprontánëse, mo canyë soldado jenëuyanama y inya jáyënjana ba soyënga tojenocjacá. <sup>13</sup> Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, inyëngbiana lempe chaotsinynëse. Chcasna, ndoñe quešnátamna yapa tmoýënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásaftaca ntsamana y jenomándama ntobencá chca soyënga ndoñe ntsamana, nyëtscanga ndoñe cachcá ntsejuabnayama ndoñe ntsamana y ndoñe inyënga yapa ntsiyentsbuašana. <sup>14</sup> Chca játamamna, smochtsiyena jtsamëse ntšamo Bëngbe Utabná Jesucristo endbetsamcá, y ndoñe nye šmatjésejuabnaye jtsamana nye cach tšëngaftanga tšabá jtsomñama juabnëngaca, ndayá tšëngaftanga chašmotsamama chë juabnënguifne tojtsemncá.

## 14

*Ndoñe šmattsóyeuambnaye inye ošbuáchiyënga contra*

<sup>1</sup> Chë Jesucristbeñe nye batšatema ošbuáchiyënga tšabá šmochjúbuaja, y chëngaftaca ndoñe šmattsenatsëtsnaye ndayá aifne o ndoñe jamana yontsamnama. <sup>2</sup> Er básefta ošbuáchiyënga corente imotátšëmbo chënga nye ndayánaca jasama imobenama, pero chë Jesucristbeñe nye batšatema ošbuáchiyënga, ndocna mëntsena ntseayana, er chënga jsejuabnayana aifne jasana canyë bacna soye nántsemna ca. <sup>3</sup> Chë nyëtscá saná sayënga ndoñe chamondëtsejuabná chë inye soyënga ndoñe mondëtsesayëngbiana, chë causa chënga más batšá uámanënga imomna ca; y chë ndaye soyënga ndoñe mondëtsesayëngna, chë nyëtscá saná sayëngbe contra ndoñe chamondëtseyeuambná, er Bëngbe Bëtsá chënga tojúbuaja mo chabe entšangcá. <sup>4</sup> Tšëngaftanga ndoñe quecmátamna chë inyabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntšamo thojtsemncá, er Bëngbe Utabná obenana endbomna cha chca chaotsamama.

<sup>5</sup> Báseftanga mondmëna, chënga jtsejuabnayana canyë te inye tescama más uámana te yomna ca; pero inyënga jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yojuabnacá ndáyeca chca ca. <sup>6</sup> Nda tojtsejuabná canyë te inye tescama más uámana te yomna ca, chca jamana Bëngbe Utabnábiama jtenójuaboyama. Y nda nyëtscá saná tojtsešá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnábiama jtenójuaboyama, y chánaca Bëngbe Bëtsábioye chë sanama jëtschuayana.

<sup>7</sup> Bënga ošbuáchiyënguentšana ndocná ainá ntsemnana nye cachabiana, ni jóbanana nye cachabiana. <sup>8</sup> Bënga tmojtsiyenëse, Bëngbe Utabnábiama jtsiyenana; y tmojóbanëšna, Bëngbe Utabnábiama jóbanana. Chca, masque ainënga o obanënga, bënga Bëngbe Utabnábiama jtsemnana. <sup>9</sup> Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

<sup>10</sup> As, ¿ndáyeca tšëngaftanguentšë báseftanga, catšátangbe contra jtsóyeuambnayana, ndayá chënga tmojtsamama? ¿Y ndáyeca inyënga tšëngaftanguentšë jtsichámuana, catšátanga ndoñe uámanënga montsemna ca, ndayá chënga tmojtsamama? Er nyëtscanga šontsamna Bëngbe Bëtsabe delante jashjanguana, ntšamo cada ona tojëftsemcá tšabá o ndoñe tšabá bëtsemnana cha cháuyanama. <sup>11</sup> Er Bëngbe Bëtsabe uabemana palabrënguifne Bëngbe Utabná mëntšá tojánayana:

Ndegombre atšë ainá sëndëtsomñe, y chíyeca atšë šcojurá,  
nyëtscanga atšë delante mochanjoshëntsaméntša atšë jadórama,  
y nyëtscanga šmochanjauyana, “ndegombre aca Bëngbe Bëtsá condmëna ca”.

<sup>12</sup> Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

*Ndoñe šmatjama inye ošbuáchiyënga bacna benachiñe chamótsatšama*

<sup>13</sup> Chíyeca, ya ndoñe quešnátamna inyëngbe contra jtsóyeuambnayana. Chca játamamna, smochtsejuabnaye y yejuana smochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma. <sup>14</sup> Atšë sëndëtatšëmbo, mo canya Bëngbe Utabnáftaca cányiñe mo canyáca quetsomñecá, ndocna soye yondmëna, nye cachabe ponto chaotsemna ndoñe tšabe soye. Pero canyë entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiana cocayé chë soye nyëtscá tempo jëftsemnana ndoñe tšabe soye. <sup>15</sup> Tšëngaftanga inya becá šmojtsatsëtsná, inye soyënga tšabá endmëna jasama ca, y cha tojtsejuabná,

chca soyënga jasama ndoñe tšabá yondmëna ca, pero tšëngaftanga tša šmojtsatsá causa, cha chca soyënga tojase, y chentsana tšojtsebiona puerta bacna soye tojamama, chca, tšëngaftanga jtsin'janyayana ndoñe šmondoyena jtsamëse chë in'jenga jtsababuán'yeshanëse. N'ye tšëngaftanga in'ye soyënga šmëtsesayama ndoñe šmatjaleséncia chë soye chaoma in'ya, ndabiana Cristo tojanóbana, chë ndoñe ndegombre benachiñe chaoquedama. <sup>16</sup> Ndoñe šmatjaleséncia ndayá tšëngaftanga tšabá šmëtsamama, in'jenga ndoñe tšabá tšëngaftangbiana chamotsóyebuambnana. Chca šmochanjobenaye, ntšamo šmojtsamcá jtsajbanase, in'jenga ndoñe tšabá tmontsoyebuambná ora. <sup>17</sup> Bëngbe Bëtsabe amëndayana bëngbeñe ndoñe quenátsmëna in'ye soyënga aifñe jasana o in'ye soyënga ndoñe, can'ye soye aifñe jofšiyana o in'ye soye ndoñe. Pero chabe amëndayana bëngbeñe aifñe endmëna jtsamana soyënga ndayama Bëngbe Bëtsá tojayana aifñe tšabá jamama yomna ca, cháftaca tempcá tšabá jtsatsmënana y ainaniñe oyejuayana jtseboamnana; y Uámana Espiritbeyeca bënga jobenayana chca jamana. <sup>18</sup> Y nda Crístbioye chca tšojtseeserverna, jamana Bëngbe Bëtsá cháftaca oyejuayá chaotsemnana, y entšangbe bominiñe tšabia jtsemnana.

<sup>19</sup> Sempre šontsamna tšabe soyënga jtsamana y chë soyëngaca chaopodé jamana nyëtsanga natjëmmana chamotsiyenama, y ndaye sóynaca šmochtsama, ndayá in'jenga chaújabuache Jesucristbeñe corente jtsošbuáchiyama y ainaniñe bëtscá aifñe jtseboamnana. <sup>20</sup> Tšëngaftanga ndaye sanánaca jasama šmobénayeca, ndoñe šmatjama chaotsopochocama ndayá Bëngbe Bëtsá ainaniñe tojamcá. Ndegombre, nyëtsca sananga tšabá jasama endmëna; pero ndayá tšëngaftanga šmojasama, in'ya bacna benachiñe chaótsatsama šmojamëse, chë soye cocayé ndoñe tšabá ntsemnana. <sup>21</sup> Tšabá endmëna mëntšena ndoñe ntjasana, vínoye ndoñe ntjofšiyana o ndayánaca ndoñe ntjamana, pero chë soye aifñe tojama ora, Jesucristbeyeca can'ye catšata chaojuaboma y bacna soye chaomama tojoservese.

<sup>22</sup> Asna, ntšamo tšëngaftanga chë soyëngama ndegombre šmošbuachecá, n'ye Bëngbe Bëtsá y tšëngaftangafaca chaotsemna. Can'ye entšá ndegombre oyejuayá jtsemnana, can'ye soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontseboamnëse. <sup>23</sup> Pero can'ye entšá ndayá tojamentšana tojayana, bacna soye tojama ca chë ndayá tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye aifñe tšabá yomnana jtsošbuáchiyëse; y ndayánaca chca ora tojtsamëse, chca jamana bacna soye jtsemnana.

## 15

*Ntšamo in'jengbiana tšabá tojtsemncá mochtsama, ndoñe n'ye bëngbiana*

<sup>1</sup> Bënga, chë Jesucristbeñe corente ošbuáchiyënga, šontsamna chë n'ye batšatema ošbuáchiyënga jubabuáchana, chënga bacna soyënga tmojtsama ora, n'ye batšá ošbuáchiyana bomna causa; y ndoñe n'ye jatsënguayana n'ye ndaye soyëngaca yopodena bënga tšabá jtsemnana. <sup>2</sup> Cada ona bënga šontsamna jamana ntšamo cach bëngcá Jesucristbeñe ošbuáchiyabiana tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bëtscá Jesucristbeñe chaotsóšbuáchemá, y ainaniñe más aifñe chaotseboamnana. <sup>3</sup> Er Cristo, ntšamo tojanmcá cach ndoñe tonjanma n'ye cha oyejuayá jtsemnana. In'yetšá, cháftaca tojanopasá ntšamo Bëngbe Bëtsabe uabemana palabrénguiñe endayancá, mo Cristo Bëngbe Bëtsáftaca cuaftsoyebuambnacá: "Ntšamo entšanga montsichamcá áca joyenguanguama, atše šmontsatsëtšná ca." <sup>4</sup> Er lempe ntšamo tempo Bëngbe Bëtsabe uabemana palabrénguiñe tmojanabemcá, bënga jabuátambama endmëna. Ndayá bënga chiñe tmojuatsjín'yama, bënga jtsobenana padecena soyënguiñe tmojtsachnéjuana ora uantadënga jtsemnana, y ainaniñe más aifñe jtseboamnana; y hiyëca bënga montsobena, chábeñe jtsošbuáchiyëse, chábeñe jobátmana, ntšamo tojanayancá chaomama. <sup>5</sup> Atše, Bëngbe Bëtsá sëntseimpadana, nda inétsama bënga padecena soyënguiñe uantadënga chamotsemnana, y nda inétsama bënga ainaniñe más aifñe chamotseboamnana, cha chaoma nyëtsanga can'ye juabna chašmotseboamnana, ntšamo Cristo Jesús yojanjuabnacá tšëngaftanga jtsejuabnayëse; <sup>6</sup> cha chca chaoma, nyëtsca tšëngaftanga mo can'yiñe cuaftsemncá, y mo nyëtsanga can'ye ora cuafjayancá, Bëngbe Bëtsá, Bëngbe Utabná Jesucristbe Taitá, puerta bëtšá y uamaná yomnana chašmuin'janyëma.

*Chë ndoñe judiëngbiámnaca chë tšabe noticiënga jtsemnana*

<sup>7</sup> Nyëtsanga oyejuayënga šmochjenofja, ntšamo Crístnaca tšëngaftanga tmojanëbuajcá, chca, entšanga chamuiniñan'ye Bëngbe Bëtsá puerta bëtšá y obená yomnana. <sup>8</sup> Atše sëntseboše ndayá jayanana, Cristo tojánabo judiënga jabáserviama ca, chca, jin'yan'iyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uámana bëtš taitanga tojanašebuachenacá chaocumplima; <sup>9</sup> y Bëngbe Bëtsá puerta bëtšá yomna ca chë ndoñe judiëngnaca chamuayanámnaca, cha chënga

inétسالastemanama, ntšamo Bèngbe Bètsabe uabemana palabrènguiñe endayancá, y chca tojanocumpli:

Chíyeca, atše chë ndoñe judièngbeñe chaitsemna ora, aca cbochantsatschuanaye, Bèngbe Bètsá;

y jacántase chanjayana aca puerta bètsá y uamaná comna ca.

<sup>10</sup> Inyoca mèntšá endayana:

Puerta oyejuayènga chë ndoñe judiènga šmochtsemna, Bèngbe Bètsabe bocacana entšàngaftaca cánýiñe ca.

<sup>11</sup> Y inyoca mèntšá endayana:

Bèngbe Utabná šmochtsatschuanaye tšèngaftanga ndoñe judiènga,

y cha šmochtsatschuanaye nyètsca tšèngaftanga nyèts luarènguenache entšanga ca.

<sup>12</sup> Y Isaiásnaca Bèngbe Bètsabe uabemana palabrènguiñe mèntšá tojanábema:

Canýa Isaiabe entšanguentsana echanjabo,

y Bèngbe Bètsá chábiye uamaná bochanjábema, nyèts luarènguenache entšanga chaot-saméndama,

y chènga chábeñe jtsošbuáchiyèse, chábeñe mochantsobátmana tšabe soyènga chèngbiama chaotsamama ca.

<sup>13</sup> Atše, Bèngbe Bètsá sèntseimpadana, nda inétsama bènga chábeñe chamotsobátmanama tšabe soyènga bèngbiama chaomama, cha chaoma tšèngaftanga ainaniñe puerta oyejuayènga chašmotsemnana y ainaniñe tšabe ebionana chašmotsebmomna, chábeñe jtsošbuáchiyèse; y Bèngbe Bètsá chca tšèngaftangbiama chaoma, tšèngaftanga cada te más chábeñe chašmotsobátmanama, chë Uámana Espíritbe obenánaca.

<sup>14</sup> Jesucristbeyeca atšbe catšátanga, atše corente sèndèttšèmbó tšèngaftanga puerta tšábenga šmómnama, ndayá cmamnana corente šmotatšèmbuama, y jtsebuayiyayama šmobenámna. <sup>15-16</sup> Quem tsbuanáchañe básefta soyèngama sènjuábema, ntšamo šmatjásjuabnayama atše ntjatauajtcá; chca sènjama, básefta soyèngama chašmuatenójuaboma; y chca sèntsobena juabomana, er Bèngbe Bètsá tojama atše chaitsebmoma chë uámana trabajo, Cristo jtsešervénana, chë ndoñe judiènga jtšèjabuáchanèse. Atše bachnécá sèntsošservena, Cristo stseservena ora, entšanga tšabe noticièngama jtšabuayiyayèse; atše chca sèndama chë ndoñe judiènga Jesucristbeñe chamotsošbuáchemá, y ndayánaca chamotsamama Bèngbe Bètsá oyejuayá chèngaftaca chaotsemnana, mo chabiama canýe uatšèmbonancá. Chcánaca atše sèndama, ndoñe judiènga ndegombre Bèngbe Bètsábenga chamotsemnana, chë Uámana Espíritbeyeca.

<sup>17</sup> Chca, atše Cristo Jesúseftaca cánýiñe mo canýacá quetsomñecá, ndegombre sèntsobena jtsejuabnayana ntšamo Cristo jatsèviama atše sèndamcá, puerta uámana soye yomnana.

<sup>18</sup> Atše añemo sèntsebmoma nyè chë ndayá Cristo átseftaca tojamama jóyebuambayama, ndoñe judiènga Bèngbe Bètsá chamóyeunama. Chca tonjopasá, ndayá tijayanama y tijamama, <sup>19</sup> chë Bèngbe Bètsabe obenana jinýañiyama bèts soyèngama, chë chabe obenánaca tojopasá tšabe soyèngama, y chë Uámana Espíritu bèts obenánaca tojama soyèngama. Y chca, Jerusalenocana jaboajtšase, nyètsca luarènguèjana Iliria luaróntsoñe, Cristbe tšabe noticièngama nyèts luarènguenache entšanga tijabuayená. <sup>20</sup> Atše sempre canýe soye inyè soyèngama más sènjánboše, y enjamna chë tšabe noticièngama jábuayenana, entšanga ndocna te Cristbiana oyebuambnayana tmonjanuena luarènguenache; y chca sènjannma, atše ndoñe játamama inýa tojanbojatsé trabajo, mo inýabe bojatsèna yebnentše jajebruama cuafjatontšecá. <sup>21</sup> Ntšamo Bèngbe Bètsabe uabemana palabrènguiñe endayancá, chë tempo Cristbiana ndoñe tmonjanuenèngbiama:

Chë ndèmuanyènga tempo ndocná chabiama tonjanabuayená, chènga tšabá mochanjinýe ntšamo cha yomnana;

y chë ndocna te chabiama tmonjouenènga, chabe soyèngama echanjósertaye ca.

### *Pablo yojanjuabná Roma bèts puebløye jama*

<sup>22</sup> Y nýa chë causa, atše ndoñe chiyjobená tšèngaftangbiøye jana tšèngaftanga jányama, masque ba soye tsjenojuabná chøye jama. <sup>23</sup> Pero mora atšbe trabajo quem luarènguiñe sènjapochocá y tèmpscana tšèngaftanga jányama tša sèndánbošeyeca, <sup>24</sup> sèntsejuabná mora aifñe chjobenaye chøye jama, tšèngaftanga jautsètsayama, chèjana chajjachnèngo ora, España luarøye chaitsá ora. Y baseftayté tšèngaftangaftaca chjèftsemna, cbochjányama tšèngaftangaftaca oyejuayá; chentsana Diosmanda šmochjuájabuache, y lempe ntšamo chašojtsajabotcá šmochjåtsetaye jobenayama Españoje ayana jtètóntsama. <sup>25</sup> Morna Jerusalenøye chanjá, choca entšanga Bèngbe Bètsábenga imomnènga jaujabuáchama; <sup>26</sup> er Jesucristbeñe ošbuáchiyènga Macedonia y Acaya luarentsènga, tmonjajuabó tšabá yojtsemna crocénana jájubana chë Jerusalenoca entšanga, Bèngbe Bètsábenga imomnènga y ndbomnèjémènga imomnènga jujabuáchama; y oyejuayènga chca

tmonjama. <sup>27</sup> Cachënga chca tmonjajuabó, y chca jamana tsábá endmëna, er judiënga tmonjanma, chë Bëngbe Bëtsábiocana tmojanóyëngacñe soyënga ndoñe judiëngnaca chamotsebonnama; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatšatayëse, chënga vida jtsebonnama chamotsobenama. <sup>28</sup> Y chca, quem trabajo chajapochocá ora, y chë ndoñe judiënga ošbuáchiyënga lempe tmojátbanana chajáftsayentšbuachiye ora, chanjontsé Españaoye jama, y tsëngaftangbiajana chanjachnëngo tsëngaftanga jáftsanyama, tsëngaftangataca baseftayté jëftsemnama. <sup>29</sup> Atse corente sëntsetatšëmbo tsëngaftangbiöye chajá ora, chjášhango y chjama tsëngaftanga bëtscá tsabe bendicionënga Crístbentsana chašmotsebonnama, tondaye chacmondëtsabuáshebenëntsana.

<sup>30</sup> Jesucristbeyeca catšátanga, Bëngbe Utabná Jesucristbeñe ošbuáchiyënga quetsomñecá, y bënga bonshánana chamotsebonnama chë Uámana Espíritu inétsamayeca, tsëngaftanga cbontsaïmpadana, bëtscá chašmotsentšena Bëngbe Bëtsá nyëts ainánaca jtseïmpadánama, ntšamo atšë sëndbetsëïmpadancá, cha atšë chašotsinyënama. <sup>31</sup> Cha šmochtseïmpadana chë Judea luaroca ndošbuáchiyënga ndocá chašmondëborlama, y chë Jerusaleñoquënga Bëngbe Bëtsábënga, tsábá chamóyëngacñama ndayá chënga jujabuáchama chajáftsayentšbuachiye ora. <sup>32</sup> Y chentšana, y Bëngbe Bëtsá chca chajábošenëse, atšë chayobená bëtscá oyejuayá tsëngaftangbioca jashjanguana tsëngaftanga jányama, y tsëngaftangataca chaitsemna ora, batšá jóchnama chayobená. <sup>33</sup> Atšë, Bëngbe Bëtsá sëntseïmpadana, nda inétsama bënga ainaniñe tsabe ebionana chamotsebonnama, nyëtsca tsëngaftangataca chaotsemnama. Chca chaotsemna.

## 16

### *Ubuátmënga jacheuayama*

<sup>1</sup> Atšë sëntseboše tsëngaftanga jáuyanana Febe, Jesucristbeyeca bëngbe uabena, canýe tsabe entsá endmënama; cha chë Cencrea puebloca enefjuana ošbuáchiyënga endujabuachana.

<sup>2</sup> Tsábá cha šmochjofja, mo canýa Bëngbe Utabnábia quetsomñecá, ntšamo Bëngbe Bëtsabe entsanga entsamncá inýengataca jenofjana. Šmochjuájabuache ntšamo tbojtsajabotcá, er cha banga tonjújabuache; átsbioynaca.

<sup>3</sup> Atšbe cuenta Prisca y Aquila šmochjácheuaye, chë átšeftaca tbonjatrabajata, Cristo Jesusbïama oservëniñe. <sup>4</sup> Jobanámna bonjanprontana, atšë jatsbocama, ndoñe chašmondóbama. Atšë chama chata sëntsatacheuaná; y ndoñe nyë atšë, sinó nyëts luarenache enefjuana ndoñe judiënga ošbuáchiyëngnaca chca. <sup>5</sup> Chë ošbuáchiyënga, chë Bëngbe Bëtsá jëtschuayama chatbe yebnentšë jénefnama imuamanëngnaca, šmochjácheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtsošbuáchiyama. <sup>6</sup> María šmochjachuaye; cha tsëngaftangbeñe bëtscá tojtrabajá. <sup>7</sup> Chë cach atšcá judeocata Andrónico y Junias šmochjácheuaye. Chata canýe ora átšeftaca cárceloye bonjanëtámëna, y Jesucristbe ichmónëngbiama chata puerta uámanata bonjamna, y atšbiama más natsana tbojanontšë Jesucristbeñe jtsošbuáchiyama.

<sup>8</sup> Ampliato šmochjachuaye, atšbe bonshaná, er atšcá cha Bëngbe Utabnáftaca cánýiñe mo canýacá bondmëna. <sup>9</sup> Urbano šmochjachuaye, chë bëngaftaca Crístbiama oservëniñe trabajayá; y atšbe bonshana Estáquisnaca šmochjachuaye. <sup>10</sup> Apeles šmochjachuaye; cha ba soye tonjinyáñe Jesucristbeñe puerta yošbuáchemá; y Aristóbulbe yebnentšëngnaca šmochjácheuaye. <sup>11</sup> Chë cach atšcá judeocá Herodiön šmochjachuaye, y chë Narcisbe pamillëntšana Bëngbe Utabnábeñe ošbuáchiyëngnaca. <sup>12</sup> Trifena y Trifosa šmochjácheuaye; chata Bëngbe Utabnabiama puerta bondëtrabajá; y bëngbe bonshaná Pérsidnaca šmochjachuaye; cha bëtscá endëtrabajá, Bëngbe Utabnabiama oservëniñe. <sup>13</sup> Rufo, chë Bëngbe Utabnabiama uámana trabajayá, šmochjachuaye, y chabe mamánaca; cha mo atšbe mamacá endmëna. <sup>14</sup> Asíncrito, Flegonte, Hermes, Patrobas y Hermas šmochjácheuaye, y chë inýenga Jesucristbeñe ošbuáchiyënga chëngaftaca inmënutanangnaca. <sup>15</sup> Filólogo y Julia, Nereo y chabe uabena, Olimpas y nyëtsca Bëngbe Bëtsabe entsanga chëngaftaca inmënutanangnaca šmochjácheuaye.

<sup>16</sup> Nyëtscanga mo Jesucristbeyeca catšátangcá šmochjenchuaye, jtenámochëse, ntšamo cach tsëngaftangbe pamíllanga puerta bonshanánaca šmondëtsacheuanaycá. Nyëts luarenache enefjuana Crístbeñe ošbuáchiyënga cmontsacheuaná.

<sup>17</sup> Jesucristbeyeca catšátanga, atšë cbontsaïmpadana tsábá šmochjuáfsna y cuedado šmochtsebonma chë cánýenga inýengataca contra chamotsemnama y inýenga Jesucristbeñe ošbuáchiyana chamotsajbanama inmëtsamëngbiama; chëngna, chë tsëngaftanga ndaye šmojóyëngacñe buatëmbana soyëngama contra jtsoýebuambnayana. <sup>18</sup> Er chca amënga, ndoñe ntsentšënaná Cristo Bëngbe Utabná jtseservënaná, sinó jtsamana ndayá cachënga tmojtsebošcá, nyë cachëngbe cuerpama tsábá tojtsemncá; y tsabe y botamana palabréngaca

chê paselo jáingñama yomna entsanga jáingñana, chëngbe ainaniñe chëngcá chamotsejuab-nama. <sup>19</sup> Nýetsca entsanga tmojouena, chë Bëngbe Bëtsabe soyëngama ntšamo ínÿenga tcmojabuatambacá, tsëngaftanga corente šmnétsayaunana, y chíyeca atše puerte oyejuayá tsëngaftangaftaca sëntsemna. Atše sëntseboše, tsëngaftanga tsábá chašmotsetátšëmbo jt-samana ntšamo tsábá yomncá, y ntšamo bacna soyënga jamamna chašmotsemna mo ndoñe cuafsetatšëmbcá. <sup>20</sup> Y Bëngbe Bëtsá, nda inétsama bënga ainaniñe tsábe ebionana chamotsebmomna, ndoñe bën y echanjama tsëngaftanga Satanás chašmoyénjanama, mo cha tsëngaftangbe cucuatsiñe cuafjaboshjoncá. Atše sëntseimpadana Bëngbe Utabná Jesús, chaoma tsábe bendicionënga tsëngaftangbeñe chaotsemnama.

<sup>21</sup> Timoteo, chë átseftaca trabajayá, tsëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tsëngaftanga cmontsacheuaná.

<sup>22</sup> Atšnaca Tercio, chë Páblëbe cuenta quem tsbuanácha uabiamnayá, tsëngaftanga cbontsacheuaná, tsëngaftanga y átšnaca Bëngbe Utabnáftaca cánÿiñe mo canÿacá quet-somñecá.

<sup>23</sup> Gayo cmontsacheuaná; atše Pablo chabe yebnentše posada sëntsebmomna, y cha enduamana nýetsca chë muentša ošbuáchiyënga tsábá júbuajana. Erasto, chë quem pueblentša crocénana bojanÿá, tsëngaftanga cmontsacheuaná, y Jesucristbeyeca bëngbe catšata Cuártënaca.

<sup>24</sup> Atše, Bëngbe Utabná Jesucristo sëntseimpadana, cha chaoma tsëngaftangbeñe tsábe bendicionënga chaotsemnama. Chca chaotsemna.

*Quem tsbuanácha juapochócama, Pablo Bëngbe Bëtsábioye tbojtanchuá*

<sup>25</sup> Bënga sempre mochtsinÿanÿnaye Bëngbe Bëtsá puerte uamaná yomnama. Cha endobena jamama tsëngaftanga puerte chašmotsošbuáchema; y chca, cha echanjama ntšamo chë bënga fsëndabuayiná tsábe noticiënguiñe yomncá, ntšamo chë Jesucristbe buayenana soyënga yomncá, y ntšamo chë Bëngbe Bëtsá šojinÿanÿé ndegombre soyënga yomncá. Nýets tempo mëntscóñama, Bëngbe Bëtsá chë soyënga entsanga ndoñe tonjinÿanÿé, y chë causa chënga chë soye ndoñe ntsetatšëmbuana. <sup>26</sup> Pero morna, ntšamo Bëngbe Bëtsabe juabna oyebuambnayënga tmojanabemcá, tojama bëtscá entsanga chë ndegombre soyëngama chamotsetatšëmbuama; Bëngbe Bëtsá, chë nýets tempo vida bomná, tojanmandá entsanga nýets luarënguenache chë ndegombre soyëngama chamotsetatšëmbuama, chënga chábeñe chamotsošbuáchema y ntšamo cha yobošcá chamotsamama.

<sup>27</sup> Nýe canÿe Bëngbe Bëtsá endmëna, y cha nýets osertánana endbmomna. ¡Nýetscanga chamotsinÿanÿná cha puerte bëtsá y uamaná yomnama, ndayá Jesucristo tojanmama! Chca chaotsemna.

## 1 Corintios

*Pablo chënga jacheuayama*

<sup>1</sup> Atše Pablo, ndábioye Bëngbe Bëtsá tbojanchembo Jesucristbe ichmoná jtsemnana, Bëngbe Bëtsá chca yojábošeyeca, cányíñe chë Jesucristbeyeca catšata Sósteneseftaca, <sup>2</sup> quem tsbuanácha sentsabiamná tsëngaftanga chë Corinto bëts puebloca Jesucristbeñe ošbuáchiyëngbiama; ndëmuanyënga Cristo Jesúseftaca Bëngbe Bëtsá tojábiama chabe entsanga nýe chábioye oservénënga, ndëmuanyënga Bëngbe Bëtsá tojáchembo chabe entsanga chašmotsemnana, chë nýe quem luarama enójuabnaye entsanguentsana luarénënga, Bëngbe Utabná Jesucristbioye tmojotšëmbonëngaftaca, Jesucristo nda yomna Bëngbe Utabná y chëngbe Utabná. <sup>3</sup> Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnana, y tsëngaftangbe ainaniñe tsabe ebionana chašmotsebonnana.

*Bëngbe Bëtsá Jesucristbeyeca tojama tsëngaftanga ba tsabe bendicionënga chašmotsebonnana*

<sup>4</sup> Bëngbe Bëtsá tsëngaftangbiama sempre sëndbëtsatschuanaye, er tsëngaftanga cányíñe mo cányáca Cristo Jesúseftaca šmómnayeca, Bëngbe Bëtsá tsëngaftangbeñe toja juabó, tsëngaftangbe tsabiama. <sup>5</sup> Chca Cristoftaca šmómnayeca, Bëngbe Bëtsá tojama tsëngaftanga chašmotsebonnana chábenšana nyetsca tsabe soyënga, tsëngaftanga obenana chašmotsebonnana cha jamëse, Bëngbe Bëtsabe soyëngama jóyebuambayama y chë soyëngama chacmësertama. <sup>6</sup> Chca, ntšamo chonjanabuayinacá mo Jesucristbe ndegombre soyëngcá, tsëngaftángnaca inýengbioye tsábá šmojinýanyë ndegombre soyënga bëtsemnana, chë ntšamo jtsiyenama. <sup>7</sup> Y chca, Bëngbe Bëtsá chabe entsanga inétsatšatnaye tsabe soyënguentsana tondaye quecmochatabuáshebena, Bëngbe Utabná Jesucristo quem luarentše yochtonýna tescama Bëngbe Bëtsábeñe jtošbuáchiyëse chašmojtsobatmanëntscuana. <sup>8</sup> Cha echanjama tsëngaftanga chábeñe corente chašmotsošbuáchemba y ainaniñe bëts añemo chašmotsebonnana, ndayá tsëngaftangftaca jamama cha yojuabnacá chaojapochocantscuana; chca, chë Bëngbe Utabná Jesucristo nyetsca entsangbiama tsábá o ndoñe tsábá tmonjamama yochjayana te, ndocná chaondobená jayanana tsëngaftanga ndoñe tsábá šmonjama ca. <sup>9</sup> Bëngbe Bëtsá nyëts tempo jtsamana ntšamo tojašebuachenacá, y cha endmëna nda tcmojánachembo cányíñe mo cányáca chašmotsemnana chabe Uaquiñá Jesucristoftaca, Bëngbe Utabná.

*Choca ošbuachiyëngbeñe nyetscanga ndoñe cachcá montsanjuabná*

<sup>10</sup> Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nyetsca bëngbiama yomnana, tsëngaftanga nyetscanga cachcá chašmotsejuabnana, y tsëngaftangbeñe ndoñe más báseftanga canýe soye y inýenga inýe soye chamuat-sjuabná. Y aññe šmochtsiyena mo cányáca, nyetscanga cachcá jtsejuabnayëse y cachcá jamama jtsebošëse. <sup>11</sup> Jesucristbeyeca atšbe catšátanga, atše chca sënjayana, er Cloebe yebnentsënga šmonjabëuenaye, tsëngaftangbeñe šmojtsepenzentserama. <sup>12</sup> Ntšamo sentsichamcá entsemna ndayá tsëngaftangbentše báseftanga šmojtsechamo: “Atše Páblëbe ustoná sëndmëna ca”; inýengna imojtsichamo: “Atšna Apólosbe ustoná sëndmëna ca”; inýengna: “Atšna Pédrëbe ustoná sëndmëna ca”, y inýengna: “Atšna Cristbe ustoná sëndmëna ca” imojtsichamo. <sup>13</sup> Chca šmojtsechamo, jtsóbocanana mo cada básefta ošbuáchiyënga canýe Cristo tmojtsechomcá. ¿Pablo yojamna nda tmojanrucificá tsëngaftangbe tsabiama? ¿O tsëngaftanga uabáinënga šmómna, atše jótšëmbonëse, tsëngaftanga atšbe ústonënga bëtsemnana? <sup>14</sup> ¡Bëngbe Bëtsá sëndbëtsatschuanaye atše ndocná tsëngaftanguentsá tjanábayama; nýe Crispo y Gáybioye aññe! <sup>15</sup> Chca, ndocná quenátobena jayanana, atše jótšëmbonëse uabainá cha tojanoquedá ca, mo atšbeñe ošbuáchiyënga cuaftsemncá. <sup>16</sup> Estéfanasbe pamillentsëngnaca sënjanëbaye, pero ndoñe quetsatabouñýna inýa tjanábayama. <sup>17</sup> Er Cristo ndoñe chešnatánichmó inýenga jubáyama, ndayá chë chabe tsabe noticiëngama entsanga jábuayenama. Ndoñe chešnatánichmó chë soyënga jayanana, corente osertana entsangbe soyënga jtsichámëse; chca, entsanga Cristbeñe chamot-sošbuáchemba, ndoñe chë atšbe osertánanentsana palabrëngama, sinó nýe chë buayenánama, Cristo cruzoca bëngbiama tojanóbanama.

*Cristbeñe yomna Bëngbe Bëtsabe obenana y osertánana*

<sup>18</sup> Quem buayenánana, Cristo entsangbiama cruzoca tojanóbanama, chë pochocánënga jtsemnana tmojtsejñëngbioye jtsinýanana mo ndoñe corente juabna bomnëngbe soyca; pero bëngbiama, chë Bëngbe Bëtsá nyetsca tescama šochjátšebacangbiamna, quem buayenánana

jtsin'yan'yanana Bëngbe Bëtsabe obenana. <sup>19</sup> Ntšamo Bëngbe Bëtsá chabe uabemana palabrënguine tojanayancá:

Atše chanjama chë tša osertánëngbe osertánana tondayama chaondëtsoservénama; y chanjama chë ba soyëngama osertánëngbe osertánana tondayama chaondëtsámanama.

<sup>20</sup> ¿Ntsachetšá yojtsámama chë tša osertaná y chë puerte uatsjin'nyená tbojayana soyënga? ¿Ntsachetšá yojtsámama chë tša tsábá chë soyëngama juabnayá, morscá, y in'yingaftaca enatsëtsnaye ora chëngbe ayëñjaná tojayana soyënga? Ndegombre Bëngbe Bëtsá tojin'yan'yé, chë quem luarentša bëts osertánánaca tmojayana soyënga tondaye yonduámánama. <sup>21</sup> Bëngbe Bëtsá, nyets osertánana bomná quetsomñecá y puerte tsábá jtsejuabnayése, ndoñe tonjanaleenciá quem luarentša entsánga cha chamotsábuatmama, chë quem luarentšënga tša osertánënga tmojánayana soyëngama. Chamna, cha tsábá tbojanín'yanana chábeñe ošbuáchiyënga játebacana chë bënga fsëndabuayiná soyëngama, masque in'yingbioyna mo ndoñe corente juabna bomnabe soycá jtsin'yanana.

<sup>22</sup> Judiënga tša jtsebošana y Bëngbe Bëtsábioye jtsojtanañana bëts soyënga chaomama, chabe obenana jin'yan'iyama; y ndoñe judiënga tša jtseguayana chë puerte osertánëngbe soyënga jtsetatšëmbuama. <sup>23</sup> Pero bëngna Cristbiama entsánga fsëndabuayiná, chë in'yinga tmojancrucificabiama. Quem buayenánana chë judiënga ndoñe tsábá ntjéuénanana. Y ndoñe judiënga mondbetsejuabnaye chca yomna mo can'ye ndoñe corente juabna bomnabe soycá ca; <sup>24</sup> pero bëngbiama, nyetscanga Bëngbe Bëtsá chabe entsánga chamotsemnana šojáchembëngbiama, masque judiënga o ndoñe judiënga, Cristbeñe endmëna nyets Bëngbe Bëtsabe obenana y osertánana; <sup>25</sup> er ndayá Bëngbe Bëtsá tojamncá, Cristo cruzoca chaóbanama jalesénciase, banga jtsin'yanana mo can'ye ndoñe corente juabna bomnabe soycá, pero ndegombre endmëna can'ye puerte más osertaná tojama soye, lempe ntšamo entsánga imotatšëmbuama. Y ndayá cha tojamncá masque bángbioye jtsin'yanana mo can'ye tondaye obenabe soycá, ndegombre chë soye jtsin'yan'yanana Bëngbe Bëtsá puerte más obenana yobomnana, nyets obenana ntšamo entsánga imobomnana. <sup>26</sup> Jesucristbeyeca atšbe catšátanga, šmochtsejuabnaye ntšamo yojamnama, Bëngbe Bëtsá chabe entsánga chašmotsemnana tmojánachembo ora. Tsëngangbentše nyë báseftanga tša osertánënga šmojamna, ntšamo chë osertánana bomnënga imomnana entsánga mondbetsejuabnaycá; y báseftanga šmojamna becá mando atšetanënga o uámama pamillentsënga. <sup>27</sup> Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamotsëuatjama. <sup>28</sup> Bëngbe Bëtsá quem luarentšana tojanbocacá ndayá tondaye yonduamancá y ndayá in'yinga imuabotencá; tojanbocacá ndayá tondaye yonduamancá, chca, ndayá quem luarentše tša luamancá tondaye chaondëtsámanama. <sup>29</sup> Y chca, Bëngbe Bëtsabe delante ndocná quenátobena jayanana tša bëtsá cha yomna ca. <sup>30</sup> Bëngbe Bëtsá tojama bënga Crístoftaca cán'yiñe mo can'yacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tsábënga chabe bomin'yiñe chamotsemnana, chabe entsánga jtsemnana chamobenama, puerte tsábënga cach Bëngbe Bëtsacá, y atsebácanënga chamotsemnana. <sup>31</sup> Y chca, ntšamo Bëngbe Bëtsabe uabemana palabrënguine endayancá: "Nda tojtseboše jayanama cha can'ye uamaná yomna ca, chamna más tsábá cha bontsemna jayanama Bëngbe Utabná puerte uamaná yomna ca."

## 2

*Ntšamo Pablo Cristo crucificanábiam chënga tojanabuayená*

<sup>1</sup> Pero, Jesucristbeyeca atšbe catšátanga, Bëngbe Bëtsabe ndegombre soyëngama tsëngangtanga jábuayenama sënjána ora, chca sënjamna ndoñe chë uámanëngbe palabrëngaca, ni chë tša osertánëngbe palabrëngaca. <sup>2</sup> Y tsëngangtangaftaca sënjamna ora, ndoñe quetstëtseboše nyë ndayifñaca jatsjuabnayana, ndayá nyë Jesucristbeñe, nda bëngbe tsábiamna tmojancrucificá. <sup>3</sup> Atše tsëngangbentše sënjamna, mo can'ya ba soyënga jamama ndobenacá, y mo can'ya puerte auatjáca y tbojtsengmëmñacá, chabe trabajo jamama ndoñe jobenayama juabnaye causa. <sup>4</sup> Ntšamo cbonjanëtsëtsná y cbonjanabuayinacá atše sënjanoyebuambá ndoñe chë tša osertánëngbe palabrëngaca, tsëngangtanga jáyëñjanama chiñe chašmotsošbuáchema; pero aife tcbonjanayëñjaná, Bëngbe Bëtsabe Espiritu y chabe obenana tsëngangtanga jin'yan'iyése, <sup>5</sup> chca, tsëngangtanga Bëngbe Bëtsábeñe chašmotsošbuáchema, ndoñe nyë entsánga be osertánánaca, sinó Bëngbe Bëtsabe obenanama.

*Uámama Espiritbeyeca, Bëngbe Bëtsá jamana entsánga cha chamotsábuatmama*

<sup>6</sup> Pero, chë ya tmojashjáchënga Bëngbe Bëtsábeñe puerte jtsošbuáchiyama y chabe soyëngama corente jtsoertánama, chëngbeñe bënga fchandóyebuambaye becá osertánana bomna soyënga. Pero ndoñe quenátsmëna quem luarentša entsánga quem tempo

mondbétschamo soyënga, ni mora quem luarentşe amëndayënga soyënga, ndëmuanyënga ndoñe bën y ndocna obenana bomnënga mochanjëftsoquëda. <sup>7</sup> Y aïne, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentşa entsángbioye baytentscuana ndoñe tonjaninýanyë soyënga, y chca, entsánga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmëmana, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsëtsanga y uámanënga jtsemnana, cháftaca chë nyëtsca tescama yomna tsábe vida jtsebomnana. <sup>8</sup> Quem Bëngbe Bëtsabe puerte osertánana bomna soyënga endmëna canýe soye ndayá quem luarentşa amëndayënga ndoñe ntsësertánana, er chënga aïne matëñjanësértase, Bëngbe Utabnábioye chënga ndoñe matmëñjancrucificá, Bëngbe Utabná nda puerte bëtsá y uamaná yomna. <sup>9</sup> Bëngbe Bëtsabe uabemana palabrengüiñe quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiama Bëngbe Bëtsá tojaprontá soyënga, ndocná tonjinýe, ni tonjouena y ni mo tonjajuabó ca.

<sup>10</sup> Pero Bëngbe Bëtsá quem soyënga chabe Espíritoftaca bënga şojanýanyë, er chë Espiritu lempe jtsetatşëmbuana, chë Bëngbe Bëtsabe soyëngama puerte totcá josértama yomna soyëngamnaca.

<sup>11</sup> Entsángbeñe ndocná quenátobena jtsetatşëmbuana ndayá entsábe ainaniñe tomnana, sinó nyë chë entsábe espíritu, chë chábeñe yomná. Cachcá, nyë Bëngbe Bëtsabe Espiritu jtsetatşëmbuana ndayá Bëngbe Bëtsá tojuabnacá. <sup>12</sup> Y bëngna, Bëngbe Bëtsábicocana Espiritu tmojóyëngachë, ndoñe canýe quem luarentşa espíritu, chca, bënga chaşósertama chë Bëngbe Bëtsá tojama bënga chamotsebomna soyëngama, bëngbe tsábiamana cha jtsejuabnayëse. <sup>13</sup> Bënga chë soyëngama fsëndoyebuambná, ndoñe chë quem luarentşa entsángbentşana tífjuatsjinýe osertánana bomna palabrengaca, sinó chë Bëngbe Bëtsabe Espiritu şojabuatambá palabrengaca. Chca, Bëngbe Bëtsábicocana soyëngama bënga fsëndabuayinýa, Bëngbe Bëtsabe Espiritbentşana yóbocana palabrengaca, chë Uámana Espiritu ainaniñe imobomnëngbioye.

<sup>14</sup> Bëngbe Bëtsabe Espiritu ndoñe tondbomná, chabe ainaniñe ndoñe ntjóyëngaciána chë Bëngbe Bëtsabe Espiritbiocana yóbocana soyënga, er chë entsábiamana chë soyënga jtsemnana mo canýe ndoñe corente juabna bomnabe soyëngcá, y chabosertama cach ndoñe ntsobenana. Chca endmëna, er entsá jobenayana quem soyëngama jtsetatşëmbuana y josértama, nyë chabe ainaniñe chë Uámana Espiritu tbojsájabuachanëse. <sup>15</sup> Pero nda aïne chë Espiritu tbojtsebmomna jtsoebenana nyëtsca soyënga tsábá jinýama chabosertama, y ndocná chë Espiritu ndoñe tbondbomná ntsobenana josértana ntşamo chë Espiritu bomná yomnana. <sup>16</sup> Er Bëngbe Bëtsabe uabemana palabrengüiñe mëntsá endayana: “Ndocná quenátabuatma Bëngbe Utabnabe juabna, chábioye jabuatëmbama chaotsobenama ca.” Pero bënga, chë oşbuáchiyënga, mondobena jajuaboyana ntşamo Cristo yojuabnacá.

### 3

#### *Jatrabájama enutanánënga Bëngbe Bëtsá jasérviamana*

<sup>1</sup> Pero, Jesucristbeyeca atşe catşátanga, atşe ndoñe chiyanobená jóyebuambayama, mo tsëngaftanga chë Uámana Espiritoftaca mandánënga şmojatsmëncá, sinó nyë cachënga tsábá jtşomñama juabnënga bomna entsángbioycá, mo basetemëngbioycá, Cristbe soyëngama josértama ndobenënga. <sup>2</sup> Mo canýe bebmacă, chabe basetëmbioye nyë létşiyë jafşiyana y paselo jabmuánama sananga, chë básetema chcana jasama cabá ndoñe ntsobenana causa, cachcá, atşe cbonjanabuatambá Bëngbe Bëtsabiamana nyë chë más paselo josértama soyëngama, y ndoñe inýe soyënga más totcá josértama soyënga, er tsëngaftanga ndoñe queşmëñjatobena chca soyëngama josértana. Y ni mora, tsëngaftanga queşmátobena Bëngbe Bëtsabe soyëngama josértana, chë josértama más totcá yomna soyëngama; <sup>3</sup> er tsëngaftanga cabá şmojtsama, nyë ntşamo cach tsëngaftanga tsábá jtşomñama tsëngaftangbe juabnënga yomncá. Y tsëngaftanga ínýengaftaca cabá yapa şmojtsenántşaboşe y nyë ínýengbioye jayénjanama soyënga şmojtsamëntscuana, tsëngaftanga şmojtsama nyë ntşamo cach tsëngaftanga tsábá jtşomñama tsëngaftangbe juabnënga yomncá, y chca, tsëngaftanga şmojtsiyena mo chë nyë quem luarama enójuabnayë entsángcá. <sup>4</sup> Er canýa: “Atşe Páblëbe ustoná sëndmëna ca”, y ínýana: “Atşe Apólosbe ustoná sëndmëna ca” tojayana ora, chca jtsamana mo chë nyë quem luarama enójuabnayë entsángcá.

<sup>5</sup> Tsëngaftanga chca şmojamana, atşe şontsemna tsëngaftanga játjayana: ¿Ndayá Apolos yomna? ¿Ndayá Pablo? Chatna co nyë Bëngbe Bëtsábioye oservënata bondmëna, ndátbeyeca tsëngaftanga Jesucristbeñe şmojtsosbuachë, y bëndata cada ona fsënjama chë Bëngbe Bëtsá şojanýanyë trabajo. <sup>6</sup> Atşna, mo nda jajañe jénaye cuafuatbontsacá, tsëngaftangbeñe sënjanbojatsë chë trabajo, Bëngbe Bëtsabe soyëngama jábuayenama; y Apolos, mo nda chë jajañe matëngüiñe béjaye cuaftebuescñnacá, enjantrabája cach atşe sënjanbojatsë



chiñe; pero Bëngbe Bëtsá, ntšamo matatémënga chauájuaama endbetsamcá, tojama banga tsëngaftanguentše Jesucristbeñe chamotsosbuáchemá. <sup>7</sup> Ntšamo, chë jená y chë matënguñiñe béjaye buešcñayá ndoñe yapa ntšámanana chiñe shajuanënga chaóbocnama, nye Bëngbe Bëtsá aíñe, cachcá, nda Bëngbe Bëtsabiama entšanga jábuayenama trabáyo tojabojatšé y nda chentšana tojášhjangó cach trabajuñiñe jontšama, ndoñe ntjamana entšanga Jesucristbeñe chamotsosbuáchemá; nye Bëngbe Bëtsá chca jamana. <sup>8</sup> Chë jená y chë matiñe béjaye buešcñayá cach trabajuñiñe jtsentsénana, y chatna mo trabajayatcá jtsámanana; y cada ona juácanana ntšamo chabe trabáyo tomncá.

<sup>9</sup> Bëndata fsëndmëna trabájayata Bëngbe Bëtsabiama oservëñiñe, y tsëngaftanga šmondmëna mo Bëngbe Bëtsabe jajañcá, ndayentše cha yojtseboše tsabe jaja saná chaóbocnama, y šmondmëna mo chë cha yojtsejebuana bëts yebncá. <sup>10</sup> Er Bëngbe Bëtsá atšbe tsabiama jtsejuabnayëse, chë trabáyo šojabonyé, y atše mo canye puerte tsabe jebuanacá, canye yebna ndayíñe chaotsëcuañonama tojapormacá, sënjanbojatšé chë trabáyo, Bëngbe Bëtsabe soyëngama tsëngaftangbeñe jábuayenama. Chentšana inýa, mo chë inye yebna jebuaná tojabojatšé jábeuama chiñe más jatsjebuama nda tojatontšecá, cach atše sënjanbojatšé trabajuñiñe tojanontšé. Pero cada ona botamana chaotsantješna ntšamo chë trabáyo yojtsamama. <sup>11</sup> Mo chë cánýabentšana inye trabajayacá, ndoñe ntšobenana chë yebna jábeuama tojanbojatšé cha chë yebna chaotsëcuañonama tojanpormañe inye soye cachcá chaoservema jatspórmana, cachcá, ndocná chaondëtsabuatambá inye soyënga, nye ntšamo Jesucristbeñe soyënga yomncá aíñe, chë ntšamo atše natsana sënjanabuatambacá. <sup>12</sup> Chë Jesucristbiama más uámana soyënga buatëmbayá jtsemnana mo chë castellano, midio y inye uámana soyëngaca yebna jebuanacá; y chë Jesucristbiama nye nduámana soyënga buatëmbayana mo chë niñëbenga, butšajëshá y tëshenjñësheca yebna jebuanacá. <sup>13</sup> Y Cristo chaojësabo te, Bëngbe Bëtsá echanjínýañyiye ntšamo cada cánýabe trabáyo yomnama. Cha chë te iñesheca chca echanjínýañyiye, y chë iñesheca, Bëngbe Bëtsá echanjínýe y echanjínýañyiye ndaye trabáyo cada ona tojamama. <sup>14</sup> Ntšamo cada cánýabe trabáyo yojtsámanama jtsetatšëmbuama Bëngbe Bëtsá chaojinýe ora, cha chabe trabáyo aíñe yojtsámana ca queojayanëse, chë tsabe trabajayá Bëngbe Bëtsábiocana canye uacanana soye echanjóyëngacñe, er cha jtsemnana mo canye entšacá, nda canye yebna tojtsejebuana jtsejuinýama ndoñe paselo tondmëna soyëngaca. <sup>15</sup> Pero chë te cánýabe trabáyo nye nduámana yojtsámanama Bëngbe Bëtsá iñesheca chaojinýañyese, chora chabe trabáyo echántsemna mo chë jtsejuinýama paselo tomna soyëngaca jebuanabe soyëngcá, chentšana nyets yebna jtsejuinýana. Chë jebuaná jtsachana, pero chabe trabáyo lempe jobuëtšana. Cachcá, chë Bëngbe Bëtsabiama trabáyo tojtsamá, nye batšá oservena trabáyo, cha echanjobenaye atsbocaná jtsemnana, masque lempe ntšamo tojamcá tondaye queochaisoquéda.

<sup>16</sup> ¿O tsëngaftanga ndoñe šmondëtatšëmbo nyetscanga cánýiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnana, y tsëngaftanguentše Bëngbe Bëtsabe Espiritu yomnama? <sup>17</sup> Nderado nda tojama, tsëngaftanga nyetscanga cánýiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochohá, er chë Jesucristbeñe ošbuachiyëngcá cánýiñe imomñënga, jtsemnana mo chë Bëngbe Bëtsabe bëts yebncá, chabe entšanga nye chábioye jasérviamá; y tsëngaftanga chca šmondmëna.

<sup>18</sup> Ndocná cachá chaondëtsenoñgña. Nderado nda tsëngaftanguentšá tojtsejuabná cha tša osertaná yomna ca, ntšamo quem luarentša entšanga mondbëtsejuabnaye ntšamo canye puerte osertaná inëtsemnana, cha bontsemna jóbemama mo canýa ndabiama quem luarentša entšanga chamuayana cha corente juabna ndbomná yomna ca, chca, ndegom-bre corente osertaná jtsemnana chaobenama. <sup>19</sup> Er chë quem luarentša entšanga tša osertánënga imotátšëmbo soyënga, Bëngbe Bëtsabe bominýiñe yomna mo chë corente juabna ndbomnabe soyá. Bëngbe Bëtsabe uabemana palabrénguñiñe mëntšá endayana: “Bëngbe Bëtsá chë tša osertánënga jáyëñjanana, ndayá cachënga inýnga jáingña tša osertánánaca tmojtsama soyëngaca ca.” <sup>20</sup> Y mëntšánaca endayana: “Bëngbe Utabná endëtatšëmbo chë tša osertánëngbe juabnënga tondayama yondoservënama ca.” <sup>21</sup> Chíyeca, ndocná chaondëtsichamo corente uamaná yomna ca, ndaye entšabe ustoná tomnama, er lempe ntšamo šmobomncá, Cristbeñe ošbuachiyënga bëtsemnana, tsëngaftangbe tsabiama endmëna, y nyetscanga chë tcmojubabuachëngnaca cachcá. <sup>22</sup> Lempe tsëngaftangbe soye endëtšomñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca. <sup>23</sup> Y tsëngaftanga Cristbenga šmondmëna, y Cristna Bëngbe Bëtsábía.

<sup>1</sup> Entšanga entsamna bēngbiana jtsejuabnayana bēnga fstsemna Cristbe uajabuáchanēnga y Bēngbe Bētsabe soyēngama jtsabuátambayama trabajo bomnēnga, chē Bēngbe Bētsá baytentscuana entšángbioye ndoñe tonjaninñanyē, pero mora aīñe tojinñanyē soyēnga jtsabuátambayama trabajo bomnēnga. <sup>2</sup> Chca, nda canñe trabajo tojtsebojanñabiamna, chabe mandayá jtsobátmanana cha aīñe tšabe palabra bomná chaotsemnana. <sup>3</sup> Atšbe bariēna, tondaye quenatámāna, ntšamo tijamcá šmojinñe y ndoñe tšabá tijama ca šmojayanēse, o inñe entšanga cachcá tmojayanēse mo canñe tribunaliñcá. Ni cach atše ndoñe chca quetsátama, jtsetatšēmbuana ntšamo atšbe trabajuama tijayancá ndegombre tajojtsemnana. <sup>4</sup> Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bēngbe Bētsabe delante ndocna bacna soye ndbomná atše stsemna ca. Er Bēngbe Utabná endmēna nda atšbe trabajo yonýa y nda ndegombre yobena jayanama atše tšabá o ndoñe tšabá tijamama. <sup>5</sup> Chiyeca, tšēngaftanga ndoñe quecmátamna jinñana y jayanana inñenga ndoñe tšabá tmonjama ca, chē nñā chama tempo cabá ndóshjangüēntscuana, Bēngbe Utabná chama chaojésabo ora. Cha chaojésabo ora, puerta tšabá echanjinñanyē chē iytēmencá yomna soyēngama, mo ibetiñe cuaftsemncá, y botamana echanjinñanyē, mo binñiniñcá, ndayá jamama nñe chēngbe ainanoca entšanga tmojuabocá. Y chora Bēngbe Bētsá cada entšabiana echanjayana tšabe soyēnga, ntšamo tbojtsomerecencá.

<sup>6</sup> Jesucristbeyeca atšbe catšátanga, chē soyēngama tšabá jábuayenamna, atše sēnjama ntšamo Apolos y atše tifjatrabájama botamana chašminñama, y chca sēnjama tšēngaftangbe tšabiamna, ntšamo bēndata tifjamentšana chašmuatsjinñama jtsiyenana nñe ntšamo Bēngbe Bētsabe uabemana palabreñguēntscuana, y ndocná tšēngaftanguentšá canñe entšabiamna chaot-senábotamnaye, y inñabiana ndoñe tšabá chauátoyebuambnama. <sup>7</sup> Er, ¿nda chē inñēngbiana más uámanēnga tšēngaftanga cmojtsabiamná? ¿Y ndayá šmobomna, Bēngbe Bētsá ndoñe tcmojatšatá soye? Y tšēngaftanga chca chašmotsebomnama cha tojanmēse, ¿ndayeca šmojtsenabotamná mo Bēngbe Bētsabe tšetana soyēnga ndoñe tontsemncá, y nñe cach tšēngaftangbeyeca šmojonñencá?

<sup>8</sup> Tšēngaftanga šmojtsejuabná ya lempe ntšamo cmējabotcá Bēngbe Bētsábicana šmojtsebomna ca, y lempe ntšamo jtsebošama šmojtsobencánaca ca. Mo reyēnga cuaftsemnēngcá cmojtsabiona, bēngbentšana tondaye ntšējabotcá. Malaye tšēngaftanga mo reyēngcá šmojtsemna, Crístofaca cāññiñe jtsemándayēse; chca, bēngnaca tšēngaftangtaftaca jtsemnama, cāññiñe jtsemándayēse. <sup>9</sup> Atše šontsinñana, bēnga chē Cristbe ichmónēnga Bēngbe Bētsá šojábiana mo chē nyētschangbiana más nduamanēngcá, mo chē jōbanama yojtsamna entšangcá. Nyētsanga chē Bēngbe Bētsá tojábiamna bēngbioye jtšēñyana mo ndoñe cachca entšanga fstsemncá; angelēnga y entšángnaca cachcá bēngaftaca montsama. <sup>10</sup> Bēnga, Cristbiana oservena causa, quem luarentša entšangbiana fšēntsinñana mo corente juabna ndbomnēngcá; chē cuenta, tšēngaftanga šmojtsejuabná Cristbe soyēngama corente osertānēnga šmomna ca. Bēnga fšēndmēna chē entšangbe bominñiñe ndocna obenana ndbomnēnga; y tšēngaftangna šmojtsejuabná puerta obenana bomnēnga šmomna ca. Tšēngaftangbioye inñenga puerta uámanēnga y bētsētsanga jtšabiamnayana, pero chēnga bēngbioye jtšēbuayēñjana. <sup>11</sup> Y mēntscoñama, bēnga šontsabuashebebianana saná, ndayá jofšiyama y entšayá. Entšanga bēngbioye bacá jtšaborlánana, y tondaye yebna queftsátsbomna. <sup>12</sup> Y bēnga puerta jabuache fšēndētrabája cach bēngbe cucuatšēngaca. Entšanga šojóyanguango ora, Bēngbe Bētsá fchandbētsēimpadana cha chaoma chēnga tšabe bendicionēnga chamotsebomnama. Bēnga chamosufriña inñenga tmojtsama ora, bēnga chē soye fchandbētsoboyaye. <sup>13</sup> Inñenga bēngbiana bacá tmojtsoyebuambná ora, jtsababuāñyeshanēse fšēnduamana jtējuana. Quem luarentša entšangbe bominñiñe bēnga jtsemnana chē puerta nduámanēnga, mo chē quem luarentša basurēshēngcá, chē quem luarentša entšanga tondayama ndoservēnēnga, mo chē quem luarentša tsengacá; y chca endmēna mēntscoñama.

<sup>14</sup> Quem soyēnga ndoñe quechatēbuabiamná tšēngaftanga chašmotsēuatjama, sinó ndayá jábuayenama mo cach atšbe basēngbioycá, atšbe bonshánēnga. <sup>15</sup> Er masque tšēngaftanga mallajta abuátambayēnga chašmotsóbomñe, jacúntama ntjobenaycá, Cristbiana chacmotsabuátambama, ndoñe banga quešmátabamna tšēngaftangbiana mo taitangcá, Cristo Jesúsbeñe jtsošbuáchiyama tcmojanējabuachama. Nñe atše sēndmēna mo taitacá tšēngaftangbiana, mo ošbuachiyēngcá, er atše natsana tcbonjanabuayená chē tšabe noticiēnga Jesucristbiana, y tšēngaftanga chiñe šmontsanosbuaché. <sup>16</sup> Chiyecna, cbontsaimpadana ntšamo atše tijamcá chašmotsamama.

<sup>17</sup> Chama Timoteo tšēngaftangbioye sēntsichamná, atšbe bonshaná, canñe aīñe tšabe palabra bomná; Bēngbe Utabnábeñe tojanošbuachéyeca, atše Cristbiana sēñjanbuayinñá ora, mo atšbe uaquinacánaca cha endmēna, ntšamo chabe ošbuáchiyana yomnama. Cha echan-jama tšēngaftanga chašmuatenójuaboma ntšamo atše tšēngaftangbeñe tsjoyenama, Cristbeñe

oşbuachiyacá, ndayama atşe nyets tempo oşbuáchiyënga sëndbetsabatambaycá nyets luare oşbuáchiyënga eneffuanenache. <sup>18</sup> Tsëngaftanguentşe báseftanga ya şmojatsjuabná puerte uámanënga şmojtsemna ca, er şmojtsejuabná atşe stsauatja tsëngaftangbiöye jama jányama ca. <sup>19</sup> Pero Bëngbe Bëtsá chaşojalesenciase, sentsobátmana betscó tsëngaftangbiöye jama jányama. As chjinýe ntsache obenana imobomna chë Bëngbe Bëtsabe entsángcá jtsiyenama tša uámanënga imomna ca juabnayënga, y ndoñe nýe ntşamo jayanama imobencá. <sup>20</sup> Er Bëngbe Bëtsá canýe oşbuachiyabe ainaniñe tojtsemánda ora, chca jtsinýnana ndoñe nýe ntşamo tojtsichámuama, ndayá Bëngbe Bëtsabe obenana chábeñe tojtsemnama. <sup>21</sup> ¿Tsëngaftanga ndayá más şmattseboşe: atşe chayá tsëngaftangbiöye jaucácanama, o chayá tsëngaftangbiöye jányama puerte bonshanánaca y ntsetşatjaycá tsëngaftanga jauyanama?

## 5

*Ndaya cuanjama canýe boyabása shembásaftaca bacna soye amáftaca*

<sup>1</sup> Ndegombre nyets luariñe entsótatsëmbo tsëngaftanguentşe yojtsemna canýa, shembásaftaca bacna soye amá, y ntşamo cha yojtsamcá puerte bacna soye yojtsemna; ni chë Bëngbe Bëtsábiöye nduabuátmënga chca ntsamana: canýe entsá cachabe mamamnáftaca bacna soye yojtsama. <sup>2</sup> Y tsëngaftanga cabá şmojatsjuabná corente tsábenga şmomna ca, masque chca tsëngaftangbeñe yojtsopasánëse. Tsëngaftanga cmontsamna puerte ngménaca jtemnnana, tša uabouana soye cha yojtsama causa. Canýe entsá chca tojamáftacna, tsëngaftanga cmontsamna jamana cha ndoñe más tsëngaftangaftaca chaondenútanama mo oşbuachiyacá. <sup>3</sup> Y atşna, masque tsëngaftangaftaca choca ndoñe quetsátmëna, atşbe juabna choca tsëngaftangaftaca entsemna; y chca atşbe espíritoca sëntsemnayeca, Bëngbe Utabná Sojétsanatşetá mándoca, sënjajuabó y sëntsetatşëmbo ntşamo tsëngaftanga cmojtsamnama, chë entsá chca tojamáftaca. <sup>4</sup> Tsëngaftanga chaşmojénefna ora, chentşe atşbe espíritoca tsëngaftangaftaca atşe chántsemna, y atşbe espíritu chentşe echántsemna Bëngbe Utabná Jesusbe obenánaca. <sup>5</sup> Y chora tsëngaftanga cmontsamna jamándana chë entsá ya ndoñe más tsëngaftangaftaca mo oşbuachiyacá chaondenútanama, mo Satanasbe cucuatşine cha cuafjaboshjoncá, chca, chë quem entsá nýe cachá tsábá jtsomñiama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbocaná chaotsemnama.

<sup>6</sup> Tsëngaftanga şmojtsejuabná puerte tsábenga y uámanënga şmomna ca, pero şmojtselesencia canýa tsëngaftanguentşe chca chaotsamama. Chca ndoñe tsábá quenátsmëna. Tsëngaftanga ya şmondétatşëmbo, ntşamo chë nýe batşá levadura endbama, nyets arninýa chauábochema; cachcá, tsëngaftanguentşe canýa tša bacna soye chca tojama ora, nyetscangbiama ndoñe tsabe soyënga jóbocnana. <sup>7</sup> Chiyeca, tsëngaftanga cmontsamna, chca uabouana bacna soye tojamá jtabocnana, cha ya ndoñe más tsëngaftangaftaca mo oşbuachiyacá chaondenútanama; y chora tsëngaftanga şmochántsemna mo tsëm arninýacá, ndocna levadúraca, chë bacna juabnëngaca ya ndëmandánënga şmojtsémnayeca. Ndegombre tsëngaftanga chca şmondmëna, er Bëngbe Bëtsá tojama tsëngaftanga tsëm vida chaşmotsebomnama. Bashco fiesta ora, oveshá tmojanóba, Israeloca entsanga perdonánënga chamotsemnama. Cachcá Cristo, mo chë oveshacá, tojanóbana bacna soyënguentşana bënga játsebacama. <sup>8</sup> Ntşamo chë judiënga chë fiesta ora mondbamcá, nyets levadura ojamnana cachcá jonýayana, cachcá, bënga şontsamna jtsajbanana oyanana bacna soyënga inýengbiama jamama jtseboşëse, y ndaye bacna soye jtsamëse, ntşamo tempo imojanamcá. Ntşamo chë judiënga chë fiestiñe nýe levadúraca ndëpormana tandëse mondbetsesaycá, cachcá, bënga şontsamna jtsiyenana nyetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

<sup>9</sup> Chë inýe atşbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chaşmondëtsoyebuambná nyetsca chë quem luarentşënga boyabása o shembásaftaca bacna soye amëngaftaca, chë nýe cachëngbiama bëtscá soyënga jtsebmomna tša boşëngaftaca y atbëbanëngaftaca, y chë cachëngbe pormana soyënga diosënga yomnama jtsejuabnayëse adoraýëngaftaca ca; er nýa chca jamamna, tsëngaftanga cmattsamna quem luarentşana jëftsebocanana. <sup>11</sup> Ntşamo chora sënjanayancá endmëna ndayá tondayama ntscuénayana, chë Cristbeñe oşbuachiyá yomna ca tojayanáftaca, y boyabása o shembásaftaca bacna soye tojtsama, o nda nýe cachabiama bëtscá soyënga jtsebmomna tša tojtseboşe, o chë cachabe pormana soyënga diosënga yomnama jtsejuabnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entsángaftacna, ni mo şmuatjótëbema chëngaftaca cánýiñe jasama. <sup>12-13</sup> Atşe ndoñe queşnátsmëna jayanana chë ndoşbuáchiyënga, chë bëngaftaca ndoñe mondbénutananga, aifne o ndoñe tsábá tmonjamama. Bëngbe Bëtsá echántsemna nda chëngbiama yochjayana

ntšamo tmojamcá tšabá o ndoñe tšabá bétsemnana, tšéngaftanga ndoñe. Ndegombre nñe chë ošbuáchiyënga tšéngaftangafaca imñénutanangbiana cmontsamna chca jayanana. Chcasna, šmochjama ntšamo Bëngbe Bëtsabe uabemana palabrenguiñe endayancá: “Tšéngaftanga cmontsamna, chca bacna soye amá tšéngaftangbentšana jtabocnana ca.”

## 6

### *Ošbuáchiyënga jendemándama tojtsemna ora*

<sup>1</sup> Canñe tšéngaftanguentša ošbuachiyá inñe ošbuachiyabiana canñe demanda tojtse-bomna ora, ¿cha nanjá chë ndošbuáchiyënga mandadëngbioye chë soye chamojand-manama? ¿Ndáyeca chca nanjama, y ndoñe chë Bëngbe Bëtsabe entšángbioye nanjá chabe demanda chamouenama? <sup>2</sup> Tšéngaftanga ndegombre šmondétatšëmbo, Bëngbe Bëtsabe entšanga mochjayanama quem luarentša entšangbiana tšabá o ndoñe tšabá tmonjamama. Y chënga quem luarentša entšangbiana chca jayanama tmojtsohenë, ¿ndoñe montsobena más base soyëngama chca jayanama? <sup>3</sup> Tšéngaftanga ndegombre šmondétatšëmbo chë angelëngbiámnaca tšabá o ndoñe tšabá tmonjamama bënga moch-jayanama. Chcasna, bënga más jtsobenana chë quem luarentše jëftsiyenama soyëngama chca játayanana. <sup>4</sup> Y chcase, tšéngaftangbeñe chca demandënga chë quem luarentše jëftsiyenama soyëngama tojtsemna ora, ¿ndáyeca šmatjátëbuayana chë ošbuáchiyëngbiana tondaye tmonsámama entšanga, chë soyënga chamojandmanama? <sup>5</sup> Chca sënjayana tšéngaftanga chašmotsëuatjama: ¿O tšéngaftanguentše ni mo canña yondmëna corente osertaná, ošbuachiyëngbeñe demandënga chaojandmanama? <sup>6</sup> Pero ndoñe chca: ošbuachiyëngbeñe demandënga tojtsemna ora, mandadëngbioye jana chë soyënga chamo-jandmanama. Y chca jamana ndošbuáchiyënga mandadëngaftaca.

<sup>7</sup> Y tšéngaftangbeñe nñe demandënga jájandmanama tojtsemna ora, tšéngaftangbiana ya canñe puerta bacna soye jtemnana. ¿Ndáyeca ndoñe šmatšóboyaye inñenga bacá cmo-jtsaborlana ora? ¿Ndáyeca ndoñe cachcá šmatjonñaye inñenga cmojtsabiabëbanana ora? <sup>8</sup> Pero cach tšéngaftangafaca inñetšá copasana, inñengbioye bacá jtsaborlãnana y jtsabiabëbanana, y tšéngaftangcá Crístbeñe ošbuachiyëngbioynaca.

<sup>9</sup> ¿Tšéngaftanga ndoñe šmondétatšëmbo, chë bacna soye amënga Bëngbe Bëtsabe amëndayoye ndoñe mochanjámarshënguama? Ndoñe matenoíngñana. Ni chë boyabása o shembásafaca bacna soye amënga, ni chë cachëngbe pormana soyënga diosënga yomna ca jtsëuabnayëse adórayënga, ni cachëngbe boyá o shema inñafaca ingñayënga, ni chë boyabásenga mo shembasengcá jtsinñama bošënga, ni chë boyabásenga inñe boyabásengafaca bacna soye amënga, <sup>10</sup> ni chë atbëbanënga, ni chë nñe cachëngbiana bëtscá soyënga jtsëbomnana tša bošënga, ni chë tša tmoýënga, ni chë uayátseyayënga, ni chë inñëngbiana bacna soye jtsamëse imñétsatbëbanënga, chënga nñetscanga ndoñe quemochatobenaye Bëngbe Bëtsabe amëndayoye jamashjnama. <sup>11</sup> Y tempo báseftanga tšéngaftanguentšënga chca šmojanama, pero Bëngbe Bëtsá tšéngaftangbe bacna soyëngama tmojaperdoná, y chca entsemna mo bebëngënga cuaftsemncá; cha tojama tšéngaftanga chabe entšanga chašmotsemnana, nñe cha chašmotseservëngama, y tojama tšéngaftanga mo tšabengcá chabe bominñiñe chašmotsemnana. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espíritu tojamama.

### *Bëngbe cuerpo chaotsemna Bëngbe Utabná jtseservëngama*

<sup>12</sup> Mondbëtšichamo: “Atšbiana entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiana ntsemnana. “Atšbiana entselesenciana ndayánaca jamama ca”, pero ndoñe quichatslesencia ndaye sóynecna nñets tempo mandaná jatsmënana. <sup>13</sup> Mëntšánaca mondébëtšichamo: “Saná uafsbiana y uafsbíá saná chaoyëngacñama ca.” Pero Bëngbe Bëtsá canña te echanjama chë uta soye chaotsopochocama. Bëngbe Bëtsá entšabiana cuerpo ndoñe tonjanma, boyabása o shembásafaca bacna soye cha chaotsamama, sinó chë cuépoca Bëngbe Utabná bënga chamoservema, y Bëngbe Utabná bëngbiana tšabe bendicionënga chaotsamama. <sup>14</sup> Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

<sup>15</sup> ¿Tšéngaftanga ndoñe šmondétatšëmbo, Crístoftaca cánñiñe mo canñacá šmomnana yomna mo tšéngaftangbe cuerpo chabe cuerpentša soye cuaftsemncá? Tšéngaftangbe cuerpo Crístbioye jaserviama endmënayeca, tšéngaftangbe cuerpo jtemnana mo Cristbe cuerpentša soycá. ¿Ntšamo atše chjátobena atšbe cuépoca, chë ndayá yomna mo Cristbe cuerpentša soycá, canñe bacna vida bomna shembásafaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! <sup>16</sup> ¿O tšéngaftanga ndoñe šmondétatšëmbo, canñe entšá canñe bacna vida bomna

shembásaftaca tbojéninýena ora, chë útata jóbemana mo canýacá? Er Bëngbe Bëtsabe uabemana palabrënguine boyabása y shembása tbojéninýenama mëntśá endayana: "Chë útata mo canýacá bochántsema ca." <sup>17</sup> Pero canýe entśá Bëngbe Utabnáftaca cányiñe mo canýaca tojsemna ora, jtsemnana mo chë útata cach canýe espíritu tbojtsebo mnca.

<sup>18</sup> Nýa ndocna te canýe boyabása o shembásaftaca bacna soyënga šmattsama. Nderado ndaye inýe bacna sóynaca nda tojama ora, sempre jamana ndayánaca chabe cuerpentsana shjoye; pero boyabása o shembásaftaca bacna soye jamamna, lempe jamana nýe cachabe cuerpoca, y chë causa, chca jamëse, cachabe cuerpama más bacna soyënga jtsamana. <sup>19</sup> ¿Tšëngaftanga ndoñe šmondëtatšëmbo tšëngaftangbe cuerpo yomna mo canýe yebncá Uámana Espiritibama, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye. <sup>20</sup> Chca endmëna, er Cristo bënga játsebacama tojanóbana ora, yojamna mo cha bëtscá cuafjopagaca tšëngaftanga Bëngbe Bëtsábenga chašmotsemnana. Chíyeca, chë tšëngaftangbe cuerpëngaca chašmojtsuma soyëngaca šmochtsinýanýnaye Bëngbe Bëtsá puerte uamaná y bëtśá bëtsemnana.

## 7

### *Jobouamayama jábuayenama*

<sup>1</sup> Mora chanjóyebuambaye ndayá tšëngaftanga átšbioye šmojuábobemama. Ndegombre, canýe boyabásabiamas más tšabá endmëna ndoñe chaondobouamá. <sup>2</sup> Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá. <sup>3</sup> Boyábioye bontsemna jamana chabe shembiamas lempe ntšamo jamama ibomncá, boyá bëtsemnana; y chabe shëmnaca cachcá chabe boyabiamas chaoma. <sup>4</sup> Chë shembe cuerpo ndoñe nýe cha cányábiamas ntsemnana, sinó chabe boyabiámnaca. Cachcá, chë boyabe cuerpo ndoñe nýe cha cányábiamas ntsemnana, sinó chabe shembiámnaca. <sup>5</sup> Ni boyá, ni shema ndoñe chabondëtsejuabná jtsebníátšbuana. Aíñe chca copodena, pero nýe chë útata chca básefta tescama tbojénóyeunase, Bëngbe Bëtsáftaca jencuéntama jtseñtšenama. Pero chentśana chë útata entsamna cachíñe cányiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

<sup>6</sup> Atše chca sentsichamo, tšëngaftanga jábuayenama, ndayá jamama šmojtselesenciana, y chca ndoñe chašmondëtsamama jamëndama. <sup>7</sup> Y atšbe bariëna, atšbe juabna entsemna malaye nýetscanga chë soyënguine mo atšcá šmattsemna. Pero Bëngbe Bëtsá cada ona obenana tbojatšetá tšabe soyënga jamama, Cristbeñe ošbuáchiyënga jujabuáchama, ínýenga canýe soyama, ínýengna inýe soyama.

<sup>8</sup> Chë cabá ndbouamnënga y viudanga sentsëtsëtsná, chëngbiamas tšabá yojtsemna ntjobouamaycá joquédana, atšcá. <sup>9</sup> Pero chca jtsemnana cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nýe boyabásabiamas o shembásabiamas tša nýets tempo jësejuabnayana.

<sup>10</sup> Pero chë bouamnënga sentsamëndana shema chabe boyábioye ndoñe cachcá chabondetsonýa. Chca ndoñe nýe atše quetsatmëndana, ndayá cach Bëngbe Utabná. <sup>11</sup> Pero, shema cachcá chabe boyábioye tbojesonýase, cha bontsemna ntjobouamaycá jtsomñana o chabe boyáftaca cachíñe jtenútana. Y cachcá, chë boyá ndoñe quebnátsmëna chabe shema cachcá jesonýayana.

<sup>12</sup> Chë ínýenga chjáuyana, atšbe juabncá y ndoñe Bëngbe Utabnabe soycá, nderado canýe ošbuachiyá tbojtsebo mnna canýe shema Cristbeñe ndošbuachiyá, pero chë shema tojtseboše cháftaca joquédana jtсийenama, cha chë shëmbioye ndoñe cachcá chabondetsonýa. <sup>13</sup> Nderado canýe ošbuachiyá tbojtsebo mnna canýe boyá Cristbeñe ndošbuachiyá, pero chë boyá tojtseboše cháftaca joquédana jtсийenama, chë shema ndoñe chaondëtsejuabná cha cachcá jesonýayana. <sup>14</sup> Er Bëngbe Bëtsá tojama, canýe shembása ošbuachiyá chabe entśá chaotsemnana, nýe chábioye chabotseservënana, y chca, chánaca jtsejuabnayana chë shembásabe boyá Cristbeñe ndošbuáchiyabiamas mo chabiamas oservena entśacá, cha chëngbeñe mo canýe pamillécá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Cristbeñe ndošbuáchiyabiamas mo chabiamas oservena entśacá, cha chëngbeñe mo canýe pamillécá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondmëñayeca, canýa o nýets uta bëtšëtsatbe ošbuáchiyama, Bëngbe Bëtsá jtsejuabnayana chë básengbiamas mo chabe entšangcá. <sup>15</sup> Pero chë boyá o shema Cristbeñe ndošbuachiyá cachcá jtseñónýayama tša tojtsebošëse, chca chaboma. Chora, chë ošbuachiyá ndoñe ntsotocánana chë ínýaftaca cachíñe jtëtenútana, er Bëngbe Bëtsá tcmojáchembo natjëmbana chašmotsiyenama. <sup>16</sup> Chca šmochjama, er aca

shema ¿ntšamo cattsetátšẽmbo, tacuatjobenaye acbe boyá jayénjanana Crístbeñe chaotsošbuáchema, y chca, atsbocaná chaotsemnama? o aca boyá ¿ntšamo cattsetátšẽmbo, tacuatjobenaye acbe shema jayénjanana Crístbeñe chaotsošbuáchema, y chca, atsbocaná chaotsemnama?

<sup>17</sup> Masque ntšámnaca, cada ona chaotsiyena jtsamẽse ntšamo chẽ Bẽngbe Utabná tbojatsẽtá obenana yomncá, cada ona ndayá jamama Bẽngbe Bẽtsá tbojachembcá. Chca atše nyets luare ošbuáchiyẽnga enefjuanenache sẽndbẽtsamẽndaye. <sup>18</sup> Nderado Bẽngbe Bẽtsá cányabioye tbojachembo, y cha ín̄yengbeyeca chẽ más delicadentse base bobachtema tẽtsená tojtsemna, ntšamo chẽ judiẽnga monduamancá, cha ndoñe chaondẽtsenobiamná mo ndoñe judío cuafjatsmẽncá; y nderado Bẽngbe Bẽtsá cányabioye tbojachembo, y cha ndoñe chca tẽtsená tontsemnẽse, cha ndoñe chaondẽtsejuabná tẽtsená jatsmẽnana, ntšamo chẽ judiẽnga monduamancá. <sup>19</sup> Er ndayá iuámana, ndoñe quenátsmẽna chca tẽtsená jtsemnana o ndoñe, ndayá ntšamo Bẽngbe Bẽtsá yomandacá jtsamana. <sup>20</sup> Cada ona bontsemna jtseyẽfana, ntšamo jojoyencá, chabe entšá chaotsemnama Bẽngbe Bẽtsá tbojanchembo ora. <sup>21</sup> Bẽngbe Bẽtsá tmojanchembo ora, nyets tempo ín̄yabiamna oservená cojamnẽse, chama ndoñe cattsenócochin̄yena. Pero nderado tojtsemna ntšámose jashjáchama ndoñe más chca ntsemnama, cach acbiama jatrabájama, as chca cochjama. <sup>22</sup> Er chẽ nyẽ ín̄yabiamna nyets tempo oservená vojamná, Bẽngbe Bẽtsá chabe entšá chaotsemnama tbojanchembo ora, cha mora ošbuachiyacá, jtsemnana can̄ya ya ndoñe más bacna soyẽnga jamama juabnẽngaca mandaná, sinó Bẽngbe Utabnabiamna oservená. Cachcá, chẽ nyẽ cachabiamna trabajayá vojamná, Bẽngbe Bẽtsá tbojanchembo ora, mora cha nyets tempo Crístbe oservená jtsemnana. <sup>23</sup> Cristo bẽngbiama tojanóbana ora, vojamna mo cha bẽtscá cuafjopagacá, bẽnga Bẽngbe Bẽtsabe entšanga chamotsemnama. Ndoñe šmatjalesência nyẽ entsangbe juabnẽngaca nyets tempo mandánẽnga chašmotsemnama, y Bẽngbe Bẽtsabiamna chamotsebnẽtjomba. <sup>24</sup> Chcasna, Jesucrístbeyeca atšbe catšátanga, cada ona bontsemna Bẽngbe Bẽtsáftaca jtseyẽfana, ntšamo jojoyencá Bẽngbe Bẽtsá tbojanchembo ora.

<sup>25</sup> Y chẽ ndẽbouamna shembásengbiama, chẽnga aĩñe o ndoñe yontsamna jobouamayamna, atše chama ndoñe Bẽngbe Utabnabe can̄ye mando quetsátsbomna, pero chanjayana ntšamo atše tsjuabnacá. Bẽngbe Bẽtsá atšbe tsabiamna tojanjuabóyeca, entsanga montsobena jtsejuabnayana aĩñe tsabe palabra bomná chiñe atše tsmẽnana. <sup>26</sup> Atše šontsin̄yana, entšá ibojtsemna jtsomñana nyẽ ntšamo mora yotsomñcá, er bẽnga mora montsiyena puerte padecena soyẽnguiñe. <sup>27</sup> Shema tcbomnẽse, ndoñe cachcá catjẽftson̄yaye; y ndoñe tcondbomnẽsna, ndoñe catjátsẽnguaye. <sup>28</sup> Tcojobouamase, bacna soye ndoñe quécátama; y nderado can̄ye tobiáše tojobouamase, cach bacna soye ndoñe quenátama. Pero chẽ tmojtsobouamangna padecena soyẽnguiñe mochanjoyena quem luarentše chamojẽftsemnẽntscuana, y atše sẽntseboše chẽnga jujabuáchama chca jatiyenama ndoñe chaondẽtsamnama.

<sup>29</sup> Jesucrístbeyeca atšbe catšátanga, ntšamo sẽntseboše jayanamna mẽntšá entsemna: Cristo quem luaroye yochjésabo orscama ya nyẽ batšá entšajamna. Chiyeca, morscana y nyets tempo más chcoye, chẽ bouamnẽnga entsamna jtseyenana mo ndoñe bouamnẽnga tmontsemncá, o mẽntšá, entsamna jtsentšénana Bẽngbe Bẽtsabe soyẽnguiñe, y ndoñe nyẽ chẽ bouamná bẽtsemnama tbojtsemna soyẽnguiñe. <sup>30</sup> Cachcá, chẽ puerte ngmẽnaca tsá ošachiyiñe imomnẽnga, entsamna jtseyenana mo ndoñe chca tmontsemncá; y chẽ puerte oyejuayẽnga, chamotsiyena mo ndoñe chca tmontsemncá; chẽ soyẽnga buamnayẽnga chamotsiyena mo tondaye chẽngbe soye tontsemncá. <sup>31</sup> Chẽ quem luarentša soyẽngaca jtseyenama imojtsentšénẽnga entsamna jtseyenana mo ndoñe chca tmontsamcá, er quem luare ntšamo bẽnga mora monduabuatmncá, pronto echanjochnẽngo.

<sup>32</sup> Atše sẽntseboše tsẽngaftanga ndoñe chašmondẽtsenocochin̄yena. Can̄ye entšá ndoñe bouamná tontsemna ora, jtsobenana jtsentšénana Bẽngbe Utabnabe soyẽngama jtsejuabnayama, y ntšamo oyejuayá cha jabemama; <sup>33</sup> pero chẽ bouamná nyets tempo jtšenócochin̄yenana quem luarentša soyẽngama, jtseyenama, y ntšamo chabe shema oyejuayá jtsebmomnama; <sup>34</sup> y chca, cha uta soyiñe can̄ye ora jtsentšénana. Chẽ ndẽbouamna shembása y chẽ tobiáše bontsobena jtsentšénana Bẽngbe Utabnabe soyẽnguiñe sempre jtsejuabnayama. Chẽnga mondobena jtsentšénana Bẽngbe Bẽtsá jasẽrviamna, ndayá chẽngbe cuérpoca y chẽngbe espíritoca tmojamama. Pero ín̄yetšá, chẽ bouamna shembásana, nyets tempo jesenócochin̄yenana quem luarentše vida jtsebmomnama soyẽngama, y ntšamo chabe boyá oyejuayá jtsebmomnama.

<sup>35</sup> Atše chca cbontsẽtsẽtsná tsẽngaftangbe tsabiamna, y ndoñe jamẽndama ba soyẽnga jamama ndoñe chašmondẽtsobenama, ndayá ntšamo tsabá yomncá chašmotsiyenama, y nyẽ Bẽngbe Utabná jtseervẽnama chašmotsentšénama.

<sup>36</sup> Nderado nda tojtsejuabná chabe uatsẽtsnaye tobiášeftaca jtsobouamayama ibojtsemna ca, chca jamama chẽ tobiáše ya bẽtsá tojtsemnayeca, y chca jamama tsá tsabá

yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntšamana. <sup>37</sup> Pero nderado inya, tondaye obligacionaca tontsemna y lempe ntšamo tojtsebošcá cha tojt sobena jamama, cha tšabá tojajuabó y chabe ainaniñe corente tojtsetátšẽmbo, ndoñe ntšobouamayana tšabá yomna ca, cha tšabá chca jtsamana. <sup>38</sup> Chcasna, chẽ tobiáseftaca tojtsobouamá chana, canye tšabe soye jamana; pero chẽ ndoñe cháftaca tonjobouamá chana, canye más tšabe soye jamana.

<sup>39</sup> Chẽ shembása bouamná jtsotocánana chabe boyáftaca sempre jẽtsiyenana, chẽ boyá vida tojtsebošnẽntscuana; pero chẽ boyá tojóbanẽse, cha jtsobenana cachiñe jtbouamayana, nda cha tojtsebošáftaca, pero chca chaoma mo canya Bẽngbe Utabnáftaca cányĩñe mo canyacá quetsomñecá. <sup>40</sup> Pero atse jayanamna, cha más oyejuayá nántsemna ndoñe tontóbouamase; y sẽntsejuabná, átšnaca tsbomna chẽ Bẽngbe Bẽtsabe Espiritu chašotsebuayiyina.

## 8

### *Uátšẽmbona saná entsangbe pormana soyẽngama*

<sup>1</sup> Mora chanjõe buambaye ndayá tšẽngaftanga atse šmojatjama, ndayá jtsesayama, chẽ tempo inyẽnga cachẽngbe pormana soyẽnga, diosẽnga yomna ca jtsejuabnayẽse jadórana tmojanátšẽmbona soyẽngama. Bẽnga mondẽtatšẽmbo bẽnga nyẽtscanga osertánẽnga imomnama. Canya tbojtsosertana ora, cha nderado nanjájuaboye, chca bẽtsemnama puerte uamaná cha yojtsemna ca, pero canya, inyẽnga tojtsababuánỹeshana ora, cha jtsobenana chẽnga becá jujabuáchana. <sup>2</sup> Nderado nda tojtsejuabná ndegombre canye soye yotátšẽmbo ca, cabá ndoñe yontsetátšẽmbo ndayá jtsetatšẽmbuama ibojtsemncá. <sup>3</sup> Pero nderado nda Bẽngbe Bẽtsábioye tbojtsebobonshana, Bẽngbe Bẽtsá chábioye jtsabuatmana mo chabe entsácá.

<sup>4</sup> Y chẽ tempo inyẽnga cachẽngbe pormana soyẽnga, diosẽnga yomna ca jtsejuabnayẽse jadórana uátšẽmbona soyẽngama, atse šcuayana: bẽnga corente mondẽtatšẽmbo chẽ chẽnga imnẽtsadorana soyẽnga, diosẽnga yomna ca jtsejuabnayẽse, ndegombre ndoñe dios quemátsmẽna y nẽ canya Bẽngbe Bẽtsá endmẽna. <sup>5</sup> Pero masque celoca y quem luarentse chamomna entsangbiama “diosẽnga ca” uabáinẽnga (ntšamo ndegombre endmẽncá, banga quem luarentša tsbanánoca obenánaca mondmẽna, entsangbiama diosẽnga ca ubuátmẽnga, y banga bẽts mándoca entsangbiama “utabnẽnga ca” uabáinẽnga), <sup>6</sup> bẽnga chẽ ošbuáchiyẽngbiama nẽ canya Bẽngbe Bẽtsá endmẽna, Bẽngbe Taitá, ndábentsana nyẽtsca soyẽnga yóbocana, y nẽ nda jtseservẽnama bẽnga imoyena. Y nẽ canye Utabnánaca endmẽna, Jesucristo, ndábeyeca nyẽtsca soyẽnga yomna, y cach bẽngnaca imomna.

<sup>7</sup> Pero nyẽtsca ošbuáchiyẽnga ndoñe chca quemátstatšẽmbo. Básefta entsanga, Cristbeñe cabá ntsošbuáchiye ora, imojanamana ndaye sanánaca juatšẽmbonana, chẽ chẽnga imojanjuabná diosẽnga yojamna ca soyẽnga jadórana; chẽnga, chca uatšẽmbonana tmojtesá ora, jtsejuabnayana chca uatšẽmbonana bẽtsemnama, y ainaniñe juabnẽnga jtsebošnana ndoñe tšabá tmonjamama, chana tmojase causa. Chẽnga, ndayá tempo imojánamama, ndoñe quemátobena tšẽngaftangcá jtsejuabnayana, chcana jasana bacna soye ndoñe yondmẽna ca. <sup>8</sup> Ndegombre, ndayá bẽnga tmojtesacá ndoñe ntjamana bẽnga Bẽngbe Bẽtsábioye más chamuatobẽconama. Bẽnga Bẽngbe Bẽtsabe bominyĩñe ndoñe quemochátsmẽna más tšábẽnga aĩñe tmojtesama; ni ndoñe chcanga, ndoñe tmontsesá causa.

<sup>9</sup> Pero cuadado šmochtsebomna, ndayá jamana yolesenciánama tšẽngaftanga corente tšabá smotatšẽmbuama, ndayánaca jatsmana, y chca causa inyẽnga, chẽ soyẽnguĩñe más batsá ošbuáchiyẽnga y osertánẽnga, ntšamo tšẽngaftanga šmojtsamcá chamuatsmama, y chentšana, chẽngbe ainaniñe juabnẽnga chamotsebomna y chẽngbiye chaotsẽtsẽsná ndoñe tšabá tmonjama ca. <sup>10</sup> Er, aca chẽ soyẽngama tatšẽmbuá, nderado tcojót bema jasama canye luarentse, canye soye ndayama entsanga dios yomna ca jtsejuabnayẽse adrayẽntse, y canye Cristbeñe ošbuachiyá tojtsebomna ainaniñe juabnẽnga ndoñe tšabá tonjamama, chca tojáseyeca, aquẽcá chẽ soyẽngama ndoñe yondẽtatšẽmbo causa, y cha nderado chentse cojtsesama tmojnyẽse, chẽ soye nanjobenaye chábioynaca jañẽmuana chẽ saná jasana, chẽ tempo chẽ soyẽngama tmojanátšẽmbona saná. <sup>11</sup> Y chca aca, chẽ soyẽngama ntšamo betatšẽmbuama tcojamama, catjama chẽ Jesucristbeyeca acbe catšata, chẽ ndoñe corente ošbuachiyá, y ndoñe aquẽcá chẽ soyẽngama corente tatšẽmbuá, cha pochocaná chaotsemnama, er chabe ainantẽse echántsemna juabnẽnga canye bacna soye tojamama, chẽ saná tojasama. Chca nderado cányábioye catjama, ndabiamna Cristo tojanóbana, cha jatsbocama. <sup>12</sup> Jesucristbeyeca acbe catšatbiama chca bacna soye tcojama ora, chca causa cha canye soye tojama, ndayama chabe juabnẽnga ainaniñe chabotsatsẽtsná ndoñe chca chaondẽtsama ca; y chca, chentšana tša tojesejuabná cha canye bacna soye tojamama, acna canye bacna soye jamana, ndoñe nẽ chẽ catšatbiama, ndayá cach Cristbiámnaca. <sup>13</sup> Chiyeca, nderado

ndayá atše stsesama, atše tsjama Jesucristbeyeca atšbe catšata chaoma canye soye y chca jamama chabiam canye bacna soye tojtsemnése, más tsabá nántsemna ndocna te chë soye atše ntjasana, chca, atše ndoñe jatsmama cha canye bacna soyiñe chaótsatsama.

## 9

### *Jesucristbe ichmónëngbe derecho*

<sup>1</sup> Ndegombre endmëna, atše ndayánaca jamana stselesenciánaca y Moisesbe leyëngaca ndoñe más mandaná sëntsemnaca. Cach ndegombre endmëna, atše canye Jesucristbe ichmoná tsmënama y Jesús Bëngbe Utabná tijinyama; y cach tsëngaftanga mora ošbuáchiyënga jtsemnése, šmondmëna ndayá tojóbcna Bëngbe Utabnabiam atšbe trabajuentšana. <sup>2</sup> Masque inyënga atšbiam ndoñe quematsjuabná atše canye Jesucristbe ichmoná tsmëna ca, tsëngaftangbiamna aifne chca endmëna; er tsëngaftanga Cristbeñe ošbuáchiyënga šmondmëna y Bëngbe Utabnáftaca canyñe mo canyáca šmondmëna, puerte tsabá šmontsinyanyna atše Jesucristbe canye ichmoná tsmënama.

<sup>3</sup> Mëntsá chanjayana chë atše ndoñe tsabá tijama ca imojtsichámëngbiam: <sup>4</sup> Ndegombre bënga nyets derecho fsëndëtsóbomñe jtsobátmanama tsëngaftangbentšana, chë tchojujabuáchëngbentšana, bëngbe trabajuama saná o ndayá jofšiyama chašcuaredadama. <sup>5</sup> Y bëngnaca derecho fsëndëtsóbomñe canye shema ošbuachiyá jtsebmomna y bëngaftaca cha jëfšbetsama inyë luaroye fštsajna ora, ntšamo chë Jesucristbe inyë ichmónënga, Bëngbe Utabnabe catšátanga y Pédrënaca mondbetsamcá. <sup>6</sup> ¿O nýe Bernabé y atše šojtsëtocana cabëndatbe cucuatšëca jatrabájana vida jtsebmomna, y ndoñe derecho fsëntsebmomna ošbuáchiyënga chašotsacuédanama, Bëngbe Bëtsabiam trabájayama? <sup>7</sup> ¿Ndëmua mo canye soldadcá tojtsoservená, ndayá tbojtsájabotama cachá nantsatopagana, vida jtsebmomna? Ndocná canye jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanýenana, chë tojabuatëba lëtsiyëntšana ndoñe ntjofšiyama. <sup>8</sup> Ntšamo atše muentše sëntsichamcá ndoñe nýe entšangbe juabna quenátsmëna; y Moisesbe leyifnaca cachcá endayana, <sup>9</sup> er chabe leyiñe mëntsá endayana: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtšenaye ca.” Y chca ndoñe quenátayana Bëngbe Bëtsá nýe toronga inétsanýena ca, <sup>10</sup> sinó inyë más bëts soye; chca endayana ndayá ndegombre bënga, chë Bëngbe Bëtsabiam soyëngama abuayinyayñe trabájayënga cha šnetsanýena ca. Chca tmojanábema bëngbiam, er chë fshantse arayá y chë meshënga atbanayá, entsamna chca jamana jtsobátmanëse, chë tmojábabe shajuanentšana batšá jýyëngacñama. <sup>11</sup> Y chca, bënga chë tsabe noticiënga tchojábuaýenase, y chca, Bëngbe Bëtsábionaca tsabe bendicionënga chašmotsebmomna bënga tifjama, ndoñe yapa tanandátsmëna tsëngaftanga jótjañana, chë šmobomna soyënguentsana bënga jëfšiyenama chašcuatšatama. <sup>12</sup> Inyënga derecho tmojtsebmomna tsëngaftanga jótjañana chë šmobomnentsana chašmuacaredadama, tsëngaftangbeñe chëngbe trabajuama, as bënga más derecho fštsebmomna chca jamana.

Pero bënga tondaye checbatamëndá, bënga chë derecho bëtsebmomnayeca. Chca játamamna, bënga lempe fsëntsoboyá, chca, bënga tondaye ntjámama, y chë causa entsanga ndoñe chašondëtsayaunana, bënga chë tsabe noticiënga fštsabuayinyá ora. <sup>13</sup> Tsëngaftanga šmondëtatšëmba, Bëngbe Bëtsabe bëts yebnoca trabájayënga Bëngbe Bëtsabiam oservëñe, mondbóyëngacñe chënga jasama, ndayá entsanga Bëngbe Bëtsá jadórana chabe bëts yebnoye tmojiyëbo sananguentšana. Y chë Bëngbe Bëtsá jadórana soyënga amënga, altaroca, chë juatšëmbonama luarentše, chënga jasana ndayá chentše tmojuatšëmbona soyënguentsana. <sup>14</sup> Cachcá, Bëngbe Bëtsá tojamandá, chë tsabe noticiënga abuayinyayënga, vida jtsebmomnamna lempe ntšamo tojtsëjbotcá chamóyëngacñe ca, chë tsabe noticiënga abuayinyayama. <sup>15</sup> Pero atše ndocna te chiyaisemandá inyënga chca chašmotsecuédanama, atše chë tsabe noticiënga abuayinyayá bëtsemnaca chca derecho tsbómnyeca, y cach ndoñe mora quem soye quecbatëbuabiamná, tsëngaftanga ndayánaca atše chašmuatšetama. Atšbiam más tsabá nántsemna jóbana, y ndoñe ntjalesénciana inyá chaoma atše cach atšbiam oyejuayá ndoñe ntjátsmënama, inýëngbentšana soyënga stjýyëngacñe causa.

<sup>16</sup> Atše ndoñe quetsatsjuabná atše canye bëts soye stsama ca, chë tsabe noticiënga stsabuayinyama, er atše obligaciönaca sëntsemna chca jtsamama, Bëngbe Bëtsá chama šojanchëmboyeca. ¡Tsá lastemcá atšbiam nántsemna, chë tsabe noticiënga ndoñe sëntsabuayinyase! <sup>17</sup> Chiyeca, atše chë tsabe noticiënga stsabuayinyá nýe atše chca jamama stsebóseyeca, atšbe uacanana soye ya stsebmomna; pero atše chca stjama, y ndoñe tontsemna nýe atše chca jamama stsebóseyeca, masque chca, atše stsama, ndayá jtsamama Bëngbe Bëtsá šojanbonýecá. <sup>18</sup> Y chca, atšbe uacanana soye endmëna atše oyejuayá



jtsemnana chë tšabe noticiënga abuyaiynayama, ošbuachiyëngbentšana atše vida jtsebmomnana tondaye ntjatoyëngacñëcá; chca, atše tondaye quetsátama chë tšabe noticiënga abuyaiynayama tsomna derëchoca, chë atšbe trabajuentšana vida jtsebmomnana.

<sup>19</sup> Atše, masque ndocna entšábeyeca nyëts tempo mandaná quetsátsmëna, puerte nduamáná sënjobema, mo canya nyëts tempo inýabeyeca mandanáca, nyëtscanga jaserviama, chca, atše chca jtsamëse, jobenayama becá entšanga, ntšamo tojopodecá, jayëñjanama Cristbeñe chamotsošbuáchemá. <sup>20</sup> Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyëñjanama Cristbeñe chamotsošbuáchemá. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyëñjanama Cristbeñe chamotsošbuáchemá. <sup>21</sup> Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyëñjanama Cristbeñe chamotsošbuáchemá, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá. <sup>22</sup> Chë nýe batsatema ošbuachiyëngbiamna y Bëngbe Bëtsabe soyëngama nýe batsatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Cristbeñe chamotsošbuáchemá. Y lempe chca, chë atše jamana ntšamo nyëtscanga imomncá atše chaitsemnama, endmëna atše jobenayama báseftanga jáyëñjanama Cristbeñe chamotsošbuáchemá.

<sup>23</sup> Atše lempe chca sëndama, bëtscá entšanga chë tšabe noticiënguñe chamotsošbuáchemá, y chca, atše atsbocaná chaitsemnama y chëngcá atše chayóyëngacñama, chë atsebácanënga Bëngbe Bëtsá yochjatsataye tšabe soyënga.

<sup>24</sup> Tšëngaftanga šmondëtatšëmbo, canýe luaroye jashanguama entšanga tmojótjajo orna, banga tojtajuana, pero nýe canya chë uacanana soye jóyëngacñana. Chcasna, mo chë uacanana soye jóyëngacñama tmojotjajëngcá, tšëngaftanga cmontsamna jtsiyenana, chë Bëngbe Bëtsábiocana uacanana soye josháchiñama. <sup>25</sup> Nyëtscanga chë tmojótjajënga inýenga jáyëñjanama, chënga jopróntana nyëtsca soyënguñe jtsenomándayëse, chca, canýe uacanana soye, tsbuanachëngaca uapormana coronésha juayëngacñama; y chësha bëtscó jtsanctana. Pero bënga ndoñe; bënga mondoyena Cristbiamna soyënga jtsamëse, Bëngbe Bëtsábiocana ba tšabe soyënga mo uacanancá jóyëngacñama, y chë soyënga nyëtsca tescama bënga mochanjëftsebmomna. <sup>26</sup> Y atšna, atšbe bariëna sëndëntšëna Bëngbe Bëtsá jtsešervënama, ndoñe mo canya inýengbioye jáyëñjanama tojtajjuacá, chë ndëmoye jashanguama yomnama ntsetatšëmbcá; y cach ndoñe mo nda tojtsepelíá orcá, chora, cha nýe inýoye chabe buacuatšënga tojtsëtšana y chë inýabe cuerpoye ndoñe. <sup>27</sup> Mo canýe tšabe peliayacá, chabe cuerpo jätsetšëna y chca chë cuerpo corente jtsemándayana, atše ndoñe quetsatslesëncia chë atše tšabá jtsomñama atšbe ainanentšá juabnënga chašotsemándama; y chca, Cristbioye jtsešervënëse chamotsiyenama inýengbioye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

## 10

### *Cach entšangbe pormana soyënga ndoñe chamondëtsadoránama jábuayenama*

<sup>1</sup> Jesucristbeyeca atšbe catšátanga, atše sëntseboše tšëngaftanga chašmotsetátšëmbo bëngbe tempsca bëtš taitanga judiënga, chënga nyëtscanga Bëngbe Bëtsá canýe jantšëtšesheca benache yojaninýanýná, y chënga nyëtscanga, chë Buángana ca uabaina mar bejayëjana tmojánachnëjna, chiñe mo bojojuiñe cuafstomñcá. <sup>2</sup> Chë jantšëtšesheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga. <sup>3</sup> Chënga nyëtscanga tmojanse cachca saná, chë Bëngbe Bëtsá celocana tojanichmó saná; <sup>4</sup> y nyëtscanga tmojanofšë chë Bëngbe Bëtsá tojanma chë peñšentsšana chaóbocna bėjaye. Cristo chëngaftaca yojtsemna jtsanýënama chënga imojtsajnëntscuana, y ntšamo chë peñšentšë chëngaftaca tojanopasacá, yojaninýanýná Cristo chënga yojtsanýënama. <sup>5</sup> Masque chca, banga chënguentsšënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entšanga ndoyenentšë.

<sup>6</sup> Lempe chca tojanopasá bënga jinýanýiyama y jábuayenama ntšamo inopása entšanga bacna soyënga jamama tmojtseboše ora, bënga chca jamama ndoñe chamondëtsëbošama. <sup>7</sup> Chíyeca, tšëngaftanga ndoñe šmattsadorana entšangbe pormana soyënga, ndayama inýenga jtsejuabnayana diosënga yomna ca, ntšamo báseftanga israeloquënga tmojanmncá. Ntšamo Bëngbe Bëtsabe uabemana palabrenguñe chëngbiamna endayancá, chënga canýe ternerá castellánoca tmojanpormá ora, mo dios cuafstsemncá jadórama: “Entšanga tmojanotbiamna jasama y jatmuama, y chentšana tmojantsbaná joboyeuama ca”. <sup>8</sup> Boyabása o shembásaftaca bacna soyënga ndoñe šmattsama, ntšamo báseftanga chënguentsšënga tmojanmncá, y chë causa, nýe canýe te, uta bnëtsana y unga uaranga entšanga tmojanóbana <sup>9</sup> Bacna soyënga ndoñe šmattsama, jinýama buetatescama Bëngbe Utábná uantado

yochjëftsemnana y ndoñe šochanjacastígayama. Báseftanga chënguentsënga chca tmojanma, y chë causa tmojanóbana mëtšcuayéngaca ftëtšenëga. <sup>10</sup> Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmca, y chë causa, chë ángel obanayá tojanma chënga chamóbanama.

<sup>11</sup> Lempe chca bëngbe tempca bëts taitángaftaca tojanopasá, bënga jinýanýiyama ntšamo jtsiyenana šojtsamnana, y Moisés, Bëngbe Bëtsabe uabemana palabrénguñie chca tojëftsanboshjona bënga jabuátambama, bënga, chë Jesucristo yochjésabo orscama ya batsatema yojtsájamna ora oyenëngbiama. <sup>12</sup> Chcasna, nda tojtsejuabná Bëngbe Utanabiama tšabá yojtsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatsama. <sup>13</sup> Ndocna entšá jatócochënguana bacna soyënga jamama, ntšamo tempo inýënga ndoñe tonjanocochëngcá cachca bacna soyëngama, pero tšëngaftanga corente šmondétatšëmbo Bëngbe Bëtsá sempre cmochtsëjabuachanama chë padecena soyënguñie, y cha ndoñe yochanjalesciencia bacna soyënga jamama chacmócochënguana, tšëngaftanga chca soyënga jamama jtsóboyayama obenana ntsebmncá; pero chë padecena soyënguñie chašmojtsemna ora, cha cmochanjinýanýiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

<sup>14</sup> Chýeca, atšbe bonshánënga, ndocna te šmattsadorana cach entsangbe pormana soyënga, ndayama inýënga jtsëjuabnayana diosënga yomna ca. <sup>15</sup> Atšë sëntsoyebuambná mo tšëngaftanga corente osertánënga cuaftsemncá. Cach tšëngaftanga šmochjenýuaboye y šmochjayana, ntšamo cbojtsëtsëtsnacá añe o ndoñe tšabá bëtsemnana. <sup>16</sup> Ntšamo Jesús chë coptema vinoyama Bëngbe Bëtsábioye tbojtanchuacá, bëngnaca cachcá Bëngbe Bëtsá chama fšëdbëtsatschuanaye. Bënga chca tmojama ora, ndegombre, jtsinýanýanayana bënga Crísoftaca cánýiñe mo canýácá imomnana, chabe buñe juabuáshanëse bëngbiama tojanóbanayeca. Y chë mondbajataye tandëse tmojase ora, jtsinýanýanayana bënga Crísoftaca cánýiñe mo canýácá imomnana, cha bëngbiama tojanóbanayeca. <sup>17</sup> Bënga ošbuáchiyënga masque banga mondmëna, chca orna nyetscanga cach tandësentšana bënga jasana, y chýeca bënga jtsemnana mo canýácá, mo Cristbe cuerpca.

<sup>18</sup> Tšëngaftanga šmochtsejuabnayen dayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentsšana jasana, y chca chënga chora jtsinýanýanayana chënga cánýiñe mo canýácá imojtsemnana Bëngbe Bëtsáftaca, chë chca tmojtsadoranáftaca. <sup>19</sup> Y chca, atšë ndoñe quetsátsboše jayanama chë entsangbe pormana soyënga mo diosënga cuaftsemncá, uamana soyënga yomna ca. Ni chë cach entsangbe pormana soyënga diosënga yomna ca jtsëjuabnayëse jadórama uátšëmbona saná inýe sanama más iuamana ca. <sup>20</sup> Pero añe, entsanga cach entsangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbiye jtsadoránana, y ndoñe Bëngbe Bëtsábioye. Y atšë ndoñe quetsátsboše, tšëngaftanga chca uátšëmbonana šmojasama, cánýiñe mo canýácá chë bayëjëngaftaca chašmotsemnana. <sup>21</sup> Tšëngaftanga ndoñe quešmatobena chë vínoye coptémentšana jofsiyana, ntšamo chë ošbuáchiyënga bëtsemnana mondbetsamcá, y chentšana chë cach entsangbe pormana soyënga, mo diosënga cuaftsemncá jadórama vínoye coptémentšanëna. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmatobena vínoye jofsiyana y tandëse jasana, ntšamo ošbuáchiyënga bëtsemnana mondbetsamcá, y chentšana cach entsangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbiye jtsadoránana.

<sup>22</sup> Bënga chca tmojtsamama, bënga mochanjama Bëngbe Utabná puerta etonaná bëngaftaca chaotsemnana, er chë bayëjëngaftaca bënga chca jtsamana. ¿O imojtsejuabná bënga chabiama más obenana bomnënga imomna ca?

*Lempe šmochjama Bëngbe Bëtsá puerte bëtsá y uamaná yomnama jinýanýiyama*

<sup>23</sup> Mondbëtsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atšë stjama ora ndoñe nyetscangbe tšabiama ntsemnana. “Entselesenciana ndayánaca jamama ca”, pero nyetsca soyënga ntšamo bënga tmojamcá, ošbuachiyëngbiye ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebomnana. <sup>24</sup> Ndocna chaondëtsama lempe ntšamo tojobenacá nýe cachabe tšabiama, ndayá más chaotsama chë inýëngbe tšabiama.

<sup>25</sup> Lempe mercadoca tmojtsena soyënguentsšana šmochjase, ntjatsjtjanaycá chë mëntšëna añe o ndoñe tmonjuátšëmbona chë cach entsangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tšëngaftangbe ainaniñe juabnénga šmojtsebomnana; <sup>26</sup> er ntšamo Bëngbe Bëtsabe uabemana palabrénguñie endayanca: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

<sup>27</sup> Nderado canýe ndošbuachiyá tmojúbuaja chábioca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentšana

chê saná tojóbocnama ndocá ntjatstjanaycá, ntšamo tšëngaftangbe ainaniñe juabnënga šmojtsebonnama. <sup>28</sup> Pero nderado nda tcmojáuyana: “Quem mēntšena cach entšangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canya chca tcmojáuyana, y ainanentše šmojtsebonma juabnënga, chë chca jamama ndoñe tšabá bëtsemnama. <sup>29</sup> Atše sēntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënama, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bëtsemnama, ntšamo chë inýabe ainaniñe juabna yobomnama ca? <sup>30</sup> Y atše chë ndayá stsesama Bëngbe Bëtsá tijëtschuase, ¿ndáyeca inýa sochjauyana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?” <sup>31</sup> Masque ntšámnaca, cachcá, chašmojtšesá, o chašmojtsofšëšná, o ndaye inýe soye chašmojtšama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtšá y uamaná yomnama jtsinýanýayama. <sup>32</sup> Tondaye šmatjama ndayá chaobená jamana, inýenga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe ošbuachiyëngcá enefjuanëngbiama. <sup>33</sup> Smochtsama ntšamo atše sēndēntšencá, nyētsanga nyētsca soyënguñe oyejuayënga jtsabamnama, lempe ntšamo stjobenacá jtsamëse, ndoñe nyē atšbe tšabiama, ndayá masna chë inýenga tšabiama, chënga chamotsobenama chëngbe bacna soyënguñtšana atsebácanënga jtsemnama.

## 11

<sup>1</sup> Tšëngaftanga šmochtsiyena ntšamo atše sēndamcá jtsamëse, cach ntšamo atše sēndoyencá, ntšamo Cristo inetsamcá jtsamëse.

*Ntšamo yomna shembásenga tšabá jtsemnama, ošbuachiyëngcá tmojēñfina ora*

<sup>2</sup> Atše sēntseboše tšëngaftanga jáuyana tšabá šmojama ca, tšëngaftanga nyētsca soyënguñe atšbiamá šmnēsenojuabnama, y tšëngaftanga šmojtšabuátambama y šmojtšamama ntšamo tcbonjanabuátambacá, cachcá ntšamo atše sēnjēfšsanboshjónacá. <sup>3</sup> Pero atše sēntseboše tšëngaftanga chacmēsértá: nda nyētsca entšanga iuamēnda cha, Cristo endmëna; y nda shémbyoe ibománda cha, boyá endmëna; y nda Crístbioye ibománda chana, Bëngbe Bëtsá endmëna. <sup>4</sup> Nderado canýe boyabása chabe bestšaše tojtšenátsbotse, inýe ošbuáchiyëngaftaca cánýiñe Bëngbe Bëtsáftaca tbojtscuénata ora o Bëngbe Bëtsabe juabna tojtsoyebuambná ora, cha jamana cachá chaotséuatjama, chabe bestšášeca chca tojama causa. <sup>5</sup> Pero nderado canýe shembása chabe bestšaše ndoñe tontsenátsbotse, inýe ošbuáchiyëngaftaca cánýiñe Bëngbe Bëtsáftaca tbojtscuénata ora o Bëngbe Bëtsabe juabna tojtsoyebuambná ora, cha jamana chama cachá chaotséuatjama; jtséuatjana mo cha lempe jshetētšēná cuaftsemncá. <sup>6</sup> Er, nderado canýe shembása ndocna te tontseboše chabe bestšaše jtsenátsbotsana, chabiamá más tšabá nántsemna lempe chaotsenójshetētše. Pero tojtsejuabná utsbotjená o chca lempe jshetētšēná jtsemnama cha yochtséuatja ca, as chabe bestšaše chaotsenátsbotse. <sup>7</sup> Boyabása ndoñe quebnátsmëna chabe bestšaše jtsenátsbotsana, er Bëngbe Bëtsá tojanma ntšamo cachá yomncá cha chaotsemnama, y chë boyabása chca jtsemnëse, jtsinýanýayana Bëngbe Bëtsá chabe mandayá yomnama. Pero ntšamo chë shembása yomncá, jtsinýanýayana chë boyabása chabe mandayá yomnama; <sup>8</sup> er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana. <sup>9</sup> Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. <sup>10</sup> Chiyeca, y chca jamama angelëga tšabá jtsinýanánayeca, shembása jtsemnama chabe bestšaše chaotsenátsbotsama, chca, chaotsinýayama inýa chábeñe yomándama. <sup>11</sup> Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseytētëtanama. <sup>12</sup> Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbocnana; y lempe Bëngbe Bëtsábiocana endóbocana.

<sup>13</sup> Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canýe shembásabiamá Bëngbe Bëtsáftaca jencuéntana, bestšaše ntsenatsbotscá. <sup>14</sup> Ntšamo entšanga sempre mondbetsejuabnaycá, ndayá tšabá bëtsemnama, bëngbioye jtsabuátambayana, boyabása bën stjēñēsha chabuájuaama tojalesenciase, cha jamana cachá chama chaotséuatjama. <sup>15</sup> Pero shembásabiamna, chë bën stjēñēsha jtsinýanýayana chabe botamanana y uamanana, er Bëngbe Bëtsá tojanma shembása bën stjēñēsha chaotsábomnama, chca, cha chaotsebonma ndáyeca chabe bestšaše jtsenátsbotsama. <sup>16</sup> Masque ntšámnaca, ndánaca tojtseboše quem soyama más jatóyeuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatsleséncia chca ndoñe chaondëtsemnama.

*Bëngbe Utabnabiama jtenójuaboyama jasama ora, chënga ndoñe tšabá imonjánama*

<sup>17</sup> Mora chobchanjaménda soyënguiñe atse ndoñe quetsátobena tsëngaftanga jáuayana tsábá šmojama ca, er tsëngaftanga Crístbeñe ošbuachiyëncá šmojénefña ora, Bëngbe Bëtsá jadórama, atse šontsinýana chë soye yojtsoservena tsëngaftanga más bacá chašmotsemnana, y ndoñe tsëngaftangbe tsabiama. <sup>18</sup> Natsana chochjáuyana, atse sënjouena tsëngaftanga ošbuachiyëncá šmojénefña ora, báseftanga canýe soye imnëtsejuabnaye y inýengna inýëtšá ca, y atse sëntsejuabná batšana ndegombre chca yojtemna ca. <sup>19</sup> Ndegombre jtseytana tsëngaftangbeñe chamotsemna báseftanga canýe soye juabnayënga y inýengna inýëtšá, chca, nyëtsanga chamotsetatšëmbuama ndëmuanyënga imojtsemna chë Bëngbe Bëtsá tojayana chënga tsábá tmojama ca. <sup>20</sup> Tsëngaftanga tandëse jasama y vínoye jofšiyama šmojénefña ora, ntšamo bënga fsënduamancá, Bëngbe Utabná bëngbiama tojanóbanama jtenójuaboyama, ndayá chora tsëngaftanga šmnetsamcá, ndoñe quenátsmëna ntšamo ndegombre cmojtšamncá, chë Bëngbe Utabnabiama jtenójuaboyama jasama ora; <sup>21</sup> er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nyëtsanga ndayánaca jasama chamotsebmónnëtscuana; báseftanga shëntseca joquédana, y inýengna tša jëftsesana y jofšiyana jëftsótmenantscuana. <sup>22</sup> ¿Tsëngaftanga ndoñe yebna šmondobmna ndayentse jasama y jofšiyama? ¿Ndáyeca tsëngaftanga šmojtsejuabná chë imnënefña ošbuachiyënga nduámanënga imomna ca, y šmojama chë chentse tmojtsemnënga, tondaye ndobmnënga, chamotseuatjama? ¿Tsëngaftanga šmojtsejuabná atse chochjáuyana tsábá šmojama ca, chë Bëngbe Utabnabiama jasama ora chca šmojamama? ¡Ndegombre ndoñe!

*Bëngbe Utabnabiama jtenójuaboyama saná*  
(Mt 26.26-29; Mc 14.22-25; Lc 22.14-20)

<sup>23</sup> Er atse cach Bëngbe Utabnábentsana ntšamo chontsabuatëmbacá sënjanóyëngacñe: Bëngbe Utabná cach uayayëngbe cucuatšifne tmojánboshjona ibeta, tandëse tojanca, <sup>24</sup> Bëngbe Bëtsábioye tbojtanchuá chentšana, tojanjatá y tojánayana: “Quem tandëse atšbe cuerpo entsemna; tsëngaftangbe tsabiama chanjóbana. Ntšamo mora montsamcá šmochtsama, atšbiama jtenójuaboyama ca.” <sup>25</sup> Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tsëngaftanga chašmotsetatšëmbuama, ntšamo Bëngbe Bëtsá entsanga tojanašebuachenacá pronto yochtsemnana. Cada vínoye chašmojtsofšëšná ora, chca šmochjama atšbiama jtenójuaboyama ca.” <sup>26</sup> Er tsëngaftanga cada quemëntša tandëse chašmojtsesá ora y quem coptementšaycá chašmojtsofšëšná ora, Bëngbe Utabná chaojësabëntscuana tsëngaftanga šmochántsinýanýnaye cha entsangbiama tojanóbanama.

*Ntšamo yomna jamana, Bëngbe Utabnabiama jtenójuaboyama jasama ora*

<sup>27</sup> Chcasna, Bëngbe Utabnabiama jtenójuaboyama jasama ora, ndánaca tandësentšana tojase y coptémentšana tojofšë, ndoñe chë ntšamo chaotsemnana Bëngbe Utabná yojanjuabnacá, chabiama Bëngbe Bëtsá jayanana cha puerte bacna soye tojama ca. Chë entšá chca tojama ora, cha jtsinýanýnayana, Bëngbe Utabnabe cuerpo y buiñe chabiama tondaye yonduámanana. <sup>28</sup> Chiyeca, entsemna cada ona corente chauenojuabó jtsetatšëmbuama aifne o ndoñe yontseprontana chca jasama y jofšiyama, cabá ndëse y ndofšë ora. <sup>29</sup> Er nderado nda tojase y tojofšë, chë Bëngbe Utabnabiama jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá chabotsecastigama. <sup>30</sup> Chiyeca, banga tsëngaftanguentsënga šoquënga šmojtsemna, inýengna añemo ndobmnënga, y inýengna ndoñe nýe báseftanga tmojóbana. <sup>31</sup> Pero bënga corente tmojajuabó jtsetatšëmbuama aifne o ndoñe montseprontana ntšamo šuamncá jasama y jofšiyama, cabá ndëse y ndofšë ora; chca, Bëngbe Bëtsá ndoñe buántsemna bënga játaacastigana, ntšamo tsábá yomncá ndoñe tmonjase causa. <sup>32</sup> Pero, Bëngbe Utabná castigoca chca šojabuayená ora, jtsemnana bënga más tsábá jtsamama chamuatsjínýana, y chca, baytë chentšana, Bëngbe Bëtsá ndoñe chabondëtsemna játayanana bënga šojtsamna nyëtsca tescama castigánënga jtsemnana ca, canýiñe chë nýe quem luarama enójuabnaye entsángaftaca.

<sup>33</sup> Chca, Jesucristbeyeca atšbe catšátanga, tsëngaftanga chë Bëngbe Utabnabiama saná jasama chašmojénefña ora, canýiñe nyëtsanga šmochjabojátša. <sup>34</sup> Y nderado nda tbojtshëntšana, cachabe yebnoca chauëtsece, chca, Bëngbe Bëtsá ndoñe chabondëtsemna tsëngaftanga jácastigana chora ndoñe tsábá šmonjama causa. Chë inýe soyëngama ndayama tsëngaftanga šmonjatjá, chamna chanjamánda tsëngaftanga jányama chajjá ora.

## 12

*Bëngbe Bëtsabe tšetana obenana, tšabe soyënga jamama*

<sup>1</sup> Jesucristbeyeca atšbe catšátanga, atse sëntseboše tsëngaftanga chašmotsetatšëmba Bëngbe Bëtsabe tšetana obenanama tšabe soyënga jamama, Crístbeñe ošbuachiyënga jujabuáchama.

<sup>2</sup> Tsëngaftanga šmondëtatšëmbo, tsëngaftanga Crístbeñe ndošbuáchiyënga šmonjamna ora, ínÿenga cmonjanabuatambá soyënga, y chora tsëngaftanga šmonjamna ínÿabeyeca uas-janëngcá, cach entšangbe pormana soyënga mo diosënga cuafsemncá jadórama; y chë soyëngna ni mo jóyebuambayama ntsoberenana. <sup>3</sup> Chíyeca, atse mora sëntseboše tsëngaftanga chašmotsetátšëmbo, ndocná ntsoberenana jayanana: “Jesús ndoñe chë Cristo quenátšmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsoýebuambnase. Y cach ndocná ntsoberenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsoýebuambnase.

<sup>4</sup> Espiritu jamana bënga ndoñe chamondëtsebmomnama cachca tšetana obenana tsabe soyënga jamama, pero lempe jobayana cach canÿe Espiritbeyeca. <sup>5</sup> Bënga, Bëngbe Bëtsá mondëservena, nÿetsca soyënguñe jtsetrabájayëse, pero cach Utabná nÿets chë trabajënga sojabanyë. <sup>6</sup> Nÿetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebmomnama. <sup>7</sup> Bëngbe Bëtsá inétsama cada ošbuachiyá chaotsebmomnama canÿe tšetana obenana tsabe soyënga jamama, y chë soye jtsinÿanÿachama Bëngbe Bëtsabe Espiritu chabe ainaniñe yomnama; y chë tšetana obenana jtsemnana nÿetscangbe tšabíama. <sup>8</sup> Bëngbe Bëtsá, Espiritbeyeca, canÿa obenana jatšayana puerte osertanánaca chaóyebuambama, y ínÿana obenana cach Espiritbeyeca ndayamnaca corente jtsetatšëmbëse chaóyebuambama; <sup>9</sup> ínÿana cach Espiritbeyeca, obenana Crístbeñe puerte chaotsošbuachama, y ínÿabíamna, cach nÿe canÿe Espiritbeyeca, obenana jatšayana šoquënga jáshnama; <sup>10</sup> ínÿana, obenana tsabe soyënga Bëngbe Bëtsabe obenánaca jamama, y ínÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espiritbeyeca o bacna espiritëngbeyeca tojtsemnana, y ínÿana, obenana chë tempo ndmabiyáñnaca chaóyebuambama, y ínÿana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y ínÿengna chama jábuayenama. <sup>11</sup> Pero cach Espiritu, chë nÿe canÿe Espiritu lempe chca jamana, ntšamo tsabá bëtsemnana cha tojtsejuabnacá cada entšabioye jatšayëse.

*Nÿetsca ošbuáchiyënga canÿiñe, mo Crístbe cuerpá jtsemnana*

<sup>12</sup> Cuerpo nÿe canÿe soye endmëna y chë cuerpna ba soyënga jtsebmomnana; masque chë cuerpo ba soyënga jtsebmomnana, nÿe canÿe cuerpo jtsemnana. Bëngaftácnaca cachcá. Bënga banga mondëmëna nÿetscanga Crístbeñe ošbuáchiyënga, pero Crístbeyeca, bënga canÿiñe mo canÿacá jtsemnana. <sup>13</sup> Er bënga nÿetscanga, judiënga o ndoñe judiënga, nÿe ínÿabíama nÿets tempo oservënënga o cachëngbiamna trabájayënga šojanëbaye, Crístoftaca canÿiñe mo canÿacá, jtsemnana mo chabe cuerpá, y chca yomna cach Espiritbeyeca; y Bëngbe Bëtsá tojama cach Espiritu nÿetscangbe ainanoye cháumashënguama, bënga jtsemándayama.

<sup>14</sup> Cachcá, canÿe cuerpo ndoñe nÿe canÿe soye ntsebmomnana, ndayá ba soyënga. <sup>15</sup> Nderado shecuatše tojyana: “Cucuatše ndoñe quetsátšmëna causa, atse cuerpentša soye ndoñe quetsátšmëna ca”. Chca tojayanamna, shecuatše mo chë cuerpentša soye ndoñe cuafsemncá ndoñe ntjátšmëna. <sup>16</sup> Nderado matscuase tojyana: “Bominÿe ndoñe quetsátšmëna causa, atse cuerpentša soye ndoñe quetsátšmëna ca”. Chca tojayanamna, matscuase chë cuerpentša soye ndoñe cuafsemncá ndoñe ntjátšmëna. <sup>17</sup> Nÿets cuerpo bominÿe tojtsemnëse, bënga ndoñe muantobena jouenama. Y nÿets cuerpo matscuase tojtsemnëse, bënga ndoñe muanjobenaye jonguëtsetšiyana. <sup>18</sup> Pero ndegombre endmëna, Bëngbe Bëtsá nÿetsca soye cuerpentše tojancjá ndayentše cha tojánbošenentše. <sup>19</sup> Nÿetsca cuerpentša soyënga nÿe canÿe soye tojtsemnëse, ndoñe canÿe cuerpo nántsemna. <sup>20</sup> Pero ndegombre endmëna, masque ba soyënga cuerpentše yomna, nÿe canÿe cuerpo jtsemnana.

<sup>21</sup> Bominÿe quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jauyanana: “Ndoñe quecátsiyta ca”. <sup>22</sup> Inÿetšá, chë cuerpentša soyënga, chë tojtsinÿana mo obenana ndbomna y nduámama soyëngcá, jtsemnana chë cuerpama más iyta soyënga. <sup>23</sup> Chë cuerpentša soyëngama, ndayama bënga tmojtsejuabná más nduámama soyënga yomna ca, bënga jamana más chaotsámanama, chiñe entšayaca jtchëtjëse. Y chë cuerpentša soyënga, ndayama bënga jtšëuatjana ínÿenga chamotsonÿama, bënga jamana ínÿenga ndoñe chamondëtsonÿama, chiñe entšayaca jtchëtjëse. <sup>24</sup> Pero chë cuerpentša soyëngaca, chë nÿetscanga jtsonÿayana y botamana jinÿama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámama soyënga, más chaotsámanama, ntšamo chë soyënga bënga tmojtsinÿenama. <sup>25</sup> Cha chca tojanma, cuerpentša nÿetsca soyënga chë cuerpama trabajo canÿiñe chamotsamama, y chca, cada soye chaotsama trabajo chë cuerpentša nÿetsca soyëngbe tšabíama. <sup>26</sup> Nderado canÿe cuerpentša soyama bacna soye tojopasá, chora nÿetsca chë cuerpentša soyëngámnaca chca ndoñe tsabe soye jtsebinÿyana; pero

canýe cuerpentša soyama tcojama más uámana soye chaotsemnana o ndaye tšabe soye tojopasase, chora nyetsca chë cuerpentša soyëngámnaca chca tšabe soye jtsebínýana.

<sup>27</sup> Cachcá, tsëngaftanga Crístbeñe ošbuáchiýënga, cháftaca cánýiñe mo canýacá jtsemñese, mo chabe cuerpcá jtsemnana, y cada ona tsëngaftanguentsá mo chë cuerpentša soyëngcá, jtsemnana mo chabe cuerpentša soyëngcá. <sup>28</sup> Ntsamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiýëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiana abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë inýëngbioye puerte ujabuáchanënga, chë inýe ošbuachiýëngbioye amëndayënga, y chë nyetsca biyañe jtsóyebuambnayama obenana bomnënga, tempo ndmabiyañe. <sup>29</sup> Ndegombre, ošbuachiýëngcá enefjuanëngbeñe nyetscanga ndoñe Jesucristbe ichmónënga ntsemnana, nyetscanga ndoñe Bëngbe Bëtsabe juabna oyebuambnayënga, nyetscanga ndoñe abuátambayënga, nyetscanga ndoñe Bëngbe Bëtsabe obenana bomnënga, bëts soyënga jamama. <sup>30</sup> Nyetscanga ndoñe šoquënga jáshnama obenana bomnënga; nyetscanga ndoñe nyetsca biyañe jtsóyebuambnayama obenana bomnënga, tempo ndmabiyañe; ni nyetscanga ndoñe obenana bomnënga quemátsmëna, chë tempo ndmabiyañe nyetsca biyañe jtsóyebuambnayama obenana bomnënga ntšamo tmojtsichamcá josértama y inýëngbioye chama jtsabuayiynayama. <sup>31</sup> Pero tsëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftsashjáchama.

### *Bonshánana jtsebmomna*

Y inýe soye más, atše cbochanjínýanýiye ntšamo šmojtsobena cabá más tšabá jtsiyenana, Bëngbe Bëtsá jtseservënese.

## 13

<sup>1</sup> Nderado atše stjóyebuambaye entsangbe biyañe y angelëngbe biyañe, pero inýëngbioye ndoñe sentsababuánýeshanëse, atše stsemna canýa tondayama uamaná, mo nýe canýe metalëshe tojtsenancá, o mo nýe canýe platillëshcá ndoñe tšabá tontsenanëshe. <sup>2</sup> Y atše obenana stsebmomna Bëngbe Bëtsabe juabna jóyebuambayama y nyetsca soyëngama, y chë Bëngbe Bëtsá tempo entsanga ndoñe tonjaninýanýe soyënga šojtsësertana, y Bëngbe Bëtsabe nyetsca soyëngama stsetátšëmbo, y Crístbeñe puerte stjesošbuáchiye, chca betsošbuáchemna nýa mo chë tjashënga chamobonjoma jamama, pero inýënga ndoñe sentsababuánýeshanësa, atše tondaye sëntsemna. <sup>3</sup> Y atše lempe ntšamo stsebmomncá ndbomnëjëmënga stsëjátaye, y inýëngbioye stjénontréga atšbe cuerpo chamojuinýëma, pero inýëngbioye ndoñe sentsababuánýeshanëse, atše ndocna uámana soye ntjashjáchana.

<sup>4</sup> Canýe entsá inýënga ababuanýeshaná, untado jtsemnana masque padecena soyënguñe tmojtsemna órnaca, y inýëngaftaca tšabe ainánaca mando jtsebmomnana. Inýënga ababuanýeshaná ndoñe ntsántábošana ntšamo inýa tojatsbmomncá, ni ntšenábotamayana, ni cachá chë inýëngbiana más uamaná ntjátenobiamnayana; <sup>5</sup> ndoñe bacá mandbmomná inýëngaftaca ntsemnana, ni nyëts tempo ntsebošana y lempe jtsamana nýe chabiana tšabe soye jónýenama; cha nýe ndayámnaca ndoñe ntjetnana, ntšamo inýënga tmojaborlá ora jtšaperdónayana. <sup>6</sup> Inýënga ababuanýeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngama aíñe. <sup>7</sup> Inýënga ababuanýeshaná, ainanñe añemo jtsebmomna nyetsca padecena soyënguñe, lempe ntšamo más tšabá yomna soyënguñe jtsosbuáchiyana, nyetsca más tšabá yomna soyëngama jtsobátmanana, y jtsóboyayana nyetsca toto soyënga.

<sup>8</sup> Bonshánana nyetsca tescama jëftsemnana. Canýe te echántsemna, chora chë Uámana Espíritu ndoñe más queochátama entsanga Bëngbe Bëtsabe juabna chamotsóyebuambnama, ni chë ndocna te ndmabiyañe chamotsóyebuambnama, ni chë puerte jtsetatšëmbëse jóyebuambayama obenama chamotsebmomnama; <sup>9</sup> er ntšamo mora bënga imotatšëmbcá y Bëngbe Bëtsabe juábnaca jóyebuambayëse tmojayana soyënga, nýe batšatema bëngbioye jtsinýanýayana Bëngbe Bëtsabe soyëngama, ndoñe lempe; <sup>10</sup> pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiana yojanjuabnacá, quem soyënga, chë nýe batšatema bëngbioye jtsinýanýayana Bëngbe Bëtsabe soyëngama, ya ndoñe más queochátšinýna.

<sup>11</sup> Atše básatema ora, sënjanoyebuambná, sënjanjuabná, y soyëngama tšabá jtsetatšëmbuamna sënjanjuabná mo canýe basetemcá; pero bëtsá sënjanóbema orna, sentsanajbaná lempe amana mo canýe basetemcá. <sup>12</sup> Cachcá, mora bënga quem luarentše nýe batšatema Bëngbe Bëtsabe soyëngama jtsetatšëmbuana, mo canýe espejuñe tmojtsonýacá, pero ndoñe nýa corente tšabá. Pero canýe te bënga mochántsetatšëmbo lempe nyetsca soyëngama, Bënga Bëngbe

Bëtsabe delante chamojtsemna ora. Mora atše sêntsetatšëmbo nÿe batšatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente šuabuatmá.

<sup>13</sup> Pero morna, Bëngbe Bëtsábeñe jtsošbuáchiyana, chábeñe jtsobátmanana, y chábioye y inÿengbioye jtsababuánÿeshanana, chë soyëngna nÿetsca tescama jëftsemnana; pero chentšana chë más uámana soye endmëna inÿenga jtsababuánÿeshanana.

## 14

### *Ndmabiyañe obenana Bëngbe Bëtsabe tšetánana*

<sup>1</sup> Bëtsá šmochtsama nÿetscanga jtsababuánÿeshanëse chašmotsiyenama, y puerte šmochtseboše jtsebmomnama chë Bëngbe Bëtsabe tšetana obenana tšabe soyënga jamama; pero chentšana masna, chë Bëngbe Bëtsabe juabna jóyebuambayama obenana. <sup>2</sup> Er chë tempo ndmabiyañe mora jóyebuambayama obenana bomná, Bëngbe Bëtsábioye jtsatsëtsnayana y ndoñe entšangbioye, er ndegombre entšanguentše ntšamo cha tojtsoyebuambnácá ndocná ntjosértana; chana chabe espítoftaca jtsoyebuambnayana y ndoñe nÿe chabe juábnaca, chë tempo Bëngbe Bëtsá ndocna entšábioye tbonjaninÿinÿé soyëngama. <sup>3</sup> Pero chë Bëngbe Bëtsabe juabna oyeuambnayana entšanga jtsëtsëtsnayana, chënga más chamotsošbuáchemá y ainaniñe añemo chamotsebmomnama, Bëngbe Bëtsabe soyëngama jábuayenama, y jamama padecena soyënguñe tmojtsemna órncá añemo chamotsebmomnama. <sup>4</sup> Chë tempo ndmabiyañe mora jóyebuambayama obenana bomná, jtsamana nÿe cha más jtsošbuáchiyama y ainaniñe añemo jtsebmomnama; pero chë Bëngbe Bëtsabe juabna oyeuambnayana jtsamana chë ošbuachiyëngcá enefjuanënga chca soyënga chamotsebmomnama.

<sup>5</sup> Atše sêntseboše nÿetsca tšëngaftanga chë tempo ndoñe šmonjanbiyañe mora jóyebuambayama obenana chašmotsebmomnama, pero chama atše más sêntseboše tšëngaftanga chë Bëngbe Bëtsabe juábnaca soyënga chašmotsóyebuambnama. Chë Bëngbe Bëtsabe juábnaca soyënga oyeuambnayá más uamaná jtsemnana chë inÿe biyañe oyeuambnayabiama; chca ndoñe nántsemna, ntšamo canÿe biyañe tojayancá chë biyañe oyeuambnayá tojtsësértanëse y chë ošbuachiyëngcá enefjuanënga tojábuayenase, y chca, chë soyënga tmojouenama, chënga chamotsobena más jtsošbuáchiyama y añemo jtsebmomnama. <sup>6</sup> Y mora, Jesucristbeyeca atšbe catšátanga, atše nderado tchojábuache y nÿe inÿe biyañe tchojáuyanëse, ¿chca ntšamo chatjúabuache? Atše jtsobenana jujabuáchana, nÿe ntšamo chë biyañe tijayancá átsnaca šojtsësértanëse, y ndayá Bëngbe Bëtsá šojinÿinÿecá entšanga jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tšëngaftanga jabuátambama cha yoboše soye.

<sup>7</sup> Entšanga monduamana ndayánaca juénanana, mo flautëfja o arpa, vida ndbmoma soyënga; cada sóyeca inÿetšá juénanama ndoñe tontsopodënëse, ndocná nantsobena jtsetatšëmbuama ndayá canÿa chë soyëngaca yojtsénanama. <sup>8</sup> Y nderado nda trompetëfjua tojuájatëta ora, soldadënga japéliama chamoprontama, chë uajatëtaná inÿetšá, nÿa chama ndoñe tonjuájatëtëse, ndocná buanjósëta y jempéliama ndoñe nanjoprónta. <sup>9</sup> Tšëngaftangafácnaca cachcá jtspasánana. Inÿenga paselo josértama jobenaycnana tšëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nÿe canÿenga cuaftsoyebuambnácá. <sup>10</sup> Atše sêntsejuabná, ndegombre quem luarentšé ba inÿe biyañe entšanga imnëtsoyebuambnayana, y ndaye biyáñnaca tmojoyebuambá ora, sempre jtsemnana inÿenga ntšamo chënga tmojtsichamcá osertánënga. <sup>11</sup> Pero ntšamo inÿa chabe biyañe šojauyancá atše ndoñe šontsësértanëse, atše stsemna canÿe chabiama ndosertana biyañe oyeuambnayá, y chánaca cachcá atšbiama. <sup>12</sup> Chcasna, chë Uámana Espíritu šondinÿanÿná obenana jtsebmomnama tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebmomnama inétsama obenana.

<sup>13</sup> Chíyeca, chë tempo ndmabiyañe mora jóyebuambayama obenana tojtsebmomná, Bëngbe Bëtsá chatotseimpadana, cha chaoma ntšamo chë inÿe biyañe tojayancá chabosertama y ošbuáchiyënga jábuayenama obenana chaotsebmomnama. <sup>14</sup> Pero atše Bëngbe Bëtsáfatacá stjencuénta, chë ndmabiyañe jóyebuambayama cha obenana šojanatšetacá jtsoyebuambnayëse, atšbe espíritu cháftaca nantsóyebuambnayë, pero atšbe juabna ndoñe ntsetatšëmbuana ntšamo chë espíritu tojtsoyebuambnácá. <sup>15</sup> Y asna, ¿ntšamo atše chtsemna? Bëngbe Bëtsáfatacá chanjencuénta atšbe espíritoca, pero ntšamo stsichámuauma jtsejuabnayësnaca. Bëngbe Bëtsá jëtschuayama chanjavérsia atšbe espíritoca, pero chca chanjama chíñnaca jtsejuabnayëse. <sup>16</sup> Nderado aca Bëngbe Bëtsá cojtsatschuaná nÿe espíritoca, y canÿa quem Bëngbe Bëtsabe tšetana obenanama ndosertaná tmojóyëunase, cha ndoñe ntsoebenana jayanana “chca chaotsemna ca”, cach aquícá cha yojtsejuabnama jinÿinÿiyama, er ntšamo

cojtsichamcá cha ndoñe ntsésertánana. <sup>17</sup> Aca jtsobenana chca puerta tsábá Bèngbe Bètsá jètschuayana, pero ntšamo cojtsamcá ndoñe ntjamana inya ndaye tsabe soye chaotsebm-nama. <sup>18</sup> Atše, Bèngbe Bètsá sèntsatschuaná inye biyañe jóyebuambayama tsèngaftangbiamá más tsobenama; <sup>19</sup> pero Crístbeñe ošbuachiyèngcá tmojënefña ora, atše más sèndbètseboše nye mo shachna palabratémnaca jóyebuambayana, chènga aife catafjosertacá, chca, inyenga jabuatambama, y ndoñe bnètsana uaranga palabrènga jatóyebuambnayana inye biyañe, chènga chaósertama ndoñe tontsopodénese.

<sup>20</sup> Jesucrístbeyeca atšbe catšátanga, šmochtsajbaná basetemèngcá juabnayana. Mo šešonatemèngcá šmochtsemna, bacna soyènga jamama ntsetatšèmbcá; pero mo bètsebsangcá tsábá šmochtsejuabnaye. <sup>21</sup> Bèngbe Bètsabe uabemana palabrènguife, Bèngbe Utabná mèntšá tojánayana:

Atše quem entšángbioye chanjáuyana,

inyenga inye luarèngocana ashjajnèngaftaca, chèngbiamá canye ndosertana biyañe oye-buambnayènga;

y chanjáuyana ndayá chèngbe biyañe chamojtsichamo soyèngaca;  
pero ni chca, chènga ndoñe quešmochatóyeunaye ca.

<sup>22</sup> Chcasna, inye biyañe jóyebuambayama obenana jtsebm-nana endmèna, Bèngbe Bètsá ndayánaca chē chabeñe ndošbuachiyèngbioye jinýañiyama, y chabeñe ošbuachiyèngbioyna ndoñe. Pero, Bèngbe Bètsabe juabna jóyebuambayama obenana jtsebm-nana endmèna, Bèngbe Bètsá ndayánaca chabeñe ošbuachiyèngbioye jinýañiyama, y chabeñe ndošbuachiyèngbioyna ndoñe. <sup>23</sup> Er tsèngaftanga nyetscanga ošbuachiyèngcá šmojënefña ora, nyetscanga ba biyañe šmojtsoyebuambná, y choye tojámashèngo canya chca Bèngbe Bètsabe tsètana obenanama ndosertaná o chabeñe ndošbuachiyá, cha nanjáuyaboye tsèngaftanga opènga šmojtsóbema ca. <sup>24</sup> Pero nyetscanga tmojtsichamo, Bèngbe Bètsabe juábnaca jtsóyebuambnayèse, y choye tojámashèngo canya Bèngbe Bètsabeñe ndošbuachiyá o canya chca Bèngbe Bètsabe tsètana obenanama ndosertaná, ntšamo chašmojtsichamcá cha bochanjosértá; y chē soye cha bochanjayèñjaná cha bacna soyènga tojamama, y ndayá cha tojamiñe corente echántsejuabnaye, ntšamo nyetscanga tmojtsichámuama. <sup>25</sup> Y Bèngbe Bètsá chábioye bochanjinýinýiye ntšamo cha ainaniñe tojauabó y tojabošencá, ndayá ndocnábioye tbonjinýinýecá, y cha echanjoshèntsamentšiyē Bèngbe Bètsá jadórana, y tsèngaftangbe delantechanjayana Bèngbe Bètsá ndegombre tsèngaftangbeñe yojtsemna ca.

*Ošbuachiyèngcá šmojënefña ora, ntšamo tsábá yomncá lempe šmochtsama*

<sup>26</sup> Chcasna, Jesucrístbeyeca atšbe catšátanga, šmojënefña ora, cada ona ndayánaca jtsebm-nana nyetscangbiamá: inyengna jtsobenana javérsiama, Bèngbe Bètsá jètschuayama, inyengna jtsobenana jabuatambana o jábuayenama ndayá Bèngbe Bètsá tojinýañecá, o tempo ndmabiyañe chora jtsóyebuambnayana, o entšanga jábuayenana ntšamo inya inye biyañe tojayancá. Pero lempe šmochjama, ošbuachiyènga más chamotsošbuáchemá y más añemo chamotsebm-nama Cristo jasérviamá. <sup>27</sup> Nderado inye biyañe jóyebuambayama tojtsemnése, útata o nya másese únganga chca chamoyebuambá, y canýányá; y jtseytana ndánaca ntšamo tmojtsichamcá chabosértá y nyetscanga chama chauabuayená. <sup>28</sup> Y chca chabosertama y nyetscanga jábuayenama ošbuachiyèngbeñe ndocná tontsemnése, as ošbuachiyèngcá chamojënefña ora chē chca oyeuambnayá bontsemna ndoñe chca biyañe ntsóyebuambnayana, sinó nye canya tojtsemna ora cha jtsobenana chca Bèngbe Bètsáftaca jencuéntana. <sup>29</sup> Utata o únganga entsamna jayanana soyènga, Bèngbe Bètsabe juábnaca jtsóyebuambnayèse; y chē inyenga jtsamnana botamana jajuaboyana y jayanana ntšamo chènga tmojayancá aife o ndoñe Bèngbe Bètsábiocana tayojsóbocanama. <sup>30</sup> Pero canya Bèngbe Bètsabe juabna tojtsóyebuambnanscuana, inya chentše ouenana tthemanábioye Bèngbe Bètsá tbojinýinýe ndayánaca yojtsebm-nana jayanama, as chē natsana oyeuambnayá iytēca chaóbema, y chaboleenciá chē inya chaóyebuambama. <sup>31</sup> Chca, nyetscanga, canýányá jtsobenana jayanana soyènga, Bèngbe Bètsabe juábnaca jtsóyebuambnayèse, nyetscanga chamuat-sjínýama y nyetscanga añemo jatšatayama. <sup>32</sup> Chē Bèngbe Bètsabe juabna oyeuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora; <sup>33</sup> er Bèngbe Bètsá endmèna nda inétsama bènga natjèmbana chamotsiyenama, y ndoñe chē bènga nyetscanga cachcá ndoñe chamondètsejuabnana, y nye ntšamo cada ona tojtsebošcá chaotsamama.

Ntšamo nyets luarènguenache, chē ošbuachiyènga, chē Bèngbe Bètsabe entšanga mondbènefña luarènguenache endbetsemncá, <sup>34</sup> tsèngaftangbèntšnaca, shembásenga entsamna iytēca jobiamèngana, ošbuachiyèngcá šmojënefña ora, er ndoñe quenátlesenciána chènga chora chamuatoyebuambnama, y aife chènga entsamna chèngbe boyanga jtsayaunanana, ntšamo Moisesbe leyíñe endayancá. <sup>35</sup> Chènga ndayánaca jtsetatšèmbuama tmojtsebošēse, cachèngbe boyángbioye yebnoca chamotjanga; er ndoñe corente tsábá



ntsemnana canye shembása jtsóyebuambnayana tsšengaftanga ošbuachiyěngcá šmojénefjna ora.

<sup>36</sup> ¿Tsšengaftanga šmojatsjuabná, Běngbe Bětsabe tsšabe noticiěnga tsšengaftangbeñe tojanobojatšé ca, o nýe tsšengaftanga chě soyěnga šmojanóyěngacñe ca? Ndegombre ndoñe chca; chíyeca tsšengaftanga nýe cányenga ndoñe ntsobenana jayanama ndayá jamama cmojtsamnama. <sup>37</sup> Nda tojtsejuabná cha Běngbe Bětsabe juabna oyeuambnayá yomna ca, o chabe ainaniñe chě Espíritu jtsemándayama yojtsebmoma ca, cha bontsemna tsábá jtsetatšěmbuana, ntšamo Běngbe Utabná sojamandacá atše stsabiamnama. <sup>38</sup> Pero cha ndoñe chca tontsetátšěmbo y chca ndoñe yondmēna ca tojayaněse, ndayá cha tojayancá ndoñe šmatjójěngacñe.

<sup>39</sup> Chcasna, Jesucristbeyeca atšbe catšátanga, puerte šmochtseboše Běngbe Bětsabe juábna soyěnga jtsóyebuambnayama obenana jtsebmoma, y ndoñe šmattsama chě tempo ndmabiyañe inýenga ndoñe chamondětsóyebuambnama; <sup>40</sup> pero lempe šmochjama ntšamo jamama yomncá, y ndoñe nýe ntšamo cada ona tojatsjuabnacá.

## 15

### *Cristo tojtanayenama*

<sup>1</sup> Morna, Jesucristbeyeca atšbe catšátanga, atše sěntseboše tsšengaftanga chašmuatenójuaboma atše tcbonjanabuayená tsšabe noticiěnguiñe, ndayá tsšengaftanga šmonjanóyěngacñe, chě ndáyeca tsšengaftanga Jesucristbeñe šmojtsošbuaché y cha jtsešervěne šmojtsiyena. <sup>2</sup> Chca šmobómnyeca, tsšengaftanga atšebacáněnga šmojtsemna, pero tsšengaftanga sempre chiñe šmojtsošbuachese, ntšamo cbonjanabuayinacá; chca ndoñesna, nýe ndoñe corente tsábá ntjajuaboycá chě buayenana soyěnguiñe šmojtsošbuaché.

<sup>3</sup> Er atše tsšengaftangbeñe sěnjěftsanboshjona, Běngbe Bětsábocana atše tjanóyěngacñe más uámana buatěmbana soyěnga. Atše tcbonjabuatambá: Cristo tojanóbana běnga bacna soyěnga tmojamama, ntšamo Běngbe Bětsabe uabemana palabrenguiñe chabe juabna oyeuambnayěnga chama tmojanayancá; <sup>4</sup> chě Cristo tmojanatbontsá y unga tianoye cha cháuatayenama Běngbe Bětsá tojanmama, ntšamo Běngbe Bětsabe uabemana palabrenguiñe chabe juabna oyeuambnayěnga chama tmojanayancá; <sup>5</sup> chě Pédrěbloye tbojánéběbocnama, y chentšana chě bnětsana útata ca uabobáiněngbioynaca. <sup>6</sup> Chentšana mo shachna patsama más chábeñe ošbuáchiyěnga tojánéběbuacna, chěnga cányěntšě imojtsemna ora; chěnguentšanga banga cabá vida imotsóbomñe, masque báseftanga ya tmojóbana. <sup>7</sup> Chentšana Santiágbloye tbojánéběbocna, y chentšana nýetsca chabe ichmóněngbioye.

<sup>8</sup> Y chentšana átsnaca šonjánéběbocna. Mo canye šesona cabá shbená tojonýnacá, Cristo chabe ichmoná šonjáněbma, chě tempo chama jopróntama ntsebmomncá, ndayěntscuana inýenga cha tojanabuatambá. <sup>9</sup> Er atše sěndmēna chě más batšá uamaná Jesucristbe ichmóněngbeñe; y ni mercedo taitsatobuajoñe “chabe ichmoná ca” chašmotsábobuatmama, er atše tsša sěnjánama Jesucristbeñe ošbuáchiyěnga chamotsesufrínama. <sup>10</sup> Pero Běngbe Bětsá atšbe tsábama yojanjuabná, y chíyeca atše mora tsmēna ntšamo sěndmēncá, y chabe tsšabe juábna atšbama jtsamana, ndoñe nýe bonamente quenátsmēna. Er atše más sěnjatrabajá, chě inýe Jesucristbe ichmóněngbiama; pero ndegombre atše ndoñe nýe canýa chca chiyatsma, sinó masna Běngbe Bětsá chě trabajo tojama, tsšabe juabna atšbama jtsebmomñe. <sup>11</sup> Ndayá más yojtsámama ndoñe quenátsmēna, atše o chěnga, Jesucristbe soyěngama abuayinayañe más tojatrabajá, sinó ndayá chě soyěnga běngbe buayenana soye yojtsemna, y tsšengaftanga chiñe šmojtsošbuaché.

### *Chě obaněnga cachiñe vida mochtsatsbmoma*

<sup>12</sup> Pero běngbe buayenana soye endmēna, Běngbe Bětsá tojanma Cristo cháuatayenama; as žndáyeca básefta tsšengaftanga šmñětsichamo Běngbe Bětsá ndoñe yochanjama chě mora obaněnga chámuatayenama ca? <sup>13</sup> Pero chca tojtsemna, chě obaněnga ndoñe mochantayenasna, Cristo cach ndoñe tontanayena; <sup>14</sup> y Cristo ndoñe matenjěsáyeněse, běnga nýe bonamente chabiama ftsabuayináy, y tsšengaftanga nýe bonamente chábeñe šmojtsošbuaché. <sup>15</sup> Y canýe más běts soye: chca tojtsemñesna, běnga muanjábocna mo chě Běngbe Bětsabiama soyěnga tmojinýe ca ichaměngcá, pero ndoñe ndegombre chca tontsemna; er běnga fsěndbětsichamo, Cristo cháuatayenama Běngbe Bětsá tojanma ca. Pero chě obaněnga ndoñe mochantayenasna, Běngbe Bětsá ndoñe tonjanma Cristo cháuatayenama. <sup>16</sup> Pero chě obaněnga ndoñe mochantayenasna, Cristo cach ndoñe tontanayena. <sup>17</sup> Y Cristo cháuatayenama Běngbe Bětsá ndoñe matěnjānměse, tsšengaftanga nýe tondayama chábeñe šmojtsošbuaché; tsšengaftanga chě bacna soyěngama cabá ndoñe perdonáněnga šmontsemna. <sup>18</sup> Y chca, chě tmojanóbaněnga, Crístbeñe ošbuáchiyěnga, chěnga cach ndoñe chěngbe bacna soyěnguentšana atšebacáněnga quemochátsmēna, sinó nýetsca tescama castigáněnga.

<sup>19</sup> Bënga tmojtsobátmana Cristo bëngbiana tsábe soyënga chaotsamama, pero chca nÿe quem luarentse bënga vida tmojtsebomnëntscuana, as bënga nÿetscangbiana más muantsomere-cena, nÿetscanga bëngbiana chaotsangménama.

<sup>20</sup> Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinÿanÿayana más shajuaneëga chentšana yochjóbcocnama, cachcá, Cristo tojtayanena ora, cha tojaninÿanÿe Bëngbe Bëtsá yochjanma inÿenga chábeñe oshuáchiyënga chámuatayenama vida chamotsatsbomnana. <sup>21</sup> Chca, ndayá canÿe entšá, Adán, tojanmama, nÿetscanga jóbanama yojtsamna, cachcá, ntšamo inÿe entšá, Cristo, tojanmama, Bëngbe Bëtsá yochjama entšanga chámuatayenama. <sup>22</sup> Er ntšamo, Adánbentšana entšanga bëtsemnayeca jóbanama jtsamnana, cachcá, Cristbeñe oshuáchiyënga bëtsemnayeca, Bëngbe Bëtsá jamana chë nÿetsca tescama yomna tsábe vida chënga chamotsebomnana. <sup>23</sup> Pero Bëngbe Bëtsá jamana cada ona cháuatayenama nÿa chama tempo tojtsemna ora. Natsana Cristo, y chentšana, Cristo cachiñe quem luaroÿe chaojésabo ora, nÿetscanga chë Cristbe entšanga imomnënga. <sup>24</sup> Y chentšana, Bëngbe Bëtsá chë Taitábioÿe, Cristo chabe amëndayana chabojantšabuaché ora, nÿetsca mandadënga, mando y obenana bomnënga corente jtsayénjanayëse. <sup>25</sup> Er Cristo bontsemna inÿenga mo reyca jtsamëndayana, chabe uyayyënga chabe cucuatšine chamoquedama Bëngbe Bëtsá tojamëntscuana. <sup>26</sup> Canÿe uyayá inétsama entšanga jóbanama; pero Cristo último echanjama chabe obenana pronto chaotsopochocama. <sup>27</sup> Er ntšamo Bëngbe Bëtsabe uabemana pal-abrënguifne endayancá: “Bëngbe Bëtsá tojama Cristo nÿetsca soyënguifne chaotsemándama ca.” Pero “tojama Cristo nÿetsca soyënguifne chaotsemándama ca” tojayana ora, jtsopodénana puerta tsábá jinÿama, chca ndoñe yontsayana, Bëngbe Bëtsá Cristbeyeca mandaná yojtsemna ca; Bëngbe Bëtsá nda tojanma Cristo nÿetsca soyënguifne chaotsemándama. <sup>28</sup> Y Cristo nÿetsca soyënguifne chaojtsemándama ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nÿetsca soyënguifne chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentse yobínÿiñe.

<sup>29</sup> Inÿetšánaca, báseftanga cachiñe uabáinënga imojtsemna, chë oshuáchiyënga ndu-abáinënga obanëngbe cuenta. Chca chënga jamana mo chë obanënga uabáinënga chamot-semnana cuaffamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muanténabaye? <sup>30</sup> Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nÿets tempo resjuifne jtsajnana, Cristbiana oservena causa? <sup>31</sup> Atšbiana cada te resjo endmëna jóbanama. Jesucristbeyeca atšbe catsátanga, atše sentsichamo, chca ndegombre yómnayeca, atše oÿejuayá stsemna ca, mo Cristo Jesús Bëngbe Utanabe canÿe oservenacá, tsëngaftanga chábeñe šmojtsošbuáchema. <sup>32</sup> Mo canÿa tsátjaye bayëngaca tojtsentsjaná orcá, atšbiana puerta resjo enjamna jóbanama, Efeso puebloca; pero nÿe chë entšanga mondbëtsejuabnaye jëftsashjáchama soyënga jtse-bošëse chca matsjamnëse, ¿ndaye tsábe soÿe matëñjanóbcocna, chca atšbiana resjo jóbanama enjamna ora? Obanënga ndoñe mochántayenëšna, mochtsama ntšamo entšanga jayanana monduamancá: “¡Mochjase y mochjofšÿe, nderado yëfse muatjóbanaca!”

<sup>33</sup> Ndoñe matenoíngñana. Ntšamo canÿa tojanayancá: “Nderado nda bacna amiguëngaftaca tojtsenutaná, cha jtsajbanana chë tsábe soyënga, ntšamo jtsamëse yojoyena.” <sup>34</sup> Tsábá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tsëngaftanguentse Bëngbe Bëtsabe soyënga ndoñe quešmatábuatma. Atše chca sentsichamo tsëngaftanga chašmotsëuatjama.

### *Ntšamo chë obanënga mochtayena*

<sup>35</sup> Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebomna ca?” <sup>36</sup> ¡Juabna ndbomna entšá! Ndayá tcojajé orna, jtseytana chë jénaye chaoábanama, chë matatema vida chaotsebomnana. <sup>37</sup> Ndayá tcojajecá ndoñe ntsemnana chë juábocnama matatema, ndayá nÿe chë meshe, trigo meshe o ndaye mata méshnaca jtsemnana. <sup>38</sup> Pero Bëngbe Bëtsá jamana chë jénayentšana mata chauábocnama, ntšamo jamana cha tojajuabocá; y cha jamana cada jénayentšana canÿe mata chauábocnama, ntšamo chë jénayentšana chauábocnama tojtsemncá. <sup>39</sup> Nÿetsca cuerpënga ndoñe cachcá ntsemnana. Entšanga canÿe cuerpo mondbomna, bayënga inÿe cuerpo, shloftšënga inÿe cuerpo, y beongna inÿe cuerpo. <sup>40</sup> Chë celoca vida bomnënga inÿetšá jtsinÿnana, y chë quem luarentse vida bomnënga inÿetšá. Pero chë buashinÿinÿanana y botamanana ntšamo celoca vida bomnënga jtsinÿnancá, ndoñe cachcá ntsemnana chë quem luarentse vida bomnëngbe botamanancá. <sup>41</sup> Cachcá, shinÿe ndoñe quenátsbomna cachca buashinÿinÿanana juashconcá, ni estrellëngcá; y estrellënguëntse cach ndoñe cachcá ntsebuashinÿinÿanana.

<sup>42</sup> Cachcá, chë obanënga chámuatayenama Bëngbe Bëtsá chaojama ora chamojtse-bomna cuerpo, ndoñe queochátsmëna cachcá ntšamo quem luarentse imojaniyena

ora imojéftsebmoma cuerpcá. Ntšamo chë jénaye tcojuatbontsá ora chiye jóbanana, cachá, quem luarentse bënga mondbomna cuerpo jóbanana, inýenga juatbontsana y jt-sopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántatsatbmoma y ndocna te queochatopochóca. <sup>43</sup> Chë óbana cuerpo tmojuatbontsá ora, chë cuerpo tondaye ntásmanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinýinýana y echantsámama. Bënga quem luarentse imoyenëntscuana imobomna cuerpo, nýe batśá obenana jtsebmomana; pero chë Bëngbe Bëtsá šochjatsataye tsëm cuerpo, puerte obenana bomna cuerpo echántsemna. <sup>44</sup> Quem luarentse imobomna cuerpo endmëna cam luarentse vida chaotsebmomana; pero bënga chámuatayenama chaojama ora, chë bënga mochtsebmoma tsëm cuerpo, puerte chë Espiritbeyeca echántsemandana. Canýe cuerpo quem luarentse vida chaotsebmomana yómnyeca, canýe cuérpënaca, jtsebmomana celoca vida chaotsebmomana.

<sup>45</sup> Chca Bëngbe Bëtsabe uabemana palabrénguife endayana: “Bëngbe Bëtsá, chë natsana entśá tbojanma chaotsainama ca.” Adánbentsana nýetsca entśanga jabocanana, pero Crístbeyeca, Bëngbe Bëtsá tojama banga mo tsmëma entśangcá chamotsebmomana; chca, Cristo jtsebmomana mo chë ústonoye Adancá; pero Crístna canýe espíritu endmëna, y chë espíritu jamana entśanga chë nýetsca tescama yomna tsabe vida chamotsebmomana. <sup>46</sup> Pero chë celoca nýetsca tescama vida jtsebmomana cuerpo na chë natsana ntjóbcocnana, ndayá chë quem luarentse vida jtsebmomana cuerpo; chentśana chë celoca vida jtsebmomana cuerpo. <sup>47</sup> Bëngbe Bëtsá, chë natsana entśá tbojanma fshántseca, y chca, cha fshantsentśana tojánbocna; Crístna, mo entśangbentsana chë natsaná tsmácá bemanacá, celocana tojánbocna. <sup>48</sup> Adánbentsana, chë natsana entśá, chë fshántseca tmojanmábentsana tmojábocanënga, ntšamo cha yojamncá jtsebmomana. Cachá, chë mo tsmëmangcá tojábiamënga, Crístcá jtsebmomana; Cristo nda celocana tojánabo.

<sup>49</sup> Ntšamo bënga jtšinýnana chë Bëngbe Bëtsá fshántseca tbojánbema entśacá, cachá bëngnaca mochtśinýana ntšamo chë celocá yomnacá.

<sup>50</sup> Jesucristbeyeca atśbe catśátanga, atśe cbochjáuyana, nýe quem luarentse vida jtsebmomana cuerpëngaca, bënga ndoñe ntobenana Bëngbe Bëtsabe amëndayoye jamashënguana; ni ndayá yochjopochóca soye, ntobenana ndayá ndoñe yochanjopochóca soye jtsebmomana. <sup>51</sup> Smochjouena, atśe canýe soye cbochanjáuyana, y chë soye Bëngbe Bëtsá entśanga tempo ndoñe tonjaninýanýe: Bënga ośbuáchiyënga nýetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá. <sup>52</sup> Nýe betscó, mo tcojofshetá y cachora tcojafśnacá, quem luare ya jopochócama ora, canýe ángel trompetéřjua chaojuátëta ora, er chora trompetéřjua echanjuénana, Bëngbe Bëtsá echanjama obanënga chámuatayenama, nýetsca tescama vida jtsebmomana; y bënga, chë ainënga mochtsebmomënga, cha šochanjátrocaye mo tsmëmangcá jtsebmomana; <sup>53</sup> er jtseytana Bëngbe Bëtsá chaotrocá chë bëngbeñe jopochócama yomna soye, ndocna te yochanjopochóca soyiñe; y ndayá bëngbeñe yochjóbana soye, ndocna te yochanjóbana soyiñe. <sup>54</sup> Bëngbe Bëtsá chca bëngaftaca chaojama ora, chë cha jatrócana ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbana soyiñe, chora echanjochnëngo ntšamo Bëngbe Bëtsabe uabemana palabrénguife chama endayancá: Bëngbe Bëtsá tojayënjaná chë entśanga chamóbanama endbëtsama obenana; entśanga ndoñe más quemochatóbana ca.

<sup>55</sup> ¡Mora entśanga chamuatóbanama chaotsama obenana ya ndoñe quenátśmëna; Bëngbe Bëtsá chë obenana nýetsca tescama tojayënjaná ca!

<sup>56</sup> Entśanga bacna soyënga tmojama causa, obenana endmëna entśanga jóbanama chaot-samnana. Ndayá leyiñe iuayanama, entśá jtsetatśëmbuana ndayá yomna bacna soyënga jamana, y chca tátśëmbo causa, chca bacna soyënga jamama juabnëngaca mandaná jtsebmomana, y cabana, jóbanama jtsebmomana. <sup>57</sup> ¡Pero Bëngbe Bëtsá mochtśatschuanaye, bënga mo ayëñjanayëngcá cha šojábiamama, er ya ndoñe šontsamna chca jtsebmomana, chë Bëngbe Utabná Jesucristo bëngbiama tojanma sóyeca!

<sup>58</sup> Chiyeca, Jesucristbeyeca atśbe catśátanga, atśbe bonshánënga, Jesucristbeñe sempre puerte šmochtsośbuáchiye y ndocna te šmatjaleséncia ndocná ni tondaye chaotsama chábeñe ośbuáchiyana chašmotsajbanama. Sempre šmochtśentśëna bëtscá jtsamana Bëngbe Utabnabiamana trabájayiñe, er tšëngaftanga šmondëtatśëmbo, Bëngbe Utabnabiamana trabájayiñe ndayá šmojamcá, ndocna te nýe bonamente ntsebmomana.

## 16

*Jerusalenoca ośbuáchiyëngbiama crocenánama*

<sup>1</sup> Mora chanjóyebuambaye chë Jerusalenoca Bëngbe Bëtsabe entśanga nd-bomnjëmëngbiama tšëngaftanga šmochjuíuchmua crocenánama. Atśe sëntseboše tšëngaftanga

chca chašmoma ntšamo chë Galacia luaroca ošbuachiyëngcá enefjuanenache chama atše sënjanabuayenacá. <sup>2</sup> Cada tmingo, cmontsamna batšá crocénana jaluárana ntšamo chë semaniñe šmojonýencá, y šmochtsejuabaye; chca atše choye chaijá ora, ndoñe chacmondëtšamna quem uajabótama chora crocénana játatbanayana. <sup>3</sup> Y atše choye chaijáshjango ora, Jerusalenoye chjichamuá chë tšëngaftanga mo tšabengcá šmojubuáyana entsanga, chë Jerusalenoca ošbuachiyëngbioye tšëngaftangbe crocénana chámuyentšbuachema, y tsbuanachangá chanjúyentšbuachiye ndayá imojtsamama chënga jábuayenama. <sup>4</sup> Y nderado, átšnaca chëngaftaca jama tšabá tojtsemnëse, chënga átšeftaca chamua.

*Ntšamo Pablo yojanjuabná chë luarëngoye jama*

<sup>5</sup> Atše sëntsejuabná tšëngaftangbioye jama jautšëtsayama, Macedonia luarëjana chajachnëngüentšana, chentša ošbuáchiyënga jaftsanyëse, er atše sëntsejuabná natsana Macedonia luaroye jëftsana. <sup>6</sup> Nderado baseftaytë tšëngaftangbeñe chašuetsejetana, o nderádose nyets uafena tempo; as tšëngaftanga inýe luaroye játama chašmuájabuachama, ndëmoye jama chašojtsemnoye. <sup>7</sup> Atše ndoñe quetsátšboše nyë betso tšëngaftanga jáftsanyana, er atše sëntsobátmana más baytë tšëngaftangbeñe jaftsemnana, Bëngbe Utabná chca šojalesenciase. <sup>8</sup> Pero Efesoca šochanjajétana Pentecostés fiesta chaojobuáchëntscuana. <sup>9</sup> Er Bëngbe Bëtšá tojama atše jobenayama muentše chë tšabe noticiëngama banga jábuayenama, y chíyeca banga Cristbeñe montsošbuaché; pero bángnaca atšbe contra montsemna.

<sup>10</sup> Timoteo tšëngaftangbioye chaojase, yejuana šmochtsantješna cha tondayama chaondëtšauatjama, tšëngaftangbeñe tojtsemnëntscuana, er cha Bëngbe Utabnabiamana endëtrabája, ntšamo atše sëndamcá. <sup>11</sup> Chcasna, ndocná chábioye chabondëtšáboyëña. Bëtšá šmochjama cha natjëmbana átšbioye chauatábama, er atše cha sëntsobátmana, chë inýenga muentše Cristbeñe ošbuáchiyëngaftaca.

<sup>12</sup> Y Jesucristbeyeca bëngbe catšata Apólosna, atše bëtscá cha sënjaipadá, chë Jesucristbeyeca catšátanga tšëngaftanga jányama mochjángaftaca chaotsama, pero cha ndoñe chenátšbošena choye mora jama. Cha choye caochjá, chaojobená ora ca.

*Pablo chënga jtadióšofanama*

<sup>13</sup> Sempre šmochtsenocuedana chë Bëngbe Utabná ndoñe chašmondëtšeservenama tojtsama soyëngama. Nyets tempo, Cristbeñe y chabe soyënguñinaca šmochtsosbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtšabe obenánaca. <sup>14</sup> Y nyetsca soyënga ntšamo chašmojtsamcá, bonshanánaca šmochtsama.

<sup>15</sup> Jesucristbeyeca atšbe catšátanga, tšëngaftanga šmondëtatšëmbo, Estéfanas y chabe pamillanga chë natsanënga monjamnama Jesucristbeñe jtsošbuáchiyama, Acaya luaroca, y bëtscá imojtsentšëna Bëngbe Utabnabiamana jtsetrabájayana, chabe entsanga jtšëjabuáchanëse. <sup>16</sup> Atše chaimpadá, tšëngaftanga lempe šmochtsama ntšamo cmojtsamëndacá, chca entsanga mo tšëngaftangbe uanatsanëngcá, y ntšamo nyetsca chë inýenga mo bëngcá quemuiñe uajabuáchanëse trabájayënga cmojtsamëndacá.

<sup>17</sup> Atše tša oyejuayá sëntsemna tšëngaftangbe pueblentšana Estéfanas, Fortunato y Acaico moye tmojáshjajnama, er atše sëntsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sëntsobenëntscuana. <sup>18</sup> Er chënga átšbioye tmonjabo y tšëngaftangbiamana šmonjauyana, y chca chënga tmonjama, atše y tšëngaftanga natjëmbana ainánaca chamotsomñama. Chënga šmochtsétabna mo puerte uamana entsangcá.

<sup>19</sup> Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbëtšënefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bëtsemnayeca. <sup>20</sup> Muentša ošbuáchiyënga nyetscanga cmontsacheuaná. Nyetscanga šmochjenchuaye mo Jesucristbeyeca catšatangcá, jtënamochëse, ntšamo cach tšëngaftangbe pamillanga puerte bonshanánaca šmondbetsacheuanaycá.

<sup>21</sup> Quem palabrënga tšëngaftanga jacheuayama cach atšbe cucuátšëca sëntsabianná.

<sup>22</sup> Nderado nda Bëngbe Utabnábioye ndoñe tbontsebobonshana, Bëngbe Bëtšá nyetsca tescama chabocastigá. jBëngbe Utabná cachiñe cochjésabol

<sup>23</sup> Atše, Bëngbe Bëtšá sëntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnana. <sup>24</sup> Atše, nyetsca tšëngaftanga cbondábuanýëshana, canýa mo tšëngaftangcá, Cristo Jesúseftaca canýiñe mo canýacá jtsemnëse.

## 2 Corintios

### *Jacheuayama*

<sup>1</sup> Atse Pablo, Jesucristbe canye ichmoná, Bèngbe Bètsá atse chca jtsemnana yojánboseyeca, Jesucristbeyeca bèngbe catšata Timotéoftaca quem tsbuanácha sèntsabiamná, Corinto puebloca Bèngbe Bètsábeñe ošbuachiyèngcá enefjuanèngbiama, y nyets Acaya luarentše Bèngbe Bètsabe nyetsca entsangbiámnaca. <sup>2</sup> Atse sèntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tsèngaftangbeñe tsabe bendicionènga chaotsemnana y ainaniñe tsabe ebionana chašmotsebmnama.

### *Ntsamo Pablo tojansufri*

<sup>3</sup> Bènga mochtsatschuanaye Bèngbe Bètsá, chë Bèngbe Utabná Jesucristbe Taitá, bèngbe Taitá, chë bèngbiama lastemado yomná, y ndaye padecena soyènguiñe tmojtsemna ora, bènga sòndbetsañemuayá. <sup>4</sup> Cha bènga jtsañemuayana padecena soyènguiñe tmojtsemna ora, chca, bènga chamotsobena chë tmojtseusufrinènga jañèmuayama, ntšamo Bèngbe Bètsá sojjuabuachcá chënga jujabuáchese. <sup>5</sup> Er ntšamo Cristo tojansufri, bènga tša fsèndèusufrina chabiama oservèniñe; cachcá, Cristbeyècnaca Bèngbe Bètsá jamana bènga puerte añemo ainaniñe fchaitsebmnama. <sup>6</sup> Er bènga tmojtseusufrinèse, jtsemnana bènga jobenayama tsèngaftanga jañèmuayama chë šmojtseusufrina ora, y atsebácnènga chašmotsebmnama, Bèngbe Bètsabe soyèngama jouenèse. Chë padecena soyènguiñe tmojtsemna ora Bèngbe Bètsá sojjañemose, jtsemnana bènga fchayobenama tsèngaftanga jañèmuayama, padecena soyènguiñe šmojtsemna ora. Chca, bènga jobenayama tsèngaftanga jujabuáchana, Bèngbe Bètsábeñe chašmotsebmnama, chábeñe jtsòšbuachiyèse, y lempe jtsòboyayama, ntšamo bènga fsènjasufricá šmojtseusufrina ora. <sup>7</sup> Bènga sempre fsèndóbátmana y tsabá fsèndètatšëmbo chë padecena soyènguentšana tsabá šmochjábocanama, er bènga fsèndètatšëmbo, chë ntšamo bènga fsènjasufricá tsèngaftanga šmojasufrima; y cachcá, Bèngbe Bètsá yochjama tsèngaftanga ainaniñe puerte añemo chašmotsebmnama, ntšamo bènga fchaitsebmnama cha tojamcá.

<sup>8</sup> Jesucristbeyeca atšbe catšátanga, bènga fsèntseboše tsèngaftanga chašmotsetátšëmbo ntšamo bènga Asia luaroca tša fsènjansufrinama. Bènga puerte padecena soyènguiñe fsènjaniyena, nya ndoñe más jauantacá, chentšana vídaca jabocanama ntjatobtanmancá. <sup>9</sup> Bènga sòntsanènana mo jóbanama cuaftsamncá. Pero chë soye tonjanoservé, bènga jtsòšbuachiyama Bèngbe Bètsábeñe, nda inétsama obanènga chámuatayenama, y ndoñe cabèngbeñe ntsošbuachiyama. <sup>10</sup> Cha sojatsebacá bènga jóbanama puerte resjo enjamntšana, y cachcá sochjátsebacaye bèngbiama cachiñe cachcá tša resjuiñe chamojtsemna ora. Bènga puerte chábeñe fsèndóbátmana, puerte padecena soyènguiñe bènga chamojtsemna ora, cha cachiñe sochjátsebacama. <sup>11</sup> Tsèngaftangnaca cmontsamna bènga jujabuáchana, bèngbiama Bèngbe Bètsá jaimpádase; chca, ba entsanga Bèngbe Bètsá mochanjtšchuae, er cha tojama bènga chábentšana tsabe bendicionènga fchayoyèngacñama, cha jamèse ntšamo chënga bèngbiama tmojanimpadacá.

### *Ndáyeca Pablo Corinto pueblaye ndoñe tonjána*

<sup>12</sup> Canye soye endmèna ndayá oyejuayènga sojtsabiamná: bènga bèngbe ainanentša juabnèngaca jtsetatšëmbuana puerte tsabá jtsamèse fstsiyena ca, ntšamo chë Bèngbe Bètsabe entsànga endbetsamncá, nyetsca quem luarentša entsàngbeñe, y más tsèngaftangbeñe, y bènga jtsetatšëmbuana ntšamo tsabá tifjamcá nyets ainánaca tifjamama. Bènga tondaye chibiatsma quem luarentša entsàngbe osertanánaca, ndayá Bèngbe Bètsá tša tsabia bèngaftaca bétsemnayeca, sojjuabuache chca chamotsiyenama. <sup>13</sup> Er ntšamo fsèntsabiamnamna ndoñe queftsátseboše, ntšamo tsèngaftanga šmojtšalía y cmojtsèsertánentšana inyètšá játayanana, y sèntsóbátmana puerte tsabá lempe chacmòsertama. <sup>14</sup> Mora ndayá atse stsamama ndoñe lempe quecmátèsertana. Pero atse sèntseboše tsèngaftanga chama corente chacmòsertama; chca, Bèngbe Utabná quem luaroye chaojésabo ora, tsèngaftanga bèngbiama oyejuayènga chašmotsebmnama, ntšamo bèngnaca tsèngaftangbiama oyejuayènga fchantsemncá.

<sup>15</sup> Chca ndegombre yomnama atse sèndètatšëmboyeca, atse sènjanjuabná tsèngaftangbioye jshétsana jányama, y chca, chë tsabe soye tsèngaftangbiama uta soye jamana, tsèngaftangbioye uta soye jányèse. <sup>16</sup> Atse sènjanjuabná tsèngaftanga jshaftsanyana, Macedonioye ayiñe chëjana matijánachnèngo ora; y chentšana, ya camoye ataboye ora, tsèngaftanga cachiñe jáftsanyana. Chca, tsèngaftanga mašmènjanošená atse jujabuáchana Judea luaroye játama. <sup>17</sup> Atse chca jamama tsjanjuabná ora, ¿chca tjanma ndoñe corente tsabá ntjenjuaboycá? ¿Tsèngaftanga šmatjájuaboye, ntšamo nye quem luarama enójuabnaye entsànga monduamancá, cachora canye soyama “aíñe” y “ndoñe ca” jayanèse, atse ndayánaca jamama snètsejuabnaye ca?

<sup>18</sup> Canje soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe quetsbatayana chentšana atšbe juabna jatstrócama, mo canya cachora canje soyama “aíñe” y “ndoñe ca” cuafjatichamcá. <sup>19</sup> Er Cristo Jesús, Bëngbe Bëtsabe Uaquiñá, ndabiamama Silvano, Timoteo y atše tsëngaftangbeñe fsëñjanabuayinyá, ndoñe ntsejuabnayana canje soye jamama y chentšana jatšbana inyetšá jatsmama, mo canye entšá cachora canje soyama “aíñe” y “ndoñe ca” cuafjatichamcá, ndayá chana nyets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocyá. <sup>20</sup> Er ndayá cha tojamiñe, lempe ntšamo Bëngbe Bëtsá tojašebuachenacá jocúmpiana, mo chë lempe ntšamo Bëngbe Bëtsá tojašebuachenama cha “aíñe ca” cuafšichamcá. Chiyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”. <sup>21</sup> Pero Bëngbe Bëtsá endmëna nda inétsama bënga y tsëngaftanga puerte Cristbeñe chamotsošbuáchema, cháftaca cányíñe mo canyáca jtsemnëse; y Bëngbe Bëtsánaca endmëna nda bënga šojabacacá chabe entšanga chamotsemnana. <sup>22</sup> Cha tojama chë Uámana Espiritu bëngbe ainaniñe cháumashënguama jtsemándayama, y chë soye jtsinjanynayana bënga Bëngbe Bëtsabe entšanga imomnana. Y bëngbe ainaniñe chë Espiritu imobómnyeca, bënga corente jtsetatšëmbuana bënga mochjójyëngacñama lempe ntšamo Bëngbe Bëtsá bënga jatšatayama šojašebuachenacá.

<sup>23</sup> Bëngbe Bëtsá entsonyá atše ndegombre stsichámuama. Atše Corinto puebloye cabá ndoñe chiyjá, er atše ndoñe quetsátsboše tsëngaftanga jašëchnana, chë bacna soyënga šmojamama, tchojaucacánëse. <sup>24</sup> Bënga ndoñe quetsátsboše tsëngaftanga jamëndana ndayíñe tmojtsamna jtsošbuáchiyana; er tša šmojtsošbuachëyeca, ndoñe quešmochatajbaná Cristbeñe jtsošbuáchiyana. Bëngbe fsëntseboše ndayá tsëngaftanga jujabuáchana, corente oyejuayënga chašmotsemnana.

## 2

<sup>1</sup> Chiyeca atše ndoñe chiyjá jautsëtsayama, er atše sënjanjuabó y sënjanëniyana choye ndoñe jama ca, bacna soyënga šmojtsanmama jábuayenama, y chca, ngmënënga játabiamana, ntšamo chanje sënjamcá. <sup>2</sup> Tsëngaftanga ngmënaca chašmotsemnana atše stjamëse, ¿nda yochjama atše oyejuayá chaitsemnana, sinó nye tsëngaftanga, chë atše ngmënënga tijábiamënga? <sup>3</sup> Chiyeca tchbonjanëbuábiana chë ntšamo šmojualiacá, chca, atše choye stjášhango ora, tsëngaftanga átsbiroye ndoñe ngmená chašmondëbemama. Chca játamamna, tsëngaftangbiana más tsabá endmëna oyejuayá atše chašmobema. Atše tsabá sënjántatšëmbó ndayá átsbiroye oyejuayá šojabemcá, tsëngaftángnaca chca mašmënjánbošena y oyejuayënga chë soye matcmëñánabiana. Chiyeca atše ndoñe chiyataná, nyetscanga oyejuayënga jtsemnana ndoñe quenjatopodena ora. <sup>4</sup> Pero chë tsbuanácha tchbonjanëbuábiana ora, atše corente šonjanongmé y ainana šonjántsetšena chca jabuache soyënga tsëngaftanga jubuábiamama, y chca jamama shëchbuýnaca sënjanoperdé. Pero atše ndoñe checbátanëbuábiana atše jatšmama tsëngaftanga puerte ngmënaca chašmotsemnana, ndayá chašmotsetatšëmbuama atše tša cbababuánjeshanama.

### *Perdón chë bacna soye amabiamama*

<sup>5</sup> Y mora, chë tsëngaftangbeñe puerte ngmënana chaotsemnana tojama boyabásabiamna, cha átsbiroye ndoñe ngmená chešnátsbema, ntsachetšá tsëngaftanga tcmojabiamcá, injengbiroye injengbiana más. Chca séntsichamo, er atše ndoñe quetsátsboše jayanama ntsachetšá tojamama cha más bacna soye tojama ca. <sup>6</sup> Banga tsëngaftanguentsënga ntšamo šmojamcá, chë entsábiana ya bëts castigo entsemna. Nye nyetsá ponto. <sup>7</sup> Chamna, ndayá mora cmojtsamna jamamna entsemna, cha jtseperdóna y jañëmuana, chca, ndocna tsabe soye jamama ndobená ndoñe chaondësemnana, chë castiguama puerte ngmënaca bëtsemna causa. <sup>8</sup> Chiyeca, tsëngaftanga chaimpadá cachíñe tsabá chašminyinyé chábiroye corente šmobobonshánama. <sup>9</sup> Tempo ya chama tchbonjanëbuábiana, atše jinýama tsëngaftanga aíñe o ndoñe šmontsanprontánama, lempe ntšamo tchbonjanamëndacá jamama. <sup>10</sup> Chcasna, ndánaca ndayánaca tsëngaftanga chašmojaperdoná ora, átsnaca cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tsëngaftangbe tsábiana y Cristbe delante. <sup>11</sup> Atše tsëngaftangcá, quem entšábiroye šcoperdoná chë bëngbiana tojama bacna soye; chca, Satanás ndoñe chaondobenama bënga jáingñama, er bënga mondëtatšëmbó cha inétsboše ndaye bacna soye entšá chaotsamama.

### *Ndayeca Pablo ndoñe natjëmbana Troas puebloca tontsanoquedañe*

<sup>12</sup> Atše Troas puebloca sënjánashjango ora, Cristbe tsabe noticiënga jábuayenama, atše sënjáninýe Bëngbe Utaná tojanma chentše banga chë buayenana soye chamouenama y

chëngbe ainaniñe chana chamóyëngacñama. <sup>13</sup> Masque chca enjamna, atše ndoñe quetstésobera natjëmbana ainaa jtsebmna, er atše sënjanjuabná Jesucristbeyeca bëngbe catšata Tito chentše jinjenana, pero ndoñe chca. Chíyeca, Troas pueblentša entsanga sëntanadiošoftaná, y Macedonia luaroye sënjána.

*Cristoftaca cányíñe mo canýacá jtsemnëse, bënga mo ayëñjanayëngcá jtsemnana*

<sup>14</sup> Atše Bëngbe Bëtsábioye sëndbëtsatschuanaye, bënga bacna soyënga jamama juabnënga cha tojanëyëñjanama, tempo sojanamënda juabnënga; y chë mora bënga Cristoftaca cányíñe mo canýacá jtsemnëse, nyëts tempo cha snetsënachayama, mo canýe ayëñjanayacá, y chë nyëts luarenache entsanga Cristbiamá soyënga chamotsábuatmama bëngaftaca cha vojtsamama, mo nda canýe botamana uangüëtse soye nyëts luarënguenache chauáshanama cuaftsamcá. <sup>15</sup> Er chë incienso tojtsejuinýñyana ora, entsábioye tsábá juanguëtšenana; cachcá Cristbe tsábe noticiënga fstsabuayiná ora, Bëngbe Bëtsabiamá bënga jtsemnana chë ndëmuanyënga tmojtsama cha oyejuayá chaotsemnana. Incienso tcojtsejuinýñyana ora, nyëts cángbioye juanguëtšenana. Cachcá, Bëngbe Bëtsabe palabra fstsoyebuambná ora nyëts canga jouenana, Cristo vojtsatsebacanga y chë pochocánënga jtsemnana imojtsajnëngnaca. <sup>16</sup> Chë pochocánënga jtsemnama imojtsajnënga, pochocánënga mochanjábocana, er ntšamo bënga fsëndabuayinacá y tmojouencá chënga tmojtsaboté; y chca, chëngbiamá chë tsábe noticiënga jtsemnana mo canýe obanabe uangüëtšancá. Pero chë Cristo yochjátsebacangna, tsábe noticiënga tmojóyëngacñeyeca, mochanjobenaye tsábe vida nyëts tempo jtsebmna; y chca, chëngbiamá chë tsábe noticiënga jtsemnana mo canýe puerte botamana uangüëtšancá. Y asna, ¿nda obenana vojtsabomna chë tsábe noticiënga jábuayenama trabajo jtsamama? <sup>17</sup> Bënga chë tsábe noticiënga ndoñe queftsatabuayiná, ntšamo ba entsanga imojtsamcá, mo nye batšá uámana soyënga cuafsemncá, y ndayánaca juácanama, mo nda ndaye nduámana soyënga cuaftsencá. Banga chca mondama; bënga ndoñe. Bënga, Cristoftaca cányíñe mo canýacá jtsemnëse, fsëndabuayiná mo Bëngbe Bëtsabe delante cuafsemnëngcá, ndegombre nye ntšamo tsábá yomncá nyëts ainánaca jtsebošëse, y mo Bëngbe Bëtsabe ichmonëngcá.

### 3

*Chë Bëngbe Bëtsabe tsëm tratama buayenana soye*

<sup>1</sup> Chca bëngbiamá fstsajayana ora, tsëngaftanga cmojtsinýana ¿bënga cachiñe tiftëtontsé cabënga bëtsétsanga enobiamnayana? ¿O bënga sojtsamna, mo inýëngcá, tsëngaftanga juyentsbuáchiyana o juátjañana tsbuanachangá, bënga tsábá fstsamama chëchangaca jinýanyiyama? <sup>2</sup> Bënga bëngbe ainaniñe puerte tsábá fsëndétatšëmbo, nyëtsca entsanga, ntšamo tsëngaftanga jtsamëse šmoyencá tmojinýe ora, tsëngaftanga jtsinýanýñyana bënga ndegombre ntšamo tsábá yomncá fstsamama. Chca, tsëngaftanga jtsemnana mo canýe tsbuanachacá, nyëts canga jtsabuatmana y jtsobenana jualiana, bënga tsábá fstsamama. <sup>3</sup> Nyëts canga tsábá mondétatšëmbo Cristo tojanma tsëngaftanga chábeñe chašmotsošbuáchemá, y bëngaftaca cha chca tojanmámna. Chca, tsëngaftanga šmondmëna mo Cristbe canýe tsbuanachacá, ndayëcha quem luarentša entsángbioye tojuyentsbuaché bëngaftaca. Tsëngaftanga ndoñe chësmatanobená Cristbeñe ošbuáchiyënga jtsemnana entsangbe trabájoca, er Cristbeñe šmonjanošbuaché chë Bëngbe Bëtsá Ainabe Espiritbeyeca; y chca, tsëngaftanga šmondmëna mo canýe tsbuanácha cháftaca uabemanëchacá, y ndoñe mo entsángbeyeca uabemana tsbuanachacá. Bëngbe Bëtsá chë mandënga ndëtsbé tablëbenguiñe tojanábema, entsanga chamotsobedecénama, pero tsëngaftangna Cristbe buayenana soye tsëngaftangbe ainaniñe smojóyëngacñe.

<sup>4</sup> Cristbeyeca Bëngbe Bëtsábeñe jtsosbuáchiyëse, bënga corente fsëndétatšëmbo chca ndegombre bëtsemnana. <sup>5</sup> Ndoñe quenátsmëna, nye bënga cányënga quem trabajo jamama fstsobena y játayana bëngbe soye chë trabajo vojtsamna ca, er bënga jtsobenana chca jamama, nye Bëngbe Bëtsabe ujabuáchenanaca; <sup>6</sup> er cha tojama bënga fchayobenama quem trabajo jamama, chë entsanga jábuayenana Bëngbe Bëtsá chabe entsángbioye tojanašebuachená soyëngama, ndayá Cristo tojanma sóyeca, mo canýe tsëm tratcá, Bëngbe Bëtsá y chabe entsángaftaca. Quem soye ndoñe quenátsmëna mo chë Bëngbe Bëtsá tempo Israeloca entsángbioye léyeca tojanašebuachená soyëngcá. Inýëtšá; entsanga mondama Bëngbe Bëtsabe tsëm trato, Uámana Espiritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entsá jóbana jtsemnana; pero Cristbe tsábe noticiënga, chë tsëm trato, entsanga ainaniñe tmojóyëngacñe ora, chë Uámana Espiritu jamana, chë nyëtsca tescama yomna tsábe vida chënga chamotsebmna.

<sup>7</sup> Quem Moisesbe ley, chë ndoñe tmonjobedecema entsanga jóbana jtsamnana, ndëtsbé tablëbenguiñe letrëngaca tmojanábema, y Bëngbe Bëtsá Moisesbioye tbojanantšabuaché ora, cha tsá buashinýñyaníñe tojánabo. Chë causa entsanga ndoñe

imontsobena ni mo jin̄yana Moisesbe jubíá, er t̄sa ibojtsanjuebēbuashin̄jin̄yana, Bēngbe Bētsáftaca thojanencuentent̄sana tojtanabo ora. Pero betso tojanējbana chē jubíá chca buashin̄jin̄yanana. Chē ley, chē natsana trato, Bēngbe Bētsá tojanayent̄sbuaché ora, t̄sa buashin̄jin̄yanánaca cha tojanm̄sē; <sup>8</sup> ndegombre, más bēn y uámana tempo entsemna chē Bēngbe Bētsá bēnga šojanašebuachená tsēm soyēnga yojtsama ora, chē Uámana Espiritu Bēngbe ainaniñe cháumashēnguama Bēngbe Bētsá tojama ora. <sup>9</sup> Bēngbe Bētsá chē ley tojanayent̄sbuaché ora, chē ndáyeca ent̄sanga jóbanama yojánamna, nt̄samo chiñe betsayancá ndoñe tmonjama causa, chora cha chca tojanma puerte chabe buashin̄jin̄yanana jin̄yan̄iyēse; ndegombre más bēn y uámana tempo entsemna chē mocna ora Bēngbe Bētsá yojtsama ent̄sanga chabe homin̄yiñe tsábenga chamotsemnana. <sup>10</sup> Er chē Bēngbe Bētsá ley tojanayent̄sbuaché ora tojanin̄yan̄yē buashin̄jin̄yanana, mora jtsin̄ynana mo ya tondaye cuabndētsemncá, chē Bēngbe Bētsá ent̄sangbiamma tsēm soyēnga tojtsamama toctson̄yá ora, chē t̄sa buashin̄jin̄yanana yojtsemna ora. <sup>11</sup> Er chē leyama tempo, chē ya jochnēnguama tempo entsemna ora, Bēngbe Bētsá chabe buashin̄jin̄yanana y uámanana tojin̄yan̄yese; ndegombre chē Bēngbe Bētsá tsēm soyēnga ent̄sangbiamma jamama ora, chē ndocna te yochanjochnēngo tempo ora, Bēngbe Bētsá más chabe buashin̄jin̄yanana y uámanana echántsin̄yan̄yaye.

<sup>12</sup> Y chca, Bēngbe Bētsá chca bēts soyēnga yochjamama fsēndobatmánayeca, bēnga fsēntsobena jóyebuambayama, nyētsca soyēngama jayanēse, tondayama nt̄jatauaticjá. <sup>13</sup> Y chca, bēnga ndoñe Moisescá queftsátama, chē chabe jubíá chaobuashin̄jin̄yenama Bēngbe Bētsá tojanma ora, can̄ye ent̄sējuaca yojtsenamochēcua; cha chca tojanma, chē Israeloca ent̄sanga ndoñe chamondobená jin̄yama chē jubíá buashin̄jin̄yanana ya yojtsēchnējuana ora. <sup>14</sup> Pero Bēngbe Bētsá tojanma chēnga ndoñe chaondósertama nt̄samo Moisesbiajana cha tojanayancá. Y cabá quem tempo, nt̄samo Bēngbe Bētsá Moisésbiaye thojan̄sbuachenacá chēngbiamma jamama, Israeloca ent̄sanga tmojtsalía ora, ndoñe nt̄sēsértanana Bēngbe Bētsabe ndegombre soyēnga, mo chēngbiamma iytēmena soyēnga cuaftsemncá, mo chē Moisés yojtsenamochēcua ent̄sējuacá. Y chca endmēna, er n̄ye Cristoftaca cán̄yiñe mo can̄yacá jtsemnēse, chēnga jtsobenana chē soyēngama jósertana, y iytēmencá ya ndoñe ntsemnana. <sup>15</sup> Y mēntscōñama, Moisesbe librēšangá chēnga tmojtsalía ora, ndoñe nt̄sēsértanana Bēngbe Bētsabe Bētsabe ndegombre soyēngama, nt̄samo chiñe tojtsayancá jamama ndoñe montseboše causa. <sup>16</sup> Pero can̄ye ent̄sá chē Bēngbe Utabnabe benache tojishache ora, cha jtsobenana chē soyēngama jósertana. <sup>17</sup> Y Bēngbe Utabná y Espiritu can̄ya bondmēna, y Bēngbe Bētsabe Espiritu tojtsemn̄nt̄se, chē bacna soyēnga jamama juabnēnga, ni chē ley ndoñe ntsemándayana. <sup>18</sup> Moisés chabe jubiañe Bēngbe Bētsabe buashin̄jin̄yanana y uámanana tojanin̄yan̄yē, y chíyeca, can̄ye ent̄sējuaca yojtsenamochēcua, chca, chēnga ndoñe chamondin̄yama. Pero bēnga ošbuáchiyēnga nyētscanga jtsin̄yan̄yanana Bēngbe Utabnabe buashin̄jin̄yanana y uámanana, mo can̄ye espejo can̄ye soye tojtsin̄yan̄ynacá, y ndoñe queftsátsoše nt̄sám̄naca jamēse chē soye jatsēytamianana. Cha Bēngaftaca yojtsama cada te más chē nt̄samo cha yomncá bēnga chamotsemnana, cada te más bētsēsanga chē nt̄samo cha yomncá jtsemnēse. Chca endmēna nt̄samo Bēngbe Utabná yojtsama; y Bēngbe Utabná y Espiritu can̄ya bondmēna.

#### 4

<sup>1</sup> Y chca, Bēngbe Bētsá bēngbiamma lastemado yóm̄nayeca, quem trabajo šojaban̄yē, jtsabuayin̄yanama chē Cristoftaca tojašebuachená soyēnga; y chíyeca bēnga ndocna te nt̄jābanana ainaniñe añemo homnana. <sup>2</sup> Bēnga fsēntsaboté chē in̄yēnga iytēmencá inm̄n̄tsama soyēnga, chē in̄yēnga tmojin̄ye ora chama jtsēuatjana, y chē in̄yēnga ent̄sanga jáingñama inm̄n̄tsama soyēngnaca, y Bēngbe Bētsabe buayenana soye ndoñe queftsastroca ndoñe ndegombre soyēngaca. Chamna, bēnga sempre n̄ye chē nt̄samo ndegombre yomncá fsēndbētsoyebuambnaye, mo Bēngbe Bētsabe delante cuaftsemnēngcá jtsamēse; y chca, bēnga fsēndbētsama cada ent̄sabe ainanent̄sa juabnēnga chamuayanama, bēnga ndegombre soyēnga fstsoyebuambná ca. <sup>3</sup> Y nderado bēnga chē tsabe noticiēnga ftsabuayin̄yá ora, báseftanga chē soyēnga chaósertama ndoñe tontsopodēnēse, n̄ye chē pochocánēnga jtsemnana tmojtsajnēngbiamma chca jtsemnana. <sup>4</sup> Chēngbiamma, chē Cristbeñe ndošbuáchiyēngbiamma, chē quem luarent̄se mora mandayá, Satanás, tojama chē buayenana soye ndoñe chaondēsēsertanama; chca, chēnga ndoñe chamondin̄yama chē tsabe noticiēnguent̄sana puerte bēts y tsabe soyēnga, chē Cristo puerte bētsá y obená yomnana in̄yan̄naye soyēnga, nda nyētsca soyēnguiñe Bēngbe Bētsacá yomna. <sup>5</sup> Bēnga ndoñe n̄ye cabēngbe soyama queftsatabuayin̄yá, ndayá Jesucristbiamma mo Bēngbe Utabnacá. Bēnga bēngbiamma fsēndbáyana mo oservenēngcá ftsmēna ca, tsēngaftanga jujabuáchama; y chca fsēndbētsama Jesús jaserviama. <sup>6</sup> Er Bēngbe Bētsá, nda quem luare joboját̄sama ora tojanmandá bin̄yiñe ibetent̄sana chaóboचना, chánaca tojama bēnga ainaniñe tsabá chabe



soyëngama chašotsësertánama, chca bënga fchayobená juabuátmanana chë Bëngbe Bëtsabe uámanana y obenanentšana inétsobocana osertánana, ndayá Crístbeñe bënga mondonýa.

*Bënga fsëndoyena Crístbeñe jtsošbuáchiyëse*

<sup>7</sup> Pero chë puerte tšabe y bëts soye, chë Crístbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nýe mo matbajëngcá, ndoñe yapa obenana ntsebmomna, chca, jinýanýiyama tša bëts obenana Bëngbe Bëtsábocana yóbocanama, y ndoñe bëngbentšana. <sup>8</sup> Y chca, bënga nýetsca padecena soyënguñe vida fsëndbomna, pero ndoñe queftsátsmëna ndobenënga chë padecena soyënguentšana tšabá jabocanama; ndoñe queftsátstátšëmbo ndayá jamama šojtsamna, pero ndoñe queftsátsmëna ntšobencá jtšobátmanama quem padecena soyënguentšana tšabá jabocanama. <sup>9</sup> Inýenga montsama bënga puerte fchaisufrima, pero Bëngbe Bëtsá ndoñe nýe cachcá sentsabashëjuana; mo nda inýabiye cuafjutsencá tmojtsentsjaná ora, ya jóbama jtseprontánana, uayayënga bënga jtšébáyama imojtsejuabnangbe cucuatšine fsëntsemna, pero cabá ndoñe ntjóbáyana. <sup>10</sup> Inýenga sempre jtšamana bënga bëngbe cuerpiñe puerte fchaisufrima, y jobanámnaca resjo jtsemnana, ntšamo Jesúseftaca tmojanmca, cha chaosufrima y chaóbanama. Chca bëngaftaca endopasana, chca, inýenga chamobená jinýama Jesús bëngbeñe vida yobomnama. <sup>11</sup> Er bënga vida fchabomnëntscuana, sempre puerte resjo bëngbiama jëftsemnana jóbana, Jesúsbioye servena causa; y chca endmëna, inýenga chamobená jinýama Jesús vida yobomnama bëngbe cuerpiñe, chë canýe te yochjopochóca cuerpo. <sup>12</sup> Y chca, bënga tša fsëndësufirina y jobanámnaca resjo endmëna; y tšëngaftanga tšabe noticiënga šmojóyëngacñayeca, Bëngbe Bëtsá tojama chë nýetsca tescama yomna tšabe vida chašmotsebmomnama.

<sup>13</sup> Bëngbe Bëtsabe uabemana palabrénguñe endayana: “Atše sentsanošbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca bëngnaca Bëngbe Bëtsábeñe fsëntsošbuaché y chabiama fsëntsoyebuambná. <sup>14</sup> Er bënga fsëndétatšëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Crístoftaca canýiñe mo canýacá jtsemnëse, bënga chámuatayenama, y tšëngaftangaftaca canýiñe cha yochtsemnoye sochjúshejango. <sup>15</sup> Lempe ntšamo bënga ftsama y fstsësufirincá tšëngaftangbe tšabiama endmëna; chca, más becá entšanga chábeñe chamojtsošbuaché ora, ba tšabe bendicionënga Bëngbe Bëtsá entšangbiama jtsemnëse, más becá entšángnaca chábioye chamotsatschuaná, ndayá chëngbiama cha yochjamama; y lempe chca, Bëngbe Bëtsá puerte uamaná y obená yomnama nýetsca entšanga chamotsichámuama.

<sup>16</sup> Chíyeca bënga ndoñe ntjájbánana ainaniñe añemo bomnana. Masque quem luarentša bëngbe cuerpo cada te jtšopochóca, Bëngbe Bëtsá jamana chë bëngbentšana nýets tempo vida yochtsebmomna soye, cada te más obenana chaotsebmomna; y chca, bënga jtsemnana mo tsmëma entšangcá. <sup>17</sup> Ntšamo bënga mora fsëndësufirincá endmëna nýe quem luarentše vida tmojtsebmomnëntscuana, y chca, chë soye jtsemnana mo canýe nduámana soyca; pero ntšamo bënga fsëndësufirincá josérviana bënga jtsebmomna chë Bëngbe Bëtsá šochjatsataye puerte bëts uámanana y obenana, cháftaca nýets tempo vida jtsebmomna, chë ndayá yomna nýetsca soyëngama más bëts y uámana soye. <sup>18</sup> Er bënga nýe chë tojtsopodena jinýama soyënguñe ndoñe nýets tempo queftsatsjuabná, ndayá chë ndoñe yondopodena jinýama soyënguñe; er chë bënga imobena jinýama soyënga ndoñe nýetsca tescama ntsemnana; pero chë bënga ndoñe mondbomna jinýama soyënga cocayé nýetsca tescama jtsemnana.

## 5

<sup>1</sup> Bënga mora mondbomna canýe cuerpo quem luarentše vida jtsebmomna. Quem cuerpo yomna mo chë jtšatsjacama yopodena yebncá, canýentšë ndoñe nýets tempo ntjëftsemnana. Bënga mondtátšëmbo, quem cuerpo canýe te tojtsopochocase, Bëngbe Bëtsá yochjama bënga tsmëma cuerpënga chamotsatsbmomna, celoca nýetsca tescama vida jtsebmomna, Bëngbe Bëtsabe pormanana cuerpënga y ndoñe entšangbe pormanana cuerpënga. <sup>2</sup> Chíyeca, bënga quem luarentše chca vida tmojtsebmomnëntscuana, yapa tmojtsebsufrina causa, bënga tša jtšebošana betscó Bëngbe Bëtsá celoye chašúyambama, y bënga nýets tempo celoca jtšiyenama tsëm cuerpo jtsebmomna cha chaomama; <sup>3</sup> chca, Crísto yochjésabo ora, bënga chë tsëm cuérpoca chamotsemnana, y ndoñe nýe espíritu ndocna cuérpoca. <sup>4</sup> Bënga quem cuerpiñe, chë quem luarentše vida jtsebmomna cuerpiñe chamojtsiyenëntscuana, yapa padecena soyënguñe sufrina causa, bënga jabuache mochanjáshachna; chca echántsemna ndoñe nýe chë espíritu ndocna cuérpoca jtsemnana bënga imojtsebóšeyeca, ndayá masna, bënga chë tsëm cuerpo chamotsebmomna Bëngbe Bëtsá chaomama imojtsebóšeyeca. Bënga fsëntseboše chë bëngbeñe jopochócama yomna soye Bëngbe Bëtsá lempe chaotrocama, chca, bënga chamotsobenama celoca nýetsca

tescama vida jtseboimnama. <sup>5</sup> Y Bëngbe Bëtsá endmëna nda tojama bënga chamot-seprontánama chë tsëm cuerpo jtseboimnama, y nda tojama Espiritu bëngbe ainaniñe cháuamashënguama, chca bëngbioye jinñanñiyama, bënga ndegombre mochióyëngacñe ndayá Bëngbe Bëtsá tojašebuachenacá.

<sup>6</sup> Y chca, bënga sempre ainaniñe bëts añemo fchandbëtseboimna. Bënga fsëndëtatsëmbo, quem cuerpiñe cabá vida bënga mochiëftseboimnëtsuana, bënga ndoñe mochiántsemna Bëngbe Utabná yojtsemnëntse. <sup>7</sup> Er mora bënga fsëndoyena jtsamëse, ntšamo Crístbeñe bënga imošbuachecá, y ndoñe nñe ndayá jinñama tmojtsobenama. <sup>8</sup> Bëngbe fsëntsemna ainaniñe bëts añémoca, y más fsëntseboše jájbanana quem cuerpiñe vida jtseboimnana, jama Bëngbe Utabnáftaca nñetsca tescama vida jtseboimnama. <sup>9</sup> Chiýeca bënga bëtsá fsëndëtsëna Bëngbe Utabná sempre oyejuayá jabemama, masque bënga quem luarentse quem cuépoca tmojtsiyena, o ya ndoñe. <sup>10</sup> Er nñetscanga šontsamna jashjanguana Crístbe puestoca tribunalentse, cada ona ntšamo yomerecencá chaóyëngacñama, ntšamo tsábá o ndoñe tsábá quem luarentse chabe cuerpiñe vida yojëftseboimnëtsuana tojëftsemcá.

*Jábuayenama ntšamo Bëngbe Bëtsá inama entsanga tempcá tsábá cháftaca chamotsatsmënama*

<sup>11</sup> Chcasna, Bëngbe Utabná nñetscangbiana chë más bëtsá yomnama jtsejuabnayëse, bënga bëtsá fsëndama entsanga jáyëñjanama, bënga tsábá ftsamama chamotsejuabnama. Pero Bëngbe Bëtsá ya endëtatsëmbo ntšamo bënga ftsmënama, y atše sëntsobátmana tsëngaftangnaca chca tsábá chašmotsetátšëmbo, tsëngaftangbe ainanëtša juabnëngaca, chë bëngbiana aña ca cmojtsëtsëtsná juabnënga. <sup>12</sup> Bënga ndoñe cachiñe cabëngbiana queftsatoyeuambná; chca fsëntsichamo ndayá tsëngaftanga oyejuayënga bëngbiana chašmotsemnama, chca, tsëngaftanga jojuama chašmobenama, chë uámama soyënga tmojtsebinanngbioye ndayá entsanga canñe entsábeñe tmojtsónýacá y ndoñe chca chë entsábe ainaniñe tomna soyëngaca. <sup>13</sup> Er bënga mo chë ndoñe corente juabna ndbomnëngcá ftsamëse, ntšamo báseftanga mondbetsichamcá, jtsemnana Bëngbe Bëtsá jasërviam; y bënga corente juabna bomnëngcá ftsamëse, jtsemnana tsëngaftangbe tsábiana. <sup>14</sup> Bënga chca fsëndmëna, Crísto šondábabuanñeshanayeca, y chë soye endama bënga nñe cha fchaitseservénama, er bënga fsëndenojuabná y puerte tsábá fsëndëtatsëmbo, canña, Crísto, nñetscangbiana tojanóbanama; y cha nñetscangbiana tojanóbanayeca, endmëna mo cha tojanóbana ora, nñetscanga cháftaca cuafjobancá. <sup>15</sup> Y Crísto nñetscangbiana tojanóbana, chë quem luarentse vida bomnënga ndoñe más nñe cachëngbiana chamondëtsiyenama, sinó chabiana, nda chëngbiana tojanóbana y tojtanayena. <sup>16</sup> Chiýeca, bënga ya ndoñe ndocnabiama queftsatsjuabná ntšamo entsanga quem luarentse jtsejuabnayama monduamancá; masque ndegombre bënga chca Crístbiana fsënjanjuabná, mora ya ndoñe chca chabiana queftsatsjuabná. <sup>17</sup> Chcasna, nderado nda Crístoffaca cánñiñe mo canñacá tojtsemna. Bëngbe Bëtsá tojama cha mo canñe tsëm entsacá chaotsemnama. Ntšamo chë Crístbioye cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayana y jtsamana inñe soyënga y tsëm soyënga.

<sup>18</sup> Bëngbe Bëtsá endmëna nda chca inétsama, entsanga mo tsëm entsangcá jábiamama; y cha Crístoffaca tojama bënga tempcá tsábá cháftaca chamotsatsmënama. Y cha bënga canñe trabajo šonjanabanyé, bënga entsanga jábuayenama, Bëngbe Bëtsá inétsama entsanga tempcá tsábá cháftaca chamotsatsmënama, y entsanga jujabuáchama chca chamotsemnama. <sup>19</sup> O mëntšá, Crísto tojanma sóyeca Bëngbe Bëtsá yojtsama entsanga chamotsobenama tempcá tsábá cháftaca jtsatsmënama, y chca, chënga chamotsobena chëngbe bacna soyëngama perdonánënga jtsemnana, y chë soyëngama nñetsca tescama castigánënga jtsemnana ndoñe chaondëtsamnama. Y bënga šonjanabanyé chë trabajo, entsanga jtsabuayinayama ntšamo Bëngbe Bëtsá inama entsanga tempcá tsábá cháftaca chamotsatsmënama. <sup>20</sup> Y chca, bënga jtsemnana Crístbe cuenta oyeuambnayënga y amënga, mo cach Bëngbe Bëtsá bëngaftaca cmojtsaimpadancá. Crístbe cuenta cbaimpadá, bëtsá šmochttsëntšëna Bëngbe Bëtsáftaca tempcá tsábá jtsatsmënama. <sup>21</sup> Crísto ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canñe bacna soyënga amá cuafsemncá, chca, bënga Crístoffaca cánñiñe mo canñacá jtsemnëse, Bëngbe Bëtsabe bominiñe tsábënga jtsemnana chamotsobenama.

## 6

<sup>1</sup> Chcáyeca, bënga Bëngbe Bëtsáftaca cánñiñe trabájayënga quetsomñecana, cbontsaimpadana ndoñe nñe bonamente chašmondóyëngacñe chë Bëngbe Bëtsá yojtsama soyënga, tsëngaftangbiana tsábe juabna jtseboimnëse. <sup>2</sup> Er Bëngbe Bëtsá chabe uabemana palabrënguiñe mëntšá tojánayana:

Chë tsábe soye jamama tsábá šonjaninñana ora, atše tcbonjanoyeuná;

chê ácbioye jatsbocama te, tcbonjanájabuache ca.

Smochjinýe. Mora entsemna chë mocna ora Bëngbe Bëtsá tsabá ibojtsinýana tsabe soye jamama; mora entsemna chë mocna ora Bëngbe Bëtsá yojtseboşe aca jatsbocama.

<sup>3</sup> Bënga ndocna bacna soye queftsátama, ndayá chaoma entsanga chë tsabe noti-ciënga chamotsábotema, chca, ndocná podesca chaondëtsóyeuambnana bëngbe trabajuama, Cristbiam. <sup>4</sup> Inýetsá, bëngna nyetsca soyënguife fsënjaniyena mo Bëngbe Bëtsabe oservenëngcá; Bëngbe Bëtsábeñe obatomancá puerte uantadënga jtsemnëse, fstsesufrina ora; puerte padecena soyënguife bëtsemna causa, ndayá jamama ndoñe fsëntsetatšëmbo ora; y ainaniñe puerte ngmënaca fstsemna ora; <sup>5</sup> inýënga šojtsatsetšená ora; cárceloye šojautame ora; entsanga bëngbe contra tmojtsenbouénana ora; jahuache trabájayñe puerte uamëntšnayënga fstsemna ora; bayté ntsamanacá fstsemna ora; y jasama tondaye fsëntsebmoma ora. <sup>6</sup> Bëgnaca fsëntsinýanýná Bëngbe Bëtsabe oservënënga fstsmënana, puerte tsabe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbe; inýënga ntšamo šojáborlaye ora puerte uantadënga jtsemnëse; inýëngbioye puerte bonshanánaca jtsëñýayëse; Uámana Espiritu bëngbe ainaniñe jtsebmomnëse; y ndegombre nyets ainánaca nyetscanga jtsababuánýeshanëse; <sup>7</sup> ntšamo Bëngbe Bëtsabiam ndegombre yomncá jtsabuayinayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyëñjanama y chëngbiam jenëuyanama soyënga jtsebmomnana, chë Satanásbioye jáyëñjanama y chabiam jenëuyanama ndayá Bëngbe Bëtsá šojatšatacá jtsebmomnëse; y Bëngbe Bëtsá chca tojama, er cha tojama bënga chabe hominýiñe tsábënga chamotsemnana. <sup>8</sup> Bënga fsëntsinýanýná Bëngbe Bëtsabe oservënënga fstsmënana, inýënga bëngbiam tsabe soyënga tmojtsejuabná ora y bënga nduámanënga jtsemnana chënga tmojtšama ora; inýënga tsabe soyënga bëngbiam tmojtsoyeuambná ora y chënga bëngbiam podesca tmojtsichamo ora; bënga áingñayënga fstsmëna ca báseftanga tmojtsejuabná ora, pero bënga ntšamo ndegombre yomncá jtsóyeuambnayëse. <sup>9</sup> Mo nduámanëngcá bënga entsángbeñe jtsëñýayana, pero banga corente tsabá bënga šondëubuatma; bëngbiam sempre resjo endmëna jóbanama, pero smochjinýe, bënga sempre vídaca chentšana jatóbocañana; bënga juatsjínýama jobenayama, Bëngbe Bëtsábeyeca castigánënga fchandbëtsemna, pero nýa jóbanana ndoñe. <sup>10</sup> Masque ngmënënga fstsemna, ainaniñe sempre oyejuayënga fchandbëtšomñe; masque ndbomnjëmëngcá, pero fchandbëtšama banga Bëngbe Bëtsábicocana bëtscá chamotsebmomnana; quem luarentša soyënga tondaye queftsátšbmoma, pero Bëngbe Bëtsabe entsanga quetsomñecana, ndegombre lempe fsëndëtsóbmome.

<sup>11</sup> Tsëngaftangbiam, Corintoca entsanga, lempe fsëñjyana, tondaye ntjaitëmcá; nyets ainánaca, corente cbondábabanýeshana. <sup>12</sup> Bënga puerte cbondábabanýeshana, pero tsëngaftangna ndoñe yapa quešcátáabanýeshana. <sup>13</sup> Atše cbontšaimpadana, mo canýe taitá chabe básënga cuaftšaimpadancá, atše puerte chašmotsebobonshánama, er atše corente cbondábabanýeshana.

### *Bënga mondmëna mo Bëngbe Bëtsabe bëtš yebncá*

<sup>14</sup> Cristbeñe ndošbuachiyëngaftaca ndoñe šmatjenutaná ndayánaca jamama, er chca, chëngaftaca šmatjábcocana mo chë jáárama uacnata ndoñe cachëñchechata tbontsemncá. Ndegombre, chë tsabe soyënga amá y Bëngbe Bëtsabe bominiñe tsabia mëná, nýa tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entsangbe juabna binýnayáftaca vida bomná, nýa tondaye ntsebmomnana chë nýe mo ibetiñcá juabnayáftaca. <sup>15</sup> Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Cristbeñe ošbuachiyá y chábeñe ndošbuachiyáftaca. <sup>16</sup> Ndocna soyiñe cachcá ntsemnana, Bëngbe Bëtsabe bëtš yebna, chë nýe canýe Bëngbe Bëtsábioye jadórana yebna, y chë entsangbe pormana soyënga, mo diosënga cuatfsemncá jtsadoránana soyënga; chca endmëna, er bënga, nyetscanga cánýiñe Jesucristbeñe ošbuachiyëngcá, mondmëna mo Bëngbe Bëtsá Ainabe bëtš yebncá, ntšamo Bëngbe Bëtsá chabe uabemana palabreñguife chabe entsangbiam tojanayancá:

Chëngbeñe vida chántsebmoma y chëngbenache chántšana;  
atše chëngbe Bëtsá chántsemna  
y chëngna atšbe entsanga ca.

<sup>17</sup> Chýeca mëntšánaca Bëngbe Utabná chabe entsanga tojanëyana:

“Chë bacna soye amëngbentšana smochjésebcocana, y chëngbentšana šmochtsojuánañe; tondaye šmatsebana, ni šmatšana ndayá Bëngbe Bëtsabe entsangbiam ndoñe tsabá tontsemncá.

As chochanjúbuaa,

<sup>18</sup> y chántsemna mo canýe taitacá tsëngaftangbiam,  
y tsëngaftangna mo atšbe uaqüñënga y bembangcá.

Chca séntsicamo atše, tsěngaftangbe Utabná, nyets obenana bomná ca” —chiñe en-duábemana.

## 7

<sup>1</sup> Chcasna, atšbe bonsháněnga, chca endmēna ntšamo Běngbe Bětsá šojašebuachenacá. Chíyeca šontsamna, Běngbe Bětsabe delante nyetsca soyěnguiñe tsábenga jtsemnana, běngbe cuerpama o espíritiama bacna soye ndoñe más ntšamcá; y Běngbe Bětsá nyetscangbiama más uamaná yomna ca mondějuabnáyeca, lempe ntšamo tmojobenacá mochsiyena mo chabe entsāngcá, nyetsca soyěnguiñe puerte tsábenga jtsemnēse.

*Ntšamo chě Corintoca entsānga juabna tmojantrocá*

<sup>2</sup> Běngbiama šmochtsenójuabnaye tsěngaftangbe ainaniñe puerte bonshanánaca. Běnga ndocnabiama bacna soye chibiatsma, ndocnabiama chibiatsma más bacna entsá chaotsemnana, y ndocnábioye chibiatsingñé. <sup>3</sup> Atše chca ndoñe quetsátichamo, ndoñe tsábá šmonjama ca tsěngaftangbiama jayanama, er ntšamo ya tcbonjauyancá, atše tsěngaftangbiama sempre ainaniñe puerte bonshanánaca sěndbětsenojuabnaye; y chca, mo átseftaca canyíñcá šmochántsemna, masque chayóbana o cabá vida chaitsóbomñése. <sup>4</sup> Atše puerte tsábá sěndětatsěmbo, ntšamo tsábá yomncá šmochtsamama; y tsěngaftangbiama puerte oyejuayá sěntsemna. Lempe ntšamo tsěsufincá tsiyenama, atšbe ainaniñe běts añemo sěndětsóbomñe y corente sěntsoyejuá.

<sup>5</sup> Macedonia luaroye fsěnjánashjajna orscana, ndoñe luare queftsátsbomna jóchnama, sinó nyetsca soyěnguiñe fsěnděpadeceña: chě běngbe buayenana soyama contra tmojtsemněngaftaca jabuachana enatsětnayěse, y běngbe ainaniñe jtsauatjěse. <sup>6</sup> Pero Běngbe Bětsá, chě yapa añemo ndbomněngbioye endbetsañemuayá, tojanma běnga ainaniñe más añemo fchaitsebomnama, Tito moye tonjánashjango ora. <sup>7</sup> Y cha tonjánabo ora, běnga ndoñe más añemo quefstětsebomna nyě cha tojánashjanguama, sinó tsěngaftanga šmojanájabuachama y ainaniñe añemo chaotsebomnama šmojanmama. Cha šonjaněyana tsěngaftanga tša šmojanboše běnga jányama ca, y šonjanacuntá ntšamo tsěngaftanga ngmėnaca šmojanma, atšbiama ndoñe tsábá šmonjanma causa, y ntšamo tsěngaftangbiama atšbe tsábiana puerte iuámanana; y quem chabe noticiěngaca, cabá más sěntsoyejuá.

<sup>8</sup> Er masque tsěngaftanga tša ngmėnaca šmojanma chě tcbonjaněbuábiana tsbuanáchama, mora ndoñe quetsatsjuabná más tsábá yojamna chca ndoñe jatěbuabiamana ca; masque tempo atše chca sěnjanjuabná, er atše sěntsetatsěmbo chě tsbuanácha básefta tescama ngmėnėnga tcmojánabiama, <sup>9</sup> mora atše puerte oyejuayá sěntsemna, ndoñe tsěngaftanga ngmėnėnga šmojanmama, ndayá chě šmojanbomna ngmėnana tojanmama tsěngaftanga chašmuenójuaboma ndoñe tsábá šmontsamama, y chca amana chašmotsajbanama, tsěngaftangbe juabnėnga jatrócace. Chca enjamna, er tsěngaftanga ngmėnana šmojanbomna ntšamo Běngbe Bětsá inabošcá; chíyeca, běnga ndocna bacna soye tsěngaftangbiama chibiatsma. <sup>10</sup> Ntšamo Běngbe Bětsá tojtsebošcá ngmėnana bomnentsāna, jóbocnana chě bacna soyěnga tcojamama jenójuaboyana y juabnėnga jatrócana; y juabna jatrócana entsábioye juanatsana atsbocaná chaotsemnana, y cha ndocna te ntjátsjuabnayana más tsábá yojamna ndoñe chca ntjatstrócana ca. Pero ntšamo chě nyě quem luarama enójuabnaye entsānga mondbetsebomncá ngmėnana bomnentsāna, ndoñe ntjóbocnana juabna jatrócana; chentšana jóbocnana nyě nyetsca tescama castiganá jtsemnana, mo nyetsca tescama cuaffobancá. <sup>11</sup> Smochjinýe ndayá tojóbcna, ntšamo Běngbe Bětsá inabošcá ngmėnana bomnentsāna: tojanma chě šmojanma soyiñe puerte chašmuenójuaboma; y ntšamo jájandmanana bětscá chašmonguanguama; tojanma tsěngaftanga chacmetonama chě bacna soye tojanmáftaca; y castigánėnga jtsemnana jtsauatjámna. Chentšana, tsěngaftanga tša šmojtsanboše atše jinýama; y šmojtsanprontana lempe jamama chca bacna soye ndoñe más chaondětsemnana y chca tojanmábioye jacastigama. Nyetsca chě soyěnguiñe tsěngaftanga šmonjinýanýe chca bacna soye ndoñe šmonjanmama; y chca, mora tondaye quenátsemna tsěngaftanga castigo jtsebomnama chacmotsamnama. <sup>12</sup> Y chca, atše chě tsbuanácha tcbonjaněbuábiana ora, ndoñe checbátaněbuabiana chě puerte bacna soye tojanmábeyeca, ni chě bacna soye tojanoyěngacñábeyeca; ndayá tsěngaftanga, mo Běngbe Bětsabe delante cuafsemnėngcá, chě šmojanma soyiñe bětscá chašmuenójuaboma, y chca, cha chašminýanýe tsěngaftanga běngbe tsábiana puerte šmenójuabnama. <sup>13</sup> Chíyeca běnga más añemo ainaniñe fsěntsebomna.

Pero ntsachetšá añemo fstsobomnama, masna puerte oyejuayěnga fsěntsemna, er běnga fsěnjinyě Tito tša oyejuayá, er chabe ainaniñe lempe natjėmbana yojtsemna nyetsca tsěngaftangbiama. <sup>14</sup> Tito tsěngaftanga jányama cabá nda ora, atše cha sěnjaniyana tsěngaftanga šmochjanóyeunaye chě atše tcbonjaněbuaja palabra ca; y tsěngaftanga ndoñe chešmatsma atše chaitsėuatjama chca tijánayanama. Inýetšá, lempe ntšamo tcojauyancá ndegombre endmėna; cachcá, ntšamo běnga Títbioye fsěnjaniyancá ndegombre entsemna, chě

tšëngaftangbiam fstsóyejuama. <sup>15</sup> Y mora Tito más cmontsababuányëshana, ntšamo cha tcmojanamëndacá ndayá tšëngaftanga šmojanmama, y ntšamo puerte respétoca y mo uamaná cuaftsemncá chabiam jtsējuabnayëse šmojanofjama tojtenojuabó ora. <sup>16</sup> Atše puerte oyejuayá sëntsemna, er atše sëndétatšëmbo tšëngaftanga ntšamo tšabá yomncá nyetsca soyënguife šmochtsamama.

## 8

*Chënga jañëmuayama, inye ošbuachiyëngbioye nyets ainánaca jujabuáchama*

<sup>1</sup> Y mora, Jesucristbeyeca catšátanga, bënga fsëntseboše tšëngaftanga chašmotsetátšëmbo ntšamo Bëngbe Bëtsá bëtsá tšabe bendicionënga tojama Macedonia luarentše ošbuachiyëngcá enefjuanëngbiam. <sup>2</sup> Chënga puerte tmojasufí, y chora chca, chënga tmojinjanyé beca imošbuáchema y tša imoyejuama; y masque puerte ndbomnjëmënga, chënga nyets ainánaca bëtsá tmojanacaredadó Jerusalenentša ošbuachiyënga ndbomnjëmëngbiam. <sup>3</sup> Atše sëndétatšëmbo y sentsobena jayanama chënga ndegombre tomatšatá ntšamo tjobenacá, y ntsachetšá imobenitšana cabá más, chënga chca imobóseyeca. <sup>4</sup> Tša šonjánaimpadana chëngbioye jálesenciama ndayánaca jamama, Jerusalenoca ošbuachiyëngbioye jujabuáchama. <sup>5</sup> Bënga ftsjanobatmanama cabá más chënga tmonjanma; natsana, chënga Bëngbe Utabná tmojanianana lempe ntšamo cha tojtsebošcá chënga jamama imojtseboše ca, y chentšana bëngaftácnaca cachcá tmonjanma; y lempe enjamna ntšamo Bëngbe Bëtsá inabošcá. <sup>6</sup> Ndayá Macedonioca ošbuachiyënga tmojanmama bënga añemo fsënjanóyëngacñeyeca, bënga Tito fsënjaipadá chë tšabe trabajo chaopochocama, chë tšëngaftangbeñe crocénana játbana, Jerusalenoca ošbuachiyënga jujabuáchama, ndayá cha jamama tojanbojatšecá. <sup>7</sup> Y morna, ntšamo tšëngaftanga nyetsca soyënguife tša šmómncá —puerte ošbuachiyënga, beca obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnayënga bëtsá jamama Cristo jasérviam y bëngbioye corente ababuányëshanënga —cachcá, mórnaca bëtsá šmochjama quem trabajuife chë ošbuachiyënga ndbomnjëmëngbiam, tšëngaftangbe bonshánana jtsinjanjanyëse.

<sup>8</sup> Chca ndoñe quebatëtsëtná mo canye mandcá; atše sëntseboše ndayá nye tšëngaftanga jáuyanana ntšamo ínýenga bëtsá tmojatrabajá chë ndbomnjëmëngbiam, tšëngaftángnaca cachcá chašmotsamama; y chca, chašminjanyëma chë tšëngaftanga šmobomna bonshánana ndegombre bëtsemnama. <sup>9</sup> Er tšëngaftanga šmondétatšëmbo ntšamo Bëngbe Utabná Jesucristo puerte tšabe soyënga bëngbiam tojamama, bëngbioye puerte jtsababuányëshanëse. Celoca, cha cabá quem luaroye ndabo ora, cha bëtsá inabomna; pero tšëngaftanga ababuányëshanayeca, mo canye puerte nduamanacá tojanóbema. Y mora, Cristo mo canye nduamanacá tojóbmeyeca, Bëngbe Bëtsá puerte tšabe soyënga šojatšatá.

<sup>10</sup> Tšëngaftangbe tšabiam mëntšá cbabuayená, ntšamo quem soyife šmochjamama. Chë inye uata tšëngaftanga šmonjanbojatšé, ndoñe nye chë ndbomnjëmëngbiam jacjayama, ndayá chca jamama jtsebošámnaca. <sup>11</sup> Morna, chë ndbomnjëmëngbiam trabajo šmochjapochóca; chca, ntšamo tšëngaftanga beca šmonjanprontana y jujabuáchama tša šmonjanbošcá, mórnaca cachcá chašmomama chë trabajo japochóca, ntšamo šmjobenacá jacjayëse. <sup>12</sup> Er canye entšá, jatštayama ndegombre tojtsebošëse, ndayá cha tojatšatá Bëngbe Bëtsábioye oyejuayá jabemana, ntšamo cha tojtsobercá, y ndoñe ntšamo cha ndoñe tontsobencá.

<sup>13</sup> Ndoñe quenátsmëna, tšëngaftanga puerte ujabótënga chašmoquedá, ínýëngbioye atšatnaye causa, chënga ndoñe yapa ujabótënga chamondëtsemnama. <sup>14</sup> Atše sentsichamo ndayá nyetscanga chamotsenajabuachana, chca tojtšejaboto ora ca. Mora, chë bëtsá šmobomnentsšana šmontsobena chënga jujabuáchana, ndayá tojtšabuáshebencá jatšatayëse; y inye orna, chënga entsamna tšëngaftanga jujabuáchana chë cmojtsabuáshebena soyëngaca. Chca, nyetscanga jóyëngacñana ndayá tojtšejaboto ora. <sup>15</sup> Ntšamo Bëngbe Bëtsabe uabemana palabrënguife endayanca:

Chë tša bomnábioye ndoñe chebatanójam;

y chë nye batšá bomnábioye, ndoñe quebënjatanbuášbena ca.

*Tito y chabe enutënga*

<sup>16</sup> Bëngbe Bëtsá šcuatschuá, tšëngaftanga jtsanýenama Tito ainaniñe juabnënga chaotse-bomnana cha tojanmama, cachcá ntšamo bënga fsëndbomncá. <sup>17</sup> Er tšëngaftangbioye chaot-sama bënga fsënjanimpadá ora, cha oyejuayá aife ca tonjánayana choye jama; y chabiam puerte enduámana tšëngaftangbe tšabiana; chíyeca mora echanjá tšëngaftanga jányama, chca jamama cachá yobóseyeca.

<sup>18</sup> Títoftaca, canya Jesucristbeyeca bëngbe catšata fsentsichamná; chabiam puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe

noticiënga abuayinyayama. <sup>19</sup> Y ndoñe nÿe chë soye, sinó quem luarentşe oşbuachiyëngcá enefjuanënga cha tmonjuábuaayana bëngaftaca Jerusalenoye jama, y jujabuáchama chë ndbomnjëmëngbiama trabajuíñe; chë trabajo endmëna bonshánana jinÿanÿiyama; chca fsëntsama, Bëngbe Utabná jtsatschuanayama y jinÿanÿiyama bënga chca jujabuáchama tša fstsboşama. <sup>20</sup> Títoftaca cha fsëntsichamná, chca, ndocná chaondëtsichamo bënga ndoñe tsábá tifjama ca, ntşamo játbana cmojtsamnñe, chë becá juabónana játbana, ndbomnjëmënga jujabuáchama; <sup>21</sup> er bënga fsëndama lempe ntşamo fstsobencá, ndoñe nÿe ntşamo Bëngbe Bëtsabe bominiñe tsábá yomncá jamama, ndayá ntşamo entşangbe bominiñe tsábá yomncánaca.

<sup>22</sup> Chátaftaca inÿa Jesucristbeyeca bëngbe catşátnaca fsëntsichamná; cha bënga ba soyiñe şonjinÿanÿe cha yojtseboşe bëtscá jamama, Cristo jaserviama, y mora más, er cha puerta bëtscá entsejuabná tşëngaftanga puerta tsábá şmochjamama. <sup>23</sup> Y Titbiamna, cha quem trabajuíñe atşe enutá endmëna, y atşcá tşëngaftangbiama endëtrábaja; y chë inÿata Jesucristbeyeca bëngbe catşatadiamna, chata bontsemna quemuentşa oşbuachiyëngcá enefjuanëngbe ichmónata, chëngbiama chabóyebuambama; y chë bontsama soyecna, chata Cristbioye corente jtsatschuanayana. <sup>24</sup> Chiyeca, chëngbioca oşbuachiyëngcá enefjuanënga chca chamotsetatşëmbuama, chë ichmona boyabásengbiye şmochjinÿanÿiye tşëngaftanga ndegombre chënga şmojtsababuánÿeshanama, y bënga razón fstsebonnama tşëngaftangbiama oyejuayënga jtsemnana.

## 9

### *Chë inÿe oşbuachiyëngbiama crocénana játbana*

<sup>1</sup> Chë Jerusalenoca Bëngbe Bëtsabe entşangbiama crocénana játbana ndoñe quenátsiyta tşëngaftangbiye jatëbuabinayama, <sup>2</sup> er atşe ndegombre sëntsetatşëmbo tşëngaftanga tša şmojtseboşe chca jujabuáchama. Macedonioca entsanga puerta oyejuayá sempre sëndbëtsëtsësnaye, Acaya luaroquënga chë inÿe uatscana quem trabajuíñe jujabuáchama şmoprontánama; y chë jujabuáchama tşëngaftangbe bëtscá juabnënga tmojama banga quem luarentşënga bëtscá añemo chamotsebonnama, chëngnaca chë trabajo jamama. <sup>3</sup> Pero Jesucristbeyeca quem catşátanga sëntsichamná, ntşamo bënga oyejuayënga tıfjayancá tşëngaftanga chaşmotsamama, chë tşëngaftanga quem trabajuíñe bëtscá şmochjama ca; chca, ntşamo tıjanayancá ndoñe nÿe bonamente chaondëtsemnana, y ntşamo sënjanayancá tşëngaftanga chaşmotseprontánama; <sup>4</sup> er nderado báseftanga Macedonioquënga átşeftaca tmojá y choca ndëprontánënga tcmojánÿena chë ndbomnjëmëngbiama ujabuáchenanaca, chë soye nanjama bënga fchaitşëuatjama, er ba soye fsënjayana bënga ndegombre fstsëtátşëmbo tşëngaftanga prontánënga şmochtsemna ca; y ndegombre, tşëngaftangbiama cabá más ouatjca nántsemna. <sup>5</sup> Chiyeca, tsábá şonjuínÿana Jesucristbeyeca quem catşátanga jáimpadana chënga atşe natsana chamotsama tşëngaftanga jáñÿama, y chacmëjabuachama chë juabónana játbana, ndayá tşëngaftanga tempo şmonjanaşebuachenacá. Chca, atşe choca chajjáşhango ora, tşëngaftangbe juabónana chaotseprontana. Chca, tşëngaftanga şmochanjınÿanÿiye ndbomnjëmëngbiama şmojacá, chca jamama tša şmobóşeyeca, y ndoñe nÿe batşatema jatşatayama y tşëngaftangbiama bëtscá jobuájua şmojtseboşe.

<sup>6</sup> Quemuiñe şmochtsenójuabnaye: Nda nÿe batşá tojajé, cach batşá chentşana josháchiñana; y nda bëtscá tojajé, cach bëtscá chentşana josháchiñana. <sup>7</sup> Cada ona bontsemna jajájuana ntşamo chabe ainaniñe tojajuabocá; ndoñe ngmëna o nÿe inÿenga chca jamama tmojtsemándaye. Chca chaotsemna, er nda oyejuayá tojajóbıoye, Bëngbe Bëtsá jtsebobonshánana. <sup>8</sup> Bëngbe Bëtsá endobena jamana chábentşana nÿetsca tsabe bendicionënga y bëtscá soyënga tşëngaftanga chaşmotsebonnama; chca, ntşamo nÿetsca soyënguñe cmojtsëjabotcá sempre chaşmotsóbomñama, y cabá más bëtscá chaşmotsebonnama, nÿetsca tsabe obrënguñe inÿenga chameşjabuachama. <sup>9</sup> Bëngbe Bëtsabe uabemana palabrënguñe, mëntşá endayana chë bëtscá tojacjabia: Cha nÿets ainánaca ndbomnjëmënga bëtscá jatşatayana; y chë tsabe soyënga ntşamo cha tojtsamcá nÿets tempo jëftsemnana.

<sup>10</sup> Bëngbe Bëtsá, nda endbama chaotsemna jénaye jájema y sananga jasama, cmochanjatşataye lempe ntşamo cmojtsëjabotcá, y echanjama, tşëngaftanga cabá más tsabe soyënga chaşmotsamama. <sup>11</sup> Bëngbe Bëtsá echanjama tşëngaftanga nÿetsca tsabe soyënga chaşmotsebonnama, chca, tşëngaftanga nÿets ainánaca puerta inÿengbiye chaşmatşatama, y bëngbeyeca, chë mojhóyëngcáñënga Bëngbe Bëtsá chamotsatschuanama; <sup>12</sup> er chë ujabuáchenana Bëngbe Bëtsabe entsanga tcojatşatá ora, ndoñe nÿe ndayá tojtsëjabotcá jatşatayana, ndayá chënga Bëngbe Bëtsá chamotsatschuanámna jamana. <sup>13</sup> Chënga Bëngbe Bëtsá mochantşatschuanaye, er chë ujabuáchenanaca chëngbiye jinÿanÿiyana, ntşamo Cristbe tsabe noticiënguñe iuayancá tşëngaftanga şmobedecénama, y ntşamo tşëngaftanga

tšabá jamése, nyets ainánaca bétscá soyënga chënga y nyetscanga šmojátšatama. <sup>14</sup> Y chënga tša mochántseboše tšëngaftanga jányama y tšëngaftangbiam Bëngbe Bëtsá mochántseimpadana, er cha bétscá tšabe soyënga tšëngaftangbiam tojama. <sup>15</sup> ¡Bëngbe Bëtsá šcuatschuá ndayá cha šojátšatama, canye puerta uámana soye, ndocná jobenayana tšabá jayanama ntšamo chë soye bétsemnana!

## 10

### *Ntšamo Pablo tojánayana ínÿenga chabe contra imojtsichamo ora*

<sup>1</sup> Y mora, atše Pablo, cbochanjáimpada, tšëngaftangbioye puerta bonshanánaca jtsënyáyëse, y tšëngaftangbiam tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerta nduamaná tsenóbema atše tšëngaftangtaftaca stsemna ora, pero corente añemo bomná tsenóbema jabuache soyënga jayanama tšëngaftangbentšana bënoca stsemna ora ca. <sup>2</sup> Tšëngaftanga cbontsaimpadana, tšëngaftanga jányama chajá ora, atše ndoñe chašondëtsemna puerta añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerta tšabá sëntsetatšëmbcá ndayá báseftangtaftaca jamama šojtsotocana, chë ndëmuanyënga imojtsejuabná, nÿe bënga tšabá jtsomñiama juabnëngaca bënga fstsiyena ca. <sup>3</sup> Ndegombre bënga quem luarentše fsëndoyena, pero ndoñe queftsátspelia Cristbiam, ntšamo quem luarentša entšanga monduamancá; <sup>4</sup> er chë ndaye sóyeca bënga Cristbe soyëngama fsëndépelia, ndoñe quenátsmëna mo chë ndaye sóyeca chë nÿe quem luarama enójuabnaye entšanga japéliama monduamancá, ntšamo nÿe chënga tšabá jtsomñiama juabnënga yomncá. Inÿetšá, chë ndaye soyëngaca bënga fsëndépelia, Bëngbe Bëtsá jtsinÿanana puerta obenana bomna soyënga yomna ca; y endmëna chë Satanás tojtsemánda soyënga jayëñjanama, puerta jabuache soyënga jayëñjanama. Mo nda canye uayayábioye jtsepochocancá, chë Bëngbe Bëtsabe osertánana ndoñe yonduámana ca jinÿanÿiyama soyënga ichámëngbiam, <sup>5</sup> y Bëngbe Bëtsabe osertánana jtsabotema juabnënga bomnëngbiam, bënga fsëndama ntšamo chënga tmojtsichamcá tondaye chaondëtšámanama. Y chë japéliama fsëndbomna soyëngaca, bënga fsëndbëtsama chca juabnayana chamotsajbanama, y chamotsobena ntšamo Cristo yomandacá jtsamana. <sup>6</sup> Bënga fsëntseprontana chë Cristbiam nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.

<sup>7</sup> Tšëngaftanga ndayánaca jtsonÿayana nÿe ntšamo tbojtsabinÿnëcá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Cristbenga fstmënama, ntšamo cha yomncá. <sup>8</sup> Er atše masque tša sëndbëtsoyebuambnaye chë Bëngbe Utabná šojatšatá mandama, chë ndáyeca bënga jamama tšëngaftanga puerta chašmotsošbuáchem y ainaniñe bëtš añemo chašmotsebomnana, y ndoñe tšëngaftanga ntjapochócama, chama atše ndoñe quetsátëuatja. <sup>9</sup> Atše ndoñe quetsátsoše tšëngaftanga chacmotšinÿana, tšëngaftanga jáutatjayama atše stseboše ca, ndayá atšbe tsbuanáchangañe tijuábemama. <sup>10</sup> Er báseftanga mëntšá atšbiam imojtsichamo: “Chabe tsbuanáchangañe cha sontsamënda bétscá soyënga jamama, y tša obenacá cha jtsóyebuambnayana; pero cha bëngaftaca tojtsemna ora, cha jtsóyebuambnayana mo canye ndocna obenana ndbomncá, y ntšamo tojtsichamcá tondaye ntsámanana ca.” <sup>11</sup> Chca entšanga entsamna jtsetatšëmbuana, ntšamo bënga fstsichamcá, tsbuanachangá juichmuase, tšëngaftangtaftaca cabá ndoñe fsëntsemna ora, tšëngaftangtaftaca fchaitsemna órnaca, bënga chca fchjamama.

<sup>12</sup> Ndegombre bënga ndoñe tša añemo queftsátšbomna jayanama nyetšá uámanënga fstmëna ca, mo chë cachënga jtsenábotamnyana uamanëngcá. Chënga jtsejuabnayana y jtsichámuana tšábenga imomna ca, nÿe ntšamo cachëngbeñe ínÿenga imomnama jtsonÿayëse; y chca tmojtsama ora, chënga juabna ndbomnënga jtsemnana. <sup>13</sup> Bënga ndoñe yapa quifchatóyebuambaye cabëngbiam, chca, tša tšábenga bënga imomna ca jtseñábotamnyama; fchanjóyebuambaye ndayá chë bënga tifjama tšabe trabajuama, ndayá Bëngbe Bëtsá šojabanÿecá, y chiñnaca entsemna ntšamo tšëngaftangbeñe Corintoca tifjamcá. <sup>14</sup> Chiýeca, bënga ndoñe queftsatoyebuambná chë bënga ndoñe derecho fsëntsebomnana, ntšamo ndegombre nántsemna bënga tempo tšëngaftangtaftaca ndoñe mafsëñjammëse; er bënga chë natsanënga fsëñjamma tšëngaftangbioye jama, Cristbiam tšabe notiçiënga jábuayenama. <sup>15</sup> Y ndoñe quifchatóyebuambaye tša tšabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínÿengbe soye yómnyeca. Chamna, bënga fsëntsobátmana tšëngaftanga Cristbeñe más chašmotsošbuáchem, y chca chaojtsemna ora, bënga fchayobená ba luariñe entšanga jábuayenana, ntšamo tšëngaftangbeñe fsëntsamcá. <sup>16</sup> Chca, fsëntsobátmana bënga jobenayama tšabe notiçiëngama jábuayenama, chë tšëngaftangbentšana más chcoye imoyena entšangbioye; chca, bënga ndoñe yapa quifchatóyebuambaye ínÿengbe trabajuama, Cristbe soyënga jábuayenama, mo chë soye bëngbe trabajo cuafjatsmëncá.

<sup>17</sup> Ntšamo Bēngbe Bētsabe uabemana palabrenguifē endayanca: “Nda tojtseboše jayanama cha canye uamana entšá yomna ca, más tsábá cha cháuyana Bēngbe Utabná puerte uamaná endmēna ca.” <sup>18</sup> Er Bēngbe Bētsá jayanana canye entšá ndegombre tsábá tojama ca, ndoñe nye cachá tojtsenábotamnabiama, ndayá Bēngbe Bētsá chca ndegombre tojama ca Bēngbe Bētsá tojtsejuabnabiama.

## 11

*Pablo y chē ndoñe ndegombre ichmónēnga*

<sup>1</sup> Malaye atše šmēntjēuánta, atše básefta soyēnga mo canye opá tojtsoyebuambnacá stschámēntscuana, cach atše stsenabotamná ora. Masque ntšámnaca šmochtsēuánta. <sup>2</sup> Bēngbe Bētsábeyeca atše tša chondábabuanýeshana y chondányēna, tsēngaftanga nye cha chašmotsēstonama y ndoñe inýēngbioye. Er atše Cristo sēnjašbuachená tsēngaftanga sempre cha šmochtsēstonama, y sēntseboše, cha quem luaroye yochjésabo ora, chábioye tsēngaftanga júshejanguana, mo nye chábioye sempre ustonēngcá, ntšamo canye taitá chabe bembe ndocna boyabása nduabatmá nye canye boyabásaftaca chaóbuamama jushjanguancá. <sup>3</sup> Mētscuaye Evábioye tbojaningñē, y cha tbojanínýnana puerte osertanabe soyēnga cuaftsatsētsnací, pero ndegombre ndoñe chca yonjamna. Atše sēntsauatja nderado cachcá inýēnga tsēngaftangatafaca muanjama y tsēngaftangbe juabna chašmotrocá, y chca, tsēngaftanga chašmotsajbaná sempre jtsejuabnayana nye Cristo nyētsca soyēnguifē jtseeservénama. <sup>4</sup> Atše chama sēntsauatja, er ndánaca jashjanguana y Jesusbiamá tojtسابuayíná, mo cha inye entšá cuafsemncá, ndoñe ntšamo bēnga Jesusbiamá fsēndabuayínací, y tojtsama tsēngaftanga chašmobená canye espíritu jtsebomnana, pero ndoñe ntšamo chē Bēngbe Bētsá tojama tsēngaftangbe ainaniñe cháumashēnguama espiritcá, chē Uamana Espiritu, tsēngaftanga tsábá cha jtsēuántana. Y atše sēntsauatja, tsēngaftangbe ainaniñe inye buayenana chašmóyēngacñama ndánaca tojtsamama, ndoñe cachcá chē tsabe noticiēnga ntšamo ya bēngbentsana šmonjouencá, y chora tsēngaftanga chábioye becá tsábá jtsēuántana. <sup>5</sup> Pero atše sēntsejuabná tondayiñe más batšá uamaná tsmēna ca, chē Jesucristbe puerte uamana ichmónēnga imomna ca juabnayēngbiama. <sup>6</sup> Atše ndoñe sēnjuatsjinýe ntšamo corente tsábá entšāngaftaca jóyebuambayama; pero atše puerte tsábá sēndētátšēmbó ntšamo stschámuama. Bēnga puerte tsábá nyētsca soyēnguifē tsēngaftanga tchbonjanýñyē, ndegombre chca osertánana ftsbomnana.

<sup>7</sup> ¿O atše ndoñe tsábá sēnjama, tsabe noticiēnga chbonjanabuayíná ora, tsēngaftangbentsana atšbiamá tondaye ntjotjañcá, nduamanací jenóbemēse; chca, tsēngaftanga puerte uamanēnga chašmotsemnana Bēngbe Bētsá chaomama? <sup>8</sup> Mo inýēnache osbuachiyēngcá nefjuanēnga crocénana cuafjabaquécá, crocénana sējanóyēngacñe chē osbuachiyēngbentsana, tsēngaftanga jujabuáchama jobenayama. <sup>9</sup> Y tsēngaftangatafaca sēnjama ora y ndayánaca šojanájoboto ora, atše ndoñe checbátantjañe atšbe opresidama, chca, tsēngaftangbiama totcá ndoñe chaondētsemnana; er chē Jesucristbeyeca catšátanga Macedoniocana tmonjánashjainēnga, šmonjanatšetá ntšamo šojanbuashbencá. Chca, atše sēnjama, atšbe causa tsēngaftangbiama totcá ndoñe chaondētsemnana; y sempre chca chántsama. <sup>10</sup> Serto, Cristbe ndegombre soyēnga atšbe ainaniñe sēntsebomna; chíyeca, atše corente sēntsetátšēmbó ndocná Acaya luarentse yochjama atše chayajbaná puerte oyejuayá jtsóyebuambnayama, chē tsabe noticiēnga stsabuayíná ora; y chca chanjama atšbe opresidama chašmoyema inýēnga ntsamncá. <sup>11</sup> ¿Y ndáyeca chca stsama? ¿Yojtsemna ndoñe chondábabuanýeshana causa? Ndoñe. Bēngbe Bētsá endētátšēmbó tša chondábabuanýeshanama.

<sup>12</sup> Pero atše sempre chántsama ntšamo sēndamcá, chca, chē inýēnga, chē Jesucristbe puerte uamana ichmónēnga imomna ca juabnayēnga ndoñe chamondētsebomna ndáyeca jatenábotamnayama, ntšamo bēnga ftsamcá chēnga imojtsetrabája ca. <sup>13</sup> Er chēnga ndoñe quemátsmēna Jesucristbe ndegombre ichmónēnga, mondmēna chē inýēnga jáingñama imotrabájanga, y mondana entšanga chaotsinýanama chēnga mo Jesucristbe ndegombre ichmónēnga cuafsemncá. <sup>14</sup> Y chama ndoñe šmatjenjnaná, er cach Satanásnaca endbētsama mo canye buashinýinýana angelcá jtsinýnama; <sup>15</sup> chíyeca, ndoñe muatjenjnaná, chabe oservenēngnaca tmojtsamama mo tsabe entšāngcá jtsinýnama. Pero chēnga mochanjopochóca, ntšamo tmojtsomerecencá, ndayá tmojamama.

*Ntšamo Pablo tojansufri, Cristbe ichmoná bētsemna causa*

<sup>16</sup> Cachiñe chochtētēyana: ndocná chaondētsejuabná atše opá stsemna ca, cach atše stsenabotamná ora; pero chca šmojtsejuabnase, mo canye opabioycá šmochtsēuánta, chca, átšnaca jtsenábotamnayama jobenayama. <sup>17</sup> Chca jayanēse, ndoñe quenátsmēna ntšamo Bēngbe Utabná endbetsamcá, ndayá canye opá inetsamcá; atše tsábá jtsetatšēmbēse ndegombre stsebomna ndáyeca jobenayama jtsenábotamnayana. <sup>18</sup> Banga



mondmëna, cachënga jtsenábotamnayana ndayá quem luarentse chënga tmojamama, as átsnaca chantsenábotamnaye. <sup>19</sup> Tsëngaftanga chë tsa osertánënga, oyejuayënga opëngbioye jtsëuantánana. <sup>20</sup> Atse sëndétatšëmbo tsëngaftanga chë opëngbioye šmnetšëuantánama, er tsëngaftanga šmondbétsëuantana chë nyëts tempo tsëngaftanga mo chëngbe oservenëngcá tcmojtsamëndayënga, o chë tsëngaftanga bëtscá tcmojtsabacanga, o tcmojtsaíngfianga, o chë uámanënga tmojtse nobiamnanga tsëngaftanga mo nduamanëngcá jtsamëndayama, o chë tcmojtsajuebantšetayënga.

<sup>21</sup> Atse chca sentsichamo masque sentsëuatja chca jayanama. Bënga fsënjamna corente obenana ndbomnënga, ntšamo tsëngaftanga bëngbiama šmojayancá, tsëngaftangafata chca jamama.

Inyënga, chë tsëngaftangbeñe imotrabájanga, ndayama jtsenábotamnayama tmojtse bomnëse, puerte uámana ichmónënga imomna ca jtsichámëse, átsnaca añemo sëntse bomna chama jtsenábotamnayama; chca stjayana ora, mo canye opá tojtsoyebuambnacá sëntsoyebuambná. <sup>22</sup> Chënga jtsenábotamnayana hebreunga imomnama. Atšnaca hebreo sëndmëna. Chënga jtsenábotamnayana Israeloquënga imomnama. Atšnaca Israelocá sëndmëna. Chënga jtsenábotamnayana Abrahámbentšana entsanga imomnama. Atšnaca Abrahámbentšana entsá sëndmëna. <sup>23</sup> Chënga jtsichámuana Cristo imoservenena ca. Atse chëngbiama cabá más tšabe oservená sëndmëna. Chca stjayana ora, mo canye opá tojtsoyebuambnacá sëntsoyebuambná. Atse chëngbiama más tijatrabájá, más šmojutame, más šmojatsetšená y ba soye atšbiama resjo endmëna jóbanama. <sup>24</sup> Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastigana monduamancá. <sup>25</sup> Unga soye niñëbëngaca šmonjanëtsjanganja, y ndëtsbëngaca canye šmonjanatëchënganja. Unga soye chë atse sënjanenjaquena barco tontsanenatjëmbe, y chca ora, canye šonjanotocá, chë mar béjayoca tsachocana bënoca canye ibeta jëftsebobínynana y canye te jëftsejétanana. <sup>26</sup> Atse becá sënjanana, y chca atšbiama resjo enjamna bëtš fshajayënguñe y uacucuatšënga chašmuebiatbëbama; resjo cach atšbe entsángbentše, judiënga y ndoñe judiëngbentše; resjo bëtš pueblënguentše, entsanga ndoyenentše y mar béjayoca. Atšbiámnaca resjo enjamna chë Jesucristbeyeca atšbiama catšátanga imomna ca jtsichámuana, pero ndegombre chca ndoñe mondmëñëngbeñe. <sup>27</sup> Atse bëtscá tijatrabájá empás uamëntšnáyá joquédantsucana; ba soye tijachnëgo ibeta ntsamanacá y ba soye tijachnëgo shëntseca y uajuendayá; ba soye ndayá jasama ntse bomncá; tijasufri sësname y tondaye entsayama.

<sup>28</sup> Quem soyëngama y inyë ndoñe chiyátayana soyëngama más, atse cada te natjëmbana ainánaca ndoñe queschatmëna, er ndoñe quetsátstátšëmbo ntšamo nyëtsca ošbuachiyëngcá enefjuanënga imojtsiyenana. <sup>29</sup> Ndánaca tšabe soye jamama tondaye añemo tontse bomna ora, atse chabiama šochandbóngmia, mo átsnaca cach tondaye añemoca cuabndëtsemncá. Nderado inyënga tmojama ndánaca bacna soyiñe chaótsatšama, atse ndegombre puerte ngmënaca chandbëtse sufrina. <sup>30</sup> Nderado nýa tojatsiya atse ndayama jatenábotamnayama, as chë atse tondaye obenana ndbomná tsmënama inýanýnaye soyëngama chtsenábotamnaye. <sup>31</sup> Bëngbe Bëtscá y Bëngbe Utabná Jesucristbe Taitá, ndábioye nyëtscanga nyëtsca tescama jtsatschuanayama entsamna, cha endétatšëmbo atse ndegombre stsichámuama chë sëntsoyebuambná soyënguñe. <sup>32</sup> Atse Damasco bëtš puebloca sënjamna ora, chë rey Aretasbe uabuáyana mandado tojanmandá chë puebloye amashjuaniñe soldadënga chamotsebojanýama, atse chašmishachama chëjana stse bocana ora; <sup>33</sup> pero básefta enutënga, canye sbarëcuiñe šmontsanëštjango chë pueblëtša shëconana tapiësiñe canye atëfjnëjana, y chca atse sënjanobená chëngbe cucuatšentsana jótsbocana.

## 12

*Ndayá Pablo mo otjenayoquécá tojáninýe y ndayá Satanás tojanma, Pablo chaosufri*

<sup>1</sup> Atse šontsemna más jtsenábotamnayana, masque chca tcojamentšana ndocna tšabe soye ntjóbcnana. Mora chanjóyebuambaye, chë mo otjenayoquécá sënjinýe Bëngbe Bëtscabe soyëngama y Bëngbe Utabná šojinýinýe soyëngama. <sup>2</sup> Atse canye entsá sënduábuatma, cha Cristoftaca cánýiñe mo canýacá endmëna y nda bnëtsana canta uata entsemna, Bëngbe Bëtscá tbojanánatse, chë celoca más tsbanánoye, Bëngbe Bëtscá yomnoye. Atse ndoñe quetsátstátšëmbo Bëngbe Bëtscá cha tbojanánatse chabe cuérpoca o nýe chabe espiritiñe. inýe Bëngbe Bëtscá chama yotátšëmbo! <sup>3-4</sup> Atse sëndétatšëmbo Bëngbe Bëtscá chë entsábioye celoye tbojanánatsama, nyëtscanga oyejuayënga imomnoye (atse ndoñe quetsátstátšëmbo Bëngbe Bëtscá tbojanánatse chabe cuérpoca o nýe chabe espiritiñe; nýe Bëngbe Bëtscá chama yotátšëmbo), y chentše cha tojanuena palabrénga, ndocná bontsemna jayanama palabrénga, chë ndayama entsángbiama ndoñe yontselesenciana jatichámuana. <sup>5</sup> Atse chë

entšá sěndmēna. Canŷe entšá ndáftaca chca tojopasabiama, tšabá nántsemna chama jt-senábotamnayana; pero cach atšbiama jt-senábotamnayana ndoñe tšabá ntsemnana, ndayá nŷe chē atše mo obenana ndbomnacá tsmēnama inŷinŷnaye soyēngama chantsenábotamnaye. <sup>6</sup> Y nderado jt-senábotamnayama atše stseboše, chca ora atše ndoñe stsama mo canŷe opá tojtsoyebuambnacá, er ntšamo ndegombre yomncá atše stsichomo. Pero chca ndoñe quetsátama, chca, ndocná chaondětsejuabná ntšamo atšbiama tbojtsinŷanam o ntšamo atšbiama cha tojouenama atše más tsmēna ca. <sup>7</sup> Chŷyeca, tša uamaná tsjamna ca atše ntjátsjuabnayama, atše chē Bēngbe Bětsá tša bēts soyēnga tbojaninŷinŷe entšá bětsemnayeca, Bēngbe Bětsá tojanma atše chaitsebomna ndáyeca puerte chaisufrima, mo canŷe bēts uch-mašēŷa atšbe cuerpiñe tojtsashacuanca, mo Satanasbe ichmona soyca, atše chaisufrima chaomama. <sup>8</sup> Unga soye Bēngbe Utabná sēnjaimpadá chca sufrínana chašotsebojuánama; <sup>9</sup> pero Bēngbe Utabná sōnjauyana: “Nŷe atšbe bonshánana endmēna lempe ntšamo cmojt-sajabotcá; nŷetscanga atšbe obenana más tšabá jinŷana, chē obenana ndbomna entšangbeñe atšbe obenana stjínŷanŷiye ora ca.” Chcasna, atše puerte oyejuayá chanjōyebuambaye chē atše mo obenana ndbomnacá tsmēnama inŷinŷnaye soyēngama, Cristbe obenana átšbeñe sempre chaotsomñama. <sup>10</sup> Chŷyeca, Cristo jaserviama, oyejuayá chandbětsemna atše mo obenana ndbomnacá stsemna ora, inŷenga šmojtsoyenguá ora, puerte padecena soyēnga causa ndayá jamama ndoñe sěntsetatšēmo ora, atše puerte chaisufrima inŷenga tmojtsama ora y puerte tšetšena ainánaca stsemna ora; er chca soyēnguiñe stsemna ora, mo canŷa obenana ndbomnacá, chora Bēngbe Bětsá jamana atše ainaniñe bēts añemo chaitsebomnama.

*Nderado ndayá Corintoca ošbuáchiyēnga muanjamama Pablo yojánauatja*

<sup>11</sup> Atše chca chē soyēngama sěntsenabotamná ora sēnjoyebuambá mo canŷe opá tojtsoyebuambnacá, pero ndegombre tšēngaftanga šmonjama atše chca chaimama. Er tšēngaftanga šmondmēna ndēmuanŷyenga yojtsamna atšbiama puerte tšabá jtšichámuana, atše chca jt-senábotamnayama ndoñe chašondětsemnana. Ndegombre, atše tondayiñe más batšá uamaná quetsátsmēna, chē Jesucristbe puerte uámana ichmónēnga imomna ca juab-nayēngbiama, masque atše šontsebiona mo atše tondaye cuaftsamancá. <sup>12</sup> Canŷa Jesu-cristbe ndegombre ichmoná bětsemnana inŷinŷnaye soyēnga, tšēngaftangbeñe tonjanopasá atše choca sēnjama ora. Chca, chē Bēngbe Bětsabe obenana inŷinŷnaye soyēnga y chē tšabe soyēnga ntšamo chora tonjanopasacá, puerte tšabá jt-sinŷanŷayana atše canŷe ndegombre ichmoná tsmēnama; y atše chca sēnjanma, padecena soyēnguiñe puerte uantado jtsemñe. <sup>13</sup> ¿Ndayá tšēngaftanga ndoñe cachcá šmonjanóyēngacñe chē inŷe luarenache ošbuáchiyēngcá enefjuanēngbiama? Canŷe soye aŷne, er tšēngaftangbioye tondaye ntjotjañcá, atše ndoñe chiyatslesenciá tšēngaftanga atšbe opresidama chašmuájabuachama, ntšamo inŷe ošbuáchiyēnga aŷne sēnjalesenciá. Šmochtseperdóna chca bacna soye tšēngaftangbiama tijamama.

<sup>14</sup> Atše ya sěntseprontana, móracna unga soyama jama tšēngaftanga jánŷama, y mora atše cach ndoñe quechochataimpáda atšbe opresidama chašmuatájabuachama. Atše ndoñe quetsátsoše chē tšēngaftanga šmobomna soye jatsbomnana, ndayá puerte sěntseboše tšēngaftanga Cristo sempre chašmotseservénama. Atše chca jamama sěntseboše, er atše tšēngaftangbiama mo canŷe taitacá, Cristbeñe šmontsanošbuachēyeca, atše chabiama tcbonjanabuayená ora; sěntsejuabná chē taitanga inétsamna crocénana jájuabana básenga jt-sanŷenama, y ndoñe básenga chē taitangbiama. <sup>15</sup> Y atše corente oyejuayá lempe ntšamo tšbomncá chanjátsataye, y atše jopochócantscuanēnaca, tšēngaftangbe tšabiama. Atše cada te más chojtsababuánŷeshanēse, ¿tšēngaftanga más batšá atše šmochtsebobonshana?

<sup>16</sup> Ndoñe; tšēngaftanga tšabá šmondětatšēmo, atše uajabotá sēnjama ora, atše tondaye tcbonjanótjañama. Masque chca, báseftanga imojtsichamo ntšamo inŷenga ndayífnaca jáingñama atše tštátšēmo ca, chēngbentšana crocénana josháchiñama; y atše catijama, inŷenga jáingñase, nŷe ntšamo atše tšbošcá chamotsamama ca. <sup>17</sup> ¿O nderado atše tcbō-jaingñé, canŷa chē tšēngaftangbioye sēnjichamó chentšáftaca? <sup>18</sup> Tito sēnjanimpadá tšēngaftanga jánŷama chaotsama, y cháftaca sēnjanichmó chē inŷa bēngcá Cristbeyeca bēngbe catšata. ¿Nderado Tito tcmojaingñé? ¿Ndoñe ndegombre yondmēna, Tito y atše cachcá ftsjuabná y ftsboše y cachca soyēnga jtsamēse ftsiyena? Ndegombre chca endmēna.

<sup>19</sup> Nderado tšēngaftanga šmojtsjuabná bēnga jenēuyanama chca cbojtsětsětná ca; pero ndoñe chca quenátsmēna. Inŷetšá, bēnga Cristofaca canŷiñe mo canŷacá entšangcá, Bēngbe Bětsabe delante fsěntsoyebuambná, y lempe ntšamo tijayancá, Jesucristbeyeca atšbe bonshana catšátanga, tšēngaftangbe tšabiama tijayana, Cristbeñe corente chašmotsōšbuachema y ainaniñe bēts añemo chašmotsebomnama. <sup>20</sup> Er atše sěntsauatja, atše jánŷama chaijá ora, ndoñe chachondanŷyena ntšamo tšbošcá, y tšēngaftanga atše ndoñe chašmondinŷyena ntšamo šmojtsebošcá. Sěntsauatja nderado bacna soyēnga šmattsama: jt-senpenzentser-ana, inŷengafaca yapa jt-senántšabošana, ndayánaca rábiaca jtsamana, nŷe tšēngaftangbiama

tšabe soyënga jtsebomnama jtsebošana, inÿengbiana podesca ichámuana, uayátsenayënga jtsemnana, inÿengbiana cachënga más uámanënga jtse nobiamnanyana, y nÿetscanga ndoñe cachcá ntsejuabnayana. Chca chachojánÿenëse, tšëngaftanga ndoñe quešmochátsbošëna jóyëngacñana ntšamo tšëngaftanga jucácanama atše šochtsemncá. <sup>21</sup> Atše sentsauatja, cachiñe jánÿama chajjá ora, atšbe Bëtsá chaoma atše chaitšëuatja chca šmojtsamama, y chašotsemna puerte ngmënaca jošachnama ba tšëngaftangbiana, ndëmuanyënga ya baytë bacna soyënga imojtsama y chca juabnayana ndoñe tmonjatrocá, y ndoñe tmonjajbaná chë bacna soyënga boyabása o shembásaftaca jtsamama juabnayana, y chca soyënga jtsamana y nÿetsca bacna soyënga jtsamana, jenomándama ntšobencá.

## 13

### *Inÿe soyëngama jábuayenama y jádiošoftama*

<sup>1</sup> Móraca ya unga soyama tšëngaftanga jánÿama chanjá. Atše chajjáshjango ora, tojtseytëse chanjayana ntšamo báseftanga tmojamcá tšabá o ndoñe tšabá bëtsemnana. Nda bacna soye ntšamo Moisesbe leyíñe endëmandancá tojama ora, atše chanjayana cha ndoñe tšabá tonjama ca; pero útata o únganga tmojtsemnëse, chënga chamuayanama cha ndegombre chca tojamama. <sup>2</sup> Atše tempo sënjanabuayená, chë tšëngaftanguentsënga bacna soye tmojánamënga y chë inÿenga, atše šojtsanmëna jácastigana, chca soyënga amana ndoñe tmonjájbananga. Mora, tšëngaftangbentsana bënoca sëntsemna ora, cachiñe cachcá cbëtëtabuayená, ntšamo sënjanamcá chë tšëngaftangaftaca uta soyama sënjamna ora: atše cachiñe jánÿama chajjase, ndoñe quichatslesëncia bacna soyënga chašmotsamama y chama ntjacastigacá jatabáshejuanana. <sup>3</sup> Atše chca chanjama, er tšëngaftanga šmontsenguá ndayánaca tšabá chacminÿanÿema Cristo atšbiajana yoyebuambnama. Cristo ndoñe quenátsmëna mo canÿa obenana ndbomnacá, ntšamo tšëngaftangaftaca cha tojamama; ndayá chabe bëtš obenana tšëngaftangbëne bëtscá jtsinÿanÿayana. <sup>4</sup> Er cha tmojancrucificá mo canÿa obenana ndbomnacá; pero mora, Bëngbe Bëtsá puerte obená bëtšómñeyeca, cha tojtayena. Cachcá bëngnaca, cháftaca canÿiñe mo canÿacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtsá puerte obená bëtšómñeyeca, tšëngaftanga jtsaservénama.

<sup>5</sup> Tšëngaftanga cada ona šmochjshënojuaboje, tšabá jtsetatšëmbuama mocna entšanga bëtsemnana, jtsetatšëmbuama aifne o ndoñe sempre Crístbëne puerte tašmuetsošbuáchema. Šmochjshënojuaboje chca šmošbuáchema ntšamo šmojtsemnana y tšabá inÿenga šmochjinÿanÿiye. ¿Ndoñe šmondëtatšëmo Jesucristo tšëngaftangbe ainaniñe yoyenama? Ndóñesna, tšëngaftanga ndegombre ndoñe Crístbëne ošbuáchiyënga šmontsemna. <sup>6</sup> Pero atše sentsobátmana tšëngaftanga ndegombre chašmotsejuabnama bënga Jesucristbe ndegombre ichmónënga ftsmënama. <sup>7</sup> Y Bëngbe Bëtsá fsëntseimpadana bacna soye ndoñe chašmondëtsamama, ndoñe chë Jesucristbe ndegombre ichmónënga ftsmënama tšëngaftanga jinÿanÿiyama, ndayá ntšamo tšabá yomncá chašmotsamama. Nÿetscanga chca tmojtsamëse, nántsinÿna mo Crístbe ndegombre ichmónënga bënga ndoñe cuabndmëncá, er chca ndoñe tašuatátëjaboto jinÿanÿiyana ntšamo bënga bëngbe mándoca ftsmënama mo ichmonëngcá, tšëngaftanga jábuayenama. Pero chë soye tondayana šattsentšamna, <sup>8</sup> er bënga queftsátobena tondaye jamana Bëngbe Bëtsabe ndegombre soyëngama contra; nÿe ntšamo chabe ndegombre soyënga yomncá aifne. <sup>9</sup> Bënga fsëntseboše ntšamo tšabá yomncá tšëngaftanga chašmotsamama, er bënga oyejuayënga fchandbëtsemna, bënga mo chë obenana ndbomnëngcá ftssemna ora, bëngbe mando jácastigama ntjatijnÿanÿnaycá, y tšëngaftanga ainaniñe bëtš añémoca šmojtsemna ora y puerte tšabá šmojtse nománda ora. Bënga Bëngbe Bëtsá fchandbëtseimpadana, chca bacna soyënga amana jtsajbanase, chašmobená jtsemnana nÿetsca soyënguñe tšábënga, y lempe ntšamo tšëngaftanga chašmotsemnana Bëngbe Bëtsá yobošcá. <sup>10</sup> Quem tsubanácha cbontšëbuabiamná tšëngaftangaftaca cabá ndoñe sëntsemna ora; chca, atše choye chajjá ora ndoñe chašondëtsemna jabuache jucácanana, mo canÿa puerte mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëtš añemo chašmotsebmomna, y ndoñe tšëngaftanga jatapochócama.

<sup>11</sup> Morna, Jesucristbeyeca atšbe catšátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Šmochjouena ntšamo tcbonjabuayenacá, nÿetscanga cachcá šmochtsejuabnayene, nÿetscángaftaca natjëmbana šmochtsiyena, y Bëngbe Bëtsá, chë cmondababuanÿeshaná y tšëngaftangbe ainaniñe tšabe ebionana chašmotsebmomna endamá, tšëngaftangaftaca echántsemna. <sup>12</sup> Nÿetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamállanga puerte bonshanánaca šmondëbetsacheuanaycá. <sup>13</sup> Nÿetsca quem luaroca ošbuáchiyënga cmontsacheuaná.

<sup>14</sup> Atše, Běngbe Bětsá sěntseimpadana, Běngbe Utabná Jesucristo chaoma, nŷetsca tšěngaftangbeñe tšabe bendicioněnga chaotsemnama. Běngbe Bětsabe bonshánana sempre chašmotsóbomñe, y Uámana Espíritu sempre chašmotsóbomñe, y chě Uámana Espíritoftaca cánŷiñe mo canŷacá chašmotsomñe.

## Gálatas

### *Pablo Galacia luaroca ošbuáchiyënga jacheuayama*

<sup>1-2</sup> Atše Pablo, quem tsbuanácha sentsabiamná Jesucristbeñe ošbuáchiyëngbiam, chë Galacia luaroca ošbuáchiyëngcá enefjuanëngbiam. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë inýenga Jesucristbeñe ošbuáchiyënga átšeftaca montsemnënga, tsëngaftanga cbontsacheuaná. <sup>3</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsabe bendicionënga tsëngaftangbeñe chaotsemnama, y chaboma tsëngaftangbe ainaniñe tsabe ebionana chašmotsebonnama. <sup>4</sup> Cristo chabe derecho vida jtsobomñama cachcá tojanonýá y tojanóbana, bëngbe bacna soyënguentšana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerta bacna soyënga imojt-sama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanboščá. <sup>5</sup> Nyetscanga nyetsca tescama Bëngbe Bëtsá chamotsatschuaná. Chca chaotsemna.

### *Nýe canýe ndegombre buayenana soyënga Cristbiam endmëna*

<sup>6</sup> Atše ainanoca inýetšá šontsebiona, er nda nanjouena, tsëngaftanga nýe baseftaysh-inýe y ya juabna šmojatstroká y Bëngbe Bëtsá stëtsoye šmojtsequedá, nda tsëngaftanga tcmojáchembo chabe entšanga chašmotsemnama. Cha chca tojanma Cristbeyeca, er mua puerta tsabia tsëngaftangata enjamna. Tsëngaftanga Bëngbe Bëtsá stëtsoye šmojtsequedá, inýengbe buayenana soye jouenama, y chë inýenga jtsichámuana chë buayenana soyënga chë tsabe noticiënga canmëna ca. <sup>7</sup> Ndegombre, ndoñe quenátsmëna inýe ndegombre buayenánana. Ntšamo entsopasancá mëntšá entsemna: báseftanga montsama tsëngaftanga ndoñe natjëmbana ainánaca chašmotsiyenama, y becá montsama chë Cristbiam tsabe noticiënguentše, ba ndegombre soyënga jtsejuánama, inýe soyënga jacyayama. <sup>8</sup> Nderado bënga o canýe celoca ángel soyënga cmojtsabuayiyiná, y ndoñe tontsemna mo chë tsabe noticiënga bënga tempo tchbonjanabuayenacá, as chë chca tojtsamabiam jBëngbe Bëtsá chaoma infiernoca becá chaosufrima! <sup>9</sup> Tempo ya chca sënjánayana; mora cachiñe šcutëtayana: Nderado nda soyënga cmojtsabuayiyiná, y ndoñe tontsemna mo chë tsabe noticiënga, ntšamo tempo šmonjanoyëngacñëcá, jBëngbe Bëtsá chabiam chaoma infiernoca puerta chaosufrima!

<sup>10</sup> Atše chca stjayana ora, tsëngaftanga cmojtsinýana atše soyënga stsama entšanga oyejuayënga átšeftaca chamotsemnama? Ndoñe chca quenátsmëna. Atše sëndboše ndayá Bëngbe Bëtsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamëse, atše ya ndoñe Cristbe canýe oservená stsemna.

### *Ntšamo Bëngbe Bëtsá Páblëbiye tbojanchembo, Jesucristbe ichmoná jtsemnama*

<sup>11</sup> Atše sëntseboše tsëngaftanga, Jesucristbeyeca atše catšátanga, chašmotsetátšëmbo chë tsabe noticiënga ntšamo sëndabuyayinacá quem laurentša entšangbe juabnentšana ndoñe yondóbocanama. <sup>12</sup> Ndocna entšá chë tsabe noticiënga chešnatanbuayená, ni chešnatanbuatëmbá, ndayá cach Jesucristo šonjaninýinýe.

<sup>13</sup> Tsëngaftanga šmojátatšëmbona ntšamo atše tempo tsjanamana jtsiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becá tsjanamama chë ošbuachiyëngcá enefjuanënga puerta chamosufrima, y ntšamo atše becá tsjanamama ndocná Jesucristbeñe chaondëtsošbuáchemá. <sup>14</sup> Atše inýe judiënga cach atšá uata bomnëngbiam más sënjánama Bëngbe Bëtsá adórayiñe, ntšamo judiënga cha jadórana mondumancá, y atše nýets añémoca tša sënjantšëna jtsamama ntšamo bëngbe bëts taitanga básenga jabuátambama monjanamancá. <sup>15</sup> Pero Bëngbe Bëtsá atše tsabiam yojanjuabná, y chiyeca, atše cabá ndonýna ora, canýe bëts soyama cha šojanbocacá. <sup>16</sup> Y cha tojánbošëna ora, šonjaninýinýe ntšamo ndegombre chabe Uaqiñá yomnana, y šonjanchembo. Cha chca tojanma, atše chë tsabe noticiënga ndoñe judiëngbeñe chayábuayenama. Y atše ndocnábiye chiyataná ndayá jamama šojtsanmënama chašobuayenama; <sup>17</sup> y Jerusalemoye cach ndoñe chiyataná chë atšbiam más natsana Jesucristbe ichmónënga imojamñëngaftaca jencuëntama. Chamna, cachora Arabia uabaina luaroye sëntsanoñe, y chentšana Damasco bëts pueblöye sëntana.

<sup>18</sup> Jesucristbeñe jtsošbuáchiyama sënjanóntša orscana, unga uatëse Jerusalemoye sënjána Pédroftaca jencuëntama, y cháftaca nýe uta semana sënjëftsemna. <sup>19</sup> Y ndocna chë Jesucristbe inýe ichmónënga chiyáisananýe; nýe Santiago aifne, Bëngbe Utabnabe catšata. <sup>20</sup> Bëngbe Bëtsá šontsonýá, ntšamo tsëngaftanga cbontsëtsësnacá ndegombre bëtsemnama.

<sup>21</sup> Jerusalenocana sējñěftsanbocnentsana, Siria y Cilicia luarēngoye sējñána.  
<sup>22</sup> Pero chē tempo, chē Jesucristbeñe ošbuáchiyēnga Judea luariñe bomínýeca ndoñe quešmējñatanábuatma. <sup>23</sup> Nýe ínýēngbioye imojtsayaunana: “Nda tempo bēnga puerte chamotsesufrínama enjanamá, mora entšanga entsabuayiyíná, Jesucristbeñe jtsosbuáchiyama caojtsamna ca. Y tempo cha tša enjánboše jamama entšanga Jesucristbeñe ndoñe chamondětsosbuáchemá ca” —chēnga imojtsichamo. <sup>24</sup> Y entšanga Bēngbe Bětsá imojtsatschuanaye, ndayá cha atšbiajana tojanmama.

## 2

*Chē inýe ichmónēnga tmojánayana Pablo aĩñe tsabá yojtsama ca*

<sup>1</sup> Jerusalenoye sējñána orscana bnětsana canta uatěse, cachiñe choye sējñesana. Bernabé sonantjěmbambá, y Tito bēndataftaca fsējñěftsanbetse. <sup>2</sup> Choye sējñána, choye jama sojanmama Bēngbe Bětsá sojaninínýanyéyeca. Atše nýe chē Jesucristbeñe ošbuáchiyēngbiama uámanēnga imojamnéngaftaca sējñanencuentá, ínýēngaftaca ndoñe; y chē tsabe noticiēngama chē ndoñe judiēngbeñe sēndabuayiyinama chēnga sējñanacuntá. Chca sējñanma atše jtsetatšēmbuama, ntšamo tijanma y sējñěftsamcá ndoñe nýe bonamente yonjamnama. <sup>3</sup> Pero chēnga tmonjánayana atše aĩñe tsabá tijanma ca, y Tito, chē átseftaca enjamná, masque Grecia luarocá enjamna, chēnga ndoñe chematanmandá base bobachtema chē más delicadentse tětšená chaotsemnama, ntšamo judiēnga monduamancá, Bēngbe Bětsabēnga imomnama chaotsinýnama. <sup>4</sup> Chca tonjanopasá, masque ínýēnga monjánboše Tito base bobachtema chē más delicadentse tětšená chaotsemnama. Chēnga tmonjánayana bēngcá Jesucristbeñe ošbuáchiyēnga imojamna ca, pero ndoñe chca quemējñatsmēna. Chēnga chē Jesucristbeñe ošbuáchiyēngaftaca tmojanenutaná, ndayá yojtsanopasánama chē ošbuáchiyēnga ntsetatšēmbcá, mo chē ošbuáchiyēngbiama bacna soyēnga jamama cuafseitémena cuenta. Chēnga tmojánabo jtsetatšēmbuama ntšamo Jesucristo bēnga atsebácanēnga sojánabiamama, chē judiēngbe leyēngaca ndēmandánēnga, cháftaca cánýiñe mo canýacá jtsemnēse. Chēnga chca tmojanma, er chēnga imojtsanboše jamana, bēnga chē judiēngbe leyēngaca nýets tempo mandánēnga chamotsiyenama. <sup>5</sup> Pero bēnga ndocna ora fchiyátanayana aĩñe ca chē ntšamo chēnga monjánichamo bēnga sojánamna jamama soyēngama, er bēnga becá fsējñanboše tsēngaftanga nýets tempo Jesucristbe ndegombre tsabe noticiēnga chašmotsóbomñama.

<sup>6</sup> Pero chē ndēmuanýēngbiama entšanga monjánichamo chē uánatsanēnga imojamna ca (ndayá chēnga tempo imojamna atšbiama ndoñe quenatámana; Bēngbe Bětsabiamama nýetscanga cachcá monduámama), chēngna tondaye chešmatanbuayená, ntšamo tempo tijanmama inýetšá chaimama. <sup>7</sup> Masna, chēnga tmonjántatšēmbona, Bēngbe Bětsá chē tsabe noticiēnga ndoñe judiēnga jábuayenama trabajo atše jamama sojanětsabuáchemá, ntšamo judiēnga jábuayenama cachcá Pédrēbioye tbojanětsabuachecá. <sup>8</sup> Er Bēngbe Bětsá atše chabe ichmoná sojánábema, ndoñe judiēnga chabiamama jábuayenama, ntšamo cachá Pédrēbioye chabe ichmoná tbojanbemcá, judiēnga chabiamama jábuayenama.

<sup>9</sup> Santiago, Pedro y Juan, chē ošbuachiyēnguentša uánatsanēnga, atše canýe běts trabajo chaitsebomnama Bēngbe Bětsá tojanmama tmonjántatšēmbona ora, cucuatše šontanatšataye atše y Bernabēbioye, jinýinýiyama chēnga sojaněbuajama mo cachēngbe trabajo amatcá. Y fsējñanenoyeuná bēndata jama, masna ndoñe judiēnga jtsabuayiyenayama trabajo jamama, y chēngna judiēngbeñe. <sup>10</sup> Chēnga nýe sojanainmpádaye chē ošbuáchiyēnga ndbomnějémēnga Jerusaleñoquēngbiama jtsenójuabnayama; y atše bětscá sěntsama chēnga jujabuáchama.

*Pablo Antioquioca Pédrēbiamama tojánayana cha ndoñe tsabá tojanma ca*

<sup>11</sup> Pero Pedro Antioquía běts puebloye tonjánabo ora, chabe delante sējñánayana cha ndoñe tsabá tonjanma ca, er ntšamo enjanamcá ndoñe tsabá quenjatmēna. <sup>12</sup> Měntšá tonjanopasá: Santiago básefta entšanga Antioquiōye tojanichmó, pero chēnga cabá choca ndáshjajna ora, Pedro yojanamana chē ndoñe judiēnga ošbuáchiyēngaftaca jtsesayana. Pero chē entšanga tmojánashjajñentšana, Pedro tojtsanajbaná chēngaftaca sayana y encuentayana. Cha chca tojanma, ntšamo chē ndoñe judiēnga ošbuáchiyēnga, chē base bobachtema chē más delicadentse tětšenēnga jtsemnnama yojánamna ca tmojánayanēnga, chabiamama muanjájuboyama yojtsauatja causa. <sup>13</sup> Chē inýe judiēnga ošbuachiyēngnaca tmojanontě amana cachcá ntšamo Pedro yojtsamcá, jtsaměse ntšamo chēnga imojántatšēmbó chca jamama ndoñe yonjanamncá. Y Bernabénaca, ntšamo chēnga imojtsamcá jtsónýayěse, chēngcá yojtsama, jtsaměse ntšamo cha yojántatšēmbó chca jamama ndoñe ibonjamncá. <sup>14</sup> Chēnga ndoñe quemējñátanyena jtsaměse ntšamo yojanamncá, ntšamo chē Jesucristbe tsabe noticiēnguentša ndegombre soyēnga endmēncá. Chca sējñaninýe ora, Pédrēbioye nýetsca ošbuáchiyēngbe delante sējñaniyana: “Aca canýe judío, mo ndoñe judío bendmēncá

cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

*Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchem*

<sup>15</sup> Bënga judiënga fsëndmëna, bëngbe bëtsëtsanga judiënga monjámnayeca, y ntšamo judiënga chë ndoñe judiëngbiyoye mondubobuatmncá, chë “bacna soye amënga ca”, ndoñe queftsátsmëna. <sup>16</sup> Y bënga mondëtatšëmbo, canyë entšá Jesucristbeñe tojtsošbuáchem, Bëngbe Bëtsá jamana cha chabe bominiñiñe tsabia chaotsemnana, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominiñiñe tsábenga chamotsemnana, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canyë entšá chabe bominiñiñe tsabia chaotsemnana, ntšamo chë judiëngbe leyënguiñe iuayancá jamama ibomna ca cha tojamama.

<sup>17</sup> Pero, bënga bëtsá mondënguá, Bëngbe Bëtsá chaomama bënga chabe bominiñiñe tsábenga chamotsemnana, bënga Cristoftaca cányñiñe mo canyáca jtsemnëse, chábeñe imošbuáchem. Chca mondošbuaché, bënga chë bacna soyëngama perdonánënga chamotsemnana. Pero inyë entšanga jtsichámuana bënga bacna soyënga amënga imomna ca, ntšamo chë Moisesbe leyine iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe! <sup>18</sup> Atše, ntšamo Bëngbe Bëtsá šojaninñiñecá, chë šoitsemna jájbanama soyënga, cachiñe jajuaboyama y jamama stëtontëse, mo chë Moisesbe ley jtsocumplinana perdonánënga jtsemnana, atše stsemna mo nda ndáy cáchá tojtšendbema y cachiñe tojtšetsjebuanacá; y ndegombre, atše stsemna canyá ntšamo ndoñe tsábá yondmëncá amá. <sup>19</sup> Chë judiëngbe leyëngaca atše sëndëtatšëmbo, ntšamo chë leyënguiñe iuayancá stsamëse, Bëngbe Bëtsá ndoñe yochanjama atše chabe bominiñiñe tsabia chaitsemnana; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbocaná jtsemnana. Chë léyeca ndoñe más mandaná ntsemnana jtsebošëse, atše cachá chë ley šëjanonýá, Jesucristbeñe jtsošbuáchiyama; y chca, atše chaitsobena jtšiyenana Bëngbe Bëtsá jtšeservënëse. Atše Cristoftaca cányñiñe mo canyáca sëndmënayeca, Cristo cruciñe tojanóbana ora enjamna mo átsnaca cuařjocabancá; <sup>20</sup> y mora entsemna mo nýe atše ya ndoñe cuařtsiyencá, Cristo becá vida atše ainaniñe entsebošmënayeca. Y ntšamo mora atše vida sëntsebošmncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtšobomñama cachá tojanonýá y atše tsabiamna tojanóbana. <sup>21</sup> Atše ndoñe quetsátobotena ntšamo Bëngbe Bëtsá entšangbe tsabiamna juabna yobomncá. Nderado Bëngbe Bëtsá tojama canyë entšá chabe bominiñiñe tsabia chaotsemnana, ntšamo chë leyine jamama yomna ca iuayancá cha tojtšamama, as Cristo nýe tondayama matëñjanóbana.

### 3

*Ley jtšobedecënëse o Jesucristbeñe jtsošbuáchiyëse*

<sup>1</sup> ¡Tšëngaftanga Galacientša entšanga, yapa ndenójuabnayënga! Entsemna mo nda tcmojtsabocjuanacá, tšëngaftangbe juabna tojtšetrocá. Ndoñe quešnántësertana ntšamo chca nanjopása, er cach atše botamana chonjanabuayinýá, Jesucristo cruciñe tojanóbana. <sup>2</sup> Atše sëntseboše nýe canyë soye atše chašmëyana: ¿Uámana Espiritu tšëngaftangbe ainaniñe tojanamashëngo jtsemándayama, tšëngaftanga ntšamo chë leyine jamama yomna ca iuayancá šmojamama, o tšëngaftanga chë tsabe noticiënga šmojanuena y chiñe šmojtsošbuáchem? <sup>3</sup> ¿Ndáyeca tša ndenójuabnayënga šmomna? Bëngbe Bëtsabe Espiritbeyeca tšëngaftanga šmonjanontšë mo tsmëma entšangcá jtsemnana. ¿Y mora šmojtseboše tšëngaftangbe vidënga jachñënguama nýe entšangbe juabñëngaca jtšiyënëse? <sup>4</sup> ¿Nýetsca soyënga ndayëjana tšëngaftanga šmojachñëjna, tondayama tonjoservé? Ndegombre chca ndoñe taiuatsmëna. <sup>5</sup> Bëngbe Bëtsá, chë Uámana Espiritu tšëngaftangbe ainaniñe cháumashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyine jamama yomna ca iuayancá šmojtšamama, o tšëngaftanga Jesucristbe tsabe noticiënga šmojanuena y chiñe šmojtsošbuáchem?

<sup>6</sup> Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntšá endayana: “Cha Bëngbe Bëtsábeñe yojtsošbuáchiye, y chiýeca Bëngbe Bëtsá tonjánayana cha chabe bominiñiñe tsabia yojamna ca.” <sup>7</sup> Chiýeca tšëngaftanga cmontsamna jtšetatšëmbuana, Bëngbe Bëtsábeñe ošbuáchiyënga mondmëna mo Abrahábentšana entšangcá, cachá ošbuáchiyana bëtsebošmnama, chë chábentšana ndegombre entšangbiama más. <sup>8</sup> Bëngbe Bëtsabe uabemana palabrënguiñe endopodena jualíama, Bëngbe Bëtsá yochjanma chë ndoñe judiënga chabe bominiñiñe tsábenga chamotsemnana, chábeñe

tmojtsosbuáchema ca. Y Bèngbe Bètsabe uabemana palabrènguiñe, cabá chca ndéma ora, Bèngbe Bètsá Abrahámioye quem tsabe noticiènga tbojanbuayená: “Acheyeca, atse chanjama nyetsca quem luarentsa entsanga tsabe bendicionènga chamotsebmomna ca.”<sup>9</sup> Bèngbe Bètsá tojanma Abraham ba tsabe bendicionènga chaotsebmomna, cha chabeñe yojtsosbuáchema. Chca, Bèngbe Bètsá, chabeñe ošbuachiyèngbiámnaca ba tsabe soyènga jamana, carchá ntšamo Abrahambiana tsabe soyènga tojanmca.

<sup>10</sup> Chè Bèngbe Bètsá chabe bominýiñe tsábenga yochjábiama ca juabnayènga, ntšamo leyíñe jamama yomna ca iuayancá lempe tmojtsobedecénama, chénga nyets tempo jtsiyenana jtsetatsèmbèse Bèngbe Bètsá nyetsca tescama chénga yochjácastigayama. Er Bèngbe Bètsabe uabemana palabrènguiñe mèntšá endayana: “Bèngbe Bètsá jayanana nyetsca tescama castigo chaotsebmomna ca, nda nyets tempo ndoñe tontsama nyetsca mandènga ntšamo chè leyènguiñe iuabemancá ca.”<sup>11</sup> Ndegombre, puerte tsabá entsinýinýena, Bèngbe Bètsá ndoñe yochanjama ndocná chabe bominýiñe tsabia chaotsebmomna, ntšamo chè leyíñe jamama ibomna ca iuayancá tojtsobedecénese. Chca ndegombre endmèna, er Bèngbe Bètsabe uabemana palabrènguiñe mèntšá endayana: “Nyè ndabiama Bèngbe Bètsá tojama chabe bominýiñe tsabia chaotsebmomna, cha Bèngbe Bètsabeñe betsošbuáchema, cha ndegombre chè nyetsca tescama yomna tsabe vida echántsebmomna ca.”<sup>12</sup> Jtsamana ntšamo chè leyènguiñe jamama yomna ca iuayancá, ndoñe quenátsmèna mo Bèngbe Bètsabeñe cuaftsošbuachecá. Ntšamo Bèngbe Bètsabe uabemana palabrènguiñe endayancá: “Nda tojtsama nyetsca mandènga ntšamo chè leyènguiñe endayancá, tsabe vida echántsebmomna, nyets tempo chè leyèngaca mandaná ca.”

<sup>13</sup> Pero, Cristo jóbanama ibojama ca tmojánayanama, y cha bèngbe causa chca chamomama chénga tojanalesènciayeyeca, Cristo tojama bènga nyetsca tescama castigánènga ndoñe chamondètsebmomna, ntšamo chè leyíñe iuayancá ndoñe tmontsama causa. Ntšamo Bèngbe Bètsabe uabemana palabrènguiñe endayancá: “Nyetsca tescama castigo chaotsebmomna, nda canye niñèsiñe tmojajonýá chaóbanama cha ca.”<sup>14</sup> Chca tojopasá, Bèngbe Bètsá chaomama, chè tsabe bendicionènga ntšamo cha Abrahámioye tbojanšbuachenacá, ndoñe judièngnaca chamotsebmomna, Cristo Jesúsbeyeca; y Jesucristbeñe ošbuachiyánaca, Bèngbe Bètsá chaomama chè Uámana Espiritu bèngbe ainaniñe cháuamashèngo jtsemándayama, ntšamo Bèngbe Bètsá tojanašebuachenacá.

*Ndocna ley quenátobena Bèngbe Bètsabe šbuachenana soye jatrócama*

<sup>15</sup> Jesucristbeyeca catšátanga, chè ndayá sèntsichamcá endmèna ntšamo nyets tempo entsángbeñe endbetsopasancá. Uta entsáta tbojenoyeuná canye trato jénbemama, y ntšamo tbojenšbuachenacá chaotsinýnama chatbe uabaina tsbuanáchañe tbojuábemèse, ndocná inýa más ntsoberenana jayanana ntšamo tbojentratacá ndoñe yontsoservena ca; y inýe soyènga chiñe jacjayama cach ndoñe.<sup>16</sup> Chcasna, Bèngbe Bètsá ba soye Abrahámioye tbojanšbuachená puerte tsabe bendicionènga chabiama jamama, y chabe entsanguentsana canýabiámnaca. Y Bèngbe Bètsabe uabemana palabrènguiñe ndoñe quenátayana: “chabe entsanguentsèngbiámnaca ca”, mo Bèngbe Bètsá ba entsángbiama cuaftsichamcá; sinó mèntšá endayana: “acbe entsanguentsana canýabiama ca”. Y chca entsayana, nyè canye entsá ca; y cha endmèna Cristo.<sup>17</sup> Atse ndayá mèntšá chontsètsètsná: Natsana, Bèngbe Bètsá Abrahánoftaca canye trato tojánbema, y tbojaninyana “aíñe ca”, ntšamo tbojanšbuachenacá jamama. Chentsana canta patse y unga bnètsana uatèse, Bèngbe Bètsá Moisesbe cucuatšíñe chè leyènga tbojanántšaboshjona; chíyeca, chè leyènga ndoñe ntsoberenana jamana chè Bèngbe Bètsá Abrahánoftaca tojánbema trato ndoñe chaondètsošservénama, ni jamana ndayá Bèngbe Bètsá tojanšbuachenacá ndoñe chaondètsošservénama.<sup>18</sup> Er ndayá Bèngbe Bètsá chabe entsanga tojatsatacá, tojsemna chénga ntšamo chè leyíñe jamama yomna ca iuayancá tmojtsamama, chca, chè tsetana soyènga ya ndoñe nantsóbocana ndayá Bèngbe Bètsá jamama tojanašebuachenántšana. Pero ba tsabe bendicionènga Abrahambiana jamama, Bèngbe Bètsá tbojanšbuachenáyeca, Bèngbe Bètsá chè soyènga Abrahambiana tojanma.

<sup>19</sup> Asna, ¿ndayama chè Moisesbe ley nantsoservena? Bèngbe Bètsá chè leyènga tojanáboshjona, ba tsabe soyènga jamama Abrahámioye tbojanšbuachenántšana baytese. Bèngbe Bètsá yojanjuabná chè ley chaoservé entsanga jinýanýiyama ndayá tsabá o ndoñe tsabá jamama bétsebmomna, chè Abrahámbentšana Uámana Entšá jashjanguèntscuana, ndabiama Bèngbe Bètsá Abrahámioye tbojanšbuachená ba tsabe bendicionènga jamama. Bèngbe Bètsá angelèngaftaca chè ley Moisesbe cucuatšíñe tbojanántšaboshjona, y chè entsá Moisés enjamna chè oyebuambnayá Bèngbe Bètsáftaca y entsángaftaca.<sup>20</sup> Uta entsáta canye trato jénbemamna, jtseytana inýe entsá chè uta entsátaftaca chaóyeuambama; pero Bèngbe Bètsá Abrahámioye ba tsabe soyènga jamama tbojanšbuachená ora, nyè canýa chca tojanma, y ndoñe bonjanájaboto inýa chabiama Abrahánoftaca chaóyeuambama.



### *Ndayama chë ley yomna*

<sup>21</sup> ¿Chca nántsayana, ntšamo Moisesbe leyiñe iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entsangbe cucuatšíñe canye ley tojanáboshjona, y chë ley tojtsoyobena jamana entsanga ndegombre tsabe vida chamotseboimnana, as Bëngbe Bëtsá nanjama entsanga chabe bominyiñe tsábenga chamotsemnana, ntšamo chë leyiñe jamama yomna ca iuayancá tmojtsamama. <sup>22</sup> Pero Bëngbe Bëtsabe uabemana palabrénguiñe endayana, nyetsca quem luarentša entsanga cachëngbe bacna soyënga jamama juabnéngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jóyëngacñama. Y chënga, Jesucristbeñe imojtsošbuáchema imojtseboimna ndayá Bëngbe Bëtsá tojanašbuachenacá.

<sup>23</sup> Jesucristbeñe jtošbuáchiyama entsanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entsanga Jesucristbeñe muanjobenaye jtošbuáchiyama Bëngbe Bëtsá jinjaníyama tempo joshjanguëntscuana. <sup>24</sup> Cristo jabama tempo tonjanoshjanguëntscuana, chë ley bëngbiana enjamna mo canye pamillentsa oservenacá, cha jtsamana chentša básenga chamotsamama ntšamo tsabá tojtsemncá. Chë ley chca yojamna, bënga Cristbeñe jtošbuáchiyama chamobenama, y chca, Bëngbe Bëtsá chaoma bënga chabe bominyiñe tsábenga chamotsemnana. <sup>25</sup> Pero Jesucristbeñe jtošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canye entsacá, ndayá tsabá yomncá bënga chamotsamama cuaftsamcá. <sup>26</sup> Cristo Jesúseñe šmojtsošbuáchema, nyetsca tsëngaftanga šmojobená Bëngbe Bëtsabe básenga jtsemnana, Cristo Jesúseftaca cányiñe mo canyáca jtsemnëse. <sup>27</sup> Tsëngaftanga tcmónjanëbaye, y chca, Cristoftaca cányiñe mo canyáca šmontsemna. Y mora šmojobená mo cach Cristcá jtsemnana. <sup>28</sup> Chiyeca, ndayá Bëngbe Bëtsá tojamama, judiënga y ndoñe judiënga cachcanga mondmëna; nyets tempo nye inyabiana oservënënga y chë nye cachëngbiana trabájayënga cachcanga, y boyabásenga y shembásëngacna. Nyetsca tsëngaftanga mo canyáca šmondmëna, Cristo Jesúseftaca cányiñe mo canyáca jtsemnëse. <sup>29</sup> Tsëngaftanga Cristbe entsanga šmondmënayeca, šmontsemna mo Abrahámbeñsana entsanga cuaftsemncá; y chca, ntšamo Bëngbe Bëtsá Abrahámbye tojašbuachenacá, tsëngaftanga šmochanjóyëngacñe.

## 4

<sup>1</sup> Atšnaca sëntseboše jayanama, chë uaquiñá nda yochjóyëngacñe ntšamo tbojtsotocancá, ntšamo chabe taitá jatšetayama tojašbuachenacá, cha cabá mo canye basacá tojtsemnëntscuana, ndocna derecho chë soyënguiñe ntseboimnana; y chca, cha jtsemnana mo canya nyets tempo nye inyabiana oservenacá, masque lempe ntšamo chabe taitá tojašbuachenacá chë uaquiñabiana tojtsemna. <sup>2</sup> Chë uaquiñá tojtsobóchantscuana, entsanga jtsemnana ndëmuanyënga ntšamo cha tbojtsajabotcá jtsoinayana, y inyënga jtsejuabnayana ndayá chë taitabe soyëngaca jamama, chë uaquiñá otocana soyëngaca. Y chca jtsemnana, chë taitá tojayana tempëntscuana. <sup>3</sup> Mo cachcá cuaftsemncá, bënga chë ndegombre soyëngama cabá ndosértaye ora, bëngnaca mandánënga monjamna mo nyets tempo nye inyabiana oservënëngcá, quem luarentše imománda espiritëngaca. <sup>4</sup> Pero Bëngbe Bëtsá chabe Uaquiñá quem luaroye tbojanichmó, nya chama tempo tojanóshjango ora; cha mo nyetsca entsangcá, canye shembásabentšana tojanonýná, y yojoyena jtsamëse ntšamo judiëngbe leyiñe jamama ibojamna ca yojanayancá jtsamëse. <sup>5</sup> Quem luaroye chca tojánabo bënga jabátsebacama, y chamotsobenama Bëngbe Bëtsabe basengcá jtsemnana, bënga chë tempo šonjánamna chë ley jtsobedecénana. <sup>6</sup> Y chca, tsëngaftanga ya chabe básenga šmojtsemnana jinjaníyama, Bëngbe Bëtsá chabe Uaquiñabe Espiritu tbojanichmó, nyetscangbe ainaniñe cháumashënguama, y chë Espiritu endama bënga Bëngbe Bëtsá chamochembo, “Atšbe Taita ca”. <sup>7</sup> Mëntsá, cada ora tsëngaftanguentsá ya ndoñe quenátsmëna mo chë nyets tempo nye inyabiana oservënëngcá, quem luarentše imománda espiritëngaca mandánënga, y aife Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básenga jatšatayama tojašbuachenacá cha echanjóyëngacñe.

### *Pablo, Galacia luaroquëngbiana ngménaca yojtsanjuabnaye*

<sup>8</sup> Tempo, Bëngbe Bëtsá ndoñe šmonjanáuatma ora, tsëngaftanga šmojamna mo nyets tempo nye inyabiana oservënëngcá, ndoñe ndegombre diosënga mondmëna espiritëngaca mandánënga. <sup>9</sup> Pero mora, Bëngbe Bëtsábye šmontsáuatma ora, o tsabá jayanama, Bëngbe Bëtsá cmojtsëuatma ora, ¿ntšámoyeca tsëngaftanga cachiñe chë quem luarentše imománda espiritënga šmojtsayaunana? Chënga ndocna obenana quemátsboimna, y nduámanënga

mondmëna. ¿Ndayeca tsëngaftanga šmojtseboše cachiñe jtsemnana mo chë nyëts tempo nýe inýabiama oservenëgcá, chë espiritëngaca mandánënga? <sup>10</sup> Tsëngaftanga tša jtsejuab-nayana diënguñe, shinýënguñe, canýe uatentša tempënguñe y uatënguñe, mo uámana tempëngcá Bëngbe Bëtsá tsábá jadórana, y chama bëts fiestënga jtsebmomnana. <sup>11</sup> Atše corente šontsengmena, nderado atšbe trabajo tsëngaftangbeñe tondayama tonjoservé.

<sup>12</sup> Jesucristbeyeca atšbe catšátanga, bëtscá cbontsaimpadana, šmochtsiyena jtsemëse ntšamo atše sëndamcá, er átsnaca sënjóbmëna ntšamo tsëngaftanga ndoñe judiënga šmondmëncá. Tsëngaftanga ndocna bacna soye atše chešatsborlá. <sup>13</sup> Tsëngaftanga šmondëtatšëmbo, atše sënjanobená chë natsana soyama tsëngaftanga chë tsabe noticiënga jábuayenama, canýe šocana šonjanontšáshjango causa. <sup>14</sup> Atše canýe šocana sënjánbmomna causa, tsëngaftangbiama ndoñe paselo quenjatsmëna tsëngaftangbeñe atše jofjana; pero masque chca, tsëngaftanga ndoñe chešmatanaboté, ni quešmatanáboyënja; masna, tsëngaftangbeñe tsábá šmonjanofja; šmonjanofja mo canýe ángel Bëngbe Bëtsabe ichmoná šmojofjá, o cach Jesucristbioycá. <sup>15</sup> Ndayá chora tsëngaftangftaca enjanopasancá, puerte oyejuayënga tcomjánabiama. ¿Y mora ndayá tojopasá? Ndegombre, atše sëndëtatšëmbo y sëntsobena jayanama, tsëngaftanga ndaye sóynaca atšbiama mašmëñjanmama. Chë más uámana šmojánbmomna soyënga atšbe cucuatšifne mašmëñánboshjona, y nýa mo chë hominýëngnaca masmëñjánenobuchjatsëca atše jatsetayama. <sup>16</sup> Y morna, ¿ntšamo ndegombre yomncá cbojtsëtsësnama, atšbiama šmojtsejuabná mo tsëngaftangbe uayayá cuaftsemncá ca?

<sup>17</sup> Chë ndoñe ndegombre soyënga buátëmbayënga montsinýinýná mo tsëngaftangbiama ndegombre tsábá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tsëngaftangbiama ndoñe tsábá quenátsmëna. Chënga montseboše atšbe contra y atšbe buátëmbana soyëngama contra chašmotsemnana, chentšana tsëngaftanga chëngaftaca jtsemnana chašmotsebošama y chënga chašmotsababuánýeshanama. <sup>18</sup> Puerte tsábá endmëna atše y inýenga chafstseboše tsëngaftangftaca amiguënga jtsemnana, canýe tsabe soye jamama tojtsemnëse; y sempre chca chauëtsemna, tsabiama tojtsemnëse, y ndoñe nýe atše chentše tsëngaftangftaca stsemna ora. <sup>19</sup> Tsëngaftanga, chë atšbiama mo atšbe basengcá šmondmëñënga, Jesucristbeñe chašmošbuáchemë tconjanëjabuáheyeca; atše cachiñe sëntsesufrina tsëngaftangbe causa, ntšamo canýe šësona jtsebmomna ora canýe shembása jtseufrinancá; y atše chca chanjëftsesentina, ntšamo Cristo endmëncá tsëngaftangbe vidiñe ndegombre chaajtsebínýnëntscuana. <sup>20</sup> Malaye atše, mora tsëngaftangftaca stsemna, atše jobenayama jinýanýiyama, cach tsëngaftanga jáuyanëse, ntšamo ndegombre atše tsëngaftangbiama tsësentinana. Atše tša šontsecohëngmena tsëngaftangbiama.

### *Ntšamo Agar y Sáraftaca tojanopasá*

<sup>21</sup> Canýe soye šmochjauyana, tsëngaftanga chë Moisesbe léyeca mandánënga jtsemnana šmojtsebošënga. ¿Ntšamo chë leyine endayancá tacmojtsësertana? <sup>22</sup> Chiñe endayana, Abraham uta uaquifiñata yojánabamna ca; canýana Agárbeñe, canýa chabe shembíama nyëts tempo oservená; y chë inýana, cachabe shémbeñe, Sara, y mua ndocnabiama nyëts tempo oservená yonjamna. <sup>23</sup> Chë chabe shembíama nyëts tempo oservenabe šësona, tojanonýná nýe Abraham y Agar chca chaotsemnana tbojánbošenayeca; y cachabe shembe šësona tojanonýná, Bëngbe Bëtsá chë soye jamama Abrahámbioye tbojánšbuachenáyeca.

<sup>24</sup> Ntšamo Agar y Sara, y chatbe šëšónataftaca tojanopasacá, bënga canýe uámana soye šontsabatambá. Ndayá chë uta shembásataftaca tojanopasacá, uta trato entsinýinýná: chë shembása Agar, chë nyëts tempo nýe inýabiama oservená yojamná, entsinýinýná chë trato Bëngbe Bëtsá y Israeloca entšangftaca, chë Moisésoftaca Bëngbe Bëtsá leyënga entšangbe cucuatšifne tojanáboshjona ora. Agar básenga yojtsabamna ora, chëngnaca tmojanonýná nýe inýabiama nyëts tempo oservëñënga jtsemnana, y chë tratentša leyifne soyëngaca mandánënga jtsemnana tmojtsebošëngnaca jtsemnana mo nýe inýabiama nyëts tempo oservëñëgcá. <sup>25</sup> Ndayá Agáraftaca tojanopasacá entsinýinýná chë Siná batsjoca tmojánbmëna trato, Arabia luaroca; y chë morsca bëtš pueblo Jerusalénënga entsinýinýná, er chentša montsenga tsemnna chë leyëngaca mandánënga. Ntšamo Agar y chabe básenga nýe inýabiama nyëts tempo oservëñënga monjamncá, Jerusalenentša entšangnaca cachcá chëngcá mondmeñe, chë leyëngaca nyëts tempo mandánënga bëtsemnayeca. <sup>26</sup> Ndayá Sáraftaca tojanopasacá, chë nýe cachabiama trabájaye shembása, entsinýinýná chë trato, chë tsabe bendicionënga Abrahámbiama jamama chábioye tbojánšbuachená ora. Chánaca entsinýinýná chë Bëngbe Bëtsabe bëtš pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyëngaca mandánënga. Chë Cristbeñe ošbuáchiyënga mondmeñe chë celoca bëtš pueblo Jerusalenentše joyénanama, y chca, ndegombre chënga mondmeñe celocama entšanga. <sup>27</sup> Chë celoca Jerusalén endmëna

chê ndegombre bêts pueblo chë Jesucristbeñe ošbuáchiyëngbiama, y chca endmëna mo canýe shembása šešonga ndabamná y aíñe chaotsabamnama Bëngbe Bëtsá cuafjamcá. Quem luarentša Jerusalén endmëna chë uámana luare chë léyeca mandánënga imomnëngbiama, y chca endmëna mo canýe shembása aíñe boyaftaquécá, er Bëngbe Bëtsabe uabemana palabrënguifñe chë shembásatbiama mëntšá endayana:

Shembása šešonga ndabamná, y ndocna te tsetšanënga ndbomná šešona jtsebmomnama, moyejúa y moyó oyejuayá cojtsemnama.

Chca moma, er aca, chë shembása chabe boyabiama utšená, chë shembása boyá bomnabiama más básenga cochántsabamna ca.

<sup>28</sup> Chcasna, Jesucristbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámbioye thojanšbuachenáyeca; cachcá, tsëngaftángnaca šmojobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca. <sup>29</sup> Ntšamo chë tempo tojanopasacá, chë Isaac chaosufrima Ismael tojanmá (Ismael, Abrahambe uaquiñá Agárbeñe, chë nýe chata chca thojánbošenayeca onýnaná; Isaac, chë Bëngbe Bëtsabe Espíritbeyeca onýnaná), mórñaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá. <sup>30</sup> Pero, çndayá Bëngbe Bëtsabe uabemana palabrënguifñe Abrahambe básatbiama iuayana? Mëntšá endayana: “Moma, chë nýets tempo nýe ínýabiama oservená y chabe basa acbe yëbñentšana chábuaisebocnama, er chë nýets tempo nýe ínýabiama oservenabe šešona ndoñe quenátobena chabe taitabe soyënga jtsebmomnama. Nýe chë propio shembe šešona aíñe, er chë shemna ndoñe nýe ínýabiama nýets tempo oservená quenátsmëna.” <sup>31</sup> Chcasna, Jesucristbeyeca atšbe catšátanga, bënga ndoñe quemuátsmëna mo canýa nýe ínýabiama nýets tempo oservenabe básenga cuaftsemncá, er mora ya ndoñe más quemuátsmëna chë léyeca nýets tempo mandánënga. Y aíñe montsemna mo canýe shema ndoñe nýe ínýabiama nýets tempo oservenabe básenga cuaftsemncá, er Bëngbe Bëtsabe básenga bënga mondmëna.

## 5

### *Cristo bënga šojatsebacá*

<sup>1</sup> Cristo bënga šojatsebacá, ndoñe más mo chë nýets tempo nýe ínýabiama oservenëngcá chamondëtsiyenama, chë léyeca mandánënga. Nýa šmochtsentsëna nýets tempo chca atsebácánënga chašmoquedama, y ndoñe šmatjaleséncia tsëngaftanga cachiñe chë léyeca mandánënga ínýenga chácmabiamama.

<sup>2</sup> Tšabá šmochjouena. Atšbe Pablo cbëyana: Nderado tsëngaftanga ndoñe judiënga, šmojaleséncia ínýenga chë tsëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tsëngaftangbiama tojanmá tondayama nantoservena. <sup>3</sup> Ndëmuanýe entšánaca, nda tojaleséncia ínýenga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nýetsca chë judiëngbe leyentša mandënga jtsobedecénana. <sup>4</sup> Ndëmuanýënga tsëngaftangbentšana šmojtsenguá, Bëngbe Bëtsabe bominiñiñe tšábënga jtsemnama, ntšamo leyiñe jamama yomna ca iuayancá jtsemëse, tsëngaftanga chca šmojtsamama, šmojama Crístoftaca cányiñe mo canýacá ndoñe chašmondëtsemnama; Bëngbe Bëtsábentšanëñaca šmojtsoluaré, y chca, šmontsinýanýná tsëngaftanga ndoñe šmontseboše, Bëngbe Bëtsá tsëngaftangbe tšabiama jtsejuabnayëse, chácmatsebacana. <sup>5</sup> Pero bënga, Bëngbe Bëtsabeñe jtsošbuáchiyëse, mondobátmana cha yochjama bënga chabe bominiñiñe tšábënga nýets tempo chamotsemnama. Y bënga chca mondobátmana, Jesucristbeñe ošbuáchiyana bómñayeca, y chë ošbuáchiyana chë Uámana Espíritbijana bëngbioye endobá. <sup>6</sup> Er Crístoftaca cányiñe mo canýacá tmojtsemna ora, aíñe base bobachtema tëtšëñënga tmojtsemna o ndoñe, tondaye ntsámanana; ndayá puerte enduámama endmëna chë Jesucristbeñe bënga mondbomna ošbuáchiyana, y chca bëtsebmomnama bënga montsinýanýná ínýenga jtšababuánýeshanëse.

<sup>7</sup> Tsëngaftanga tšabá šmonjánama, chë jtšiyenana ntšamo Bëngbe Bëtsabe ndegombre soyënga yomncá jtsemëse. Y mora, çnda tojama tsëngaftanga chašmotsajbanama chë Bëngbe Bëtsabe ndegombre soyënga jtšuenanama? <sup>8</sup> Ndegombre, Bëngbe Bëtsá ndoñe quenátsmëna, er cha tsëngaftanga tcmojáchembo chabe entšanga chašmotsemnama. <sup>9</sup> Ntšamo entšanga mondëntšayancá: “Nýe base levadura jamana nýetsana chauabochama ca”; cachcá, tsëngaftanga chë judiëngbe básefta leyëngaca mandánënga jtsemnama šmojabojátse, šmuatjábocna nýetsca leyëngaca mandánënga. <sup>10</sup> Bënga Bëngbe Utabnáftaca cányiñe mo canýacá bëtsemnayeca, atšbe corente sëntsetatšëmbo, ntšamo atšbe juabna yomncá tsëngaftángnaca cachcá šmochtsejuabnayama; y átsñaca corente sëntsetatšëmbo Bëngbe Bëtsá puerte bochjacastiga, nda tsëngaftanga natjëmbara ainánaca ndoñe chašmondëtsiyenama tojtsamábioye, masque ndánaca cha chaotsomñe.

<sup>11</sup> Y atšbiamá chanjayana, Jesucristbeyeca atšbe catšátanga, Jesucristbeñe ošbuáchiyënga base bobachtema chëngbe más delicantše tétšenënga chamotsemnana entšanga cabá stsabuayiynase, entšanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entšanga stsabuayiyná ora, chënga ya ndoñe átšeftaca nanjóntsiaye. <sup>12</sup> Pero chë natjëmbana ainánaca ndoñe chašmondëtsiyenama imojtsamëngna, ¡malaye cachënga muanjenocbóna!

<sup>13</sup> Pero tsëngaftanga, Jesucristbeyeca atšbe catšátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnana. Pero chca bëtsemnana, mora ndoñe šmatjátsjuabnaye šmojtsovena jalesénciana, nýe tsëngaftangbe cuerpënga tsábá chamotsemnana juabnëngaca mandánënga jatiyenama. Chamna, tsëngaftanga šmuenbobonshánayeca, nýetscanga šmochtsenájabuachana. <sup>14</sup> Er ntšamo Moisesbe leyentša nýetsca mandënguifíe endayancá, nýe canýe mandíñe lempe chca entsayana. Y chë mando endmëña: “Ndëmua entšánaca cochtsebobonshana ntšamo cach aca cuenobobonshancá.” <sup>15</sup> Pero ñyënga chamotseufrínama jtsamëse tsëngaftanga šmojtсийëse, mo tsátjaye bayënga tmojtšenashantsná y tmojtsebobonacá, cuedado šmochtsëbomna. Ndóñese, nýetscanga šmatjánenpochocaye.

*Ntšamo chë Bëngbe Bëtsabe Espíritbeyeca vida jtsebomnana*

<sup>16</sup> Chiyeca chochjáuyana: Nýets tempo šmochtsiyena ntšamo chë Uámana Espiritu cmotjtsamëndacá, y chca, tsëngaftanga ndoñe quešmochátama soyënga, nýe cach tsëngaftanga tsábá jtsomñama juabnëngaca. <sup>17</sup> Er ndayá bënga, nýe entšangbe juábnaca jamama mondbošcá, jtsemnana ndayá chë Uámana Espiritu bënga chamomama yobošcá contra; y ndayá chë Uámana Espiritu bënga chamomama yobošcá, jtsemnana ndayá bënga, nýe entšangbe juábnaca jamama imobošcá contra. Chca endmëñayeca, ntšamo chë Uámana Espiritu chašmomama yobošcá šmojttsamëse, ndoñe quešmatóvena jamana, ndayá cach tsëngaftanga, nýe entšangbe juábnaca jamama šmojttsabošcá. <sup>18</sup> Tsëngaftanga, ntšamo chë Uámana Espiritu cmotjtsamëndacá šmojttsamëse, ndoñe quecmátamna ntšamo chë leyíñe iuayancá játamama.

<sup>19</sup> Ntšamo entšanga, nýe entšangbe juábnaca tmojttsamcá, nýetscanga paselo jtsonýayana: chënga bacna soye boyabása o shembásaftaca jtsamana, nýe chca soyëngama jësejuabnayana, y ndoñe ntsovenana cachënga jenomándama, chca soyënga jtsamëse. <sup>20</sup> Ba uabouana soyënga jtsamana, diosënga yomna ca tmojtsejuabná soyënga jadórama, jtsencjuanayana, ñyëngaftaca jtsenájayana, nýetscanga ndoñe cachcá chamondëtsejuabnama jtsamana, ñyëngaftaca yapa jtsenántšabošana, soyënga nýe rábiaca jtsamana, ñyëngaftaca tsá jesenaleganana, y canýënga ñyëngaftaca contra chamotsemnana jtsamana. <sup>21</sup> Nýe jtsebošana ntšamo ñyá tojatashjachcá jtsebomnana, yapa tmoýënga jtsemnana, fiestënguifíe ndoñe tsabe soyënga jtsamana, y ñyë soyëngnaca mo chë soyëngcá jtsamana. Y mora atše cbabuayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsoamna.

<sup>22</sup> Pero, Uámana Espiritu ainaniñe tojtsemándá ora, quem soyënga chentšana jóbocnana: nýetscanga jtsababuánýeshanana, jtsóyejuayana, natjëmbana ñyëngaftaca jtsiyenana, puerta uantado nýetsca padecëniñe jtsemnana, nýetscanga corente bonshanánaca jtsenýayana, tsabe ainana jtsebomnana, y nýetscañe tsabe palabra bomnënga jtsemnana, <sup>23</sup> jtsejuabnayana chë ñyënga mo chabiamá más uamanënga cuatfsemncá, y cachá nýetsca soyënguifíe jenomándama jtsovenana. Y ndocna ley quenátsmëña, chca soyënga tmojttsama entšangbiama contra cháuyanama. <sup>24</sup> Jesucristbenga imomnënga tmojama, chënga chë nýe entšangbe juabnëngaca mandánënga ndoñe ntsemnana; ya ndoñe más, chë nýe cachënga tsábá jtsomñama bacna juabnëngaca mandánënga quemátsmëña, y chë nýe cachëngbiama soyënga jamama bëtscá juabnëngaca cach ndoñe. <sup>25</sup> Bënga ndegombre tsabe vida chamotsebomnana Uámana Espiritu yojtsámayeca, bënga mochtсийena jtsamëse lempe ntšamo Uámana Espiritu šojtsamëndacá. <sup>26</sup> Ndoñe šmattsenábotamnaye, uamanënga jatenobiamnyëse, ndoñe soyënga mattsama ñyënga bëngaftaca chaoséntiyama, y ndoñe nýe mochjatsboše ntšamo ñyá tojatashjachcá jatsbomnana.

## 6

*Nýetscanga šmochtsenájabuachana*

<sup>1</sup> Jesucristbeyeca atšbe catšátanga, nderado ndánaca bacna soye tojamama šmojinýe, tsëngaftangbentše ntšamo chë Bëngbe Bëtsabe Espiritu tojtsemándacá tmojttsamënga cmontsamna cha juajabuáchana, chë ndoñe tsabe soye amana chaotsajbanama; pero chca šmochjama becá bonshanánaca jtsonýayëse. Cuedado šmochtsëbomna, er ndóñese, tsëngaftangnaca cmatjócochëngo cachcá soye jamama. <sup>2</sup> Chë soyënguifíe chašmojtsepadecena ora, šmochtsenájabuachana, mo chë uauta uasmanëshangá

šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojamandacá šmochantsocumplina.

<sup>3</sup> Nderado nda tojtsejuabná, cha canýe uámana entšá yomna ca, pero ndoñe chca cha tondmënëse, cachá jtsenoíngñayana. <sup>4</sup> Cada ona chauenojuabó, ntšamo tojamcá tšabá o ndoñe tšabá bétsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá tojtsemna ca, chë ndayá ínyenga tmojamama más tšabá yojtsemna ca jatichámëse. <sup>5</sup> Er cada ona bontsemna jtsenójuabnayana, jtsetatšëmbuama ntšamo tojamcá tšabá o ndoñe tšabá bétsemnama.

<sup>6</sup> Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyëtsca tšabe soyënga jenájatayana.

<sup>7</sup> Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaíngñana. Ntšamo entšanga mondëntsáyancá: “Ndayá tcojá y cachá josháchiñana ca.” <sup>8</sup> Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nye cachá tšabá jtsomñama bacna juabnëngaca, cha echanjábozna jabuache castiganá nyëtsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espíritu tojtsemandacá jtsamëse, chë nyëtsca tescama yomna tšabe vida echántsebomna. <sup>9</sup> Chcasna, ndoñe chašondëmantsë tšabe soye jtsamama; er masque šojtsëmantsnasna, pero chë tšabe soyënga jtsamama ndoñe tmonjajbanase, canýe bëts te echanjóshjango, bënga bëtscá tšabe soyënga josháchiñana, mo tša tšabe shajuanënga tmojashaquëcá. <sup>10</sup> Chíyeca, tmojtsobena ora, nyëtschangbiama tšabe soyënga mochjama, pero masna chë Jesucristbeñe ošbuáchiyana bómnyeyca, bëngcá Bëngbe Bëtsabe básenga imomnëngbiama.

*Quem tsbuanácha juapochócama cach Pablo tojanábema*

<sup>11</sup> ¡šmochjinýe, tša bëts letrëngaca cach atšbe cucuátšëca mora cbontsëbuabiamná!

<sup>12</sup> Ndëmuanyënga imojtseboše, tšëngaftanga chë ndoñe judiënga jamëndama tšëngaftangbe más delicadentšë base bobachtema tëtšënënga chašmotsemnama, ntšamo judiënga monduamancá, chënga chca jtsamana nye chë judiëngaftaca tšabá joquédama. Y chca jtsamëndayana, chënga chamosufrima ínyenga chamotsamama ndoñe mondbóseyeyca; er judiënga muanjama chënga chamosufrima, Cristo cruzoca jóbanana entšangbiama puerte iuámana ca chënga tmojtsabuayiynase. <sup>13</sup> Pero ni mo chë más delicadentšë base bobachtema tëtšënënga imomnënga, ndoñe quemátama lempe ntšamo chë leyíñe iuayancá. Pero chënga jtsebošana tšëngaftanga chca tëtšënënga chašmotsemna, chënga jtsenábótamnyama jobenayama, ínyenga base bobachtema chacmatëtšama tšëngaftanga šmojalesenciama. <sup>14</sup> Atšeftacna ndocna te chca chaondopasá. Atše nyëts tempo y becá chanjëftsóyebuambnaye ndayá atšbiama Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiama tondaye quenatámana ntšamo entšanga quem luarentše imojuabnacá y chëngbiama puerte iuámana; y ndayá atšbiama puerte iuámana, entšangbiama tondaye quenatámana; y chë causa, atše chëngbiama mo obanacá šëndmëna. <sup>15</sup> Chë más delicadentšë base bobachtema aíñe tëtšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entšangcá bënga šojábama, Uámana Espíritu bëngbe ainaniñe jtsemándayëse. <sup>16</sup> Chë quem buatëmbana sóyeca jtsamëse šmoyenëngbiama, atše, Bëngbe Bëtsá sëntseimpadana, cha chaoma tšëngaftangbe ainana natjëmbana chašmotsebomnama y becá chacmotsalastemánama; y ndoñe nye chëngbiama chca quetsatsimpadana, ndayá nyëtscanga Bëngbe Bëtsabe entšanga imomnëngbiamnaca.

<sup>17</sup> Y mora, nye canýe soye cbochjáuyana: morskana ndocná chaondëtsama atše jasúfriama chašotsemnama; er atšbe cuerpiñe endëtinýna ntšamo atše tijasufri, Jesusbe oservená bétsemnama.

<sup>18</sup> Jesucristbeyeca atšbe catšátanga, atše sëntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnama. Chca chaotsemna.

## Efesios

### *Jacheuayama*

<sup>1</sup> Atse Pablo, Jesucristbe ichmoná Bèngbe Bètsá chca yobóseyeca, quem tsbuanácha sèntsabianná Efeso puebloca Bèngbe Bètsabe entsanga y Cristo Jesúsbeñe ošbuáchiyènga imomnèngbiamá. <sup>2</sup> Atse sèntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tsèngaftangbeñe tsabe bendicionènga chaotsemnana, y chata chaboma tsèngaftangbe ainaniñe tsabe ebionana chašmotsebonnana.

*Cristoftaca cányiñe mo canýacá jtsemnèse, bènga mochántsebonna nyetsca tsabe soyènga, ntšamo celoca yobinýncá*

<sup>3</sup> Bèngbe Bètsá y Bèngbe Utabná Jesucristbe Taitábioye mochjètschuaye, er bènga Cristoftaca cányiñe mo canýacá mondménayeca, Bèngbe Bètsá tojama bènga nyetsca tsabe soyènga chamotsebonnana, ntšamo celoca yobinýncá. <sup>4</sup> Bèngbe Bètsá bènga šojanabacacá Cristoftaca cányiñe mo canýacá chamotsemnana, cabá quem luare cha ndama orscana, bènga chabe delante chamotsemnana chabe entsanga, bacna soyèngama perdonánènga y chabe oservénènga, y bènga ainaniñe bacna soye ndbomnènga imomna ca cha cháuyanama. <sup>5</sup> Bèngbe Bètsá šuababuánýeshanayeca, tempo cha tojanjuabó y tojánbošena bènga mo cachabe basengcá jábiamama, ché Jesucristo yochjanma sóyeca. <sup>6</sup> Chiyeca bènga Bèngbe Bètsábioye sempre jtsatschuanayana, cha bèngbe tsabiama juabna yobómnayeca, ndayá chabe Bonshana Uaquiñáftaca Bèngbe tsabiama cha tojamama. <sup>7</sup> Bèngbe Bètsá puerte bonshanánaca bèngbe tsabiama bètscá yojuabnýeyeca, cha bèngbe bacna soyèngama šojtsaperdoná y sojatsebacá, er Jesús bèngbiamá tojanóbana, chabe buiñe juabuáshanése. <sup>8</sup> Bèngbe Bètsá tojama bènga nyets osertánana y becá juabna chamotsebonnana, cha becá bonshanánaca bèngbe tsabiama juabna yobómnayeca, <sup>9</sup> y tojama bènga chamotsetatšèmbuama ndayá jamama cha yobošcá, ndayá cachá tempscana yojanjuabná jamama, pero entsanga chca ndoñe tonjaninýanjé. Ndayá jamama Bèngbe Bètsá tempo yojanjuabnacá, ndayá cha tojama bènga chamotsetatšèmbuama, cachá yojanjuabná chca jamama. <sup>10</sup> Ndayá jamama Bèngbe Bètsá yojuabnacá, lempe echanjochnèngo nýa chama tempo chaojshjango ora, y quem Bèngbe Bètsabe juabna endmèna jamana, lempe ntšamo cha tojamcá celoca y quem luarentše, Cristo chamotsebonna nyetsca ché soyènguifè mo ché mandayacá.

<sup>11</sup> Bèngbe Bètsá sempre jamana nyetsca soyènga ntšamo tojtsejuabnacá y tojtsebošcá. Y Bèngbe Bètsá bènga šojabacacá, ntšamo cabá chca ndama ora yojanjuabnacá; chca, bènga Cristoftaca cányiñe mo canýacá jtsemnèse, bènga chamóyèngacñama ndayá Bèngbe Bètsá chabe entsanga jatšatayama tojašebuachená, mo chèngbe otocana soyca. <sup>12</sup> Y Bèngbe Bètsá chca tojama, bènga ché Cristbeñe natsana imojtsanošbuachenga, cha bènga sochjánatsebacama, tsabe soyènga jtsamèse chamotsiyenama, chca, ché inýe entsanga Bèngbe Bètsabe obenanama cha chamotsatschuanama. <sup>13</sup> Y tsèngaftángnaca, ché ndegombre buayenánana šmojanuena ora, ché Bèngbe Bètsá bènga játsebacama buayenánana, y Cristbeñe šmojtsanošbuaché ora, Bèngbe Bètsá tojanma tsèngaftanga Cristoftaca cányiñe mo canýacá chašmotsemnana y tcmojanainýnaná tsèngaftanga chabe entsanga bétsemnana. Bèngbe Bètsá chca tojanma, Uámana Espiritu tsèngaftangbe ainaniñe cháumashènguama tojanma ora, ntšamo tempo cha tojanašebuachenacá. <sup>14</sup> Bènga ché Uámana Espiritu bèngbe ainaniñe mondbómnayeca, corente mondetatšèmbó ndayá Bèngbe Bètsá chabe entsanga tojašebuachenacá bènga mochjýèngacñama. Uámana Espiritbeyeca bènga montsobena chca puerte tsábá jtsetatšèmbuama, ché Bèngbe Bètsá chabe entsanga nyetsca tescama játsebacama y ntšamo tojašebuachenacá jatšatayama tempo chaóshjanguèntscuana; y lempe ntšamo cha bèngbiamá inétsamama, nyetscanga cha mochántatschuanaye, cha bètsá y obená bétsemnana.

*Pablo Bèngbe Bètsábioye tbojanimpadá, ošbuáchiyènga osertánana chamotsebonnana.*

<sup>15-16</sup> Chcáyeca, atšna, Bèngbe Bètsá tsèngaftangbiamá stseimpadana ora, sempre cha sèndbètsatschuanaye, er atse sènjátatšèmbona ntšamo tsèngaftanga Bèngbe Utabná Jesúsbeñe tša šmojtsobuáchemá, y ntšamo tsèngaftanga nyetsca ché Bèngbe Bètsábenga imomnènga šmababuánýeshanama. <sup>17</sup> Bèngbe Bètsá, Bèngbe Utabná Jesucristbe Taitá, nda corente iuámana, sèntseimpadana cha chaoma Uámana Espiritu chacmèjabuachama, corente osertánènga chašmotsemnana, y chacmínýanjé nda Bèngbe Bètsá yomnana, chca, más tsabá cha chašmotsábuatmama. <sup>18</sup> Atse, Bèngbe Bètsá sèntseimpadana, cha chaoma tsèngaftanga Bèngbe Bètsabe soyènguifè corente osertánana chašmotsebonnana, tsèngaftanga chašmotsetatšèmbuama, ndayá Bèngbe Bètsabeñe jtsobuáchiyèse tsèngaftanga šmojtsobatmancá cha cmochjátatayama. Bèngbe Bètsá tcmojáchembo chábeñe

chca chašmotsobátmanama. Atše cha séntseimpadana, chaoma tsěngaftāgnaca chašmotsetátšēmo tša bētsá y bēts soyēnga yomna ndayá chabe entsānga cha tojašebuachenacá; <sup>19</sup> y chašmotsetátšēmo tša bēts soye y ndocna te ntjēstōpochócama chabe obenana yomnama, chē ndayá bēngbe ainaniñe tšabe soyēnga yojtsama, bēnga chē Crístbeñe ošbuachiyēngbeñe. Cach quem puerte bēts obenana endmēna, <sup>20</sup> ndáyeca Bēngbe Bētsá tojanma Cristo cháuatayenama, y chabe catšbioica celoca tšojtantbema chaotsemándama. <sup>21</sup> Choca Cristo nyētsca soyēnguñe yojtsemándama, y más bētsá obenana y mando yojtsebmoma nyētsca mándayēngbiama, chē mando y obenana bomnēngbiama, y cha yomna más uamaná y bētsá nyētsca chē entsāngbiama mo bētsētsāngcá utabnēngbiama, chēngbe uabaina respētoica jtsichámēse. Cristo puerte bētsá endmēna lempe ntšamo quem luarentše yobínynama y Cristo yochjésabentšana yochtsebinynámna. <sup>22</sup> Bēngbe Bētsá tojama Cristo nyētsca soyēnguñe chaotsemándama, y tšojanábuaiana nyētsca soyēnguñe chaotsemándama, chábeñe ošbuachiyēngbe tšabiama. <sup>23</sup> Cha endmēna nyētsca chábeñe ošbuachiyēngbe mandayá, y chēnga mondmēna mo cachabe cuerpo cuafsemncá. Chēngbe ainaniñe cha endoyena y nyētsca luarēnguñinaca, y lempe cha endēmándama.

## 2

*Atsebácanēnga mondmēna, Bēngbe Bētsá šuababuányēshanayeca*

<sup>1</sup> Tempo tsěngaftanga Bēngbe Bētsabiama mo obanēngcá šmonjamna, er tsěngaftanga šmonjaniyena, ntšamo Bēngbe Bētsá yomandacá ntsamcá, y bētsá bacna soyēnga šmojánama. <sup>2</sup> Chca, tsěngaftanga šmonjánama mo chē nŷe quem luarama enójuabnayēnga monduamancá, y šmonjanēyeunana Satanás, chē bacna espíritēnga obenana bomnēnga y quem luarentša tšbanánoca imonēngbe amēndayá, chē Bēngbe Bētsábioye ndēyeunanēngbe ainaniñe yomána espírítu. <sup>3</sup> Tempo bēnga nyētsca fsēnjaniyena ntšamo tsěngaftanga šmonjaniyencá. Bēnga soyēnga fsēnjánama, nŷe ntšamo ftsjanbošcá nŷe bēngbe cuerpēngbe tšabiama, y nŷe ntšamo bēngbe juabna enjamncá bacna soyēnga jamama. Bēnga fsēnjaniyena soyēnga jtsamēse mo chē Bēngbe Bētsábioye nduabuatma entsānga mondbetsamcá; chē causa bēnga fsēnjanomerecena jtsebmomna chē Bēngbe Bētsabe uabouana castigo, cachcá chē Bēngbe Bētsábioye nduabuatmēngcá. <sup>4</sup> Pero Bēngbe Bētsá sempre tša lastemado entsāngbiama endmēna y sempre corente bēnga sondábabuanŷeshana; <sup>5</sup> y chíyeca, bēnga cabá mo obanēngcá chabiama fsēnjamna ora, bacna soyēnga fsēnjánama causa, chora cha tojanma bēnga tšabe vida chamotsebmomna y Crístoftaca cányñe mo canŷacá chamotsemnana. Bēngbe Bētsá tsěngaftangbe tšabiama juabna bómnyeyeca, bacna soyēnguentšana tcmojatsebacá. <sup>6</sup> Bēnga Jesucrístoftaca cányñe mo canŷacá bētsemnayeca, Cristo Jesús cháuatayenama Bēngbe Bētsá tojanma ora y celoca tšojtantbema ora, enjamna mo bēngbaca chámuatayenama Bēngbe Bētsá cuafjamcá y Cristo Jesúseftaca celoca cuaftatbiámncá. <sup>7</sup> Chca enjamna, Bēngbe Bētsá entsānga cháuinŷanŷema nyētsca joshjanguama tempēnguñe, ntšamo cha bēngbe tšabiama bētsá juabna bētsebmomna, cha Cristo Jesúseftaca bēngbioye tšabe juábnaca sojánanŷe ora. <sup>8</sup> Er Bēngbe Bētsá tsěngaftangbiama tšabe juabna yojánbomnayeca, tcmojatsebacá, Jesucrístbeñe šmojtsanošbuáchema; pero atsebácanēnga šmondmēna, ndoñe cach tsěngaftanga ndayá šmojánmayeca, ndayá atsbocaná jtsemnana endmēna Bēngbe Bētsabe canŷe tšetana soye. <sup>9</sup> Atsebácanēnga šmondmēna, ndoñe cach tsěngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnana. <sup>10</sup> Bēngbe Bētsá šojtabiama ntšamo bēnga mondmēncá, y Cristo Jesúseftaca cányñe mo canŷacá bētsemnayeca, Bēngbe Bētsá mo tsmēma entsāngcá cuaftsatsmēncá šojtabiama, tšabe soyēnga jtsamēse jtsiyenama. Y ndayá bēnga tšabá mondamcá, Bēngbe Bētsá tempo tojanprontá bēnga chamotsamama.

*Crístbeyeca tempcá tšabá Bēngbe Bētsáftaca jtsatsmēnana*

<sup>11</sup> Tsěngaftanga ndoñe judiēnga, ndēmuanŷenga judiēnga cmōndubuatma “chē más delicadentše base bobachtema ndētētšenēnga ca”, chēngcá uinŷnanánēnga ndoñe šmondmēnana; chēnga cachēnga jtšenábobuatmana “chē más delicadentše base bobachtema tētšenēnga ca”, y cachēngbe cuerpēnguñe chca jtsamana. Mēntšá, tsěngaftanga chē ndoñe judiēnga, <sup>12</sup> smochjenójuaboŷe ntšamo tempo šmojamnama, Crístbeñe cabá ndošbuáchiye ora. Chora, tsěngaftanga Cristo ndoñe šmonjánbmoma, Israeloca entsāngbiama stēšoye šmonjanquedana, y ndoñe šmonjantátšēmo lempe ntšamo Bēngbe Bētsá chabe entsānga tojanašebuachenacá. Tsěngaftanga quem luarentše šmonjaniyena ndocnábeñe ntšobatomancá y Bēngbe Bētsá ntšabatmncá. <sup>13</sup> Pero mora tsěngaftanga Cristo Jesúseftaca cányñe mo canŷacá šmontsemna, chē tempo Bēngbe Bētsá ndoñe šmonjanábuatmēnga, y cha tojama chábioye chašmotsábuatmama; y chca yomna, er Jesús, chabe buñe juabuáshanēse, tsěngaftangbiama tojanóbana. <sup>14</sup> Cach Cristo yojtsama bēnga tempcá tšabá Bēngbe Bētsáftaca chamotsemnana. Cha tojama judiēnga y ndoñe judiēnga nyētsca mo cachca entsāngcá

chamotsemnana, mo nda canye tapiëse tojtsendbemcá, chë ndayëseca canye luarentša entsanga tmojtsenjáta, chënga enáyaye causa. <sup>15</sup> Cristo chënga mo cachca entsangcá tojábiama, judiëngbe leyënga y mandënga ndocna obenana chamondëtsebmomnana jamëse. Chca tojama, cha jobanëse, chë útoica entsanga mo nye canye tsmëma entsangcá jábiama, cháftaca cánýiñe mo canýacá jtsemnëse. Cha chca tojanma chënga nyëtsanga tsábá chamotsiyenama; <sup>16</sup> y Cristo cruciëse tojanóbanayeca, cha tojanma chë útoica entsanga enáyayana chamotsajbanama, y tojanma chë útoica entsanga mo canye entsangcá chamotsemnana, chënga tempcá tsábá Bëngbe Bëtsáftaca chamotsatsmënama.

<sup>17</sup> Cristo quem luaroye tojánabo tsabe noticiënga jabábuayenama, tempcá tsábá Bëngbe Bëtsáftaca jtsatsmënama. Cha quem tsabe noticiënga tojanabuayená chë ndoñe judiëngbioye, chë Bëngbe Bëtsá ndoñe smonjanábuatmënga, y chë judiëngbioynaca, chë Bëngbe Bëtsá imojanábuatmënga. <sup>18</sup> Er chábeyeca, canýánýenga y ínýenga montsobena chë Taitábioye jobëconana, er bënga nyëtsanga cachca espíritu bëngbe ainaniñe mondbomna, chë Uámana Espíritu. <sup>19</sup> Chiyeca tsëngaftanga, Bëngbe Bëtsabe entsanguentse ndoñe queśmátsmëna mo inye luarocana ashjajnëngcá, y ni mo cachëngbe yebnentse ndoyenëngcá, tondayama derecho ndbomnënga. Inyëtsá endmëna; tsëngaftanga derecho smondbomna cachcá ntšamo Bëngbe Bëtsabe entsanga mondbomncá, y Bëngbe Bëtsabe básenga smondmëna. <sup>20</sup> Jesucristo y chabe entsanga mondmëna mo canye jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtšbenga ndayíñe chë yebna tojtsëcuatjoncá; tsëngaftanga ošbuáchiyënga smondmëna chë jebna yebnentša soyëngcá, y cach Jesucristo mo chë más uámana luarentse uashacuana ndëtšbecá. <sup>21</sup> Quem más uámana luarentse uashacuana ndëtšbeñe, nyëtsca chë bëtš yebnentša soyënga jtsëcuatjonana, y tsbanánoye más tmojtsjebëse, chë bëtš yebnentše tsëm jebna sóynaca chiñe jtsëcuatjonana. Cachcá Cristo, mo chë más uámana luarentse uashacuana ndëtšbecá, jtsamana nyëtsca chábëñe ošbuáchiyënga cháftaca cánýiñe mo canýacá chamotsemnana, y ínýengnaca cachcá chamotsemnana. Y nyëtsca ošbuáchiyënga Cristoftaca cánýiñe mo canýacá tmojtsenma ora, chënga jtsemnana mo Bëngbe Utabnabiama canye bëtš yebna jebncá, chábioye jtsatschuanayama. <sup>22</sup> Y tsëngaftanga Efesoca ošbuachiyëngbiámnaca Cristo entsama, chë inye chábëñe ošbuáchiyëngaftaca mo canye entsangcá chašmotsemnana. Y chë Uámana Espíritu bëngbe ainaniñe yojtsiyénayeca, bënga nyëtsanga cánýiñe mondmëna, mo canye bëtš yebncá ndayentše Bëngbe Bëtsá yoyena.

### 3

#### *Pablo Jesucristbe trabajo yojanbonýena, chë ndoñe judiëngbeñe jamama*

<sup>1</sup> Chca, atše Pablo utamená séntsemna, Cristo Jesusbiamá soyënga entsanga abuayiynaye causa, tsëngaftanga chë ndoñe judiëngbe tsabiama. <sup>2</sup> Er tsëngaftanga ya cmontsamna jtsetatšëmbuama, Bëngbe Bëtsá tsëngaftangbe tsabiama juabna yobomnana; y chca, chë trabajo atše šojabonýe, tsëngaftangbe tsabiama jamama. <sup>3</sup> Tsëngaftangnaca cmontsamna jtsetatšëmbuama ndayá Bëngbe Bëtsá šojinýinýe, ntšamo cha jamama tempo tojanjuabocá, pero entsanga chca ndoñe tonjaninýanýe, y chë soyama ya batsatema tcbonjubaúbiama. <sup>4</sup> Chašmojualiá ora, smochanjátatšëmbona Cristbe soyënga šosertánama, chë tempo ndocná yonjanábuatma soyënga, <sup>5</sup> chë tempo Bëngbe Bëtsá ndocnábioye tbonjaninýinýe soyënga; pero mora cha tojinýanýe, Jesucristbe ichmónënga nye Bëngbe Bëtsabiama oservénëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espíritoftaca. <sup>6</sup> Ndayá tempo Bëngbe Bëtsá ndoñe tonjaninýanýecá mëntšá endmëna: chë ndoñe judiënga Jesucristbe tsabe noticiënguñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábiocana mochjoshachiñcá, chëngnaca chábíocana mo otocaná chë soye mochanjóyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšačá y chënga nyëtsanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjóyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúseftaca cánýiñe mo canýacá bëtsemnayeca.

<sup>7</sup> Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jtseservënama, tsabe noticiënga entsanga jtsabuayiynayëse; y cha átšëftaca chca tojanma chabe obenánaca. <sup>8</sup> Atše nyëtsca chë Bëngbe Bëtsabe entsanguentše sëndmëna chë más nduamaná; pero Bëngbe Bëtsá bëtš pavor šontsebema, šonjalesencia chë Cristbe bëtšcá tsabe soyënga chë ndoñe judiënga jábuayenama. Chë Cristbe soyënga tša bëtšcá endmëna, y chca, quenátopodena chë soyënguentsana lempe jtsabuatmana. <sup>9</sup> Y chë trabajo šonjabonýe jamama, nyëtsanga botamana jinýama chamotsobenama ndayá Bëngbe Bëtsá yochjama, ndayá cachá, chë nyëtsca soyënga tojamá, tempscana yojanjuabnacá. Mëntscoñama



Bëngbe Bëtsá chë soye ndocnábioye tbonjinjinyé, pero mora aife. <sup>10</sup> Chca, Cristbeñe ošbuáchiyëngbeyeca, mora chë celoca mándayënga y obenana bomnënga, chamobená juabuátmanana nyets osertánana ntšamo Bëngbe Bëtsá yobomncá. <sup>11</sup> Bëngbe Bëtsá chca tojama, ntšamo cachá yojanjuabnacá nyetsca tescama jamama, y chca cha tojama Jesu-crístoftaca, Bëngbe Utabná. <sup>12</sup> Bënga Crístoftaca cánjiñe mo canyáca mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatau-atjca, y corente jtsetatšëmbëse cha ndoñe chašondubatema. <sup>13</sup> Chíyeca atše cbontsaim-padana ndoñe chašmondëtsajbaná ainaniñe añemo bomnana, atše sëntsesufrina causa, er chë tsëngaftangbe tsabiama tsëufrinentšana, tsëngaftangbiamia tsabe soyënga endóbocana.

#### *Cristbe bonshánana*

<sup>14-15</sup> Y chca, Bëngbe Bëtsá, chë Taitá, ndábentšana nyetsca pamíllanga celoca y quem luarentše uabaina imóyëngacañe, chabe delante joshaméntšase, <sup>16</sup> sëntseimpadana, chabe bëtsáca uamana bomnánaca chaoma, tsëngaftanga ainaniñe obenana y bëts añemo chašmotsebmnama, chabe Espíritbeyeca, <sup>17</sup> y tsëngaftanga Crístbeñe jtsošbuáchiyëse, mua tsëngaftangbe ainaniñe chaotsiyenama. Bëngbe Bëtsánaca sëntseimpadana, cha y inyënga nyets ainánaca jtsababuán'yeshanëse, <sup>18</sup> tsëngaftanga y nyetsca Bëngbe Bëtsabe entšangnaca tsëngaftangta, chašmotsobena josértama Cristbe bonshánana tsëngbiamia tsá bëtsáca yomnama. Nderado nda tojontsé chabe bonshánana jatšëmbonana mo canye soye cuafsemncá, cha ndocna te nanjobenaye jtsetatšëmbuana tëntsoye ndayëntscoca yomna y nyanëjoye ndayëntscoca, jashenoye ndayëntscocñe y tsbanánye ndayëntscocñe yomna. <sup>19</sup> Atše sëntseimpadana tsëngaftanga chašmobená chë bonshánana juabuátmanana (chë bonshánana puerte bëtsáca endmëna causa, bënga ndocna te quemochatobenaye josértama ntšamo chë soye lempe yomnana). Pero sëntseboše, tsëngaftangbe ainaniñe nyë Bëngbe Bëtsabe soyënga chaotsemna y tsëngaftanga chašmotsiyena jtsamëse, ntšamo tsëngaftanga chašmotsamama Bëngbe Bëtsá yojuabnacá.

<sup>20</sup> Y mora, nyetscanga Bëngbe Bëtsá chamotsatschuaná. Cha obenana yobomna ntšamo bënga tmojtsojtjanañe o tmojtsejuabnama más soyënga jamama, chabe puerte bëts obenánaca; y chë obenana Bëngbe ainaniñe yojtsemána y yojtsama bënga ainaniñe sempre ošbuáchiyana chamotsebmnama. <sup>21</sup> ¡Entšanga Bëngbe Bëtsá chamotsatschuaná nyets tempo y nyetsca tescama, ndayá Crístbeñe ošbuáchiyënga tmojtsamama y cach Cristo tojamánaca! Chca chaotsemna.

## 4

#### *Uamana Espíritbeyeca bënga cánjiñe mo canyáca jtsemnana*

<sup>1</sup> As, atše chë cárceloye utamená, Bëngbe Utabnabiamia trabájaye causa, tsëngaftanga cbontsaimpadana, ndëmuanjyënga Bëngbe Bëtsá tcmojáchembo chabe entšanga chašmotsemnana, sempre chašmotsiyena mo chë entšangcá ndëmuanjyënga Bëngbe Bëtsá cach soyama tojánachembo y chca imomerecena. <sup>2</sup> Cada ona chamotsenojuabná mo chë inyënga chabiamia más uamanënga tmojtsemncá, y nyetscángbioye puerte bonshanánaca šmochtsobatmana, y bëtsáca bonshánana jtsebmnnëse šmochtseñeuantana; <sup>3</sup> sempre šmochtsejuabnaye y šmochtsentšena tsëngaftanga nyets tempo cánjiñe mo canyáca chašmotsemnana, nyetsca tsëngaftanga natjëmbana jtsemnnëse. Y tsëngaftanga šmotsobena cánjiñe mo canyáca jtsemnana chë Uamana Espíritbeyeca. <sup>4</sup> Bënga Jesucristbeñe ošbuáchiyënga bëtsemnayeca mondmëna mo cach cuerpentšëngcá, chë Crístbe cuerpo, y cachca Espíritu bënga nyetscanga ainaniñe mondbomna. Bëngbe Bëtsá sojáchembo, bënga chábeñe jtsošbuáchiyëse, nyetscanga cachcá sochjátsatayama chamotsobátmanama. <sup>5</sup> Bënga nyetscanga cach Utabná mondbomna, cachca ošbuáchiyana Jesucristbeñe mondbomna, y bënga nyetscanga uabánënga mondmëna chca betsošbuáchiyama. <sup>6</sup> Bënga ošbuáchiyënga nyetscangbiamia cach Bëngbe Bëtsá y Taitá endmëna. Cha Bëngbe amëndayá endmëna, chabe obenana nyetscángbeñe jtsinynana, y nyetsca Bëngbe ainaniñe chabe Espíritu endmëna.

<sup>7</sup> Pero Bënga, cada ona tsëtana obenana tojóyëngacñe, tsabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama. <sup>8</sup> Chíyeca, Bëngbe Bëtsabe uabemana palabreñguñe Jesucristbiamia mëntšá endayana:

Cha celoye tontantsjuá, y cháftaca tonjanëyamba nyetsca chabe uayayënga, chë tojánayëñjananga,

y chabe entšangbioye obenana tonjanatšatá, tsabe soyënga jamama ca.

<sup>9</sup> ¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. <sup>10</sup> Y Cristo, chë tojanastjanguá, cachá endmëna nda celoca chë más tsbanánye tojtantsjuá; chca, canye ora nyëtscañe cha chaotsemnana. <sup>11</sup> Y cachá, chë tsabe soyënga jamama obenana tojanatšatá ora, tojanma chábeñe ošbuáchiyënguentše

chamotsemna inýengna chabe ichmónënga, inýengna Bëngbe Bëtsabe juabna oyebuamb-nayënga, inýengna tsábe noticiënga Cristbiana abuayiyayënga, y inýengna ošbuáchiyënga anyënga y Bëngbe Bëtsabe soyëngama abuátambayënga. <sup>12</sup> Cristo tojanabacacangna chabe entsángbioye mochanjëabuache, cha tojanabanyé trabajo chënga chamotsamama, y nyetsca ošbuáchiyënga, chë nyetscanga cányife mondmëna mo Cristbe cuerpcá, cada te más ošbuáchiyana y bonshánana chamotsebonnama, <sup>13</sup> bënga nyetscanga chamobenantsuana cachca ošbuáchiyana Jesucristbeñe jtsebonnama, y Bëngbe Bëtsabe Uaquifiabiama nyetscanga lempe cachcá jtsetatsëmbuama. Chca, bënga mochanjashjache jtsebonnama lempe ntšamo Cristo yomncá, mo bëtsetsanga bëtscá juabna bomnëngcá, <sup>14</sup> y ndoñe nyë mo basengcá, Bëngbe Bëtsabe soyëngama jtsetatsëmbuama. Chë soyënguife ya ndoñe más nyë mo basengcá quemochátsmëna, ndëmuanyënga paselo jáingñama yomna. Mo canýe barquësha nyë ndaye binýiacnaca tojtsëyambancá, básefta entsanga nyë ndaye buatëmbana soye tmojatuenca jatsyeunanana; bënga ndoñe chca quemochátsmëna, ya ndoñe más bëngbe juabna quemochatsróca, nyë ndaye tmojatuenca tsëm sóyeca, inýengbioye áingñayënga. Chënga becá montsetáttsëmbo ntšamo entsanga jáingñana, y montseboše chë montsabuatambá bostero soyënga bënga jtseyeunanama. <sup>15</sup> Chamna, chë Bëngbe Bëtsabe ndegombre soyëngama bonshanánaca jtsóyeuambnayëse, šontsamna jashjáchana jtsebonnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemandayancá. <sup>16</sup> Mo canýe bestšašcá, chëse jamana nyetsca chë cuerpentša soyënga ndayentše chamueneftnama y chiñe jobónjuama chamotsobenama, chë cuerpo saná chaotsebonnama jtsamëse, chca, nyets cuerpo tsábá chaóbochemá, cachcá Cristo, chë nyetsca ošbuáchiyënga amëndayá, chabe obenánaca jamana chënga cada te más ošbuáchiyana y bonshánana chamotsebonnama. Cada cuerpentša soye tojtsama ntšamo chë soye chaot-samama tomncá, as nyets cuerpo tsábá jobóchana; cachcá, ošbuáchiyënguëntše cada ona tojtsama ntšamo jamama tbojtsemncá, as nyetsca ošbuáchiyënga cada te más ošbuáchiyana mochántsebonna, puerta jtsebonbonshánëse.

*Crístoftaca cányife mo canýacá jtsebonnëse tsëm vida šmochtsebonna*

<sup>17</sup> Mëntsá entsemna ntšamo chontsëtsëtsnácá, y Bëngbe Utabná endmëna nda tojama atše mando chaitsebonnama tsëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jt-siyenana jtsamëse ntšamo cachëngbe ndoservena juabnënga tojtsamëndacá. <sup>18</sup> Chëngbe juabnoca obenana mondbomna nyë ndoñe ndegombre soyëngama josértama. Chënga ndoñe quemátsbomna chë Bëngbe Bëtsábiocana yóbocana tsábe vida, er chënga ndoñe quemat-slesência chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaodómashënguama. <sup>19</sup> Chënga bacna soyënga tmojtsama ora, tondayama ntsenócochinýenana; chënga nyets tempo jesentsénana nyetsca bacna soyënga amana, y chca jtsamana tondayama ntjatenajuabnycá.

<sup>20</sup> Pero chca ndoñe quenjatsmëna ntšamo tsëngaftanga Cristbe soyëngama šmojanatsjinýe y ntšamo chábioye šmojanabuatmancá. <sup>21</sup> Ndegombre tsëngaftanga chabiana šmojanuena y inýenga tcmojanabuatambá mo chábeñe ošbuáchiyëngcá y ntšamo chë ndegombre soyënga Jesucristbeñe endbinýncá. <sup>22</sup> Chcasna, ntšamo tsëngaftanga šmojanjuabná, šmojanentina y šmojanamcá Jesucristbeñe cabá ndošbuachená ora, mora lempe stëtsoye šmochjaquéda; ntšamo tempo tsëngaftanga šmojanjuabná, šmojanentina y šmojanamcá, canýe ondbiamnaye juabnentšana yojóbocana, tsëngaftanga bacna soyëngama juabnëngaca mandánënga jtsebonnëse, y chë juabnënga tsëngaftangbioye cmojáaingñaye. <sup>23</sup> Tsëngaftanga cmontsamna tsëngaftangbe juabniñe tsëm y tsábe juabnënga jtsebonnana. <sup>24</sup> Tsëngaftanga cmontsamna jashjáchana mo tsëmëna entsangcá jtsebonnama, y chë ntšamo tempo šmojanamcá mora ndoñe cachcá chašmondëtsamama. Chca, tsëngaftanga šmochanjashjache jtsebonnama ntšamo Bëngbe Bëtsá yomncá. Bëngbe Bëtsá chca tsëmëna entsangcá tcmojábiana, tsëngaftanga chašmotsiyenama jtsamëse Bëngbe Bëtsabe bominýife tsábá yomna soyënga y chábioye jadórana soyënga, chë ndegombre soyënguëntšana óbocana soyënga.

<sup>25</sup> Chcasna, ya ndoñe más šmattseboštero, ndayá cada ona cháuyana ndegombre soyënga cachacá Jesucristbeñe ošbuáchiyáftaca, er nyetscanga cányife mondmëna mo nyë canýe entsangcá. <sup>26</sup> Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjalesência bënama chacmetëna y ndoñe nyets te chacmondetëna. <sup>27</sup> Ndoñe šmatjalesência Satanás ndayánaca tsëngaftangaftaca chaomama.

<sup>28</sup> Chë yojanatbëbaná chauajbaná atbëbanama y jatrabájama chaontsé; cachabe cu-cuátseca tsábe trabajo chaotsóboma, chca, ndayánaca cha chaotsebonnama chë ujabótënga jatšatayama.

<sup>29</sup> Bacna palabrënga ndoñe šmattsichamo, pero aïne tšabe palabrënga y nŷa chorsca uajabótama palabrënga, chë inŷe entšangbiye jujabuáchama más Cristcá chamotsemnana, chënga Bëngbe Bëtsábiocana tšabe bendicionënga chamóyëngacñama, chë ndayá chašmojtsëtsësná sóyeca. <sup>30</sup> Ndoñe šmattsama soyënga, Bëngbe Bëtsabe Uámama Espiritu chabongmema. Bëngbe Bëtsá tojama Uámama Espiritu tsëngaftangbe ainaniñe cháumashënguama, y chca, tcmojanainŷnaná chabe entšanga bëtsemnayeca, chë yochjóšhango tescama, Bëngbe Bëtsá chabe entšanga nŷetsca tescama yochjatsebacye orscama.

<sup>31</sup> Inŷëngbiana bacna juabnënga ainaniñe ndoñe chašmondëtsebmoma, etonánënga ndoñe chašmondëtsemna, ni inŷëngaftaca ndoñe chacmondetëna. Inŷëngbiye ndoñe chašmondëtsabuachembuana, inŷëngbiye ndoñe šmatjójayánguango y ndaye bacna sóynaca ndoñe šmattsama. <sup>32</sup> Nŷetscángaftaca tšábënga šmochtsemna, nŷetscanga šmochtsenlastemana y šmochjenperdóna, ntšamo Bëngbe Bëtsá, Crístbeyeca tcmojaperdonacá.

## 5

### *Ntšamo yomna Bëngbe Bëtsabe básënga chamotsiyenama*

<sup>1</sup> Tsëngaftanga, Bëngbe Bëtsabe bonshana básënga quetsomñecá, nŷa šmochtsentšëna cachacá jtsemnana. <sup>2</sup> Smochtsiyena nŷetsca soyënga bonshanánaca jtsamëse, ntšamo Cristo šojanababuanŷeshancá; chca, cha chabe derecho vida jtsobomñama cachcá tojanonŷá y bëngbiana tojanóbana. Y ntšamo Cristo tojanmá, yojamna Bëngbe Bëtsábiye jëtšchuyama, y chabe bominŷiñe tša tšabá yojtsemna, mo ndaye ora Bëngbe Bëtsá oyejuayá jóyëngacñana ndayá tcojóbá y altaroca tcojajuinŷese, y chë soye botamana jtsonguëtsiyana.

<sup>3</sup> Tsëngaftanga, Bëngbe Bëtsábënga šmornënga, ndoñe quecmátamna shembása o boyabásafaca bacna soyënga jtsamana, ni chca játamama jtsejuabnayana y jtsebošana, y chë nŷe yapa jësebošana más soyënga inŷëngbiana jtsebmoma cach ndoñe. Ni chë soyëngama ndoñe šmattsóyëbuambnaye. <sup>4</sup> Bacna soye ndoñe šmattsóyëbuambnaye, ni corente ntjenjuaboycá, ni nŷe ntšámnaca bacna soye jenbotatšëmbonana cach ndoñe, er chë soyënga tsëngaftangbiana ndoñe tšabá ntsemnana. Chca játamamna, más tšabá, Bëngbe Bëtsá šmochtsatschuanaye. <sup>5</sup> Er tsëngaftanga ya šmondëtatsëmbo, ndocna chë shembása o boyabásafaca bacna soye amá, ndocna chë nŷe chabe bacna juabnëngaca soyënga jtsamama oyená, o chë nŷe más soyënga inŷëngbiana jtsebmoma bošá y amá (chca jtsayanana chabiana más iuámama soyënga jtsebmomana, Bëngbe Bëtsábiye jatsbobonshánama), chca amënguentsana ndocná tondaye quechatóyëngacñe ndayá Bëngbe Bëtsá chabe entšangbiye jatšatayama tojašëbuachenantšana, Cristo y Bëngbe Bëtsabe amëndayoca. <sup>6</sup> Ndocná chacmondainŷnë ndoñe ndegombre tondmëna palabrëngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábiye ndëyeunanënga yochjácastigaye. <sup>7</sup> Chíyeca, chca amëngbe soyënga tondaye šmattsama.

<sup>8</sup> Tempo tsëngaftanga šmojanienana bacna juabnënga jtsebmomne y bacna soyënga jtsamëse, mo ibetiñe cuafsiyencá, pero mora Bëngbe Utabnáftaca cánŷiñe mo canŷacá bëtsemnayeca, chabe soyënga šmontsetátšëmbo y sempre šmondëtsemna cháftaca, chë entšangbe juabnënga binŷnayáftaca. Smochtsiyena jtsamëse mo chë binŷnayabe entšangcá. <sup>9</sup> Chë binŷnayábeyeca entšanga tšabe soyënga jtsamana, chë Bëngbe Bëtsabe bominŷiñe tšabá yomna soyënga, y ndegombre soyëngnaca. <sup>10</sup> Nŷa šmochtsentšëna soyënga jamama, Bëngbe Bëtsá oyejuayá chaotsemnana. <sup>11</sup> Chë mo ibetiñe cuafsiyencá oyenëngbe bacna soyënga tondayama ntoservénana, y tsëngaftanga chca ndoñe šmattsama. Chamna, chëngbiye šmochjinŷanŷiye chënga ndoñe tšabá tmonjamama. <sup>12</sup> Ndegombre, nŷe chë ndayá chënga mo iytëmcá tmojamama jóyëbuambayama ya cuantsëuatja; <sup>13</sup> pero nŷetsca soyënga binŷiñe tmojacá ora jtsopodénana tšabá jinŷama ntšamo ndegombre tomncá. Cachcá, ntšamo entšanga tmojamcá chë binŷnayá chaojinŷanŷé ora, echantsopodena jtsotatšëmbuama ntšamo chë soyënga yomnana; <sup>14</sup> er ndayánaca binŷiñe tojtsinŷiñe, jtsopodénana jinŷama ntšamo ndegombre chë soye tomncá. Cachcá, ntšamo entšanga iytëmcá tmojtsamcá chë binŷnayá chaojinŷanŷé ora, chënga mochántsetatšëmbo bacna soyënga imojtsamama. Chíyeca mëntšá jtsichámuana:

Botamana cochjájuaboye, aca ndoñe quecátobena jenomándana, mo canŷa cuafsomañcá; chë bacna soyënga ama causa, Bëngbe Bëtsabe bominŷiñe mo obanëngcá imomnënguentsana šmochtsojuánañe,

y Cristo acbe juabnënga echantsebinŷnaye ca.

<sup>15</sup> Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aïne chë chca

soyëngama osertanëngcá. <sup>16</sup> Lempe ntšamo chašmojobenacá nyëts tempo tšabe soyënga šmochtsama, er quem tempo entšanga yapa bacna soyënga montsama. <sup>17</sup> Ntjenjuaboycá ndoñe šmattsama, mo chë ndosertanëngcá. Pero aifñe bëtscá šmochtsentsëna ndayá Bëngbe Utabná jamama yobošcá chacmósertama. <sup>18</sup> Ndoñe šmattsótmenaye, er chë soye entšábioye juanatsana jenomándama ndoñe chaondëtsobenama; chamna, šmochjama Uámana Espiritu sempre y bëtscá tšëngaftangbe ainaniñe chaotsemándama. <sup>19</sup> Smochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espiritu inëtsama tšëngaftanga chašmotsobena jacántama soyëngaca; chca, nyëts ainánaca Bëngbe Utabnabiamama šmochjacántaye y cha šmochtsatschuanaye. <sup>20</sup> Nyëts tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

*Ntšamo yomna canye yebnentsënga chamotsemnana*

<sup>21</sup> Nyëtscanga šmochtsenëyeunana, tšëngaftanga Cristbioye puerte šmorrespetánayeca.

<sup>22</sup> Shémanga, šmochtsatšëmbo tšëngaftangbe boyanga chë yebnentsá mándayënga imomnana; y nyëts tempo chca šmochtsama, Bëngbe Utabná chašmotsoebedecénama. <sup>23</sup> Er boyá endmëna shembe mandayá y inyëná, ntšamo Cristo chë ošbuáchiyëngbe mandayá y inyëná endmëncá. Cha chënga tojatsebacá y mora cha chënga entsamënda, mo chë bestšaë nyëts cuerpo jtsemandayancá; <sup>24</sup> y chca, ntšamo chë ošbuáchiyënga, Cristo chëngbe amëndayá yomnana imotatsëmbcá y chca jtsamana, cachcá, chë shemángnaca entsamna jtsemnana nyëtsca soyënguifñe chëngbe boyángaftaca.

<sup>25</sup> Boyanga, tšëngaftangbe shémanga šmochtsababuányëshana, ntšamo Cristo chábeñe ošbuáchiyënga yojanababuanýeshancá, y chca, chabe derecho vida jtsobomñama cachcá tojanonýá y chëngbiamama tojanóbana. <sup>26</sup> Chca tojanma, chënga chabe entšanga y puerte tšábenga jábiamama; y chënga tmojanenabaye ora, tmojaninýanýe Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnana cha tojanmama. Cha chca tojanma, er chënga chábeñe imojtsanosbuaché, chabiamama buayenana soyënga tmojanuena ora. <sup>27</sup> Cha chca lempe tojanma, chë ošbuáchiyënga japróntayama corente tšábenga y uámanënga cachabiamama chamotsemnana, ndocna bacna soye ndbomnënga, ni ndocna entšá chaondobená jayanama chënga imomna chë ndoñe tšabá tmonjamënga ca, ni ndocna inýe canýca sóyeca. <sup>28</sup> Ntšamo canye boyá cachabe cuerpo endbetsëbobonshancá, cachcá cha bontsemna chabe shëmbioye jtsebobonshánana. Nda chabe shëmbioye tbojtsebobonshana, cachábioye jtsebobonshánana, er chata cánýifñe jtsemnana mo nýe canye entšá cuenta. <sup>29</sup> Er ndocná cachabe cuerpo jtsáboyënjana, ndayá saná janguangoñana y jtsinýenana, ntšamo Cristo bënga chë ošbuáchiyëngaftaca endbetsamcá; <sup>30</sup> er bënga nyëtscanga cánýifñe mondmëna mo chabe cuerpo cuaftsemncá, y bënga mo chabe cuerpentša soyënga cuaftsemncá. <sup>31</sup> Ntšamo Bëngbe Bëtsabe uabemana palabrenguifñe endayancá: “Chiyeca, boyabásca chabe taitá y chabe mamá echanjësabashjuana chabe shëmaftaca jenútanama, y chë útata mo canýcá bochántsemna ca.” <sup>32</sup> Chë soyënga josértama puerte totcá comna, pero atše šcuayana, chë soye entsoyebuambná ntšamo Cristo chábeñe ošbuáchiyëngaftaca yomnana. <sup>33</sup> Pero morna, tšëngaftanga cada ona cachabe shëmbioye chabotsebobonshana, ntšamo cachá iuenobobonshancá, y shema boyábioye ndoñe stëtsoye chabondëquedá.

## 6

<sup>1</sup> Básenga, Bëngbe Utabnáftaca cánýifñe mo canýcá bëtsemnayeca, tšëngaftangbe bëtšëtsangbioye šmochtsayaunana, er chca jamana tšabá endmëna. <sup>2</sup> Moisesbe leyifñe canye mando endmëna, y chentšë endmëna chë Bëngbe Bëtsabe natsana mando, ndayentše cha tojašbuachená tšabe bendicionënga jamama: “Ache taitá y ache mamá ndoñe stëtsoye catjëtsaquédaye, <sup>3</sup> tšabe vida chacuetsobomñama y quem luarentše bayté chacuetsiyenama.”

<sup>4</sup> Taitanga, ndoñe šmattsama tšëngaftangbe básenga chauetënana; más tšabana, chënga šmochtsabéchaye jtsabuátambayëse y jucacánëse, ntšamo Bëngbe Utabná endbetsabuutam-baycá.

<sup>5</sup> Tšëngaftanga, chë nyëts tempo nýe inýabiamama oservënënga, tšëngaftangbe nduiñënga šmochtsayaunana; chca šmochtsama puerte respétoca, bëtscá cuedádoca y nyëts ainaniñe tšabe juabnëngaca, mo cach Cristbioye cuaftseservencá. <sup>6</sup> Y chca chë nduiñëngbioye šmochtsaservena, ndoñe nýe chënga chacmojtšénýa ora, mo nda nýe entšangbe delante tšabá joquédama cuaftsebošcá, ndayá Cristbe oservenëngcá, chënga nyëts ainánaca jtsamana ntšamo Bëngbe Bëtsá tojtsebošcá. <sup>7</sup> Nyëtsca trabajotëmënga šmochtsama nyëts tšëngaftangbe añémoca, mo Bëngbe Utabnabiamama cuaftsetrabajacá, y ndoñe nýe entsangbiamama. <sup>8</sup> Er tšëngaftanga ya šmondëtatsëmbo, cada ona, nyëts tempo nýe inýabiamama trabajayá o nýe

cachabiamana trabajayá tomna, ntšamo tšabe soyënga tojamcá Bëngbe Utabnábiocana yochjójëngacñe.

<sup>9</sup> Y tšëngaftanga, ndëmuanyëngbiamana ínÿenga nyëts tempo imoservena, cachcá tšabá chëngaftaca šmochjamna, tondayama ntšautatjnyëse. Šmochtsenójuabnaye, Bëngbe Utabná chë celoca endmëná, tšëngaftanga y chëngbe mandayá yomnama, y chabiamana nyëtscanga cachcá monduámama.

*Ndayá Bëngbe Bëtsá entšanga tojatsatá Satanabiamana jenëuyanama*

<sup>10</sup> Y morna, Bëngbe Utabnáftaca cánÿiñe mo canÿacá jtsemnëse, ainaniñe bëts añemo šmochtsebmoma, chë Bëngbe Utabnabe bëts obenanentšana óbocana añemo. <sup>11</sup> Mo canÿe soldadcá, ba soyënga jtochëtjuana chë tmojtsentsjananga ora uayayëngbiamana jenëuyanama, tšëngaftángnaca cachcá, nyëtsca chë Bëngbe Bëtsá cmojatsatá soyëngaca šmochtseprontana jenëuyanama, tšëngaftanga jáingñama Satanás ntšámnaca tojtsama ora, ndoñe chaomondáyëñjanama. <sup>12</sup> Er bënga ndoñe quemuatenojuerzana cach quem luarentša entšángaftaca jenëyëñjanama, ndayá bacna espíritënga mando bomnëngaftaca; bacna espíritënga obenana bomnëngaftaca; y quem luarentša entšanga, chë bacna juabna bomna causa y Bëngbe Bëtsabe soyënga nduabuatma causa, mo ibetiñe cuafsoyencá oyena entšángbiöye amëndaye espíritëngaftaca; y chë tsbanánoca luarënguñe imomna y bacna soyënga chaotsebinÿnama ama espíritëngaftácnaca. <sup>13</sup> Chiyeca, lempe ntšamo Bëngbe Bëtsá cmojatsatá šmochjójëngacñe y chë soyënga jtsamëse šmochtsiyena jtseprontánama, mo canÿe soldado jenëuyanama y jáyëñjanama bëtscá soyënga tojtochëtjá. Chca šmochjama, chë uayayá Satanás tšëngaftangbiöye jáingñama chaojtsama ora ndoñe chaomondáyëñjanama, y jenëuyanama lempe jtsamëse, chašmobená cha jáyëñjanama.

<sup>14</sup> Mo canÿe soldadcá, jabuache jtsanayana y cochaca canÿe morocho soye jenácochjatsana jtsevalentíama y ndoñe chamondëyëñjanama, tšëngaftángnaca cachcá, ntšamo ndegombre yomncá jtsamëse šmochtsiyena, mo chë jabuache cuafatsnacá, y chë Bëngbe Bëtsabe bominiñe tšabá yomna soyënga jtsamëse, mo chë morocho soye cochaca cuafjena-cochjatscá, chca, Satanás tšëngaftangaftaca tondaye chaondobená jamama. <sup>15</sup> Mo canÿe soldadcá jtšhecochëtjuana betso jobónjuama jtseprontánama, tšëngaftángnaca cachcá, Bëngbe Bëtsabe obenánaca sempre šmochtseprontana jtsabuayinyanama ntšamo Bëngbe Bëtsá inëtšama entšanga tempcá tšabá cháftaca chamotsatsmënama. <sup>16</sup> Canÿe soldado escudo jtsebmomna chë uayayabe uajuinÿinÿana flechëjuangá chabe cuerpiñe ndoñe chaoduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftebmomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora. <sup>17</sup> Mo chë soldadcá, canÿe morocho buchtšanëse tojtábuchëtšëse chabe bestšaše jenëuyanama, tšëngaftángnaca cachcá, sempre šmochjësejuabnaye Bëngbe Bëtsá cmojátsebacama, y chë juabna cmochanjújabuache, mo canÿe morocho buchtšanëse cuafsabuchëtšancá. Mo canÿe soldadcá, chë uayayábíoye jáyëñjanana, chabe espadéjaca japéliase, cachcá tšëngaftanga, Bëngbe Bëtsabe palabra šmochtsóyeuambnaye Satanás jáyëñjanama. Uámama Espiritu jtsamana, tšëngaftanga Bëngbe Bëtsabe palabra chašmotsebmomna. <sup>18</sup> Nyëts tempo chë Uámama Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábíoye jtsempadánëse. Yeuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jt-sobátmanëse, y Jesucristbeñe ošbuáchiyëngbiamana nyëtscangbiamana cha šmochtsempadana.

<sup>19</sup> Atšbiámnaca Bëngbe Bëtsá šmochtsempadana, atše jóyebuambayama chajontšé ora, cha chë buayenana soye chašúyanama; y atše chayobená tondayama ntjatauatjá jóyebuambayana, y chca, entšanga chayinÿanjé Jesucristbiamana tšabe notiçiënga, ndayá chënga tempo ndoñe monjántatšëmbo. <sup>20</sup> Bëngbe Bëtsá šojichmó mo canÿa chabe cuenta oyebuambnayacá, chë buayenánama entšángbeñe jóyebuambayama, y chca bëtsamama, mora atše utamená sëntsemna. Atšbiamana Bëngbe Bëtsá šmochtsempadana, atše chayobenama Cristbe buayenánama tondayama ntjatauatjá jóyebuambayana, ntšamo atše jamama šojtsemncá.

*Pablo chënga jtadiósoftanama*

<sup>21</sup> Tíquico, Jesucristbeyeca Bëngbe bonshana catšata y canÿe entšá tšabe palabra bomná, Bëngbe Utabnabe trabajo jamama oservëniñe, ntšamo atše stsemnama y ndayá stsamama tšëngaftanga chašmotsetatšëmbuama, lempe cmochanjácuntaye. <sup>22</sup> Chama cha tšëngaftangbiöye sënjichmó, ntšamo muentše ftsemnama chacmëyanama, y tšëngaftanga ainaniñe añemo chašmotsebmomna chaomama.

<sup>23</sup> Atše sëntsempadana Bëngbe Bëtsá chë Taitá y Bëngbe Utabná Jesucristo, chaboma chë Jesucristbeyeca catšátangbe ainaniñe tšabe ebionana chašmotsebmomna, y Bëngbe

Bëtsábioye y ínÿengbioye puerte chašmotsababuányeshanama, Jesucrístbeñe tšëngaftangbe ošbuachiyánaca; <sup>24</sup> y chaboma, chë Bëngbe Utabná Jesucrístbioye bëts bonshanánaca imobobonshanëngbeñe tšabe bendicionënga chaotsemnama, canÿe ndocná yondobena jatrócama bonshanánaca.

## Filipenses

### *Jacheuayama*

<sup>1</sup> Pablo y Timoteo, Jesucristbiamá oservénata, quem tsbuanácha fséntsabiamná Filipos bēts puebloca Bēngbe Bētsabe entšanga imomnēnga, y Jesucristoftaca cānyīñe mo canyācá imomnēngbiamá. Fséntsabiamná nyētsca chē Jesucristbeñe ošbuáchiyēngbiamá, nyētsca chentša uanatsanēngaftaca y chē inye ošbuáchiyēnga ujabuáchanīñe trabajayēngaftaca. <sup>2</sup> Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chaboma tsēngaftangbeñe tsabe bendicionēnga chaotsemnama, y chaboma tsēngaftanga ainaniñe tsabe ebionana chašmotsebonnama.

### *Pablo Bēngbe Bētsábioye tbojtanchuá ošbuáchiyēngbiamá*

<sup>3</sup> Cada tsēngaftangbiamá stenojuabó ora, Bēngbe Bētsá tsēngaftangbiamá sēndbētsatschuanaye; <sup>4</sup> y Bēngbe Bētsá tsēngaftangbe tsabiamá stseimpadana ora, atše corente oyejuayá chca sēndbētsama, <sup>5</sup> ntšamo tsēngaftanga atše šmojuájabuachama, tsabe noticiēnga Jesucristbiamá entšanga abuayinyaniñe, tsēngaftanga Jesucristbeñe jtsošbuáchiyama šmonjanbojatsé orscana y mēntsoñama. <sup>6</sup> Atše corente sēntsetatšēmo, Bēngbe Bētsá tojanbojatsé tsēngaftangbe ainaniñe tsabe soyēnga jtsamama, y más tsabe soyēnga yochtsamama. Y chca yochtsama, lempe ntšamo tsēngaftangbiamá cha yojtsejuabnacá chaochnēnguēntscuana, y chca, Cristo Jesús yochjésabēntscuana. <sup>7</sup> Atše tsēngaftangbiamá sempre ainaniñe sēndbētsenojuabnaye, chiyea atšabiamá puerte tsabá entsemna chca tsēngaftangbiamá jtsējuabnayana. Tsēngaftanga nyētscanga atše šmonjuájabuache jamama chē Bēngbe Bētsá tša tsabiamá bētsemnayeca šonjanēntšabuaché trabajo. Atše chē Bēngbe Bētsabe trabajo sēndbomna jamama, mora sēntsetámena ora o natjēmbana shjoca stsana ora, nyētscángbioye tsabá inyinyniñe chē tsabe noticiēnga ndegombre soyēnga bētsemnama, y bētsá amiñe entšanga chē soyēnguīñe corente chamotsosbuáchemá. <sup>8</sup> Bēngbe Bētsá yotátšēmo ntšamo sēntschamcá ndegombre bētsemnama. Atše tša sēntseboše tsēngaftanga jányama y chontsababuanýeshana cachcá ntšamo Cristo Jesús atše šondbobonshancá. <sup>9</sup> Atše, Bēngbe Bētsá sēntseimpadana tsēngaftanga cada te más cha chašmotsebobonshánama y chē inyēngbioynaca, chca, osertánana chašmotsebonnama ndayá chē ndegombre soye bētsemnama jtsetatšēmbuama, y chašmotsetátšēmo ndayá tsabá o ndayá ndoñe tsabá tondmēnama; <sup>10</sup> y chca, chašmotsobena sempre jabocacayama chē puerte tsabá yojtsemna jamama soye. Chca, Cristo yochjésabo ora, tsēngaftanga puerte tsabe vida šmochántsebonna, bacna soyēngaca ndēmandánēnga; y tondaye quešmochátama, chora chē entšanga chca ndoñe tsabá quenátsmēna ca chamuátichamuama. <sup>11</sup> Y lempe ntšamo chašmojtsamcá ndegombre tsabá echántsemna, y nye Jesucristo endobena jamama entšanga chca chamotsamama. Nyētsca chē tsabe soyēnga echántsemna, Bēngbe Bētsá puerte bētsá y uamaná bētsemnama jinýanýiyama.

### *Atše vida endmēna Cristo jtseservénama*

<sup>12</sup> Jesucristbeyeca atšbe catšátanga, atše sēntseboše tsēngaftanga chašmotsetátšēmo, ntšamo atše tijapasama, más bētsá entšanga Jesucristbiamá tsabe noticiēnguīñe chamotsosbuáchemá tojoservema. <sup>13</sup> Chca, nyētsca chē romanēngbe mandadbe bēts yebna bojanýá soldadēnga y chē inye entšanga quem luarentše montsetátšēmo atše utamená stsemna, atše Cristbiamá tstrabája causa. <sup>14</sup> Atše utamená sēntsemnayeca, ošbuáchiyēnguentšana banga ainaniñe más añemo montsebonna, y chiyea chēnga Bēngbe Bētsabe palabra más y más añēmoca y tondayama ntjatauajcá entšángbioye montsabuayinyá.

<sup>15</sup> Ndegombre entsemna, báseftanga Cristbiamá entšángbioye imojtsabuayinyá, pero chēngna nye ntšamo tijashjachcá šmojtsántšabošama chca, y chēnga imojtseboše, bētsá jtsamēse, atše chayotjáyanama; chiyea chca imojtsama. Pero inyēngna, entšángbioye montsabuayinyá tsabe soyēnga inyēngbiamá jamama ndegombre imojtsebóseyeca. <sup>16</sup> Mēnga chca montsama, atše šmondbobonshánayeca y Bēngbe Bētsá chē trabajo šojanēntšabuáchemá mondētátšēmboyeca, Jesucristbiamá tsabe noticiēnga ndegombre bētsemnama entšanga jtsinýanýanayana; <sup>17</sup> pero chē inyēngna chca imojtsama, ndoñe tsabe soyēnga inyēngbiamá imojtsebóseyeca, ndoñe chēnga chē inyēngbiamá tsabe soyēnga imojtsebóseyeca. Chēnga Jesucristbiamá imojtsoyebuambná nye entšanga chēnga chamotsarrespetánama, y nye cachēngbiamá tsabe soyēnga jtsebonnama imojtsebóseyeca. Chēnga jtsējuabnayana mochjobenaye jamama atše más chašotsengmēnama ca, muentše utamená chjēftsemnēntscuana, chēnga entšángbioye chca tmojtsabuatambá ora. <sup>18</sup> Pero žndayase chē soye atšbiamá? Masque ntšámnaca, tsabe soyēnga inyēngbiamá tmojtseboše o

ndoñe, Cristbiamá montsoyebuambná, y Cristbiamá chēnga montsoyebuambnama atše oyejuayá sēntsemna.

Y cabá más chanjōyejuaye, <sup>19</sup> er atše sēntsetatšēmo quem utámenentšana atše chjésebocnama. Atše sēntsetatšēmo muentšana chjésebocnama, tsēngaftanga Bēngbe Bētsá šmoimpadánayeca y Jesucristbe Uámana Espiritu šuajabuachánayeca. <sup>20</sup> Atše corente jtsōshuáchiyēse Bēngbe Bētsábeñe sēndobátmana, atše ndocna te tondaye chanjēftsema y chama chjaisēuatjama, pero aīñe nyētscangbe delante becá aīñemoca chayoyebuambá, y nyēts tempo pero más mora, lempe ntšamo stsamama y stsichámuama, atše chaima entsānga chaminjānyēma Cristo puerte bētsá y uamaná bētsemnama, y chca chāntsama masque ainá o obaná chaitsemnēse. <sup>21</sup> Chca entsemna, er atšbe vida Cristo jtseservénama endmēna, y nderado atše chajōbanēse, nyētscanga puerte bēts soye mochanjēftsashjache. <sup>22</sup> Pero atše ainá stsemnēse, chanjobenaye más uámana trabajo Cristbiamá jēftsemama. Chiyeca, atše ndoñe corente quetsátstātšēmo ntšamo mora jobuáyanana, ainá jtsemnama o ndoñe. <sup>23</sup> Ndegombre mora puerte šontsētēmmana ntšamo jobuáyanana: atše tša sēndboše ndoñe más quem luarentše ntjēftsemnana, Crístoftaca jtsatsmēnama, y ndegombre chca atšbiamá puerte tsábá nántsemna; <sup>24</sup> pero, inyoicana tsēngaftangbiamá šontsemna ainá jēftsemnana. <sup>25</sup> Atše corente sēntsetatšēmo chca ndegombre yochtsemnama, y chiyeca sēntsetatšēmo atše cabá ainá chjēftsemnama, tsēngaftanga jujabuáchama más Jesucristbeñe chašmotsošbuáchema, y chiñe bētsá oyejuayana chašmotsebmnama. <sup>26</sup> Chca, atše tsēngaftanga jutsētsayama choye chajá ora, chašmobená inye soyama más Cristo Jesús jtschuayama.

<sup>27</sup> Morna, chē más uámana soye entsemna, tsēngaftanga chašmotsama ntšamo jtsiyenama ntšamo chē Cristbiamá tsabe noticiēnguiñe endayancá. Y mēntšá, cachcá, jutsētsayama chajá o ndoñe, atše chāntsetatšēmo tsēngaftanga Jesucristbeñe ošbuáchiyama ndoñe šmontsajbanama, y aīñe becá ošbuáchiyana chábeñe šmotsobomñama; nyētscanga cachcá šmojtsejuabnáyeca y nyētscanga cach soye šmojtsebošeyeca, cányiñe nyētscanga enutanánēga jtsenojuerzánēse, ndocná chē tsabe noticiēnguiñe tsēngaftanga šmobomma ošbuáchiyana chacmondábuajuanama. <sup>28</sup> Tsēngaftangbe uayayēngbiamá tondayama šmattsauatja, sempre bētsá aīñemo šmochtsebmomma. Chca tsēngaftanga šmochanjínjānyīe chēnga pochocánēga mochtsemnama, y tsēngaftangna atsebácanēga šmochtsemnama. Y chē soye Bēngbe Bētsá tsēngaftangbiamá echāntsama, Cristbeñe šmosbuachéyeca. <sup>29</sup> Chca echanjopása, er Bēngbe Bētsá tsēngaftangtaftaca puerte tsabia endmēna, Cristbiamá oservénēga Bēngbe Bētsá tcmojábiamá, pero ndoñe nyē chábeñe chašmotsošbuáchema, ndayá chabiamá chašmosufrimnaca. <sup>30</sup> Tsēngaftanga y atše cachca soyama montsenojuerzana. Tsēngaftanga ya šmonjinjē ntšamo atše sēnjānenojuerzana, entsānga jinjānyiyama chē tsabe noticiēnga ndegombre soyēnga bētsemnama. Y mora, tsēngaftanga noticiēnga šmochanjōyēngacñe ntšamo atše cach soyama cachcá stsamama.

## 2

*Ndoñe uámanēnga šmattsenobiamnaye, ntšamo Cristo ndoñe tonjanmca*

<sup>1</sup> Tsēngaftanga, Crístoftaca cányiñe mo canýacá jtsemnēse, ainaniñe bētsá aīñemo šmontsebmomma. Cristo cmondábabuanýeshana, y chē soye tsēngaftanga cmontsējabuachana nyētsca trabajēnguentšana tsábá jabocanama. Y tsēngaftanga Cristbe Espítoftaca cányiñe mo canýacá šmontsemna; tsēngaftanga nyētscanga šmondénbobonshana y nyētscangbiamá jóngmiamá šmondauamana. <sup>2</sup> Tsēngaftanga lempe chca šmobómnayeca, atše corente oyejuayá šmochjábema, er tsēngaftanga nyētscanga cachcá cányiñe šmondējuabná, cachcá nyētscanga šmondénbobonshana, nyētscanga mo canýe ainancá šmondómomma, y nyētscanga cachca soye šmondboše. <sup>3</sup> Tondaye šmattsama nyē inýenga chē sóyeca chamotsejuabnana, o nyē tsēngaftanga tša bēts soyēnga amēnga šmomna ca entsānga chamotsejuabnama; pero ndoñe yapa uámanēnga šmojtsemna ca šmochtsejuabnaye, y cada ona chaotsejuabná chē inýenga bēngbiamá más uámanēnga imomnama. <sup>4</sup> Y ndocná tondaye chaondétsama, nyē chabiamá tsabe soyēnga jónýenama, sinó ndayánaca chaotsama nyētscangbiámnnaca tsabe soyēnga jónýenama.

<sup>5</sup> Tsēngaftanga cmontsamna jtsemnana ntšamo cach Cristo Jesús yojanjuabná y yojanamcá:

<sup>6</sup> Cha nyēts tempo yomna cach Bēngbe Bētsá y uamaná cach Bēngbe Bētsá, pero masque chca, ndocna te yonjanjuabná:

“Atše sēntseboše nyētsca entsānga nyēts tempo atše chašmotserrespetana, ntšamo atšbe Taitá Bēngbe Bētsá mondérrespetancá ca.”

<sup>7</sup> Pero cha mo nduamanacá tonjanóbema, nyētsca chabe bomna soyēnga jēftsebošjonēse, y ndegombre, mo canýe oservenacá tojanóbema.



Cha canýe entšacá tojanonýná,

y entšanga canýe ndegombre entšacá tmojáninýe.

<sup>8</sup> Cachá tojanlesenciá nduamaná jtsemnama,

y sempre Běngbe Bětsábioye ibnayeunana, y jobanámna, cruciñe jóbaneše.

<sup>9</sup> Ndayá cha tonjanmama, Běngbe Bětsá, chě celoca más uámama luare tbojaninýinýe

y chě más uámama uabaina, chě más bětsětsangbe uabainěguentša uabaina tbojabuajo;

<sup>10</sup> y chca, celoca imomnēnga, y quem luarentše y fshantše jashenoye imomnēngnaca nyětsanga chamóshamentšema,

Jesúsbioye jětschuayama, chabe uámama uabaina jayaněse;

<sup>11</sup> y chca, nyětsanga chamuayana Jesucristo chěngbe Utabná yomna ca,

chca, Běngbe Bětsá chě Taitá nyětsanga chamotsatschuanama.

*Cristbeñe ošbuachiyēnga entsamna mo buashinýinýana estrellēngcá jtsemnana*

<sup>12</sup> Chcasna, atšbe bonshana catsátanga, ntšamo atše tšěngaftangftaca sěnjamna ora, atše sempre šmonjaněyeunancá, mora más šmochtsatěnyeunana, mora atše tšěngaftangbiama bēnoca stsemna ora. Bětsětsanga ntjatenobiamnacyá y Běngbe Bětsá jtserrespetānēse šmochtsama soyēnga, chca, tšěngaftangbe tšabe videntše, Jesucristbeñe ošbuachiyēnga quet-somñecá, tondaye chacmondětsabuáshebenama; <sup>13</sup> er Běngbe Bětsá nyěts tempo tšěngaftangbe ainaniñe inětsama tšěngaftanga ndayánaca chašmotsebošama y chašmotsamama, ntšamo cha yoyuabná y yobošcá chaotsemnana.

<sup>14</sup> Ndayánaca jamama chacmojtšějaboto ora, chě soye šmochjama, chca jamama yapa totcá comna ca ntjatichamcá y inýengftaca jabuachana ntjatenatsětsnaycá.

<sup>15</sup> Chca cmontsamna, chca, tšěngaftanga šmojtšama soyēnguñe ndocná ndocna bacna soye chaondinýenaca, y puerte tšabe vida chašmotsebošnama. Běngbe Bětsabe puerte tšabe basengcá šmochtsiyena, tšěngaftanga chě šmojtsemnēnga canýe luarentše puerte bacna entšángbeñe y sempre bětscá bacna soyēnga jtsamana uamanēngbeñe. Chiyecna, tšěngaftanga šmochtsiyena puerte tšabe soyēnga jtsamēse, y chca tšěngaftanga šmochántsemna mo canýe ibetiñe luarentše buashinýinýana estrellēngcá. <sup>16</sup> Chě tšabe soyēngaca entšángbioye chaurinýanýe ntšamo muanjobenaye tšabe vida jtsebošnama. Chca chašmojamēse, Cristo cachiñe yochjésabo ora, atše chantsobena tšěngaftangbeyeca puerte oyejuayá jtsemnana, er ntšamo chašmojamcá echanjínýanýiye atše ndoñe nýe bonamente jabuache tijatrabajá. Chca atše chántsemna mo nda bětscá tojoprontá, y chentšana inýengftaca tojótjajo ora, chěngbioye tojtsayēnjanacá. <sup>17</sup> Mo chě altaroca canýe bachna buiñe tojuabuashanacá, Běngbe Bětsá jětschuayama tmojóba ovesháftaca, cachcá nderado echántsemna atšbe buiñe, atše šmojbóse, chca, Běngbe Bětsábioye oyejuayá jabemama. Tšěngaftanga bětscá šmojalemošná, Cristbeñe tša šmošbuacheyeca, y tšěngaftangbe ošbuachiyānēnaca endmēna Běngbe Bětsábioye oyejuayá jabemama. Chě uta soye echántsemna mo chě buiñe y chě oveshacá, Běngbe Bětsábioye oyejuayá jabemama. Atše chca stjobanēse, puerte oyejuayá stsemna, y stjama tšěngaftāngnaca cachcá chašmotsóyejuama. <sup>18</sup> Chca, tšěngaftanga cmontsamna oyejuayēnga jtsemnana, y šmochjama átsnaca oyejuayá tšěngaftangftaca chaitsemnana.

*Timoteo y Epafrodito*

<sup>19</sup> Atše becá ošbuachiyānaca Běngbe Utabná Jesúsbeñe jtsobátmanēse, sěntsejuabná pronto chjobenaye Timoteo tšěngaftangbioye jíchmuama, tšěngaftangbiama chašuabocuéntama, y chca, atše más añemo chaitsatsbošnama. <sup>20</sup> Er nýe cha endmēna canýa cach atscá ainaniñe juabnáyá, y cha ndegombre puerte entseboše tšěngaftanga tšabá chašmuetsiyenama; <sup>21</sup> chě inýengna nyětsanga nýe cachēngbe tšabiama ndayánaca jamama jtsejuabnayanaya, y tondaye ntsebošana Jesucristbiama jamama. <sup>22</sup> Pero cach tšěngaftanga ya šmondětatšēmbo, ntšamo Timoteo chě padecena soyēnguentsana tšabá tonjětsobocñama, y ntšamo Timoteo y atše, mo canýe uaqiñá chabe taitábioye cuafstajabuachancá, cányñe fsějantrabájá, más bětscá entšanga chě tšabe noticiēnga chamóyēngacñama. <sup>23</sup> Chcasna, atše sěntsobátmana cha jíchmuana, ntšamo átšeftaca jopásama chaitsetátšēmbo y cachora; <sup>24</sup> pero bětscá ošbuachiyānaca sěntsobátmánayeca, sěntsejuabná, Běngbe Utabná chašojtábocnēse, pronto átsnaca chjobenaye choye jama.

<sup>25</sup> Atše sěntsejuabná yojtsemna, Jesucristbeyeca bēngbe catšata Epafrodítnaca choye jíchmuana, nda átšeftaca cányñe endētrabájá y chě tšabe noticiēnga ndegombre soyēnga bēsemnana jinýanýiyama endenojuerzana, nda tšěngaftanga šmojanichmó atše chašuabēuájabuachama. <sup>26</sup> Cha chanjíchmu; cha puerte entseboše tšěngaftanga jánýama, y yapa ngménaca entsemna, cha šocá enjamnama šmojátatšēmbonama. <sup>27</sup> Y ndegombre cha šocá enjamna, y enjětsinýna mo jtsobanamcá; pero Běngbe Bětsá thonjalastemá, y ndoñe nýe chábioye sinó átsbioynaca, atše ndoñe más ngmenanēnga chayátsbošnama, ntšamo mora sěntsebošama. <sup>28</sup> Chiyeca atše más sěntseboše cha pronto jíchmuana, as

tšəngaftanga cha chašmojtinje ora, puerte oyejuayənga chašmotsemnana, y atše ndoñe yapa chašondətsengmenama. <sup>29</sup> Smochjofja nyets oyejuayánaca, Bəngbe Utabnábeyeca catšátanga quetsomñecá; y nyets tempo chacá aməngbioye mo bətsətsangcá šmochtsətabna, <sup>30</sup> er batšatema más y matənjətsobana, Cristbiamma trabajayinje uajabuachaniñe. Cha chə trabajo tonjanma atše juajabuáchama, ntšamo cach tšəngaftanga ndoñe chešmatanobenacá, atše juajabuáchama.

### 3

#### *Ndayá Pabləbiamma ndegombre corente yojanámana*

<sup>1</sup> Y morna, atšbe catšátanga, ndayá Bəngbe Utabná tojamama móyejuanga. Ndoñe bacá quešnatámana, ntšamo chə inje tsbuanáchañe tcbonjanəbuabiamcá cachcá cachiñe jtəťyanama; y chə soye bətscá cmochanjúbuache ndoñe resjuinje chašmondətsemnana. <sup>2</sup> Cuedado šmochtsebomna chə ndoñe tsabe entšangbiamma, mo quešəngcá imomnənga, chə puerte bacna soyənga mondbətsamənga, y entšangbe más delicadentše base bobachtema jatəťsana uamanənga; <sup>3</sup> er bənga mondməna y ndoñe inyənga, chə ndegombre uinýnanánana bomnənga, bənga Bəngbe Bətsabe entšanguentšənga bətsəmnama, bənga chə Uámana Espiritbe uajabuáchenanaca Bəngbe Bətsá mondadóránama, bənga chə Cristo Jesúseftaca cánýinje mo canýacá bətsəmnama mondbətsəyejuama, y bənga chə ntšamo inyənga monduamancá bəngbe cuerpiñe jamama tondayama yondoservénama mondbətsəjuabnayama.

<sup>4</sup> Masque atše razón səndətsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chə soyənga yoserverna ca jtsejuabnayama, ndegombre atše chabiamma más razón chama stšóbomñe. <sup>5</sup> Sənjanonýná y posufta tianoye base bobachtema chə más delicadentše šmojanťetše; atšbe nyets uta bətsətsata Israeloca entšanguentšata bonjamna, y atšna Benjaminbe bəts pamillentsá səndməna; atšbe tempsca bəts taitanga nyetscanga hebreunga imnamna. Atšna fariseo sənjamna. Atše sənjánama, lempe ntšamo judiəngbe leyənguiñe endayancá, ndayá jamama sojanmencá. <sup>6</sup> Atše tsə sənjánboše Bəngbe Bətsá jtseservénama, chíyeca Jesúseñe ošbuáchiyənga bətscá sənjanečamenana; y ndayá canye entšá ibnətsəmnna jtsamama, Bəngbe Bətsabe bominiñe tsəbia jtsemnana, judiəngbe ley jtsocumplínese, chama ndocná tondaye quenjátsbomna jayanama, atše ndoñe tsabá səntsánama ca.

<sup>7</sup> Pero lempe chca ntšamo atše sənjamnama y ndayá sənjánamama, puerte sənjanjuabná atšbiamma puerte yojanámana ca; pero mora, Cristo atšbe ainaniñe tonjámašəngoyeca, chə soyənga atšbiamma y ndoñe quenatámana. <sup>8</sup> Y cabá más, tondaye atšbiamma quenatámana, chə bəts soye jtsonýayəše, Cristo Jesús, Bəngbe Utabná jtsabuatmana. Chábeyeca, lempe chə nje quem luarentša soyənga sənjesəboshjona, y lempe chə soyənga atšbiamma tondayama quenátoserverna; y chca entsemna, chə bəts soye jəťtsashjáchama, Cristo jtsabuatmana, <sup>9</sup> y cháftaca cánýinje mo canýacá jtsemnana. Atše ya ndoñe quetsatsngú Bəngbe Bətsabe bominiñe tsəbia jtsemnana, nje ntšamo atše tijamama chə judiəngbe ley jtsocumplínese, pero Cristbeñe jtsəšbuáchiyəse aine; Bəngbe Bətsá entsama atše chabe bominiñe tsəbia chaitsemnana, atšbe bacna soyəngama jtseperdónase, y lempe chca entsemna atše Cristbeñe səndošbuachéyeca. <sup>10</sup> Atše səntseboše ndayá cha jtsabuatmana, chə obanənguentšana tojtanayenama cha tojaninýanýe obenana atše chaitsebomnana, atše cháftaca cánýinje mo canýacá chaitsemna ora; y ntšamo bənga jatsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnana; <sup>11</sup> y ntšámnaca, atše jəťtsashjáchama Bəngbe Bətsá chaoma atše chaitayenama.

#### *Yeuana jtsentšəñese, Bəngbe Bətsábicocana uacanánana josháchiñama*

<sup>12</sup> Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tsəbia Bəngbe Bətsabe bominiñe stsemna ca, pero sempre natsanoye səntsá, mo nda canye luaroye jashjanguama cuaťtsəchamancá; y puerte jtsəšbuáchiyəse səntsəbátmana atše chjobenaye jtsemnana, chə ndayama Cristo šojanchembo, er Cristo Jesús ya tonjama atše chabiamma chaitsemnana. <sup>13</sup> Atšbe catšátanga, atše ndoñe quetsátichamo chca ya tijashjache ca. Pero chama canye soye səntsama: chə tempo atše sənjánbomna y sənjánama soyənga, mora lempe stəťsoye sənjaquedá, y bətscá səntsama jobenayama chə jashjanguama yojtsemnoye jashjanguama, <sup>14</sup> chə ndémoca yojtsemna jashjanguama luaroye jobenayama jashjanguama, mo nda canye luaroye jashjanguama ndayánaca juácana bətscá jenojuérzase cuaťtsəchamancá. Cachcá, átšnaca səntsá chə Bəngbe Bətsá šojtsachembuana uacanánana josháchiñama, Cristo Jesúsbeyeca; y chə uacanánana entsemna chə nyetsca tescama yomna tsabe vida jtsebomnana.

<sup>15</sup> Chca bənga šontsamna jtsejuabnayana, chə Jesucristbeñe puerte ošbuáchiyana y nyets tempo cha ústonənga; y nderado tšəngaftanga ndayiníncana inýetsá šmojatsjuabná ora, Bəngbe

Bětsá chě sóynaca tšabá cmochanjínjanyie. <sup>16</sup> Pero morna šontsamna jtsiyenana ntšamo mēntscoñama Běngbe Bětsabe soyēngama sojosertacá.

<sup>17</sup> Jesucristbeyeca catšátanga, ntšamo atše sēndmēncá tšēngaftanga šmochtsemna, y chě ntšamo jtsiyenama tchbonjaninjanýecá imojtsiyenēngbioye šmochtsēnyaye. <sup>18</sup> Ntšamo chochanjauyancá, ya ba soye tchbonjáuyana y mora cachiñe chca chanjayana, pero chca jayanamna atše puerte ngmēnaca sēndbētsemna. Banga mondmēna, y chēnga ntšamo vida imojtsebomnama montsinjínýná, lempe ntšamo Cristo chě cruciñe jóbanēse bēngbiana iuayancá contra chēnga imojtsemnama, <sup>19</sup> y chēngbioye nyetsca tescama in-fiernoca mochāntsapochocaye. Chēngbiana chě más uámana soye yojtsemna jtsamana ntšamo cachēnga tmojtsebošcá, nýe cachēngbe cuerpiñe tšabá jtsomñama. Chēnga nýa mo bēts soye cuafjamcá jtsemnana chě soyēnga tmojtsama ora, pero ndegombre chēnga entsamna cach soyēngama jtsēuatjama; y chēnga sempre jēsejuabnayana chě nýe quem luarama enójuabnayēngbe soyēngama. <sup>20</sup> Chě cuenta bēngna, ndegombre celocama entsānga mondmēna, y mora montobcátmana, chě luarocana chauabo bēngbe atsebacyá, Bēngbe Utabná Jesucristo. <sup>21</sup> Cha bēngbe cuerpēnga, chě pronto jopochócama cuerpēnga echanjátrocaye, jtsemnama mo chabe cuerpćá, chě obanēnguentšana tojtayenabe cuerpćá; y cha chca echanjama, cha puerte obenana lempe jtsemāndayama bómnyeca.

#### 4

*Bēngbe Utabnáftaca cānyñe mo canýacá jtsemnēse oyejuayana jtsebomnana*

<sup>1</sup> Chcasna, Jesucristbeyeca atšbe catšátanga, Bēngbe Utabnábeñe ošbuáchiyana ntjajbanacá, y puerte chábeñe jtsosbuáchiyēse, cháftaca cānyñe mo canýacá šmochtsemna. Corente chondábabuanýeshana y tša sēntseboše tšēngaftanga jányama. Tšēngaftangbeyeca atše puerte oyejuayá sēntsemna, y atše corente sēndbētsoyejuaye tšēngaftangbiana ínýēngbioye jáuyanama.

<sup>2</sup> Evodia sēntseimpadana y Sintiquenaca, chata chabuatenóyeunama, mo Bēngbe Utabnábeñe ošbuáchiyata quetsomñecá. <sup>3</sup> Y ácnaca, nda puerte tšabá átseftaca tconjatrabáj, chontseimpadana choma chě shembásata chacújabuachama, er chata bētsćá átseftaca tbonjatrabájá tšabe noticiēnga entsānga abuayinayañe. Clemente y inýe entsānga átseftaca tmonjatrabájá cach soye amiñe. Nyetsca chēngbe uabaina entsábemana chě librēsañe, ndayentše yojtsábemana chě tšabe vida mochjónýenēngbe entsāngbe uabaina.

<sup>4</sup> Sempre oyejuayēnga šmochtsemna, Bēngbe Utabnáftaca cānyñe mo canýacá jtsemnēse, y cachiñe šcutétayana: ¡Móyejuanga! <sup>5</sup> Nyetscanga chamotsetátšēmo, tšēngaftanga tšabe juabna bomnēnga šmonnama. Bēngbe Utabná jésabama tempo ya entsobeco.

<sup>6</sup> Tondayama šmattsenócochinýena, pero cada Bēngbe Bětsáftaca chašmojtsencuēnta ora, ndayá cmojtsējabotama cha šmochjaimpáda. Y chca chašmojtsama ora, chánaca sochtsatschuanaye. <sup>7</sup> Chca, Bēngbe Bětsá echanjama chě chabe ainaniñe tšabe ebionana tšēngaftanga chašmotsebomnama; chě tšabe ebionana puerte bētsćá endmēna, y bēnga entsānga quetsomñecá ndoñe ntsobenana chama jósertana; y chca tšabe ebionánaca, tšēngaftangbe juabnēnguñe y ainaniñe tondayama quešmochátenocochinýena, er tšēngaftanga cānyñe mo canýacá Cristo Jesúseftaca šmondmēna.

*Lempe ntšamo tšabá yomncá soyēngama jtsejuabnayana*

<sup>8</sup> Cabana, atšbe catšátanga, lempe ntšamo ndegombre yomncá soyēnguñe šmochtsejuabnaye, lempe chě respeto yomerecēniñe, nyetsca soyēnguñe entsāngbe bominiñe tšabá yomniñe, nyets tempo corente tšabá yomniñe, nyetsca soyēnga entsānga yogusetániñe, y lempe chě ndayama entsānga tmojtsejuabná tša iuámana ca soyēnguñe. Lempe chě tšabá yomna soyēnguñe y jtsatschuanayama yomna soyēnguñe šmochtsejuabnaye.

<sup>9</sup> Sempre šmochtsama chě átšbentšana šmojuábouinýe soyēnga, chě atšbiajana šmojóyēngacñe soyēnga, chě atše šmojoyeuná soyēnga y ntšamo šmojinýcá atše jtsamana. Chca šmochtsama y Bēngbe Bětsá, chě bēnga ainaniñe tšabe ebionana chamotsebomnama amá, tšēngaftangftaca echāntsemna.

*Pablo tojtanacheuá tmojanájabuachama*

<sup>10</sup> Atše corente sēndoyejuá Bēngbe Utabnáftaca cānyñe mo canýacá tsmēnama, er tšēngaftanga ba ishinýe chentšana, cachiñe šmojatobená atše jatiniñiyana ntsachetšá atšbe tšabiana tšēngaftangbiana iuámanana. Chca, atše ndoñe quetsátichamo tšēngaftanga atšbiana cmojtsanebnětjomba ca, ndayá ntšamo tšēngaftanga tšabá šmojuabnacá atše jinýinýiyama ndoñe yonjanopodena ca. <sup>11</sup> Atše chca, ndoñe quetsátichamo uajabotá stsemna ca, er atše sēnjuatsjinýe sempre oyejuayá jēftsemnana, nýe ndaye soyñe masque batšatēmnaca stsebomnēse. <sup>12</sup> Atše sēndētátšēmo ntšamo yomna jtsiyenana chě vida jtsebomnama uajaboto soyēnga tojtsashbenēse, y ntšamo yomna jtsiyenana chě tcuajabótama más bētsćá

jtsebmōnēse. Atše tijuatsjinjē oyejuayá jtsemnana masque nje ndaye soyēnguifnāca stsemna ora, jasama bētsá stsebmōna ora o masque nje shēntseca jtsemnana šoitsemna ora, atše jtsiyenama bētsá soyēnga stsebmōnēse o masque ndōfnāca. <sup>13</sup> Atše lempe chca sēndobena, atše obenana jtsebmōnama Cristo endbētsamayeca. <sup>14</sup> Masque chcasna, tšēngaftanga tšabá šmonjama, atše padecena soyēnguifne sēnjamna ora atše juajabuáchana.

<sup>15</sup> Tšēngaftanga, chē Filipos pueblocā Jesucristbeñe ošbuáchiyēnga, corente šmondētatsēmo, Macedonia luarentšana sēnjēftsānbocna ora, nje tšēngaftanga atše šmonjanájabuachama; inje ošbuáchiyēnga ndoñe. Chora enjamna atšbe bojatšena tempo tšēngaftangbe luarentše chē tšabe noticiēnga entšanga abuayiyenayifne; y nje tšēngaftanga atše šmonjanájabuache. <sup>16</sup> Ba soye atše Tesalónica pueblocā sēnjamna ora, y chašmuájabuachama šonjanájaboto ora, tšēngaftanga atšbe opresidēngama crocēnana šmonjanafja. <sup>17</sup> Chca ndoñe quenátayana atše tsjuabná nje tšēngaftangbentšana ndayānaca jójēngacñama ca; chē sóyeca atše sēntseboše ndayá tšēngaftanga más tšabe soyēnga chašmotsamama, Bēngbe Bētsá tšēngaftangbiamā más chaotsóyejuama. <sup>18</sup> Er atše ya lempe sēnjójēngacñe, y chē šuajabótama cabá más sēntsebmōna. Atše chē ntšamo šjuajabotcá lempe sēntsebmōna, chē tšēngaftanga Epafrodítóftaca šmonjanichmó soyēngaca. Ndayá atše šmojanichmocá, Bēngbe Bētsabe bominyifne puerte tšabá entsemna, mo juatšēmbonama ndayá tcojóba y altaroca tcojajuinýe y botamana tojtsonguētšecá, chora cha oyejuayá chca jójēngacñana. <sup>19</sup> Atšbe Bētsá, chabe bētsá uamana y bēts bomnānaca, echanjama tšēngaftanga lempe ntšamo cmējabotcá Cristo Jesusbajana chašmójēngacñama. <sup>20</sup> Entšanga nyets tempo chamotsinýanýná Bēngbe Bētsá y Bēngbe Taitá puerte uamaná bētsemnana. Chca chaotsemna.

#### *Chēnga jtadióšoftanama*

<sup>21</sup> Atšbe cuenta, nyetscanga chē Jesucristbeyeca Bēngbe Bētsábenga imomnēnga šmochjácheuaye. Atšeftaca montsemna Jesucristbeyeca catšátangnaca cmontsacheuaná. <sup>22</sup> Nyetscanga chē muentše Bēngbe Bētsábenga imomnēnga, y más chē romanēngbe mandadbe bēts yebnoca oyenēnga, cmontsacheuaná.

<sup>23</sup> Atše sēntseimpadana Bēngbe Utabná Jesucristo, chaoma tšēngaftangbeñe tšabe bendicionēnga chaotsemnana.

## Colosenses

### *Jacheuayama*

<sup>1</sup> Atse Pablo, Jesucristbe ichmoná Bèngbe Bètsá chca yobóseyeca, y Jesucristbeyeca bèngbe catšata Timotéoftaca, <sup>2</sup> quem tsbuanácha sèntsabiamná chë Colosas puebloca Bèngbe Bètsábenga imomnèngbiamna. Tsèngaftanga bèngcá Jesucristbeñe ošbuáchiyènga šmondmèna, y chca, Jesucristbeyeca bèngbe catšatanga. Atse sèntseimpadana Bèngbe Bètsá Bèngbe Taitá, chaoma tsabe bendicionènga tsèngaftangbeñe chaotsemnama, y chaoma tsèngaftangbe ainaniñe tsabe ebionana chašmotsebmnama.

### *Pablo, Bèngbe Bètsábioye tbojanimpadá Colosas puebloca ošbuáchiyèngbiamna*

<sup>3</sup> Bèngbe Bètsá, Bèngbe Utabná Jesucristbe Taitá tsèngaftangbiamna fstseimpadana ora, cha sempre fchandbètsatschuanaye, <sup>4</sup> er bènga fsènjátatsèmbona ntšamo tsèngaftanga Cristo Jesúsbeñe tša šmojtsošbuáchemna, y ntšamo tsèngaftanga nyètscanga chë Bèngbe Bètsábenga imomnènga šmababuányeshanama. <sup>5</sup> Natsanama, chë ndegombre buayenánama, chë tsabe noticiènga, tsèngaftanga tcmojanabuatambá ora, tsèngaftanga botamana šmojanuena ntšamo chë buayenániñe bejtsayancá, chë tsèngaftanga šmojtsobena tsabe soyama jobátmana, Bèngbe Bètsábeñe jtsošbuáchiyese. Chë šmontsobatmana soye entsama tsèngaftanga Jesucristbeñe puerte chašmotsošbuáchemna y nyètscanga chašmotsababuányeshanama. Bèngbe Bètsá celoca enduaquécjná chë tsèngaftanga šmojtsobatmana tsabe soye. <sup>6</sup> Chë tsèngaftanga tcmojanabuayená tsabe noticiènga más bètsá entšanga montsuenana; y chca, nyets quem luarentše entšanga montsiyena más tsabe soyènga jtsamése. Chca entsemna ntšamo tsèngaftangbeñe tojopasacá, chë natsana te chë tsèngaftanga Bèngbe Bètsabe tsabiánama šmojanuena orscana, y ntšamo Bèngbe Bètsá puerte bonshanánaca y tsabiánaca bèngbioye šuanyenama ndegombre cmojanosérta orscana. <sup>7</sup> Y chca Epafra tsèngaftanga tcmojanabuatambá, Bèngbe Bètsabe bonshánama y tsabiánama. Epafra endmèna canýa bèngaftaca Cristbiamna oservená, y cha bènga fsèndbobonshana; cha Cristbiamna endëtrabája bèngbe cuenta tsèngaftangbentše. <sup>8</sup> Cha šonjáuyana ntšamo chë Uámana Espiritu yojtsama, nyètscanga Jesucristbeñe ošbuáchiyèngbioye chašmotsababuányeshanama.

<sup>9</sup> Lempe ntšamo tsèngaftangaftaca tojopasama, chë natsana te tsèngaftangbiamna fsènjauena orscana y mentscoñama, Bèngbe Bètsá sempre tsèngaftangbiamna fchandbètseimpadana, cháftaca fstsencuènta ora. Bèngbe Bètsá fsèndèimpadana, chabe Espiritu chaoma tsèngaftanga chašmotsobena jtsetatšëmbuana y jtsoertánana, chca, ntšamo Bèngbe Bètsá yobošcá chašmotsamama, tsèngaftanga tsábá chašmotsetatšëmbuama. <sup>10</sup> Y chca, tsèngaftanga šmochantsobena jtsiyenana jtsamése ntšamo Bèngbe Utabná yobošcá, y sempre šmochantsama ntšamo chabiamna tsábá yomncá. Ntšamo tsèngaftanga chašmojtсийencá tsabe soyènga jtsamése, chentšana nyetsca tsabe soyènga echanjóbcna, y tsèngaftanga más tsábá Bèngbe Bètsá šmochantsábuatma. <sup>11</sup> Atse, Bèngbe Bètsá sèntseimpadana, chabe puerte bètsá obenánaca cha chaoma tsèngaftangbe ainaniñe bèts añemo chašmotsebmnama; y chca, tsèngaftanga chë padecena soyènguiñe chašmojtsemna ora, puerte uantadènga chašmotsebmnama, y ainaniñe añémoca Bèngbe Bètsábeñe becá chašmotsobátmanama. <sup>12</sup> Y puerte oyejuayènga Bèngbe Taitá šmochantsatschuanaye, nda iuama bènga chamotsobena ntšamo cha chabe entšanga jatšatayama tojašebuachenacá jtsebmnama. Tsèngaftanga šmochanjóyèngacñe ntšamo cmojtsètocancá celoca, chë corente buashinýinýana luarentše. <sup>13</sup> Bèngbe Bètsá bènga šojatsebacá, Satanás, chë ibetiñe luarentša mandayabe cucuatšentšana, y tojama chë chabe bonshana Uaquiñabe amèndayana bèngbe ainaniñe chamotsebmnama; <sup>14</sup> chábeyeca Bèngbe Bètsá Satanásbe cucuatšentšana šojatsebacá; o mēntšá, chábeyeca Bèngbe Bètsá bèngbe bacna soyènga šojtsaperdoná.

### *Cristo tojanóbanayeca, entšanga Bèngbe Bètsáftaca tsábá jtsatsmènana*

<sup>15</sup> Cristo tmojaníniñe ora, bènga tmojántatsèmbona ntšamo Bèngbe Bètsá yomnana; entšanga imojobena cha jinýama, pero Bèngbe Bètsábioye ndoñe. Cha, chë Bèngbe Bètsabe Uaquiñá, ya natsana yojtsemna lempe chë Bèngbe Bètsá tojanma soyèngama; y cha lempe chë soyèngama más uamaná endmèna. <sup>16</sup> Chábeyeca Bèngbe Bètsá tojama lempe ntšamo celoca y quem luarentše yobinýncá, lempe ntšamo chë entšanga imobena o ndoñe mondobena jinýama soyènga, y chë espíritèngnaca chë imobena inýèngbioye jtsamèndayana y obenana imobomna. Bèngbe Bètsá, chábeyeca y chabiamna tojama, lempe ntšamo quem luarentše yobinýncá. <sup>17</sup> Bèngbe Bètsá cabá nyetsca soyènga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnama yojamncá. <sup>18</sup> Cha endmèna nda nyètscanga Bèngbe Utabnábeñe ošbuáchiyènga iuamènda, ntšamo

chë bestšaşe nÿetsca chë cuerpentša soyënga jtsemandayancá. Cha endmëna nda iuama ošbuáchiyënga tsëm tšabe vida chamotsebmomnama, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mochtsatsmënënguentsana, cha chë natsaná chaotsemnma; nÿe cha canýa chë más uámana luare chaotsebmomnama, nÿetscañe chaotsemándayama. <sup>19</sup> Er Bëngbe Bëtsá yojanjuabná cachabiamna tšabá yojamna, lempe ntšamo cha yomncá, chabe Uaquiñábeñnaca chaotsemnma, <sup>20</sup> y Bëngbe Bëtsá tojánbošena, Crístbeyeca nÿetsca soyënga quem luarentše y celoca, cháftaca tempcá tšabá chaotsatsmënema. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma nÿetsca soyënga quem luarentše y celoca, cháftaca tempcá tšabá chaotsatsmënema.

<sup>21</sup> Tempo, tšëngaftanga Bëngbe Bëtsá stëtsoye šmojanquedá y chábioye uyayënga šmojanma, bacna soyënga šmojanjuabná y šmojánama causa; <sup>22</sup> pero mora chabe Uaquiñáftaca, cha mo canýe entšacá jóbanëse, Bëngbe Bëtsá tojama tšëngaftanga tempcá tšabá cháftaca chašmotsatsmënema; y chca tojama, tšëngaftanga chabe delante nÿets tempo chašmotsemnma; chora tšëngaftanga, chabe entšanga, ainaniñe ndocna bacna soye ndbmomnënga chašmotsemnma, y ndocná chaodayana ntšamo šmojamcá ndoñe tšabá yontsemna ca. <sup>23</sup> Pero tšëngaftanga cmontsamna chë bëtscá ošbuáchiyana šmondbmomnana nÿets tempo jtsebmomnana, Bëngbe Utanábëñe jtsošbuáchiyama ndocna te ntjabanacá. Nÿets tempo chë tšabe noticiënguñe šmochtsosbuáchiye, y ndoñe šmatjaleséncia ndocná tšëngaftangbe ošbuáchiyana chaotrocama; y nÿe chca puerte jtsošbuáchiyëse Bëngbe Bëtsábeñe šmochtsobátmana, ntšamo tšëngaftanga šmojanmá, Jesucristbiamna buayenánama šmojanuena ora. Chë buayenánana endmëna ntšamo ba entšanga nÿetsca quem luarentša entšángbioye tmojabuayenacá, y atšbe trabaje endmëna cach tšabe noticiëngama entšanga jtsubuayiynayana.

*Pablo, ošbuáchiyënga jasérviaa trabaje tmojanbonýe*

<sup>24</sup> Atše corente sënjesoyejúa mora tšëngaftangbiamna jasúfriama stsobenama. Ba entšanga entsamna jasúfriana Cristo jasérviaa, y atše sëntsesufrina ntšamo Cristo tojansufricá, mora atše jtseusufrinëse chabe cuenta, ntšamo jasúfriama yomncá. Y ntšamo sëntsesufrincá entsemna Crístbeñe ošbuáchiyëngbe tšabiamna, chë chabe cuerpcá imomnënga, chënga Crístbenga bëtsemnma. <sup>25</sup> Bëngbe Bëtsá atše šojábema chë Jesucristbeñe ošbuáchiyëngbe canýe ujabuachaná. Cachá chë trabajuama šojanábuayana, chca jamëse, tšëngaftangbe tšabiamna chaotsemnma. Chë trabaje endmëna, lempe ntšamo cha tojayancá entšanga jábuayenana. <sup>26</sup> Bëngbe Bëtsá nÿetsca entšanga ndoñe tonjanaleseña, quem luare jobojátšama orscana y nÿets tempo chë buayenánama chamotsetatšëmbuama; pero mora, chábenga imomnënga chë soye cha tojinýanyé. <sup>27</sup> Bëngbe Bëtsá yoboše, chabe entšanga imomnënga chamotásbuatmama ndayá tempo chënga ndoñe tonjaninýanyécá; y yoboše chë ndoñe judiënga jinýanyiyama tša bëts y tšabe soye yomna chë ndegombre buayenánana, ndayá tempo inýenga ndoñe tonjaninýanyécá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojtsiyena, y chábëñe puerte jtsošbuáchiyëse šmojtsoberna jtsobatmanana, Bëngbe Bëtsá puerte bëtsetsanga y uámanënga chácmabiamama, batšá ntšamo cachá yomncá. <sup>28</sup> Bënga nÿetscángbioye Jesucristbiamna fchandbëtsabuayiynaye; fchandbëtsetsëtsnaye ndayá chënga ndoñe yontsamna jtsamana, y fšëndbëtsabuatambaye nÿets osertánánaca ndayá chënga aiñe yojtsamna jtsamana, y chca, nÿetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguñe, chënga Crístotaca canýiñe mo canýacá jtsemnëse. <sup>29</sup> Chca chaotsemnma, atše bëtscá šëndëtrabája; y chca sëntsama, chë Cristo yojtsama atše chaitsebmomnama bëts obenánaca.

## 2

<sup>1</sup> Atše sëntseboše tšëngaftanga chašmotsetatšëmbo, Bëngbe Bëtsá becá tsimpadánama, tšëngaftangbioye jubabuáchama, chë Laodicea puebloquënga Jesucristbeñe ošbuáchiyënga y nÿetscanga chë ndocna te atše šmonjinýe ošbuáchiyëngnaca. <sup>2</sup> Atše chca sëndama, tšëngaftanga y chënga ainaniñe bëtš añemo chašmotsebmomnama, y canýiñe mo canýacá chašmotsemanama, nÿetscanga jtsebmomnshánëse. Chca, nÿets osertánana tšëngaftanga chašmotsebmomnama, y chë tempo Bëngbe Bëtsá entšanga ndoñe tonjaninýanyé buayenánama chašmotsetatšëmbuama, y chë buayenánana Crístbe soye entsemna. <sup>3</sup> Mo canýe bëtscá bomnana iytëmena soyá pero mora ya uinýenana, cachá Crístbeñe entsemna nÿets osertánana y obenana Bëngbe Bëtsá jtsubuatmama. Chë soye tempo Bëngbe Bëtsá entšanga ndoñe tonjaninýanyé, pero mora Cristo yojtsama bënga chë uámana soyënga chamotsebmomnama. <sup>4</sup> Atše chca sëntsichamo, botamana palabréngaca ndocná chacmondáingñema. <sup>5</sup> Er masque choca tšëngaftangata atše ndoñe quetsátsmëna, atšbe

ainana aíñe choca tsëngaftangafata entsemna; y atše puerte sëntsoyejuá tsëngaftanga şmatenëyeunana y nyets tempo Bëngbe Bëtsábeñe şmojtsosbuáchema.

*Cristofata canýiñe mo canýacá jtsemnëse, entsanga ndegombre tsabe vida jtsebmna*

<sup>6</sup> Tsëngaftanga Jesucristbeñe oşbuáchiyënga şmojanóbiam ora, şmojanayana: “Cristo Jesús, Bëngbe Utabná entsemna ca”. Chcasna, tsëngaftanga cmontsamna jtseyenana soyënga jtsamëse mo chë cháftaca canýiñe mo canýacá tojtsemnacá. <sup>7</sup> Chca şmontsobena jamana, cháftaca canýiñe mo canýacá nyets tempo jtsemnëse. Smochtsiyena jtsamëse ntşamo cha tojabuatëmbacá y cada te más chca. Cabá más şmochtsoşbuáchie chë Cristbiama buayenana soyëngama, ntşamo tcmojabuatambacá; y Bëngbe Bëtsá sempre şmochtsatschuanaye.

<sup>8</sup> Cuedado şmochtsebmna, ndoñe şmatjaleséncia ndocná chaondëtsamama tsëngaftanga jtsajbanama Cristbeñe oşbuáchiyana jtsebmna. Chca entsanga montseboşe juabnëngaca tsëngaftanga jáingña, nye básefta entsangbe juabnënga y tondayama ndoservena juabnënga. Chë juabnënga jtsóbocanana ntşamo bëts taitanga básengbioye mondbetsabuátambayentşana y chë espíritëngbentşana, ndëmuanýengbiama entsanga jtsejuabnayana chënga nyetsca soyënguñe imomána ca; pero Cristbentşana chë juabnënga ndoñe ntsóbocanana.

<sup>9</sup> Cristo endmëna cachcá ntşamo Bëngbe Bëtsá yomncá, masque mo canýe entsacá quem luarentşe yojëtsiyena; <sup>10</sup> y Bëngbe Bëtsá tojama tsëngaftanga ndegombre tsabe vida chaşmotsebmna, Cristofata canýiñe mo canýacá bëtsemnayeca; y Cristo, nyetsca chë mándayënga y obenana bomnëngbiama más uamaná endmëna. <sup>11</sup> Tsëngaftanga Cristofata canýiñe mo canýacá bëtsemnayeca, mo uinýnananëngcá şmontsemna, tsëngaftanga Bëngbe Bëtsabe entsanga şmomnana. Quem uinýnanánana ndoñe quenátsmëna mo chë más delicadentşe base bobachtema tmojatëtscá, cach entsángbeyeca ntşamo judiënga monduamancá, pero aíñe entsemna cach Cristo nda tcmojauinýnaná; y chë uinýnanánana entsemna, tsëngaftangbe ainanentşana Cristo bacna juabnënga jabuajuánayana. <sup>12</sup> Tsëngaftanga şmojanenabaye ora, enjamna mo ntşamo cach Cristo tmojanatbontsacá tsëngaftanga utebuantsánënga cuaftsemncá, er tsëngaftanga şmojanajbaná jtsamana chë tempo şmojánama bacna soyënga; y ntşamo Cristo cháuatayenama Bëngbe Bëtsá tojamcá, cachcá, tsëngaftanga şmojanenabaye ora, enjamna mo tsëngaftanga chaşmatayenama Bëngbe Bëtsá cuafjamcá, er mora tsëngaftanga mo tsmëma entsangcá şmondoyena. Chca tojanopasá, Bëngbe Bëtsá obená bëtsemnana tsëngaftanga şmojtsosbuáchema, y chë obenana tojama Cristo cháuatayenama.

<sup>13</sup> Inye tempo tsëngaftanga Bëngbe Bëtsabiama mo obanëngcá şmojamna, yapa bacna soyënga jtsamama şmojanamana causa y uinýnanánënga mo Bëngbe Bëtsabe entsangcá ndoñe şmonjámnayeca, pero aíñe şmojanamana bacna soyënga jtsamana nye ntşamo şmojanboşcá. Morna Bëngbe Bëtsá tojama tsëngaftanga tsabe vida chaşmotsebmna, Cristofata canýiñe mo canýacá jtsemnëse, y Bëngbe Bëtsá bëngbe nyetsca bacna soyënga şojtsaperdoná. <sup>14</sup> Mo nda ba ndebëñënga tojtsabamna y chama tsuanachangá tojtsamna y chiñe tojtsayana chënga obligaciönaca imojtsemna chë ndebëñana pronto jtohocana ca, pero chë entsá chëchangá tojtsandbiama chë entsanga cha ndoñe más chamondëtsendebeñama, Bëngbe Bëtsá cachcá tojama, bacna soyëngama bënga şojtsaperdoná ora. Jesús Bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebëñana tojtsanpochocá cuenta. <sup>15</sup> Jesucristo cruciñe tojanóbana yeca, Bëngbe Bëtsá tojanayëñaná Satanás y chabe bacna espíritënga obenana bomnënga y inýengbioye amëndayënga; y nyetsca entsangbe delante tojaninýanyé cha chënga jtsamëndayama yobenama, mo canýe reyca chë inýënga tojayëñaná ora, chabe entsangafata natsana jtsayana y chë ayëñanánënga ústonoye.

*Ainaniñe becá jtseboşana chë oşbuáchiyëngbiama celoca yomna soyënga*

<sup>16</sup> Ndoñe caso şmattsabiamnaye, ndoñe tsabá şmontsama ca inýënga tsëngaftangbiama tmojtsichamo ora, ndayá tsëngaftanga şmëtsesaye o şmëtsosfëşenayama, o ndayá aíñe o ndoñe şmondëtsamama Bëngbe Bëtsá jadórana fiestënga ora o shbojueta fiesta ora, o jóchna tese. <sup>17</sup> Baytë entsemna, Bëngbe Bëtsá entsangbe cucuatşinë chë mandënga tojáboshjona, chë soyëngama bënga jabuátambama. Chë mandëngaca Bëngbe Bëtsá yojaninýanýnaye ndayá más chcoye jopásama; entsángbioye yojaninýanýnaye ndayá Cristo yochjanmama. <sup>18</sup> Báseftanga mondmëna y chënga mo nduamanëngcá entsángbeñe jtsebínýana, pero tsoye cachënga corente uámanënga jtsenobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso şmattsabiamnaye, tsëngaftanga ndoñe tsabá şmontsama ca chënga tmojtsichamo ora, ntşamo chënga tmojtsichamcá tsëngaftanga ndoñe şmontsámayeca. Chënga jtsichámuana bëts soyënga mo otjenayoquécá tmojinýe ca, y nye cachënga puerte jtsenábotamnayana, pero chca chamotsamama razón ndoñe quemátsbmna, er nye ntşamo

inŷe entšanga imnetsejuabnaycá chéngnaca cachcá jtsejuabnayana. <sup>19</sup> Chénga Jesu-crístofata cányíŷe ndoŷe tmonjoquedanga, y Cristo endmēna chē nŷetsca ošbuáchiyēngbe amēndayá, mo chē bestšaše nŷets cuerpo jtsemandayancá. Canŷe cuerpiŷe chē bestšaše jtsamana nŷets cuerpo chaóbochemá, ntšamo Bēngbe Bētsá tojtsebošcá, chē cuerpo ndayá jasama chaotsebonnama jtsamēse, y nŷetsca chē cuerpentša soyēnga chamenefjanama jtsamēse. Cachcá, Cristo jtsamana nŷetsca ošbuáchiyēngbe cányíŷe mo canŷacá cháftaca chamotsemnana, y cada te más tšabá cha chašmotsábuatmama.

<sup>20</sup> Cristo tojanóbana ora enjamna mo tšēngafatngnaca cuafjobancá, y Bēngbe Bētsá tšēngafatnga cmojatsebacá chē quem luarentše imománda espíritēngbe cucuatšentšana. As, itšēngafatnga ndáyeca šmojtšiyena jtsamēse mo chē nŷe quem luarama enojuabnayēngcá? ¿Ndáyeca tšēngafatnga cabá šmoberdecena chca mandēnga, mo: <sup>21</sup> “Chē soye ndoŷe matsbanana, chca soye ndoŷe catjase, o chē soye acbe cucuatšeca ndoŷe catjaca ca?” <sup>22</sup> Lempe chē mandēnga, chē ndayá canŷa ndoŷe bontsemna jamana, nŷe soyēngama jtsayanana, y tempo tojochnēngo ora, chē soyēnga jtsopochócana y chora tondaye ntšamanana. Chē mandēnga jtsemmnana nŷe ntšamo entšanga mondbetsamcá y ínŷēngbiye mondbetsabuatambaycá. <sup>23</sup> Ndegombre, ba entšanga jtsejuabnayana chē mandēnga tmojamēngbiana, puerte osertanánaca chca tmojama ca, pero ndegombre chca ndoŷe quenátsmēna; er chēnga jtsichámuana, ntšamo Bēngbe Bētsá jadórana yomncá imojtsabuatambá ca, jtsabuatambayana entša cabnmēna uamaná ndoŷe ntse nobiamnayana ca, y jabuache cachabe cuerpoca jtsamana ca. Pero chē mandēnga tondaye ntšamanana, er chē mandēnga entšangbe ainanentšana ndoŷe ntjajuánana chē bacna soyēnga jtsamama juabnēnga.

### 3

<sup>1</sup> Cristo cháuatayenama Bēngbe Bētsá tojanma ora, enjamna mo tšēngafatngnaca Crístbeŷe ošbuáchiyēnga, chašmatayenama cha cuafjamcá. Chíyeca, tšēngafatngbe ainaniŷe puerte šmoctseboše ndayá Bēngbe Bētsá celoca tšēngafatngbiana yobomncá; y choca, Cristo uámana puestentše endētbemana, Bēngbe Bētsabe catšbioica. Y šmoctšinŷinŷenaye chca šmojtsebošama, ntšamo jtsamēse mora šmojtšiyenama. <sup>2</sup> Tšēngafatnga nŷets tempo chē celoca soyēngama šmoctsejuabnaye, ndoŷe chē nŷe quem luarentše yomna soyēngama. <sup>3</sup> Tšēngafatnga Crístofata cányíŷe mo canŷacá jtsemmēse, jtsemmnana mo tšēngafatnga ya cuafjobancá, er mora ya ndoŷe quešmátiyena tempcá jtsamēse. Cristo, Bēngbe Bētsáftaca cányíŷe mo canŷacá endmēna, y Cristo endmēna nda mora tšēngafatngbe vida yojtsinŷena. <sup>4</sup> Ndegombre, Cristo endmēna nda endama tšēngafatnga tšabe vida chašmotsebonnama; y quem luarentše cha cachíŷe chaojtonŷná ora, tšēngafatngnaca chentše cháftaca šmoctšantsemna, y chora ntšamo Cristo corente uamaná y bētsá yomnama Bēngbe Bētsá yochjinŷanŷiyicá, tšēngafatngbiámnaca echanjinŷanŷiye más bētsétsanga y uamanēnga šmojtsemmnana.

#### *Tempscá vida y morsca vida*

<sup>5</sup> Tšēngafatnga, ntšamo chē nŷe quem luarama enójuabnayēnga mondbetsebošcá bošana lempe šmoctšajbaná. Ndocná chaondētseboše ndaye bacna soye boyabása o shembásafata jtsamana, ni chca soyēnguifŷe ndoŷe chaondētsejuabná; ndoŷe chaondētšiyena nŷe ínŷēngbiana bacna juabnēnga jtsebonmēse, y ndoŷe chaondētseboše nŷe bētscá soyēnga ínŷēngbiana más jtsebonmama, er chca jtsamana jtsayanana, chabiana más yojtsámama soyēnga jtsebonmama, Bēngbe Bētsá jatsbobonshánama. <sup>6</sup> Er entšanga mondmēna y chēnga chca soyēnga jtsamama jtsebošana, y Bēngbe Bētsá ndoŷe ntseyeunanana. Chca entšangafatnga Bēngbe Bētsá puerte bochanjetna, y echanjamánda chē uabouana castigo chēngbeŷe chaotsemnana. <sup>7</sup> Y tempo, tšēngafatnga šmojaniyena jtsamēse, sempre nŷe chca bacna juabnēngaca, <sup>8</sup> pero mora tšēngafatnga cmontsanna lempe quem soyēnga stētsoye jaquédana: ínŷēngafatnga jetnana, ínŷēngafatnga rábiaca jtsemmnana, ínŷabioye ntšamo jáborlama jtsebošana, ínŷēngbiye joyánguanguana, y ndoŷe tšabe palabrēnga jtsóyeuambayana. <sup>9</sup> Ndoŷe šmattsenbuambnaye, er ntšamo tempo šmojanmncá mora tšēngafatnga ya ndoŷe cachcá quešmátsmēna, y mora ndoŷe quešmátiyena jtsamēse ntšamo tempo šmojanamcá. <sup>10</sup> Y mora tšēngafatnga šmojashache jtsemmnana mo tsmēma entšangcá, y ntšamo tempo šmojanamcá ndoŷe cachcá quešmátama. Bēngbe Bētsá chca tsmēma entšangcá tmojábiana; y cha nŷets tempo yojtsama, tšēngafatnga cada te más ntšamo cha yomncá chašmotsemmnana, chca, corente tšabá cha chašmuábuatmanama. <sup>11</sup> Chíyeca, ndayá Bēngbe Bētsá tojamama, ndoŷe judiēnga y judiēnga cachcanga mondmēna; chē más delicadentše base bobachtema tētsenēnga ndoŷe más uamanēnga quemátsmēna chē ndoŷe chca mondmēnēngbiana; chē inŷe luarēngocana áshjajnēnga, bēn tjoye oyenēnga, chē nŷe ínŷabiana nŷets tempo oservēnēnga y chē cachēngbiana trabájayēnga, nŷetscanga



cachcanga mondmëna. Chë nÿe ndayá iuámana endmëna Crístbeñe jtsosbuáchiyana y nÿetsca oşbuáchiyënge ainaniñe cha yojtsemna jtsemándayama.

<sup>12</sup> Tsëngaftanga Bëngbe Bëtsábenga şmondmëna. Cha cmondábabuanÿeshana y tcmojabacacá chabe entşanga chaşmotsemnama; chiyea, tsëngaftanga cmontsamna ínÿenga jtsinÿanÿnayana nÿetscangbiamá jóngmiamá şmuamanama, tsábe juabna ínÿengbiamá sempre şmnéteşebomnama, cada ona chë ínÿenga chabiamá más uámanënga cuaftsemncá innéteşjuabnayama, nÿetscanga puerte bonshanánaca şmnétsënÿayama, y nÿetsca pade-cena soyënguñe corente uantadënga şmomnama. <sup>13</sup> Nÿetscanga şmochtsenëuantana y şmochjenperdoná, nderado ntşamo nda ínÿabioye tbojaborlá y chama cha tbojtsatsëtsná ora. Ntşamo Bëngbe Bëtsá tsëngaftanga tcmojaperdonacá, tsëngaftángnaca cachcá ínÿenga şmochjáperdonaye. <sup>14</sup> Lempe chë soyëngama más enduámana nÿetscanga jtşenbobon-shánana. Nÿetscanga şmojtsenbobonshánëse, tsëngaftanga şmochantsobena sempre lempe chë ínÿe soyënga corente tsábá jtsamana, ntşamo ndegombre chë soyënga jamama yomncá. <sup>15</sup> Crísto endama tsëngaftangbe ainaniñe tsábe ebionana chaşmotseşebomnama. Chë tsëngaftangbe ainaniñe tsábe ebionánaca şmochtsiyena nÿetscanga natjëmbana, Jesu-crístbeñe oşbuáchiyënga quetsomñecá. Bëngbe Bëtsá tcmojáchembo tsëngaftanga nÿetscanga cánÿiñe mo canÿe cuerpcá chaşmotsemnama, y chca, natjëmbana chaşmotsiyenama. Bëngbe Bëtsá sempre şmochtsaşchuanaye.

<sup>16</sup> Chë Crístbe puerte tsábe buayenana soyënga tsëngaftangbe ainaniñe nÿets tempo şmochtsambaye. Nÿets osertanánaca şmochtsenbuátëmbaye y şmochtsenbuayiyinaye. Nÿets ainánaca şmochjacánta chë Salmos librëşañe uabemana cantënga, chë Jesucristbe soyëngama cantënga, y chë Bëngbe Bëtsabe Espíritu iuama tsëngaftanga chaşmotsobena jacántama soyënga; chca şmochjama Bëngbe Bëtsá jëtschuanaye. <sup>17</sup> Y lempe ntşamo chaşmojtsama o chaşmotsichamcá, Bëngbe Utabná Jesúşbeñe oşbuáchiyënga quetsomñecá chca şmochjama, sempre Bëngbe Bëtsá Bëngbe Taitábioye, chábeyeca jtsaşchuanayëse.

#### *Ntşamo ínÿengaftaca jtsiyenama*

<sup>18</sup> Shémanga, şmochtsatşëşbo tsëngaftangbe boyanga chë yebnentşa mándayënga imom-nama, y nÿets tempo chca jtşeuabnayëse şmochtsiyena, er tsëngaftanga Bëngbe Utabnábeñe oşbuáchiyënga quetsomñecá, chca cmontsamna. <sup>19</sup> Boyanga, tsëngaftangbe shémanga sem-pre şmochtsababuánÿeshana, y podesca palabréngaca ndoñe şmattsëtsëtsnaye.

<sup>20</sup> Básenga, tsëngaftangbe bëtsëtsanga nÿetscañe şmochtsayaunana; chca şmojtsamëse, Bëngbe Bëtsá oyejuayá echántsemna. <sup>21</sup> Taitanga, ndoñe şmattsama tsëngaftangbe básenga chauetënama, ainaniñe tondaye añëmoca chënga ndoñe chamondëtsatsmënama.

<sup>22</sup> Tsëngaftanga chë nÿets tempo nÿe ínÿabiamá oservënënga, tsëngaftangbe nduiñënga nÿetscañe şmochtsayaunana, y ndoñe nÿe chënga tcmojtsënÿa ora, mo nda nÿe entşangbe delante tsábá joquédama tojseşboşacá, ndayá chënga şmochtsayaunana nÿets ainaniñe ndegombre tsábe juabnéngaca, er tsëngaftanga Bëngbe Utabnabiamá corente respeto şmondobomna. <sup>23</sup> Lempe ntşamo chaşmojtsamcá, nÿets tsëngaftangbe añëmoca şmochtsama, mo Bëngbe Utabná ndegombre cuaftseşervencá, y ndoñe nÿe entşangbioycá. <sup>24</sup> Tsëngaftanga ya şmondëtatşëşbo, ntşamo cha chabe entşanga tojaşebuaçhenacá mo uacanancá, Bëngbe Utabná tsëngaftanga cmochjátsatayama. Er Crísto, chë Utabná, endmëna ndábenga tsëngaftanga şmomnana, y cha şmondëşervena. <sup>25</sup> Pero chë ndoñe tsábe soyënga tontsamábioye, Bëngbe Bëtsá bochanjacatíga, ntşamo chë entşá bacna soyënga tojamcá, er Bëngbe Bëtsabiamá nÿetscanga cachcá monduámana.

## 4

<sup>1</sup> Y tsëngaftanga, ndëmuanÿengbiamá ínÿenga nÿets tempo imoservena, nÿetsca soyënguñe tsábá şmochtsama, y nÿetscangbiamá cachcá şmochtsemna, chë nÿets tempo nÿe tsëngaftangbiamá oservënëngaftaca, er tsëngaftanga şmondëtatşëşbo celoca canÿa endmëna, ndabiamá tsëngaftángnaca oservënënga şmondmëna.

#### *Oşbuáchiyënga jábuayenama*

<sup>2</sup> Nÿets tempo Bëngbe Bëtsáftaca şmochtsencuëntaye, ntşamo şmojtsichámuama botamana jtşeuabnayëse y Bëngbe Bëtsá jtsaşchuanayëse. <sup>3</sup> Bëngbe Bëtsáftaca cha şmojtsencuënta ora, bëngbiámnaca chaşmochtseimpadana, cha chaoma bënga fchayobenama Bëngbe Bëtsabe palabra Crístbiamá entşanga jábuayenama, chë buayenana soye ndayama tempo entşanga ndoñe monjántatşëşbo. Atşe chë buayenana soye entşanga abuátambaye causa, mora cárceloye şëntsëtámena. <sup>4</sup> Chcasna, Bëngbe Bëtsá atşbiamá şmochtseimpadana, atşe chayobenama chë buayenana soyënga entşanga jabuátambama, y chë soye atşe chaima chënga corente tsábá catafjosertaycá, er atşe şontsemna chca jamana.

<sup>5</sup> Şmochtsiyena nÿetsca soyënga osertanánaca jtsamëse chë Jesucristbeñe ndoşbuáchiyëngaftaca, y chca, nÿets tempo ínÿenga şmochtsinÿanÿnaye tsëngaftanga

Jesucristbeñe ošbuáchiyënga bétsemnama. <sup>6</sup> Inyëngaftaca chašmojtsencuënta ora, šmochtsama ntšamo šmojtsoyebuambnacá chëngbiama tšabá chaotsemnama, y soyënga šmochtsichamo nyëtscanga oyejuayana chamotsebonnama; y šmochtsetátšëmbo ntšamo cmojtsamna cada cányabioye jojuana.

*Jtadiósoftanama*

<sup>7</sup> Jesucristbeyeca bëngbe bonshana catšata Tíquico, canye trabajayá tšabe palabra bomná y Bëngbe Utabnabiama bëngaftaca oservená, tšëngaftangbioye noticiënga echanjuamba ndayá átšeftaca tojopasama. <sup>8</sup> Chýeca cha tšëngaftangbioye sëntsichamná, chca, tšëngaftanga chašmotsetatšëmbuama ndayá bëngaftaca yojtsopasana, y cha chacmañémuayama. <sup>9</sup> Cháftaca Onésimo echanjá, Jesucristbeyeca bëngbe bonshana catšata; cha canye tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muiñe yojtsopasancá.

<sup>10</sup> Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga šmontsemna ndayá jamama cmojtsamnana, Marcos tšabá jofjama, cha tšëngaftanga jautsëtsayama tojase. <sup>11</sup> Jesús, chë Justo cánaca uabainá, chánaca cmontsacheuaná. Quem pueblentša nyëtsca judiënga ošbuáchiyënguentsana, nye chë unga átšeftaca mondëtrabája, Bëngbe Bëtsabe amëndayana entšangbioye chaóshjanguama, y chënga mondama atše ainaniñe bëts añemo chaitsebonnama. <sup>12</sup> Epáfrasnaca cmontsacheuaná, inye tšëngaftangbiocá y cha Cristo Jesusbiana jatrabájama endoserverna. Cha nyëts tempo tšëngaftangbiama Bëngbe Bëtsábioye tša bochandbétseimpadana, tšëngaftanga Bëngbe Utabnábeñe ošbuáchiyana ndocna te chašmondájbanama, y nyëts tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtsamncá; y chca, tšëngaftanga corente šmochántsetatšëmbo ntšamo šmojtsamncá ndegombre yomna ntšamo Bëngbe Bëtsá yobošcá. <sup>13</sup> Cach atše sënjinye y sëntsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis puebloca oyenëngnaca. <sup>14</sup> Lucas, bëngbe bonshana ashnayá, cmontsacheuaná; y Démasnaca.

<sup>15</sup> Chë Laodiceoca Jesucristbeyeca catšátanga bëngbe cuenta šmochjácheuaye. Ninfábioynaca šmochjachuaye, y nyëtsca ošbuáchiyënga chë Bëngbe Bëtsá jëtschuayama chabe yebnentše jénefnama imuamanëngnaca. <sup>16</sup> Quem tsbuanácha chašmojualiá chentšana, Laodiceoca ošbuachiyëngbioye šmochjuíchmua, chócna mëcha chamualiamia; y tšëngaftángnaca šmochjualiá chë Laodiceoca ošbuachiyëngbioye tmonjanichmó tsbuanácha, chëcha tšëngaftangbioye chaojuáshjango ora.

<sup>17</sup> Arquipo šmochjauyana yejuana chaotsantješna chë Bëngbe Bëtsá tbojabonýe trabajo sempre tšabá chaotsocumplinama.

<sup>18</sup> Atše Pablo, nye quem palabrénga tšëngaftanga jacheuayama cach atšbe cucuátseca sëntsabiamná. Šmochtsenójuabnaye atše utamená stsemnama. Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

## 1 Tesalonicenses

### *Jacheuayama*

<sup>1</sup> Atse Pablo, Silvano y Timotéoftaca, quem tsbuanácha séntsabiamná tséngaftangbiam, chë Tesalónica bës puebloca Jesucristbeñe ošbuáchiyëngbiam, tséngaftanga chë Bëngbe Bëtsá chë Taitá y Bëngbe Utabná Jesucristoftaca cányíñe mo canýacá šmommënga. Atše séntseimpadana Bëngbe Bëtsá, chaoma tsabe bendicionënga tséngaftangbeñe chaotsemnama, y tséngaftanga ainaniñe tsabe ebionana chašmotsebmomma.

### *Pablo Bëngbe Bëtsábioye tbojtanchuá chë Tesalónica pueblentša entsangbe ošbuáchiyama*

<sup>2</sup> Bënga sempre Bëngbe Bëtsá fsëndëtschuaná tséngaftangbiam, y bënga cháftaca ftsencuénta ora, tséngaftangbiam fchandbëtseimpadana. <sup>3</sup> Bënga, Bëngbe Bëtsá chë Taitáftaca ftsencuénta ora, fsëndbëtsenojuabnaye ntšamo tséngaftanga šmotrabájama, Jesucristbeñe ošbuáchiyana šmobómnayeca; ntšamo tséngaftanga tša inýenga šmëjabuáchana, Jesucristo šmobobonshánayeca; y ntšamo tséngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama. <sup>4</sup> Jesucristbeyeca catsátanga, bënga fsëndëttátšëmbo Bëngbe Bëtsá cmababuánýeshanama, y cha tcmojábacacama chábënga chašmotsemnama. <sup>5</sup> Bënga chë tsabe noticiënga Jesucristbiam tcbonjanabuayená ora, ndoñe nýe bënga jóyebuambayëse chca quenjatšmëna, ndayá chë Uámana Espírite obenanácna, y bënga corente jtsejuabnayëse chë buayenánana ndegombre soye bëtsemnama. Tséngaftanga corente šmondëttátšëmbo ntšamo bënga ftsjamna tséngaftangtaftaca fsënjamna ora, tsabe soyënga tséngaftangbiam nguayíñe.

<sup>6</sup> Chora, ntšamo bënga fsënjannamcá y ntšamo Bëngbe Utabná enjaniyencá, tséngaftanga šmonjanontsé amana; y chë buayenánana šmonjanóyëngacñe chë Uámana Espíritu tcmojanatsatá oyejuayánaca, masque inýenga tmojamna tséngaftanga puerte chašmozufima. <sup>7</sup> Mëntsá, tséngaftanga uánatsanënga šmonjanobiama ntšamo ndegombre jtсийenama, nýetsa Macedonia y Acaya luarentša Jesucristbeñe ošbuáchiyëngbiam. <sup>8</sup> Tséngaftanga šmojoyebuambá Bëngbe Utabná Jesucristbe palabrama. Mora, ndoñe nýe Macedonia y Acaya luarentše entsanga chama quemátstátšëmbo —nýets luarenache entsángnaca montsetátšëmbo ntšamo tséngaftanga Bëngbe Bëtsábeñe šmojtsošbuáchema —y chca, bënga tondaye más quešnatëjaboto tséngaftangbiam jatichámuama. <sup>9</sup> Cach entsanga montsoyebuambná chë bënga tcbonjánabuache ora tša tsabá tséngaftanga šcojanëbuajama. Chëngnaca montsichamo ntšamo tséngaftanga šmojtšajbaná chë šmojanjuabná diosënga yojamna soyënga adórayana y šmojanontsé chë tsabe benache jtishachama, y chë Bëngbe Bëtsá ndegombrá y ainá jasërviam, <sup>10</sup> y chca, chabe Uaquiñá Jesús jobátmana; mua celocana echanjésabo; chabiam Bëngbe Bëtsá tojanma obanënguentšana cháuatayenama, y cha šochanjátsebacaye chë uabouana castigüentšana, Bëngbe Bëtsá entsangbe bacna soyëngama chëngbiam yobomnentšana.

## 2

### *Ntšamo Pablo yojantrabája Tesalónica puebloca*

<sup>1</sup> Cach tséngaftanga, Jesucristbeyeca catsátanga, šmondëttátšëmbo bënga tcbonjánabuache ora ndoñe nýe bonamente quenjatšmënama. <sup>2</sup> Tséngaftanga šmondëttátšëmbo, bënga cabá tséngaftangbiye nda ora, Filiposoca šonjanëyánguango y bacá šonjanaborlama; y masque tséngaftangbioca bëngbe contra entsanga monjamna, Bëngbe Bëtsá tonjanma bënga fchayobená chë tsabe noticiënga bëtscá añémoca jabuátambama. <sup>3</sup> Er bënga entsángbioye bostero soyënga ndoñe queftsjatanabuayíyná, tséngaftangbiam bacna soyënga ndoñe queftsjátanboše, y entsanga jáingñama ndoñe queftsjatanoyebuambná. <sup>4</sup> Bëngna inýetšá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tsabe noticiënga entsanga jabuátambama, y chca bënga fsëndoyebuambná; chíyeca bënga ndoñe nýe entsangbe bominíñe tsabá chaotsinýnama queftsátama, ndayá nýe Bëngbe Bëtsabiam, nda chë ndayá bëngbe ainaniñe yomnama yotátšëmbo. <sup>5</sup> Ntšamo tséngaftanga corente šmondëttátšëmbcá, bënga ndocna te tséngaftangbiam tsabe soyënga tifjánayana, tséngaftanga bëngaftaca oyejuayënga chašmotsemnama; y ntšamo tséngaftanga cbonjanëtsëtsnácá ndoñe quenjatšmëna nýe tséngaftangbentšana ba soyënga bëngbiam josháchiñama. Bëngbe Bëtsá chama yotátšëmbo. <sup>6</sup> Ndocna te bënga queftsatsngúá entsanga más uamanëngcá bënga chašotsabiamnama, ni tséngaftangbentšana, ni inýengbentšana.

<sup>7</sup> Masque bënga, Cristbe ichmónënga bëtsemnama, matifjanobená tséngaftanga nýe sempre jtsamëndayana, bënga ndoñe chca chibiátanma; bënga corente jtšababuánýeshanëse

chbonjánnyena, ntšamo canye mamá chabe básenga jtsabéchayana y corente bonshanánaca jtsanýenana. <sup>8</sup> Tša chbonjánababuanýeshanayeca, bēnga ndoñe nye chē Bēngbe Bētsabe tšabe noticiēnga checbēnjatanabuayená, tšēngaftanga chíne chašmotsošbuáchemana ntšamo bēnga fsēndošbuachecá, ndayá bēngbe vidēnga jáshbiamnaca fsēnjanprontana tšēngaftangbe tšabíama. ¡Tša chondábabuanýeshana! <sup>9</sup> Jesucristbeyeca bēngbe catšátanga, tšēngaftanga šmenabouinýna ntšamo bēnga bētsá y jabuache fsēnjantrabajama, Bēngbe Bētsabe tšabe noticiēnga abuayinýayíne y bēngbe vida onguayíne, chca, tšēngaftanga ndoñe chacmondétsamnana bēngbe uajabótama bēnga jatatsatnayama.

<sup>10</sup> Cach tšēngaftanga šmondétatsēmo y Bēngbe Bētsánaca, ntšamo bēnga ftsjamna tšēngaftanga chē ošbuáchiyēngaftaca fsēnjamna ora; fsēnjaniyena ntšamo Bēngbe Bētsá tšabá tbojtsinýancá, nyētscāngaftaca fsēnjánama ntšamo jamama šojanamncá, y ndocná quenátobena jatichámuana ntšamo fsēnjanamcá ndoñe tšabá yonjamna ca. <sup>11-12</sup> Tšēngaftanga šmondétatsēmo, bēnga bētsá jóyebuambayēse cada ona tšēngaftanguentšá chbonjánējabuachanama y chbonjánāñemuama, ntšamo canye taitá chabe básēngaftaca endbetsamcá. Bēnga bētsá chbonjánētsētsná ntšamo Bēngbe Bētsá tšabá tbojtsinýancá chašmotsiyenama; y Bēngbe Bētsá cmontsēbuájajana chabe amēndayoye jamashēnguama y chabe obenana y buashinýinýanana jinýama.

<sup>13</sup> Bēnga, Bēngbe Bētsabe tšabe soyēnga chbonjanabuayinýa ora, ntšamo tcbonjanēyancá tšēngaftanga šmonjanuena y šmontsanošbuaché mo Bēngbe Bētsábíocana buayenanancá, y ndoñe nye entšangbe oyeuambnayancá. Y ndegombre Bēngbe Bētsabe buayenánana endmēna, y chē palábraca, tšēngaftanga chē chábēne ošbuachiyēngbēne Bēngbe Bētsá bētsá soyēnga yojtsama. Chama sempre Bēngbe Bētsá fsēndétschuaná. <sup>14</sup> Jesucristbeyeca catšátanga, cach tšēngaftangbe luarentša entšanga cmonjanēcamaena ora y šmonjansufrina, šmonjanpasá ntšamo chē Judeoca Bēngbe Bētsábēne ošbuachiyēngcá enefjuanēnga tmonjanpasacá, y chēngna Cristo Jesusbe entšanga mondmēna. Chēnga tmonjansufrí cach luarentša entšanga, chē judiēnga, chēngbiyoye monjánēcamaena ora. <sup>15</sup> Chē judiēngbe bēts taitanga, Bēngbe Bētsabe juabna oyeuambnayēngbiyoye tmojtsanēbaye, y ntšamo chēngbe bēts taitanga tmojanmá, chēngnaca Bēngbe Utabná Jesúsbiyoye tmojanóba, y chēnga mondama bēnga chaftsēsuftrinama. Chēnga ndoñe tšabēnga Bēngbe Bētsabe bominýíne quemátsmēna, y nyētsca entšangbe contra montsemna. <sup>16</sup> Chē ndoñe judiēngbiyoye, Bēngbe Bētsá cháuatsebacama jábuayenama fstseboše ora, chē judiēnga bētsá jtsamana bēnga ndoñe fchandobenama chca jamama. Judiēnga nyēts tempo bacna soyēnga monjánama; pero chē entšanga jábuayenama bēnga ndoñe fchandobenama jtsamana, entsemna chē último bacna soye ntšamo chē judiēnga jamama imojtsobencá, más ya ndoñe; y mora, cabana, Bēngbe Bētsá ya puerta chēngaftaca tbojtna y echanjácastigaye.

*Pablo tša yojánboše, Tesalónica puebloca entšanga jányama*

<sup>17</sup> Jesucristbeyeca catšátanga, bēnga tšēngaftangbentšana baseftayté jēftsebocnama šonjanotocá ora, masque ndoñe choca tšēngaftangtaftaca queftsjátanmēna, sempre tšēngaftangbiamna fsēnjanenajuabná, y tša fsēnjánboše tšēngaftangbiyoye jtsana jautsētsayama. <sup>18</sup> Bēnga fsēnjánboše tšēngaftangbiyoye jésana; chíyeca cach atše Pablo, ba soye sēnjanóshenguēnja jobenayama choye jésama, pero Satanás yojantrabája bēnga ndoñe fchandobenama chca jamama. <sup>19</sup> Atše sēntsánboše tšēngaftanga jautsētsayama, er tšēngaftangbeyeca Bēngbe Utabná Jesusbe delante, cha yochjésabo ora, ntšamo tšēngaftanga šmoyenama, bēnga puerta jtsóšbuáchiyēse fchantsobátmana, corente oyejuayēnga fchtsemnama y más bētsētsanga fchtsemnama. <sup>20</sup> Aíñe, ndegombre, ntšamo tšēngaftanga šmoyenama, bēnga bētsá añēmoca ntšamo tšēngaftangbēne tifjamama fsēndétsoyebuambnaye, y tša oyejuayēnga fsēntsemna.

### 3

<sup>1</sup> Chíyeca ya ndoñe chibiatanobená más jatobátmanana tšēngaftanga jautsētsayama; as fsēnjanjuabó nye bēndata Atenas bēts pueblentše joquédana, <sup>2</sup> y jíchmuana Jesucristbeyeca bēngbe catšata Timoteo, chē bēngaftaca trabajá, Bēngbe Bētsábíoye oservéniñe, tšabe noticiēnga Cristbiamna entšanga abuayinýayíne. Fsēnjanichmó chacmañēmuayama y chaot-samama tšēngaftanga Jesucristbēne más chašmotsošbuáchemana; <sup>3</sup> y chca, ndocná Jesucristbēne ošbuáchiyana chaondáibanama, masque tšēngaftanga Jesúsbeñe ošbuáchiyēnga bētsēmnama, inýenga imojtsama chašmotsesuftrinama. Er cach tšēngaftanga šmondétatsēmo bēnga šojtsamna chca quem luarentše jēftsepdecénana. <sup>4</sup> Y cabá tšēngaftangtaftaca fsēnjēftsemna ora, tcbonjanēyana bēnga šojánamna jasúfriana; y ndegombre chca tonjopasá, ntšamo tšēngaftanga ya šmondétatsēmbcá. <sup>5</sup> As y chē tšēngaftangbiamna jtsetatsēmbuama más jatobátmanana ndoñe quetstétsobenayeca, sēnjanjuabó šojtsemna Timoteo jíchmuana.

Sënjanichmó atse jtsetatsëmbuama aínë bètsá o ndoñe tsëngaftangbe ošbuáchiyana Jesucristbeñe tayojamnama, er atse yapa sënjanjuabná nderado Satanás tojanma tsëngaftanga bacna soyënga chašmotsamama, y chca, bëngbe trabajo tondayama chaondëtsoservënama.

<sup>6</sup> Pero mora, Timoteo tsëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tsëngaftanga bètsá Jesucristbeñe šmojtsošbuáchema y nyëtsanga šmenbobonshánama. Cha šonjacuntá ntšamo tsëngaftanga corente oyejuayënga bëngbiana šmuatenojuabnama, y ntšamo tsëngaftanga tša šmojtseboše bënga jányama, cachcá ntšamo bënga tsëngaftanga jányama tša fsëntsebošcá. <sup>7</sup> Quem sóyeca, Jesucristbeyeca catšátanga, y mora chë bënga nyëtsca chë padecena soyënga fstsebmoma ora y ínýenga bënga jasúfriama imojtsama ora, bèts añemo fsëntsebmoma, ntšamo tsëngaftanga tša Jesucristbeñe šmojtsošbuáchema jtsetatsëmbëse. <sup>8</sup> Jtsetatsëmbuana tsëngaftanga sempre puerte tsábá Bëngbe Utabnáftaca šmoyenama, entsama bënga más añémoca chaftsiyenama. <sup>9</sup> Mora fchantsobena Bëngbe Bëtsá jtsatschuanayana tsëngaftangbiana, y chë tsëngaftangbeyeca chabe delante bënga oyejuayana ftsbmónámna. <sup>10</sup> Cada te, bnété y ibeta, tša Bëngbe Bëtsá fsëndëtseimpadana jobenayama tsëngaftanga jautsëtsayama chašualesenciama, Bëngbe Bëtsabe palabra tsábá chašmobedecema, chë buayenánana ntšamo yojtsashbencá jabuátambama.

<sup>11</sup> Bënga, Bëngbe Bëtsá fsëntseimpadana, cachá y Bëngbe Utabná Jesús, chašújabuache bënga fchayobenama tsëngaftangbioye jama jautsëtsayama. <sup>12</sup> Y Bëngbe Utabná chaoma más bètsá chašmotsenbobonshánama, y cachcá corente nyëtscángaftaca, ntšamo bënga cbond-ababuanýeshancá. <sup>13</sup> Chca, tsëngaftangbe ainaniñe bètsá añemo šmochántsebmoma; y Bëngbe Utabná Jesús cachábengaftaca chaojésabo ora, Bëngbe Bëtsá Bëngbe Taitabe delante ndocná chaundayana, ntšamo tsëngaftanga šmojamcá ndoñe tsábá yontsemna ca, er tsëngaftanga šmondmëna Bëngbe Bëtsábenga, nyë cha jtseservënama.

## 4

### *Ntšamo jtsiyenama, Bëngbe Bëtsá oyejuayá chaotsemnama*

<sup>1</sup> Y mora inýe palabra šmochjatspasëncia. Jesucristbeyeca bëngbe catšátanga, tsëngaftanga bëngbentsána šmonjanatsjinýe ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tsëngaftanga šmondoyena. Y mora Bëngbe Utabná Jesusbe cuenta, cbontsaimpadana y beca cbontsëtsësná más chca chašmotsamama.

<sup>2</sup> Tsëngaftanga šmondëtatsëmbó ndayá tifjánayana ntšamo tsëngaftanga chašmotsiyenama, y chca fsënjanma Bëngbe Utabná Jesús chca jamama šonjanamëndáyeca. <sup>3</sup> Bëngbe Bëtsá endboše tsëngaftanga chašmotsiyenama mo Bëngbe Bëtsabengcá, ndocná bacna soyënga boyabása o shembásaftaca chaondëtsamama, <sup>4</sup> y nyëtscanga chamotsobena ntšamo canýe shema jonguanguana, chë ntšamo canýa Bëngbe Bëtsábía yomná jamama ibomncá, y ntšamo entsangbe bominýiñe tsábá yomncá, <sup>5</sup> y ndoñe chabondónguango nyë cháftaca bacna soyënga chëngbe cuépoca jamama, ntšamo chë Bëngbe Bëtsábioye nduabuátëmga mondbetsamcá. <sup>6</sup> Chë palabriñe ndocná chabe catšátbioye chabondëngíñe, chë catšatbe shémaftaca bacna soye jamëse, er chca amëngbioye Bëngbe Utabná corente echanjácastigaye. Chíyeca bënga ya bètsá chama tcbonjabuayená. <sup>7</sup> Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tsábá yomncá jtsamama, ntšamo chabe entsanga mondbetsamcá. <sup>8</sup> Mëntšá, nda quem buatëmbana soyënga tojtsábotena, cha ndoñe nyë entsanga jtsëbáténana, ndayá Bëngbe Bëtsábioye, nda tsëngaftangbe ainaniñe Uámana Espíritu cháumashënguama tojama.

<sup>9</sup> Atse ndoñe quešnátsmëna juabuábiamana ntšamo cmojtsamana ínýenga Jesucristbeñe ošbuáchiyënga jtsababuánýeshanama, er cach Bëngbe Bëtsá tcbonjabuatambá nyëtscanga chašmotsenbobonshánama. <sup>10</sup> Y ndegombre, tsëngaftanga chca šmondama nyëtsca Macedonia luarentše Jesucristbeñe ošbuáchiyëngaftaca. Pero cbontsaimpadana, Jesucristbeñe catšátanga, más chca chašmotsamama.

<sup>11</sup> Nýa sempre quem soyënguñe šmochtsentšena: natjëmbana jtsiyenana, ínýengbe soyënguñe ndoñe ntsonremeténana, y ndoñe ntjatobátmanana nyë ínýenga tsëngaftangbiana chamotsetrabájama, ntšamo tcbonjanëyancá tsëngaftangftaca fsënjanma ora; <sup>12</sup> chca šmochtsama, chë ínýenga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

### *Bëngbe Utabná quem luaroye yochjésabo ora*

<sup>13</sup> Bëngbe catšátanga, bënga fsëntseboše tsëngaftanga ndegombre chašmotsetatsëmbó ntšamo chë obanëngaftaca yochjopásama, y chca, tsëngaftanga ndoñe ngmenánaca chašmondëtsemnama, mo chë ínýengcá, chë tcojóbantšana ndoñe yontsemna jtayanama ca juabnayëngcá. <sup>14</sup> Bënga fsëndošbuaché Jesús tojanóbana y tojtanayenama, y cachcá bënga

fsëndosbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiam yochjama chë nyetsca tescama yomna tsabe vida Jesucristoftaca chamotsebomnana, y quem luaroye cháftaca chamuatábama.

<sup>15</sup> Chë soyama bënga cbontsëtsëtsná ntšamo cach Bëngbe Utabná tojëtsanabuatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtseemnënga, chábioye ndoñe quemochátinyëna tsbanánoca, más natsana chë ya obanënga chë te mochtayenëngbiam. <sup>16</sup> Er entšanga mochanjouena canye mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetéřjua juajatëtámnaca, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena; <sup>17</sup> chentšana, chë ainënga chamojtseemnënga chëngaftaca cánýiñe Bëngbe Bëtsá šochanjúyamba, Bëngbe Utabná yochtseemnoca jash-janguama, chë celoca jantšetëshënga endmënoca; as chentšana nyetsca tescama cháftaca bënga mochántsemna. <sup>18</sup> Quem palabrëngaca nyetscanga ndoñe más ngménana ainaniñe chašmondëtsebmna.

## 5

<sup>1</sup> Jesucristbeyeca catšátanga, ndoñe quenátsiyta atše jubuábiamana mocna ora chë soyënga yochjopásama. <sup>2</sup> Cach tsëngaftanga corente šmondëtátšëmbo, Bëngbe Utabná yochjésabo chama ndocná chaondëtsejuabná ora, mo canye atbëbanacá jashjanguana ibeta ndocná chama tonjatsjuabná ora. <sup>3</sup> Entšanga chamojyana: “Lempe tsábá endëtsoñe y ton-dayama quešnátmna játauatjana ca”, chora nye ndeolpe chë entšangbiam tša jasúfriama echanjóshjango, mo canye shembása šešona jtsebmnama ora nye ndeolpe jasúfriama jontšancá; y ndegombre, entšanga chca jasúfriama quemochatotsbocá. <sup>4</sup> Pero tsëngaftanga catšátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tsëngaftanga ndoñe auatjanánënga quešmochátsmëna, mo ndábioye canye atbëbaná tbojotbá ora, chábioye cuafstauatjanacá. <sup>5</sup> Nyetsca tsëngaftanga šmondmëna entšangbe juabna binýnayabe básenga, y mo binýniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena; <sup>6</sup> chíyeca bënga ndoñe quešnátmna jtsebmnama mo chë cachëngbe cuerpo jenomándama ndobenëngcá, chë mo cuafstsemangcá oyenënga. Pero aïne šontsamna mo chë fšnëngcá jtсийenana, bëngbe cuerpo jtsemándayëse y nyets tempo jtseprontánëse. <sup>7</sup> Ibeta ora entšanga jtsemangana, y cach ibeta tojtsebmna ora entšanga jotmenangana; <sup>8</sup> pero bënga, chë binýnentšëngna, šontsamna sempre bëngbe cuerpo jtsemándayana. Šontsamna Bëngbe Bëtsábeñe jtsošbuáchiyana y cha jtsebobonshánana, chë uayaná Satanasbiam jenëuyanama y cha jayénjanama, mo canye soldadcá, canye morochó soye cochaca jenáčochjatsana jtsevalentiam y ndoñe chamondëýenjanama. Y chë castigüentšana Bëngbe Bëtsá šochjätsebacamnaca puerte jtsošbuáchiyëse jtsobátmanana; y chca, bënga mochántsemna mo canye soldadcá, cha canye casquëse juabuchëtsana jenëuyanama. <sup>9</sup> Er Bëngbe Bëtsá ndoñe šonjáchembo bënga chašotsamnama chë nyetsca tescama castigo jtsebmnama. Ndayá Bëngbe Bëtsá šojabacacá, Bëngbe Utabná Jesucristbeyeca bënga chamótsbocama. <sup>10</sup> Cha bëngbiam tojanóbana, bënga cháftaca cánýiñe jtсийenana chamot-sobenama, masque ainënga o obanënga chamojtseemnëse, cha chaojésabo ora. <sup>11</sup> Chíyeca, nyetscanga šmochtsenafiñmuaye y šmochtsenájabuachana más jtsošbuáchiyama, ntšamo tsëngaftanga mora ya šmontsamcá.

### *Pablo choca ošbuáchiyënga jábuayenama*

<sup>12</sup> Jesucristbeyeca catšátanga, cbontsaimpadana chašmotsarrespetana chë Bëngbe Bëtsabiam tsëngaftangbeñe trabajayëngbioye, y chë Bëngbe Utabná tsëngaftanguentše tojábacacanga uánatsanënga chamotsebmnama y ntšamo jtсийenana cmojtsamnama chácmbuayenama. <sup>13</sup> Cmotsamna chënga jtsarrespetánana y jtsababuánýeshanana, ndaye trabajo chënga imojtsamama. Natjëmbana nyetscángaftaca šmochtsiyena.

<sup>14</sup> Quem soyënga chašmotsamámnaca cbontsaimpadana: jatrabájama ndoñe tmontsebošëngbioye šmochjúacana, añemo ndbomnëngbioye šmochjáñemuaye, bëtscá ošbuáchiyana ndbomnëngbioye šmochjúabuache, y uantadënga nyetscángaftaca šmochtsebmna.

<sup>15</sup> Cuedado šmochtsebmna, nderado nda bacna soye tbojaborlase, ndocná ndoñe cachcá chabondëtachnënguama. Masna, nye šmochtsentšëna nyets tempo tsabe soyënga jtsamama cach tsëngaftanguentsëngaftaca y nyetsca entsangafátnaca.

<sup>16</sup> Nyets tempo oyejuayënga chašmotsëbmna. <sup>17</sup> Sempre Bëngbe Bëtsáftaca šmochtsencuëntaye. <sup>18</sup> Nyetsca soyënguñe Bëngbe Bëtsá šmochtsatschuanaye; er chca entsebmna ndayá cha yojtseboše, bënga Cristo Jesúsbeñe ošbuachiyëngcá chamotsamama.

<sup>19</sup> Ndoñe šmattsama ntšamo chë Uámana Espiritu tsëngaftangbeñe yojtsamcá chaot-sopochocama. <sup>20</sup> Ndoñe šmattsábotena chë Bëngbe Bëtsabe juabna oyebuambnayëngbe

buayenana soye. <sup>21</sup> Yejuana šmochjájuaboye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábiocana tayóbocanama, y chentša tšabe soyënga šmochjobuajo y sempre chca šmochtsama. <sup>22</sup> Nýetsca bacna soyënguentšana šmochtsojuánañe.

<sup>23</sup> Cach Bëngbe Bëtsá, chë bëngbe ainaniñe tšabe ebionana chamotsebmomnama endamá, nýetsca soyiñe tšábenga chacá chacmabiama, y nýets tšëngaftangbe espíritu, ainana y cuerpo chaotsinýena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaodayanama. <sup>24</sup> Nda tcmojúbuaja chábenga chašmotsemnama, cha sempre jtsamana ntšamo tojayancá, y lempe cha echanjama.

*Inýe rueguënga chëngbiana y jtadiósoftanama*

<sup>25</sup> Jesucristbeyeca catšátanga, Diosmanda, bëngbiámnaca Bëngbe Bëtsá šmochtseimpadana.

<sup>26</sup> Nýetscángbiye mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerta bonshanánaca šmondbsacheuanaycá.

<sup>27</sup> Cbontsaménda quem tsbuanácha nýetsca Jesucristbeñe ošbuáchiyënga chašmëbuáliama, y chca séntsama, Bëngbe Utabná chca jamama šojanmandáyeca.

<sup>28</sup> Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

## 2 Tesalonicenses

### *Jacheuayama*

<sup>1</sup> Atse Pablo, Silvano y Timoteoftaca, quem tsbuanácha sentsabiamná tsêngaftangbiam, chë Tesalónica bëts puebloca Jesucristbeñe ošbuáchiyëngbiam, tsêngaftanga Bëngbe Bëtsá chë Taitá y Bëngbe Utabná Jesucristoftaca cányíñe mo canýacá šmommënga. <sup>2</sup> Atse sëntseimpadana Bëngbe Bëtsá, chaoma tsabe bendicionënga tsêngaftangbeñe chaotsemnama, y tsêngaftangbe ainaniñe tsabe ebionana chašmotsebmomnama.

### *Cristo chaojésabo ora, ntšamo entšanga tmojamama Bëngbe Bëtsá echanjajama*

<sup>3</sup> Jesucristbeyeca Bëngbe catšátanga, šontsamna nyëts tempo Bëngbe Bëtsá tsêngaftangbiam jtsatschuanayana, ntšamo tsêngaftangbiam jamama šojtsëtocancá, er tsêngaftanga cada te más ošbuáchiyana šmontsebmomna, y ntšamo tsêngaftanga nyëtscanga šmojtsenbobonshana, tempscama más yojtsemna. <sup>4</sup> Tsêngaftangbe ošbuáchiyama y bonshánama, bënga nyëts tempo oyejuayënga fchandbëtsemna, chë inýenache Bëngbe Bëtsábeñe ošbuáchiyëngcá ene-fjuanëngbeñe tsêngaftangbiam jóyebuambayama. Bënga fchandbëtsoyebuambayaye ntšamo tsêngaftanga inýetšá ntjatsjuabnacyá Jesucristo šmëstonama, y ntšamo tsêngaftanga chábeñe tša šmošbuachëmnaca, masque inýenga tša cmëcamena y chašmosufrima bëtscá imojtsama, tsêngaftanga Jesucristbeñe ošbuáchiyënga bëtsemnama. <sup>5</sup> Tsêngaftanga chca Cristo šmëstonayeca, corente entsinýinýena Bëngbe Bëtsá nyëtscá soyënguñe tsabá amá yomnama, y entšanga ntšamo tmojamama tsabá o ndoñe tsabá bëtsemnama jayanama ora, cha chca echanjajama ntšamo entšanga tmojtsomerecencá. Y chca entsayana tsêngaftanga aíñe mercedo šmotsobuáñoñe chabe amëndayoye jamashënguama ca; y mora, tsêngaftanga choye jobenayama jashjanguama šmojtsamama, inýenga imojtsama chašmotsesufrínama.

<sup>6</sup> Bëngbe Bëtsá echanjama ntšamo jamama ibomncá; echanjama chë tsêngaftanga chašmosufrima imojtsamënga bëtscá chamosufrima; <sup>7</sup> y echanjama tsêngaftanga y bënga chë mondësufirinëngbiam, ndoñe más chamondëtsesufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerta obenana bomna angelëngaftaca echanjabo, y chora bëtscá inëtšënga echántsemna. <sup>8</sup> Cha echanjabo chë Bëngbe Bëtsábioye jtsabuatmama ndoñe montsebošënga jabácastigayama, y chë tsabe notiçënga Bëngbe Utabná Jesusbiam ndoñe montsuenanëngbiyocna. <sup>9</sup> Chënga Bëngbe Bëtsá echanjácastigaye, nyëtscá tescama jtsapochócase; y Bëngbe Utabnábëntšana bënoca mochantsemnënga, y ndocna te quemochatobenaye jinýama Bëngbe Utabná tša bëtsá y obená bëtsemnama. <sup>10</sup> Quem puerta uámana te, Bëngbe Utabná chaojésabo ora, nyëtscá chabe entšanga, nyëtscá chábeñe ošbuáchiyënga cha mochantatschuanaye y mochantšichamo: “¡Tša obená cha yomna ca!” Y tsêngaftanga chëngaftaca šmochántsemna, er tsêngaftanga šmonsanošbuachë bënga ndegombre fsënjántatšëmbo soyënguñe, chë bënga tcbonjanabuayená soyënguñe.

<sup>11</sup> Chiyeca, chca chaotsemnama, nyëts tempo Bëngbe Bëtsábioye tsêngaftangbiam fsëndëimpadana mercedo bomnënga chácmabiamama, chë vida chašmotsebmomnama, ndayama cha tcmojúbuaja, y chabe obenánaca bëtscá chaoma tsêngaftanga chašmobená nyëtscá tsabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtsamcá, Jesucristbeñe šmojtsošbuáchemna. <sup>12</sup> Chca jtsamëse, tsêngaftanga šmochanjínýanýiye Bëngbe Utabná puerta bëtsá y uamaná bëtsemnama, y cha echanjama tsêngaftanga más uamanënga chašmotsebmomnama. Chca echanjopása, er Bëngbe Bëtsá y Bëngbe Utabná Jesucristo tsêngaftangbiam tsabe juabna ibobomna.

## 2

### *Chë Bëngbe Bëtsabe contra yomná*

<sup>1-2</sup> Mora atse sëntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninýenama ora. Básefta entšanga imojtsichamo chë bëts uámana te, chë Bëngbe Utabná jésabama te, ya tojóshjango ca; pero cbontsaimpadana, Jesucristbeyeca catšátanga, bëtscá šmochtšentšëna chënga ndoñe chamondobená jamana tsêngaftanga inýetšá juabna tsêngaftangbe ainaniñe chašmátsbmomnama. Ndoñe šmatjóeyunaye nderado nda mëntšá chacmojtšëtšëtsná ora: “Canýe Bëngbe Bëtsabe juabna oyeubuambnayá šonjáuyana chë Bëngbe Bëtsabe uámana te ya tojóshjango ca” o “canýa chca šonjabuayená ca” o “Páblëbiocana tsbuanácha fsënjushache y chiñe entsayana chë te ya tojóshjango ca”. <sup>3</sup> Bëtscá šmochtšentšëna ndocná tondáyeca chacmondáingñema. Er chë Bëngbe Utabnabe uámana te cabá ndóshjango ora, mallajta entšanga Bëngbe Bëtsabe amëndayama contra mochantsemna, y chë Bëngbe Bëtsabe contra yomná echanjabocna. Y cha entsemna nda ibojtsemna



infernoca pochocaná jtsemnama. <sup>4</sup> Cha Běngbe Bětsabe contra echanjóyeuambaye, chě ndēmuanýęgbiama y ndaye soyęngama entšanga imojuabná diosęnga imomnama contra echanjóyeuambaye. Chentšana cha echanjayana chęngbiama más obená yomna ca. Y Běngbe Bětsabe běts yebnóynaca cha echanjámashęngo, choca echanjótבema y entšanga echantsětsěsnaye ndegombre cha Běngbe Bětsá yojtsemna ca.

<sup>5</sup> ¿Chě soyama tsęngaftanga ndońe šmondenabouínýna? Atše cabá tsęngaftangaftaca sęnjana ora, chama sęnjanyeuabmná. <sup>6</sup> Y tsęngaftanga šmondetátšęmbo, nda mora yojtsama chě Běngbe Bětsabe contra yomná ndońe chaondonýnama, cabá chě tempo chca jopásama ndóshjango ora. <sup>7</sup> Mora ya mallajta entšanga puerte bacna soyęnga tmojontšę amana, ndońe ntšamo Běngbe Bětsá tojayancá chęnga jamama yojtsamna ca, y bęnga chě soyęnga josértama ndońe quemuátobena, ndayá nýe Běngbe Bětsá chca šojinýanýese; pero ntšamo tcbonjauyancá chě Běngbe Bětsabe contra yomnabiama ndońe queochatěchńęngo, nýa nda chě soyęnga ndońe chaondětsemnama yojtsamábiye Běngbe Bětsá chabojtsejuaná ora ańfe. <sup>8</sup> Chora chě Běngbe Bětsabe contra yomná echanjábocna; pero Běngbe Utabná yochjésabo ora, echanjáńgouo y echanjama cha chaóbanama; y tša buashinýinýanánaca y obenánaca echanjábocnama, chábiye bochantsepochóca. <sup>9</sup> Chě Běngbe Bětsabe contra yomná, Satanase obenánaca echanjabo, y entšanga běts obenana echanjínýanýiye, y chě běts soyęngaca entšanga ingńęnęga mochántsemna. <sup>10</sup> Cha ba bacna soyęnga echanjama ntšamo Běngbe Bětsá ndońe yondbošcá, chca, ba entšángbiye nýetsca soyęnguńfe jáingńama. Y chęnga ndegombre pochocánęnga mochántsemna; Běngbe Bětsá chca echanjama, chęnga chě ndegombre soyęnga Jesucristbiama chęngbe ainanińe ndońe tmonjanýęngacńe causa, y chě soyęngama mo uamana soyęngcá ndońe tmonjanuabó causa, chca, atsebácanęnga jtsemnama. <sup>11</sup> Chca causa, Běngbe Bětsá entselesęncia entšanga ingńęnęga chamotsemnama, y chě ndońe ndegombre soyęnguńfe chamotsošbuáchema. <sup>12</sup> Běngbe Bětsá chca echanjama, nýetscanga chě ndegombre soyęnguńfe Jesucristbiama ndońe tmonsošbuáchęga, chě bacna soyęnga amama oyejuayęnga tmojtsemnęga, chě nýetsca tescama castigo chamotsebmnama jayanama.

### *Běngbe Bětsá šojabacacá atsebácanęnga jtsemnama*

<sup>13</sup> Pero bęnga šontsamna nýets tempo Běngbe Bětsá jtsatschuanayana tsęngaftangbiama, Jesucristbeyeca catšátanga, Běngbe Utabnabe bonshánęnga. Bęnga, Běngbe Bětsá fsěndětšchuaná cha quem luare cabá ndobojátsa ora, atsebácanęnga chašmotsemnama tcmojánabacama. Běngbe Bětsá tcmojatsebácá er chě Uamana Espíritu Běngbe Bětsabe entšanga tcmojábima, y tsęngaftanga chě ndegombre soyęnguńfe šmojtsošbuachě. <sup>14</sup> Chě tšabe noticięga bęnga chondábuayinyayeca, Běngbe Bětsá tcmojúbuaja chábęga chašmotsemnama. Cha tcmojúbuaja Běngbe Utabná Jesucristbe obenana y buashinýinýanánęnaca chašmotsebmnama.

<sup>15</sup> Chcasna, ndocna te šmattsajbaná ošbuáchiyana chě ndegombre soyęnguńfe ntšamo tcbonjabuatambacá, cach tsęngaftangbęńe jóyeuambayęse y tsbuanácha jubuábiamęse, y ndocna te inýetšá šmatjátsjuabnaye. <sup>16</sup> Běngbe Bětsá puerte tšabia endmęnayeca, cha šuababuánýęshana y tojama bęnga sempre añemo ainanińe chamotsebmnama y chě mochjóyęngacńe tšabe soyęngama corente jtsošbuáchiyęse chamotsobátmanama. Chábiye y Běngbe Utabná Jesucristbiye fsěntseimpadana, <sup>17</sup> chata chaboma tsęngaftanga bětscá añemo ainanińe chašmotsebmnama, y tsęngaftanga nýets tempo chašmotsobena ntšamo tšabá yomná jtšichámuama y jtsamama.

## 3

### *Bęngbiama Běngbe Bětsá šmochtseimpadana*

<sup>1</sup> Y morna, Jesucristbeyeca bęngbe catšátanga, Diosmanda bęngbiama Běngbe Bětsá šmochtseimpadana, nýetsca luarenache más ba entšanga chamotsobenama Běngbe Bětsabe buayenánana jouenama, y chęnga chě soye chamóyęngacńama, y puerte chamotserre-spetanama, ntšamo tsęngaftanga šmonjanmćá. <sup>2</sup> Běngbe Bětsánaca šmochtseimpadana cha chašotsěbuáyuyama, y chě puerte bacna entšanga ndońe chamondobenama jamama bęnga fchaisufrima, er nýetscanga ndońe quemochatošbuáchie chě fsěndbuayinyá palabrińe. <sup>3</sup> Pero Běngbe Utabná sempre jtsamana ntšamo tojayancá, y cha echanjama tsęngaftanga más chábęńe chašmotsošbuáchema, y ndońe nýe cachcá quecmatęńýa chě bacna soyęnga mandayá nýe ntšámna ndońe chacmondáborlama. <sup>4</sup> Y Běngbe Utabná entsama bęnga ndegombre ainanińe fchaitsejuabnama, ntšamo bęnga tchojanamęndacá mora šmojtsamama y cachcá sempre šmochtsamámna. <sup>5</sup> Bęnga, Běngbe Bětsá fsěntseimpadana, Běngbe Utabná benache chacmanýanýe bonshánana jtsebmnama ntšamo Běngbe Bětsá endbmćá, y chašmojtsesufrina ora, corente añemo chašmotsebmnama, ntšamo Cristo tojansufrí ora yojanbmćá.

*Nyetscanga entsamna jtsetrabájayama*

<sup>6</sup> Jesucristbeyeca catšátanga, Bëngbe Utabná Jesucristbe mándoca cbontsamënda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyeubamnye. <sup>7</sup> Cach tsëngaftanga tsábá šmondétatšëmbo ntšamo cmojtsamna jtsiyenana, ntšamo bënga fsëñjoyencá: bënga tsëngaftangbeñe fsëñjaniyena ora, nye ntjatrabajacá oyëñjayënga ndoñe queftsjatsmëna, <sup>8</sup> ni ndocnabe saná chibiáisesse, tondaye ntabuenaycá. Inyetsá enjamna; cada te bnëté y ibeta jabuache fsëñjantrabája, chca, tsëngaftanga ndoñe chacmondëtsamnama bëngbe uajabótama bënga jatatšatnayama. <sup>9</sup> Y ndegombre, bënga derecho fsëñjãnbomna tsëngaftanga jamëndama chašcújabuachama; pero masque chca, bënga jabuache fsëñjantrabája tsëngaftanga chašmotsetatšëmbuama ntšamo yomna jtsiyenama, y chca chašmotsamama. <sup>10</sup> Bënga tsëngaftangafaca fsëñjamna ora, mëntšá tcbonjanamëndá: Nda ndoñe tontseboše jatrabájama, cha cach ndoñe chaondëtsesá. <sup>11</sup> Chca fsëñsichamo, er bënga fsëñjátatšëmbona, báseftanga tsëngaftanguentšënga imojtsiyena tondaye ntsamcá, pero tša chë inyëngbe soyënguiñe jtsontremetënëse. <sup>12</sup> Chca oyena entšángbioye fsëñsabuayiyiná y fsëñtsamënda Bëngbe Utabná Jesucristbe mándoca, natjëmbana cachëngbe vida onguayíñe chamotsotrabáña.

<sup>13</sup> Jesucristbeyeca catšátanga, ndoñe chacmondëumantšé tsabe soyënga amana. <sup>14</sup> Nderado nda ntšamo quem tsbuanáchañe fsëñjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama. <sup>15</sup> Mo canye uayayacá ndoñe šmattsonyaye; šmochjabuayená mo canye catšatcá, chca ndoñe chaondëtsamama.

*Jtadiósoftanama*

<sup>16</sup> Bëngbe Utabná fsëntseimpadana, cha, chë entšanga tsabe ebionana ainaniñe chamotsebmoma iuamá, chaoma tsëngaftanga nyets tempo y nyetsca tescama chca chašmotsebmoma. Bëngbe Utabná tsëngaftangafaca chaotsemna.

<sup>17</sup> Nye quem palabrënga tsëngaftanga jacheuayama cach atšbe cucuátseca sëntsabianná. Atše chca sëndbauapochóca atšbe tsbuanachangá juabemama; ntšamo muentše entsabemancá entsininyíná quem tsbuanácha atšbiácha iuamnama.

<sup>18</sup> Atše, Bëngbe Bëtsá sëntseimpadana, Bëngbe Utabná Jesucristo chaoma tsabe bendicionënga tsëngaftangbeñe chaotsemnama.

## 1 Timoteo

### *Jachuayama*

<sup>1</sup> Atše Pablo, Jesucristbe ichmoná sëndmëna. Bëngbe Bëtsá Bëngbe atsebacayá endmëna y Bëngbe Utabná Jesucristo endmëna ndábeñe bënga, puerte jtsosbuáchiyëse mondobátmana ba soyënga bëngbiam cha yochjamama. Atše Jesucristbe ichmoná sëndmëna, er chata tbojanmandá atše chca jtsemnama. <sup>2</sup> Timoteo, atše quem tsbuanácha chontsabobiamná. Atše Bëngbe Bëtsabe soyëngama entsãnga sënjanabuayiná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše sëntseimpadana, Bëngbe Bëtsá Bëngbe Taitá, y Cristo Jesús Bëngbe Utabná, chaboma aca tsabe bendicionënga chacotsebomnama, chata chacmolastemama y ainaniñe tsabiana ebionana chacotsebomnama.

### *Pablo chë ndoñe ndegombre soyënga abuátambayëngbiam chënga tojanabuayená*

<sup>3</sup> Ntsamo chë Macedonia luaroye chocana sënjëftsanbocna ora tcbonjanimpadacá, mora cachife chochtësimpáda. Efeso puebloca cochjoquéda, básefta entsãnga chácuaemëndama chë ndoñe ndegombre soyënga ndoñe chamondëtsabuatambama, <sup>4</sup> ni nyets tempo ndoñe nyë chamondetsejuabná anteungbe cuentëngama, ni chë ba uabemana uabáinënga chë tempsca bëts taitangbiam. Er nyë chca yapa jesejuabnayanentsãna, jóbocnana nyë inyëngaftaca jabuachana enatsëtsanyiñe, y chca chëngbioye tondayama ntujabuáchana ntsamo Bëngbe Bëtsá jamama yojuabnacá chaósertama. Chë soyna nyë chábeñe jtsošbuáchiyëse jobenayana josértana.

<sup>5</sup> Chca mando entsemna nyetscanga chamotsenbobonshánama, y chë bonshánana endóbocana nda chabe ainanentše ndocna bacna soyënga tondbomnábensãna, ntsamo tojtsamcá tsabá yojtsemna ca ainaniñe tojtsejuabná y tojtsetatšëmbuábentšana, y Jesucristbeñe ndegombre ošbuachiyábentšana. <sup>6</sup> Báseftanga tmojtsajbaná chca jtsemnana y inyë soyëngama tmojontšë juabnayana; chíyeca chënga mora imojtsentšena nyë ndayámna ndoservena soyëngama enatsëtsnayana. <sup>7</sup> Chënga jtsebošana Bëngbe Bëtsabe ley abuátambayënga jtsemnama, pero chënga ndoñe yontsósertana ni ntsamo imojtsabuatambacá, mo ndayánaca ntsamo chënga tmojtsichamcá, mo chë soyënga ndegombre cuaftsemncá.

<sup>8</sup> Pero bënga mondëtatšëmbo chë leyënga tsabá yomnama; tsabá endmëna, chë ndayama chë leyënga tmojuamcá entsá chë leyëngaca tojtsamëse. <sup>9</sup> Bëngnaca mondëtatšëmbo, chë leyënga ndoñe tmonjuama chë nyetsca soyënguifë tsabá amëngbiam. Chë leyënga tmonjuama quemëntsa entsãnga jácastigama: ntsamo leyënguifë ndoñe tonseseleenciá amënga y ntsamo Bëngbe Bëtsá yobošcá ndámënga, chë Bëngbe Bëtsá ndoñe imondadoránënga y bacna soye amënga, Bëngbe Bëtsá ndoñe mondërrespetánënga y Jesucristbeñe jtsosbuáchiyana y Bëngbe Bëtsá jtsadoránana tondaye yondoservena ca juabnayënga, cachabe taitá o mamá obányënga y ndëmuanyënga imomna entsãnga obányënga, <sup>10</sup> boyabásaftaca o shembásaftaca bacna soye amënga y boyabásenga cach boyabásengaftaca bacna soye amënga, entsãnga enënga nyë inyabiama nyets tempo chamotseservënama, bosterënga y chë nyë bonamente Bëngbe Bëtsabiam júrayënga; chca entsayana, chë leyënga yomna jácastigama nyetscanga ndëmuanyënga ndoñe tmontsama ntsamo chë ndegombre बातëmbana soyënguifë iuayancá. <sup>11</sup> Ntsamo muentše chë leyëngama tijayancá, entsebuátëmbana chë Bëngbe Bëtsábiocana puerte tsabe noticiënguifë, chë ndegombre buatëmbana soye; Bëngbe Bëtsá, chë corente bendición bomná, šonjichmó chë buayenánana entsãnga jabuátambama.

### *Pablo Bëngbe Bëtsábioye tbojtanchuá, tbojanlastemama*

<sup>12</sup> Atše, Bëngbe Utabná Jesucristo sëndëtschuaná, er cha tojanjuabó, ntsamo cha šojanmandacá jobedësama atše tsjëtseprontanama, y chíyeca šojanabuayana atše chabiam chaitrabajama; y cha endmëna nda inétsama atše obenana chaitsebomnama chë trabajo jamama. <sup>13</sup> Cha chca átseftaca tonjanma, masque tempo atše chabe contra ba soyënga sënjánichamo, chabe ústonënga sënjanácama, y chabiam tondaye respeto ntsebomncá sënjánenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatšëmbo ndayá tsjánamama. <sup>14</sup> Y chca, Bëngbe Utabná ba tsabe bendicionënga atšbiam tonjanma, y chábeñe ošbuachiyá šonjánbema, y tonjanma atše cha chaitsebobonshánama y inyëngbioynaca. Cha chca bëngbiam tojama, bënga cányiñe mo canyáca Cristo Jesúseftaca bëtsemnayeca.

<sup>15</sup> Ntsamo chanjayancá ndoñe nyë bostero soye quenátsmëna, y nyetscanga entsamna chca ndegombre bëtsemnama jtsejuabnayama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëts bacna soye

amá sëndmëna. <sup>16</sup> Chíyeca, Bëngbe Bëtsá šonjanlastemá, jinjanyiyama cha puente uantado entšangafatacá yomnama. Y chë soye inýengbioye tojaninjanýé, chë nyetsca tescama yomna tšabe vida jtsebmomnama, chë chábëñe mochtsanošbuachéngbioye; chca tonjaninjanýé cachá átseftaca uantado jtsemnëse, atše nyetscangbiama chë más bëts bacna soye amá jtsemnëse. <sup>17</sup> ¡Entšanga nyets tempo chamotsinjanýá, chë Utabná nyets tempo mandayá y puente bëtsá y obená yomnama! Cha endmëna chë ndocna te echanjéftsobaná, chë entšanga ndoñe ntsobenana jinýamá y chë nýe canýe Bëngbe Bëtsá yomná. Chca chaotsemna.

<sup>18-19</sup> Timoteo, aca mo atšbe uaqiñacá condmëna. Atše tcbonjaimpadá, ntšamo tcbonjauyancá entšanga chacúyanama, ntšamo báseftanga Bëngbe Bëtsabe juabna oyebuambnayënga acbiama tmojanayancá, y chiñe jtsejuabnayëse chë Jesucristbe soyëngama chacopeliá y nyets tempo chca chacotsama, Jesucristbeñe puente jtsošbuáchiyëse, y lempe ntšamo tcojtsamama tšabá yojtsemnama ainaniñe jtsetatšëmbëse. Báseftanga, chënga ndoñe tšabá imonjétsama ca chë ainanoca juabnënga tmojánayana ora, chë soye ndoñe tmojanuena y chë causa, Jesucristbe soyënguñe ošbuáchiyana tmojtsanajbananga y tmojanontsé inýe buatëmbana soyënguñe jtsošbuáchiyana. <sup>20</sup> Chca tonjopasá Himeneo y Alejándroftaca, y atše sënjalesenciá Satanás chaoma chata chabosufrima; y chca, chata chabuatsjinýe Bëngbe Bëtsabiama ndoñe bacá ntsóyebuambnayana.

## 2

### *Pablo tojanabuayená ntšamo Bëngbe Bëtsá jtsadoránama*

<sup>1</sup> Nyetsca soyama más cbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuénta ora, nyetsca soyëngama ntšamo tojtsëjabotcá cha chamotseimpadana, nyetsca entšangbiama, y cha sempre chamotsatschuaná. <sup>2</sup> Entsemna, nyetscangbe tšabiama Bëngbe Bëtsá jtseimpadánama, pero masna quem luarentša reyëngbiama y inýe mándayëngbiama, chca, nyetscanga puente natjëmbana jtсийenama chamuetsobenama, y nyetsca soyënguñe tšabá jtsamëse, Bëngbe Bëtsá jtsatschuanayama, y entšangbe juabniñe tšabá chamotsemnana. <sup>3</sup> Chca jtsamana tšabá endmëna, y Bëngbe Bëtsá, bëngbe Atsebacayá, chama jtsóyejuayana; <sup>4</sup> y chca jtsóyejuayana, er cha endboše nyetsca entšanga atsebácanënga chamotsemnana y chë ndegombre buayenánana chamotsábuatmama. <sup>5</sup> Chca nyetsca entšangbiama endmëna, er nýe canýe Bëngbe Bëtsá nyetscangbiama endmëna, y nýe canýa endmëna nda yobena jamama entšanga tempcá tšabá Bëngbe Bëtsáftaca chamotsemnana; cha endmëna Jesucristo, cach entšá. <sup>6</sup> Er Jesucristo, mo canýa inýenga játsebacama cuaftopagacá, chabe derecho vida jtsebmomñama cachá tojanonýa y tojanóbana, chca, nyetsca entšanga chamotsobenama atsebácanënga jtsemnana. Chë soye cha tonjaninjanýé, nýa chama tempo yojtsemna ora, chë Bëngbe Bëtsá nyetsca entšanga atsebácanënga chamotsemnana yobošama. <sup>7</sup> Bëngbe Bëtsá chca nyetsca entšangbiama yobóseyeca, Jesucristo šojanábuaayana chabe ichmoná jtsemnana, chabe soyënga entšanga jtsabuayinyayama; ndegombre soye sëntsoyebuambná, ndoñe quetsátsbostero. Sonjanmandá chë ndegombre buayenánana chë ndoñe judiëngbioye jabuátambama, y chënga entsamna chiñe jtsošbuáchiyana.

<sup>8</sup> Ntšamo sënjayancá, atše sëntseboše nyetsca chë Jesucristbeñe ošbuachiyëngcá enefjuana luarënguenache, boyabásenga Bëngbe Bëtsáftaca chamotsencuénta, y chora celoye, Bëngbe Bëtsábioye cucuatše chamatsbaná; pero chamna, ainaniñe bacna soyënga ntsebmomná, inýengaftaca ntjatentjayanaycá, y inýengaftaca jabuachana ntjatenatsëtsnycá chënga chamotsemna.

<sup>9</sup> Y atše sëntseboše shembásenga entšayangá chamuatíchëtjo, mo chë tšabe shembásenga mondbetsichëtjoncá, ndoñe nýe entšanga chamotsëbuáuatjama y ntšamo tmojtsichëtjonama chëngna uámanënga imomna ca entšanga chamotsejuabnama. Ndoñe quenátamna jtseñóbotamayana, nýa mo chca chquëcnënga jtsemnëse, ni castellano soyëngaca o uámana fiantse ndëtšbëngaca, o yapa uámana entšayangaca, chca, nýe entšanga jinýama tšabá jtsemnana. <sup>10</sup> Pero aifne mo chë Bëngbe Bëtsá adóraye shembásenga mondbetsamcá jtsamëse, chë tšabe soyënga jtsamana.

<sup>11</sup> Nderado nda tojtsabuatambá ora, shembása bontsemna jtsatsjëndayana, chca ora tondaye ntjatichamcá, y chentša mándayënga chaotsayaunana. <sup>12</sup> Atše ndoñe quichatslesenciá, canýe shembása boyabásenga chaotsabuatambá, ni chaotsamënda. Canýe boyabása tojtsabuatambá o tojtsamënda ora, shembása ndocá chaondëtsichamo. <sup>13</sup> Chca chaotsemna, er Bëngbe Bëtsá natsana Adán tbojanpormá, y chentšana Eva; <sup>14</sup> y er Satanás Adánbioye ndoñe tbonjaningñé, ndayá chë shëmbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesenciá. <sup>15</sup> Pero shembása atsbocaná echántsemna, básenga quem luaroye endbaúshejangoyeca, pero chamna, aifne nyets tempo Bëngbe Bëtsábeñe tojtsosbuáchese, nyetscanga tojtsababuánýeshanëse, cachá nyetsca

soyënguifne jenomándama tojtsobenëse, y nyets tempo tšabe soyënga tojtsamëse, ntšamo Bëngbe Bëtsabe entšanga mondbetsamcá.

### 3

*Ntšamo ibojtsemna chë ošbuachiyëngcá enefjuanëngbeñe mandayá*

<sup>1</sup> Mëntšá ndegombre endmëna: nderado nda tojtseboše canye trabajo jtsebmomma, cán'yentše ošbuachiyëngcá enefjuanentše chë inye ošbuachiyënga jtsamëndayama, cha ndegombre yojtseboše canye puerte tšabe trabajo. <sup>2</sup> Chiyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná chaondëtsichamuama. Y mëntšánaca cha bontsemna jtsenama: nye canye shembásabe boyá; ntšamo jtsiyenama tšabá juabnayá chaotsemna, cachá nyetsca soyënguifne jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentše posada entšanga júyentšamiama, y chaotsobena botamana abuatambayá jtsennama. <sup>3</sup> Ndoñe yapa tmoýá o penzentsero chaondëtsemna; pero chaotsemna tšabá mandbomná, entšanga natjëmbana chamot-siyenama bošá, y ndoñe chaondëtsejuabná nye crocénana jtsebmomma. <sup>4</sup> Chaotsetátšëmbo ntšamo nyetsca chabe yebnentša entšanga botamana jtsamëndayama, y chaoma chabe básenga chë ntšamo cha tojayancá chamotsamama, ndocna te stëtsoye chamondëquedama; <sup>5</sup> er, nda cachabe yebnentša entšanga ndoñe tontsobena jtsamëndayama, chca, jntšamo nantsobena chë ošbuachiyëngcá enefjuanënga jtsanyënama? <sup>6</sup> Cha ndoñe chaondëtsemna cabá mora cuenta Jesucristbeñe ošbuachiyá; aiñe chca chë ošbuachiyëngcá enefjuanëngbe mandayá tojtsemnëse, nderado nye cachá uamana entšá nantsenobiamnaye, y ntšamo Bëngbe Bëtsá Satanásbioye tbonjancastigacá, chca bëtsemnama, cach soyama Bëngbe Bëtsá chë entšábioye buanjacastíga. <sup>7</sup> Chánaca bontsemna jtsiyenana jtsamëse, y chca chaotjsama ora, chë Jesucristbeñe ndošbuachiyënga tšabá chabiamna chamotsichamo. Chë entšá ndoñe chca tontsamëse, chënga chabiamna mochanjayana ndoñe tšabá yontsama ca, y Satanás echanjama cha chabócochëngo bacna soyënga jamama.

*Ntšamo ibojtsemna chë ošbuachiyëngcá enefjuanënga ujabuachaná*

<sup>8</sup> Cachcá, chë mándayëngbe ujabuachanënga mëntšá entsamna: uamana entšangcá nyetscanga chamotsetabna, uta palabra ndbomnënga; ndoñe yapa vínoye chamondëtsetmó, y ndoñe chamondëtseboše nye paselo becá crocénana jtsebmomma. <sup>9</sup> Chënga entsamna ndegombre jtsošbuachiyana chë Bëngbe Bëtsá tojinýanyë soyënguifne, chë ndayiñe bënga mondošbuaché, chëngbe ainaniñe inyetšá juabnënga ntjatsbomncá. <sup>10</sup> Natsana, chëngbiamna botamana šmochjshauarrepára jtsetatšëmbuama chënga aiñe o ndoñe montsobena mo chë ošbuachiyëngbeñe mándayëngbe ujabuachanëngcá josérviamna. Chënga nyetsca soyënguifne tšabá tmojtsemnëse, šmochjálesenciaye chiñe chamoservema. <sup>11</sup> Cachcá, chë shémanga mëntšá entsamna: nyetscangbiamna mo uamana entšangcá utabnënga, ndoñe uayátšenayënga, cachënga nyetsca soyënguifne jenomándama obenënga, y nyetscañe tšabe palabra bomnënga. <sup>12</sup> Canye ujabuachaná chaotsemna nye canye shembásabe boyá, y chaotsetátšëmbo ntšamo chabe básenga y nyetsca chabe yebnentša oyenënga jtsamëndayana. <sup>13</sup> Chë ujabuachanënga tšabá chiñe tmoservëñe, canye uamana puesto mochanjashjache, y chënga mochantsobena bëtš añémoca jtsóyebuambnayama ntšamo Cristo Jesúsbeñe tmošbuáchema.

*Ndayá Bëngbe Bëtsá bënga šojinýanyëcá, canye bëtš buatëmbana soye endmëna*

<sup>14</sup> Atše sentsobátmana pronto chjobenaye jama aca jauatsëtsayama; pero chca cbontsabobiamná, <sup>15</sup> nderado atše betscó jama ndoñe sënjobenase, chacotsetatšëmbuama ntšamo canya ibojtsemna nyetsca chë Bëngbe Bëtsábenga imomnëngaftaca. Chënga mondmëna chë Jesucristbeñe ošbuachiyënga, chë Bëngbe Bëtsá Ainabe básenga. Chënga chë Bëngbe Bëtsabe ndegombre soyënga mondbomna chë más uamana puestoca quem luarentše, y tša mondëntšena chama inyëngbioye jáyëñjanama. <sup>16</sup> Nya ndegombre endmëna, Bëngbe Bëtsá soyënga šojinýanyë, y chë soyëngaca bënga montsobena jtsiyenana, chë Bëngbe Bëtsabe entšanga imomnëngcá; chë soyënga bëngbiamna ndegombre bëtš buatëmbana soye endmëna, y chë buatëmbana soye mëntšá endmëna:

Cristo quem luarentše cach entšacá entšángbioye tojánëbëbuacna.

Chë Uamana Espiritu tonjinýanyë chca nyetsca soyënguifne tšabá amá yomnama.

Angelënga cha tmojáninýe, y chabiamna ba luarënguentsä entšángbioye tmojanabuayená.

Ba entšanga quem luarentše chábeñe montsanošbuaché, y Bëngbe Bëtsá celoye tbontanatsbaná, cha puerte bëtšá y obená yomnama jinýanyiyëse.

### 4

*Báseftanga chë tšabe benachentsana mochtsojuánañe*

<sup>1</sup> Uámana Espíritu, nŷetscanga catafjosertaycá tojayana, quem luare jopochócama tempo chaojtsobeco ora, básefta entšanga camochtsajbaná ošbuáchiyana chē ndayiñe bēnga Jesucristbiama mondošbuachē soyēnguifñe ca. Chēngna, espíritēnga entšanga áingñayēnga mochāntsayaunana, y chē ndoñe ndegombre soyēnga chē bacna bayējēnga entšángbiye mochtsabuátambaye soyēnguifñaca. <sup>2</sup> Chca buatēmbana soye jtsóbocanana chē bacna entšango ntšamo ndegombre tmojuabnacá ndinŷinŷnayēngbentšana y chē bosterēngbentšana. Chēnga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyēnga tmojama causa, chēnga nŷe chca chēngbe ainaniñe jésejuabnayana. <sup>3</sup> Quem entšanga ndoñe ntjalesénciana inŷyēnga chamotsobouamama, y jtsēmāndayana básefta sananga entšanga ndoñe chamondētsesama. Ntšamo chēnga chíne tmojtsebuatēmbacá ndoñe ndegombre soye ntsemnana, er Bēngbe Bētsá chē sananga tojanma, Jesucristbeñe ošbuáchiyēnga y chē ndegombre soyēnga uabuátmēnga chamóyēngacñiama, Bēngbe Bētsábíoye chama jtsatschuanayēse. <sup>4</sup> Er lempe ntšamo Bēngbe Bētsá entšanga chamosama tojamcá tšabá entsemna. Ndoñe quešnátamna ndaye saná jtsaboténana, bēnga chē saná tmojuáyēngacñe ora, Bēngbe Bētsá chama tmojētschuase; <sup>5</sup> er chca saná Bēngbe Bētsábíoye tšabá jtsinŷnana, cachá chca tojayánayeca, y bēnga chē sanama cha mondbatschuayama.

*Jesucristbiama trabájayñe canŷe tšabe oservená*

<sup>6</sup> Aca, chē soyēnga ošbuachiyēngbiye chacojtsabuátambase, aca Jesucristbiama trabájayñe canŷe tšabe oservená cochántsemna. Y mo nda bētscá añemo jtsebomnana botamana tojtsesacá, cachcá, ácnaca puerta ošbuáchiyana y ainaniñe bēts añemo cochántsebonna; chca echántsemna, chē bēnga mondošbuachē buayenana soye aca icuatsjendá y icoyeunánayeca, y ntšamo chē tšabe buatēmbana soyēnguifñe endayancá sempre icuámayeca.

<sup>7</sup> Pero ndoñe nŷe quem luarentša entšangbe cuentēnga y ndoservena cuentēnga cattsuennana. Ba soyēnga cochjama aca bēts añemo ainaniñe chacotsebonnana, mo nda bēts añemo jtsebomnana cachabe cuérpoca ba soyēnga cuaftsamcá, ntšamo Bēngbe Bētsá jadórana yomncá jtsiyenama jtsamēse; <sup>8</sup> cachabe cuérpoca ba soyēnga jamana más añemo jtsebomnana, añe batšatema endoservena; pero jtsiyenana Bēngbe Bētsábíoye jadórana yomncá jtsamēse, puerta enduámama y juajabuáchana nŷetsca soyēnga tšabá chaotsemnana; chca jtsamana puerta tšabá endmēna cachabe vidama quem luarentše, y chē inŷe vidócnaca. <sup>9</sup> Ntšamo tijayancá ndegombre entsemna, y nŷetscanga entsamna jtsejuabnayana chca ndegombre bētsemnana. <sup>10</sup> Y chē soyama bēnga puerta mondētrabá y mondēsufrina, er chē Bēngbe Bētsá Ainábeñe puerta mondošbuachēyeca, bēnga mondobátmana cha yochjama soyēnga bēngbe tšabíama. Cha endmēna chē nŷetsca entšangbe atsebacayá, pero ndegombre masna, chábeñe ošbuáchiyēngbe atsebacayá cha endmēna.

<sup>11</sup> Ntšamo quem soyēngama tcbonjauyancá entšanga cochtsamēndaye y cochtsabuátambaye. <sup>12</sup> Ndoñe catjaleséncia, aca bobontse comnana, ndánaca chacmotsábóyēnjama. Pero añe bētscá cochtsama, chēnga puerta chacmotsarrespetánama, chca jtsamēse icoyenama jtsónŷayēse, cachcá chacmotsamama: botamana jtsóyebuambnayēse, nŷets tempo tšabe soyēnga jtsamēse, nŷetscanga jtsababuánŷeshanēse, Bēngbe Bētsábeñe corente jtsóšbuáchiyēse, y puerta tšabía jtsemnēse, ainaniñe ndocna bacna soye ndbomná. <sup>13</sup> Atše choca chaijashjanguēntscuana, cochtsentšena chē Bēngbe Bētsabe uabemana palabrenga entšángbeñe jtsaliayama, y chēnga jtsabuátambayama y jtsabuayinayama. <sup>14</sup> Achíoye Bēngbe Bētsá obenana tmojanatšetá tšabe soyēnga jamama chacotsobenama, ošbuáchiyēnga jujabuáchama. Bēngbe Bētsabe juabna oyebuambnayēnga achíama tmojanoyebuambá ora, y chē ošbuachiyēnguentša bētséjémēnga chēngbe cucuatšēnga ábeñe tmonjancá y Bēngbe Bētsá achíama tmonjanimpadá ora, chca tšetana obenana tcojanóyēngacñe. Chē soye sempre cochtsinŷyena.

<sup>15</sup> As, aca cmontsemna sempre jtsamana chē soyēnga ntšamo tcbonjauyancá. Cochtsentšena chē soyēnga tšabá jtsamana, chca, entšanga chamobená jinŷama, aca cada te más tšabá lempe cojtsamama. <sup>16</sup> Botamana cochtsantješna, aca chē tšabe soyēnga jtsamēse cojtsiyenama, y chē tšabe buatēmbana soye inŷyēnga cojtsabuátambama. Cada te chca cochtsama, y chca, cach aca cochanjenájabuache atsbocaná jtsemnana y chē ábíoye ouenanēngnaca játsebacama.

## 5

*Ntšamo Timoteo ibojtsemna chē inŷe ošbuáchiyēngacñiama jtsemnana*

<sup>1</sup> Bētséjémēnga ndoñe catjucácana; chca játamama, cochjábubayenaye, chēnga mo cach acbe taitá cuaftsemncá; y chē bobontšēngacñiama cochjama, mo chēnga acbe catšátanga cuaftsemncá. <sup>2</sup> Chē bētsanana shembásēngacñiama tšabá cochtsemna, chēnga mo cach acbe mamá

cuafsemncá; y chë tobiasëngaftaca cochjama, chënga mo acbe uabénanga cuafsemncá; chëngaftaca cmontsemna puerta tšabia jtsemnana, chëngbiama ndocna bacna juabnënga ainaniñe ntsebmncá.

*Ošbuáchiyëngbenache viudanga tmojtsemna ora*

<sup>3</sup> Chë ndegombre viudanga, chë ndocná mondbomna chaújabuachama, chënga cochtsar-respetana y cochtsëjabuachana. <sup>4</sup> Pero canye viudá nderado básenga o nietënga tuabamna, chënga entsamna natsana jshauatsjínýana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtsanýenëse, y chëngbe bëtsëtsangaftaca tšabá chamotsama, ntšamo chënga chëngaftaca tmojanmcá, er chca jtsamama, Bëngbe Bëtsá jtsóyejuayana. <sup>5</sup> Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama jtsobátmanana, y nyëts tempo jtseimpadánana, bnëté y ibeta, cha chabuájabuachama. <sup>6</sup> Pero canye viudá, nye quem luarentša entšangftaca oyejuayá jtsemnana soyënga tojtsamëse, cha masque ainá tojtsemna, Bëngbe Bëtsabe bominiñe mo canye obanacá jtsemnana, er chábioye ndoñe ntsešervénana. <sup>7</sup> Lempe chë soyënga chamotsamama ošbuáchiyënga cochtsamëndaye, chca, ndocná ndocna bacna soye chëngbiama jatichámuama chaondëtsebmnnama. <sup>8</sup> Er, nda cachabe entšanga y más, cachabe pamíllanga ndoñe tontsacuedana, cha chca jtsinýinýayana chë buatëmbana soyënga, ndayíñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiama más bacna entšá jtsemnana.

<sup>9</sup> Chë juajabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nye canye boyá ibnabomná. <sup>10</sup> Entšanga cha chamotsábuatma mo canye tšabe soyënga amacá: chabe básenga botamana tojabëché, áshjajnëga chabe yebnentse posada júyentsámiamana prontaná, Bëngbe Bëtsabe entšanga imomnënga tojushecjabebé, chë imosufrínënga tojújabuache; jayanana, nda sempre nyëtsca tšabe soyënga jamama yontšená.

<sup>11</sup> Pero chë lístañe, chë viudanga chnënguana bnëtsana uata cabá ndbomnënga ndoñe catjúbiamá; er chë chëfta uata ndbomnënga, yapa nye cachënga tšabá jtsemnana juabnënga jtsebmnnana y soyënga jtsamana. Chcase, chënga Jesucristbioye ya ndoñe ntsešervénana, y chora jtsebošana cachiñe jtëtóbouamayama; <sup>12</sup> y chca, inýenga chëngbiama mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama. <sup>13</sup> Y cabá más, tondaye ntsamcá tmojtsemna ora, chënga juabouinýana oyënjayënga jtsemnana, y yebnënguenache jtsanama; y ndoñe nye oyënjayënga, sinó oinýanëngnaca, inýengbe soyënguñe jtseyentsbëtsjuanëse, y ndoñe yontsemna jayanama soyënga jtsichámëse. <sup>14</sup> Chýeca, atše sëntseboše, chë viudanga cabá tobiasënga chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, bëngbioye uayayënga chamuayana, chënga chca ndoñe tšabá montsama ca. <sup>15</sup> Atše chca sëntsichamo, er básëfta viudanga cabá tobiasënga tmojtsajbaná Jesucristo obedecénana, y tmojontsé Satanás joye-unayana.

<sup>16</sup> Canye shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga juajabuáchana, chca, chë ošbuachiyëngcá enefjuanënga ndoñe chaondëtsemna chëngbiama jatantješnana; chca, chë ošbuáchiyënga mochanjobenaye chë ndegombre viudanga, chë chaújabuachama ndocná mondbomnëngbioye juajabuáchama.

*Ntšamo cuantsemna chë ošbuachiyëngbeñe amëndayëngaftaca*

<sup>17</sup> Chë bëtsëjemënga, tšabá chë ošbuachiyëngcá enefjuanënga tmamëndangna, jtsomerecénana entšanga más chamotsarrespetánama, chca trabajo bëtsamama, y más, chë sempre entšanga jtsabuayinayama y jtsabuátambayama imontšëngbioye. <sup>18</sup> Er Bëngbe Bëtsabe uabemana palabrënguñe endayana, mëntšá: “Aca canye toróftaca shajuana tmojtsatbaná luariñe chacojtsetrabá ora, ndoñe catjuanguëtšenaye ca”; inýoca: “Chë trabajayá merecido jtsebuájonana juacánama ca”. Chýeca, chë bëtsëjemëngcá amëndayënga jtsomerecénana entšanga chamotsarrespetánama.

<sup>19</sup> Nderado nda tcmojáuyana canye bëtsëjema bacna soye tojama ca; pero útata o unga entšanga más ndoñe tmontsemna, chca tojamama tmojinýe, y chë bëtsëjema mal quedayá ndegombre soye yojtsichamo ca ndoñe tmonjayana, ndoñe catjóeyunaye.

*Inýe soyëngama jábuayenama*

<sup>20</sup> Chë bëtsëjemënga nye bacna soyënga tmojtsamënga, nyëtsca entšangbe delante cochjucána, chca nyëtsanga uatjana chamuishache, bacna soye amama castigo mochtsebmnnama.

<sup>21</sup> Atše cbontsemánda, Bèngbe Bètsabe delante, Jesucristo y Bèngbe Bètsabe bocacana angeléngbe delante, chë mandënga chacotsamama; pero ndoñe catjayana canye bètsèjema tšabá o ndoñe tšabá tonjama ca, cabá ndoñe lempe botamana ndabonñe ora, ni canye entšá inýengbiana más tšabá ntjatabacacnaycá. <sup>22</sup> Ndocnabe bestšašifne cucuatšënga catjajájua, Bèngbe Bètsábioye chabiana jaimpádama, jinýinýiyama cha mo canye bètsèjema amëndayacá josérviana yojtsohenama, nýe betso, juabuáyanama botamana ntjenjuaboýcá. Pero nýe ntjenjuaboýcá chca tcojamëse, y cha canye bacna soye amá tomnëсна, ácnaca cochántsemna mo chabe bacna soyënga cuafjamcá. Cochtsantjesna ndocna bacna soyënga ainaniñe chacondëtsebonmna.

<sup>23</sup> Aca ba soye uafšbiaca condbëtsešoca causa, ndoñe más nýe ena búyeshe cattseftmana, sinó base vínoynaca.

<sup>24</sup> Entšanga mondobena tšabá jinýana, básefta entšangbe bacna soyënga, cabá chë soyëngama chëngbioye botamana ntjájaye ora; pero inýengbe bacna soyëngama, nýe tocjáiyentšana entšanga chama jtsatšëmbuana. <sup>25</sup> Cachá, báseftanga entšangbe delante tšabe soyënga jtsamana, y cachora chë soyëngama jtsotatšëmbuana; y inýengna iytëmná tšabe soyënga jamana, pero masque chca, ndaytënaca chë tmojanma tšabe soyëngama inýenga mochanjátatšëmbona.

## 6

<sup>1</sup> Chë nýets tempo nýe inýabiana oservënga entsamna, chëngbe nduiñëngbiana jtsejuabnayana, chënga uámana entšanga imomnana y nýets respeto jtsebonmna imomercénama. Chca entsamna, Bèngbe Bètsabe Uabainama y chabe soyëngama, ndayiñe bënga mondošbuaché y entšanga mondbëtsabuatambaye, inýenga podesa ndoñe chamondëtšoyebuambnana. <sup>2</sup> Y chë imobomna Jesucristbeñe ošbuáchiyënga nduiñënga, chëngbioye nýe batšá ndoñe chamondëtšarrespetana, er chënga Jesucristbeyeca chëngbe catšátanga mondmëna, y entsamna más tšabá jtsaservënana, er chëngbe trabajuentšá tšabe soyënga imóyëngacañe, Jesucristbeñe ošbuáchiyënga mondmëna, y Bèngbe Bètsabe bonshánënga.

*Jtsiyenana Bèngbe Bètsá jadórama soyënga jtsamëse, endmëna chë ndegombre bomnana*

Quem soyënga cmontsamna entšanga jtsabuátambayana, y becá jtsëtsëtsnayana chca chacmóyaunama: <sup>3</sup> Nderado nda inýe soyënga tojtsabuatambá, y ntšamo bënga mondëjuabnacá, chë Bèngbe Utabná Jesucristbiana ndegombre buatëmbana soyama, ni chë buatëmbánana ntšamo jtsiyenama Bèngbe Bètsábioye jadórama yomna soyënga jtsamëse, ndoñe cachá bëngcá tontsejuabnase, <sup>4</sup> cha nýe cachá puerte uámana entšá yojtsenobiamná, y tondaye ndosertaná yojtsemna. Cha tša jtsogustánana ba soyëngama y palabréngama jabuachana jtsenatsëtsnayana, y cha nýe chama vida jësebonnana. Cha chca yomna causa, nýe jtsebošana chë inýa tojashjache soyënga jtsebonmna, nýetscanga ndoñe cachá chamondëtsejuabnana jtsamana, inýengbioye joyánguanguama jtsebošana, bacna soyënga ndoñe ndegombre soyënga inýengbiana jtsejuabnayana, <sup>5</sup> y inýengtafaca nýe sempre jtsenpenzëtsiayana, er chëngbe juabniñe nýe bacna soyënga jtsebonmna, chë ndegombre soyënga quematábuatma, y jtsejuabnayana chë soyënga Bèngbe Bètsá jadórama jtsamana, nýe más soyënga jóyëngacñama yoservena ca. <sup>6</sup> Ndegombre canye entšá bètscá tšabiana jëftsashjáchana, cha tojtsiyena Bèngbe Bètsábioye jadórama soyënga jtsamëse, y sempre oyejuayá nýe chë tojtsebonma soyëngaca tojtsemnëse. <sup>7</sup> Er bënga tmojanonýná ora, quem luaroye bëngaftaca tondaye tmonjániyëbo, y quem luarentšana cach tondaye quemochatobenaye jëftsocñama. <sup>8</sup> As, bënga ndayá jasama y ndayá jitchëtjuama tmojtsebonnëse, chë soyëngaca oyejuayënga mochtsemna. <sup>9</sup> Pero chë bomnënga jtsemnana tmojtsebošënga, bacna soyënga jamama tojócochëngo ora, ndoñe ntsemorochana y pronto chiñe jotsatsana, mo bayá uachmaniñe cuafjotsatšcá, chë entšanga Satanase cucuatšifne ndeolpe jotsatsana; chora chënga jtsamana soyënga mo chë juabna ndbomnëngcá, y chë cachëngbiana ndoñe tšabe soyënga tmojtsamëngbe juabnëngaca. Y mo chë uandbemana barco, bëtš búyeshe asentoye tojtsenatjëmbcá, cachá, chë bacna juabnënga bomnana, chëngbioye mochántsapochocaye y nýetsca tescama mochántscastigaye. <sup>10</sup> Crocénana jtsebonmna yapa jtsebošana, jamana entšabe ainanentšana nýetsca bacna juabnënga y soyënga chaóbcocna; y básefta entšanga, crocénana jtsebonmna yapa jtsebošana causa, tmojtsajbaná ošbuáchiyana chë Bèngbe Bètsabe soyënguifne, chë bënga mondošbuaché soyënguifne, y chca cachëngbiana tmojama puerte chamosufrima y bëtš ngmënana jtsebonmna.

*Chë tšabe soyama jtsenojuerzánama, ošbuáchiyana sempre chaotsemnana*

<sup>11</sup> Pero aca, Bèngbe Bètsabiana oservená, chca benachentšana cochtsojuánañe. Nýa cochtsentšena, chë Bèngbe Bètsabe bominiñe tšabá yomncá jtsamama, chë ndayá Bèngbe



Bětsá jadórama yomncá jtsamama, Jesucristbeñe puerte jtsosbuáchiyama, nyetscanga jtsababuányeshanama, Běngbe Bětsábeñe jtsobátmaněse puerte uantado padecena soyěnguiñe jtsemnana, y corente jtsababuányeshaněse nyetscanga chacotsěnyayama. <sup>12</sup> Chě tsabe soyama, ošbuáchiyana joboguiyanama cochtsenojuerzana. Chě nyetsca tescama yomna tsabe vida cochjashjache; chama Běngbe Bětsá tcmojanchembo y bětscá entsāngbe delante tconjāyana tsabe soyěnga Jesucristbiana, ndayĩne aca icošbuaché. <sup>13</sup> Y mora, Běngbe Bětsabe delante, nda endbama lempe ntšamo quem luarentše yobinýncá vida chaotsebmnama, y Jesucristbe delante, ntšamo cachabiana ndegombre bemncá Poncio Pilatbe delante lempe tojanayaná, chatbe delante cbontsemánda, <sup>14</sup> lempe cochjama ntšamo tcbonjauyancá, ndocna soye chacmonděntšashbe jamama, y cochtsiyena, ntšamo ndocná tondaye chaondětsebmna jayanama aca bacna soye tcojama ca. Y chca cochtsama Běngbe Utabná Jesucristo quem luaroye yochjěsaběntscuana. <sup>15</sup> Y nýa chě soyama chě tempo chaojőshjango ora, Běngbe Bětsá chca echanjýnyāyie, er cha endmēna chě corente bendición bomná y chě nýe canýe Mandado. Cha nyetsca reyěngbiama, chě más uámana Rey, y nyetsca aměndayěngbiama, chě más uámana Utabná. <sup>16</sup> Nýe cha ndoñe bondmēna ndocna te ntjóbanana, y cha canýe běts buashinýinyāna luarentše endoyena y choye ndocná yondobena joběconana. Cha ndocná tbonjinýe y ndocná yondobena jinýana. ¡Entšanga nyets tempo chamotsinýanyná cha puerte bětsá y obená bětsebmnama! Chca chaotsemna.

<sup>17</sup> Chě quem luarentša soyěngaca bomnēnga imomnēnga, cochjáměndaye enábotamnyāyēnga ndoñe chamondětsebmnama, ni lempe tsabá yochjóbcnana, bětscá soyěnga bětsebmnama ndoñe chamondětsobátmana, er chě tcbomna soyěngama ndoñe ntsótatšěmbuana ndayěntscóñama chca mochtsebmnama; pero aĩne, Běngbe Bětsábeñe jtsosbuáchiyěse, chěnga chábeñe chamotsobátmana. Cha endmēna chě sempre bětscá soyěnga šnetsatšatnayá; y chca, cha jamana bēnga chamotsobena nyetsca chě soyěngaca oyejuayēnga jtsemnana. <sup>18</sup> Ntšamo tsabá yomncá chěnga chamotsama, ba tsabe soyěnga chamotsama, y siempre tsabe ainánaca chamotseprontana entsānga ba soyěnga jatšatayama, y ndaye tmobomna soye entsāngaftaca jenájatayama. <sup>19</sup> Mo nda bětscá shajuana tojtsábuajo y jtsatšěmbuana yochtsebmna más chcoye jasama, cachcá, quem bomnēnga ba tsabe soyěnga tmojtsaměse, mochántsetatšěmbo chěnga bětscá tsabe bendicionēnga más chcoye mochtsebmnama. Y chěnga chě soyěnga tmojtsaměse, chěnga chě ndegombre vida, chě nyetsca tescama yomna tsabe vida mochanjěftsashjache.

*Inýe soye Timotéobiye tbojanbonýé*

<sup>20</sup> Timoteo, ndayá Běngbe Bětsá tcmojabonýecá, botamana cochtsinýena. Entšanga nýe quem luarentša soyěngama encuěntayana, ndoñe cattsuenana, ni chě ndoservena soyěngama jabuachana enatsětsnayana, chě ndayama entsānga jtsichámuana becá osertánanentsāna chca yóbocana ca, pero ndegombre chca ndoñe ntsebmna. <sup>21</sup> Atše chca sěntsichamo, er báseftanga chca osertánana imobomna ca ichámēnga, Jesucristbeñe ošbuáchiyana y chě bēnga mondošbuaché soyěnguiñe ošbuáchiyana tmojtsajbaná.

Atše, Běngbe Bětsá sěntseimpadana, ácebeñe tsabe bendicionēnga chaotsebmnama.

## 2 Timoteo

### *Jachuayama*

<sup>1</sup> Atše Pablo, Jesucristbe ichmoná sēndmēna, Bēngbe Bētsá chca yobóseyeca. Jesucristo sonjichmó entsānga jábuayenama Bēngbe Bētsabe šbuachenánama, ntšamo cha inētsamama entsānga chē n̄yetsca tescama yomna tšabe vida chamotseboimnana; y chca vida montseboimna Cristo Jesúseftaca cānyīñe mo can̄yáca bētsēmnyayeca. <sup>2</sup> Atše quem tsbuanácha cbontsabobianná, acbiama Timoteo, aca mo atšbe bonshana uaquiñacá, Crístbeñe condosbuachema. Atše sēntseimpadana, Bēngbe Bētsá, Bēngbe Taitá, y Jesucristo, Bēngbe Utabná, chaboma ácbēñe tšabe bendicionēnga chaotsemnana, chata ácbioye chacmolastemama, y acbe ainaniñe tšabe ebionana chacotseboimnana.

### *Ndoñe ntsēuatjana entšángbeñe Jesucristbiama jóyebuambayama*

<sup>3</sup> Sempre Bēngbe Bētsáftaca stsencuēnta ora, acbiama sēndbētsenojuabnaye, y acbiama sēndbētsatschuanaye bnēté y ibeta; y Bēngbe Bētsá endmēna nda atše sēndēservena, ainánaca jtsejuabnaye y jtsetatšēmbēse, ntšamo atše stsamcá tšabá bētsēmna, cachcá ntšamo atšbe bēts taitanga tmojanmá. <sup>4</sup> Atše sēndbētētenojuaboye ntšamo aca, chocana atše sēntanabo ora shēchbuiye tconjanoperdema, y chíyeca atše tša sēntseboše aca jtētinyama, atše puerte oyejuayá chaitsemnana. <sup>5</sup> Bēngbe Bētsá acbiama sēndbatschuaye, er atše sēndbātenojuaboye aca Jesucristbeñe ndegombre ošbuáchiyana condboimnana. Natsana, acbe bēts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sēndētātšēmbō.

<sup>6</sup> Chíyeca sempre cochtsantješna quem uamana soyama: Mo nda can̄ye shin̄yāñe tojt-sajuiñyínacá, chentše sempre chaotsoiñama, cachcá aca, chē Bēngbe Bētsá tmojatsetá obenana tšabe soyēnga jamama, sempre cochtsin̄yena. Chē obenana aca conjanóyēngacñe, atšbe cucuatšēnga acbe bestsašīñe sēnjanjajó y Bēngbe Bētsá acbiama sēnjanimpadá ora. <sup>7</sup> Er Bēngbe Bētsá tonjama bēngbe ainaniñe Uamana Espiritu chaotsemándama, uatjana ndoñe ntseboimnana, ndayá obenana bēnga chamotseboimnana, bonshánana Bēngbe Bētsabiama y n̄yetscangbiama chamotseboimnana, y cabēnga jenomándama chamotsobemana. <sup>8</sup> Chíyeca, ndoñe cattseuatja entsānga jáuyanama, ntšamo tcojin̄ye y cojtsetatšēmbcá Bēngbe Utabnabiama ndegombre bētsēmna; n̄i atšbiama ndoñe cattseuatja, atše cárceloye sēndutámenama, chabiama oservena causa. Chamna, chē Bēngbe Bētsá cmochanjátsetaye obenánaca, sempre cochtseprontana jasúfriama, átseftaca y in̄yengaftaca, entsānga tšabe noticiēnga abuayin̄yaye causa. <sup>9</sup> Bēngbe Bētsá endmēna nda bēnga šojatsebácá, y šojáchembo jtсийenama mo chábēnga imomnēngcá jtsamēse. Y cha chca tojama, ndoñe nderado bēnga ndoye tšabe soye tmojamama, ndayá cachá chca chaotsemnana inabóseyeca y bēngbe tšabiama juabna bómnyayeca. Cha chca inajuabnaye, cabá quem luare ndmēna orscana; y chca jamama Bēngbe Bētsá inajuabnaye, chē ndayá Cristo Jesús bēngbiama jamama sóyeca. <sup>10</sup> Y mora, Bēngbe Atsebacayá Jesucristo tojaboyeca, Bēngbe Bētsá šojin̄yan̄yē cha bēngbe tšabiama juabna yobomnana. Jesucristo tonjama, entsānga n̄yetsca tescama obanēnga ndoñe chamondētsemnana, y tonjama bēnga chamotsetatšēmbuama, chē tšabe noticiēnga chabiama jounēse y joyeunayēse, bēnga chē n̄yetsca tescama yomna tšabe vida mochjábomnana, ndoñe n̄ye jopochócama cuerpēnguīñe.

<sup>11</sup> Bēngbe Bētsá šojanábuayana tšabe noticiēnga entsānga jábuayenama, Jesucristbe ichmoná jtsemnana y entsānga jabuátambama. <sup>12</sup> Chē causa, atše mora cárceloca quem soyēnga sēntsesufrina; pero chama atše ndoñe quetsátēuatja, er atše sēndētātšēmbō ndábeñe atše stsošbuáchemá, y corente sēndētātšēmbō cha yobena jtsin̄yenana ndayá šojabon̄yecá, chē ndayté cha yochjésabēntscuana.

<sup>13</sup> N̄yets tempo, chē ndegombre buayenánana, ndayá átsbentsana tconjanuencá, entsānga cochtsabuayin̄yaye, entsānga jtsin̄yan̄yayēse aca Jesucristbeñe icošbuáchemá, y Bēngbe Bētsá y n̄yetscanga icuababuán̄yeshanama, y chca yomna aca Cristo Jesúseftaca cānyīñe mo can̄yáca bētsēmnyayeca. <sup>14</sup> Chē Uamana Espiritu, chē bēngbe ainaniñe endoyenabe uajabuáchenanaca, ntšamo Bēngbe Bētsá tmojabon̄yecá sempre cochtsin̄yena.

<sup>15</sup> Ntšamo ya condētātšēmbcá, n̄yetsca ošbuáchiyēnga Asia luaroquēnga cachcá šmonjeson̄yá, y chentše bontsemna Figelo y Hermógenes. <sup>16</sup> Pero Bēngbe Utabná Onesiforbe pamillanga chaotsalastemana, er cha ba soye šonjanañemó, y atše cárceloye utámenama cha ndoñe quenjatēuatja. <sup>17</sup> Masna, Romoye tojabánashjango ora, cha botamana šojánguango y šonjánin̄yena. <sup>18</sup> Bēngbe Utabná lastemado cháftaca chaotsemna, ntšamo n̄yetscanga tmojamcá tšabá o ndoñe tšabá yontsemnana cha yochjayana ora. Aca corente condētātšēmbō ntsachetšá Onesiforo Efeso puebloca šonjanējabuachama.

## 2

*Jesucristbiam canye tšabe soldado*

<sup>1</sup> Y aca, atšbe uaquiña, chë Cristo Jesús acbiam tšabe juabna yobomnentsana, bëtscá añeño ainaniñe cochtsebomna. <sup>2</sup> Ntšamo ba entsangbe delante šconjoyeunacá, cach buayenánana, boyabásenga nyétscañe tšabe palabra bomnënga cochjábanyiye, y chamot-sobena inyënga cachcá jabuatambama.

<sup>3</sup> Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entšanga abuayinayea causa, ainaniñe bëtš añemo cochtsebomna, mo canye tšabe soldadca, cha chabe mándayabiam jasúfriana. <sup>4</sup> Ndocna soldado ntjátanana shjoca soyënguine vida jtsebomnama o crocénana juacánama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama. <sup>5</sup> Y canye travisiayá, inyënga jáyëñjanama, canye soye juacánama; pero ntšamo chë uacanánana jočfama tomncá ndoñe tonjatravisiase, cha chë ndoñe ntjosháchiñama. Cachcá, acbe trabajo cochjama ntšamo cmojtsemncá. <sup>6</sup> Chë jajañe trabajayá derecho jtsebomnana chë natsaná jtsemnama, chë tmojatbaná sananguentšana ndayánaca jtsebomnama. Acaftaca cachcá echanjopáca, chë trabajo tšabá chacojamëse. <sup>7</sup> Chë cbontsatsëtsnañe cochtsenójuabnaye, y Bënge Utabná echanjama lempe chacmósertama.

<sup>8</sup> Sempre cochtsenójuabnaye Jesucristbiam, ndabiam Bënge Bëtšá tojanma cháuatayenama y enjamna canya rey Davidbentsana entšá, ntšamo atše chabiam sëndabuayiná tšabe noticiënguine endmëncá. <sup>9</sup> Chca abuayinayea causa, atše sëntsesufrina, nya cadenëjuangácnaca utsbuaná, mo canye bëtš bacna soye ochjajnayacá. Pero masque atše chca sëntsemna, chë Bënge Bëtšabe soyëngama buayenánana inyënga entšangbioye montsabatambá. <sup>10</sup> Chýeca atše nyëtscá padecena soyëngaca sëndëtsóboyana, Bënge Bëtšabe bocacánënge tšabiam, chëngnaca atsebácanënga chamotsemnama, Cristbeñe jtsošbuáchiyëse; y Cristo Jesús bëtšëtsanga cháuabiamama, y cháftaca nyëtscá tescama chamotsiyenama.

<sup>11</sup> Mëntšá ndegombre endmëna:

Cristo Jesús tojanóbana ora, enjamna mo bëngnaca cuafjobancá, er bënga tmonsajbaná oyenana ntšamo tempo monjaniyencá y Jesucristbeñe montsošbuachë; y chca, bëngnaca cháftaca mochantsiyena;

<sup>12</sup> Bënga chë padecena soyëngaca tmojtseufrina ora, tmojtsemorochëse, bëngnaca Jesucristoftaca mochántsemandaye.

Bënga tojayana, cha ndoñe monduabatma ca, as cha bëngbiámnaca cachcá echanjanya;

<sup>13</sup> Bënga chábeñe ndoñe tmontsošbuáchese, masque chca, cha cabá echanjama ntšamo tbojašebuachenacá, er cha lempe jamana, ntšamo sempre iuetsemncá jtsinýanýnayëse.

*Canye trabajayá, ndáftaca Bënge Bëtšá jtsóyejuayana*

<sup>14</sup> Chë tcbonjauyana soyëngama, cochjama chë entsanga chamotsenójuabnama, y Bënge Bëtšabe delante cochjábuayenaye chënga ndoñe yontsamna nye palabrënga jabuachana enatsëtsnayana; er chca, ndocna tšabe soye ntjamana, y chca tmojtseñatsëtsná ora, jamana chë soye ouenanënga más batšá chamotsošbuáchemá, y jujabuáchana chëngbe tšabe juabnënga jtsondbiamama. <sup>15</sup> Lempe ntšamo icobencá cochtsama, aca chacotsemnama mo canye entšá ndabiam Bënge Bëtšá cháuyana nyëtscá soyënguine tšabá amá yomna ca; aca chacotsemnama mo canye trabajayacá, nda tondaye tontsebomna ndayama jatëuatjama; y chacotsemnama chë ndegombre buayenánana corente tšabá buatëmbayá. <sup>16</sup> Entšanga nye quem luarentšá soyëngama, ndoservena palabrënga tmojtseñuënta ora, chë soye ndoñe cattsuenana; er chë soye jamana entsanga puerte inyëtšá chamobocanama, ntšamo Bënge Bëtšá ndoñe yondmëncá, inyëtšá jtsejuabnayëse y jtsamëse. <sup>17</sup> Chëngbe buatëmbana soyëngaca puerte bacá inyëngbioye jáborlana, nya mo canye uabouana šocana chamotsebomnama cuafjamcá. Chca buatëmbayënguëntšë Himeneo y Fileto bontsemna. <sup>18</sup> Chata chë ndegombre benachentsana tbojsojuánañe, y ibojtsichamo chë obanëga chámuatayenama Bënge Bëtšá ya catëñjama ca, y Jesús chaojésabo ora, nyëtscanga chámuatayenama Bënge Bëtšá ndoñe yochanjama ca. Chë causa, chata bontsama básefta entsanga chë ntšamo Jesucristbeñe imojanošbuachecá, mora ya ndoñe chamondëtssošbuáchemá. <sup>19</sup> Pero Bënge Bëtšabe ndegombre buayenánana nyëts tempo cachcá endesomñe, y ndocná quenátobena chë soye jatrócama. Chca endmëna mo chë ndëtsbenga ndayiñe canye bëtš yebna tojebncá, ndayiñe mëntšá yojtsábemana: “Bënge Utabná endëubuatma chë chábenga imomnënga”, y “Nyëtscanga chë Bënge Utabná benga imomnënga ca tmojtšichámënga, chamuajbaná nyëtscá bacna soyënga amana ca”.

<sup>20</sup> Canýe uámana entsábe yebnentše, tsafjoca soyënga ndoñe nýe castellano o midio soyënga ntsemnana, ndayá niñëse y fshantse soyëngnaca; chë natsana soyënga uámana tescama jtsebuájonana, pero chë inýe soyëngna, nýe nýets tempo chauetsoservënana. <sup>21</sup> Chca endmëna chë Jesucristbeñe imojtsošbuachëngbeñe, ndoñe nýetscanga tmontsajbaná bacna soyënga juabnayana y amana, ni chë chca tmojtsama entsángbentšana ndoñe tmontso-juaná. Pero, chca jtsojuánañama tojtsebošá, echántsemna canýa Bëngbe Utabnabiama tsábe trabajayá; y chca, mo chë tsafjoca castellano y midio soyëngcá, canýe uámana trabajuiñe echanjoservía, y cha sempre echántseprontana ndaye tsábe soye jamama.

<sup>22</sup> Chýeca, ntšamo básefta bobontsënga bacna soyënga jamama mondbošcá, ndoñe cattsama; pero aínë cochtsiyena ntšamo Bëngbe Bëtsábe hominýiñe tsábá yomncá jtsamëse, Jesucristbeñe puerta cochtsošbuáchiye, Bëngbe Bëtsá y inýenga cochtsababuánýeshana y nýetscángaftaca natjëmbana cochtsomñe, chë chaujjabuachama Bëngbe Utabná mondbet-sotšëmbuanëngaftaca cánýiñe, ndocna bacna soye ainaniñe ntsebomncá. <sup>23</sup> Ndoservena soyëngama palabrénga y ndosertántšana óbocana soyëngama ndoñe cattsuenana; aca corente condëtatšëmbo chë soyënguentshana entsanga nýe jabuachana enatsëtsnayiñe jabo-canana. <sup>24</sup> Pero chë Bëngbe Utabnabiama oservená ndoñe quebnátsmëna inýengaftaca jabuachana ntsenatsëtsnayana; chamna, cha bontsemna jtsababuánýeshanëse nýetscanga jtsënyayana, jtsemnana tsábe बातëmbayá y inýengaftaca uantadá. <sup>25</sup> Cha bontsemna, chë chabe contra y chabe buayenánama contra imomnënga, chë ndegombre soyënga jabuatambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatšëmbuama; <sup>26</sup> chënga botamana chamuatsjuaboma, y Bëngbe Bëtsá, Satanase cucuatšënguentshana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canýe uachmaniñcá.

### 3

*Ntšamo entsanga mochtsemna, Cristo jésabama chaojtsobeco ora*

<sup>1</sup> Pero aca cmontsemna jtsetatšëmbuana, Cristo jésabama tempo chaojtsobeco ora, entsanga echántsamna puerta padecena soyënguñe jtsiyenana. <sup>2</sup> Chca echántsemna, er entsanga, cada ona nýe cachabe tsabiama echanjësenuabnaye, crocénana jtsebomnana tsá mochántseboše, mochántsemna enábotamnayënga y inýengbiye mo nduamanëngcá mochantsënyaye. Bëngbe Bëtsabiama y inýengbiama bacá mochantsóyebuambnaye, chëngbe bëtsetsangbiye ndoñe quemochátayaunana, ni chëngbiama tsábe soyënga tmojtsamëngbiye quemochtëtachuanaye, y Bëngbe Bëtsabiama y chabe soyëngama ndoñe respeto quemochátbomna, <sup>3</sup> ni cachëngbe pamíllangbiye quemochátatabuanýeshana, mochántseboše ndoñe natjëmbana jtsiyenama, uayátseñayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nýetsca tsábe soyënga uabotëñënga. <sup>4</sup> Chënga, uayayëngbe cucuatšëne entsanga ayentšbáshejuanënga mochántsemna, mochantsama soyënga tondayama ntjatsrëparánëse, y cachënga uámana entsangcá mochántsenobiamnaye; chënga Bëngbe Bëtsá jatsboboñshana cuenta, cachëngbe cuerpiñe tsábá jtsoññama soyënga mochántseboše. <sup>5</sup> Inýenga echantsinýana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjinýanýiye, Bëngbe Bëtsá obená bëtsemnana chënga ndoñe mondošbuáchemo.

Nýa tondayama chëngaftaca cattscuëntaye. <sup>6</sup> Chënguentsë báseftanga mondmëna, y chëngna botamana palabréngaca yebnënguenache jamashjnana, y chenache, chë paselo yomna jáingñama shembásenga jtsaíngñayana, chëngbe बातëmbana soyënguñe chamot-sošbuáchemo. Chë shembásenga bëtscá bacna soyënga tmojana, y chë causa ndoñe corente natjëmbana montsiyena, y ba ndoñe tsábe soyënga imojtsama nýe cachënga tsábá jtsemnana, ntšamo tmojtsebošcá. <sup>7</sup> Chënga nýets tempo nýe ndaye tsëm soye jatóntšana jatatsjinýana, pero ndocna te ntjobenayana Bëngbe Bëtsábe ndegombre soyënga josértama. <sup>8</sup> Ntšamo Janes y Jambres Moisesbe contra ibojamncá, cachcá, chë inýenga jáingñama abuátambayënga nýetsca ndegombre soyëngama contra jtsemnana. Chë entsanga chëngbe juabniñe nýe bacna soyënga jtsebomnana, y Bëngbe Bëtsá chënga tojtšëbaté, chënga chë ndegombre soyënguñe ndoñe ntsošbuáchiyana causa. <sup>9</sup> Pero chënga ndoñe quemochatobenaye bëtscá entsanga jáyëñjanama, er nýetsca entsanga mochanjátatšëmbona chënga nýe bacna soyënga juabnayënga imomnana, mo chë Israeloca entsanga tmojantatšëmboncá Janes y Jambres nýe chca juabnayata bëtsemnana.

*Inýe soye Timotëobiye tbojanbonýe*

<sup>10</sup> Pero acna, puerta tsábá condëtatšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerta tsošbuaché, ntšamo inýengaftaca uantado tsmëna; ntšamo atše, Bëngbe Bëtsá y inýengbiye tsababuánýeshana;

ntšamo atše, Běngbe Bětsábeñe jtsobátmaněse, <sup>11</sup> inýenga šmonjanacmena ora; y sěnjansufrina ora, padecena soyěnguiñe běts añemo tsjānbomna. Acnaca condětatsěmbo ntšamo atše chama Antioquía, Iconio y Listra běts pueblěngoca tsjansufrinama. Pero masque entšanga tša šmonjanacmena, atše lempe sějānauantana, Běngbe Bětsábeñe jtsobátmaněse, y cada ora, Běngbe Utabná chěngbentšana šonjanatsbocá. <sup>12</sup> Ndegombre endmēna, nyetscanga chě Běngbe Bětsá jadórana soyěnga jtsaměse jtsiyenama bošēnga, y Cristo Jesúseftaca cānyīñe mo canýacá imomnēnga, puerte mochanjasúfria, chca bětsemnama, chēnga chamosufrina inýenga chamojtsama ora; <sup>13</sup> pero chě bacna entšanga y chě inýenga áingñayēnga, cada te más bacna entšanga mochántsemna, más bacna soyēnga jtsaměse; chēnga inýengbioye mochāntsingñaye, pero cachēngnaca ingñēnēnga mochántsemna.

<sup>14</sup> Pero aca, nyets tempo cochtsejuabnaye y cochtsama lempe ntšamo tcojuatsjinyñcá, chě ndegombre soyēngcá cojtsosbuácheñe, er aca tsabá condēubuatma chě tcmojan-buatēmbanga; <sup>15</sup> y aca, cabá básetema conjamna orscana, chě Běngbe Bětsabe uabemana palabréngama condětatsěmbo, chě ndaye sóyeca aca contsobena juatsjinyñana, Běngbe Bětsá chacmatsbocama, Cristo Jesúseñe jtsosbuáchiyēse. <sup>16</sup> Běngbe Bětsá, Uámaya Espiritbeyeca tonjama, lempe ntšamo Běngbe Bětsabe uabemana palabrénguiñe yobinyñcá entšanga chamuábemama. Chě uabemana palabra endoservena, bēngbioye chě ndegombre soyēnga jabuátambama; nderado ndaye soye ndoñe tsabá tmonjamama bēnga chamot-setatsěmbuama, jinýanyiyama ntšamo más tsabá chě soyēnga muanjobenaye jamama; y bēngbioye jabuátambama ntšamo jtsiyenama chě Běngbe Bětsabe bominýiñe tsabá yomna soyēnga jtsaměse; <sup>17</sup> chca, canýe entšá Běngbe Bětsabiama oservená y obená chaotsemnama, tsabá chaotsetatsěmbo y sempre chaotseprontana nyetsca tsabe soyēnga jtsamama.

#### 4

<sup>1</sup> Běngbe Bětsabe delante y Cristo Jesús, nda echanjabo mo reycá jabomándama y jabáyana chě ainēngbiama y chě ya mochjóbanēngbiama, ntšamo chēngbe vidēnguiñe tmojtseñcá tsabá o ndoñe tsabá bětsemnama, chatbe delante cbomandá, <sup>2</sup> Běngbe Bětsabe palabra entšanga chacsabuaiynayama; sempre chca jamama cochtseprontana, masque entšanga aīñe o ndoñe jouenama tmojtsebošēse. Cochjama, inýenga bacna soyēnga tmojtsamama chamotsetatsěmbo, chca tmojtsamama cochjucácana y cochjábuayenaye ndayá jamama yojtsamnana. Sempre chca cochtsabuátambaye, chca ora puerte uantado jtsemnēse. <sup>3</sup> Chca cochtsama, er canýe tempo echanjóshjango y chora entšanga chě ndegom-bre buātēmbana soye ndoñe quemochátuenana; chamna, nýe chě último tsēm soyēnga jtse-tatsěmbuama boše causa, ba abuátambayēnga mochanjuánguango, y chēnga mochāntsichamo soyēnga nýe ntšamo cach entšanga jouenama tmojtsebošcá. <sup>4</sup> Chēnga chě ndegombre soyēnga ndoñe quemochátuenana, y nýe ndaye cuentēnga mochántseyeunana. <sup>5</sup> Pero aca, sempre botamana cochtsejuabnaye; chě padecena soyēngama chacojtsesufrina ora, añemo cochtsebmoma; chě Jesucristbiama tsabe noticiēnga entšanga abuayiynayabe trabajo cochtsama; y nýa cochtsentšena ndayá Běngbe Bětsá tcmojabonyēcá tsabá jtsamama.

<sup>6</sup> Er mo Běngbe Bětsábioye jětschuayama, canýe bayá obanáftaca tcojabuešcja vínoye jt-sopochocancá, cachcá atšbe vídnaca ya jopochócama entsemna. Atše jóbanama bēcoñe entsemna; chanjóbana ora echántsemna Běngbe Bětsá oyejuayá chaotsemnama. <sup>7</sup> Cristo Jesusbe soyēngama corente sējenojuerzá. Mo canýe travisiayacá, chě jashjanguama yomna luaroye ya tojashjangcá, átsnaca ya, ntšamo Běngbe Bětsá yobošcá atše jtsaměse, atšbe trabajo ya tijapochocá. Atše nyets tempo Jesucristbeñe sēndosbuaché. <sup>8</sup> Chcasna, atšbiama canýe uacanana soye echántsemna, er Běngbe Bětsá tojama atše chabe bominýiñe tsabia chaitsemnama. Běngbe Utabná endmēna chě ndegombre tsabá ichamuá entšanga aīñe o ndoñe tsabá tmonjamama, y cha chě uacanana soye šochántsetaye, entšanga ntšamo tmojamama cha chaojabáyana ora. Pero cha nýe atše ndoñe chě uacanana soye quešochtétatsetaye, ndayá nyetscāngbioye chca, ndēmuanýenga puerte imoboše cha cachiñe cháuesabama, cha imobobonshánayeca.

#### *Inýe soyēnga Timoteobiama*

<sup>9</sup> Lempe ntšamo tcojobenacá cochjama betscó jabama atše jabínyama; <sup>10</sup> er Demas, cha yapa nýe quem luarentša entšangbe soyēnga bošá enjamna, cha cachcá šonjesonýa y Tesalónica pueblōye tojtsoñe. Crescente Galacia luaroye tonjá y Tito Dalmacia luaroye. <sup>11</sup> Nýe Lucas, chě šmonjanájabuachanēnguentšana, mora átsēftaca entsemna. Marcos coh-jafstenguango y ácaftaca cochjěftbetše, er cha atšbe trabajuama puerte oservená endmēna. <sup>12</sup> Tíquico, Efesoye sējnichmó. <sup>13</sup> Chacojabo ora, uabonjanía šcochjesacñe, atše Troas běts pueblōca, Carpbe yebnoca tijěsaboshjona; chě librěšangánaca, pero chě uámama uabemana tsbuanachangá ndoñe chacmondětsēbnatjēmba.

<sup>14</sup> Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastíga, ntšamo atše šojaborlama. <sup>15</sup> Chabíama cuedado cochtsebmna; cha tojobenase ntšámnaca cmatjabórla, er cha chë bënga mondabuayiyná soyëngama contra entsemna.

<sup>16</sup> Chë natsana soyama, mándayëngbe delante šonjanotocá jenëuyanama ora, atše ndocná chešnátanajabuache; nyetscanga cachcá šmonjésonyaye. Pero atše sentsobátmana, Bëngbe Bëtsá chama chënga chaotsaperdoná. <sup>17</sup> Pero Bëngbe Utabná aíñe šonjanájabuache y tonjanma atše bëts añemo jtsebmnama, y chcase, atše sënjanobená Jesucristbiamá nyetsca chabe tšabe noticiënga entšanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canye uabouana resjuentsana šonjanatsbocá, mo canye león jtsosañámentšana ndábioye cuafjatsbocacá, <sup>18</sup> y Bëngbe Utabná šochanjatsbocá, bacna soye ndocná chašondëborlama; y sempre jtsinýenëse, celoye, chë ndayentše cha yománda luaroye šochanjesbetše. ¡Nyetscanga nyetsca tescama cha chamotsatschuaná! Chca chaotsemna.

*Pablo Timotéobioye jadiósoftanama*

<sup>19</sup> Atšbe cuenta cochjácheuaye Prisca y Aquila, y Onesíforbe pamíllnaca. <sup>20</sup> Erasto, Corinto puebloca tontsoquedañe, y Trófimo Mileto puebloca šocá sënjëftsebmshjona. <sup>21</sup> Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nyetscanga muentše Jesucristbeñe ošbuáchiyënga.

<sup>22</sup> Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

## Tito

### *Jachuayama*

<sup>1</sup> Atše Pablo, Bèngbe Bètsabe oservená sèndmèna y Jesucristbe ichmoná entsànga jábuayenama, chë Bèngbe Bètsá chabe entsànga chamotsemnama tojábacacanga, Jesucristbeñe chamotsošbuáchema y chë ndegombre soyèngama chamotsetatšëmbuama; chë soyènga endmèna ntšamo bènga, Bèngbe Bètsabe básenga bétsemnama, mondoyena jtšamèse. <sup>2</sup> Lempe chca sèndama, er Bèngbe Bètsábeñe jtsošbuáchiyèse, atše sèntsobátmana chë nyetsca tescama yomna tsabe vida jtsebmnama. Bèngbe Bètsá, chë ndocna te obosterayá, quem luare cabá ndmèna orscana tojanašebuachená entsànga chca vida jtsebmnama; <sup>3</sup> y nýa chama tempo tojóshjango ora, chë entsànga jábuayenama, soyèngaca Bèngbe Bètsá chabe palabra šojinýañýé, ndayá Jesucristo entsangbiana yochjanmama; y chca jábuayenama atše palabra šmonjabonýé, Bèngbe Bètsá, bèngbe Atsebacayabe mándoca. <sup>4</sup> Tito, quem tsbuanácha cbontsabobiamná. Atše Jesucristbe soyèngama entsànga sèñjanabuayinýa ora, aca chabeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquinacá condmèna. Atše sèntseimpadana, Bèngbe Bètsá Bèngbe Taitá y Jesucristo Bèngbe Atsebacayá, ábeñe tsabe bendicionènga chaotsemnama chata chaboma, y chaboma aca ainaniñe tsabe ebionana chacotsebmnama.

### *Titbe trabajo Creta luaroca*

<sup>5</sup> Atše Creta luaroca tcbonjétsanboshjona, ntšamo chentše jamama enjetsashbencá chacomama, y nyetsca pueblènguenache chë ošbuachiyèngcá enefjuanèngbeñe bètsèjemèngcá amèndayènga jtsemnama chacubuáyanama, ntšamo tcbonjaftsemnadacá. <sup>6</sup> Canýa Bètsèjemèngcá uabuayaná mèntšá bontsemna: chaotsiyena ntšamo chabiana ndocná chaondètsichamo ndoñe tsabá yontsama ca; nýe canýe shembásabe boyá; chabe básengna, Jesucristbeñe ošbuachiyènga chamotsemna, y chamotsiyena, ntšamo ndocná chaodayana chènga nýe jenomándama ntšobencá y nýe ntšamo tmojtsebošcá imojtsiyena ca, o chènga chèngbe bètsètsanga o mándayènga ndoñe montsayanana ca. <sup>7</sup> Er cányèntše ošbuachiyèngcá enefjuanèngbe mandayá, Bèngbe Bètsabe trabajo jamama tmojabonýéyeca, cha bontsemna jtšiyenana, ntšamo ndocná chaodayana cha ndoñe tsabá yontsama ca; ntjajuabocýá, nýe ntšamo cha tojtsebošcá ndoñe chaondètsama; ndoñe chaondètsiyena nýe rábiaca jtsemnama; ndoñe chaondètsètmó; penzentsero ndoñe chaondètsèmma; y ndoñe chaondètsèboše nýe paselo becá crocénana jtsebmnama. <sup>8</sup> Pero chabe yebnentše posada entsànga júyèntšamiana sempre chaotseprontana, tsabe soyènga chaotsebinýnana sempre chaotsentšena, botamana juabnýa chaotsemna, ntšamo Bèngbe Bètsabe bominýiñe tsabá yomncá chaotsiyena, nyets tempo Bèngbe Bètsábioye chabotsadorana, y cachá nyetsca soyènguñe jenomándama chaotsobena. <sup>9</sup> Cha bontsemna nyets tempo jtsošbuáchiyana y jtšobedecénana chë ndegombre buayenana soye, ntšamo tmojabuatèmbacá, chca, chë ndegombre buatèmbana soyèngaca inýenga añemo chaotsatšatnama, y chë soyama contra tmojtsebmnama jáyèñjanama, ndoñe tsabá montsamama.

<sup>10</sup> Cha chca bontsemna, banga nýe ndèmandánènga jtšiyenama bošènga mondmèna causa, y chènga mondmèna, nýe ndaye ndoservena soyèngama yapa oyebuambnayènga y inýenga áingñayènga, y chcanga más mondmèna chë nyetsca ošbuachiyènga base bobachtèma chë más delicadentše tètšèngènga jtsemnama yojtsamna ca mondbètsichamènguentše. <sup>11</sup> Y entseyta chèngbioye jtayáchetana, er chènga jamana ba pamíllanguentše nyetscanga Jesucristbeñe ošbuachiyana chamotsajbanama. Chènga chca mondbètsama, chë ndoñe yojtsamna jtsabuátambayama soyènga jtsabuátambayèse, nýe paselo crocénana jóngánama.

<sup>12</sup> Enjanna canýa, ndabiana entsànga jtsichámuana cach Creta luarentša diosèngbiana oyebuambnayá canjamna ca, y cha cachabe luarentša oyenèngbiana mèntšá tonjánayana: “Creta luarentše oyenènga, nyets tempo bosterènga mondmèna, ainana ndbomnènga y oyènjayènga nýe becá jasama bošènga ca.” <sup>13</sup> Y chca ndegombre cha tonjánayana; chýeca chènga jabuache cochjucácana, chca, chènga Jesucristbeñe chamotsošbuáchema y chamotsobedecena chë buatèmbana soyènga, chë ndayíñe bènga mondošbuaché; <sup>14</sup> y cach judièngbe cuentènga ndoñe chamondètsuenana, ni chë ndegombre soyènga uabotenèngbe mandènga.

<sup>15</sup> Chë ainaniñe bacna juabnènga ndbomnènga y chca juabnèngaca ndèmandánènga, nyetsca soyèngama jtsejuabnayana mo ndegombre tsabe soyènga cuaftsemncá; pero chë bacna soyèngaca mandánènga y Jesucristbeñe ndošbuachiyènga, nýe ndayámnaca jtsejuabnayana mo bacna soye cuaftsemncá. Chca entsemna, er chèngbe juabnoca nýe ena bacna soyènga jésebmnama, y ndaye bacna soye tmojama ora, chèngbe ainaniñe juabnènga ndoñe ntsebmnama, bacna soye tmojamama chaúyanama. <sup>16</sup> Chènga jtsichámuana Bèngbe Bètsá

imuábuatma ca, pero ntšamo tmojtsama soyëngaca jtsinÿinÿayana chca ndoñe ndegombre yondmënama. Chënga Bëngbe Bëtsabe hominÿiñe puerte bacna entsanga mondmëna, y ntšamo cha tomandacá ndoñe ntšamana; chë causa chënga ndoñe ntšobenana ndaye tšabe soye jamama.

## 2

*Soyënga ntšamo chë ndegombre बातेंबाना endmëncá*

<sup>1</sup> Ntšamo chacojtsoyebuambnacá sempre chaotsemna ntšamo chë ndegombre बातेंबाना endmëncá. <sup>2</sup> Cochjayana chë bëtsëjëmëngna chamotsemna cachënga nÿetsca soyënguifne jenomándama obenënga, nÿetscangbiamma mo uámana entsangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguifne chamot-sošbuachë, Bëngbe Bëtsá y nÿetscanga chamotsababuánÿeshana, y padecena soyënguifne puerte uantadënga chamotsemna.

<sup>3</sup> Cachcá, chë bëtsanana shembásënga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoýënga. Entsamna chamotsiyena tšabe soyënga jtsamëse; <sup>4</sup> chë tobiasënga chamotsinÿanÿná y chamotsabuatambá ntšamo chëngbe boyanga y básënga jtsababuánÿeshanana, <sup>5</sup> ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentšëna, nÿetscángaftaca tšábënga jtemnana, cachëngbe boyángbioye jtsayaunanana, chca, ndocná chaondëtobena Bëngbe Bëtsabe palabrama bacá jatöyebuambnayana, ntšamo chë tobiasënga tmojamama.

<sup>6</sup> Cachcá, chë bobontsënga añemo cochtsatsatnaye cachënga jenomándama chamot-sobenama, <sup>7</sup> y chënga cochjínÿanÿiye ntšamo yomna jtsiyenana, cach aca nÿetsca soyënguifne tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca cochtsama, <sup>8</sup> chë ndegombre soyënga jtsöyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiamma jayanama.

<sup>9</sup> Chë nÿets tempo nÿe inÿabiamma oservënënga cochjábuayenaye, chëngbe nduinëngbioye chamotsobedecënana, soyënga chamotsama chënga chamotsóyejuama, y yajuatsanënga ndoñe chamondëtsemnana. <sup>10</sup> Ndoñe chamondëtsatbëbana, pero aifne nÿetscañe tšabe palabra bomnënga chamotsemna. Chënga chca entsamna, chca, inÿënga chámuinÿe y chamojuabó tša botamana chë बातेंबाना soyënga, Bëngbe Bëtsá bëngbe Atsebacayabiamma yomna ca.

<sup>11</sup> Er Bëngbe Bëtsá bënga Sonjinÿanÿé cha bëngbe tšabiamma juabnënga yobomnana, y chca, cha tojama nÿetsca entsanga chamotsobena atsebácänënga jtemnana. <sup>12</sup> Chë Bëngbe Bëtsabe juabna bëngbe tšabiamma, sentsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámna sentsabuatambá, cabënga jenomándama jtsobenëse, ntšamo Bëngbe Bëtsabe hominÿiñe tšabá yomncá y cha jadórana soyënga jtsamëse. <sup>13</sup> Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnana te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora. <sup>14</sup> Cha chabe derecho vida jtsobomñiama cachcá tojanonÿá y bëngbiamma tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bënga jatsebacama, ainaniñe ndocna bacna soye ndbomnënga jábiamama, bënga chábënga chamotsemnana, sempre prontánënga ntšamo tšabá yomncá jtsamama.

<sup>15</sup> Chca cmontsemna jtsabuátambayana, chënga becá añemo jtsatsatnayëse, y jtsinÿanÿayëse chënga bacna soye tmojamama, chë nÿets condbomna mándoca jucacánëse. Ndoñe catjalesência ndocná chaondayana aca mando ndoñe condbomna ca.

## 3

*Ndayá Jesucristbeñe ošbuachiyënga yojtsamna jamana*

<sup>1</sup> Cochtsama chënga chamuatenójuaboma chë mandadënga y inÿe mándayënga chamotsayaunanama, chamotsobedecënana, y tšabá yomncá jamama sempre chamotseprontánama. <sup>2</sup> Ndocnabiamma ndocna bacna soye chamondëtsoyebuambná, penzentserënga ndoñe chamondëtsemna, ndayá nÿetscángaftaca natjëmbana jtsiyenama bošënga, tšabá mándbomnënga, nÿetscanga tšabe ainánaca imojtsénÿama entsanga jtsinÿanÿayëse.

<sup>3</sup> Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjátanama, ingñiñënga y mandánënga monjamna nÿetsca



bacna soyënga jamama juabnëngaca y nÿe quem luarentşe tşabá jtsemnana juabnëngaca. Bënga monjaníyena nÿe bacna soyënguñe juabnaye, ínÿenga uantşaboşe. Inÿenga bënga şonjanëbuayënja y bënga nÿetscanga monjanenáboyënja. <sup>4</sup> Pero Bëngbe Bëtsá, bëngbe Atsebacayá, bëngbe tşabiama juabna yobómnyeca y tşa şuababuánÿeshanama şonjanínÿanyé ora, <sup>5</sup> cha şonjanatsebacá, pero ndoñe nderado bënga ndaye tşabe soye tmojanmama, ndayá cha bëngbiana tbojanongméyeca. Cha şonjanatsebacá, bëngbe bacna soyënga jabuajuánase, y chë Uámana Espíritu jujabuáchëse, bënga mo tsmëma entşangcá chamotsemnana, ntşamo tempo yojamncá ntjatsjuabnaycá y ntjatamcá. <sup>6</sup> Bëngbe Atsebacayá Jesucristbeyeca, Bëngbe Bëtsá tojanma Uámana Espíritu bëngbe ainaniñe nÿets tempo chaotsemándama y bënga chaşotsëjabuachanama, <sup>7</sup> chca bënga, Bëngbe Bëtsá bacna soyëngama şojaperdónanga y bëngbe tşabiama juabna bómnyeca tojayana chabe bominíñe tşábenga imomnënga, chamotsobena cha yobomna soyënguentşana bënga mo ndayá cuaftşëtocancá jóyëngacñama, y chca, chábeñe jtsoşbuáchiyëse, chë nÿetsca tescama yomna tşabe vida chamotşobátmanama.

<sup>8</sup> Chca, lempe ntşamo tijayancá nÿa ndegombre endmëna, y atşe sëntseboşe chë soyëngama bëtscá chacotsabuatambá, chca, chë Bëngbe Bëtsábeñe tmoşbuachenga chamot-sentşena chë tşabe soyënga jtsamama. Chë buatëmbánana puerte tşabá endmëna y nÿetscangbiana bëtscá endoservena. <sup>9</sup> Inÿenga nÿe ndoservena soyëngama jabuachana tmojtšenatsëtsná ora, y anteungbe cuentëngama chamojtsoyebuambná ora, ndoñe cattson-tremetena; ndoñe cattsama cach tşëngaftanga ndoñe tşabá jtşenÿeyeanamcá, y judiëngbe leyëngama ndoñe ínÿengaftaca cattşenpéliaye. Chca jtsamana tondayama ntşoservënana, y nÿe bonamente chca jtsamana.

<sup>10</sup> Nderado nda tojtşama entşanga ndoñe cachcá nÿetscanga chamondëtsejuabnama y chamotşenpéliama, canÿe o uta soye cochjabuayená ndoñe tşabá tonjamama; pero cha ndoñe tmonjóyeunase, chentşana cháftaca ndoñe más cattsóyeuambnaye. <sup>11</sup> Chca cochjama, er aca cochanjátatşëmbona canÿa chca tojtşemná, chabe juabna tojatrocá bacna soyënga jtsejuabnayama. Chë soye y chë inÿe bacna soyënga ntşamo cha tojtşamcá, jtşinÿanyñayana cha ibojtsemna castiganá chama jtsemnana.

#### *Inÿe soyënga Titbiama*

<sup>12</sup> Atşe, Artemas o Tíquico ácbioye chaijichmó y choca chaojáşjango ora, ndayánaca cochjama Nicópolis puebloye aca jama atşe jinÿama, er atşe sënjauiabó chentşe chë uaftenëntscuana jëftsemnana. <sup>13</sup> Lempe ntşamo chacojobenacá, cochjuájabuache chë ínÿenga obuauiayá Zenas, y Apólosnaca; lempe ntşamo chata ibojtsëjabotcá cochjátşataye, ínÿoye jama jatóntsama chamobenama y benachëjana tondaye chaondëtsabuáshebenama. <sup>14</sup> Atşe sëntseboşe, bëngbe entşanga, chë bëngcá Jesucristbeñe oşbuáchiyënga, chamotsentşena chë tşabe soyënga jtsamama y chë puerte ujabótënga jtşëjabuáchanama, chca, chënga tondayama ndoservena vidënga ndoñe chamondëtsebonnama.

#### *Pablo Títbioye jadiósoftanama*

<sup>15</sup> Nÿetscanga chë átşeftaca montsemnëngnaca cmontsechuaná. Atşbe cuenta cochjácheuaye nÿetscanga chë bënga imuababuanÿeshanëngbioye, cach bëngcá Jesucristbeñe oşbuáchiyana bómnyeca. Atşe, Bëngbe Bëtsá sëntseimpadana, cha chaoma ácbëñe tşabe bendicionënga chaotsemnana.

## Filemón

### *Jachuayama*

<sup>1</sup> Atše Pablo, mora utamená Cristo Jesusbiam a oservena causa, quem tsbuanácha sentsabiamná, Jesucristbeyeca Bèngbe catšata Timotéoftaca, acbiam Filemón, Bèngbe bonshaná y nda Bèngaftaca condètrabája Jesucristo jaserviama. <sup>2</sup> Atše sentsacheuaná, Jesucristbeyeca Bèngbe uabena Apia y Arquípnaca, nda Bèngaftaca cánýiñe Jesucristbe soyèngama endenojuerzana; y nyetsca ošbuachiyèngnaca, ndèmuanyènga imuamana acbe yebnèntše jénefnama Bèngbe Bètsá jètschuayama. <sup>3</sup> Atše sèntseimpadana Bèngbe Bètsá Bèngbe Taitá y Bèngbe Utabná Jesucristo, chata chaboma tsabe bendicionènga tsèngaftangbèñe chaotsemnama, y chaboma tsèngaftangbe ainaniñe tsabe ebionana chašmotsebmomnama.

### *Filemonbe bonshánana y ošbuáchiyana*

<sup>4</sup> Bèngbe Bètsáftaca stsencuénta ora, acbiam sèndbètsenojuabnaye, y sempre acbiam Bèngbe Bètsá sèndbètsatschuanaye, <sup>5</sup> er atše sènjátatsèmbona ntšamo aca nyetsca chë Bèngbe Bètsábenga imomnènga icuababuányèshanama, y ntšamo aca Bèngbe Utabná Jesúsbeñe tša icošbuáchema. <sup>6</sup> Bènga, Jesucristbeñe ošbuáchiyènga quetsomñecá, ácaftaca mo canýacá fsèndmèna. Chca endmènayeca atše Bèngbe Bètsá sèntseimpadana, tsèngaftanga chašmobená más botamana josértana nyetsca chë Bèngbe Bètsábocana tmojóyèngacñe tsabe bendicionènga, Bènga Cristo Jesúseftaca cánýiñe mo canýacá bétsemnayeca. <sup>7</sup> Jesucristbeyeca atšbe bonshana catšata, aca chë Jesucristbeñe ošbuáchiyènga tša condábabuanýèshanama, atše corente oyejuayá sèntsemna y bèts añemo sèntsebmomna. Y aca tcojama, nyetscanga chë Bèngbe Bètsábenga imomnènga chèngbe ainaniñe ngmènac ndoñe chamondètsemnama, chènga jujabuáchèse.

### *Pablo, Filemónbiye Onésimbiam tbojanimpadá*

<sup>8</sup> Y chca, atše Cristbe ichmoná quetsomñecá sèntsobena, aca nýe jamándana ntšamo yomncá chacotsamama, pero atše chca ndoñe quichatsma. <sup>9</sup> Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiam a oservena causa, <sup>10</sup> canýe ruego cbochanjábema, Onésimo chacuájabuachama. Atše utamená tsmèñèntscuana, Jesucristbe soyèngama cha sènjambuayiyiná. Cha Cristbeñe tonjanošbuachèyeca, cha mo atšbe uaquinacá tonjanóbema.

<sup>11</sup> Tempo, cha ácbioye tondayama quecmènjátanservena, pero mora cha becá entsámana, acbiam y atšbiam. <sup>12</sup> Mora ácbioye sèntsatichamná, y atše sempre chabiam sèndbètsenojuabnaye y sèndbobonshana. <sup>13</sup> Atšbiam puerte tsabá manmèna cha átšeftaca matèñquedase, acbe cuenta atše chašoservema, cárceloye utamená sèntsemnèntscuana, chë tsabe noticiènga entsanga abuayiyenaye causa. <sup>14</sup> Pero atše ndoñe chiyatsma cha chaouquedama atše chašujábuachama, er atše ndoñe quetsátsoše aca obligaciònaca chacotsebmomna, atše juajuabúachama ndayánaca chacomama; y sèntseboše aca ndayánaca chacomama, cach aca chca jamama puerte tcojtsebošeme. Chcasna, tondaye quichatsma, chë soye chca chaotsebmomna aca cabá ndocá ntjayancá. <sup>15</sup> Atše sèntsejuabná nderado Onésimo ácbentšana básefta tescama tojanoluaré, mora ácaftaca nyets tempo jtsatsmènama ca, <sup>16</sup> y ndoñe nýe acbiam mo nyets tempo canýe oservenacá, ndayá chama más uamanacá, mo Jesucristbeyeca canýe bonshana catšatcá. Atše puerte Onésimo sèndbobonshana, y acna cmontsemna más cha jtsebobonshánana, er cha mora ndoñe quenátsmèna canýa nýe acbiam nyets tempo oservená, ndayá Bèngbe Utabnábeyeca canýe catšata, ntšamo cach aca condmèncá.

<sup>17</sup> Chca, aca atšbiam condèjuabná mo ácaftaca cánýiñe Bèngbe Utabnabiam trabajayacá; chíyecna cmontsemna cha jtójjana, mo atše šcojofjá. <sup>18</sup> Nderado ntšamo cha tmojanborlá o ndayánaca tcomondebena, atše chama chochjètsèntšabuachiye. <sup>19</sup> Atše Pablo, cach atšbe cucuatšeca quem soye sèntsabiamná. Atše chama cbochanjètsèntšabuachiye. Ndegombre, ndoñe quenátšiyta atše chacbéyana becá scondebena ca, ntšamo atsbocaná jtsebmomna atše tbojánbuayenama. <sup>20</sup> Chcasna, Jesucristbeyeca atšbe catšata, Bèngbe Utabnáftaca cánýiñe mo canýacá quetsomñecá, Diosmanda chë pavor šcochtsebema. Diosmanda cochjama atšbe ainana ngmènac ndoñe chaondètsemnama.

<sup>21</sup> Atše chca cbontsabobiamná, er atše tsabá sèndètátšëmbo, ntšamo cbontseimpadancá cochjamama, y cabá más chama cochjatsmama. <sup>22</sup> Y mora inýe soye, Diosmanda posada šcochjaboprónta, atše jányama chajábocna orscama, er atše puerte jtsošbuáchiyèse Bèngbe Bètsábeñe sèndobátmana, cha tsèngaftangbiam yochjama lempe ntšamo atšbiam chašmojotjañcá, y chca, cha sochjalesència atše tsèngaftangbiye jésama.

*Pablo Filemónbiye jadiósoftanama*

<sup>23</sup> Epafra, muentše átšeftaca cárceloye utamená, Cristo Jesusbiam entšanga abuayiy-naye causa, chánaca cmontsechuaná. <sup>24</sup> Y Marcos, Aristarco, Demas y Lucas, chë bëngaftaca mondëtrabájanga Cristo jasérviam, chëngnaca cmontsechuaná.

<sup>25</sup> Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

## Hebreos

*Bëngbe Bëtsá bëngaftaca tojoyebuambá, chabe Uaquiñáftaca*

<sup>1</sup> Tempo, Bëngbe Bëtsá ba soye y ba soyëngaca Bëngbe Bëts taitángbiye tojanëyana, chë chabe juabna oyebuambnayëngaftaca. <sup>2</sup> Pero quem tempo bëngaftaca tojoyebuambá, chabe Uaquiñá jíchmuase, bëngbiye cha chaśúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnana, y chábeyeca Bëngbe Bëtsá quem luare y nÿetsca inÿe luarënga tojama. <sup>3</sup> Cha endinÿanÿná Bëngbe Bëtsabe corente buash-inÿinÿanana y uámanana, y cha endmëna cach Bëngbe Bëtsacá, y chábeñe bënga mondobena jinÿama ntšamo Bëngbe Bëtsá yomncá. Chabe Bëts obenánaca endútabna lempe ntšamo quem luarentše yobinÿncá; cha tojayana y chca jtsemnana. Cha tojanóbana Bëngbe bacna soyënga jabuajuánama, y chentsana Bëngbe Bëtsá tojaninÿanÿé cha puerte Bëtsá y uamaná Bëtsemnana, celoca játbemëse, Bëngbe Bëtsabe catšbioica, nÿetscanga jtsamëndayama.

*Bëngbe Bëtsabe Uaquiñá chë angelëngbiama más Bëtsá yomna*

<sup>4</sup> Y chca, Bëngbe Bëtsá tbojánbema chë angelëngbiama más uamaná y obená, er Bëngbe Bëtsá tbojanbuajó canÿe más uámana uabaina y chë angelëngbiama canÿe más uámana trabajo tbojanbonÿé. <sup>5</sup> Ndegombre chca endmëna, er Bëngbe Bëtsá ndocna te ndocna ángelbiye mëntsá tbonjaniyana, ntšamo chabe Uaquiñábiye tbojaniancá:

Aca atšbe Uaquiñá condmëna.

Mënté entšanga sënjinÿanÿé aca atšbe Uaquiñá comnana ca.

Ni ndocna angelbiama mëntsá tojánayana, ntšamo chabe Uaquiñabiama tojanayancá:

Atše canÿe taitá chabiama chántsemna,

y cha canÿe Uaquiñá atšbiama ca.

<sup>6</sup> Quem Bëngbe Bëtsabe Uaquiñá endmëna nÿetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháuashjanguama cha tojanma ora:

Bëngbe Bëtsabe nÿetsca angelënga cha chamotsatschuaná ca.

<sup>7</sup> Y chabe angelëngbiama, mëntsá tojánayana:

Atše sëndama atšbe angelënga, chë atšbe buayiynayënga, mo binÿiëngcá chamotsemnana, y chënga, atšbe oservénënga, mo inÿiëngcá ca.

<sup>8</sup> Pero chabe Uaquiñabiama Bëngbe Bëtsá tojánayana:

Utabná, acbe amëndayana nÿetsca tescama echántsemna,

y aca nÿetsca soyënguifë condbëtsemmandaye, ntšamo tšabá yomncá jtsamëse.

<sup>9</sup> Aca icontšena ntšamo tšabá yomncá nÿetsca soyënguifë jtsamama, y sempre chca jtsamama tša icoboše,

pero nÿa tondayama cmondogustana bacna soyënga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá,

y tojama aca puerte oyejuayá chacotsemnana,

chë inÿengbiama más oyejuayá ca —Bëngbe Bëtsá tojánayana.

<sup>10</sup> Bëngbe Bëtsá mëntsánaca chabiama tojánayana:

Utabná, quem luare jobojátšama ora, aca quem luare tconjanma,

y lempe chë celoca yomna soyëgnaca.

<sup>11</sup> Lempe chë soyënga nÿets tempo ndoñe queochátsmëna;

aca nÿetsca tescama cochántsemna.

Lempe chë soyënga echanjopochóca, mo tojuatanguaná entšayacá.

<sup>12</sup> Aca chë luarënga cochanjátrocaye, mo tsmëcá cuafjabiamcá.

Chca, chë luarëngaca cochanjama, mo entšayá tcojenëjônëtse y tcojenotrocacá.

Pero aca nÿets tempo cach aca cochandesomñe,

y nÿets tempo vida cochandesóbomñe ca —cha tojánayana.

<sup>13</sup> Bëngbe Bëtsá ndocna te ndocna ángelbiye mëntsá tbonjaniyana, ntšamo chabe Uaquiñábiye tbojaniancá:

Atšbe catšbioica cochtsetbemana,

acbe uayayënga acbe cucuatšifë chamoquedama atšbe obenánaca chjamëntscuana ca.

<sup>14</sup> Ndegombre, nÿetsca angelënga espíritënga mondmëna Bëngbe Bëtsá jaserviama, ndëmuanyënga cha tojanichamá bënga jabújabuachama, chë atsebácanënga mochtsemnëngbe tšabiama.

<sup>1</sup> Chíyeca, bënga šontsamna sempre Bëngbe Bëtsabe soyënga jtsuenanana, chë bënga tmonjouena soyënga, chë tsabe benachentsana ndoñe chamondojuánama. <sup>2</sup> Ndayá Bëngbe Bëtsá tempo angelëngaca entsänga tojanamëndacá, canýe ndegombre soye endmëna, y entsänga entsamna chca jtsobedecënana; y chë bacna soye tmojanmënga y ntšamo Bëngbe Bëtsá tojanmandacá ndoñe tmonjanmënga castigo tojanatsátá, chca tmojanma causa; y chca, <sup>3</sup> bënga chca bacna soyënga tmojtsamëse, ¿ntšamo mochjobenaye jtsejuabnayana Bëngbe Bëtsá chama ndoñe šochanjacastigaye ca? Ndegombre cha chca echanjama, bënga chábeñe ndoñe tmontsošbuáchese, chë bëts soye jëftsashjáchama, atsebácanënga jtsemnma. Bëngbe Utabná chë natsaná yojtsemna nda entsänga tojanabuayená Bëngbe Bëtsá entsänga yochjánatsebacama; y inýenga bënga šonjanabuayená cachcá ntšamo chábioye tmojanoyeunacá. <sup>4</sup> Y Bëngbe Bëtsánaca tonjaninýanyé, ndayá chënga tmojanabuayenacá ndegombre bëtsemnma, chabe obenana jinýanýiyama soyëngaca, entsänga chamenjnaná soyëngaca, bëts soyëngaca, y entsänga chë Uámana Espiritu ainaniñe chamotsebomnma cha jtsamëse. Chca jamëse, cada ona chaotsobena jamama ntšamo Bëngbe Bëtsá yobošcá.

*Bëngbe Bëtsá tojanma Jesucristo entsängcá chaotsemnma*

<sup>5</sup> Bëngbe Bëtsá angelënga ndoñe tonjubuáyana chamotsemándama ndayá quem luarentše yochtsemniñe, lempe mo tsmëcá chaotsemnma Bëngbe Bëtsá chaojama ora, chë ndayama mora bënga montsoyebuambná. <sup>6</sup> Chamna, inýoca Bëngbe Bëtsabe uabemana palabrënguifne mëntsá endayana, ntšamo chábioye canýa tbojaniyancá tojánayana:

Entsänga ndoñe yapa uámanënga quemátsmëna, as ¿ndáyeca tša chëngbeñe cuanjësejuabnaye?

Chënga entsänga mondmëna. ¿Ndayeca tša chënga cuanjësanýena?

<sup>7</sup> Aca tcojama entsá puerte uamaná chaotsemnma, y chë angelëngna nýe batšatema chabiama más uámanënga mondmëna.

Aca tcojama cha puerte uamaná y respeto merecido bomná chaotsemnma,

<sup>8</sup> y cha chaotsemándama nýetsca chë inýe soyënguifne, chë quem luarentše aca tcojamiñe — chiñe canýa tojánayana.

Entsä lempe chaotsemándama Bëngbe Bëtsá tojanma ora, tondaye tonjánboshjona entsáftaca ndëmandana soye ca. Pero mëntscoñama ndoñe nýa chca quemëntinýe, chë entsá lempe ntšamo quem luarentše yomncá jtsemándayana. <sup>9</sup> Pero bënga mondëtatšëmbo y corente mondonýá Jesús aíñe chca tojanmama. Bëngbe Bëtsá tojanma cha nduamaná chaotsemnma, mo canýe entsácá, baseftayté chë angelëngbiama más batšá uamaná. Bëngbe Bëtsá, entsängbe tsabiama jtsejuabnayëse, yojánboše Jesús chaóbanama, corente jasúfriase; Bëngbe Bëtsá yojánboše cha chca chaomama, nýets luarentša entsängbe tsabiama. Y Jesús ya chca tojánmayeca, Bëngbe Bëtsá ya tojinýanyé cha puerte bëtsá y uamaná bëtsemnma.

<sup>10</sup> Nýetsca soyënga yobinýna Bëngbe Bëtsabiama y chábeyeca. Tsabá enjama, Bëngbe Bëtsá jamana Jesucristo chaotsemnma lempe ntšamo entsänga tmojtsajabotcá, nda chëngbe bacna soyënguentšana cháuatsebacama. Bëngbe Bëtsá chca tojanma, Jesús, chë entsänga atsebácanënga jtsemnma unachayá, chaosufrija jamëse, chca, ba entsänga celoca, mo chabe basengcá, cháftaca bëtsëtsänga chamotsemnma. <sup>11</sup> Er Bëngbe Bëtsá cach Taitá nýetscangbiama endmëna: Jesús, chë entsänga Bëngbe Bëtsábenga chamotsemnma uamabiama, y chë entsänga chca chamojtsemnëngbiámna. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbiaye catšátanga ca jtsachembuanama. <sup>12</sup> Bëngbe Bëtsabe uabemana palabrënguifne Bëngbe Bëtsábioye cha mëntsá tbojaniyana:

Atšbe uabentsëngbeñe acbiama chanjóyebuambaye, y jacántase chochanjëtshuaye, ácbioye adórayënguëntše ca.

<sup>13</sup> Y mëntsánaca cha Bëngbe Bëtsabiama tojánayana:

Atše atšbe Bëtsábeñe chantsošbuáchiye ca.

Y más hcoye mëntsá tojánayana:

Muentše Bëngbe Bëtsabe básengaftaca sëntsemna, chë atšbe cucuatšíñe tojábashejuanënga, atše jtsanýenama ca.

<sup>14</sup> Quem Bëngbe Bëtsabe básenga nýetsca entsängcá mondmënayeca, Jesúsna canýe entsá chëngcá tojanóbema. Cha chca tojanma, jóbanëse, chë entsänga jóbanama chaot-samnama obenana bomná Satanás, jayëñjanama. <sup>15</sup> Y chca, cha tojama chë jóbanama y ndayá chentsšana yochjopásama auatjënga ndoñe chamondëtsauatjama; chënga nýets tempo corente ngmëna imnoyena, jóbanama auatja causa. <sup>16</sup> Er ndegombre, cha ndoñe tonjánabo chë angelënga jabújabuachama, ndayá chë Abrahámbentsšana entsängbiaye. <sup>17</sup> Y chama cha ibojamna jtsemnna nýetsca soyënguifne cachcá mo chabe uabentsëngcá, chë entsänga, chca, jobenayama jtsemnma chëngbiama mo bachnangbe canýe más uámana amëndayacá, Bëngbe Bëtsá jtseimpadánama chëngbiaye chëngbe bacna soyëngama cháuaperdonama, puerte lastemado mëná y siempre ntšamo Bëngbe Bëtsá tbojauyancá amá. Chca, cha jóbanëse

jamama entsānga chamobenama perdonānēnga jtsemnana, y chca, jobenayama Bēngbe Bētsáftaca tsábá tempcá jtsemnēngama.<sup>18</sup> Y mora cha entsobena, ndēmuanýēnga bacna soye jamama tojócochengüēnga jujabuáchana; cha chca entsobena, er cachánaca tojansufri, cha bacna soye chaomama Satanás tša yojtsentsēna ora.

### 3

#### *Cristo Moisesbiamá más uamaná endmēna*

<sup>1</sup> Chíyeca, Jesucristbeyeca catsátanga, Bēngbe Bētsábēnga, ndēmuanýēnga Bēngbe Bētsá tojáchembo chabe entsānga chamotsemnana, corente Jesucristbeñe šmochjésejuabnaye. Cha endmēna nda Bēngbe Bētsá bēngbiōye tbojanichmó, y nda bēngbiamá yomna mo chē más uamana bachnangbe amēndayacá, Bēngbe Bētsábīōye jtseimpadánama bacna soyēngama chašotsaperdonama. Cha chca endmēna chē bēnga mondošbuaché soyēnguiñe y chē mondbáyana ndegombre yomna ca soyēnguiñe. <sup>2</sup> Er Jesús nyēts tempo tojanma ndayá chaot-samama Bēngbe Bētsá tbojanīyancá, Bēngbe Bētsá, nda tbojanábuayana chca chaoservema, cachcá ntšamo Moisés tojanma ntšamo Bēngbe Bētsá tbojanmandacá, chabe entsāngbiōye cháuaservema. <sup>3</sup> Canýe yebna jebuaná chē yebnama más uamaná jtsemnana; cachcá Jesús, nda inētsama entsānga Bēngbe Bētsábēnga chamotsemnana, más jtsomerecēnana Bēngbe Bētsá cha puerte bētsá y uamaná bētsemnana cháuinýanýema, nýe ntšamo Moisés, canýa Bēngbe Bētsabe entsānguentšá yojanomerecēnana. <sup>4</sup> Ndēmuanýe yébnēnaca canýe jebuaná jtsebomnana, pero Bēngbe Bētsá endmēna nda tojanma lempe ntšamo yobinýncá. <sup>5</sup> Moisés yojtsama ndayá chaot-samama Bēngbe Bētsá tbojanmandacá, tsabe oservenacá nyētsca Bēngbe Bētsabe entsāngbeñe, y yojamna canýa corente tatsēmbuá ndayá más chcoye yochjanopásama, ndayá Bēngbe Bētsá yochjánayanama. <sup>6</sup> Pero Cristo, ndayá Bēngbe Bētsá tobošcá jamana, chē Bēngbe Bētsabe entsāngbeñe Uaquiñacá jtsemāndayēse, ntšamo canýe uaquiñá jtsemāndayana ndayá nyētsca chabe pamillanga tmojtsamiñe; cha, chē Uaquiñacá y chēnga chē Bēngbe Bētsabe pamillentsēngcá. Bēnga chē pamillentsá entsānga jtsemnana, bēnga chē ndayá tmošbuáchema bēts añēmoca sempre tmojtsóyebuambnase, y sempre Bēngbe Bētsá tsabe soyēnga bēngbiamá yochjamama tmojtsobátmanēse, y bēnga chca jtsebomnana puerte oyejuayēnga tmojtsemnēse.

#### *Chē jóchnama uamana luare Bēngbe Bētsabe entsāngbiamá*

<sup>7</sup> Chcasna, ntšamo chē Uamana Espiritu Bēngbe Bētsabe uabemana palabreñguñe to-janayancá:

Mēnté tsēngaftanga ndayá Bēngbe Bētsá tojtsichamcá šmojouenēse,

<sup>8</sup> ndoñe šmattsama, Bēngbe Bētsabe buayenana soyēnga tsēngaftangbe ainaniñe ndoñe chaondómashēnguama,

mo chē entsānga ndoyena luaroca Moisésoftaca imojtsemnēngcá, Bēngbe Bētsabe contra nyētsca soyēnguiñe imojtsemna.

Chēnga bētscá bacna soyēnga tmojanma, mo ndayá cuaftsamcá jinýama ntsachetšá más muanjobenaye jamana y Bēngbe Bētsá cabá uantado chēngaftaca tajojtssemnana.

<sup>9</sup> Bēngbe Bētsá tojánayana: “Chentše, tsēngaftangbe bēts taitanga bētscá monjánama jinýama ndayēntscoñe atše uantado chēngaftaca tsjamnama;

chca chēnga tmonjanma, masque canta bnētsana uatēntscuana chēnga chentše tmonjáninýe chē atše sēnjánama bēts soyēnga.

<sup>10</sup> Chíyeca, atše chorsca entsāngaftaca šonjánetna y sēnjánayana:

‘Tsēngaftanga mora átseftaca ndoñe quešmátajna, mo chē otšenēnga tmojtsemnēngcá, y ndoñe šmonjábošena jtsiyenana ntšamo atše tsošcá jtsamēse.’

<sup>11</sup> Chíyeca, atše chēngaftaca etonaná sēnjánayana, mo nda cuafjajuracá, chēnga ndocna te mochjēftsashjache chē átseftaca jóchnama uamana luaroye jashjanguama ca” —cha tojánayana.

<sup>12</sup> Jesucristbeyeca catsátanga, yejuana šmochtsantješna ndocná tsēngaftanguentšá chaondētsēbomna canýe ainana bētscá bacna juabnēngaca, y chē causa chaotsemna Bēngbe Bētsábeñe ndošbuachiyá, y Bēngbe Bētsábentšana, chē sempre iuetsemnábentšana chaotsojuánañe. <sup>13</sup> Chamna, nyētscanga añemo šmochtsatenatšetnaye cada te, chē bēnga imobena Bēngbe Bētsá joyeunayama tempo imoyenēntscuana, chē Bēngbe Bētsabe uabemana palabreñguñe “mēnté ca” uabaina tempo. Chca cmontsamna, ndocná tsēngaftanguentšá chaondētsamama, Bēngbe Bētsabe buayenana soyēnga ainaniñe ndoñe más chaondómashēnguama, bacna soyēnga jamama juabnēngaca ingñená. <sup>14</sup> Er, ndayá Jesús chabe amēndayoca yobomnentsana bēnga chamóyēngacñamna, bēnga šontsamna sempre ainaniñe corente jtsetatsēmbuana Jesusbe soyēnga ndegombre soyēnga bētsemnana, ntšamo bēnga chábeñe jtsošbuáchiyama tmonjanontsé ora monjanamcá.

<sup>15</sup> Ntšamo Bēngbe Bētsabe uabemana palabreñguñe endayancá:

Mënté tšëngaftanga ntšamo Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama, mo chë entsanga ndoyena luaroca Moisésotfaca imojëftsemnëngcá, Bëngbe Bëtsabe contra nyëtsca soyënguñe imojtsemna ca.

<sup>16</sup> ¿Y ndëmuanýënga imojamna, chë Bëngbe Bëtsá tojanëyancá tmojanuenentsana, nyëtsca soyënguñe chabe contra imojtsanmëna? Co chë Moisésbeyeca Egiptocana tmojánbocanënga.

<sup>17</sup> ¿Y ndëmuanýëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanýënga entsanga ndoyena luaroca tmojanóbana y chëngbe cuerpo chentše tojanoquedá. <sup>18</sup> ¿Y ndëmuanýënga tojanëyana, mo nda cuafjajuracá, chënga ndocna te mochjëftsashjache chë cháftaca jóchnama uámana luaroye jashjanguama ca? Co chë ndëmuanýënga ntšamo cha tojanmandacá ndoñe tmonjanmënga. <sup>19</sup> Y ndegombre, bënga montsobena jinýama chënga ndoñe tmonjëftsashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

## 4

<sup>1</sup> Chiyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanasëbuachenacá cachcá mentscoñama iuëtsemna, puerte cuedado mochtsebmoma, nderado ndánaca tšëngaftanguentšá ndoñe nanjobenaye chca jashjáchama. <sup>2</sup> Er bëngnaca chë tsabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tsabe soye chëngbeñe tonjanopasá, er chca tmojanuena ora, chë palabrënguñe ndoñe montsanošbuaché. <sup>3</sup> Pero bënga, chë Jesucristbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiana cha mentsá tojánayana ora:

Chiyeca, atše chëngaftaca etonaná, sënjánayana mo nda cuafjajuracá, ndegombre chënga ndoñe mochjëftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora; <sup>4</sup> er Bëngbe Bëtsabe uabemana palabrënguñe canýentše mentsá endayana, chë canýsëfta tianoye ndayá cha tojanmama:

Bëngbe Bëtsá nyëtsca trabajëngama tonjanochná chë canýsëfta tianoye ca.

<sup>5</sup> Y cachentše Bëngbe Bëtsabe uabemana palabrënguñe endayana, chë tempo chábioye chca tmojtsanábotengbiana:

Chënga ndocna te quemocháisashjache chë átšeftaca jóchnama uámana luaroye jashjanguama ca.

<sup>6</sup> Chë entsanga monjamna chë natsanënga chë tsabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjëftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguñe tmojtsanošbuachenga, mochjëftsashjache chë Bëngbe Bëtsáftaca jóchnama uámana luaroye jashjanguama. <sup>7</sup> Chë entsanga ndoyena luaroca, Bëngbe Bëtsá entsanga tojánachembo chë cháftaca jóchnama uámana luaroye chámuamashijnama, y chentšana ba uatëse cha cachiñe canýe tempo tojuinýnaná, chora entsanga chamobënama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyëbuambayëse, David Bëngbe Bëtsabe uabemana palabrënguñe mentsá tojánayana ora:

Mënté tšëngaftanga, ndayá Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

<sup>8</sup> Josué, Israeloca entsanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnama cha choca matëñjanmëse, Bëngbe Bëtsá bayté chentšana, David yojëftsiyena ora, inýe tempuama ndoñe matëñjanoyëbuambá, chë ndaye ora entsanga muanjobenaye chë cháftaca jóchnama uámana luare jashjáchama. <sup>9</sup> Y chca, cabá endmëna canýe uámana luare ndayentše Bëngbe Bëtsabe entsanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyëtsca trabajënga tojanpochocá ora; <sup>10</sup> er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyëtsca trabajënga tojanpochocá ora. <sup>11</sup> Chiyeca, sontsamna lempe ntšamo tmojobenacá jamana chë jóchnama uámana

luare jěftsashjáchama, ntšamo chě Běngbe Bětsábioye ndoñe tmonjanoyeunangcá ndocná chaondětsamama, y chě causa chěnga chě soye ndoñe tmonjěftsashjache.

<sup>12</sup> Er Běngbe Bětsabe palabra endmēna mo canye aina soycá, nyets tempo entšangbioye ndayánaca jtsabuátambayana, y bětscá jamana corente obenánaca, y ndocna te nye bonamente chě palabra jóyebuambayana. Mo chě nyets utoicajana más efsana espadějaquécá, jobenayana puerte jashenoye jatětsana canye cuerpo tocatětse ora, cachcá y cabá puerte más Běngbe Bětsabe palábraca, cha bēnga jinyanjiyana ntšamo bēnga nye bēngbe ainaniñe tmojtsejuabná y tmojtsebošcá, y chě ndocnábioye tmonjinjinýe sóynaca; y chě palábraca cha endobena jáuyanana ntšamo bēnga tmojajuabó y tmojabošencá aĩne o ndoñe tšabá bětsemnana. <sup>13</sup> Ntšamo Běngbe Bětsá tojamentšana tondaye quenátopodena chabiana iytēmenana jtsemnana. Běngbe Bětsá lempe bominye iuetsequěcná, y nyetsca soyēngama y nyetscangbiana lempe yotátšēmo; Běngbe Bětsá, ndábioye šojtsamna sempre jojuana ndáyeca canye soye chca tmojamama.

*Jesús endmēna chě más uámana bachnangbe bēts amēndayá*

<sup>14</sup> Jesús, Běngbe Bětsabe Uaquiñá celoye tojámashēngo, y mora cha endmēna nda chabe delante sempre bēngbiana ibuětseimpadana, mo chě bachnangbe canye más uámana amēndayacá. Chiyeca, bēnga šontsamna sempre chábēne jtsobuáchiyana, ntšamo bēngbe ndegombre ošbuáchiyana yomncá, chě ndayama bēnga nyetsca entšangbēne tmojayana. <sup>15</sup> Er chě bēngbiana impadaná, mo bachnangbe canye más uámana bēngbe amēndayacá, Jesús, yobena bēngbiana jōngmiana, bēnga inye ora ndoñe yapa obenana tmontsebmōna ora, tšabe soye o ndaye sóynaca jamama. Chca endmēna, er Satanás tša yojtsentsēna Jesúsbioye ba juabnēnga chabotsontšáshjajuanama, jayēnjanama bacna soye chaomama, nyetsca juabnēnga ntšamo bēngnaca mondbetsebmōncá, pero Jesús ndocna te ndocna bacna soye tonjěftsema. <sup>16</sup> As, ndauatjca Běngbe Bětsá mochjótšēmbona, mo chábioye cuaf-sobecocnangcá; cha canye uámana tbe maniñe yojtsetbemana canye bēts reycá; chca moch-jama, bēnga cháśualastemama, y bēngbiana tšabe juabna jtsebmōnēse, chaśujabuachama bēnga chca chaśojtsějaboto ora.

## 5

<sup>1</sup> Ndēmuanje bachnangbe más uámana amēndayánaca jtsemnana entšanguentšana bocacaná, y uabuayaná chēngbe cuenta Běngbe Bětsá jaserviama, chábioye juatšēmbonama y bayēnga jobáyama Běngbe Bětsá jětschuayama, chca, Běngbe Bětsá chě bacna soyēnga entšanga tmojamama cháuaperdonama. <sup>2</sup> Chě bachna jtsobenana jōngmiana, chě bacna soyēnga amēngbiana chama ntsetatšēmbcá, y chě bacna soyēnga jamama ingñēnēnga imomnēnga, mo otšenēngcá imomnēngbiana, er cachánaca inye ora ndoñe yapa obenana ntsebmōnana, chě bacna soyēnga jamama juabnēnga jtocochbuáchama. <sup>3</sup> Y chiyeca cha jtsemnana bayēnga jobáyama Běngbe Bětsá juatšēmbonama, ndoñe nye entšangbioye bacna soyēngama cháuaperdonama, ndayá chábioye chaboperdonámnaca. <sup>4</sup> Ndocná quenátobena cachá quem uámana trabajo jentšetayana, bachnangbe más uámana amēndayá jtsemnana; cha jtsemnana, Běngbe Bětsábeyeca uabuayaná chca uámana trabajo jamama, ntšamo ndegombre Aarónofaca tempo cha tojanmncá. <sup>5</sup> Cachcá, Cristo ndoñe cachá tonjanenábuiyana jtsemnana chě Běngbe Bětsabe delante sempre bēngbiana impadaná, mo bachnangbe canye más uámana amēndayacá, ndayá Běngbe Bětsá tbojanábuiyana chě uámana trabajo jtsebmōnana. Cha endmēna nda Jesúsbioye mēntšá tbojaniana:

Aca atšbe Uaquiñá condmēna.

Mēntē entšanga sēnjinyānyé aca atšbe Uaquiñá comnama ca.

<sup>6</sup> Y inyōcnaca, Běngbe Bětsabe uabemana palabrenguiñe mēntšá tbojaniana:

Aca nyetsca tescama canye bachna condmēna,

canye bēts bachna ntšamo Melquisedec yojamncá ca.

<sup>7</sup> Jesús quem luarentše yojěftsiyeněntscuana, cha juayebuáchēse y shěchbuiyeca Běngbe Bětsáftaca ibnécuentaye y ibnaimpadana, cha chě jobanámentsšana jatsbocama yojanobená; y Jesús ntšamo Běngbe Bětsá yojanbošcá tojánmayeca y tša respeto chabiana bómnyeca, chábioye tbojanoyeuná. <sup>8</sup> Chca, Cristo masque Běngbe Bětsabe Uaquiñá inamna, jasúfriase tojanábouiniye ntšamo jamana ndayá Běngbe Bětsá tojtsebošcá. <sup>9</sup> Chca, Běngbe Bětsá chábioye tbojánbema lempe ntšamo entšanga tmojtšajabotcá, nda chēngbe bacna soyēngama cháuatsebacama; chentšana cha, Cristo, tojjanma lempe ntšamo yojaniytca, nyetscanga chě entšanga chábioye imojányeunanēnga chamotsobenama nyetsca tescama atsebácanēnga jtsemnana; <sup>10</sup> y Běngbe Bětsá tbojanábuiyana, chě chabe delante sempre bēngbiana impadaná, mo bachnangbe canye más uámana amēndayacá chaotsemnana, canye bēts bachna ntšamo Melquisedec yojamncá.

*Resjo endmēna, ošbuáchiyana jtsajbanana*



<sup>11</sup> Bětsćá entsemna quem palabrama jóyebuambayama, pero chě soyěnga jayanama ntšamo tsěngaftanga catafjosertaycá, ndoñe paselo quenátsměna, er tsěngaftanga nŷa uenana Běngbe Bětsabe soyěngama jósertana. <sup>12</sup> Tsěngaftanga ya baytė Jesucristbe soyěngama šmotátšěmboyeca, tsěngaftanga cmontsamna ya jtsobenana inŷengbiye chě soyěnga jtsabuátambayana; pero tsěngaftanga cmontsějaboto ndánaca Běngbe Bětsabe soyěngama cachiñe chacmětětabuayená, chě jtsošbuáchiyama šmojtntśé ora natsana jshauatsjínŷana soyěngama. Y chca, tsěngaftanga šmojobiama mo šesonateměngcá, jtsějabótana létŷiye jofšiyana y ndoñe jobenayana jasana chě jabmuánama ndoñe paselo tontsemna soyěnga. <sup>13</sup> Chě nŷetsca soyěnguiñe ntšamo tsábá yomncá jtsamama buatěmbana soyěnga ndoñe tontsabuamtá cha, jtsemnana mo canŷe šesonatemcá, nda vida jtsobomnana nŷe létŷiye jtseftmaněse. <sup>14</sup> Pero chě tmojtobena jajuaboyana y jtsetatsěmbuana ndayá tsábá yomna o ndayá ndoñe tsábá jamama, chca jtsaměse tmoyenamna, chěnga jtsemnana mo bětsěsangcá, nděmuanŷenga ndayánaca jasana, chě ndoñe paselo jabmuánama soyěngnaca.

## 6

<sup>1</sup> Chcasna, běnga šontsamna jtsajbanana nŷe jésebošana jtsatsjědayana Cristbe बातěmbana soyěnga, chě běnga chábeñe jtsošbuáchiyama tmojanontśé ora tmojanatsjínŷe soyěnga, y šontsamna jtsatsjědayana chabiama nŷetsca soyěnga, más totcá josértama yomna soyěnga. Chca, běnga mochántsemna mo chě bětsěsangcá, ndayánaca jtseyayana. Ndoñe más nŷe chě natsana बातěmbana soyěngama mattsatsjědaye, mo chě ndayá yomna bacna soyěnga jtsamana y chě běnga ndoñe vida ntsebmomnama junatsana soyěnga amana jt-sajbanana, y chě tsabe benache jtishachana; o ntšamo Běngbe Bětsábeñe jtsošbuáchiyana; <sup>2</sup> chě juabáyana ndayá yomna; chě inŷabe bestšašñe cucuatśěnga jacjayana Běngbe Bětsábíoye chabiama jaimpádama; chě obaněnga jtayenama Běngbe Bětsá yochjamama; y mocna ora ntšamo entśanga tmojamama Běngbe Bětsá yochjayanama, chěnga chě nŷetsca tescama yomna tsabe vida chamotsebmomnama o nŷetsca tescama castigáněnga chamotsem-nama. <sup>3</sup> Y běnga chca fchanjama, chě más totcá yomna josértama soyěnga jtsabuátambayana, Běngbe Bětsá chca chašojálesenciase.

<sup>4</sup> Nděmuanŷenga, canŷe ya chě Běngbe Bětsabe ndegombre soyěnga tmojanóyěngacñe, y chě Běngbe Bětsabe ba tsabe soyěngnaca, chábenga bětsemnama, y chě Uámana Espíritu chěngbe ainaniñe chaotsemándama imobomna, <sup>5</sup> y chě Běngbe Bětsá ntšamo tojašebuachenacá sempre inětsamama tmojinŷe, y nděmuanŷenga tmojáninŷe Cristo jtsamana běts soyěnga chabe běts obenánaca, chě ndaye obenánaca cha puerte běts soyěnga yochjama cha quem luaroye yochjésabo ora, <sup>6</sup> chěnga Jesucristbeñe ošbuáchiyana lempe tmojtsajbanase, tondaye quenátsměna ndayá jamama cachiñe Běngbe Bětsábíoye jtobéconama; er Běngbe Bětsabe Uaquiñá chca stětšoye jaquédana, y jtsemnana mo Běngbe Bětsabe Uaquiñábíoye cachiñe chěnga tmojtsecrucificacá, y entśanga cachiñe cha chamotsábíoyejuanama chěnga cuafjamcá. <sup>7</sup> Smochjinŷe: fshantse jamana chě ba uaftěněnga chiñe chaomashěnguama, y chě chiñe trabájayěngbama bětscá jaja sananga tojóbočnėse, Běngbe Bětsá jamana, chě fshantsentśana bětscá tsabe soyěnga entśangbiama chaotsebíñŷama. <sup>8</sup> Pero nŷe uchmašěshangá y matěnga uchměšfangaca chiñe tojuábocnėse, chě fshantse tondaye ntsámanana; y nderado Běngbe Bětsá nanjama chiñe ndocna tsabe mata chaondúabocnama, y cabana, entśanga chiñe mochantsashaniñá. Cachcá, chě ošbuáchiyana tmojtsajbananga castigáněnga mochántsemna.

*Běngbe Bětsábeñe sempre chamotsobátmanama y ainaniñe bětscá añemo chamotsebmomnama*

<sup>9</sup> Pero masque chca montsoyebuambná, atśbe bonsháněnga, běnga tsábá fsěndětátšěmbo tsěngaftangbeñe chě más tsabe soyěnga echántsemna, chě atsbocaná jtsemnama tojtsá cha yobomna soyěnga. <sup>10</sup> Er Běngbe Bětsá sempre ntšamo tsábá yomncá nŷetsca soyěnguiñe jtsamana, cha ndegombre echántsejuabnaye ndayá tsěngaftanga šmojamama, y chě chabiama šmojinŷinŷe bonshánama, chabe entśangbiye jtsějabuáchaněse, ntšamo mórnaca šmojtsama. <sup>11</sup> Pero běnga fsěntseboše, cada ona tsěngaftanguentśá, nŷets tempo y Jesús chaojěsaběntscuana chaotsinŷanŷná corente yoboše chca jtsamama, Běngbe Bětsábeñe chca jtsošbuáchiyěse, chábeñe sempre chašmotsobátmanama, tsěngaftangbe tsábiamama chaomama. <sup>12</sup> Ndoñe queftsátšboše tsěngaftanga oyěnjayěnga chašmotsobiama chě Běngbe Bětsá tmojabanŷe trabajo jtsamama, ndayá Jesucristbeñe ošbuáchiyana bomněngcá y padecena soyěnguiñe uantado mēněngcá šmochtsama. Chca, chěnga mochanjóyěngacñe ndayá Běngbe Bětsá jatsatayama tojašebuachenacá, chabe entśanga bětsemnama.

<sup>13</sup> Běngbe Bětsá Abrahámíoye tbojansbuachená ora, chca tbojaníyana cachabe uabaina jayaněse, er inŷa chabiama más uamaná ndoñe yontsemna ndabiama jajúrama, ntšamo tbojansbuachenacá ndegombre chaotsemnama; <sup>14</sup> cha mēntśá tbojansbuachená: “Aíñe, atśe chanjama aca bětscá tsabe bendicioněnga chacotsebmomnama, y chanjama acbentśa

pamillentsana mallajta entsanga chamotsemnama ca.” <sup>15</sup> Y chca, Abraham Bèngbe Bètsábeñe jtsosbuáchiyése, puerte uantadiñe yojanóbátmana ntšamo tbojansbuachenacá Bèngbe Bètsá yochjanmama, y pronto chca tojanóyèngacñe.

<sup>16</sup> Entšanga tmojajurá ora, chca jamana chèngbiama canye puerte más uámanabe uabaina jayanése, y chca chèngbiama más uamanabiama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más nt-jatenátšetsnayana. <sup>17</sup> Y chca, Bèngbe Bètsá tojánbošena botamana jinñanñiyana, ntšamo cha tojanašebuachenacá mochjanoyèngacñèngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yoch-jantrócama. Chiyeca, botamana tojaninñanyé cha chca yochjanmana, cachabiama jajurase, chë ntšamo tojanašebuachenacá yochjanmama ndegombre bétsemnama. <sup>18</sup> Bèngbe Bètsabe šbuachenana soye y chama jinñanñiyama ntšamo tojanayancá, ntšamo tojanašebuachenacá ndegombre yochjanmama, chë uta soye ndocná ntšobenana jatrócama; y chca tojajana ora, ndoñe ntšopodénana Bèngbe Bètsá chaobená jobostérana. Y chca, chë uta soyama, bènga bètscá añemo ainaniñe jóyèngacñana, bènga chë Bèngbe Bètsábioye tmojobéconanga, cha chásuatsebacama y chašotsanñenama, mo canye bêts resjuentsana tmojsachetèngcá, ntšamo chentsana atsebácanènga jtsemnama cuafstenguacá. Bèngbe Bètsá jójauyana bènga imojtsobena chábeñe jtsobátmanama ca, y bêts añémoca chábeñe jtsosbuáchiyése, cha yejuana šochtsanñenama mondobátmana. <sup>19</sup> Mo ntšamo chë béjaye asentoca cuedádoca tcojajajo anclama, chë barcuñe enjaquenènga tšabá jtsetatšèmbuana chë barco ndoñe yochántasashiyyinama, cachcá bèngnaca, Bèngbe Bètsábeñe imobátmanama, montsobena ainanoca jtsetatšèmbuana lempe tšabá yotsomñana. Bènga Jesucristeñe mondobátmana, y Bèngbe Bètsá yojtsemnoye celoca cha tojámarshèngo y chabe delante entsemna mo chë bachnangbe más uámana amèndayacá. Chana jamashènguana chë Bèngbe Bètsabe bêts yebnoca, “chë más uámana ca” uabaina luaroye, entšèjua ujonñana stètsoica, Bèngbe Bètsabe delante jtsemnama, <sup>20</sup> ndayentše Jesús celoca, Bèngbe Bètsabe delante tojámarshèngo bèngbe tšabiama soyènga jamama, bèngnaca chamobenama chabe delante jamashènguama; chca, Jesús tojanóbema chë bachnangbe más uámana amèndayá nyetsca tescama, canye bêts bachna ntšamo Melquisedec yojamncá.

## 7

*Jesús, canye bêts bachna ntšamo Melquisedec yojamncá*

<sup>1</sup> Quem Melquisedec yojamna Salem puebloca rey y bachna chë celoca Bèngbe Bètsabiama; Bèngbe Bètsá, chë nyetscangbiama más uamaná. Abraham chë reyènga y chèngbe soldadèngaftaca imojentsjaná y tojanayèñjaná chentsana yojtsatabó ora, Melquisedec tojánbocna cha jajébenguama, y chora Bèngbe Bètsábioye tbojanimpadá, Abraham Bètsá tšabe bendicionènga chaotsebmomnama chaomama. <sup>2</sup> Chora Abraham chábioye tbojanatšetá, chë reyèngaftaca imojentsjaná ora, lempe tojanosháchiñentsana, bnètsanentsana canye soye. Chë palabra Melquisedec endayana “nyetsca soyènguiñe tšabá ama rey ca”; y chánaca yojamna Salem puebloca rey, y chca endayana “nyetscanga natjèmbana chamotsiyenama ama rey ca”. <sup>3</sup> Chabe pamillangbiama tondaye quenatótatšèmbó; chca cha endmèna mo ni taitá ni mamá ndoñe endbmomnacá, ni bêts taitanga. Tondaye quenatótatšèmbó ntseco tojanonñinama, ni ntseco tojanóbánama; chca, inye soyènguiñe cha yojamna mo Bèngbe Bètsabe Uaquiñacá, y endmèna mo nyetsca tescama bachna cuafstsemncá.

<sup>4</sup> Y mora, šmochjábuaboje tša uamaná Melquisedec inamnama, er bèngbe tempsca uámana bêts taitá Abraham chábioye tbojanatšetá, chë reyèngaftaca imojentsjaná ora lempe tojanosháchiñentsana bnètsanentsana canye soye. <sup>5</sup> Ntšamo Moisesbe leyíñe endèmandacá, chë bachnangbe más uámana amèndayá Leví, Aarónèna ca uabainabe pamillentsana tmomna bachnanga, jtsamnana chë Israeloca entsángbioye nyetsca chë tmobomna soyènguentšana bnètsanentsana canye soye jtsayèngacayana; y chca jtsamnana masque chë entsanga cachèngbe pamillentsènga tmomna y Abrahámèntšana pamillentsèngnaca. <sup>6</sup> Pero Melquisedec, masque Aaronbe pamillentsá ndoñe yonjamna, Abraham, chë ntšamo Bèngbe Bètsá tbojanšbuachenacá tojanóyèngacñabentsana, cha tojanóyèngacñe nyetsca soyènguentšana bnètsanentsana canye soye, y Bèngbe Bètsábioye tbojanimpadá, Abraham Bètsá tšabe bendicionènga chaotsebmomnama chaomama. <sup>7</sup> Y ndocná quenátobena jayanama ndoñe ndegombre yondmèna ca, chë Bèngbe Bètsábioye impadaná inñabiama tšabe soyènga chaomama, más uamaná inètsemna chë chca tojóyèngacñabiama, inñya chabiama Bèngbe Bètsábioye tbojaimpadá ora. <sup>8</sup> Quem tempo, bachnanga mochjóbanènga, entsángbioye jtsayèngacayana nyetsca chë tmobomna soyènguentšana bnètsanentsana canye soye, pero chë Bèngbe Bètsabe uabemana

palabra, Melquisedecbiana endoyebuamná cha mo canya cabá ainá totsomñá. <sup>9</sup> Y bēnga montsobena jayanama, Abraham Melquisedecbioye chē nyetsca soyēnguentšana bnētsanentšana canye soye tbojanoyé ora, yojamna mo Leví, chē nyetscāngbioye nyetsca soyēnguentšana bnētsanentšana canye soye ayēngacayá, Melquisedecbioye chca cuafatopagacá; <sup>10</sup> er cha Abrahambe pamillentsá inamna. Melquisedec yojtsabó ora y chábioye chē lempe tojanosháchiñentšana bnētsanentšana canye soye Abraham tbojanatsetá ora, yojamna mo nyetscanga, chē Abrahámbentšana entsānga más chchoye mochtsaniyenēnga, chēngnaca chē bnētsanentšana canye soye cuafajajocá, masque Abraham chca tojanma ora, Leví y chē Abrahámbentšana inye entsānga cabá ndoñe tmonjanonýná.

<sup>11</sup> Israeloca entsānga Moisesbe ley tmojanáyēngaca, chē bēts taitá Levibe pamillentsēnga bachnanga imojamnēnga Bēngbe Bētsá imojtseservena ora, y chēnga monjamna Aarónbentšana entsānga. Ntsāmo chē leyíñe yomandancá imojánamēnga perdonánēnga jtsemnama y Bēngbe Bētsabe bominýñe tsábēnga jtsemnama quem bachnanga jamama matmēnjanobenase, ndoñe manjanēyta Bēngbe Bētsá inye bachna chabuatschembuama, nda ndoñe yonjamna mo chē bēts bachna Aaroncá, ndayá ntsāmo chē bēts bachna Melquisedec yojamncá. <sup>12</sup> Er, canye bachnanga Bēngbe Bētsábioye jtse servénama tmojajbaná y inye bachnanga chábioye jaserviama tmojatontsé ora, jtseytana chē natsana bachnanga imojanoservena ora mándaye leyēngnaca jtsetrócama. <sup>13</sup> Bēngbe Utabná, ndabiama quem soyēnga jtsóyebuamnbayana, ndoñe Aaronbe pamillentsá quenjatsmēna, ndayá inye pamillentsá, y quem pamillentsá entsānga ndocna te bachnangcá Bēngbe Bētsá tmonjanservé, chē altar ndirichiñe Bēngbe Bētsabe bēts yebnoca. <sup>14</sup> Er nyetscanga mondētatsēmba Bēngbe Utabná Judabe pamillentsāna bētsēmnama, y chē pamíllama Moisés ndocá tonjánayana, Bēngbe Bētsá mo bachnangcá chēnga jtse servénama.

<sup>15</sup> Y ntsāmo tmojayaná montsobena más tsábá josértana, er chē tsēm bachna Cristo yojamna canya mo Melquisedec yojamncá. <sup>16</sup> Cha bachna yojamna, ndoñe chē bachnanga chabe pamillentsāna jabocanama yojánamnama canye ley tojánayanayeca, ndayá nyetsca tescama jēftsienayana cha inobénayeca. <sup>17</sup> Er mēntšá endmēna, ndayá Bēngbe Bētsá chabiama tojánayana:

Aca bachna nyetsca tescama condmēna, canye bēts bachna ntsāmo Melquisedec yojamncá ca.

<sup>18</sup> Cha tojánabo ora, Bēngbe Bētsá tojanma chē nda bachna jtsemnama y ntsāmo joserviama mandēnga chaotsopochocama, er chē mandēnga ndoñe ntjobenayana entsānga jujabuáchama atsebácānēnga jtsemnama, y chca, chēngbiana ndoñe bētscá yonjanoservena. <sup>19</sup> Er Moisesbe léyeca, entsānga ndoñe tmonjanobená Bēngbe Bētsabe bominýñe tsábēnga jtsemnama, pero mora chama canye corente más uámana soye montse bomna: Jesucristbeñe jtsošbuáchiyēse, chábeñe montsobátmana Bēngbe Bētsáftaca tsábēnga chásubiamama, y chca, Bēngbe Bētsábioye bēnga jtobēconama.

<sup>20</sup> Y Bēngbe Bētsá lempe chca tojanma, cachabiama jajúrase, lempe ntsāmo cha tojanayanacá ndegombre chaotsemnama. Chē inye bachnanga, chē Aaronbe pamillentsēngbioye tmojanēbuáyana ora, Bēngbe Bētsá ndoñe chca tonjánayana, <sup>21</sup> pero mo bachnēcá chaoservena Bēngbe Utabnábioye tojanábuayana ora añe; cach Bēngbe Bētsabiama jajúrase, Bēngbe Utabná canye bachna yochtsemna ca tojánayana. Ntsāmo Bēngbe Bētsabe uabemana palabrēnguiñe endayanacá:

Bēngbe Utabná Bēngbe Bētsá, Jesucristbioye tbojanianayana, cachabiama jajúrase, ntsāmo tojanayanacá ndegombre chaotsemnama, y juabna ndoñe ntjatrócama:

“Aca bachna nyetsca tescama condmēna ca.”

<sup>22</sup> Bēngbe Bētsá chca tojánayanama, Jesúsbeñe bēnga corente mondētatsēmba, ndayá Bēngbe Bētsá bēngbiana jamama tojanašebuachenacá, chē Jesúsbioye bēngbe bachna chaotsemnama juabuáyanana, más tsábá yojtsemna chē ndayá tempo cha chabe entsāngbiana tojanašebuachená soyama. <sup>23</sup> Chē inye bachnanga banga imojamna, er ndocná yonjanobena Bēngbe Bētsábioye nyetsca tescama chca jtse servénana; cada ona básefta uatēngama tojētsanoservé, tojanóbana y inýabioye chē trabajo jatontšabuáchana. <sup>24</sup> Pero Jesús ndocna te ntjobanámayecna, cha mo bachnēcá Bēngbe Bētsábioye nyetsca tescama bochjēftseservena, y ndocna te chabe trabajo inýabioye bochanjēftsinyinýiye, chē inya cachcá jtsamama chauatontšema. <sup>25</sup> Chiyeca, cha yobena nyetsca tescama játsebacana ndēmuanýēnga chábeyeca Bēngbe Bētsábioye mtjobeconá, er nyetsca tescama cha echanjēftsienayana Bēngbe Bētsábioye chēngbiana jtseimpadánama.

<sup>26</sup> Chcasna, Jesús ndegombre endmēna lempe ntsāmo bēnga imuajabotcá nda Bēngbe Bētsábioye bēngbiana chabotseimpadánama, mo chē bēngbe bachnangbe más uámana amēndayacá. Cha sempre uamaná endmēna, ndocna te ni mo canye juabna inýabe contra

yonjábomna, ainaniñe ndocna bacna juabna yonjábomna, chë bacna soyënga amënguentšana luaroca mëná, y Bëngbe Bëtsá tojanma celoca más bëtsá y obená nyëtscangbiama cha chaotsemnama. <sup>27</sup> Cha ndoñe bonjanájaboto canye te y inye te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entsanga tmojanmámna, mo chë inye bachnangbe más uámana amëndayënga mondbetsamcá, cachëngbiama y chë judiëngbiámna. Cha tojanma lempe ntšamo yojaniytcá canye soye y nyëtscá tescama, entsanga bacna soyënga tmojanmama perdonánënga chamotsemnama. Cha chca tojanma, chabe derecho vida jtsobomñama cachcá tojanonýná ora; y tojanóbana entsanga chamotsobenama perdonánënga jtsemnama. <sup>28</sup> Ntšamo Moisesbe leyíñe yojanmandacá, chëngbiama mo chë bachnangbe más uámana amëndayëngcá tmojanëbuáyana entsanga inye ora bacna soye amënga; pero Bëngbe Bëtsá cabá chë ley entsangbe cucu-atsíñe tojanáboshjonentsana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiama jajúrase, ntšamo tojanayancá ndegombre chaotsemnama. Bëngbe Bëtsá tojanma chë Uaquiñá chaotsemnama lempe ntšamo entsanga tmojtsajabotcá, nda cháutsebacama, ndocna te bacna soye ndamá, ni ainaniñe bacna juabnënga ndbomná.

## 8

*Cristo, nda jóbanëse tojanma entsanga Bëngbe Bëtsáftaca mo canyácamá chamotsemnama*

<sup>1</sup> Chë más uámana soye ndayama bënga montsichamo, chë Cristo mo bachnëcá yomnama montsoyebuambná ora, entsemna: Bënga chábeñe imojtsebomna canya nyëtscá tescama Bëngbe Bëtsabe delante bëngbiama impadaná, mo chë bëngbe bachnangbe más uámana amëndayacá, Bëngbe Bëtsabe catšbioica yojtsetbemana jtsemándayama, y Bëngbe Bëtsá chë más uámana tbemanentse. <sup>2</sup> Chë inye bachnanga Bëngbe Bëtsabe bëts yebnentse tmojánamashjna chë “más uámana ca” uabaina luaroye, Bëngbe Bëtsabe delante jtsemnama; pero chë luare celoca ndayentse nyëtscá tempo Cristo mo chë bachnangbe más uámana amëndayacá yoservena, entsanga ndoñe chca tmonjanpormá, ndayá Bëngbe Bëtsá.

<sup>3</sup> Nyëtscanga chë bachnangbe más uámana amëndayënga tmojanëbuáyana, entsangbiama soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnama; chíyeca, jtseytana Jesucristo ndayánaca chaotsebomnama, Bëngbe Bëtsábioye juatšëmbonama. <sup>4</sup> Cha quem luarentse tojtsetrabájase, cha ni mo bachna ndoñe nántsemna, er muentse ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyíñe yomandancá. Y chca, ndoñe nantseyta cha chca chauatoservénama. <sup>5</sup> Chë inye bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoservena, ndoñe cachcá yontsemna chë ndayentse Jesucristo celoca yoservena luarcá, ni ntšamo cha yoservencá; nyë batšatema bëngbiaye šuinjanýná ntšamo chë celoca luare yomnama, ndayentse Cristo mo bachnëcá yoservena. Y bënga mondetatšëmbo quem luarentse chë soyënga chca yomnama, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntšá tbojanianyana: “Cuedado cochtsebomna chë atšbiama yebniñe nyëtscá soyënga jamama, ntšamo tcbonjaninýñyëcá chacomama, chë tjoca bonjamna ora ca.” <sup>6</sup> Pero bëngbe bachnangbe más uámana amëndayá Cristo, tojashjache canye más bëts trabajo jtsebomnama, ntšamo chë inye bachnanga imobomna trabajuama; cachcá, ndayá Bëngbe Bëtsá tojayancá Cristoftaca bëngbiama jamama, bënga tempcá tšabá Bëngbe Bëtsáftaca jtsemnama jtsamëse, puerte más tšabá endmëna, chë ndayá tempo chabe entsangbiama jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiama jamama.

<sup>7</sup> Chë Bëngbe Bëtsá natsana tojanašebuachená soyëngaca matëñjanopodé entsanga chamotsamama ntšamo yojanamncá, ntšamo tojanašebuachenacá jóyëngacñama, as ndoñe manjanëyta Bëngbe Bëtsá cachiñe canye trato chauátšbemama entsangbiama. <sup>8</sup> Pero Bëngbe Bëtsá tojáninýe ntšamo yojanamncá entsanga ndoñe tmonjanmama, ntšamo cha tojanašebuachenacá jóyëngacñama, y Bëngbe Utabná Bëngbe Bëtsá chëngbiama mëntšá tojánayana:

Canye tempo echanjóshjango, y chora Israel y Judabe pamillentsa entsangbiama básefta soyënga jamama chanjašebuachená, chënga átseftaca tempcá tšabá jtsemnama chamotsobenama.

<sup>9</sup> Chë chanjašebuachená soye ndoñe queochátsmëna cachcá ntšamo chë chëngbe bëts taitanga sënjanašebuachená soye enjamncá, atse chënga sënjanënatse ora, Egipto luarocana sënjësänëbuacna ora; pero chëngna, ntšamo jamama enjanamncá, chë sënjanašebuachená soye jóyëngacñama ndoñe chemátanma causa,

atše cachcá chënga sënjesanëñyaye ca, Bëngbe Utabná tojánayana.

<sup>10</sup> Chë Israeloca entsangbiamana ndayá jamama canye tempo chentsana chanjašebuachená soye,

mëntšá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama, y chamotseboše jtsamana ndayá chëngbe ainaniñe chaitsemánda soye.

Atše chëngbe Bëtsá chántsemna, y chënga atšbe entsanga.

<sup>11</sup> Chë tempo ndoñe queochátsiya cánýenga ínýenga chamotsabuátambama, cachabe luariñe oyenábioye o cachabe pamillentsa entsábioye, atše chë chëngbe Utabná chašmotsábuatmama.

Ndoñe queochátsýta, er nyetscanga uámanënga y nduámanënga, corente tšabá atšbe šmochantsábuatma.

<sup>12</sup> Chënga chanjálastemaye y chëngbe bacna soyëngama chanjáperdonaye,

y ndocna te más chë bacna soyënga chënga tmojamama quichátsjuabnaye ca —cha tojánayana.

<sup>13</sup> Bëngbe Bëtsá, chë entsangbiamana mora jamama tojášebuachenama tojtsichamo ora, chca jtsemnana, er cha tojama chë tempo entsangbiamana jamama tojanašebuachená soye, mora ya ndoñe chaondëtsoservénama; ndayá mo tanguá soyca tojtsemna y ya ndoñe tontsoservena, chë soyana nýe batšatema más y ya jtsopochócana.

## 9

### *Bëngbe Bëtsá jadórama muentšá luare y chë celoca luare*

<sup>1</sup> Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nýa chabiamana pormana yebnentse quem luarentše.

<sup>2</sup> Chíyeca, Bëngbe Bëtsá tojanmandá chaotsemna canye jatsjacama opodena yebna chábioye jadórama, mëntšá: Chë ntšana tšañe quem Bëngbe Bëtsabiamana yebnentse inauabaina “chë uámana luare ca”; chentše inamna chë canýsëfta quínýenëšjuangá castellano candelersíñe, y canye mesëshá ndayiñe yojacjana chë luarentše Bëngbe Bëtsá bëtsemnama inýinýnaye tandëšënga.

<sup>3</sup> Inýe ujonýana entsëjua chentsana, inýe luare inamna; inauabaina “chë más uámana luare ca”. <sup>4</sup> Chentše inamna chë castellano altar, incienso jajuinýiyama, y chë cajontema nyetsiñe castellánoca pormánëtema. Quem cajontema yojaninýanýná ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana soye inýinýnaye cajontema ca”; y chë tsoye quem soyënga inabomna: canye castellano jarrëtema, maná ca uabaina tandëšëca, chë Bëngbe Bëtsá tojanma celocana chabe entsangbiamana chaótsatsama saná; Aaronbe varëšja, chë tojanantšëfjonëšja; y chë ndëtsbé tablëbenga ndayiñe Bëngbe Bëtsá tojanábema chë bnëtsana uámana mandënga. <sup>5</sup> Chë cajontema juatsboca inamna chë juatëngmiášha uabomnënga, mo angelëngcá, “querubinënga ca” uabáinënga, y chënga imojaninýanýná chë Bëngbe Bëtsabe buashinýinýanana chëntšnaca bëtsemnama. Chënga, chë juatëngmiášhangaca chë cajontémentšá nyëts ústonëtema imojanëtsbotsana; chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuéšcjana, chë Bëngbe Bëtsábioye cha ibnaimpadana te, entsanga cháuaperdonama. Pero mora ndoñe quenátsiya chë soyëngama lempe jatóyebuambnayama.

<sup>6</sup> Lempe chca tmojanprontantšana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama. <sup>7</sup> Pero nýe chë bachnangbe más uámana amëndayá yojobena chë inýe luaroye jamashënguana, y nýe canye cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonana, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entsanga tmojanma bacna soyëgnaca. <sup>8</sup> Chca, chë Uámana Espíritu jamana bënga chašósertama, chë natsana luare cabá tojtsemnëntscuana y chë bachnanga cabá chë soyënga chentše tmojtsamëntscuana, nyetscanga cabá ndoñe tmonjanobená chë inýe luaroye jamashjnama, chë “más uámana luaroye”. <sup>9</sup> Chë soyëngaca jtsopodénana bëngbioye jinýanýiyana, chë tempo, chë Bëngbe Bëtsábioye jadórama yebnentše entsanga uta luare imojábomna ora, ndoñe yonjopodena Bëngbe Bëtsabe delante nyetscanga jatsmënnana, mo chë bachnangbe más uámana amëndayacá. Y chë soyëgnaca jtsayanana, chë Bëngbe Bëtsabiamana uatšëmbona soyëngaca y bachnanga tmojanóba bayëngaca, ndoñe tonjanopodé jamana canýa Bëngbe Bëtsábioye adoryá, Bëngbe Bëtsáftaca tempcá tšabá chaotsatsmënnama y Bëngbe Bëtsá chabe bacna soyëngama tbojaperdonama ainaniñe corente chaotsetatšëmbuama. <sup>10</sup> Chënga, chë uatšëmbona soyëngaca y tmojanóba bayëngaca tmojanma nýe ntšamo Moisesbe leyíñe

yojanayancá, ndayá chiñe yojanlesenciancá, ndayá jasama o jofsiyama, y chë cuerpo jabebianama mo tsabe entsangcá Bëngbe Bëtsabe delante jtsatsmënama; nyetsca mandënga nñe cuerpama, pero ainanama tondaye ntjamana. Pero chë entsanga chca yojánama jtsamana, nñe Bëngbe Bëtsá inñe soyënga, más tsabe soyënga jamama tojamandantscuana, chë tsëm trato tojábema ora.

<sup>11</sup> Pero Cristo ya tojánoba, y cha yomna chë Bëngbe Bëtsabe delante bëngbiamapa impadaná mo chë bëngbe bachnangbe más uámana amëndayacá, chca, bëngbiamapa chaotsemnana chë tsabe soyënga ntšamo mochjoyëngacñécá. Chë luare celoca ndayentše cha Bëngbe Bëtsabe delante mo bachnécá yotrabája, puerte tsabe luare yomna, y chentše cha, ndoñe chë quem luarentše bachnanga imonnëngcá, cha yobena jamana lempe ntšamo Bëngbe Bëtsá entsangbiamapa jamama inajuabnaycá. Chë luare ndoñe entsangbe cucuátseca yondëpormana, y chca jtsayanana, quem luarentša soye ndoñe yondmëna ca. <sup>12</sup> Cha, canñe y nyetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inñe bachnanga imojuamancá; ndayá jóbanëse, chabe buiñe juabuáshanëse, cha tojanma entsanga atsebácanënga jtsemnana chamotsobenama; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nyetsca tescama yomna tsabe vida jtsebonnana chamotsobenama.

<sup>13</sup> Ndëmuanyënga ndayámncapa chë leyama tmojanocuadá mo chë Bëngbe Bëtsabe delante ndoñe tsabengcá, chë bachnanga imojuamana chëngbiyoe toronga y chivëngbe buiñe jabuëscacjana, y chë altaroca tcojajuinñe ternerabe jatínñá chëngbiyoe jatbótótana, chca, chënga jábiamapa Bëngbe Bëtsabe delante mo tsabengcá. Chca tmojamentšana, chë bachnanga tmojánayana chënga imojtsobena chë inñengaftaca jabama, Bëngbe Bëtsá jadórama, y cachiñe mo tsabengcá Bëngbe Bëtsabe delante imojtsatsmëna ca. <sup>14</sup> Ndayá bachnanga tmojanmncá yojánamapa entsanga cachiñe mo tsabengcá Bëngbe Bëtsabe delante imojtsatsmëna ca jayanama; y chca, chë inñengaftaca Bëngbe Bëtsábioye jadórama tmojanobenase, jtsachetšá más yojtsámama Cristbe buiñe, ndëmuanyëye tojánábuašana bëngbiamapa cha tojanóbana ora! Chë nyets tempo vida bomná Espiritbe obenánaca, Cristo, chabe derecho vida jtsobomñama cachcá tojanonñá y bëngbiamapa tojanóbana. Cha, chë ndocna bacna soye ndbomná, tojanóbana ora yojamna mo canñe bayá tondaye ndbemaná chë bachnanga cuafjobacá juatšëmbonama, entsangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiamapa tojanóbanayeca, Cristo yobena jamama bënga ainaniñe corente tsabá chamotsetátšëmbo, bacna soyënga bënga tojomamapa, chë ndoñe vida jtsebonnana bënga junatsana soyënga, chama bënga perdonánënga imojtsemnana, y chca, bënga montsobena jtseyenana, Bëngbe Bëtsá, chë ndegombre ainá yomná, jtse servénese.

<sup>15</sup> Chiyeca, Cristo jóbanëse tojama entsanga Bëngbe Bëtsáftaca cánñiñe mo canñacá chamotsemnana, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entsanga chamotsemnana tojáchembënga perdonánënga chamotsemnana, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebonnana soyënga jóyëngacñama, ntšamo Bëngbe Bëtsá chabe entsanga tojanašebuachenacá.

<sup>16</sup> Ntšamo canñe testamentiñe jtsayancá chaopasamna, jtseytana chaotšótatšëmbo chë chca jamama tojašbuachená cha tojóbanama. <sup>17</sup> Canñe testamento tondaye ntsámanana, chë chca jamama tojašbuachená cha cabá ainá totsomñëntscuana; nña cha tojóbanapa orna aiñe. <sup>18</sup> Chiyeca chë Bëngbe Bëtsabe natsana trato, entsangbeñe tojanobo jatšé, chora tmojanóba bayëngbe buiñe jabuëscjëse. <sup>19</sup> Moisés chë leyentša nyetsca mandënga nyetsca entsanga tojanabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyesheca enajuabnëyiñe tojanfchecuacuá, y chora chë leyënga librësañe tojanbuëscacja, y nyetsca entsangbeñnaca. <sup>20</sup> Y mëntšá tojánayana: “Quem buiñe entsinñinñá, ntšamo Bëngbe Bëtsá tojamandacá ndegombre yochtsemnana, y tsëngaftangbiamapa puerte yochtsámanama ca.” <sup>21</sup> Moisésnaca buiñe tojanbuëscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoservena. <sup>22</sup> Er ntšamo leyinñe iuayancá, yojtsemna nña mo nyetsca soyënguiñe buiñe jabuëscacjana, Bëngbe Bëtsábioye jadórama tsabá chaoservema; y buiñe ndoñe tonjuábuashanësa, ndoñe ntsopodénana entsanga bacna soyëngama perdonánënga chamotsemnana.

*Cristo jasúfriase y jóbanëse, tojanma entsanga bacna soyëngama perdonánënga chamotsemnana*

<sup>23</sup> Chiyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tsabá chaoservema, chë Bëngbe Bëtsábioye

jëtschuayama tmojóba bayëngbe buíñeca. Chë soyënga batšatema jtsinýanýnáyana ntšamo chë celoca luare yomnana Bëngbe Bëtsabe delante, ndayentše Jesú yoservena. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesu-cristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše innétsama soyëngama. <sup>24</sup> Er Cristo ndoñe tonjánamashëngo canýe luarentše Bëngbe Bëtsá jadórama nýe entšangbe pormánentše, ndaye luare nýe batšatema jtsinýanýnáyana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiana jtseimpadánama. <sup>25</sup> Chë bachnangbe más uámana amëndayana chë “más uámana luaroye” jamashënguana canýe cada uata, bayëngbe buíñeca, ndoñe cachabe buíñeca, chca, ndayánaca jamama entšanga bacna soyënga tmojamama perdonánënga chamotsemnana. Pero Cristo chë luaroye celoca ndoñe tonjánamashëngo, chentšana jtésebocnana, y chabe buíñe juabuáshanëse cachiñe jatóbanama, y ba soye cachá chautsemnana. <sup>26</sup> Chca tojtsemnëse, Cristbiana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canýe y nýetsca tescama tojenonýinýe quem luarentša entšanga bacna soyënga jabuajuánama, chëngbiana jóbanëse, mo entšangbe bacna soyëngama canýe tmojóba bayá, Bëngbe Bëtsábioye uatšëmbonacá. <sup>27</sup> Cachcá, ntšamo nýetsca entšanga jtsamnana nýe canýe jóbanama, y chentšana Bëngbe Bëtsá chëngbiana jayanana chë imojëtsiyenëntscuana ntšamo tmojan-mcá tšabá o ndoñe tšabá bëtsemnana, y chëngaftaca jamana ntšamo chora tojajuabocá, <sup>28</sup> cachcá, Cristnaca, nýe canýe chabe derecho vida jtsobomñama cachcá tojanonýa, chabe buíñe juabuáshanëse jóbanama, ba entšanga bacna soyëngama jáperdonama; y chentšana cachiñe yochjësabo, ndoñe bacna soyëngama entšanga jabáperdonama, ndayá chë cha cháuesabama tša tmobátmanënga jabátsebacama.

## 10

<sup>1</sup> Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inýe soyëngaca, ndoñe ntsinýanýnáyana lempe chë Bëngbe Bëtsá chabe entšanga jatšatayana puerte tšabe soyënga, pero aíñe batšatema jtsinýanýnáyana ntšamo chë soyënga yochtsemnana. Chiyeca chë mandënga, chë uatšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana ja-mana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nýets tempo, chënga ainaniñe corente chamotsetatšëmbuama chëngbe bacna soyëngama nýetsca tescama perdonánënga imojtsemnana. <sup>2</sup> Er ndayá tcojtsamama Bëngbe Bëtsabiana uatšëmbona soyëngaca y chábioye jëtschuayama tmojóba bayëngaca, entšanga Bëngbe Bëtsábioye adórayënga, chabe delante tšábënga jtsemnana matmënjánobenase, chënga chë bacna soyënga tmojanmama ainaniñe ngmënaca ya ndoñe mamënjëtsemna, y matmëntsanajbaná soyënga amana chë tmojóba bayëngaca. <sup>3</sup> Pero juatšëmbonama entšanga bayënga tmojóba ora, josérviana entšanga bacna soyënga tmojamama cada uata chamu-atenójuaboma; <sup>4</sup> er chë toronga y chivënga tmojóbanëngbe buíñeca ndoñe ntsopodénana entšangbioye bacna soyënga jabuajuánama.

<sup>5</sup> Chiyeca, Cristo quem luaroye tojánabo ora, Bëngbe Bëtsábioye mëntšá thojaniyana: Ndoñe tconjábošena entšanga chacmátšëmbona soyënga, ni tmojobaye bayënga, pero aíñe tcojama atše canýe entšacá chaitsemnana.

<sup>6</sup> Ndoñe tšabá quecmátinýana chë tmojóba y tmojajuinýe bayënga, entšanga bacna soyëngama chacotsaperdonama.

<sup>7</sup> As atše Bëngbe Bëtsá sënjanaryana: “Bëngbe Bëtsá, muentše sëntsemna, ntšamo aca icobošcá atše chaimama, ntšamo acbe uabemana palabrënguñe atšbiana endayancá, chë ndayá atše chjanmama ca.”

<sup>8</sup> Natsana, Cristo tojánayana, Bëngbe Bëtsá ndoñe tonjánbošena, ni tšabá thonjanínýnana entšanga chamuátšëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinýe bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyíñe iuayancá ndayá chënga jamama yojtsamna. <sup>9</sup> Y chentšana, Cristo Bëngbe Bëtsábioye thojátaniyana: “Muentše sënjabo, chë ntšamo aca icobošcá atše chaimama ca.” Chca, Cristo tojinýanýe chë jtsamana soyënga tmojóba bayëngaca, tondaye yonduámana entšanga bacna soyënga jabuajuánama, y entšangbe bacna soyëngama jóbanëse tojaninýanýe chë ntšamo Bëngbe Bëtsá yobošcá jtsamana, más iuámana chë inýe soyënga játamama. <sup>10</sup> Bëngbe Bëtsá tojama, bënga chabe entšanga y chabe delante tšábënga chamotsemnana, ntšamo Bëngbe Bëtsá

yobošcá Jesucristo tojánmayeca, chabe derecho vida jtsobomñama cachcá jonýayése y entsangbe bacna soyëngama jóbanése, canýe y nyëtsca tescama.

<sup>11</sup> Judiëngbe nyëtsca bachnanga nyëts tempo ba soye altarentsa natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entsanga bacna soyënga jabuajuánama. <sup>12</sup> Pero Jesucristo entsangbe bacna soyëngama tojanóbana ora, yojamna mo canýe tmojóba bayacá, Bëngbe Bëtsá entsanga bacna soyëngama cháuaperdonama; nyë canýe y nyëtsca tescama chca tojanma, y chentšana Bëngbe Bëtsabe catsbioica tojtanoíbema, canýe uámana puestentse, jtsemándayama. <sup>13</sup> Chentse cha yobátmna, Bëngbe Bëtsá chabe obenánaca Cristbe uayayënga chabe cucuatšiñe chamoquedama yochjamëntscuana. <sup>14</sup> Er nyë canýe, entsangbe bacna soyëngama cruzoca jóbanése, Jesucristo lempe tojama, entsanga chë Bëngbe Bëtsábenga jtsemnana chëmbonënga, chabe delante nyëtsca tescama tsabengcá chamotsemnana. <sup>15</sup> Y Uámana Espíritnaca, Bëngbe Bëtsabe uabenana palabrerënguine šontsinýañná chca ndegombre bëtsemnana, mëntšá tojánayana ora:

<sup>16</sup> Ndayá entsangbiana chjama, canýe tempo chentšana chanjašebuachená soye mëntšá entsemna ca, Bëngbe Utabná tojánayana:

Atse chanjama chënga chamotseboše jtsamana ndayá chëngbe ainaniñe chaitsemánda soye, y chamotsejuabnana chë chëngbe juabniñe chaitsemánda soyama ca.

<sup>17</sup> Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama, y ntšamo atse stsebošcá contra soyënga chënga tmojamama ca.

<sup>18</sup> Chcasna, Bëngbe Bëtsá nyëtsca tescama entsanga bacna soyëngama tojaperdoná ora, ya ndoñe ntjátsiytana inýe soyënga más játamama, mo bayënga cuafjobaycá, entsanga bacna soyëngama perdonánënga chamotsemnana.

#### *Sontsamna Bëngbe Bëtsábioye jtobéconana*

<sup>19</sup> Y chca, Jesucristbeyeca catsátanga, Jesusbe buiñe tojanábuashanama y bëngbiana tojanóbana, chábeñe jtsošbuáchiyëse, Bënga montsobena, tondayama ntjatauaticá Bëngbe Bëtsabe delante jamashënguama. <sup>20</sup> Bënga montsobena jamashënguama chë tsëm benachëjana, Cristo bëngbiana tojamëjana; cha nda inëtsama chë nyëtsca tescama yomna tsabe vida chamotsebonnana. Mo chë quem luarentse chë bachnangbe más uámana amëndayacá, chë ujonýana entsëjuajana jamashënguana chë “más uámana ca” uabaina luaroye, Bëngbe Bëtsabe delante jtsemnana, cachcá, Cristo bëngbe bacna soyëngama mo entsacá tojanóbanayeca, bëngnaca montsobena Bëngbe Bëtsabe delante luaroye jamashënguama. <sup>21</sup> Bënga mondbomna canýe bëtš bachnangbe más uámana amëndayá, Bëngbe Bëtsabe entsángbeñe jtsemándayama, y cha endmëna Jesús. <sup>22</sup> Chiyeca, Bëngbe Bëtsá jaserviama ndegombre ainaniñe corente jtsesbošese, y chábeñe puerta jtsošbuáchiyëse, šontsamna Bëngbe Bëtsábioye jobéconana. Ntšamo chë bachnángbioye buiñeca tmojanabuešcacjá, Bëngbe Bëtsabe delante tsabengcá chamotsemnana cha jaserviama, cachcá, Cristbe buiñe juabuáshanése y bëngbiana jóbanése, bënga ainaniñe corente montsetátšëmbo Bëngbe Bëtsá nyëtsca tescama bëngbe bacna soyëngama šojtsaperdonama. Y bënga bëjayeca uabainëngnaca mondëmna; chiýeca bënga jtsobenana Bëngbe Bëtsábioye chca jobéconana.

<sup>23</sup> Bënga šontsamna nyëts tempo Bëngbe Bëtsábeñe puerta jtsošbuáchiyana, y ndocna te nyë ndayámna játajbanana entsángbeñe ichámuana, chë Bëngbe Bëtsábeñe jtsošbuáchiyëse bënga imobatmana soyënga cha yochjamama, er chë soyënga šojašebuachená cha, sempre jamana ntšamo tojayancá. <sup>24</sup> Bënga šontsamna janguanguana ntšamo muatjebenaye añemo jenatšetayana, nyëtscanga jtsenbobonshánana, y ntšamo tsabá yomncá jtsamana; <sup>25</sup> pero ndoñe quešnatamna játajbanana, Bëngbe Bëtsábioye jadórana enefjuanana mo Cristbeñe ošbuáchiyënga quetsomñecá, ntšamo báseftanga imojtsamcá. Chamna, nyëtscanga añemo mochtšenatšetnaye Cristo nyëts tempo jtseservénana, y más mora, chë ndayá imojtsónýama, Bëngbe Utabná yochjésabama ya yojtsobecuama montsetátšëmbo ora.

<sup>26</sup> Er chë ndegombre soyëngama tsabá tmojátatšëmboñentšana y chë soyënga tmojoyeuná chentšana, bacna soyënga jtsamëse tmojtsiyena, nyë chca jamama tmojtseboše causa, muatšaboté ndayá Cristo bëngbiana tojanmncá, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdonama. <sup>27</sup> Y chca, ndayá bënga muatšobena jobátmna soye nántsemna nyë chë Bëngbe Bëtsábicana castigo, chë ndayama šojtsamna uatjana jtsëbonnana; y nyë jobátmna chë tempo, ndaye ora Bëngbe Bëtsá puerta etonaná chabe uayayënga bëtscá ifñesheca yochtsapochócaye. <sup>28</sup> Nánaca chë Moisesbe leyama tojayana tondaye yondoalena ca, y útata o únganga chca tmojouena y aiñe cha chca tojayana ca chënga tmojayanése, jtsemnana chë entsábioye jtsóbana, tondaye ntjalastemacá. <sup>29</sup> Canýa, nyëts ainánaca Bëngbe Bëtsabe Uaquiñábioye tbojtsaboté; y tojayana Cristbe buiñe, chë ndëmuanýeye tojanábuashana bëngbiana tojanóbana ora, tondaye yonduámana ca, ndayá



nÿe ndaye entsabe buiñá ca, chë buiñe chë ndëmuanyëye šojtsinÿanÿná ndayá Bëngbe Bëtsá tbojašebuachenacá bëngbiana jamama, y ndáyeca Bëngbe Bëtsá chabe entsanga šojábiana, cha jaserviama; chë entsá Uamana Espíritbioye tbojóyenguango, nda inétsama bënga tsabe soyënga chamotsebomnama; y canÿa chca amá, ¿tsëngaftanga ndoñe šmontsejuabná cha ibojtsomerecena Bëngbe Bëtsábíocana canÿe puerte más uabouana castigo, chë Moisesbe leyama tondaye yondovalena ca tojayanabiama? <sup>30</sup> Bënga nÿetscanga mondëtatšëmbo Bëngbe Bëtsá mëntšá tojánayana: “Atše chanjama chënga chamosufrima, inÿenga chamosufrima tmojama causa; y chënga chanjácastigaye, inÿengbioye bacá tmojaborlá causa ca.” Y mëntšánaca tojánayana: “Bëngbe Utabná chabe entsangbiana echanjayana ntšamo tmojëftsemcá tsabá o ndoñe tsabá bëtsemnama, y chëngaftaca echanjama ntšamo chora chaojajuabocá ca.” <sup>31</sup> ¡Tša uabouana, Bëngbe Bëtsá chë nÿets tempo ainabe cucuatšíñe joquédana, castiganá jtsemnama!

<sup>32</sup> Pero ntšamo tempo yojamnama šmochtsenójuabnaye, chë ndegombre soyënga Jesucristbiana cabá chora šmonjanábuatmana ora, y chora tša jenojuérzana cmonjanotocá padecena soyënguñe, y chë causa tša šmojansufri. <sup>33</sup> Báseftanga tsëngaftanguentsëngbioye entsangbe delante tmojanoyánguango, y inÿenga tmojanma puerte chašmotsesufrinama; y inÿenga tsëngaftanguentsënga chca imojansufrinëngaftaca šmojanama, chënga jujabuáchama. <sup>34</sup> Tsëngaftanga šmojánalastemana chë chënguentsënga cárceloye imojanëtámenënga; y oyejuayënga šmojanlesenciá ntšamo šmojanbomncá inÿenga chacmotsabacama, er tsëngaftanga šmojátatšëmbona Bëngbe Bëtsábíocana más tsabe soyënga šmojtsebomnama, chë nÿetsca tescama šmochtsebomna soyënga. <sup>35</sup> Chcasna, ndoñe šmatjajbaná ainaniñe bëtscá añemo jtsebomnana, ni Bëngbe Bëtsábeñe sempre jtsobatmanana; er chca šmobatmánayeca, Bëngbe Bëtsá echanjama tsëngaftanga bëtscá uacanana soyënga chábiocana chašmotsebomnama. <sup>36</sup> Tsëngaftanga cmontsamna corente uantadënga jtsemnana, padecëniñe chašmojtsachñëjuana ora, chca, ntšamo Bëngbe Bëtsá yobošcá tsëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñama. <sup>37</sup> Er Bëngbe Bëtsabe uabemana palabrënguñe cha mëntšá tojánayana: Betsco, ndoñe bën, y chë jabama ibomná echanjabo.

Ndoñe bën quebochatóbema.

<sup>38</sup> Nÿe chë ndabiama atše chaijama atšbe bominiñe tsabia chaotsemnana, átšbeñe cha betsošbuáchema, cha ndegombre chë nÿetsca tescama yomna tsabe vida echántsebomna;

pero uatjana causa, átšbeñe ošbuáchiyana tojtsajbanase, atše cháftaca ndoñe quichátoyejuaye ca —cha tojánayana.

<sup>39</sup> Pero bënga ndoñe quemátsmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nÿetsca tescama pochocánënga jtsemnana imojtsajnënga; pero añe mondmëna chë Bëngbe Bëtsábeñe ndegombre ošbuáchiyënga, y chca, chë atsebácanënga jtsemnana mochjashjáchënga.

## 11

### *Bëngbe Bëtsábeñe ošbuáchiyana jtsebomnana*

<sup>1</sup> Ošbuáchiyana jtsebomnana endmëna corente jtsetatšëmbuana, ndayá tmojtsobatmancá ndegombre chca yochjopásama; endmëna ainaniñe corente jtsetatšëmbuana, ndayá bënga mora ndoñe tmontsonÿacá ndegombre chca yomnama. <sup>2</sup> Bëngbe Bëtsá tojánayana bëngbe bëtš taitanga tsabá imojánama ca, chënga chábeñe imojtsošbuachéyeca.

<sup>3</sup> Bënga, Bëngbe Bëtsábeñe mondošbuachéyeca, mondëtatšëmbo cha quem luare y nÿetsca luarënga tojanmama, chca chaotsemnana cha tojanmandá ora; chcasna, chë ndayá mora bënga jinÿama imobencá, cha tojanma bënga ndoñe mondobena jinÿama soyënguentsana.

<sup>4</sup> Abel Bëngbe Bëtsábeñe yojanošbuachéyeca, oveshatémënga chábioye tbojanátšëmbona, y chë soye Bëngbe Bëtsabiana más tsabá yojtsemna, chë ndayá Caín, chabe catšata, Bëngbe Bëtsá jëtshuayama tbojanátšëmbonama. Chíyeca, Bëngbe Bëtsá tojánayana Abel chabe bominiñe tsabia yojtsemna ca, ndayá Abel chábioye jëtshuayama tojanmcá oyejuayá tojanóyëngacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

<sup>5</sup> Enoc Bëngbe Bëtsábeñe puerte yojanošbuachéyeca, Bëngbe Bëtsá celoye tbojesanbëtseñe, ntjobancá. Chentšana ndocná tonjanobená cha jtsinÿenana, Bëngbe Bëtsá tbojesanbëtseñe causa. Y Bëngbe Bëtsabe uabemana palabrënguñe endayana, Bëngbe Bëtsá Enócaftaca oyejuayá canjamna ca, ntšamo jtsamëse yojoyenama, y chentšana celoye tbojtsanámbañe.

<sup>6</sup> Pero Bëngbe Bëtsábeñe ntsošbuachiycá, ndoñe quenátopodena cha oyejuayá bëngaftaca jabemama, er chábioye jobéconamna, entsá jtsemnana jtsošbuáchiyana cha ndegombre

bétsemnana, y cha inétsamama chë cha jtsabuatmama tša tmobošëngbiama bètská tšabe soyënga chamotsebomnana, mo chábicana uacanana soyëngcá.

<sup>7</sup> Bëngbe Bètsá Noébioye tbojanbuayená uabouana soyënga yochjanopásama, cachora ndopodena jinýama soyënga, y cha Bëngbe Bètsábeñe yojanošbuachéyeca, tojanma ntšamo Bëngbe Bètsá tbojanmandacá y barquésa tojanaporná chabe pamállanga játsebacama. Cha chca tojanma ora, ošbuáchiyana bómnyeca, cha tojaninýanýe entsánga tša bacna soyënga tmojanmama y chë causa castigánënga jtsemnana yojtsamnama. Chabe ošbuachiyánamnaca Noé tojánashjache Bëngbe Bètsabe bominýiñe tšabia jtsemnana, y chca entsá jashjáchana, nýe Bëngbe Bètsábeñe jtsošbuáchiýese.

<sup>8</sup> Bëngbe Bètsá Abrahámioye tbojanchembo, inýe luaroye cháuama; Abraham Bëngbe Bètsábeñe yojanošbuachéyeca, tojanma ntšamo Bëngbe Bètsá tbojanmandacá, y tojánbocna chë luaroye jama, chë Bëngbe Bètsá tbojanšbuachená jatšetayama luaroye, masque Abraham ndoñe yontsetátšëmbo ndémoye yochjánama. <sup>9</sup> Bëngbe Bètsábeñe yojanošbuachéyeca, yojobena mo inýe luarocana ashjargonacá jtsiyenana, cachabe luarentše ndoyená, chë Bëngbe Bètsá tbojanšbuachená luarentše. Entšëjuaca pormana tambënguñe yojoyena, cachcá ntšamo chë chábentšana básenga Isaac y Jacob ibojéftsiyencá; y chátnaca Abrahamcá ibojanobátmana jóýëngacñama ntšamo Bëngbe Bètsá Abrahámioye tbojanšbuachenacá. <sup>10</sup> Er Abraham corente uantadá yojanobátmana chë canýe luaroye celoca jamashënguama tempo; chë luare inamna canýe bèts pueblo, puerta tšabe ucuatjoníñe pormana pueblo, canýe luare chë ndayentšama Bëngbe Bètsá tojanjuabó ntšamo chaotsemnana, y cachabe pormana luare inamna.

<sup>11</sup> Sara, Bëngbe Bètsábeñe yojanošbuachéyeca, Bëngbe Bètsá tojanma cha canýe šesona chabotsebomnana, masque chora ya bëtsanánëjema yojtsemnna, šesona jtsebomnana. Bëngbe Bètsá chca tojanma, er Sara corente yojanjuabná, cha chë canýe šesona yochtsanbomnana tbojanšbuachená cha, nýets tempo ntšamo tojayancá amá yojamna ca. <sup>12</sup> Y chca, quem entsá Abraham, chë šesonga jtsabamnana ya ndobenábentšana, ba básenga tmojanonýná, tša mallajta mo chë celoca estrellëngcá, y tša chëftanga mo chë mar bëjayoca chëñyáñentša cascá, ndocná jacúntama ntjobenayana.

<sup>13</sup> Nýetsca quem entsánga imojéftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóýëngacñe chë Bëngbe Bètsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bètsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnana, y chama oyejuayënga chëngbe imojtsemnna. Chënga tmojánayana quem luarentše chënga imojoyena mo cachëngbe luarentše ndoyenëngcá, y quem luarëjana mo nýe achnëjuanëngcá ca. <sup>14</sup> Y chca tmojtsichámëngna, puerta jtsinýanýnayana chënga tša imojtseboše inýe luaroca jóýënanama, canýe luare cachëngbiama. <sup>15</sup> Chënga nýe chë ndayentšana tmojéftsanbocna luarama manjánjuabnase, matmëñjanobená tšabá cachoye jeshëconama. <sup>16</sup> Pero chëngna canýe más tšabe luare imnaboše, canýe luare celoca. Chíyeca Bëngbe Bètsá ndoñe yonjanëuatja, chëngbe Bètsá ca chënga chamotsechembuanama, er celoca canýe bèts luare, mo canýe bèts pueblécá chëngbiama tojanprontá.

<sup>17</sup> Bëngbe Bètsá Abrahámioye jinýama, ndegombre aíñe o ndoñe Bëngbe Bètsábeñe tayojtsanobuachema, tbojanmandá chabe uaquiñá Isaac chabuánatse jóbama, chábioye jëtschuayama, ntšamo Abraham chë tojóba bayëngaftaca jamama yojanamancá. Cha Bëngbe Bètsábeñe yojanošbuachéyeca, yojtseprontana chë nýe canýe uaquiñá ibnabomná jóbama, Bëngbe Bètsábioye jëtschuayama, masque Bëngbe Bètsá mëntšá tbojanšbuachená: <sup>18</sup> “Chë ácbentšana entsánga nýe Isaachiajana mochanjabo ca.” <sup>19</sup> Abraham corente yojanjuabná y yojátatšëmbo, Bëngbe Bètsá ndegombre obenana bomná bétsemnana, chë obanënga chámuatayenama jamama. Chíyeca, Bëngbe Bètsá Abrahámioye tbojtsanauyaná Isaac jóbama ora, yojamna mo Abraham obanënguentšana chábioye cuaftoyëngacñécá. Y chca, ntšamo Isaácaftaca tojanopasacá, batśá yojtsinýanýaye ntšamo Jesucristoftaca yochjanopasacá.

<sup>20</sup> Isaac Bëngbe Bètsábeñe yojanošbuachéyeca, Bëngbe Bètsábioye tbojanimpadá chabe uaquiñátbama, Jacob y Esaú, bètská tšabe bendicionënga chabotsebomnana, chë joshjanuama tempënga ora.

<sup>21</sup> Jacob Bëngbe Bètsábeñe yojanošbuachéyeca, ya jóbanama ora, tbojanimpadá cada ona chë Josebe básëngbiama, Bëngbe Bètsá chaoma bètská tšabe bendicionënga chamotsebomnana. Cha chca tojanma, jotsejbénase Bëngbe Bètsábioye jadórama, y chabe jatjonëñiñe tsbanánoca jojuachase.

<sup>22</sup> José Bëngbe Bètsábeñe yojanošbuachéyeca, ya jóbanama ora, tojánayana más chcoye chë Israeloca entsánga Egiptó luarentšana mojhëftsanbocna ca, y tojéftsanmandá ndayá jamana chabe óbana cuérpoca.

<sup>23</sup> Moisesbe bëtsëtsata Bëngbe Bètsábeñe ibojanošbuachéyeca, cha tojanonýná ora, unga shinýëntscuana cha tmojtsaniytëme, er chata tbojáninýe cha canýe botamana

básetema bétsemnama, y ndoñe tbonjanéuatjaná chë reybe mandama, chë nyetsca judiëngbe basetëmënga boyabásetemënga jtsëbáyana.

<sup>24</sup> Moisés Bëngbe Bëtsábeñe yojanošbuachéyeca, ya bëtsá yojtsemna ora, ndoñe tonjánbošena chë Egiptoca reybe bembëbe uaqüñacá chamotsábuatmama. <sup>25</sup> Chamna, tojánbošena cha jasúfriama ínÿyenga chamotsamama, cánÿiñe chë Bëngbe Bëtsabe entšangftaca, y ndoñe nÿe baseftayé tsábá jatsmënana, bacna soyënga jtsamëse, ntšamo cachá tojtsejuabnacá, nÿe cachá tsábá jtsomñiama. <sup>26</sup> Chamna, cha yojanjuabná, chë padecena soyënguñe jasúfriana ntšamo Cristo tojansufricá, más tsábá yojamna chë Egiptoca uámana soyëngama, er cha Bëngbe Bëtsábeñe jtsosbuáchiyëse chábeñe yojanóbátmana, ba tsabe soyënga mo canÿe uacanana soyá cha ibochjanatsetayama.

<sup>27</sup> Bëngbe Bëtsábeñe yojanošbuachéyeca, Moisés Egiptocana tojéftsanbocna, chë luar-entša rey cháftaca chábuatnama ntjatauatjácá. Cha ainaniñe nyets tempo añemo yojtse-bomna, y chca yojáninÿna mo chë ndocná jinÿama tondobenacá, Bëngbe Bëtsábioye cuaft-sonÿácá. <sup>28</sup> Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entšangftaca yebnëngoye amashjuaniñe buñfeca tojanbuéscacjá, chca, chë ángel obanayá, chë Israeloca pamíllangbeñe Egiptoca chë mayor uaqüñënga ndocá chaondámama.

<sup>29</sup> Moisés y Israeloca entšanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñcá; chentšana, chë Egiptoca entšanga cachcá jamama tmojánbošena ora, nyetscanga chiñiñe tojtsanatajo.

<sup>30</sup> Israeloca entšanga Bëngbe Bëtsábeñe imojanošbuachéyeca, chë Jericó bëts pueblentša tapiëšënga shëconana canÿsëfta tentscuama chënga imojánajnentšana, chëšënga yojtsáshajaye.

<sup>31</sup> Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínÿengftaca, chë bëts pueblentse oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entšanguentšana ichmónënga tsábá tojanëbuaja, chë jarrepárama tmojánanga ntšámose chë luarentse oyenënga jáyëñjanama jobenayama.

<sup>32</sup> Atse sëntsobena banghiana más jóyebuambayama, Bëngbe Bëtsábeñe ošbuáchiyëngbiana, pero luare šattsëshbe chcangbiana jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambnayëngcá. <sup>33</sup> Chënga Bëngbe Bëtsábeñe imojanošbuachéyeca ínÿyenga mandadëngbe entšángbioye tmojanayëñjaná, bëtscá imojánama nyetsca entšangftaca ntšamo tsábá yomncá jtsamama y nyetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama. <sup>34</sup> Ošbuáchiyana bómnyeca, Bëngbe Bëtsá tojanma lempe chaotsefsanama, chëngbioye íñeshiñe tmojanacjá ora, chënga ndocá chamondëpasama; tmojanotsbocá espadëjaca jobanámentšana; ya tondaye añemo bëntsebomna ora, Bëngbe Bëtsá tojanma bëts obenana y puerta añemo chamotsebom-nama; tmojánashjache bëts obenana jtsebomnama ínÿyenga jáyëñjanama, chëngftaca imo-jtsentsjaná ora; y tmojanobená inÿe mandadënga y chëngbe soldadënga jáyëñjanama, chamotsachetama jamëse. <sup>35</sup> Ošbuáchiyana bómnyeca, básefta shembásënga chëngbe óbana pamíllangbioye cachiñe ainënga tmojtananye, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyeca, ínÿyenga tmojanma básefta ošbuáchiyënga, puerta chamosufrima, y jobanámnaca; er chënga más tmojánbošena jashjáchana chë nyetsca tescama yomna tsabe vida jtsebomnana, y ndoñe nÿe chë jótsbocana batsatema más vida jtsebomnama. <sup>36</sup> Ošbuáchiyana bómnyeca, ínÿyenga corente tmojansufri, ínÿyenga chëngbioye tmojanoyánguango ora y tmojanatsetšená ora; y ínÿyenga tmojansufri y cárceloye cadenëjuangaca utámenënga joquédamnaca. <sup>37</sup> Inÿyengbioye ndëtsbéngaca tmojtsanatëchënganja, serruchëshaca tmojtsanëjácacaye, espadëjaca tmojtsanëbaye. Inÿyenga imojánajna cánÿentšana inÿecnoye nÿe oveshá y chivëbe bobácheca uichëjtjonënga, ujabótënga, ainana tsetšanënga, y ínÿyengbeyeca mocá borlánënga. <sup>38</sup> Chë nÿe quem luarama enójuabnayënga ndoñe monjanomerecena chënga mëngftaca jtsiyenama, chënga chë vida imojábomna cánÿentšana inÿecnoye aniñe, entšanga ndoyena luarënguenache, tjañenache, fshantsiñe atëbëfñiñe y cuevëshënguñe.

<sup>39</sup> Nyetsca quem entšanga, ndëmuanyëngbiana muentse tmonjoyebuambá, Bëngbe Bëtsá tsábá chëngbiana tojánayana, ošbuáchiyana imojánbomna ca; pero ni canÿa chënguentšá tonjanóyëngacñe, ndayá Bëngbe Bëtsá chëngbe entšanga jatsatayama tojanašebuachenacá, nyetsca tescama jtsebomnama. <sup>40</sup> Bëngbe Bëtsá, bëngbeñe jtsejuabnayëse, tojanjuabó canÿe más tsabe soye bëngbiana jamama, chca, Bëngbe Bëtsá canÿe ora jamama, bënga nyetscanga,

chënga y bënga chamotsemnana lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñëse.

## 12

*Bënga mochtsejuabnaye ndayá Jesús tojanmama*

<sup>1</sup> Chiyeca, bënga mochtsejuabnaye ba entsangbiama, chë bëngbiama más natsana imojaniyenënga, ndëmuanýenga puerte tšabá bënga jtsinýanýanayana ntšamo ndegombre yomnana Bëngbe Bëtsábeñe ošbuáchiyana jtsebmomnana, mo chënga ndayá bënga tmojt-samama cuaftsonýangcá. Chcasna, mo chë tmochamanëngcá, ínýengaftaca jenëyëñjanama, chë jashjanguama tojtsemna luaroye natsana jashjanguama, chënga jotjajuamna, chë chorscama nduaservena entšayá jtšenátsejcana, y lempe ndayá tojtsama más uenana chamotjajuama soyëgnaca jtseñójacana; bëngnaca cachcá, ndoñe matjaleséncia bënga Cristbioye ndoñe tšabá ndëtsošervénama, ni chë bacna soyënga jamama juabnënga, chë bëngbioye paselo jáyëñjanama juabnënga cachcá chamotsamama. Chamna, šontsamna sempre Bëngbe Bëtsá jtsešervénana, puerte uantadënga jtseñnëse masque padecena soyënguñe tmoyna, bënga chamobená chë trabajo jamama, chë ndayama Bëngbe Bëtsá šojáchembo. <sup>2</sup> Jesusbiama mochtsejuabnaye, nda šuebëñatsana Bënga ošbuáchiyana chamot-sebmomnana, y šuinýanýná ntšamo nýets tempo nýetsca soyënguñe Bëngbe Bëtsábeñe jtsošbuáchiyama. Cha chë cruzoca jóbanama sufrína lempe tojanoboyá, er cha yojanóbátmana chë chentšana yochtsanbomna bëts oyejuayánama; y yojanjuabná, chë más bacá uamana entšangcá jóbanana, chabiama ndoñe canýe uamana soye yonjamna ca; y chentšana chë uamana puestentse tojtanoñbema, Bëngbe Bëtsabe catšbioica, jtsemándayama.

<sup>3</sup> Chiyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamna, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Cristbiama oservëñe ndoñe chačmondëumantšema, ni ainaniñe añemo jtsebmomnana ndoñe chašmondájbanama. <sup>4</sup> Tšëngaftanga padecena soyënguñe šmojachnëgo, entsanga bacna soyënga imojtsama causa, pero mëntsoñama ndoñe cmontsamna jóbanama, Cristbe soyëngama enojuerzáníñe; <sup>5</sup> y tcmojtséñnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguñe mëntšá endayana: Atšbe uauquiñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,

chora ndoñe catjásjuabnaye chiñe mo canýe nduámana soye cuaftsemncá;

y cha chacmojuácacana ora, ndoñe catsajbaná ainaniñe añemo jtsebmomnana.

<sup>6</sup> Er Bëngbe Utabná jábuayenana nda cha tbobobonshanábioye,

y jacistigana chë mo chabe uauquiñacá tbojofábioye ca —chiñe endayana.

<sup>7</sup> Padecena soyënguñe chašmojtsešufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangftaca jtsamana mo chabe básenga quetsomñecá. ¿Nderado nántsemna canýe uauquiñá, y chábioye chabe taitá ndocna te buanjuácacana, más tšabá chaotsamama? <sup>8</sup> Nderado Bëngbe Bëtsá tšëngaftanga ndoñe tcmonjabuayená, ntšamo nýetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga. <sup>9</sup> Y bënga básenga monjamna ora, bëngbe bëtsétsanga quem luarentse monjanamana bënga jácastigana, y bënga chëngbioye ndoñe stëtsoye ntjaquédana. Y mora, bënga más šontsamna, jtsobedecénana y más bëts respeto jtsebmomnana celoca Bëngbe Taitabiama, nda tojama entšanga espíritu chamotsebmomnana, y chca, bënga tšabe vida chamotsebmomnana. <sup>10</sup> Bëngbe bëtsétsanga quem luarentse, nýe básefta tescama, bënga jëftsabuayinyana, y chca jamana chënga tšabá tojtsinýana ora; pero Bëngbe Bëtsá bënga šojtsabuayinyá ora, sempre chca jtsamana bëngbe tšabiama, bënga chabe entšanga jábiama, cachacá puerte tšábenga, ntšamo cha nýets tempo yomncá. <sup>11</sup> Sempre bënga ndaye castigo tmojtsebmomna ora, chora bënga chama ndoñe oyejuayënga ntsemnana, pero añe cochtsetšëñanënga. Pero bënga chë castigüentšana tmojtušjinyë ndayá Bëngbe Bëtsá chë sóyeca tbojtsabuayinyacá, as chentšana jóbocnana natjëmbana oyenana, nýetsca soyënguñe ntšamo tšabá yomncá jtsamëse.

*Bëngbe Bëtsábioye jtsabotena, entsangbiama ndoñe tšabá ntsemnana.*

<sup>12</sup> Mo nda puerte uamëntšayacá, jatrabájama tondaye añemo ntjtsebmomncá, tsátšëna buacuatsëngaca y puerte uamëntšëna ntsamiasëngaca, tšëngaftangbentše báseftanga ya uamëntšayënga šmojtsemna Bëngbe Utabnabiama trabájayñe, y ainaniñe ndoñe añemo šmontsebmomna. Cachiñe bëts añemo šmochtishache, y Bëngbe Bëtsabe obenana cachiñe šmochtsatsbmomna. <sup>13</sup> Mo chë canýe benache tšabá y ndericho chaotsemnana tmojtsamëngcá, chca, chë coshetënga chiñe jama chamotsobenama y más tšabá jtsatanama chamuatatsjínýama, y chë benachentšana ndoñe chamondëtsebocanama; cachcá

tšəngaftanga, chë bëtsá ošbuáchiyana y Cristo jasérviaa corente añemo šmobomnənga, chë nŷe batšatema ošbuáchiyana y chca jatrabájama nŷe tondaye añemo ndbomnənga šmochjújabuache; chë soye šmochjama, ntšamo Cristo tšabá jasérviaa yomncá jinŷanŷiyěse, y ntjalesenciá ndocna soye chaotsama chë tšabe benachentšana tšəngaftanga chašmotsojuánañama.

<sup>14</sup> Lempe ntšamo chašmojobenacá šmochjama nŷetscəngaftaca natjəmbana jtsiyenama, y ntšamo Bəngbe Bətsabe entšanga mondbetsamcá jtsaməse chašmotsiyenama, cha jt-seservénese; er chca ntjamcá, canŷa ndoñe ntsoberenana Bəngbe Utabnábioye jinŷama. <sup>15</sup> Yeuana šmochtsantješna, ndocná Crístbeñe ošbuáchiyana chaondətsajbanama, y chca, chë Bəngbe Bətsá chabe entšəngbioye yochjatsataye tšabe soyənga chənga ndoñe chamondashjache. Smochtsantješna, tšəngaftanguentše ndocná chaondətsemna, mo canŷe untja tbəťjčá, chë chcaja sayəngbioye jásocayana, nda chaotsama, inŷənga natjəmbana ainana ndoñe chamondətsebmomna y bacna soyənga jtsaməse chamotsiyenama. <sup>16</sup> Yeuana šmochtsantješna ndocná tšəngaftanguentše shembása o boyabášaftaca bacna soye amá chaondətsemnana, ni canŷa ndabiamna Bəngbe Bətsabe soyənga tondaye chaondətsámama. Esaú chca tojanma, chë lempe yochjanashjachcá, mayor uaquiñá bətsemnana, chabe uabentsábioye canŷe šcena sanama tbojtaname ora. <sup>17</sup> Y tšəngaftanga šmondətatšəmo, chca tojanopasá chentšana, Esaú tojánbošena chabe taitá Bəngbe Bətsábioye chaobimpadama, chabiamna tšabe bendicionənga chaomama, chë mayor uaquiñá bətsemnana yojanobena jtsebmomna soyənga; pero chora chabe taitá ndoñe tbojanoyeuná, er masque Esaú chora juabna tojantrócá, cha ndoñe tonjanobená ntšamo yojtsopasancá jətsjandmanana. Masque cha tša tojánbošena, shəchbuiyeca chabe taitábioye jaimpádase, ya ndoñe yontsopodena ntšamo tojanopasacá jətsjandmanana.

<sup>18</sup> Tšəngaftanga ndoñe chešmatobecná, mo chë entšanga Israeloca Sinaí ca uabaina tjoye tmojanobeconacá, ndayá chənga imojobena jabojuama, y ifəsheca joŷtsəngbototjuana, tondaye binŷniñe luare, tša ibetñe y puerre jabuache binŷiəngaca; <sup>19</sup> ni chešmatuena chəngcá, canŷe trompetəťjua uajatətanana, ni Bəngbe Bətsabe oyebuambnayana. Chë oyebuambnayana tmojanuenənga, imojtseimpadana ndoñe más chəngbioye chaondətsəoyebuambnana. <sup>20</sup> Chca tmojanma, jauántama ndoñe tmonjanobená causa, ntšamo Bəngbe Bətsá tojanaməndacá: “Nda quem tjoca chaojyená, masque canŷe bayá chaotsomñe, entsemna chana ndəťšbəngaca chamotsatəchənjanga jtsóbama ca.” <sup>21</sup> Ndegombre, ntšamo tmojaninŷcá tša uabouana yojtsemna, cach Moisésnaca məntšá tojánayana: “Tša šontsəngməmná auatjananá səntsemna causa ca.”

<sup>22</sup> Pero tšəngaftanga Bəngbe Bətsábioye šmojobecná, y chca endməna mo tšəngaftanga canŷe Sión ca uabaina tjoye celoca cuafjobeconacá, chë Bəngbe Bətsá nŷets tempo vida bomnabe bəts puebløye, mo celoca Jerusalén cuenta; y ba uaranga angeləngbioye šmojobecná, canŷiñe oyejuayənga enəfjuanənga imojtsemnəngbioye, Bəngbe Bətsá jt-satschuanayama. <sup>23</sup> Endməna mo tšəngaftanga chë Bəngbe Bətsabe entšəngbioye cuafjobeconangcá, chentše enəfjuanənga mo Bəngbe Bətsabe basəngcá, chənga ndayá chë Taitá tojašebuachenacá jóyəngacñama, ndəmuanyənga Bəngbe Bətsá chabe libřəšañe tojúbiamna. Tšəngaftanga šmojobecná Bəngbe Bətsábioye, ntšamo nŷetsca entšanga tmojamcá tšabá o ndoñe tšabá bətsemnana yochjayanábioye. Endməna mo tšəngaftanga cuafjobeconacá, chë entšanga mora ya obanənga y ntšamo tšabá yomncá jtsaməse imojəťsiyenəngbe espir-itəngbioye, chë entšanga ndəmuanyəngbiama Bəngbe Bətsá tojanma chamotsemnana lempe ntšamo chabe entšəngbiama yojanjuabnacá, chca, cháftaca sempre vida jəťtsebmomna. <sup>24</sup> Tšəngaftanga Jesúsbioye šmojobecná, chë jóbanəse, entšanga Bəngbe Bətsáftaca mo canŷácá chamotsemnana tojanmá, ntšamo Bəngbe Bətsabe tsəm trato yojamncá; y endməna mo chë bəngbiama cha tojanóbana ora tojanábuashana buiñioye tšəngaftanga cuafjobeconacá; chca tojanábuashana, bəngbioye Bəngbe Bətsabe delante mo tšabəngcá jábiamama, mo ntšamo entšəngbeñe buiñe jabuəcacjama chë bachnanga imojuamancá. Cain chabe catšata Abəlbioye tbojanóba ora, yojamna mo chë Abelbe uabuáshanana buiñe Bəngbe Bətsábioye cuafseimpadancá, chë bacna soyama castigo chaotsemnana; pero Jesucristbe buiñe ndoñe chca ntšamana, ndayá chíyeca bənga más tšabe soyənga jashjáchana; Jesusbe buiñeca, bənga montsobena atsebacənənga jtsemnana.

<sup>25</sup> Cuedado šmochtsebmomna, bəngbioye tojtsoyeuambná ora cha joyeunayama. Chë Israeloca entšanga ndoñe tmonjánbošena Bəngbe Bətsá joyeunayama, chë Sinaí tjoca quem luarentše tojanabuayená ora; chəngbioye cha tojanacastigá. Y mora más, Bəngbe Bətsá, chë celocana bənga abuayinyayá, ndoñe cachcá ndécastigánənga quešohátabashejuana, ntšamo cha šojtsəťsəťsnacá ndoñe tmontseyeunanəse. <sup>26</sup> Bəngbe Bətsá Sinaí tjoca chë entšəngbioye tojanoyebuambá ora, chabe oyebuambnayánaca tojanma quem luare chauangməmanama, pero mora cha chabe uabemana palabřənguiñe tojašebuachená: “Atše cachiñe chanjatsma chauangməmanama, ndoñe nŷe quem luare, sinó celócna ca.” <sup>27</sup> Bəngbe Bətsá “cachifne

ca" tojánayana ora, chë sóyeca yojtsichamo, chë ndayté lempe chaongmëmanama cha cachiñe yochjama ora, chë quem luarentse tmojama soyënga y chë jatrócama yopodena soyënga yochtsejuána ca, chca, nýe chë nýetsca tescama yomna soyënga y ndoñe jatrócama soyënga chaouedama. <sup>28</sup> Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nýetsca tescama y ndocna te ntjotrócana. Bëngbe Bëtsá chama mochjëtshuaye, y ntamo cha tšabá tbojtsinýancá mochtsadorana, chabíama bëts respeto jtsebmñese, y nýetscangbíama más bëtsá cha yomnama jtsejuabnayëse. <sup>29</sup> Er Bëngbe Bëtsá puerte etonaná chë chabíama nduauenanënga jabuache echanjácastigaye, y chca, cha jtsemnana mo canýe íñeshe lempe jtsepochoacamca.

## 13

*Ntsamo jtsiyenama, Bëngbe Bëtsá oyejuayá bëngaftaca chaotsemnama*

<sup>1</sup> Sempre nýetscanga šmochtsenbobonshana, Jesucristbeyeca catšátanga quetsomñeca.

<sup>2</sup> Sempre tšabá chë tšëngaftangbe yebnoye inýe luarëngocana tmojáshhajñënga šmochjúbuaja, er chca jamëse, ntsetatšëmbcá báseftangna angelënga chëngbe yebnentse tmojanëbuaja.

<sup>3</sup> Chë utámenëngbíama sempre šmochtsenójuabnaye, mo tšëngaftángnaca chëngaftaca utámenënga cuafsemncá. Chë inýenga tmojtsama chamotsesufrinëngbíama šmochtsenójuabnaye, er tšëngaftángnaca nderado cachcá šmatjatspása.

<sup>4</sup> Boyabása y shembása tbojanobouamá ora, ntamo tbojanensbuachenacá nýetscanga chamotserrespetana; y chë útata chabotsama nýe ndayá y nýe ntamo Bëngbe Bëtsá bouamnatbíoye tojanamëndacá, er Bëngbe Bëtsá echanjácastigaye chë shembása o boyabásafaca bacna soye amënga, y chë shema o boyábíoye inýaftaca ingñayëngnaca.

<sup>5</sup> Ndoñe šmattsiyena jtsejuabnayëse nýe mallajta crocénana jëftsebmñama. Nýe chë šmobomna soyëngaca oyejuayënga šmochtsomñe, er Bëngbe Bëtsá tojánayana: "Ndocna te cachcá quebochatonýaye, ni canýa quebocháiseboshjona ca." <sup>6</sup> Y chca, bënga montsobena corente añémoca jayanama:

Bëngbe Utabná endmëna nda atše šonduájabuachana; tondayama quichátatauajta.

¿Ndayá canýe entšá nanjobenaye átseftaca jamama ca?

<sup>7</sup> Tšëngaftangbe amëndayëngbíama, chë Bëngbe Bëtsabe buayenana soyënga tcmojábuatambangbíama, sempre šmochtsenójuabnaye. Sempre šmochtsenójuabnaye chë ntamo chënga imojaniyenentšana tojanóbocna tšabe soyëngama, y šmochtsiyena jtsamëse ntamo chënga imojanamcá, Jesucristbeñe ošbuáchíyënga bëtsemnama.

<sup>8</sup> Jesucristo cachá nýets tempo iuëtsemna, tempo, mora y nýetsca tescama.

<sup>9</sup> Ndoñe šmatjaleséncia inýenga chamotsamama tšëngaftanga chë benachentšana chašmotsojuánañama, ndayá chënga tmojtsabuátambama, y chë Cristo tojánabuátambama contra soyëngaca. Más tšabá endmëna bënga ainaniñe añemo jtsebmñana, Bëngbe Bëtsá tšabe juabna bëngbíama yobómnayeca, y ndoñe chë sanama, chë ndayá añe o ndoñe šontsamna jtsesayana soyëngama mandënga tcojtsamëse. Chca mandënga ndocna te chë Israeloca entsangbíama tempo tonjanoservé.

<sup>10</sup> Bënga chë Jesucristbeñe mondošbuáchenga, canýe soye mondbomna mo chë Bëngbe Bëtsábíoye jëtšchuayama altaroca juinýena soycá, bacna soyëngama perdonánënga jtsemana. Bënga mondbomna chë Jesucristo bëngbíama tojanma soye, cruzoca tojanóbana ora, bëngbe bacna soyëngama; y chë nýe tmojóba bayëngaca soyënga tmojtsama bachnanga ndoñe ntsebmñana, chë Cristo tojanóbana ora, ndayá tojanmentšana tojanóbocna tšabe soyënga. <sup>11</sup> Er chë judiëngbe más uámana bachnangbe amëndayá, chë tmojóba bayëngbe buiñe chë "más uámana ca" uabaina luaroye juabuyambana, Bëngbe Bëtsá entsangbe bacna soyëngama cháuaperdonama, y chë bayëngbe cuerpënga jtsejuinýiyana entsanga tmoyna luarentšana chaboca. <sup>12</sup> Cachcá, Jesúsna tojansufri y tojanóbana bëts pueblentšana chaboca, chabe buiñe tojanábuashana ora jóbánese, entsanga Bëngbe Bëtsábënga chamotsemnama, y chabe delante mo tšabengcá chamotsemnama. <sup>13</sup> Chíyeca bënga šontsamna Jesúsbiyoe jobéconana, nda entsanga tmojtsanaboté y bëts pueblentšana chaboca tojanóbana. Cha mochjuasto, y ntamo cha tojansufricá bëngnaca mochjasúfia. <sup>14</sup> Er quem luarentse bënga ndoñe quemátsbmna canýe bëts pueblo bëngbíama, nýets tempo chauesomñe bëts pueblo, ndayá bëngna tša mondboše y puerte mondobátmana bënga joyénana chë celoca yochtsemna Bëngbe Bëtsabe bëts pueblentse. <sup>15</sup> Chíyeca, šontsamna sempre Bëngbe Bëtsábíoye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábiyoe jëtšchuayama canýe soye cuafjuatšëmboncá. Chcasna, jtsoyebuambnayëse cha mochtsadorana. <sup>16</sup> Sempre ntamo tšabá yomncá šmochtsama, y chë šmobomncá inýengbíamnaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabíama tcojama ca, y jtsinýnana bënga Bëngbe Bëtsá imojtsatschuanama, ndayá cha tojamama.

<sup>17</sup> Sempre šmochtsama ntšamo chë tšëngaftanga ošbuachiyëngcá enefjuanëngbeñe amëndayënga tmojayancá, y sempre šmochtsiyena jtsamëse nýe ntšamo chënga tmojtsebošcá. Chënga sempre tšëngaftangbioye jtsanýenana, tšëngaftangbe tšabiama, ntšamo cmojánanýenama Bëngbe Bëtsábioye jojuama yojtsamnama chënga jtsetatšëmbëse. Jtsayau-nanëse, šmochjama chënga chëngbe trabajo oyejuayánaca y ndoñe ngmënaca chamot-samama, er ndoñe chca šmonjamëse, chë trabajo tšëngaftangbe tšabiama ndoñe nántsemna.

<sup>18</sup> Bëngbe Bëtsá bëngbiana šmochtseimpadana, er bënga ainaniñe corente fsëndétatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse. <sup>19</sup> Tšëngaftanga bëtscá cbontsaimpadana, Bëngbe Bëtsá chašmoimpadama, atše chašolesenciama tšëngaftangftaca cachiñe jtsatsmënama.

*Bëngbe Bëtsábioye chëngbiana jaimpádama y chënga jacheuayama*

<sup>20</sup> Atše, Bëngbe Bëtsá sëntseimpadana, cha chë nda endbëtsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondánýena mo oveshëngbe tšabe abuaijënýacá; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca, entšanga jinýanýiyama ndegombre bëtsemnama ntšamo Bëngbe Bëtsá chabe entšangbiana tojanašebuachenacá nýetsca tescama jamama. <sup>21</sup> Cha sëntseimpadana chaoma tšëngaftanga chašmotsebomnama nýetsca tšabe soyënga ntšamo cmojtsëjabotcá, chca, lempe ntšamo cha yobošcá tšëngaftanga chašmotsamama; y cha Jesucrísoftaca chaboma bëngaftaca ntšamo cha tšabá tbojtsinýancá. ¡Nýetscanga nýetsca tescama Cristo chamotsatschuaná! Chca chaotsemna.

<sup>22</sup> Jesucrístbeyeca catšátanga, tšëngaftanga cbontsaimpadana, jábuayenama ntšamo tcbon-jauyancá, puerta uantádoca tšabá chašmóyëngacñama, er nýe básefta palabréngaca chama tcbonjubuábiana. <sup>23</sup> Atše sëntseboše tšëngaftanga chašmotsetátšëmbo, Timoteo Jesu-crístbeyeca bëngbe catšata, ya ndoñe utamená yontsemnama, y cha betscó átsbioye chaojtabëse, átsëftaca chanjëftsbetše tšëngaftanga jányama chaijá ora.

<sup>24</sup> Tšëngaftanga ošbuachiyëngbeñe nýetsca amëndayënga šmochjácheuaye, y nýetsca Bëngbe Bëtsabe entšángnaca choca. Chë Italia luaroquënga ošbuachiyënga tšëngaftanga cmontsacheuaná.

<sup>25</sup> Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

## Santiago

### *Jacheuayama*

<sup>1</sup> Atše Santiago, Bèngbe Bètsá y Bèngbe Utabná Jesucristbe canye oservená, tsèngaftanga cbontsèbiabimná, tsèngaftanga chë bnètsana uta Israeloca bèts pamillangbiye nyets lumarèjana ujquëshenènga. Atše cbontsacheuaná.

### *Chë Bèngbe Bètsábicocana osertánana*

<sup>2</sup> Jesucristbeyeca atšbe catšátanga, tsèngaftanga ndaye padecena soyènguiñe chašmojtsiyena ora, chiñe šmochjájuaboye mo chca tsèngaftangbe tsábiama cuafstsemncá y šmochjóyejuaye; <sup>3</sup> er tsèngaftanga šmondétatšëmbo, chcañe chašmojtsajna ora, šmochtsetátšëmbo cach tsèngaftanga Jesucristbeñe puerte šmošbuaché o ndoñe. Chca ora bèts ošbuáchiyana chašmojtsebmñese, šmochanjobenaye, Bèngbe Bètsábeñe jtsobatmanese añémoca jtsemnana, masque padecena soyènguiñe chašmotsomñese. <sup>4</sup> Pero chca chašmojtsemñese, šmochtsentšena jashjáchama ntšamo canye entšá Bèngbe Bètsabe soyèngama corente osertaná yomncá chašmotsemnana, ntšamo Bèngbe Bètsá yobošcá chašmotsiyenama, chiñe ni mo canye soye jamama chacondètsabuashebenese.

<sup>5</sup> Nderado nda tsèngaftanguentsana ndoñe tontsobena corente osertánana jtsebmñama, cha bontsemna Bèngbe Bètsá jaimpádana cha chaoma aña chana jtsebmñama, y Bèngbe Bètsá chana bochanjátsetaye; er Bèngbe Bètsá nyetscanga bètscá endbètsatšatnaye y ndocnábiye jatáboyènjana. <sup>6</sup> Pero cha bontsemna, Bèngbe Bètsábeñe puerte jtsošbuáchiyese chama cha jaimpádana, y cha nderado ndoñe bochanjóyeunayama ntjatatèmnancá. Nda mèntšá tojtsamése, inye ora aña Bèngbe Bètsábeñe cuafstsošbuachecá y inye ora ndoñe, cha entsemna mo canye olèshcá, mar béjayoca binýia nye cátatoye jtsambayana. <sup>7</sup> Chca ama entšá ndoñe chaondètsejuabná, Bèngbe Utabnábentsana ndayánaca jatóyèngacñama. <sup>8</sup> Cha jtsemnana canye entšá, mora canye soye juabnayá, pero chentsana inyetšá jatójuabnañana. Chca, cha jtsiyenana nyetsca soyèngama uta soye jtsejuabnayese, y chca cha ndoñe ntsoberana tondaye puerte tsábá jamama.

<sup>9</sup> Chë Jesucristbeñe ošbuachiyá, ndbmñejema y ndoñe yapa uamana entšá tomná, corente oyejuayá chaotsemna, er Bèngbe Bètsabe bominyiñe cha canye uamana entšá jtsemnana; <sup>10</sup> y chë bomnánaca puerte oyejuayá chaotsemna, Bèngbe Bètsá chábiye nduámana entšá chabojábema ora, er mo chë shacuaníñe uantšefjushacá, cha ndoñe nyets tempo quem luarentše ntjèftsiyenana. <sup>11</sup> Shinýe tojábocna y becá tojojènyana ora, chë shácuaña jtsebuashana, chë uantšefjúsha jtsátsatšana y chabe uabótamanana ya ndoñe más ntsebinýnana. Cachcá chë bomná, echanjóbana nye cachabiamá más becá crocénana onguayíñe chaojtsemna ora.

### *Bacna soye ocotchènguentsana tsábá jabocnana*

<sup>12</sup> Oyejuayá chaotsemna chë entšá chë padecena soyènguentsana tsábá tojètsbocná, cabá Jesucristbeñe ošbuachiyá; chama Bèngbe Bètsá chabiamá oyejuayá echántsemna y echanjama chë nyetsca tescama yomna tsabe vida cha chaotsebmñama, mo uacananancá chabe ošbuáchiyama. Chë soye Bèngbe Bètsá tojašebuachená nyetscanga cha imobobonshánèngbiye. <sup>13</sup> Nderado nda bacna soye jamama thojócochèngo, ndoñe chaondètsejuabná Bèngbe Bètsá chca cháftaca yojtsama ca; er Bèngbe Bètsá ndocna te bacna soye jamama jócochènguana, y cha ndoñe ntamana inýenga bacna soye jamama chaócochènguana. <sup>14</sup> Inyetšá endmèna, canya bacna soye jamama jócochènguana, bacna juabnènga tojtsebmñana ora; cha chiñe nye jesejuabnayana y chë soye jtsasjayana cha chca jamama. <sup>15</sup> Nda yapa bacna soyènga tojtseboše, cabana cha pronto chë bacna soye jamana; y nda sempre bacna soyènga tojtsama, chama Bèngbe Bètsá nyetsca tescama bochanjacastiga.

<sup>16</sup> Atšbe bonshana catšátanga, ndoñe matenoíngña, jtsejuabnayese Bèngbe Bètsá yojtsama tsèngaftanga bacna soyènga chašmotsamama ca. <sup>17</sup> Nyetsca tsabe soyènga y chë puerte tsabe soyènga tsbanáncocana endobá, Bèngbe Bètsá chë Taitábicocana. Y cha chë shinýe, juashcona, y nyetsca chë celoca yobuashinýinýana soyènga tojamá, nyets tempo nye cachá uesomñe y ndoñe inýa ntjátsmènana. <sup>18</sup> Cachá jamama tojánbošenayeca, bènga chábenga šojánabiamá, bènga chabe ndegombre palabrènga jounèse. Cha chca tojama, lempe ntšamo Bèngbe Bètsá quem luarentše tojamentšana, bènga chë natsanènga chábenga chamotsemnana.

### *Ntšamo ndegombre yomna Bèngbe Bètsábiye tsábá jadórana*

<sup>19</sup> Atšbe bonshana catšátanga, quem soyama šmochtsenójuabnaye: nyetsca tsèngaftanga cmontsamna sempre jtseprontánana jounenama; pero jóyeubambyamna jobátmana y inýengafaca jetnámnaca. <sup>20</sup> Inyáftaca thojetna ora, canye entšá ndoñe ntamana ntšamo



Bëngbe Bëtsá yobošcá, chë nyetsca soyënguifne tšabá jtsamana. <sup>21</sup> Chcasna, šmochtsajbaná bacna soyënga jtsamëse oyenana, y amana nyetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjójyëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnana.

<sup>22</sup> Ndoñe quécmatamna nñe chë Bëngbe Bëtsabe buayenánana jouenana, ndayá ntšamo cha tojayancá aifne jtsamana; ndoñe chca šmontsamëse, cach tšëngaftanga šmontsenoingña. <sup>23</sup> Nda nñe chë buayenánana tojouena, pero betscó tbojtsebñatjëmbe y ndoñe tontsama ntšamo chiñe tojtsayancá, cha jtsemnana mo canñe entšá chabe jubíá espejuifne tojtsenonýacá: <sup>24</sup> chana cachá jtsenónýayana, pero chë espejo tojabuertaná ora, jtsebñatjëmbana ntšamo cha bëtsemnana. <sup>25</sup> Pero nda ntšamo tojouencá ndoñe tbonjebñatjëmbe, y sempre tojtsejuabná chë entšanga játsebacama Bëngbe Bëtsabe puerte tšabe mando cha-bosertama, y tojtsiyena ntšamo chë mandënguëntšë endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

<sup>26</sup> Nderado nda tojtsejuabná Bëngbe Bëtsábioye ibojtsadorana ca y chë Bëngbe Bëtsábioye adorayá ntšamo ibomncá cha yojtsama ca, pero ndoñe tontsobena bacna soye oyebuamb-nayana jtsajbanana, cachá yojtsenoingña, y nyetsca soyënga ntšamo tojtsamcá Bëngbe Bëtsá jadórama, chabiama tondaye ntšamanana. <sup>27</sup> Bëngbe Bëtsá chë Taitabe bominiñe, chë puerte tšabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmënënga tmojtsemna ora jubabuáchana, y ndoñe bacna soyënga játamana, mo chë nñe quem luarama enójuabnayënga mondbetsamcá.

## 2

### *Nyetscanga tšabá jtsatenonýayëngana*

<sup>1</sup> Tšëngaftanga, Jesucristbeyeca atšbe catšátanga, šmondošbuaché Bëngbe Utabná Jesu-cristo, chë puerte bëtšá y uamanábeñe; chíyeca tšëngaftanga cmontsamna nyetsca entšanga cachá jtsatenonýayëngana. <sup>2-3</sup> Nderado tšëngaftanga cányëntšë šmojënefina, y chora canñe bomna entšá tojáshjango castellano ntšabuchëtjonëñjagaca y uámana entšayëjuangaca bopormaná, cha botamana šmojúmashëngo y mëntšá šmojaunya: “Moca quëfseroca mabesótbema ca”. Pero cachca ora, canñe ndbomñëjema tojáshjango uandocuenta entšayá uichëtjoná, y cha šmojaunya: “Acna choca tsanana cochtsemna o chafjoca mótbema ca”. <sup>4</sup> Chca tšëngaftanga ya šmotsama cach tšëngaftanguëntšë báseftanga más uámanënga inýëngbiam chamotsemnana, y chca šmojtsama, ana bacna juabñënga šmojtsebmna causa.

<sup>5</sup> Atšbe bonshana catšátanga, quem soye šmochjouena: Bëngbe Bëtsá quem luarentšë ndbomñënga imomñënga tojabacacá, chënga canñe puerte uámana soye chamotsebmna, Jesucristbeñe puerte chamotsošbuáchema; y mo otocana soycá Bëngbe Bëtsabe amëndayama chamosháchiñama. Cha imobobonshánëngbioye chë soye játsatayama tojašebuachená; <sup>6</sup> pero tšëngaftanga chë cuenta, mo ndoñe cach tšëngaftangcá entšanga bendmëncá chëngbioye jtsénýayana. Ndegombre, chë bomñënga mondmëna chë nñe sempre cmondébtsamëndayënga y chë sjojónana chë pueblentšá mandadëngbioye cmondébáunatsënga. <sup>7</sup> Y cach bomñëgnaca mondmëna chë Cristbiam podesca oyebuambnayënga, ndábenga tšëngaftanga šmondmëna, y chabe uabaina tšëngaftangbiam puerte enduámana.

<sup>8</sup> Bëngbe Bëtsabe uabemana palabreñguifne mëntšá endayana: “Ndëmua entšánaca cocht-sebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandiñe endayancá ndegombre šmojtsamëse, tšabá šmochántsama. <sup>9</sup> Pero tšëngaftanga ndoñe cachá šmontsenonýase, chcana bacna soye jtsamana y šmojama ntšamo Bëngbe Bëtsabe leyënguifne ndoñe yondëlesenciancá. <sup>10</sup> Y mora, canñe entšá nyetsca chë leyentšá mandënga tojtsobedecena, pero ndoñe tontsama ntšamo nñe mo canñe mando ntšamo iuayancá, cha Bëngbe Bëtsabiam jtsemnana canñá ntšamo nyetsca chë leyentšá mandënguifne ndoñe yondëlesenciancá amá. <sup>11</sup> Cach Bëngbe Bëtsá, chë “acbe shema o boyábioye inýaftaca ndoñe cattseingñaye ca” tojanayaná, cachá mëntšánaca tojánayana, “inýabioye ndoñe catjóba ca”. Chca, nda cachabe shëmbioye inýaftaca ndoñe tbonjaingñë, pero aifne inýabioye tojóba, chca, Bëngbe Bëtsabiam cha jtsemnana canñá nyetsca chë leyentšá mandënga ndocumpliná.

<sup>12</sup> Tšëngaftanga cmontsamna jtsóyeuambnayana y jtsamana ndayá Cristo sojanamëndacá, atsebacana entšangcá, er Bëngbe Bëtsá echanjayana ntšamo tmojamcá aifne o ndoñe tšabá bëtsemnana. <sup>13</sup> Er chë inýëngbiam ndoñe ngmënana bomñëngbiam, Bëngbe Bëtsá ntjongmi-acá echanjayana ntšamo tmojamcá aifne o ndoñe tšabá bëtsemnana; pero chë inýëngbiam

aíñe ngménana bomnëngbiam, ntšamo tmojamcá aíñe o ndoñe tšabá bétsemnama Bëngbe Bëtsá chaojayana ora, chënga tšabá chentšana mochanjábocana.

*Chë ndegombre ošbuáchiya, soyëngaca jinñanñiyama*

<sup>14</sup> Atšbe catšátanga, ¿ndayama cánñabioye buanjóservia jayanana aíñe Jesucristbeñe sëntsošbuaché ca, pero cha inñengbiam tšabe soyënga ndoñe tontsama, y chca, ntšamo cha tojtsamcá ndoñe tontsinñanñá cha Jesucristbeñe yošbuáchema? Ndegombre, cha nñe chca tojtsichámëse, ndoñe ntso podénana cha atsbocaná chaotsemnama. <sup>15</sup> Nderado canñe boyabása o shembása ošbuachiyá entsáyá tbojtsabuáshbena y saná chë tē jasámnaca tbojtsebuáshbena, <sup>16</sup> y canñá tšëngaftanguentsá tbojauyana: “Diošoftá, sēsnama ndoñe chacondētsepapadecena y becá chacuatoshachá ca”, pero chca chaotsemnama chábioye tondaye tbonjatšetase, ¿ndayama nantso servena chca jayanana? <sup>17</sup> Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiya bomnama jinñanñiyama, nñe chca ošbuáchiya jtsebmomnana tondayama ntso servénana.

<sup>18</sup> Pero nderado ndánaca mēntšá echanjayana: “Aca Jesucristbeñe icošbuaché, pero atšna inñengbiam tšabe soyënga sēntsama ca.” Chora atšbe stjojuá: “Sminñinñe ntšamo canñá ntso bena Jesucristbeñe jtsošbuáchiya, chca chaotsinñama tondaye ntšamcá, y chora, ndayá tijamama atšbe ošbuáchiya cchochinñinñiye ca.” <sup>19</sup> Aca condošbuaché nñe canñe Bëngbe Bëtsá yomnama y chca tšabá contsama; pero chë bacna bayejëgnaca chiñe jtsošbuáchiya, y chë causa chënga uatjana jtsebmomnana y jtsangmēmñayana. <sup>20</sup> Ndoñe obějema cattsemna; ndegombre cchochanjinñinñiye nderado nda Jesucristbeñe tojtsošbuaché, pero tondaye tontsama chca chaotsinñama, chabe ošbuáchiya tondayama ntso servénana. <sup>21</sup> Bëngbe Bëtsá tojánayana chabe bominñiñe Abraham, bëngbe tempsca bēts taitá, tšabia yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaquiñá altariñe jóbama, cach Bëngbe Bëtsábioye jētschuayama. <sup>22</sup> Aca contsobena Abrahámbeñe jinñama, cha Bëngbe Bëtsábeñe yojanošbuáchema, y soyënga yojánama chca chaotsinñama; y ndayá cha tojanmama entsinñinñena, cha ndegombre puerte bētscá yojanošbuáchema. <sup>23</sup> Chca tojanopasá ntšamo Bëngbe Bëtsabe uabemana palabreñguñe endayanacá, mēntšá: “Abraham Bëngbe Bëtsábeñe yojtsošbuáchiye, y chama Bëngbe Bëtsá tojánayana chabe bominñiñe cha tšabia yojamna ca.” Y Abraham entsanabaina Bëngbe Bëtsabe amigo ca.

<sup>24</sup> Y tšëngaftanga šmontsetátšëmbo, Bëngbe Bëtsá ináyana canñe entsá chabe bominñiñe tšabia yomna ca, chë entsá ndayá tojtsamama, chabe ošbuáchiya chaotsinñama, y ndoñe nñe ošbuáchiya tojtsebmomnana. <sup>25</sup> Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominñiñe cha tšabia yojamna ca, er cha canñe tšabe soye tojanma. Cha chë noticia uambaye judiënga posada tojanëyentsame, y chentšana tojanëjabuache inñe benachējana chamuáisebocanama, chë pueblentša soldadëngbiam chamotsachetama. <sup>26</sup> Lempe básefta palabreñguñe jayanamna mēntšá entsemna: ntšamo canñe cuerpo, espíritu ndobomna cuerpo, pronto jóbana, cachcá chë ošbuáchiya, ndocna soyëngaca tontsemna, chca chaotsinñama, tondayama ntso servénana.

### 3

*Bichtájaca tšabá jóyebuambayama endmëna*

<sup>1</sup> Jesucristbeyeca atšbe catšátanga, ndoñe yapa buátëmbayënga tšëngaftangbeñe chamondëtsemna; er tšëngaftanga ya šmondëtatšëmbo, bënga, chë entsanga abuátambayëngbiam, chë castigo más bētscá yochtsemnama, Bëngbe Bëtsá ndoñe tmonjóyeunase, ntšamo entsanga tmojamama aíñe o ndoñe tšabá bétsemnama cha chaojayana ora. <sup>2</sup> Bënga nyētsanga nyētsca bacna soyënga mondbētsama. Nderado nda oyeubambnayiñe ni mo canñe bacna soye tonjama, chë entsá puerte tšabia jtsemnana, ntšamo Bëngbe Bëtsá yobošcá jtsiyenëse, y cha yojtso bena cachá sempre jtsenomándayama.

<sup>3</sup> Chë couayëngbioye freno tmojuayashbé ora, ntšamo bënga tmojtsebošcá chënga mochántsama, y bënga cachora jtso bennana ntšamo nyēts chëngbe cuérpoca tmojtsamcá jtsemándayana, y ndoñe nñe chëngbe bestšaše. <sup>4</sup> Barquëshamnaca smochjenójuaboye. Masque tša bētsētsacuemënga y tša jabuache binñiënga chë barco jtsējuatsēntšayana, chë uamanéjayënga chë barco juyambana ndayëjana tmojtsebošcá, y chca, nñe canñe base soyetémaca, timón ca uabainētémaca. <sup>5</sup> Cachcá, chë bichtaja cuerpiñe canñe base soyetema endmëna, pero chë bichtájaca entsanga jtšenábotamnayana bēts soyënga tmojamama. Smochjouena, canñe base iñeshe jtso bennana canñe bēts tjañe juangbotjuama. <sup>6</sup> Y chë bichtaja endmëna mo canñe iñeschá, mo canñe luare ndayentse puerte bacna soyënga tobinñncá. Chë bichtaja jtso bennana bëngbe cuerpentse puerte bacna soyënga bëngbiam jama. Mo canñe iñeshe becá tojtsebmamnacá, chë bichtájaca tcojtsichamo ndoñe

tšabe soye, jtsobenana bacna soyënga bëngbiana jamama nyëtsa tempo quem luarentšë tmuetsiyenëtsuana; y mo nda ndayá tojtsangbotjuacá, Satanás jtsobenana chë bichtaja jtsamándayana, bacna soyënga chaotsamama.

<sup>7</sup> Entšá endobena jtsaméndayana nyëtsa tjoica bayënga, shloftšënga, osjojnayënga y buyeshiñe oyena bayënga; y ndegombre mora entsamënda; <sup>8</sup> pero ndocná tonjobená chë bichtaja jtsamándayana, chca, bacna soyënga amana chaotsajbanama. Chë bichtaja jtsamana bëtsá bacna soyënga cada te chauëtsebinýnama, y mo canýe mëtšcuaycá veneno jtsobomnana jóbama, chë bichtájna cachá endmëna. <sup>9</sup> Bichtájaca bënga puerte tsábá Bëngbe Bëtsá y Taitabiama jtsichámuana, y cach bichtájaca bënga puerte bacá entsangbiana mondbëtsichamo, masque Bëngbe Bëtsá cachá enoparecëñënga chënga tojábiama. <sup>10</sup> Cach uayásentšana jtsóbocanana Bëngbe Bëtsabiama tsabe palabrenga y entsangbiana bacna palabrenga. Jesucristbeyeca atšbe catšátanga, chca ndoñe chaondëtsemna. <sup>11</sup> Canýe bëjaye obocanentšana ndoñe ntšopodénana tsabe býyeshe chaóbocnama y cachentšana untja býeshnaca. <sup>12</sup> Ntsamo canýe higo betiyentšana ndoñe ntšopodénana olivosëšënga jashacama, y canýe uvas betiyentšana ndoñe ntšopodénana higuëbënga jashacama, cachá, atšbe catšátanga, tamona býeshentšana ndoñe ntšopodénana tsabe býyeshe chaóbocnama.

#### *Bëngbe Bëtsábiocana óbocana osertánana*

<sup>13</sup> Nderado tsëngaftanguentšë tojtsëmna canýe puerte tatšëmbuá y osertaná, cha bontsemna, chca yomnama entsánga jinyányiyana, tsabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnama. <sup>14</sup> Pero tsëngaftangbe ainaniñe yapa inýabioye šmojtsántšaboše y nyë inýënga chamotjáyanama soyënga šmojtsama, as ndoñe šmattsenábotamnaye osertánënga y tsábënga šmomnama, er ndegombre Bëngbe Bëtsabe osertánana tsëngaftanga ndoñe šmontsebmoma. <sup>15</sup> Er chca osertánana, Bëngbe Bëtsábiocana ndoñe ntšóbocanana, ndayá nyë quem luarama enójuabnayëngbentšana, nyë entsangbe juabnentsana, y canýe bacna bayëjbentšana. <sup>16</sup> Ndayentšë entsánga yapa tmojtsenántšaboše, y nyë inýënga chamotjáyanama soyënga šmojtsama, chentšë tondayama quemochátenëyeunana y nyëtsca bacna soyënga mochántsama.

<sup>17</sup> Pero chë Bëngbe Bëtsábiocana óbocana osertánana bomnënga, nyëtsca soyamna, natsana puerte tsabe vídaca jtsiyenana, bacna soyëngaca ndëmandánënga; y chënga jtsëmna chë inýënga ndoñe chamondëtšentsjanama amënga, tsábënga y sempre jtseprontánana inýënga joyaunayama. Y chca quemënga jtsëmna inýëngbiana ngmëñana bomnënga, sempre tsabe soyënga jtsamana, cachá nyëtsca entsángbioye jtsëñýayana, y ntšamo ndegombre tojtsëmncá jtsichámuana y jtsamana. <sup>18</sup> Ntsamo canýe jená, botamana shajuana jtsobomnama tsabe jénaye jájena, cachá, sempre natjëmbana jtsiyenama bošënga, natjëmbana inýëngaftaca jtsiyenana, chca, nyëtsca entsánga chamotsamama ntšamo Bëngbe Bëtsabe bominiñe tsábá yomncá.

## 4

#### *Smochtsiyena Bëngbe Bëtsá tsëngaftangbeñe jtsamándayëse*

<sup>1</sup> ¿Ndayentšana chë tsëngaftanga jtsentsjanayama y jtsenpenzëntsiayama yóbocana? Endóbocana chë tsëngaftangbe bacna juabnënguentsana, nyë cach tsëngaftanga tsábá jtsomñama; y chë soyënga tsëngaftangbe ainaniñe sempre chë tsabe juabnëngama contra jësemnana. <sup>2</sup> Tsëngaftanga ndayánaca jtsobomnama šmojtseboše, pero chca jtsobomnama ndoñe šmontsobena, as jtseprontánana inýëngbioye jtsëbáyama. Inýa ntšamo tobmncá tsëngaftanga tša jtsántšabošana, y chë soye jashjáchama ndoñe šmontsobena ora, inýëngaftaca jentjáyanangana y jtsenpenzëntsiayana. Ntsamo šmojtsebošá ndoñe ntjobenayana jtsobomnama, Bëngbe Bëtsá chama ndoñe šmondbotjañe causa; <sup>3</sup> y chë soye šmojtjañe ora, tsëngaftanga ndoñe ntjóýëngacñana, ndoñe botamana chë soye šmondbotjañe causa, er tsëngaftanga chë soye jtsëbošana nyë chaoservema oyejuayënga bacna soyënguñe jtsomñama.

<sup>4</sup> ¡Tsëngaftanga, Bëngbe Bëtsá bobonshánana šmojtsajbananga! ¿Ndoñe šmondëtatsëmbo, chë jtsëbošana nyë quem luarama enójuabnayëngbe amigo jtsëmna y nyë quem luar-entša soyënga jtsobomnama, chca, canýe entsá Bëngbe Bëtsabe uayayá jtsëmna? Ndánaca tojajuabó nyë quem luarama enójuabnayëngbe amigo jtsëmna, chca, canýe Bëngbe Bëtsábioye uayayá jóbemana. <sup>5</sup> Ndoñe nyë bonamente Bëngbe Bëtsabe uabemana palabrenguñe mëntšá endayana: “Chë Bëngbe Bëtsá tbojanichmó bëngbe ainaniñe chaotsiyenama Uámana Espíritu, puerte entseboše nyë Bëngbe Bëtsá canýa bëngbe amëndayá chaotsemnama ca.” <sup>6</sup> Pero Bëngbe Bëtsá, bëngbe tsabiama jtsejuabnayëse bënga jtsëjabuáchanana, chíyeca Bëngbe Bëtsabe uabemana palabrenguñe mëntšá endayana: Bëngbe Bëtsá chë nyë cachënga uamanënga tmojtsenobiannangbe contra entsemna,

y chë ndoñe uámanënga montsenobiamnangbiamna, Bëngbe Bëtsá más tšabe juabna entse-bomna ca.

<sup>7</sup> Asna, tšëngaftanga šmochtseprontana nýe Bëngbe Bëtsá chacmotsamëndama; ntšamo Satanás tcmojtsamëndacá ndoñe šmattsama, y cha cachora tšëngaftangbentsána echantsachá. <sup>8</sup> Bëngbe Bëtsábioye šmochtobeconá, y cha echanjama tšëngaftanga ntšamo cha yomnama chacmotsesertánama. Tšëngaftanga bacna soye amënga, cach tšëngaftangbe cucuatšëngaca tšabe soyënga šmochtsama, bacna soyënga ndoñe. Tšëngaftanga chë inýe ora jtsejuabnayana Bëngbe Bëtsá jtsebobonshánama, y inýe orna, nýe quem luarentša soyënga jtsebomnama, šmochtsajbaná bacna soyënga jamama bošana, chca, nýe tšabe juabnënga tšëngaftangbe ainaniñe chašmotsebmomnama. <sup>9</sup> Tšëngaftangbe bacna soyëngama ngménaca šmochtsemna, šmochjenóbošachna y cochtsetšenánënga šmochjóyeuambaye. Jatenbiajuayamna, šmochjenóbošachna; y joyejuayëngamna, ngménaca šmochtsemna. <sup>10</sup> Bëngbe Bëtsabe delante bëtsëtsanga ndoñe šmattsenobiamnayey, y cha más uámanënga cmochanjábiamna.

### *Inýengbiamna ndoñe ntsichámuana ndoñe tšabá tmonjama ca*

<sup>11</sup> Jesucristbeyeca catšátanga, inýengbiamna bacna soyënga ndoñe šmattsóyeuambaye. Nda cachabe catšatbiamna bacna soye tojtsichamo o tojyana ntšamo cha tojamcá ndoñe tšabá yontsemna ca, cha chora chë leyentša mandënga ndoñe ntsoCumplínana y jtsichámuana chë leyentša mandënga tondayama yontsoserverna ca. Y chë leyama chca tcojtsichámëse, cach ley jocúmplia cuenta, contsobiamná canýe ichamuá chë ley aífne o ndoñe yondoservénama, y chca ndoñe quemátsmëna jtsamana. <sup>12</sup> Chë ley tojuapormá cha nýe canýa endmëna, Bëngbe Bëtsá, y cachá endmëna ntšamo entšanga tmojamcá aífne o ndoñe tšabá bëtsemnama ichamuá, y cachánaca entsobena entšanga játsebacama o nýetsca tescama jácastigama. Y acna, ¿ndase cmëna ndëmuca entsabiámnaca jobenayama jatichámuama ntšamo tojamcá aífne o ndoñe tšabá bëtsemnama?

### *Ndayá yëfse yochjatëchnënguama ndoñe ntsótatsëmbuana*

<sup>13</sup> Y mora quem soye šmochjouena, tšëngaftanga chë šmondBëtsichamo: “Mënté o yëfse quemoye o chë inýe bëts puebloye fchanjanga, y chentše canýe uata fchanjëftsemna ba soyënguifne trabájayifne, y ndegombre becá fchanjónýena ca.” <sup>14</sup> ¡Pero ni mo ndayá yëfse tšëngaftangafaca yochjochnënguama ndoñe quešmátststšëmbó! Tšëngaftanga ndoñe quešmátststšëmbó ndayëntscuana vida šmochjëftsebmomna, y chca, tšëngaftanga šmondmëna mo canýe jantšetëshcá, chëshe mora jónýnana y nýe ndeolpe jatenatjëmbana. Tšëngaftangafaca cachcá echanjopása. <sup>15</sup> Tšëngaftanga mëntšá cmontsamna jayanama: “Bëngbe Bëtsá quešjalesenciase, ainënga fchántsemna y quem soye o chë soye fchanjama ca.” <sup>16</sup> Pero chë cuenta, tšëngaftanga bëts soyënga šmochjamama sempre jtšenábotamnayana, ndayá tšëngaftanga chašmomama Bëngbe Bëtsá yochjalesenciaca ntsetatšëmbcá; y chca jtsamana ndoñe tšabá quenátsmëna. <sup>17</sup> Nda tojtsobena ntšamo tšabá yomncá jamama, pero ndoñe chca tonjama, cha canýe bacna soye jtsamana.

## 5

### *Chë bomnënga jábuayenama*

<sup>1</sup> ¡Quem soye šmochjouena, tšëngaftanga chë bomnënga! ¡Chë tšëngaftanga šmochtseufrinama šmochjenóbošachna y uatjananënga šmochtseyoye! <sup>2</sup> Tšëngaftangbe bomnana buajónana janguánana entsemna, tondayama quenátoserverna, y chë entšayëjuangá mejëjonga montsasá. <sup>3</sup> Tšëngaftangbe castellano y midio tojtsengúsheshe; y chë ngúshesha echántsinjínýnaye tšëngaftanga chë crocenánaca ndoñe šmonjanmama ntšamo inýenga jujabuáchama yojamncá; chë causa, nýetsca tescama cmochántsapochocaye, ntšamo chë inëshe canýe soye endbetsepochochacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco. <sup>4</sup> Tšëngaftanga chë tšëngaftangbe fshantsënguifne tmojëftsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nýets obenana bomná, chë trabajayëngbe chembuanana ya tojouena. <sup>5</sup> Quem luarentše tšëngaftanga šmondoyena ba botamana soyëngaca y nýe ntšamo cach tšëngaftanga šmobošcá jtsamëse. Ntšamo canýe uacná jóbana, minýicá tojtsemna ora, cachcá tšëngaftangbiamna entsobeco chë te, ndaye ora Bëngbe Bëtsá echanjama castigánënga chašmotsemnama, er puerta bacna soyënga šmojama. ¡Chë castigo jtsebínýnaye tempo ya entsobeco! <sup>6</sup> Tšëngaftanga, chë puerta tšabá amëngbiamna šmojayana jóbana yojtsamna ca y šmojtsebaye, chca ndoñe chaondëtsemnama chënga ndocá jamama ntsobercá.

### *Chë uantado jtsemnana y chë Bëngbe Bëtsáftaca jencuéntama ora*

<sup>7</sup> Pero tsëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tsabe shajuanënga jobuátbanama, jtsoctacánana natsana uantádoca jobátmana chë jajañama uafena tempo chaóshjanguama. <sup>8</sup> Tsëngaftángnaca uantadënga šmochtsemna, y tsëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

<sup>9</sup> Jesucristbeyeca catšátanga, ntšamo inyenga tmojtsamama ndoñe nýe šmatsoquejana, Bëngbe Bëtsá tsëngaftangbiama ndoñe chaondayanama, ntšamo šmojóyebuambama ndoñe tsabá šmonjama ca. Y nda yochjayana ntšamo entsanga tmojamcá aife o ndoñe tsabá bëtsemnana, ya entsebeconá. <sup>10</sup> Atšbe catšátanga, chë tempsquënga Bëngbe Bëtsabe juabna oyebuambnayënga, ndëmuanyënga entsanga tmonjanabuayená Bëngbe Utabná jótšëmbonëse, chënga bëngbiøye šonjëtsaninýanýiye ntšamo tmojansufrima, ntšamo šojtsamna uantadënga jtsemnana tmojtsesufrina ora; y chca tsëngaftanga cmontsamna jtsamana. <sup>11</sup> Bënga chëngbiama fsëndbëtsejuabnaye oyejuayënga imojamna ca, chë tmojan-sufri ora Bëngbe Bëtsábeñe imojanobátmana ainaniñe añemo jtsebomnëse. Tsëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte pade-cena soyënguife yojasufrina ora; y šmondëtatšëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entsangbiama puerte ngmená yómnayeca.

<sup>12</sup> Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inýe soyama. Tsëngaftanga aife ca jayanama šmojtsebošëse, nýe aife ca šmochjayana, y ndoñe casna nýe ndoñe; chca, Bëngbe Bëtsá ndoñe chaondayana ndoñe tsabá šmonjama ca júraye causa.

<sup>13</sup> Nderado nda tsëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuayama. <sup>14</sup> Nderado nda šocá tojtsemna, cha bontsemna chentša ošbuachiyëngcá enefjuanëngbeñe bëtšëjemëngcá amëndayënga jáchembuana, chënga Bëngbe Bëtsá chabiama chamoimpadama, y Bëngbe Utabná jótšëmbonëse aceitiye chamuanëttjuama. <sup>15</sup> Y tsëngaftanga, puerte jtsošbuachiyëse Bëngbe Bëtsá chašmojaimpadá ora, chë šocá salud echántinýena, y Bëngbe Utabná echanjama cha tsabá cachiñe chaotsatsmënana; y nderado cha bacna soyënga tojamëse, Bëngbe Bëtsá bochantseperdóna. <sup>16</sup> Chýecna, chë bacna soyënga šmojtsamama šmochjobuambaye, y Bëngbe Bëtsá nýetscangbiama šmochtseimpadana, chca, tsabá mo shnanëngcá chašmotsemnana. Canýa ndabiama Bëngbe Bëtsá tojayana chabe bominiñe tsabia yomna ca, cháftaca tbojencuentá ora, chánaca ba tsabe soyënga jýëngacñana, y jobenayana bëtš soyënga jamama. <sup>17</sup> Bëngbe Bëtsabe juabna oyebuambnayá Elías, mo cach bëngcá canýe entšá inamna, y puerte jtsošbuachiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tsëntsañe ndoñe tonjanafté. <sup>18</sup> Chentšana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yojtsats-binýna.

<sup>19</sup> Atšbe catšátanga, nderado nda tsëngaftanguentšá tojtsajbaná chë ndegombre soyënga jtsamana, pero inýa chábioye tbojuájabuache cachiñe chë tsabe benache cháuatishachama, <sup>20</sup> tsëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tsabe videntšana cháuaisebocnama, cha chë nýetsca tescama castigüentšana chábioye jatsbocana, y jamana ba bacna soyëngama cha perdonaná chaotsemnana.

# 1 San Pedro

## *Jacheuayama*

<sup>1</sup> Atše Pedro, Jesucristbe ichmoná, quem tsbuanácha sentsabiamná chë cachëngbe larentše ndoñe mondoyenëngbiama, chë Ponto, Galacia, Capadocia, Asia y Bitinia larenguenache ujquëshenënga imoyenëngbiama. <sup>2</sup> Sentsabiamná chë Bëngbe Bëtsá Bëngbe Taitá tojánabacacangbiama, ntšamo cachá jamama yojanjuabnacá y ntšamo jopásama yojantatšëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tsëngaftanga chabe entsanga chašmotsemnana, Jesucristo chašmotseyeuananama y Bëngbe Bëtsabe delante tsabá chašmotsatsmënana, bacna soyënga abuajuánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá séntseimpadana Bëngbe Bëtsá, chaoma tsabe bendicionënga tsëngaftangbeñe chaotsemnama, y chaoma tsëngaftangbe ainaniñe tsabe ebionana chašmotsebmnama.

## *Bëngbe Bëtsábeñe jtsosbuáchiyëse vida jtsebmnama, atsebácënënga jtsemnana*

<sup>3</sup> Bëngbe Bëtsá y Bëngbe Utabná Jesucristbe Taitábioye matschuanga; cha puerta lastemado inyëngaftaca yómnyeca, tojanma bënga tsëm juábnaca vida chamotsebmnama, bëngbioye bacna soyënga jabuajuánase, Jesucristo cháuatayenama tonjánmayeca. Chiyeca bënga montsobena chábeñe jtsobátmanana sempre y nyetsca tescama, ndayá cha sochjátšatayama. <sup>4</sup> Ndayá bënga sochjátšataycá ndoñe quenátsmëna jëtsopochócama opodena soyënga, ndayá nyets tempo tsabe soyënga. Y bënga mondobátmana jóyëngaçñama ndayá Bëngbe Bëtsá chabe entsanga jatšatayama tojašebuachenacá, ndayá celoca bëngbiama cha yojtsinýena. <sup>5</sup> Chë soyënga tsëngaftangbiama entsemna, Bëngbe Bëtsábeñe šmosbuáchema; cha chabe obenánaca cmondánýena, tsëngaftanga játsebacama. Cha chca jamama ya tojaprontá y echanjinýanyíe, Cristo jésabama tempo chaojóshjango ora.

<sup>6</sup> Chiyeca tsëngaftanga tsá oyejuayënga šmojtsemna, masque nderado jtseytana inýe ora, nyetsca padecena soyënguñe jasúfriase chašmuachnënguama. <sup>7</sup> Mo chë castellanama jtsetatšëmbuama aiñe o ndoñe tsabe castellano tomnama iñiñe fjuchnëngcá, padecena soyënguñe tsabá chašmojachnënguse, Bëngbe Bëtsá echanjinýanyíe tsëngaftanga ndegombre taišmosbuáchema. Chë castellano pronto endbetsopochóca, masque chca, chana puerta endbetsámama. Y tsëngaftangbe ošbuáchiyana chë castellanama puerta más enduámama. Tsëngaftanga padecena soyënguentšana bëtš ošbuachiyanaca chašmojabocnëse, Jesucristo chaojésabo ora, entsanga mochanjinýe tsëngaftanga šmojtsomerecena chacmotsatacheuana, más bëtšetsanga y obenënga chácmabiamama y uámanëngnaca.

<sup>8</sup> Tsëngaftanga Jesucristo šmondobonshana, y chábioye ndoñe chešmataninýe; masque mora cha ndoñe quešmatonýá, tsëngaftanga chábeñe šmontsošbuaché, y šmontsebmna canýe puerta tsabe oyejuayana, y ntsachetšá chana yomnana ndoñe quešmatobena jayanama, tsá bëtscá causa. <sup>9</sup> Chca oyejuayana tsëngaftanga šmontsebmna, er ndayá tsëngaftanga jtsosbuáchiyëse šmobatmanácá, ya šmojtsosháchichana, chë Bëngbe Bëtsá tsëngaftanga jtsatsebacayana.

<sup>10</sup> Bëngbe Bëtsabe juabna oyebuambnayënga ya imojanatsjendá y imojanguá jtsetatšëmbuama, ntšamo Bëngbe Bëtsá entsanga játsebacama, y tmojanoyebuambá ndayá Bëngbe Bëtsá tsëngaftanga jatšatayama, tsëngaftangbiama tsabe juabna cha yobómnayeca. <sup>11</sup> Chëngbe ainaniñe yojtsemna Cristbe espíritu, y ntšamo tojanéyancá, cabá chca ndochnëngo ora, yojamna Cristo jasúfriama y ntšamo chentšana Bëngbe Bëtsá chábioye puerta bëtšá bochjánbemama, Bëngbe Bëtsabe juabna oyebuambnayënga imojanjuabná y imojanatsjendá jtsetatšëmbuama chë soyënga yochjanopása ora, ndaye tempo y ntšamo chë tempo yochtsemnana. <sup>12</sup> Pero tempo Bëngbe Bëtsá chëngbioye tojaninýanyé, chca jtsamana ndoñe cachëngbe tsabiama yonjamnama, ndayá chca jtsamana yojamna tsëngaftangbe tsabiama. Chënga tmojanoyebuambá, ntšamo chë tsabe noticiënga oyebuambnayënga tsëngaftanga tcmojauyancá. Y chca tcmojáuyana chë Uámana Espíritbe obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tsabá jinýama, chënga chaósertama.

## *Bëngbe Bëtsá entsanga jtsachembuanana chabe entsangcá chamotsiyenama*

<sup>13</sup> Chiyeca, botamana jtsejuabnayëse tsabá jatrabájama, y cach tsëngaftanga jenomándama jtsobenëse, yejuana šmochtsobátmana, Bëngbe Bëtsá soyënga cmochjátšatayama tsëngaftangbe tsabiama jtsejuabnayëse, Jesucristo quem luaroye yochjésabo ora. <sup>14</sup> Tsëngaftanga Bëngbe Bëtsabe básenga uauenanënga quetsomñecá, ndoñe šmattsiyena ntšamo cach tsëngaftangbe bacna juabnënga yomncá nýe tsabá jtsomñama, ntšamo Bëngbe Bëtsábioye cabá nduabuatma ora šmonjanbomncá. <sup>15</sup> Chamna, šmochtsiyena

mo chë Bëngbe Bëtsabe entšangcá, puerte tšabe entšangcá jtsamëse, er Bëngbe Bëtsá, nda tcmojáchembo chca chašmotsemnana, sempre uamaná endmëna. <sup>16</sup> Er Bëngbe Bëtsabe uabemana palabrënguifë mëntšá endayana: “Tšëngaftanga Bëngbe Bëtsábeñe uámanënga šmochtsemna, er atše uamaná sëndmëna ca.”

<sup>17</sup> Tšëngaftanga Bëngbe Bëtsábioye šmondbuyana “Taita ca”, šmondbótšëmbona ora. Bëngbe Bëtsabiana nyëtscanga cachcá mondmëna. Chiyeca, ntšamo nyëtscanga tmojamama tšabá o ndoñe tšabá yontsemna ca cha yochjayana ora, cha chca echanjama nýe ntšamo chënga tmojamcá jtsónyayëse. “Taita ca” chábioye šmondbuyánayeca, quem luarentše šmochtsiyenëntscuana sempre šmochtsejuabnaye cha nyëtscangbiama más bëtsá yomnana, chë šmojtsama sóyeca chca jtsinýanýayëse. <sup>18</sup> Tšëngaftanga šmondëtatšëmbo, Jesucristo, mo nda ínýengbioye játsebacama crocénana cuafjëtšajocá, tonjanóbana tšëngaftanga játsebacama, chë nyëtca soyënga nýe bonamente jtsamëse oyenentšana, ntšamo jtsiyenama tšëngaftangbe bëts taitángbentšana šmojanatsjinýcá. Cristo ndoñe checmatanatsebacá, yopodena jt-sopochócama soyënga jëtšájuaše, mo crocénana o castellancá, <sup>19</sup> ndayá cachá jóbánëse, chabe uámana buifë juabuáshanëse. Cristo chë ndocna bacna soye ndbomná, tonjanóbana ora enjamna mo canýe oveshatemcá, tondaye ndbemaná, ni tsengana ndbomná, Bëngbe Bëtsábioye jëtšchuayama altaroca obaná. <sup>20</sup> Chama Bëngbe Bëtsá Crístbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entšángbeñe tonjábocna tšëngaftangbe tšabiana. <sup>21</sup> Crístbeyeca, tšëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjábema. Mëntšá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

<sup>22</sup> Tšëngaftanga šmojama ndocna bacna soyënga ainaniñe ntsebmomnana, Jesucristbeyeca catšátangbioye ndegombre jtsababuányeshanama, er tšëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna, sempre nyëtš ainánaca nyëtscanga šmochtsenbobonshana. <sup>23</sup> Bëngbe Bëtsá tojama tšëngaftanga tsëm vida chašmotsebmomnana; pero tšëngaftanga tsëm vida šmontsebmomna, ndoñe nýe quem luarentša entšanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entšanga muantsobena tšabe vida jtsebmomnana y chë palabra ndocna te queochaisopochóca. <sup>24</sup> Ntšamo Bëngbe Bëtsabe uabemana palabrënguifë endayancá:

Nýetca entšanga mondmëna mo shacuancá,  
y chënga imobomna tšabe soyënga, endmëna mo chë shacuanentša uantšëfjushangacá.  
Chë shácuaña jtsanctana y chë uantšëfjushangá jtsatquécjanana;  
entšanga cachcá, nyëtš tempo quem luarentše ndoñe quemochátiiyena;  
<sup>25</sup> pero Bëngbe Bëtsabe palabra nyëtš tempo echanjesomñe ca —chiñe endayana.  
Y chë palabra endmëna chë Jesucristbe tšabe noticiënga, chë buayenánana ntšamo ínýenga tcmojabuayenacá.

## 2

<sup>1</sup> Chcáyecna, nyëtšca tescama šmochtsajbaná nyëtšca bacna soyënga amana, ínýengbioye áingñayana, bacna entšanga chë ntšamo ndegombre šmojuabnacá ndinýinýayënga ntsemnana, ínýengbioye untšabošana, y ínýengbiana uayátšenayana. <sup>2</sup> Mo cabá mora onýnana šešoncá, tša jtsebošana chabe mamabe létsiye, cachcá tšëngaftanga cmontsamna puerte jtsebošana nyëtš tempo Bëngbe Bëtsabe soyënga jtsebmomnana, chë soyëngaca Jesucristbeñe corente chašmotsošbuáchema, y chca, atsebácánënga chašmotsemnana; <sup>3</sup> ntšamo Bëngbe Bëtsabe uabemana palabrënguifë endayancá: “Tšëngaftanga šmojátatšëmbona Bëngbe Utabná puerte tšabia nyëtscángaftaca yomnana ca.”

*Cristo, chë mo aina ndëtšbecá endmëná*

<sup>4</sup> Bëngbe Utabnábioye šmochtobeconá, nda endmëna mo canýe aina ndëtšbecá, ndëmuanyëse tojtsama entšanga tšabe vida chamotsebmomnana. Báseftanga cha tmojtsaboté, mo ntšamo chë ndëtšbëngaca canýe yebna tmojtsejebuana ora, luaroca tmojtsejajó ndëtšbecá; pero Bëngbe Bëtsá chábioye tbojuábuayana, y chabe hominýiñe cha puerte uamaná endmëna. <sup>5</sup> Chábioye šmochtobeconá, tšëngaftanga chë tšabe vida šmojóyëngacñënga, cánýiñe mo aina ndëtšbëngcá, Bëngbe Bëtsabiana jajebuama canýe yebnentšama chašmotsemnana; mo Bëngbe Bëtsabiana bachnangcá chašmotsemnana, nýe Bëngbe Bëtsábioye jtseservénama jtsentšénëse, chábioye jtsatschuanayama. Ntšamo Bëngbe Bëtsábioye jtseservénama šmojtsamcá, chábioye tšabá jtsinýanana, ndayá Jesucristo tojanmama. <sup>6</sup> Chca ndegombre endmëna, er Bëngbe Bëtsabe uabemana palabrënguifë, Bëngbe Bëtsá Jesucristbiana mëntšá tojánayana:  
Smochjinýe, atše sënjama Jerusalenentše canýa chaotsemna,

y cha endmëna mo chë canÿe yebna jajebugamentse chë más bëts uashacuanësentse jajona ndëtsbecá.

Cha atšbe Uabuayaná endmëna, y atšbiama puerte enduámána.

Nda chábeñe tojtsosbuaché, ndocna te nÿe bonamente chábeñe queochátobatmana ca.

<sup>7</sup> Tsëngaftanga, chábeñe ošbuáchiyëngbiama, nda endmëna mo chë yebna jajebugamentse más bëts uashacuanësentse jajona ndëtsbecá, cha puerte enduámána; pero chábeñe ndošbuáchiyëngbiama, entsopasana ntšamo Bëngbe Bëtsabe uabemana palabrënguñie Crist-biama endayancá:

Chë yebna jebuanënga tmonsanaboté ndëtsbé,

mora chë más bëts uashacuanësentse entsejájona ca.

<sup>8</sup> Inÿoca, Bëngbe Bëtsabe uabemana palabrënguñie mëntsánaca chabiama endayana:

Cha endmëna mo ndëtsbé ndayentse jtsjestjiyamcá;

y mo peñescá yomna chënga chamotsótsatšama ca.

Chënga Jesucristo jtsabotena, chabe buayenánana ndoñe ntjoyeunaycá; Bëngbe Bëtsá cabá chca ndopása ora tojanjuabó chca chaotsemnana.

<sup>9</sup> Pero tsëngaftanga šmondmëna Bëngbe Bëtsábeyeca bocacánënga, y mo canÿe rey tmojtseservena bachnangcá, y šmondmëna Bëngbe Bëtsabe entsānga nÿe chabiama jtsetrabájayama, y chë nÿe Bëngbe Bëtsábenga šmomnënga. Y chca endmëna, tsëngaftanga chë bëts soyënga ntšamo Bëngbe Bëtsá tojamcá chašmotsabuyayinama. Cha endmëna nda tcmojáchembo chašmotsajbanama oyenana mo ndoñe binÿniñcá jtsejuabnayëse y jtsamëse, cháftaca jtsemnana chašmotsobenama, chë tsëngaftangbe juabnënga puerte binÿnayaftaca. <sup>10</sup> Tempo tsëngaftanga ni mo cánÿentša entsāngcá ndoñe quešmënjatšmëna, nÿe ujquëshenënga; pero mora, Bëngbe Bëtsabe entsānga šmontsemna; tempo šmonjamna entsānga ndocná tonjānalastemanga, pero mora, Bëngbe Bëtsá aíñe lastemado tsëngaftangftaca entsemna.

#### *Bëngbe Bëtsá jtseservénama jtsiyenana*

<sup>11</sup> Atšbe bonshánënga, ndayentse tsëngaftangbe ndegombre luare yomna, celoca endmëna, y muentse quem luarentse, tsëngaftanga šmondmëna mo inÿoicana ashajñëngcá, y mo canÿe luarëjana nÿe achñëjuanëngcá, cach tsëngaftangbe luaroye átayiñe. Chiyeca cbontsaimpadana, ndoñe chašmondëtsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsepenzëntsiayana, chentse jtsemándayama y Uámama Espiritu ndoñe chaondëtsemándama. <sup>12</sup> Chë Bëngbe Bëtsábioye nduabuatmëngbeñe sempre šmochtsiyena tšabá jtsamëse; chca chënga, masque mora tsëngaftangbe contra imojtsoyebuambná, tsëngaftanga mo bacá uamana entsānga cuaftsemnëngcá, chë tšabe soyënga ntšamo tsëngaftanga šmojtsamcá chamuinÿama, y chca, Bëngbe Bëtsá chëngbioye chaojenonÿinÿé te, chábioye chënga chamotsatschuanama.

<sup>13</sup> Bëngbe Bëtsá šmoyeunanama, nÿetsca entsānga mando bomnëngbioye šmochtsobedecena; chë Romoca bëts mandádbioye, cha chë quem luarentša más uámama puesto jtsemándayama endbómnyeca; <sup>14</sup> y chë tsëngaftangbeñe mandadëngbióynaca, ndëmunyënga cha jichamuana chë bacna soyënga amënga jácastigama, y chë tšabe soyënga amëngbiama tšabá imojtsama ca chamuayanama. <sup>15</sup> Chë mando bomnëngbioye šmochtsobedecena, er Bëngbe Bëtsá endboše tsëngaftanga tšabe soyënga chašmotsamama, chca, chë ndosertánënga chë tsëngaftangbiama podesca ichámënga, ntšamo ndegombre yomncá ntsetatšëmbcá, tondaye chamondëtsebmoma tsëngaftangbe contra jayanama.

<sup>16</sup> Smochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnana ndoñe šmattsejuabnayë nÿe ndaye bacna soye jamama šmojtsobena ca, y nÿe chca šmochjåtama. Más tšabá endmëna jtsiyenana, mo chë Bëngbe Bëtsá imoservenëngcá. <sup>17</sup> Nÿetscangbiama respeto šmochtsobomna, chë Jesucristbeyeca catšátangbioye šmochtsababuánÿeshana, sempre šmochtsiyena Bëngbe Bëtsabiama jtsejuabnayëse cha chë más bëtsá yomnama, y chë Romoca bëts mandado šmochtsesrespetana.

#### *Cristo chabe entsānga tojinÿanÿé ntšamo yomna jasúfriana*

<sup>18</sup> Tsëngaftanga, chë nÿets tempo inÿabiama canÿe yebnentse oservénënga, tsëngaftangbe nduinëngbioye šmochtsayaunana, puerte respeto chëngbiama jtsebmñëse; y ndoñe nÿe chë tšábëngbioye y nÿe tšabá mandbomnëngbioye, ndayá chë bacá mandbomnëngbióynaca. <sup>19</sup> Nderado nda, ntšamo Bëngbe Bëtsá yobošcá jamama bošama, tojboýá chabe nduiño cha chaosufrima tojtsama ora, masque chama jasúfriana ndoñe tbondmëna, chca jamëse, Bëngbe Bëtsá corente tšabá jtsinÿanana. <sup>20</sup> Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtsesufrina, y tša uantadënga chiñe šmojachnëngo, chë soye cocayé Bëngbe Bëtsá



corente tšabá jtsinjanana. <sup>21</sup> Chca cmontsamna, er Běngbe Bětsá tcmojánachembo tšabe soyěnga jamama y chca jasúfriama; chca ndegombre endmēna, er Cristo tšěngafangbiama tonjansufri, y chca cha tcmontaninjanjē, ntšamo jamama cmojtsamna, tšěngafanga chca chašmotsamama. <sup>22</sup> Cristo ndocna te ndocna bacna soye chenáisema, ni ndocnábioye chebnaisengnē. <sup>23</sup> Chábioye tmojtsoyenguá ora, chěngbioye ndoñe ntěyánguanguana. Cha chaosufriama tmonjanma ora, cha ndocá ntjatětsětsnayana jaútajayama, ndayá Běngbe Bětsábeñe jtošbuáchiyēse, chábēñe yojanobátmana. Běngbe Bětsá ntšamo nyětsanga tmojamama tšabá o ndoñe tšabá yonjamna ca yochjayana ora, chca echanjama nyē ntšamo chěnga tmojamcá jtsonjāyēse. <sup>24</sup> Cristo cruciñe tonjanóbana ora, cha tonjansufri chē castigo, chē Běngbe bacna soyěngama cach bēnga šojánamna jasúfriama castigo, bēnga chē bacna soyěnga jamama juabnēngaca ndoñe más mandánēnga chamondětsemnana, y bēnga ntšamo Běngbe Bětsabe bominiñe tšabá yomncá jtsamēse chamotsiyenama. Er Cristbioye chěnga tmonjanlisiá chaóbanama y tonjansufri jobaněntscuana, y chca, bēnga šonjanatsebaca. <sup>25</sup> Er tšěngafanga, tempo Běngbe Bětsábentšana bēnoca šmonjamna, mo ótsēna oveshēngcá; pero mora Cristbe benache šmojtishache, y cha cmontsanjēna, mo oveshēngbe canyē abuañēñacá, y cha entsantjēšna tšěngafanga tšabá chašmotsemnana.

### 3

#### *Ntšamo iuamna chē bouamnēngbioye jtsiyenana*

<sup>1</sup> Cachcá mo chē oservenēngcá, tšěngafāngnaca shémanga, tšěngafangbe boyángbioye šmochtsayaunana, chca, chē Běngbe Bětsabe buayenana soyēnguñe ndošbuáchiye boyángbioye chašmobená jáyēñjanama, Jesucristbeñe chamotsošbuáchema, ntšamo tšěngafanga šmojtсийenama. Ndoñe queochátsiyta chē buayénánama chěnga jatětsětsnayana, <sup>2</sup> er chěnga mochanjinjē tšěngafanga šmojtсийena, Běngbe Bětsá nyětsangbiama más bětsá yomnana sempre jtsejuabnayēse, y ntšamo šmojtsamcá chca yojtsinjinjānyēca. <sup>3</sup> Cach tšěngafangbiama ndoñe mēntšá smattsejuabnayē: “Entšanga atše botamaná tsmēna ca chamotsejuabnama atše nýa mo chca chantenochquēca, chantenóbotamaye ba castellano soyēngaca o ba uámana entšayangá chantichětjo ca”; <sup>4</sup> ndayá chca chaotsemna, ntšamo tšěngafanga chē Uámana Espiritbeyeca mandánēnga jtsemnēse ainaniñe šmojuabnama, cmēbionama y šmobošama; ndocna te ndopochócaye botamanana jtsebmōnna, ainaniñe nyē cach tšěngafanga uámanēnga jenobiamama juabnēnga ntsebmōncá, pero añe ainaniñe tšabe ebionana jtsebmōnēse. Chē soyěnga Běngbe Bětsabe bominiñe puerte enduámama. <sup>5</sup> Tempo chca, chē puerte tšabe shembásēnga, chē Běngbe Bětsabe bocacānguentšēnga, imojanamana jtenóbotamayana; chěnga Běngbe Bětsábeñe imojtsanošbuaché y chábēñe imojanobátmana, y nyětsanga chěngbe boyángbioye imojánayaunana. <sup>6</sup> Chca yojamna Sara, Abrahámioye ibnayēunana y chábioye “Taita ca” ibojanábobuatma. Tšěngafanga Sarabe bembiangcá jtsemnana, tšabe soyěnga šmojtsamēse, y tondayama uatjana šmontsebmōnēse.

<sup>7</sup> Cachcá, tšěngafanga boyanga, cada ona cachabe shémaftaca chaotsiyena, tšabá jtseñeyēunanēse, y cha respeto buajoná chaotsemnana jtsamēse; pero chca, ndoñe nyē cha acbiama más batsá obenana bomná bětsemnana, ndayá Běngbe Bětsá chabiama tšabe juabna yobómnyēca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Běngbe Bětsáftaca jencuéntama totcá chaondětsemnana.

#### *Chē tšabe soyěnga amama jasúfriama yojtsamnēnga*

<sup>8</sup> Y morna, nyětsca tšěngafanga cachcá šmochtsejuabnayē, injēnga šmochtsalastemana, chē Jesucristbeyeca catšátangbioye šmochtsababuánjēshana, injēngbiama chacmóngmiaye, y cada ona chaotsejuabná chē injēnga chabiama más uámanēnga imomna ca. <sup>9</sup> Injēnga tšěngafangbiama ntšamo tcmojaborlá ora, ndoñe smattěchenanguaye; ni chacmojtšēyanguá ora, chěngbioye ndoñe smattoyanguango. Chca játamama cuentna, Běngbe Bětsá šmochjaimpáda, chěngbeñe tšabe bendicionēnga chaotsemnana cha chaomama, er Běngbe Bětsá tcmojáchembo chca chašmotsamama, y Běngbe Bětsábiocana tšabe bendicionēnga chašmoháchíñama. <sup>10</sup> Ntšamo Běngbe Bětsabe uabemana palabrenguñe endayanacá: Nda toboše tšabe vida jěftsebmōnna y puerte oyejuayá tempēnga jtsebmōnna, yejuana chaochtsenojuabná bacna soyěngama ndoñe chaondětsoyēbuambnama, y ndoñe chaondětseboosterama.

<sup>11</sup> Bacna soyēnguentšana chaotsojuánañe y tšabe soyěnga chaotsama, natjēmbana nyětscāngafaca jtsiyenama chaotseboše, y chca chaotsemnana sempre chaotseñtšēna.

<sup>12</sup> Chca bontsemna jamana, er Běngbe Utabná, chabe bominiñe tšabe soyěnga amēngbioye jtsanjanana, chěngbiama sempre jtsantjēšnēse; y sempre chěngbioye jtsayaunana, chábioye ndayámnaca tmojtsotjanañe ora;

pero chë bacna soyënga jamana uamanëngbe contra cha jtsemnana ca —chiñe endayana.

<sup>13</sup> ¿Nda nanjobenaye tsëngaftangbiana bacna soyënga jamana, tsëngaftanga chë tsabe soyënga jamana sempre smojtsentsënëse? <sup>14</sup> Pero masque tsëngaftanga cmojtsamna jasúfriama tsabe soyënga smojtsamama, Bëngbe Bëtsá chama tsabe soyënga cmochántatsataye. Chë tsëngaftanga chašmosufrima amëngbiana ndoñe matauatjëngana, ni ainana tsëtsenánënga ndoñe matsmëñëngana, <sup>15</sup> ndayá ainaniñe sempre smochtsejuabnaye Cristbiana mo Bëngbe Utabnacá y chabiana respeto smochtsebomna; y sempre smochtseprontana jojuama ndëmuanýënga tcmojtsatjaná ndáyeca tsëngaftanga Bëngbe Bëtsábeñe jtsosbuáchiyëse, chabiana ainaniñe smobátmanama. <sup>16</sup> Pero chca smochjama tsabe ainánaca jtsëñýayëse y Bëngbe Bëtsabiana respeto jtsebomñëse. Smochtsiyena tsabá jtsamëse, y chama ainaniñe ndoñe chašmondëtsebomna juabñënga y chamuayana chca ndegombre ndoñe tsabá smontsama ca, chca, ñyënga tsëngaftangbiana podesca chamojtsejuambuabná ora, tsëngaftanga Cristbeñe ošbuáchiyënga quetsomñëcá tsabe soyënga smojtsamama, chënga chamotséuatja chca tmojtsóyeubamnbiana.

<sup>17</sup> Más tsabá endmëna jasúfriana tsabe soyënga tcojamama, nderado Bëngbe Bëtsá chca chaotsemnana tojtsebošëse, y ndoñe chë jasúfriana ndaye bacna soye tcojamama. <sup>18</sup> Er Cristo nýe canýe tonjanóbana bënga bacna soyëngama jáperdonama; chë nýetsca soyënguifñe tsabá amá, chë Bëngbe Bëtsabe bominýiñe ndoñe tsabá yondmëna soyënga amëngbiana, tsëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsbomnbiana. <sup>19</sup> Pero Cristo cháuatayenama Bëngbe Bëtsá cabá ndëma ora, chabe espiritiñe cha tojána chë ndoñe tsabe entšanga imonjamñëngbe espíritënga utámenënga imojamnoye, chëngbiana castigo tojtsemñëntscuana; y cha tojanayëñjanama chënga tojanabuayená. <sup>20</sup> Quem espíritënga bayté entsemna, Bëngbe Bëtsábioye ndoñe monjánëyeunana, Noebe yojétsiyena ora, chë bacna soyënga amënga chca amama chamotsajbanama y tsabe benache chámuatishachama Bëngbe Bëtsá bën yojanobátmana ora, barquësha canduapormantscuana. Chentsana chë barquëshañe báseftanga tmojanotsbocá, posufta entšanga, búyeshe juatsbuacá chë barquësha yojtsámnyayeca. <sup>21</sup> Chë chënga chamótsbocama tojanëjabuache bëjaye, enjamna mo chë mora jenábayama buyeshcá, chca, atsebácanënga bënga chamotsemnana. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtsenóbolimpiana, ndayá bëngbe ainaniñe ndocna bacna juabñënga ntsebomnbiana Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca. <sup>22</sup> Cristo celoye tojtantsjuá y Bëngbe Bëtsabe catsbioica yomna jamándama. Cha endmëna chë amëndayá angelëngbiana y espíritënga mando y obenana bomnëngbiana.

## 4

### *Entšanga entsamna jtsiyenana ntšamo Bëngbe Bëtsá yobošcá*

<sup>1</sup> Chcasna, ntšamo Cristo tojansufricá, chabe cuerpiñe mo entšacá játssetšënëse, tsëngaftángnaca cmontsamna jtseprontánana chca jasúfriama. Er chë Cristbeñe ošbuachiýá nda chabe cuerpiñe tojasufri, chë bacna soyënga amentšana tojsojuañañe, <sup>2</sup> chca, chabe vidiñe, morscana y jobanëntscuana, jétsiyenama ntšamo Bëngbe Bëtsá yobošcá, y ndoñe nýe entšangbe bacna juabñëngaca, nýe quem luarentše tsabá jéftsemnana. <sup>3</sup> Tempo, bayté enjamna, ndayëntscuana tsëngaftanga smonjánama soyënga, mo chë Bëngbe Bëtsábioye nduabuátmënga mondbetsamcá; nýa ndoñe más. Chë tempo, tsëngaftanga smonjaniyena nýetsca bacna soyënga jtsamëse, jenomándama ntsobercá; tsëngaftanga smonjánama soyënga nýe ntšamo smojanbošcá, nýe tsëngaftanga tsabá jtsomñama; smonjanamana jotmenangana y ba fiestënga jtsebomnbiana, y chora chë ójanënga tša jtsetmoyana y tša jtseyoyana, y ba uabouana soyënga smonjanamana jtsamana chë diosënga yojamna ca smojanjuabná soyënga jadórana. <sup>4</sup> Morna, chë Bëngbe Bëtsábioye nduabuátmënga montsenjnaná, tsëngaftanga ya ndoñe más bacna soyënga jtsamëse smojtsiyenama, ntšamo tempo smonjaniyena, ntšamo chënga jtsamëse mondoyena, jenomándama ntsobercá; y chë causa, chënga bacna soyënga tsëngaftangbiana jtsóyeubamnbayana. <sup>5</sup> Pero chënga echanjótocaye jayanama ndáyeca chca tmojamama, chë entšangbiana, chë ainënga y chë ya mojhóbanëngbiana, ntšamo tmojamama, aifñe o ndoñe tsabá bëtsemnana jayanama entseprontanabe delante. <sup>6</sup> Chíyeca, Cristbeñe ošbuáchiyënga, chë mora obanënga imojtsemnënga, ainënga monjamna ora, ñyënga chë tsabe noticiëngama chëngbioye monjanabuayiyiná, chënga chamobenama chë nýetsca tescama yomna tsabe vida chëngbe espítoftaca jtsebomnbiana, ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nýetsca entšanga yojtsamna jóbanama ca.

<sup>7</sup> Ndoñe bayté y nýetsca soyënga echanjopochóca. Chíyeca, tsëngaftanga cmontsamna botamana jtsejuabnbayana y jenomándama jtsoberana, Bëngbe Bëtsáftaca jencuëntama

chašmotsobenama. <sup>8</sup> Njetsca soyëngama, masna, sempre nyetscanga puerta šmochtsenbobonshana, er nda inýenga puerta tojtsababuanýeshaná, sempre jtseprontánana inýenga jáperdonama, chëngbiama bacna soyënga tmojamama. <sup>9</sup> Nyetscanga šmochtsamana tšëngaftangbe yebniñe jenofjana, chca jamama totcá yojtsemna ntjatichamcá. <sup>10</sup> Njetsca tšëngaftanga Bëngbe Bëtsá tcmojatšatá obenana tšabe soyënga jamama; chca, chë obenánaca cmontsamna jtsamana soyënga chë inýengbe tšabiama, chë Bëngbe Bëtsá cmojatšatá nyets obenánaca inýengbiaye jujabuáchama, nyets tempo tšabe soyënga jtsamëse. <sup>11</sup> Nda tojtsabuayiyíná, Bëngbe Bëtsabe palabra chaotsabuayiyíná mo Bëngbe Bëtsá chabijana cuafsoyebuambnacá; nda inýenga tojtsaservena, chca chaotsama chë Bëngbe Bëtsá yojtsama cha chaotsebomnama obenánaca. Nyetsca soyënga ntšamo šmojtsamcá chaotsinýanýná Bëngbe Bëtsá puerta uamaná y obená bëtsemnama, Jesucristbeyeca. Chca šmochtsama, er Bëngbe Bëtsá puerta uamaná endmëna y obenana endbomna nyets tempo y nyetsca tescama. Chca chaotsemna.

*Puerta tšabá endmëna, Cristbeñe tcosbuáchema, jasúfriama tbojtsemnëse*

<sup>12</sup> Atšbe bonshana entsanga, ndoñe šmattsenjnanaye padecena soyënguiñe šmojtsesufrínama; chiñe jtsinýnana ntsachetšá ošbuáchiyana šmobomnama. Chca ora ndoñe šmattsejuabnaye, tšëngaftanga ndoñe cmondamna chca soyiñe jtsachnëjuanana ca; <sup>13</sup> chamna, šmochjóyejuaye chë ntšamo Cristo tojansufrićá šmojtsesufrina ora, chca, Cristo corente obenánaca y uamanacá entsángbeñe chaojtonýná te, tšëngaftanga puerta chašmotsóyejuama. <sup>14</sup> Puerte šmochtsóyejuaye, nderado nda tcmojoyánguango Cristbiana bëtsosevenayeca, er Bëngbe Bëtsabe Espiritu, chë corente bëtšá endmëná, sempre tšëngaftangbe ainaniñe iuëtsemna. <sup>15</sup> Tšëngaftanguentšë ndocná chabondëtsemna jasúfriama inýa óbanaye causa, atbëbanama, bacna soyënga inýengbiama amama, o inýengbe soyënguiñe ontremetënama. <sup>16</sup> Pero Cristbe ustoná tomnama tojasufrić, chama ndoñe chaondëtšéuatj; chamna, Bëngbe Bëtsábíoye chabotsatschuaná, cha Cristbe ustoná bëtsemnama.

<sup>17</sup> Er chë tempo ya tojobuache, Bëngbe Bëtsá jayanama, cach Cristbeñe ošbuáchiyëngbiama, chabe entsángbiama, tšabá o ndoñe tšabá tmonjamama. Chca chca bëngbiama jayanama tojontse, chë chabe palabra ndobedenëngaftaca yochjanopasacá puerta uabouana echántsemna, cha chëngbiama chca chaojayana ora. <sup>18</sup> Y chca, chë Bëngbe Bëtsabe bominýiñe tšabá amabíama ndoñe paselo atsbocaná jtsemnama tontsemnëse, ¿ntšamo yochjopása chë Bëngbe Bëtsábíoye ndoñe adórayënga y chë bacna soye amëngaftaca? <sup>19</sup> Chcasna, chë imosufriñëngaftaca Bëngbe Bëtsá chca yobóseyeca, entsamna chë tšabe soyënga jtsamana y Bëngbe Bëtsabe cucuatšíñe chëngbe espíritu chamoboshjona cha chaotsinýenama, er cha chënga tojánabiama, y nyetsca soyënguiñe tšabe palabra bomná cha endmëna.

## 5

*Cristbeñe ošbuáchiyënga jábuayenama*

<sup>1</sup> Y mora, chë tšëngaftangbentšë ošbuachiyëngcá enefjuanëngbeñe bëtšejëmëngcá amëndayënga chanjabuayená, atše cach tšëngaftangcá bëtšejëma, canýa ntšamo Cristo tonjansufrićá tonjaninýá y chama inýenga tonjanëyana, y canýa ndábíoye cach tšëngaftangcá Bëngbe Bëtsá hochjábema más uamana y bëtšá, Cristo entsángbeñe chaojtonýná ora; tšëngaftanga cbabuayená. <sup>2</sup> Ošbuáchiyënga šmochtsanýena; chënga chašotsanýenama Bëngbe Bëtsá chca tcmojábíama. Chca, chentša ošbuachiyëngbeñe šmochtsama ntšamo canýe tšabe abujënëña chabe oveshëngaftaca endbetsamcá. Bëngbe Bëtsabe trabajo ndoñe šmattsama, nýe cmojtsëtocanama, ndayá chca jamama šmojtsébóseyeca. Chca ndoñe šmatjama nýe paselo crocénana juácanama, ndayá inýengbiaye jujabuáchama tša šmobóseyeca. <sup>3</sup> Chë cmojtsamna jtsanýenama ošbuáchiyënga ndoñe nýe bëtšcá šmattsamëndaye, mo chëngbe nduiñënga cuafjatsmënëngcá, ndayá ntšamo tšëngaftanga šmojtsiyenama, chënga šmochjinýanýe ntšamo yojtsamna jtsiyenana. <sup>4</sup> Chca, chë bënga nyetscanga, mo chë tšabe abujënëñacá šuanýená, quem luaroye yochjésabo ora, mo canýe uabuashinýinýana coronësha ndocna te tontsandbemëšhacá, tšëngaftanga canýe bëtš uacanana soye šmochanjóyëngacñe, y chë soye endmëna nyetsca tescama; Bëngbe Bëtsá uamanënga y bëtšëtšanga cmochanjábíama, cháftaca nyets tempo oyejuayënga jtsemnëse.

<sup>5</sup> Cachcá, tšëngaftanga chë bobontšëngnaca cbabuayená, sempre šmochtsejuabnaye chë bëtšejëmënga tšëngaftangbe amëndayënga imomnama, y chca šmochtsama. Cada ona tšëngaftanguentšá bontsemna jtsejuabnayana chë inýenga tšëngaftangbiama más uamanënga cuafsemncá, inýengbiaye šmojtsaservena ora; er ntšamo Bëngbe Bëtsabe uabemana palabrënguiñe endayancá:

Bëngbe Bëtsá chë nýe cachënga uamanënga tmojtsenobiamnangbe contra entsemna, y chë ndoñe uamanënga montsenobiamnangbiama, Bëngbe Bëtsá más tšabe juabna entsebmomna ca.

<sup>6</sup> Sempre šmochtsejuabnaye Běngbe Bětsá chě más bětsá njetścangbiana yomnama, y njetš mando y obenana bomná yomnama, y chabe delante ndoñe uámaněnga šmattsenobiamnaye, cha más uámaněnga chácmabiamama, chama chě tempo chao-jobuache ora. <sup>7</sup> Njetšca soyěnga ndayama šmuenócochinjēnama Běngbe Bětsabe cucuatšife šmochjáboshjona, er cha tšěngaftanga yejuana cmondánjēna.

<sup>8</sup> Cach tšěngaftanga jenomándama chašmotsobena y sempre šmochtseprontana, er tšěngaftangbe uayayá Satanás, mo canje león tojtsejató, nda jtsósañama tojtsana orcá, chě diablo, sempre jtsebošana jamama, tšěngaftanga Jesucristbeñe ošbuáchiyana chašmotsajbanama. <sup>9</sup> Puerte šmochtomorócha, Jesucristbeñe bětsá jtsóšbuáchiyese, chě uayayá tondaye chaondobená tšěngaftangaftaca jamama, cach tšěngaftangcá Jesucristbeñe ošbuáchiyěnga njetš luarěnguenache cachcá jasúfriama yojtsamnama jtsetatšěmbese. <sup>10</sup> Pero tšěngaftanga baseftayté chašmojasufri chentšana, Běngbe Bětsá cmochanjábiana njetšca soyěnguiñe puerte tšábenga, puerte chašmotsemorochama, bětsá ošbuáchiyana y bonshánana bomněnga jtsemnēse, y ainaniñe corente añemo bomněnga chašmotsemnama; Běngbe Bětsá, chě bēngbiana tšabe juabna bomná, bēnga njetšca tšabe soyěnga šonjatšatá, y nda bēnga šojáchembo njetšca tescama bětsětsanga jtsemnama, chca echanjama. <sup>11</sup> Cha njetš obenana njetš tempo y njetšca tescama chaotsebmoma. Chca chaotsemna.

### *Jtadióšoftanama*

<sup>12</sup> Silvano, ndabiana sěndějuabná atšbiana canje tšabe palabra bomná Jesucristbeyeca catšata yomnama, cháftaca quem base tsbuanácha tcbonjubuábiana. Atše sěntseboše tšěngaftanga añemo jatšatayana y jáuyanana, ndegombre ntšamo tcbonjubuabiamcá yojt-soyebuambná ntšamo Běngbe Bětsá tšabe bendicioněnga cmatšatnama. Chíyeca, sempre šmochjěftsiyena jtsaměse ntšamo chabe tšabe juabna tšěngaftangbiana yomncá.

<sup>13</sup> Ošbuáchiyěnga muentše átšeftaca montsemněnga cmontsacheuaná. Chěnga quem běts pueblentše mondoyena bacá uamana entšángaftaca, mo chě tempo, Babilonia běts puebloca imojoyena entšangcá, pero Běngbe Bětsá muentša ošbuáchiyěnga tojabacacá cach tšěngaftangbioycá. Marcos, chě atšbiana mo uaquiñacá endmēná, chánaca cmontsacheuaná. <sup>14</sup> Njetšcanga Jesucristbeyeca catšatangcá šmochjenchuaye, jtenámochese tša šmojtsenbobonshánama.

Atše, Běngbe Bětsá sěntseimpadana cha chaoma tšěngaftanga chě Jesucristoftaca cánjiñe mo canjácá šmogněnga, njetšcanga ainaniñe tšabe ebionana chašmotsebmoma.

## 2 San Pedro

### *Jacheuayama*

<sup>1</sup> Atše Simón Pedro, Jesucristbe oservená y chabe ichmoná, quem tsbuanácha sentsabiamná tséngafangbiamna, ndémuanýenga smojashjache jtsebmomnama canýe ošbuáchiyana Jesucristbeñe, cach bēngbe ošbuachiyancá uámanana, er Bēngbe Bētsá y Atsebacayá Jesucristo, jtsebošana ndánaca y nyetscanga chábeñe chamotsošbuáchema. <sup>2</sup> Atše sēntseimpadana, tséngafanga Bēngbe Bētsabiamna y Bēngbe Utabná Jesusbiamna cada te más jtsetatšēmbēse, Bēngbe Bētsá chaoma tsabe bendicionēnga tséngafangbeñe chaotsemnana y chaoma tséngafanga ainaniñe tsabe ebionana chašmotsebmomnama.

### *Chē Jesucristbeñe ošbuáchiyēngbe tsabe soyēnga*

<sup>3</sup> Bēngbe Bētsá chabe obenánaca tojama bēnga chamobená jtsebmomnama, lempe ntšamo tmojtsējabotcá tsabe vida jtsebmomnama y jtsiyenama, Bēngbe Bētsá jadórana soyēnga jtsamēse. Cha chca tojama bēnga chábiye chamotsábuatmama tojanma ora. Cha bēnga šojáchembo, cachá obená y uamaná bētsemnana y bēts soyēnga jamēse, chabe entšanga chamotsemnana. <sup>4</sup> Chca, Bēngbe Bētsá šojatšatá ntšamo bēnga jatšatayama tojanašebuachenacá, bēts y uamana soyēnga, chca, quem luarentša bacna soyēnguentšana chašmotsojuánañama. Chē bacna soyēnga quem luarentše jtsebinýnana, entšanga nýe cachēngbe bacna juabnēngaca jtsiyenama yapa boše causa. Chánaca chē tsabe soyēnga šojatšatá, tséngafanga cháftaca cánýiñe mo canýacá chašmotsemnana, cachacá jtsemnana jashjáchése. <sup>5</sup> Chca, ndoñe quenátšmēna nýe Jesucristbeñe ošbuáchiyana jtsebmomnama; chíñe smochjenobuáshjache, bētsá tsabe soyēnga jtsamēse; chora bētsá smochtsama Bēngbe Bētsabe soyēngama chacmotsēsértánama; <sup>6</sup> chora bētsá smochtsama cach tséngafanga jenomándama chašmotsobenama; y chca, tséngafanga masque padecena soyēnguiñe chašmojtsachnējuana, ainaniñe puerta añemo jtsebmomñese, puerta uantadēnga chašmotsemnana; y chentšana bētsá smochtsama, tséngafanga Bēngbe Bētsá šmojtsadoránama jinýanýiyama; y <sup>7</sup> chca, nyetsca tséngafanga ošbuáchiyēnga chašmotsenbobonshana; y chca, nyetsca entšanga chašmotsababuánýeshana.

<sup>8</sup> Tséngafanga lempe chē soyēnga šmojtsebmomna, y bētsá chca šmojtsamēse, smochantsiyena becá oservena soyēnga jtsamēse, y chentšana puerta tsabe soyēnga echantsóbocana, corente tsabá Bēngbe Utabná Jesucristo chašmotsábuatmama. <sup>9</sup> Pero nda quem soyēnga ndoñe tontsama, Bēngbe Bētsabe soyēngama ndoñe ntšosertánana; y chca, cha mo canýe jtaná y nduabinýnacá jtsemnana; cha tbojtsebnatjēmba Bēngbe Bētsá chabe tempsca bacna soyēnga tbojtsebojuánama, y Bēngbe Bētsabe delante cachíñe tsabá chaotsatsmēnana tojamama. <sup>10</sup> Chíyeca, Jesucristbeyeca atšbe catšátanga, nýa smochtsentšena chca tsabe soyēnga jtsamama, y chca, corente tsabá smochanjátatšēmbona, Bēngbe Bētsá chabe entšanga chašmotsemnana tcmojáchembunama y tcmojábacacama; y chca jtsamēse, Jesucristbeñe ošbuáchiyana ndocna te quešmochatajbaná. <sup>11</sup> Chca, Bēngbe Bētsá oyejuayá tséngafangbiamna echanjama, Bēngbe Utabná y Atsebacayá Jesucristbe amēdayoye jamashēnguama ndegombre chašmobenama.

<sup>12</sup> Chcáyecna, atše sēntsejuabná tséngafangbiye sempre chē soyēngama jtsabuayiy-nayana, masque chē soyēngama ya šmotátšēmbó, y tša smojtsošbuaché Bēngbe Bētsabe ndegombre soyēnguiñe y chca šmojtsiyena, chē mora šmojtsetátšēmbó soyēnguiñe. <sup>13</sup> Sēntsejuabná, chajjēftsainēntscuana tsabá yojtsemna jamana, ainaniñe bētsá añemo chašmotsebmomnama chē soyēnga jtsamama, ntšamo tijayancá jtsabuayiyayēse. <sup>14</sup> Atše sēntsetátšēmbó, ndoñe baytese y atšbe ainana Bēngbe Bētsábiye yochtá, ntšamo Bēngbe Utabná Jesucristo šonjētsanbuayenacá; <sup>15</sup> pero bētsá chanjēftsema, atše chajjóbana chentšánēnaca tséngafanga nýets tempo chē soyēngama chašmotsenójuabnama.

### *Cristo corente uamaná y obená yojamnama tmojáninýe ora*

<sup>16</sup> Bēngbe Utabnabe obenanama y cha yochjésabana ntšamo tcbonjanabuatambacá, ndoñe quenjatšmēna entšangbe osertánanaca pormana cuentēngaca, er cach bēnga botamana fsēnjáninýe chabe uámanana y obenana. <sup>17</sup> Bēngbe Bētsá chē Taitá, Jesucristo puerta obenana bomná bētsemnana y cha corente bētsá y uamaná bētsemnana tonjaninýinýe ora, bēnga fsēnjáninýe. Chca fsēnjáninýe Bēngbe Bētsá, chē puerta uamana y bētsábocana oyeubambnayana Jesúbiye mēntšá tbonjaniyana ora: “Mua atšbe bonshana Uaquíná endmēna, atše chabiamna sēntsoyejuá ca.” <sup>18</sup> Cach bēnga chē oyeubambnayana fsēnjanuena, chē celocana tonjanóbocnana, er bēnga Bēngbe Utabnáftaca fsēnjannmēna, chē uamana tjoca.

<sup>19</sup> Chē sóyeca bēnga fsēntsobena corente jtsetatšēmbuana, ntšamo chē Bēngbe Bētsabe juabna oyeubambnayēnga tmojanayancá ndegombre bētsemnana, y tséngafanga

tšabá šmochántsama, ntšamo chënga tmojanayancá šmojtseyeunanëse. Chca, chëngbe palabrëngaca entsopodena Bëngbe Bëtsabe soyëngama tšëngaftanga jinjányiyana, y echántsemna mo canye uajuinýanësha canye ibetiñe luarentse tojtsebinýnacá. Chë soyënga šmochtsuenana Jesucristo yochjësabëntscuana; chora, cha nyëtsca soyënga cmochanjínýanyie, mo tšëngaftangbiana canye tšëm te cuafjabinýncá, y chë jabínýnama ora bínýnaye estrella tojábozna tšëngaftanga jabuabinýnamcá. <sup>20</sup> Pero natsana chacmësertá, ndocna palabra Bëngbe Bëtsabe uabemana palabrënguiñe tojayana canye soye yochjopása ca, cabá chca ndopása ora, nye cach Bëngbe Bëtsabe juabna oyebuambnayëngbe juabnentsana tojanóbocnama; <sup>21</sup> er Bëngbe Bëtsabe juabna oyebuambnayënga ndoñe monjanoyebuambná nye chënga chca jamama innabóseyeca, ndayá Bëngbe Bëtsabe cuenta tmojanoyebuambá, chë Uámana Espíritu chënga chca chamóyebuambama tojánmayeca.

## 2

*Chë ndoñe ndegombre soyënga buátëmbayënga  
(Jud 4-13)*

<sup>1</sup> Chë Bëngbe Bëtsabe juabna oyebuambnayëngbe tempo, Israeloca entšángbeñe baseftángnaca imojamna, ndëmuanyënga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe abuátambayënga mochántsemna, y chënga ndoñe ndegombre soyënga mochántsabatambaye, pero ndegombre soyëngaca cányíñe, chca, chënga chca imojtsabuátambama entšanga ndoñe chamondétatsëmbonama. Chë buátëmbana soyënga echanjama, entšanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsabatambaye soyëngaca, mochántsama Jesucristo ndoñe chëngbe Utabná chaondëtsemnama, cha nda chënga tojatsebacá, mo nda inýenga játsebacama crocénana cuafjëtšajocá. Y chca, nye ndeolpe, chë Bëngbe Bëtsábiocana uabouana castigo nyëtsca tescama mochántsebmna. <sup>2</sup> Banga chëngbiyoye mochantsësetona, nyëtsca bacna soye, jenomándama ntšobencá jtsamëse; y chëngbe causa, inýenga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama. <sup>3</sup> Chënga bëtscá crocénana jtsebmnama yapa mochántseboše causa, ba bostero soyëngaca cmochántsangñaye; pero Bëngbe Bëtsá tempo chëngbiana tojánayana, ndoñe tšabá imojtsamama y chëngbiana castigo nyëtsca tescama chaotsemnámnaca.

<sup>4</sup> Bëngbe Bëtsá chë bacna soyënga tmojanma angelëngbiyoye ndoñe tonjanaperdoná, ndayá infernoye tojtсанатse y puerta ibetiñe tojtсанабáshejuana, chë uabouana thoca chamoquedama, Bëngbe Bëtsá chëngbiana nyëtsca tescama castigo chamotsebmnama yochjayana orscama. <sup>5</sup> Y cach ndoñe quem luarentša entšángbiyoye tonjanaperdoná Noé yojëtšiyena ora, y chënga jácastigama aíñe tojanma chë uabouana uaftena chëngbeñe chaotsemnama, chë nduauenana y bacna entšanga jtsapochócama. Chentsána, nye Noébiyoye, tbojanatsbocá, nda entšanga yojanabuayiyá ntšamo jtsiyenana, Bëngbe Bëtsabe bominyíñe tšabá yomncá jtsamëse; cha y inye canýsëftangnaca tojanatsebacá. <sup>6</sup> Bayté entsemna, Bëngbe Bëtsánaca tojánayana chë Sodoma y Gomorra bëtš pueblentša entšanga, yapa bacna entšanga imojamnana, bëtš castigo jtsebmnama yojánamama; y íñesheca tojtсанapochocá, chë pueblënga y chentsa entšanga jatinyá jtsabiamëntscuana. Y chë sóyeca Bëngbe Bëtsá tojaninýanyé ntšamo bacna entšángaftaca yochjama, chë chentsana mochtsiyena bacna entšangbiana. <sup>7</sup> Pero Bëngbe Bëtsá Lótbodye tbojanatsbocá, chë bëtš pueblënga pochócaýentsana. Cha yojamna Bëngbe Bëtsabe bominyíñe tšabá amá, y ntšamo chë luarentša entšanga imojaniyenama, nyëtsca bacna soye jtsamëse, jenomándama ntšobencá, cha puerta ngménana inabomna. <sup>8</sup> Er quem tšabe entšá, chëngbeñe oyená, chë entšanga imojtsama bacna soyënga cada te yojanonýaye y yojanuenana ora, puerta chabe tšabe ainaniñe inasufrina.

<sup>9</sup> Chca, Bëngbe Utabná endobena chë Bëngbe Bëtsábiyoye adórayënga játsebacana pade-cena soyënguentsana y bacna soyënga jamama juabnënguentsana, y chë bacna soyënga jamama uamanëngna castigánënga jtsabamnama, chë ntšamo chënga imojaniyentëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nyëtsca tescama chë bëtš castigo chamotsebmnama jamándama. <sup>10</sup> Chca ndegombre endmëna, y más chë ndëmuanyënga nye cachëngbe cuerpëngama bacna juabnëngaca jtsamëse imoyenëngbiana, chënga chë Bëngbe Utabnabe mando jtsaboténana. Chënga bacá buátseanënga mondmëna y jtsebošana nye ntšamo cachënga tmojtsejuabnacá chaotsemnama, y ndoñe ntsauatjana chë espíritënga obenana bomnëngbiana puerta bacna soyënga jtsóyebuambnayama. <sup>11</sup> Chamna chë angelënga, masque más añemo y obenana bomnënga mondmëna, ndoñe jenñëmuana chë espíritënga obenana bomnëngbiana chca jayanama, chëngbiana ndoñe tšabe soyënga jtsóyebuambnayëse, Bëngbe Utabnabe delante.

<sup>12</sup> Pero chë buátëmbayënga, chë cachënga ndoñe tontsësertana soyëngama puente bacá jtsóyebuambnayana, y chca, chënga mondmëna mo tja bayëngcá, soyënga tsábá josértama juabna ndbomnënga; chënga jtsiyenana nÿe ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye. <sup>13</sup> Chënga mochanjasúfria, ínÿyënga chamosufrima tmojama causa. Chëngbe oyejuayana endmëna nÿe chora chënga tsábá jtsemnana soyënga. Tsëngaftangataca cánÿiñe mo ošbuachiyëngcá tmojtsesá ora, tsëngaftangbiama ouatjca jtsemnana y chëngbe causa, ínÿyënga tsëngaftangbiama podesca mochántsuchamo, er chënga chentše oyejuayënga jtsemnana, nÿe chënga tsábá jtsemnana jtsamëse; y chënga tsëngaftangbeñe jtsemnana, tsëngaftangbioye jtsaíngñase.

<sup>14</sup> Chënga ndoñe ntsoobenana canÿe shembása jinÿana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿe batšá ošbuáchiyana bomnënga jtsaíngñayana, y sempre jtsentšénana nÿe más soyënga jésebošama y jésebonnana, ínÿyënga tmobomnana más soyënga jashjáchama; chënga montsemna pochocánënga jtsemnana. <sup>15</sup> Chënga chë tsábe benachentsana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyeuambnayá Balaamcá, cha ndoñe tsábá tonjanma orcá; Balaam Beorbe uaqiñá. Cha yapa inaboše bëtscá crocénana juácana inÿyëngbiama bacna soyënga jtsamëse; <sup>16</sup> y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsétsama jamëse; y chca, ndoñe tbonjanlesencia jama chë ndocna juábnaca soye jamama.

<sup>17</sup> Entšanga jtsobátmanana chënga bëtscá tsábe soyënga chamotsamama, pero chë tmojtsama soyënga tondayama ntsooservénana, y chca, chënga jtsemnana mo búyeshe obocantše tojtsebuashjá; y chënga mora canÿe soye jtsējuabnayana y chentšana inÿetšá; chca chënga jtsemnana mo jantšetšëhënga bëtš binÿiaca bonjnëshëngcá. Chëngbiama Bëngbe Bëtsá tojayana castigo chamotsebonnana, chë más ibetoca, tondaye binÿiñe luarentše. <sup>18</sup> Chënga ba botamana palabréngaca jtsenábotamnayana, pero tondayama ntsooservénana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtsábioye nduabuátmënga imoyencá jtsiyenama imojtsajbanaga. Chë buátëmbayënga chë soye jtsamana, chëngbioye jáyëñjanase, nÿe cachënga tsábá jtsomñama bacna juabnëngaca soyënga chamotsamama, cachënga jenomándama ntsoebencá. <sup>19</sup> Chë abuátambayënga jásebuachenana tsábe vida jónÿenama, nÿe ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnëngaca mandánënga, y chca, chënga montsajna pochocánënga jtsemnana, er ndaye entšánaca mandaná jtsemnana, chë nÿets tempo tobedecena sóyeca. <sup>20</sup> Er ndëmuanyënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nÿe quem luarama enójuabnaye entšangcá, nÿetsca bacna soye amana y tša bacna juabnënga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnëngaca, chënga mora más bacá tempscama jabocanana. <sup>21</sup> Chëngbiama más tsábá manjanma ndoñe ntjobenayana jtsatšëmbuana ntšamo Bëngbe Bëtsabe bominÿiñe tsábá yomncá inétsamama, chë soye jatabuátmanana y chentšana játajbanana chë buátëmbana soyënga y chë abuayinayëngataca chëngbioye Bëngbe Bëtsá tojanoye mandënga jtsoebedecénana. <sup>22</sup> Pero chëngaftaca tojopasá ntšamo entšanga mondëntšayancá chca ndegombre bëtsemnana: “Chë queše chabe ashconánana tojtsemnoye jeshéconana ca” y “chë cotše cabá chora bebená, ngüichetsoye jana jetsójanuouoyama ca”.

### 3

#### *Jesucristo quem luaroye jésabama ora*

<sup>1</sup> Jesucristbeyeca atše bonshana catšátanga, móraca ya uta soyama cbontsëbuabiamná. Quem uta tsbuanáchaca atše sënjábošena jamama tsëngaftangbe juabna nÿe ena tsábe soyëngaca chaotsemnana, y chca chaotsemnamna atše jtsabuayinayëse chë tmojanabuatambá soyëngama. <sup>2</sup> Atše sëntseboše tsëngaftanga chašmotsenojuabná, ntšamo chë inÿe tempënga ora, chë nÿe Bëngbe Bëtsábioye jtsoservénëse, chabe juabna oyeuambnayënga tmojánayanama, y chë Bëngbe Utabná y Atsebacayabe buátëmbana soyëngama y mandëngama, ndayá chabe ichmónëngaftaca tsëngaftanga šmojanóyëngacñe.

<sup>3</sup> Pero masna quem soye chacmotsësertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyena nÿe cachënga tsábá jtsomñama bacna juabnëngaca, y cmochantsëbuayajuana, chë Cristo yochjésabama šmošbuáchemá. <sup>4</sup> Chënga mëntšá mochántsuchamo: “Cristo tmojanasebuachená quem luaroye jésabama. ¿Ndegombre chca? Chcase, ¿ndayentše cha yojtsemna? Bëngbe bëtšétsanga, ndëmuanyëngbioye cha tojanašebuachená quem luaroye jésabama, ya tmonjóbana, y quem

luarentše lempe cachcá endesomñe, ntšamo quem luare tojanobojatšé orscana enjamncá ca.”<sup>5</sup> Chê entšanga ndoñe ntsebošana jtsejuabnayana ya bayté yojtsemna, Bèngbe Bètsá tojanmandá y chca tojanma celoca y quem luare chaotsemnana. Cha quem luare tojanma búyeshentšana y búyesheca;<sup>6</sup> y cach búyeshecnaca, chê uabouana uafteentša béjeyeca, ya bayté yojtsemna, cha lempe quem luarentše yojanbinýncá tojtsanpochocá.<sup>7</sup> Pero chê mora entsemna celoca y quem luare, cach Bèngbe Bètsabe mándoca, ndoñe quenátopodena chamotseepochocama, chê Bèngbe Bètsá jayanama chábioye ndoñe mondadoránènga ntšamo tmojamcá ndoñe tsabá yonjamnana, y chê bacna soyènga tmojamama nyètscá tescama castigo chamotsebonnana jamándama tempo candóshjanguèntscuana. Chora Bèngbe Bètsá, celoca y quem luare ifñesheca echantseepochóca.

<sup>8</sup> Pero, atšbe bonshánènga, canye soye endmèna y chê soye ndoñe chacmondébnètjomba: Bèngbe Utabnabe juabnama, canye te endmèna mo canye uaranga uatcá, y canye uaranga uata mo canye teca.<sup>9</sup> Ndoñe quenátsmèna, ntšamo báseftanga jtsejuabnayana, ntšamo tojašebuachenacá cha ndoñe betsko yochanjama ca, chê cha quem luaroye jésabama, ndayá chana puerte uantado tsèngaftangaftaca comna; er cha jtsebošana ndocná nyètscá tescama castigo chaondétsebonnana, ndayá nyètscanga bacna soyènga amana jtsajbanase, Bèngbe Bètsabe tsabe benache chamuashjáchama.

<sup>10</sup> Pero Bèngbe Utabná echanjésabo ndocná chama chaondétsejuabná ora, mo canye atbèbanacá jashjanguana, ndocná chama tontsejuabná ora. Chora celoca echanjopochóca, canye jabuache shauenanáncá, y quem luare ndaye soyènguentšana yomnana ifñesheca echántsefjatéjo, y ndayá Bèngbe Bètsá y entšanga quem luarentše tmojamcá, lempe echántsejuinýe.

<sup>11</sup> Lempe chca japochócama entsémnayeca, ndegombre tsèngaftanga cmontsamna jtsiyenana ntšamo chê Bèngbe Bètsabe entšanga jtsiyenana entsamncá, y nyètscá tempo jtsamése chê Bèngbe Bètsábioye jtsatschuanayama yomna soyènga,<sup>12</sup> tsèngaftanga chê Jesucristo quem luaroye jésabama chaóshjanguama šmojtsobátmanèntscuana; y nýa šmochtseentšana cha más betsko cháuesabama. Chê te ifñesheca celoca echántsejuinýe, y ndaye soyènguentšana quem luare yomnana cach ifñesheca echántsefjatéjo.<sup>13</sup> Pero bènga mondobátmana ntšamo cha šojašebuachenacá: canye tsém luare, mo canye tsém celoca y tsém fshantscá, y chentše nyètscanga mochantsiyena ntšamo Bèngbe Bètsabe bominyíñe tsabá yomncá jtsamése.

<sup>14</sup> Chiyeca, atšbe bonshánènga, chê soyènga chaotsemnana šmojtsobátmanèntscuana, nýa chiñe šmochtseentšana, chca, cha yochjésabo ora, chacmanyena oyeniñe tsabá Bèngbe Bètsáftaca jtsatsmèñese, inýengaftaca natjèmbana jtsiyenése; chacmanyena ainaniñe ndocna bacna soye ndbomnènga, y puerte tsabá jtsamése oyeniñe; chca, ndocná chaondobená jayanama tsèngaftanga ndaye bacna soye šmojama ca.<sup>15</sup> Quem soye šmochtsejuabnaye: Bèngbe Atsebacayá ndoñe yapa betsko tonjésabèšna, chca jtemnana cha puerte uantado nyètscángaftaca yómnayeca; chca cha yomna, ba entšanga chê bacna soyènga amana chámajbanama y chabe benache chámuatishachama y chca, atsebácanènga chamotsemnana. Cach quem soyèngámncá, Jesucristbeyeca bèngbe bonshana catšata Pablo tcmontanèbuábiana, chê Bèngbe Bètsá tojanma cha chaotsebonnana osertanánaca.<sup>16</sup> Chê soyèngama, Pablo nyètscá chabe tsbuanáchangañe tonjanoyebuambá. Chèchangañe endmèna soyènga totcá josértama; y chê soyèngama, chê Bèngbe Bètsabe soyèngama ndoñe tmonjuatsjínýènga, y chê mora canye soye jtsejuabnayana y chentšana inýetšá juabnayènga, jtsejuabnayana y inýengbioye jtsabuayinyayana ndoñe ndegombre yondmèna ca. Y cachcá jtsamana inýe soyèngaca, Bèngbe Bètsabe uabemana palabrènguiñe. Chca chènga montsajna pochocánènga jtsemnana.

<sup>17</sup> Chiyeca, atšbe bonshánènga, tsèngaftanga chê ya šmojtsetátšèmba chê ndoñe ndegombre soyènga abuatambayènga mochtsemnana, yejuana šmochtsantješna; chca, chê Bèngbe Bètsá ntšamo yomandacá ndobedecenèngbe soyèngaca inýenga jáingñama, tsèngaftanga ndoñe chašmondétsemna mo uambanèngcá, ndoñe chašmondétsajbanama jtsebonnana chê Bèngbe Bètsabe soyènga ntšamo šmojashjachcá.<sup>18</sup> Pero atšna, Bèngbe Utabná y Atsebacayá Jesucristo sèntseimpadana, tsèngaftanga chašmotsiyena jtsamése, chê chábenšana šmojóyèngacñe ba soyènga ntšamo tomnana jtsejuabnayése, y chaoma tsèngaftanga cada te más tsabá cha chašmotsábuatmama. ¡Nyètscanga cha chamotsatschuaná, mora y nyètscá tescama! Chca chaotsemna.



## 1 San Juan

*Cristo, chë nyetsca tescama yomna tsabe vida entsanga chamotsebmomnama amá*

<sup>1</sup> Bënga cbontsëbuabiamná chë Bëngbe Bëtsá ndabiajana inétsoyebuambnabiamna, chë nyetsca tescama yomna tsabe vida entsanga chamotsebmomnama iuamabiamna, chë Bëngbe Bëtsá cabá quem luare ndëma orscana ya yojamnabiamna. Bëngbe matscuašëngaca chabe oye-buambnayana fsënjouena y bëngbe bomínýeca cha tonjama soyënga fsënjinyë. Aíñe bënga cha fsënjinyë y bëngbe cucuatšeca fsënjábojajo. <sup>2</sup> Cha bëngbentše tonjanonýná y fsënjáninyë; chíyeca bënga chabiamna cbontsëtsëtsná y cbontsabuayiyiná, nda sempre vida yobomna y nda chë nyetsca tescama yomna tsabe vida entsanga chamotsebmomnama iuama. Chana, chë Taitá Bëngbe Bëtsáftaca inamna, pero mora bëngbioye sojinýanyé. <sup>3</sup> Bënga tsëngaftanga cbontsabuayiyiná ntšamo tifjinyë y tifjouencá, tsëngaftanga cánýiñe mo canýacá bëngaftaca chašmotsemnana. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaqiñá Jesucristoftaca. <sup>4</sup> Bënga quem soyënga tsëngaftanga cbontsëbuabiamná, bëngbe oyejuayana corente bëtscá chaotsemnana.

*Bëngbe Bëtsá endmëna chë entsangbiamna binýnayá*

<sup>5</sup> Mëntsá entsemna ntšamo Jesucristbentsana tifjouencá y chca tsëngaftanga cbontsabuayiyiná: Bëngbe Bëtsábeñe lempe binýniñe, lempe tsábá endmëna, y chábeñe tondaye ndoñe chca quenátsmëna. <sup>6</sup> Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatšíñe, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá. <sup>7</sup> Pero bënga chë binýniñe tmojtsiyena, tsabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaqiñá Jesucristbe uabuáshanana buíñeca, Bëngbe Bëtsá bëngbe bacna soyënga sempre šochántsabuanayane, y echanjama bënga chabe delante tsábá chamotsatsmënama.

<sup>8</sup> Bënga bacna soyënga ndoñe queftsátšomna ca tmojtsichámëse, chca cabënga jt-senoíngñayana y ainaniñe chë ndegombre soyënga ndoñe tmonjóyëngacñe; <sup>9</sup> pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanyíye cachá chë ntšamo šojiytsašebuachecá amá y nyetsca soyënguñe tsábá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye. <sup>10</sup> Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe bostero cuaftsemncá, y ntšamo Bëngbe Bëtsá bënga sojauyancá ainaniñe ndoñe tmonjóyëngacñe.

## 2

*Cristo, bëngbe obuauyayá*

<sup>1</sup> Tsëngaftanga mo atšbe basengcá, er atše tcbonjanëjabuache Jesucristbe tsabe noti-ciënguñe chašmotsošbuáchema, quem soyënga cbontsëbuabiamná bacna soyënga ndoñe chašmondëtsamama. Pero ndánaca Cristbeñe ošbuachiyënguentšá bacna soye tojamëse, bënga canýe obuauyayá Bëngbe Bëtsabe delante montsebmomna, y cha endmëna Jesucristo, chë nyetsca soyënguñe tsábá amá. <sup>2</sup> Jesucristo tonjanóbana ndoñe nye Bëngbe Bëtsá bënga chášuaperdonama bëngbe bacna soyëngama, ndayá quem luarentša nyetsca entšángnaca chëngbe bacna soyëngama cháuaperdonama.

<sup>3</sup> Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatšëmbo bënga cha imuábuatmama. <sup>4</sup> Pero nda tojyana: “Atše Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canýe bostero jtsemnana y ainaniñe chë Bëngbe Bëtsabe ndegombre soyënga ndoñe tonjóyëngacñe. <sup>5</sup> Pero nda ntšamo Bëngbe Bëtsá ibuamëndacá tojtsama, jtsinýanyayana chabe ainaniñe Bëngbe Bëtsabiamna corente bonshánana yomnama, y chca, mochántsetatšëmbo bënga sempre cánýiñe mo canýacá cháftaca imomnama. <sup>6</sup> Nda tojtsichamo Bëngbe Bëtsáftaca cánýiñe mo canýacá yojtsemna ca, bontsemna jtsiyenana soyënga jtsamëse ntšamo Jesucristo yojétsiyencá.

*Canýe tsëm mando*

<sup>7</sup> Atšbe bonshana entsanga, ntšamo mora cbontsëbuabiamnacá, ndoñe canýe tsëm mando quenátsmëna, pero aíñe canýe tempsca mando; entsemna cach tsëngaftanga Cristbe ústonënga šmonjanobiama ora šmonjanóyëngacñe mando. Quem tempsca mando entsemna ntšamo tsëngaftanga bëngbentsana šmonjouencá. <sup>8</sup> Pero masque chca endmënëse, quem cbontsëbuabiamná soye tsëngaftangbiamna echántsemna mo canýe tsëm

mandacá. Cristo enjëftsiyena ntšamo quem Bëngbe Bëtsabe mando ndegombre yomncá y tšëngaftángnaca cachá šmondoyena, er chë bacna juabnënga jtsebmnnëse mo ibetiñcá jtsiyenana tempo ya echanjochnëngo, y chë entsangbe juabna ndegombre binýnayá ya entsebuashinýinýana.

<sup>9</sup> Nda tojayana chë binýnayáftaca yojtsemna ca, pero cha chabe catsátbioye tbojtsáboyënja, cha cabá tempcá, bacna juabnënga jtsebmnnëse yojtsiyena, mo ibetiñcá. <sup>10</sup> Nda chabe catsátbioye tbojtsebobonshana, cha chë binýnayáftaca jtsiyenana, y tondaye queochátsmëna cha bacna soye chaotsamama. <sup>11</sup> Pero nda chabe catsátbioye tbojtsáboyënja, cha bacna juabnënga jtsebmnnëse jtsiyenana, mo canýa ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebmnnëse jtsiyenana chábioye ndoñe ntjalesénciana ntšamo tsábá yomncá chaotsamama.

<sup>12</sup> Básenga, atše cbontsëbuabiamná Bëngbe Bëtsá tšëngaftangbe bacna soyënga tcmojáperdonama, ndayá Jesús tojanma sóyeca. <sup>13</sup> Taitanga, tšëngaftanga cbontsëbuabiamná, er tšëngaftanga ya šmonjuábuatmana chë quem luare jobojátsama orscana ya inamná. Tšëngaftanga bobontšëgnaca cbontsëbuabiamná, er tšëngaftanga ya chë nyetsca bacna soyënga mandayá Satanás šmonjayëñjaná.

<sup>14</sup> Básenga, tšëngaftanga tcbonjubuábiana, er tšëngaftanga chë Taitá ya šmonjuábuatmana. Taitanga, tšëngaftanga tcbonjubuábiana, er tšëngaftanga ya šmonjuábuatmana chë quem luare jobojátsama orscana ya inamná. Bobontšënga, tšëngaftángnaca tcbonjubuábiana, er tšëngaftanga bëtscá añemo ainaniñe šmambá, y Bëngbe Bëtsabe palabrama sempre tšëngaftangbe ainaniñe šmondëjuabná, y chë nyetsca bacna soyënga mandayá šmonjayëñjaná.

<sup>15</sup> Ndoñe matsbošana oyejuayënga jtsemnana nýe quem luarentša soyëngaca, ni nýe chë soyënga jtsebmnnama. Nda yapa tojtseboše quem luarentša bacna soyënga jtsebmnnama, cha ndoñe chë Taitábioye bondbobonshana. <sup>16</sup> Er chë nýe quem luarama enójuabnayënga mënšá juabnënga mondbomna: yapa jtsebošana jtsebmnnama ntšamo chë ainaniñe bacna juabnënga bomnënga mondbetsebošcá; yapa jtsebošana nýe ndayá tmojatinýe soye; y yapa jtšenábotamnyana chë tmbomna soyëngama. Chë juabnënga Bëngbe Bëtsábocana ndoñe ntsóbocanana, ndayá nýe chë quem luarama enójuabnayëngbentšana. <sup>17</sup> Pero quem luare echanjopochóca y nyetsca chentša soyënga, chë entsanga bacna juabnëngaca yapa imoboše jtsebmnnama soyëngnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tsábe vida echántsebmnná.

### *Chë Cristbe contra yomná*

<sup>18</sup> Básenga, quem luare jopochócama tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imonnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama. <sup>19</sup> Chënga cach bëngbentšana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmëñjoquedanga. Pero chca tonjopasá, ndegombre jtsoatšëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchemá.

<sup>20</sup> Pero Cristo, chë Uamaná, tšëngaftanga tcmonjabacacá, y cha tonjama chë Uamana Espíritu tšëngaftangbe ainaniñe cháumashënguama; y nyetsca tšëngaftanga chë ndegombre soyënga šmondétatšëmbo. <sup>21</sup> Atše cbontsëbuabiamná, ndoñe chë ndegombre soyëngama ndoñe šmondétatšëmbuama, ndayá aife šmotatšëmbuama; er tšëngaftanga šmondétatšëmbo chë ndegombre soyënga y ndoñe ndegombre soyënga cánýiñe jtsemnana ndoñe yondopodénama. <sup>22</sup> Nda tojayana Jesús chë Bëngbe Bëtsabe Uamana Uabuayaná, chë Cristo ndoñe yondmëna ca, chana jtsebmnnana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiana ndoñe ntsejuabnayana cha chë Taitá bëtsemnana. <sup>23</sup> Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cánýiñe mo canýacá ndoñe ntsemnana. Pero nda entsangbeñe tojayana, Cristo aife Bëngbe Bëtsabe Uaquiñá endmëna ca, chana aife chë Taitáftaca cánýiñe mo canýacá jtsemnana.

<sup>24</sup> Tšëngaftanga, chë Cristbe ústonënga šmojanóbiana orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cánýiñe mo canýacá šmochántsemna. <sup>25</sup> Y quem soye entsemna ntšamo Cristo šojëtsašebuachená: chë nyetsca tescama yomna tsábe vida jtsebmnnana.

<sup>26</sup> Atše chca cbontsëbuabiamná, chë tšëngaftanga jáingñayama imojtsebošëngbiama chašmotsetatšëmbuama. <sup>27</sup> Pero Cristo tcmojanabacacá ora, Uamana Espíritu šmojanóyëngacñe, y mora tšëngaftangbe ainaniñe Uamana Espíritu šmontsebmnná, y ndoñe quenátsiya ndocná más chacmotsabuátambama, er chë Uamana Espíritu lempe cmontsabuatambá; y cha endabuátambá ndegombre soyënga, y boistero soyënga ndoñe.

Měntśá, ntśamo chě Uámana Espíritu tcmojabuatambacá jtsiyeněse, Crístoftaca cányiñe mo canyácá šmochtsemna.

<sup>28</sup> Y mora básenga, Crístoftaca cányiñe mo canyácá šmochtsemna, chca, cha chaojabáisebocna ora, chábene jtsošbuáchiyěse, bēnga añémoca chamotsemnama y ndoñe chamondětšēuatjama, bēnga chabe delante chamojtsemna ora. <sup>29</sup> Tšēngaftanga šmontsetátšēmo Jesucristo nyetsca soyēnguñe tśabá amá yomnama. Chcasna, cmontsamna jtsetatšēmbuana, nyetscanga ntśamo Bēngbe Bětsá yoboščá tmojtsamēngna, Bēngbe Bětsabe básenga imomnama.

### 3

*Crístbene ošbuáchiyēnga, Bēngbe Bětsabe básenga*

<sup>1</sup> Menójuabonga, ntsachetśá Bēngbe Bětsá chě Taitá šondábabuanjeshanama. Chabe bonshánana tśa bētsá endmēnayeca, bēnga šondēubabuatma chabe básenga ca, y ndegombre bēnga chca mondmēna. Chě causa chě nye quem luarama enójuabnayēnga ndoñe quenátšertana ntśamo bēnga imomnama, er chēnga cha ndoñe tmonjanábuatmana. <sup>2</sup> Atśbe bonshana entśanga, mora bēnga ya Bēngbe Bětsabe básenga montsemna. Y masque cabá ndoñe quemuatstatšēmo ntśamo más chcoye bēnga mochjamnama, aifñe mondětātšēmo, Jesucristo chaojabáisebocna ora bēnga cachacá mochtsemnama, er bēnga mochanjobenaye jinýama ntśamo cha ndegombre yomncá. <sup>3</sup> Y nda chca chábene puerte jtsošbuáchiyěse tojtsobátmana, bacna soyēnga amana jtsajbanana, más tśabia jtsemnama, ntśamo cach Cristo yomncá, lempe tśabia y bacna soye ndbomná.

<sup>4</sup> Pero nda bacna soye tojama, chana ntśamo Bēngbe Bětsá tojēftsemandacá jtsaboténana; er bacna soye jamana endmēna, jtsabotena ntśamo Bēngbe Bětsá tojēftsemandacá. <sup>5</sup> Tšēngaftanga ya šmondětātšēmo Jesucristo quem luaroye tojánabo bēngbe bacna soyēnga jabětsabuanajama, y cha ni mo canye bacna soye ndoñe yondbomnama. <sup>6</sup> Chcasna, nda cányiñe mo canyácá cháftaca nyets tempo tojtsemna, ndoñe ntsiyenana bacna soyēnga jtsamēse. Pero nda tojtsiyena bacna soyēnga jtsamēse, Jesucristbiana ndoñe tbonjosertá y ndoñe yondětātšēmo ntśamo cha bētemnama. <sup>7</sup> Atśbe básenga, ndocná chacnondaingñe: nda nyetsca soyēnguñe tśabá tojtsama, cha canye tśabá mándbomna entśá jtsemnana, ntśamo Jesucristo yomncá; <sup>8</sup> pero nda tojtsiyena bacna soyēnga jtsamēse, chabe ainaniñe Satanás jtsemándayana, er Satanás quem luare jobojátśama orscana bacna soyēnga iuětsama. Bēngbe Bětsabe Uaquiñá nýa quem soyama tojabo: chě Satanásbe soyēnga jabětsepochocama.

<sup>9</sup> Ndocná Bēngbe Bětsabe uaquiñá tojtsemná jtsiyenana bacna soyēnga jtsamēse, er cha jtsebmomnana chě Bēngbe Bětsá tojuántśame tśabe vida, y Bēngbe Bětsá chabe Taitá endmēna. Chiyeca cha ndoñe ntsiyenana bacna soyēnga jtsamēse. <sup>10</sup> Corente jtsotatšēmbuana ndēmuanjēnga Bēngbe Bětsabe básenga imomnama y ndēmuanjēnga Satanásbe básenga; ndēmuanjēngnaca ntśamo tśabá yomncá ndoñe tmontsama o chabe catśata ndoñe tmontsebobonshana, ndoñe ntsemnana Bēngbe Bětsabe básenga.

*Nyetscanga jtsenbobonshánana*

<sup>11</sup> Quem buayenana entsemna ntśamo tšēngaftanga šmojanuena, tšēngaftanga Cristbe ústonēnga šmonjanobiama orscana: nyetscanga šontsamna jtsenbobonshánama. <sup>12</sup> Ndoñe Caincá muatjama. Chabe ainaniñe Satanás yojamánda, y chiyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tśabá yonjánama; chabe uabentsana aifñe; chiyeca tbojtsanóba.

<sup>13</sup> Jesucristbeyeca atśbe catśátanga, ndoñe šmattsenjnanaye chě nye quem luarama enójuabnayēnga cmojtsēbuayēnjama. <sup>14</sup> Bēnga mondětātšēmo, bēnga tempo monjanienana chě nye quem luarama enójuabnayēnga mondoyencá, y chca, Bēngbe Bětsabiama mo obanēngcá monjamna, er bēnga monjanienana ntśamo Bēngbe Bětsá ndoñe yondēmandacá. Pero Bēngbe Bětsá tonjama mora bēnga tsēm vida chamotsebmomnama, y chca, mo ndegombre ainēngcá montsemna. Chca mondětātšēmo, er bēnga bēngbe catśátangbioye mondábabuanjeshana. Nda chabe catśátbioye ndoñe tbonsebobonshana, cha cabá mo obanacá jtsiyenana. <sup>15</sup> Nda cachabe catśátbioye tbojtsáboyēnja, cha jtsemnana mo entśanga obanayacá. Y tšēngaftanga šmondětātšēmo entśanga obanayá ndoñe ntsobenana jtsiyenana, chě nyetsca tescama yomna tśabe vida chabe ainaniñe jtsebmomnēse.

<sup>16</sup> Ndayá chě jtsenbobonshánana bētemnama mēntśá montsetátšēmo: Jesucristo chabe derecho vida jtsobomñama cachcá tojanonýa y bēngbiana tojanóbana; cachcá bēnga šontsamna jtsemnama, sempre jtseprontánana chě Jesucristbeyeca bēngbe catśátangbiana jóbanama. <sup>17</sup> Canýa bomnana tojtsebmomna y catśátbioye uajabotá tbojtsonýa, pero chabiana ndoñe tbonjongmé y ndoñe tbonjuájabuache, cha ndoñe ntsobenana Bēngbe Bětsabiama ainaniñe bonshánana jtsebmomnana. <sup>18</sup> Atśbe básenga, ndoñe queśnátamna nýe bēngbe catśátanga imuababuanjeshana ca jatichámuana, y nýe chě bonshánama jatóyebuambnayana;

pero ndegombre šontsamna ndayánaca jamana, chca, jinjanyiyama, bēnga ndegombre injēngbiana imuababuányeshanama.

*Bēngbe Bētsabe delante natjēmbana ainánaca entsānga*

<sup>19</sup> Chchase bēnga mochántsetatšēmo, ntšamo chē Bēngbe Bētsabe ndegombre soyēnga yomncá bēnga imojtsamama. Y bēnga ndoñe quemochátenocochinýena, Bēngbe Bētsábica jtsemnana merecido ndoñe mondbuájona ca tmojtsejuabná ora; y bēngbe ainana natjēmbana Bēngbe Bētsabe delante echántsemna. <sup>20</sup> Bēnga chca bēngbe ainaniñe tmojtsejuabná ora, bēnga montsobena natjēmbana ainana jtsebomnana, er Bēngbe Bētsá corente jtsotatšēmbñana ntšamo bēngbe ainana yomnana, y cha lempe yotátšēmo. <sup>21</sup> Atšbe bonshana entsānga, bēnga ndoñe bacna soye tmonjama ca bēngbe ainaniñe tmojtsejuabnase, jtsobenana añémoca jtsemnana y tondayama ntsauatjá Bēngbe Bētsabe delante jtsemnana. <sup>22</sup> Y cha lempe ntšamo chamojotjañcá šochanjátataye, er bēnga montsama ntšamo Bēngbe Bētsá ibuamandacá y ndayá chabe bominiñe tsábá yomncá. <sup>23</sup> Y chabe mando endmēna: bēnga chabe Uaquiñá Jesucristbeñe jtsošbuáchiyana, y bēnga nyētsčanga jtsenbobonshánana ntšamo Jesús šojētsamēndacá. <sup>24</sup> Ntšamo Bēngbe Bētsá tojētsamandacá amēnga, Bēngbe Bētsáftaca cānyñe mo cānyacá jtsemnana, y cha sempre chēngaftaca cānyñe mo cānyacá echanjētssemna. Y quem sóyeca bēnga montsobena jtsetatšēmbuana cha bēngaftaca iuētsemnana: Uámana Espíritu bēngbe ainaniñe cháumashēnguama cha tojama.

## 4

*Chē Bēngbe Bētsabe Espíritu y chē Cristbe uayayabe espíritu*

<sup>1</sup> Atšbe bonshana entsānga, nyētsčanga chē Bēngbe Bētsabe juábna imoyebuambná ca ichámēngbioye ndoñe šmattsayaunana; botamana šmochjuarrepára corente jtsetatšēmbuama chēnga aife o ndoñe chē Bēngbe Bētsabe juábna imoyebuambnama. Quem tempo banga Bēngbe Bētsabe ndoñe ndegombre juabna oyebuambnayēnga quem luarējana mondajna. Chē causa tsēngaftanga cmontsamna botamana chēngbiana juarrepárana. <sup>2</sup> Chē Bēngbe Bētsabe Espíritu ndegombre imobomnēngbiana tsēngaftanga mēntšá šmontsobena jtsetatšēmbuana: nda tojayana Jesucristo quem luaroye aife entšacá tojánabo ca, cha ndegombre chē Bēngbe Bētsabe Espíritu yojtsebomna. <sup>3</sup> Pero nda ndoñe chca Jesucristbiana tonjayana, cha Bēngbe Bētsabe Espíritu ndoñe yontsebomna; injētsá, chana chē Cristbe contra yomnabe espíritu yojtsebomna. Tsēngaftanga šmojouena chē espíritu yochjabama; pero ndegombre cha ya quem luarentše entsemna.

<sup>4</sup> Atšbe básenga, tsēngaftanga Bēngbe Bētsábenga šmondmēna y ndoñe šmonjalesenciá chē Bēngbe Bētsabe ndoñe ndegombre juabna oyebuambnayēnga tsēngaftangbioye chacmaingñema, er chē nyēts tempo tsēngaftangbe ainaniñe vida endbomná, chē nýe quem luarama enójuabnayēngbe ainaniñe mándayabiana más obená endmēna. <sup>5</sup> Chē Bēngbe Bētsabe ndoñe ndegombre juabna oyebuambnayēngna chē nýe quem luarama enójuabnayēnguentsana mondmēna, chíyeca chēnga nýe quem luarentša soyēngama jtsóyebuambnayana, y chē nýe quem luarama enójuabnayēnga chēnga jtsayaunanana. <sup>6</sup> Pero bēnga Bēngbe Bētsábenga mondmēna. Nda Bēngbe Bētsábioye tbojtsabuatma, bēngbiōye jtsayaunanana; pero nda Bēngbe Bētsábioye ndoñe tbontsabuatma, cha bēnga ndoñe ntsayaunanana. Chiñe bēnga montsobena jtsetatšēmbuana nda chē ndegombre soyēnga jóyebuambayama ama espíritu yobomnabiama, y nda chē injēngbioye jáingñama ama espíritu yobomnabiámna.

*Chē bonshánana Bēngbe Bētsábicacana yóbocana*

<sup>7</sup> Atšbe bonshana entsānga, chē bonshánana Bēngbe Bētsábicacana endóbocana; chchase, bēnga šontsamna nyētsčanga jtsenbobonshánana. Nda Bēngbe Bētsábioye y chē inýe entšángbioye tojtsababuányeshana, cha Bēngbe Bētsabe uaqiñá jtsemnana y Bēngbe Bētsábioye jtsabuatmana. <sup>8</sup> Nda ndoñe chca tontsebobonshana, cha Bēngbe Bētsábioye ndoñe ntsábuatmana, er Bēngbe Bētsá bonshanánaca nyētsca soyēnga jamana. <sup>9</sup> Bēngbe Bētsá sonjinýané bēnga šuababuányeshanana, cha chē nýe canýe Uaquiñá ibobomná quem luaroye jíchmuase; cha tbojanichmó, bēnga chábeyeca chē nyētsca tescama yomna tsábe vida chamotsebomnana. <sup>10</sup> Bēngbe Bētsabe bonshánana mēntšá endmēna: ndoñe quenátšmēna bēnga Bēngbe Bētsá imobobonshánayeca, ndayá cha bēnga šojánababuányeshanayeca, y chabe Uaquiñá tbojanichmó, cha jóbanēse, bēnga bēngbe bacna soyēngama perdonánēnga chamotsemnana.

<sup>11</sup> Atšbe bonshana entsānga, Bēngbe Bētsá chca šuababuányeshana; chcasna, bēngnaca šontsamna nyētsčanga jtsenbobonshánana. <sup>12</sup> Ndocná ndocna te Bēngbe Bētsábioye tbojinýe. Bēnga nyētsčanga tmojtsenbobonshánēse, Bēngbe Bētsá nyēts tempo bēngaftaca echántsemna, y chabe bonshánana puerte bētscá bēngbeñe echántsemna. <sup>13</sup> Bēnga mēntšá montsobena ndegombre jtsetatšēmbuana bēnga Bēngbe Bētsáftaca imomnana y cha

bēngaftaca: cha tonjanma chabe Espiritu bēngbe ainaniñe cháumashēnguama. <sup>14</sup> Y cach bēnga fsēnjinye y entšanga fsēntsētsētná, chē Taitá chabe Uaquiñá tbojchmoma, quem luarentša entšanga jabátsebacama. <sup>15</sup> Ndánaca tojayana Jesús Bēngbe Bētsabe Uaquiñá yomna ca, cha Bēngbe Bētsáftaca cányíñe echántsemna y Bēngbe Bētsánaca sempre cháftaca cányíñe mo canýacá.

<sup>16</sup> Chcaxe bēnga montsetátšēmo y montsošbuaché ndegombre Bēngbe Bētsá bēnga šuababuányeshanama. Bēngbe Bētsá nyetsca soyēnga bonshanánaca jamana y nda Bēngbe Bētsá y chē inye entšanga sempre tojtsababuányeshana, cha Bēngbe Bētsáftaca cányíñe mo canýacá jtsemnana y Bēngbe Bētsánaca sempre cháftaca cányíñe mo canýacá. <sup>17</sup> Chca, Bēngbe Bētsabe bonshánana puerte bētsá bēngbeñe echántsemna, bēnga bēts añémoca y tondayama ntsauatjá chamotsemnana, chē tšabá o ndoñe tšabá tmonjamama entšangbiama jayanama Cristo yochjésabo orscama; er bēnga Jesucristoftaca cányíñe mo canýacá jtsemnēse, quem luarentše mondmēna ntšamo Jesucristo endmēncá. <sup>18</sup> Nda Bēngbe Bētsá y chē inye entšanga tojtsababuányeshana, tondayama ntsauatjana; bēnga corente tmojtsebbonshana ora, ndoñe ntsopodénana uatjana jtsebmomna. Canye entšá tojtsauatja ora, jtsemnana mo chabe castigo ya cuafjobjatšecá. Chca, nda uatjana tojtsebmomna, Bēngbe Bētsábioye y chē inye entšanga cha ndoñe corente yondábabuanýeshana, ntšamo Bēngbe Bētsá bēnga šuababuányeshancá.

<sup>19</sup> Natsana Bēngbe Bētsá šojánababuanýeshana, y chíyeca bēnga, cha y chē inye entšanga imuababuányeshana. <sup>20</sup> Nda tojayana: “Atše Bēngbe Bētsábioye sēndbobonshana ca”, pero cachca ora cachabe catsátbioye tbojtsáboyēñja, cha canye bostero jtsemnana. Canya aife jtsoberenaca chabe catsáta jinýama; y cha chē catsátbioye ndoñe tbojtsebbonshana, ndegombre cha Bēngbe Bētsábioye ndoñe bondbobonshana, ndábioye jinýama ndoñe ntsoberenana. <sup>21</sup> Y bēnga quem mando chábéntšana tmonjanóyēngacñe: nda Bēngbe Bētsábioye tbojtsebbonshana, cachabe catsátbioynaca chabotsebbonshana ca.

## 5

### *Chē Jesucristbeñe ošbuachiyá endobena Satanásbe soyēnga jáyēñjanana*

<sup>1</sup> Nda tojtsosbuaché Jesús chē Uámana Uabuyaná, chē Cristo yomnama, cha Bēngbe Bētsabe uaquiñá jtsemnana; y nda canye taitábioye tbojtsebbonshana, chē taitabe uaquiñábioynaca cha jtsebbonshánana. <sup>2</sup> Bēnga Bēngbe Bētsá tmojtsebbonshana y ntšamo cha tojtsemandacá tmojtsamēse, bēnga ndegombre mochántsetatšēmo, chē Bēngbe Bētsabe basengbioynaca bēnga imuababuányeshanama. <sup>3</sup> Bēnga Bēngbe Bētsábioye imobobonshánama quem soyíñe jtsinýana: bēnga ntšamo Bēngbe Bētsá tomandacá tmojtsamēse. Y ndayá Bēngbe Bētsá yomandacá ndoñe yapa totcá quenátšmēna bēnga chamotsamama. <sup>4</sup> Nda Bēngbe Bētsabe uaquiñá tomna, chana jáyēñjanana quem luarentša entšanga y soyēnga ntšamo Satanás yomandacá. Quem luarentša entšanga y soyēnga ntšamo Satanás yomandacá, Crístbeñe bēnga imošbuachéyeca montsobena bēnga jáyēñjanana. <sup>5</sup> Nye nda, Jesús Bēngbe Bētsabe Uaquiñá yomnama tojtsosbuaché, cha jtsoberenana chē entšanga y soyēnga ntšamo Satanás yomandacá jáyēñjanana; ndocná más.

### *Bēngbe Bētsá tojinýanyé ntšamo chabe Uaquiñabiama ndegombre yomncá*

<sup>6</sup> Cach Jesucristo endmēna nda quem luaroye tojánabo y mēntšá tojanenonýñyé: býyesheca cha tmojanabaye ora, y buiñe juabuáshanēse cha tonjanóbana ora. Cha ndoñe tonjanenonýñyé nye býyesheca, ndayá býyesheca y buiñeca. Cach Uámana Espiritu entsobena jayanana chca ndegombre bétsemnana Jesusbiama, er chē Espiritu endmēna chē sempre ndegombre oyebuambnayá. <sup>7</sup> Endmēna unga soyēnga, ndayá iuinýanýná ntšamo ndegombre yomncá Jesusbiama: <sup>8</sup> Espiritu, býyeshe y buiñe; y chē unga soyēnga lempe cachá Jesusbiama jtsinýanýnayana. <sup>9</sup> Bēnga mondbétsejubanaye, ndayá entšanga tmojinýe ca tmojtsichámuama mo ndegombre cuaftsemncá, pero ndayá Bēngbe Bētsá tojtsichamcá chē ndegombre soye jtsemnana y puerte jtsámanana, er chē ndegombre soye ntšamo cha tojtsichamcá, endmēna ndayá chabe Uaquiñabiama iuichamcá. <sup>10</sup> Nda Bēngbe Bētsabe Uaquiñábeñe tojtsosbuaché, cha chca nyets tempo chabe ainaniñe jtsejubanayana; nda Bēngbe Bētsábeñe ndoñe tontsošbuaché, cha chca jtsamana mo Bēngbe Bētsá canye bostero cuaftsemncá, er chē Bēngbe Bētsá chabe Uaquiñabiama tojayana soyama cha jtsejubanayana ndoñe ndegombre yontsemna ca. <sup>11</sup> Ntšamo Bēngbe Bētsá chabe Uaquiñabiama tojayancá mēntšá entsemna: Bēngbe Bētsá bēngbiama tojama chē nyetsca tescama yomna tšabe vida chamotsebmomna; y quem vida chabe Uaquiñábeñe entsemna. <sup>12</sup> Nda Bēngbe Bētsabe Uaquiñáftaca cányíñe mo canýacá tojtsemna, cha chē tšabe vídnaca jtsebmomna; pero nda chē Bēngbe Bētsabe Uaquiñáftaca cányíñe mo canýacá ndoñe tontsemna, cha chē nyetsca tescama yomna tšabe vida ndoñe ntsebmomna ca.

### *Inye soyēngama jábuayenama y jtadiósoftanama*

<sup>13</sup> Tsëngaftanga, chë Bëngbe Bëtsabe Uaquiñabeñe šmošbuachéngbioye quem soyënga cbontsëbuabiamná, ndegombre chašmotsetatšëmbuama chë nyetsca tescama yomna tsabe vida šmojtsebonnana.

<sup>14</sup> Bënga bëts añémoca y ndauatjá Bëngbe Bëtsabe delante mondmëna, er bënga mondëtatšëmbo, nderado ntšamo chaotsemnana cha tojtsebošcá bënga tmojtotañe ora, cha bënga šnétsayaunanama. <sup>15</sup> Nderado ndayá chca Bëngbe Bëtsábioye tmojtsotjanañe ora, cha bënga joyaunayana; bënga mondëtatšëmbo chca ndegombre yomnana, y chca, bëngnaca montsetatšëmbo, ndayánaca chábioye bënga chamojotjañcá cha sochjátatayama.

<sup>16</sup> Nda cachabe catšátbioye tbojinýe canýe bacna soye tojtsamama, pero chë bacna soye tojamentsana cha perdonaná jtsemnana cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catšata chë nyetsca tescama yomna tsabe vida chaotsebonnana, cha chca tojamentsana perdonaná jtsemnana cabá tojtsopodénëse. Pero canýe bacna soye endmëna, y chca tojamama canýa ndoñe ntsoebenana perdonaná jtsemnana, y chca, cha jabocnana canýa nyetsca tescama castiganá chaotsemnana, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca. <sup>17</sup> Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nyetsca bacna soyënga ntšamo canýa tojtsamcá, ndoñe ntjamana cha ndëperdonaná chaotsemnana.

<sup>18</sup> Bënga mondëtatšëmbo, nda Bëngbe Bëtsábioye mo taitacá tbojtsebonna, cha ndoñe ntsiyenana bacna soyënga jtsamëse, er chë Bëngbe Bëtsábentšana Onýnaná chábioye jtsinýenana, y Satanás, chë nyetsca bacna soyënga amëndayá, tondaye ntsoebenana chábioye jabórlana. <sup>19</sup> Bënga mondëtatšëmbo, bënga chë Crístbeñe ošbuáchiyënga Bëngbe Bëtsábenga imomnana, y chë quem luarentša inýe entšanga Satanasbe cucuatšñe imomnana.

<sup>20</sup> Bëngnaca mondëtatšëmbo Bëngbe Bëtsabe Uaquiñá tojabama, y cha iuama bënga osertánana chamotsebonnana, chë ndegombre Bëngbe Bëtsá yomná jtsabuatmama. Bënga chë ndegombráftaca cánýñe mo canýacá mondmëna, bënga chabe Uaquiñáftaca cánýñe bëtsemnayeca. Cha chë ndegombre Bëngbe Bëtsá endmëna, y nda chë nyetsca tescama yomna tsabe vida entšanga chamotsebonnana iuamá. <sup>21</sup> Atšbe básenga, ndoñe šmattsadorana cach entšangbe pormana soyënga, chë ndayama ínýenga mondbëtsejuabnaye diosënga yomna ca.

## 2 San Juan

*Jtsiyenana ndegombre soyëngaca y nyëtscanga jtsenbobonshánëse*

<sup>1</sup> Atše chë Bëtsëjema, quem tsbuanácha sëntsabiamná, chë uámana mamá, chë Bëngbe Bëtsabe bocacaná y chabe basengbiámnaca, ndëmuanýënga atše ndegombre sëndábabuanýeshana. Y ndoñe nye atše chënga quetsátababuanýeshana, ndayá nyëtscanga chë Bëngbe Bëtsabe ndegombre soyënga uabuátmëngnaca. <sup>2</sup> Atše cbontsababuanýeshana, chë ndegombre soyënga bëngbe ainaniñe mondbómnyeyca, y chë soyënga bëngbe ainaniñe sempre echántsemna.

<sup>3</sup> Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnana, chata tsëngaftangbiöye chácmalastemama, y chaboma tsëngaftangbe ainaniñe tsabe ebionana chašmotsebmomna. Quem soyënga, bënga chë ndegombre soyënga uabuátmënga y nyëtscanga mondenbobonshánëngaftaca echántsemna.

<sup>4</sup> Puerte sënjoyejuá, er atše acbe básenguentše báseftanga sënjánýëna chë ndegombre soyënga ntšamo Bëngbe Bëtsá chë Taitá šojamëndacá jtsamëse. <sup>5</sup> Y mora, uámana mamá, cbontseimpadana Diosmanda nyëtscanga chamotsenbobonshana. Chë cbontsëbuabiamná soye ndoñe canýe tsëm mando quenátsmëna, ndayá cach Cristbe ústonënga tmonjanobiama ora tmonjanóyëngañe mando. <sup>6</sup> Bënga, Bëngbe Bëtsá y chë inýe entšanga imababuanýeshanama jtsinýnana, bënga ntšamo Bëngbe Bëtsá tojamandacá jtsamëse tmojt-siyenama. Y chabe mando, ntšamo Cristbe ústonënga šmonjanobiama ora šmojanuencá, mëntšá endmëna: jtsiyenana Bëngbe Bëtsá y chë inýe entšanga jtsababuánýeshanëse.

*Chë entsángbiöye áingñayënga*

<sup>7</sup> Quem luarëjana banga entsángbiöye áingñayënga mondajna, y chënga jtsejuabnayana Jesucristo quem luaroye ndoñe mo canýe ndegombre entsacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná. <sup>8</sup> Chëngbiama cuedado šmochtsebmomna. Ndoñe chcase, tsëngaftanga ndoñe quešmochátsbmomna chë Cristbiama cach tsëngaftangbe trabajuentsána tojóbcna soyënga, y ndoñe quešmochatosháchiñe lempë ntšamo Bëngbe Bëtsá tsëngaftangbiöye jatšatayama yojtsebošcá.

<sup>9</sup> Ndánaca chë Cristo tojanabuatambá soyëngama inýe soyënga tojatabuatambá, cha ndoñe Bëngbe Bëtsáftaca cánýiñe mo canýacá ntsemnana; pero nda sempre ntšamo Cristo tojanbuatëmbacá tojtسابuatambá, cha aíñe chë Taitáftaca y chabe Uaquiñáftaca cánýiñe mo canýacá jtsemnana. <sup>10</sup> Ndánaca tsëngaftangbiöye tojá jabuátambama, pero ndoñe ndayá Cristo tojanabuatambacá tojtsebuatëmbase, cha ndoñe šmatjofja, ni mo šmatjachuaye. <sup>11</sup> Er nda chábiöye tbojachuase, chábiöye jtsajabuáchanana chë bacna soye chaomama.

*Jtadióšoftanama*

<sup>12</sup> Atše ba soyënga sëntsebmomna tsëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná aíñe chjobenaye tsëngaftangbiöye jama, jobenayama nyëtscángaftaca jencuéntama, chca, bëngbe oyejuayana puerte bëtscá chaotsemnana.

<sup>13</sup> Crístbeyca acbe quenata, chë Bëngbe Bëtsabe bocacaná, chabe básenga cmontsacheuaná.

## 3 San Juan

*Juan Gaybiana puerte tsabá tojanoyebuambá*

<sup>1</sup> Atše chë bëtsëjema, quem tsbuanácha atšbe bonshana amigo Gaybiana sentsabiamná. Chábioye atše ndegombre sëndbobonshana.

<sup>2</sup> Atšbe bonshaná y Cristbeyeca atšbe catšata, Bëngbe Bëtsá sëntseimpadana aca tsabia nyetsca soyënguifne chacotsemnana y salud bomnánaca. Atše sëntsetatšëmbo aca ainaniñe tsabá cotsomñama, Bëngbe Bëtsabiana bëtscá tsabe juabnënga chentše jtsebomnëse. <sup>3</sup> Er báseftanga Jesucristbeñe ošbuáchiyënga átšbioye tmonjabo y šmonjacuentá ntšamo aca chë ndegombre soyënga yomncá icuamama, aca chë ndegombre soyënga jtsamëse icyenama. Chiyeca atše bëtscá sëntsoyejuá. <sup>4</sup> Tondaye jamana atše nyetsá oyejuayá chaitsemnana, ndayá nye jouenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

<sup>5</sup> Atšbe bonshaná, aca contsama ntšamo Jesucristo tonjanbuatëmbacá, aca chë inýenga Jesucristbeñe ošbuáchiyënga jujabuáchama ndayánaca tcojama ora, y masna, chë inýe luaroquëngocana ashjajnëngbiana ndayánaca tcojsama ora. <sup>6</sup> Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mondbeneneñjñëngbe delante, aca tša chënga icuababuánýeshanama. Diosmanda, ntšamo tojtsëjabotcá chënga cochjúabuache, chca, chënga chamobená tsabá inýe luarëngoye játama. Chënga mondmëna Bëngbe Bëtsabiana trabájayënga; chcasna, chëngaftaca cochjama ntšamo chënga chama merecido imobuajoncá. <sup>7</sup> Chca cochjama, er chënga chëngbe pueblënguentšana tmojëftsebobcana Jesucristbe soyëngama entšángbioye jábuayenama, y chënga chama tondaye crocénana quematóyëngacañe chë Jesucristbeñe ndošbuáchiyëngbe cucuatšentšana. <sup>8</sup> Chiyeca bënga sontsamna chëngbiana jtsantješana y jtsëjabuáchanana, chca, bënga chamobená cányiñe chëngaftaca jatrabájana, entšángbioye chë ndegombre soyëngama jábuayenama, ndayá chënga mondama.

*Diótfes ndoñe tsabá tonjanma; Demetrio aïne*

<sup>9</sup> Atše canýe tsbuanácha chë Jesucristbeñe ošbuáchiyënga chentše mondbeneneñjñëngbioye sënjubuábiana, pero Diótfes ndoñe yontsuenana ntšamo atše sentsichamcá, er cha yojtseboše chë inýëngbioye nye jtsamëndayana. <sup>10</sup> Chiyeca atše choye chajjá ora, ndayá cha yojtsamama chanjauácacana. Cha sempre bacá yojtsoinýana y uayátsenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe puebloye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnana imnétsenefjuana luarentšana yojtsatëbuacana.

<sup>11</sup> Atšbe bonshaná, ndoñe cattsama chë ndoñe tsabá yontsamacá, ndayá chë tsabe soyënga tmojtsamëngcá cochtsama. Nda ntšamo tsabá yomncá tojtsama, cha Bëngbe Bëtsábia jtsemnana; pero nda ndoñe chca tontsama, cha cabá ndoñe yondëtatsëmbo ntšamo Bëngbe Bëtsá yomnama.

<sup>12</sup> Jesucristbeñe ošbuáchiyënga nyetscanga tsabe soyënga Demetriëbiana montsichamo, y Jesucristbe ndegombre soyënga entsinýa ntšamo cha soyënga yojtsiyenama. Bëgnaca chabiana tsabá fsentsichamo, y aca condëtatsëmbo ntšamo bënga fsentsichamcá, ndegombre yomnama.

*Jadiósoftanama*

<sup>13</sup> Atše ba soyënga sëntsebomna aca jauyanama, pero ndoñe quetsátsboše tsbuanáchañe juábobemana. <sup>14</sup> Atše sëntsejuabná betscó chjobenaye ácbioye jama jauatsëtsayama y jobenayana ácaftaca jencuéntama.

<sup>15</sup> Puerte tsabe ebionana ainaniñe chacotsebomna. Quem luarentša amiguënga cmontsechuaná. Diosmanda, bëngbe amiguëngbioye choca cada ona cochjácheuaye.



## San Judas

### *Jacheuayama*

<sup>1</sup> Atše Judas, Jesucristbe oservená y Santiagbe catsata, quem tsbuanácha sentsabiamná, ndémuanýngbiye Běngbe Bětsá, chě Taitá chabe entsānga chamotsemnna tojáchembo, chabe bonshánēnga, y ndémuanýnga Jesucristo endányēna. <sup>2</sup> Atše, Běngbe Bětsá sěntseimpadana, cha puerte lastemado tsěngaftangaftaca chaotsemnna, cha chaoma tsěngaftanga ainaniñe tsabe ebionana chašmotsebonnna, y chaoma tsěngaftanga cada te más Běngbe Bětsábioye y inýngbiye chašmotsababuánýeshanama.

### *Chě ndoñe ndegombre soyēnga buátěmbayēnga*

<sup>3</sup> Atše bonshánēnga, atše tša sěndboše tsěngaftanga jubuábiamama, ntšamo Jesucristo bēngbe bacna soyēnguentsāna šojátsebacama, tsěngaftangbiye y bēngbiyōnaca; pero atše sěntsejuabná atše šojtsemna tsěngaftanga jubuábiamana, jáimpadama bětsá chašmotsama Jesucristbe soyēngama, chě mondošbuaché soyēngama jenojuérzama, ndoñe chaondopochocama. Chě soyēnga Běngbe Bětsá chabe entsānga canýe tojatsatá, y nýetsca tescama. <sup>4</sup> Er tsěngaftanga ntšamo inýnga imomnna ntjatatsěmbonca, básefta entsānga tsěngaftangaftaca tmojenutaná. Chěnga mondmēna Běngbe Bětsá ndoñe adórayēnga, y chě buátěmbana soyēnga tmojtsetrocá. Běngbe Bětsá bēngbe tsabiama juabna yobómnayeca, chěnga jtsichámuana tsěngaftanga šmojtobena nýetsca bacna soyēnga jtsamēse jtsiyenana, jenomándama ntšobencá ca; y chca, chěnga montseboše jinýanýiyama, Jesucristo ndoñe bēngbe canýe Nduiño y Běngbe Utabná chěngbiama yondmēna ca. Y bayté, Běngbe Bětsabe uabemana palabrenguñe tmojanábema, chě chca amēngna jtsamnana nýetsca tescama castigánēnga jtsemnna ca.

<sup>5</sup> Masque tsěngaftanga lempe quem soyama ya šmondětatsěmbo, atše sěntseboše jamama tsěngaftanga chašmotsenojuabná, Běngbe Utabná, Israeloca entsānga Egiptoquēngbe cucuatšentsāna tojanatsebácá chentsāna, cachá chě Israeloquēnguentse chábeñe ndošbuachiyēnga tojánapochocama; <sup>6</sup> y cachcá chě angelēngbiámna, ndémuanýnga ndoñe tmonjanoquedá chě tmojanóyēngacñe mándoca, pero aīñe chēngbe luarēnga cachcá imojéftsonýaye. Chě causa, Běngbe Bětsá tojanmandá cadenējuangaca nýetsca tescama chamoquedama, chě más ibetiñe, tondaye binýiñe luarentše, chěnga bacna soyēnga tmojanmama nýetsca tescama castigánēnga jtsemnna yojtsamna ca, cha jayanama tescama. <sup>7</sup> Y chě Sodoma y Gomorra, y chě béconana pueblēnguentse entsāngbiámna; chēngnaca cach angelēngcá ndoñe tsábá monjánama, y nýetsca bacna soyēnga imojánama boyabása o shembásaftaca, y inýengaftaca y bayēngaftácnaca. Chýeca chěnga tmonjansufrí chě iněshca castigo nýetsca tescama, y chca, nýetsca entsāngbiye tmojaninýanýe, ndayá yochjopása chě chca Běngbe Bětsábioye ndoñe tbontsobedecenáftaca.

<sup>8</sup> Cachcá, chě ndoñe ndegombre soyēnga buátěmbayēngnaca chě mo otjenayoquécá tmojáninýe soyēngama jtsichámuana, y chě causa cachēngbe cuerpēngama bacna soyēnga jt-samana, chě mando bomnēngbiye jtsěbátēnana, y chě espíritēga obenana bomnēngbiama ndoñe tsábá ntsichámuana, mo chēngbiye cuafjoyanguangcá. <sup>9</sup> Pero ni mo chě angelēngbe mandayá Miguel quem buátěmbayēngcá tojanma. Cha chě diábloftaca ibojentsjaná ora, Moisesbe cuerpama cháftaca jabuachana ibojanenatsěsnaye ora, ndoñe tonjanenñemó jayanama chě diablēbima podesca soyēnga, jóyenguanguse, ndayá nýe mēntśá ibojauyana: “Běngbe Utabná chacmácacana ca.” <sup>10</sup> Pero quem buátěmbayēngna, chě ndoñe tontsěsertana soyēngama podesca jtsichámuana, y ntšamo tojtsebionama y tmojtsebošama, nýe mo bayēngcá, chě soyēngama tsábá josértama juabna ndbomnēnga, ndayá chentsāna tmojtsešertancá jtsamēse, jamana chěnga nýetsca tescama castigánēnga jtsemnna chamotsaj-nama.

<sup>11</sup> ¡Tša lastema quem buátěmbayēngbiama! Er chěnga ndoñe tsábá tmojanma, mo Caincá; cha tojanaboté ntšamo Běngbe Bětsá inétsama bacna soyēnga japerdónama, y cabana chabe catsátbiye tojanóba. Chěnga crocénana juacánama, mo Balaam yojanamcá, Běngbe Bětsabe tsabe benachentsāna tmojtsojuánañe, bacna soyēnga jamama. Chěnga chě amēndayēngcá Běngbe Bětsá tojanabacacāngbiye ndoñe ntsayaunanana, ntšamo Coré, Moisés y Aarónbiye joyaunayama ndoñe tonjanbošencá; y chě causa chěnga pochocánēnga mochántsemna, ntšamo Coré pochocaná chaotsemnna Běngbe Bětsá tojanmcá.

<sup>12</sup> Chēngna tsěngaftangbiama jtsemnana mo canýe ndětsenga luarentše canýe bēts tse-ngacá, tsěngaftangaftaca tmojenutaná ora, cānyñe jasama mo Jesucristbeñe ošbuachiyēngcá. Chěnga chca jtsemnana, er chca fiestēnguñe chěnga oyejuayēnga jtsemnana, nýe chěnga tsábá jtsomñama soyēnga jtsamēse, y chěnga chama ndoñe ntsěuatjana. Chěnga nýe

cachëngbiana jtsantješnana, inÿengbiana ndoñe. Chënga tša jtsašebuachiyana, pero chëngbe buâtëmbana soyënga inÿengbiana tondayama ntsoservënana; y chca, chënga jtsemnana mo chë tša jënyá ora jantšetëshëngcá, tondaye ntjuaftena, bínÿiaca ochñëjuañëshënga; y mo betiyeshënga jashtsnëshënga y buashanëshëngcá, chë jashacama tojtsemna ora tondaye shajuana causa. <sup>13</sup> Chënga nÿets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinÿanÿnayana chënga chë bacna juabnënga imobomnama. Chca, chënga jtsemnana mo mar béjayoca oleshëngcá, chentšana espumushënga bëtscá tsenguëshëca jtsóbocanana. Y cabana, chënga jtsemnana mo estrellëngcá chëtëmëngbe benachentšana tmojtsebocna, y chentšana jtsefsanana. Bëngbe Bëtsá tojamandá, chë buâtëmbayënga ntšamo tmojamamna, chë más ibetoca, tondaye binÿniñe luarentše nÿetsca tescama chënga chamoquedama.

<sup>14</sup> Adánbentšana chñënguana pamillo entšanga tmojánachñëjna chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buâtëmbayëngbiana, mëntšá tojánayana ora: “Smochjinÿe, Bëngbe Utabná echanjabo bëtscá uaranga angelëngaftaca, <sup>15</sup> nÿetsca entšangbiana jabáyanama ntšamo tmojamcá tsabá o ndoñe tsabá bëtsemnama; y cha echanjamándá chë Bëngbe Bëtsábioye ndoñe adórayënga nÿetsca tescama castigánënga chamotsemnama, tša bacna soyënga chabe contra tmojamama, y bacna soyënga chabe contra tmojanayana, chënga, chë puerte bacna soyënga amënga ca” —tojánayana. <sup>16</sup> Chënga mondmeña chë tsabe soyëngama nÿets tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nÿe cachënga tsabá jtsomñama, y puerte botamana palabrenga jtsichámuana uámanënga jtsenobiamnayëse, y tsabe soyënga inÿengbioye jtsëtsënayana, chënga tsabá joquédama y chëngbentšana ndayánaca josháchiñama.

#### *Ošbuáchiyënga jábuayenama*

<sup>17</sup> Pero tsëngaftanga, atšbe bonshánënga, smochtsenójuabnaye ndayá chë Bëngbe Utabná Jesucristbe ichmónënga tcmojanéyanama, mëntšá: <sup>18</sup> “Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nÿe cachënga tsabá jtsomñama bacna juabnëngaca, y tsëngaftanga cmochantsëbuayajuana ca.” <sup>19</sup> Chënga mondmeña chë ošbuáchiyënguentše nÿetscanga ndoñe cachcá chamondëtsejuabnama amënga; chënga mondoyna jtsamëse cachëngbe bacna juabnëngaca y ndoñe quemátsebmoma Uámana Espíritu, chëngbe ainaniñe chaotsemándama.

<sup>20</sup> Pero tsëngaftanga, atšbe bonshánënga, nÿets tempo, cada te más Jesucristbeñe ošbuáchiyana smochtsebomna, chë Bëngbe Bëtsábicana endóbocana ošbuáchiyana, y Bëngbe Bëtsáftaca smochjencuénta, ntšamo Uámana Espíritu tcmojtsamëndacá. <sup>21</sup> Yejuana smochtsantješna tsëngaftanga nÿets tempo chašmotsiyenama, Bëngbe Bëtsá cmababuánÿeshanama jtsejuabnayëse, y smochtsobátmana chë tempo ndaye ora Bëngbe Utabná Jesucristo, tsëngaftanga jtsalastemánëse, yochjama tsëngaftanga chë nÿetsca tescama yomna tsabe vida chašmotsebomnama.

<sup>22</sup> Chë inÿe ora aifne y inÿe ora ndoñe Jesucristbeñe ošbuáchiyana bomnënga smochtsalastemana. <sup>23</sup> Bëtscá smochtsama, báseftanga chë uabouana castigüentšana atsebácanënga chamotsemnama, mo chënga inëshentšana cuaftëbuacancá. Inÿengbiana chacmotsangmena, pero cuedado smochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondëtsamama; y chë bacna soyënga ntšamo chënga tmojtsiyena jtsamëse, chëngbe bacna juabnëngaca, nÿa tondaye chacmondëtsogusetana.

#### *Judas, Bëngbe Bëtsá jëtschuayama*

<sup>24-25</sup> Chë nÿe canÿe Bëngbe Bëtsá, bëngbe Atsebacayá obenana endbomna tsëngaftanga jtsanÿenama, chca, tondaye chaondëma tsëngaftanga Jesucristbeñe ošbuáchiyana chašmotsajbanama; y obenana endbomna tsëngaftanga ainaniñe ndocna bacna soye ndbomnënga chašmotsemnama y puerte oyejuayënga cachabe delante chašmotsemnama, cha canÿe puerte uamaná y obená bëtsemnama chaojinÿanÿe ora. Bëngbe Utabná Jesucristbeyeca, nÿetscanga Bëngbe Bëtsá chamotsatschuaná; y cha puerte bëtsá chauesomñe, nÿets obenana bomná y nÿets mando bomná, nÿets tempscana, tempo, mora y nÿetsca tescama. Chca chaotsemna.

## Apocalipsis

*Ndayá quem librêsañe yomna*

<sup>1</sup> Quemuentse entsábemana ndayá Bèngbe Bètsá Jesucristbioye tbojaninjinýe, chë Bèngbe Bètsabe oservênnga cha cháuinýanyema, ndayá jopásama yojtsobecuama chënga chamot-setatšëmbuama. Jesucristo chama chabe ángel tbojichmó, chë soyëngama atše, Juan, chë Jesucristbe oservenábioye chašuinýinýema. <sup>2</sup> Y atše sënjayana lempe ntšamo ndegombre yomncá lempe chë tijinýe soyëngama, chë Bèngbe Bètsabe buayenana soyëngama y chë Jesucristo šonjaniana ndegombre bêtsemna soyëngama.

<sup>3</sup> Oyejuayá nda tojtsalía, y oyejuayënga ndëmuanýenga botamana tmojtsuenana quem yochjopása soyëngama, chë muentse entsabemancá ndegombre tmojóyeunanga, er chca jopasa tempo entsobeco.

*Asia luaroca ošbuachiyëngcá enefjuanënga jacheuayama*

<sup>4</sup> Atše Juan, sentsabiamná chë Asia luaroca canýsëftañe ošbuachiyëngcá enefjuanëngbiamna. Atše, Bèngbe Bètsá sèntseimpadana, tsabe bendicionënga chábiocana chašmosháchiñe y ainaniñe puerte tsabe ebionana chašmotsebmoma, Bèngbe Bètsábentšana, chë canýsëfta espíritëngbentšana y Jesucristbentšana. Bèngbe Bètsá, chë mora endmëná, enjamná y sempre echantsemná; chë canýsëfta espíritënga, chabe uámana puesto natsanoica mondmënënga; <sup>5-6</sup> y Jesucristo, chë ntšamo Bèngbe Bètsabiamna yotatšëmbcá ndegombre oye-buambnayá, chë natsaná ndabiamna Bèngbe Bètsá tojama obanënguentšana cháuatayenama, y nyetsca quem luarentša mandadëngbe amëndayá. Cristo šondábabuanýeshana y Bèngbe bacna soyënguentšana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnama, y Bèngbe Bètsá chabe Taitá mo bachnangcá chamotseservënama. ¡Nyetscanga nyets tempo chamotsinýanýná Cristo puerte bëtšá y uamaná bêtsemnama y obenana nyetsca tescama yobomnama! Chca chaotsemna.

<sup>7</sup> Mouenënga. Cristo jantšetëšhënguñe echanjésabo.

Chábioye nyetscanga mochanjinýe,

chë tmonjancrucificánagna;

y quem luarentša nyetsca entsanga puerte ngmënaca mochántsemna

y mochantsošachna chábeyeca.

Ndegombre, chca chaotsemna.

<sup>8</sup> “Atše sëndmëna chë nyetsca soyënga bojatsáyá y pochocayá ca,” Bèngbe Utabná Bèngbe Bètsá tojajana. Cha chë sempre endmëná, enjamná, nyets tempo echantsemná, chë nyets obenana bomná.

*Juan mo otjenayoquécá Cristbiamna tojáninýe*

<sup>9</sup> Atše Juan, Jesucristbeyeca tsëngaftangbe catšata, cháftaca cánýiñe mo canýacá bêtsemnama, cach tsëngaftangcá sëndëpadecena, tsëngaftangcá chanjéftšashjache Bèngbe Bètsabe amëndayoye jamashënguama, y tsëngaftangcá Bèngbe Bètsábeñe jtsobátmanëse, uantado sëndmëna chë padecena soyënguñe. Bèngbe Bètsabe palabra sënjanabuayinýama y Jesusbiamna ntšamo ndegombre endmëncá sënjanóyebuambnama, atše šmonjetsanëtsëna mar bëjayoca canýe fshantsentse, Patmos ca uabáinoca. <sup>10</sup> Y tonjanopasá, canýe tmengo, chë ošbuáchiyënga Bèngbe Utabnábioye cánýiñe jëtschuayama te, atše sënjanokuedá chë Uámana Espiritbeyeca corente mandaná, mo otjenayoquécá soyënga sënjëtsonýaye, y atše stëtsoica canýe jabuache oyebuambnayana sënjanuena, mo canýe trompetëfjua cuafjuajatëtčá; <sup>11</sup> mëntšá šontsanatsëtsná: “Canýe librêsañe mábema lempe ntšamo contsonýacá y cochjuíchmua chë Asia luaroca canýsëftañe ošbuachiyëngcá enefjuanëngbioye: Efeso, Esmirna, Pérgamo, Tiatira, Sardis, Filadelfia y Laodiceoquëngbioye ca.”

<sup>12</sup> Sënjanobuértana jinýama nda chca šojtsanatsëtsná, y chca sënjanma ora, sënjaninýe canýsëfta castellano candelërëngcá; <sup>13</sup> y chë canýsëfta castellano candelërëngcá tsëntsaca canýa sënjaninýe, mo entsacá inýná, canýe bën entsáyá uichëtjoná, y cochóntscoca canýe tëntša castellano uasnanëjaca. <sup>14</sup> Chabe stjënashana uafjantsëshá, puerte uafjantsëshá mo canýe oveshabe boboshëshacá, y chabe fšnëbenga mo iñeshcá enjëtšinýna. <sup>15</sup> Chabe shecuatšënga enjëtsebuashinýinýana mo bronscá, ndaybé natsana iñëjana tco-juchnëngo enabé chaotsemnama y chentšana entsëjuaca becá tcojajojó corente chaotsebuashinýinýanama; y chabe oyebuambnayana jabuache enjëtšenana mo bëtscá bëjaye cuaftebuachquëcjancá. <sup>16</sup> Chabe catšbioica cucuatšinë enjëtšatbëna canýsëfta estrellënga, y chabe uayoicana enjëtšobocana canýe espadëja, nyets utoicajana puerte efsánëja, y chabe

jubiá tša enjétebuashinjinjána, mo chë shinje corente, lempe ntšamo tojobenacá tojtsebuashinjinjána orcá.

<sup>17</sup> Cha sënjaninje ora, chabe shecuatšentše mo obanacá sënjánshajaye. Pero cha, chabe catšbioica cucuatše átsbeñe jajájuase, šonjanijana: “Ndoñe matauatjana; atše sëndmëna chë nyetsca soyënga bojatsáyá y pochocayá, <sup>18</sup> chë sempre vida bomná. Atše obaná sënjamna, pero mora nyetsca tescama vida sëntsebmoma. Atše obenana sëndbmoma, y chë obenánaca entsángbiöye ndoñe quenátamna infiernoca nyetsca tescama castigánënga jtsemnana, mo nyets tempo cuafstobancá. <sup>19</sup> Ntšamo tconjinýá mábema, chë quem tempo endmëna soyëngama y chë más chcoye echántsemna soyëngama. <sup>20</sup> Mëntsá endmëna chë atšbe catšbioica cucuatšine tconjinýe canýsëfta estrellëngaca y chë canýsëfta castellano candelersëngaca: chë canýsëfta estrellënga montsinjinýná chë canýsëfta ošbuachiyëngcá enefjuanëngbeñe chamotsemándama uámana ichmonënga, y chë canýsëfta candelersëngaca chë canýsëfta ošbuachiyëngcá enefjuanënga.”

## 2

*Efesoca ošbuachiyëngcá enefjuanënga jábuayenama*

<sup>1</sup> Mëntsánaca cha šonjanijana:

“Mëntsá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioye:

Mëntsá entsichamo chë chabe catšbioica cucuatšine canýsëfta estrellënga entsatbëná y chë canýsëfta castellano candelersënga luarëjana entsaná: <sup>2</sup> Atše lempe sëndétatšëmbo ntšamo tsëngaftanga šmoyenana; atše corente sëndétatšëmbo tsëngaftanga jabuache šmotrabájama, y ntšamo tsëngaftanga Bëngbe Bëtsábeñe jtsobátmanëse šmnëtsauantana padecena soyënguiñe šmojtsemna ora. Y átsnaca sëndétatšëmbo tsëngaftanga ndoñe šmontsobena jtsëuantánana ntšamo bacna entsanga tmojtsamcá. Átsnaca sëndétatšëmbo tsëngaftanga yejuana šmojarrepará y becá šmojenojuabó jinýama chë Jesucristbe ichmonënga imomna ca tmojtsichamëngbiama; pero ndegombre chënga ndoñe chca quemátsmëna; y chca šmojámayeca, tsëngaftanga mora šmontsetátšëmbo chënga bosterënga imomnama. <sup>3</sup> Padecena soyënguiñe becá šmojoboyá y chca ora, Bëngbe Bëtsábeñe šmobátmana. Chë soyënguiñe šmojasufri, tsëngaftanga atše šmoservënema; y tsëngaftanga chca šmondësverna, ainaniñe añemo jtsebmoma ntajbanacá.

<sup>4</sup> Pero canýe soye sëntsebmoma tsëngaftangbe contra jayanama: Tsëngaftanga mora ya ndoñe cachca bonshánana quešmátsbmoma ni atšbiama ni nyetsca entsangbiama, ntšamo átsbeñe jtsošbuáchiyama šmonjanbojatsé orcá. <sup>5</sup> Menójuabonga ntšamo chë tempo šmonjانبobonshanama, juabnayana motrocanga y cachiñe šmochtsama ntšamo chë átsbeñe jtsošbuáchiyama šmonjanbojatsé orcá. Ndoñe chcase, atše tsëngaftangbiöye chanjá jabuache jetsacastígama, jtsapochócantscuana, mo chë tsëngaftangbe cuenta entsemna candelersë chabe puestentsana cuafstëjuanacá. Chca chanjama, tsëngaftanga juabnayana ndoñe chašmonjatrocace. <sup>6</sup> Pero tsëngaftangbe pavor quem tsabe soye šmontsebmoma: Tsëngaftanga šmonduábotena lempe ntšamo chë nicolaíta ca uabaina entsanga tmojtsamcá, ndayá átsnaca sënduábotena.

<sup>7</sup> Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentšana tsábá chamojábocana mo ayënjanyëngcá, chëngbiama chanjama chë nyetsca tescama yomna tsabe vida chamotsebmoma, y chca chënga mochántsemna mo chë nyetsca tescama yomna tsabe vida jtsebmoma betiyeshentsana cuafstesacá, chë entsanga sempre oyejuayënga mondbetsemnoca ca” —cha šonjanijana.

*Esmirnoca ošbuachiyëngcá enefjuanënga jábuayenama*

<sup>8</sup> Mëntsánaca cha šonjanijana: “Esmirna bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë nyetsca soyënga bojatsáyá y pochocayá, chë tonjanobaná y ndabiama Bëngbe Bëtsá tonjama cháuatayenama: <sup>9</sup> Atše sëndétatšëmbo tsëngaftanga tsá jabuache šmojasufima y ndbomnjëmënga šmommoma, pero ndegombre Bëngbe Bëtsábocana bëtscá tsabe soyënga šmondëtsóbmöñe. Y sëndétatšëmbo tsá bacá tsëngaftangbiama mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entsangcá; chca, chënga mondmëna mo Satanasbe entsangcá, nýe chábiöye jtseservënëse y jtsatschuanayëse.

<sup>10</sup> Ndoñe matauatjëngana chë ndoñe yapa bën y tsëngaftanga šmochjasufima, er Satanas echanjama tsëngaftanguentsënga báseftanga cárceloye inýenga chacmëtámia, jinýama ntsachetšá Cristbeñe ošbuáchiyana šmobomnama, padecena soyënguiñe šmojtsemna ora; y entsamna baseftayté jasúfriana. Sempre bëtscá ošbuáchiyana, y

ainaniñe bēts añemo šmochtsebmoma, masque jobanámna chacmotsamna, Cristbiam trabájaye causa. Chca chašmojtsamēse, atše chanjama tšēngaftanga chašmotsebmomama mo canye uacanana soycá, chē n̄yetsca tescama yomna tšabe vida.

<sup>11</sup> Chē jouenama tmojtsobenēnga, chamouena ndayá Espiritu chē ndayenache ošbuachiyēngcá enefjuanēnga yojtsētsētsnacá. Chē padecena soyēnguentšana tšabá chamojábocana mo ayēnjanayēngcá, ndegombre chēnga ndoñe queochátamna játauatjana n̄yetsca tescama castigánēnga jatsmēnama ca” —cha šonjaniyana.

*Pérgamoca ošbuachiyēngcá enefjuanēnga jábuayenama*

<sup>12</sup> Mēntšánaca cha šonjaniyana: “Pérgamo bēts pueblentse ošbuachiyēngcá enefjuanēngbeñe chaotsemándama uámama ichmonábioynaca mēntšá mabobema:

Mēntšá entsichamo chē n̄yets utoicajana puerta efšana espadēja entsatbēná: <sup>13</sup> Atše sēndētatsēmbo ntšamo yomna tšēngaftangbe oyenentše, canye luare ndayentše Satanás entšángbioye puerta iuamēnda. Masque chca, tšēngaftanga sempre n̄ye atše šmondēseservena, y ndocna te chešmáisayana átsbeñe ndoñe šmondošbuaché ca, ni mo Antipas, chē canye n̄yets tempo atšbe ustoná y atšbiam ndegombre oyebuambnayá, ín̄yenga tmonjanóba ora. Y lempe chca tojopasá tšēngaftangbe pueblentše, ndayentše Satanás bētsca entsana.

<sup>14</sup> Pero básefta soyēnga sēntsebmoma tšēngaftangbe contra jayanama: Chentše tšēngaftangbeñe báseftanga montsemna, soyēnga montsabuatambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entšángbioye jáingñama, chēnga chē ntšamo ndoñe tšabá yomncá chamotsamama; y chca, Balac tojanma chē ín̄yenga diosēnga yojamna ca imojanajuabná soyēnga jadórama uátšēmbona saná chē Israeloca entšanga chamosama, y shembása o boyabásaftaca bacna soyēnga chamotsamama. <sup>15</sup> Chēntšánaca ín̄yenga montsemna, y chēngna chē nicolaitēngbe buatēmbana soyēnguiñe mondošbuaché, y chca buatēmbana soyēnga ndoñe tšabá quenátsmēna. <sup>16</sup> Smochtsejuabnaye ntšamo šmojtsamama, chēngbioye tšēngaftangbeñe šmojtsēuantana ora, y chca jtsamana šmochjajbaná; er ndoñese, atše betscó tšēngaftangbioye chanjá, y chē chca buatēmbana soyēnguiñe ošbuáchiyana ndoñe tmonjajbanángaftaca chanjéntsja chē atšbe uayoicana endóbocana espadējaca.

<sup>17</sup> Chē jouenama tmojtsobenēnga, chamouena ndayá Espiritu chē ndayenache ošbuachiyēngcá enefjuanēnga yojtsētsētsnacá. Chē padecena soyēnguentšana tšabá chamojábocana mo ayēnjanayēngcá, chēngbioye maná chanjátšataye chamosama, chē celoca tandēse, ndayá Bēngbe Bētsá tempo entšángbioye ndoñe tonjin̄yñe; y canye f̄jantse ndētsētema chanjáyentšbuachiye, chēnga oyejuayēnga šmojábemama. Chiñe canye t̄sem uabaina echantsábemana; ndocná chē uabaina quenátabuatma, ndayá n̄ye chē chamojýēngaciñēnga ca” —cha šonjaniyana.

*Tiatiroca ošbuachiyēngcá enefjuanēnga jábuayenama*

<sup>18</sup> Mēntšánaca cha šonjaniyana: “Tiatira bēts puebloca ošbuachiyēngcá enefjuanēngbeñe chaotsemándama uámama ichmonábioynaca mēntšá mabobema:

Mēntšá entsichamo Bēngbe Bētsabe Uaquiñá, chē mo iñeshcá uafsná y mo entšējuaca jojona puerta chaotsebuashin̄yñyanama bronce shecuatšēnga bomná: <sup>19</sup> Atše sēndētatsēmbo ntšamo tšēngaftanga šmoyenama; sēndētatsēmbo ntsachetšá tšēngaftanga Bēngbe Bētsábioye y n̄yetscángbioye šmababuán̄yeshanama, ntšamo tšēngaftanga Bēngbe Bētsábeñe puerta šmošbuáchema, ntšamo chábioye šmoservénama, ntšamo tšēngaftanga ín̄yenga šmojuabuaache y ntšamo Bēngbe Bētsábeñe jtsobátmanēse becá šmojoboyá padecena soyēnguiñe; y sēntsetatsēmbo mora más bētsca tšabe soyēnga šmojtsama, ntšamo tšēngaftanga átsbeñe jtsosbuáchiyama šmonjanbojatšé orscama.

<sup>20</sup> Pero canye soye sēntsebmoma tšēngaftangbe contra jayanama: Tšēngaftangbeñe šmondēuantana chē shembása, mo chē bacna reiná Jezabelcá endmēnábioye. Chē shembása entsichamo Bēngbe Bētsabe juabna oyebuambnayá canmēna ca; pero chabe buatēmbana soyēngaca atšbe oservénēnga entsaíngña, shembása o boyabásaftaca bacna soyēnga chēnga chamotsamama, y chē ín̄yenga diosēnga yojamna ca imojanajuabná soyēnga jadórama uátšēmbona saná chamosama. <sup>21</sup> Cha sēn̄juená atše ch̄jacastíga ca, chca juabnayana ndoñe tonjatrocace, y canye boyabásaftaca bacna soyēnga amana ndoñe tontsajbanase. Cha jacastígama batšá sēn̄jobatma, nderado chca amana nan̄jatróca, pero ndoñe chenátšbošena. <sup>22</sup> Mora atše chanjama bēts šocana cha chaboshachama, y chē cháftaca bacna soye tmojamēnga, juabnayana ndoñe tmonjatrocá y chca jtsamana ndoñe tmonsajbanase, chēngbiam chanjama puerta chamosufrima; <sup>23</sup> y chē shembásabe básēnga chantsēbaye. Chca, n̄yetsquénache ošbuachiyēngcá enefjuanēnga mochántsetatsēmbo, ndayá entšanga juabniñe y ainaniñe tmojuabnacá atše

tsuábuatmama; y cada ona tsëngaftanguentšá, chca bacna soye cháftaca tojamá, ntšamo ibojtsomerecencá chanjacastiga.

<sup>24</sup> Pero tsëngaftangbentše, ínŷenga Tiatira pueblentše šmojtsemnënga, chë shembásabe buatëmbana soyënguife ndoñe šmontsošbuachenga, y chë ínŷenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tsëngaftanga ndoñe quebochatamënda inŷe más toto soye chašmotsamama. <sup>25</sup> Pero nŷe sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábocana šmojóyëngacñe soyënga yomncá, atše quem luaroye jesabámëntscuana.

<sup>26</sup> Chë padecena soyënguentšana tsábá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nŷetsca mándayëngbentša entšángbeñe jtemándayama, <sup>27</sup> ntšamo atšbe Taitá chabe obenana šojatšetacá; y chënga entšángbioye puerte obenánaca mochántsamëndaye, mo canŷe hierro varëfjaquécá, y chëngbe contra chamojtsamëngbioye mochántsapochocaye, mo nŷe matbajënga tmojtsëtsjanjñacá. <sup>28</sup> Y chë jabínŷnama ora bínŷnaye estréllnaca chanjátšataye.

<sup>29</sup> Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

### 3

*Sardisoca ošbuachiyëngcá enefjuanënga jábuayenama*

<sup>1</sup> Mëntšánaca cha šonjaniyana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë Bëngbe Bëtsabe canŷsëfta espíritënga y chë canŷsëfta estrellënga bomná: Atše lempe sëndëtatšëmbo ntšamo tsëngaftanga šmoyenama; atše sëndëtatšëmbo tsëngaftangiama ínŷenga tša jtsichámuana Bëngbe Bëtsá jaserviama bëtscá šmojtsama ca, pero ndegombre tsëngaftanga nŷe batsatema šmontsama, y chca, chabiamama mo obanëngcá šmondmëna. <sup>2</sup> Botamana šmochjenóbobonŷe y más šmochtsama chë Bëngbe Bëtsá jaserviama cabá šmondama básefta soyënga. Ndoñe yapa quenátajama chë tsabe soyëgnaca chašmotsajbanama, er atše sënjinŷe chë Bëngbe Bëtsábioye jaserviama ntšamo jtsamëse šmoyencá, atšbe Bëtsabiama ndoñe yapa tsábá quenátsmëna. <sup>3</sup> Asna, šmochtsenójuabnaye ndayá Bëngbe Bëtsábocana šmojóyëngacñama, y chabiamama šmojouena soyënguifñaca. Ntšamo chë soyënga yomncá šmochtsiyena, juabnayana šmochjatróca y šmochjontša bëtscá jtsamana Bëngbe Bëtsá jaserviama. Ndoñe tsábá cach tsëngaftanga chašmonjenójuabose y juabnayana ndoñe chašmonjatrocace, nŷe ndeolpe chanjá tsëngaftangbioye, mo canŷe atbëbanacá, chabiamama ndocná tontsejuabná ora, y ndegombre tsëngaftanga ndoñe quešmochátstatšëmbo mocna ora atše tsëngaftangbioye chjama.

<sup>4</sup> Masque chca, Sardisentše tsëngaftangbeñe básefta entšanga mondmëna, chënga ndoñe chematajbaná oyenana tsabe soyënga jtsamëse, bacna soyënga játamama. Chëngna átšetaca mochántsjana uafjantsëjuangá uichëtjonënga, chënga chca mercedo montsebuajónayeca. <sup>5</sup> Chë padecena soyënguentšana tsábá chamojábocana mo ayëñjanayëngcá, chca uafjantsëjuangá uichëtjonënga mochántsemna, y chëngbe uabaina ndoñe quichat-sjuána chë tsabe vida mochjónŷenëngbe uabaina enduábemana librësëntšana, ndayá atše, Bëngbe Bëtsabe delante y chabe angelëngbe delante, chënga atšbe entšanga imomna ca chanjayana.

<sup>6</sup> Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

*Filadelfioca ošbuachiyëngcá enefjuanënga jábuayenama*

<sup>7</sup> Mëntšánaca cha šonjaniyana: “Filadelfia bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë uamaná y ndegombre oyebuambnayá, chë jtemándayama puerte obenana bomná, ntšamo Rey David enjanbomncá, chë nda ndayá chaotsemnana tojamandá ora, ndocná ntobenana jamama chca ndoñe chaondëtsemnana, y ndayá ndoñe chaondëtsemnana tojamandá ora, ndocná ntobenana jamama aife chaotsemnana: <sup>8</sup> Atše lempe sëndëtatšëmbo ntšamo tsëngaftanga šmoyenama. Minŷënga, atše sënjama tsëngaftanga bëtscá tsabe soyënga chašmotsebomnana, y ndocná quenátobena jamama chca ndoñe chaondëtsemnana; y chca entsemna mo atše tsëngaftangiama canŷe bësáša cuaftatëfjácá, y chëša jtatámiamama ndocná quenátobena. Atše sëndëtatšëmbo tsëngaftanga batsatema obenana šmobomnana, pero šmojouena ntšamo jtsamama tcbonjauyancá, y ndocna te chešmátayana atšbe entšanga ndoñe šmondmëna ca. <sup>9</sup> Atše chanjama, chë mo Satanasbe entšangcá imomnënga, nŷe

chábioye jtseservénese y jtsatschuanayése, chë judiënga imomna ca ichámënga, pero chë Bëngbe Bëtsabe bocacana entsängcá ndámënga y bosterënga, chënga tsëngaftangbiöye chamua y tsëngaftangbe delante chamoshamentšë, tsëngaftangbiama respeto jinjányiyama, y chca, chënga chamotsetátšëmbo atše sempre chababuánýeshanama. <sup>10</sup> Atše tcbon-janamëndá, Bëngbe Bëtsabeñe jtsobátmanése, lempe chašmotsoboyá padecena soyënguifne, y tsëngaftanga chca šmonjama. Chíyeca, atše puente tsábá cbóchántsanýena, chë quem luarentše oyenënga nyetscanga jasúfriama y padecena soyënguifne jtsemnma chaojtsemna ora, Bëngbe Bëtsabeñe aifne o ndoñe mondošbuáchema jinjányiyama.

<sup>11</sup> Cachiñe quem luaroye betsoo chanjésabo. Sempre šmochtsama ntšamo mora šmondamcá, y Bëngbe Bëtsabiocana šmojóyëngacñe soyënga šmochtsinýena; chca ndocná chaondobená ndayá jamana, y chë sóyeca chaoma tsëngaftanga ndoñe chašmondóyëngacñe ndayá Bëngbe Bëtsá chë chábioye jtseservénama ndoñe tmonsajbanángbiöye yochjatšataycá, chëngbe uacanana soye. <sup>12</sup> Chë padecena soyënguentšana tsábá chamojábocana mo ayëñjanayëngcá, chëngbiama atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe Bëtsabëntšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsabiocana. Y chëngbeñnaca chanjuábema atšbe tsëm uabaina. Lempe chca chanjama jinjányiyama chënga Bëngbe Bëtsábenga mochtsemnma.

<sup>13</sup> Chë jouenama tmojtsoebenënga, chamouena ndayá Espiritu chë ndayenache ošbuachiyëngcá enefjuanënga yojsšetsëtsnacá ca” —cha šonjaniyana.

#### *Laodiceoca ošbuachiyëngcá enefjuanënga jábuayenama*

<sup>14</sup> Mëntšánaca cha šonjaniyana: “Laodicea bëts puebloca ošbuachiyëngcá enefjuanëngbeñe chaotsemándama uamana ichmonábioynaca mëntšá mabobema:

Mëntšá entsichamo chë sempre Ndegombrá endmëná, chë Bëngbe Bëtsabe soyëngama ndegombre oyebuambnayá, y chë ndábeyeca Bëngbe Bëtsá quem luare tojanmá: <sup>15</sup> Atše lempe sëndëtatšëmbo ntšamo šmoyenama. Atše sëntsetatšëmbo tsëngaftanga ndoñe yapa šmontseboše Bëngbe Bëtsá jasérvíama, pero Bëngbe Bëtsabe buayenana soyënga ndoñe lempe šmontsaboté. Y chca, nýe batsatema šmojtseboše Bëngbe Bëtsá jasérvíama; chca, tsëngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sëntseboše tsëngaftanga chašmotsemna mo ntšniñiye o shécbaniye buyeshcá, tsábá jtsamése o tondaye! <sup>16</sup> Chca, tsëngaftanga tibiye buyeshcá šmondmëna, y ndoñe quešmátsboše bëtscá jamama, pero Bëngbe Bëtsabe soyënga ndoñe lempe šmontsaboté. Chíyeca atše sëntsejuabná jtsëbatena, mo nda tibiye býueshe tojtšbuashëtjácá, chcaye ndoñe bondogustana causa.

<sup>17</sup> Er tsëngaftanga jtsichámuauna bomñënga šmomna ca, puente tsábá šmojábocana y tondaye cmontsabuáshebena ca, pero ndoñe quešmátstatšëmbo Bëngbe Bëtsabe soyënga bëtscá cmojtsabuáshebena. Chca, tsëngaftanga šmontsemna nýa ndoñe tsábá, inýënga ngmënanaca chacmotsabamna, mo ndbomñëjemëngcá, mo jtanëngcá, Bëngbe Bëtsabe soyëngama ntsošertancá, y mo enašëngcá, bëtscá Bëngbe Bëtsabe soyënga ntsebomuncá. <sup>18</sup> Chíyeca cbabuayená, átsbëntšana chašmuatsjinýe chë Bëngbe Bëtsabe soyënga y uamana soyënga, mo chë ena castellano jabemama, inéjána fjëchnënguëse castellano átsbioye šmojtsonštšabuamnañcá. Tsëngaftanga Bëngbe Bëtsabe delante mo enašëngcá šmondmëna, er cha endonýá chë ba bacna soyënga ntšamo tsëngaftanga šmojtsamcá. Šmochjaleséncia atše chacbëjabuache tsëngaftanga Bëngbe Bëtsabe bominiñiye tsábënga chašmotsemnma, mo juichëtjuama uafantse entsáyá átsbioye šmojtsantsabuamnañcá. Chca šmochjama, tsëngaftanga Bëngbe Bëtsabe delante ndoñe chašmondëtsëuatjama. Šmochjaleséncia atše chacbëjabuache tsëngaftanga Bëngbe Bëtsabe soyëngama chacmósertama, mo tsëngaftanga bominiñe šocanama šhnana átsbioye šmojtsonštšabuamnañcá. Chca šmochjama, Bëngbe Bëtsabe soyëngama puente tsábá chacmósertama.

<sup>19</sup> Atše chë sëndábabanýeshanënga sëndbaucácana y sëndbábuayenaye. Chíyeca, lempe ntšamo šmojobenacá šmochtsama Bëngbe Bëtsá jasérvíama, y juabnayana šmochjatróca, y nyets tempo puente šmochtseboše Bëngbe Bëtsá jtseservénana. <sup>20</sup> Nderado canýe tsabe amigo yebnoye tojabo y tojachembo, tsëngaftanga šmojouenése y bësása šmojebiatëfjése, cha jamashënguana, y canýiñe cháftaca joyejuayana y jasana. Cachcá, atše entsänga sëntschambuana chašmoleséncia chëngbe ainaniñe jtsiyenama. Nderado nda šojóyeunase, atše chanjámashëngo chabe ainaniñe jtsiyenama, y nyets tempo cháftaca canýiñe mo canýacá chanjëftsemna.

<sup>21</sup> Chë padecena soyënguentšana tsábá chamojábocana mo ayëñjanayëngcá, atše chanjama chënga puente bëtšëtsanga chamotsemnma ntšamo atše sëndmëncá, y

átseftaca chamótbemama, atšbe uámana tbemanentše jtsemándayama, ntšamo atše atšbe uayayéngbioye sēnjayēñjanacá, y atšbe Taitáftaca chabe uámana tbemanentše tijotbemcá.  
<sup>22</sup> Chē jouenama tmojtsobenēnga, chamouena ndayá Espiritu chē ndayenache ošbuachiyēngcá enefjuanēnga yojtsētsētsnacá” —cha šonjaniyana.

## 4

*Chē Ainēnga Bēngbe Utabnabe uámana tbemanentša natsana imojtsechuanaye*

<sup>1</sup> Chentsana mo otjenayoquēcá sēnjáninīye. Sēnjanrrepará y sēnjáninīye celoca canīye bēšása enjētsatēfina, y chē natsana sēnjanuena oyebuambnayana, chē enjamna mo canīye trompetēfjua cuafjuajatētcá, mēntšá šonjētsatsaye: “Moye másēngo, atše chochanjinīyīye ntšamo más chcoye yochjopasacá ca.”

<sup>2</sup> Cachora, chē Uámana Espiritbeyeca, mo atšbe ainana celoca cuaftsemncá atše sēnjanoquedá, y sēnjáninīye celoca enjētsemna canīye reybe uámana puesto, y chentše canīya enjētsetbemanana. <sup>3</sup> Chentše enjētsetbemaná enjamna, puerte tēshinīná mo jaspe ndētsbecá, puerte buanganá mo cornalina ndētsbecá, y chē uámana puesto shēconana canīye tsēfucúacuato enjamna, y enjētsebuashinīyīyana mo canīye esmeralda ndētsbecá. <sup>4</sup> Chē reybe uámana puesto juachajana, inīye uta bnētsana y canta puesto sēnjáninīye, y chiñe uta bnētsana y canta bētsējmēnga amēndayēnga monjētsetbiamana, uafjantsējuangá uichētjonēnga, y castellano coronēshangá monjētsabestšajona. <sup>5</sup> Chē uámana puestentšana enjētsobocana tciuinīyējēnga, becá shauenanana y juesasanana; y chē uámana tbemaniñentša natsanoicna, canīysēfta uajuinīyanēsha enjētsangbototjuana; chē uajuinīyanēshangá entsayana chē Bēngbe Bētsabe canīysēfta espíritēnga. <sup>6</sup> Y chē uámana puestentša natsanoica enjētsemna mo canīye mar bejaycá, tēshinīniye mo canīye cristal ca uabaina ndētsbecá.

Chē luariñe tsēntsaca, chē uámana puesto enjētsemnentše y chē shēconánējana monjētsemna canta Ainēnga, nyētsañe fšnēbēngaca, natsanoica y stētsōica. <sup>7</sup> Chē natsana Ainá enjamna mo canīye leoncá, chē inīye Ainá mo canīye torošcá, chē inīye Ainá enjānbomna mo canīye entsábe jubiacá, y chē inīye Ainá mo canīye águila tojtsongüēfjnacá. <sup>8</sup> Chē canta Ainēnga, cada ona chnēnguana juatēngmiáša enjanábomna, y tsoicajana y shjoicajana nyētsañe fšnēbēnga monjānbomna. Y chēnga nyēts tempo, ntjochnacá mēntšá monjānichamo:

¡Uamaná, Uamaná, Uamaná, Bēngbe Utabná,  
 Bēngbe Bētsá nyēts obenana bomná,  
 nda enjamná, endmēná y sempre echanjēftsemná ca!

<sup>9-10</sup> Chca chē Ainēnga Bēngbe Bētsá bētscá tmontanchuá, Bēngbe Bētsá chē uámana puestentše tbemaná, chē nyēts tempo y nyētsca tescama oyená. Chēnga puerte respeto chabiamana monjētsebomna y bētscá tmontanchuá. Cada ora chēnga chca tmonjanma ora, chē uta bnētsana y canta bētsējmēnga amēndayēnga, chē uámana puestentše tbemanabe shecu-atšentše joshamentšiyana y chábioye jtsatschuanayana, chē coronēshangá chē natsanoica jutšanana, y mēntšá jtsichámuana:

<sup>11</sup> Aca nyēts mercedo condētsobuájoñe, Bēngbe Utabná y Bēngbe Bētsá,  
 entsānga chamotsinīyanīyama, aca puerte bētsá comnama, y chamotsichamo aca nyēts  
 respeto buajoná comna, y nyēts obenana bomná comna ca,  
 er aca nyētsca soyēnga tcojama;  
 aca icnabóseyeca chē soyēnga yojtsemna y aca chca tcojanma ca.

## 5

*Chē uabemana uándmanana tsbuanácha y chē Oveshatema*

<sup>1</sup> Chē uámana puestentše enjētsetbemanabe catšbioica cucuatšīñe canīye uándmanana tsbuanáchanaca sēnjáninīye, y nyētsañe enjētsabemana tsoicajana y shjoicajana, y canīysēfta tsengáše sellēngaca enjētsajandmanana. <sup>2</sup> Y canīye ángel puerte obenana bomná sēnjáninīye, y cha mēntšá enjētsayebuache: “¿Nda mercedo yobuájoña, quem uándmanana tsbuanácha jutēfjonama y chē sellēnga jutsēcama ca?”

<sup>3</sup> Pero, ni celoca, ni quem luarentše, ni quem luarentša jashenoye, ndocná quen-jatsmēna obenánaca chē uándmanana tsbuanácha jutēfjonama, ni juinīyama. <sup>4</sup> Y atše puerte sēnjánenobošachna, er ndocná ntjónýnana mercedo buajoná chē uándmanana tsbuanácha chautēfjonama, ni chauinīyama. <sup>5</sup> Pero canīya chē bētsējmēnguentsá šonjaniyana: “Ndoñe más matenóbošachena; mouena, chē Judabe pamillentsá, León ca uabobainá, mando y obenana bētsēbomnama, chē rey Davidbentsana Entšá, tonjayēñjaná; cha entsobena chē uándmanana tsbuanácha jutēfjonama, y chē canīysēfta sellēnga jutsēcama ca.”

<sup>6</sup> Chora sēnjáninīye, chē uámana puesto y chē canta Ainēnga y chē bētsējmēngbe tsēntsaca, canīye Oveshatema tsanana, pero enjētsinīyana mo cuaftsobacá. Chē Oveshatema enjānbomna canīysēfta tsējonēše y canīysēfta fšnēbé. Chē canīysēfta fšnēbé monjaninīyīyá chē Bēngbe



Bètsabe canýsèfta espíritènga, chë Bèngbe Bètsá nýets quem luarèjana tojánichamonga. <sup>7</sup> Chë Oveshatema tonjanobeconá y chë uándmanana tsbuanácha tonjanaca, chë uámana puestentse themanabe catsbioica cucuaténtšana; <sup>8</sup> y chabe cucuatshiñe tonjanaca ora, chë canta Ainènga y chë uta bnètsana y canta bètsèjémènga amèndayènga chë Oveshatembe shecuaténtse tmonjanoshamentse. Nýetscanga monjétsètbèna arpangá y castellano cop-benga jútjena inciensiyeca; chë copbenga inciensiyeca enjamna chë Bèngbe Bètsabe entsànga tmojayana palabrènga, cháftaca jencuéntama ora. <sup>9</sup> Y quem tsèm canto montsancántaye: Aca mercedo condètsobuájoñe, chë uándmanana tsbuanácha chacuacama y chë sellènga chacutsècama;

er acbe buiñe juabuáshanese tconjanóbana, y chca enjamna mo crocénana cuafjètsajocá, Bèngbe Bètsabiana chamotsemnana, entsànga nýetsca cachca buiñe bomnènguentsana, nýetsca biyana bomnènguentsana, nýetsca canýe entsanguentsana, y nýetsca mándayèngbentsa entsanguentsana.

<sup>10</sup> Aca tcojama chènga chamotsobena ácaftaca jtsemádayama y uámanènga chamotsemnana, Bèngbe Bètsábioye mo bachnangcá chamotseservénama, y quem luarentse chènga montsemánda ca —chènga monjétserversiaye.

<sup>11</sup> Y chca sènjétsonýaye ora, mallajta angelèngbe oyebuambnayana sènjanuena, y chènga monjétsemma chë uámana puestentse, chë Ainènga y chë bètsèjémènga amèndayèngbe shèconana. Nýetsá bètsá angelènga monjétsemma, corente mallajta; <sup>12</sup> y chènga mèntšá monjétsayebuache:

jChë Oveshatema cuafjobacá endmèná, mercedo endètsobuájoñe, nýets obenana, nýets bomnana, nýets osertánana y nýets añemo chaotsebmnama, y entsànga chabiana chamotsichamo cha nýets respeto buajoná yomna ca, y chamotsinýanýnama cha puerte bètsá y uamaná yomnama, y nýetscanga chamotsatschuanama ca! —chènga monjétsayebuache.

<sup>13</sup> Y sènjanuena, lempe ntšamo Bèngbe Bètsá tojanmcá aina soyènga, celoca, quem luarentse, quem luarentša jashenoye y chë mar béjayoca, chèngnaca mèntšá monjétsichamo: jChë uámana puestentse themanábioye y chë Oveshatema nýetscanga nýets tempo y nýetsca tescama chamótsatacheuanaye

y chamotsichamo chata puerte uámanata y nýets respeto buajonata ibomna ca, y chamotsinýanýná chata puerte bètsétsata y obenata bétsemnana ca!

<sup>14</sup> Y chë canta Ainèngna monjétsichamo: “Chca chaotsemna ca.” Y chë bètsèjémènga amèndayèngna tmonjanoshamentse y chátbioye monjétsatacheuanaye.

## 6

### *Chë Oveshatema chë canýsèfta sellènga tonjanètsécá*

<sup>1</sup> Chentšana más sènjáninye; chë Oveshatema chë canýsèftentsana natsana sello tonjanètsécá ora, sènjanuena canýa chë canta Ainènguentsana puerte jabuache, mo cuafjajuesascá, mèntšá enjétsichamo: “¡Mabo ca!” <sup>2</sup> Sènjannrepará y sènjáninye canýe fjtante couaye, y chábèñe enjetsenjaquená canýe arquèja enjétsatbèna. Chábioye canýe coronèsha tmonjaníyè, y mo canýe ayèñjanayacá tonjétsanbocna, y cabá más jatsyénjanámna.

<sup>3</sup> Chë Oveshatema chë inýe sello tonjanètsécá ora, sènjanuena chë inýa chë canta Ainènguentsana mèntšá enjétsichamo: “¡Mabo ca!” <sup>4</sup> Y inýe couaye tonjánbocna, canýe buanganá; y chë enjetsenjaquená obenana tonjanóyèngacñe jamama chë fshantsentša natjèmbana vida chaotsopochocama, entsànga chamotsenóbama; y canýe bèts espadèja tmonjanoyé.

<sup>5</sup> Chë Oveshatema chë inýe sello tonjanètsécá ora, sènjanuena chë inýa chë canta Ainènguentsana mèntšá enjétsichamo: “¡Mabo ca!” Sènjantonjéšé y canýe ftsenga couaye sènjáninye, y chë enjetsenjaquená canýe romanèsha enjétsètbèna. <sup>6</sup> Y chë canta Ainèngbeñe canýe oyebuambnayana mèntšá sènjanuena: “Nýe canýe kilo trigo canýe tesca trabajuama, y unga kilo cebadá canýe tesca trabajuama; pero chë aceitíye y chë vínoyna ndoñe cattsepochoçaye ca.”

<sup>7</sup> Chë Oveshatema chë inýe sello tonjanètsécá ora, chë ústonoca Ainá enjétsichamo: “¡Mabo ca!” <sup>8</sup> Sènjantonjéšé y canýe shatsèsiye couaye sènjáninye; chë enjetsenjaquená Obanana ca enjanabaina, y stètsioica bonjétsèstona canýa, Obanènga imomna luare ca uabainá; y chátbioye obenana tmonjanatšatá cántañentsana canýentse quem luarentse jtsepochoçama, chentša entsànga jtsepochoçase, entsànga tmojtsentsjanama, bèts shèntsànèngaca, šocanèngaca y quem luarentša tsátjaye bayèngaca.

<sup>9</sup> Chë inýe sello tonjanètsécá ora, sènjáninye chë altarentša tajsoye chë tmojanóbànèngbe espíritènga, chë Bèngbe Bètsabe palabra entsànga abuayinayama tmojanóbànènga. <sup>10</sup> Chora

chënga tmonjanontsé tša uayebuáchana: “Uamaná y ntšamo tojašebuachenacá lempe amá bēngbe Nduiño, ¿ntseco quem luarentša entsangbiana cochjayana ndoñe tšabá tmonjamama, y chē bēngbioye obanayama cochjácastigaye ca?” <sup>11</sup> Chentsšana nyētscángbioye uafjantse entsáyá tmonjaníyē y tmonjanéyana batsatema más chamobatmá ca, chē cachēngcá Cristbeyeca catšátanga y oservénēnga, chē cachēngcá mochjanóbanēnga, nyētscanga choca chamojtsemnēntscuana.

<sup>12</sup> Y más sēnjáninýe; chē inýe sello cha tonjanētsēcá ora, jabuache fshantse tontsanangmēmmana; shinýe tontsanftsénganga, mo chē obaná tojtsemnama juichētjuama entsáyacá, y nyēts juashcona mo buiñcá enjétsinýa, <sup>13</sup> y estrellatēmēnga celocana fshantsoye tontsantquēcjana, mo canýe higo betiye jabuache bínýiaca tojtshatiyeyna ora, chē nguēfshna higuēbēnga cuafjatquēcjaná. <sup>14</sup> Y celoca luare tontsanenatjēmba mo canýe tsbuanácha cuafjuandmanacá, y nyētsca tjañe y bėjayoca fshantsēnga, chē ndayentšē enjamnentšana tontsanojuaná; <sup>15</sup> y nyētscanga, fshantsoca reyēnga, uámanēnga, soldadēngbe amēndayēnga, bomnēnga, obenana bomnēnga, y nyētscanga chē nyēts tempo nýe inýabíama oservénēnga y chē cachēngbíama trabájayēngnaca, chē cuevēshēnguiñe y bēts ndētsbenguenache tjañe tmonsanoítana; <sup>16</sup> y chē tjañēngoye y chē ndētsbēngoye montsanichamo: “¡Bēngbioye šmotsētebuantsá y šmotsaitame, chē uámana puestentšē themanabe bomínýentšana, y chē Oveshatembe uabouana castigo, cha bēngaftaca tbojetnama, bēngbeñe ndoñe chaondētsemnama! <sup>17</sup> Er chē uachuana te chabe castigo jtsebinýnama te tojóshjango; y mora ¿nda nanjobenaye chē sóyeca ndoñe chamondētsepochochama ca?” —chēnga montsanichamo.

## 7

*Chē Bēngbe Bētsábíoye oservénēnga chē uabouana castigüēntšana mochántsatsebacana*

<sup>1</sup> Chca tonjanopasá chentsšana, canta angelēnga sēnjánanýe, monjétsatsana chē quem luarentša canta opochócayenache; chēnga ndoñe quemēnjatanleséncia chē canta binýiēnga jtsebinýnama, ndoñe chaondētsebinýiyama, ni fshantsentšē, ni mar bėjayoca, ni ndocna betiyeshēnguiñe. <sup>2</sup> Inýe ángelnaca sēnjáninýe, shinýe bocana luaroicana enjetsabó, y chē Bēngbe Bētsá Ainabe sello enjétsiyēboye. Chē ángelna chē inýe canta angelēngbioye, ndēmuanýēngbioye obenana tmojanatšatá chē fshantsentšē y mar bėjayoca lempe jtsepochochóca, chēngbioye jabuache tonjánabachembo: <sup>3</sup> “¡Tondaye šmatjapochóca, ni fshantsoca, ni mar bėjayoca, ni betiyeshēnguiñe, chē Bēngbe Bētsabíama oservénēngbioye chē sélloca juentsaca fchayauinýnanantscuana, ndoñe chamondētsapochocama ca!”

<sup>4</sup> Y sēnjanuena buétanga chē sélloca tmojánauinýnanayama: canýe patse, canta bnētsana y canta uaranga entsānga uinýnanánēnga nyētsca Israeloquentša bēts pamillanguentšana.

<sup>5</sup> Judabe pamillentsšana, bnētsana uta uaranga uinýnanánēnga;

Rubenbe pamillentsšana, bnētsana uta uaranga;

Gadbe pamillentsšana, bnētsana uta uaranga;

<sup>6</sup> Aserbe pamillentsšana, bnētsana uta uaranga;

Neftalibe pamillentsšana, bnētsana uta uaranga;

Manasesbe pamillentsšana, bnētsana uta uaranga;

<sup>7</sup> Simeonbe pamillentsšana, bnētsana uta uaranga;

Levibe pamillentsšana, bnētsana uta uaranga;

Isacarbe pamillentsšana, bnētsana uta uaranga;

<sup>8</sup> Zabulonbe pamillentsšana, bnētsana uta uaranga;

Josebe pamillentsšana, bnētsana uta uaranga;

y Benjaminbe pamillentsšana, bnētsana uta uaranga entsānga.

*Chē mallajta entsānga uafjantsējuangá uichētjonēnga*

<sup>9</sup> Chentsšana, sēnjanrrepará y mallajta entsānga sēnjánanýe, ndocná quentaisobenaye jacúntana, nyētsca mándayēnguentšana, nyētsca cachca buiñe bomnēnguentšana, nyētsca canýe entsānguentšana, y nyētsca biyana bomnēnguentšana; chēnga monjétsatsana chē uámana puesto chē Oveshatembe natsanentšē, uafjantsējuangá uichētjonēnga y ramēshangá monjétsētbēna. <sup>10</sup> Nyētscanga tša monjétsayebuache:

¡Bēnga atsebacyana endobá, Bēngbe Bētsá,  
chē uámana puestentšē entsethemanábentšana,  
y chē Oveshatēmbentšana ca!

<sup>11</sup> Y nyētsca angelēnga, chē uámana puesto y chē bētsējēmēnga amēndayēnga y chē canta ainēngbe shēconana monjétsatsanēnga, chē uámana puestentša natsanoica tmonjanoshamentšē, fshantsóntsoñe jotsejbénase, y Bēngbe Bētsá tmonjanadorá, <sup>12</sup> mēntšá jayanēse:

¡Chca chaotsemna!

Bëngbe Bëtsábioye nÿets tempo y nÿetsca tescama chamotsadorana y nÿets ainánaca cha chamotsatschuaná.

Entsanga chamotsinÿanÿná cha puerte bëtsá y uamaná bétsemnama; cha endmëna nÿets osertánana bomná, y nÿets respeto buajoná, y nÿets obenana y añemo bomná.

¡Chca chaotsemna ca! —chënga monjétsichamo.

<sup>13</sup> Chentšana, canÿa chë bëtsëjemënguentsá tonjanoyebuambá y ñonjantjá: “¿Ndëmuanyënga imomna chë uafjantsëjuangá uichëtjonënga, y ndëmocana tmojabo ca?”

<sup>14</sup> “Taita, aca chëngbiana cotátsembo ca” —atse sënjanjuá.

Y cha ñonjanianya: “Chënga montsemna chë jabuache ngmenënguentsana tsabá tmojábocanënga; chë Oveshatema chëngbiana tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsaboshabé y chë Oveshatembe buiñeca tmojtabofjantse.

<sup>15</sup> Chýeca chënga chë Bëngbe Bëtsabe uámana puestentša natsanoica montsemna, y chábioye nÿets tempo chabe delante mondëservena, y chë uámana puestentše entsetbemaná, chëngbenache jtsemnëse, chënga echántsanÿena, mo cuafjutsebotscá.

<sup>16</sup> Ya ndoñe más shëntsana, ni uajuendayana quemochátbomna;

shinÿama, ni yapa jënÿama ya ndoñe más quemochátssufrina;

<sup>17</sup> er chë Oveshatema, chë uámana puestentša natsana tsëntsaca entsemná,

chëngbioye mo oveshëngcá echantsabuajënÿa, y echanjunatse béjaye vida bomniye yóbocana luaroye,

y Bëngbe Bëtsá echanjama ya ndoñe más ngménana chamondëtsebomnama ca” —cha ñonjanjuá.

## 8

### *Chë ústonoca sello*

<sup>1</sup> Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentétsënëna mo tsëntsaca hora nÿetsá.

<sup>2</sup> Chora sënjanianÿe chë canÿsëfta angelënga, chë Bëngbe Bëtsabe delante monjétsatsanënga; chëngbioye canÿsëfta trompetëfjuangá tmonjanianÿe.

<sup>3</sup> Chentšana inÿe ángel tonjánashjango, canÿe castellano matbëtémaca incienso jauinÿiyama, y altar natsanoica tonjantsá; chábioye bëtscá incienso tmonjanoyé chaojuinÿema chë castellano altaroca, chë uámana tbemana natsanoica enjëtsemnoca. Chë ángel incienso tonjanjuinÿe Bëngbe Utabná jëtschuayama, canÿiñe nÿetsca chë Bëngbe Bëtsabe entsanga tmojoyebuambá palabrëngaca, cháftaca jencuéntama ora. <sup>4</sup> Y chë incienso juinÿnentsá ngona, chë ángelbe cucuatšentšana Bëngbe Bëtsabe delante tonjanótsjua, canÿiñe chë Bëngbe Bëtsabe entsanga cháftaca jencuéntama palabrëngaca. <sup>5</sup> Chentšana chë ángel chë incienso jauinÿiyama matbëtéma tonjanca, chë altarentša chebánbengaca tonjanajutjé, y quem luaroye tonjanëtsana. Chora enjëtsemna tša juesasanana, corente shauenanana, bëtscá tcuinÿënga, y quem luare tontsanangmëmana.

### *Chë trompetëfjuangá*

<sup>6</sup> Chora chë canÿsëfta angelënga, chë canÿsëfta trompetëfjua uabomnënga, tmonjanoprontá chëfjuangá juajatëtama.

<sup>7</sup> Chë natsana ángel chabe trompetëfjua tonjanájetëto, y quem luaroye tmonjanëtsana bëntstá y iñeshe, canÿiñe buiñeca. Ungañentšana canÿëntse quem luarentše tontsanjuinÿe, úngañentšana canÿëntse betiyeshënguñe y nÿetsca nguëfshna shacuanënguñinaca.

<sup>8</sup> Chë inÿe ángel chabe trompetëfjua tonjanájetëto, y chora chë mar béjayoye tmonjanëtsana canÿe soye mo canÿe bëts tjañe tojtsangbototjuancá, y chë mar béjayiñe úngañentšana canÿëntse buiñe tontsanóbema. <sup>9</sup> Chë mar béjayiñe vida imobomnëngbeñe úngañentšana canÿëntse tontsanopochocá, y chë barquënguëntšnaca úngañentšana canÿëntse.

<sup>10</sup> Chentšana chë inÿe ángel chabe trompetëfjua tonjanájetëto, y canÿe bëts estrella, mo canÿe uajuinÿanëshacá enjëtsgbototjuana, celocana tonjanótsatse chë úngañentšana canÿëntse béjayënguñe, y béjaye óbocanénache. <sup>11</sup> Chë estrella enjanabaina Untjana ca; y chë úngañentšana canÿëntse buyeshënguñe untjiye tontsanóbema, y chë untja búyeshe causa ba entsanga tmonjanóbana.

<sup>12</sup> Chë inÿe ángel chabe trompetëfjua tonjanájetëto, y chora tontsanóndbema chë úngañentšana canÿëntse shinÿiñe, y chë úngañentšana canÿëntse juashconiñe y chë estrellënguñinaca. Chca, nÿetsca chentša ungañentšana canÿëntse ibetiñe tonjanoquedá, y chë

causa ndoñe quemëntétsebinñaye posufta horëntscuana, bnèté canta hora y ibeta canta hora.

<sup>13</sup> Chentšana, sënjanrrepará y sënjanuena canye águila, tsbanánoca celoca enjetsongüefná, jabuache mëntsa enjétsichamo: “¡Tsa lastema, tsa lastema, tsa lastema quem luarentsa entsangbiama, chë inñe trompetéfuangá chë inñe unga angelénga chamojuájatêto ora ca!”

## 9

<sup>1</sup> Chentšana chë inñe ángel chabe trompetéfuua tonjanájatêto, y sënjaninñe canye ángel quem luaroye jastjanguana y enjétsinña mo canye estrella celocana quem luaroye cuaftsotsatsancá; y moye tonjánashjango ora, tmonjanoyé chë uabouana tboca atëfñentša llavéjfa. <sup>2</sup> Chë uabouana tboca atëfñentše tonjánatêfjo, y chentšana becá ngona tonjanótsjua, mo bëts hornentša ngoncá; y chë uabouana tboye atëfñentše ngona causa shinñe tontsanibétata y nyets celoca ena ngona enjésemna. <sup>3</sup> Chë ngonentsšana ba tsátjaye chapulinga tmonjánbocana, y nyets quem fshantsëjana tmonjánashana; y chëngbiroye obenana tmonjanátatá, chánaca jándbemama, mo chë juetjuama alacranënge obenancá. <sup>4</sup> Chëngbiroye tmonjanamëndá tondaye ntjándbemana chë shacuanënguifne, ni ndocna nguëfshna matënguifne, ni ndocna betiyeshinë; nñe chë juentsaca chë Bëngbe Bëtsabe sëlloca nduinñyanana entsangna aíñe. <sup>5</sup> Pero ndoñe chematanalesenciá entsangbiroye jobáyana, ndayá nñe jamama chënga shachna shinñentscuana tsetsanana chamotsebomnama; y chë chënga monjánama chamotsebomnama tsetsanana enjamna mo canye alacranbe uetjoniñcá.

<sup>6</sup> Chca tempo chaojtsemna ora, entsanga mochántsensuaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinñena ntšamo jamëse jtsóbanama; y masque tsa mochántseboşe jobanama, chora chëngaftaca ndoñe chca queochatopása, mo jobanama ndoñe tmontsobencá.

<sup>7</sup> Chë tsátjaye chapulinga monjétsinña mo couayëngcá prontánënga jama entsángaftaca jétsjama; chëngbe bestsañe monjanábomna mo castellano coronëshangacá, y chëngbe jubíá enjamna mo entsábe jubiácá. <sup>8</sup> Stjénashe monjánbomna mo shembásabe stjénashacá, y chëngbe juatsaënga mo leonbe juatsaëngcá. <sup>9</sup> Chëngbe cuerpënga jenëuyanama cochaca monjánbomna morochó soyënga, mo hierro soyëngcá, y chëngbe juatëngmiashangá tmojtsabonjá ora, chë shauenanana bëtscá enjamna, mo ba cochëshangá couayënga cuaftsasjojnácá, chë inñengaftaca jétsjama tmojëtsátjajo ora tojtseshauenancá. <sup>10</sup> Chënga monjanábomna mo alacranbe uascuatšëjuacá, ba uetotjéffangaca, y chë uascuatšëjuaca obenana monjánbomna shachna shinñentscuana entsanga mal chamotsepasama. <sup>11</sup> Chë tsátjaye chapulinga canye amëndá monjánbomna, chë uabouana tboca mándaye ángel; hebreo biyañna cha uabainá Abadón ca y grieguñña Apolión o pochocayá ca.

<sup>12</sup> Chë natsana pochócayana ya tojchoñnëgo, pero más chcoye cabá inñe uta soye más pochócayana cachcá echántsemna.

<sup>13</sup> Chentšana chë inñe ángel chabe trompetéfuua tonjanájatêto, y canye oyebuambnayana sënjanuena, chë Bëngbe Bëtsabe delante enjésemna castellano altarentsa juatsboica lado sibienache obocanentsana enjétsobocana. <sup>14</sup> Y chë oyebuambnayana, chë trompetéfuua tonjanájatêto y enjétsëtbëna ángelbiroye tbonjaniyana: “Chë canta angelénga chë Eufrates bëts fshájaye tsachoca utsbuanënga mëjafoná ca.” <sup>15</sup> Y chë canta angelénga tmonjanëjafoná; y nñe chë ora, chë te, chë shinñe y chë uatama chëngbiroye tmojanaprontá, chë quem luarëntsa entsángbefe ungañentsšana cánñentsënga jtsëbáyama. <sup>16</sup> Atse sënjanuena buétanga imojamna chë angelëngaftaca tmojána soldadënga, couayënguifne: uta patse millonënga ca.

<sup>17</sup> Mëntsa sënjananyë mo otjenayoquécá chë couayënga y chë chëngbëne enjaquenënga: Chë enjaquenënga monjánbomna morochó soyënga cochaca, jenëuyanama, y chë soye buanganana enjáninñna, mo iñcá, y fchendana mo chë uámana ndëtšbé jacintcá y tsësiyana inñana mo azufrcá; y chë couayënga monjánbomna mo leonbe bestsašcá, y chëngbe uayoicana enjétsobocana iñe, ngona y azufrana. <sup>18</sup> Y chë ungañentsšana cánñentsë entsanga tmonjanóbana quem unga uabouana pochócaye soyëngaca, chë couayëngbe uayoicana enjétsobocanana: iñe, ngona y azufrana. <sup>19</sup> Er chëngbe obenana entsanga japochócama monjánbomna uayáshañe y uascuatšëjuañe; er chëngbe uascuatšëjuua enjuamna mo mëtscuayëngcá, bestsaëngaca, y chëjuanga causa entsanga mal montsanpásaye.

<sup>20</sup> Pero chë inñe entsanga, chë uabouana pochócaye soyëngaca ndoñe tmonjanopochocanga, juabna ndoñe chematantrócá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjenga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtšbé y niñébé soyënga; y chca soyënga ndoñe quemënjatobena ni jinñama, ni jouenama, ni jtsanama. <sup>21</sup> Juabna ndoñe chematantrócá y

ndoñe chematanajbaná entsānga obanayana, encjuanayana, bacna soyēnga boyabása o shembásataca jtsamēse oyenana, ni atbēbanana.

## 10

*Chē ángel base uándmanana tsbuanáchaca*

<sup>1</sup> Chentsāna sēnjāniñyē inye ángel, puerta obenana bomná; celocana enjétsastjajuana, y chabe shēconana canye jantsetšeshe enjétsesma; chabe bestšase tatsétsacá canye tsēfcuácuatjo. Chabe jubíá shinýcá enjétsesuashinýinýana, y chabe shecuatšēnga mo úcuatjona niñēbenga cuaftsoiñcá. <sup>2</sup> Chabe cucuatšīñe enjétsētbēna canye base uándmanana y utēfjna tsbuanáchaca. Chabe catšbioica shecuátšeca chē mar bējayoca tonjantsá, y chē uañicuayóicatšecna, quem fshantsentše. <sup>3</sup> Y jabuache tonjanoyó, mo canye león cuaftseyocá; y tonjanoyó ora, canýšēfta juesasanentsa jabuache shauenanana sēnjanuena. <sup>4</sup> Chē canýšēfta juesasana chca tmonjanoyebuambá ora, atše sēnjanoprontá ntšamo chēnga tmonjanayancá juabemama; pero canye oyeubuambnayana celocana sēnjanuena, mēntšá šonjétsatsaye: “Nye aca cochtsójuabnañe ntšamo chē canýšēfta juesasana tmonjayancá, ndocnábioye catjauyana, y chē soye ndoñe catjuábema ca.”

<sup>5</sup> Chora chē ángel, chē mar bējayoca y quem fshantsentše atsaná sēnjaninýá, chabe catšbioica cucuatše celoye tonjanatsbaná, <sup>6</sup> y tonjanjurá Bēngbe Bētsabiamá, chē nyēts tempo y nyētsca tescama oyenabiamá, chē celoca, quem luare, chē mar bējaye, y lempe chē luarēnguñie yobinýncá tojanmabiamá. Tonjánayana: “Ya ndoñe más quemochatobatna; mora Bēngbe Bētsá echanjama ntšamo tojašebuachenacá, <sup>7</sup> er chē tempo chaojóshjango, chē ústonoye ángel chabe trompetšfua juajátētama chaojontšé ora, chora ya echanjochnēngo ntšamo Bēngbe Bētsá jamama yoyuabnacá; chē soye nyētsca entšāngbioye cha ndoñe chēnatinýañé, ntšamo tempo cha chabe oservēñēngbioye, chē chabe juabna oyeubuambnayēngbioye tojanabuayenacá ca” —cha tonjánayana.

<sup>8</sup> Chē atše sēnjanuena oyeubuambnayana celocana enjétsobocanana, cachiñe šonjanatsētsá y šonjanayana: “Motsa y mauaca chē mar bējayoca y quem luarentše ángel entsemnabe catšbioica cucuatšīñe base uándmanana y utēfjna tsbuanáchaca.”

<sup>9</sup> As atše chē ángelbioye sēnjána; chē base uándmanana tsbuanáchaca chašuíyema sēnjanianá, y cha šonjanjuá: “Quemécha, motsásañe. Acbe uayoye uamesquénēcha mo tjouangbe meloycá echántsamna, pero acbe uafsbioyna puerta uauntjēcha echantsábema ca.”

<sup>10</sup> As chē base uándmanana tsbuanáchaca chē ángelbe cucuatšētsāna sēnjanaca, y sēntsanásañe; y atšbe uayoye meloycá enjétsamna, pero sēnjanabmuaná y atšbe uafsbioyna puerta uauntjēcha tontsanábema. <sup>11</sup> Chora šmonjanianá: “Aca cmontsemna cachiñe jtētabuayenana, ntšamo Bēngbe Bētsá tojayancá chē ntšamo yochjopásama, ba canye luarentša entšāngtaftaca, ba mándayēngbēntša entšāngtaftaca, ba biyana bomna entšanguentšēngtaftaca y quem luarentša reyēngtaftaca ca.”

## 11

*Chē útata Bēngbe Bētsabe juabna oyeubuambnayata*

<sup>1</sup> Chentsāna canye medídaye niñēfja šmonjanoyé, mo jatšēmbonēfjácá, y šmonjanianá: “Motsa y Bēngbe Bētsabe bēts yebna y chentša altar cochjamedída, y cochjácutayē bueta entsānga chentše Bēngbe Bētsábioye imojtsadorana. <sup>2</sup> Pero chē Bēngbe Bētsabe yebnentše más shjoica luarna cachcá cochjonýaye, ndoñe catjamedída, er chiñe chē ndoñe judiēngbiamá endmēna; y chēnga, chē uamana ca uabaina bēts pueblama, canta bnētsana y uta shinýēntscuana soyēnga mochántsama chiñe jtsepochócama, mo cuaftsebotajnaycá. <sup>3</sup> Pero atše, útata atšbiama tatšēmbuata y oyeubuambnayata chanjichamuá atšbe cuenta entšāngbioye jábuayenama, canye uaranga y uta patse y chnēnguana bnētsana tentscuana. Chatna uajojēsha entšayangá uichétjonata bochántsemna, chca, ngmena bomnama jinýañiyama ca” —chata tbonjánayana.

<sup>4</sup> Quem útata atšbiama tatšēmbuata y oyeubuambnayata bontsinýinýena chē uta olivos betiyela y chē uta candelerēšeca, ntšamo Bēngbe Bētsá, chē quem luarentše mandayabe delante endmēncá. <sup>5</sup> Nderado nda tojtseboše chatbiama bacna soye jamama, ndoñe quentatobenaye ntšámnaca jáborlana, er uayoicana iñeshe nanjóbozna y chē uayayēngbioye nantsapochócaye; nderado nda tojábóšena chatbiama bacna soye jamama, cachcá cha buántsemna jóbanama. <sup>6</sup> Chē útata obenana bondbomna celoca jtsachtama, ndoñe chaonduafema, entšāngbioye Bēngbe Bētsabiamá chabojsabuayinýa tese; obenana bējayēnga buiñe jtsebiámama, y jamama quem luarentše chaotsóndbemama, nyētsca pochócaye soyēngaca, bueta sóynaca ntšamo chata tojtsebošcá.

<sup>7</sup> Pero ntšamo Bēngbe Bētsabiamá ibotatšēmbcá entšāngbioye jábuayenama chata chabojapochócá ora, chē uabouana bayá, chē corente bēts thoicana chaojabocná, chátbioye

echantsatsjaye, echantsayenjaná y echantsébaye. <sup>8</sup> Y chatbe óbana cuerpo, chë corente bêts pueblentsá tsáshenañe echanjoquéda, chë chatbe Utabná tmojancrucificá luarentse, y chë bêts pueblo inyetšá juabáyama nántsemna mo chë Sodoma y Egiptó luaroycá. Chentše endmëna mo chë bêts pueblënga Sodoma y Egiptcá, er chentše chë entsanga yapa bacna soyënga jtsamana. <sup>9</sup> Y unga y tsëntsa tentscuana, chë obanathe cuerpo mochantsonjaye, nyetsca canye luarentsa entsanga, nyetsca cachca buiñe bomna entsanga, ba biyana bomna entsanguentsana y ba mándayëngbentsa entsanga; ndoñe quenátslesenciana chata jutabuantsama. <sup>10</sup> Chata bochjóbana, quem luarentse oyenënga mochanjójeyuaye; tša oyejuayënga mochántsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentse oyenënga puerta chamo-sufrima.

<sup>11</sup> Pero chë unga y tsëntsa te tonjanochnëgo ora, Bëngbe Bëtsá tonjanma chë obanata chábuatayenama; chentšana tñontantsata, y chë monjétsantješnënga tša uatjana tonjanjébuache. <sup>12</sup> Chora canye jabuache oyebuambnayana tbonjanuena, celocana mëntšá enjétsëtsësnaye: “Moye mašënguata ca.” Y chatna canye jantšetëshiñe tbonjántsjua, y chatbe uayayënga chca monjétsónjaye. <sup>13</sup> Cachora quem fshantse jabuache tontsanangmëmana, y chë bêts pueblentse bnëtsanentsana cányëntse tontsanáshajaye, y canysëfta uaranga entsanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

<sup>14</sup> Chë inye uabouana soye quem luare japochócama, mora tocjochnëgo, pero betscó chë ústonoye uabouana pochócaye soye echanjójshjango!

#### *Chë ústonoye ángelbe trompetëfjua*

<sup>15</sup> Chë ústonoye ángel chabe trompetëfjua tonjanájatëto ora, celoca tša monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentse chaotsemnama,

y chë amëndayana echántsemna nyets tempo y nyetsca tescama ca.

<sup>16</sup> Y chë uta bnëtsana y canta bëtšëjmënga amëndayënga, chë chëngbe uámana puestiñe Bëngbe Bëtsabe delante monjétsëbiamanënga, tmonjanoshamentšé, fshantsóntscoñe jotse-jbënase, y Bëngbe Bëtsá tmonjanadorá, <sup>17</sup> mëntšá jayanëse:

Bëngbe Utabná, Bëngbe Bëtsá nyets obenana bomná, aca chë mora cha condmëná y chë tempo cha conjamná cbontsatschuaná, er nya mora acbe bëtš obenánaca soyënga cochjama, acbe amëndayana jontšama.

<sup>18</sup> Ba luarentsa entsanga ácaftaca tmonjanotšatjayená; pero chëngaftaca cmojetnama chë uabouana castigo jtsebínjyama te tocjójshjango, chë tempo tmojanóbánëngbiama jayanama tsábá o ndoñe tsábá tmonjétsëmama.

Tonjójshjango chë hora, uacanánana jtatsatayama chë acbiama oservénëngbiye, chë acbe juabna oyebuambnayëngbiye, chë acbe entsángbiye, y chë acbe uabaina nyetscangbiama más bëtš uabainana yomnama juabnayëngbiye, uámanënga y nduámanënga;

y chë tempo tonjójshjango, quem luare pochocayënga jtsapochócayama ca —chënga tmonjánayana.

<sup>19</sup> Chora, Bëngbe Bëtsabe bëtš yebna celoca tonjantëfjo, y choye enjétsëbinjyana chë cajontema, ndayëtema yojaninjanjyana ntšamo Bëngbe Bëtsá chabe entsángbiye tojanašebuachenacá; y chora enjétsëmna tcuinjyënga, tša shauenanana, juesasanana, quem fshantse tontsanangmëmana y bëtscá bëntstá tonjantquécjana.

## 12

#### *Chë shembása y chë uabouana bayá*

<sup>1</sup> Chentšana, canye bëtš soye celoca tonjanonjyana entsanga canye soye jinjanjyama: canye shembása, shinjyë mo chabe uichëtjoniaca, juashcona chabe shecuatšentsá tajsoye, y chabe bestšašifne canye coronësha bnëtsana uta estrellënga. <sup>2</sup> Chë shembása ngomaná enjëtsemna, y chë šësona jónjyama yojétsobecuana jabuache enjëtseyoye, chë šësona jónjyama cha puerta jasúfriama ibojamna causa. <sup>3</sup> Y chora inye bëtš soye celoca tonjanonjyana, entsanga inye soye jinjanjyama: canye uabouana dragón buanganá, canysëfta bestšašëngaca y bnëtsana tsëtjonëšëngaca y chë bestšašënguine enjanábomna canysëfta coronëshangá. <sup>4</sup> Chabe uascuatšëjuaca úngañentsana cányëntse chë estrellatëmënga celocana tontsansojó, y quem fshantsoye chëtëmënga tontsanëtsana. Y chë dragón chë šësona jtsebomnama shembásabe delante tonjantsá, chë šësonatëmbye jtsósañama, cha tojonjyana ora. <sup>5</sup> Chora chë shembása canye šësona boyabásetema bontsanbomna, nda nyets luarenache entsángbiye yochtsamëndaye mo canye hierro varëfjaquécá. Pero chë šësona

chábentsana tmontsanjuaná y Bèngbe Bètsábíoye, chabe uámana puestoye tmontsanámabñe.  
<sup>6</sup> Chë shembásana entsãnga ndoyena luaroye tontsanachá, Bèngbe Bètsá canye luare ibojaboprõnta choye, chentse saná chamocaredadoma, canye uaranga y uta patse y chnènguana bnètsana tentscuana.

<sup>7</sup> Chentšana celoca canye entsjanayana enjètsemna: Miguel, chë angelèngbe amëndayá, y chabe angelènga chë dragónaftaca monjétsentsjanaye. Chë dragón y chabe angelènga monjétsatsjanaye, <sup>8</sup> pero ndoñe chematanobená jáyèñjanama, y chëngbiama y ndoñe más luare celoca quentètsemna. <sup>9</sup> Chcase, chë uabouana dragón chocana tmontanábocna, chë tempsca mètscuaye, chë Diablo y Satanás ca uabainá, y chë bètsá entsãngbiyoye aingñayá; quem fshantsoye cha tmontsantsatse, y chë cha yojanamènda angelèngnaca.

<sup>10</sup> Chora canye jabuache oyebuambnayana celoca sèñjanuena, mèntšá enjétsichamo:

Chë Bèngbe Bètsá entsãnga játsebacama tempo ya tonjòshjango.  
 Mora Bèngbe Bètsá echanjínjñanyíy chabe obenana y mándayana,  
 y chabe Uámana Uabuayaná Jesucristbe obenana jtsemándayama;  
 er chë Cristbe delante bèngbe catsátanga mal aquedayá ya tmontábocna,  
 nda nyets tempo Bèngbe Bètsabe delante mal enjanaquedayá.

<sup>11</sup> Bèngbe catsátanga cha tmonjayèñjaná,  
 er Cristo, chë mo tmojóba Oveshatemcá, Bèngbe Bètsá bacna soyèngama entsãnga cháuaperdonama,

tonjanóbana, chabe buíne juabuáshanése,  
 y chë ndegombre soyèngama chënga monjanóyeuambnáyeca;  
 er chëngbe vida chëngbiama ndoñe quenjatámana;  
 Jesucristo jaserviama jóbanama chënga monjanprontana.

<sup>12</sup> ¡Chcasna, celoca corente oyejuayana chaotsemna,  
 y tsèngaftanga chë choca oyenèngbeñnaca!  
 ¡Pero tša lastema chë fshantsoca y mar bėjayoca oyenèngbiama,  
 er chë diablo tsèngaftangbiyoye tonjástjango, corente tsatjayá,  
 er cha entsetátsembo ya nye batsá yojtsábojamna chë chábíoye mochjacastígama ca! —  
 enjétsichamo.

<sup>13</sup> Chë dragón quem fshantsoye tmojtsantsatsama tonjáninýe ora, chë šešona boy-abásetema tbonjanèshjango shembásabíoye tbonsanacmé. <sup>14</sup> Pero uta juatèngmiáša, chë bèts aguillbeshá, chë shembásabíoye tmonjaniyé, chabíama tmojanprontá luaroye chaongüefjoma, entsãnga ndoyena luaroca, chë dragónbentsana bënoca; y chentse enjamna chë shembásabíoye saná chamuájuatsema, unga y tsèntsa uatèntscuana. <sup>15</sup> Chora chë dragón, chabe uayoicana bèts bėjaye tonjanbuashètjo chë shembásabe stètsoica, chaobuama y chabotsambama; <sup>16</sup> pero quem fshantse chë shembásabíoye tbonjanájabuache, er chë fshantse mo uayašacá tonjantèfjo, y chë dragonbe uayoicana bėjaye obocniye tontsanobmuánañe. <sup>17</sup> Y chë dragón chë shembásabíoye tondaye jamana chenatanobená causa, corente cacháftaca tbonjánetna, y tonjána chë inýenga, chë shembásabe basengcá mondmenènga játsjayama, ntšamo Bèngbe Bètsá yomandacá imobedecèngna, y ntšamo Jesucristo tonjanabuayená ndegombre soyèngaca sempre imoyenènga. <sup>18</sup> Y chë dragón chë mar bėjaye tsachañe tonjantsá.

## 13

*Chë dragón tonjanma, chë mar bėjayoca uabouana bayá chabe obenana chaotsebomnama*

<sup>1</sup> Chentšana atse sèñjáninýe, canye uabouana bayá chë mar bejajoicana tonjánbocna; enjánbomna canýsèfta bestšašènga y bnètsana tsètjonèšènga, y chëšènguiñe bnètsana coronèshangá, y chë bestšašènguiñe bañe enjétsabemana Bèngbe Bètsabíama contra oye-buambnayey uabaina. <sup>2</sup> Chë uabouana bayá sèñjáninýá enjamna mo canye leopardcá, mo osbe shecuášangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uámana puesto jtsemándayama, y chabe bèts mando. <sup>3</sup> Canye chabe bestšašènguentse enjétsinýna mo jóbanama tètšeniñcá; pero chentse tbontanóbema; y chora quem luarentša nyètca entsãnga ojanánènga monjètsemna, y chë uabouana bayábíoye montsanèyeunana. <sup>4</sup> Y chë dragón montsanadorana, chë uabouana bayábíoye obenana tbonjánatšetama; y chë uabouana bayábíoyenaca montsanadorana, mèntšá jayanése: “Ndocná obenana quenátsbomna quem uabouana bayacá, y ndocná quenátobena chábíoye jáyèñjanama ca.”

<sup>5</sup> Chë uabouana bayábíoye tbonjanlesenciá corente podesca Bèngbe Bètsabíama chaotsóyeuambnama, y obenana tbonjanatšetá, canta bnètsana y uta shinýèntscuana chaotsemándama. <sup>6</sup> Y podesca Bèngbe Bètsabíama tonjánayana, soyènga chabe contra, chabe bèts yebnama y chë celoca oyenèngbe contra. <sup>7</sup> Chábíoyenaca tbonjanlesenciá chë

Bëngbe Bëtsábenga imomnënga játsjayama, jáyëñjanantscuana; y obenana tbonjanatsetá chaotsemándama nyetsca cachca buiñe bomna entsángbeñe, nyetsca canye entsángbeñe, nyetsca biyañe bomnëngbeñe, y nyetsca mándayëngbentša entsángbeñe. <sup>8</sup> Chë uabouana bayá nyetsca quem luarentša entsanga mochántadorana. Chë entsanga mondmëna ndëmuanyëngbe uabaina ndoñe yontsábemana, chë Bëngbe Bëtsábioye jëtschuyama mo canye oveshatemcá, tojanóbanabe librësañe. Bëngbe Bëtsá quem luare cabá ndëma ora, quem librësañe tojanábema nyetscanga chë tsabe vida mochjónyëngbe uabaina.

<sup>9</sup> Chë jouenama obenënga, chamouena.

<sup>10</sup> Chë cárceloye jama ibomná, cárceloye bochanjotóca jama;

chë espadéjaca jobanamá, espadéjaca echanjóba.

Chíyeca quem luarentše entseyta, chë Bëngbe Bëtsábenga imomnënga padecena soyënguñe tmojtsemna ora, puerte uantadënga jtsemnana y Bëngbe Bëtsábeñe jtsóbuáchiyana, mo chë Bëngbe Bëtsabe entsangcá.

<sup>11</sup> Chëntsana inye uabouana bayá sënjáninye, quem fshantsentšana enjëtsebocana; uta tsëtjonëse mo oveshabešca enjánbomna, pero mo canye dragoncá, mo canya Satanásbeyeca mandanacá enjëtsoyebuambnaye. <sup>12</sup> Y enjánama soyënga chë natsana uabouana bayabe nyëts obenánaca, chabe delante. Chë fshantsentša bayá tonjanma nyetsca luarentše oyenënga chamotsadoránama chë natsana uabouana bayábioye, chë jóbanama tëtšeniñe thontanobemá. <sup>13</sup> Cha ba bëtš soyëngnaca enjánama chabe obenana entsanga jinjánýiyama, entsangbe delante jamana iñe celocana fshantsoye chaótsatšamnaca. <sup>14</sup> Y cha tbonjanlesenciá chaoma chabe obenana jinjánýiyama chë natsana uabouana bayabe delante. Chë soyëngaca entsanga tonjanaíngñé, y quem luarentša entsanga tonjanéyana canye soye chamopormá, y chë soye cháotsinýna mo chë natsana uabouana bayacá, chë espadéjaca tëtšená enjamná, y chora tsabá enjetsatsmëná. <sup>15</sup> Y chë inye uabouana bayábioye tmonjanlesenciá obenana chaotsebomnana jamama, chë natsana uabouana bayábioye jadórana entsanga tmonjanma soye vida chaotsebomnana, y chë soye jóyebuambayama chaotsobenámna, y jamama chë chábioye ndoñe tmonsadoránënga chamóbanama. <sup>16</sup> Y tonjanma, nyetscángbioye, básenga y bëtšëtsanga, bomnënga y ndbomnënga, cachëngbiama trabájayënga y nye inýabiamna nyëts tempo oservëñënga, catšbioica cucuatšíñe o juentsaca chamuñýnanama. <sup>17</sup> Y ndocná quenjátanobena ni jiyama, ni jobuámiñama, chë uinýnanánana ndoñe tontsebomnëse; chë uabouana bayabe uabaina o chë chabe uabainama yomna número.

<sup>18</sup> Chë número jinýenamna bëtscá osertánana jtseytana. Chë becá osertánana bomná cháuinýena ntšamo chë uabouana bayabe número uayancá, er canye entsábe número endmëna. Chë número endmëna chë chñënguana patse y chñënguana bnëtsana y chñënguana.

## 14

### *Chë canye patse y canta bnëtsana y canta uaranga entsangbe canto*

<sup>1</sup> Y más sënstanonýá. Sënjáninye, chë Oveshatema, enjëtšatšabna Sión ca uabaina tjoca, y cháftaca monjëtsemna canye patse y canta bnëtsana y canta uaranga entsanga, y chëngbe juentsaca enjëtšabemana chë Oveshatembe y chabe Taitabe uabaina. <sup>2</sup> Chora sënjanuena celocana canye shauenanana, mo bëtscá béjayënga y bëtš juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojtšabuastocá. <sup>3</sup> Chënga canye tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtšëjëmënga amëndayëngbe natsanentše. Y ndocná quenjátanobena chë canto juatsjínýana, nye chë canye patse y canta bnëtsana y canta uaranga quem luarentšëngbentšana atsebácanënga aiñe. <sup>4</sup> Chënga monjanmëna chë shembásoftaca ndocna bacna soye tmonjanmënga, er chënga imojanenomándá chca bacna soyënga ndoñe ntsamama; chë Oveshatema ndëmoye tojtšá y chëngnaca choye jtšëstonana. Chënga imojamna chë natsanënga chë quem luarentša entsanguentše atsebácanënga jtsemnana, y chënga atsebácanënga imojtsemna Bëngbe Bëtsá y chë Oveshatema jtsaservënama. <sup>5</sup> Chënga ndocna te tmonjanobosteró; ndocná quenátobena jayanama chënga bacna soye tmojanma ca.

### *Ntšamo chë unga angelënga tmojánayana*

<sup>6</sup> Chëntsana inye ángel sënjáninye, tsbanánoca celëjana enjëtšongüefñaye. Cha enjánbomna canye nyëts tempscama oservena buayenana soye, entsángbioye jáuyanama, nyëts quem luarentše oyenënga, nyetsca mándayëngbentša entsanga, nyetsca cachca buiñe bomna entsanga, nyetsca biyañe bomnëngbeñe y nyetsca canye entsangbiama. <sup>7</sup> Y jabuache mëntšá enjëtšichamo: “¡Bëngbe Bëtsabiamna šmochjábuaboye cha nyëtscangbiama chë más uamaná endmënama, y cha šmochtsatschuanaye, er ya tonjóshjango chë tempo ntšamo entsanga



tmojamama tšabá o ndoñe tšabá bétsemnama cha cháuyanama! ¡Chê celoca y quem luare, chë mar béjaye y nyetsca chë fshantsentsána óbocana béjayenga tojamá smochtsadorana ca!”

<sup>8</sup> Chábentsána inýe ángel mēntšá enjétsichamo: “¡Ya bēts castigo, ya bēts castigo chë Babilonia bēts puebloca entšángbeñe echántsemna!, ndēmuanýenga tmojinýanyē ntšamo puerte bacna soyēnga shembása o boyabásaftaca jtsamama y inýe corente bacna soyēngnaca, y chentsána nyets quem luarentšé entsānga mo cach Babilonioquēngcá tmojama. Chë causa, Bēngbe Bētsá echanjama chēngbiámnaca chabe uabouana castigo chaotsemnama ca.”

<sup>9</sup> Chë útatbentsána inýe ángel jabuache mēntšá enjétsichamo: “Nderado nda chë uabouana bayábioye y chë chábioye jadórana pormana soye tojtsadorana, y tojalesenciá chabe uinýnanana soye juentsca o cucuatsiñe chamojajoma, <sup>10</sup> chánaca bontsemna, chë Bēngbe Bētsabe uabouana castigo jasúfriana. Entšanga puerte bacna soye tmojamama, Bēngbe Bētsá puerte tbojetna, y chë causa echanjama chë castigo chēngbeñe chaotsemnama. Y chë uamana angelēnga y chë Oveshatembe delante, chë bayá adorayábioye puerte mochan-jatsetšená, iñeshe y azúfeca. <sup>11</sup> Chca chamojtsesufrina ora, becá ngona echantsóbocana, y chë ngona nyets tempo chca echantsótsjuaye; y chēnga, chë uabouana bayá y chábioye jadórana pormana soye adórayēnga, y chabe uinýnanana soye bomnēngbiama, ndocna te chë tsetšanana queochatējbana ca” —cha enjétsichamo.

<sup>12</sup> Chýeca quem luarentšé entseyta, chë Bēngbe Bētsabe mandēnga obedecēnga y Jesúsbeñe puerte ošbuáchiyana bomnēnga, chë Bēngbe Bētsabe entsānga, padecena soyēnguiñe tmojtsemna ora, puerte uantana jtsemnana.

<sup>13</sup> Chentsána canýe oyebuambnayana celocana sēnjanuena, mēntšá šonjétsatsaye: “Mēntšá mábema: ‘Tša oyejuayēnga mochántsemna chë mēntescana mochjóbanēnga, Bēngbe Utabnáftaca cánýiñe mo canýacá jtsomñēse ca.’ ”

“Añe ca” —chë Uamana Espiritu tonjayana—, “chēnga ya ndoñe más queochátamna jatrabájana, ni jasúfriana, er chēnga tmojama tšabe soyēnga Jesús jaserviama, y chë soyēngama chēnga tšabe bendicionēnga mo uacanancá celoca mochanjóyēngacñe ca.”

### *Ndayá chë angelēnga quem luarentšé tmojanatbaná*

<sup>14</sup> Chora más sēnjāniñe; sēnjāniñe canýe fñantse jantsetšeshe, y chēshiñe canýa enjétssetbemana. Cha enjamna mo canýe entšacá; chabe bestšašñe enjanábomna canýe castellano coronēsha, y cucuatsiñe canýe puerte efsana mēntšá enjétsatbēna. <sup>15</sup> Chentsána, chë celoca Bēngbe Bētsabe bēts yebnentsána inýe ángel tonjánbocna, y jabuache bonjétsatsaye chë jantsetšēñe themanábioye: “¡Acbe mēntšaca machbonja y shajuanēnga matbaná, er chë játbanama tempo ya tonjóshjango; chë quem luarentša shajuana ya tonjaboche ca!” <sup>16</sup> Y chë jantsetšēñe enjantbemaná chabe mēntšaca quem luariñe tonjánachbonja, y nyets quem luarentšé atbanániñe tonjanoquedá.

<sup>17</sup> Chentsána inýe ángel chë celoca Bēngbe Bētsabe bēts yebnentsána tonjánbocna; chánaca canýe puerte efsana mēntšaca. <sup>18</sup> Y chë altarentšana inýe ángel tonjánbocna, chë mando bomná iñesheca castigo entšangbiama jamama; y chë puerte efsana mēntšá bomna angelbioye jabuache tbonjaniyana: “¡Acbe mēntšaca machbonja y chë fshantsoca nyetsca uvas betiyeshēnguentša uvasēsangá mātabe, er ya uabochenēsangá entsamna ca!” <sup>19</sup> Y chë ángelna chabe mēntšaca quem luariñe tonjánachbonja, y nyetsca quem luarentša uvasēsangá tonjanátabe, y lempe chë juantšétetjama luaroye tonjanētsána. Chë soye entsinýinýná ntšamo yochtsemnana Bēngbe Bētsabe uabouana castigo. <sup>20</sup> Chë uvasēsangana, chë bēts pueblentsána chaboye tmonjanantšétetje, y chë luarentšana tša buiñe tonjanóbocna; tonjanojutjé couayēngbe uyayashbenēsantscoñe y mo unga patse kilómetrēnga tonjanábuashana.

## 15

### *Chë angelēnga chë canýsēfta pochócaye soyēngaca*

<sup>1</sup> Chentsána, inýe bēts soye entsānga inýe soyama jinýanýiyama, celoca sēnjāniñe, canýe puerte bēts soye: canýsēfta angelēnga canýsēfta pochócaye soyēngaca, chë ústonoye pochócaye soyēnga. Chë soyēnga chaotsemnentsána ya ndoñe inýe pochócaye soye yochántsemna, er chēntscōñe Bēngbe Bētsá yochjacistiga, lempe ntšamo cha jamama tojan-juabocá.

<sup>2</sup> Canýe mar béjaynaca sēnjāniñe, mo cristalcá enjétsinýna iñeca enájuañe; y chë béjaye juachaca monjétsatsana chë tšabá tmonjánadoranga, y ni chë uabouana bayá, ni chë chábioye jadórana pormana soye ndoñe tmonjánadoranga, y chë uabouana bayabe uabainama yomna número chēngbeñe chaotsemnama ndoñe tmonjanlesencianga. Nyetscanga chēnga monjétsabomna Bēngbe Bētsá tojanētsatá arpangá. <sup>3</sup> Chēnga, canýe canto monjétsacantaye ntšamo Moisés, chë Bēngbe Bētsabe oservená tojancantacá, y ntšamo chë Oveshatema tojancantacá. Mēntšá monjétsacantaye: Puerte bēts soyēnga y tšabe soyēnga entsemna lempe ntšamo aca tcojanmcá,

Bëngbe Utabná Bëngbe Bëtsá nyëts obenana bomná;  
lempe ntšamo jtsamëse aca icyena, acbe bominyiñe puerte tsabe y ndegombre soyënga yomna,

nyëts luarënguenache entšangbe Rey.

<sup>4</sup> Bëngbe Utabná, nda nanjájuaboje aca nyëtschangbiam a ndoñe más bëtsá condmëna ca, o ndoñe cmantsatschuanaye?

Nye aca uamaná condmëna;

nyëtsca mándayëngbentša entšanga ácbioye mochanjabo,

ácbentse mochanjoshamentšiyë aca jadórama,

er ntšamo tcojamcá lempe entšangbioye mora tcojinñanyé,

y lempe ntšamo aca tcojamcá tsabá jtsemnana ca —monjëtsecantaye.

<sup>5</sup> Chca chentšana sënjanontjëse y sënjaninyë chë celoca Bëngbe Bëtsabe bëts yebna tonjantëfo, chë Bëngbe Bëtsá Moisésbioye tbojaniyé leyënga uajajóntëse. <sup>6</sup> Y Bëngbe Bëtsabe bëts yebnentsana tmonjánbocna chë canýsëfta angelënga, chë canýsëfta pochócyaye soyënga uambayënga, uafjantse lino entšëjuangá uabuashinñinyañëjuangá uichëtjonënga, y tëntša castellano uasanëjëngaca cochóntscóñe. <sup>7</sup> Chentšana, canya chë canta Ainënguentšá chë canýsëfta angelëngbioye tonjanoyé canýsëfta castellano codbenga jútjena chë Bëngbe Bëtsabe uabouana castigoca; Bëngbe Bëtsá chë nyëts tempo y nyëtsca tescama vida bomná.

<sup>8</sup> Chorna, chë Bëngbe Bëtsabe bëts yebna celoca becá ngónaca tonjanoutjë, y chë ngona enjëtsohcana Bëngbe Bëtsábentšana, chabe buashinñinyañana y obenana jtsinñanyñayëse; y Bëngbe Bëtsabe bëts yebnoye ndocná quenjátanobena jamashënguana, chë canýsëfta angelënga canýsëfta pochócyaye soyënga candochnënguëntscuana.

## 16

### *Chë castigoca codbenga*

<sup>1</sup> Chentšana, canye jabuache oyebuambnayana sënjanuena, chë celoca Bëngbe Bëtsabe bëts yebnentsana enjëtsohcana, y chë canýsëfta angelëngbioye mëntšá enjëtsetsëtsnaye: “Motsajna y quem canýsëfta codbenga, chë Bëngbe Bëtsábocana endóbocana uabouana castigoca, fshantsoca šmochjabuashcja ca.”

<sup>2</sup> Chora chë natsana ángel tonjána y chabe codbé quem luariñe tonjanbuashcja, y nyëtsca entšanga chë uabouana bayabe uinñananana soye bomnënga y chë chábioye jadórama pormana soye adórayëngbe cuerpiñe bañe bacna nguayanana tonjanóbocna, puerte tsetšëana.

<sup>3</sup> Chentšana, chë inye ángel chabe codbé mar béjayoca tonjanbuashcja, y choca búyeshe buiñcá tontsanóbema, mo canye entšá obanabe buiñcá, y nyëtscanga chë mar béjayoca vida bomnënga tmontsanóbana.

<sup>4</sup> Chora chë inye ángel chabe codbé béjayënguñe y béjaye obocanënguñe tonjanbuashcja, y buiñe tontsanobiama. <sup>5</sup> Chentšana sënjanuena, chë béjayënguñe mando bomna ángel mëntšá enjëttsichamo:

Aca nyëtsca soyënguñe tsabá amá condmëna,

er aca tcojayana chë quem luarentša entšanga chca castigánënga chamotsemnana.

Bëngbe Bëtsá, Uamaná, mora chca condmëna y chca conjamna;

<sup>6</sup> er chënga tmonjama, chë acbe entšanga

y acbe juabna oyebuambnayëngbe buiñe chauábuashanama, jtsëbáyëse;

y mora tconjama chënga buiñe chamofšema.

Nyëts mercedo imobuájona chca japásama ca —cha enjëttsichamo.

<sup>7</sup> Altarocánëna canye oyebuambnayana sënjanuena, mëntšá enjëttsichamo: “Aíñe, Bëngbe Utabná, Bëngbe Bëtsá, nyëts obenana bomná condmëna, y ntšamo entšanga contsacastigacá, ndegombre y tsabá entsemna ca.”

<sup>8</sup> Chentšana, chë inye ángel chabe codbé shinñiñe tonjanbuashcja; chë shinñe corente tontsanobonñaná y chíyeca entšangbioye iñesheca tontsanajuinñé. <sup>9</sup> Y nyëtscanga uabouancá juinñënga tmonjanocuéda; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtshachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócyaye soyënga jíchmuama, chënga chamosufrima.

<sup>10</sup> Chentšana chë inye ángel chabe codbé chë uabouana bayabe uámana puestiñe tonjanbuashcja, y nyëts chabe amëndayíñe ibetiñe tonjanocuéda. Chë entšanga bichtaja montsanenóantsnaye, yapa tsetse causa; <sup>11</sup> pero ni chca, chë entšanga chematanajbaná bacna soyënga jtsamana, ndayá chë yapa tsetsama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

<sup>12</sup> Chentšana chë inye ángel chabe copbé chë bêts fshájaye Eufates ca uabáiniyífe tonjanbuashcja y chë béjaye tontsanbuashjo, japróntama chë shinýe bocanoica luarënguentša reyënga y chëngbe soldadënga chëjana chámuachnëjnama.

<sup>13</sup> Atše sënjaninýe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo saposëngcá monjétsinýna. <sup>14</sup> Chënga monjamna bayëjëngbe espíritënga; bêts soyënga monjánama obenana jinýanýiyama, y montsanbocana nyets luarentša reyënga jáchembuama, chë uamana te, ndayté Bëngbe Bëtsá, chë nyets obenana bomná yochjabo entsangbiama jabáyanama ntšamo chënga tmojamama, chë te chënga chabe contra chamotsetsjama.

<sup>15</sup> Bëngbe Utabná Jesucristo mëntšá tojayana: “Smochjinýe, atše nýe ndeolpe chanjabo, mo canýe atbëbanacá, chabiamna ndocná tontsejuabná ora; chiýeca oyejuayënga mochántsemna atše jabama tmojtseprontanënga, mo nda tojtsefsna y chabe entsáyá totsaboprontañacá, nýe enašá ndoñe chaondëtsemnama, y entsanga chca tmojinýe ora ndoñe chaondëtsëuatjama ca.” <sup>16</sup> Y chë bacna espíritëngna chë reyëngbiøye tmonjanënatse canýe luare, hebreuñe Armagedón ca uabáinoe.

<sup>17</sup> Chentšana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bêts yebnentša uamana puestentšana canýe jabuache oyebuambnayana tonjanóbocna, mëntšá enjétsichamo: “¡Chë jopásama enjamna soye ya tojochnëngo ca!”

<sup>18</sup> Chora enjëtsemna tcuinýënga, shauenanana y juesasanana, y quem luariñe tontsanangmëmana, yapa jabuache quem luare tontsanëbanjó causa; quem luarentše entsanga imobinýna orscana, ndocna te nýa chca quem luare tontsanëbanjó. <sup>19</sup> Chë puerte bêts pueblo úngañe tontsanajatá, y nyets luarentša bêts pueblënga tontsanáshajaye, y Bëngbe Bëtsá tojanenajuabó chë puerte bêts pueblama, Babilonia ca uabaina pueblama, chentša entsanga chë uabouana castigo chamotsebomnama, Bëngbe Bëtsá tša tbojanetna causa, tša bacna soyënga chentše tmojanmama. Y chca, chë chëngbe bêts pueblo úngañe tontsanajatá ora, cha chënga tonjanacastigá. <sup>20</sup> Mar béjayoca nyetsca fshantsënga y quem luarentša nyetsca tjañe tontsanenatjëmbe. <sup>21</sup> Celocana bëtsëtsa bëntstbenga entsángbeñe tonjanquécjána, chëbenga canta bnëtsana kilama más utbenga; y entsanga Bëngbe Bëtsabe contra ba soyënga tmonjánayana, er chënga tša montsansufrina chë bêts pochócaye bëntstá causa, y chë pochócaye bëntstá chëngbiama puerte jabuache castigo enjamnama.

## 17

### *Chë puerte bacna vida bomna shembásabe castigo*

<sup>1</sup> Canýa chë canýsëfta angelënguentšá, chë canýsëfta copbenga monjanatbënënguentšá, tonjánabo y šonjaniiyana: “Mabo; cbochanjinýinýiye ntšamo yochtsemna chë puerte bacna vida bomna shembása, chë béjayënguñe entsetbemanabe castigo. <sup>2</sup> Quem luarentša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjotmenangcá ca.”

<sup>3</sup> Chentšana chë ángel, atše chë Uamana Espíritbeyeca corente mandaná jtsemnëse, šonjanánatse entsanga ndoyena luaroye. Choca sënjaninýe canýe shembása, canýe uabouana buángana bayábeñe enjaquená; chë bayabe cuerpiñe nyëtsañe Bëngbe Bëtsabiamna puerte bacá oyebuambnaye uabaina enjëtsebomana, y enjánbomna canýsëfta bestšaše y bnëtsana tsëtjonëse. <sup>4</sup> Chë shembása enjanichëtjona uamana shbuenda uafjatsenga y buángana entsáyá, y entsanbotamana castellánoca, uamana botamana ndëtsëtëmëngaca y pérlocá. Chabe cucuatšifne chëte castellano copbé enjëtstbëna, jútjena puerte uaboyëñja soyëngaca, y chë boyabásëngafaca cha tojanma puerte bacna soyëngaca. <sup>5</sup> Y chabe juentsaca canýe uabaina enjëtsebomana, ndoñe josërta soye, mëntšá: “Chë puerte bêts pueblo Babilonia, tša bacna entsanga chentše, mo chë puerte bacna vida bomna shembásëngbe bebmá cuafsemncá; chentšana tojanóbocna quem luarentša nyetsca puerte uaboyëñja soyënga ca.” <sup>6</sup> Atše sënjaninýe chë shembása tëmía, er cha tojanofšë chë Bëngbe Bëtsábenga imojamnëngbe buiñe, ndëmuanyëngbiøye tmojanëbaye Jesusbiama oyebuambnaye causa.

Chca sënjaninýe ora, tša sënjanenjananá. <sup>7</sup> Chora chë ángel šonjaniiyana: “¿Ndáyeca tcojenjaná ca? Atše cbochanjauyana ntšamo yojtsayana chë shembása y chë chábiøye bontsambá uabouana bayá, chë canýsëfta bestšaše bomná y bnëtsana tsëtjonëse; chë soye ndocná quenátstátšëmbo. <sup>8</sup> Chë tconjinýe uabouana bayá, tempo chca enjamna, pero mora ya ndoñe. Chë corente bêts thoicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndëmuanyëngbe uabaina quem

luare joboját sama orscana ndoñe yonduábemana, chë tšabe vida mochjónyēnēngbe uabaina iuábemana librěsañe, chēga mochanjenjaná, chë bayá chë tempo enjaniená y mora ya ndoñe, pero cachiñe yochjěsabama chamojinñe ora.

<sup>9</sup> “Muentše canñe soye entsemna chë chca josértama chamojobenangbiam: chë bayabe canñsěfta bestšashe endmēna canñsěfta tjañe ndayĩñe chë shembása entsetbemana; chë bestšasēgnaca mondmēna canñsěfta mandadēga. <sup>10</sup> Chentšana, shachnēngbe amēndayana ya tonjochnēgo, canña mora entsetbemana jtsamēndayama y chë inña cabá ndoñe tonjášhango. Y cha chaojášhango ora, ndoñe bēnama cha queochaisemānda. <sup>11</sup> Chë tempo enjanienana uabouana bayá pero mora ya ndoñe, endmēna chë canñsěfta mandadēnguentsāna inñe mandado, pero chánaca chë inñe canñsěftangcá endmēna y lempe pochocaná jtsemnama entsá.

<sup>12</sup> “Chë tconjinñe bnětsana tsětjoněse mondmēna bnětsana mandadēga, jamēndama cabá ndoñe tmonjójayega; pero bāsefta tescama cánñiñe chë uabouana bayáftaca, mando mo reyēngcá mochanjójēngacñe. <sup>13</sup> Quem bnětsanēga nñetscanga cachcá mochántsejuabnaye, y chë uabouana bayábioye chēngbe obenana y mando mochanjātsetaye. <sup>14</sup> Chë Oveshatembe contra mochántsestsjanaye; pero chë Oveshatema echantsayēnjaná, er chë Oveshatema endmēna nñetsca amēndayēngbiam chë más uamana Utabná y nñetsca reyēngbiam chë más uamana Rey. Chë bnětsana mandadēga cháftaca mochántsestsjanaye ora, cha chentše chabe entsāngaftaca cánñiñe echántsemna. Chēga mondmēna chë cha tojáchembo y tojubuáyanēga y chábeñe sempre ošbuáchiyēga ca” —cha šonjanianana.

<sup>15</sup> Chë ángel mēntšánaca šonjanianana: “Chë tconjinñe bėjayēga, ndayĩñe chë bacna vida bomna shembása entsetbemana, mondmēna nñetsca canñe luarentša entsāga, enutanana entsāga, nñetsca biyañe oyebuambnayēga y nñetsca mándayēngbentša entsāga. <sup>16</sup> Y chë uabouana bayábeñe tconjinñe bnětsana tsětjoněse y chë uabouana bayá, chë bacna vida bomna shembásabioye mochantsáboyēnja; enašá cachcá mochanjesonjaye; chabe cuerpentša mēntšena mochantsósañe y ifiesheca mochántsejuinñiye, chaopochocantscuana. <sup>17</sup> Bēngbe Bětsá tojama chë bnětsanēga ainaniñe tša chamotseboše, ntšamo cha yoboscá chamotsamama. Chca, chēga mochanjenóyeunaye chēngbe mando chë uabouana bayábioye jantšabuáchiyana, ntšamo Bēngbe Bětsá tojayancá chaojopasantscuana. <sup>18</sup> Chë tconjinñe shembása chë puerte bēts pueblo endmēna, chë ndayentša mandadēga nñets quem luarentša mandadēngbeñe mando mondbomna ca” —cha šonjanianana.

## 18

### *Babilonia japochócama*

<sup>1</sup> Chentšana inñe ángel sēnjáninñe, celocana enjětsastajuana, puerte obenana bomná, y chabe buashinñinñanánaca nñets quem luariñe entsanbinñina. <sup>2</sup> Chë ángel jabuache mēntšá enjětsichamo:

¡Ya mochantsepochóca, ya mochantsepochóca chë uamana pueblo Babilonia!

¡Chentše tojtsóbeta diablēngbe oyeniñe,

nñetsca bacna espiritēngbe oyeniñe,

y ndoñe tšabe y uaboyēnja shloftšēngbe oyeniñe!

<sup>3</sup> Er nñetsca quem luariñe mándayēngbentša entsāga puerte bacna soyēga tmojama chentša entsāngbe causa,

mo chë bacna vida bomna shembásaftaca bacna soyēga cuafjamcá,

mo puerte cuafjotmenangcá chë bacna vida bomna shembásabe vínoyeca.

Nñetsca luarēnguentsā mandadēga puerte bacna soyēga tmojama,

mo chë shembásaftaca bacna soye cuafjamcá,

y quem luarentša obuámmañega y enēga, bomnēga tmojobiam chentša entsāga yapa crocénana nñe ndayĩñnaga ntsejuabnaycá gástaye causa ca —cha enjětsichamo.

<sup>4</sup> Chentšana, celocana inñe oyebuambnayana sēnjanuena, mēntšá enjětsichamo:

¡Chë bēts pueblentšana maisebocana!, tsēngaftanga chë atšbe entsāga šmornēga,

chë chentša entsāga mondbětsama bacna soyēga ndoñe chašmondětsamama,

ni chë chēngbioye japochócama soyēga tsēngaftangbiam cach ndoñe chaondětsemnama.

<sup>5</sup> Chēga tša bacna soyēga tmojama, tša bētská nña mo celóntscoñe cuafjotjēcá,

y Bēngbe Bětsá mora entsejuabná chēga tša puerte bacna soyēga tmojama causa, chë soyēngama jácastigama.

<sup>6</sup> Ntšamo chentša entsāga inñēngbiam ndoñe tšabá tmonjamcá,

chë entsāngbiámnaca cachcá chaotsemna;

ntšamo tmojamama, cabá uta soye más cachca soye chēngbiam chaotsemna;

ntšamo chentša entsāga inñēga chamosufrima tmojamcá,

chēngnaca cachcá uta soye más chamosufrí.

<sup>7</sup> Chënga corente jtsenábota mnyana y yapa crocénana nÿe ndayíñnaca ntsejuabnacyá jtsegástayana;

chë causa, chënga entsamna puerte jasúfriama y beca tsetshanana jtsebo mnyama.

Er chëngbe ainaniñe mëntśá jtsejuabnacyana:

“Muentše mo reyëngcá mondëbíamana.

Viudacá ngmënaca ndoñe quemuátsmëna; tondayama quemochátsuufrina ca.”

<sup>8</sup> Chíyeca, canÿe ora pochócaye soyënga chëngbiama echanjóshjango:

jóbanama socanënga, puerte ngmënana y jabuache shëntsana,

íñesheca lempe chëngbeñe echántsejuinÿe;

er Bëngbe Bëtsá corente obenana bomná endmëna,

Bëngbe Utabná chë chënga chca castigo chamotsebo mnyama tojayaná ca —cha enjëtsichamo.

<sup>9</sup> Quem luarentša mandadënga, chentša entsángaftaca puerte bacna soyënga tmojamënga, y chëngaftaca nÿe ndayíñnaca yapa crocénana, ntsejuabnacyá tmojagastanga, mochanjóshachna y puerte ngmenánaca mochántsemna, chë bëts pueblo chaojtsangbototjuanentša ngona chamojinÿe ora. <sup>10</sup> Chentšana bënoca mochanjoquéda antješna, chë uabouana castiguama auatja causa, y chentša entsangbiama mochanjayana:

¡Tša lastema, tša lastema tsëngaftanga chë uamana bëts pueblo, Babilonientše oyenëngbiama, chë tša obenana binÿentše!

Canÿe ora tsëngaftangbe castigo tojóshjango ca —mochántsechamo.

<sup>11</sup> Chë quem luarentša obuámañënga y enëgnaca mochanjóshachna y ngmenánaca mochántsemna chë pueblentša entsangbiama, er chora ya ndocná queochátsmëna chë chënga tmojúshjango soyënga chamobuámiñama: <sup>12</sup> tmojúshjango castellano soyënga, midio soyënga, uamana y botamana ndëtsbënga, perlënga, uamana lino y shbuenda uafjatsenga entsáy y sedëjua y uamana uabuángana entsáy; nÿetsca botamana uanguëtse betiyënga, marfíloca pormana soyënga, uamana niñëšëngaca pormana soyënga, bronce soyënga, hierro y marmol soyënga; <sup>13</sup> bëtscá canela y inÿe botamana uanguëtse y tamna soyënga, botamana uanguëtse bëjayënga, incienso y mirra; vínoye, aceitiye, uamana arninÿá, trigo; bayënga ndayánaca uasmëmnyënga, oveshënga, couayënga, cochëshangá y entsanga nÿets tempo nÿe inÿabiamana oservenëgnaca. <sup>14</sup> Y chë pueblentša entsangbiama mochanjayana:

¡Chë tša cmonjanogúsetana jtsebo mnyama soyënga, mora ya ndoñe quemátsbomna;

chë uamana y buashinÿinÿana soyënga y tša bomnana lempe šmojobuetše,

y ndocna te más cachca soye quemochátsbomna ca!

<sup>15</sup> Chë soyënga enënga, chë bëts pueblentša entsángbeyeca bomnënga tmojanobiamënga, bënoca mochanjoquéda antješna, chë bëts pueblentša entsangbiama tša bëts castiguama auatja causa; mochanjóshachna, puerte ngmenánaca mochántsemna. <sup>16</sup> Y mëntśá chentša entsangbiama mochanjayana:

¡Tša lastema, tša lastema tsëngaftanga chë uamana bëts pueblentše oyenëngbiama!

Chë enjaninÿna mo canÿe shembasacá, uamana lino entsëjua uichëtjoná,

uamana shbuenda uafjatsenga y uabuángana entsáy uichëtjoná,

botamananá castellanoca, perlënga y uamana botamana ndëtsbëngaca.

<sup>17</sup> ¡Y canÿe ora chabe tša bomnana lempe tojtsopochocá ca! —mochanjayana.

Nÿetsca chë barquënguentša mándayënga, chentša entsanga inÿe luaroye ajnënga y chentša trabájayënga, y nÿetscanga chë vida onguayiñe mar bëjayoca trabájayëgnaca, chentšana bënoca mochanjoquéda antješna, <sup>18</sup> y chë bëts pueblo chaojtsangbototjuanentša ngona chamojinÿe ora, jabuache mochanjayana: “¡Quem uamana bëts pueblécá ndocna inÿe pueblo cachcá quenátsmëna ca!” <sup>19</sup> Chca chamojinÿe ora, ngmënana bestšašine polvëshe mochántsenotboto, y mëntśá mochántseyona ošachiyënga y puerte cochtsetšenánënga:

¡Tša lastema, tša lastema tsëngaftanga chë uamana bëts pueblentše oyenëngbiama!

Chentša bomnánaca bomnënga tmojanobiamana nÿetscanga chë mar bëjayoca barco bomnënga.

¡Canÿe ora lempe tojtsopochocá ca! —chënga mochántseyona.

Chora chë ángel tonjánayana:

<sup>20</sup> ¡Celoca oyenënga móyejuanga

chë pueblo chca tojapasama;

y tsëngaftángnaca móyejuanga, Bëngbe Bëtsabe entsanga, Jesucristbe ichmónënga y Bëngbe Bëtsabe juabna oyebuambnayënga,

er chca jacastigase, Bëngbe Bëtsá tojama chënga chamosufrima,

ntšamo tsëngaftanga chašmosufrima chënga tmojanmca ca! —cha tonjánayana.

<sup>21</sup> Chentšana, canÿe ángel puerte obenana bomná, canÿe ndëtsbé tonjanatsbaná, mo canÿe bëts nantsnëbé ndëtsbecá, mar bëjayoye tonjanashbuetše y mëntśá tonjánayana:

Mëntśá, nÿe ndeolpe y jabuache, Babilonia chë uamana bëts pueblo mochántsetsatše,

y ndocna te más quem pueblo queochátsmëna.

<sup>22</sup> Chentše, ndocna te más quemochátuenana  
arpanjá uabuástoyana, ni cantayana, flautēfēnga y trompetēfjuangá cach ndoñe;  
ndocna te más quemochátsmēna obrerēnga,  
ni chē nantsnēbeñe trabájayana quemochátuenana.

<sup>23</sup> Chentše, ndocna te más ndocna uajuinýanēsha queochátsbinýnaye,  
ni casamento fiententša enbouenanana quemochátuenana.

Er chē bēts pueblo chca mochantsepochoá,  
masque chentša obuámnañēnga y enēnga nýets quem luarentše chē más bomnēnga mon-  
jamna,  
y chentša bocjuanánaca nýetsca luarēnguentša entšanga ingñēnēnga monjamna ca —cha  
tonjánayana.

<sup>24</sup> Bēngbe Bētsá chca chē bēts pueblentše echanjama, er chentše tmojinýena chē Bēngbe  
Bētsabiana trabájaye causa tmojanóbanēngbe buiñe; chē chabe juabna oyebuambnayēnga,  
chabe entšanga, y chē chábioye oservénama nýets quem luarentše tmojtšēbayēngbe buiñe.

## 19

<sup>1</sup> Chentšana celoca sēnjanuena mo mallajta entšanga cuafstayebuachcá, mēntšá  
monjétsichamo:

¡Bēngbe Utabná matschuanga!

Bēngbe Bētsá endmēna nda chabe entšanga tojatsebacá;  
cha puerta uámanana, buashinýinýana y mando endbomna,

<sup>2</sup> er ndayama cha tojayancá ndegombre jtsemnana,  
y ntšamo tšabá chama tojtsemncá.

Cha chē uachuana bacna vida bomna shembásabioye tojacastigá.

Chē shembásabe puerta bacna soyēnga causa,  
nýets luarentša entšángnaca bacna soyēnga tmojama.

Chábioye chca jacastigase,

Bēngbe Bētsá tojama ntšamo jamama ibomerecencá,  
chábioye oservénēnga chē shembásabeyeca tmojóbana causa ca —chēnga monjétsichamo.

<sup>3</sup> Y cachiñe mēntšá tmonjánayana:

¡Bēngbe Utabná matschuanga!

¡Chē bēts pueblo japochoócama uangbototjuanentša ngona nýetsca tescama chca  
echanjótsjuaye ca!

<sup>4</sup> Y chora, chē uta bnētsana y canta bētsējémēnga amēndayēnga y chē canta Ainēnga  
tmonjanoshamentšé, y Bēngbe Bētsá, chē uámana tthemanentše enjésetbemanabioye tmon-  
janadorá, mēntšá jayanēse: “¡Chca chaotsemna! ¡Bēngbe Utabná matschuanga ca!” <sup>5</sup> Y chē  
uámana puestentšana canye oyebuambnayana tonjanóbocna, mēntšá:

Bēngbe Bētsá matschuanga, nýetsca chabe oservénēnga  
y chē nýetscangbiama cha chē más uamaná yomnama juabnayēnga,  
básenga y bētsétsanga ca.

### *Chē Oveshatembe casamento fiesta*

<sup>6</sup> Y sēnjanuena mo mallajta entsangbe oyebuambnayancá, mo bētscá bėjaye cuafstobonj-  
nacá y mo bēts juesasanana shauenanancá; mēntšá monjétsichamo:

¡Bēngbe Utabná matschuanga!

Er Bēngbe Utabná, Bēngbe Bētsá nýets obenana bomná tojontšé jamándana.

<sup>7</sup> Puerte móyejuanga y mochjínýaniye

Bēngbe Bētsá puerta bētsá y uamaná bétsemnana,  
er mora entsemna mo chē Oveshatembe casamento te cuafjoshjangcá;  
chabe shema yochjabocná puerta tojenobotamá;

<sup>8</sup> tmojalesenciá cha chauatichētjo uámana, nduatsenga uafjantse y uabuashinýinýana lino  
entšayá.

Chē shema entsinýinýná chē Bēngbe Bētsabe entšanga;

y chē lino entšayá jtsichétjonana entsinýinýná

chēnga lempe ntšamo tšabá yomncá jtsamēse imoyena ca —chēnga monjétsichamo.

<sup>9</sup> Chentšana chē ángel sonjaniyana: “Mēntšá mábema: ‘Oyejuayēnga chē Oveshatembe  
casamento fiestama ófanēnga ca.’ ” Y mēntšanaca sonjaniyana: “Chca, ndegombre Bēngbe  
Bētsabe palabrenga endmēna ca.”

<sup>10</sup> As chabe shecuatšentše sēnjanoshamentšé cha jadórana, pero cha sonjaniyana: “Ndoñe,  
átseftaca ndoñe chca mátamana, er atše Bēngbe Bētsabe canye oservená sēndmēna, ntšamo  
aca condmēncá, y chē Crístbeyeca acbe catšátanga, ntšamo chabiana motatšēmbcá y chabe

ndegombre palabrenga nÿets tempo imabuayiyanga mondmëncá. Aca cmontsemna Bëngbe Bëtsá jadórana ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuamb-nayënga chëngbe ainaniñe osertánana y añemo chamotsebomnama, chë soyëngama entsángbiöye jábuayenama.

### *Chë fiantse couayiñe enjaquená*

<sup>11</sup> Chora sënjaninÿe celoca atëfñiñe; canÿe fiantse couaye enjëtsemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entsángaftaca; y chca chabe uayayëngaftaca monjánentsjanaye. <sup>12</sup> Chabe fšnëbenga mo iñeshcá enjáninÿna, bestšašifne ba uabuashinÿinÿana coronëshangá enjanábomna, y canÿe uabaina chábeñe enjanábemana; nÿe cha chë uabaina yojanábuatma. <sup>13</sup> Cha enjanichëtjona buñeca unëtjona entsáyá y chabe uabaina enjamna “Bëngbe Bëtsabe palabra ca”. <sup>14</sup> Y chabe ústonoye monjétsajna mallajta soldadënga celoquënga, nduatsenga uafjantse y uámana lino entsáyá uichëtjonënga, fiantse couayënguiñe enjaquenënga. <sup>15</sup> Chë enjëtsebnatsanabe uayoicana enjanóbocana canÿe puerta efsana espadëja, chë Bëngbe Bëtsábeñe ndošbuáchiyënga játatsetšama. Cha puerta obenána echántsamëndaye, mo canÿe hierro varëfjaquécá. Cha echanjama entsángaftaca mo nda uvasëšangá juantsëtetjama tojtsabotajná ora cuafjamcá; y echanjama chënga chamotse-bomnama chë puerta uabouana castigo, Bëngbe Bëtsá chë nÿets obenana bomná tbojetna causa. <sup>16</sup> Chabe uabonjaníyane y chabe mëntjoca canÿe uabaina enjanábemana: “Nÿetsca reyëngbiama chë más uámana Rey, y nÿetsca amëndayëngbiama chë más uámana Utabná ca”.

<sup>17</sup> Chentsana canÿe ángel sënjaninÿe, shinÿiñe enjëtšatsana, chë celoca tšbanánoca nÿetsca monjanongüefná shloftšënga jabuache mëntšá enjëtšëtsëtsnaye: “¡Mabënga, menefña chë Bëngbe Bëtsá tojaprontá bëtš saná jasama; <sup>18</sup> chašmosama reyëngbe mëntšëna, soldadënga amëndayëngbe mëntšëna y valente entsángbe mëntšëna, couayënga y chëngbeñe enjaquenëngbe mëntšëna, y nÿetsca entsángbe mëntšëna, cachëngbiama trabájayënga y nÿe inÿabiamá nÿets tempo trabájayënga, básesenga y bëtšëtsanga ca!”

<sup>19</sup> Chora atšë sënjaninÿe chë uabouana bayá y quem luarentša reyënga chëngbe soldadëngaftaca tmojánenefña, chë fiantse couayiñe enjaquená y chabe soldadëngaftaca jëntsjama. <sup>20</sup> Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnayá, chë bayabe delante ba bëtš soyënga tonjanmá obenana jinÿanÿiyama; y cha chë soyëngaca tojanaingñé chë uabouana jadabe uinÿnanana soye chamuayentsjajoma tmojanlesencianga, y chë chábiöye jadórana pormana soye adórayënga. Y chë útatbioyna ainata tmontsanatmetšë chë iñeshëca uafjajónayoye, chë azufre endëjuinÿinÿanentšë. <sup>21</sup> Chë inÿengbioyna tmontsanapochocá chë fiantse couayiñe enjaquenabe uayoicana enjanóbocana espadëjaca, y nÿetsca shloftšënga chëngbe mëntšëna yapa tmontanoshachá.

## 20

### *Chë uaranga uata*

<sup>1</sup> Chentsana canÿe ángel sënjaninÿe celocana entsanastajuana chë corente asen-toye tboca llavëfjaca, y canÿe bëtš cadenëjua entsanëtvena. <sup>2</sup> Chë ángel tbontsanbá chë dragónbiöye, chë tempca mëtscuaye, chë Diablo y Satanás endmëná, y canÿe uaranga uatama tbontsanbëtšëca. <sup>3</sup> Chë corente asentoye tboye tbontsantsatšë, chentšë tbontsanëtame, y chentšë bëtšáša tsengájašëca tonjaninÿnaná, ndotatšëmbcá jatëfjuama ndocná chaondobenama; y chca, chë dragón ndoñe chaondobená jabocnama entsanga jáingñama, chë uaranga uata candochnënguëntscuana; y chora, básefta tescama chë dragón mochanjëtšboshjona.

<sup>4</sup> Uámana puestënga sënjaninÿe, y chiñe tmonjanotbiamá chë entsanga tšabá o ndoñe tšabá tmonjamama jayanama obenana tmojanóyëngacñënga. Chë bestšašë jtsëstjanguëse tmojanóbanëngbe espíritëgnaca sënjananÿe. Chënga chca tmojanóbana, Jesús tojánayana soyënguiñe y chë Bëngbe Bëtsabe buayenana soyënguiñe sempre ošbuáchiye causa. Chënga ndoñe tmonjanadórá ni chë uabouana bayá, ni chë chábiöye jadórana pormana soye, y ndoñe tmonjanlesenciá chë bayabe uinÿnanana soye juentsaca o cucuatšifne chamuayentsjajoma. Y sënjaninÿe chëngna tmontanayena y Cristoftaca canÿe uaranga uatama montsanmánda. <sup>5</sup> Chë entsanga mondmëna chë natsanënga jtayenama, pero chë tempo chë inÿe obenënga ndoñe chemëntëtayanena, ndayá nÿe chë canÿe uaranga uata chentšana. <sup>6</sup> ¡Oyejuayënga y Bëngbe Bëtsabe entsanga, chë tmojtayanenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nÿetsca tescama castigo jtsebomnana, ndayá Bëngbe Bëtsá y Cristbiöye mo bachnangcá chënga mochántseservena, y Cristoftaca chë uaranga uatama mochántsemandaye.

### *Satanás japochócoma*

<sup>7</sup> Chê uaranga uata chaojochñengo ora, Satanás chabe utámenocana mochanjétsboshjona; <sup>8</sup> y cha echanjábecna nýets luarentsa entsángbioye, chë Bëngbe Bëtsabe soyëngama contra imomnëngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnënga. Satanás, chë entsanga echanjáchembo Bëngbe Bëtsabe contra jéntsama, y tša chéftanga cha echanjáchembo, nýa mo chë mar béjaye chënyoca cascajá mochántsemna.

<sup>9</sup> Chënga nýetscanga nýets luarëjana mochanjátsjua, y chë Bëngbe Bëtsabe entsanga oye-  
nentse y chabe bonshana entsangbe bëts pueblo shëconana mochanjotsaye. Pero celocana  
iñe echanjatquécjama y chë Bëngbe Bëtsabe contra imomnënga lempe echántsjuinýe. <sup>10</sup> Y  
Satanás, chë aingñayá, mochántsatmetše chë ññeshe y azúfreca uafjajónayoye, ndayentše  
chë uabouana bayá y chë Bëngbe Bëtsabe ndoñe ndegombre juabna oyeuambnayá  
tmontsanatmetše. Chentše bëts castigo nýets tempo, bnëté y ibeta mochanjasufrina.

### *Chë obanëngbiam tmonjánayana ntšamo chëngaftaca jamama yojtsemnana*

<sup>11</sup> Chentšana sënjaninýe canýe bëts uamana fñantse puesto jamándama y nda chiñe en-  
jetsetbemaná. Celoca y quem luare chabe delante lempe tonjanenatjëmbe, y ndócñentše  
más chenatanobinýná. <sup>12</sup> Y chë obanënga sënjaninýe, bëtsëtsanga y básesenga, chë uamana  
puestentša natsanoica monjétsatsana; y chë librëšangá tmonjanëtëfjo, y inýe librëšanaca,  
ndëmuanyënga nýetsca tescama tšabe vida mochjónýenëngbe uabaina uabemana librëša.  
Chë obanëngbiam tmonjánayana ntšamo chëngaftaca jamama yojtsemnana, cachënga  
vida imojábomna ora ntšamo tmofjëtsema soyëngaca, ntšamo chë librëšangañe yojanabe-  
mancá. <sup>13</sup> Chë mar béjayoye tmojanóbanënga choicana tmontanbocna, y chë obanënga tmo-  
janoquedanga luarënguentšana tmontanbocna, y cada cányabiam tmonjánayana ntšamo  
cháftaca jamama yojtsemnana, cachënga vida imojábomna ora ntšamo tmofjëtsema  
soyëngaca. <sup>14</sup> Chentšana ya ndoñe más obenana quentëtsemna entsanga chamóbanama  
chaomama, mo chë obenana chë ññesheca uafjajónayoye cuaftsëtsëncá; quem ññesheca  
uafjajónaye endmëna chë nýetsca tescama castigo jtsebmomna luare; chë choca cas-  
tigánënga jtšamnama yojtsamñëngbiam entsemna mo chënga cachiñe cuaftatobancá; <sup>15</sup> y  
ndëmuanyëngbe uabaina chë tšabe vida mochjónýenëngbe uabaina iuábemana librëšañe  
ndoñe yonjanabemana, chë ññesheca uafjajónayoye tmontsanatmetše.

## 21

### *Celoca tsmiñe y fshantse tsmiñe*

<sup>1</sup> Chentšana atše sënjaninýe canýe celoca tsmiñe y canýe fshantse tsmiñe, ndoñe  
ntšamo tempo enjamncá, er chë tempo enjamna celoca y fshantse chora ya ndoñe  
quentëtsemna, y chë mar béjaye chora cach tondaye. <sup>2</sup> Sënjaninýe chë “uamana ca”  
uabaina bëts pueblo, chë tsëm bëts pueblo Jerusalén, Bëngbe Bëtsabiocana celocana  
entsostjajuana, puerta botamaniñe, mo canýe shembása puerta botamananacá, chabe  
boyá jábocnabiam. <sup>3</sup> Y chora canýe jabuache oyeuambnayana Bëngbe Bëtsabe uamana  
puestentšana sënjanuena, mëntšá: “Mouena. Bëngbe Bëtsá entsángaftaca echántsemna  
y cha chëngbeñe echantsiyena. Chënga chabe entsanga mochántsemna, cach Bëngbe  
Bëtsá chëngaftaca echántsemna, y cha chëngbe Bëtsá echántsemna. <sup>4</sup> Cha echanjama  
chënga ndocna te más ngmënënga chamondëtsemnama, y ndoñe más chamondóbanama,  
ndoñe más chamondóšachema, ni ngmënaca ndoñe chamondëtsoyeuambnama y ndoñe  
más tsetšanana chamondëtsebmomnama; er ntšamo chënga entsangcá fshantsoca tempo  
imofjëtсийena ora enjamncá, chora ya ndoñe chca queochátsemna ca.”

<sup>5</sup> Chë uamana puestentše enjantbemaná šonjaniyana: “Atše lempe mo tsëm soyëngcá  
sëndbama ca.” Y mëntšanaca tonjánayana: “Chë soyënga mábema, er chë palabrenga endmëna  
ntšamo ndegombre yomncá, y nýetscanga mondobena chiñe corente jtsošbuáchiyana ca.”

<sup>6</sup> Chentšana šonjaniyana: “Lempe tonjochñengo. Atše sëndmëna chë nýetsca soyënga  
bojatsáyá y pochocayá, chë natsaná y chë ustonoyá. Mo nda tša uajundayana tojt-  
sebmomná canýe béjaye fshantsiñe obocanentšana cuaftofšecá, cachcá nda tša tojtseboše  
atšbe soyënga jtsebmomnama, atše chanjama cha chë soyënga chaotsebmomnama, y chë  
nýetsca tescama yomna tšabe vídnaca, chca jtsebmomnama chábioye tondaye ntsojtañcá.

<sup>7</sup> Nda nýetsca soyënguentšana tšabá chaojabocná mo ayëñjanayacá, lempe echanjýëngacñe  
ntšamo atšbe entsángbioye jatšatayama tijašebuachenacá, y atše chabe Bëtsá chántsemna  
y cha atšbe uaquíná. <sup>8</sup> Pero chë auatja causa Crístbioye ndoñe mondëservénënga, chábeñe  
ndošbuáchiyënga, chë bacna soyënga causa Bëngbe Bëtsabiam puerta uaboyëñjanënga  
imomnënga, chë ñyëngbioye obánayënga, chë shembása o boyabásaftaca bacna soye amënga,



chë bocjuana soyënga amënga, chë soyënga adórayënga diosënga yomna ca jtsejuab-nayëse, y nyetscanga bosterënga imonnëngbiamna, chënga entsamna chë ifësheca uaf-jajónayoca jasúfrana, chë azufre yojuinjinyanentse. Chentse puerte castigánënga sempre mochanjëftsemna, mo uta soyama cuafjobanca ca.”

### *Chë tsëm bëts pueblo Jerusalén*

<sup>9</sup> Chentsana canya chë angelënguentsá, chë canysëfta copbenga bomnënga jútjena chë canysëfta ústonoye pochóccaye soyëngaca, átšbioye tonjánabo y šonjaniana: “Mabo, chochanjinjinye chë tojobouamá shembása, chë Oveshatembe shema ca.” <sup>10</sup> Y atše chë Uámana Espítoftaca corente mandaná jtsemnëse, chë ángel šonjanánatse canye bëts y tsbanana tjoye, y šonjaninjinyé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsabiocana enjëtosttajuana. <sup>11</sup> Chë bëts pueblo enjëtsebuashinjinyana Bëngbe Bëtsabe buashinjinyánanaca; enjëtsebuashinjinyana mo canye uámana botamana ndëtsbecá, mo jaspe ndëtsbecá, pero mo cristalcá tëshínyniñe. <sup>12</sup> Chë bëts pueblo shëconana canye bëts y tsbanana tapiëse enjamna, chë tapiëshiñe bnëtsana uta bëshashangá y cada bëshashentse canye ángel, y chë bëshashangañe enjanábemana chë Israeloca bnëtsana uta bëts pamillangbe uabaina. <sup>13</sup> Shinýe bocanoica unga bëshashangá, shinýe uenatjëmbambanoica ungashá, tsjuanoica unga bëshashangá, y tsmanoica ungashá. <sup>14</sup> Chë tapiëse enjanëcuatjona bnëtsana uta ndëtsbenguíñe, y chëbenguíñe enjanábemana Jesucristo chë Oveshatembe bnëtsana uta ichmónëngbe uabaina.

<sup>15</sup> Chë ángel átseftaca oyeuambnayá canye castellano juinjynanëšëfja enjánatbëna jamedídama chë bëts pueblo, chentsa bëshashangá y chentša tapiëse. <sup>16</sup> Chë bëts pueblo cach medida enjánbomna nyets cantoica, cach medida tëntsoye y nyanëjoye. Chë ángel chabe juinjynanëšëfjaca chë bëts pueblo tonjanmedidá: enjánbomna uta uaranga y uta patse kilómetrënga; tëntsoye, tsbanánye y nyanëjoye cach medida enjánbomna. <sup>17</sup> Chentsana chë tapiëse tonjanmedidá, enjánbomna chñënguana bnëtsana y shachna metrënga; ntšamo entsanga chca soyënga jamedídama mondëtatšëmbcá chë ángel tonjanmedidá.

<sup>18</sup> Chë tapiëse enjanpormana jaspe ndëtsbeca, y chë bëts pueblo ena castellánoca, tša chca nýa mo cristalcá tëshínyniñe enjányina. <sup>19</sup> Chë ndëtsbenga ndayíñe chë tapiëse enjanëcuatjona enjánbotamanana nyetsca uámana botamana ndëtsbëngaca: canyëbé jaspe ndëtsbeca, chë inyëbé zafíroca, chë inyëbé ágata ndëtsbeca, chë inyëbé esmeráldaca, <sup>20</sup> chë inyëbé ónice ndëtsbeca, chë inyëbé cornalina ndëtsbeca, chë inyëbé crisólito ndëtsbeca, chë inyëbé berilo ndëtsbeca, chë inyëbé topácioca, chë inyëbé crisoprasa ndëtsbeca, chë inyëbé jacíntoca y chë inyëbena amatista ndëtsbeca. <sup>21</sup> Chë bnëtsana uta bëshashangá enjuamna bnëtsana uta perlënga; cada bësháša nýe canye pérlica uapormanësha. Y chë más bëts tsáshenëjana enjamna ena castellánoca; mo cristalcá tëshínyniñe enjányina.

<sup>22</sup> Chë bëts pueblentsë ndocna Bëngbe Bëtsabe bëts yebna chiyátaninye, er Bëngbe Utabná, chë Bëngbe Bëtsá nyets obenana bomná y chë Oveshatema chentše bonjamna, y chata nyetscangbiama chë bëts pueblentsë ndayéntšnaca adoránata bonjëtssemna. <sup>23</sup> Chë bëts pueblentsë ndoñe quenjatsiya shinýe o juashcona chaotsebinjynaye, er Bëngbe Bëtsabe buashinjinyanana chentše enjëtsebinjynaye, y chë Oveshatembe buashinjinyanana mo uajujynanëshacá enjamna chë bëts pueblama. <sup>24</sup> Chentsa binjynayánaca, entsanga nyetsca mándayëngbentše mochantsiyena, y quem luarentša mandadënga chëngbe uámana y bëts soyënga chë bëts puebloye mochanjiyëbo. <sup>25</sup> Chë bëts pueblentsa bëshashangá ndocna te quemochtëtatame, y chentše ndocna ora ibeta queochátsmëna. <sup>26</sup> Chë bëts puebloye mochanjiyëbo chë nyetsca luarënguentsa entsangbe uámana y bëts soyënga, y chë nyetsca luarënguentsa entsangbeñe bëtsëtsanga y uámanënga iuabiamná soyëngnaca. <sup>27</sup> Pero ndocna te queochatómashëngo ndayánaca, y chë soye chaotsama entsanga ndoñe tsábënga chamotsemnama Bëngbe Bëtsá jadórama; ni ndocná queochátamashëngo, Bëngbe Bëtsabiama nýa tondayama ogustana soyënga amá o inýëngbioye jáingñama soyënga amá. Choye mochanjámashjna nýe chë ndëmuanyëngbe uabaina yojtsábemana chë Oveshatembe libëršañe, chë nyetsca tescama tsabe vida mochjónyëngbe uabaina uábemanentse.

## 22

<sup>1</sup> Chë ángel šonjaninjinyé chë enjanobëjna bėjaye vida bomniye. Chë býeshe enjamna ndëtsenguíye y tëshínyniye mo cristalcá. Enjanóbocana chë Bëngbe Bëtsá y chë Oveshatembe uámana puestocana, <sup>2</sup> y chë más bëts tsashená tsëntsajana enjanobëjna. Chë fshajayentša catoica lado enjanójuaña betiyeshënga chë nyetsca tescama yomna tsabe vida jtsebomnama, canye uatiñe bnëtsana uta soye jashájonana, canye cada shinýe; chë betiyeshentša tsbuanáchënga josérviana nyetsca mándayëngbentša entsanga jáshnama. <sup>3</sup> Choca ndocna soye queochátsmëna chë ndayama Bëngbe Bëtsá tojyana ndoñe tsabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana

puesto chë bëts pueblentše echántsemna, y chatbe oservénënga mochántsadórana. <sup>4</sup> Chënga mochanjinýe Bëngbe Bëtsabe jubíá, y chabe uabaina chëngbe juentsaca mochantsambaye. <sup>5</sup> Chentše ndocna ora ibeta queochátsmëna, y chentša oyenënga ndoñe queochátëjaboto canýe uajuinýanësha o shinýe chaotsebínýnaye, er Bëngbe Bëtsá Bëngbe Utabnabe buash-inýinýanana chëngbiana echantsebínýnaye, y chënga mochántsemna mo reyëngcá uámanënga, y Bëngbe Bëtsáftaca nyëtsca tescama mochántsemmandaye.

*Jesucristo jésabama entsobeco*

<sup>6</sup> Chentšana chë ángel šonjaniana: “Quem palabrénga endmëna ntšamo ndegombre yomncá, y nyëtscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyeubuambnayënga, chëngbe ainaniñe osertánana y añemo chamotsebomnama jóyeubuambayama, chabe ángel tbojichmó chabe oservénëngbioye jinýanýiyama ndayá betscó yojtsemna jopásama ca.”

<sup>7</sup> Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábna oyeubuambana soye tojoyeuná, chë ndayama quem librësañe entsábemana ca.”

<sup>8</sup> Atše Juan, chë soyënga sënjanuena y sënjaninýe. Y chca sënjanuena y sënjaninýentsana, chë chca šonjaninýinýe ángelbe delante atše sënjanoshamentsé, cha jadórana. <sup>9</sup> Pero cha šonjaniana: “Ndoñe, átšeftaca ndoñe chca mátamana, er atše canýe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catsátanga, chë Bëngbe Bëtsabe juabna oyeubuambnayënga y nyëtscanga chë ndayá quem librësañe endayanama tmójoyeunanga mondmëncá. Aca cmontsemna Bëngbe Bëtsá jadórana ca.”

<sup>10</sup> Chora mëntšánaca šonjaniana: “Ndoñe mo iytëmcá catjáboshjona ndayá quem librësañe entsabemancá, chë ndegombre jochnénguama soyënga, er chca jopásama chë tempo ya entsobeco. <sup>11</sup> Cachcá monýá chë bacna entsá bacna soyënga chaotsama; chë puerte bacna soyënguñe jtšiyenama bošá, cachca soyënga chaotsama; pero chë tsábiana ntšamo tsábá yomncá chaotsama, y chë Bëngbe Bëtsabe entsá, nyëts tempo nyëts ainánaca chábioye chabotseSERVERNA ca” —cha šonjaniana.

<sup>12</sup> Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjiyëbo chë uacanana soye, y cada ona tsëngaftanguentsábioye chanjoyiye ndayá tojamama ntšamo tbojtsomerecencá. <sup>13</sup> Atše sëndmëna chë nyëtsca soyënga bojatšayá y pochocayá, chë natsaná y ustonoyá, chë ndábeyeca y ndabiama lempe yomna ca” — šonjaniana.

<sup>14</sup> Oyejuayënga chë bacna soyëngama perdonánënga imojtsemnënga, mo chënga chëngbe entsáyá botamana cuaftsaboshabecá. Chca chënga mochantsobena chë nyëtsca tescama yomna tsabe vida jtsebmomnama uacanánana jashjáchama, mo chë nyëtsca tescama yomna tsabe vida jtsebmomnama betiyeshentšana cuaftsesacá, y mochanjobenaye chë tsëm bëts pueblöye bësásajana tsábá jamashjnana. <sup>15</sup> Pero ndoñe quemochatobenaye jamashjnana chë ba ndoñe tsabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë inýenga obánayënga, chë soyënga adórayënga diosënga yomna ca jtsejuabnayëse, y nyëtscanga chë bostero soyënga ogusetánënga y chca jtšamëse oyenënga.

<sup>16</sup> Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempe chámabuayenama. Atše sëndmëna chë Rey Davídbentšana Entsá. Atše sëndmëna mo chë bínýanoye puerte bínýnaye estrellcá ca.”

<sup>17</sup> Chë Uámana Espíritu y chë Oveshatembe shema bondbëtsichamo: “¡Mabo ca!” Y nda chca chaojuená cháuyana: “¡Mabo ca!” Y mo nda tsá uajuendayana tojtsebmomna, tojabo y bëtscá béjaye cuafjofšecá, cachcá nda tsá tojtseboše Jesusbe soyënga jtsebmomnama, chábioye chaobeconá y cha echanjama chë soyënga cha chaotsebomnama y chë nyëtsca tescama yomna tsabe vídnaca, chca jtsebmomnama tondaye ntsojtañcá.

<sup>18</sup> Nyëtscanga ntšamo quem librësañe entsabemancá, chë ndegombre echanjopásama chamojuenëngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librësañe entsábemana pochócaye soyënga. <sup>19</sup> Y nderado nda ntšamo quem librësañe entsabemancá, chë ndegombre echanjopásama soyënguñe ndayánaca tojajuaná, Bëngbe Bëtsá chábioye bochantsebojuána ntšamo chabiama yomncá chë nyëtsca tescama yomna tsabe vida jtsebmomnama betiyeshentšana y chë tsëm bëts pueblentšana, chë ndayama quem librësañe entsábemana.

<sup>20</sup> Quem soyënga oyeubuambnayá, chë lempe ndegombre echantsemnama tonjayaná, atše, Jesús sëntsichamo: “Añe, betscó chanjésabo ca.”

Chca chaotsemna. ¡Cochjabo, Bëngbe Utabná Jesús!

<sup>21</sup> Bëngbe Utabná Jesús chaoma tsabe bendicionënga tsëngaftangbeñe chaotsemnama.